


Mofu-Gudur



The New Testament in the Mofu-Gudur language of Cameroon:

Mejəwey-mey Mawiya

Mofu-Gudur
The New Testament in the Mofu-Gudur language of
Cameroon: Mejəwey-mey Mawiya
Le Nouveau Testament en langue Mofu-Gudur
(Cameroun)

copyright © 2007 Wycliffe Bible Translators, Inc.

Language: Mofu-Gudur

Contributor: Aramaic Bible Translation, Inc.

All rights reserved.

2025-05-14

PDF generated using Haiola and XeLaTeX on 14 May 2025 from source files dated 14
May 2025

2b021919-36cf-59da-a35f-10c5e5548811

Contents

Matiye	1
Mark	103
Luk	167
Jan	272
Slëra ŋga Ndøhay Meslørey	349
Rawma hay	449
1 Kwarinti hay	499
2 Kwarinti hay	544
Galat hay	574
Efez hay	592
Følepi hay	609
Kwalaws hay	621
1 Tesalawnik hay	633
2 Tesalawnik hay	644
1 Timawte	651
2 Timawte	665
Tit	675
Filemanjw	682
Hebøre hay	685
Jak	721
1 Piyer	734
2 Piyer	748
1 Janj	757
2 Janj	769
3 Janj	771
Jud	774
Cek ma wuzar a Janj	779

Mey-maaya-mawiya masa

Matiye

ma wuzlala

Mey da ray

Mey-maaya-mawiya masa Matiye

ma wuzlala

Matiye a wuzlala Mey-maaya-mawiya na, gweegwe letek ta masa Mark leŋ Luk ma wuzlalamara. Ata tabiya a wuzlalam:

- mey da ray Jan-Baptis ma zelta ndəhay nga mbəfdamara menjey ata
- mey da ray baptem nga Yesu
- mey da ray bay-malula ma wufey nga bata Yesu daa masa anŋa fa key daliyam da wuzlah-ley
- mey da ray Yesu ma zla sləra anŋa daa hwayak ngab Galile
- mey da ray Yesu ma daw aa berney nga Jeruzelem
- mey da ray meməcey nga Yesu da Jeruzelem
- mey da ray masləkdawa nga Yesu daa meməcey

Matiye na, anŋa ndaw ma cakala budaw nga ngwamna nga Rawm. Ama Yesu a zəla nga səpa. Da ray nŋene, ta', a mbəkda sləra anŋa, a daw asiya. Ara ndaw da wuzlah gula hay nga Yesu kuraw a ray a cew.

Matiye a wuzlala dərewel anŋa na, ngada ndəhay Jəwif hay. A zla dərewel anŋa na, ta mezəley nga ndəhay daa səkway nga Yesu amba a wuzda Yesu aa daa səkway nga Abəraham. Aa guzley da ray mayawa nga Yesu. A wufey amba Jəwif hay a səmra fara fara Yesu na, ara ndaw masa Gazlavay ma wala nga ləhdata ndəhay daa mebərey, asaya, amba a səmra ara anŋa masa ndəhay maa guzlam da ray a daa Mejəwey-mey Magurma.

Matiye ta wuzleley mey la ga masa Yesu maa guzlda. Daa fasəlawal 5 haa 7 na, ara mey masa Yesu ma wuzda da anŋwa. Daa fasəlawal 13 mey-menŋey hay daha ta meesərkedey hay mekele mekele da ray mewey nga Gazlavay da ray ndəhay. Daa fasəlawal 24 ta 25 ara mey da ray menjey nga ndəhay nga Yesu daa masa ata fa səkwara anŋa ma da vəhwa nga zəma bay anŋa.

Daa mezley nga dərewel e, mey mawuzlalakaya da ray Yesu daha, a ləvey: «A da zəlmara Emanəwel, anda meləvey, Gazlavay aa ta aləkwa.» (1.23) Daa mendəvey a, Matiye a wuzleley mey da ray Yesu ma ləvey: «Səmra,

yah na, yah ta akwar mandaw mandaw haa mendəvey nga bəla.» (28.20)

Daa dərəwel e keđe na, mey mekele mekele daha nga vəley gədan a ndəhay:

Mey da ray maaya nga Gazlavay da ray ndəhay (5.3-10)

Sləra masa Yesu ma vəldatara a gula anğa hay nga key (28.19-20)

Mezley nga səkway nga Yesu Kəriste

(Luk 3.23-38)

¹ *Yesu *Kəriste na, ara səkway nga Bay *Davit. Davit e may, a yawa daa səkway nga *Abərahəm. Ndəhay daa səkway nga Yesu Kəriste he na, a zley ta Abərahəm.

² Abərahəm a na, anğa papaŋ nga *Izak.

Izak may, papaŋ nga Jakwap.

Jakwap, papaŋ nga ata Juda ta məlmaha hay.

³ Juda, papaŋ nga ata Fares ta Zerah ma yatərwa ta ngwas anğa mezəley Tamar.

Fares, papaŋ nga Esraŋw.

Esraŋw, papaŋ nga Aram.

⁴ Aram, papaŋ nga Aminadap.

Aminadap, papaŋ nga Naasaŋw.

Naasaŋw, papaŋ nga Salmaŋ.

⁵ Salmaŋ, papaŋ nga Bəwaz ma yarawa ta ngwas anğa *Rahap.

Bəwaz, papaŋ nga Awbet ma yarawa ta ngwas anğa Rut.

Awbet, papaŋ nga Jese.

⁶ Jese, papaŋ nga Bay Davit.

Davit e na, anğa papaŋ nga Salamaŋw. Mamaha ta key ngwas nga Uri la.

⁷ *Salamaŋw, papaŋ nga Rabəwam.

Rabəwam, papaŋ nga Abiyah.

Abiyah, papaŋ nga Asaf.

⁸ Asaf, papaŋ nga Jawzafat.

Jawzafat, papaŋ nga Jəwaram.

Jəwaram, papaŋ nga Awziyas.

⁹ Awziyas, papaŋ nga Jəwatam.

Jəwatam, papaŋ nga Akaz.

Akaz, papaŋ nga Ezekiyas.

¹⁰ Ezekiyas, papaŋ nga Manase.

Manase, papaŋ nga Amaŋw.

Amaŋw, papaŋ nga Jawziyas.

1:1 1.1 Rm 1.3-4; 2Tm 2.8; Mt 20.30-31 **1:2 1.2** MC 21.2-3; 25.26; 29.32-30.24

1:3 1.3 MC 38.29-30; Rut 4.18-22 **1:5 1.5** Rahap: Jes 2.1-24; **Rut ta Bəwaz:**

Rut 1-4 **1:6 1.6** 2Sam 11-12 **1:7 1.7** 1Mev 11.31-13.23 **1:8 1.8** 2Mev

13.23-21.20; 26.1 **1:9 1.9** 2Mev 26.1-28.27 **1:10 1.10** 2Mev 29.1-33.25

11 Jawziyas, papan̄ nga ata Yekwaniya ta məlmaha hay,
a yatərwa daa masa ndəhay daa hwayak nga *Babilan̄w
lan̄w

ma həlmata *Israyel hay aa hwayak ata.

12 Fa dəba ha masa ata ma həlmata la a Babilan̄w a na,
Yekwaniya a yawa Salatiyel.

Salatiyel, papan̄ nga Zarubaabel.

13 Zarubaabel, papan̄ nga Abiyut.

Abiyut, papan̄ nga Eliyakim.

Eliyakim, papan̄ nga Azawr.

14 Azawr, papan̄ nga Sadakw.

Sadakw, papan̄ nga Akim.

Akim, papan̄ nga Eliyut.

15 Eliyut, papan̄ nga Eliyazar.

Eliyazar, papan̄ nga Matan̄.

Matan̄, papan̄ nga Jakwap.

16 *Jakwap, papan̄ nga *Jawzef, zel nga *Mari

ma yarawa Yesu ma zəlmara Kəriste, anda meləvey,

ndaw masa Bay *Gazlavay ma wala nga ləhdata
ndəhay.

17 Anda kefe, dəga fa Abəraham haa kasl fa Davit na,
dedeŋ nga dedeŋ hay kuraw a ray a məfad. Dəga fa Davit
e may haa kasl ta pas masa ata ma həlmata Israyel hay a
Babilan̄w na, dedeŋ nga dedeŋ hay kuraw a ray a məfad.
Yaw, dəga ta pas a ŋgene kasl fa mayawa nga Kəriste na,
dedeŋ nga dedeŋ hay kuraw a ray a məfad saya.

Mey da ray mayawa nga Yesu Kəriste

(Luk 2.1-7)

18 Ehe cəndamara mey da ray mayawa nga Yesu *Kəriste.
*Mari mamaha na, ara kwakwa nga *Jawzef. Daa masa
Jawzef ta la Mari a way an̄ga daa ba aran̄ na, Mari ta key
hwad sem ta gədan̄ nga *Mesəfney nga Gazlavay.

19 Jawzef, man̄gasl nga Mari na, ara ndaw maaya ta
len̄gesl. Daa masa aa ma cənda Mari ta key ta hwad sem
na, a wufey a par hwaray fa dey nga ndəhay ba. Da ray
ŋgene, a wulkey nga mbəkda kwakwa an̄ga, ama a wufey
nga mbəkda na, kwa ndaw a səra mey a ba.

20 Daa masa Jawzef fa wulkey da ray mey a na, *maslan̄
nga Bay Gazlavay da vad ta', a sawa a ray a, aa guzlar
daa mesəfney, a ləvar: «Jawzef, səkway nga *Davit, ka da
zlurey nga la kwakwa akah Mari ba, maja a key ta hwad
ŋgene na, ara ta gədan̄ nga Mesəfney nga Gazlavay.

²¹ A yawa bəzey mezəle la, ka da par mezəley Yesu, maja a da ləhdata ndəhay anğa hay daa mebərey ata hay.»

²² Cek aha keđe cəpa ta key la anda Gazlavay maa guzłwa zleezle ta mey *ndaw ma təla mey anğa, ma ləvey:

²³ «Nəka taw! dam-sabara a key ta hwacł la manjar zel, a da yawa bəzey mezəle.

A da zəlmara Emanəwel»,

anda meləvey, Gazlavay aa ta aləkwa.

²⁴ Jawzef a sləkdfey daa đar, fa dəba ha a ka anda maslan nğa Bay Gazlavay ma ləvar heyey. Leñ! a la kwakwa anğa Mari a way,

²⁵ ama ta cəmam cew e daa ba, haa kasl mayawa nğa bəzey a. Jawzef a par mezəley Yesu.

2

Mey da ray ndəhay ma səra mey da ray wurzla hay

¹ Yesu a yawa da Betəlehem daa hwayak nğa *Jude, daa masa *Herawt anğa bay nğa hwayak a. Fa dəba nğa mayawa anğa, ndəhay ma səra mey da ray wurzla hay a samawa ta da wurza aa berney nğa *Jeruzelem.

² Aa cəfdamara, a ləvam: «Bəzey masa ata ma yamərwa ma da key bay nğa *Jəwif hay heyey na, anğa dama? Ya ta hətmərwa wurzla anğa la ma bawa ta da wurza. Anda keđe, ya samawa na, amba ya ragadamar.»

³ Bay Herawt ma cənda mey a keđe na, rav anğa a jəvey ga, asaya, ndəhay daa berney nğa Jeruzelem tabiya rav a jəvtar may.

⁴ Ta', a zəltərwa *bay-ray hay nğa ndəhay ma ka kwakwas nğa Gazlavay, ta ndəhay maa sərkada *kwakwas nğa Mawiz, aa cəfdata, a ləvtar: «*Kəriste, ndaw masa Gazlavay ma wala nğa key bay na, a da yawa dama?»

⁵ A mbəcdamara, a ləvmar: «A da yawa da Betəlehem daa hwayak nğa Jude. Ya sərmara maja *ndaw ma təla mey nğa Gazlavay ta wuzleley la da ray a zleezle, a ləvey:

⁶ «Akwar, ndəhay da Betəlehem daa hwayak nğa Jude na, slala akwar aa mahura da wuzlah slala hay

mahura hay da Jude,

maja ara da slala ha ngene yah ma da bawa bay

ma da nəkey dey fa ndəhay adaw hay Israyel hay.»»

⁷ Fa dəba ha, Bay Herawt a zəltərwa ndəhay ma səra mey da ray wurzla hay heyey ta mayal a, amba aa cəfdata wurzla ha a bawa na, ta pas wura.

⁸ Ta', a slərdata a Betəlehem, a ləvtar: «Diyam a Betəlehem, səpmara bəzey a ta dək-vaw. Da masa akwar ma hətmərwa la na, ka samawa, ka wuzdamiwa, amba ya daw, ya ragadar may.»

⁹ Ndəhay a ma cəndamara mey nga bay a cay na, ta', a diyam. Masa ata daa cəved na, a hətmar wurzla masa ma bawa ta da wurza heyey fa daw fa mey ata. Wurzla ha fa daw fa mey fa mey, a wusey kasl aa slam masa bəzey mecəhe anğa da hwađ a heyey na, deŋ! a lecey a ray way a.

¹⁰ Masa ata ma hətmar wurzla malacakaya heyey na, aa səmam ga, ara mey ba.

¹¹ A wusam aa slam aha, ta', a mbəzam aa way a, a hətfamar bəzey a ta mamaha *Mari. A həlmamara, a ragadamar. Cay, ta', a pəskamata gabal ata hay, a vəlmar cek hay ma həđkam ba. A vəlmar bərey mewedey pəŋged pəŋged ta matəway nga wudez mezey maaya, leŋ slalak mezey maaya mezəley «*mir».

¹² Fa dəba ha, mesəfney a katar. Daa mesəfney a na, Gazlavay a kətata nga diyam ta fa Bay Herawt saba. Maja ngene, ta', a lam cəved mekele nga vəhey aa hwayak ata.

Ata Jawzef ta Mari a hwam aa hwayak nga Ejip

¹³ Daa masa ndəhay ma səra mey da ray wurzla hay heyey ma diyam sem na, ta', *maslan nga Bay Gazlavay a wuzar vaw a *Jawzef daa mesəfney, a ləvar: «Sləkdey, la bəzey, hwam ta mamaha aa hwayak nga *Ejip. Njamawa fetede, haa kasl pas masa yah ma da ləvkwar nga vəhwa, maja Bay *Herawt a da səpa bəzey a amba a kəđa vagay.»

¹⁴ Masa Jawzef ma cənda mey a keđe la na, pərta! a sləkdey, leŋ! a la bəzey a, a səhwam ta maman nga bəzey a dasi tavađ a ngene a Ejip.

¹⁵ A njamawa fetede haa kasl meməcey nga Bay Herawt. Cek aha ta key la anda Gazlavay maa guzley ta mey *ndaw ma təla mey anğa zleezle, ma ləvey: «Ya ta zələrwa bəzey adaw daa hwayak nga Ejip la.»

A kəđmata bəza hay mezəle da slala Betəlehem

¹⁶ Bay *Herawt ma səra ndəhay ma səra mey da ray wurzla hay heyey ta fəcmara sem na, mevel a car ga! Ta', a slərey ndəhay anğa hay nga kəđmata bəza hay mezəle da Betəlehem ta bəza hay masa gweegwe ta slala ha tabiya vagay. A wudey nga kədey vagay na, bəza hay masa ma yamawa təlam haa kasl fa bəza hay mevey cew. A kəđta bəza hay mecəhe hay a anda ngene na, maja anğa ma səra

mevey nga wurzla ma bawa masa anga ma cōnda da mey ndōhay ma sēra mey da ray wurzla hay heyey.

¹⁷ Mekōdey bēza hay a vagay nģene na, ta key la anda Jeremey, ndaw ma tēla mey nga Gazlavay, maa guzley zleezle, a lōvey:

¹⁸ «A cōndamara fa wudam ta gōdanj da slala Rama, matōway ta mewudey slōw a! a ndōvey ba. Ara Rasel ma tōway bōz anga hay. Mevel anga a dōkey ba, maja bōz anga hay a ta mēcām sem.»

Mavēhwa nga ata Jawzef ta Mari da Ejip

¹⁹ Fa dōba nga memōcey nga Bay *Herawt heyey na, ta', *maslanj nga Bay Gazlavay a wuzar vaw a *Jawzef daa mesōfney daa hwayak nga *Ejip heyey,

²⁰ a lōvar: «Slōkđey, la bōzey, vōham ta mamaha aa hwayak nga *Israyel, maja ndōhay * ma sōpmara bōzey a nga kōdey vagay heyey na, ta mēcām sem dōba.»

²¹ Cay, Jawzef pōrta! a slōkđey, lej! a la bōzey, ta', a vōham ta mamanj nga bōzey a, aa hwayak nga Israyel.

²² A da cōnda na, Arkelawas fa zōma bay nga papaha Herawt daa hwayak nga *Jude. Da ray nģene, mandōrzay a kar, a zlurey nga njej daa hwayak a. Ta', mesōfney a kar a Jawzef saya. Daa mesōfney a na, Gazlavay a kōta nga daw aa hwayak nga *Galile.

²³ Anda kede, a daw a njej aa hwayak a, da slala *Nezeret. Menjey anga da slala ha nģene na, ta key la, anda ndōhay ma tēla mey nga Gazlavay, ma kadamara zleezle, ma lōvam: «A da zōlmara bōzey a na, ndaw Nezeret.»

3

Mey da ray slōra nga Jan-Baptis

(Mark 1.1-8; Luk 3.1-18; Jan 1.19-28)

¹ Fa dōba ha, ndaw daha mezōley *Jan-Baptis, a wuzwa vaw da wuzlah-ley daa hwayak nga *Jude, fa wuzey mey,

² a lōvey: «Mbōđdamara menjey akwar, sōpmara Gazlavay ta mevel pal, maja gweegwe cay, bay nga Gazlavay a wuzwa.»

³ *Jan a na, ara ndaw masa *Izay, *ndaw ma tēla mey nga Gazlavay zleezle, maa guzley da ray a, a lōvey:

«Ndaw fa wudey da wuzlah-ley, a lōvey:

Diyamar cōved nģada Bay Mahura,

dīymara cōved e maaya maaya dōr e.»

⁴ Zana fa vaw nga Jan a na, macakaya ta engwec nga slagwama. Vaw anga majəwkaya ta huted. A zəmey na, ayakw ta amam da ley.

⁵ Ndəhay daa berney nga *Jeruzelem ta daa hwayak nga Jude tabiya, leŋ daa hwayak hay mekele mekele gweegwe ta wayam nga Jurdeŋ tabiya a diyam a fa Jan a,

⁶ a wuzdamara mebərey ata hay. Jan ta', a katar *baptem daa wayam a.

⁷ Da wuzlah ndəhay ma diyam fa Jan a amba a katar baptem na, *Fariza hay ta *Saduse hay ga daha. A da hətatar na, fa samawa a fa vəda, ta', aa guzlar, a ləvtar: «Hey! akwar bəza hay nga kucesl hay! Ma ləvkwar ka ləham la daa banay masa Gazlavay ma da handərwa a ray akwar na, wa?»

⁸ Kam cek maaya, amba ndəhay a sərmara akwar ta mbədamara menjey akwar sem, akwar fa səpmara Gazlavay ta mevel pal.

⁹ Ka da wulkam daa mevel akwar, ka ləvam: "Papa ala na, ara *Abəraham, maja ŋgene, Gazlavay a da sərfandar dey-ceceh." Ka da ləvam kəne ba, maja ya fa ləvkwar fara fara, Gazlavay a gwa nga tərdata anɣwa hay kede nga səkway nga Abəraham may.

¹⁰ Zlamba mangakaya cay nga ŋgəmey wudez hay ta slaslalay a cəpa. Wudez ma yey babəza maaya ba na, a ŋgəmamara, a pamar awaw fa vəda.

¹¹ Yah na, ya kakwar baptem ta yam, nga wuzwa fara fara akwar ta mbədamara menjey akwar cay. Ama ndaw ma fənya fa sawa. Anɣa na, kwa ya wusa nga cəkwa tarak da salay anɣa ba. Ndaw a na, a kakwar baptem la ta *Mesəfney nga Gazlavay leŋ ta awaw.

¹² Anɣa da gədak ta vəley mekəfey daw da har, amba a wunka bəz-daw ta cekwesl e. Bəz-daw na, a da həla a wuded. Ama cekwesl e na, a da gədar awaw a ray a, awaw masa ma məcey ba nga sərmataw.»

Mey da ray baptem nga Yesu

(Mark 1.9-11; Luk 3.21, 22)

¹³ Fa dəba ha, Yesu a sawa daa hwayak nga *Galile, a daw aa wayam nga Jurdeŋ fa *Jan, amba Jan a kar *baptem.

¹⁴ Ama Jan a wufey nga kar baptem e ba, a ləvar: «Am! Anja ma da daw fa kah, amba ka kaya baptem na, yah jak, ba diya? Kaa, ka fa sawa fa yah jak na, kwara?»

¹⁵ Yesu a mbæddara, a ləvar: «Ama wure keđe na, təba nga kaya baptem, amba ya kakwa sləra nga Gazlavay masa aa maa cəfda tabiya nga key.» Ta', Jan a, a təba nga kar baptem e.

¹⁶ Masa Yesu ma hətey baptem cay fa bawa daa yam na, wure ngene, slam da vad bəfan! a wurey. A da nəkey dey na, *Mesəfney nga Gazlavay fa pawa salay da vad, anda makurgwadakw. Cəkwam! a njeý a ray a.

¹⁷ Asaya, day fa cənwa da gazlavay da vad, a ləvey: «Kəde he, ara Bəzey adaw, masa yah ma wudfa kalah. Ya faa səmey ga da ray a.»

4

Bay-malula a wufey nga bata Yesu (Mark 1.12, 13; Luk 4.1-13)

¹ Fa dəba ha, *Mesəfney nga Gazlavay a handa Yesu a wuzlah-ley amba *Satan, bay-malula, a jada nga bata.

² Kwa Yesu ta zəmey cek daa ba, dar kwakwar məfad, taa vad, taa pas. Fa dəba ha, may a car dəba.

³ Ta', bay-malula a daw a cakay a nga bata, aa guzlar, a ləvar: «Da kah Bəzey nga Gazlavay na, tərdata anɣwa hay keđe nga daf taw!»

⁴ Yesu a mbæddara, a ləvar: «Mawuzlalakaya daa dərewel nga Gazlavay, a ləvey: “Ndaw na, a njeý ta cek mezəmey daada ba, ama ta mey cəpa masa ma bawa da mey Gazlavay.”»

⁵ Cay, bay-malula ha ta', a handa a *Jeruzelem, berney nga Gazlavay. A təpda aa ray nga *Way-mekey-kwakwas nga Gazlavay,

⁶ a ləvar: «Da kah Bəzey nga Gazlavay na, jəvey a hwayak, maja Mey nga Gazlavay mawuzlalakaya a ləvey: “Gazlavay a da ka amba a slərwa maslan anɣa hay, a sləwmaka la a har ata

amba salay akah a gurzey fa anɣwa ba.”»

⁷ Yesu a mbæddara, a ləvar: «Mey nga Gazlavay mawuzlalakaya a ləvey saya: “Ka da jada Bay Gazlavay akah ba.”»

⁸ Fa dəba ha, bay-malula ha, a handa saya, a təpda aa ray nga anɣwa maazəma, a wuzdara hwayak hay da bəla cəpa ta zleley hay cəpa da hwad a, aa guzlar,

⁹ a ləvar: «Da kah ma ragadaya la, kah ma dərya danḡay la na, hwayak hay a ta zleley hay cəpa da hwađ a keđe na, ya vəldatakawa la.»

¹⁰ Ta', Yesu a mbəđdara, a ləvar: «Satan, hway la fede! Mbəkdaya maja Mey nḡa Gazlavay mawuzlalakaya a ləvey: "Ka da ragadar na, si nḡada Bay Gazlavay akah gway. Dərar danḡay nḡada Bay Gazlavay pal taava anḡa."»

¹¹ Daa nḡene, bay-malula ha, mbak! a mbəkda Yesu. Ta', maslan hay nḡa Bay Gazlavay da vad a samawa a cakay a, a jənmara, a vəlmar cek mezəmey.

Yesu a zlar sləra anḡa daa hwayak nḡa Galile

¹² Menjey nekədey na, ta', a kərzamara *Jan-Baptis, a mbəzdamara aa fərsəne. Masa Yesu ma cənda ata ma kərzamara Jan-Baptis sem na, a sləkdey, a vəhey aa hwayak nḡa *Galile.

¹³ Ta njey da slala *Nezeret daa ba, ama a daw a njey a Kapernayum. Kapernayum na, ara slala da mey dəhwa nḡa Galile, masa daa hwayak nḡa səkway nḡa Zabulanḡw ta nḡa Naftali.

¹⁴ Anda keđe, cek aha ta key la anda *Izay, *ndaw ma təla mey nḡa Gazlavay, maa guzley zleezle, ma ləvey:

¹⁵ «Ndəhay daa hwayak nḡa səkway nḡa Zabulanḡw ta nḡa Naftali,

hwayak hay masa gweegwe ta dəhwa nḡa Galile,

ta dey lanḡar nḡa wayam nḡa Jurdeḡ,

hwayak nḡa Galile masa ndəhay Jəwif hay ba hay

ma njam da hwađ a,

¹⁶ ndəhay a, ata daa ləvan,

ama a hətmar mewedey mahura la.

Ata masa anda ndəhay maməctakaya,

ama slam a wedey la a ray ata.»

¹⁷ Masa Yesu ma daw a Kapernayum a na, ara daa nḡene, anḡa ma zlar mewuzey mey, a ləvey: «Mbəzdamara menjey akwar da bəla, maja gweegwe cay, Gazlavay a wuzdərwa bay anḡa.»

Yesu a zəlwa gula hay məfad nḡeeme

(Mark 1.16-20; Luk 5.1-11)

¹⁸ Pas pal daha, Yesu fa pəkey da mey dəhwa nḡa *Galile. Ta', a hətey məlman hay cew daha, ara ndəhay ma kərza ewet. Ata *Simanḡw masa ma zəlmara *Piyer ta məlmaha *Andəre, fa kərzam ewet ta *tabaw daa dəhwa ha.

¹⁹ Yesu ta', a zəltərwa, a ləvtar: «Samawa asi adaw. Akwar na, ndəhay ma kərza ewet, ama dəga wure keđe

ya da tærdakwar nga ndøhay ma zølwa ndøhay aa cøved nga Gazlavay.»

²⁰ Wure ñgene, mbak! a mbækdamata tabaw ata hay, ta', a diyam asi Yesu.

²¹ Yesu a ñgøchey nekøfey fa mey na, a høtey mølman hay cew mekele saya, ara ata *Jak ta mølmaha *Jan, bøza hay nga Zebede. Ata manjatakaya daa kwambiwal ta papa ata Zebede, fa diymata tabaw ata hay. Yesu ta', a zølta ata Jak ta Jan nga diyam asiya.

²² Wure ñgene, mbak! a mbækdamara kwambiwal len papa ata, ta', a diyam asi Yesu.

Yesu a wuzey mey ta a mbøley masa-macay hay
(Mark 1.39; Luk 4.44; 6.17-19)

²³ Yesu fa pøkta slala hay cøpa daa hwayak nga *Galile, faa sækadata ndøhay daa way-mewuzey-mey hay nga Gazlavay, fa wuzey *Mey-maaya-mawiya da ray *mewey nga Bay Gazlavay da ray ndøhay, fa mbøley ndøhay daa macay hay wura wura cøpa len ndøhay maahølbatakaya hay tabiya.

²⁴ Ndøhay tabiya daa hwayak nga Siri a cødamara mey da ray a. Anda kefe, a handamar ndøhay ga daa macay hay mekele mekele, siya hay masa vaw fa catar kalah, siya hay masa malula da ray, siya hay masa ta cek da ray fa bøzlam, len masa maahølbatakaya hay. Ta', Yesu a mbøldata.

²⁵ Ndøhay ga fa diyam asiya. Ndøhay a na, a samawa daa hwayak nga Galile, daa hwayak mezøley Berney-Hay-Kuraw, daa berney nga *Jeruzelem, daa hwayak nga *Jude, len daa hwayak ta dey langar nga wayam nga Jurden.

5

Yesu a wuzey mey da aŋgwa

¹ Masa Yesu ma høtatar ndøhay ga fa diyam asiya na, ta', a tøpey a aŋgwa, cøkwam! a njeý ta njeý. Gula aŋga hay a diyam, a kusam a cakay a.

Mey da ray maaya nga Gazlavay ma da sawa a ray ndøhay
(Luk 6.20-23)

² Yesu a zlar ñgaa sækadata, a løvtar:

³ «Maaya nga Gazlavay aa da ray ndøhay ma løvam mbalay Gazlavay, ba na, ata cek hay nga tede.

Maaya nga Gazlavay aa da ray ata na,

maja ata ma tøbmara

amba Gazlavay a wey da ray ata fara fara.

- 4 Maaya nga Gazlavay aa da ray ndəhay
masa ta matəway daa dey,
maja ata na, ara Gazlavay ma da dəktar mevel.
- 5 Maaya nga Gazlavay aa da ray ndəhay meekwed-mey,
maja ata na, a da hətam slam menjey
anda Gazlavay ma ləvtar a da vəldatara.
- 6 Maaya nga Gazlavay aa da ray ndəhay ma wudam
nga key cek ma mbafar a Gazlavay ta mevel ata cəpa,
maja ata na, Gazlavay a, a pata la aa wiya.
- 7 Maaya nga Gazlavay aa da ray ndəhay
ma səram dey-ceceh fa ndəhay,
maja ata na, Gazlavay a sərfatar dey-ceceh la may.
- 8 Maaya nga Gazlavay aa da ray ndəhay
ma səpmara mey nga Gazlavay ta mevel pal,
maja ata na, a hətmar Gazlavay la ta dey ata.
- 9 Maaya nga Gazlavay aa da ray ndəhay
ma cəmtar dəy nga ndəhay,
maja ata na, Gazlavay a da zəлта bəz anğa hay.
- 10 Maaya nga Gazlavay aa da ray ndəhay
masa ndəhay ma sərdamata banay
maja ata ma kam cek ma mbafar a Gazlavay.

Maaya nga Gazlavay aa da ray ata na,
maja Bay Gazlavay fa wey da ray ata.

11 «Da ndəhay fa cədmakwar, fa sərdamakwar banay,
asaya, fa mbəzlam a ray akwar maja akwar ndəhay adaw
hay na, maaya nga Gazlavay aa da ray akwar.

12 Ta sərdamata banay ta ndəhay ma təla mey nga
Gazlavay zleezle la, ba diya? Yaw, da anda kefe na,
maaməlkam, njam ta meesəmey ga ara mey ba, maja ara
Gazlavay ma da pəlkwara mawurbay nga sləra akwar
maaya maaya da vad.»

Mey da ray manda ta slam-mewedəy
(Mark 9.50; Luk 14.34, 35)

13 Yesu a ləvtar a gula anğa hay saya: «Da bəla kefe,
akwar na, anda manda. Da mecərey nga manda ha
daa saba na, ka da sərmara ara manda na, kwara? Da
mecərey nga manda ha daa saba na, anğa maaya saba, a
kwydamara aa papalah saw, ndəhay a hərpamara.

14 «Asaya, akwar na, ndəhay ma wadə bəla. Da berney
aa daa ray nga anğwa na, a bəy fa dey nga ndəhay la daw?

15 Yaw, ndaw a gødfeý awaw aa petørla, a pa asi manğayak ba, si a pa aa slam mepeý petørla amba a wadatar dey ngada ndøhay daa way a tabiya.

16 Anda keðe, si ka wadamar fa dey nga ndøhay tabiya, amba a høtmar sløra akwar maaya, a høslmar ray a Papakw akwar Bay Gazlavay da vad.»

Mey da ray kwakwas nga Mawiz

17 «*Kwakwas nga Mawiz ta meesørkedey nga ndøhay ma tøla meý nga Gazlavay na, ka wulkam, ya sawa nga nøsa daw? Ara køne ba. Ama ya sawa na, amba ya wuzdakwara mabara nga meý da ray a.

18 Ya fa løvkwara fara fara, kwakwas nga Mawiz a, kwa kuset kødfeý, fa daa zødfeý daa ba sølak, haa kasl slam da vad ta slam da hwayak ma ndøvam. Kwakwas nga Mawiz fa daa zødfeý daa ba, haa kasl ta pas masa sløra nga kwakwas a ma ndøvey cay cøpa.

19 Anda keðe, da ndaw ta zløbey meý la, kwa kuset kødfeý daa kwakwas a, asaya, da taa sørkadata ndøhay la nga kamara anda aa ma zløba ha na, ndaw aha a da tørey ndaw mecøhe da wuzlah ndøhay masa Gazlavay ma weý da ray ata. Ama da ndaw ta nar ray la ngada kwakwas a cøpa, asaya, da taa sørkadata ndøhay la nga kamara køne na, ndaw aha a da tørey mahura da wuzlah ndøhay masa Gazlavay ma weý da ray ata.

20 Ya fa løvkwara fara fara, akwar fa da ndøkwam a wuzlah ndøhay masa Gazlavay ma weý da ray ata na, daa ba, si ka kam cek ma mbafar a Gazlavay ma føna *Fariza hay len ndøhay maa sørkada kwakwas nga Mawiz.»

Mey da ray meceý-mevel

21 Yesu aa sørkadata gula anğay hay da cakay a heyey saya, a løvtar: «Akwar ma cøndamara meý nga Gazlavay maa guzldatara ngada dede aløkwa hay zleezle la, ba diya? Mey a, a løvey: “Ka da kødfeý ndaw vagay ba. Kwa waawa ma kødfeý ndaw vagay na, a kamar sariya la.”

22 Ama yah na, ya fa løvkwara saya, kwa waawa ma cey mevel a ray mølmaha * na, Gazlavay a kar sariya la. Kwa waawa ma løvar a mølmaha: “Kah manjar lengesl” na, a handamara ndaw a la fa meý nga ndøhay mahura hay ma sla yawa nga Israyel hay. Asaya, kwa waawa ma løvar a

5:15 5.15 Mk 4.21; Lk 8.16 5:16 5.16 Ef 5.8; Føl 2.15; 1Pi 2.12 5:17 5.17 3.15; 7.12; 22.40; Rm 3.31 5:18 5.18-19 Jak 2.10 5:21 5.21 Mab 20.13; Lev

24.17 * 5:22 5.22 mølmaha: Mølmaha a wufey nga løvey ara mølman nga søkway ba, ama ara mølman daa meý nga Gazlavay.

məlmaha: “Kah marəzlkaya” na, n̄gene, mak n̄ga mbəzda aa v̄ged n̄ga awaw magaza.

²³ «Yaw, da ka fa daw aa *Way-mekey-kwakwas n̄ga Gazlavay amba ka v̄lar cek a Gazlavay, daa n̄gene, ka s̄fada, məlmakw fa cey mevel da ray akah na,

²⁴ n̄gene, mbəkda cek akah ha a cakay slam-mefəkey cek n̄gada Gazlavay a, daw fa məlmakw a, cəmamawa d̄ay ta an̄ga la d̄agay, wara ka v̄hwa, ka v̄lda cek akah n̄gada Gazlavay.

²⁵ «Da ndaw a wudka, fa handaka aa sariya na, wusey vaw, d̄ymara mey akwar ta ndaw aha daa c̄ved. Da daa ba na, a da v̄ldaka a har ndaw ma ka sariya. Ndaw ma ka sariya ha, a da v̄ldaka a har sewje hay. Sewje hay may, a da k̄zlamaka aa f̄ərsəne.

²⁶ Ya fa l̄vka fara fara, ka fa da bawa daa f̄ərsəne he daa ba s̄lak, si kah ma p̄la d̄əvaz a la tabiya ndav.»

Mey da ray meley-vaw saw

²⁷ «Akwar ma c̄ndamara mey n̄ga Gazlavay maa guzlda la, a l̄vey: “Ka da ley vaw saw da palah ba.”

²⁸ Ama yah na, ya fa l̄vkw̄ar saya, kwa waawa maa h̄mey n̄gwas n̄ga ndaw daa mevel an̄ga n̄ga ney ta an̄ga na, n̄gene anda ndaw aha ta lam vaw sem ta n̄gwas aha.

²⁹ Da dey akah n̄ga z̄əmay fa h̄ldaka n̄ga key cek hay maaya ba na, wuzlka dey a, hazakada d̄əren̄ ta kah. N̄gama mez̄əvey n̄ga vaw akah pal meez̄əfey da ray vaw akah tabiya ma da k̄zley aa v̄ged n̄ga awaw magaza.

³⁰ Asaya, da har akah n̄ga z̄əmay fa h̄ldaka n̄ga key cek maaya ba na, d̄əsla har a, hazakada d̄əren̄ ta kah. N̄gama mez̄əvey n̄ga vaw akah pal meez̄əfey da ray vaw akah tabiya ma da mb̄zey aa v̄ged n̄ga awaw magaza.»

Mey da ray mebəley n̄gwas

(Matiye 19.9; Mark 10.11, 12; Luk 16.18)

³¹ «Mey mekele daha saya, a l̄vey: “Kwa waawa ma b̄la n̄gwas an̄ga na, si a v̄lar d̄erewel n̄ga wuzda an̄ga ma b̄la sem.”

³² Ama yah na, ya fa l̄vkw̄ar saya: Ndaw a da b̄la n̄gwas an̄ga ba, si da n̄gwas aha ta ley vaw la da palah kwa. Da ndaw a b̄la, fa d̄əba ha n̄gwas aha a ley zel mekele na, a key n̄gene, a t̄ərda n̄gwas aha n̄ga n̄gwas meley-vaw saw da palah. Asaya, ndaw ma la n̄gwas masa zel e ma b̄la

ngene na, anga anda ndaw ma ley vaw saw da palah may.»

Mey da ray membedey

³³ «Asaya, akwar ma cøndamara mey nga Gazlavay maa guzldatara ngada dede alækwa hay la, a løyey: “Ka da mbađam nga tede ba. Da akwar ma mbađam sem na, si ka kamara cek aha fara fara ta mezøley nga Bay Gazlavay.”

³⁴ Ama yah na, ya fa løykwär, kwa ka da mbađam ba sølak, kwa ta slam da vad ka da mbađam ba, maja ara slam-menjey nga Gazlavay.

³⁵ Kwa ta slam da hwayak ka da mbađam ba, maja ara slam-mepey-salay nga Gazlavay. Kwa ta *Jeruzelem ka da mbađam ba, maja ara berney nga Gazlavay Mawaca-waca.

³⁶ Asaya, kwa ta ray akwar hay ka da mbađam ba, maja ka gwamara nga tøndamara kwa engwec nga ray akwar matara pal nga mabara ba.

³⁷ Da mey a ara anga na, løyam: “Ahaw, ara anga!” Da ara anga ba na, løyam: “Kay, ara anga ba!” Da ka løyam mey wal na, ngene mey a, a bawa ta fa *Satan, bay-malula.»

Mey da ray mepøley cøhwal

(Luk 6.29, 30)

³⁸ «Akwar ma cøndamara mey nga Gazlavay maa guzley la daa slam mekele, a løyey: “Da ndaw a wuzlkakawa dey na, wuzlkara nga anga may. Da ndaw a pølhgwakawa sler na, pølhgwara nga anga may.”

³⁹ Ama yah na, ya fa løykwär, akwar na, ka da pølam cøhwal ba. Da ndaw a køfka a cakay baazlam nga zømay na, mbøfdara dey nga gula saya.

⁴⁰ Da ndaw a wudka amba a tøba ðeñ-kece akah na, gərda nga tøba dawura akah saya.

⁴¹ Da ndaw a tøkaka ðay nga ley cek dadakw kølemeeter pal na, handara a key kølemeeter cew.

⁴² Da ndaw aa cøfdafaka cek na, vølar. Asaya, da ndaw a dedøfey cek na, kwa ka daa zløka ba.»

Mey da ray mewuđfey masa-gøra hay

(Luk 6.27, 28, 32-36)

5:32 5.32 19.9; Mk 10.11-12; 1Kwr 7.10-11 5:33 5.33 Lev 19.12; Mesl 30.3
 5:33 5.33-37 23.16-22; Jak 5.12 5:34 5.34-35 Iz 66.1; SNM 7.49 5:35 5.35
 Ps 48.3 5:37 5.37 2Kwr 1.17-19 5:38 5.38 Mab 21.24 5:39 5.39 Rm 12.17
 5:40 5.40 1Kwr 6.7; Heb 10.34

⁴³ «Akwar ma cəndamara mey nga Gazlavay maa guzley la daa slam mekele, a ləvey: “Wuɗa jam akah, masa-gəra akah na, ka da pey dey a ray a ba.”

⁴⁴ Ama yah na, ya fa ləvkwar: wuɗmata masa-gəra akwar hay, dərəm dangay a Gazlavay amba a pəstar mey a ndəhay ma sərdamakwar banay.

⁴⁵ Anda keɗe, a da wuzwa akwar na, bəza hay nga Papan Bay Gazlavay da vad, maja anɗa na, fa waɗarawa pas a ray ndəhay maaya ta maaya ba hay, asaya, fa parawa var nɗada ndəhay ma namar ray ta nɗada ndəhay ma namar ray ba tabiya.

⁴⁶ Da ka wuɗam ndəhay ma wuɗmakwar daada gway na, Gazlavay a da pəlkwara mawurbay nga sləra akwar na, maja me? Kwa ma cakala budaw hay na, fa kamara kəne may, ba diya?

⁴⁷ Da ka cam har nɗada səkway akwar hay gway na, ka ta kam sləra maaya ma fəna maamandaw la daw? Kwa ndəhay ma sərmara Bay Gazlavay ba na, fa kamara kəne may, ba diya?

⁴⁸ Papakw akwar Bay Gazlavay da vad, anɗa maaya kalah, a wuɗta ndəhay tabiya. Tərəm ndəhay maaya kalah anda anɗa.»

6

Mey da ray mejəney masa-viya hay

¹ Yesu aa sərkadata gula anɗa hay da cakay a heyey saya, a ləvtar: «Wam vaw fa sləra masa akwar ma kamara nɗada Gazlavay. Ka da kamara ta mezlepey fa mey nga ndəhay ba. Maja da ka kamara amba a hətmakwar na, Papakw akwar masa da vad na, fa da pəlkwara mawurbay nga sləra akwar a daa ba.

² «Yaw, da ka vələm dala a ndəhay masa-viya hay na, ka da wudam ta wudey anda ndəhay masa ta neneh cew ba. Ata na, fa kamara kəne daa *way-mewuzey-mey nga Gazlavay lenɗ daa mepəkey ata hay, amba ndəhay aa həmdamata. Ya fa ləvkwar fara fara, meehəmey a nɗene na, ara mawurbay nga sləra ata.

³ Ama kah, da ka fa vəley dala a masa-viya hay na, vələda ta mayal a, amba ndəhay a sərmara ba.

⁴ Anda keɗe, Papakw Bay Gazlavay, ma hətar cek masa kah ma vələda na, ara anɗa ma da pəlkawa mawurbay akah.»

Mey da ray medørey-danğay
(Luk 11.2-4)

⁵ «Yaw, da akwar fa dëram danğay na, ka da kamara anda ndëhay masa ta neneh cew ba. Ata na, a wuɗam melecey nga dërey danğay daa *way-mewuzey-mey nga Gazlavay leŋ da mey-cøved hay amba ndëhay tabiya a hëtmatar. Ya fa lëwkwar fara fara, taa hëmdamata cay, meehømey a ŋgene na, ara mawurbay ata.

⁶ Ama kah, da masa ka fa da dërey danğay na, daw a ver akah, gërca mey-slam, dërar danğay a Papakw Bay Gazlavay fetefe, daa slam masa ndëhay da hwaɗ a daa ba. Anda keɗe, Papakw Bay Gazlavay, ma hëtar slëra masa kah ma ka ta mebey ŋgene na, ara anğa ma da pëlkawa mawurbay nga slëra akah.

⁷ «Da akwar fa dëram danğay na, ka da ɗulam mey ga anda ma ta kuley hay ba. Ata a wulkam na, Bay Gazlavay a cëndatara mey ata meɗuley ga ŋgene la.

⁸ Ka da kam anda ata ba, maja Papakw akwar Bay Gazlavay na, ta sëra cek masa akwar ma daa cøɗafamara sem.

⁹ Da akwar fa dëram danğay na, lëvam:

“Papa ala Bay Gazlavay da vad,
anja ndëhay tabiya nga namaka ray maja kah na,
Bay Gazlavay pal.

¹⁰ Anja bay akah nga wuzwa.

Ka amba ya namaka ray da bëla keɗe
anda ata ma namaka ray da vad.

¹¹ Vëlndar cek mezømey nga wusndar tasana.

¹² Mbëkdandara mebörey ala
anda ala ma mbëkdamatara mebörey
nga ndëhay ma kamandar cek maaya ba.

¹³ Jæɗndar amba cek a batandar nga key mebörey ba.
Badandërwa dasi har nga bay-malula.”

[Ahaw, ara kah Bay Gazlavay ta gëdaŋ,
ma wey da ray cek hay tabiya.

Ara kah masa ndëhay ma hëslmaka ray nga sërmataw.
Amen.]

¹⁴ «Sërmara, da akwar fa mbëkdamatara mebörey nga ndëhay ma kamakwar mebörey na, ŋgene, Papakw akwar masa da vad a mbëkdakwara mebörey akwar la may.

15 Ama da ka mbəkdamatara mebørey nga ndøhay ba na, ñgene, Bay Gazlavay Papakw akwar a mbəkdwara mebørey akwar daa ba may.»

Mey da ray mekey daliyam

16 Yesu a løvtar saya: «Masa akwar fa kam *daliyam na, ka da ndərbam dey anda ndøhay masa ta neneh cew ma kamara ba. Ata na, a ndərbam dey amba ndøhay tabiya a sərmara ata fa kam daliyam. Ya fa ləvkwar fara fara, taa həmdamata cay, meehəmey a ñgene na, ara mawurbay nga sləra ata.

17 Ama kah, da masa ka fa key daliyam na, pəra dey akah, njəra ray akah,

18 amba ndøhay a sərmara ka fa key daliyam ba. Ama, ma səra na, si Papakw Bay Gazlavay, ma hətar sləra masa kah ma ka ta mebey ñgene, a pəlkawa mawurbay nga sləra akah la.»

Mey da ray mebøcey zleley da gazlavay da vad

(Luk 12.33, 34)

19 «Ka da səpam nga bøcey zleley da bəla kefe ba, maja kwa mətal, da daa ba, maaca a gwa nga zəma. Kwa mayal hay a gwamara nga slənmara way nga lalamara.

20 Ama səpam nga bøcey na, zleley masa da vad, maja fetefe na, mətal, da daa ba, maaca a gwa nga zəma ba. Kwa mayal hay a gwamara nga mbəzam fetefe, nga lalamara ba.

21 Ya ləvey anda kefe maja daa slam masa zleley akah aa da hwad a na, mevel akah may aa fetefe.»

Mey da ray mewedey masa fara fara

(Luk 11.34-36)

22 «Bəz nga dey na, anğa anda petərila ngada vaw tabiya. Da bəz nga dey akah anğa maaya maaya na, ñgene vaw akah cəpa aa daa slam-mewedey.

23 Ama, da bəz nga dey akah maaya ba na, ñgene, vaw akah cəpa aa daa ləvañ. Da mewedey da ray akah fara fara daa ba na, ñgene, kah daa ləvañ bək-bək.»

Mey da ray mesəpey Gazlavay, da daa ba, zleley

(Luk 16.13; 12.22-31)

24 Yesu a løvtar saya: «Ndaw pal a gwa nga key madərlam nga bay hay cew ba. Da ta key la kəne na, a da wudə bay lanğar ma fəna bay lanğar, da daa ba, a da nar ray ngada

bay lanġar, a røsa bay lanġar. Ka gwamara nġa sèpmara Gazlavay leŋ zleley cewete daa slam a ba.

²⁵ «Maja nġene, ya fa løvkwar fara fara, daa menjey akwar na, ray akwar a da høbey da ray cek mezømey ta cek mesey ba. Asaya, ray akwar a da høbey da ray zana nġa køzley fa vaw akwar ba. Yaw, cek mezømey na, a fønà heter akwar daw? Asaya, zana na, a fønà vaw akwar daw?

²⁶ «Wulkam da ray diyaŋ hay taw: fa sløkam daa ba, fa nġømam daw daa ba, fa bøcam kwa meeme a wuded daa ba, ama Papakw akwar Bay Gazlavay da vad fa vøltar cek mezømey cøŋga. Kaa akwar na, ka fønmata diyaŋ hay, ba daw?

²⁷ Ndaw da wuzlah akwar ma gwa nġa pey kwa ðar pal a ray ðar aŋga da bøla ta mewulkey aŋga na, wa?

²⁸ «Kaa, ka wulkam ga da ray zana na, maja me? Nøkmara meefekwey hay da ley cey! Aa fakwam na, kwara? A kam sløra ba, a cam zana ba,

²⁹ ama ya fa løvkwar, kwa Bay *Salamaŋw zleezle ta zleley ga ta gwa nġa køzley zana ma mbey anda meefekwey pal na, daa ba.

³⁰ Gazlavay a ka amba kusaf aa fekwey tasana, ama mandaw na, kusaf a, a wewurey. Da Gazlavay fa key cek maaya nġada kusaf masa awaw ma da wawura anda kefe na, Gazlavay a nøkfakwar dey ma fønà kusaf a nġene daa ba daw? Akwar masa ma pamara Gazlavay nġa ndaw akwar fara fara ba nġene, sèpmara Gazlavay a køzlakwar zana la ma fønà meefekwey hay a.

³¹ «Da ray nġene, ka da wulkam ga ba. Da ka løvam: “Ya da zømam me? Ya da sam me? Ya da køzlam fa vaw me?” na, ka da wulkam køne ba,

³² maja ma sèpam cek hay a nġene na, ara ndøhay ma sèpmara Gazlavay ba. Asaya, cek hay masa akwar ma wudam cøpa ha na, Papakw akwar da vad ta søra sem.

³³ Sèpam teesed na, Gazlavay nġa wey da ray akwar, asaya, kam cek anda aŋga ma wufey. Fa døba ha, Bay Gazlavay a vøldakwara cek hay siya la cøpa.

³⁴ Ya fa løvkwar døba, ka da wulkam ga fa cek ma da key mandaw ba, maja mewulkey nġa mandaw na, aŋga wal. Mewulkey fa ðar pal na, a wusa nġada ðar a.»

7

Mey da ray membøkey mebørey nga ndøhay
(Luk 6.37, 38, 41, 42)

¹ Yesu aa guzltar saya, a løvtar: «Ka da wulkam daa mevel akwar, ka løvam, “Anja manan̄ ngaa zøðey maja mebørey an̄ga” na, køne ba, maja Bay Gazlavay a daa zøðdakwar maja mebørey akwar køne may.

² Ya fa løvkwar, Bay Gazlavay a daa zøðdakwar daa sariya anda akwar ma wudam manan̄ na, ngaa zøðey ngene may. Asaya, a da dəsla mey da ray akwar anda akwar ma dəslmara mey da ray ndøhay mekele may.

³ «Ka nøkey dey fa guzer daa dey nga məlmakw, ama hwadam mahura masa daa dey akah na, ka wulkey da ray a ba na, maja me?

⁴ Ka gwa nga løvar ngada məlmakw, “Dagay, ya lakawa guzer daa dey akah la”, anja hwadam mahura daa dey akah daha gway na, kwara?

⁵ Kah, ndaw masa ta neneh cew! La hwadam daa dey akah la dāgay, amba ka høtar dey njøð-njed̄ nga ley guzer daa dey nga məlmakw.»

Mey-mengey da ray ndøhay ma rəsmara Gazlavay

⁶ «Cek hay maaya masa ngada Gazlavay na, ka da vøldamatara ngada gødey hay ba, maja a da tatərmawa a ray akwar. Asaya, ka da kəzlamata bersle akwar hay maaya asi salay nga vetem hay ba, maja a da mbərzlamata ta salay.»

Mecəfðey cek fa Bay Gazlavay
(Luk 11.9-13)

⁷ «Cacəfdam cek fa Bay Gazlavay, a vøldakwara la. Səpam cek fa Gazlavay, ka høtam la. Zølam fa mey-mbew, a wurkwara la,

⁸ maja kwa waawa maa cəfdafar cek na, a vølar la. Kwa waawa ma səpey cek fa vøða na, a høtey la. Kwa waawa ma zøley fa mey-mbew na, a wurara la.

⁹ Da bəzey akah aa cəfdafaka makala na, ka vølar an̄gwa la daw?

¹⁰ Asaya, da aa cəfdafaka ewet na, ka vølar zezekw la daw?

¹¹ Akwar ndøhay malamba hay ma!, ka sərmara nga vøley cek maaya ngada bəz akwar hay. Da køne na, kaa wara Papakw akwar Bay Gazlavay da vad̄ a vøltar

cek maaya ngada ndohay masa maa cəfdəfamara ba na, kwara?

¹² «Anda keđe, kamatar cek maaya a ndohay anda akwar ma wudam a kamakwara kəne may. Keđe he ara mey masa *kwakwas nga Mawiz lej ndohay ma təla mey nga Gazlavay maa sərkadamara.»

Mey-mengey ta mey-mbew hay cew

(Luk 13.24)

¹³ «Səpam nga mbəzey na, ta daa mey-mbew meengəlez e, maja mey-mbew maaban a na, ara cəved meezədey ndaw. Ma daw taa cəved e na, anğa ta banay daa ba. Ndohay ga fa diyam ta da hwad a.

¹⁴ Ama mey-mbew nga cəved ma hendey ndaw aa heter mawiya na, ara mey-mbew meengəlez e. Ma daw ta hwad a na, anğa ta banay. Ndohay ma hətam nga daw ta da hwad a na, ga daa ba.»

Nga sərey ndohay maaya ta maaya ba hay na, kwara?

(Luk 6.43, 44)

¹⁵ «Wam vaw fa ndohay ma pamata ray ata nga ndohay ma təla mey nga Gazlavay. A da samawa fa akwar na, ta meney ray zəkwaβ zəkwaβ anda təban hay, ama a da kam həma na, anda gədey-ley hay.

¹⁶ Ka da sərmata na, ta fa sləra ata hay maaya ba. Nəka, ndaw a gwa nga ngəley manğwara fa hatak-daw la daw? Da daa ba, ndaw a gwa nga ngəley gudav fa manjaraf la daw?

¹⁷ Wudez madəfadakaya gudaf! gudaf! na, a yey babəza maaya maaya may. Wudez masa fa bətey ta bətey na, a yey babəza maaya ba may.

¹⁸ Anda keđe, wudez makudffafar a na, a yey babəza maaya ba na, daa ba. Yaw, wudez masa fa bətey ta bətey may, a yey babəza maaya na, daa ba.

¹⁹ Wudez ma yey babəza maaya ba na, a dəslmara, a pamar awaw fa vəda.

²⁰ Ara anda keđe, ka da sərmata ndohay ma pamata ray ata nga ndohay ma təla mey nga Gazlavay na, ta fa sləra ata hay maaya ba may.»

Mey da ray sariya nga Gazlavay

(Luk 13.25-27)

²¹ «Sərmara ndohay ma zəlmaya “Bay Mahura, Bay Mahura” na, fa da mbəzam cəpa a wuzlah ndohay masa

Gazlavay ma wey da ray ata na, daa ba. Ama ma da mbəzam na, si ndəhay ma kam cek ma mbafar a Papay Bay Gazlavay da vad gway.

²² Ta pas masa yah ma da katar sariya a ndəhay tabiya na, ndəhay ga a ləvmaya la: “Bay Mahura, Bay Mahura, mey nga Gazlavay masa ala ma wuzdamara na, ara ta mezəley akah. Malula hay masa ala ma bəlmata da ray ndəhay ga na, ara ta mezəley akah. Asaya, maazla hay ga masa ala ma kamata na, ara ta mezəley akah, ba diya?”

²³ Anda keɖe, ya daa guzltar ta' a mey, ya ləvtar: “Kwa ya sərkwar ba səlak! Diyam doreŋ ta yah, akwar ndəhay ma kam cek hay malamba.”»

Mey-menɖey ta way hay cew

(Luk 6.47-49)

²⁴ «Yaw, kwa waawa ma cənda mey adaw keɖe, ma ka cek anda mey a la na, anɖa anda ndaw masa ta lenɖesl, ma ləma way anɖa da ray pərad.

²⁵ Ta piya, bərgadan a kawa a ray way a, var a pey, wayam a ley. Ama way a, a bəzley ba, maja salay nga way a mapakaya da ray pərad.

²⁶ Ama kwa waawa ma cənda mey adaw keɖe, ma ka cek anda mey a daa ba na, anɖa anda ndaw manjar lenɖesl, ma ləma way anɖa da ray mawurbay.

²⁷ Ta piya, bərgadan a kawa a ray way a, var a pey, wayam a ley. Way a kərep! a bəzley, kwa dey lanɖar ma mbəkey daa ba.»

Yesu aa sərkadata ndəhay na, ta me?

²⁸ Fa dəba ha Yesu ma ndəvda nɖaa sərkadata ndəhay cay da ray mey hay a nɖene na, ndəhay a, a rəzlam da ray meesərkedey anɖa ha,

²⁹ maja aa sərkadata ndəhay anda ndəhay ata hay maa sərkada *kwakwas nga Mawiz ba, ama aa sərkadata na, ta gədan masa Gazlavay ma vəldara.

8

Yesu a pərey ndaw daa maasəkula

¹ Fa dəba ha, Yesu a bərnɖawa da anɖwa heyey, ndəhay ga fa səpmar wurzay.

² Ndaw-maasəkula daha a nɖəchey a cakay a, a regedey fa mey anɖa, a ləvar: «Bay adaw, da ka wudəy na, ka gwa nga pərya daa maasəkula adaw keɖe.»

³ Yesu tal! a telda har anġa, a gəsfar, a ləvar: «Ya wufey amba maasəkula akah a pərey. Tərey ndaw mapərkaya dəba!» Wure wure ŋgene, ndaw-maasəkula heyey sad! a səfey.

⁴ Ta', Yesu a ləvar: «Pey lenġesl, ka da wuzda cek masa yah ma kakawa keđe kwa a ndaw ba. Ama daw fa *ndaw ma ka kwakwas ŋga Gazlavay, amba a nəkaka. Fa dəba ha, vəlar cek a Gazlavay anda *kwakwas ŋga Mawiz ma ləvey, ŋga wuzey a ndəhay, maasəkula fa vaw akah daa saba.»

Yesu a mbəlda madərlam ŋga mahura ŋga sewje hay

⁵ Yesu fa daw a Kapernayum. Masa anġa fa daw na, ndaw Rawma daha, anġa mahura ŋga sewje hay temere, a ŋgəchey a cakay a. A kar ambahw amba Yesu a jəna,

⁶ a ləvar: «Bay adaw, madərlam adaw, anġa manakaya da way daa macay. Maahəlbakaya, fa sərey banay kalah.»

⁷ Yesu a mbəddara, a ləvar: «Ya fa daw, ya mbəlda la.»

⁸ Ama mahura ŋga sewje hay heyey a ləvar: «Bay adaw, kwa ya ta wusa amba ka mbəzey a way adaw na, daa ba. Gweguzley mey pal gway na, madərlam adaw a, a mbəley la.

⁹ Ya ləvka anda keđe maja yah na, sewje hay mahura da ray adaw daha, asaya, yah mahura da ray sewje hay mekele may. Da ya ləvar ŋgada sewje lanġar “daw”, a daw. Da ya ləvar ŋgada ndaw lanġar “sawa”, a sawa. Da ya ləvar ŋgada beke adaw “ka sləra keđe”, a ka.»

¹⁰ Masa Yesu ma cənda mey a keđe la na, a mbafar ara mey ba, ta', aa guzltar ŋgada ndəhay ma diyam asiya, a ləvey: «Ya fa ləvkwar fara fara, kwa ya ta hətey ndaw ma paya ŋga ndaw anġa fara fara anda ndaw keđe daa ba səlak, kwa da wuzlah səkway adaw hay *Israyel hay, ya ta hətey daa ba.

¹¹ Ya fa ləvkwar: Ta pas masa Gazlavay ma da wuzdərwa bay anġa na, ndəhay ga a samawa la daa slam hay tabiya da bəla, ŋga key gwagway da vad ta ata *Abəraham, *Izak lenj *Jakwap.

¹² Ama ndəhay masa ma yamawa da wuzlah səkway ŋga ndəhay ŋga Gazlavay na, a da kəzlamata aa ambaw aa ləvanj. Fetede na, a da təwam, a daa pədam sler.»

¹³ Ta', Yesu aa guzlar a mahura ŋga sewje hay heyey, a ləvar: «Daw a way dəba. Anja cek masa kah ma wufey keđe na, ŋga key, anda kah ma təba mey adaw keđe.» Wure wure ŋgene madərlam anġa heyey mbal! a mbəley.

Yesu a mbøley masa-macay hay ga

14 Cay, ta', Yesu a daw a way *Piyer. A hətfar mamaŋ nga ngwas nga Piyer e, vaw fa car, manakaya, awaw fa vaw ga.

15 Yesu ta', a gəsfar fa har. Da ray ŋgene, awaw fa vaw heyey daa saba. Ngwas aha pərta! a lecey, ta', a vəlar cek mezəmey a Yesu a.

16 Taa kwad a ŋgene, a handamawa ndəhay ga ta malula hay da ray. Yesu aa guzltar mey pal, ta', malula hay da ray ndəhay a, a bam. Asaya, a mbəldata ndəhay masa-macay hay tabiya.

17 Cek aha ta key la anda *Izay, *ndaw ma təla mey nga Gazlavay maa guzley zleezle, ma ləvey: «Ara aŋga ta ray aŋga ma jəndakwar daa bəle aləkwa, asaya, ara aŋga ma mbəldandakwar daa macay aləkwa hay tabiya.»

Mey da ray ndəhay ma wudam nga diyam asi Yesu

18 Masa Yesu ma nəkta ndəhay ga fa zlərmar ray na, ta', a ləvtar a gula aŋga hay amba a zləŋgam a dey laŋgar nga dəhwa nga *Galile.

19 Daa ŋgene, *ndaw maa sərkada kwakwas nga Mawiz daha a ŋgəchey a cakay a, aa guzlar, a ləvar: «Bay adaw, kwa aa slam wura wura masa kah ma da daw na, ya daw la asi akah.»

20 Yesu a mbəddara, a ləvar: «Mbiga hay, ata ta vəged ata hay, diyaŋ hay, ata ta way ata hay. Ama yah, *Bəz nga Ndaw na, kwa slam nga ney nekədey amba ya məskey vaw da hwad a na, daa ba.»

21 Ndaw mekele da wuzlah ndəhay nga Yesu heyey, a sawa, a ləvar: «Bay adaw, vəlya cəved amba ya daw ya jəhərwa papay la dəgay.»

22 Yesu a mbəddara, a ləvar: «Sawa asi adaw, mbəkdata ndəhay maməctakaya nga jəhmata ndəhay ata hay maməctakaya.»

*Yesu a lacada bərgadaŋ da wuzlah dəhwa
(Mark 4.35-41; Luk 8.22-25)*

23 Cay, Yesu kula! a mbəzey aa kwambiwal, gula aŋga hay ta', a diyam bama.

24 Daa masa kwambiwal a fa daw na, wure ŋgene memed mahura aa bərey a ray yam, mendərey nekədey vaŋgwala nga yam a sərta kwambiwal a. Daa ŋgene, Yesu na, manakaya daa dər.

25 Ta', gula anğa hay, a ngəcham a cakay a, a sləkdamara, a ləvmar: «Bay Mahura, sləkdey, ləhdandakwar! Aləkwa fa da məckwa.»

26 Yesu a mbəddatara, a ləvtar: «Ka zloram na, maja me? Akwar fa padamara Gazlavay nğa ndaw akwar fara fara daa ba daw?» Pərta! a sləkdey, ta', aa bəctar nğada memed ta yam heyey. Memed deŋ! a lecey, yam a wusey saba.

27 Da ray ngene, ndəhay a rəzlam, a ləvam da wuzlah ata: «Ndaw a kefe na, ara na, wa? Masa kwa memed ta yam a cənmə mey kefe na!»

Yesu a bəley malula da ray ndəhay cew
(Mark 5.1-20; Luk 8.26-39)

28 Daa masa Yesu ma wusey la a dey lanğar nğa dəhwa nğa *Galile heyey, masa daa hwayak nğa ndəhay Gederen hay na, ndəhay cew daha ta malula da ray fa bamawa daa cəvay hay mavavərkwatakaya daa anğwa, a cam ray ta Yesu. Ndəhay a, fa zlazləbam ndəhay ara mey ba, kwa ndaw ma gwa nğa daw taa cəved e ngene daa ba.

29 Ndəhay a, a wudam ta gədan, a ləvmar a Yesu: «Kah, Bəzey nğa Gazlavay, ka wudey fa ala na, me? Ka sawa nğa sərdandar banay dəga pas nğa sariya aran daw?»

30 Da fetede na, nğaba nğa vetem hay ga daha da mecəkwer gweegwe ta ata.

31 Malula hay da ray ndəhay kaa heyey a bərkwamara Yesu, aa cəfdamara, a ləvmar: «Da ka da bəlndar na, vəlndar cəved amba ya diyam ya mbəzam aa vetem hay katay.»

32 Ta', Yesu a ləvtar: «Diyam, mbəzam.» Da ray ngene, a bam da ray ndəhay kefe heyey, a diyam a mbəzam a ray vetem hay a. Ta', vetem hay a cəpa, a hwam ta gədan nğadaa heelen, a tataram, a kwiyam saf! aa yam, aa zədam kudap! fetede.

33 Mecəkwer hay nğa vetem hay kaa heyey takw! a həlmara mahway a slala, a kadamatara mey a leŋ mey da ray ndəhay ta malula da ray heyey cəpa nğada ndəhay da slala ha.

34 Da ray ngene, ndəhay tabiya da slala ha a bamawa, a cadamara ray ta Yesu. Ta', a bərkwamara nğa daw la daa hwayak ata ha.

9

Yesu a mbəley ndaw maahəlbakaya
(Mark 2.1-12; Luk 5.17-26)

¹ Fa dɔba ha, Yesu a tɔpey aa kwambiwal, a vɔhey a dey langar nga dɔhwa, a daw a slala anɔa.

² Ta', a handamar ndaw maahɛlbakaya daha, manakaya da ray bebele. Masa Yesu ma nɔka ndɔhay a, fa tɔbmara anɔa ta gɔdan nga mbɔlda ndaw ata na, ta', a lɔvar a ndaw maahɛlbakaya heyey: «Dɔka mevel, bɔz adaw! Mebɔrey da ray akah daa saba.»

³ Fetede na, ndɔhay maa sɔrkada kwakwas nga *Mawiz daha, a wulkam daa ray ata, a lɔvam: «Ndaw a kedɛ, a pa ray anɔa nga Gazlavay na, kwara?»

⁴ Yesu a sɔra mewulkey ata. Da ray nɔgene, aa cɔfdata, a lɔvtar: «Ka wulkam maaya ba anda kedɛ na, maja me?»

⁵ Ya gwa ya lɔvey: "Mebɔrey akah daa saba" da daa ba, ya gwa ya lɔvey: "Slɔkɔfey, daw ta salay akah." Dasi mey hay cewete kedɛ na, masa ta banay nga lɔvey nɔgada yah na, wura?

⁶ Yaw, ya wudɛy ka sɔrmara, yah *Bɔz nga Ndaw, yah ta gɔdan nga mbɔkey mebɔrey nga ndɔhay da bɔla kedɛ. Wure kedɛ, ka hɔtmar cek ma da key la.» Anda kedɛ, Yesu, ta', a lɔvar a ndaw maahɛlbakaya heyey: «Slɔkɔfey, la bebele akah, daw a way!»

⁷ Ndaw aha pɔrta! a slɔkɔfey, ta', a daw a way.

⁸ Daa masa ndɔhay makustakaya ma hɔtmar cek aha mekey na, a zluram, a rɔzlam. A hɛlmamara Gazlavay maja anɔa ma vɔlar gɔdan mahura anda kedɛ a ndaw-magɔdan.

Yesu a zɔla Matiye

(Mark 2.13-17; Luk 5.27-32)

⁹ Yesu a slɔkɔfey daa slam aha, a daw. Masa anɔa fa daw na, a hɔtar ndaw daha mezɔley *Matiye. Anɔa manjakaya fa key slɔra daa slam mecekeley budaw. Ta', Yesu aa guzlar, a lɔvar: «Sawa, sɔpya.» Da ray nɔgene, Matiye pɔrta! a slɔkɔfey, ta', a daw asiya.

¹⁰ Fa dɔba ha nekɔfey, Yesu a daw nga zɔmey daf da way Matiye he. Daa way a, ata Yesu ta gula anɔa hay a zɔmamara daf a na, ta ndɔhay ma cakala budaw ga lenj ta ndɔhay ma zlɔba *kwakwas nga Mawiz.

¹¹ Masa *Fariza hay ma hɔtmatar fa zɔmam daf bama ta ndɔhay a na, ta', a lɔvmatar a *gula hay nga Yesu: «Bay akwar a zɔmam daf ta ndɔhay ma cakala budaw lenj ta ndɔhay ta mebɔrey hay na, kwara?»

¹² Yesu ma cɔnda mey a na, ta', aa guzltar, a lɔvtar: «Ndɔhay masa wurwer na, mey ata ta ndaw ma vɔlda slalak

daa ba. Ama ma wufey mey nga ndaw ma volda slalak na, si ndohay masa-macay hay gway.

¹³ Ehe, sarmara mey nga Gazlavay mawuzlalakaya daa derewel anga, a lovey: "Ya wufey na, ndohay a saram dey-ceceh fa ndohay, ba na, a hormaya gonaw hay ba." Yaw, ndohay ma wulkam ata ndohay maaya fa mey nga Gazlavay na, Gazlavay ta slerdiwa nga zelta daa ba, ama a slerdiwa na, nga zoley ndohay ta meborey.»

Mey da ray mekey daliyam

(Mark 2.18-22; Luk 5.33-39)

¹⁴ Fa dɔba ha, gula hay nga *Jan-Baptis a ngɔcham a cakay Yesu, aa cɔfdamara, a lɔvmar: «Ala ta ndohay *Fariza hay na, ala fa kam *daliyam *, ama gula akah hay na, a kam daliyam ba sɔlak na, maja me?»

¹⁵ Yesu a mbɔddatara ta mey-menjey, a lovey: «Da ndaw a zelwa ndohay aa mekey mɔlak nga kwakwa nga zomey cek na, ndohay a, aa sɔmam da cakay zel-kwakwa ha daa ba daw? Ta pas njene a kam daliyam ba. Ama pas a, a sawa la masa ata ma da kɔrzamara zel-kwakwa † ha na, a kam daliyam la dɔba.

¹⁶ «Yaw, ndaw a gwa nga dɔpa zana magurma ta zana mawiya daw? A key ba, maja zana mawiya madɔpkaya na, a nɔsa zana magurma ha la, zana magurma ha a da njɔrey a dey a.

¹⁷ «Asaya, ndaw a gwa a zlɔrey wuzam meededek e aa kwene-kwene ‡ magurma ba. Da a zlɔra a hwad a na, wuzam a, a mɔsley, a njɔra kwene-kwene he la. Anda kedɛ, wuzam a leŋ kwene-kwene he a nɔsam la cewete. Da nga key maaya na, si ndaw a zlɔra wuzam meededek e na, aa kwene-kwene mawiya. Anda kedɛ, wuzam a, aa daha, kwene-kwene may aa daha, cewete a nɔsam ba.»

Yesu a mbɔley njwas ta a slɔkɔadɔrwa dam daa memɔcey

(Mark 5.21-43; Luk 8.40-56)

¹⁸ Daa masa Yesu faa guzɔtar anda njene na, ndaw mahura daa *way-mewuzzey-mey nga Gazlavay a sawa fa anga, ta', a regedey fa mey anga, a lɔvar: «Dam adaw ta mɔcey sem wure wure kedɛ. Ama ya fa kaka ambahw,

9:13 9.13 Aw 6.6; Mt 12.7; Lk 19.10 * **9:14 9.14** daliyam: Da ndaw Jɔwif fa key daliyam na, a zomey cek ba amba a nar ray a Gazlavay, a mbɔdda menjey anga. **9:14 9.14** 6.16-17; 11.18-19; Lk 7.33-34 † **9:15 9.15** zel-kwakwa: Yesu a njey mey da ray ndohay ma da kɔrzamara nga kɔɔfey vagay. **9:15 9.15** 22.2; 25.10; Jan 2.1-12; 3.29; CWJ 19.7 ‡ **9:17 9.17** kwene-kwene: Ara cek anda des (gwajakwad) ama makakaya ta ambal.

sawa, pa har akah a ray a amba a hëtar mesəfney anğa aa slam a cəngə.»

¹⁹ Da ray nğene, Yesu a lecey, a diyam asiya ta gula anğa hay.

²⁰ Nğwas daha, mambaz fa mbədfwa da hwađ dəga mevey kuraw a ray a cew. Daa masa Yesu fa daw na, nğwas aha a nğəchey a cakay a ta fa dəba, ta', a gəsfar har fa mey nğa zana nğa Yesu a.

²¹ A ka anda keđe maja anğa fa wulkey daa mevel anğa, a ləvey: «Da ya gwa nğa gəsfar har kwa fa zana anğa na, ya mbəley la.»

²² Yesu pəla! a mbədey dey fa dəba, a nəka nğwas aha, ta', a ləvar: «Dəka mevel, dam adaw! Ka ta mbəley cay maja kah ma paya nğa ndaw akah fara fara.» Wure wure nğene, nğwas aha ta mbəley cay.

²³ Fa dəba ha, Yesu a wuswa a way ndaw mahura heyey. A hətfatar ndəhay ma fa sləlam, asaya ndəhay makustakaya fa mbədam haya! haya!

²⁴ Ta', a ləvtar a ndəhay a: «Hwam la fedə! Dam aha ta məcey daa ba, ama a key a ney aa dar.» Ndəhay a, aa sanğəram da ray a.

²⁵ Daa masa ndəhay a ma bamawa sem aa ambaw na, Yesu a mbəzey a way a, ta', a kərza dam aha fa har. Dam a pərta! a sləkdey.

²⁶ Mey da ray dam aha, a cəney aa wura aa wura tabiya daa hwayak a.

Yesu a wurey dey nğa ndəhay wulaf hay cew

²⁷ Masa Yesu ma sləkdey da way ndaw mahura heyey la na, wulaf hay cew daha, a səpmar wurzay ta mewudey, a ləvam: «Sərfandar dey-ceceh, may taw, Bəzey nğa *Davit!»

²⁸ Yesu a wusey a way na, wulaf hay cew heyey, a mbəzam asiya. Ta', Yesu aa cəfdəta, a ləvtar: «Ka wulkam na, ya gwa nğa wurkwara dey akwar daw?» A mbəddamara, a ləvmar: «Ahaw, Bay Mahura.»

²⁹ Da ray nğene, anğa gas! gas! a gəsfatar har fa dey nğa wulaf hay a, ta', a ləvtar: «Dey akwar nğa wuram anda akwar ma təbmara ya gwa nğa wurkwara.»

³⁰ Dey ata wur! wur! a wuram. Yesu a kətata, a ləvtar: «Jəkam sləmay maaya maaya, ndaw a da cənda cek masa ma key ta akwar keđe ba.»

³¹ Ama ndəhay cew kaa heyey, a mbəkdamara slam aha nekədey na, ta', a kadamara mey da ray Yesu a ndəhay daa hwayak a tabiya.

Yesu a bəla malula da ray ndaw ma gwa ngaa guzley ba

³² Masa ndəhay Yesu ma wurtara dey heyey fa bamawa da way a la na, ta', a handamar ndaw daha ma gwa ngaa guzley ba, maja anğa ta malula da ray.

³³ Ta', Yesu a bəla malula da ray ndaw a, ndaw aha aa guzley dəba. Da ray ngene, ndəhay tabiya fetede a rəzlam, a ləvam: «Dəga nga menjey aləkwa, ya ta hətkwa cek ma key anda kedə daa hwayak nga *Israyel kedə daa ba.»

³⁴ Ama ndəhay *Fariza hay na, aa guzlam, a ləvam: «Ara bay nga mesəfney maaya ba hay ma vəlar gədanj nga bəley malula da ray ndəhay.»

Mey da ray Yesu, ma key dey-ceceh fa ndəhay

³⁵ Yesu fa pəkta berney hay ta slala hay masa gweegwe ta dəhwa nga *Galile. Fetede faa sərkadata ndəhay daa way ata hay mewuzey mey nga Gazlavay, fa wuzey *Mey-maaya-mawiya da ray *mewey nga Bay Gazlavay da ray ndəhay, asaya, fa mbəley ndəhay daa macay hay wura wura cəpa lej ndəhay maahəlbatakaya tabiya.

³⁶ Masa Yesu ma hətatar ndəhay makustakaya na, dey-ceceh a kar maja a gəram, gədanj ata daa saba, ata anda təbanj hay manjar mecəkwer.

³⁷ Maja ngene ta', a ngatar mey a gula anğa hay, a ləvtar: «Cek ta key la ga da ley §, ama ndəhay pəreh nga kamərwa ngada way.

³⁸ Anda kedə, kamar ambahw a bay nga ley a, nga slərwa ndəhay mekele saya a dey a nga kawa cek hay da ley a.»

10

*Yesu a slərdata gula anğa hay kuraw a ray a cew
(Mark 3.13-19; Luk 6.12-16)*

¹ Fa dəba ha, Yesu ta', a zəлта gula anğa hay kuraw a ray a cew amba a slərdata nga key sləra anğa. A vəltar gədanj nga bəley malula hay da ray ndəhay, asaya, nga mbəley ndəhay daa macay hay wura wura cəpa, lej ndəhay maahəlbatakaya tabiya.

9:31 9.31 Mk 7.36 **9:32 9.32-34** 12.22-24 **9:34 9.34** 10.25; 12.24, 27; Mk 3.22; Lk 11.15, 19 **9:35 9.35** 4.23 **9:36 9.36** Mesl 27.17; Ez 34.5; Zak 10.2;

Mt 14.14; 15.32; Mk 8.2 § **9:37 9.37** Cek ta key la ga da ley: Yesu a wa cek ma key da ley ta ndəhay ma da təbmara mey nga Gazlavay, ama ndəhay pəreh nga jənta nga təbmara mey nga Gazlavay a. Bay nga ley a na, ara Gazlavay.

² Ndəhay meslərey kuraw a ray a cew e na, ara *Simanɔw, ndaw masa ma zəlmara *Piyer ta məlmaha *Andəre, *Jak ta məlmaha *Jan, ata cewete bəza hay ɲga Zebede,

³ *Fəlep, *Bartelemey, *Tuma, *Matiye, *ndaw ma cakala budaw, Jak, bəzey ɲga Alfe, Taade,

⁴ Simanɔw, ndaw da wuzlah ndəhay ma wudam ɲga ləhdamata ndəhay ata hay dasi har ɲga masa-gəra ata hay, leɲ Juda Iskariyawt, ndaw ma vəlda Yesu a har masa-gəra aɲga hay.

Mey da ray sləra ɲga ndəhay meslərey ɲga Yesu ma da kamara

(Mark 6.7-13; Luk 9.1-6)

⁵⁻⁶ Yesu a slərdata gula aɲga hay kuraw a ray a cew heyey, a kətata, a ləvtar: «Diyam fa ndəhay *Israyel hay. Ata maazəftakaya anda təbən hay maa zəfam. Ama a slala ndəhay masa *Jəwif hay ba hay na, ka da diyam ba. Ka da diyam a slala *Samarı hay ba may.

⁷ Da akwar fa diyam daa cəved na, wuzdamatara a ndəhay, ləvmatar, “Gweegwe cay, bay ɲga Gazlavay a wuzwa.”

⁸ Mbəldamata masa-macay hay, sləkfdamatərwa ndəhay maməctakaya, pərmata maasəkula hay, bəlmata malula hay da ray ndəhay. Gədan a na, ya vəldakwara ɲga maaya. Yaw, akwar may, kamatara ɲga maaya.

⁹ Da akwar fa diyam na, ka da lam dala a har ba.

¹⁰ Ka da diyam ta gabal da har ba, kwa ta zana hay cew ba. Ka da diyam kwa ta tarak ba, kwa ta zlanday ba. Maja ndaw ma ka sləra na, si a hətəy cek mezəmey maja sləra aɲga.

¹¹ «Da akwar ma wusam la aa berney, da daa ba, a slala na, səpam ndaw masa ma wudəy ɲga təbkwar. Njam da way aɲga haa kasl pas masa akwar ma da diyam.

¹² Da akwar fa mbəzam a way ndaw na, ka camatar har, ka ləvmatar: “Maaya ɲga Gazlavay ɲga sawa a ray akwar.”

¹³ Da ndəhay da way a ta təbmakwar la na, cacəfdamara Gazlavay amba maaya aɲga a njeɲ a ray ata. Ama da ta təbmakwar daa ba na, cacəfdamara Gazlavay amba a la maaya aɲga ha la da ray ata.

¹⁴ Da way, da daa ba, da slala masa ndəhay da hwad a, a gəmam ɲga təbmakwar ba, asaya, a gəmam ɲga

cəndamara mey akwar ba na, raramatara lagwada fa salay akwar hay *, bam la da way a, da daa ba, da slala ha.

¹⁵ Ya fa ləvkwar fara fara, ta pas nga sariya na, Gazlavay a da sərdata banay ta ndəhay daa berney a ngene ma fəna nga ndəhay daa berney nga *Sadawm ta nga *Gwamar †.»

Mey da ray banay ma da sawa a ray ndəhay meslərey nga Yesu

(Mark 13.9-13; Luk 21.12-17)

¹⁶ Yesu a patar lenjesl, a ləvtar: «Jəkam sləmay, ya fa slərdakwar anda təban hay ngada wuzlah gədey-ley hay. Anda kefe, wam vaw fa ndəhay anda zezekw hay ma wam vaw fa ray ata. Təram ndəhay meekwed-mey anda makurgwadakw hay.

¹⁷ Wam vaw, maja a kərzamakwar la, a handamakwar la fa mey nga ndəhay ma ka sariya. Asaya, a slədmakwar la daa way ata hay mewuzey mey nga Gazlavay.

¹⁸ A dafamakwar la fa mey nga ndəhay mahura hay lenj fa mey nga bay hay maja akwar ndəhay adaw hay. Gazlavay a pəskatar mey la nga handamakwar amba ka kam sede da ray adaw fa mey ata lenj fa mey nga ndəhay masa *Jəwif hay ba hay.

¹⁹ Da ta handamakwar la aa sariya na, ka da həbam ray da ray mey masa akwar ma daa guzldamara ba, maja mey masa akwar ma daa guzldamara ngene na, a bawa la daa masa akwar faa guzlam.

²⁰ Yaw, mey a, a da bawa ta fa akwar ba, ama ara Mesəfney nga Papakw akwar Bay Gazlavay ma da balakwara mey a.

²¹ «Ndəhay a vəldamata məlma ata hay la nga kədfey vagay. Papanj hay may, a vəldamata bəz ata hay la kəne. Bəza hay a kam həma la a ray papa ata hay ta mama ata hay, amba ndəhay a kədmata vagay.

* **10:14 10.14** raramatara lagwada fa salay akwar hay: Da Jəwif hay fa pəkam daa hwayak nga Jəwif hay ba hay na, a raramara lagwada fa salay ata hay lenj fa zana ata hay maja a wulkam lagwada ha a da zləbta. Yesu a ləvtar a gula anja hay, da ndəhay da slala a təbmara mey ata ba na, nga raramatara lagwada fa salay ata hay kəne. Nəka Mk 6.11; Lk 9.5. **10:14 10.14** SNM 13.51

† **10:15 10.15** Berney hay nga Sadawm ta nga Gwamar na, Gazlavay ta pəlhata sem cewete zleezle maja mebərey nga ndəhay daa berney hay a kalah. Nəka Mezley 18 ta 19. **10:15 10.15** MC 18.20; 19.1-29; Mt 11.24 **10:16 10.16** Lk 10.3 **10:17 10.17** SNM 5.40; 2Kwr 11.24 **10:17 10.17-22** 24.9-14; Mk 13.9-13; Lk 21.12-19; Janj 16.1-4 **10:18 10.18** SNM 24.1-26 **10:19 10.19-20** Lk 12.11-12 **10:21 10.21** Mi 7.6; Mt 10.35; Lk 12.52-53

²² Ndəhay cəpa a da ηgəldamakwar ba maja yah. Ama ndaw ma bəsa banay a la haa kasl mendəvey a na, Gazlavay a ləhda la.

²³ Da fa sərdamakwar banay da slala na, diyam a slala mekele. Ya fa ləvkwar fara fara, ta pas masa yah, *Bəz ηga Ndaw, ma da vəhwa na, akwar ma ndəvdamara sləra akwar da slala hay tabiya ηga *Israyel daa ba aranj.

²⁴ «Ndaw maa sərkey na, a səra cek a fəna ndaw maa sərkada ba. Ndaw ma ka sləra na, mahura da ray bay anğa ba.

²⁵ Ndaw maa sərkey na, a da tərey anda ndaw maa sərkada ha gway. Ndaw ma ka sləra na, a da tərey anda bay ηga sləra ha gway. Yaw, akwar na, anda ndəhay da way adaw, da ta zəlmaya “*Beyelzebul †” sem na, ηgene he, akwar ndəhay da way adaw, a da cədmakwar ma fəna.»

Ka da zluram ta ndəhay ba

(Luk 12.2-9)

²⁶ «Da ray ηgene, ka da zluram ta ndəhay ba. Cek tabiya masa ndəhay ma bədamara, a wuzwa la a palah, cek hay masa ndəhay ma sərmara ba na, a sərmara la.

²⁷ Mey masa yah ma wuzdakwara ta mayal a keđe na, wuzdamərwa a palah. Yaw, mey adaw masa akwar ma cəndamara ta mey-meəsəkey keđe na, təpam aa ray ηga anğwa, wudmara ta gədanj a ndəhay tabiya.

²⁸ Ka da zluram ta ndəhay ma da kədmakwar vagay ba, maja a da kədfam na, vaw akwar daada gway, ama a gwamara a ray mesəfney akwar ba. Zluram na, si ta Gazlavay gway. Anğa na, a gwa ηga kəzla vaw akwar ta mesəfney akwar aa vəgeđ ηga awaw magaza.

²⁹ Diyanj mecəhe mecəhe cew na, a gwa ηga həđkedey dala pal daada, ba daw? Ama kwa diyanj mecəhe pal fa da kəzlwa a hwayak ηgaa zəđey na, daa ba, si Papakw akwar Bay Gazlavay ma vəlda cəveđ ηgaa zəđda.

³⁰ Akwar may, kwa enğwec ηga ray akwar hay na, masləftakaya pal pal tabiya.

³¹ Yaw, maja ηgene, ka da zluram ba. Akwar na, Gazlavay a wudkwar a fəna diyanj hay mecəhe mecəhe ga ηgene, ba daw?

³² «Kwa waawa ma ləvey fa mey ηga ndəhay, anğa ndaw adaw na, ηgene, yah, ya da ləvey fa mey ηga Papay da vad, anğa, ndaw adaw may.

10:22 10.22 5.11; Jan 15.18 **10:23 10.23** 16.28; SNM 8.1 **10:24 10.24-25**
Lk 6.40; Jan 13.16; 15.20 † **10:25 10.25** Beyelzebul: Mezəley ηga bay ηga
mesəfney maaya ba hay. **10:25 10.25** 9.34 **10:26 10.26** Mk 4.22; Lk 8.17
10:28 10.28 Heb 10.31 **10:30 10.30** Lk 21.18 **10:32 10.32** CWJ 3.5

³³ Ama ndaw ma løyey fa mey nga ndøhay, a sørya ba na, ngene, ya da løyey fa mey nga Papay da vad, ya søra ndaw a ba may.»

Mey da ray ndøhay ma wunkam ðay maja mey nga Yesu (Luk 12.51-53; 14.26, 27)

³⁴ Yesu a patar lenjgesl saya, a løytar: «Ka da wulkam ya sawa nga handawa zazay a bøla na, køne ba. Fara fara, ya sawa na, nga handawa zazay ba, ama ya handawa vøram.

³⁵ Ya sawa na, amba ya wunkatar ðay nga bøy-mezøle ta papaha, nga dam-mangusa ta mamaha, lenj nga ngwas ta mamarj nga zel e.

³⁶ Kwa da way ndaw pal na, ndøhay siya hay a da tøram masa-gøra nga siya hay.

³⁷ «Kwa waawa ma wudfa papaha ta mamaha kalah a føna anga ma wudya na, ta wusa nga njeý ta yah daa ba. Asaya, kwa waawa ma wudfa bøy anga hay ta dam anga hay kalah a føna anga ma wudya na, ta wusa nga njeý ta yah daa ba.

³⁸ Kwa waawa ma bøsa banay § ma da sawa a ray a maja yah daa ba na, ta wusa nga njeý ta yah daa ba. Asaya, kwa waawa ma søpya daa ba na, anga ta wusa nga njeý ta yah daa ba may.

³⁹ Yaw, kwa waawa ma wudfey nga løhda heter anga na, aa zøfda la. Ama ndaw ma vølda heter anga maja yah na, a høtar la aa slam a.»

Gazlavay ma da pøley mawurbay nga sløra na, ngada wa hay wa?

(Mark 9.41)

⁴⁰ «Kwa waawa ma tøbkwar la ta meesømey na, a key a tøbey ngene na, yah. Ndaw ma tøbya na, a key a tøbey ngene na, ndaw ma slørdiwa.

⁴¹ Yaw, kwa waawa ma tøba *ndaw ma tøla mey nga Gazlavay ta meesømey, maja a søra, anga ndaw ma tøla mey nga Gazlavay na, a høteý mawurbay nga sløra anga la anda nga ndaw ma tøla mey nga Gazlavay. Yaw, kwa waawa ma tøba ndaw maja a søra, ara ndaw maaya fa mey nga Gazlavay na, a høteý mawurbay nga sløra anga la anda nga ndaw maaya ha may.

10:33 10.33 Mk 8.38; Lk 9.26; 2Tm 2.12 **10:34 10.34** Lk 2.14 **10:35 10.35** 10.21; 24.10; Mk 13.12; Lk 21.16 **10:35 10.35-36** Mi 7.6 **10:37 10.37** Mew 13.7-10; 33.9; Mt 19.29; Mk 10.29; Lk 18.29 § **10:38 10.38** Ta mey Gørek a løyey: «Kwa waawa ma la hwadam anga mazlangalakaya nga daw asi adaw daa ba na, ta wusa nga njeý ta yah daa ba.» **10:38 10.38-39** 16.24-25; Mk 8.34-35; Lk 9.23-24; Jan 12.25-26 **10:40 10.40** 18.5; Mk 9.37; Lk 9.48; Jan 13.20; Gal 4.14

⁴² Kwa waawa ma vølar yam makøslkaya ngada ndaw pal da wuzlah akwar, masa ma pa ray anga nga mecøhe, maja a søra, anga gula adaw na, ya fa løvkwar fara fara, a høtey mawurbay nga sløra anga la.»

11

(Luk 7.18-35)

¹ Masa Yesu ma køtata ndøhay anga hay meslørey kuraw a ray a cew heyey cay na, pørta! a sløkdøey, a daw nga wuzey *Mey-maaya-mawiya ngada ndøhay da slala hay fetedøe.

Jan-Baptis a slørdara gula anga hay fa Yesu

² *Jan-Baptis, anga daa førsøne. Daa masa anga daa førsøne he na, a cønda mey da ray sløra nga Yesu *Køriste. Ta', a slørey gula anga hay siya fa Yesu a

³ ngaa cøfdamara, a løvmar: «Kah na, Køriste, ndaw ma da sawa nga løhdata ndøhay heyey daw? Da daa ba, ya søkwam ndaw mekele ma da sawa daw?»

⁴ Yesu a mbøfdatara, a løvtar: «Diyam, kadamara cek masa akwar ma cøndamara ta slømay akwar, ta masa akwar ma høtmar ta dey akwar kedøe a Jan-Baptis.

⁵ Løvmar na, wulaf hay fa høtmar dey døba, jegwer * hay fa diyam maaya maaya ta salay ata, maasøkula hay ta sødam sem, madagazlam hay fa cønarn slømay, ndøhay mamøctakaya fa sløkdøamawa daa memøcey, ndøhay masa-viya hay fa cøndamara Mey-maaya-mawiya døba.

⁶ Ndaw ma mbøkda mey adaw ba maja sløra masa yah ma ka na, maaya nga Gazlavay aa da ray a.»

Mey da ray Jan-Baptis

⁷ Masa gula hay nga *Jan-Baptis ta diyam sem na, Yesu aa guzltar mey da ray Jan-Baptis a, a ndøhay, a løvtar: «Akwar ma diyam a wuzlah-ley na, nga nøkwa me? Ka nøkmawa na, guzer masa memed ma wusa daw? Ara anga ba, ba diya?

⁸ Kaa, akwar ma diyam nga nøkwa na, me? Ka nøkmawa na, ndaw masa ma pey zana maaya fa vaw daw? Anja ndøhay masa ma pam zana maaya fa vaw na, ata da way bay hay, ba diya?

⁹ Wuzdamiwa, ka diyam nga nøkmawa na, wa? Ka nøkmawa na, *ndaw ma tøla mey nga Gazlavay, ba diya? Ya fa løvkwar, fara fara ara anga. Ama a fønarn ndaw ma tøla mey nga Gazlavay la saya,

10 maja *Jan̄ a na, ara ndaw masa mey nga Gazlavay mawuzlalakaya maa guzley da ray a, a løyey: “Bay Gazlavay a løyar a Bøyey an̄ga: Ehe, ya fa sløyey maslan̄-cöved adaw fa mey akah, amba a d̄iykawa cöved akah.”»

11 Yesu aa guzley saya, a løyey: «Ya fa lövkwar fara fara, da wuzlah ndöhay da bëla na, kwa ndaw ma fëna Jan̄-Baptis na, daa ba. Ama ndaw mecöhe da wuzlah ndöhay masa Gazlavay fa wey da ray ata na, ndaw aha a fëna Jan̄-Baptis.

12 Döga ta pas masa Jan̄-Baptis ma zlar nga wuzey mey nga Gazlavay haa wure kede na, ndöhay malamba masa-höma hay fa këdam vaw nga tøkmarä Bay Gazlavay nga wey da ray ndöhay. A wudam nga wamara bëla aa slam a nga Gazlavay.

13 Kwakwas nga *Mawiz ta ndöhay ma tëla mey hay tabiya taa guzlam la da ray Gazlavay ma wey da ray ndöhay. Aa guzlam anda kede haa kasl pas masa Jan̄ ma wuswa.

14 Da ka tøkmarä mey adaw na, ya fa lövkwar, *Eli, ndaw masa ndöhay ma tëla mey hay maa guzlam zleezle da ray a ma da vöhwä heyey na, ara Jan̄-Baptis a.

15 Da ndaw, an̄ga ta slömay na, nga cönda mey a maaya maaya.

16 «Sökway nga ndöhay masa wure kede kaa na, ya da wata na, ta me? Yaw, ya da wata na, ta bëza hay masa manjatakaya da slala fa kam wasa ta mandala ata hay, a wudkam d̄ay da wuzlah ata, a lövam:

17 “Ala ta famakwar slölam la, ama ka ta görvam daa ba. Ala ta zlamakwar walay vagay la, ama akwar ta töwam daa ba may.”

18 Yaa guzlkwar anda kede na, maja Jan̄ ta sawa la nga wuzkwar mey. A key *daliyam, asaya, a sey wuzam ba. Kaa ndöhay a lövam: “An̄ga ta malula da ray.”

19 Yah, *Böz nga Ndaw, ya sawa, ya fa zömey cek, ya fa sey cek anda ndöhay mekele. Ama ndöhay a lövam: “Nøkmarä, ndaw a kede, a wulkey si nga zömey cek ta nga sey wuzam ngada hwad̄ an̄ga gway. Asaya, an̄ga na, ara jam nga ndöhay ma cakala budaw ta nga ndöhay ma zlöba kwakwas nga Mawiz.” Ama yah na, ya fa lövkwar ndöhay a da sörmara lengesl nga Gazlavay an̄ga maaya na, ta fa slöra maaya masa ndöhay ta lengesl nga Gazlavay ma kamara.»

Mey da ray banay ma da sawa a ray ndəhay ma təbmara mey nga Yesu ba

(Luk 10.13-15)

²⁰ Fa dəba ha, Yesu a mbədtar ray ngada ndəhay da slala hay masa aa ma key maazla hay ga da hwaɗ a. A mbədtar ray na, maja ndəhay da slala hay a, ta mbəɗdamara menjey ata daa ba.

²¹ A ləvtar: «Haya! ndəhay da slala Kwaraziŋ, banay a sawa la a ray akwar. Haya! ndəhay da slala Betsayda, banay a sawa la a ray akwar. Da ndəhay daa berney nga Tir ta nga Sidaŋw ta hətmatar maazla hay a la na, anja ta mbəɗdamara menjey ata sem dəga zleezle, anja ta kəzlam zana nga sak meefərey vaw sem fa vaw, asaya, ta pətkwalam sem daa bebədes nga wuzwa na, ata ta mbəɗdamara menjey ata da bəla cay.

²² Da ray ngene, ya fa kadakwara, ta pas masa Gazlavay ma da ka sariya da ray bəla na, Gazlavay a da sərdakwar banay ma fəna nga ndəhay daa berney nga Tir ta nga Sidaŋw.

²³ Akwar ndəhay da Kapernayum may, ka wulkam na, Gazlavay a ngəlkwara la a vadɗ daw? Ara kəne ba. A da kəzlakwar aa slam nga ndəhay maməctakaya. Ya ta key maazla hay la da wuzlah akwar. Da ndəhay daa berney nga *Sadawm ta hətmatar maazla hay a keɗe la na, anja berney ata ta pəlhey daa ba, anja anɗa daha haa wure keɗe.

²⁴ Da ray ngene, ya fa kadakwara, ta pas masa Gazlavay ma da ka sariya da ray bəla na, Gazlavay a da sərdakwar banay ma fəna nga ndəhay daa berney nga Sadawm.»

Yesu a kar suse a Gazlavay ta meesəmey

(Luk 10.21, 22)

²⁵ Daa ngene, Yesu aa guzley, a ləvey: «Waa Papay Bay Gazlavay, ndaw ma wa slam da vadɗ ta da hwayak, ya fa kaka suse, maja ka ta wuzdərwa maaya akah la a ndəhay ma sərə cek ba anda bəza hay mecəhe hay. Ama ngada ndəhay masa ta lenɗesl ma sərə cek na, ka ta bəda maaya ha sem fa ata.

²⁶ Ahaw, Papay, maja ta mbafaka sem nga ka kəne.»

²⁷ Ta', Yesu aa guzlar a gula anɗa hay, a ləvey: «Papay ta vəldatiwa cek hay tabiya sem asi har adaw. Kwa ndaw pal ma sərya, yah, *Bəz nga Ndaw na, daa ba, si Papay. Asaya, kwa ndaw pal ma sərə Papay daa ba may, si yah, Bəzey anɗa, lenɗ ndəhay masa yah ma wufey nga wuzdatara.»

Mey da ray Yesu ma da mæskadata vaw ta ndəhay

²⁸ «Akwar ndəhay masa fa gəram ŋga səpey mey hay mekele mekele ŋga *ndəhay maa sərkaɗa kwakwas ŋga Mawiz ŋgene, samawa fa yah, akwar fa da gəram daa saba.

²⁹ Cəndamara mey aɗaw, samawa, sasərkaɗa fa yah, maja yah ndaw meekweɗ-mey, ka da mæskam vaw ta zazay.

³⁰ Meesərkey aɗaw na, anɗa ta banay ŋga cəney ba, kwa sləra masa yah ma da ləvkwar ŋga key na, aa ta gəra daa ba.»

12

Yesu, anɗa bay ma wey da ray pas meməskey-vaw

(Mark 2.23-28; Luk 6.1-5)

¹ Pas pal daha, ara ta *pas meməskey-vaw, ata Yesu ta gula anɗa hay a diyam taa ley ŋga cek anda daw *. May fa catar a gula anɗa hay a. Da ray ŋgene, ta', a həbɗam cek hay a heyey, aa mbəɗmara.

² Daa masa ndəhay *Fariza hay ma hətmatar gula anɗa hay fa həbɗam cek aha na, ta', aa guzɗmar a Yesu, a ləvmar: «Haya! Nəɗta gula akah hay fa kam sləra ta pas meməskey-vaw, ara cek matəkakaya daa *kwakwas ŋga Mawiz.»

³ Yesu a mbəɗɗatara, a ləvtar: «Akwar ta janɗamara daa ɗerewel ŋga Gazlavay cek masa *Davit ma ka zleezle na, daa ba daw? Ta pas lanɗar daha, ata Davit ta ndəhay anɗa hay, may fa catar, ama cek mezəmey fa ata daa ba.

⁴ Maja ŋgene Davit e a mbəzey aa way ŋga Gazlavay, anɗa ta ndəhay anɗa hay, ta', a zəmamara peɗ masa mavəldakaya ŋgada Gazlavay. Kwa kwakwas aləkwa ta pəskatar mey ŋga zəmamara daa ba, anja ŋga zəmamara na, si ndəhay ma ka kwakwas ŋga Gazlavay gway.

⁵ Asaya, ka ta janɗamara mey ŋga kwakwas ŋga Mawiz la, ta pas meməskey-vaw na, ndəhay ma ka kwakwas a fa kam sləra daa *Way-mekey-kwakwas ŋga Gazlavay. Anda keɗe, ata fa zləbɗmara kwakwas ŋga pas meməskey-vaw, ama ara mebərey ba.

⁶ Ehe, ya fa ləvkwar, cek mahura ma fəna Way-mekey-kwakwas ŋga Gazlavay na, anɗa feɗe da wuzlah akwar.

⁷ Ɗerewel ŋga Gazlavay zleezle a ləvey: “Ya wuɗey na, ndəhay a səram dey-ceceh fa ndəhay, ba na, a hərmaya gənaw hay ba.” Ama ka ta cəndamara mabara ŋga mey a fara fara daa ba. Anja da ka ta cəndamara la na, ka

11:28 11.28-30 Iz 28.12 11:29 11.29 Jer 6.16 * 12:1 12.1 cek anda daw: Ta mey Pelta na, mezəley «alkamaari», ta mey Nasara «le blé». 12:1 12.1 Mew 23.25-26 12:2 12.2 Mab 20.8-10 12:3 12.3-4 1Sam 21.2-7; Lev 24.5-9 12:5 12.5 Mesl 28.9-10

gwamara nga mbødfmatar ray ngada ndøhay masa manjar mebörey kefe ba.

⁸ Yaw, ma wey da ray pas memøskey-vaw na, ara yah, *Böz nga Ndaw.»

Yesu a diyra har mamøckaya nga ndaw ta pas memøskey-vaw

(Mark 3.1-6; Luk 6.6-11)

⁹ Fa döba ha, Yesu pørtal! a sløkdøy, a daw a mbøzey aa *way-mewuzey-mey nga Gazlavay da slala ha.

¹⁰ Ndaw fetefe daha, har mamøckaya. Ndøhay *Fariza hay daa way-mewuzey-mey a, aa cødfamara Yesu, a løvmar: «Kwakwas aløkwa ta vøley cøved la nga mbøley ndaw ta *pas memøskey-vaw daw?» Aa cødfamara anda ngene na, amba aa dødfamar mey.

¹¹ Yesu a mbødfdatara, a løvtar: «Da ndaw da wuzlah akwar, anga ta tøban pal, da tøban a, a køzley aa vøged ta pas memøskey-vaw na, ndaw aha, a badørwa daa vøged e daa ba daw?»

¹² Yaw, ya fa løvkwar fara fara, ndaw a føna tøban ta maaya. Kaa wara kwakwas aløkwa a vøley cøved nga jøney ndaw ta pas memøskey-vaw ba na, kwara?»

¹³ Cay, ta', Yesu a løvar a ndaw masa har mamøckaya heyey: «Tøldørwa har a.» Tal! a tøldara har a. Ta', a diyey anda har lanjar.

¹⁴ Da ray ngene, ndøhay Fariza hay a, a bamawa aa ambaw, a kusam, a cømdamara day ata nga kødøy Yesu vagay.

Mey da ray ndaw ma ka sløra masa Gazlavay ma wala

¹⁵ Daa masa Yesu ma søra dabaray ata la na, pørtal! a sløkdøy daa slam aha, ndal! a daw. Ndøhay ga fa diyam asiya. Ta', a mbøldata masa-macay hay cøpa da wuzlah ata.

¹⁶ Ama a katar mey, a løvtar: «Kwa ka da wuzdamara mey da ray adaw a ndøhay ba.»

¹⁷ Yesu maa guzley anda kefe na, mey a, ta key la anda *Izay, *ndaw ma tøla mey nga Gazlavay zleezle, ma løyey:

¹⁸ «Gazlavay a løyey: Kefe ara ndaw ma ka sløra adaw masa yah ma wala,

yah ma wudfa kalah,

yah faa sømey ga da ray a.

Ya slørey Mesøfney adaw la a ray a,

amba a wuzdatara a ndøhay masa Jøwif hay ba,

ya da katar sariya a ndøhay ta cøved e.

- 19 Kwa fa da terey vaw ta ndaw daa ba,
 kwa fa da wudey ta wudey daa ba.
 Kwa fa da key baazlam da wuzlah ndohay daa ba.
- 20 Fa da ngorfa panay masa fa da hobey na, daa ba.
 Asaya, kwa fa da moca peterla masa fa da macey na, daa
 ba,
 maja ara ndaw meserey dey-ceceh fa masa-bøle hay.
 A ka sløra anga ha la haa ta pas
 masa aa ma da ka sariya fara fara da ray ndohay cøpa.
- 21 Ndohay tabiya a da pamara nga ndaw ata fara fara.»

Gødan nga Yesu a sawa na, dama?

(Mark 3.20-30; Luk 11.14-23)

22 Ta', a handamawa ndaw-wulaf daha ma gwa ngaa
 guzley ba, maja anga ta malula da ray. Yesu ta', a mbølda, a
 gwa ngaa guzley, a gwa nga høtar dey maaya maaya døba.

23 Ndohay tabiya fetede a røzlam, a løvam da ray Yesu:
 «Da ara Bøzey nga *Davit † heyey kwa?»

24 Ama ndohay *Fariza hay ma cøndamara mey a kede
 na, a løvam: «Ndaw kede fa bøley malula da ray ndohay ta
 maazla nga *Beyelzebul, bay nga mesøfney maaya ba hay.»

25 Yesu a søra mewulkey ata, a løvtar: «Da ndohay daa
 hwayak pal a kam vøram da wuzlah ata na, hwayak a ngene
 a nøsey la. Asaya, ndohay da slala hay, da daa ba, ndohay
 da way ndaw pal, da ta cømam day da wuzlah ata daa ba
 na, slala ha a nøsey la, da daa ba, way nga ndaw aha a
 nøsey la may.

26 Da ndohay nga *Satan fa kødam vaw da wuzlah ata
 na, ngene he, ara Satan a, mekeðey vaw ta vaw anga. Kaa
 wara a da cømtar ray nga wey da ray ata na, kwara døba
 wura?

27 Da ka løvam ya bøla malula ta gødan nga Beyelzebul,
 bay nga mesøfney maaya ba hay na, kaa gula akwar hay
 na, a bølam malula ta gødan nga wa? Da ray ngene, gula
 akwar hay na, a wuzdamakwara la, mey akwar ngene, ara
 anga ba.

28 Fara fara, ya fa bøley malula ta gødan nga *Mesøfney
 nga Gazlavay. A wuðey nga løvey, Gazlavay fa wey da ray
 akwar cay.

29 «Yaw, kwa ndaw-mayal ma gwa nga mbøzey a way
 ndaw masa-gødan amba a lalatørwa cek anga hay meede

12:22 12.22-24 9.32-34 † 12:23 12.23 Bøzey nga Davit: Ara mehøsey-ray
 ngada ndaw mawalakaya ma da sawa nga key Bay Mahura nga Israyel hay,
 a da yawa daa søkway nga Davit, bay nga Israyel hay zleezle. 12:23 12.23
 20.30-31 12:24 12.24 10.25 12:28 12.28 Lk 17.21

anġa na, daa ba. Si ndaw-mayal a, a key gədan teesed, a jəwa ndaw masa-gədan a daġay. Fa dəba ha, a gwa a həltərwa cek hay da way a.

³⁰ «Da ndaw ta njeŷ ta yah daa ba na, nġene ndaw a ara masa-gəra adaw. Asaya, da ndəhay a jənmaya nġa bəcwa ray nġa ndəhay nġada fa Gazlavay ba na, a key nġene, aa wadamatar ray.

³¹ Maja nġene, ya fa ləvkwar, da ndaw ta key cek maaya ba sem, kwa a cəda Gazlavay na, Gazlavay a gwa a mbəkdara mebərey anġa cəpa. Asaya, a gwa a mbəkdara meŷ hay maaya ba tabiya masa anġa maa guzlda da ray Gazlavay a. Ama da ndaw a cəda Mesəfney nġa Gazlavay na, Gazlavay fa da mbəkdara mebərey anġa daa ba səlak.

³² Kwa anja ndaw aha aa guzley meŷ maaya ba da ray adaw, yah, *Bəz nġa Ndaw na, Gazlavay a gwa a mbəkdara mebərey anġa. Ama ndaw maa guzley meŷ maaya ba da ray Mesəfney nġa Gazlavay na, Gazlavay fa da mbəkdara mebərey a daa ba, kwa wure keđe, kwa ta vara ta vara, fa da mbəkdara daa ba səlak.»

Mey-menġey ta wudez meŷey babəza maaya ta maaya ba (Luk 6.43-45)

³³ «Da wudez, anġa maaya na, a yey babəza maaya may. Da wudez, anġa maaya ba na, a yey babəza maaya ba may. A da sərmara wudez keđe maaya ta maaya ba na, fa babəza ha.

³⁴ Hey! Akwar bəza hay nġa kucsl hay, akwar ndəhay maaya ba, kaa wara ka daa guzlam meŷ maaya na, kwara? Maja meŷ masa ndaw maa guzlda na, fa wuzdərwa cek masa mabadakaya daa mevel anġa.

³⁵ Anda keđe, ndaw maaya na, fa wuzdərwa cek maaya daa mevel anġa. Ndaw malamba may, fa wuzdərwa cek malamba daa mevel anġa.

³⁶ Ya fa ləvkwar, ta pas masa Bay Gazlavay ma da ka sariya na, kwa waawa a kadara meŷ anġa la a Bay Gazlavay da ray meŷ hay maaya ba masa aa maa guzldata cəpa.

³⁷ Anda keđe, da meŷ masa kah maa guzlda aa maaya ba na, Gazlavay a mbədkra ray la. Yaw, da meŷ a maaya na, nġene Gazlavay a paka la nġa ndaw maaya fa meŷ anġa.»

Ndəhay aa cəfdamara Yesu nġa key maazla (Mark 8.11, 12; Luk 11.29-32)

³⁸ Fa dəba ha, ndəhay siya da wuzlah *ndəhay maa sərkada kwakwas nġa Mawiz leŷ *Fariza hay siya aa

guzlmar a Yesu, a ləvmar: «Bay ala, ya wudam ka kandar maazla ma wuzdərwa gədan̄ ŋga Gazlavay.»

³⁹ Yesu a mbəɸɸdatara, a ləvtar: «Akwar ndəhay masa wure keɸe na, malamba hay, akwar ma mbəkdamara Bay Gazlavay sem! Ka wudam ŋga hətam maazla ma wuzdərwa gədan̄ ŋga Gazlavay fara daw? Kwa akwar fa da hətam maazla ha daa ba, si maazla anda ma key ta *Jawnas, *ndaw ma təla mey ŋga Gazlavay zleezle.

⁴⁰ Anda Jawnas ma key ɸar maakar taa vad, taa pas da hwad ewet mahura heyey na, ara anda ŋgene may, yah, *Bəz ŋga Ndaw, ma da key ɸar maakar taa vad, taa pas da vөгed.

⁴¹ Ta pas sariya masa Gazlavay ma da ka na, ndəhay daa berney ŋga Niniwe heyey na, a lacamawa la ŋga mbəɸɸmakwar ray, akwar ndəhay wure keɸe, maja daa masa ata ma cəndamara mey ŋga Gazlavay masa Jawnas ma wuzdatara na, ta mbəɸɸdamara menjey ata sem. Nəkmara, da wuzlah akwar feɸe, ndaw ma fəna Jawnas daha, ama akwar ta mbəɸɸdamara menjey akwar daa ba.

⁴² Asaya, ta pas sariya masa Gazlavay ma da ka na, ŋgwas ma key bay daa hwayak ŋga Saba zleezle heyey a lacawa la ŋga mbəɸɸkwar ray, akwar ndəhay wure keɸe, maja an̄ga na, a sawa da dərəŋ ŋga cəney mey da ray len̄gesl maaya ŋga Bay *Salaman̄w. Nəkmara, da wuzlah akwar feɸe, ndaw ma fəna Bay Salaman̄w daha, ama akwar ta təbmara mey an̄ga daa ba.»

*Mey da ray malula ma vəhwa a ray ndaw saya
(Luk 11.24-26)*

⁴³ «Da masa malula ta bey sem da ray ndaw na, a daw a pəkey da ley saw, a səpey slam ŋga məskey vaw. Ama da ta hətey slam daa ba na,

⁴⁴ a wulkey, a ləvey: “Ŋgama, ya vəhey aa slam adaw masa yah ma bawa da hwad a heyey.” A vəhey a ray ndaw aha aa slam an̄ga heyey, a hətfar slam aha maɸiykaya maaya maaya, kwa meeme da hwad a daa ba.

⁴⁵ Da ray ŋgene, malula ha a daw, a ŋgəlwa malula hay mekele maasala ma fənmara ta həma ŋga key cek maaya ba. A samawa a ray ndaw a heyey. Anda keɸe, ndaw aha a da sərey banay ma fəna masa ŋgeeme. Ara anda keɸe, cek aha a da key ta ndəhay masa maaya ba wure keɸe.»

*Maman̄ ŋga Yesu ta məlmaha hay na, ara wa hay wa?
(Mark 3.31-35; Luk 8.19-21)*

⁴⁶ Daa masa Yesu faa guzltar a ndəhay na, ata mamaha ta məlmaha hay malacatakaya daa ambaw, a wudam ngaa guzlmār.

⁴⁷ Ndaw daha a ləvar a Yesu: «Mamakw ta məlmakw hay ata malacatakaya daa ambaw. A wudam ngaa guzlmaka.»

⁴⁸ Yesu a mbəɸɸdara, a ləvar: «Mamay na, wa? Məlma adaw hay na, wa hay wa?»

⁴⁹ Fa dəba ha Yesu, ta', a wuzey har ngada fa gula anga hay, a ləvey: «Mamay ta məlma adaw hay na, ara ndəhay keɸe,

⁵⁰ maja məlma adaw, dam-mama adaw, da daa ba, mamay na, ara ndaw ma key cek anda Papay da vad ma wudəy.»

13

*Mey-menjey ta ndaw maa kwecey hulfaɸ a ley
(Mark 4.1-9; Luk 8.4-8)*

¹ Ta pas a ngene, Yesu a bey da way, a daw a njeɸ a meɸ dəhwa nga *Galile nɡaa sərkadata ndəhay.

² Ndəhay ga a kusam a cakay a. Maja ngene, ta', Yesu a təpeɸ aa kwambiwal, a njeɸ a hwaɸ a amba aa guzltar. Kwambiwal a, aa da ray yam, ama ndəhay a na, malacatakaya da meɸ dəhwa ha.

³ Aa guzltar da ray cek hay ga ta meɸ-menjey, a ləvtar:

«Ndaw mehəveɸ daha, a daw nɡaa kweceɸ hulfaɸ a ley anɡa.

⁴ Daa masa anɡa faa kwacada hulfaɸ a na, hulfaɸ lanɡar a kəzley aa cəveɸ. Fa dəba ha, diyan hay a samawa, a ndamara.

⁵ Yaw, hulfaɸ lanɡar a kəzley aa slam masa pəraɸ, hwiɸak da ray a ga daa ba. Hulfaɸ a, a pəceɸ fiɸaw, maja hwiɸak da ray a ga daa ba.

⁶ Ama menjeɸ nekəɸeɸ, da masa pas fa teɸ na, a bəta. Fa dəba ha, a kweley, maja slaslalay a daa vəgeɸ ga daa ba.

⁷ Hulfaɸ lanɡar a kəzley a wuzlah hatak. Hatak a, a gəley, aa njərɸa hulfaɸ mapəckaya ha.

⁸ Ama hulfaɸ lanɡar na, a kəzley aa slam masa maaya, a gəley, a yey babəza ga, wurzay pal, a gwa a yey babəza temere, lanɡar kwakwar maakwaw, lanɡar may, kwakwar maakar.»

⁹ Yesu aa guzltar saya, a ləvtar: «Da ndaw, anɡa ta sləmay na, nɡa cənda meɸ a maaya maaya.»

Yesu aa guzltar a ndəhay ta mey-menjey hay na, maja me?

(Mark 4.10-12; Luk 8.9, 10)

¹⁰ Fa dəba ha, *gula hay nga Yesu a ngəcham a cakay a, aa cəfdamara, a ləvmar: «Kaa guzltar ngada ndəhay a ta mey-menjey hay na, maja me?»

¹¹ A mbəfdatara, a ləvtar: «Yaa guzltar ta mey hay menjey na, maja akwar na, Gazlavay ta vəkwar cəved la nga sərey mey hay mabadatakaya da ray mewey anga da ray ndəhay. Ama ndəhay a kefe na, Gazlavay ta vəltar cəved nga sərey mey a daa ba.

¹² Anda kefe, da ndaw a wudəy nga səra mey nga Gazlavay na, Gazlavay a jəna nga səra mey a la a dey a. Da ndaw a wudəy nga səra mey nga Gazlavay ba na, kwa mey a masa nekəfey daa mevel anga na, Gazlavay a badərwa la tabiya.

¹³ Yaw, yaa guzltar ta mey-menjey na, maja ata fa nəkam dey, ama a hətmar dey ba, fa jəkam sləmay, ama a cəndamara ba.

¹⁴ Anda kefe, cek aha ta key la ngada ata, anda mey masa Gazlavay maa guzlda zleezle ta mey ndaw ma təla mey anga *Izay, ma ləvey:

“Akwar fa jəkam sləmay maaya maaya,
ama ka cəndamara ba.

Akwar fa nəkam dey maaya maaya,
ama ka hətmar dey ba.

¹⁵ Maja ndəhay a, a gəmam nga cənam mey ba,
a dəzlmata sləmay ata hay,
a dəpmata dey ata hay.

A kamara kəne amba a hətmar dey ba,
a jəkam sləmay ba,
a təbmara mey a, aa mevel ata ba.

Da ray nge, fa da mbəfdamara menjey ata
amba ya mbəldata na, daa ba.”

¹⁶ «Ama akwar, gula adaw hay na, maaya nga Gazlavay aa da ray akwar, maja akwar fa hətmar dey, asaya, akwar fa jəkam sləmay.

¹⁷ Ya fa ləvkwar fara fara, ndəhay ma təla mey hay ga zleezle ta ndəhay siya ga masa maaya fa mey nga Gazlavay ta wudam la nga hətmar cek masa akwar ma hətmar kefe, ama ta hətmar daa ba. Ta wudam la nga cəndamara cek masa akwar ma cəndamara kefe, ama ta cəndamara daa ba.»

Mabara nga mey-menjey ta ndaw maa kwecey hulfad
(Mark 4.13-20; Luk 8.11-15)

¹⁸ «Ehe, cændamara mabara nga mey-menjey ta ndaw maa kwecey hulfad heyey dæba.

¹⁹ Ndøhay siya hay a cændamara mey da ray *mewey nga Gazlavay da ray ndøhay, ama a cændamara mabara nga mey a ba. Bay-malula a sawa, a la mey maaya daa mevel ata la. Ngada ata na, mey a, annga anda hulfad ma kězley aa cøved.

²⁰ Ndøhay siya hay saya ma cændamara mey nga Gazlavay la na, a tømbara fiyaw fiyaw ta meesømey. Ngada ata na, mey a annga anda hulfad ma kězley aa slam masa pørad.

²¹ Ama ndøhay a, a tømbara mey nga Gazlavay nga ðar nekøðey gway. Ta pas masa banay mekele mekele ma da sawa a ray ata maja mey a na, ndøhay a, a da mbøkdamara mey nga Gazlavay a fiyaw fiyaw. Ata na, anda hulfad ma pøcwa daa slam masa pørad, slaslalay daa vøged ga daa ba.

²² Ndøhay mekele a cændamara mey nga Gazlavay, a tømbara, ama mey a, aa zøðey maja ata fa wulkam kalah da ray menjey maaya da bøla, asaya, maja a wudam zleley kalah. Ngada ata na, mey a, annga anda hulfad masa ma kězley a wuzlah hatak, manjanjørðakaya daa hatak a. Ata anda cek ma yey babøza ba.

²³ Ndøhay mekele saya, a jøkam slømay fa mey nga Gazlavay, a tømbara. Da ray ngene, fara fara a kadamara sløra ta annga. Ata anda hulfad ma pøcwa daa slam maaya. Anda keðe, mey a, a yey daa mevel ata anda hulfad ma pøcwa ma yey ga, babøza fa vøða a key temere, mekele a key kwakwar maakwaw, da daa ba, kwakwar maakar.»

Mey-menjey ta ley nga daw ta zlørav da hwad a

²⁴ Fa dæba ha, Yesu aa guzltar ta mey-menjey mekele a ndøhay makustakaya heyey, a løvtar: «*Mewey nga Bay Gazlavay da ray ndøhay na, ya gwa nga wa na, ta me? Ehe, ya ngakwar mey da ray a: Ndaw daha a sløkey hulfad maaya a ley annga.

²⁵ Ta tavad masa ndøhay fa nam na, masa-gøra annga, a sawa, a sløkey zlørav aa ley a, ta', a daw.

²⁶ Menjey nekøðey, daw heyey a pøcwa. Zlørav a, a pøcwa may. A gølam daa slam a, a pamawa ray *.

²⁷ Anda keðe, ndøhay ma ka sløra nga bay nga ley a, ta', a samawa, a løvmar a bay ata: "Waa Bay ala, ka sløkey aa ley akah na, hulfad maaya, ba diya? Kaa zlørav na, a sawa dama?"

28 A mbəddatara, a ləvtar: “Ara masa-gəra adaw ma ka sləra ha.” Ta’, ndəhay ma ka sləra anğa hay a, a ləvmar: “Anda kedə na, ka wudey ya diyam, ya mədmata daw?”

29 A mbəddatara, a ləvtar: “Kay, a njeý, maja da akwar fa mədmata na, ka da mədam daw maaya asiya may.

30 Mbəkdamata nğa kam daa slam a haa kasl kiya mekey daw. Ta kiya ha ngene, ya da ləvtar nğada ndəhay ma da kamərwa daw a, nğa nğəmamara zlərav a la dğay, nğa jəwmata maaday a, nğa pamatar awaw fa vəfa. Ama daw maaya na, a kamərwa, a handamərwa a wuded.”»

Mey-menğey ta babəza nğa bazlawar leñ ta cek ma həsla makala

(Mark 4.30-32; Luk 13.18, 19)

31 Fa dəba ha, Yesu aa guzltar ta meý-menğey mekele saya a ndəhay fetede heyey, a ləvtar: «*Mewey nğa Bay Gazlavay da ray ndəhay na, anğa anda babəza nğa bazlawar, masa ndaw ma la, ma rəba aa ley anğa.

32 Anğa mecəhe da wuzlah hulfad hay siya, ama a pəcwa, a gəley mahura da ray cek hay siya, a tərey nğa wudez, dıyan hay a samawa, a dıyam way fa meý-har hay a.»

(Luk 13.20, 21)

33 Yesu aa guzltar ta meý-menğey mekele saya, a ləvtar: «Mewey nğa Bay Gazlavay da ray ndəhay na, anğa anda cek ma həsla makala masa nğwas ma həley kuset kədəy, ma jahada ta hapa nğa makala ga, amba a həslərwa tabiya.»

Yesu aa guzley ta meý-menğey na, maja me?

(Mark 4.33, 34)

34 Yesu a wuzdatara meý hay cəpa nğada ndəhay na, ta meý-menğey. Kwa taa guzltar ta meý mekele daa ba.

35 A ka kəne na, amba a key anda *ndaw ma təla meý nğa Gazlavay maa guzley zleezle, ma ləvey:

«Ya daa guzltar a ndəhay ta meý-menğey,
Ya da wuzdatara cek hay masa zleezle mabadatakaya
dəga Gazlavay ma ləma bəla.»

Mabara nğa meý-menğey ta ley nğa daw

36 Fa dəba ha, Yesu ta’, a mbəkdata ndəhay heyey, a vəhey a way. Gula anğa hay ta’, a samawa a cakay a, aa cəfdamara, a ləvmar: «Wuzdandara mabara nğa meý-menğey ta zlərav da ley heyey cey.»

37 Ta’, a mbəddatara, a ləvtar: «Ndaw ma sləka daw masa maaya na, ara yah, *Bəz nğa Ndaw.

38 Ley na, ara bəla. Hulfaɖ masa maaya na, ara ndəhay ma təbmara amba Gazlavay a wey da ray ata. Zlərav na, ara ndəhay ma namar ray a bay-malula.

39 Masa-gəra ma sləka zlərav na, ara *Satan, bay-malula. Kiya mekey daw na, ara pas ŋga mendəvey ŋga bəla. Ndəhay ma da kamərwa daw na, ara maslan hay ŋga Gazlavay da vad.

40 Anda ata ma ŋgəmamara zlərav ŋga tekwerey na, ta pas mendəvey ŋga bəla na, a da key kəne may ta ndəhay ma namar ray a bay-malula.

41 Anda keɖe, yah, Bəz ŋga Ndaw, ya slərdata maslan aɖaw hay da vad la ŋga badamata ndəhay ma təknamata ndəhay ŋga key mebərey leŋ ndəhay ma kam cek malamba da wuzlah ndəhay masa Gazlavay ma wey da ray ata.

42 A da kəzlamata aa awaw mendəvey ba. Fetede na, a təwam la, aa pəɖam sler la.

43 Ama ŋgada ndəhay ma namar ray a Bay Gazlavay na, a njam la ta Papa ata, Bay Gazlavay, da vad, a waɖam la anda pas. Da ndaw, aŋga ta sləmay na, ŋga cənda mey a maaya maaya.»

Mey-menɣey ta zleley mabadakaya leŋ ta bersle

44 Yesu aa guzltar ta mey-menɣey mekele saya, a ləvtar: «*Mewey ŋga Bay Gazlavay da ray ndəhay na, aa letek ta zleley mabadakaya daa ley. Ndaw a daw, a hətar, a ɖada ma fəna saya. Aa səmey ga da ray a. Maja ŋgene, a daw, a həɖkadata cek aŋga hay tabiya amba a həɖka ley a.

45 «Asaya, mewey ŋga Gazlavay da ray ndəhay na, aa letek ta ndaw ma ka filaw, ma səpey bersle maaya membey ŋga həɖkey.

46 Da ta hətey bersle maaya membey ma həɖkey ba la na, a daw, a həɖkadata cek aŋga hay tabiya amba a həɖka bersle he.»

Mey-menɣey ta tabaw

47 «Asaya, *mewey ŋga Gazlavay da ray ndəhay na, aa letek ta *tabaw † ma kərzawa ewet hay daa dəhwa, a kumawa səkway ŋga ewet hay mekele mekele ga.

48 Masa tabaw a ta rəhey cay ta ewet e na, ta', a badamərwa a mey dəhwa. A njam ta njeɣ, a walamata səkway ŋga ewet hay masa maaya, a pamata aa gabal, ama səkway ŋga ewet hay masa maaya ba na, a kəzlamata.

13:40 13.40 7.19; Jan 15.6 13:41 13.41 24.31; Mk 13.27 13:42 13.42 8.12
 13:43 13.43 Dan 12.3; NMH 5.31; Mt 11.15 13:44 13.44 Fəl 3.7-14 † 13:47
 13.47 tabaw: Ara njele mahura masa ndəhay ga ma kərzadamara ewet daa slam a.

49-50 Ta pas mendøvey nga bəla na, maslan hay nga Gazlavay da vad, a samawa la nga wunkey ndəhay ma namar ray a Gazlavay ta ndəhay masa ta mebərey. Ndəhay masa ta mebərey na, a kəzlamata aa awaw mendøvey ba. Fetede na, a təwam la, asaya, aa pədam sler la. Sariya nga Gazlavay ma da key na, ara anda kede.»

Mey da ray mey hay mengey nga Yesu

51 Yesu aa cəfdata gula anga hay, a ləvtar: «Akwar ta sərmara mabara nga mey hay mengey kede la daw?» A mbəddamara, a ləvmar: «Ahaw, ala ta sərmara la.»

52 Da ray ngene, Yesu a ngatar mey mekele saya, a ləvtar: «Kwa waawa da wuzlah *ndəhay maa sərkada kwakwas nga Mawiz ma təba amba Gazlavay a wey da ray a na, anga anda bay nga way ma badərwa zleley anga mawiya ta magurma nga jəney ndəhay.»

Ndəhay da Nezeret a rəsmara Yesu

(Mark 6.1-6; Luk 4.16-30)

53 Masa Yesu maa guzltar a ndəhay ta mey hay mengey cay na, ta', a sləkdey fetede,

54 a daw a *Nezeret, slala masa aa ma gəley da hwaɸ a. Fetede aa sərkadata ndəhay daa *way-mewuzey-mey nga Gazlavay. Ndəhay tabiya daa way a, a rəzlam, a ləvam: «Haya! Ma vəldara lengeşl a ndaw a kede nga sərey cek hay anda kede na, wa? A hətərwa lengeşl nga sərey cek hay a kede na, dama?»

55 Anga na, bəzey nga ndaw ma sla hwadam, ba diya? Mamaha na, *Mari, ba diya? Ata *Jak, *Jawzef, *Simanjw leş Jud na, məlmaha hay ba diya?

56 Dam-mamaha hay tabiya, ata da wuzlah aləkwa fede, ba diya? Kaa a hətərwa lengeşl kede ta gədan kede na, dama?»

57 Ara maja mewulkey ata ngene, ata ma təbmara mey nga Yesu ba. Da ray ngene, Yesu aa guzltar, a ləvtar: «*Ndaw ma təla mey nga Gazlavay na, ndəhay a təbmara mey anga kwa dama dama, ama ma təbmara ba na, si ndəhay daa hwayak anga, ndəhay daa səkway anga.»

58 Yesu a key maazla hay fetede nekədey gway maja ata ma təbmara mey anga ba.

14

Mey da ray meməcey nga Jan-Baptis

(Mark 6.14-29; Luk 9.7-9)

¹ Daa ηgene, *Herawt, bay daa hwayak nga *Galile, a cənda mey da ray Yesu.

² Da ray ηgene, aa guzltar a madərlam anğa hay, a ləvtar: «Ndaw aha na, ara *Jan-Baptis. A sləkdfawa daa meməcey. Ara maja ηgene, anğa ta gədan ηga key maazla hay.»

³⁻⁴ Herawt aa guzley anda keđe na, maja ara anğa ta ray anğa ma kəda Jan-Baptis a vagay. Ehe mey da ray Jan-Baptis a: Herawt a la Herawdiyat, ηgwas ηga məlmaha *Fəlep ηga ηgwas anğa, daa masa Fəlep aa ta dey d'agay. Maja ηgene, *Jan a ləvar a Herawt: «Kah ma la ηgwas ηga məlmakw ηgene na, ara cek matəkakaya daa kwakwas aləkwa.» Da ray ηgene, Herawt a ləvtar a sewje anğa hay ηga kərzamara Jan a. Ta', sewje anğa hay a, a kərzamara, a jəwmara, a kəzlamara aa fərsəne.

⁵ Herawt a wufey ηga kəda Jan a vagay, ama a zlurey ta ndəhay *Jəwif hay maja a wulkam na, Jan a ara *ndaw ma təla mey ηga Gazlavay.

⁶ Yaw, ta pas gwagway ηga mesərfedey d'ar ηga mayawa ηga Herawt na, dam ηga Herawdiyat a gərvey fa mey ηga ndəhay mazəltakaya aa gwagway a. Megərvey a, a mbafar kalah a Herawt.

⁷ Ta', a mbedey fa mey ηga ndəhay, a ləvar a dam aha: «Kwa meeme masa kah maa cəfdafaya na, ya vəldakawa la.»

⁸ A mbəddara a Herawt, a ləvar: «Vəldiwa ray ηga Jan-Baptis aa vəley wure keđe fedə.» A ləvar anda ηgene na, maja mamaha ma balar mey.

⁹ Masa Bay Herawt ma cənda mey a keđe na, mevel a tədar. A gwa ηga mbədda mey anğa ha saba, maja ta mbedey sem fa mey ηga ndəhay mazəltakaya heyey. Da ray ηgene, ta', a vəley cəved ηga vəlda ray ηga Jan-Baptis ηgada dam aha.

¹⁰ Ta', a slərey ndaw aa fərsəne. Ndaw aha a dəsələrwa ray ηga Jan-Baptis,

¹¹ a parawa aa vəley, a handərwa, a vəldara a dam a heyey. Ta', dam aha a handara a mamaha.

¹² Fa dəba ha, gula hay ηga Jan-Baptis a, a diyam a lamara vagay a, a pəshamara aa cəvay. Ta', a diyam, a wuzdamara mey a, a Yesu.

Yesu a vəltar cek mezəmey ηgada ndəhay ma fəna gabal zlam

(Mark 6.30-44; Luk 9.10-17; Jan 6.1-14)

¹³ Daa masa Yesu ma cənda mey da ray meməcey ηga *Jan-Baptis la na, pərta! a sləkdfey, ta', a daw ta kwambiwal

amba a wusey taava an̄ga aa slam masa ndəhay da hwaɗ a daa ba. Masa ndəhay da slala hay ma cəndamara an̄ga sem na, a diyam ta mey dəhwa ha ta salay, a səpmar wurzay.

¹⁴ An̄ga ma wusey cay na, ta', a bərn̄gawa daa kwambiwal a, a hətfatar ndəhay makustakaya ga fetede. A sərfatar dey-ceceh, ta', a mbəldata masa-macay hay da wuzlah ata.

¹⁵ Ta pas n̄gaa kwaɗ na, *gula hay n̄ga Yesu a n̄gəcham fa vəɗa, a ləvmar: «Wure keɗe hakwaɗ cay, aləkwa da wuzlah-ley. N̄gama na, ka mbəɗtar mey a ndəhay a n̄ga diyam a slala hay, amba a həɗkam cek mezəmey.»

¹⁶ Yesu a mbəɗdatara, a ləvtar: «Ndəhay a na, si a diyam a slala hay daw? Akwar, ray akwar na, vəlmatar cek mezəmey a.»

¹⁷ Ama a mbəɗdamara, a ləvmar: «Kwa cek mezəmey fa ala daa ba, si peɗ zlam ta ewet cew daada gway.»

¹⁸ Yesu a mbəɗdatara, a ləvtar: «Handamərwa fede.»

¹⁹ Fa dəba ha, Yesu a ləvtar n̄gada ndəhay tabiya n̄ga njam a hwayak. An̄ga hal! a həlta peɗ zlam ta ewet cew heyey, a ban̄gaɗa dey a vaɗ, a kar suse a Gazlavay. Fa dəba ha, a papəsa peɗ e, ta', a vəldatara a gula an̄ga hay amba a wunkamatara a ndəhay makustakaya heyey.

²⁰ Kwa waawa a zəmey haa a rəhey. Gula an̄ga hay ta', a cakalamara siya n̄ga peɗ e. Membəkey na, a rəhey gadakar kuraw a ray a cew.

²¹ Ndəhay ma zəmam peɗ e na, ata ga ara mey ba, a fəna ndəhay gabal zlam, n̄gusay ta bəza hay manjar n̄ga sləfam.

*Yesu a daw ta salay da ray dəhwa n̄ga Galile
(Mark 6.45-52; Jan̄ 6.15-21)*

²² Masa ndəhay a ma zəmam cek cay na, wure wure n̄gene Yesu ta', a təktaɗ ɗay a gula an̄ga hay n̄ga təpam aa kwambiwal amba ata na, a zləngam teesed' a dey lan̄gar n̄ga dəhwa n̄ga *Galile. Yesu na, a n̄jey fa dəba ɗagay amba a mbəɗtar mey a ndəhay makustakaya heyey n̄ga diyam a way.

²³ Masa ta mbəɗtar mey a ndəhay a cay na, ta', a təpey aa ray n̄ga an̄gwa n̄ga dərwa ɗan̄gay. Haa tavaɗ, an̄ga pal taava an̄ga da an̄gwa ha cənḡa.

²⁴ Kwambiwal masa gula an̄ga hay da hwaɗ a heyey, an̄ga da wuzlah yam, an̄ga dərəɗ ta rav-zazay, van̄gwala n̄ga yam fa zakada *kwambiwal a maja memed fa key ga n̄gada ray ata.

²⁵ Fa dəba ha, gweegwe slam n̄gaa pərek na, Yesu ta', a daw ta salay da ray yam n̄gada fa ata.

²⁶ Masa gula anġa hay a ma hətmar fa daw da ray yam na, a zluram ga, aa wasam pər-par! Aa guzlam da wuzlah ata, a ləvam: «Ara mamayam!» Ta', a wudam ta gədan maja mandərzay fa katar.

²⁷ Ama, wure ŋgene, Yesu aa guzltar, a ləvtar: «Dəkmara mevel! Ara yah, ka da zluram ba!»

²⁸ *Piyer a mbəddara, a ləvar: «Bay adaw, da ara kah fara fara na, vəlya cəved amba ya daw da ray yam ŋgada fa kah taw.»

²⁹ Ta', Yesu a ləvar a Piyer: «Sawa!»

Piyer a bərnġawa daa kwambiwal, a daw da ray yam ta salay ŋgada fa Yesu.

³⁰ Ama, masa aa ma nəka memed fa key ta gədan na, mandərzay a kar. A zlar ŋga mbəzey asi yam, ta', a wudey, a ləvey: «Bay mahura, ləhdaya!»

³¹ Wure wure ŋgene, Yesu tal! a təley har, a kərza fa har, a ləvar: «Ka wulkey cew cew na, maja me? Kah, ndaw masa ma paya ŋga ndaw akah fara fara ba ŋgene.»

³² Fa dəba ha, ta', a təpam cewete aa kwambiwal a. Wure wure ŋgene, memed e, deŋ! a lecey, a key saba.

³³ Gula hay ŋga Yesu masa daa kwambiwal, a ragadam fa mey anġa, a ləvmar: «Fara fara, kah na, Bəzey ŋga Gazlavay.»

Yesu a mbəley masa-macay hay daa hwayak ŋga Genezeret

(Mark 6.53-56)

³⁴ Masa ata Yesu ta gula anġa hay ma təngam la a dey lanġar ŋga dəhwa ŋga *Galile heyey na, a wusam aa hwayak daha mezəley Genezeret.

³⁵ Ndəhay daa slam aha na, a səmra ara Yesu. Ta', a kadamatara mey a, a ndəhay da slala hay mekele mekele daa hwayak a. Daa masa ata ma cəndamara mey a cay na, ta', a handamar masa-macay hay.

³⁶ A bərkwamara amba masa-macay hay a, a gəsam har kwa fa mey ŋga zana anġa gway. Ndəhay ma gəsfamar har cəpa na, ta mbəlam sem.

15

Mey ŋga Yesu da ray kwakwas ŋga Jəwif hay

(Mark 7.1-13)

¹ Fa dəba ha, *Fariza hay ta *ndəhay maa sərkada kwakwas ŋga Mawiz a samawa da *Jeruzelem fa Yesu, a ləvmar:

² «Gula akah hay a zløbmara kwakwas nga papañ nga papa aləkwa hay zleezle na, maja me? A da zømam daf na, a pørmara har anda kwakwas aləkwa ma lövey ba na, kwara?»

³ Yesu a mbødfdatara, a lövtar: «Akwar na, ka zløbmara *mewey hay nga Gazlavay ta mesøpey kwakwas akwar hay na, maja me?»

⁴ Gazlavay a lövey: “Natar ray ngada ata papakw ta mamakw.” Asaya, “Ndaw ma cøfa papaha, da daa ba, ma cøfa mamaha na, si a kødmara ndaw aha vagay.”

⁵ Ama akwar na, akwar faa sèrkadam ndøhay, ka lövam ndaw a gwa nga lövar a papaha, da daa ba, a mamaha: “Cek masa yah ma da vøldakawa nga jønka heyey na, ya vøldakawa daa saba, maja yah ma vøldara sem a Gazlavay.”

⁶ Ngene na, ndaw aha a nar ray a papaha, da daa ba, a mamaha ha saba, ba diya? Ara anda ngene, akwar fa nøsmara mey nga Gazlavay, ta mesøpey kwakwas akwar.

⁷ Akwar na, ndøhay masa ta neneh cew! *Izay, *ndaw ma tøla mey nga Gazlavay zleezle maa guzley da ray akwar na, anja fara. Izay a, a lövey:

⁸ “Gazlavay a lövey: Ndøhay kefe fa høslmaya ray ta mey nga tede, ama mevel ata na, aa dørenj ta yah.

⁹ Ata fa hølmamaya, ama mehølmey a, ta tørey sem nga cek nga tede, maja kwakwas masa ata maa sèrkadamara ngene na, ara kwakwas nga ndaw-magødanj daada gway.”»

*Mey da ray cek mekey mebørey a ndaw
(Mark 7.14-23)*

¹⁰ Fa døba ha, Yesu a zøltørwa ndøhay makustakaya ta', aa guzltar, a lövtar: «Jøkam slømay, cøndamara mey kefe maaya maaya:

¹¹ Cek masa ndaw ma ndøkwd a mey, ma zøma na, a kar mebørey ba, ama ma kar mebørey na, si mey ma bawa da mey anja.»

¹² Ta', *gula hay nga Yesu a ngøcham a cakay a, a lövmar: «Ka fa søra mey masa kah maa guzlða kefe na, fa catar mevel a *Fariza hay, ba diya?»

¹³ Yesu a mbødfdatara, a lövtar: «Kwa wudez wura wura masa Papay da vad, ma røva ba na, a mødmara la.

¹⁴ Mbøkdamata! Ata na, wulaf hay ma dødam wulaf hay anda ata. Da ndaw-wulaf a døfey wulaf cøla ta zlanday na, ata cewete a tødam la aa vøgeð, ba diya?»

15 Fa dɔba ha, *Piyer ta', aa guzlar, a lɔvar: «Wuzdandara mabara nɔga mey a kedɛ ceɣ.»

16 Yesu a lɔvey: «Akwar gula adaw hay kwa na, ka cɔndamara mey a kedɛ ba saya na, gway daw?»

17 Cek masa ndaw ma ndɔkwda a mey, ma zɔma na, a daw nɔgada hwaɗ nɔga ndaw aha. Fa dɔba ha, a bawa a palah. Ka ta sɛrmara daa ba cɔnɔga daw?»

18 Ama mey masa ndaw maa guzlda ta mey a nɔga na, a sawa dɔga daa mevel a nɔga. Nɔgene, a kar mebɔrey a ndaw aha.

19 Mewulkey maaya ba a bawa na, daa mevel nɔga ndaw. Ara mewulkey a ma hɔlda ndaw nɔga kɔɗey ndaw vagay, nɔga ley vaw saw da palah, nɔga key cek malamba saw kɔne, nɔga leley, nɔga mbɔrzley a ray ndaw, leɲ nɔga key mbadfa fa ndɔhay.

20 Ara sɔkway nɔga cek hay malamba anda kedɛ ma kar mebɔrey a ndaw. Ama, da ndaw a zɔma cek ta har manjar nɔga pɔrey na, ara mebɔrey ba.»

Nɔgwas masa Jɔwif ba a pa Yesu nɔga ndaw a nɔga fara fara (Mark 7.24-30)

21 Fa dɔba ha, Yesu pɔrta! a slɔkɗey daa slam aha, tall a diyam ta gula a nɔga hay aa hwayak mekele masa berney nɔga Tir ta berney nɔga Sidanɔw da hwaɗ a.

22 Nɔgwas daa hwayak a daha, a nɔga dam Kana. A sawa fa Yesu, a kar ambahw, a wudey, a lɔvar: «Waa Bay mahura, Bɔzey nɔga *Davit! Dam adaw daha, a nɔga ta malula da ray, fa sɔrda banay kalah. Sɔrfaya dey-ceceh may taw!»

23 Yesu taa guzlar kwa mey pal daa ba. Gula a nɔga hay a nɔgɔcham a cakay a, a lɔvmar: «Mbɔɗar mey a nɔgwas a kedɛ, maja fa sɔpndakwar wurzay ta mewudey.»

24 Yesu a mbɔɗɗatara, a lɔvtar: «Gazlavay a slɔrɗiwa na, fa ndɔhay *Israyel hay gway. Ata na, maazɔɗtakaya anda tɔban hay manjar mecɔkwer.»

25 Ama, nɔgwas a heyey a daw, a regedey fa mey a nɔga, a lɔvar: «Waa Bay mahura, jɔnya may taw!»

26 Yesu a mbɔɗɗara, a lɔvar: «Mevɔley ɗaf nɔga bɔza hay nɔgada gɔɗey hay na, maaya daw?»

27 Nɔgwas a heyey a lɔvar: «Ahaw, Bay adaw, kaa gɔɗey hay na, a zɔmam meepɔsey nɔga ɗaf ma kɔzley daa slam masa bay ata hay ma zɔmam ɗaf cɔnɔga, ba diya?»

28 Da ray nɔgene, Yesu a mbɔɗɗara, a lɔvar: «Maaya kwakwa! Kah ma paya la nɔga ndaw akah fara fara. Cek

aha nga key anda kah ma wufey.» Daa ngene, dam anga heyey a mbøley.

Yesu a mbøley masa-macay hay ga

²⁹ Fa døba ha, Yesu a sløkdey daa slam aha, a daw ta mey døhwa nga *Galile. Ta', a tøpey aa ray nga anywa, cøkwan! a njeý fetede.

³⁰ Ndøhay makustakaya ga, a samawa fa vøða, a handamawa ndøhay jegwer hay, ndøhay wulaf hay, ndøhay maahølbatakaya hay, madagazlam hay len ndøhay ta macay hay mekele mekele ga. A njadamata fa mey nga Yesu. Ta', a mbøldata.

³¹ Ndøhay makustakaya heyey a røzlam maja ata ma høtmatar madagazlam hay heyey faa guzlam døba, ndøhay maahølbatakaya hay heyey ta mbølam cay, ndøhay jegwer hay heyey fa diyam ta salay ata hay, wulaf hay may fa høtmar dey døba. Ta', a hølmamara Bay Gazlavay nga *Israyel hay.

Yesu a vøltar cek mezømey ngada ndøhay ma føna gabal møfad

(Mark 8.1-10)

³² Yesu ta', a zøltørwa gula anga hay, a løvtar: «Dey-ceceh fa kaya fa ndøhay makustakaya kefe, maja anga kaa ðar maakar ata da cakay aðaw, wure kefe cek mezømey da har ata daa saba. Ya wufey nga mbøkdata nga diyam a way ta may ba, maja da a da høtam gødan daa cøved nga wusey a way ata hay ba kwa.»

³³ Gula anga hay a mbøðdamara, a løvmar: «Kaa aløkwa da wuzlah-ley kefe na, ya da høtmawa cek mezømey nga røhdata ndøhay tabiya makustakaya kefe na, dama?»

³⁴ Yesu aa cøfdata, a løvtar: «Da har akwar fefe kaa na, peñ we?» A mbøðdamara, a løvmar: «Da har ala na, peñ maasala ta ewet mecøhe mecøhe nekødey gway.»

³⁵ Yesu a løvtar a ndøhay makustakaya heyey nga njam a hwayak.

³⁶ Anga ta', a høla peñ maasala ta ewet hay heyey, a kar suse a Gazlavay, a papøsa, ta', a vøldatara a gula anga hay. Gula anga hay a, a wunkamatara a ndøhay makustakaya ha.

³⁷ Kwa waawa ta høtey cek mezømey la, haa a røhey. Ta', gula anga hay a cakalamara siya mambøkakaya. Macakalakaya ha a røhey gadakar mahura mahura maasala.

³⁸ Yaw, ndəhay ma zəməmara peŋ ta ewet e na, ndəhay gabal məfad, ŋgusay ta bəza hay manjar ŋga sləfam.

³⁹ Fa dəba ha, Yesu a mbəkdata ndəhay makustakaya ha ŋga diyam a way ata hay. Ta', a təpey aa kwambiwal, a diyam aa hwayak mezəley Magadaŋ.

16

*Mahura ŋga Jəwif hay aa cəfdamara Yesu ŋga key maazla
(Mark 8.11-13; Luk 12.54-56)*

¹ Fa dəba ha, *Fariza hay ta ndəhay *Saduse hay a ŋgəcham a cakay Yesu ŋga jadamura, aa cəfdamara amba a key maazla ŋga wuzda gədaŋ aŋga a sawa ta fa Bay Gazlavay.

² Yesu a mbəfdatara, a ləvtar: «[Masa pas fa kəzley, gazlavay fa key magaza na, ka ləvam mandaw na, gazlavay ŋga var a key daa ba.

³ Asaya, pərek pərek da masa pas fa bawa, fa cey na, ka ləvam tasana na, var a pey la. Anda kedə, da akwar fa nəkam dey a gazlavay na, ka səmra cək ma da key tasana ta cək ma da key mandaw. Kaa sləra masa yah ma ka na, ka səmra mabara ha ba na, kwara?]

⁴ Akwar ndəhay masa wure kedə na, malamba hay, akwar ma mbəkdamara Bay Gazlavay sem! Ka wudam ŋga hətam maazla ma wuzdərwa gədaŋ ŋga Gazlavay fara daw? Kwa akwar fa da hətam maazla ha daa ba, si maazla anda ma key ta *Jawnas * zleezle.»

Fa dəba ha, Yesu ta', a mbəkdata, a daw.

*Mey-menğey da ray meesərkedey ŋga Fariza hay ta ŋga
Saduse hay
(Mark 8.14-21)*

⁵ Daa masa ata Yesu ta gula aŋga hay ma təŋgam sem a dey laŋgar ŋga dəhwa na, gula aŋga hay a ta sərfadamara ŋga handawa peŋ daa ba.

⁶ Ta', Yesu aa guzlar, a ləvtar: «Wam vaw fa cək ma həsla peŋ ŋga *Fariza hay leŋ ŋga *Saduse hay!»

⁷ Da ray ŋgene, gula aŋga hay aa guzlam da wuzlah ata, a ləvam: «Aa guzley anda kedə maja aləkwa ma sakurwa ta peŋ daa ba daw?»

⁸ Yesu na, ta səra mey masa ata maa guzldamara da wuzlah ata sem. Da ray ŋgene, aa cəfdamara, a ləvtar: «Akwar ndəhay masa ma pamara Gazlavay ŋga ndaw akwar fara

fara ba ηgene, ka wulkam da ray peɲ masa akwar ma handamawa daa ba na, maja me?

⁹ Haa wure keɗe akwar na, ka cɛndamara mey a ba cɛnɲa daw? Sɛrfadamara peɲ zlam masa yah ma wunkatara ηgada ndɛhay gabal zlam heyey. Mambɛkakaya na, a rɛhey gadakar we?

¹⁰ Asaya, sɛrfadamara peɲ maasala masa yah ma wunkatara ηgada ndɛhay gabal mɛfad heyey. Mambɛkakaya na, a rɛhey gadakar mahura mahura we?

¹¹ Yaw, daa masa yah maa guzlkwar: “Wam vaw fa cek ma hɛsla peɲ masa fa Fariza hay leɲ fa Saduse hay” na, yaa guzley na, da ray peɲ ba. Kaa ka cɛndamara ba na, kwara?»

¹² Anda keɗe, *gula hay ηga Yesu heyey a sɛrmara, Yesu aa guzltar na, da ray cek ma hɛsla peɲ fara fara ba, ama a ηgatar mey da ray meesɛrkedey ηga Fariza hay ta ηga Saduse hay.

*Piyer a wuzda, Yesu na, ara Kɛriste
(Mark 8.27-30; Luk 9.18-21)*

¹³ Yesu a wusey aa slam masa gweegwe ta slala Sezere-Fɛlep. Aa cɛɗɗata gula aɲga hay, a lɛvtar: «Ndɛhay a padamaya, yah, *Bɛz ηga Ndaw na, ηga wa?»

¹⁴ A mbɛɗdamara, a lɛvmar: «Ndɛhay siya a lɛvam kah na, *Jan-Baptis, mekele hay a lɛvam, kah na, *Eli, *ndaw ma tɛla mey ηga Gazlavay zleezle. Ndɛhay mekele hay saya a lɛvam, kah na, Jeremey, da daa ba, ndaw mekele dasi ndɛhay ma tɛla mey ηga Gazlavay zleezle.»

¹⁵ Ta', Yesu aa cɛɗɗata saya, a lɛvtar: «Kaa akwar may, ka lɛvam yah na, wa?»

¹⁶ *Simanɲw *Piyer a mbɛɗɗara, a lɛvar: «Kah na, *Kɛriste, Bɛzey ηga Gazlavay, ndaw masa aɲga daha ta dey ηga sɛrmataw.»

¹⁷ Yesu aa guzlar, a lɛvar: «Simanɲw, bɛzey ηga *Jawnas, maaya ηga Gazlavay aa da ray kah, maja mey masa kah maa guzlda keɗe na, ara ndaw-magɛɗan ma wuzdakawa ba, ama ara Papay da vad ma wuzdakawa.

¹⁸ Yaw, yah may, ya fa lɛvka, kah na, mezɔley akah Piyer anda melɔvey “pɛraɗ.” Ya da pa *mecɛmey-ray ηga ndɛhay aɗaw hay da ray pɛraɗ a. Kwa memɛcey na, fa da gwa ηgaa zɛɗɗa daa ba.

¹⁹ Ya da vɛlka gɛɗan ηga wurey cɛved ηgada ndɛhay amba a tɛram ndɛhay ηga Gazlavay. Mey masa kah ma da jɔwa da bɛla na, aɲga majɔwkaya da gazlavay da vad

may. Asaya, mey masa kah ma da pəska da bəla na, anğa mapəskakaya da gazlavay da vad may.»

²⁰ Yesu ta', a kətata gula anğa hay, a katar mey, a ləvtar: «Fara fara yah na, Kərıste, ama ka da wuzdamara a ndəhay ba.»

Ndaw ma wufey nga səpa Yesu na, si a key me?

(Mark 8.27-30; Luk 9.18-21)

²¹ Dəga ta pas masa *Piyer ma wuzda Yesu ara *Kərıste heyey na, Yesu a wuztar mey ngada gula anğa hay, a ləvtar: «Si ya daw a *Jeruzelem. Mahura hay nga *Jəwif hay, *bay-ray hay nga ndəhay ma ka kwakwas nga Gazlavay, lej *ndəhay maa sərkada kwakwas nga Mawiz na, a sərdamaya banay la fetede, a kədmaya la vagay. Ama nga dar maakar a na, ya sləkdawa la daa meməcey.»

²² Piyer ta', a zəla Yesu ta cakay, a mbədar ray, a ləvar: «Kay! Bay mahura, Gazlavay nga ka kəne ba! Anja səkway nga cek anda ngene na, nga hətfaka ba səlak!»

²³ Ama Yesu pəla! a mbədey dey ngada fa Piyer, a ləvar: «Hway la da cakay adaw, kah, *Satan. Kah na, ka fa səpey nga zlanğadadaya daa cəved adaw daw? Maja mewulkey akah ngene na, ara mewulkey nga Gazlavay ba, ama ara mewulkey nga ndaw-magədan gway.»

²⁴ Ta', Yesu aa guzltar a gula anğa hay, a ləvtar: «Da ndaw a wufey nga səpya na, si a mbəkda mewulkey fa ray anğa, a səpya ta mevel pal, si a bəsa banay ma da sawa a ray anğa maja yah, anda yah ma da məcey fa hwadam mazlanğalakaya.

²⁵ Sərmara, kwa waawa ma wufey nga ləhda heter anğa na, a key aa zədda, ama ndaw maa zədda heter anğa maja yah na, a hətər la aa slam a.

²⁶ Da ndaw a hətey cek hay tabiya masa anğa ma wufey da bəla kefe, ama taa zədda heter anğa sem na, cek hay a tabiya ngene, ta ləhdamara ndaw a la daw? Yaw, ndaw a gwa nga mbəda heter anğa na, ta me?

²⁷ Sərmara, yah, *Bəz nga Ndaw na, ya da sawa ta gədan nga Papay lej ta maslan anğa hay da vad. Ya da pəla mawurbay kwa nga waawa cəpa, tede fa slərə masa ndaw a ma ka.

²⁸ Ya fa ləvkwar fara fara, ndəhay siya da wuzlah akwar fede, fa da məcəm daa ba haa ata ma hətmaya ta dey ata la dagay, masa yah, Bəz nga Ndaw, ya fa zəma bay adaw.»

16:19 16.19 Lk 11.52; Mt 18.18; Jan 21.15-17 **16:20 16.20** 17.9 **16:21 16.21** 17.22-23; 20.17-19; 26.2 **16:24 16.24-25** 10.38-39; Lk 14.27; 17.33; Jan 12.25-26; 1Pi 2.21 **16:27 16.27** Ps 62.13; Jəw 34.11; Mt 7.23-27; 13.41; 25.31-46; Lk 13.27; Jan 5.29; Rm 2.6; 1Kwr 3.13-15; 1Pi 1.17; 2Tm 4.14; CWJ 22.12 **16:28 16.28** 10.23; 24.34; Mk 9.1; 13.30; Lk 9.27; 21.32

17

Yesu a mbədey fa dey nga gula anga hay
(Mark 9.2-13; Luk 9.28-36)

¹ Dar maakwaw fa dəba ha na, Yesu ta', a zelta ata *Piyer, *Jak, leŋ *Jaŋ, məlmaŋ nga Jak a, a ŋgelta aa ray nga anɣwa maazəma, a njam fetede taava ata.

² Yesu a, pəla! a mbədey fa dey ata, dey anɣa a wedey anda pas, zana anɣa mabara ndəf-nded.

³ Wure wure ŋgene, ata *Mawiz ta *Eli a wuzmatar vaw a gula anɣa hay heyey *. Gula hay a, a hətmatar fa kam maɣay ta Yesu a.

⁴ Da ray ŋgene, Piyer aa guzlar a Yesu, a ləvar: «Waa Bay Mahura, maaya na, ya njakwa fede. Da ka wudəy na, amba ya kəreɣ slam hay maakar, pal ŋgada kah, pal ŋgada Mawiz, pal ŋgada Eli.»

⁵ Daa masa faa guzley araŋ na, mekwtene mewedey ndəf-nded! a sawa, sərat! a sərtata. A cənam ɗay maa guzla daa mekwtene he, a ləvey: «Kede he ara Bəzey aɗaw masa yah ma wuɗa kalah. Ara bəzey masa ya faa səmey ga da ray a. Jəkfamar sləmay!»

⁶ Masa *gula hay nga Yesu ma cəndamara la na, a zluram ga, ta', a tədam ta mey ta mey, daŋgay dar! a hwayak.

⁷ Wure ŋgene, Yesu a ŋgəchawa a cakay ata, a wusta ta har, a ləvtar: «Sləkɗam, ka da zluram ba.»

⁸ A baŋɗamara dey na, a hətam ndaw mekele saba, si Yesu taava anɣa gway.

⁹ Masa ata fa bəŋgamawa da anɣwa ha na, Yesu a kətata, a ləvtar: «Ka da wuzdamara cek masa akwar ma hətmar kede a ndaw ba, haa kasl pas masa yah, *Bəz nga Ndaw, ma da sləkɗawa daa meməcey.»

¹⁰ Ta', gula hay nga Yesu aa cəɗamara, a ləvmar: «Ndəhay maa sərkada kwakwas nga Mawiz a ləvam si Eli a sawa la teesed da ray *Kəriste na, maja me?»

¹¹ Yesu a mbəɗɗatara, a ləvtar: «Ahaw, fara fara si Eli a sawa nga ɗiyta cek hay cəpa maaya maaya.

¹² Ama, yah na, ya fa ləvkwar, Eli ta sawa cay. Ndəhay ta hətmar la, ama ta səmra daa ba, ta kamar cek maaya ba la anda mevel ata ma wudəy. Ara kəne may, ndəhay a ma da sərdamaya banay, yah, Bəz nga Ndaw.»

¹³ Anda kede, gula hay nga Yesu ta səmra sem Yesu aa guzlar na, da ray *Jaŋ-Baptis.

17:1 17.1 5.1 17:2 17.2-8 2Pi 1.16-18; CWJ 1.16 * 17:3 17.3 Ata Mawiz ta Eli na, ta məcam sem dəga zleezle, ta wuzmatar vaw la a gula hay nga Yesu. 17:5 17.5 3.17 17:9 17.9 16.20 17:10 17.10-11 Mal 3.23-24; Mt 16.14 17:12 17.12-13 11.14; Lk 1.17; Jaŋ 1.21

Yesu a bada cek da ray bəzey
(Mark 9.14-29; Luk 9.37-43a)

¹⁴ Masa ata Yesu ta gula anɗa hay maakar heyey ma wusam la a cakay ndəhay makustakaya na, ta', ndaw daha a ɗgəchawa a cakay Yesu, a regedey fa mey anɗa,

¹⁵ a kar ambahw, a ləvar: «Bay Mahura, bəzey adaw anɗa ta cek da ray, fa bərzlada, fa sərda banay. Da cek aha ta zlar ɗga bərzlada la na, ta pas lanɗar a təɗɗa aa awaw, da daa ba, aa yam. Sərfar dey-ceceh may taw!

¹⁶ Ya ta handa la fa gula akah hay, ama ta gwamara ɗga mbəldamara daa ba.»

¹⁷ Yesu ta', aa guzley, a ləvey: «Hey! Akwar ndəhay marəzltakaya masa ma pamaya ɗga ndaw akwar fara fara ba keɗe. Ya da nɗey ta akwar na, haa ta vara? Ya da bəskwar na, haa ta vara? Handamiwa bəzey a feɗe!»

¹⁸ Masa ata ma handamərwa bəzey a la na, Yesu ta', aa bəcar a cek da ray bəzey a. Ta', cek aha a bey. Wure ɗgene, bəzey a, a mbəley.

¹⁹ Masa ata Yesu ta gula anɗa hay ata taava ata na, ta', gula anɗa hay a, a ɗgəcham a cakay a, aa cəɗdamara, a ləvmar: «Ala ta gwamara ɗga badamara cek da ray bəzey a daa ba na, maja me?»

²⁰ Yesu a mbəɗɗatara, a ləvtar: «Maja akwar fa təbmara mey ɗga Gazlavay fara fara daa ba. Ya fa ləvkwara fara fara, da akwar fa təbmara mey ɗga Gazlavay kwa kuset kəɗey həma babəza ɗga bazlawar na, ɗgene, ka gwamara ɗga ləvmar a anɗwa mahura keɗe, sləkɗey la feɗe, daw ɗgada fatadɗay na, anɗwa ha a sləkɗey la. Anda keɗe, cek masa ta gəra ɗga key fa akwar na, daa ba. [

²¹ Ama ɗga bey cek anda keɗe da ray ndaw na, si ta medərey-danɗay a Bay Gazlavay len ta mekey *daliyam.]»

Yesu aa guzley saya da ray meməcey anɗa ta masləkɗawa anɗa

(Mark 9.30-32; Luk 9.43b-45)

²² Ta pas lanɗar daha, ata Yesu ta gula anɗa hay a vəhmawa a *Galile, ata tabiya daa slam a. Yesu ta', aa guzltar, a ləvtar: «A da kərzamaya yah, *Bəz ɗga Ndaw, a da vəldamaya a har ndəhay.

²³ Ndəhay a, a da kəɗmaya vagay. ɗga ɗar maakar a na, ya sləkɗawa la daa meməcey.»

Mey a keɗe a təɗtar mevel a gula anɗa hay.

Mey da ray budaw

²⁴ Ata Yesu ta gula anɔa hay a diyam a Kapernayum. Ata ma wusam la na, ndohay ma cakala budaw nɔa *Way-mekey-kwakwas nɔa Gazlavay ata fetede. Ta', ndohay a, a nɔgoham a cakay *Piyer aa cɔfdamara, a lɔvmar: «Bay akwar na, a poley budaw nɔa Way-mekey-kwakwas nɔa Gazlavay ba daw?»

²⁵ Piyer a mbɔddatara, a lɔvtar: «'A, 'a, fa poley.»

Daa masa Piyer fa mbzey a way masa Yesu aa da hwad a na, Yesu aa guzlar teesed, a lɔvar: «Simanɔw Piyer, ya wufey nɔaa cɔfdaka, ma pɔlam budaw a bay hay da bɔla kede na, wa hay wa? Ara bɔza hay nɔa bay hay a daw? Da daa ba, ara zɔgdaw hay daw?»

²⁶ Piyer a mbɔddara, a lɔvar: «Ara zɔgdaw hay.»

Yesu a lɔvey: «Anda kede na, bɔza hay nɔa bay a pɔlam budaw ba.

²⁷ Ama nɔgama ya pɔlkwa budaw a, amba mevel a catar ba. Anda kede, daw aa dɔhwa nɔa *Galile, kɔzla tetɔlem † akah a hwad a. Ewet masa kah ma da lawa teesed na, ka wura mey nɔa ewet e, ka hɔtfey bɔrey nɔa dala mak nɔa pɔndakwara budaw a la. Larawa amba ka pɔndakwara budaw alɔkwa cew e.»

18

Ma da key mahura na, wa?

(Mark 9.33-37; Luk 9.46-48)

¹ Daa nɔgene, *gula hay nɔa Yesu a nɔgoham a cakay a, aa cɔfdamara, a lɔvmar: «Da wuzlah ndohay masa Gazlavay fa wey da ray ata na, mahura na, wa?»

² Yesu ta', a zɔlwa bzey mecɔhe, a lacada a wuzlah ata.

³ Ta', aa guzlar, a lɔvtar: «Ya fa lɔvkwara fara fara, da akwar ta mbɔdam amba ka tɔram anda bɔza hay mecɔhe daa ba na, nɔgene, akwar fa da nɔam a wuzlah ndohay masa Gazlavay fa wey da ray ata na, daa ba sɔlak.

⁴ Ndaw ma pa ray anɔa nɔa mecɔhe anda bzey mecɔhe kede na, ara anɔa ma da key mahura da wuzlah ndohay masa Gazlavay fa wey da ray ata.

⁵ Kwa waawa ma tɔbey bzey anda bzey mecɔhe kede maja a wufya na, a key nɔgene, a tɔbey yah, ray adaw.»

Mewey vaw fa cek ma bata ndaw

(Mark 9.42-48; Luk 17.1-2)

⁶ «Asaya, kwa waawa ma betey ndaw pal dasi ndohay ma tɔba mey adaw hay kede nɔa key mebɔrey na, nɔgada

aŋga na, ŋgama ata ma jəwmar aŋgwa mahura a ɗay, ma kəzlamara aa bəlay gway.

⁷ Kay! Banay daha fa ndəhay da bəla kefe, maja cek hay ga fa təknamata ndəhay ŋga key mebərey. Ahaw fara, cek hay a, a da batamata ŋga key mebərey mandaw mandaw. Ama banay a sawa la a ray ndaw ma həldata ndəhay ŋga key mebərey a.

⁸ Da har akah, da daa ba, salay akah, fa həldaka ŋga key mebərey na, ɗəsla har a, da daa ba, salay a, hazakada dərəŋ ta kah. Ŋgama kah ma hətey heter mendəvey ba ta salay pal, da daa ba, ta har pal da ray kah ma da mbəzey aa awaw mendəvey ba ta har akah hay cewete, da daa ba, ta salay akah hay cewete.

⁹ Da dey akah fa həldaka ŋga key mebərey na, wuzlka dey a, hazakada dərəŋ ta kah. Ŋgama kah ma hətey heter mendəvey ba ta dey pal, da ray kah ma da mbəzey aa vəgeɗ ŋga awaw magaɗa ta dey akah hay cewete.

(Luk 15.3-7)

¹⁰ «Pam lenjesl, kwa ka da rəsam ndaw pal letek da wuzlah ndəhay ma pamata ray ata ŋga mecəhe anda bəza hay ba. Fara fara, ya fa ləvkwar maslaŋ ata hay da vad fa lacafamatar a ray da cakay Papay da vad mandaw mandaw.

[¹¹ Maja yah *Bəz ŋga Ndaw, ya sawa na, ŋga ləhdata ndəhay masa maazəɗtakaya.]»

Mey-menɗey ta təbaŋ meezəɗɗey

¹² «Da ndaw aa ta təbaŋ hay temere, da pal da wuzlah ata taa zəɗɗey sem na, ndaw aha a da key na, kwara? A mbəkdata təbaŋ hay kwakwar zlam-letek a ray a zlam-letek da aŋgwa, a daw a səpərwa pal masa meezəɗɗey a ŋgene daa ba daw?

¹³ Ya fa ləvkwar fara fara, da masa ta hətərwa la na, aa səmey la ga da ray təbaŋ a pal ŋgene, ma fəna da ray kwakwar zlam-letek a ray a zlam-letek masa taa zəɗam daa ba heyey.

¹⁴ Ara kəne, Papakw akwar masa da vad may, a wuɗɗey kwa ndaw pal letek da wuzlah ndəhay ma təba mey aŋga hay aa zəɗɗey ba.»

Da məlmakw ta kaka cek maaya ba la na, ka da kada na, kwara?

¹⁵ Yesu aa guzltar a gula aŋga hay, a ləvtar: «Da məlmakw * ta kaka cek maaya ba la na, daw fa vəɗa, kadara mebərey

anğa ha, akwar taa cew e. Da ta cændakawa mey akah la na, nğene ara cek maaya, kah ma dīya mēlmakw a sem.

¹⁶ Ama da a cændakawa mey akah ba na, nğoley ndaw pal, da daa ba, ndəhay cew asi akah. Ka ka anda kefe na, anda dferewel nğa Gazlavay ma ləvey: “Kwa cek wura wura maaya ba masa ndaw ma ka, nğa sərey mey da ray a fara fara na, maaya na, ndəhay cew, da daa ba, maakar a nəkmara mey a, a kam sede da ray mey a.”

¹⁷ Da a cændakwara ba cənğa na, kada mey a, a ndəhay daa *mecəmey-ray nğa ndəhay adaw hay. Da a cəntar mey a ndəhay daa mecəmey-ray a ba cənğa na, pa mēlmakw a nğa ndaw ma sərə Gazlavay ba, da daa ba, pa nğa *ndaw ma cakala budaw.»

Mey da ray medərey-danğay

¹⁸ «Ya fa ləvkwar fara fara, kwa mey wura wura masa akwar ma da jəwmara da bəla na, anğa majəwkaya da gazlavay da vad may. Asaya, kwa mey wura wura masa akwar ma da pəskamara da bəla na, anğa mapəskakaya da gazlavay da vad may.

¹⁹ «Ya fa ləvkwar saya: da ndəhay cew da bəla kefe, a cəmam dāy nğaa cəfdəy kwa meeme daa medərey-danğay na, Papay da vad a vəltar la.

²⁰ Maja da ndəhay cew, da daa ba, maakar ta cəmam la ta mezəley adaw na, yah da wuzlah ata.»

Mey-menğey ta ndaw ma ka sləra ma sərey dey-ceceh ba

²¹ Fa dəba ha, *Piyer ta', a nğəchey fa Yesu, a ləvar: «Bay Mahura, da məlma adaw fa kaya cek maaya ba mandaw mandaw na, ya da mbəkdara mebərey anğa na, dey we? Haa dey maasala daw?»

²² Yesu a mbəddara, a ləvar: «Kay! dey maasala daada ba, ama dey kwakwar maasala haa dey maasala ha.

²³ «Maja nğene, ya wudəy nğa nğakwar mey amba ka səmra Gazlavay a wey da ray ndəhay na, kwara. Bay daha a wudəy nğaa cəfda dəvaz anğa fa ndəhay ma ka sləra anğa hay.

²⁴ Masa anğa fa zlar nğaa cəfda dəvaz a na, a handamar ndaw pal masa ta dala anğa da ray a ga a sləfey ba.

²⁵ Cek anğa nğa pəla daa ba. Anda kefe, bay a, a pəskatar mey a gula anğa hay nğa hədkadamara ndaw aha, ta nğwas anğa, ta bəz anğa hay leŋ cek anğa hay cəpa nğa pəley dəvaz a.

26 Ta', ndaw a heyey, a pøtkweley fa mey nga bay anga ha, a løvar: "Ambahw, bay adaw, vølya ðar nekødey, cay na, ya pølkawa cøpa."

27 Bay heyey dey-ceceh a kar fa ndaw aha. Anda keðe, a mbøkda døvaz anga da ray ndaw aha heyey cøpa, ta', a mbøkda nga daw.

28 «Masa ndaw aha fa bawa na, a cam ray ta ndaw mekele masa ata ma kam sløra bama. Døvaz anga fa ndaw aha daha may, døvaz a, kuset kødey gway. Kaw! a kørza ndaw aha kasl! asi ðay. Ta', a løvar: "Pølyawa dala adaw."

29 Ndaw masa ata ma kam sløra bama heyey, ta', a pøtkweley fa mey anga, a ðerar ðanngay, a løvar: "Ambahw, vølya ðar nekødey, cay na, ya pølkawa."

30 Ama ndaw kaa heyey a tøba ba. Ta', a handa, a køzla aa førsøne, haa anga ma pølra døvaz anga ha.

31 Mandala anga hay siya ma høtmar na, a røzlam, mevel a catar ga. Ta', a diyam a wuzdamara mey a cøpa a bay ata heyey.

32 Da ray ngene, bay a heyey a zølrawa ndaw aha, a løvar: "Kah na, ndaw malamba. Ya ta mbøkðakawa døvaz masa da ray kah sem cøpa maja kah ma ðørya ðanngay.

33 Kaa kah na, ka sørfar dey-ceceh fa mandala akah anda yah ma sørfaka dey-ceceh ba na, kwara?"

34 Mevel a car a bay heyey, ta', a vølda a har ndøhay nga sørdamara banay, haa aa ma pølra døvaz anga ha cøpa.»

35 Cay, Yesu ta', a patar lenngesl, a løvtar: «Yaw, ara anda ngene, da ndaw da wuzlah akwar a mbøkðara mebørey nga mølmaha ta mevel pal ba na, Papay da vad, fa da mbøkðara mebørey anga daa ba køne may.»

19

Mey da ray mebøley ngwas

(Mark 10.1-12; Luk 16.18)

1 Masa Yesu ma ndøvda mey anga cay na, ta', a bey daa hwayak nga *Galile, a daw aa hwayak nga *Jude da dey lanngar nga wayam nga Jurdey.

2 Ndøhay ga, a søpmar wurzay. Fetede, ta', a mbøldata masa-macay hay da wuzlah ata.

3 *Fariza hay a diyam a cakay a, amba a jadamara. Aa cøfdamara, a løvmar: «Kwakwas aløkwa a vøley cøved a ndaw nga bøla ngwas anga, kwa fa mey wura wura daw?»

4 Yesu a mbøðdatara, a løvtar: «Mawuzlalakaya daa ðerewel nga Gazlavay a løvey: "Daa mezley nga bøla,

Gazlavay a ləmwa na, zel ta ηgwas.” Ka ta janɣamara mey a daa ba daw?

⁵ Gazlavay a ləvey saya: “Maja ηgene, ndaw-mezəle a mbəkda papaha ta mamaha, amba a cəmam ta ηgwas anɣa. Ata cewete, a təram anda ndaw pal.”

⁶ Anda keɗe, ata ndəhay cew saba, ama ata anda ndaw pal. Yaw, cek masa Gazlavay ma cəma sem anda keɗe na, ndaw a da wunka ba.»

⁷ Fariza hay a, aa cəɗɗamara Yesu a saya, a ləvmar: «*Mawiz ta wuzleley mewey la ma ləvey, da ndaw a wuɗey ηga bəla ηgwas anɣa na, si a wuzlalar ɗerewel ηga wuzda anɣa ma bəla sem. Kaa a wuzlala mey a anda keɗe na, maja me?»

⁸ Yesu a mbəɗɗatara, a ləvtar: «Mawiz a vəlkwar cəved ηga bəley ηgwas akwar hay na, maja mevel akwar maaya ba. Ama daa mezley ηga bəla na, cek aha ta key kəne na, daa ba.

⁹ Ya fa ləvkwar fara fara, kwa waawa ma bəla ηgwas anɣa, ηgwas aha ta ley vaw saw da palah daa ba, a ley ηgwas mekele, a key ηgene na, a ley vaw saw da palah.»

¹⁰ Gula anɣa hay, a ləvmar: «Da ηga bəley ηgwas si anda keɗe na, ηgama, ndaw a njeɣ manjar ηgwas.»

¹¹ Yesu a mbəɗɗatara, a ləvtar: «Ndəhay cəpa a təbmara mey a ηga key kəne ba. Ma gwa ηga təbmara na, si ndəhay masa Gazlavay ma vəltar gədaη ηga təbmara mey a.

¹² Sərmara, cek hay mekele mekele daha ma təkta ndəhay ηga ley ηgwas. Ndəhay siya maja vaw a latar ba dəga ηga mayawa ata, siya maja ata maanɣwadatakaya, siya hay may a njam manjar ηgwas, maja a wuɗam ηga key sləra ηgada Bay Gazlavay gway. Da ndaw ma gwa ηga təba mey masa yah ma kada da ray meley ηgwas keɗe daha na, ηga təba.»

*Yesu a pəstar mey a bəza hay
(Mark 10.13-16; Luk 18.15-17)*

¹³ Fa dəba ha, ndəhay a handamata bəza hay fa Yesu, amba a patar har a ray, a pəstar mey, a dərey dangay maja ata. Ama gula anɣa hay, a kamatar mey a ndəhay a.

¹⁴ Da ray ηgene, Yesu aa guzltar a gula anɣa hay a, a ləvtar: «Mbəkdamatərwa bəza hay ηga samawa fa yah! Ka da təkмата ba, maja Gazlavay fa wey da ray ndəhay masa anda bəza hay a.»

¹⁵ Ta', a patar har a ray, a pəstar mey. Fa dəba ha, ndal! madaw anɣa.

Bəz-gula masa-zleley aa cəfda Yesu da ray mehətey heter mendəvey ba

(Mark 10.17-31; Luk 18.18-30)

¹⁶ Ta pas lanġar daha, bəz-gula daha a nġəchey a cakay Yesu, aa cəfda, a ləvar: «Bay adaw, ya da key maaya amba ya hətey heter mendəvey ba na, me?»

¹⁷ Yesu a mbəfdara, a ləvar: «Kaa cəfdaya da ray mekey cek maaya na, maja me? Ara Gazlavay pal taava anġa, ndaw maaya. Da ka wufey nġa hətey heter mendəvey ba na, si ka nar ray a *mewey hay nġa Gazlavay.»

¹⁸ Gula ha aa cəfda Yesu, a ləvar: «Ya ney ray na, a mewey hay wura?» Yesu a mbəfdara, a ləvar: «Ka da kədəy ndaw vagay ba, ka da ley vaw saw da palah ba, ka da leley ba, ka da mbərzley a ray ndaw ba.

¹⁹ Natar ray nġada ata papakw ta mamakw, asaya, wufda meseembew akah anda kah ma wufda ray akah.»

²⁰ Bəz-gula ha, a ləvar: «Mewey hay a cəpa kədə, ya ta zləbta daa ba səlak, ma mbəkya nġa key na, wura dəba wura?»

²¹ Yesu a ləvar a bəz-gula ha: «Da ka wufey nġa tərey ndaw maaya kalah na, daw, həfdakata cek akah hay tabiya, wunkatara dala ha a masa-viya hay. Da ka ta ka la anda kədə na, ka da hətey zleley fa Gazlavay da vad. Masa kah ma vəldatara dala ha cay a masa-viya hay na, sawa, səpya.»

²² Masa bəz-gula ha ma cənda mey a anda kədə na, ta', a daw, anġa ta meesəmey daa ba, maja aa ta zleley ga, a wufey nġa vəldatara a ndəhay ba.

²³ Da ray nġene, Yesu aa guzltar a gula anġa hay, a ləvtar: «Ya fa ləvkwar fara fara, anġa ta banay ga nġada ndaw masa-zleley amba a təba Gazlavay nġa wey da ray a.

²⁴ Asaya, ya fa ləvkwar, anġa ta banay nġada slagwama nġa mbəzey taa vəged nġa baatal. Ama, anġa ta banay ga ma fəna saya nġada ndaw masa-zleley nġa təba Gazlavay nġa wey da ray a.»

²⁵ Masa gula anġa hay ma cəndamara mey a kədə na, a rəzlam ga, a ləvam: «Kay! Da anda kədə na, ma da ləhey daa mebərey na, wa?»

²⁶ Da ray nġene, Yesu a nəkta, a ləvtar: «Meləhey daa mebərey na, ara cek masa ndaw-magədan ma gwa nġa ka ba, ama Gazlavay na, a gwa nġa kata cek hay tabiya.»

²⁷ Ta', *Piyer aa guzlar a Yesu a, a ləvar: «Yaw, ala na, ya ta mbəkdamatərwa cek ala hay sem cəpa, amba ya səpmaka. Kaa ya da hətam fa salay ala na, me?»

²⁸ Yesu a mbədfatar, a ləvtar: «Ya fa ləvkwar fara fara, ta pas masa cek hay cəpa ma da təram mawiya na, yah, *Bəz n̄ga Ndaw, ya da n̄jey aa slam-menjey adaw mawadəkaya n̄ga wey da ray ndəhay. Akwar, kuraw a ray a cew masa ma səpmaya kefe na, ka da n̄jam aa slam-menjey n̄ga bay hay amba ka kamatar sariya n̄gada səkway hay kuraw a ray a cew n̄ga *Israyel.

²⁹ Da ndaw a mbəkdərwa way an̄ga, da daa ba, a mbəkdətərwa məlmaha hay, dam-mamaha hay, mamaha, papaha, bəz an̄ga hay, da daa ba, a mbəkdətərwa ley an̄ga hay, amba a səpya na, ndaw aha a hətey cek hay a la ma fəna masa an̄ga ma mbəkdətərwa n̄gene a key dey temere. Asaya, a hətey heter mendəvey ba la may.

³⁰ Yaw, ndəhay ga ma təbmara mey adaw n̄geeme, a da vəham fa dəba. Asaya, ndəhay ga masa fa dəba, a da diyam fa mey.»

20

Mey-menjey ta ndəhay ma ka sləra da ley

¹ Ta', Yesu aa guzltar a gula an̄ga hay, a ləvtar: «Ya gwa n̄ga wa cek masa ndəhay ma da hətam ta pas masa Gazlavay ma da wuzdərwa mewey an̄ga da ray ndəhay na, ta me? Ehe, ya n̄gakwar mey da ray a. Bay n̄ga ley daha, a bawa taa pərek e n̄ga səpey ndəhay n̄ga key sləra da ley an̄ga.

² A kam maday ta ndəhay ma ka sləra. Fa mevərndey na, a da vəltar dala təde n̄ga sləra n̄ga ndaw mevərndey da ley. Ta', a ləvtar n̄ga diyam a ley an̄ga ha dəba.

³ Pas təde mehəley maaca na, a bawa da way saya, a da nəkey dey na, a ray ndəhay mekele hay manjatakaya n̄ga maaya daa slam aha.

⁴ Ta', a ləvtar: "Diyam ta kam sləra da ley adaw katay may, amba ya pəlkwar dala təde fa sləra akwar a."

⁵ Ta', ndəhay a, a diyam aa sləra ha. Bay n̄ga ley kaa heyey a bawa ta wuzlah-pas, a həley ndəhay mekele. Asaya, a bawa ta pas n̄gaa kwad, a həley ndəhay mekele saya.

⁶ Pas gweegwe a kəzley na, a bawa, a hətey ndəhay manjatakaya daa slam aha saya, a ləvtar: "Ka vərndam n̄ga maaya anda kefe na, maja me?"

⁷ A mbəddamara, a ləvmar: "Ya vərndam n̄ga maaya na, maja ndaw ma həlndar aa sləra daa ba." Anda kefe, a ləvtar: "Yaw, diyam a ley adaw, ta kam sləra may."

⁸ «Masa pas ta kəzley cay na, ta', a zəlrawa *bay-ray nga sləra anğa, a ləvar: "Zəltərwa ndəhay ma ka sləra, pəltara dala ata. Ka zlar ta fa ndəhay ma samawa madagway-dakw haa kasl fa ndəhay ma samawa ngeeme."

⁹ Ndəhay madagway-dakw heyey a diyam fa bay-ray nga sləra heyey dəba, a təbmara dala ata, kwa waawa a hətey dala təde nga sləra nga ndaw mevərndey da ley.

¹⁰ Ndəhay ngeeme heyey a diyam may, a wulkam na, a da hətam ma fəna nga ndəhay madagway-dakw hay heyey. Ama, a hətam na, dala təde nga sləra nga ndaw mevərndey da ley cəngga gway.

¹¹ Masa fa təbmara dala ha na, faa nguram mey da ray bay nga ley a,

¹² a ləvam: "Ndəhay ma samawa madagway-dakw kefe, a kam sləra bərey pal gway, ama ka vəltar dala letek ta ala ma kam sləra hipas daa pas mecey na, kwara?"

¹³ Ta', bay nga ley a, aa guzley ngada ndaw pal da wuzlah ata, a ləvar: "Jam adaw, ya ta bataka daa ba sələk, maja ya kakwa maday na, da ray dala təde nga mevərndey nga sləra nga ndaw pal da ley, ba diya?"

¹⁴ Təba dala akah masa anda aləkwa ma kakwa maday, daw. Ya wudey nga vəlar dala həma nga akah a ndaw ma sawa aa sləra fa dəba kefe.

¹⁵ Fa kah na, ya gwa nga key cek ta zleley adaw anda yah ma wudey ba daw? Səlenj fa kaka maja yah ndaw maaya daw?"»

¹⁶ Ta', Yesu aa guzltar saya, a ləvtar: «Ara anda kefe, ndəhay madagway-dakw, a da təram ndəhay ngeeme, asaya, ndəhay ngeeme a da təram ndəhay madagway-dakw.»

Yesu aa guzley nga dey maakar da ray meməcey anğa ta masləkdəwa anğa

(Mark 10.32-34; Luk 18.31-34)

¹⁷ Ata Yesu fa diyam a *Jeruzelem. Daa masa ata daa cəved na, ta', Yesu a ngəлта gula anğa hay kuraw a ray a cew ta cakay, a ləvtar:

¹⁸ «Ehe, wure kefe aləkwa fa nakwa a Jeruzelem. Fetede na, a da vəldamaya, yah *Bəz nga Ndaw, a har *bay-ray hay nga ndəhay ma ka kwakwas ta *ndəhay maa sərkada kwakwas nga Mawiz. A da kamaya sariya nga kədey vagay.

¹⁹ Asaya, a da vəldamaya a har ndəhay masa *Jəwif hay ba, amba aa sanğəram a ray adaw, a slədmaya ta laway, a dərmaaya fa hwadam mazlangalakaya, ya məcey la. Nğa dar maakar a na, ya sləkdəwa la daa meməcey a.»

Mamanŋ nga ata Jak ta Jan aa cɔfɔa Yesu
(Mark 10.35-45)

²⁰ Fa dɔba ha, ŋgwas ŋga Zebede ta bɔz aŋga hay a ŋgɔcham fa Yesu. Ŋgwas aha a regedey fa mey aŋga, aa cɔfɔa ŋga jɔna.

²¹ Yesu ta', aa cɔfɔa, a lɔvar: «Ka wudɛy na, me?» Ŋgwas aha, aa mbɔddara, a lɔvar: «Ya wudɛy na, ka lɔvya dɔga wure kedɛ, daa masa ka fa zɔma bay akah na, ka da njadata bɔz adaw hay cew kedɛ, pal ta har-zɔmay akah, langar ta har-gula akah.»

²² Yesu aa guzltar a bɔza hay ŋga ŋgwas a heyey, a lɔvtar: «Ka sɔrmara cek masa akwar maa cɔfdam ba. Ka gwamara ŋga sɔram banay la anda yah ma da sɔra daw *?» Ta', a mbɔddamara, a lɔvmar: «Ahaw, ya gwamara.»

²³ Yesu a lɔvtar: «Ahaw, ka sɔram banay la anda yah ma da sɔra. Ama ŋga nɔjey ta har-zɔmay adaw, da daa ba, ta har-gula adaw na, ara yah ma da dɔsla mey a ŋgene ba. Ara Papay ma diyta slam hay a ŋgene ŋgada ndɔhay masa aa ma walata.»

²⁴ Fa dɔba ha, masa gula aŋga hay siya kuraw ma cɔndamara mey a na, a cam mevel a ray mɔlmanŋ hay cew heyey.

²⁵ Da ray ŋgene, Yesu a zɔlta tabiya, a lɔvtar: «Ka sɔrmara da wuzlah ndɔhay da bɔla kedɛ na, bay hay daha. Bay hay a na, fa wam da ray ndɔhay ta gɔdanŋ, asaya, mahura hay mekele fa wam da ray ndɔhay ta cɔved e ba.

²⁶ Ama da wuzlah akwar na, a da key kɔne ba. Yaw, da ndaw da wuzlah akwar a wudɛy ŋga key mahura na, si a tɔrey ndaw ma ka slɔra akwar.

²⁷ Asaya, da ndaw da wuzlah akwar a wudɛy ŋga key *bay-ray na, si a tɔrey anda beke akwar.

²⁸ Anda kedɛ, kwa yah, *Bɔz ŋga Ndaw, ya sawa a bɔla na, amba ndɔhay a kamaya slɔra ba. Ama ya sawa a bɔla na, amba ya katar slɔra a ndɔhay, ya vɔlda heter adaw ŋga lɔhey ndɔhay ga daa mebɔrey.»

Yesu a wurey dey ŋga ndɔhay wulaf hay cew
(Mark 10.46-52; Luk 18.35-43)

²⁹ Masa ata Yesu ta gula aŋga hay fa bam da Jerikwaw na, ndɔhay ga fa sɔpmatar wurzay.

* **20:22 20.22** Ka gwamara ŋga sɔram banay la anda yah ma da sɔra daw?: Ta mey Gɔrek a lɔvey «Ka gwamara ŋga sam cek la daa vɔley anda yah ma da sa daw?» **20:22 20.22** 26.39; Mk 14.36; Lk 22.42; Jan 18.11 **20:23 20.23** SNM 12.2 **20:26 20.26-27** 23.11; Mk 9.35; Lk 9.48 **20:28 20.28** Iz 53.12; 1Kwr 6.20; 7.23; Gal 1.4; 1Tm 2.5-6; 1Pi 1.18-19 **20:29 20.29-34** 9.27-30

³⁰ Ndəhay wulaf hay cew daha manjatakaya da meycəved. A cəndamara na, Yesu fa daw ta ηgene. Ta', a wudam, a ləvam: «Bay Mahura, Bəzey ηga *Davit, ambahw sərɤandar dey-ceceh may taw!»

³¹ Ndəhay ga heyey a kamatar mey, a ləvmatar ηga njam teete. Ama wulaf hay a, a wudam ta gədanj ta gədanj cəηga, a ləvam: «Bay Mahura, Bəzey ηga Davit, ambahw sərɤandar dey-ceceh may taw!»

³² Yesu ta', a lecey, a zəltərwa, aa cəɤɤata, a ləvtar: «Ka wudam ya kakwar na, me?»

³³ Ta', wulaf hay a, a mbəɤdamara, a ləvmar: «Bay Mahura, ya wudam ka wurndara dey ala.»

³⁴ Wulaf hay a, a kamar dey-ceceh a Yesu. Anηa gas! gas! a gəsfatar har fa dey ata. Wure wure ηgene, dey ata ha, wur! wur! a wuram, a hətmar dey maaya maaya dəba. Fa dəba ha, ta', a diyam asiya.

21

*Yesu a daw a Jeruzelem anda bay
(Mark 11.1-11; Luk 19.28-40; Janj 12.12-19)*

¹ Ata Yesu ta gula anηa hay fa diyam aa berney ηga *Jeruzelem. Masa ata gweegwe ta berney a na, a wusam gweegwe ta slala daha mezəley Betfaje da rav Anηwa ηga *Awliviye. Yesu ta', a slərey gula anηa hay cew teesəɤ ηgada slala ha,

² a ləvtar: «Diyam a slala fa mey akwar katay, ka da hətfam madi-zəηgwaw majəwkaya ta babəza da cakay a. Pəskamərwa, handamatiwa cewete.

³ Da ndaw a təkakwar ηga pəska na, ləvmar: “Bay Mahura a wudəy.” Nηgene na, ndaw aha, a mbəkɤakwar la ηga pəska wure ηgene.»

⁴ Yaw, cek aha ta key la amba a key anda Gazlavay maa guzlwa zleezle ta mey *ndaw ma təla mey anηa ma ləvey:

⁵ «Ləvmatar a ndəhay daa berney ηga *Siyanjw:
nəkam dey, bay akwar fa sawa fa akwar.

Ara ndaw meekweɤ-mey, aa da ray madi-zəηgwaw,
aa da ray babəza ηga madi-zəηgwaw aha.»

⁶ Da ray ηgene, gula anηa hay cew heyey a diyam, a kamara anda Yesu ma ləvtar ha.

⁷ A handamar madi-zəηgwaw ta babəza ha dəba. Gula anηa hay a, a ciymata zana ata hay a ray zəηgwaw hay a. Yesu ta', a njeɤ a ray a.

⁸ Ndohay ga malacatakaya daa caved nga cey ray ta Yesu, a ciyam zana ata hay aa caved nga hselmar ray. Siya hay da wuzlah ata, a bezlham mey-har nga wudez hay, a pamata aa caved e may.

⁹ Ndohay fa diyam fa mey anga, lej fa dɔba anga, ata tabiya fa wudam, a lɔvam: «*Hawzana! Hɔlmakwa Bɔzey nga *Davit! Anja Bay Gazlavay nga pɔsar mey a ndaw masa aa ma slɔrdɔrwa ta mezɔley anga. Hɔlmakwa Bay Gazlavay da vad!»

¹⁰ Masa Yesu a fa mbɔzey aa berney nga Jeruzelem na, ndohay daa berney a, a mbɔdam haya! haya! aa cɔdam vaw da wuzlah ata, a lɔvam: «Kede he na, ara wa?»

¹¹ Ndohay ga ma diyam ta Yesu heyey, a mbɔdamatara, a lɔvmatar: «Ara ndaw ma tɔla mey nga Gazlavay, mezɔley Yesu, ndaw *Nezeret daa hwayak nga *Galile.»

Yesu a bɔlta ndohay daa Way-mekey-kwakwas nga Gazlavay

(Mark 11.15-19; Luk 19.45-48; Jan 2.13-22)

¹² Fa dɔba ha, Yesu a mbɔzey aa papalah nga *Way-mekey-kwakwas nga Gazlavay. Fetede na, ndohay fa kam luma. Maja ngene, ta', a bɔlta ndohay tabiya ma hɔdkadam cek hay lej ndohay ma hɔdkam cek hay. A bezlta slam hay nga ndohay ma mbɔda dala ta janga hay nga ndohay ma hɔdkadam makurgwadakw hay.

¹³ Ta', a lɔvtar: «Mawuzlalakaya daa dɔrewel nga Gazlavay, Gazlavay a lɔvey: "Way adaw na, ara way amba ndohay a dɔrmaya dangay da hwad a." Ama akwar na, ka tɔdamara way a kede nga slam nga mayal hay!»

¹⁴ Ndohay wulaf hay ta ndohay jegwer hay a ngɔcham fa Yesu daa Way-mekey-kwakwas a. Ta', a mbɔldata.

¹⁵ Ndohay mahura hay da ray ndohay ma ka kwakwas nga Gazlavay lej *ndohay maa sɔrkada kwakwas nga Mawiz, a hɔtmatar maazla hay masa Yesu ma ka. Asaya, a hɔtmatar bɔza hay daa Way-mekey-kwakwas nga Gazlavay a, fa wudam, a lɔvam: «*Hawzana! Hɔlmakwa Bɔzey nga *Davit!» Da ray ngene, mevel a catar.

¹⁶ Ta', a lɔvmar a Yesu: «Ka fa cɔnda mey masa ata maa guzlam kede daw?» Yesu a mbɔddatara, a lɔvtar: «Ahaw, ya fa cɔnda. Mawuzlalakaya daa dɔrewel nga Gazlavay, a lɔvey: "Bay Gazlavay, ka taa sɔrkadata bɔza hay mecɔhe hay ta bɔza hay da mey dɔwa la nga hɔlmamaka." Ka ta jangamara mey a daa ba daw?»

17 Fa dɔba ha, Yesu a mbəkdata, a bawa daa berney nga *Jeruzelem e, a daw a slala Betani. A ney fetede dasi tavad a ngene.

Mey da ray wudez manjar babɔza
(Mark 11.12-14, 20-24)

18 Peperek e, ta slam ngaa perek na, Yesu a vɔhwa aa berney nga *Jeruzelem, may fa car.

19 Daa masa anɔa fa daw na, a hɔtey wudez daha da meycɔved, a yey babɔza anda gudav. Ta', a daw a cakay wudez e, ama a hɔtfey fa wudez e na, si gwaslaf a gway, babɔza fa vɔda daa ba. Da ray ngene, Yesu a nɔsa wudez e, a lɔvey: «Kuse! Ka yey babɔza saba nga sɔrmataw.» Wure wure ngene, wudez e, a kweley.

20 Daa ngene, gula anɔa hay, ata da siya. Masa ata ma hɔtmar wudez e ma kweley anda ngene na, a rɔzlam, a lɔvmar a Yesu: «Wudez e, a kweley fiyaw fiyaw na, kwara?»

21 Yesu a mbɛɔɔdatara, a lɔvtar: «Ya fa lɔvkwara fara fara, da akwar fa pamara Gazlavay nga ndaw akwar fara fara, asaya, da akwar fa wulkam cew cew daa ba na, ka gwamara nga key cek anda yah ma ka ngada wudez keɔde daada ba, ama ka gwamara kwa nga lɔvar ngada anɔgwa mahura keɔde: “Slɔkɔey la fede, kɔzley aa bɔlay” na, a key la kɔne.

22 Da akwar fa pamara Gazlavay nga ndaw akwar fara fara na, cek masa akwar maa cɔɔɔamara daa medɔrey-danɔay na, a vɔldakwara la cɔpa.»

Ma vɔldara gɔdan a Yesu na, wa?
(Mark 11.27-33; Luk 20.1-8)

23 Fa dɔba ha, Yesu a mbɔzey aa papalah nga *Way-mekey-kwakwas nga Gazlavay. Aa sɔrkadata ndɔhay fetede. Masa anɔa faa sɔrkadata ndɔhay a na, ta', *bay-ray hay da ray ndɔhay ma ka kwakwas nga Gazlavay len mahura hay nga *Jɔwif hay a ngɔcham a cakay a, aa cɔɔɔamara, a lɔvmar: «Ma lɔvka nga kata cek hay a keɔde na, wa? Asaya, ma vɔlka cɔved nga kata na, wa?»

24 Yesu, ta', a mbɛɔɔdatara, a lɔvtar: «Yaw, yah may, amba yaa cɔɔɔakwar mey pal. Da akwar ta mbɛɔɔdamiwa mey a la na, yah may, ya kadakwara ndaw ma vɔldiwa cɔved nga kata cek hay a keɔde la.

25 Kaa ma slɔrdɔrwa *Jan-Baptis nga katar *baptem a ndɔhay na, wa? Gazlavay daw, ndɔhay daw?»

Da ray ngene, ndɔhay mahura hay a ta bay-ray hay a, a slam yawa da wuzlah ata, a lɔvam: «Ya da mbɛɔɔdakwa aa mey anɔa ha na, kwara? Da ya lɔvkwa: “Ara Gazlavay ma

slərdərwa” na, a da mbəḍdandakwara, a ləvey: “Kaa ka təbmara mey n̄ga Jan-Baptis a ba na, maja me?”

²⁶ Ama da ya ləkwā: “Ara ndəhay ma slərdamərwa” na, ya zlrakwa ta ndəhay maja ndəhay tabiya fa wulkam Jan-Baptis na, ara *ndaw ma təla mey n̄ga Gazlavay.»

²⁷ Da ray n̄gene, ta’, a mbəḍdamara a Yesu, a ləvmar: «Ya sərmara ba.»

Yesu, ta’, a mbəḍdatara, a ləvtar: «Yaw, da anda keḍe na, ya fa da kadakwara ndaw ma vəlya cəveḍ n̄ga kata cek hay a keḍe, daa ba may.»

Mey-men̄gey ta bəza hay cew

²⁸ Yesu aa guzltar a ndəhay daa *Way-mekey-kwakwas n̄ga Gazlavay heyey saya, a ləvtar: «Ya wuḍey ya n̄gakwar mey amba ka wulkam da ray a.

«Ndaw daha, a n̄ga ta bəza hay cew. A ləvar n̄gada bəzey mahura: “Bəz aḍaw, tasana daw ta kawa sləra da ley.”

²⁹ Bəzey a, a mbəḍdara, a ləvar: “Ya fa da daw daa ba.” Ama men̄jey nekəḍey na, a mbəḍda len̄gesl a n̄ga, ta’, a daw n̄ga kawa sləra ha.

³⁰ Papaha, ta’, a ləvar n̄gada bəzey mecəhe saya, kəne may. Bəzey a, a mbəḍdara, a ləvar: “Aya, papay.” Ama fa dəba ha, bəzey a, ta daw n̄ga kawa sləra heyey daa saba.

³¹ Kaa dasi bəza hay cew keḍe, ma ka cek masa papa ata ma wuḍey la na, wura?» Ndəhay a, a mbəḍdamara, a ləvmar: «Ara bəzey mahura.»

Yesu a mbəḍdatara n̄gada ndəhay a dəba, a ləvtar: «Ahaw, kəne, ama ya fa ləkwāw fara fara, ndəhay maaya ba hay anda ndəhay ma cakala budaw ta n̄gwas-barlaw hay, a mbəzam la teesəḍ da ray akwar a wuzlah ndəhay masa Gazlavay ma wey da ray ata.

³² *Jan-Baptis ta sawa la n̄ga wuzkwar cəveḍ masa dər e, ama akwar ta təbmara mey a n̄ga daa ba. Ndəhay ma cakala budaw ta n̄gwas-barlaw hay, ata na, ta təbmara mey a n̄ga la. Kwa masa akwar ma hətmar ata ma mbəkdamara mekey mebərey na, akwar ta mbəḍdamara men̄jey akwar n̄ga təbey mey n̄ga Jan-Baptis a daa ba cə n̄ga.»

Mey-men̄gey da ray ndəhay ma təbmara Bəzey n̄ga Gazlavay ba

(Mark 12.1-12; Luk 20.9-19)

³³ Yesu aa guzltar a ndəhay saya, a ləvtar: «Jəkam sləmay fa mey-men̄gey mekele. Ndaw daha, a key jerne n̄ga wuḍez ma yey babəza mezəmey. Ta’, a zləba jerne he ray a zlar. Daa jerne he na, a ḍiyey slam n̄ga ḍəcey babəza n̄ga wuḍez

e, a ləmey way magəlkaya maazəma ɲgada ndaw ma jəɖa jerne he. A vəlda jerne he a har ndəhay ɲga kam sləra da hwaɖ a. Fa dəba ha, ta', a daw aa slam dərəɲ.

³⁴ Masa kiya menɲəley babəza ɲga wudez daa jerne he ta wuswa cay na, bay ɲga ley a, a slərey gula aɲga hay ɲga təbwa babəza ɲga wudez e maala ɲga aɲga.

³⁵ Masa gula hay a ma wusam cay fa ndəhay ma ka sləra daa jerne kaa heyey na, ndəhay ma ka sləra hay a, kaw! kaw! a kərzamata. Gula laɲgar, a slədmara, laɲgar may, a kədmara vagay, asaya, ta', aa zakamara gula laɲgar ta aɲgwa vagay.

³⁶ Fa dəba ha, bay ɲga jerne kaa heyey a slərey gula hay ga ma fəna ɲgeeme heyey. Ndəhay ma ka sləra daa jerne kaa heyey, a kədmata kəne cəɲga.

³⁷ Fa dəba ha, ta', a slərey bəzey aɲga, a wulkey, a ləvey: "A namar ray la a bəzey da hwaɖ aɖaw."

³⁸ Ama daa masa ndəhay ma ka sləra daa jerne kaa heyey ma hətmar bəzey aɲga ha fa sawa na, ta', a slam yawa da wuzlah ata, a ləvam: "Katay ara bəzey ma da wa jerne keɖe fa dəba ɲga papaha. Nakwa ta kəɖkwa vagay, amba ya wakwa jerne he keɖe."

³⁹ Anda keɖe, a kərzamara, a ɖaɖamara a dəba jerne he, ta', a kədmara vagay.»

⁴⁰ Yesu aa guzltar saya, a ləvtar: «Kaa wara bay ɲga jerne he ma da sawa na, a da kadata ndəhay a na, kwara?»

⁴¹ A mbəɖdamara, a ləvmar: «Bay ɲga jerne he, a da kəɖta ndəhay lamba hay a vagay, kwa fa da sərɖatar dey-ceceh daa ba. Fa dəba ha, a da vəlda jerne he a har ndəhay mekele. Ndəhay a, a da vəlmar babəza ɲga wudez e ta kiya menɲəley babəza ha.»

⁴² Yesu ta', aa guzltar, a ləvtar: «Akwar ta jaɲgamara mey mawuzlalakaya daa ɖerewel ɲga Gazlavay daa ba səlak daw? Mey masa ma ləvey:

"Aɲgwa meləmey way masa ndəhay ma ləma way
ma kəzlamara ta cakay na,
aɲgwa ha na, ta tərey sem ɲga aɲgwa maaya meləmey way
ma fənta siya hay jak.
Nɲgene na, ara Bay Gazlavay ma ka cek aha,
ara cek maaya fa dey aləkwa."»

⁴³⁻⁴⁴ Fa dəba ha, Yesu aa guzltar saya, a ləvey: «[Da ndaw a təɖey a ray aɲgwa aha na, ndaw aha a da ɲgərɖey. Asaya da aɲgwa aha a kəzley a ray ndaw na, a ɖəga ndaw aha la kwəɖ-kwəɖ anda bebəɖes.] Ara maja keɖe, ya fa ləvkwar,

akwar na, Bay Gazlavay fa da vɛlkwar cɛved ŋga njeɣ da wuzlah ndɛhay aŋga hay daa ba. A da vɛley cɛved na, si ŋgada ndɛhay masa slɛra ata ma mbafar.»

⁴⁵ Masa *bay-ray hay ŋga ndɛhay ma ka kwakwas ŋga Gazlavay ta *Fariza hay ma cɛndamara meɣ-menɣeɣ masa Yesu maa guzlda ha na, a sɛrmara Yesu aa guzley na, da ray ata.

⁴⁶ Da ray ŋgene, a sɛpam cɛved amba a kɛrzamara. Ama a zluram ta ndɛhay fetede maja ndɛhay a, a wulkam Yesu na, ara *ndaw ma tɛla meɣ ŋga Gazlavay.

22

Mey-menɣeɣ da ray Jɛwif hay ma tɛɓmara meɣ ŋga Yesu ba

(Luk 14.15-24)

¹ Yesu aa guzltar ŋgada ndɛhay daa *Way-mekey-kwakwas ŋga Gazlavay heyey ta meɣ-menɣeɣ hay saya, a lɛvtar:

² «Ya gwa ŋga wa *mewey ŋga Bay Gazlavay da ray ndɛhay na, ta me? Yaw, bay daha, a key gwagway ta pas bɛzey aŋga ma lawa kwakwa.

³ A slɛrdata madɛrlam aŋga hay ŋga zɛlwa ndɛhay masa mazɛtakaya ŋgadaa gwagway a. Ama ndɛhay mazɛtakaya ha, a gɛmam ŋga samawa ba.

⁴ «Fa dɛɓa ha, a slɛrey madɛrlam aŋga hay mekele saya, a lɛvtar: “Diyam ta lɛvmatar a ndɛhay masa mazɛtakaya na, ŋga samawa aa gwagway a. Yah ma hɛrta sla hay ta dɛhway cay, cek hay tabiya madɛytakaya cay, ŋga samawa ŋga zɛmey dɛf ŋga gwagway a dɛɓa.”

⁵ Ama ndɛhay mazɛtakaya ha, a pam lenɣesl fa mezɛley a ba. A diyam ŋga key cek ata hay mekele. Ndaw lanɣar a daw a ley, ndaw lanɣar a daw a kawa filaw.

⁶ Siya hay may, a kɛrzamata madɛrlam hay ŋga bay kaa heyey, a sɛrdamata banay, a kɛdmata vagay.

⁷ Masa bay kaa heyey ma cɛnda na, mevel a car, a slɛrey sewje aŋga hay ŋga kɛdɛy ndɛhay ma kɛdmata madɛrlam aŋga hay heyey vagay. Fa dɛɓa ha, sewje hay a, a wawurmara berney ata.

⁸ «Cay, ta’, a lɛvtar ŋgada madɛrlam aŋga hay siya: “Cek hay tabiya ŋga gwagway madɛytakaya cay, ama ndɛhay mazɛtakaya na, ata tɛde ŋga samawa aa gwagway a saba.

⁹ Anda kede, diyam aa cɛved mahura hay, zɛlmawa kwa waawa masa akwar ma hɛtam amba a samawa, a zɛmam dɛf ŋga gwagway a.”

10 Ta', madərlam anɣa hay kaa heyey, a diyam aa cəved mahura hay, a zəlmawa ndəhay masa ata ma hətam, ndəhay maaya ta maaya ba hay cəpa, haa way masa ata ma kam gwagway da hwaɗ a kaa heyey a rəhey.

11 «Bay kaa heyey a daw, a mbəzey aa way nɣa gwagway nɣa nəktərwa ndəhay ma zəmam ɗaf nɣa gwagway a. A da nəkey dey na, a ray ndaw daha da wuzlah ata, zana nɣa gwagway fa vaw daa ba.

12 Aa guzlar a ndaw a, a ləvar: "Jam aɗaw, zana nɣa gwagway fa vaw akah daa ba kaa na, ka mbəzwa aa way a, ta wura?" Kwa ndaw aha, ta mbəɗɗara daa ba.

13 Ta', bay kaa heyey aa guzlar a ma ka sləra anɣa hay, a ləvtar: "Jəwmara salay ta har nɣa ndaw nɣene, hazakadamara aa ambaw, aa ləvaŋ. Fetede na, a da təway, asaya, a daa pəfey sler."»

14 Yesu ta', aa guzlar a ndəhay a saya, a ləvey: «Ahaw, ndəhay ga mazəltakaya, ama mawalatakaya na, ndəhay nekəfey gway.»

Ndəhay mahura hay a jadamara Yesu da ray mepəley budaw

(Mark 12.13-17; Luk 20.20-26)

15 Fa dəba ha, ndəhay *Fariza hay, a kusam ta cakay nɣa səpey dabaray, amba a kərzamara Yesu fa mey masa anɣa ma daa guzlda.

16 Ta', a sləram gula ata hay siya, ta ndəhay nɣa Bay *Herawt fa Yesu nɣaa cəɗɗamara. A ləvmar: «Bay ala, ya sərmara kah na, ndaw ma mbərzley ba, ka faa sərkadata ndəhay nɣa nɣam anda Gazlavay ma wuɗey fara fara, ka zlurey ta ndaw ba, asaya, ka nəkta ndəhay cəpa letək fa mey akah.

17 Anda keɗe, ya wuɗam nɣaa cəɗɗamaka, kwakwas aləkwa na, a vəley cəved nɣa pəley budaw a bay mahura *Sezere daw? A vəley cəved ba daw? Wuzɗandara mewulkey akah da ray mey a keɗe cey.»

18 Ama Yesu ta səra mewulkey ata maaya ba nɣene sem. Ta', a ləvtar: «Akwar ndəhay masa ta neneh cew, ka wuɗam nɣa jadamaya na, maja me?»

19 Wuzmaya dala masa akwar ma pələm budaw a ta anɣa.» Ta', ndəhay kaa heyey a wuzmar dala ha pal.

20 Yesu a nəka dala ha, ta', aa cəɗɗata saya, a ləvtar: «Fa dala ha keɗe na, ara dey nɣa wa? Ara mezəley nɣa wa?»

21 A mbəɗɗamara, a ləvmar: «Ara nɣa Sezere, bay mahura nɣa *Rawm.» Da ray nɣene, Yesu a ləvtar: «Anda

kede, cek masa nga Sezere na, vøldamara a Sezere he. Cek masa nga Gazlavay na, vøldamara a Gazlavay a.»

²² Masa ata ma cøndamara Yesu ma mbødfdatara anda ngene la na, a røzlam ga da ray mey a. Mbak! a mbøkdamara, ta', a diyam.

*Mey da ray masløkdfawa nga ndøhay daa memøcey
(Mark 12.18-27; Luk 20.27-40)*

²³ Ta pas a ngene, ndøhay *Saduse hay a ngøcham a cakay Yesu. Saduse hay na, ara ndøhay ma wulkam, ma løvam da ndaw ta møcey sem na, fa da sløkdfawa daa memøcey daa ba. Ta', aa cøfdamara Yesu, a løvmar:

²⁴ «Bay ala, mawuzlalakaya daa *kwakwas nga Mawiz a løvey: “Da ndaw a møcey ta høtey bøzey daa ba na, si mølmaha a la ngwas-vagay a, amba a yamawa bøza hay ngada mølmaha mamøckaya ha.”

²⁵ Yaw, mølman hay maasala da wuzlah ala daha, ata ngaa man, ngaa pan. Mølma ata mahura leŋ! a ley ngwas, pam! a møcey, kwa ta høtey bøzey daa ba. Da ray ngene, a mbøkdara ngwas anga a mølmaha lanjar.

²⁶ Cek aha, a key letek ta mambaray a, a key letek ta mølma ata nga dey maakar a haa kasl fa mølma ata nga dey maasala ha.

²⁷ Fa døba ha ata ma møcam la cøpa ata na, ngwas aha pam! a møcey may.

²⁸ Anda kede, ta pas masa ndøhay mamøctakaya ma da sløkdamawa na, ngwas aha a da key na, ngwas nga wa dasi ata? Maja ata cøpa ta lamara la nga ngwas ata.»

²⁹ Yesu a mbødfdatara a løvtar: «Akwar faa zøfdamara ray akwar maja ka sørmara mey nga Gazlavay ba, asaya, maja ka sørmara gødan anga ba.

³⁰ Ya fa løvkwara fara fara, ta pas masløkdfawa nga ndøhay daa memøcey na, zel hay fa da lam ngusay daa saba, ngusay fa da njam ta zel hay daa saba may, ama ndøhay, a da njam anda maslan hay nga Gazlavay da vad.

³¹ Akwar ma janjamara mey masa Gazlavay maa guzldakwara da ray masløkdfawa nga ndøhay daa memøcey na, daa ba daw? Gazlavay a løvey:

³² “Yah, Gazlavay masa *Abøraham, *Izak, leŋ *Jakwap ma namar ray.”» Yesu aa guzley saya, a løvey: «Gazlavay na, ara Gazlavay nga ndøhay ta dey, ba na, nga ndøhay mamøctakaya ba.»

³³ Ndøhay tabiya ma cøndamara mey a kede na, a røzlam da ray meesørkedey nga Yesu a.

Mewey nga Gazlavay masa mahura na, wura?
(Mark 12.28-34; Luk 10.25-28)

³⁴ Masa *Fariza hay ma nəkmarā Yesu ta kusta *Saduse hay sem ta mey na, ta', a kusam, a ngəcham a cakay Yesu.

³⁵ *Ndaw maa sərkada kwakwas nga Mawiz da wuzlah ata daha, aa cəfdā Yesu amba a jada, a ləvar:

³⁶ «Bay adaw, *mewey nga Gazlavay mahura ma fənta siya hay na, wura?»

³⁷ Yesu a mbəfdara, a ləvar: «“Si ka wudā Bay Gazlavay akah, ta mevel akah cəpa, ta mesəfney akah cəpa, asaya, ta lenjesl akah cəpa.”

³⁸ Kede he ara mewey nga Gazlavay mahura ma fənta siya hay.

³⁹ Asaya, mewey nga dey cew e ma səpa kede daha saya. Mewey a, ata letək. Mewey a, a ləvey: “Si ka wudā meseembew akah anda kah ma wudā ray akah.”

⁴⁰ Yaw, *kwakwas nga Mawiz tabiya ta meesərkedey nga ndəhay ma təla mey nga Gazlavay zleezle macəmtakaya tabiya na, daa mewey hay a cew kede.»

Kərīste, anga bay nga Davit na, kwara?
(Mark 12.35-37; Luk 20.41-44)

⁴¹ Daa masa *Fariza hay makustakaya na, Yesu aa cəfdāta may,

⁴² a ləvtar: «*Kərīste, *ndaw masa Gazlavay ma wala nga ləhdata ndəhay na, ka wulkam da ray a na, kwara? Anga, səkway nga wa?» A mbəfdamara, a ləvmar: «Anga na, səkway nga Bay *Davit.»

⁴³ Yesu a ləvtar: «Ta gədanə nga *Mesəfney nga Gazlavay na, Davit ta zəla Kərīste he la, “Bay Mahura.” Kaa a zəla anda kede saya na, kwara? Davit e, ta ləvey la:

⁴⁴ “Bay Gazlavay a ləvar a Bay adaw Mahura:

Sawa, njeý a har-zəmay adaw

amba ya wakwa da ray ndəhay

haa ta pas masa yah ma da pata

masa-gəra akah hay asi salay akah.”

⁴⁵ Yaw, da Davit a zəla Kərīste “Bay Mahura” na, kaa wara Kərīste he ara bəzey da hwad Davit saya na, kwara?»

⁴⁶ Kwa ndaw pal da wuzlah ata ta gwa nga mbəfdara kwa mey pal daa ba. Dəga ta pas ngeñe, kwa waawa a zlərey ngaa cəfdafar mey.

22:37 22.37 Mew 6.4-5 **22:39 22.39** Lev 19.18; Mt 5.43; 19.19; Rm 13.9; Gal 5.14; Jak 2.8 **22:40 22.40** 5.17; Rm 13.10 **22:41 22.41-46** 20.30-31 **22:44 22.44** Ps 110.1; SNM 2.33-35; 1Kwr 15.27; Heb 1.13; 8.1 **22:46 22.46** Mk 12.34; Lk 20.40

23

Yesu a patar lenjgesl a ndəhay da ray ndəhay maa sərkada kwakwas nga Mawiz ta da ray Fariza hay (Mark 12.38, 39; Luk 11.43, 46; 20.45, 46)

¹ Yesu aa guzltar ngada ndəhay makustakaya ta ngada gula anga hay daa *Way-mekey-kwakwas nga Gazlavay heyey saya,

² a ləvtar: «*Ndəhay maa sərkada kwakwas nga Mawiz lej ndəhay *Fariza hay na, mapatakaya aa slam a nga Mawiz ngaa sərkedey kwakwas anga.

³ Si ka təbmara mey ata, asaya, ka kamara cek masa ata maa sərkadamakwara ha. Ama cek masa ata ma kamara na, ka da kamara ba, maja ata ta ray ata na, fa kamara cek anda ata maa sərkadamakwara ha, daa ba.

⁴ A bamawa kwakwas hay maadək w a maadək w a masa ndəhay ma gwamara nga səpa ba. A təkmatar dāy a ndəhay nga səpmara kwakwas hay a, ama ata na, a gəmam nga jənmata ndəhay nga səpey kwakwas hay a kwa nekədey ba.

⁵ A kamata sləra ata hay tabiya na, amba ndəhay a hətmatar aa həmdamata gway. Anda keđe, a wuzlalam mey masa daa derewel nga Gazlavay, a təfmara aa ambal anda laya, a ləwmara fa danğay, da daa ba, fa har. A təfmata mahura mahura ma fəna nga ndəhay siya hay. Asaya, zana hay masa ata ma pamata fa vaw na, a cam gagəmay maazəma maazəma * fa mey a, ma fəna nga ndəhay mekele.

⁶ «Da ta zəlmata la aa gwagway na, a wudam menjey aa slam maaya nga ndəhay mahura hay. Asaya, daa *way-mewuzey-mey nga Gazlavay na, a wudam menjey aa slam maaya fa mey.

⁷ A wudam ndəhay a camatar har ta meney ray fa mey nga ndəhay makustakaya, asaya, a wudam ndəhay a zəlmata bay.

⁸ «Ama akwar na, ka da təbmara amba a zəlmakwar bay ba, maja akwar tabiya na, məlman hay. Ngada akwar, ndaw ma səra cek na, anga pal.

⁹ Asaya, ka da zəlam ndaw da bəla keđe Papan bay, maja Papakw akwar na, anga pal masa da vad.

¹⁰ Ka da təbmara amba a zəlmakwar Bay Mahura ba, maja Bay akwar Mahura na, ara *Kəriste pal taava anga.

23:3 23.3 Rm 2.21-23 * **23:5 23.5** Daa mewulkey nga Jəwif hay, gagəmay macakaya maazəma fa mey nga zana nga ndaw na, a wuzda ndaw aha anga ndaw ma nar ray a Gazlavay. **23:5 23.5** Mab 13.9; Mew 6.8; Mesl 15.38-39; Mt 6.1 **23:8 23.8** Jan 13.13

¹¹ «Ndaw mahura da wuzlah akwar na, ara ndaw ma kakwar slëra.

¹² Kwa waawa ma pa ray anga nga ndaw mahura na, Gazlavay a da pa nga mecëhe. Kwa waawa ma nada ray anga na, Gazlavay a da pa nga mahura.»

Yesu a mbëd̄tar ray a ndëhay maa sërkada kwakwas nga Mawiz ta a Fariza hay

(Mark 12.40; Luk 11.39-42, 44, 52; Luk 20.47)

¹³ «Banay a sawa la a ray akwar, akwar *ndëhay maa sërkada kwakwas nga Mawiz ta *Fariza hay. Akwar na, ndëhay masa ta neneh cew. Akwar fa tëkmata ndëhay nga mbëzey a wuzlah ndëhay masa Gazlavay fa wey da ray ata. Akwar ta ray akwar, ta mbëzam daa ba, asaya, ka ta tëkmata ndëhay ma wudam nga mbëzam sem.

[
¹⁴ «Banay a sawa la a ray akwar, akwar ndëhay maa sërkada kwakwas nga Mawiz ta Fariza hay. Akwar na, ndëhay masa ta neneh cew. Akwar fa tëbmatara cek hay nga ngwas-vagay hay tabiya, asaya, akwar faa guzlam ga daa medërey-dangay amba ndëhay aa zaramakwar. Maja ngene Gazlavay a sërdakwar banay la ma fëna ndëhay siya.]

¹⁵ «Banay a sawa la a ray akwar, akwar ndëhay maa sërkada kwakwas nga Mawiz ta Fariza hay. Akwar na, ndëhay masa ta neneh cew. Akwar fa pëkam aa wura aa wura cëpa amba ka hëtam kwa ndaw pal letek nga sëpey kwakwas akwar ni, ama da akwar ma hëtam la na, ka tërdamara ndaw a, nga ndaw nga awaw magaza ma fënkwar haa dey cew.

¹⁶ «Banay a sawa la a ray akwar, akwar ndëhay ma wuzmatar cëved ngada ndëhay, ama akwar na, wulaf hay. Ka lëvam: “Kwa waawa ma mbedey nga key cek ta *Way-mekey-kwakwas nga Gazlavay na, ara nga tede, ama kwa waawa ma mbedey nga key cek ta bërey magaza mewedey pëlñged pëlñged daa Way-mekey-kwakwas a na, si cëma a ka cek aha anda aa ma lëvey.”

¹⁷ Akwar na, ndëhay manjar-lengesi, asaya, akwar wulaf hay! Way-mekey-kwakwas nga Gazlavay ta bërey magaza na, mahura dasi ata na, wura? Way-mekey-kwakwas nga Gazlavay na, anga mahura da ray bërey magaza, maja ara Way a ma tërda bërey magaza aha nga cek maaya ngada Gazlavay.

18 Akwar fa løvam saya: “Kwa waawa ma mbedey nga key cek ta slam-meføkey cek ngada Gazlavay na, *mbedey a, ara nga tede. Ama kwa waawa ma mbedey nga key cek ta cek mavældakaya ngada Gazlavay masa mapakaya da ray slam aha na, si a ka cek aha anda aa ma løvey.”

19 Akwar na, wulaf hay! Cek mahura na, cek mevøley a Gazlavay daw? Da daa ba, slam-meføkey cek a Gazlavay ma tərda cek aha maaya fa Gazlavay daw?

20 Anda kede, kwa waawa ma mbedey ta slam-meføkey cek ngada Gazlavay na, a key ngene, a mbedey ta slam aha lenj ta cek da ray a tabiya.

21 Kwa waawa ma mbedey ta Way-mekey-kwakwas nga Gazlavay na, a key ngene, a mbedey ta Way a lenj ta Gazlavay manjakaya daa Way a.

22 Kwa waawa ma mbedey ta slam da vad na, a key ngene, a mbedey ta slam-menjey nga Gazlavay lenj ta Gazlavay a manjakaya da ray a.

23 «Banay a sawa la a ray akwar, akwar ndøhay maa sərkada kwakwas nga Mawiz ta Fariza hay. Akwar na, ndøhay masa ta neneh cew. Akwar fa wunkamata cek akwar hay tabiya slam kuraw, ka vøldamara slam pal a Gazlavay, kwa cek hay mecøhe mecøhe ma cərda lar na, akwar fa wunkamara køne may. Ama nga søpey mewey hay maaya na, ka sərfadamara ba. Anda meløvey mekey cek ta cøved e, mesørey dey-ceceh, asaya, menjey mandaw mandaw daa cøved nga Gazlavay. Sasøkar jak, cek hay a ngene na, ara cek hay maaya nga key. Ka da mbøkdamara nga key cek hay siya hay ba may.

24 Akwar fa wuzmatar cøved ngada ndøhay, ama akwar na, wulaf hay. Akwar fa jajørmara cek akwar mesey maja jajøway mecøhe da hwad a, anja ngene, akwar fa ndam slagwama a hwad daa yam maajørkaya heyey cønga gway.

25 «Banay a sawa la a ray akwar, akwar ndøhay maa sərkada kwakwas nga Mawiz ta Fariza hay. Akwar na, ndøhay masa ta neneh cew. Akwar fa pørmata døba nga vøley akwar hay mesey cek ta vøley akwar hay nga daf, anja ngene, ta da hwad a na, vøley hay a madakalatakaya tep! tep! ta cek hay nga mayal akwar hay lenj ta cek hay maaya ba masa akwar ma wudam kalah daa mevel akwar.

26 Akwar Fariza hay na, wulaf hay! Pøram teesed na, hwad a dægay, anda kede, døba ha na, a pørey la.

27 «Banay a sawa la a ray akwar, akwar ndəhay maa sərkaɗa kwakwas ŋga Mawiz ta Fariza hay. Akwar na, ndəhay masa ta neneh cew. Akwar na, anda cəvay hay makulbatakaya mabara ma mbam. Ama ta da hwaɗ a na, mazakaya, asaya, marəhtakaya ta tetesl hay.

28 Akwar na, kəne may. Fa dey ŋga ndəhay na, akwar anda ndəhay maaya. Anja daa mevel akwar na, cek hay malamba hay ga, akwar ndəhay masa ta neneh cew.

(Luk 11.47-51)

29 «Banay a sawa la a ray akwar, akwar *ndəhay maa sərkaɗa kwakwas ŋga Mawiz ta *Fariza hay. Akwar na, ndəhay masa ta neneh cew. Akwar fa ləmamata cəvay hay ŋga ndəhay ma təla mey ŋga Gazlavay ma kəɗmata vagay zleezle ŋga mbey, akwar fa kam banjay fa cəvay hay ŋga ndəhay ma ka cek ta cəveɗ e zleezle.

30 Asaya, akwar fa ləvam: “Daa masa papaŋ ŋga papa ala hay, ata ta dey, da daa ŋgene ala daha na, anja ala fa da cəmam ta ata ŋga kəɗey ndəhay ma təla mey ŋga Gazlavay a vagay na, daa ba.”

31 Anda keɗe, akwar, ta ray akwar, fa wuzdamara, akwar na, bəza hay ŋga ndəhay ma kəɗmata ndəhay ma təla mey ŋga Gazlavay.

32 Yaw, maaya na, ka ndəvdamara sləra ŋga papaŋ ŋga papakw akwar hay zleezle la gway.

33 Akwar zezekw hay, səkway ŋga kucosl hay! Akwar fa da ləham fa awaw magaza na, daa ba!

34 Maja ŋgene, jəkam sləmay! Yah na, ya da slərkwat ndəhay ma təla mey ŋga Gazlavay, ndəhay ta lenjesl ma səra cek, len ndəhay ma daa sərkaɗamakwara mey ŋga Gazlavay. Da wuzlah ndəhay a na, siya hay ka da kəɗmata vagay, siya hay ka da dərmatata fa hwadam mazlanɗalakaya, siya hay ka da sləɗmata daa way akwar hay mewuzey mey ŋga Gazlavay, siya hay may ka da səpmatar wurzay aa berney hay mekele mekele amba ka səɗdamata banay.

35 Maja ŋgene, mambaz ŋga ndəhay ma ka cek ta cəveɗ e cəpa masa ndəhay ma kəɗmata vagay na, a hufkwat † la. A kəɗam teeseɗ na, Abel. Asaya, ta kəɗam ndəhay mekele mekele la haa kasl fa Zakari, bəzey ŋga Baraki, masa akwar ma kəɗmara daa walaŋ ŋga slam-mefəkey cek ŋgada Gazlavay ta *Way ŋga Gazlavay.

36 Ya fa ləvkwat fara fara, mambaz ŋga ndəhay a ŋgene, a huftar la a ray ndəhay masa wure keɗe.»

Yesu aa guzley da ray Jeruzelem

(Luk 13.34, 35)

³⁷ Fa dɔba ha, Yesu a lɔvey: «Haya! Akwar ndɔhay da *Jeruzelem, akwar ndɔhay da Jeruzelem, Gazlavay a slɔrkwar ndɔhay ma tɔla mey anɔa hay na, ka kɔɔmata vagay! Asaya, a slɔrkwar maslan anɔa hay na, kaa zakamata ta anɔwa! Ama mandaw mandaw ya wudfey amba ya bɔckwar tabiya akwar anda gwagwar ma bɔcta bɔz anɔa hay asi kɔrpaɔl, ama ka wudam ba.

³⁸ Cɔndamara, Gazlavay a da la har anɔa da ray akwar, Way-mekey-kwakwas akwar a da tɔrey yidenɔ.

³⁹ Yah fa lɔvkwar dɔga wure kedɔ, akwar fa da hɔtmaya fa dey daa saba haa ta pas masa akwar ma da lɔvam: “Anja Bay Gazlavay nɔga pɔsar mey nɔgada ndaw masa aa ma slɔrdɔrwa ta mezɔley anɔa.”»

24

Yesu aa guzley da ray Way-mekey-kwakwas nɔga Gazlavay ma da bɔzley

(Mark 13.1-2; Luk 21.5-6)

¹ Yesu a bawa daa *Way-mekey-kwakwas nɔga Gazlavay. Masa anɔa fa daw na, gula anɔa hay a nɔgɔcham a cakay a amba a wuzdamara Way-mekey-kwakwas nɔga Gazlavay a, anɔa malɔmkaya na, kwara.

² Ta', Yesu aa guzlar, a lɔvtar: «Akwar fa hɔtmar way a kedɔ cɔpa, ba diya? Ya fa lɔvkwar fara fara, way a kedɔ na, a bɔzlmara la, kwa anɔwa pal fa da mbɔkey da ray cɔla daa ba.»

Mey da ray bɔla ma da ndɔvey

(Mark 13.3-13; Luk 21.7-19)

³ Fa dɔba ha, Yesu a daw aa Anɔwa nɔga *Awliviye, cɔkwam! a nɔjey fetedɔ. Gula anɔa hay ta', a nɔgɔcham a cakay a, ata taava ata, aa cɔɔdamara, a lɔvmar: «Wuzdan-dara cey, cek aha a da key na, ta vara? Yaw, ya da sɔrmara gweegwe cay ka vɔhwa, asaya, gweegwe cay bɔla a ndɔvey na, fa me?»

⁴ Yesu a mbɔɔɔdatara, a lɔvtar: «Wam vaw fa ndɔhay ma da fɔcmakwar.

⁵ Ya lɔvkwar anda kedɔ, maja ndɔhay ga a samawa la ta mezɔley adaw, kwa waawa a da lɔvey anɔa na, *Kɔriste, *ndaw masa Gazlavay ma wala nɔga lɔhdata ndɔhay. Anda kedɔ, a fɔcam ndɔhay la ga.

⁶ Ka da cɔnam vɔram hay gweegwe ta akwar lenj mey da ray vɔram hay masa dɔrenj ta akwar. Ta ngene he cɔpa na, ka da zluram ba, maja si cek hay a ngene a kam la teesef dagay. Ama ara mendɔvey nga bɔla ba aran.

⁷ Hwayak lanjar a da key vɔram ta hwayak lanjar, bay lanjar a da key hɔma a ray bay lanjar. Daa hwayak hay mekele mekele, may a key la, asaya, hwiyak a wusey la.

⁸ Cek hay a tabiya a da kam na, anda hwad ma zlar nga car ngada ngwas ma da yey.

Mey da ray banay ma da hɔfatar ndɔhay ma tɔba mey nga Yesu

⁹ «Daa ngene, a da vɔldamakwar a har ndɔhay nga sɔrdamakwar banay, a kɔɔmakwar la vagay. Ndɔhay tabiya da bɔla a da ngɔldamakwar ba, maja yah.

¹⁰ Anda kedɛ, ndɔhay ga a da mbɔkdamara nga tɔbey mey adaw. A da ngɔlam vaw ba da wuzlah ata, asaya, siya hay a da vɔldamata siya hay asi har nga ndɔhay nga sɔrdamata banay.

¹¹ Ndɔhay ga a samawa la, a da mbɔzlam, a lɔvam ata na, ndɔhay ma tɔla mey nga Gazlavay. Ndɔhay a ngene, a da nɔsam ndɔhay ga.

¹² Ndɔhay a da kam cek hay malamba ma fɔna ma fɔna, maja ngene ndɔhay ga fa da wudam vaw ta maaya daa saba.

¹³ Ama ndaw ma bɔsa banay a la haa mendɔvey a na, Gazlavay a lɔhda la.

¹⁴ Si a wuzdamara *Mey-maaya-mawiya da ray *mewey nga Bay Gazlavay da ray ndɔhay a ndɔhay tabiya da bɔla la dagay, amba ndɔhay tabiya a cɔndamara mey da ray adaw. Fa dɔba ha, bɔla a ndɔvey dɔba.»

*Mey da ray banay ma da sawa a ray ndɔhay da Jude
(Mark 13.14-23; Luk 21.20-24)*

¹⁵ «Cay na, ka da hɔtmar ndaw malamba ma nɔsa cek, ara ndaw masa Gazlavay ma wudɛy nga hɔtar fa dey ba. Ka da hɔtmar ndaw aha manjakaya daa *Way-mekey-kwakwas nga Gazlavay. Ndaw a na, *Daniyel, *ndaw ma tɔla mey nga Gazlavay ta wuzleley mey la zleezle da ray a. (Akwar masa ma janjamara mey a kedɛ na, si ka pam lenjesl fa mey a.)

¹⁶ Daa dɔr hay a ngene na, si ndɔhay daa hwayak nga *Jude a hwam nga bawa a anɔwa.

24:7 24.7 2Mev 15.6; Iz 19.2 24:9 24.9 5.11 24:9 24.9-14 10.17-22; Jan 16.1-4 24:10 24.10 10.35; Lk 12.52-53 24:11 24.11 7.15 24:12 24.12 2Tm 3.1-5 24:13 24.13 CWJ 13.10 24:14 24.14 28.19 24:15 24.15 Dan 9.27; 11.31; 12.11

17 Kwa ndaw masa fa mëskey vaw daa ambaw na, fa da mbøzey a way nga lawa cek anga hay daa ba.

18 Kwa ndaw anga da ley na, a da vøhwa a way nga ley zana ba.

19 Daa ðar hay a ngene, banay a sawa la a ray ngusay ta hwað ta a ray ngusay masa ta bøza hay da har.

20 Døram danggay a Gazlavay amba banay a, a sawa ta piya ba, kwa ta *pas memøskey-vaw ba may,

21 maja daa ðar hay a ngene na, banay a sawa la ga a ray ndøhay. Døga mezley nga bøla haa wure keðe ndaw ta sørey banay anda ngene daa ba aran. Asaya, banay fa da sawa ma føna ngene daa saba.

22 Da Gazlavay ta ngøwa siya nga ðar nga banay a daa ba na, anja kwa ndaw pal fa da mbøkey ta dey daa ba. Ama a ngøwa siya nga ðar a na, maja ndøhay masa anga ma walata nga ndøhay anga hay.

23 «Da ray ngene, da ndaw a løvkwar: “*Køriste, anga keðe”, da daa ba “annga katay” na, ka da tømara mey anga ba.

24 Ya løvkwar anda keðe na, maja ndøhay ma pamara ray ata nga Køriste, asaya, ndøhay ma pamara ray ata nga ndøhay ma tøla mey hay nga Gazlavay na, a samawa la. A kam maazla hay ma røzla ndaw la nga wuzdørwa gøðan ata amba a tøknam ndøhay. Da a gwamara na, a tøknam kwa ndøhay masa Gazlavay ma walata sem nga ndøhay anga hay may.

25 Jøkam slømay, cøndamara maaya maaya, fa cek hay a keðe ma da kam na, ya ta pakwar lenjesl cay.»

Mey da ray ma vøhwa nga Bøz nga Ndaw
(Mark 13.24-27; Luk 17.23-24; Luk 21.25-28)

26 «Da ndaw aa guzlkwar, a løvkwar: “*Køriste anga katay da wuzlah-ley” na, ka da diyam ba. Da a løvkwar saya “annga mabakaya feðe” na, ka da tømara mey nga ndaw a ba.

27 Yah, *Bøz nga Ndaw, ya da vøhwa na, anda var ma zømey ma wedey døga da wurza haa kasl a mey-anqwa.

28 Daa slam masa cek mamøckaya daha na, kwakucah hay makustakaya fetede*.

24:17 24.17-18 Lk 17.31 24:21 24.21 Dan 12.1; CWJ 7.14 24:23 24.23-25 Lk 17.23-24 24:24 24.24 24.5; 7.15; CWJ 13.13-14 24:27 24.27 24.30, 37; 25.31; 1Kwr 15.23; 1Tes 3.13; 4.15; 2Tes 2.1, 8; Jak 5.7-8; 2Pi 3.4; 1Jn 2.28 * 24:28 24.27-28 Anda ndøhay ma hømmar mezømey nga var, da daa ba, kwakucah hay makustakaya da ray cek mamøckaya na, ndøhay tabiya a da hømmar Yesu, Bøz nga Ndaw ma da vøhwa na, køne may. 24:28 24.28 Jøw 39.30; CWJ 19.17-18

29 «Fa dɔba nga banay a masa daa ɗar hay a ngene na, wure ngene pas a tɔbzley la, kiya fa da wedey daa saba, wurzla hay a kɔzlamawa la da vad a hwayak, cek hay cɔpa da gazlavay da vad, a wusam la.

30 Daa ngene, yah, Bɔz nga Ndaw, ya da wuzwa vaw da gazlavay da vad. Anda keɗe, ndɔhay da bɔla cɔpa a da wudam ta matɔway. A da hɔtmaya, yah, Bɔz nga Ndaw, ya fa sawa da ray mekwtene ta gɔɗaŋ mahura lenj ta mewedey nga Bay Gazlavay.

31 Day nga taalam mahura a cɔnwa la, yah, Bɔz nga Ndaw, ya da slɔrdatɔrwa maslaŋ hay nga Bay Gazlavay da vad amba a diyam aa slam hay tabiya da bɔla, a kusmatɔrwa ndɔhay masa Gazlavay ma walata nga ndɔhay aŋga hay.»

Mey-mɛngɛy ta gudav

(Mark 13.28-31; Luk 21.29-33)

32 «Jɔkam slɔmay maaya maaya fa mey masa yah ma da wakwara ta gudav. Da masa ka hɔtmar gudav fa ɗeɗey, gwaslaf a gudaf! gudaf! na, ka sɔrmara kiya madaw a ley gweegwe cay.

33 Aŋga letɛk kɔne, da ka hɔtmatar cek hay a tabiya fa kam anda yah ma lɔvkwɔr keɗe na, ngene sɔrmara, Yah, *Bɔz nga Ndaw, gweegwe cay ya vɔhwa.

34 Ya fa lɔvkwɔr fara fara, cek hay a keɗe tabiya a da kam na, ndɔhay masa wure keɗe ta mɛcam tabiya daa ba araŋ.

35 Slam da vad ta slam da hwayak a ndɔvey la, ama mey aɗaw na, fa da ndɔvey daa ba sɔlak.»

Ma sɔra pas nga mavɔhwa nga Bɔz nga Ndaw na, wa?

(Mark 13.32-37; Luk 17.26-30, 34-36)

36 «Fara fara, cek hay a keɗe tabiya a da kam na, ndaw ma sɔra kwa ɗar a, kwa ler e, daa ba. Kwa maslaŋ hay ma njam da cakay Bay Gazlavay da vad a sɔrmara ba, kwa Yah, Bɔzey aŋga, ya sɔra ba, ama si Papay, pal taava aŋga, ma sɔra ɗar a.

37 Ta pas masa yah, *Bɔz nga Ndaw ma da vɔhwa na, a da key anda cek ma key daa masa Nɔwe aŋga da bɔla.

38 Daa masa Bay Gazlavay ta paslata cek hay da bɔla ta yam daa ba araŋ, haa a wusey kasl fa ɗar masa Nɔwe ma mbɔzey aa kwambiwal na, ndɔhay fa zɔmam cek, fa sam

cek, fa lam ngusay, asaya, fa veldamata dam ata hay a way zel.

³⁹ Ama daa ngene na, kwa ndohay ta sarmara masa cek fa da hutfatar na, daa ba, haa yam a sawa aa zeddata cpa.

Yah, Bəz nga Ndaw ma da vohwa na, a da key kene.

⁴⁰ Daa ngene, da ndohay cew fa kam slera da ley na, ya da ngela pal, ya da mbekda langar.

⁴¹ Da ngusay cew fa karam fa lavar pal na, ya da ngela pal, ya da mbekda langar.

⁴² Anda kefe, wam vaw, ka da nam ba, maja ka sarmara pas nga Bay akwar Mahura ma da vohwa ba.

⁴³ Jekam slamay maaya maaya, da bay nga way a sara dar masa ndaw-mayal ma da daw a way anga nga leley ta tavad na, a ney aa dar dasi tavad a ngene la daw? Fa da ney daa ba selak, fa da mbekda ndaw-mayal nga slona way anga daa ba.

⁴⁴ Maja ngene, akwar may, wam vaw maaya maaya, maja yah, Bəz nga Ndaw, ya da vohwa na, kwa ka sarmara dar a ba.»

Mey da ray ndaw ma ka slera maaya ta maaya ba

(Luk 12.41-48)

⁴⁵ «Ndaw ma ka slera maaya ta lengesl na, wura? Ndaw ma ka slera maaya ta lengesl na, ara ndaw masa bay anga ma veldata ma ka slera hay cpa asi har anga amba a veltar cek mezomey daa masa may fa catar.

⁴⁶ Da masa bay anga ha, a sawa a hutfar anga fa ka slera ha na, ndaw ma ka slera ha aa somey la.

⁴⁷ Ya fa lovkwar fara fara, bay anga ha, a da veldara zleley anga hay cpa a har anga amba a nekfar dey.

⁴⁸ Ama da ndaw ma ka slera ha anga maaya ba na, a da ley mewulkey wal, a lovey: “Bay adaw aha, fa da vohwa gweegwe daa ba.”

⁴⁹ Anda kefe, ndaw ma ka slera ha, a zlar nga kedta mandala anga hay masa ata ma kam slera bama. A da zomey cek, a da sey wuzam ta ndohay ma wam mandaw mandaw.

⁵⁰ Yaw, bay anga ha na, a da vohwa ta pas masa ndaw ma ka slera fa wulkey da ray a daa ba, asaya, kwa fa da sara ler e daa ba.

⁵¹ Bay anga ha, a da belala da way anga, a da sarda banay anda ndohay masa ta neneh cew ma da saram banay ta pas mendovey nga belala, fetefe a da teway, asaya, a daa pofey sler.»

25

Mey-menjey da ray ma da vøhwa nga Yesu

¹ Yesu a ngatar mey a gula anga hay, a løvtar: «Ya gwa nga wa pas masa yah ma da vøhwa nga wey da ray ndøhay na, ta me? Yaw, ya gwa nga wa ta sabara hay kuraw daha ma diyam ta pas meley kwakwa. A diyam nga cawa ray ta zel nga dam a ta tavađ, ta petørla ata hay da har.

² Sabara hay zlam da wuzlah ata na, manjar lenjesl hay. Siya hay zlam na, ata ta lenjesl.

³ Sabara hay manjar lenjesl hay heyey na, a lamata petørla ata hay, ama ta lam mal a har nga zlørey aa petørla ata hay a saya na, daa ba gway.

⁴ Ama sabara hay zlam masa ta lenjesl heyey na, a lamata petørla ata hay, asaya, a zløram mal aa kwalaba hay.

⁵ Zel nga dam aha ta wuswa fiyaw daa ba. Anda keđe, sabara hay heyey a gøram nga sækwmara haa đar a katar, a nam.

⁶ «Ta wuzlah-tavađ na, đay a cønwa ta gøđan, a løvey: "Zel nga dam ta wuswa cay, diyam ta cadamørwaw ray."»

⁷ Da ray ngene, sabara hay kaa heyey a sløkđam daa đar, a diymata petørla ata hay.

⁸ Sabara hay manjar lenjesl hay heyey na, a løvmatar a sabara hay masa ta lenjesl hay: "Ambahw, vølmandar mal may taw. Petørla ala hay fa møcam maja mal daa saba."»

⁹ Sabara hay a, a mbøđdamatara, a løvmatar: "Kay! ya vøldamara ba, maja mal ala fa da wusndakwar aløkwa cøpa daa ba. Diyam ta høđkamawa fa ndøhay ma høđkada mal."»

¹⁰ «Masa ata ma diyam sem nga søpwa mal heyey na, zel nga dam heyey, a wuswa døba. Sabara hay siya zlam masa madiytakaya vaw heyey na, a mbøzam bama nga key gwagway. Ta', a gørcamara mey-slam.

¹¹ «Fa døba ha, sabara hay zlam manjar lenjesl heyey, a wusmawa, a løvam: "Bay ala, Bay ala, wurndara mey-mbew may taw!"»

¹² Ama zel nga dam heyey, a mbøđdatara, a løvtar: "Ya fa løvkwar fara fara, ya sørkwar ba."»

¹³ Yaw, Yesu aa guzltar saya, a løvtar: «Anda keđe, wam vaw, maja yah, *Bøz nga Ndaw, ma da vøhwa na, ka sørmara kwa đar a ba, kwa ler e ba.»

Mey-menjey da ray ndøhay ma ka sløra maaya ta maaya ba

(Luk 19.11-27)

14 Yesu aa guzltar mey-menjey saya, a ləvhtar: «Ma da vəhwa adaw a bəla na, anja letek anda ndaw masa-zleley ma daw a mələk. Masa fa da daw na, a zelta ndəhay ma ka sləra anja hay, a vəldatara zleley anja amba a nəkfamar dey.

15 A vəlar gabal temere zlam * a ndaw pal, a vəlar gabal temere cew a ndaw lanjar, a vəlar gabal temere pal a ndaw lanjar saya. A vəldatara na, təde ta gədan nja ndaw a, nja ndaw a. Fa dəba ha, ta', a daw a mələk.

16 Ndaw masa ma hətey gabal temere zlam heyey na, a daw wure wure nje, a kada filaw ta dala ha. A hətey gabal temere zlam mekele a dey a.

17 Ndaw masa ma hətey gabal temere cew heyey na, a ka kəne may. A hətey gabal temere cew a dey a.

18 Ama ndaw masa ma hətey gabal temere pal na, a daw ta', a zlədey vəged, a bəda dala nja bay anja ha a hwad a.

19 «Menjey ga fa dəba ha, bay nja ndəhay ma ka sləra ha, a vəhwa da mələk a, ta', aa cəfdəta da ray dala ha heyey.

20 Ndaw masa ma hətey gabal temere zlam heyey, a njechey a cakay a, ta gabal temere zlam mekele da dey a, ta', a ləvar: "Bay adaw, kah ta vəlyə gabal temere zlam la. Nəka, yah ma hətey gabal temere zlam mekele la a dey a."

21 Bay anja, a mbəfdəra, a ləvar: "Maaya, kah ndaw ma ka sləra maaya ta cəved e. Kah ma key sləra ta cəved e la ta cek mecəhe. Ya da vəldatakawa cek adaw hay maaya ga asi har akah. Sawa, njakwa cew e, sasəmkwa."

22 «Ndaw masa ma hətey gabal temere cew, a njechey a cakay a may, ta', a ləvar: "Bay adaw, ka ta vəlyə gabal temere cew la, nəka, ya ta hətey gabal temere cew mekele la a dey a."

23 Bay anja ha, a ləvar: "Maaya, kah ndaw ma ka sləra maaya ta cəved e. Ka ta key sləra la ta cəved e ta cek mecəhe. Ya da vəldatakawa cek adaw hay maaya ga asi har akah. Sawa, njakwa cew e, sasəmkwa."

24 «Fa dəba ha, ndaw masa ma hətey gabal temere pal heyey, a njechey a cakay a, ta', a ləvar: "Bay adaw, ya səra, kah ndaw ma sərey dey-ceceh fa ndaw ba, ka njechey daw daa slam masa kah ma sləka ba, asaya, ka kawa cek da ley daa slam masa kah ma rəva ba.

25 Ya ta zlyurey la ta kah, anda kedə, ta', ya daw ya bəda dala akah aa vəged. Dala ha anja kedə, ehe təba cek akah."

25:14 25.14-15 Mk 13.34 * 25:15 25.15 Gabal temere zlam, gabal temere cew, lej gabal temere pal mawuzlalakaya ta mey Gorek na, «*talanj zlam, talanj cew, talanj pal*». 25:15 25.15 Rm 12.6 25:19 25.19 18.23 25:21 25.21-23 24.45-47; Lk 16.10

26 Bay an̄ga ha, a mbæfdara, a ləvar: “Kah ndaw ma ka sləra maaya ba, masa-mayad! Ka səra yah ndaw ma ngəmey daw daa slam masa yah ma sləka ba, asaya, ya kawa cek da ley daa slam masa yah ma rəva ba,

27 anda kefe, ka gwa ka vəlda dala adaw a har ndəhay amba daa mavəhwa adaw kefe na, a vəhdamiwa dala ha ta yam a, ba daw?”

28 «Da ray ngene, ndaw masa-zleley a, a ləvtar a ndəhay ma ka sləra an̄ga hay mekele: “Təbmara gabal temere he, vəldamara a ndaw masa ma hətəy gabal temere zlam a dey a heyey.

29 Sərmara, ndaw masa cek an̄ga daha, a da vəlmar a dey a, ama ndaw masa cek an̄ga kuset kəfey na, a da təbmara kwa masa kuset kəfey a ngene.

30 Ndaw ma ka sləra kefe na, an̄ga ndaw masa mayad nga tede, hazakadamara aa ambaw, aa ləvan̄. Fetefe, a da təway, asaya, a daa pəfey sler.”»

Mey da ray mendəvey nga bəla

31 Yesu aa guzltar a gula an̄ga hay saya a ləvtar: «Masa yah, *Bəz nga Ndaw, ma da vəhwa daa mewefey adaw na, ya da samawa ta maslan̄ hay nga Gazlavay tabiya da vad. Ya da n̄jey aa slam adaw menjey maaya nga key sariya.

32 Səkway hay tabiya da bəla, a da kusam fa mey adaw. Ya da ngəwta ndəhay maaya ta maaya ba hay wal wal anda ndaw-mecəkwer ma ngəwey təban̄ hay ta dāhway.

33 Ya da pata ndəhay maaya ta har-zəmay, ndəhay maaya ba ta har-gula.

34 «Fa dəba ha, yah bay, ya da ləvtar a ndəhay ta har-zəmay: “Akwar ndəhay masa Papay ma pəskwar mey, slam mad̄iykaya ngada akwar daha dəga mezley nga bəla, samawa, njakwa bama ta Gazlavay nga sərmataw,

35 maja may ta caya la, akwar ta vəlmaya cek mezəmey la, yam ta kaya la, akwar ta vəlmaya yam nga sey la, ya ta daw la fa akwar anda ndaw-məlak, akwar ta təbmaya la a way akwar hay,

36 zana fa vaw adaw daa ba, akwar ta vəlmaya zana la. Vaw ta caya la, akwar ta samawa la nga nəkmaya. Yah daa fərsəne, akwar ta samawa la nga nəkmaya.”

37 «Da ray ngene, ndəhay maaya heyey, a da mbæfdamiwa, a ləvmaya: “Bay mahura, ya hətmake may fa caka, ta’, ya vəlmaka cek mezəmey na, nga vara? Ya

hətmaka yam fa kaka, ta', ya vəlmaka yam nga sey na, nga vara?

³⁸ Ya hətmaka kah ndaw-məlak, ta', ya təbmaka a way ala hay na, nga vara? Da daa ba, ya hətmaka zana fa vaw daa ba, ta', ya vəlmaka zana na, nga vara?

³⁹ Asaya, ya hətmaka vaw fa caka, da daa ba, kah daa fərsəne, ta', ya nəkmakawa na, nga vara?"

⁴⁰ «Yah, bay, ya da mbədfdatara, ya ləvtar: "Ya fa ləvkvar fara fara, cek hay tabiya masa akwar ma kamara ngada kwa waawa, kwa ngada ndəhay mecəhe hay dasi ndəhay adaw hay keđe, ka kamara ngene na, ngada yah may."

⁴¹ «Fa dəba ha, ya daa guzltar a ndəhay ta har-gula, ya ləvtar: "Akwar masa Bay Gazlavay ta nəskwar sem, ngəcham la da cakay adaw. Diyam aa awaw mēndəvey ba mađiykaya ngada bay-malula ta maslanj anga hay.

⁴² Maja may ta caya la, ama akwar ta vəlmaya cek mezəmey daa ba. Yam ta kaya la, ama akwar ta vəlmaya yam nga sey daa ba.

⁴³ Ya ta daw la fa akwar anda ndaw-məlak, ama akwar ta təbmaya a way akwar hay daa ba. Zana fa vaw adaw daa ba, ama akwar ta vəlmaya zana daa ba. Vaw ta caya la, asaya, yah daa fərsəne, ama akwar ta samawa nga nəkmaya daa ba."

⁴⁴ «Da ray ngene, a da mbədfdamiwa, a ləvmaya: "Bay mahura, ya hətmaka may fa caka, da daa ba, yam fa kaka na, nga vara? Ya hətmaka kah ndaw-məlak, da daa ba, zana fa vaw akah daa ba na, nga vara? Asaya, ya hətmaka vaw fa caka, da daa ba, kah daa fərsəne masa ala ta jənmaka daa ba na, nga vara?"

⁴⁵ «Da ray ngene, ya da mbədfdatara, ya ləvtar: "Ya fa ləvkvar fara fara, cek hay masa akwar ma gəməm nga kamara ngada kwa waawa, kwa ngada ndəhay mecəhe hay dasi ndəhay adaw hay keđe ba na, ka gəməm nga kamara ba ngene na, ara ngada yah may."

⁴⁶ «Yaw, ndəhay maaya ba hay anda ngene na, a da səram banay nga sərmataw, ama ndəhay masa maaya fa Gazlavay na, a da hətam heter mēndəvey ba.»

26

Mahura hay nga Jəwif hay a slam yawa nga kədey Yesu vagay

(Mark 14.1, 2; Luk 22.1, 2; Jan 11.45-53)

¹ Masa Yesu ma ndøvda meesærkedey hay a kedfe tabiya cay na, ta', aa guzltar a gula anğa hay, a løvtar:

² «Ka sərmarā, mendərey đar cew nğa wusey fa gwagway nğa *Pak, ba diya? Ta pas a ngene, a da kərzamaya yah, *Bəz nğa Ndaw, a da dərmaaya fa hwadam ma-zlanğalakaya.»

³ Ta pas a ngene, *bay-ray hay nğa ndəhay ma ka kwakwas nğa Gazlavay ta mahura hay nğa *Jəwif hay a kusam a way Kayif, *ndaw mahura da ray ndəhay ma ka kwakwas nğa Gazlavay cəpa.

⁴ A slam yawa da wuzlah ata amba a kərzamara Yesu ta mayal a nğa kədey vagay.

⁵ Aa guzlam, a ləvam: «Ya gwakwa nğa kərzakwa daa gwagway kedfe ba, maja ndəhay a da yam mey.»

*Nğwas a mbəđar bərdey fa ray nğa Yesu
(Mark 14.3-9; Jan 12.1-8)*

⁶ Daa ngene, Yesu aa da Betani da way *Simanğw, ndaw masa aa ma mbəlda daa maasəkula.

⁷ Masa Yesu a, fa zəmey đaf na, nğwas daha a nğəchey a cakay a ta kwalaba nğa anğwa maavərkwakaya mezəley «*albaatəra». Kwalaba ha marəhkaya ta bərdey mezey maaya ma hədkey ba. Ta', a mbəđara bərdey a fa ray nğa Yesu.

⁸ Masa *gula hay nğa Yesu ma hətmar na, a cam mevel, a ləvam da wuzlah ata: «A nəsa bərdey a kedfe nğa tede na, maja me?»

⁹ Anja a hədkada na, a gwa nğa hətey dala ga. Fa dəba ha a wunkatara dala ha a masa-viya hay, ba daw?»

¹⁰ Yesu a səra mewulkey ata ha, ta', aa guzltar, a løvtar: «Ka həbmar ray a nğwas aha na, maja me? Sləra masa anğa ma kayawa kedfe na, anğa maaya,

¹¹ maja ndəhay masa-viya hay na, mandaw mandaw akwar bama. Ama yah na, akwar fa da hətmaya nğa njeý mandaw mandaw ta akwar daa ba.

¹² Nğwas aha, a mbəđda bərdey fa vaw adaw na, a key ngene, a diyawa vaw adaw nğadaa cəvay.

¹³ Ya fa ləvkwar fara fara, kwa daa wura daa wura da bəla tabiya, ndəhay ma da wuzdamara *Mey-maaya-mawiya na, a kadamara cek masa nğwas a ma ka kedfe la may, amba ndəhay a sərfadamara nğwas aha.»

*Juda a vəlda Yesu a har masa-gəra anğa hay
(Mark 14.10, 11; Luk 22.3-6)*

14 Fa dɔba ha, ndaw pal da wuzlah *gula hay nga Yesu kuraw a ray a cew mezɔley Juda Iskariyawt, a daw fa *bay-ray hay nga ndɔhay ma ka kwakwas nga Gazlavay.

15 Ta', aa guzltar, a lɔvtar: «Da ya ta vɔldakwara Yesu a har akwar la na, ka da vɔlmaya me?» Ta', a mɔslmar bɔrey hay kwakwar maakar nga dala, a vɔldamara.

16 Dɔga ta pas a ngene, Juda a daw a sɔpey cɔved amba a kɔrztara Yesu, a vɔldatara.

Yesu a zɔmam daf nga gwagway nga Pak ta gula anga hay

(Mark 14.12-21; Luk 22.7-13, 21-23; Jan 13.21-30)

17 Ta dɔr ngeeme nga *gwagway nga pen manjar cek ma hɔsla da hwad a na, *gula hay nga Yesu, a ngɔcham a cakay a, a lɔvmar: «Ka wudɔy ya diyam, ya diymɔrwa slam amba ya zɔmkwa daf nga gwagway nga *Pak na, dama?»

18 Yesu a mbɔdɔdatara, a lɔvtar: «Diyam aa berney nga *Jeruzelem fa ndaw daha. Ka lɔvmar na, “Bay ala a lɔvey: Dar adaw gweegwe cay a wuswa. Ya wudɔy nga key gwagway nga Pak ta gula adaw hay na, da way akah.”»

19 Gula hay nga Yesu heyey a kamara anda Yesu ma lɔvtar. Anda kedɔ, a diymara cek nga gwagway nga Pak a dɔba.

20 Taa kwad a ngene, Yesu a njam ta gula anga hay kuraw a ray a cew nga zɔmey daf nga gwagway a.

21 Daa masa ata fa zɔmamara daf a na, Yesu aa guzltar, a lɔvtar: «Ya fa lɔvkwar fara fara, ndaw pal da wuzlah akwar a vɔldaya la a har ndɔhay nga kɔdmaya vagay.»

22 Mey a kedɔ a mɔctar vaw kwa ara mey ba a gula anga hay a. Da ray ngene, aa cɔfdamara Yesu pal pal, a lɔvam: «Bay Mahura, ara yah ma da vɔldaka ba, ba diya?»

23 Yesu a mbɔdɔdatara, a lɔvtar: «Ma da vɔldaya a har ndɔhay nga kɔdmaya vagay na, ara ndaw masa alɔkwa fa zɔmkwa daf bama daa slam a kedɔ.

24 Ahaw, yah, *Bɔz nga Ndaw na, ya mɔcey la anda mey mawuzlalakaya daa dɔrewel nga Gazlavay ma lɔvey. Ama banay a sawa la a ray ndaw ma da vɔldaya a har ndɔhay nga kɔdmaya vagay a. Ngada ndaw aha na, ngama ta yamɔrwa daa ba sɔlak.»

25 Juda, ndaw ma da vɔlda Yesu a har ndɔhay nga kɔdmara vagay heyey aa cɔfda Yesu may, a lɔvar: «Bay adaw, ara yah ma da vɔldaka daw?» Yesu a mbɔdɔdara, a lɔvar: «Ka fa kada ta mey akah ngene na, kwariya?»

Mey da ray mezəmey cek nga madagway-dakw nga Bay Mahura

(Mark 14.22-26; Luk 22.14-20; 1 Kwarinti hay 11.23-25)

²⁶ Masa ata fa zəmam daf nga gwagway a na, Yesu leŋ! a ley peŋ. A kar suse a Gazlavay, a wunka, ta', a vəldatara a gula anğa hay, a ləvtar: «Ehe, təbmara, zəmamara. Kede he, ara vaw adaw.»

²⁷ Fa dəba ha, leŋ! a ley vəley ta cek mesey da hwaɗ a, a kar suse a Gazlavay saya. Ta', a vəldatara, a ləvtar: «Ehe, samara akwar cəpa.

²⁸ Kede he, ara mambaz adaw. Ta fa mambaz a, Gazlavay a jəwey mey mawiya ta ndəhay anğa hay. Mambaz a, a da mbəɗwa maja ndəhay ga amba Gazlavay a mbəkdatara mebərey ata hay.

²⁹ Ya fa ləvkwar, dəga wure kede ya fa da sey yam nga babəza nga wudez maɗəckaya anda kede daa saba səlak. Ya da sey na, si cek mawiya mekele ta pas masa aləkwa bama daa slam masa Papay fa wey da ray ndəhay da vad.»

³⁰ Ta', a zlam walay nga gwagway daa *Pəsam hay. Fa dəba ha, a sləkɗam, a diyam aa Anğwa nga *Awliviye.

Piyer a ləvey fa da mbəkda Yesu daa ba səlak

(Mark 14.27-31; Luk 22.31-34; Jan 13.36-38)

³¹ Yesu aa guzltar a gula anğa hay, a ləvtar: «Dasi tavad kede akwar cəpa ka da mbəkdamaya anda mawuzlalakaya daa ɗerewel nga Gazlavay, ma ləvey: “Ya kəɗa ndaw-mecəkwer la vagay. Təbaŋ hay masa ma səkəram daa slam a may, aa kwacam ray la pal pal.”

³² Ama da yah ta sləkɗawa cay daa meməcey na, ya daw la teesɗ da ray akwar aa hwayak nga *Galile. Ka da hətfamaya fetede.»

³³ *Piyer a mbəɗɗara, a ləvar: «Kwa ndəhay cəpa a mbəkdamaka, ama yah na, ya fa da mbəkɗaka daa ba səlak.»

³⁴ Yesu a mbəɗɗara, a ləvar: «Ya fa ləvka fara fara, dasi tavad kede, wuskwaa gwagwalak a da cey ɗay na, ka ta ləvey cay dey maakar, ka sərya ba, ka sərya ba.»

³⁵ Ama Piyer a mbəɗɗara, a ləvar: «Kwa da fa da kəɗmaka vagay na, nga kəɗmandakwar cew e, ya fa da ləvey ya sərka ba na, daa ba səlak.» Gula hay nga Yesu siya a ləvam kəne may.

Yesu a dɔrey danɔay a Gazlavay da Gecemene
(Mark 14.32-42; Luk 22.39-46)

³⁶ Fa dɔba ha, Yesu a wusam ta gula anɔa hay aa slam daha mezɔley Gecemene. Ta', aa guzltar a gula anɔa hay, a lɔvtar: «Njam fedɛ, yah na, ya daw la fatadɔy nɔa dɔrwa danɔay a Gazlavay.»

³⁷ Ta', a nɔelta ata *Piyer ta bɔza hay nɔa Zebede cewete. Wure nɔgene, mevel anɔa a dɔsley, aa lɔkey maja banay ma da sawa a ray a.

³⁸ Anda kedɛ, aa guzltar, a lɔvtar: «Mewulkey fa da kɔɔya vagay. Njam fedɛ, zazɔkakwa, ka da nam ba.»

³⁹ Ta', a nɔɔchey nekɔɔɔy fa mey, a ney ta hwad ta hwad, ray dar! a hwayak, a dɔrey danɔay, a lɔvey: «Papay, da a key ta key na, nɔɔchada banay ma da sawa a ray adaw kedɛ la. Ta kɔne he cɔpa na, key anda kah ma wudɔy, ba na, anda yah ma wudɔy ba.»

⁴⁰ Cay, ta', a vɔhwa fa gula anɔa hay maakar heyey, a hɔɔfatar manatakaya daa dɔr. Aa guzlar a Piyer, a lɔvar: «Haya! Ka gwamara nɔaa zɔkam ta yah kwa ler pal ba gway daw?

⁴¹ Zazɔkam, ka da nam ba, dɔram danɔay a Gazlavay nɔa jɔnkwar amba cek a batakwar nɔa key meɔrey ba. Mevel akwar na, a wudɔy nɔa key cek maaya, ama vaw akwar na, anɔa ta bɔle.»

⁴² Yesu a nɔɔchey nɔa dey cew saya, ta', a dɔrey danɔay, a lɔvey: «Papay, da ka wudɔy nɔa nɔɔchada banay a kedɛ dɔren ta yah ba, si a sawa a ray adaw cɔma na, ka anda kah ma wudɔy.»

⁴³ Fa dɔba ha, a vɔhwa fa gula anɔa hay maakar heyey saya, a hɔɔfatar manatakaya cɔnɔa maja dɔr fa latar mey kalah.

⁴⁴ Anda kedɛ, Yesu ta', a mbɔkdata, a nɔɔchey saya, a dɔrey danɔay nɔa dey maakar, aa guzley mey letɛk anda aa ma dɔrey danɔay nɔa dey cew heyey.

⁴⁵ Fa dɔba ha ta', a vɔhwa fa gula anɔa hay heyey saya, a lɔvtar: «Haa wure kedɛ, akwar fa nam, fa mɔskam vaw cɔnɔa daw? Ehe dɔr a ta wuswa cay amba a vɔldamaya, yah, *Bɔz nɔa Ndaw, a har ndɔhay ta meɔrey.

⁴⁶ Nɔkmara ndaw ma da vɔldaya a har ndɔhay nɔa kɔɔɔy vagay fa sawa katay. Lacam, nakwa ta cadakwa ray.»

A kɔrzamara Yesu
(Mark 14.43-50; Luk 22.47-53; Jan 18.3-12)

⁴⁷ Masa Yesu ta ndøvda meeguzley daa ba arañ na, Juda, ndaw pal dasi gula anğa hay kuraw a ray a cew heyey, a wuswa. Juda ha a samawa na, ta ndøhay ga ta dølawa * hay da cakay, ta zlanday hay da har. Ma slørdamatørwa ndøhay a na, ara bay-ray hay nğa ndøhay ma ka kwakwas ta mahura hay nğa Jøwif hay.

⁴⁸ Juda, ndaw masa ma da vølda Yesu a har ndøhay, ta wuswa fa Yesu daa ba arañ na, aa guzltar a ndøhay a, a løvtar: «Ndaw masa yah ma da car har anda mandala adaw fara fara na, ara anğa, kørzamara.»

⁴⁹ Masa Juda ma wusey la gweegwe ta Yesu na, wure wure nğene, a nğøchey a cakay a, a løvar: «Bay adaw, zay daw?» Ta', a car har anda aa ma løvey heyey.

⁵⁰ Yesu a mbøddara, a løvar: «Jam adaw, ka sløra masa kah ma wufey nğa ka.»

Anda kefe, ndøhay ma samawa ta ata Juda heyey a nğøcham fa Yesu a, ta', a kørzamara.

⁵¹ Ndaw pal da wuzlah gula anğa hay masa da cakay a, a mødørwa dølawa anğa, a nğøma, cørah! a cørha slømay nğa madørlam nğa ndaw mahura da ray ndøhay ma ka kwakwas.

⁵² Maja nğene, Yesu aa guzlar, a løvar: «Mada dølawa akah aa way a maja ndøhay ma kødam vaw ta dølawa na, ara dølawa a ma da kødta vagay.

⁵³ Ka søra, da ya wufey na, ya gwa nğaa cøfda Papay nğa slørya maslan anğa hay ga a føna gabal kuraw a ray a cew † nğa jønya, ba daw?

⁵⁴ Ama da ya ka køne na, mey nğa Gazlavay mawuzlalakaya a da key fara fara na, kwara døba wura? Maja mey a mawuzlalakaya, a løvey si cek aha a key køne.»

⁵⁵ Fa døba ha, Yesu aa guzltar a ndøhay makustakaya fetefe, a løvtar: «Ka samawa nğa kørzamaya ta dølawa, ta zlanday faa har faa har anda yah ndaw-mayal na, maja me? Mandaw mandaw yah manjakaya daa *Way-mekey-kwakwas nğa Gazlavay, ya faa sørkadata ndøhay, ama ka ta kørzamaya daa ba.

⁵⁶ Ama daa mey nğa Gazlavay mawuzlalakaya na, ndøhay ma tøla mey nğa Gazlavay taa guzlam la da ray cek ma da key da ray adaw. Ara maja nğene si cek aha a key cøpa.»

Fa døba ha, gula anğa hay cøpa a zluram, a mbøkdamara Yesu, a hwam.

* **26:47 26.47** dølawa: maslalam **26:52 26.52** MC 9.6 † **26:53 26.53** Yesu a wufey nğa løvey Papaha, Bay Gazlavay, a gwa nğa slørar maslan hay ga, a sløfey ba. A wa ta sewje hay nğa Rawm ma kusam gabal maakwaw, gabal maakwaw, slam 12. **26:55 26.55** Lk 19.47 **26:56 26.56** Mt 26.31; Lk 24.46

Yesu fa mey nga ndəhay ma sla yawa nga Jəwif hay
(Mark 14.53-65; Luk 22.54, 55, 63-71; Jan 18.13, 14, 19-24)

⁵⁷ Ndəhay ma kərzamara Yesu heyey, ta', a handamara a way Kayif, *ndaw mahura da ray ndəhay ma ka kwakwas nga Gazlavay. *Ndəhay maa sərkada kwakwas nga Mawiz ta mahura hay nga *Jəwif hay makustakaya fetede.

⁵⁸ *Piyer na, fa səpa Yesu ta meedəreŋ e. A daw haa a mbəzey a palah-way nga ndaw mahura da ray ndəhay ma ka kwakwas nga Gazlavay heyey. Ta', a njam ta ndəhay ma jəda way a, amba a nəka cek masa ata ma da kamar a Yesu.

⁵⁹ *Bay-ray hay nga ndəhay ma ka kwakwas nga Gazlavay ta ndəhay mahura hay mekele masa ma sla yawa nga Jəwif hay tabiya, a səpam dabaray nga mbərzlafamar a ray Yesu amba a kədmara vagay.

⁶⁰ Kwa ndəhay ga ta mbərzlafamar la a ray Yesu, ama ta ŋgene he cəpa, ta hətam mey təde nga kədmara vagay daa ba. Fa dəba ha na, ndəhay cew daha a samawa fa mey ata, a mbərzlafamar a ray a, a ləvam:

⁶¹ «Ndaw kede a ləvey: "Ya gwa nga bəzla *Way-mekey-kwakwas nga Gazlavay, dər maakar na, ya ləma la aa slam a."»

⁶² *Ndaw mahura da ray ndəhay ma ka kwakwas nga Gazlavay a sləkdey, aa guzlar a Yesu, a ləvar: «Ka mbəddatara a ndəhay maa guzlam da ray akah kaa ba gway daw?»

⁶³ Ama Yesu manjakaya teete. Ta', ndaw mahura da ray ndəhay ma ka kwakwas nga Gazlavay heyey a ləvar saya: «Ya faa cəfdaka ta mezəley nga Gazlavay masa aa ta dey, *ndaw masa Gazlavay ma wala nga ləhdata ndəhay heyey na, ara kah daw? Wuzdiwa! Kah na, Bəzey nga Gazlavay daw? Mbədəy amba ka kadiwa fara fara.»

⁶⁴ Yesu a mbəddara, a ləvar: «Ka fa kada ta mey akah ŋgene na, kwariya? Ama ya fa ləvkwar, dəga wure kede, ka da hətmaya yah, *Bəz nga Ndaw, manjakaya ta har-zəmay nga Bay Gazlavay Mawaca-waca. Asaya, ka hətmaya la ya fa sawa da ray mekwtene da vad.»

⁶⁵ Maja ŋgene, ndaw mahura ha ŋgar! ŋgar! a ŋgərta zana aŋga hay, aa guzley, a ləvey: «'As! 'As! Ta pa ray aŋga sem nga Gazlavay, akwar ta cəndamara la, ba diya? Wure kede, kwa ya səpkwa ndaw ŋga guzldakwar da ray a saba.

26:61 26.61 27.40; Jan 2.19; SNM 6.14 **26:63 26.63** manjakaya teete: Iz 53.7; Mt 27.12-14; **Bəzey nga Gazlavay:** Mt 14.33; 27.40, 43; Lk 22.70 **26:64 26.64** Dan 7.13; Mt 22.44; 24.30; Mk 13.26; Lk 21.27 **26:65 26.65** a ŋgərta zana aŋga hay: Mesl 14.6; Es 9.3; **Ta pa ray aŋga sem nga Gazlavay:** Lev 24.16; Jan 19.7

⁶⁶ Kaa wure keɗe, ka wulkam kwara?» Ndohay da cakay a, a mbæɗdamara, a ləvmar: «Anɗa ta key meɓerey sem, si mekəɗey anɗa vagay.»

⁶⁷ Ndohay siya a cərmar meesleɓ aa dey, a dəvmar mekəɗey, siya hay may, a vəlmar matapa-har †,

⁶⁸ a ləvmar: «Da kah *Kəriste na, səra ma kəɗka keɗe na, wa? Wuzɗandara ceɓ!»

Piyer a ləvey a səra Yesu ba

(Mark 14.66-72; Luk 22.56-62; Jan 18.15-18, 25-27)

⁶⁹ Daa nɗene, *Piyer manjakaya da palah-way nɗa ndaw mahura ma ka kwakwas nɗa Gazlavay heyey. Dam ma ka sləra fetede daha, a nɗəchawa a cakay a, a ləvar: «Kah na, gula nɗa Yesu, ndaw *Galile may, ba diya?»

⁷⁰ Ama Piyer a cada mey fa mey nɗa ndohay tabiya, a ləvey: «Kay! Ya səra mey masa kah ma wudey nɗaa guzley ba!»

⁷¹ Fa dəba ha, ta', a daw fa mey-mbew nɗa way a. Dam ma ka sləra mekele daha saya, a hətər Piyer, ta', aa guzlar a ndohay fetede, a ləvtar: «Ndaw keɗe ara ndaw nɗa Yesu, ndaw *Nezeret.»

⁷² Piyer a cada mey saya, a ləvey: «Ya fa mbedey, fara fara, ya səra ndaw a ba.»

⁷³ Fa dəba ha nekəɗey saya, ndohay masa fetede a nɗəcham a cakay Piyer, a ləvmar: «Fara fara kah na, kah ndaw da wuzlah ndohay anɗa hay maja meeguzley akah kaa na, anda ndaw daa hwayak anɗa.»

⁷⁴ Da ray nɗene, Piyer ta', a ləvtar: «Ya fa mbedey, fara fara ya səra ndaw a ba. Da ya mbərzley na, Gazlavay nɗa mbəɗya ray!» Wure wure nɗene, gwagwalak ta', a ceɓ ɗay.

⁷⁵ Piyer a sərɗada mey masa Yesu maa guzlar zleezle heyey dəba. Mey a, a ləvey: «Wuskwaa gwagwalak a da ceɓ ɗay na, ka ta ləvey cay dey maakar ka sərya ba, ka sərya ba.» Piyer ta', a bawa aa ambaw, a təway ga, a zəley marava.

27

A handamara Yesu fa mey nɗa Bay Pilat

(Mark 15.1; Luk 23.1, 2; Jan 18.28-32)

¹ Pərek pərek, *bay-ray hay nɗa ndohay ma ka kwakwas nɗa Gazlavay tabiya, len mahura hay nɗa *Jəwif hay a slam yawa daa slam a nɗa kəɗey Yesu vagay.

² A jəwmara, a handamara fa Pilat, ndaw Rawma ma wa hwayak ata.

† 26:67 26.67 matapa-har: maarawa 26:67 26.67 Iz 50.6; 53.5 26:68 26.68 21.11 26:75 26.75 26.34

Mey da ray meməcey nga Juda
(SNM 1.18, 19)

³ Juda, ndaw ma volda Yesu asi har nga masa-gəra anğa hay heyey, a cənda fa da kədmara Yesu vagay na, a zəley marava. Da ray nğene, a handatara bərey hay kwakwar maakar nga dala heyey a *bay-ray hay nga ndəhay ma ka kwakwas nga Gazlavay ta mahura hay nga *Jəwif hay.

⁴ A ləvtar: «Ya ta key mebərey la maja yah ma volda ndaw masa ta zay da mey nga kədey vagay.» Ama ndəhay a, a mbəddamara, a ləvmar: «Nğene na, ara mey akah ba na! Ma hətfandar me?»

⁵ Da ray nğene, aa kwacada dala heyey aa *Way-mekey-kwakwas nga Gazlavay. Ta', a daw a ləwa ray anğa, pam! a məcəy.

⁶ *Bay-ray hay nga ndəhay ma ka kwakwas nga Gazlavay heyey, a gədmamara dala ha. Aa guzlam, a ləvam: «Kwakwas aləkwa, a vəldakwar cəved' amba dala kefe, a cəmey ta zleley mavəldakaya nga key sləra daa Way-mekey-kwakwas nga Gazlavay ba, maja ara dala nga mekədey ndaw vagay.»

⁷ A slam yawa da wuzlah ata da ray dala ha. Ta', a hədkam ley nga ndaw meləmey manğayak daha ta dala ha. A tərdamara ley a nga cəvay nga mələk hay ma məcəm fetefe.

⁸ Ara maja ata ma hədkamara ley a nğene ta dala nga ray nga ndaw na, haa wure kefe, ndəhay fa zəlmara ley a: «ley nga mambaz.»

⁹ Cek aha, ta key la anda Jeremey, *ndaw ma təla mey nga Gazlavay maa guzley zleezle, a ləvey: «A lam bərey hay kwakwar maakar nga dala masa ndəhay da wuzlah ndəhay *Israyel hay ma pamara təfe fa ray nga ndaw.

¹⁰ A vəldamara dala ha nga hədkey ley nga ndaw meləmey manğayak anda Bay Gazlavay ma ləvya.»

Yesu fa mey nga Bay Pilat
(Mark 15.2-15; Luk 23.2-5, 13-25; Jan 18.28-19.16)

¹¹ A lacadamara Yesu fa mey nga Bay Pilat. Bay a, aa cəfda, a ləvar: «Kah na, bay nga *Jəwif hay fara daw?» Yesu a mbəddara, a ləvar: «Anda kah ma ləvey.»

¹² Daa masa *bay-ray hay nga ndəhay ma ka kwakwas nga Gazlavay len mahura hay nga Jəwif hay heyey faa dədfamar mey na, kwa Yesu ta mbəddatara daa ba.

13 Da ray ɲgene, Pilat aa guzlar, a lɔvar: «Ka fa cɛnda mey hay maaya ba cɛpa masa ata maa guzldamara da ray akah keɛɛ, ba diya?»

14 Kwa Yesu a mbɛɛɛɛɛɛɛ ba sɛlak. Anda keɛɛ, Bay Pilat a rɛzley ga maja.

15 Fa mevey a, fa mevey a, ta gwagway ɲga *Pak na, bay daa hwayak a, fa pɛskey ndaw pal daa fɛrsɛne. A pɛskey na, ndaw masa ndɔhay makustakaya ma wuɛɛɛ.

16 Daa ɲgene, ndaw daa fɛrsɛne daha, ndɔhay tabiya a sɛrmara ara ndaw maaya ba. Mezɔley ɲga ndaw a na, Yesu Barabas.

17 Pilat aa cɛɛɛɛɛɛɛ ndɔhay makustakaya, a lɔvta: «Ka wuɛɛɛ ya pɛskakwar na, Yesu Barabas daw, da daa ba, Yesu, ndaw masa ata ma zɛlmara *Kɛriste heyey daw?»

18 Pilat a sɛra a handamɛrwa Yesu fa mey aɲga na, maja sɛleɲ fa katar da ray Yesu a.

19 Daa masa Bay Pilat manjakaya daa slam mekey sariya na, ɲgwas aɲga, a slɛrwa fa aɲga, a lɔvar: «Ka da kar cek a ndaw ɲgene ba, maja ara ndaw masa ta zay da mey. Ya sɛra maja dasi tavaɛ keɛɛ, mesɛfney ta kaya la ta ndaw aha. Mesɛfney a, ta laya mey la.»

20 *Bay-ray hay ɲga ndɔhay ma ka kwakwas ɲga Gazlavay leɲ mahura hay ɲga Jɛwif hay heyey, a hɛldamata ndɔhay makustakaya heyey ɲgaa cɛɛɛɛɛɛɛ Bay Pilat amba a pɛskatara Barabas, ama Yesu na, a kɛɛɛɛɛɛɛ vagay.

21 Bay Pilat aa cɛɛɛɛɛɛɛ saya, a lɔvta: «Dasi ndɔhay cew keɛɛ na, ka wuɛɛɛ ya pɛskakwar na, wa?» Ndɔhay makustakaya ha, a mbɛɛɛɛɛɛɛ, a lɔvta: «Barabas! Barabas!»

22 Pilat aa cɛɛɛɛɛɛɛ saya, a lɔvta: «Kaa Yesu ndaw ma zɛlmara Kɛriste na, ya da kada na, kwara?» Ndɔhay tabiya a mbɛɛɛɛɛɛɛ, a lɔvta: «Dɛra fa hwadam mazlanɲgalakaya!»

23 Pilat aa cɛɛɛɛɛɛɛ, a lɔvta: «Cek maaya ba masa aɲga ma key na, wura?» Ama a wuɛɛɛ ta gɛɛɛɛɛ ta gɛɛɛɛɛ saya, a lɔvta: «Dɛra fa hwadam mazlanɲgalakaya!»

24 Masa Pilat ma nɛka kwa a gwa ɲga key meeme da ray mey a ba, asaya, masa aɲga ma nɛka ndɔhay fa kam baazlam ta gɛɛɛɛɛ, ta gɛɛɛɛɛ na, ta', a kawa yam, a pɛra har aɲga fa mey ɲga ndɔhay makustakaya, a lɔvta: «Da akwar ta kɛɛɛɛɛɛɛ ndaw keɛɛ la vagay na, mey aɛaw da hwad a daa ba. Ara mey akwar!»

²⁵ Ndohay makustakaya tabiya a mbøddamara, a løvmar: «Anja ndaw a nga møcey. Mey a nga sawa a ray ala ta böz ala hay tabiya!»

²⁶ Anda keðe, ta', Pilat a pøskatara Barabas daa førsøne. Ama Yesu na, Pilat a løvtar a sewje hay nga sløðmara ta laway, ta', a vøldatara amba a dørmara fa hwadam mazlanjalakaya.

*Sewje hay aa sanjoram a ray Yesu
(Mark 15.16-20; Jan 19.2-3)*

²⁷ Fa døba ha, sewje hay nga Bay Pilat, a handamara Yesu a palah-way nga Bay aha. Ta', a zølmatørwa sewje hay siya fetede tabiya a cakay a.

²⁸ A cøkwmata zana anga hay fa vaw, ta', a køzlmara zana nga bay hay magaza.

²⁹ Ta', a cam hatak, a paðamar ray ta anga anda gursaw nga bay. Fa døba ha, a vølmar danjwar nga bay hay a harzømay. A ragadam fa mey anga, aa sanjoram a ray a, a løvmar: «Zay daw, bay nga *Jøwif hay?»

³⁰ Fa døba ha, a tøfmar meesleb fa vaw, ta', a tøbmara danjwar heyey, a køðmara aa ray ta anga.

³¹ Masa ata maa sanjoram cay a ray a na, a cøkwmara zana magaza heyey fa vaw, a køzlmara zana anga hay. Ta', a badamara daa berney a, a handamara nga dørey fa hwadam.

*A dørmara Yesu fa hwadam mazlanjalakaya
(Mark 15.21-32; Luk 23.26-43; Jan 19.17-27)*

³² Masa sewje hay a, fa handamara Yesu na, a cam ray ta ndaw daa berney nga Siren daha, mezøley *Simanjw. A tøkmar ðay a Simanjw heyey nga la hwadam mazlanjalakaya nga Yesu a.

³³ A wusam aa slam mezøley Gwalgwata, anda meløvey, «slam anda tetesl nga ray nga ndaw.»

³⁴ Fetede, a vølmar wuzam majahadakaya ta slalak meedøwek e. Yesu aa cøka, ama a gømey nga sa ba.

³⁵ Ta', a dørmara fa hwadam mazlanjalakaya heyey. Fa døba ha, a køðam caca nga wunkey zana anga hay.

³⁶ Ta', a njam fetede nga jøðmara.

³⁷ A wuzlalam mey fa hwadam, a sløpmara ta da ray Yesu fa hwadam mazlanjalakaya. Ara mey masa ata ma køðmara vagay maja. Mey a, a løvey: «Ndaw keðe na, ara Yesu, bay nga *Jøwif hay.»

³⁸ Daa slam masa ata ma dərmarə Yesu a na, ta dərəm mayal hay cew la a cakay a, pal ta har-zəmay, lanğar ta har-gula.

³⁹ Ndəhay ma diyam taa slam a nğene, aa sanğəram a ray a, a wusam ray, a cədmara,

⁴⁰ a ləvmar: «Kah na, ndaw ma wudəy nğa bəzla *Way-mekey-kwakwas nğa Gazlavay amba ka ləma mekele daa dər maakar heyey, ba diya? Da kah Bəzey nğa Gazlavay na, bərnğawa fa hwadam a nğene a hwayak, ləhda ray akah, dəba taw!»

⁴¹ Asaya, *bay-ray hay nğa ndəhay ma ka kwakwas nğa Gazlavay ta *ndəhay maa sərkada kwakwas nğa Mawiz lən mahura hay nğa Jəwif hay aa sanğərfamar, a ləvam:

⁴² «A ləhdata ndəhay siya hay na, kaa ray anğa na, a gwa nğa ləhda, ba daw? Da anğa Bay nğa *İsrayel hay na, anja nğa bərnğawa fa hwadam a wure keđe dəba taw! Da ta bərnğawa sem na, nğene, ya təbkwa mey anğa.

⁴³ A pa Gazlavay nğa ndaw anğa fara fara, asaya, taa guzley la, a ləvey: “Yah na, Bəzey nğa Gazlavay.” Yaw, da Gazlavay fa wudə na, nğa ləhda wure keđe dəba taw!»

⁴⁴ Mayal hay cew masa madərtakaya da cakay a heyey na, a cədmara kəne may.

Meməcey nğa Yesu

(Mark 15.33-41; Luk 23.44-49; Jan 19.28-30)

⁴⁵ Ta wuzlah-pas, ləvan a key daa hwayak cəpa. Ləvan a, a njeý haa bərey maakar nğa pas nğaa kwad.

⁴⁶ Ta bərey maakar a na, Yesu a wudey ta gədan, a ləvey ta mey ata: «Eli, Eli, lema sabaktani?» Anda meləvey: «Gazlavay adaw, Gazlavay adaw, ka mbəkdaya na, maja me?»

⁴⁷ Ndəhay siya fetede, a cəndamara mewudey nğa Yesu a na, a ləvam: «Nəka, anğa fa zəla *Eli, *ndaw ma təla mey nğa Gazlavay zleezle!»

⁴⁸ Ndaw pal da wuzlah ata, ta', a hway nğa jəhwəbey cek anda gagəmay aa yam nğa babəza nğa wudez meekwerek e, ta', a pa fa mey nğa zlanday. A təldara a Yesu a amba a sasəba.

⁴⁹ Ama ndəhay mekele a ləvam: «Səkwakwa, amba ya nəkakwa da wara cay Eli a, a sawa nğa ləhda kwa.»

⁵⁰ Yesu a wudey ta gədan saya, pam! a məcey.

⁵¹ Daa *Way nğa Gazlavay na, zana ma gərca *Slam masa Gazlavay aa da hwad a daha. Masa Yesu ma məcey la na,

zana ha, a ngørey cew døga da vad kasl a hwayak. Hwiyak a wusey, bøler * hay a bøzlam,

⁵² cøvay hay a wuram, ndøhay nga Gazlavay mamøtakaya ga, a sløkdamawa daa memøcey.

⁵³ A bamawa daa cøvay. Fa døba nga masløkdawa nga Yesu na, ndøhay a, a diyam aa berney nga *Jeruzelem, berney nga Gazlavay. Fetede, ndøhay ga a høtmatar.

⁵⁴ Mahura nga sewje hay nga Rawma hay ta sewje anga hay ma jødmara Yesu heyey, a høtmar hwiyak ma wusey ta cek hay mekele ma kam heyey na, a zluram ga, a løvam: «Fara fara ndaw keðe na, ara Bøzey nga Gazlavay.»

⁵⁵ Ngusay ga fetede daha, ata fa nøkam dey da døreñ, da døreñ. Ngusay a ta søpmar wurzay nga Yesu la døga da *Galile fa jønmara.

⁵⁶ Da wuzlah ngusay a na, *Mari da Magdala, Mari mamañ nga ata *Jak ta *Jawzef, leñ mamañ nga bøza hay nga Zebede.

A jøhmara vagay nga Yesu

(Mark 15.42-47; Luk 23.50-56; Jan 19.38-42)

⁵⁷ Ta pas ngaa kwad a ngene, ndaw masa-zleley da slala Arimate daha, mezøley *Jawzef, anga may, ara *ndaw ma tøba mey nga Yesu. A wusey a *Jeruzelem.

⁵⁸ Ta', a daw a høtfar Bay Pilat, aa cøfða vagay nga Yesu. Da ray ngene, Bay Pilat a, a pøskatar mey a sewje anga hay nga vøldamara vagay a, a Jawzef e.

⁵⁹ A la vagay a, a zlønga ta zana mawiya mezløngey vagay.

⁶⁰ A handa vagay a, aa cøvay mawiya masa anga maa vørkwa daa anywa daa ðar hay a ngene. Fa døba ha, a gøðbalawa † beeler mahura gazl! fa mey nga cøvay a, ta', a daw.

⁶¹ Ata *Mari da Magdala ta Mari lanjar daha, man-jatakaya fetede, dey pøla! a mey cøvay a.

Sewje hay nga Bay Pilat a jødmara cøvay nga Yesu

⁶² Pepørek e, anda meløvey ta *pas memøskøy-vaw, *bay-ray hay nga ndøhay ma ka kwakwas nga Gazlavay ta *Fariza hay a kusam, a diyam a way Bay Pilat,

⁶³ a løvmar: «Bay Mahura, ala fa sørfadamara daa masa ndaw membørzley keðe anga ta dey na, taa guzley la, a løvey: "Fa døba nga ðar maakar na, ya sløkdawa la daa memøcey."»

* 27:51 27.51 bøler: anywa ma bøzlw. 27:51 27.51 Mab 26.3; Heb 10.19-20
 27:54 27.54 14.33; 26.63; Mk 15.39 27:57 27.57-58 Mew 21.22-23 † 27:60
 27.60 gøðbalawa: gøðkalawa 27:63 27.63 12.40

⁶⁴ Anda keđe, pəskatar mey a sewje akah hay amba a jədmara cəvay a haa dar maakar, daa ba na, gula anğa hay a da samawa nğa lalamara vagay a. Fa dəba ha, a da mbərzlam, a da ləvam: “Yesu ta sləkdawa sem daa meməcey.” Membərzley ata nğene na, a da fəna membərzley nğa ndaw aha masa ngeeme heyey.»

⁶⁵ Pilat ta’, a mbədfatara a ndəhay a, a ləvtar: «Ehe, nğəlmata sewje hay keđe, diyam jədmara cəvay a maaya maaya anda akwar ma wudam.»

⁶⁶ Ta’, a diyam nğa jədmara cəvay a maaya maaya. Anda keđe, a slərbamara mey nğa cəvay a maaya maaya. Fa dəba ha, a pam sewje hay nğa jədmara.

28

Yesu a sləkdawa daa meməcey

(Mark 16.1-10; Luk 24.1-12; Jan 20.1-10)

¹ Fa dəba nğa *pas meməskey-vaw, ta pas luma nğa Gudal, *Mari da Magdala ta Mari lanğar daha a diyam ta slam bəñ-beñ nğa nəkmərwa cəvay nğa Yesu.

² Wure wure nğene hwiyak a wusey gədf-geď ta gədañ. Daa nğene maslan nğa Gazlavay da vad a pawa salay, a gədbala beeler mahura da mey cəvay heyey, a njeý a ray a.

³ Maslan a, dey anğa a wedey anda var ma zəmey, zana fa vaw anğa a wedey mabara ndəf-ndəf anda gagəmay.

⁴ Sewje hay ma jəda cəvay heyey ma hətmar cek aha na, a zluram ga, aa wasam pər-par! a tədam a hwayak, ata anda ndəhay maməctakaya.

⁵ Ta’, maslan nğa Gazlavay heyey aa guzltar a nğusay a, a ləvtar: «Akwar na, ka da zluram ba, ya səra ka səpam na, Yesu, ndaw masa ata ma dərmara fa hwadam mazlanğalakaya heyey.

⁶ Anğa fedə daa saba, ta sləkdawa sem daa meməcey anda anğa maa guzley heyey. Samawa nəkmara slam masa ata ma pamara vagay anğa ha a hwad a tiya!

⁷ Cay na, diyam fiyaw fiyaw, ləvmatar a gula anğa hay: “Yesu ta sləkdawa sem daa meməcey. Anğa sem teesəf fa mey akwar nğada *Galile, ka da hətfamar fetedə.” Mey adaw nğada akwar na, ara keđe.»

⁸ Nğusay a, a mbəkdəmərwa cəvay a, a hwam fiyaw fiyaw nğa kadamatara mey a, a gula anğa hay heyey. Daa nğene mandərzay fa katar, ama faa səmam ga.

⁹ Ta’, Yesu heyey a daw a cadata ray, a catar har. Masa nğusay a ma hətmar Yesu la na, a nğəçham a cakay a, a ragadamar, a kərzamara fa salay.

10 Ta', Yesu aa guzltar, a ləvtar: «Ka zluram ba, diyam ta wuzdamatara a mələma adaw hay siya na, nga diyam a Galile. A da hətmaya fetede.»

Mey nga sewje hay ma jədfmara cəvay

11 Daa masa ngusay heyey ata daa cəved arañ na, sewje hay siya da wuzlah sewje hay ma jədfa cəvay heyey, a vəham aa berney. A kadamatara cek ma key cəpa da mey cəvay heyey ngada *bay-ray hay nga ndəhay ma ka kwakwas nga Gazlavay.

12 *Bay-ray hay nga ndəhay ma ka kwakwas kaa heyey, ta', a kusam ta mahura hay nga *Jəwif hay, a slam yawa da wuzlah ata. Ta', a vəlmatar dala ga ngada sewje hay a,

13 a kətmata, a ləvmatar: «Diyam, wuzdamara a ndəhay, ləvmatar: “Gula hay nga Yesu a, ta samawa sem ta tavaf, ta lalamara vagay a sem daa masa ala manatakaya daa dfar.”

14 Da bay nga hwayak ta cənda la na, ya səpam cəved la nga wuzdamara mey a maaya maaya amba a təba. Anda kefe, kwa mey fa da hətfakwar daa ba.»

15 Ta', sewje hay heyey dəba, a təbmara dala ha, a diyam a kamara anda ata ma kətmata heyey. Ara maja ngene haa wure kefe fa kadamara mey a da wuzlah Jəwif hay cənga.

Yesu, a wuztar vaw a gula anğa hay

(Mark 16.14-18; Luk 24.36-49; Jan 20.19-23; SNM 1.6-8)

16 Gula hay nga Yesu kuraw a ray a letek a diyam a *Galile, a təpam aa ray nga anğwa masa Yesu ma ləvtar nga diyam a hwaf a heyey.

17 Daa masa gula hay a ma hətmar Yesu la na, ta', a ragadamar. Ama siya hay da wuzlah ata na, ta sərmara ara Yesu fara fara na, daa ba.

18 Yesu ta', a ngəchey a cakay ata, a ləvtar: «Gazlavay ta vəldiwa gədan sem nga wa slam da vad ta slam da hwayak cəpa.

19 Maja ngene, diyam fa səkway hay da bəla cəpa, tərdamata nga ndəhay adaw hay. Kamatar *baptem ta mezəley nga Papay, ta mezəley adaw, yah Bəzey anğa, len ta mezəley nga Mesəfney anğa.

20 Asaya, sasərkadamata amba a təbmara mey hay tabiya masa yah maa sərkadakwara. Yaw, sərmara, yah na, yah ta akwar mandaw mandaw haa mendəvey nga bəla.»

28:10 28.10 12.50; Jan 20.17 28:13 28.13 27.64 28:16 28.16 5.1; 26.32; 28.10 28:17 28.17 14.31 28:18 28.18 Dan 7.14; Mt 11.27 28:19 28.19 səkway hay da bəla cəpa: 10.5-6; 24.14; Mk 16.15; Lk 24.47; SNM 1.8; CWJ 7.9; **kamatar baptem:** Mt 3.15; Mk 16.16; SNM 2.38; 8.36; 1Kwr 1.13-16; Ef 4.5; Jan 3.22; 4.1-2; Rm 6.3-4; **Papay, Bəzey anğa, len Mesəfney anğa:** 2Kwr 13.13; SNM 2.38; 8.16; Rm 6.3, 4; Gal 3.27; Kwa 2.12 28:20 28.20 1.23; 5.2-7, 27; 11.28-30; 18.20

Mey-maaya-mawiya masa

Mark ma wuzlala Mey da ray

Mey-maaya-mawiya masa Mark ma wuzlala

Mark, ndaw ma wuzlala derewel keɗe na, ara ndaw ma zɛlmara Jan-Mark masa mawuzlalakaya daa SNM 12.12 ta 12.25 leŋ daa Kwa 4.10.

Mark a wuzlala Mey-maaya-mawiya ha na, a wuɗey nga wuzdatara a ndɔhay tabiya Yesu na, ara ndaw masa Gazlavay ma wala nga lɔhdata ndɔhay. Derewel e na, aŋga maazɔma anda siya hay ba. Mark taa guzley da ray mayawa nga Yesu daa ba, asaya taa guzley da ray Yesu daa masa aŋga bɔzey na, daa ba. Daa derewel e na, Mark ta wuzleley la nekɔɗey da ray meesɔrkedey nga Yesu. Ama a wuzleley har-gɔɗaŋ na, da ray cek hay masa Yesu ma kata, anda melɔvey maazla hay, membɔley ndɔhay daa macay, mebɔley malula da ray ndɔhay.

Mark a wuɗey ya sɔrkwa Yesu Kɔriste na, ara ndaw ta gɔɗaŋ maja dɔga daa mezley nga derewel e na, a wuzda Yesu Kɔriste ara Bɔzey nga Gazlavay (1.1). Fa dɔba ha Mark aa guzley da ray mey hay zlam ma wuzda Yesu ma da zlar slɔra aŋga. Mey hay a na, ara Jan-Baptis ma sawa nga ɗiira cɔved nga Yesu, Yesu ma hɔtey baptem, Mesɔfney nga Gazlavay ma pawa salay a ray Yesu, ɗay ma cɔnwa da gazlavay da vad ma lɔvey Yesu na, ara bɔzey nga Gazlavay mawudkaya kalah, leŋ Yesu ma jerey fa Satan (1.2-13).

Daa fasɔlawal 1.14 haa 10.52 na, Yesu a pɔkey daa hwayak nga Galile leŋ daa slam hay gweegwe ta hwayak a. A wuzda aŋga ta gɔɗaŋ nga Gazlavay. Ndɔhay ga a tɔbmara mey aŋga, ama ndɔhay siya a rɔsmara.

Daa fasɔlawal 11 haa fasɔlawal 16 na, Yesu aŋga da Jeruzelem leŋ daa slam hay gweegwe ta Jeruzelem e.

Daa derewel e keɗe na, mey mekele mekele daha nga vɔley gɔɗaŋ a ndɔhay:

Yesu a wuɗey na, bɔza hay a diyam fa vɔɗa (10.13-15)

Yesu a wuɗey na, ndɔhay tabiya a cɔndamara mey aŋga, a tɔbmara (16.15)

¹ Keɗe ara mezley nga *Mey-maaya-mawiya da ray *Yesu *Kɔriste, Bɔzey nga *Gazlavay.

*Jan-Baptis a wuzey mey da ray masawa nga Yesu
(Matiye 3.1-12; Luk 3.1-18; Jan 1.19-28)*

² *Mey-maaya-mawiya ha a zley anda *Izay, *ndaw ma tɔla mey nga Gazlavay zleezle, ma wuzlala daa derewel anga, a lɔvey:

«Gazlavay a lɔvar a Bɔzey anga,

“Ehe, ya fa slɔrey maslan-ɔved adaw fa mey akah,
nga diya ɔved akah.

³ Ndaw fa wudey da wuzlah-ley, a lɔvey:

Diyamar ɔved ngada Bay Mahura,

diymara ɔved e maaya maaya dɔr e.”»

⁴ Ndaw ma tɔla mey a na, ara *Jan-Baptis. Anda kefe, ta daw la a wuzlah-ley. Fetede ta katar *baptem la a ndɔhay, ta wuzey mey nga Gazlavay la, a lɔvey: «Mbɔddamara menjey akwar, sɔpmara Gazlavay ta mevel pal, hɔtam baptem, amba Gazlavay a mbɔkdakwara mebɔrey akwar.»

⁵ Ndɔhay ga daa berney nga *Jeruzelem leŋ da slala hay mekele mekele masa daa hwayak nga *Jude a diyam fa *Jan a, a wuzdamara mebɔrey ata hay. Jan ta’, a katar baptem daa wayam nga Jurdeŋ.

⁶ Jan a pey fa vaw na, zana nga enɔwec nga slagwama *, vaw majɔwkaya ta huted. A zɔmey na, ayakw ta amam da ley.

⁷ Fa wuztar mey nga Gazlavay a ndɔhay, a lɔvey: «Fa dɔba adaw na, ndaw ma fɔnya a sawa la. Ya wusa nga regedey fa mey anga amba ya pɔska zewed nga tarak anga ba.

⁸ Yah na, ya kakwar baptem ta yam, ama ndaw aha na, a da kakwar baptem ta *Mesɔfney nga Gazlavay.»

*Jan-Baptis a kar baptem a Yesu
(Matiye 3.13-4.11; Luk 3.21, 22; 4.1-13)*

⁹ Daa masa *Jan-Baptis fa wuzey mey nga Gazlavay ta masa anga fa katar *baptem a ndɔhay na, Yesu a slɔkdawa da slala *Nezeret, daa hwayak nga *Galile. A wusey fa *Jan daa wayam nga Jurdeŋ heyey. Jan ta’, a kar baptem daa wayam a.

¹⁰ Masa Yesu fa bawa daa yam a na, wure nɔgene a hɔtar slam da vad fa wurey, *Mesɔfney nga Gazlavay a pawa salay a ray a anda makurgwadakw.

1:2 1.2 Mal 3.1; Mab 23.20; Mt 11.10; Lk 1.76; 7.27 **1:3 1.3** Iz 40.3 **1:4 1.4**

Lk 3.3 * **1:6 1.6** slagwama: slagwama, ara gɔnaw anda pɔles. **1:6 1.6** 2Bay 1.8

¹¹ A cənda dəy maa guzlwa da vad, ma ləvey: «Kah na, Bəzey adaw masa yah ma wudə kalah. Ya faa səmey ga da ray akah.»

¹² Wure wure ŋgene, Mesəfney ŋga Gazlavay, ta', a təkər dəy a Yesu ŋga daw a wuzlah-ley.

¹³ A njeý fetede dər kwakwar məfad, aŋga manjakaya da wuzlah cek ŋga ley hay. Fetede, *Satan, bay-malula, a wudəy ŋga bata, ama ta gwa daa ba. Fa dəba ha, maslan hay ŋga Bay Gazlavay da vad a samawa ŋga jənmara.

*Yesu a zəlwa gula hay məfad ŋgeeme
(Matiye 4.12-22; Luk 4.14, 15; 5.1-11)*

¹⁴ Pas pal daha, Bay *Herawt a slərey sewje aŋga hay ŋga kərzawa *Jan-Baptis. A kərzamərwa, a jəwmara, a kəzlamara aa fərsəne.

Masa ata ma kəzlamara Jan-Baptis a la aa fərsəne na, Yesu ta', a daw aa hwayak ŋga Galile. Aŋga fa pəkey fetede, fa wuzda Mey-maaya-mawiya ŋga Gazlavay a ndəhay,

¹⁵ a ləvtar: «Dər masa Bay Gazlavay ma wala ta wuswa cay. Anda meləvey, gweegwe cay, Gazlavay a wuzdərwa bay aŋga. Anda kede, mbəfdamara menjeý akwar, təbmara *Mey-maaya-mawiya ŋga Gazlavay!»

¹⁶ Yesu fa daw da mey dəhwa ŋga *Galile †. A da nəkey dey na, a ray ndəhay cew ma kərza ewet daha, ara ata Simanw ta məlmaha Andəre. Ata fa kərzam ewet ta tabaw ‡ daa dəhwa ha.

¹⁷ Ta', Yesu a ŋgəchey a cakay ata, a ləvtar: «Samawa asi adaw. Akwar na, ndəhay ma kərza ewet, ama dəga wure kede ya da tərdakwar ŋga ndəhay ma zəlwa ndəhay aa cəved ŋga Bay Gazlavay.»

¹⁸ Wure ŋgene, ata *Simanw ta *Andəre mbak! a mbəkdamata *tabaw ata hay, ta', a diyam asi Yesu.

¹⁹ Yesu a ŋgəchey daa slam aha ŋgene nekədəy na, a hətatar ata *Jak ta məlmaha *Jan, bəza hay ŋga Zebede. Ata daa kwambiwal ata, fa diymata tabaw ata hay.

²⁰ Wure ŋgene, Yesu a zəltərwa. Bəza hay a, a mbəkdamara papa ata Zebede manjakaya daa kwambiwal a ta ndəhay ma kam sləra ta ata. Ta', ata Jak ta Jan a diyam asi Yesu.

*Yesu a bəley malula da ray ndaw
(Luk 4.31-37)*

1:11 1.11 Ps 2.7; Iz 42.1; Mk 9.7; 12.6 † **1:16 1.16** dəhwa ŋga Galile: Ara dəhwa mahura, maazəma ha a key gweegwe kəlemeeter 22, mewurey a, a key kəlemeeter 12. Yam da hwaɸ a mandaw mandaw daha. Slala hay mekele mekele da mey dəhwa ha. ‡ **1:16 1.16** tabaw: Cek mahura ŋga kərzey ewet anda njele mahura masa ndəhay ga ma kərzadamara ewet. **1:18 1.18, 20** Mt 8.21-22

²¹ Fa dɔba ha, ata Yesu ta gula anɔa hay a diyam a slala Kapernayum. Ta *pas meməskey-vaw, Yesu a daw aa *way-mewuzey-mey nɔa Gazlavay fetede. Aa sərkadata ndəhay, a wuztar mey nɔa Gazlavay daa way a.

²² Ndəhay a, a rəzlam da ray meesərkedey anɔa ha, maja anɔa faa sərkadata ndəhay anda *ndəhay maa sərkada kwakwas nɔa Mawiz ba, ama aa sərkadata ta gədan masa Gazlavay ma vɔdara.

²³ Wure wure nɔgene, ndaw ta malula da ray daha, a mbəzey aa way-mewuzey-mey nɔa Gazlavay a, a wudey ta gədan, a ləvey:

²⁴ «Yesu, ndaw *Nezeret, walay akah ta ala malula hay me? Ka sawa nɔaa zəɖdandar daw? Ya sɔra fara fara, kah na, ndaw nɔa Gazlavay, masa aa ma slərdərwa nɔa key sləra anɔa.»

²⁵ Yesu a babəcar a malula da ray ndaw aha, a ləvar: «Njey teete. Bey da ray ndaw keɖe.»

²⁶ Malula da ray ndaw a heyey, aa wasada ta gədan, a wudey, ta', a bey da ray ndaw aha.

²⁷ Ndəhay makustakaya daa way a cəpa, a rəzlam, aa cəɖam vaw da wuzlah ata, a ləvam: «Haya! Ara cek e me? Ara meesərkey mawiya daw? Ndaw a, aa ta gədan, kwa aa guzlar a malula hay da ray ndəhay na, malula hay a, a cənmar mey.»

²⁸ Wure wure nɔgene, sləmay nɔa Yesu fa zəley kwa daa wura daa wura cəpa daa hwayak nɔa *Galile a.

*Yesu a mbəley masa-macay hay ga
(Matiye 8.14-17; Luk 4.38-41)*

²⁹ Ta', Yesu a bey daa *way-mewuzey-mey nɔa Gazlavay da Kapernayum heyey, wure nɔgene, a daw a way ata *Simanɔw ta *Andəre. Ata *Jak ta *Jan a ləgdamara §.

³⁰ Maman nɔa nɔgwas nɔa Simanɔw, vaw fa car, manakaya, awaw fa vaw ga. Masa Yesu ma wusey la a way a na, wure nɔgene, a kadamara macay nɔa nɔgwas kaa heyey a Yesu.

³¹ Yesu a mbəzey fa nɔgwas aha, a kərza fa har, a sləkɖada. Awaw fa vaw heyey daa saba. Nɔgwas aha, ta', a vɔltar cek mezəmey.

³² Masa hakwad ma key la na, ndəhay a handamawa masa-macay hay ga fa Yesu, asaya, a handamawa ndəhay ga masa ta malula da ray.

³³ Ndəhay tabiya da slala ha, a kusam fa mey-mbew nɔa way nɔa ata Simanɔw ta Andəre heyey.

34 Yesu a mbøley ndøhay ga daa macay hay mekele mekele. Asaya, a bøley malula da ray ndøhay ga. A mbækdata malula hay a ngaa guzlam ba, maja malula hay a, a sèrmara Yesu na, ara Bøzey nga Gazlavay.

Yesu a wuzey mey nga Gazlavay da slala hay mekele mekele daa hwayak nga Galile

(Luk 4.42-44)

35 Pepørek e, Yesu a wuley taa pørek e, a daw aa slam masa ndøhay da hwaɗ a daa ba, anga fa dèrar dangay a Gazlavay fetede.

36 Masa ata *Simanɗw ta mandala anga hay ta slækɗam cay daa ɗar na, a hətmar Yesu saba, ta', a diyam a sèpmara.

37 Masa ata ma hətɗamar la na, ta', a ləvmar: «Ndøhay tabiya fa sèpmaka.»

38 Ama Yesu a ləvtar: «Ahaw, ya sèra, ama nakwa la a slala hay mekele mekele masa gweegwe ta slala ha keɗe amba ya wuzey mey nga Gazlavay da slala hay a may, maja ma handiwa feɗe na, ara slèra ha keɗe.»

39 Da ray ngene, Yesu a daw a slala hay cəpa masa daa hwayak nga *Galile. A wuzey mey nga Gazlavay daa way-mewuzey-mey hay nga Gazlavay mekele mekele fetede, a bøley malula hay da ray ndøhay saya.

Yesu a pørey ndaw daa maasəkula

(Matiye 8.1-4; Luk 5.12-16)

40 Yaw, ndaw-maasəkula daha a sawa fa Yesu. Ta', a regedey fa mey anga, a kar ambahw, a ləvar: «Da ka wuɗey na, ka gwa nga pərya daa maasəkula adaw keɗe.»

41 Yesu, a sərɗar dey-ceceh, tal! a telda har anga, a gəsfar, a ləvar: «Ya wuɗey amba maasəkula akah a pørey. Tərey ndaw mapərkaya dəba!»

42 Wure wure ngene, maasəkula fa ndaw a heyey daa saba. Ndaw aha ta səɗey cay.

43 Yesu a ləvar nga daw a way, ama masa anga ma da ləvar nga daw a way na, ta', a kəta la ɗagay,

44 a ləvar: «Pey lenɗesl, ka da wuzda cek masa yah ma kakawa keɗe kwa a ndaw ba. Ama daw fa *ndaw ma ka kwakwas nga Gazlavay, amba a nəkaka. Fa dəba ha, vələr cek a Gazlavay anda *kwakwas nga Mawiz ma ləvey, nga wuzey a ndøhay, maasəkula fa vaw akah daa saba.»

45 Ama, ndaw aha ta təba mekətəy nga Yesu a daa ba, ta', a daw, a wuzdatara cek masa Yesu ma kara heyey ngada ndøhay daa hwayak a cəpa. Masa anga ma wuzda mey a, a ndøhay ga la na, maja ngene, Yesu a gwa nga mbøzey aa

berney meedey ndəhay saba, maja ndəhay a da kusmawa a cakay a ga kalah. Anda keɖe, Yesu a daw a njeɣ da wuzlah-ley. Ndəhay kwa daa wura daa wura cəpa fa diyam fa vəɖa cəŋga.

2

*Yesu a mbəley ndaw maahəlbakaya
(Matiye 9.1-8; Luk 5.17-26)*

¹ Masa Yesu ma lawa da wuzlah-ley heyey na, ɖar nekəɖey fa dəɓa ha, ta', a vəhwa a Kapernayum. Ndəhay a cəndamara masa aŋga da way na,

² a kusmawa ga aa way masa aŋga da hwaɖ a, slam ŋga njeɣ daa way a daa ba, asaya, kwa slam ŋga njeɣ fa meymbew ŋga way a daa ba. Fetede, Yesu fa wuztar mey ŋga Gazlavay.

³ Ndəhay daha, ta', a samawa fa aŋga. A samawa na, a handamawa ndaw maahəlbakaya, ndəhay məfaɖ da wuzlah ata ma lamərwa ndaw aha manakaya da ray bebele.

⁴ A hətam slam ŋga handamara fa mey ŋga Yesu ba, maja ndəhay ga kalah. Da ray ŋgene, ta', a təpam aa ray ŋga way a, a wuram slam dər e ta Yesu manjakaya. Ta', a ndəkwdamara ndaw maahəlbakaya heyey taa slam masa ata ma wurmara ha. A tədamara aa way a na, ndaw aha manakaya da ray gegəɖeɖ aŋga.

⁵ Masa Yesu ma nəka ndəhay a, fa təɓmara aŋga ta gəɖaŋ ŋga mbəlda ndaw ata na, ta', a ləvar a ndaw maahəlbakaya heyey: «Bəz aɖaw, mebərey da ray akah daa saba.»

⁶ *Ndəhay maa sərkaɖa kwakwas ŋga Mawiz nekəɖey daha fetede. Ta', a wulkam daa ray ata, a ləvam:

⁷ «Ndaw kaa aa guzley anda keɖe na, maja me? A pa ray aŋga ŋga Gazlavay na, kwara! Ma gwa ŋga mbəkda mebərey ŋga ndaw na, wa? Si Gazlavay pal taava aŋga.»

⁸ Wure ŋgene Yesu a sərə mewulkey ata. Ta', aa cəɖɖata, a ləvtar: «Ka wulkam daa ray akwar anda keɖe na, maja me?»

⁹ Ya gwa ya ləvey: “Mebərey akah daa saba” da daa ba, ya gwa ya ləvey: “Sləkɖey, la gegəɖeɖ akah, daw ta salay akah.” Dasi mey hay cewete keɖe na, masa ta banay ŋga ləvey ŋgada yah na, wura?

¹⁰ Yaw, ya wuɖey ka sərmara yah, *Bəz ŋga Ndaw, yah ta gəɖaŋ ŋga mbəkey mebərey ŋga ndəhay da bəla.» Anda keɖe, Yesu, ta', a ləvar a ndaw maahəlbakaya heyey:

¹¹ «Ehe, ya fa ləvka: “Sləkɖey, la gegəɖeɖ akah, daw a way.”»

¹² Wure ηgene, ndaw aha a lecey fa dey ηga ndəhay tabiya, ta', a la gegəded anğa, a bey da wuzlah ndəhay a, a daw. Da ray ηgene, ndəhay makustakaya heyey a rəzlam, a həlmamara Gazlavay, a ləvam: «Dəga ηga menjey aləkwa, aləkwa ta hətkwa cek anda kefe na, daa ba səlak.»

*Yesu a zəla Levi amba a səpa
(Matiye 9.9-13; Luk 5.27-32)*

¹³ Yesu a sləkdfey da slala ha, a daw ηgada mey dəhwa ηga *Galile saya. Ndəhay ga a samawa fa anğa, ta', Yesu aa sərkadata ta mey ηga Gazlavay.

¹⁴ Fa dəba ha, Yesu a sləkdfey daa slam aha, a daw a pəkey. Masa anğa fa pəkey na, a hətar *Levi, bəzey ηga Alfe, anğa manjakaya fa key sləra daa slam mecekeley budaw. (*Jəwif hay fa rəsmata ndəhay daa səkway ata masa ma cakala budaw ηga ndəhay Rawma.) Yesu a ləvar: «Sawa, səpya.» Da ray ηgene, Levi pərta! a sləkdfey, a daw asiya.

¹⁵ Fa dəba ha nekədfey, Yesu a daw ηga zəmey daf da way Levi a. Daa way a, ata Yesu ta gula anğa hay a zəmamara daf a na, ta ndəhay ma cakala budaw ga leη ta ndəhay ma zləba *kwakwas ηga Mawiz. A zəmam daf bama na, maja ndəhay ma zləba kwakwas ηga Mawiz a ga fa səpmar wurzay ηga Yesu.

¹⁶ Ndəhay maa sərkada kwakwas ηga Mawiz masa da wuzlah *Fariza hay a hətmar Yesu fa zəmam daf ta ndəhay ma zləba kwakwas ηga Mawiz leη ta ndəhay ma cakala budaw. Da ray ηgene, ndəhay maa sərkada kwakwas ηga Mawiz a, a ləvmatar a *gula hay ηga Yesu: «Haya! Yesu a zəmam daf ta ndəhay ma cakala budaw leη ta ndəhay ma zləba kwakwas ηga Mawiz na, kwara!»

¹⁷ Yesu ma cənda mey a la na, ta', aa guzltar, a ləvtar: «Ndəhay masa wurwer na, mey ata ta ndaw ma vəlda slalak daa ba. Ama ma wudfey mey ηga ndaw ma vəlda slalak na, si ndəhay masa-macay hay gway. Yaw, ndəhay ma wulkam ata ndəhay maaya fa mey ηga Gazlavay na, Gazlavay ta slərđiwa ηga zəлта daa ba, ama a slərđiwa na, ηga zəley ndəhay masa ta mebərey.»

*Mey da ray mekey daliyam
(Matiye 9.14-17; Luk 5.33-39)*

¹⁸ Ta pas lanğar daha, gula hay ηga *Jan-Baptis leη *Fariza hay fa kam *daliyam. Ndəhay mekele, ta', a samawa, aa cəfdamara Yesu, a ləvmar: «Gula hay ηga Jan-Baptis leη ndəhay ma səpam cəved ηga Fariza hay fa kam

daliyam, ama gula akah hay na, a kam daliyam ba na, maja me?»

¹⁹ Yesu a mbəɸɸdatara ta mey-menɸey, a ləvey: «Da ndaw a zəlwa ndəhay aa mekey mələk ɸga kwakwa ɸga zəmey cek na, a kam daliyam ta pas ɸgene daw? A kam daliyam ba səlak maja zel-kwakwa, anɸa da wuzlah ata. Ta pas masa zel-kwakwa aa manjakaya ta ata na, a kam daliyam ba.

²⁰ Ama pas a, a sawa la masa ndəhay ma da kərzamara zel-kwakwa ha, a hətmar da wuzlah ata saba. Ta pas a ɸgene na, a kam daliyam la.

²¹ «Yaw, ndaw a ɸəpa zana mawiya ta zana magurma ba, maja zana mawiya madəpkaya na, a nəsa zana magurma ha la, zana ha a ɸgərey la a dey a.

²² Asaya, ndaw a gwa ɸga zlərey wuzam meededek e aa kwene-kwene * magurma ba. Da a zləra a hwad a na, wuzam a, a məsley, a ɸgəra kwene-kwene he la. Anda kedə, wuzam a leɸ kwene-kwene he a nəsam la cewete. Maaya na, si ndaw a zləra wuzam meededek e na, aa kwene-kwene mawiya.»

*Yesu, anɸa bay ma wey da ray pas meməskey-vaw
(Matiye 12.1-8; Luk 6.1-5)*

²³ Ta *pas meməskey-vaw daha, Yesu a diyam ta gula anɸa hay, ata fa diyam taa ley ɸga cek anda daw. Masa ata fa diyam na, gula anɸa hay a həbəm cek aha ɸgaa mbəɸey.

²⁴ Da ray ɸgene, ndəhay *Fariza hay aa cəɸdamara Yesu, a ləvmar: «Nəkta gula akah hay fa kam sləra ta pas meməskey-vaw. Ata fa kam cek matəkakaya daa *kwakwas ɸga Mawiz ta pas meməskey-vaw na, maja me?»

²⁵ Yesu a mbəɸɸdatara, a ləvtar: «Akwar ta janɸamara daa ɸerewel ɸga Gazlavay cek masa *Davit ma ka zleezle na, daa ba səlak daw? Yaw, ta pas lanɸar daha, Davit ta ndəhay anɸa hay, ata daa banay maja may fa catar, ama cek mezəmey fa ata daa ba.

²⁶ Maja ɸgene Davit e, daa masa Abiyatar, anɸa *ndaw mahura da ray ndəhay ma ka kwakwas ɸga Gazlavay, a mbəzey aa way ɸga Gazlavay, a la peɸ masa mavəldakaya ɸgada Gazlavay, a zəma. Kwakwas ɸga Mawiz a vəley cəved a ndəhay tabiya ɸga zəmey peɸ e ba, si ndəhay ma ka kwakwas gway. Ama Davit ta zəma peɸ e la, ta vəltar la ɸgada ndəhay anɸa hay may.»

2:18 2.18 Mt 6.16-17; 11.18-19; Lk 7.33-34 **2:19 2.19** Mt 9.15 * **2:22 2.22**
kwene-kwene: Ara cek anda des (gwajakwad) ama makakaya ta ambal. **2:23**
2.23 Mew 23.25-26 **2:24 2.24** Mab 20.8-10 **2:25 2.25-26** 1Sam 21.2-7; 22.20;
Lev 24.5-9

²⁷ Yesu ta', aa guzltar saya, a ləvtar: «Gazlavay a pa pas meməskey-vaw na, nga key maaya ngada ndəhay. Gazlavay a ləmta ndəhay na, amba pas meməskey-vaw a sərdata banay ba.

²⁸ Anda kedə, yah, *Bəz nga Ndaw, yah na, ndaw ma wey kwa da ray pas meməskey-vaw.»

3

Yesu a dīyra har maməckaya nga ndaw ta pas meməskey-vaw

(*Matiye 12.9-14; Luk 6.6-11*)

¹ Fa dəba ha, Yesu, ta', a vəhey aa *way-mewuzey-mey nga Gazlavay saya. Fetede na, ndaw har maməckaya daha.

² *Fariza hay a wudam aa dədfamar mey a ray Yesu. Da ray ngene, a jədmara da a da mbəlda ndaw aha ta *pas meməskey-vaw kwa.

³ Yesu a ləvar a ndaw masa har maməckaya heyey: «Lecey fede, fa mey nga ndəhay tabiya.»

⁴ Fa dəba ha, ta', aa cəfdəta ndəhay heyey, a ləvtar: «Kwakwas aləkwa a ləvey na, kwara? Ta pas meməskey-vaw na, aləkwa ta cəved nga key maaya a ndaw daw, da daa ba, nga key maaya ba daw? Aləkwa ta cəved nga ləhey ndaw daa meməcey daw, da daa ba, nga kədey ndaw vagay daw?»

Ama ndəhay a, a gəmam nga mbəddamara ba.

⁵ Yesu a nəkta tabiya ta dey magaza. Mevel a car ga maja mevel ata maaya ba. Ta', a ləvar a ndaw aha heyey: «Təldərwa har a.»

Tal! a təldara har a. Har a, ta', a dīyey aa slam a.

⁶ Masa Fariza hay ma hətmar har nga ndaw aha ta dīyey sem na, a bam daa way-mewuzey-mey nga Gazlavay heyey. Wure wure ngene, a kusam ta ndəhay nga Bay *Herawt, a cəmdamara dəy ata nga kədey Yesu vagay.

Ndəhay ga a diyam asi Yesu

⁷ Ata Yesu ta gula anga hay, a mbəkdamata ndəhay daa *way-mewuzey-mey nga Gazlavay heyey, a diyam a mey dəhwa nga *Galile. Ndəhay ga a diyam asi Yesu a. Ndəhay ma diyam asiya na, a samawa daa hwayak nga Galile,

⁸ daa berney nga *Jeruzelem, daa hwayak nga *Jude, daa hwayak nga Idume, daa hwayak masa ta dey langar nga wayam nga Jurden, asaya, daa hwayak hay gweegwe ta berney nga Tir len ta berney nga Sidanw. Ndəhay a, a

samawa ga na, maja ata fa cəndamara sləra masa Yesu ma ka.

⁹ Ta', Yesu aa cəfdəta gula anğa hay nğa səpmar kwambiwal amba da ndəhay makustakaya ha fa nğacamara kalah na, a gwa a təpey aa kwambiwal a.

¹⁰ Ndəhay masa macay hay cəpa fa wusam vaw nğada fa Yesu amba a gəsfamar, maja anğa fa mbəley ndəhay ga.

¹¹ Ndəhay ta malula da ray daha a hətmar Yesu na, a tədam asi salay anğa, a wudam, a ləvam: «Kah, Bəzey nğa Gazlavay!»

¹² Ama Yesu a kətata, a katar mey ta gədan, a ləvtar a da wuzdamara anğa na, wa ba.

Yesu a weley ndəhay meslərey anğa hay kuraw a ray a cew

(Matiye 10.1-4; Luk 6.12-16)

¹³ Fa dəba ha, masa Yesu fa da təpey a anğwa na, a zəlta ndəhay masa anğa ma wudəy. Ta', ndəhay a, a diyam fa vəda.

¹⁴ A weley ndəhay kuraw a ray a cew nğa tərey ndəhay anğa hay meslərey. A walata na, amba a pəkam bama mandaw mandaw, amba a slərdata nğa wuzey mey nğa Gazlavay,

¹⁵ asaya, amba a vəltar gədan nğa bəley malula hay da ray ndəhay.

¹⁶ Ndəhay mawalatakaya kuraw a ray a cew e na, ara *Simanw ndaw masa Yesu ma par mezəley *Piyer,

¹⁷ ata *Jak ta məlmaha *Jan, bəza hay nğa Zebede masa Yesu ma patar mezəley Bawanerges, anda meləvey, «ndəhay ma kam baazlam anda var maa bəcey»,

¹⁸ *Andəre, *Fəlep, *Bartelemey, *Matiye, *Tuma, Jak bəzey nğa Alfe, Taade, Simanw, ndaw da wuzlah ndəhay ma wudam nğa ləhdamata ndəhay ata hay dasi har nğa masa-gəra ata hay,

¹⁹ leŋ Juda Iskariyawt, ndaw ma vəlda Yesu a har masa-gəra anğa hay.

Ndəhay a ləvam Yesu na, anğa ta malula da ray

(Matiye 12.22-32; Luk 11.14-23; 12.10)

²⁰ Masa Yesu ma walata ndəhay anğa hay meslərey cay na, ta', a bərnğawa da anğwa ha, a daw a way. Ndəhay ga a diyam fa anğa saya. Ata Yesu ta gula anğa hay kwa ta hətam har nğa zəmey dəf daa ba, maja ndəhay makustakaya ga kalah.

²¹ Masa mamaha ta mɛlmaha hay ma cɛndamara ndɛhay makustakaya kalah da cakay a na, ta', a samawa amba a ngɛlmara maja ndɛhay a, a wulkam, a lɛvam: «Malula fa kar a Yesu!»

²² *Ndɛhay maa sɛrkada kwakwas ngɛ Mawiz ma samawa da *Jeruzelem, aa guzlam da ray a, a lɛvam: «*Beyelzebul, bay ngɛ mesɛfney maaya ba hay da ray anɛa daha. Ara anɛa ma vɛlar gɛdan ngɛ bɛley malula da ray ndɛhay.»

²³ Maja ndɛhay maa guzlam anda ngene na, Yesu, ta', a zɛltɛrwa, a ngatar mey, a lɛvtar: «*Satan, bay-malula, a gwa a bɛla malula da ray ndɛhay daw? A gwa ba sɛlak.

²⁴ Anda melɛvey, da ndɛhay daa hwayak pal a kam vɛram da wuzlah ata na, hwayak a ngene a pɛlhey la.

²⁵ Asaya, da ndɛhay da way pal a kɛɛam vaw da wuzlah ata na, way a ngene a pɛlhey la.

²⁶ Anda kɛɛe, da Satan, bay-malula, a kɛɛta ndɛhay anɛa hay na, a key ngene, a kɛɛey ray anɛa, anɛa fa da key bay ata daa saba.

²⁷ Yaw, kwa ndaw-mayal ma gwa ngɛ mbɛzey a way ndaw masa-gɛdan amba a lalatɛrwa cek anɛa hay meedey anɛa na, daa ba. Si ndaw-mayal a, a key gɛdan teesɛɛ, a jɛwa ndaw masa-gɛdan a ɛagay. Fa dɛba ha, a gwa a hɛltɛrwa cek hay da way a.»

²⁸ Yesu a lɛvtar saya: «Ya fa lɛvkwɛr fara fara, Bay Gazlavay a gwa a mbɛkdata mebɛrey tabiya masa ndɛhay ma kamara. Asaya, a gwa a mbɛkdata mey hay maaya ba tabiya masa ndɛhay maa guzlam da ray a.

²⁹ Ama, kwa waawa maa guzley mey maaya ba da ray *Mesɛfney ngɛ Gazlavay na, Gazlavay fa da mbɛkdata mebɛrey ngɛ ndaw aha daa ba. Yaw, ndaw ma cɛɛa Mesɛfney ngɛ Gazlavay na, mebɛrey anɛa a da nɛy ngɛ sɛrmataw.»

³⁰ Yesu a lɛvey anda ngene na, maja ata faa guzlam, a lɛvam: «Malula fa kar a Yesu.»

Maman ngɛ Yesu ta mɛlmaha hay na, ara wa hay wa?
(Matiye 12.46-50; Luk 8.19-21)

³¹ Ata maman ngɛ Yesu ta mɛlmaha hay a wusmawa aa way masa Yesu aa da hwɛɛ a, a lacam aa ambahw, a slɛram ndaw ngɛ zɛlɛrwa Yesu.

³² Ndɛhay makustakaya ga da cakay a manjatakaya, a lɛvmar: «Haya, ata mamakw ta mɛlmakw hay faa cɛɛɛamaka daa ambahw.»

³³ Yesu a mbəfdatara, a ləvtar: «Mamay na, wa? Məlma adaw hay na, wa hay wa?»

³⁴ Ta', a nəkfata ndəhay manjatakaya ma zlərmar ray heyey, a ləvtar: «Mamay ta məlma adaw hay na, ara ndəhay keče,

³⁵ maja məlma adaw, dam-mama adaw, da daa ba, mamay na, ara ndaw ma key cek masa Gazlavay ma wudey.»

4

Mey-menğey ta ndaw maa kwecey hulfad a ley
(Matiye 13.1-9; Luk 8.4-8)

¹ Fa dəba ha, Yesu a daw a mey dəhwa nga *Galile saya, aa sərkadata ndəhay fetede. Ndəhay ga a diyam a cakay a, maja ngene, Yesu a təpey aa kwambiwal, a njeý a hwađ a. Kwambiwal a, aa da ray yam, ama ndəhay na, ata da mey dəhwa ha.

² Daa meesərkey anğa na, a kadatar cek hay ga ta mey-menğey. Daa meesərkey anğa ha na, a ləvtar:

³ «Jəkam sləmay! Ndaw mehəvey daha, a daw ngaa kwecey hulfad a ley anğa.

⁴ Masa anğa faa kwacada hulfad a ley a na, hulfad lanğar a kəzley aa cəved. Fa dəba ha, điyañ hay a samawa, a ndamara.

⁵ Hulfad lanğar, a kəzley aa slam masa pərad, hwiyak da ray a ga daa ba. Hulfad a, a pəcey fiyaw, maja hwiyak da ray a ga daa ba.

⁶ Ama menjeý nekədey, da masa pas fa teý na, a bəta. Fa dəba ha, a kweley, maja slaslalay a daa vəged ga daa ba.

⁷ Hulfad lanğar a kəzley a wuzlah hatak. Hatak a, a gəley, aa njərđa hulfad mapəckaya ha. Da ray ngene, hulfad mapəckaya ha a gwa a gəley nga yey ba.

⁸ Ama, hulfad lanğar a kəzley aa slam masa maaya, a pəcey, a gəley, a yey ga. Hulfad mapəckaya pal babəza fa vəđa a key kwakwar maakar, lanğar kwakwar maakwaw, da daa ba, temere.»

⁹ Ta', Yesu a ləvey: «Da ndaw, anğa ta sləmay na, nga cənda mey a maaya maaya.»

Yesu aa guzltar a ndəhay ta mey-menğey hay na, maja me?

(Matiye 13.10-15; Luk 8.9, 10)

¹⁰ Masa Yesu ma ngəcheý sem da cakay ndəhay ga heyey na, gula anğa hay kuraw a ray a cew ta ndəhay mekele da

cakay a, aa cæfdamara da ray mey-menjey hay masa anja maa guzldatara heyey.

¹¹ Yesu a mbæfdatara, a lœvtar: «Akwar na, Gazlavay ta vœlkwar cœved la nga sœrey mey da ray mewey anja da ray ndœhay. Mey a na, mabadakaya fa dey nga ndœhay siya. A cœndamara mey a anda mey-menjey gway.

¹² Anda kefe,
 “Ndœhay a, fa nœkam dey maaya maaya,
 ama a hœtmar dey ba,
 asaya, fa jœkam slœmay maaya maaya,
 ama a cœndamara ba,
 da daa ba na, a mbœdam dey la ngada fa Gazlavay,
 amba Gazlavay a mbœkdatara mebœrey ata.”»

*Mabara nga mey-menjey da ray meekwecey hulfad
 (Matiye 13.18-23; Luk 8.11-15)*

¹³ Ta', Yesu a lœvtar: «Ka sœrmara mabara nga mey-menjey da ray meekwecey hulfad kefe ba daw? Kaa, ka sœrmara mabara nga mey-menjey hay siya na, kwara?

¹⁴ Ndaw maa kwecey hulfad a ley na, anja anda ndaw ma wuzey mey nga Gazlavay.

¹⁵ Ndœhay siya, ata anda cœved masa hulfad ma kœzley a hwad a. A cœndamara mey nga Gazlavay, ama *Satan, bay-malula, a sawa, a la mey a la daa mevel ata.

¹⁶ Ndœhay siya may, ata anda slam masa pœrad masa hulfad ma kœzley a hwad a. A cœndamara mey nga Gazlavay, a tœbmara fiyaw ta meesœmey.

¹⁷ Ama ndœhay a, a tœbmara mey nga Gazlavay nga dar nekœfey anda hulfad ma pœcwa masa ta slaslalay daa vœged ga daa ba. Ta pas masa banay mekele mekele ma da sawa a ray ata maja mey a na, a da mbœkdamara mey nga Gazlavay fiyaw fiyaw.

¹⁸ Ndœhay mekele a tœbmara mey nga Gazlavay anda hulfad ma kœzley a wuzlah hatak. A tœbmara mey nga Gazlavay,

¹⁹ ama mey a, aa zœfey anda hulfad mapœckaya maa njœrdfey daa hatak maja ata fa wulkam kalah da ray menjey maaya da bœla, maja a wudam zleley kalah, asaya maja a sœpam cek hay mekele mekele. Da ray ngene, ndœhay a taa zœddamara mey nga Gazlavay daa mevel ata sem. Ata anda cek ma yey babœza ba, maja mewulkey ata ha ngene.

²⁰ Ndœhay mekele saya, a tœbmara mey nga Gazlavay anda hulfad ma pœcwa daa slam maaya. A cœndamara mey a, a tœbmara, a kadamara slœra ta anja. Anda kefe,

mey a, a yey daa mevel ata anda hulfad ma pəcwa ma yey ga, babəza fa vəda a key kwakwar maakar, mekele a key kwakwar maakwaw, da daa ba, temere.»

Yesu a ngey mey ta petərla
(Luk 8.16-18)

²¹ Ta', Yesu a ləvtar: «Ndaw a gwa a pa petərla magədkaya asi manɣayak daw? Da daa ba, asi harɣawaw daw? Kəne ba. Si a pa na, aa slam mepey petərla masa ma gwa ma wadfa slam da way.

²² Cek hay tabiya masa mabadatakaya na, a wuzwa la a palah, a da hətmar fa dey. Anda meləvey, cek masa daa ləvan na, a wuzwa la aa slam mawadəkaya amba ndəhay tabiya a hətmar.

²³ Da ndaw, anɣa ta sləmay na, nɣa cənda mey a maaya maaya.»

²⁴ Yesu a ləvtar saya: «Pam lenɣesl fa mey masa akwar ma cəndamara kedə. Anda akwar ma təbmara mey nɣa Gazlavay na, Gazlavay a wakwara maaya anɣa la kəne, fara fara, a da wakwara ma fəna.

²⁵ Da ndaw a təba mey nɣa Gazlavay na, Gazlavay a jəna la nɣa təba mey a ma fəna ma fəna. Da ndaw a təba mey nɣa Gazlavay ba na, kwa mey a masa nekədey daa mevel anɣa na, Gazlavay a badərwa la tabiya.»

Mey-menɣey ta cek masa ndaw ma sləka

²⁶ Yesu a kadatara saya, a ləvey: «*Mewey nɣa Bay Gazlavay da ray ndəhay na, ya gwa nɣa wa na, ta me? Ehe, ya nɣakwar mey da ray a.

«Ndaw a sləkey cek a ley.

²⁷ Cek a, a pəcwa. Taa vad, taa pas cek aha fa gəley. Kwa ndaw a, aa daa dər, kwa aa ta dey, cek aha fa gəley cənɣa, ama ndaw aha a sərə cek aha a gəley na, kwara ba.

²⁸ Cek aha, a pəcwa na, taava anɣa, ara hwiyak ma vəlar gədan nɣa pəcərwa. Ngeeme cek aha, a bawa anda kwakwas. Fa dəba ha, a gəley. A təlwa ray, a nəhey.

²⁹ Da cek aha ta nəhey cay na, ndaw aha a nɣəma maja kiya mekey cek da ley ta wuswa cay.»

Mey-menɣey ta babəza nɣa bazlawar
(Matiye 13.31, 32, 34; Luk 13.18, 19)

³⁰ Yesu a kadatara saya, a ləvey: «Ya da wakwa *mewey nɣa Gazlavay da ray ndəhay na, ta me? Ya da wuzdakwara mewey nɣa Gazlavay kaa na, ta mey-menɣey wura?»

³¹ Yaw, ya da wakwa mewey nga Gazlavay da ray ndəhay na, ta babəza nga bazlawar masa ndaw ma rəba aa ley anğa. Anğa kuset kədey dasi babəza nga cek hay tabiya da bəla.

³² Ama da marəbkaya cay na, a pəcwa, a gəley mahura a fənta cek hay mekele tabiya ma yey babəza mezəmey. A pey har hay mahura mahura, kwa diyaŋ hay a gwamara a diyam way da hwaɗ a.»

³³ Yaw, Yesu a wuzdatara mey nga Gazlavay na, ta mey-menğey hay anda keɗe. Aa sərkadatar mey nga Gazlavay a ndəhay təɗe ta gədaŋ ata amba a cəndamara.

³⁴ Aa sərkadata na, si ta mey-menğey hay gway. Ama da masa ata ta gula anğa hay daada na, a wuzdatara mabara nga mey a maaya maaya.

*Yesu a lacada bərgadaŋ da wuzlah dəhwa
(Matiye 8.23-27; Luk 8.22-25)*

³⁵ Taa kwaɗ aha nğene, masa Yesu manjakaya daa kwambiwal heyey na, ta', a ləvtar a gula anğa hay: «Təŋkwa a dey laŋgar nga dəhwa.»

³⁶ Da ray nğene, a mbəkdamata ndəhay makustakaya da mey dəhwa ha, gula hay a, a təŋgdamara Yesu ta kwambiwal masa aa manjakaya da hwaɗ a heyey. Kwambiwal hay mekele malacatakaya da cakay a daha.

³⁷ Ta', bərgadaŋ a zlar mekey bew! bew!, a cawaslada yam aa kwambiwal a, haa kwambiwal a, a rəhey.

³⁸ Yesu, anğa fa dəba nga kwambiwal a, aa daa ɗar, ray mabəckaya fa cek. Gula anğa hay a sləkɗadamara, a ləvmar: «Bay Mahura, aləkwa fa da məkwa keɗe na, a kaka da ray ba gway daw?»

³⁹ Yesu ta', a sləkɗey, a babəcar a bərgadaŋ, a ləvar: «Ka key saba!» A ləvar a yam a: «Ka wusey saba!» Wure wure nğene, bərgadaŋ a, a key saba, yam a, a wusey saba. Memed' te' te', a key saba.

⁴⁰ Ta', Yesu a ləvtar a gula anğa hay: «Ka zluram na, maja me? Akwar fa pamaya nga ndaw akwar fara fara daa ba daw?»

⁴¹ Da ray nğene, gula anğa hay a, a zluram ga, aa guzlam da wuzlah ata, a ləvam: «Ndaw a keɗe na, ara na, wa? Masa kwa memed' ta yam a cənmar mey keɗe na!»

5

*Yesu a bəley malula da ray ndaw
(Matiye 8.28-34; Luk 8.26-39)*

¹ Masa Yesu ma lacada bərgadan a la na, a wusam ta gula anğa hay a dey lanğar nğa dəhwa ha, masa daa hwayak nğa ndəhay Gəraza hay.

² Yesu, ta', a bərnğawa daa kwambiwal, wure nğene, ndaw daha a bawa daa anğwa masa cəvay hay da hwađ a, a sawa a cada ray ta anğa. Ndaw aha, aa ta malula da ray.

³ A njeý da wuzlah cəvay hay a. Ndaw a gwa a jəwa, kwa ta calalaw ba.

⁴ A jəwmata salay anğa hay ta har anğa hay ta calalaw dey weewe, ama a dəsłta calalaw hay a. Ndaw ma fəna ta gədan daa ba.

⁵ Mandaw mandaw, taa vad, taa pas, fa pəkey daa cəvay hay, fa pəkey da anğwa. Daa mepəkey anğa ha na, fa wudey ta gədan, fa pəđka vaw anğa ta anğwa.

⁶ Masa ndaw aha ma hətar Yesu da dərən na, a hway nğada fa vəda, a regedey fa mey anğa.

⁷⁻⁸ Yesu a ləvar: «Malula, bey da ray ndaw kedfe!»

Ama ndaw a, a wudey ta gədan, a ləvey: «Yesu, Bəzey nğa Gazlavay da vad, ka wudəy fa yah me? Ya fa kaka ambahw, ta mezəley nğa Bay Gazlavay, ka da sərdaya banay ba.»

⁹ Yesu aa cəfda, a ləvar: «Mezəley akah na, me?»

Ndaw aha a mbəddara, a ləvar: «Mezəley adaw na, "ga," maja ala malula hay ga.»

¹⁰ Malula hay da ray ndaw aha a bərkwamara Yesu, amba Yesu a, a bəłta daa hwayak a ba.

¹¹ Daa slam aha nğene, nğaba nğa vetem hay ga daha da mecəkwer, fa səpam cek mezəmey da rav-anğwa.

¹² Malula hay da ray ndaw heyey a bərkwamara Yesu, aa cəfdamara, a ləvmar: «Vəłndar cəved amba ya mbəzam a ray vetem hay katay, may taw.»

¹³ Yesu, ta', a vəltar cəved. Da ray nğene, malula hay a, a bam da ray ndaw aha, a diyam a mbəzam a ray vetem hay a. Vetem hay fetede na, a key gweegwe gabal cew. Vetem hay a, a hwam ta gədan nğadaa heelen, a tataram, a kwiya saf! aa dəhwa, a bəbətam cəpa.

¹⁴ Masa mecəkwer hay nğa vetem hay kaa heyey ma hətmatar vetem hay a ta bəbətam sem na, a hwam, a diyam, a wuzdamatara a ndəhay da slala ha leñ a ndəhay gweegwe ta slala ha. Da ray nğene, ndəhay a, a samawa nğa nəkey cek ma key fetede he.

¹⁵ Ndəhay a wusmawa a cakay Yesu, a hətfamar ndaw masa Yesu ma bəłta malula hay ga da ray a heyey. Ndaw aha

manjakaya fetede ta zana fa vaw, a sɛra leŋgesl dɛba. Da ray ŋgene, ndɛhay ma samawa heyey, mandɛrzay a katar.

¹⁶ Ndɛhay fetede ma hɛtmar cek ma key da ray ndaw ta malula da ray, leŋ da ray vetem hay a na, a kadamatara a ndɛhay siya ma samawa.

¹⁷ Ta', ndɛhay a, a bɛrkwamara Yesu ŋga daw daa hwayak ata la.

¹⁸ Masa Yesu fa tɔpey aa kwambiwal ŋga daw na, ndaw masa aa ma bɛlra malula hay da ray aŋga heyey, a bɛrkwa Yesu amba a vɛlar cɛved ŋga diyam cew e.

¹⁹ Yesu a vɛlar cɛved a ndaw aha ba, ama a lɛvar: «Vɛhey a way, kadatara a ndɛhay akah hay cek mahura masa Bay Gazlavay ma kakawa tabiya, kadatara masa aŋga ma sɛrey dey-ceceh da ray akah keɛe.»

²⁰ Ta', ndaw aha, a daw, a wuzda cek masa Yesu ma ka tabiya da ray a heyey a ndɛhay daa hwayak daha mezɔley Berney-Hay-Kuraw. Ndɛhay cɔpa masa ma cɛndamara mey a na, a rɛzlam.

*Yesu a fɛna gɛdan ŋga macay ta ŋga memɔcey
(Matiye 9.18-26; Luk 8.40-56)*

²¹ Yesu a vɛhwa ta kwambiwal da dey laŋgar ŋga dɛhwa ŋga *Galile heyey. Ndɛhay makustakaya da cakay a ga da mey dɛhwa ha.

²² Ndaw daha mezɔley Jayirus, ara ndaw pal da wuzlah *bay-ray hay daa *way-mewuzey-mey ŋga Gazlavay fetede. A sawa a cakay ata, a hɛtar Yesu, ta', a tɛɛey asi salay aŋga,

²³ aa cɛɛda ta matɔway daa dey, a lɛvar: «Dam adaw fa da mɔcey. Ambahw, sawa, pa har akah a ray a amba a mbɔley, a njeɛ ta dey, may taw.»

²⁴ Ta', Yesu a diyam cew e.

Ndɛhay makustakaya ga fa diyam asiya, fa ŋgacamara.

²⁵ Da wuzlah ata na, ŋgwas daha, mambaz fa mbɛɛɛwa da hwaɛ dɛga mevey kuraw a ray a cew.

²⁶ Ta sɛrda banay la ga. Ta daw la fa dakwter hay ga, ta ndɛvda zleley aŋga sem tabiya, ama kwa ta key ŋgama daa ba, macay a, fa lar mey ta gɛdan cɛŋga.

²⁷ ŋgwas aha fa cɛnda Yesu fa mbɔley ndɛhay, maja ŋgene, a sawa a wuzlah ndɛhay makustakaya heyey ta fa dɛba ŋga Yesu. Ta', a gɛsfar har fa zana aŋga.

²⁸ A ka anda keɛe maja aŋga fa wulkey daa mevel aŋga: «Da ya gwa ŋga gɛsfar har kwa fa zana aŋga na, ya mbɔley la.»

29 Masa ɲɠwas aha ma gəsfar har fa zana aɲga la na, wure wure ɲgene mambaz aɲga heyey taɲ! a dəsley mey. A səra aɲga ta mbəley sem.

30 Wure ɲgene Yesu a səra gədaɲ ta bey la daa vaw aɲga. Maja ɲgene, a mbədfwa dey fa dəba, a ləvtar a ndəhay ga heyey: «Məgəsey har fa zana adaw na, wa?»

31 Gula aɲga hay a mbədfdamara, a ləvmar: «Ka fa nəkta ndəhay fa ɲgacamaka ta dey wura wura tabiya kaa na, kaa cədfandar “Magəsfaya har wa” na, kwara?»

32 Ama Yesu fa nəkey dey ta cakay cəɲga, amba a hətar ndaw ma gəsfar har a.

33 ɲɠwas aha mandərzay fa kar ga, faa wesey, a səra Yesu ta mbəlda sem. Da ray ɲgene, a sawa, a tədfey asi salay ɲga Yesu, a wuzdara mabara ɲga mey a.

34 Yesu a ləvar: «Dam adaw, ka ta mbəley cay maja kah ma paya ɲga ndaw akah fara fara. Daw ta zazay, macay akah daa saba.»

35 Masa Yesu faa guzlar ɲgada ɲɠwas aha araɲ na, ndəhay a samawa ta meslərey da way Jayirus, bay-ray ɲga way-mewuzey-mey ɲga Gazlavay heyey, a ləvmar ɲgada Jayirus a: «Dam akah heyey, ta məcey sem. Ka gərda vaw ta Bay Mahura keme seme?»

36 Ama Yesu kwa ta jəkey sləmay fa mey ata daa ba, a ləvar a Jayirus: «Mevəl akah a da tədfey ba. Paya ɲga ndaw akah fara fara gway na, cay.»

37 Yaw, kwa Yesu ta vəley cəved ɲgada ndaw ɲga daw asiya daa ba, si a ɲgəley na, *Piyer, *Jak, leɲ *Jaɲ, məlman ɲga Jak.

38 A wusam a way Jayirus heyey, a hətfamatar ndəhay makustakaya. Ndəhay a, leɲgesl ata ta mbədfey sem, fa təwam, fa wudam ta gədaɲ.

39 Yesu a mbəzey a way a, a ləvtar: «Leɲgesl akwar a mbədfey, akwar fa təwam na, maja me? Bəzey a, ta məcey daa ba, ama a key a ney aa dər.»

40 Ndəhay a, aa saɲgəram a ray a. Yesu a badatərwa cəpa aa ambaw. A ɲgəlda ata papaɲ ɲga dam aha ta mamaɲ ɲga dam aha leɲ gula aɲga hay maakar heyey. A mbəzam aa way masa dam aha manakaya da hwad a heyey.

41 Yesu ta', a kərza dam aha fa har, a ləvar: «*Talita kum!*,» anda meləvey, «Dam adaw, ya fa ləvka, lecey.»

42 Dam kedə deɲ! a lecey, ta', a daw. (Mevey ɲga dam aha kuraw a ray a cew.) Wure ɲgene, ata masa daa way a na, a rəzlam ga.

⁴³ Ama Yesu a kətata, a ləvtar: «Cek masa ma key keđe na, ka da kadamara ŋgada ndaw ba.» A ləvtar saya: «Vəlmar cek ŋga zəmey.»

6

*Ndəhay da Nezeret a rəsmara Yesu
(Matiye 13.53-58; Luk 4.16-30)*

¹ Yesu a sləkdey da slala ata Jayirus heyey, a daw a *Nezeret, slala masa aa ma gəley da hwad a. Gula anğa hay a diyam asiya.

² Ta *pas meməskey-vaw na, Yesu a daw aa *way-mewuzey-mey ŋga Gazlavay fetede, aa sərkadata ndəhay. Ndəhay ga a jəkam sləmay fa mey anğa. A rəzlam, a ləvam: «Aa sərkadərwa mey ŋga Gazlavay tabiya keđe na, dama? A hətərwa lengeşl ŋga sərey cek hay a keđe na, dama? Ma vəldara gədan ŋga key maazla anda keđe na, wa?

³ Anğa na, ndaw ma sla hwadam, ba diya? Anğa bəzey ŋga *Mari, ba diya? Anğa məlman ŋga *Jak, ŋga Jawz, ŋga Jud, leŋ ŋga *Simanw, ba diya? Dam-mamaha hay ata da wuzlah aləkwa fede, ba diya?» Ara maja ŋgene, ndəhay fetede ma gəmam ŋga təbmara mey ŋga Yesu ba.

⁴ Maja mewulkey ata ŋgene, Yesu aa guzltar ta mey-menğey, a ləvtar: «*Ndaw ma təla mey ŋga Gazlavay na, ndəhay a təbmara mey anğa kwa dama dama, ama ma təbmara ba na, si ndəhay daa hwayak anğa, ndəhay daa səkway anğa, asaya, ndəhay da way ata.»

⁵ Yesu a gwa mekey maazla da wuzlah ata ba, si a pey har a ray ndəhay masa-macay hay nekədey gway, a mbəldata.

⁶ Da ray ŋgene, Yesu a rəzley da ray ata maja ata ma təbmara mey anğa ba. Ta', Yesu a daw a slala hay mekele daa hwayak a, aa sərkadata ndəhay.

*Yesu a slərdata gula anğa hay kuraw a ray a cew
(Matiye 10.5-15; Luk 9.1-6)*

⁷ Fa dəba ha, Yesu a zəltərwa gula anğa hay kuraw a ray a cew, amba a slərdata cew cew aa slam hay mekele mekele. Da ray ŋgene, a vəltar gədan ŋga bəley malula hay da ray ndəhay.

⁸ Ta', a kətata, a ləvtar: «Diyam, ama ka da lam cek a har ba. Ka da lam cek mezəmey ba, ka da lam gabal ba, ka da lam dala aa jiba ba, lam a har na, si danğwar gway.

⁹ Yaw, pamata tarak akwar hay a salay, ka diyam na, si ta zana akwar hay masa fa vaw gway. Ka da lam zana cew cew ba.»

¹⁰ Yesu a kətata saya, a ləvtar: «Da akwar ta wusam la aa slam na, njam da way ndəhay ma təbmakwar haa kasl pas masa akwar ma da diyam aa slam mekele.

¹¹ Da ndəhay daa slam aha a təbmakwar ba, a jəkam sləmay fa mey akwar ba na, mbəkdamata ndəhay a. Raramatara lagwada fa salay akwar hay * amba ka wuzdamatara ata ndəhay masa ta mebərey.»

¹² Gula hay nga Yesu heyey a diyam, a wuzdamara mey nga Gazlavay a ndəhay. A ləvmatar: «Si ka mbəfdamara menjey akwar, ka səpmara Gazlavay ta mevel pal.»

¹³ Asaya, a bəlam malula hay ga da ray ndəhay, a takwadamatar mal fa ndəhay masa-macay hay ga, a mbəldamata.

Mey da ray meməcey nga Jan-Baptis

¹⁴ Bay *Herawt fa cənda mey da ray Yesu maja ndəhay faa guzlam ga da ray a. Ndəhay siya a ləvam: «Ara *Jan-Baptis ma sləkɔawa daa meməcey. Maja ngene, anga ta gədaŋ nga key maazla.»

¹⁵ Mekele hay a ləvam: «Ara *Eli †.» Mekele hay saya a ləvam: «Ara ndaw anda ndəhay ma təla mey nga Gazlavay zleezle.»

¹⁶ Masa Herawt ma cənda mey hay a keɔe la na, a ləvey: «Ara Jan-Baptis! Ya ta ɔəslra ray anga sem, ama ta sləkɔawa sem daa meməcey!»

¹⁷⁻¹⁸ Herawt aa guzley anda keɔe na, maja ara anga ta ray anga ma kəɔa Jan-Baptis a vagay. Ehe mey da ray Jan-Baptis a: Herawt a la Herawdiyat, ngwas nga məlmaha *Fəlep nga ngwas anga, daa masa Fəlep aa ta dey ɔagay. Maja ngene, *Jan a ləvar a Herawt: «Kah ma la ngwas nga məlmakw ngene na, ara cek matəkakaya daa kwakwas aləkwa.» Da ray ngene, Herawt a ləvtar a sewje anga hay nga kərzamara Jan-Baptis a. Ta', sewje anga hay a, a kərzamara, a jəwmara, a kəzlamara aa fərsəne.

¹⁹ Masa Herawdiyat ma cənda mey nga Jan-Baptis keɔe la na, mevel a car, a wudəy nga kəɔa vagay, ama a gwa ba maja Herawt a təba ba.

²⁰ Herawt na, fa zlurey nga kəɔa Jan-Baptis a vagay, fa nəkfar dey maja a səra Jan-Baptis ara ndaw ma key cek ta cəved e, ara ndaw ma jəkey sləmay fa Gazlavay. Masa anga ma cənda mey masa Jan-Baptis maa guzlda la na, ray

* **6:11 6.11** Nəka Mt 10.14. **6:13 6.13** Jak 5.14 **6:14 6.14-15** 8.28 † **6:15 6.15** Eli: Ara ndaw ma təla mey nga Gazlavay zleezle ta məcey ta məcey daa ba, ama Gazlavay ta la sem a gazlavay a vad daa mesewere. Masa Yesu anga da bəla na, ndəhay mekele a ləvam Yesu ara Eli ma vəhwa a bəla. **6:15 6.15** Lk 7.16 **6:17-18 6.17-18** Lev 18.16; 20.21; Lk 3.19-20

anğa a hōbey ga. Ama Herawt a wudfey nğa jōkfar slōmay cōnğa.

²¹ Yaw, đar masa Herawdiyat ma hōtey cōved amba a kōđmara Jan-Baptis na, ta wuswa cay. Ara pas nğa gwagway masa Herawt ma sōrfada đar anğa nğa mayawa. Herawt ta zōlwa ndōhay la ga nğa zōmey đaf. A zōlwa gula anğa hay, bay hay nğa sewje hay, leñ mahura hay daa hwayak nğa *Galile.

²² Daa masa ndōhay fa kamara gwagway a na, dam nğa Herawdiyat a ndōkwey a wuzlah ata, a gōrvey. Megōrvey a, a mbafar a Herawt ta nğada ndōhay mazōtakaya heyey. Ta', Herawt a lōvar a sabara ha: «Cacōđafaya cek masa kah ma wudfey amba ya vōldakawa.»

²³ Herawt ta', a mbedfey, a lōvey: «Ta Gazlavay tabiya, cek masa kah maa cōđafaya na, ya vōldakawa la, kwa nğa wunkey hwayak adaw cew e, ya wunkakwa la.»

²⁴ Ta', sabara ha, a bawa, a daw a lōvar a mamaha: «Ya daa cōđafar na, me?»

²⁵ Mamaha a mbōđdara, a lōvar: «Cacōđafar ray nğa Jan-Baptis.»

Sabara ha, a wusey vaw, a vōhey fa bay a, a lōvar: «Ya wudfey ka vōldiwa ray nğa Jan-Baptis wure kedē aa vōley.»

²⁶ Da ray nğene, Herawt aa ta meesōmey daa saba. Ama a gwa nğa mbōđda mey anğa ha saba, maja ta mbedfey sem fa mey nğa ndōhay mazōtakaya heyey.

²⁷ Anda kedē, ta', a slōrey sewje wure wure nğene nğa handōrwa ray nğa Jan-Baptis. Ta', sewje he a daw aa fōrsōne, a đōslōrwa ray nğa Jan-Baptis a.

²⁸ A parawa aa vōley, a handōrwa, a vōldara a sabara heyey, ta', sabara ha a handara a mamaha.

²⁹ Masa gula hay nğa Jan ma cōndamara ta kōđmara Jan sem na, a diyam a lamara vagay a, a pōshamara aa cōvay.

Yesu a vōltar cek mezōmey nğada ndōhay ma fōna gabal zlam

(Matiye 14.13-21; Luk 9.10-17; Jan 6.1-14)

³⁰ Gula hay kuraw a ray a cew masa Yesu ma slōrdata cew cew nğa wuzey mey nğa Gazlavay heyey a vōhmawa, a kusam a cakay Yesu a, a kadamara cek hay masa ata ma kamōrwa, ta masa ata maa sōrkadamatōrwa a ndōhay.

³¹ Ta', Yesu a lōvtar: «Nakwa aa slam masa ndaw da hwad a daa ba, amba ya njakwa taava alōkwa, amba ka gwamara ka mōskam vaw.» A lōvtar anda kedē na, maja mandaw mandaw ndōhay ga fa samawa, fa vōham, mekele

hay fa samawa saya, kwa ata Yesu ta gula anɗa hay a, a hɗam har nɗa zɗmey daf ba.

³² Da ray nɗene, a tɗpam aa kwambiwal, a diyam aa slam masa ndaw da hwaɗ a daa ba, amba a nɗam taava ata.

³³ Masa ata fa diyam na, ndɗhay ga ta hɗmatar la, ta sɗmara slam masa ata ma diyam a hwaɗ a sem. Da ray nɗene, ndɗhay da slala hay tabiya daa hwayak a, a hwam ta salay, aa slam masa ata ma sɗmara ata Yesu ta gula anɗa hay ma da diyam a hwaɗ a. A wusam aa slam aha teesɗ da ray ata Yesu ta gula anɗa hay.

³⁴ Masa Yesu ma wusey la aa slam mebernɗey na, a bɗnɗgawa daa kwambiwal a, a hɗatar ndɗhay makustakaya ga. Dey-ceceh a kar, maja a nɗkta ndɗhay a, ata anda tɗban hay masa manjar mecɗker. Ta', aa sɗrkadata ndɗhay a da ray cek hay mekele mekele ga.

³⁵ Mamba pas a kɗzley, *gula hay nɗa Yesu a nɗɗam fa vɗɗa, a lɗmar: «Wure keɗe hakwaɗ cay, alɗkwa da wuzlah-ley.

³⁶ Lɗtar a ndɗhay keɗe nɗa diyam a wuzlah-way, da daa ba, a slala hay ta cakay, amba a hɗkamawa cek mezɗmey.»

³⁷ Ama Yesu a mbɗɗatara, a lɗtar: «Akwar ta ray akwar, vɗmatar cek mezɗmey a ndɗhay a!» A lɗmar: «Ka wuɗey ya diyam nɗa hɗkawa cek mezɗmey ta dala ga kalah † amba ya vɗdamatara a ndɗhay keɗe daw?»

³⁸ Da ray nɗene, Yesu aa cɗɗata, a lɗtar: «Da har ndɗhay makustakaya feɗe na, peɗ we? Diyam, nɗkmɗwa.» Masa ata ma nɗkmɗwa la na, a lɗmar: «Ya hɗmawa na, peɗ zlam ta ewet cew.»

³⁹ Ta', Yesu a lɗtar a gula anɗa hay nɗa nɗadamata ndɗhay njakw! njakw! a ray kwakwas meendɗbek e.

⁴⁰ Da ray nɗene, ndɗhay a, a nɗam ta nɗey. Daa slam pal na, ndɗhay temere, temere, daa ba, ndɗhay kwakwar zlam, kwakwar zlam.

⁴¹ Yesu hal! a hɗta peɗ zlam ta ewet hay cew heyey, ta', a banɗa dey a vad, a kar suse a Gazlavay. Fa dɗba ha, ta', a papɗsa peɗ e, a vɗɗatara a gula anɗa hay amba a wunkamatara a ndɗhay heyey. Asaya, Yesu a papɗsta ewet hay cew heyey, a vɗɗatara a gula anɗa hay amba a wunkamatara a ndɗhay a.

⁴² Kwa waawa a zɗmey haa a rɗhey.

6:32 6.32-44 8.1-10 **6:34 6.34** Jer 10.21; Ez 34.5; Zak 10.2; Mt 9.36; 14.14; 15.32; Mk 8.2 † **6:37 6.37** dala ga kalah: Mawuzlalakaya ta mey Gɗrek daa slam a keɗe, a lɗey: «deniye temere cew.» Deniye pal na, ara mawurɗay nɗa slɗra nɗa ndaw fa mevɗndey.

⁴³ Ta', gula anġa hay a cakalamara peñ ta ewet masa ndəhay ma mbəkdamara. A cakalamara aa gadakar hay. Macakalakaya ha a rəhey gadakar kuraw a ray a cew.

⁴⁴ Ndəhay ma zəmam peñ e na, zel hay a key gabal zlam §.

*Yesu a daw ta salay da ray dəhwa nġa Galile
(Matiye 14.13-21; Luk 9.10-17; Jan 6.1-14)*

⁴⁵ Masa ndəhay ma zəmam cek cay na, wure nġene, Yesu ta', a təktaŕ đay a gula anġa hay nġa təpam aa kwambiwal amba ata na, a zləngam teesed a dey lanġar nġa dəhwa ha gweegwe ta slala Betsayda. Yesu na, a nġey fa dəba đagay amba a mbəđtaŕ mey a ndəhay makustakaya heyey nġa diyam a way.

⁴⁶ Fa dəba ha masa ata ma wunkam la na, ta', a daw aa anġwa nġa dərey danġay a Gazlavay.

⁴⁷ Masa tavađ ta key sem na, *gula hay nġa Yesu ata da wuzlah dəhwa daa kwambiwal. Ama Yesu na, anġa pal taava anġa da anġwa heyey.

⁴⁸ A nəkta gula anġa hay na, fa səram banay ga nġa tənġey dəhwa ha, maja memed fa key ga nġada ray ata. Fa dəba ha, gweegwe slam nġaa pərek na, Yesu ta', a daw ta salay da ray yam nġada fa ata. Aa ma nġəchey la gweegwe ta kwambiwal a na, a wuđey nġa mbəkdata fa dəba.

⁴⁹ Ama ata ma hətmar Yesu fa daw da ray yam a na, a wulkam ara mamayam. Ta', a wudam,

⁵⁰ maja ata cəpa fa hətmar anġa fa daw da ray yam a, anda kedə, a zluram ga. Ama wure nġene, Yesu a ləvtaŕ: «Dəkmara mevel! Ara yah, ka da zluram ba!»

⁵¹ Yesu, ta', a təpey aa kwambiwal fa gula anġa hay a. Masa aa ma təpey la aa kwambiwal a na, memed a key saba. Da ray nġene, gula anġa hay a, a rəzlam ga,

⁵² maja kwa ata ma hətmar maazla masa Yesu ma ka ta peñ heyey na, daa nġene ta gwamara nġa sərmara gədan nġa Yesu a daa ba, maja ray ata manġərdakaya.

*Yesu a mbəley masa-macay hay daa hwayak nġa Genezeret
(Matiye 14.34-36)*

⁵³ Masa ata Yesu ta gula anġa hay ma tənġam la a dey lanġar nġa dəhwa heyey na, a wusam aa hwayak daha mezəley Genezeret. A jəwmara kwambiwal a mey dəhwa ha fetedə.

6:43 6.43 2Bay 4.43-44 § **6:44 6.44** Daa Mt 14.21, a ləvey nġusay ta bəza hay daha may, ama manġar nġa sləfey. **6:46 6.46** Lk 5.16 **6:48 6.48** Jəw 9.8; Lk 24.28 **6:49 6.49** Lk 24.37 **6:51 6.51** 4.39 **6:52 6.52** 8.16-18; Mt 16.7-9

⁵⁴ A bærηgamawa daa kwambiwala a, wure ηgene ndəhay a sərmara ara Yesu ma bærηgawa.

⁵⁵ A hwam a slala hay mekele mekele cəpa ηga wuzey a ndəhay siya Yesu ta sawa la. Da ray ηgene, a handamatərwa masa-macay hay manatakaya fa gegəded' aa slam masa Yesu aa da hwad' a.

⁵⁶ Aa slam masa Yesu ma daw, kwa a slala hay, kwa aa berney hay, kwa a wuzlah-ley na, ndəhay ga fa handamawa masa-macay hay aa slam masa ndəhay makustakaya da hwad' a. A bærkwamara amba masa-macay hay a gəsam har kwa fa mey ηga zana anηa gway. Ndəhay ma gəsfamar har cəpa na, ta mbəlam sem.

7

*Ndaw aa maaya fa mey ηga Gazlavay na, kwara?
(Matiye 15.1-9)*

¹ *Fariza hay ta ndəhay siya da wuzlah *ndəhay maa sərkada kwakwas ηga Mawiz a samawa da *Jeruzelem, a kusam a cakay Yesu.

² A hətmatar *gula hay ηga Yesu siya fa zəmam daf ta har manjar ηga pərey. Anda meləvey, gula hay a ta kamara anda kwakwas ata ma ləvey na, daa ba.

³ Yaw, Fariza hay a ta ndəhay *Jəwif hay mekele tabiya fa kamara kwakwas a. A da zəmam daf na, si a pərmara har maaya maaya la.

⁴ Da ta vəhmawa daa luma cay, fa da zəmam daf na, si a pəram la dagay. A nam ray a cek hay mekele mekele anda kwakwas ata ma ləvey. Anda meləvey, a pərmata vəley hay, kwakulam hay, leη manηayak hay amba a təram ndəhay mazləbtakaya ba.

⁵ Da ray ηgene, Fariza hay ta ndəhay maa sərkada kwakwas ηga Mawiz heyey, aa cəfdamara Yesu a, a ləvmar: «Gula akah hay a kam cek hay anda kwakwas ηga papaη ηga papa aləkwa hay ma wuzdamandakwara ba na, maja me? Ata fa zəmam daf ta har manjar ηga pərey.»

⁶ Yesu a mbəddatara, a ləvtar: «Akwar ndəhay masa ta neneh cew! Zleezle *Izay, *ndaw ma təla mey ηga Gazlavay maa guzley da ray akwar na, anja fara. A wuzlala daa dərewel ηga Gazlavay, a ləvey:

“Gazlavay a ləvey: Ndəhay keđe fa həslmaya ray

ta mey ηga tede,

ama mevel ata na, aa dərəη ta yah.

⁷ Ata fa həlmamaya, ama mehəlmey a,

ta tǝrey sem ɲga cek ɲga tede,
maja kwakwas masa ata maa sǝrkadamara ɲgene na,
ara kwakwas ɲga ndaw-magɛdan daada gway.”»

⁸ Yesu a lǝvtar saya: «Akwar, Fariza hay ta ndǝhay maa sǝrkada kwakwas ɲga Mawiz, ka mbǝkdamara *mewey hay ɲga Gazlavay, ama ka kam kwakwas ma sawa ta fa ndǝhay.»

⁹ Ta', Yesu aa guzltar saya: «Haya! Mewey hay ɲga Gazlavay na, ka wudam saba, ka mbǝkdamara amba ka sǝpam kwakwas akwar jak daw?

¹⁰ Yaw, Mawiz a lǝvey: “Natar ray ɲgada ata papakw ta mamakw.” Mawiz a lǝvey saya: “Ndaw ma cǝfa papaha, da daa ba, mamaha na, si a kǝfmara ndaw aha vagay.”

¹¹ Ama akwar na, akwar faa sǝrkadam ndǝhay, ka lǝvam, ndaw a gwa ɲga lǝvar a papaha, da daa ba, a mamaha: “Cek masa yah ma da vǝldakawa ɲga jǝnka heyey na, ya vǝldakawa daa saba, maja cek aha na, *Kwarban*.” (“*Kwarban*” a wudɛy ɲga lǝvey “cek mavǝldakaya ɲgada Gazlavay.”)

¹² Da ray ɲgene, ka lǝvmatar a ndǝhay ɲga jǝnmata papa ata hay ta mama ata hay saba.

¹³ Anda kedɛ, akwar fa nǝsmara mey ɲga Gazlavay ta meesǝrkedey akwar, maja ka pamara kwakwas akwar ɲga mahura da ray mey ɲga Gazlavay. Asaya, akwar fa kam cek hay mekele mekele maaya ba letɛk anda cek aha kedɛ.»

(*Matiye 15.10-20*)

¹⁴ Ta', Yesu a zǝlta ndǝhay makustakaya tabiya saya, a lǝvtar: «Jǝkfamaya slǝmay, akwar tabiya, cǝndamara mey kedɛ.

¹⁵ Cek masa ndaw ma zǝma na, a gwa ɲga kar mebǝrey a ndaw aha ba, ama si mewulkey masa ma bawa daa mevel aɲga. [

¹⁶ Wure kedɛ anja akwar ta slǝmay na, cǝndamara mey a kedɛ maaya maaya.]»

¹⁷ Fa dǝba ha, Yesu a mbǝkdata ndǝhay makustakaya heyey, a mbǝzey aa way. Gula aɲga hay ta', aa cǝfdamara da ray mey-menɲey masa aa ma kada ha.

¹⁸ Yesu ta', a lǝvtar: «Akwar may, haa wure kedɛ, ka cǝndamara ba cǝɲga daw? Ya wudɛy ka sǝrmara fara fara cek mezǝmey ma mbǝzey a hwad ndaw na, a gwa ɲga kar mebǝrey a ndaw aha ba,

¹⁹ maja cek aha a mbǝzey aa mevel aɲga ba, ama a mbǝzey aa zakwataf aɲga, fa dǝba ha, a bawa a palah.» Anda kedɛ, Yesu fa wuzda cek hay mezǝmey cǝpa na, ndaw a gwa a zǝma, a kar mebǝrey ba.

²⁰ Yesu aa guzltar saya, a løyey: «Cek ma kar mebørey a ndaw na, ara mewulkey ma bawa daa mevel anga.

²¹ Ahaw, ara daa mevel nga ndaw-magədan mewulkey maaya ba ma bawa. Mewulkey a, a həlda ndaw nga key cek hay malamba, anda meleley, mekədfey ndaw vagay,

²² meley-vaw saw da palah, mekey dey fa cek nga ndəhay, mekey cek ta maagway, membərzley, mekey cek ma ka hwaray, mekey səleŋ, mekey mbaɗa fa ndəhay, mezlepey, leŋ mepey leŋgesl ba.

²³ Yaw, cek hay maaya ba tabiya keɗe na, a bamawa daa mevel nga ndaw, a kamar mebørey a ndaw a.»

Ngwas masa Jəwif ba a pa Yesu nga ndaw anga fara fara (Matiye 15.21-28)

²⁴ Ta', Yesu a sləkdfey daa slam a ngene, a daw aa hwayak mekele gweegwe ta berney nga Tir. A mbəzey aa way. A wuɗfey amba ndaw a səra anga fetede ba, ama a gwa nga bey ba.

²⁵⁻²⁶ Fetede, ngwas daha anga dam *Jəwif ba, a yawa da Fenisi daa hwayak nga Siri. Dam anga daha, anga ta malula da ray. Masa aa ma cənda mey da ray Yesu na, wure ngene, a daw fa vəɗa, a tədfey fa mey anga. Ta', a kar ambahw a Yesu, a ləvar: «Bəla malula da ray dam adaw keɗe may taw.»

²⁷ Ama Yesu aa guzlar ta mey-menŋey, a ləvar: «Mbəkdata bəza hay nga rəham ɗagay, maja mevəley ɗaf nga bəza hay ngada gədey hay na, maaya ba.»

²⁸ Ngwas aha a mbəɗɗara, a ləvar: «Ahaw, Bay adaw. Ama kwa gədey hay daa slam masa ndəhay fa zəmam ɗaf na, ata fa zəmam meepəsey nga ɗaf masa bəza hay ma kəzlamata a hwayak may, ba diya?»

²⁹ Da ray ngene, Yesu a ləvar: «Kah ma mbəɗɗərwa mey a la maaya. Maja ngene, malula ta bey sem da ray dam akah, ka gwa nga daw a way.»

³⁰ Anda keɗe, ngwas aha, a daw a way, a hətɗar dam anga manakaya da ray harŋgawaw ta meesəmey, malula ta bey sem da ray anga.

Yesu a wurey sləmay nga ndaw madagazlam

³¹ Ta', Yesu a sləkdfey daa slam masa gweegwe ta berney nga Tir heyey. A daw ta daa berney nga Sidanw, a vəhwa ta mey dəhwa nga *Galile gweegwe ta hwayak nga Berney-Hay-Kuraw.

³² Ndəhay a handamawa ndaw daha madagazlam, maada. A bərkwamara Yesu amba a par har a ray nga wurara sləmay anga ta nga tərda neneh anga dadakw saba.

³³ Anda kedfe, Yesu ta', a ngöla ndaw aha aa slam masa doreñ ta ndöhay makustakaya. A pata böz-mey-har anğa hay aa slömay nğa ndaw aha. Ta', a töfey meesleb fa böz-mey-har anğa, a wusa neneh nğa ndaw aha ta böz-mey-har a.

³⁴ Ta', Yesu a bangada dey a vad, a söfney ta gödan, a lövar a ndaw aha: «*Efata*» anda melövey, «Wurey!»

³⁵ Wure ngene, slömay nğa ndaw aha ta', a wurey. Neneh anğa, dadakw saba.

³⁶ Yesu a kätata tabiya, a lövtar: «Ka da wuzdamara a ndaw ba.» Ama kwa Yesu a tökta nğa wuzda mey a na, ata ta wuzdamara sem cönğa.

³⁷ Ndöhay a rözlam ga, a lövam: «A key cek hay cöpa maaya. Kwa slömay nğa ndaw madagazlam na, a wura. Kwa neneh nğa ndaw maada na, a törda dadakw saba.»

8

Yesu a völtar cek mezömey nğada ndöhay ma föna gabal mäfad

(Matiye 15.32-39)

¹ Daa döar hay a ngene masa Yesu fa pökey daa hwayak nğa Berney-Hay-Kuraw heyey na, ndöhay ga a samawa, a kusam a cakay a saya. Cek fa ata nğa zömey daa ba. Yesu a zöltörwa gula anğa hay, a lövtar:

² «Dey-ceceh fa kaya fa ndöhay makustakaya kedfe, maja anğa kaa döar maakar ata da cakay adaw. Wure kedfe cek mezömey da har ata daa saba.

³ Da ya mbökdata nğa diyam a way ata hay ta may na, fa da hötam gödan daa cöved daa ba, maja ndöhay siya hay da wuzlah ata, a samawa da doreñ.»

⁴ Gula anğa hay a mböddamara, a lövmar: «Alökwa daa wuzlah-ley kedfe na, ya da hötkurwa peñ nğa röhey ndöhay tabiya kedfe na, dama?»

⁵ Yesu aa cöfdata, a lövey: «Da har akwar fedfe kaa na, peñ we?»

A lövam: «Da fedfe na, peñ maasala daha.»

⁶ Ta', Yesu a lövtar a ndöhay makustakaya heyey nğa njam a hwayak. Fa döba ha, ta', a höla peñ maasala heyey, a kar suse a Gazlavay. A papösa, a völdatara a gula anğa hay amba a wunkamatara a ndöhay a. Ta', a wunkamatara.

⁷ Da har ata, ewet mecöhe mecöhe neködey daha saya. Yesu a kar suse a Gazlavay. Ta', a lövtar a gula anğa hay nğa wunkamatara saya.

⁸ Kwa waawa ta hōtey cek mezōmey la, haa a rōhey. Ta', gula anḡa hay a cakalamara siya ma mbōkdakaya. Macakalakaya ha a rōhey gadakar mahura mahura maasala.

⁹ Ndōhay ma zōmam cek fetede he na, a fōna ndōhay gabal mōfad. Fa dōba ha, Yesu a lōvtar a ndōhay a nḡa vōham a way ata hay dōba.

¹⁰ Wure wure nḡene, a tōpam ta gula anḡa hay aa kwambiwal, a diyam aa hwayak nḡa Dalmanuta.

*Fariza hay aa cōfdamara Yesu nḡa key maazla
(Matiye 16.1-4)*

¹¹ Fa dōba ha, *Fariza hay a wusmawa fa Yesu, a zlamar mekey yawa ta anḡa. A wudam a jadamara. Da ray nḡene, aa cōfdamara amba a key maazla nḡa wuzda gōdan anḡa a sawa ta fa Bay Gazlavay.

¹² Yesu a sōfney ta gōdan, a gōrey maja a tōbmara mey anḡa ba, ta', a lōvtar: «Ndōhay masa wure kefe aa cōfdam maazla nḡa wuzdōrwa ara Gazlavay ma slōrdiwa na, maja me? Ya fa lōvkwār fara fara, ya fa da key maazla ha daa ba.»

¹³ Ta', Yesu a mbōkdata Fariza hay a, a daw a mbōzey aa kwambiwal nḡa tōnḡey a dey langar nḡa dōhwa nḡa *Galile.

*Mey-menḡey da ray meesārkedey nḡa Fariza hay
(Matiye 16.5-12)*

¹⁴ Daa kwambiwal a na, *gula hay nḡa Yesu ata ta peḡ pal gway. A sōrfadamara nḡa handawa peḡ a dey a saba.

¹⁵ Ta', Yesu a kōtata, a lōvtar: «Wam vaw fa cek ma hōsla peḡ nḡa *Fariza hay, leḡ fa cek ma hōsla peḡ nḡa Bay *Herawt.»

¹⁶ Gula anḡa hay a wulkam, aa guzlam da wuzlah ata, a lōvam: «Aa guzley anda kefe na, maja alōkwa ma sakurwa ta peḡ daa ba daw?»

¹⁷ Yesu a sōra cek masa ata maa guzlam da wuzlah ata. Da ray nḡene, aa cōfdata, a lōvtar: «Ka wulkam da ray peḡ masa akwar ma handamawa daa ba na, maja me? Haa wure kefe akwar na, ka cōndamara mey a ba cōnḡa daw? Akwar na, ray maḡḡōrdakaya.

¹⁸⁻¹⁹ Akwar fa nōkam dey, ama ka hōtmar dey ba daw? Akwar fa jōkam slōmay, ama ka cōnam slōmay ba daw? Daa masa yah ma wunkata peḡ zlam nḡada ndōhay gabal zlam heyey na, mambōkakaya na, a rōhey gadakar we? Akwar fa sōrfadamara, ba diya?»

A mbøddamara, a løvmar: «Gadakar hay kuraw a ray a cew.»

²⁰ Yesu a løvtar saya: «Daa masa yah ma wunkatara peñ maasala ngada ndəhay gabal məfad heyey na, ka rəham gadakar mahura hay ta peñ mambəkakaya na, we?»

A mbøddamara, a løvmar: «Gadakar mahura mahura maasala.»

²¹ Ta', Yesu a løvtar: «Ka sərfadamara cek masa yah ma ka, ama haa wure kefe ka cəndamara mey masa yah maa guzlda da ray cek ma həsla peñ kefe ba cəngə daw?»

Yesu a wurey dey nga ndaw-wulaf

²² Ta', Yesu ta gula anğa hay a wusam a Betsayda. Fetede a handamawa ndaw-wulaf fa vəfa, a kamar ambahw nga gəsfar har fa ndaw aha amba dey anğa a wurey.

²³ Da ray nğene, Yesu ta', a kərza ndaw aha fa har, a dafda doreñ ta slala ha. Ta', a kar meesleb fa dey nga ndaw aha, a par har fa dey, aa cəfdə, a ləvar: «Ka fa hətar dey dəba daw?»

²⁴ Ndaw-wulaf a, a banğafda dey, a ləvey: «Ya fa hətatar ndəhay, ama ata anda wudez hay ma diyam.»

²⁵ Ta', Yesu a gəsfar har fa dey saya. Ndaw aha, dey anğa a wurey, a hətatar cek hay maaya maaya dəba.

²⁶ Yesu aa guzlar nga daw a way, a kəta, a ləvar: «Ka da daw ta Betsayda kefe ba, daw a way dğay.»

*Piyer a wuzda, Yesu na, ara Kəriste
(Matiye 16.13-20; Luk 9.18-21)*

²⁷ Fa dəba ha, ata Yesu ta gula anğa hay a diyam a slala hay masa gweegwe ta slala mahura mezəley Sezere-Fəlep. Masa ata fa diyam daa cəved na, Yesu aa cəfdəta, a ləvey: «Yah na, ndəhay a padamaya na, nga wa?»

²⁸ A mbøddamara, a løvmar: «Ndəhay siya a ləvam kah na, *Jan-Baptis. Mekele hay a ləvam kah na, *Eli, *ndaw ma təla mey nga Gazlavay zleezle. Mekele hay saya a ləvam kah na, ndaw pal dasi ndəhay ma təla mey nga Gazlavay zleezle.»

²⁹ Ta', aa cəfdəta saya, a løvtar: «Kaa akwar may, ka ləvam yah na, wa?»

Piyer a mbøddara, a ləvar: «Kah na, *Kəriste, *ndaw masa Gazlavay ma wala nga ləhdata ndəhay.»

³⁰ Ta', a kətata gula anğa hay, a katar mey, a løvtar: «Ka da wuzdamara mey a kefe a ndaw ba.»

Yesu aa guzley da ray meməcey anğa ta masləkɗawa anğa

(Matiye 16.21-28; Luk 9.22-27)

³¹ Yesu, ta', aa sərkaɗata gula anğa hay, a ləvtar: «Si yah, *Bəz nğa Nɗaw, ya sərey banay la ga ɗagay. Mahura hay nğa *Jəwif hay, *bay-ray hay nğa ndəhay ma ka kwakwas nğa Gazlavay, leŋ *ndəhay maa sərkaɗa kwakwas nğa Mawiz a rəsmaya la, fa da təbmara ara Gazlavay ma slərɗiwa na, daa ba. A da kəɗmaya vagay, nğa ɗar maakar a na, ya sləkɗawa la daa meməcey.»

³² A wuzɗatara mey a keɗe, ɓa' a palah ta ɓada daa ba. Da ray ngene, *Piyer ta', a zəla ta cakay, a mbəɗar ray.

³³ Yesu pəla! a mbəɗey dey, a nəkta gula anğa hay siya. Ta', a kar mey a Piyer, a ləvar: «Hway la da cakay aɗaw, kah, *Satan. Maja mewulkey akah ngene na, ara mewulkey nğa Gazlavay ba, ama ara mewulkey nğa ndaw-magəɗan gway.»

³⁴ Ta', a zəlta ndəhay makustakaya nğa nğəɗamawa a cakay ata ta gula anğa hay. A ləvtar: «Da ndaw a wuɗey nğa səpya na, si a mbəkɗa mewulkey da ray ray anğa, a səpya ta mevel pal, si a ɓəsa banay ma da sawa a ray a maja yah, anda yah ma da məcey fa hwadam mazlanɗalakaya.

³⁵ Sərmara, kwa waawa ma wuɗey nğa ləhɗa heter anğa na, a key ngene, aa zəɗɗa. Ama kwa waawa maa zəɗɗa heter anğa maja anğa fa səpya, asaya, maja anğa fa wuzey *Mey-maaya-mawiya a ndəhay na, a key ngene, a ləhɗa heter anğa ha.

³⁶ Da ndaw a hətey cek hay tabiya masa anğa ma wuɗey da bəla keɗe, ama taa zəɗɗa heter anğa sem na, cek hay a tabiya ngene, ta ləhɗamara ndaw a la daw?

³⁷ Yaw, ndaw a gwa nğa mbəɗa heter anğa ta cek ba.

³⁸ Kwa waawa ma paya hwaray, da daa ba, ma key hwaray nğa təba mey aɗaw fa mey nğa ndəhay da bəla wure keɗe masa ma mbəkɗamara Bay Gazlavay sem ta masa ma kam mebərey keɗe na, yah, Bəz nğa Nɗaw, ya par hwaray la ta pas masa yah ma da vəhwa ta gəɗan nğa Papay leŋ ta maslan anğa hay.»

9

¹ Yesu aa guzltar saya, a ləvtar: «Ya fa ləvkwar fara fara, ndəhay siya da wuzlah akwar feɗe, fa da məcam daa ba, si ata ma hətmar Bay Gazlavay fa wey ta gəɗan anğa la ɗagay.»

Gula hay nga Yesu a hətmatar ata Eli ta Mawiz faa guzlam ta Yesu
(*Matiye 17.1-13; Luk 9.28-36*)

² Dar maakwaw fa dəba ha na, Yesu ta', a zəlta ata *Piyer, *Jak, leŋ *Jan, a ɲəɫta aa ray ɲga aɲgwa maazəma daa slam aha, a ɲjam taava ata fetedə. Yesu pəla! a mbədəy fa dey ata.

³ Zana aɲga a tərey mabara, a wedəy ndəd-ndəd. Mewedəy ɲga zana ha ɲgene na, kwa ndaw da bəla kedə ma gwa ɲga pəra zana ha ɲga wedəy kəne daa ba.

⁴ Wure wure ɲgene, gula aɲga hay maakar heyey, a hətmatar ata *Eli ta *Mawiz, ndəhay ɲga Gazlavay zleezle, faa guzlam ta Yesu.

⁵ Da ray ɲgene, Piyer aa guzlar a Yesu, a ləvar: «Bay ala, maaya na, ya ɲjakwa fedə. Ya da kərcam slam hay maakar, pal ɲgada kah, pal ɲgada Mawiz, pal ɲgada Eli.»

⁶ Piyer aa guzley anda kedə na, maja mandərzay fa katar kalah, a səra mey masa aa maa guzlda ba.

⁷ Ta', mekwtene a sərtata. Daa mekwtene he na, a cənam dəy ma ləvey: «Kedə he ara Bəzey adaw masa yah ma wudə kalah. Jəkfamar sləmay!»

⁸ Wure wure ɲgene, *gula hay ɲga Yesu a, a nəkam dey ta cakay, ama a hətmatar ndəhay a saba, si a hətam na, Yesu pal taava aɲga da cakay ata.

⁹ Masa ata fa bəɲgamawa da aɲgwa ha na, Yesu a kətata, a ləvtar: «Cek masa akwar ma hətmərwa kedə na, ka da wuzdamara a ndaw ba sələk, haa kasl pas masa yah, *Bəz ɲga Ndaw, ma da sləkɟawa daa meməcey.»

¹⁰ Gula hay ɲga Yesu a, a təbmara mekətəy a kedə, ama aa cəɟdam vaw da wuzlah ata, a ləvam: «Masləkɟawa daa meməcey na, mey a, a wudəy ɲga ləvey na, kwara?»

¹¹ Ta', aa cəɟdamara Yesu, a ləvmar: «Ndəhay maa sərkada kwakwas ɲga Mawiz, a ləvam si Eli a sawa la teesəd da ray *Kəriste na, maja me?»

¹² Yesu a mbədɟatara, a ləvtar: «Ahaw, fara fara Eli a sawa la teesəd ɲga ɟiyta cek hay cəpa maaya maaya. Mawuzlalakaya daa ɟerewel ɲga Gazlavay, a ləvey, Bəz ɲga Ndaw, a sərey banay la ga, ndəhay a rəsmara la. Akwar fa sərfadamara mey a kedə daw?»

¹³ Yaw, ya fa ləvkwar Eli na, ta sawa cay. Anda ɟerewel ɲga Gazlavay ma ləvey da ray a zleezle na, ndəhay ta kamar cek maaya ba la anda ata ma wudam.»

Yesu a bada cek da ray bəzey
(*Matiye 17.14-21; Luk 9.37-43a*)

¹⁴ Ata Yesu ta ata *Piyer, *Jak, leŋ *Jan a ngəcham gweegwe ta *gula hay nga Yesu siya zlam-letek. Fetede a hətam ndəhay ga da cakay gula hay a. *Ndəhay maa sərkada kwakwas nga Mawiz daha fetede, fa kam yawa ta gula hay zlam-letek e.

¹⁵ Masa ndəhay heyey ma hətmar Yesu la na, wure ngene ata cəpa a rəzlam, a wusam vaw ngada fa anga amba a camar har.

¹⁶ Yesu aa cəfdata gula anga hay fetede, a ləvtar: «Ka kam yawa ta ndəhay kefe na, da ray me?»

¹⁷ Ndaw pal da wuzlah ndəhay makustakaya heyey aa guzlar, a ləvar: «Bay adaw, ya ta handakawa bəzey adaw la. Anga ta cek da ray, fa təka ngaa guzley.

¹⁸ Kwa daa wura daa wura masa cek aha ta zlar la na, a tədda a hwayak, maŋgwafakw a bawa da mey, aa pədey sler, vaw anga a mberey. Ya ta cacəfdata gula akah hay la amba a badamara cek aha na, ama ta gwamara daa ba.»

¹⁹ Ta', Yesu a mbəfdatar a ndəhay a, a ləvtar: «Akwar səkway nga ndəhay ma pamaya nga ndaw akwar fara fara ba kefe. Ya da njeŋ ta akwar na, haa ta vara? Ya da bəskwar na, haa ta vara? Yaw, handamiwa bəzey a.»

²⁰ Ta', a handamara bəzey a fa Yesu. Masa bəzey a ma hətmar Yesu na, wure ngene, cek aha aa wasada. Ta', bəzey a, a tədey a hwayak, a pətkweley da hwayak, maŋgwafakw a bawa da mey.

²¹ Ta', Yesu aa cəfda papan nga bəzey a, a ləvar: «Cek aha a zlar anda kefe na, dəga nga vara?»

Papaha a mbəfdara, a ləvar: «A zlar dəga daa bəzey.

²² Ta pas mekele cek aha, a tədda aa awaw, da daa ba, a tədda aa yam amba a kəfa vagay. Da ka gwa nga bəla cek da ray bəzey a na, ambahw, sərɤandar dey-ceceh, jəndar may taw!»

²³ Yesu a mbəfdara, a ləvar: «Ka ləvey da ya gwa nga bəla na, maja me? Ya gwa ya key cek hay cəpa ngada ndaw ma paya nga ndaw anga fara fara.»

²⁴ Wure ngene, papan nga bəzey a, a wudey, a ləvey: «Ya fa paka nga ndaw adaw fara fara, ama anga ta banay ngada yah, si ka jənya nga paka nga ndaw adaw ma fəna.»

²⁵ Masa Yesu ma nəkta ndəhay ga fa hwamawa nga nəkey cek masa aa ma ka na, a babəcar a cek da ray bəzey a heyey, a ləvar: «Kah, cek ma təka bəzey kefe ngaa guzley, ma təka nga jəkey sləmay, ya fa ləvka, bey, daw! Ka da vəhwa a ray a saba!»

²⁶ Ta', cek aha, a zlar saya, a wudey ta gədan. Aa wasada bəzey a ta gədan, a tədda a hwayak. Cek aha, a bey da ray bəzey a. Ndəhay ga da cakay a, a ləvam: «Bəzey a ta məcey sem.» Aa guzlam anda kefe na, maja bəzey a, ta bərzley sem.

²⁷ Ama Yesu a kərza fa har, a sləkɗada. Ta', bəzey a, a lecey.

²⁸ Yesu ta', a daw a way. Masa ata taava ata ta gula anɗa hay da way na, gula anɗa hay a, aa cəɗɗamara, a ləvmar: «Ala ta gwamara nɗa badamara cek da ray bəzey a daa ba na, maja me?»

²⁹ Yesu a mbəɗɗatara, a ləvtar: «Iɗga bey cek anda kefe da ray ndaw na, si ta medərey-danɗay a Bay Gazlavay gway.»

Yesu aa guzley saya da ray meməcey anɗa ta masləkɗawa anɗa

(Matiye 17.22, 23; Luk 9.43b-45)

³⁰ Ata Yesu ta gula anɗa hay a sləkɗam daa slam aha nɗene, a diyam taa hwayak nɗa *Galile a Kapernayum. Yesu a wudey ndəhay a sərmara a lawa dama ba,

³¹ maja anɗa faa sərkaɗata gula anɗa hay. Daa meesərkey a na, a ləvtar: «A da kərzamaya, yah, *Bəz nɗa Ndaw. A da vəldamaya a har ndəhay. Ndəhay a, a da kəɗmaya vagay, ama nɗa ɗar maakar a na, ya sləkɗawa la daa meməcey.»

³² Ama gula anɗa hay ta cəndamara mey masa Yesu maa guzɗatara nɗene daa ba. Asaya, a zɗuram nɗaa cəɗɗamara mey a.

Mahura dasi gula hay nɗa Yesu na, wa?

(Matiye 18.1-5; Luk 9.46-48)

³³ Ata Yesu ta gula anɗa hay a wusam a Kapernayum, a mbəzam a way. Masa ata da way a na, Yesu aa cəɗɗata, a ləvtar: «Iɗga fene, ka kam yawa daa cəved na, da ray me?»

³⁴ Ama a nɗam teete, maja daa masa ata daa cəved na, ta kam yawa la da wuzlah ata, a ləvam: «Mahura dasi aləkwa na, wa?»

³⁵ Yesu, ta', a nɗey ta nɗey, a zəɗta gula anɗa hay kuraw a ray a cew, a ləvtar: «Da ndaw a wudey a key mahura da ray ndəhay na, si a pa ray anɗa nɗa mecəhe, a jənta ndəhay tabiya.»

³⁶ A ley bəzey mecəhe, a lacada a wuzlah ata. A kərza bəzey a fa har, ta', a ləvtar a gula anɗa hay:

37 «Nəkmara bəzey masa yah ma kərza keđe. Yaw, kwa waawa ma təbey bəzey * anda bəzey mecəhe keđe maja a wufya na, ndaw aha a key ɲgene, a təbey yah, ray adaw. Asaya, kwa waawa ma təbya na, a təbey ɲgene, yah pal taava adaw ba, ama a key a təbey Bay Gazlavay ndaw ma slərđiwa may.»

*Ndaw masa-gəra aləkwa ba na, ara jam aləkwa
(Luk 9.49-50)*

38 *Janj aa guzlar a Yesu, a ləvar: «Bay ala, ala ta hətam ndaw daha la fa bəley malula da ray ndəhay ta mezəley akah. Ya wufam ɲga təkmarə maja ara ndaw da wuzlah aləkwa ba.»

39 Yesu a mbəđdatara, a ləvtar: «Ka da təkmarə ba, maja da ndaw a gwa mekey maazla maaya ta gədaɲ ma sawa ta mezəley adaw na, ndaw aha fa daa guzley mey maaya ba da ray adaw na, daa ba.

40 Anda keđe, ndaw masa aɲga masa-gəra aləkwa ba na, ara jam aləkwa.

41 Yaw, ya fa ləvkwar fara fara, ndaw ma jənkwar ta cek nekədey, kwa a vəlkwar yam ɲga sey maja akwar ndəhay adaw hay na, Bay Gazlavay a pəlra mawurbay aɲga la.»

*Pam leɲgesl fa cek ma hendey ndaw aa mebərey
(Matiye 18.6-9; Luk 17.1-2)*

42 «Kwa waawa ma betey ndaw pal dasi ndəhay ma təba mey adaw hay keđe ɲga key mebərey na, ɲgada aɲga na, ɲgama ata ma jəwmar aɲgwa mahura a đay, ma kəzlamara aa bəlay.

43 Anja da har akah, fa həldaka ɲga key mebərey na, đəsla har a. ɲgama kah ma hətey heter mendəvey ba ta har pal, da ray kah ma da mbəzey aa awaw mendəvey ba masa daa vəgeđ ɲga awaw magaza ta har akah hay cewete.

[44 Fetede, “mətal ma zəmey ndaw fa da ndəvey daa ba, awaw fa da məcey daa ba.”]

45 Da salay akah, fa həldaka ɲga key mebərey na, đəsla salay a. ɲgama kah ma hətey heter mendəvey ba ta salay pal, da ray kah ma da mbəzey aa vəgeđ ɲga awaw magaza ta salay akah hay cewete. [

46 Fetede, “mətal ma zəmey ndaw fa da ndəvey daa ba, awaw fa da məcey daa ba.”]

* **9:37 9.37** bəzey: Fede Yesu a wufey ɲgaa guzley da ray bəzey daada ba, ama aa guzley da ray kwa waawa masa ta gədaɲ pəreh. **9:37 9.37** Mt 10.40; Lk 10.16; Janj 13.20 **9:40 9.40** Mt 12.30; Lk 11.23 **9:43 9.43** Mt 5.30

⁴⁷ Da dey akah, fa hældaka nga key mebørey na, wuzlka dey a. Ngama kah ma mbøzey ta dey pal aa slam masa Gazlavay ma wey da ray ndøhay anga hay da vad, da ray kah ma da mbøzey aa vøged nga awaw magaza ta dey akah hay cewete.

⁴⁸ Fetede, "møtal ma zømey ndaw fa da ndøvey daa ba, awaw fa da møcey daa ba."

⁴⁹ «Sørmara, Gazlavay a jada ndaw anga maaya, da daa ba, maaya ba na, ta awaw lej ta manda †.

⁵⁰ Manda na, ara cek maaya. Ama da manda ha a cørey saba na, ya da kadakwa amba a cørey saya na, kwara? Akwar na, kam maaya a ndøhay anda manda ma cørd a cek. Njam ta zazay da wuzlah akwar, ka da tøram vaw ba.»

10

*Yesu a wuzey mey da ray mebøley ngwas
(Matiye 19.1-12; Luk 16.18)*

¹ Yesu a sløkdøey da slala Kapernayum, a daw aa hwayak nga *Jude da dey lanjar nga wayam nga Jurden. Ndøhay a kusam ga a cakay a saya. Aa faa sørkadata anda aa ma ka mandaw mandaw.

² *Fariza hay a diyam fa vøða, amba a jadamara. Aa cøfdamara, a løvmar: «Kwakwas aløkwa a vøley cøved a ndaw nga bøla ngwas anga daw?»

³ Yesu a mbøddatara, a løvtar: «*Mawiz a løvkwar nga key na, kwariya?»

⁴ Fariza hay a, a løvmar: «Mawiz a løvey da ndaw a wufey nga bøla ngwas anga na, si a wuzlalar dærewel nga bøla ngwas anga ha dægay, fa døba ha, a bøla.»

⁵ Yesu a løvtar: «Sørmara, Mawiz a wuzlala *mewey a ngene na, maja mevel akwar maaya ba, ka gømam nga tømara mey nga Gazlavay ba.

⁶ Daa mezley nga bøla, "Gazlavay a lømwa na, zel ta ngwas", ba diya?

⁷ "Maja ngene, ndaw-mezøle a mbøkda papaha ta mamaha, amba a cømam ta ngwas anga.

9:47 9.47 Mt 5.29 **9:48 9.48** Iz 66.24 † **9:49 9.49** Gazlavay a jadata ndøhay ta cek hay mekele mekele daa menjey ata da bøla masa ta banay ga. Mey a kefe a wufey nga løvey ndøhay ma røsmara Gazlavay ma da søram banay, da daa ba, a wufey nga løvey ndøhay nga Yesu ma da tøram maaya ma føna ma føna ta fa banay a. (Nøka Iz 48.10; Rm 5.3-5; Jak 1.2-4; 1Pi 1.6-7.) «Awaw» a wufey nga løvey mesørey banay ga, da daa ba, menjey daa awaw nga sørmataw. «Manda» na, Jøwif hay a kamara fa cek meewurey ngada Gazlavay. **9:49 9.49** Lev 2.13 **9:50 9.50** zazay: Lk 2.14; 1Tes 5.13; Rm 12.18 **10:1 10.1** Lk 9.51 **10:3 10.3-4** Mt 5.31 **10:6 10.6** MC 1.27 **10:7 10.7-8** MC 2.24

⁸ Ata cewete, a tɔram anda ndaw pal.” Anda kedɛ, ata ndɔhay cew saba, ama ata anda ndaw pal.

⁹ Yaw, cek masa Gazlavay ma cɔma sem anda kedɛ na, ndaw a da wunka ba.»

¹⁰ Fa dɔba ha, masa ata Yesu ta gula anɔa hay ma vɔham cay a way na, gula anɔa hay aa cɔfdamara saya da ray mebɔley ngwas.

¹¹ Yesu a lɔvtar: «Kwa waawa ma bɔla ngwas anɔa, fa dɔba ha, a ley mekele na, ndaw aha a key ngene, a ley vaw saw da palah, a key a kar cek maaya ba ngada ngwas anɔa mahura.

¹² Ngada ngusay may, da ngwas a mbɔkda zel e, a daw asi ndaw mekele na, ngwas aha a key ngene, a ley vaw saw da palah.»

*Yesu a pɔstar mey a bɔza hay
(Matiye 19.13-15; Luk 18.15-17)*

¹³ Ndɔhay a handamata bɔza hay fa Yesu amba a patar har a ray, a pɔstar mey. Ama gula anɔa hay a kamatar mey a ndɔhay a.

¹⁴ Masa Yesu ma nɔka cek masa gula anɔa hay ma kamara ha na, a mbafar ba, ta', aa guzltar, a lɔvtar: «Mbɔkdamatɔrwa bɔza hay nɔa samawa fa yah! Ka da tɔkmata ba, maja Gazlavay fa wey da ray ndɔhay masa anda bɔza hay a.

¹⁵ Ya fa lɔvkwatara farafara, da ndaw fa tɔba Bay Gazlavay nɔa wey da ray a anda bɔzey mecɔhe ma tɔba daa ba na, ndaw aha fa da mbɔzey a wuzlah ndɔhay masa Gazlavay ma wey da ray ata na, daa ba.»

¹⁶ Ta', a lata bɔza hay a, a har anɔa, a patar har a ray, a pɔstar mey.

Ndaw masa-zleley aa cɔfda Yesu da ray mehɔtey heter mendɔvey ba

(Matiye 19.16-30; Luk 18.18-30)

¹⁷ Masa Yesu fa da daw aa slam mekele na, gula daha a hawa fa anɔa, a regedey fa mey anɔa, ta', a lɔvar: «Bay adaw, ndaw masa maaya, ya da key amba ya hɔtey heter mendɔvey ba na, me?»

¹⁸ Yesu, ta', a lɔvar: «Ka zɔlya ndaw maaya na, maja me? Ndaw maaya na, Gazlavay pal taava anɔa.

¹⁹ Yaw, ka sɔra *mewey hay nɔa Gazlavay, ba diya? Ara mey ma lɔvey: “Ka da kɔfey ndaw vagay ba, ka da ley vaw saw da palah ba, ka da leley ba, ka da mbɔrzley a ray ndaw

ba, ka da təkney cek nga ndaw ba, natar ray ngada ata papakw ta mamakw.”»

²⁰ Ndaw a, a mbəfdara, a ləvar: «Bay adaw, dəga yah daa zariya adaw, ya ta zləbta mewey hay a ngene daa ba səlak.»

²¹ Yesu a nəka ndaw aha, a wufda, ta', a ləvar: «Cek pal ma mbəkaka daha nga key. Anda kedə, daw, həfdadata cek akah hay tabiya, wunkatara dala ha a masa-viya hay. Da ka ta ka la kəne na, ka da hətey zleley fa Gazlavay da vad. Masa kah ma vəldatara dala ha cay a masa-viya hay na, sawa, səpya.»

²² Masa ndaw a ma cənda mey a kedə la na, a ndərba dey, a daw, anğa ta meesəmey daa ba, maja anğa ta zleley ga, a wufey a vəlda a ndəhay mekele ba.

²³ Yesu a nəkta gula anğa hay da cakay a, ta', a ləvtar: «Anğa ta banay ga ngada ndəhay masa-zleley amba a təbmara Gazlavay nga wey da ray ata.»

²⁴ Gula anğa hay a rəzlam ga da ray mey a. Ama Yesu a ləvtar saya: «Bəz adaw hay, anğa ta banay ngada ndaw amba a təba Bay Gazlavay nga wey da ray a*».

²⁵ Ahaw, anğa ta banay ngada slagwama nga mbəzey taa vəged nga baatal. Ama anğa ta banay ga ma fəna saya ngada ndaw masa-zleley nga təba Bay Gazlavay nga wey da ray a.»

²⁶ Gula anğa hay a rəzlam ta gədan ta gədan, aa cəfdam vaw da wuzlah ata, a ləvam: «Da anda kedə na, ma da ləhey daa mebərey na, wa?»

²⁷ Da ray ngene, Yesu a nəkta, a ləvtar: «Meləhey daa mebərey na, ara cek masa ndaw-magədan ma gwa nga ka ba. Ama Gazlavay a gwa nga ləhda ndaw maja anğa na, a gwa a kata cek hay tabiya.»

²⁸ *Piyer a ləvar a Yesu: «Yaw, ala na, ya ta mbəkdamatərwa cek ala hay sem cəpa, amba ya səpmaka.»

²⁹ Yesu a mbəfdara, a ləvar: «Ya fa ləvkwar fara fara, da ndaw a mbəkderwa way anğa, da daa ba, a mbəkdatərwa məlmaha hay, dam-mamaha hay, mamaha, papaha, bəz anğa hay, da daa ba, a mbəkdatərwa ley anğa hay, amba a səpya, asaya amba a wuzey *Mey-maaya-mawiya na,

³⁰ ndaw aha, daa masa anğa da bəla na, a hətey cek hay a la ma fəna, a key dey temere a ray cek hay masa anğa ma mbəkdatərwa ha. Anda meləvey, a da hətey way hay,

10:19 10.19 Mab 20.12-16; Mew 24.14 **10:21 10.21** Mt 19.21 **10:22 10.22** Ps

62.11 * **10:24 10.24** Daa derewel hay mekele ta mey Gərek a ləvey: «anğa ta banay ngada ndaw ma vəlda ray anğa ngada zleley amba a təba Bay Gazlavay nga wey da ray a.» **10:27 10.27** Mt 19.26 **10:29 10.29-30** Mt 10.37

məlman hay, dam-maman hay, maman hay, bəza hay, ta ley hay mekele mekele saya. Asaya, ndəhay a sərdamara banay la ga maja mey adaw. Fa dəba nga mendəvey nga bəla na, a hətey heter mendəvey ba la saya.

³¹ Yaw, ndəhay ga ma təfmara mey adaw ngeeme, a da vəham fa dəba. Asaya, ndəhay masa fa dəba, a da diyam fa mey.»

Yesu aa guzley nga dey maakar da ray meməcey anga ta masləkdəwa anga

(Matiye 20.17-19; Luk 18.31-34)

³² Ata Yesu ta ndəhay mekele, ata daa cəved ma daw a *Jeruzelem. Yesu fa daw fa mey nga gula anga hay. Gula anga hay a, ray ata fa həbey maja a sərmara Yesu a da sərey banay da Jeruzelem, ama anga fa daw a Jeruzelem e cənga. Asaya, ndəhay mekele masa ma səpmatar wurzay na, fa diyam ta mandərzay daa dey. Yesu a ngəлта gula anga hay kuraw a ray a cew saya ta cakay, aa guzltar da ray cek masa ma da hətfar.

³³ A ləvtar: «Ehe, aləkwa fa nakwa a Jeruzelem. Fetede na, yah, *Bəz nga Ndaw, a da vəldamaya a har *bay-ray hay nga ndəhay ma ka kwakwas ta *ndəhay maa sərkada kwakwas nga Mawiz. A da kamaya sariya nga kədfey vagay, a da vəldamaya a har ndəhay ma təba mey nga Gazlavay ba.

³⁴ Ndəhay a na, aa sanğəram la a ray adaw, a təfmaya meesleḅ la aa dey, a slədmaya la ta laway. Fa dəba ha, a kədmaya la vagay. Nga đar maakar a na, ya sləkdəwa la daa meməcey.»

Ata Jak ta Jan a səpam nga key mahura

(Matiye 20.20-28)

³⁵ Fa dəba ha, *gula hay nga Yesu masa bəza hay nga Zebede, ata *Jak ta *Jan, a samawa fa Yesu, a ləvmar: «Bay ala, ya wudam ka kandar cek masa ala ma daa cəfdamaka.»

³⁶ Yesu a mbədfatara, a ləvtar: «Ka wudam ya kakwar na, me?»

³⁷ A mbədfamara, a ləvmar: «Ya wudam ta pas masa kah ma da zəma bay akah na, pəskandar mey amba ndaw pal a njeý ta har-zəmay akah, ndaw lanğar a njeý ta har-gula akah.»

³⁸ Maja ngeene, Yesu a ləvtar: «Ka sərmara cek masa akwar maa cəfdam ba. Ka gwamara nga səram banay la anda yah ma da səra daw? Da daa ba, ka gwamara nga bəsmara banay la anda yah ma da bəsa daw?»

³⁹ A mbæddamara, a løvmar: «Ahaw, ya gwamara.»

Yesu a løvtar: «Ahaw, ka sèram banay la anda yah ma da sèra. Ka bèsmara banay la anda yah ma da bèsa.

⁴⁰ Ama nga njeý ta har-zəmay adaw, da daa ba, ta har-gula adaw na, ara yah ma da dəsla mey a ngene ba. Ara Gazlavay ma da diyta slam hay a ngene ngada ndəhay masa aa ma walata.»

⁴¹ Fa dəba ha, masa gula anga hay siya kuraw ma cəndamara mey a na, a cam mevel a ray ata Jak ta Jan.

⁴² Da ray ngene, Yesu a zəлта tabiya, a løvtar: «Ka sərmara da wuzlah ndəhay da bəla keđe na, bay hay daha. Bay hay a na, fa wam da ray ndəhay ta gədan, asaya, mahura hay mekele fa wam da ray ndəhay ta cəved e ba.

⁴³ Ama da wuzlah akwar na, a da key kəne ba. Yaw, da ndaw da wuzlah akwar a wudəy nga key mahura na, si a tərey ndaw ma ka sləra akwar.

⁴⁴ Asaya, da ndaw da wuzlah akwar a wudəy nga key *bay-ray na, si a tərey anda beke nga ndəhay cəpa.

⁴⁵ Maja, yah, *Bəz nga Ndaw, ya sawa a bəla na, amba ndəhay a kamaya sləra ba. Ama ya sawa na, amba ya katar sləra a ndəhay, ya vəlda heter adaw nga ləhey ndəhay ga daa mebərey.»

*Yesu a wurey dey nga ndaw-wulaf
(Matiye 20.29-34; Luk 18.35-43)*

⁴⁶ Ata Yesu ta gula anga hay a wusam a Jerikwaw, a mbəzam a slala ha. Fa dəba ha, masa Yesu fa bam da slala ha ta gula anga hay leŋ ndəhay ga heyey na, ndaw-wulaf daha mezəley Bartime, ara bəzey nga ndaw mezəley Time. Ndaw-wulaf a na, manjakaya fetede, fa rəkey da mey-cəved.

⁴⁷ Masa anga ma cənda ara Yesu, ndaw *Nezeret, ma daw taa cəved e na, a wudəy, a ləvey: «Yesu, *Bəzey nga Davit, ambahw sərfaya dey-ceceh, may taw!»

⁴⁸ Ndəhay ga heyey a kamar mey, a løvmar nga njeý teete, ama ndaw-wulaf a, a wudəy ta gədan cənga, a ləvey: «Bəzey nga Davit, ambahw sərfaya dey-ceceh, may taw!»

⁴⁹ Yesu ta', a lecey, a løvtar a ndəhay da cakay a: «Zəlmərwa ndaw aha.»

Ta', ndəhay a, a zəlmərwa, a løvmar: «Dəka mevel, lecey, Yesu fa zəlka.»

⁵⁰ Anda keđe, aa zakada gwedeere anga, pərta! a lecey, a daw fa Yesu.

⁵¹ Ta', Yesu aa cəfda, a ləvar: «Ka wudəy ya kaka na, me?»

Ndaw-wulaf a, a mbəɸɸara, a ləvar: «Bay aɸaw, ya wuɸey ka wuryawa dey aɸaw amba ya hətar dey cəŋga.»

⁵² Yesu a ləvar: «Dey akah ta wurey cay, maja kah ma paya ŋga ndaw akah fara fara. Wure keɸe, daw.»

Wure wure ŋgene, dey aŋga ta', a wurey, a hətar dey dəba. Ta', a səpa Yesu daa madaw aŋga.

11

*Yesu a daw a Jeruzelem anda bay
(Matiye 21.1-11; Luk 19.28-40; Jan 12.12-19)*

¹ Ata Yesu ta gula aŋga hay fa diyam aa berney ŋga *Jeruzelem. Masa ata gweegwe ta berney a na, a wusam gweegwe ta slala Betfaje leŋ ta slala Betani da rav Aŋwa ŋga *Awliviye. Ta', Yesu, a slərey gula aŋga hay cew teesed ŋgada slala ha.

² A ləvtar: «Diyam a slala fa mey akwar katay. Da akwar ma wusam la a slala ha na, ka hətfam bəz-zəŋgwaw majəwkaya la fetede masa kwa ndaw ta təpey a ray a daa ba araŋ. Pəskamərwa, handamərwa feɸe.

³ Da ndaw aa cəɸɸakwar, a ləvey ka pəskamara zəŋgwaw a ŋga key me na, ka mbəɸɸamara, ka ləvmar: “Bay Mahura a wuɸey. A da vəhdakawa wure keɸe.”»

⁴ Da ray ŋgene, a diyam, a hətfamar bəz-zəŋgwaw a, majəwkaya da mey-cəved gweegwe ta mey-mbew. A pəskamərwa.

⁵ Ndəhay nekəɸey da wuzlah ndəhay fetede daha aa cəɸɸamata, a ləvmatar: «Ka pəskamara zəŋgwaw a na, keme?»

⁶ A mbəɸɸamatara, a ləvmatar: «Bay Mahura a wuɸey. A da vəhdakwara wure keɸe.» Ta', ndəhay a, a mbəɸɸamata ŋga diyam ta zəŋgwaw a.

⁷ A handamərwa zəŋgwaw a heyey a Yesu. A ciymata zana ata hay a ray zəŋgwaw a. Ta', Yesu a təpey a ray a.

⁸ Ndəhay ga malacatakaya daa cəved ŋga cey ray ta Yesu, a ciyam zana ata hay aa cəved e ŋga həslmar ray. Ndəhay mekele a diyam a bəzlhamawa mey-har ŋga wudez hay da ley, a pamata aa cəved e may.

⁹ Ndəhay fa diyam fa mey aŋga, ndəhay mekele hay fa diyam fa dəba aŋga. Ata tabiya fa wudam, a ləvam: «*Hawzana! Həlmakwa Bay Gazlavay! Anja Bay Gazlavay ŋga pəsar mey a ndaw masa aa ma slərdərwa ta mezəley aŋga.

¹⁰ Anja Bay Gazlavay nga pəsar mey a bay ma da wey aa slam a nga Bay *Davit, papan nga papa aləkwa zleezle. Həlmakwa Bay Gazlavay da vad!»

¹¹ Ta', Yesu a mbəzey aa berney nga Jeruzelem. A daw aa *Way-mekey-kwakwas nga Gazlavay. A sanjalata cek hay cəpa da hwaɖ a. Ta', a diyam ta gula anğa hay kuraw a ray a cew a Betani maja gweegwe tavaɖ cay.

*Mey da ray wudez manjar babəza
(Matiye 21.18-19)*

¹² Pepərek e, ata Yesu ta gula anğa hay a sləkɖam da Betani heyey. Daa nğene, may fa car a Yesu.

¹³ Masa ata fa diyam daa cəved na, Yesu a hətəy wudez da dərən, wudez e maɖaɖakaya. Ta', a daw a cakay a amba a nəka da babəza fa wudez e daha kwa. Ama, a hətəy fa wudez e na, si gwaslaf gway, babəza fa vəɖa daa ba, maja ara kiya meyey babəza ba.

¹⁴ Da ray nğene, Yesu a nəsa wudez e, a ləvey: «Anja wudez keɖe nga yey babəza saba nga sərmataw.»

Masa anğa maa guzley anda keɖe na, gula anğa hay ta cəndamara mey a la.

Yesu a bəлта ndəhay daa Way-mekey-kwakwas nga Gazlavay

(Matiye 21.12-17; Luk 19.45-48; Jan 2.13-22)

¹⁵ Ata Yesu ta gula anğa hay, a wusmawa a *Jeruzelem. Yesu a mbəzey aa papalah nga *Way-mekey-kwakwas nga Gazlavay. Fetede na, ndəhay fa kam luma. Maja nğene, ta', a bəлта ndəhay ma həɖkadam cek hay leŋ ndəhay ma həɖkam cek hay. A bəлта slam hay nga ndəhay ma mbəɖa dala ta janğa hay nga ndəhay ma həɖkadam makurgwadakw hay.

¹⁶ Asaya, Yesu a vəley cəved kwa nğada waawa nga daw ta cek hay wura wura taa papalah nga Way-mekey-kwakwas nga Gazlavay a ba.

¹⁷ Da ray nğene, a sasərkadata ndəhay, a ləvey: «Mawu-zlalakaya daa ɖerewel nga Gazlavay, Gazlavay a ləvey: "Way aɖaw na, ara way amba ndəhay da bəлта tabiya a dərmaya danğay da hwaɖ a." Ama akwar na, ka tərdamara way a keɖe nga slam nga mayal hay!»

¹⁸ Masa *bay-ray hay nga ndəhay ma ka kwakwas nga Gazlavay ta *ndəhay maa sərkada kwakwas nga Mawiz ma cəndamara mey masa Yesu ma kada keɖe na, a səpam cəved nga kəɖmara vagay maja ata fa zluram ta anğa. A

zluram na, maja ndəhay ga fa rəzlam da ray mey masa anğa maa sərkadatara.

¹⁹ Masa tavad ta key cay na, ta', Yesu a bamawa ta gula anğa hay daa berney nğa Jeruzelem e.

*Mey da ray wudez masa Yesu ma nəsa heyey
(Matiye 21.20-22)*

²⁰ Pepərek e, masa ata Yesu ta gula anğa hay fa diyam taa cəved ma daw a *Jeruzelem na, a hətmar wudez manjar babəza heyey ta kweley sem haa kasl fa slaslalay a.

²¹ *Piyer a sərfaada masa Yesu ma nəsa wudez e heyey, ta', a ləvar a Yesu: «Bay Mahura, nəka wudez masa kah ma ləvey nğa yey babəza saba heyey na, ta kweley sem.»

²² Da ray nğene, Yesu a ləvtar: «Pamara Gazlavay nğa ndaw akwar fara fara mandaw mandaw.

²³ Ya fa ləvkwar fara fara, ndaw a gwa a ləvar a anğwa mahura: “Sləkdey la fede, kəzley aa bəlay.” Da ndaw aha anğa ta mewulkey cew cew daa ba, asaya, da anğa fa wulkey fara fara daa mevel anğa Gazlavay a da kara cek masa anğa maa cəfda na, Gazlavay a kara la.

²⁴ Maja nğene, ya fa ləvkwar, da akwar fa dərəm dangay a Gazlavay nğaa cəfdey cek, asaya, da akwar fa wulkam daa mevel akwar Gazlavay a vəldakwara cek aha la na, Gazlavay a vəldakwara cek aha la, kwa kaa cəfdam meeme daa medərey-dangay akwar.

²⁵ Yaw, da akwar fa dərəm dangay a Gazlavay, mevel akwar fa cey a ray ndaw na, mbəkdamara mebərey nğa ndaw aha, amba Papakw akwar masa da vad a mbəkdakwara mebərey akwar may. [

²⁶ Ama da ka mbəkdamatara mebərey nğa ndəhay ba na, Papakw akwar masa da vad a mbəkdakwara mebərey akwar daa ba may.]»

*Ma vəldara gədan a Yesu na, wa?
(Matiye 21.23-27; Luk 20.1-8)*

²⁷ Ata Yesu ta gula anğa hay a vəhmawa a *Jeruzelem saya. Masa Yesu fa pəkey daa *Way-mekey-kwakwas nğa Gazlavay na, *bay-ray hay nğa ndəhay ma ka kwakwas, ta *ndəhay maa sərkada kwakwas nğa Mawiz, leŋ mahura hay nğa *Jəwif hay a diyam fa anğa.

²⁸ Aa cəfdamara, a ləvmar: «Ma ləvka nğa kata cek hay a kefe na, wa? Ma vəlka cəved nğa kata na, wa?»

²⁹ Ta', Yesu a mbəddatara, a ləvtar: «Amba yaa cəfdakwar mey pal. Da akwar ta mbəfdamiwa mey a la

na, ya kadakwara ndaw ma wɛldiwa cɛvedŋ nga kata cek hay a kedfe la may.

³⁰ Yaw, ma slɛrdɛrwa *Jan-Baptis nga katar *baptem a ndɛhay na, wa? Gazlavay daw, da daa ba, ndɛhay daw? Mbɛddamiwa cey!»

³¹ Da ray ngene, ndɛhay a, a slam yawa da wuzlah ata, a lɛvam: «Ya da mbɛddakwa aa mey anŋa ha na, kwara? Da ya lɛvkwa: “Ara Gazlavay ma slɛrdɛrwa” na, a da mbɛddandakwara, a lɛvey: “Kaa ka tɛbmara mey nga Jan-Baptis a ba na, maja me?”

³² Ama da ya lɛvkwa: “Ara ndɛhay ma slɛrdamɛrwa” na, ndɛhay makustakaya da cakay alɛkwa fa da tɛbmara daa ba.»

Yaw, mahura hay a na, fa zluram ta ndɛhay, maja ata cɛpa a wulkam Jan-Baptis ara *ndaw ma tɛla mey nga Gazlavay fara fara.

³³ Da ray ngene, a mbɛddamara a Yesu, a lɛvmar: «Ya sɛrmara ba.»

Ta', Yesu a mbɛddatara, a lɛvtar: «Yaw, da anda kedfe na, ya fa da kadakwara ndaw ma wɛlya cɛvedŋ nga kata cek hay a kedfe na, daa ba may.»

12

*Mey-menŋey da ray ndɛhay ma tɛbmara Yesu ba
(Matiye 21.33-46; Luk 20.9-19)*

¹ Fa dɛba ha, Yesu a ngatar mey, a lɛvtar:

«Ndaw daha a key jerne nga wudez mezɛmey. Ta', a zɛba jerne he tabiya. A diyey slam nga dɛcey babɛza nga wudez e. A lɛmey way magɛlkaya maazɛma ngada ndaw ma jɛda jerne he. Fa dɛba ha, a hɛley ndɛhay aa jerne anŋa ha nga key slɛra da hwad a. Ta', a daw aa slam dɛrɛŋ.

² Masa kiya menŋɛley babɛza nga wudez e ta wuswa cay na, a slɛrey gula anŋa pal da wuzlah madɛrlam anŋa hay aa jerne he amba a tɛbra babɛza maala nga anŋa.

³ Ama ndɛhay ma ka slɛra daa jerne he a kɛr zamara madɛrlam a, a slɛdmara, a bɛlmara a way, ta har ba' kɛne.

⁴ Ta', bay nga jerne he, a slɛrey madɛrlam anŋa mekele fa ata. Ndɛhay a, ta', a slɛnmar ray, a cɛdmara. Ta', a bɛlmara.

⁵ Fa dɛba ha, bay nga jerne he, a slɛrey madɛrlam anŋa mekele saya. Ndɛhay a, a kɛdmara vagay. Anda kedfe, a slɛrey madɛrlam anŋa hay mekele mekele, ama ndɛhay a, a slɛdmata siya hay, asaya, a kɛdmata siya hay vagay.

⁶ Ndaw pal mambɛkakaya nga slɛrey na, ara bɛzey anŋa mawudkaya kalah. A slɛrey nga madagway-dakw na, bɛzey

aŋga ha. A wulkey daa ray aŋga, a løyey: "Fara fara a namar ray la a bøyey adaw."

⁷ Ama, masa bøyey a fa daw gweegwe ta jerne he na, ndøhay ma ka sløra ha a høtmar, aa guzlam da wuzlah ata, a løyam: "Ehe, ndaw ma sawa katay na, ara bøyey ma da wa jerne he. Nakwa, kødka vagay, amba jerne he a njeý ŋgada aløkwa."

⁸ Da ray ŋgene, a diyam, kaw! a kørzamara bøyey a, a kødmarara vagay, ba! a køzlamara vagay a, a døba jerne he.»

⁹ Yesu aa cøfdata, a løyey: «Akwar na, ka wulkam bay ŋga jerne he, a da key na, kwara? Ehe, ya fa løykwara, bay ŋga jerne he, a sawa la, a kødta ndøhay ma ka sløra ha la vagay, a vølda jerne he la, a har ndøhay mekele.

¹⁰ Akwar ta jaŋgamara mey ŋga Gazlavay la, ba diya? Mey masa ma løyey:

"Aŋgwa melømey way masa ndøhay ma løma way ma køzlamara ta cakay na, aŋgwa ha na, ta tøyey sem ŋga aŋgwa maaya melømey way ma fønta siya hay jak.

¹¹ Ŋgene na, ara Bay Gazlavay ma ka cek aha, ara cek maaya fa dey aløkwa."»

¹² Mahura hay ŋga *Jøwif hay a heyey a søpam cøved ŋga kørzamara Yesu, maja a sørmara Yesu aa guzley mey-meyŋey na, da ray ata. Ama ata fa zluram ta ndøhay fetede. Da ray ŋgene, mahura hay a, a mbøkdamara, ta', a diyam.

Ndøhay mahura hay a jadamara Yesu da ray meyøley budaw
(Matiye 22.15-22; Luk 20.20-26)

¹³ Fa døba ha, mahura ŋga *Jøwif hay a sløram *Fariza hay ta ndøhay ŋga Bay *Herawt fa Yesu. A wudam a jadamara amba aa guzley mey maaya ba.

¹⁴ A diyam, a løyamar: «Bay ala, ya sørmara kah na, ndaw ma mbørzley ba. Masa kah faa guzley na, ka zlurey ta ndaw ba, asaya, ka nøkta ndøhay cøpa letek fa mey akah. Ka faa sørkadata ndøhay ŋga njam anda Gazlavay ma wudfey fara fara. Yaw, kwakwas aløkwa a vøley cøved ŋga pøley budaw a bay mahura *Sezere daw? Maaya na, ya pølmara budaw a daw, ya pølmara ba daw?»

¹⁵ Ama Yesu a søra, ndøhay a, aa guzlam ta neneh cew. Ta', a løytar: «Ka wudam ŋga jadamaya na, maja me? Lamaya dala ha pal amba ya nøka.»

¹⁶ Ta', a lamar dala ha. Yesu aa cøfdata, a løytar: «Fa dala ha kedø na, ara dey ŋga wa? Ara meyøley ŋga wa?»

A mbəfdamara, a ləvmar: «Ara ŋga Sezere, bay mahura ŋga Rawm.»

¹⁷ Ta', Yesu a ləvtar: «Cek masa ŋga Sezere na, veldamara a Sezere he. Cek masa ŋga Gazlavay na, veldamara a Gazlavay a.»

Anda kefe, ndəhay a, a rəzlam ga da ray mey ŋga Yesu a.

Saduse hay a jadamara Yesu da ray masləkdawa daa meməcey

(Matiye 22.23-33; Luk 20.27-40)

¹⁸ Ndəhay *Saduse hay na, ara ndəhay ma wulkam, ma ləvam da ndaw ta məcəy sem na, fa da sləkdawa daa meməcey daa ba. Ndəhay da wuzlah Saduse hay a, a diyam fa Yesu, aa cəfdamara, a ləvmar:

¹⁹ «Bay ala, zleezle *Mawiz ta wuzlalandakwar kwakwas la, a ləvey: “Da ndaw məlmaha ta məcəy sem na, da ŋgwas ŋga ndaw ma məcəy a, ta yawa bəza hay daa ba na, si məlmaha a la ŋgwas-vagay a, amba a yamawa bəza hay ŋgada məlmaha maməckaya ha.”

²⁰ Yaw, məlman hay maasala daha, ata ŋгаа man, ŋгаа pan. Məlma ata mahura, leŋ! a ley ŋgwas. Fa dəba ha, ndaw aha pam! a məcəy ta hətey bəzey daa ba.

²¹ Da ray ŋgene, mambaray a, leŋ! a la ŋgwas-vagay a, anga pam! a məcəy saya ta hətey bəzey daa ba may. Fa dəba ha, məlma ata mamaakar a, a la ŋgwas-vagay a, ama pam! a məcəy ta hətey bəzey ta ŋgwas aha daa ba cəŋga.

²² Anda kefe, ata maasala ata cəpa, ta lamara ŋgwas aha la, ta məcām sem cəpa, ta mbəkam bəza hay daa ba. Fa dəba ha ata ma məcām la cəpa ata na, ŋgwas aha pam! a məcəy may.

²³ Anda kefe, ta pas masləkdawa ŋga ndəhay daa meməcey na, ŋgwas aha, a da key na, ŋgwas ŋga wa? Maja ata maasala ata cəpa ta lamara la ŋga ŋgwas ata.»

²⁴ Yesu a mbəfdatara, a ləvtar: «Akwar faa zəfdamara ray akwar anda kefe na, maja me? Ara maja ka sərmara mey ŋga Gazlavay ba ta maja ka sərmara gədan anga ba.

²⁵ Yaw, daa masləkdawa ŋga ndəhay daa meməcey na, zel hay fa da lam ŋgusay daa saba, ŋgusay fa da njam ta zel hay daa saba, ama a da njam anda maslan hay ŋga Gazlavay da vad.

²⁶ Ya wufey yaa sərkadakwar da ray masləkdawa ŋga ndəhay daa meməcey. Ka ta janɣamara daa dərəwel masa Mawiz ma wuzlala la, ba diya? Dərəwel e na, aa guzley da ray kusaf masa awaw megədey da ray a.

Fetede na, Gazlavay a lɔvar a Mawiz: “Yah, Gazlavay masa *Abəraham, *Izak, leŋ *Jakwap ma namar ray.”»

²⁷ Yesu aa guzley saya, a lɔvey: «Gazlavay na, ara Gazlavay ŋga ndəhay ta dey, ba na, ara Gazlavay ŋga ndəhay maməctakaya ba. Akwar Saduse hay, ka ta zləbmara mey a sem kalah!»

Mewey ŋga Gazlavay masa mahura na, wura?
(Matiye 22.34-40; Luk 10.25-28)

²⁸ Masa ndəhay *Saduse hay heyey fa kam yawa ta Yesu na, ndaw da wuzlah *ndəhay maa sərkada kwakwas ŋga Mawiz daha, a wusey a cakay ata, a cənda yawa ata ha. A nəka na, Yesu ta mbəɸdatara mey a maaya maaya la. Da ray ŋgene, aa cəɸda Yesu, a lɔvar: «*Mewey mahura ma fənta siya hay na, wura?»

²⁹⁻³⁰ Yesu a mbəɸdara, a lɔvar: «Mewey mahura ma fənta siya hay a na, ara mey ma lɔvey: “Jəkam sləmay, akwar ndəhay *Israyel hay, Bay Gazlavay masa aləkwa ma nakwar ray na, anɟa pal, Bay aləkwa mahura. Wudmara Gazlavay, Bay akwar, ta mevel akwar cəpa, ta mesəfney akwar cəpa, ta leŋgesl akwar cəpa, ta gədaŋ akwar cəpa.” * Mewey masa mahura na, ara mey kedə.

³¹ Yaw, *mewey mahura ŋga dey cew e daha saya, mewey a, a lɔvey: “Wudə meseembew akah anda kah ma wudə ray akah.” Mewey hay masa ma fənmata cew hay kedə na, daa ba.»

³² Ndaw maa sərkada kwakwas heyey a lɔvar: «Mey akah maaya, Bay adaw! Mey masa kah maa guzlda kedə na, ara mey fara fara. Gazlavay, anɟa pal taava anɟa, Gazlavay mekele daa ba.

³³ Si ndaw a wudə Gazlavay ta mevel anɟa cəpa, ta leŋgesl anɟa cəpa, ta gədaŋ anɟa cəpa. Asaya, si a wudə meseembew anɟa anda anɟa ma wudə ray anɟa. Ndaw ma səpta mewey hay a kedə na, a mbafar a Gazlavay a fəna mevəley cek hay ta mehərey cek hay ŋgada anɟa.»

³⁴ Masa Yesu ma nəka ndaw aha ta mbəɸdara mey a la ta leŋgesl maaya na, ta', a lɔvar: «Mewulkey akah ŋgene maaya, gweegwe ka təba amba Gazlavay a wey da ray akah.»

Fa dəba ha, kwa waawa ta gəmey ŋгаа cəɸdey mey fa Yesu a daa saba, maja a zluram fa mey anɟa masa anɟa ma da mbəɸdatara.

12:26 12.26 Mab 3.2, 6 * **12:29-30 12.29-30** Yesu a wuztar kedə na, mezley ŋga medərey-dangay masa Jəwif hay ma kamara taa pərek taa kwad. A zəlmara medərey-dangay a ta mey ata, *Sema*. Nəka Mewey hay 6.4-5. **12:29-30 12.29-30** Mew 6.4-5 **12:31 12.31** Lev 19.18; Mt 22.39 **12:32 12.32** Lk 20.39 **12:33 12.33** 1Sam 15.22; Aw 6.6 **12:34 12.34** Mt 22.46; Lk 20.40

Kəriste, anga bay nga Davit na, kwara?
(*Matiye 22.41-46; Luk 20.41-44*)

³⁵ Masa Yesu faa sərkadata ndəhay daa *Way-mekey-kwakwas nga Gazlavay na, ta', aa cəfdəta, a ləvey: «*Ndəhay maa sərkada kwakwas nga Mawiz a ləvam *Kəriste *ndaw masa Gazlavay ma wala nga ləhdata ndəhay na, ara bəzey da hwaɗ Bay *Davit na, kwara?»

³⁶ Ta fa gədaŋ nga *Mesəfney nga Gazlavay na, Davit ta ləvey la:

“Bay Gazlavay a ləvar a Bay aɗaw Mahura:

Sawa, njeɗ ta har-zəmay aɗaw

amba ya wakwa da ray ndəhay

haa ta pas masa yah ma da pata masa-gəra akah hay
asi salay akah.”

³⁷ Davit ta ray anga, a zəla Kəriste “Bay Mahura” na, kaa wara Kəriste he ara bəzey da hwaɗ Davit saya na, kwara?»

(*Matiye 23.1-36; Luk 20.45-47*)

Ndəhay ga fa jəkam sləmay fa meesərkey nga Yesu ta meesəmey.

³⁸ Daa meesərkey a na, Yesu a ləvtar a ndəhay makus-takaya ha: «Wam vaw fa *ndəhay maa sərkada kwakwas nga Mawiz. A wuɗam mepəkey ta dawura hay fa vaw nga zlepeɗ. A wuɗam ndəhay a camatar har ta meney ray fa mey nga ndəhay tabiya.

³⁹ Daa *way-mewuzey-mey nga Gazlavay na, a səpam slam-menjeɗ fa mey nga ndəhay amba ndəhay tabiya a hətmatar. Ta pas gwagway na, a səpam slam-menjeɗ maaya.

⁴⁰ Asaya, fa təbmatara cek hay nga ŋgwas-vagay hay tabiya. A njam daa medərey-dangay ga, aa guzlam ga amba ndəhay a ləvam ata maaya. Ya fa ləvkwar, ata na, Gazlavay a sərdata banay la, ma fəna nga ndəhay mekele!»

Mey da ray ŋgwas-vagay masa-viya ma vəley cek a Gazlavay

(*Luk 21.1-4*)

⁴¹ Ta', Yesu a daw, a njeɗ a cakay slam mecekeley dala daa *Way-mekey-kwakwas nga Gazlavay. Anga fa nəkta ndəhay fetede ma pamara dala aa cek mecekeley dala. Ndəhay masa-zleley hay fa vəlam dala ga.

⁴² Ŋgwas-vagay masa-viya daha, a sawa, a kwiyeɗ siseɗ siseɗ cew aa cek aha may. Dala anga ha, mekele daa ba.

⁴³ Da ray ŋgene, Yesu a zəлта gula anga hay, a ləvtar: «Ya fa ləvkwar fara fara, ŋgwas-vagay masa-viya keɗe na,

ta pey dala la aa cek mecekeley dala ma fəna nga ndəhay cəpa.

⁴⁴ Ya ləvkwar anda keđe na, maja ndəhay siya hay, a vəlam dala nekədey daa dey zleley ata hay da way ga. Ama ngwas-vagay keđe, ta mərga anga cəpa, a vəlda zleley anga tabiya, masa anga ma da hədkey cek mezəmey ta anga.»

13

Yesu aa guzley da ray Way-mekey-kwakwas nga Gazlavay ma da bəzley

(Matiye 24.1, 2; Luk 21.5, 6)

¹ Daa masa Yesu fa bawa daa *Way-mekey-kwakwas nga Gazlavay na, gula anga pal aa cəfda, a ləvar: «Bay adaw, nəka Way-mekey-kwakwas nga Gazlavay keđe cey! Səkway nga way wura, maləmkaya maaya ta anğwa ma mbey anda keđe!»

² Yesu a mbəddara, a ləvar: «Ka fa hətar way a maləmkaya maaya masa mahura keđe, ba diya? Way a cəpa na, a bəzlmara la, kwa anğwa pal fa da mbəkey da ray cəla daa ba.»

(Matiye 24.3-14; Luk 21.7-19)

³ Fa dəba ha, Yesu a daw aa Anğwa nga *Awliyiye, cəkwam! a njeý dey pəla! ngada fa *Way-mekey-kwakwas nga Gazlavay heyey. Ata *Piyer, *Jak, *Jan, leñ *Andəre, ata taava ata da cakay Yesu a. Ta', aa cəfdamara, a ləvmar:

⁴ «Wuzdandara cey, cek aha a da key na, ta vara? Ya da səmra dər a ta wuswa cay na, fa me?»

⁵ Ta', Yesu a kətata, a ləvtar: «Wam vaw fa ndəhay ma da fəcmakwar.

⁶ Səmra, ndəhay ga a samawa la ta mezəley adaw, kwa waawa a da ləvey anga na, *Kəriste, *ndaw masa Gazlavay ma wala nga ləhdata ndəhay. A təknam ndəhay la ga.

⁷ Ta pas masa akwar ma da cənam vərəm hay gweegwe ta akwar, asaya, ta pas masa akwar ma da cənam labara nga vərəm hay masa da dərəñ na, ka da zluram ba, maja si cek hay a ngene, a kam la teesəf dğay. Ama ara mendəvey nga bəla ba aran.

⁸ Hwayak lanğar a da key vərəm ta hwayak lanğar, bay lanğar a da key həma a ray bay lanğar. Daa hwayak hay mekele mekele, hwiyak a wusey la. May a key la da bəla. Cek hay a na, a kam la anda hwađ ma zlar nga car ngada ngwas ma da yey, anda meləvey, ara mendəvey nga bəla ba aran, ama ara mezley a.»

⁹ Yesu a ləvtar saya: «Ama akwar na, wam vaw! Ndəhay a handamakwar la fa mey nga ndəhay ma ka sariya, a slədmakwar la daa *way-mewuzey-mey nga Gazlavay. A handamakwar la fa mey nga ndəhay mahura hay leŋ fa mey nga bay hay, maja akwar ndəhay adaw hay. Anda keđe, ka da kam sede da ray adaw fa mey ata.

¹⁰ Yaw, ŋgeeme na, si ndəhay ma təba mey adaw a wuzdamara *Mey-maaya-mawiya da ray adaw a ndəhay da bəla cəpa la dāgay, wara cay bəla a ndəvey.

¹¹ Pas masa ata ma da kərzamakwar nga hendey aa sariya na, ka da zluram da ray mey masa akwar ma daa guzlam ba. Ama, gwaguzlam mey masa Gazlavay ma da vəldakwara ta pas a ŋgene, maja mey a na, a da sawa ta fa akwar ba, ama ta fa *Mesəfney nga Gazlavay.

¹² Ndaw a da vəlda məlmaha amba a kədmara vagay. Papan hay a kamara la kəne ŋgada bəza ata hay may. Bəza hay a mbədmatar dəba la a papa ata hay leŋ a mama ata hay, a vəldamata a ndəhay amba a kədmata vagay may.

¹³ Ndəhay tabiya a da ŋgəldamakwar ba, maja yah. Ama ndaw ma bəsa banay a haa mendəvey a na, Gazlavay a ləhda la.»

*Mey da ray banay ma da sawa a ray ndəhay da Jude
(Matiye 24.15-28; Luk 21.20-24)*

¹⁴ Yesu aa guzley saya, a ləvey: «Da dər a ta wuswa cay na, ka hətmar ndaw malamba ma nəsa cek la. Ara ndaw masa Gazlavay ma wudəy nga hətər fa dey ba. Ndaw aha, a da njeŋ na, aa slam aŋga menjeŋ ba. (Akwar masa ma jaŋgamara mey a keđe na, si ka pam leŋgesl fa mey a.) Ta pas ŋgene, si ndəhay daa hwayak nga *Jude a hwam nga bəwa a aŋgwa.

¹⁵ Kwa ndaw masa fa məskey vaw daa ambaw na, fa da mbəzey a way nga lawa cek daa ba.

¹⁶ Kwa ndaw aŋga da ley na, fa da vəhwa a way nga ley zana daa ba.

¹⁷ Daa dər hay a ŋgene, banay a sawa la a ray ŋgusay ta hwad ta a ray ŋgusay masa ta bəza hay da har.

¹⁸ Dəram daŋgay a Gazlavay, cacəfdamara amba cek hay a, a wusmawa ta piya ba *.

¹⁹ Daa dər hay a ŋgene, banay a sawa la ga a ray ndəhay. Dəga Gazlavay ma ləma bəla haa wure keđe ndaw ta sərey

13:9 13.9-13 Mt 10.17-22; Jan 16.1-4 **13:11 13.11** Lk 12.11-12 **13:12 13.12**
Mi 7.6; Mt 10.35; Lk 12.52-53 **13:13 13.13** Jan 15.21; CWJ 13.10 **13:14 13.14**
Dan 9.27 **13:15 13.15-16** Lk 17.31 * **13:18 13.18** cacəfdamara amba cek
hay a, a wusmawa ta piya ba: a ləvey anda keđe maja ta piya na, mepəkey ta
banay.

banay anda ngene daa ba arañ. Asaya, banay fa da sawa ma fëna ngene daa saba.

²⁰ Da Bay Gazlavay ta ngöwa siya nga ðar nga banay a daa ba na, anja kwa ndaw pal fa da mbökey ta dey daa ba. Ama a ngöwa siya nga ðar a na, maja ndöhay masa anja ma walata ngada anja.

²¹ Da ray ngene, da ndaw a lövkwar: “*Köriste, anja keðe”, da daa ba “Nökmara, anja katay” na, ka da töbmara mey anja ba.

²² Ya lövkwar anda keðe na, maja ndöhay ma pamara ray ata nga Köriste, asaya, ndöhay ma pamara ray ata nga ndöhay ma töla mey hay nga Gazlavay na, a samawa la. A kam maazla hay la nga wuzðerwa göðan ata amba a töknam ndöhay. Da a gwamara na, a töknam kwa ndöhay masa Gazlavay ma walata sem nga ndöhay anja hay may.

²³ Akwar na, wam vaw, maja ya ta pakwar lenjesl cay da ray cek hay a çöpa.»

*Mey da ray ma vöhma nga Böz nga Ndaw
(Matiye 24.29-31; Luk 21.25-28)*

²⁴ Yesu a lövey saya: «Ama daa ðar hay a ngene, fa döba nga mesörey banay nga ndöhay na, pas a töbzley la,

kiya fa da wedey daa saba,

²⁵ wurzla hay a közlmawa la da vad a hwayak, cek hay çöpa da gazlavay da vad a wusam la.

²⁶ Fa döba ha, ndöhay a da hötmaya, yah, *Böz nga Ndaw, fa sawa daa mekwtene ta göðan mahura lenj ta mewedey nga Bay Gazlavay.

²⁷ Yaw, Gazlavay a da slördatöwa maslan anja hay amba a diyam aa slam hay tabiya da böla, a kusmatöwa ndöhay masa anja ma walata nga ndöhay anja hay.

(Matiye 24.32-35; Luk 21.29-33)

²⁸ «Jökam slömay maaya maaya fa mey masa yah ma da wakwara ta gudav. Da masa ka hötmar gudav fa deðey, gwaslaf a gudaf! gudaf! na, ka sörmara kiya madaw a ley gweegwe cay.

²⁹ Anja letek köne, da ka hötmatar cek hay a fa kam anda yah ma lövkwar keðe na, ngene sörmara Yah, *Böz nga Ndaw, gweegwe cay ya vöhma.

³⁰ Ya fa lövkwar fara fara, cek hay a keðe tabiya a da kam na, ndöhay masa wure keðe † ta möcam tabiya daa ba arañ.

13:19 13.19 Dan 12.1; CWJ 7.14 **13:21 13.21-23** Lk 17.23-24 **13:22 13.22** Mt 24.24 **13:24 13.24-25** Mt 24.29 **13:26 13.26** Mt 24.30 † **13:30 13.30** ndöhay masa wure keðe: Ndöhay a wulkam Yesu aa guzley da ray ndöhay masa ta dey daa ngene, da daa ba, da ray Jöwif hay masa ta dey ta pas masa Yesu ma da vöhma.

³¹ Slam da vad ta slam da bēla a ndøvey la, ama mey adaw na, fa da ndøvey daa ba sēlak.

(Matiye 24.36-44)

³² «Fara fara, cek hay kefe tabiya a da kam na, ndaw ma sēra kwa d̄ar a, kwa ler e, daa ba. Kwa maslaŋ hay ma njam da cakay Bay Gazlavay da vad a sērmara ba, kwa Yah, Bøzey aŋga, ya sēra ba, ama si Papay, pal taava aŋga, ma sēra d̄ar a.

³³ Wam vaw! Ka da nam ba, maja ka sērmara d̄ar a, a da wuswa ta vara ba.

³⁴ Ya da vøhwa a bēla na, anda ndaw ma daw a mēlak. Ndaw aha, a da mbækda way aŋga na, a mbædtar mey a ma ka sløra aŋga hay, a vøltar sløra pal pal. A løvar a ndaw ma jøda mey-slam ŋga way a: “Njey ta dey, ka da ney ba.”

³⁵ «Yaw, anda kefe, wam vaw, ka da nam ba, maja ka sērmara d̄ar masa bay ŋga way ma da vøhwa ba. Da taa kwad̄, da ta wuzlah-tavad̄, da gwagwalak fa cey d̄ay, da taa pørek na, ka sērmara ba.

³⁶ Da ya vøhwa d̄erfafay na, ya wud̄ey ya høtfakwar daa d̄ar ba.

³⁷ Mey masa yah ma løvkwar kefe na, ara ŋgada ndøhay tabiya: Ka da nam ba.»

14

Mahura hay ŋga Jøwif hay a slam yawa ŋga kød̄ey Yesu vagay

(Matiye 26.1-5; Luk 22.1, 2; Jan 11.45-53)

¹ Ma lawa d̄ar cew ŋga wusey fa gwagway ŋga *Pak ta *gwagway ŋga peŋ manjar cek ma hēsla da hwad̄ a. *Bay-ray hay ŋga ndøhay ma ka kwakwas ta *ndøhay maa sērkada kwakwas ŋga Mawiz a sēpam cøved̄ ŋga kørzey Yesu ta mayal a, amba a kød̄mara vagay.

² A da kørzamara ta mayal a na, maja mahura hay a, a løvam: «Ya gwakwa ŋga kørzakwa daa gwagway kefe ba, maja ndøhay a da yam mey.»

Ŋgwas a mbød̄ar bød̄ey fa ray ŋga Yesu

(Matiye 26.6-13; Jan 12.1-8)

³ Yesu aa da Betani, fa zømey d̄af da way *Siman̄w, ndaw masa aa ma mbølda daa maasækula heyey. Masa aŋga fa zømey d̄af na, ŋgwas daha, a mbøzey fa ata ta kwalaba da har, kwalaba ha ŋga aŋgwa maavørkwakaya mezøley «*albaatøra». Kwalaba ha na, marøhkaya ta bød̄ey mezey

maaya masa ma hädkey ba, mezäleý «*nar». A wura mey nga kwalaba ha, a mbödda bërdey a, fa ray nga Yesu.

⁴ Ndöhay mekele fetede a cam mevel a ray ngwas aha. Aa guzlam da wuzlah ata, a lövam: «A nösa bërdey a kefe na, maja me?

⁵ Anja a hädkada na, a gwa nga hötey dala ga, höma dala nga ndaw ma key slöra nga mevey pal, ba daw? Da ray membödey bërdey a, a ray ndaw na, ngama a wunkatara dala ha a masa-viya hay, ba daw?» A mböfmar ray ga ngada ngwas aha.

⁶ Ama Yesu a lövtar: «Mbökdamara! Ka mböfmar ray na, maja me? Cek masa aa ma ka ngada yah kefe na, ara cek maaya.

⁷ Masa-viya hay na, akwar mandaw mandaw bama. Ta pas wura wura masa akwar ma wudam na, ka gwamara nga jönmata. Ama yah na, akwar fa da hötmaya nga njeý ta akwar mandaw mandaw daa ba.

⁸ Ngwas aha ta key cek masa aa ma gwa nga ka la. Kwa ya ta möcey daa ba aran kaa na, ta mbödda bërdey cay fa ray adaw nga diya vaw adaw ngadaa cövey.

⁹ Ya fa lövkwara fara fara, kwa daa wura daa wura da böla tabiya na, ndöhay ma da wuzdamara *Mey-maaya-mawiya nga Gazlavay, a kadamara cek masa ngwas aha ma ka kefe la may, amba ndöhay a sörfadamara ngwas aha.»

*Juda a völda Yesu a har masa-göra anga hay
(Matiye 26.14-16; Luk 22.3-6)*

¹⁰ Juda Iskariyawt, gula pal da wuzlah *gula hay nga Yesu kuraw a ray a cew, a daw fa *bay-ray hay nga ndöhay ma ka kwakwas. A lövtar a wudéy nga völdatara Yesu a har ata.

¹¹ Ata ma cöndamara mey a kefe la na, aa sömam ga. A lövmar da ta völdatara Yesu la na, a völmara dala. Anda kefe, Juda ha, a daw a söpey cöved amba a völdatara Yesu.

Yesu a zömam döf nga gwagway nga Pak ta gula anga hay

(Matiye 26.17-25; Luk 22.7-14, 21-23; Jan 13.21-30)

¹² Ara döar ngeeme nga *gwagway nga pen manjar cek ma hösla da hwad a. Ta pas a ngene, *Jöwif hay a höram böz-töban hay nga gwagway nga *Pak. Gula hay nga Yesu a diyam fa vöda, a lövmar: «Ka wudéy ya diyam, ya döymërwa slam amba ya zömkwa döf nga gwagway nga Pak na, dama?»

¹³ Da ray ngene, Yesu a zöley gula anga hay cew, a slödata, a lövtar: «Diyam aa berney nga *Jeruzelem.

Fetede na, ka da cam ray ta ndaw fa daw ta yam daa kwakulam. Diyam asiya.

¹⁴ Aa way masa aa ma da mbøzey na, lõvmar a bay nga way a: “Bay ala a lõvey: Way mapakaya ngada yah amba ya zømam daf nga gwagway nga Pak ta gula adaw hay na, aa daa wura?”

¹⁵ Fa dõba ha, a wuzkwar way mahura da ray way la. Way a madifykaya maaya maaya, cek hay cõpa nga gwagway da hwaɗ a daha. Ka da ðiymandakwara cek mezømey amba ya zøm kwa daf nga gwagway a fetede.»

¹⁶ Gula anga hay cew heyey, a mbækdamata, a diyam aa berney a. Fetede, a hõtfamatar cek hay tabiya anda Yesu ma lõvtar heyey. Ta', a ðiymata cek hay nga gwagway nga Pak a.

¹⁷ Taa kwaɗ a ngene na, Yesu a wusam ta gula anga hay kuraw a ray a cew aa slam mezømey daf nga gwagway a.

¹⁸ Masa ata fa zømamara daf a na, Yesu aa guzltar, a lõvey: «Ya fa lõvkwar fara fara, ndaw pal da wuzlah akwar, masa fa zømey daf ta yah wure keɗe, a vøldaya la a har ndõhay nga kømaya vagay.»

¹⁹ Mey a keɗe a mætar vaw a gula anga hay a, aa cõɗamara Yesu pal pal, a lõvam: «Ara yah ma da vøldaka ba, ba diya?»

²⁰ Yesu a mbõɗɗatara, a lõvtar: «Ara ndaw pal da wuzlah akwar, gula adaw hay kuraw a ray a cew. Ara ndaw masa alækwa fa zøm kwa daf bama daa slam a keɗe.

²¹ Fara fara, si yah, *Bøz nga Ndaw, ya mõeey anda mey mawuzlalakaya daa ðerewel nga Gazlavay ma lõvey. Ama banay a sawa la a ray ndaw ma da vøldaya a har ndõhay nga kømaya vagay a. Ngada ndaw aha na, ngama ta yamõrwa daa ba sèlak.»

Yesu a zømam daf nga madagway-dakw ta gula anga hay (Matiye 26.26-30; Luk 22.14-20; 1 Kwarinti hay 11.23-25)

²² Masa ata fa zømam daf nga gwagway a na, Yesu leŋ! a ley peŋ. A kar suse a Gazlavay, a wunka, ta', a vøɗɗatara a gula anga hay, a lõvtar: «Ehe, tømbara. Keɗe he, ara vaw adaw.»

²³ Fa dõba ha, leŋ! a ley vøley ta cek mesey da hwaɗ a, a kar suse a Gazlavay saya, ta', a vøɗɗatara a gula anga hay. Gula anga hay cõpa ta', a samara.

²⁴ Yesu a lõvtar: «Keɗe na, ara mambaz adaw. Mambaz a, a da mbõɗwa maja ndõhay ga. Ta fa mambaz a, Gazlavay a jøwey mey mawiya ta ndõhay anga hay.

25 Ya fa ləvkwar fara fara, kwa ya fa da sey yam nga babəza nga wudez madəckaya daa saba səlak. Ya da sey na, si cek mawiya mekele daa slam masa Gazlavay fa wey da ray ndəhay da vad.»

26 Ta', a zlam walay nga gwagway daa *Pəsam hay. Fa dəba ha, a sləkdam, a diyam aa Anɣwa nga *Awliviye.

Gula hay nga Yesu a ləvam fa da mbəkdamura Yesu daa ba

(Matiye 26.31-35; Luk 22.31-34; Jan 13.36-38)

27 Yesu a ləvtar a gula anɣa hay: «Akwar cəpa ka da mbəkdamura daa masa fa da kərzamaya nga kədey vagay anda mawuzlalakaya daa dərewel nga Gazlavay ma ləvey: “Ya kəfa ndaw-mecəkwer la vagay.

Təban anɣa hay a kwakwacam ray la pal pal.”

28 Ama da yah ta sləkdam cay daa meməcey na, ya daw la teesed da ray akwar aa hwayak nga *Galile. Ka da hətfamaya fetede.»

29 *Piyer a ləvar: «Kwa ndəhay cəpa a mbəkdamura, ama yah na, ya fa da mbəkdama daa ba.»

30 Yesu a mbəddara, a ləvar: «Ya fa ləvka fara fara, dasi tavad kede, wuskwaa gwagwalak a da cey fay nga dey cew na, ka ta ləvey cay dey maakar, ka sərya ba, ka sərya ba.»

31 Ama Piyer a mbəddara ta gədan, a ləvar: «Kay! Kwa da fa da kədmaka vagay na, nga kədmandakwar cew e, ya fa da ləvey ya sərka ba na, daa ba səlak.» Gula hay nga Yesu siya a ləvam kəne may.

Yesu a dərey danɣay a Gazlavay da Gecemene

(Matiye 26.36-46; Luk 22.39-46)

32 Ata Yesu ta gula anɣa hay a wusam aa slam daha mezəley Gecemene. A ləvtar: «Njam fede, yah na, ya daw la nga dərwa danɣay a Gazlavay.»

33 Ta', a nɣelta ata *Piyer, *Jak, leɲ *Jan, a diyam bama. Daa nɣene, mandərzay a kar a Yesu, mevel anɣa a tədey, maja banay ma da sawa a ray a.

34 Ta', a ləvtar a gula anɣa hay maakar heyey: «Mewulkey fa da kəfya vagay. Njam fede, ka da nam ba.»

35 Ta', Yesu a nɣəchey nekədey fa mey, a regedey a hwayak, a dərey danɣay a Gazlavay. Aa cəfda Gazlavay amba da Gazlavay a təba na, banay masa anɣa ma da səra na, a wusfar ba.

³⁶ A løyey: «Papay, Papay, cek hay cəpa ka gwa ŋga kata. Ləhdaya daa banay a kedə. Ta kəne he cəpa na, key anda kah ma wudəy, ba na, anda yah ma wudəy ba.»

³⁷ Ta', a vəhwa fa gula ŋga hay maakar heyey, a hətfatar manatakaya daa đar. A ləvar a *Simanɔw Piyer: «Simanɔw, ka fa ney daw? Ka ta gwa ŋga zezəkey nekəđey, kwa ler pal daa ba gway daw?

³⁸ Zazəkam, ka da nam ba, dəram danɔay a Gazlavay ŋga jənkwar amba cek a batakwar ŋga key mebərey ba. Mevel akwar a wudəy ŋga key cek maaya, ama vaw akwar na, ŋga ta bəle.»

³⁹ Ta', Yesu a ŋgəchey saya, a dərey danɔay a Gazlavay anda ŋgeeme heyey saya.

⁴⁰ Fa dəba ha, a vəhwa fa gula ŋga hay maakar heyey saya, a hətfatar manatakaya cəŋga maja đar fa latar mey kalah. Masa Yesu ma hətfatar manatakaya na, a sləkdam, a sərmara ata ma daa guzlmara ŋgada Yesu ba.

⁴¹ Ta', Yesu a mbəkdata, a daw ŋga dərey danɔay a Gazlavay ŋga dey maakar. Cay, a vəhwa fa gula ŋga hay heyey, a ləvtar: «Haa wure kedə akwar fa nam, fa məskam vaw cəŋga daw? Cay dəba. Pas a ta wuswa cay, amba a vəldamaya, yah, *Bəz ŋga Ndaw, a har ndəhay ta mebərey.

⁴² Lacam! Nəkmara, ndaw ma da vəldaya a har ndəhay ŋga kəđey vagay fa sawa katay. Nakwa la, ta cadakwa ray.»
(*Matiye 26.47-56; Luk 22.47-53; Jan 18.3-12*)

⁴³ Masa Yesu faa guzley na, wure ŋgene, Juda, ndaw pal dasi gula ŋga hay kuraw a ray a cew heyey, fa sawa fa vəda. Juda ha a samawa na, ta ndəhay ga ta dəlaw * hay da cakay, ta zlanday hay da har. Ma slərdamatərwa ndəhay a na, ara bay-ray hay da ray ndəhay ma ka kwakwas, ta ndəhay maa sərkada kwakwas ŋga Mawiz, leŋ mahura hay ŋga Jəwif hay.

⁴⁴ Juda, ndaw masa ma da vəlda Yesu a har ndəhay, ta wuswa fa Yesu daa ba aran na, aa guzltar a ndəhay a, a ləvtar: «Ndaw masa yah ma da car har anda mandala adaw fara fara na, ara ŋga. Kərzamara, handamara, jəđmara maaya maaya.»

⁴⁵ Masa Juda ma wusey cay gweegwe a cakay Yesu na, a ŋgəchey fa vəda, a ləvar: «Bay adaw!» Ta', a car har anda aa ma ləvey heyey.

⁴⁶ Ndəhay ma samawa ta ata Juda heyey, ta', a kərzamara Yesu.

14:36 14.36 10.38; Mt 6.10; Jan 18.11; Heb 10.9 **14:38 14.38** Ef 6.18; Heb 2.18

* **14:43 14.43** dəlaw: maslalam

47 Ama ndaw pal da wuzlah gula anga hay fetede, a mædərwa dəlaw anga, a ngəma, cərah! a cərha sləmay nga madərlam nga ndaw mahura da ray ndəhay ma ka kwakwas.

48 Ta', Yesu a ləvtar: «Ka samawa nga kərzamaya ta dəlaw, ta zlanday faa har faa har anda yah ndaw-mayal na, maja me?»

49 Mandaw mandaw yah da wuzlah akwar, ya faa sərkadata ndəhay daa *Way-mekey-kwakwas nga Gazlavay, ama ka ta kərzamaya daa ba. Cek hay a, a da kam wure kede na, amba a key anda dərəwel nga Gazlavay zleezle ma ləvey da ray cek ma da key da ray adaw.»

50 Fa dəba ha, gula anga hay cəpa a zluram, a mbəkdamara Yesu, a hwam.

51 Bəz-gula daha fa səpar wurzay nga Yesu. Anga fetede ta gwedeere masləlhakaya fa vaw. Ndəhay ma kərzamara Yesu heyey, a kərzamara bəz-gula ha may.

52 Ama, ta', a pərsley da har ata, a mbəkda gwedeere anga, a hway vaw ba' kəne.

Yesu fa mey nga ndəhay ma sla yawa nga Jəwif hay
(Matiye 26.57-68; Luk 22.54, 55, 63-71; Jan 18.13, 14, 19-24)

53 Ndəhay ma kərzamara Yesu heyey, a handamara a way *ndaw mahura da ray ndəhay ma ka kwakwas nga Gazlavay. *Bay-ray hay nga ndəhay ma ka kwakwas nga Gazlavay, ta mahura hay nga *Jəwif hay, leŋ *ndəhay maa sərkada kwakwas nga Mawiz ata makustakaya fetede.

54 *Piyer na, fa səpa Yesu ta meedəreŋ e. A mbəzey a palah-way nga ndaw mahura da ray ndəhay ma ka kwakwas heyey. Fetede, a njam ta ndəhay ma jəda way a, anga fa sətəy awaw.

55 Bay-ray hay nga ndəhay ma ka kwakwas nga Gazlavay ta ndəhay mahura hay mekele masa ma sla yawa nga Jəwif hay tabiya, ata na, a səpam cek malamba masa Yesu ma ka amba a kamar sariya, a kədmara vagay. Ama ta hətam daa ba.

56 Ndəhay ga a samawa nga mbərzley a ray Yesu. Ama ata na, taa guzlam mey letək daa ba.

57 Da ray ngene, ndəhay mekele da wuzlah ata, a sləkdam ta meyey-mey, a mbərzlam, a ləvam:

58 «Ya cəndamara ndaw aha a ləvey: "Ya bəzla *Way-mekey-kwakwas nga Gazlavay masa ndəhay ma ləmamara

keđe la, ya ləma la mekele đar maakar masa kwa har nga ndaw fa da gəsfar nga ləmey way a daa ba.”» †

⁵⁹ Ama kwa ta membərzley ata ha keđe na, aa guzlam mey wal wal cəŋga.

⁶⁰ Da ray ŋgene, ndaw mahura da ray ndəhay ma ka kwakwas heyey a lecey fa mey nga ndəhay cəpa, ta', aa cəfda Yesu, a ləvar: «Ka mbəfdatara a ndəhay maa guzlam da ray akah keđe ba gway daw?»

⁶¹ Ama Yesu manjakaya teete, kwa ta mbəfdatara daa ba. Da ray ŋgene, ndaw mahura heyey aa cəfda Yesu saya, a ləvar: «Kah na, *ndaw masa Gazlavay ma wala nga ləhdata ndəhay heyey daw? Gazlavay masa ala ma həlmamara na, kah na, Bəzey aŋga daw?»

⁶² Yesu a mbəfđara, a ləvar: «Ahaw, ara yah. Akwar, ka da hətmaya, yah, *Bəz nga Ndaw, manjakaya ta har-zəmay nga Bay Gazlavay Mawaca-waca. Asaya, ka hətmaya la, ya fa sawa daa mekwtene da vad.»

⁶³⁻⁶⁴ Maja ŋgene, ndaw mahura heyey, ŋgar! ŋgar! a ŋgərta zana aŋga hay. Mevel a car ga maja Yesu ma ləvar a sawa ta fa Bay Gazlavay. Ta', ndaw mahura ha, a ləvtar a ndəhay ma sla yawa makustakaya heyey: «Wure keđe, kwa ya səpkwa ndaw ŋgaa guzldakwar da ray a saba. Ta pa ray aŋga sem nga Gazlavay, akwar ta cəndamara la, ba diya? Wure keđe ka wulkam da ray a na, kwara?»

Ndəhay cəpa a ləvam aŋga ta mebərey, si mekədey aŋga vagay.

⁶⁵ Ndəhay siya da wuzlah ata a cəram meesleḅ a ray Yesu a. A dəpmara dey aŋga ta zana, a dəvmar mekədey, a ləvmar: «Səra ma kəfka keđe na, wa? Wuzdandara ceɣ!» Fa dəba ha, ta', a vəldamara a har ndəhay ma jədmara heyey, ndəhay ma jədmara ha a vəlmar matapa-har.

Piyer a ləvey a səra Yesu ba

(Matiye 26.69-75; Luk 22.56-62; Jan 18.15-18, 25-27)

⁶⁶ *Piyer, aŋga da palah-way nga ndaw mahura ma ka sariya heyey, sabara dasi dəmay ma ka sləra da way ndaw mahura ha, a sawa,

⁶⁷ a hətar Piyer fa sətəy awaw. A saŋgala Piyer heyey, a ləvar: «Kah may, gula nga Yesu, ndaw *Nezeret keđe, ba diya?»

† **14:58 14.58** Yesu a ləvey fara fara na, «Bəzlmara Way-mekey-kwakwas nga Gazlavay keđe, đar maakar ya ləma la aa slam a.» (Jan 2.19).Ta ləvey masa ara aŋga ma da bəzla na, daa ba. Fara fara Yesu aa guzley da ray ray aŋga masa ata ma da kədmara vagay, nga đar maakar a, a sləkđawa. **14:58 14.58** 15.29; Mt 26.61 **14:61 14.61** Yesu taa guzley daa ba: Iz 53.7; Mk 15.3-5; **Bəzey nga Gazlavay:** 15.39 **14:62 14.62** Dan 7.13; Mt 22.44; 24.30; Mk 13.26; Lk 21.27 **14:63-64 14.63-64** Mt 26.65 **14:65 14.65** Iz 50.6; 53.5; Lk 7.16

⁶⁸ Ama Piyer a cada mey, a løyey: «Kay! Ya sɛra cek masa kah ma wudɛy ɲɔaa guzley ba!»

A daw fa mey-slam ɲɔa way heyey. [Ta', gwagwalak a cey ɗay.]

⁶⁹ Ta', sabara heyey, a hɛtar Piyer saya, a lɔvtar a ndɔhay makustakaya fetede: «Ndaw keɗe aɲɔa da wuzlah ndɔhay ɲɔa Yesu a!»

⁷⁰ Ama Piyer a cada mey saya. Menjey nekɔɗey, ndɔhay fetede heyey a lɔvmar a Piyer saya: «Fara fara, kah ndaw da wuzlah ndɔhay ɲɔa Yesu, maja kah na, ndaw *Galile.»

⁷¹ Da ray ɲɔgene, Piyer ta', a lɔvtar: «Ya fa mbedey, fara fara, ya sɛra ndaw masa akwar maa guzlam da ray a keɗe ba sɛlak! Da ya mbɛrzley na, Gazlavay ɲɔa mbɔɗya ray!»

⁷² Wure wure ɲɔgene, gwagwalak a cey ɗay ɲɔa dey cew. Piyer a sɛrfada mey masa Yesu ma lɔvar zleezle heyey: «Wuskwaa gwagwalak a da cey ɗay ɲɔa dey cew na, ka ta lɔvey cay dey maakar, ka sɛrya ba, ka sɛrya ba.» Masa Piyer ma sɛrfada mey a la na, pat! a bawa ta matɔway.

15

A handamara Yesu fa mey ɲɔa Bay Pilat

(Matiye 27.1, 2, 11-14; Luk 23.1-5; Jan 18.28-38)

¹ Pɛrek pɛrek, *bay-ray hay ɲɔa ndɔhay ma ka kwakwas ɲɔa Gazlavay, mahura hay ɲɔa *Jɔwif hay, *ndɔhay maa sɛrkada kwakwas ɲɔa Mawiz, leɲ ndɔhay mahura hay mekele ma sla yawa ɲɔa Jɔwif hay, a kusam amba a slam yawa da ray Yesu. Fa dɔba ha, a jɔwmara Yesu, a handamara fa Pilat, bay fetede.

² Bay Pilat a, aa cɔɗɗa Yesu, a lɔvar: «Kah na, bay ɲɔa Jɔwif hay fara daw?»

Yesu a mbɔɗɗara, a lɔvar: «Anda kah ma lɔvey.»

³ *Bay-ray hay ɲɔa ndɔhay ma ka kwakwas ɲɔa Gazlavay heyey a dadɔɗɗamar mey hay mekele mekele a ray Yesu.

⁴ Da ray ɲɔgene, Pilat aa cɔɗɗa saya, a lɔvar: «Ka mbɔɗɗatara a ndɔhay maa guzlam da ray kah keɗe ba gway daw? Ka fa cɔnda mey hay cɔpa masa ata maa guzdamara da ray akah keɗe, ba diya?»

⁵ Ama Yesu a mbɔɗɗara ba sɛlak. Anda keɗe, Pilat a rɛzley ga maja.

A kamar sariya a Yesu ɲɔa kɔɗey vagay

(Matiye 27.15-26; Luk 23.13-25; Jan 18.39-19.16)

⁶ Fa mevey a, fa mevey a, ta gwagway nga *Pak na, Bay Pilat fa pəskey ndaw pal daa fərsəne. A pəskey na, ndaw masa ndəhay makustakaya maa cəfdafamara.

⁷ Yaw, ndaw daha mezəley Barabas. Anğa daa fərsəne maja anğa da wuzlah ndəhay masa ma namatar ray a ndəhay ma wa hwayak ba. Daa mekədfey-vaw daha na, ata Barabas a ta kədam ndaw la vagay.

⁸ Ndəhay makustakaya ha a diyam aa ambaw Bay Pilat, ngaa cəfdamərwa amba a pəskatar ndaw pal daa fərsəne anda anğa ma katara fa mevey a, fa mevey a.

⁹ Pilat a mbədfatara, a ləvtar: «Ka wudam na, ya pəskakwar bay nga *Jəwif hay daw?»

¹⁰ A ləvey anda kede na, maja a səra *bay-ray hay nga ndəhay ma ka kwakwas nga Gazlavay heyey a handamərwa Yesu na, maja sələn fa katar da ray a.

¹¹ Ama bay-ray hay a, a həldamata ndəhay makustakaya heyey ngaa cəfdamara Bay Pilat amba a pəskatara Barabas jak.

¹² Pilat aa cəfdata saya, a ləvtar: «Ndaw masa akwar ma zəlmara “Bay nga Jəwif hay” na, ka wudam ya kada na, kwara?»

¹³ A wudam ta gədan, a ləvmar: «Dəra fa hwadam mazlanğalakaya! Dəra fa hwadam mazlanğalakaya!»

¹⁴ Pilat aa cəfdata, a ləvtar: «Cek maaya ba masa anğa ma key na, wura?»

Ama a wudam ta gədan ta gədan saya, a ləvam: «Dəra fa hwadam mazlanğalakaya! Dəra fa hwadam mazlanğalakaya!»

¹⁵ Pilat a wudəy amba aa səmdata ndəhay makustakaya heyey. Anda kede, ta', a pəskatara Barabas daa fərsəne. A ləvtar a sewje hay nga slədmara Yesu ta laway. Fa dəba ha, a vəldatara amba a dərmara fa hwadam mazlanğalakaya.

*Sewje hay aa sanğəram a ray Yesu
(Matiye 27.27-31; Jan 19.2-3)*

¹⁶ Sewje hay a handamara Yesu a palah-way nga Bay Pilat. Ta', a zəlmatərwa sewje hay siya fetedə tabiya.

¹⁷ A kəzlmara zana magaza nga bay hay fa vaw. A cam hatak, a padamar ray anda gursaw nga bay.

¹⁸ Ta', a camar har, a ləvmar: «Zay daw, bay nga *Jəwif hay?»

¹⁹ A kədmara ta zlanday a wuzlah-ray, a təfmar meesleb fa vaw. A ragadam fa mey anğa.

²⁰ Fa dɔba ha, masa ata maa sanɔeram cay a ray a na, a cɔkwɔmara zana magaza heyey fa vaw, a kɔzɔmar zana anɔa hay. Ta', a badamara daa berney a, a handamara nɔa dɔrey fa hwadam.

*A dɔrmara Yesu fa hwadam mazlanɔalakaya
(Matiye 27.32-44; Luk 23.26-43; Jan 19.17-27)*

²¹ Ndaw daa berney nɔa Siren daha, mezɔley *Simanɔw, anɔa papan nɔa ata Alekzandɔre ta Rufus. A sawa da ley, anɔa fa daw ta nɔgene. Masa sewje hay heyey, fa handamara Yesu na, a tɔkmar dɔay a Simanɔw heyey nɔa la hwadam mazlanɔalakaya nɔa Yesu a.

²² A handamara Yesu aa slam mezɔley ta mey ata Gwalgwata, anda melɔvey, «slam anda tetesl nɔa ray nɔa ndaw.»

²³ A wudam nɔa vɔlmar wuzam majahadɔakaya ta slalak mezɔley «*mir», ama Yesu a gɔmey nɔa sa ba *.

²⁴ Ta', a dɔrmara fa hwadam mazlanɔalakaya. Fa dɔba ha, a kɔdam caca nɔa wunkey zana anɔa hay amba a sɔrmara kwa waawa a da hɔey na, zana wura.

²⁵ A dɔrmara Yesu fa hwadam na, taa pɔrek, pas tɔde mehɔley maaca.

²⁶ Mey masa ata ma kɔdmara vagay maja ha na, mawuzlalakaya fa hwadam, a lɔvey: «Ara bay nɔa *Jɔwif hay.»

²⁷ Daa slam masa ata ma dɔrmara Yesu a na, ta dɔram mayal hay cew la a cakay a, pal ta har-zɔmay, lanɔar ta har-gula. [

²⁸ Cek aha ta key la anda mawuzlalakaya daa dɔrewel nɔa Gazlavay zleezle ma lɔvey: «Ndɔhay a da slɔfmara a dey ndɔhay malamba.»]

²⁹ Ndɔhay ma diyam taa slam a nɔgene aa sanɔeram a ray a, a wusam ray, a cɔdmara, a lɔvmar: «Hey! Kah na, ndaw ma wudɔy nɔa bɔzla *Way-mekey-kwakwas nɔa Gazlavay amba ka lɔma mekele daa dɔar maakar heyey, ba diya?

³⁰ Bɔrnɔgawa fa hwadam a nɔgene a hwayak, lɔhda ray akah dɔba taw!»

³¹ Asaya, *bay-ray hay nɔa *ndɔhay ma ka kwakwas nɔa Gazlavay ta *ndɔhay maa sɔrkada *kwakwas nɔa Mawiz aa sanɔeram da ray a, a lɔvam da wuzlah ata: «A lɔhdata ndɔhay siya hay na, kaa ray anɔa na, a gwa nɔa lɔhda, ba daw?

15:21 15.21 Rm 16.13 * **15:23 15.23** a gɔmey nɔa sa ba: A vɔlmar slalak a, a Yesu na, amba a bɔsa mecey nɔa mbɔlek fa vaw anɔa. A gɔmey nɔa sa ba na, maja a wudɔy nɔa bɔsa banay a. **15:24 15.24** Ps 22.19 **15:26 15.26** Mt 27.11 **15:27 15.27** Iz 53.12 **15:29 15.29** 14.58 **15:29 15.29-32** Ps 22.8; 109.25

³² Ndaw keɗe, da anɗa ndaw masa Gazlavay ma wala nɗa key Bay nɗa *Israyel hay na, nɗa bɔrɗgawa fa hwadam a wure keɗe dɔba taw. Da ya nɔkakwa ta bɔrɗgawa sem na, nɗene, ya tɔbkwa mey anɗa la.»

Ndɔhay madɔrtakaya da cakay Yesu heyey na, a cɔɗmara may.

Memɔcey nɗa Yesu

(Matiye 27.45-56; Luk 23.44-49; Jan 19.28-30)

³³ Ta wuzlah-pas, lɔvan a key daa hwayak cɔpa. Lɔvan a, a nɗey haa bɔrey maakar nɗa pas nɗaa kwad.

³⁴ Ta bɔrey maakar a na, Yesu a wudey ta gɔɗan, a lɔvey ta mey ata: «*Elawi, Elawi, lema sabaktani?*» Anda melɔvey: «Gazlavay aɗaw, Gazlavay aɗaw, ka mbɔkɗaya na, maja me?»

³⁵ Ndɔhay siya fetede, a cɔndamara mewudey nɗa Yesu a na, a lɔvam: «Jɔkam slɔmay, anɗa fa zɔla *Eli, *ndaw ma tɔla mey nɗa Gazlavay zleezle!»

³⁶ Ndaw pal da wuzlah ata, ta', a hway nɗa jɔhwɔbey cek anda gagɔmay aa yam nɗa babɔza nɗa wudez meekwerek e, ta', a pa fa mey nɗa zlanday. A tɔɗara a Yesu a amba a sasɔba. Ndaw a, a lɔvey: «Sɔkwakwa, amba ya nɔkakwa da wara cay Eli a, a sawa nɗa bɔrɗgadɔrwa la kwa.»

³⁷ Ama Yesu a wudey ta gɔɗan, pam! a mɔcey.

³⁸ Daa *Way nɗa Gazlavay na, zana ma gɔrca *Slam masa Gazlavay aa da hwad a daha. Masa Yesu ma mɔcey la na, zana ha, a nɗɔrey cew dɔga da vad kasl a hwayak.

³⁹ Mahura nɗa sewje hay nɗa Rawma hay manjakaya fa mey nɗa Yesu, masa anɗa ma hɔtar Yesu ma mɔcey meedey anɗa na, bay nɗa sewje hay a, aa guzley, a lɔvey: «Fara fara ndaw keɗe na, ara Bɔzey nɗa Gazlavay.»

⁴⁰ Nɗusay fetede daha may, ata fa nɔkam dey ta meedɔren e. Da wuzlah ata na, *Mari da Magdala, Salawme, leɗ Mari maman nɗa ata Jawz ta *Jak, bɔz-gula.

⁴¹ ONɗusay a ta pɔkam la ta ata Yesu daa masa anɗa daa *Galile, ta kamar slɔra la. Da cakay hwadam mezlengeley Yesu a na, nɗusay ga mekele daha may. Nɗusay a na, ta diyam la ta Yesu a *Jeruzelem.

A jɔhmara vagay nɗa Yesu

(Matiye 27.57-61; Luk 23.50-56; Jan 19.38-42)

⁴² Ta pas nɗene na, ara ɗar masa ndɔhay ma diyam vaw nɗa *pas memɔskey-vaw. Ta pas nɗaa kwad a nɗene, memɔskey-vaw nɗa *Jɔwif hay a, a zley.

⁴³ Ndaw da slala Arimate daha, mezøley *Jawzef, anga, ndaw da wuzlah ndøhay mahura ma sla yawa nga Jøwif hay. Ndøhay ga fa namar ray. Anga may, fa sækwa mewey nga Bay Gazlavay. Ndaw aha na, a kørza mevel, a daw fa Bay Pilat amba aa cøfða nga vølar cøvedf nga la vagay nga Yesu amba a jøha.

⁴⁴ Pilat a røzley ga maja Yesu ta møcey sem fiyaw fiyaw gway. Da ray ngene, a zølørwa mahura nga sewje hay, aa cøfða da Yesu a møcey na, menjey ga kwa.

⁴⁵ Masa Pilat maa cøfða mahura nga sewje hay heyey la na, ta', a vølar cøvedf a Jawzef nga la vagay a.

⁴⁶ Jawzef, ta', a hødkey zana maaya mabara. A bønngadørwa vagay a da ray hwadam mazlanngalakaya heyey a hwayak. Ta', a zlønnga ta zana ha, a handa aa cøvay. Cøvay a, maavørkwakaya daa anngwa anda bødam. Ta', a gødbalawa beeler mahura, gazl! a mey cøvay a.

⁴⁷ Ata *Mari da Magdala, ta Mari, maman nga Jawz heyey, ata fetede, fa nøkam dey aa cøvay masa ata ma pamara vagay nga Yesu a hwaf a heyey.

16

Yesu a slækfawa daa memøcey

(Matiye 28.1-8; Luk 24.1-12; Jan 20.1-10)

¹ Fa døba nga *pas memøskøy-vaw na, *Mari da Magdala, Mari maman nga *Jak, leñ Salawme, a hødkaam børdøy hay ma zam maaya amba a diyam a wucmørwa fa vagay nga Yesu.

² Pørek pørek ta luma nga Gudal, masa pas fa bawa na, ngusay a, a diyam a mey cøvay nga Yesu a.

³ Ata daa cøvedf na, aa guzlam da wuzlah ata, a løvam: «Ma da gødbalandakwara beeler mahura da mey cøvay a na, wa?»

⁴ A da nøkam dey na, a høtmar beeler heyey, magødbalakaya ta cakay.

⁵ Masa ata fa mbøzam aa cøvay a na, a høtam gula manjakaya ta har-zømay. Annga ta zana mahura mabara fa vaw. Anda kefe, mandørzay a katar a ngusay a.

⁶ Ama gula ha a løvta: «Ka zluram ba! Ka søpam na, Yesu, ndaw *Nezeret, masa ata ma dørmara fa hwadam mazlanngalakaya heyey daw? Ta slækfawa sem daa memøcey, annga fefe daa saba. Nøkmara slam masa ata ma pamara a hwaf a.

⁷ Wure kefe na, diyam, løvmatar ngada ata *Piyer ta *gula hay nga Yesu mekele na, Yesu annga sem teesef a

*Galile fa mey akwar. Ka da hɔ̄tfamar fetede anda aa ma lɔ̄vkwar.»

⁸ A bamawa, a hwam, a mbəkdamara cɔ̄vay a, ata faa wasam maja mandɔ̄rzay fa katar, len̄gesl ata ta mbə̄dey sem. Ta kadamara kwa ŋgada waawa daa ba, maja ata fa zluram ga.

*Yesu a wuztar vaw a gula an̄ga hay
(Matiye 28.9-10; Jan̄ 20.11-18)*

[⁹ Pə̄rek pə̄rek ta pas luma ŋga Gudal, Yesu a sləkɔ̄dawa daa memə̄cey. Masa ta sləkɔ̄dawa cay na, ŋgeeme a wuzar vaw a *Mari da Magdala, ŋgwas masa aa ma bə̄ley malula maasala da ray a heyey.

¹⁰ Ta', ŋgwas aha, a daw, a kadatara a ndə̄hay masa ma pəkam ta Yesu zleezle. A hɔ̄tfatar ata daa matə̄way.

¹¹ Ŋgwas aha, a lə̄vtar: «Yesu aa ta dey! Yah ma hətər la.» Ama masa ata ma cə̄ndamara mey masa ŋgwas a ma kada na, a tə̄bmara mey a ba.

(Luk 24.13-35)

¹² Fa də̄ba ha, Yesu a wuztar vaw ŋgada gula an̄ga hay cew ma diyam ta daa cə̄ved ma bawa da *Jeruzelem. A wuztar vaw a na, wal ta masa an̄ga ma wuzar vaw ŋgada *Mari da Magdala heyey.

¹³ Gula hay a, a və̄hmawa, a kadamatara a *gula hay ŋga Yesu siya. Gula hay a, a tə̄bmara mey ata ha ba saya na, gway.]

*Yesu a wuztar vaw a gula an̄ga hay kuraw a ray a letek
(Matiye 28.16-20; Luk 24.36-49; Jan̄ 20.19-23; SNM 1.6-8)*

[¹⁴ Fa də̄ba ha, masa gula an̄ga hay kuraw a ray a letek fa zəmam daf na, Yesu a wuztar vaw. A mbə̄ɔ̄ftar ray maja a tə̄bmara mey da ray a ba, a lə̄vtar: «Ya ta sləkɔ̄dawa sem daa memə̄cey, ama ndə̄hay ma hət̄maya ta dey ata na, ka tə̄bmara mey ata ba na, kwara? Anda keɔ̄de, akwar na, ndə̄hay masa ray man̄gə̄rdakaya.»

¹⁵ Ta', a lə̄vtar saya: «Diyam aa hwayak hay cə̄pa, wuzdamatara *Mey-maaya-mawiya a ndə̄hay tabiya.

¹⁶ Ndaw ma tə̄ba mey a la, ta ma hət̄ey *baptem la na, a lə̄hey la daa mebə̄rey. Ama ndaw ma tə̄ba mey a daa ba na, sariya a kərza la.

¹⁷ Gazlavay a və̄ltar gə̄dan̄ ŋga key maazla hay la a ndə̄hay ma tə̄bmara Mey-maaya-mawiya ha. Anda melə̄vey, a da bə̄lam malula da ray ndə̄hay ta mezə̄ley

aɗaw. A daa guzlam mey hay mekele mekele masa ata ma sɛrmara ba.

¹⁸ Kwa a kɛrzam zezekw ta har, kwa a lɛgwmata ta slalak ma kɛɗey ndaw vagay na, cek fa da katar daa ba. A da pam har a ray masa-macay hay. Anda kede, masa-macay hay a, a mbɛlam la.]»

Bay Gazlavay a la Yesu a vad

(Luk 24.50-53; SNM 1.9-11)

[¹⁹ Masa Bay Mahura Yesu ma kadatara cek hay la cɛpa a gula anɗa hay na, ta', Gazlavay a la a vad. Fetede, anɗa manjakaya ta har-zɛmay nɗa Gazlavay.

²⁰ Gula anɗa hay, ta', a diyam aa wura aa wura cɛpa, a wuzdamara *Mey-maaya-mawiya a ndɛhay. Yesu, Bay Mahura, fa jɛnta daa slɛra ata ha. Ndɛhay a sɛrmara mey nɗa *gula hay nɗa Yesu ara mey fara fara na, maja anɗa fa vɛltar gɛɗan nɗa key maazla hay.]

Mey-maaya-mawiya masa

Luk ma wuzlala Mey da ray

Mey-maaya-mawiya masa Luk ma wuzlala

Luk na, ara dakwter. Ta lögda Pawl la kasl aa hwayak nga Rawm (Kwa 4.14; Flm 1.24; 2Tm 4.11). Ndəhay a wulkam anğa ndaw Jəwif ba, ama ndaw Gərek.

Luk ta wuzleley dərəwel cew la. A wuzleley na, *Mey-maaya-mawiya* leŋ *Sləra nga Ndəhay Meslərey*. A wuzlalata ngada ndaw mezəley Teyewfil amba a səra mey masa ndəhay nga Yesu maa sərkadamara na, ara mey fara fara (1.4). Kwa a wuzlala dərəwel e ngada Teyewfil na, ama ara ngada ndəhay masa Jəwif hay ba hay may.

Daa fasəlawal 1 ta 2 na, Luk aa guzley da ray mayawa nga Yesu ta masa anğa zariya. Ta wuzlalata mezəley nga ndəhay daa səkway nga Yesu la dəga fa Yesu a haa fa Adam. A wudfey nga wuzda Yesu na, ara ndaw ma ləhdata ndəhay daa səkway hay da bəla tabiya.

Daa dərəwel anğa na, Luk aa guzley da ray mekele mekele: A ləvey Gazlavay a wudfey ndəhay tabiya a ləham. A wuzleley ga da ray medərey-danğay. Ta wuzndakwar medərey-danğay nga Yesu la mekele mekele. A wuzleley ga da ray meesəmey da ray sləra masa Gazlavay ma ka. Luk ta wuzleley da ray ngusay mekele mekele masa daa Matiye leŋ Mark na, daa ba. A wuzda Yesu a wudfta ndəhay masa-viya hay. Ta wuzleley mey-menğey mekele mekele la da ray zleley. Yesu a wudfta ndəhay masa ta mebərey cənğa. A ka amba ndəhay a sərmara na, Gazlavay fa wudfta. Luk a wuzda dey ga Yesu na, ara «Bəz nga Ndaw». Yesu ara Bəzey nga Gazlavay, asaya, anğa ndaw-magədan. Luk taa guzley la ga da ray Mesəfney nga Gazlavay. Yesu ta key sləra la ta gədan nga Mesəfney nga Bay Gazlavay da ray a (4.14). A ləvtar a gula anğa hay nga njam daa berney nga Jeruzelem kasl pas masa Gazlavay ma da vəltar gədan ma sawa ta da vad (24.49).

Mey mahura daa dərəwel keđe na, ara mey ma ləvey: «Fara fara yah, Bəz nga Ndaw, ya sawa na, nga səpey ndəhay maazədfakaya ta nga ləhdata.» (19.10)

Daa dərəwel e keđe na, mey mekele mekele daha nga vəley gədan a ndəhay:

Walay nga Mari (1.46-55)

Mayawa nga Yesu (2.1-20)

Mey da ray mewudfey masa-gəra hay (6.27-31)

Mey da ray membəkey mebörey nga ndəhay (6.37-38)

Ma da sərey ndaw, anğa maaya na, ta fa sləra anğa (6.43-45)

Mey ngeeme

¹ Waa *Teyewfil,

Ndəhay ga ta kədam vaw la nga wuzleley da ray cek hay ma kam da wuzlah ala.

² A wuzlalam na, mey masa ala ma cəndamərwa fa ndəhay masa ma hətmərwa ta dey ata dəga nga mezley nga sləra nga *Yesu. Ndəhay a, ara ndəhay ma wuzdamara mey nga *Gazlavay.

³ Ya taa cədfey ndəhay la ta dək-vaw da ray cek hay tabiya ma key dəga nga mezley nga sləra nga Yesu a. Yah may, a mbafaya nga wuzlalatakawa cek hay a ngada kah Teyewfil, ndaw mahura.

⁴ Ya wuzlalakawa amba ka səra mey masa ata maa sərkadamakawa na, ara mey fara fara.

Maslan nga Gazlavay da vad a wuzda Elizabet a da key hwad

⁵ Daa masa *Herawt anğa bay daa hwayak nga *Jude na, *ndaw ma ka kwakwas nga Gazlavay daha mezəley *Zakari. Anğa da wuzlah ndəhay ma ka kwakwas nga Gazlavay masa ata ma zəlmata ndəhay nga Abiyah. Nğwas nga Zakari a, mezəley Elizabet, anğa səkway nga *Aranw, *ndaw mahura da ray ndəhay ma ka kwakwas nga Gazlavay zleezle.

⁶ Zakari a, ata cewete ta nğwas anğa, ndəhay maaya fa mey nga Gazlavay, fa təbmara *mewey nga Bay Gazlavay maaya maaya, asaya, fa namar ray a kwakwas nga Gazlavay ta cəved e.

⁷ Ama bəzey ata daa ba, maja Elizabet a yey ba. Ata cewete maraw hay.

⁸ Pas pal daha, Zakari fa key sləra ngada Gazlavay daa *Way-mekey-kwakwas nga Gazlavay maja sləra ha ta pas nğene a ray ata ta ndəhay nga Abiyah heyey.

⁹ Anğa fa key sləra fetede maja ta kədam caca la amba a walamara anda kwakwas ata ma ləvey. Sləra anğa ha na, ara nga mbəzey aa *Slam masa Gazlavay aa da hwad a daa *Way nga Gazlavay amba aa wurey cek mezey maaya ngada Gazlavay.

¹⁰ Daa ṅgene, ndəhay tabiya makustakaya daa ambaw fa dəram danḡay.

¹¹ Ta', *maslan ṅga Bay Gazlavay da vad' a wuzar vaw a Zakari. A lecey ta har-zəmay da cakay slam-meewurey cek mezey maaya ṅgada Gazlavay heyey.

¹² Masa Zakari ma hətar na, lenḡesl anḡa a mbədfey, a zlurey.

¹³ Ama maslan ṅga Gazlavay a, a ləvar: «Ka zlurey ba, Zakari, maja Bay Gazlavay ta cənda medərey-danḡay akah la. Elizabet, ṅgwas akah, a yaka bəzey mezəle la, ka da zəla bəzey a, *Jan.

¹⁴ Kaa səmey la ga. Ndəhay ga aa səmam la fa mayawa anḡa ha may,

¹⁵ maja a da key ndaw ma ka sləra mahura ṅga Gazlavay. Fa da sey wuzam daa ba, kwa fa da sey cek maməslkaya daa ba səlak. *Mesəfney ṅga Gazlavay a sawa la a ray a, dəga anḡa da hwad' mamaha.

¹⁶ A da jənta ndəhay *Israyel hay ga amba a vəhmawa fa Bay Gazlavay ata.

¹⁷ A da daw fa mey ṅga Bay Gazlavay ṅga dīyra cəved. Anḡa ta gədan len' ta mesəfney ṅga Gazlavay da ray a anda *Eli, *ndaw ma təla mey ṅga Gazlavay zleezle. A da cəmtar dāy ṅgada papan' hay ta bəz ata hay. A da tərdata ndəhay makəwtakaya ṅga ndəhay ma wulkam maaya anda ndəhay ma kam cek ta cəved e. Anda kefe, a da dīyta ndəhay ṅga təbey Bay Mahura ma da sawa.»

¹⁸ Ama Zakari aa cəfdā maslan ṅga Gazlavay heyey, a ləvar: «Ya da səra masa cek aha a key la fara fara na, fa me? Maja wure kefe na, yah maraw, ṅgwas adaw may, madanḡwas.»

¹⁹ Maslan ṅga Gazlavay a, a mbəfdara, a ləvar: «Ara yah, Gabəriyel, yah masa ma lecey fa mey ṅga Gazlavay ṅga kar sləra. Ara anḡa ma slərđiwa amba ya wuzdakawa mey maaya kefe.

²⁰ Mey adaw masa yah ma kadakawa kefe na, a key la fara fara ta pas masa Gazlavay ma wud'ey anda yah ma ləvka, ama kah ta təba daa ba. Da ray ṅgene, wure kefe, ka da tərey madagazlam, ka fa da gwa ṅgaa guzley daa ba, haa kasl cek aha ma key la.»

²¹ Daa masa Zakari a lawa daa Slam maaya daa *Way ṅga Gazlavay heyey na, ndəhay makustakaya daa ambaw heyey fa səkwmarā, a rəzlam maja ta njawa sem ga kalah daa slam aha.

²² Zakari a bawa aa ambaw, a gwa ngaa guzltar saba. Da ray ngene, ndəhay a, a sərmara Gazlavay ta wuzar cek la daa slam aha. A gwa aa guzley ba, aa guzltar na, si ta har gway.

²³ Masa Zakari ta ndəvda sləra anğa cay na, ta', a daw a way.

²⁴ Fa dəba ha, Elizabet, ngwas anğa, a key hwaɗ. Kiya zlam aa manjakaya da way da way, a bada hwaɗ a. Aa guzley daa ray anğa, a ləvey:

²⁵ «Nəka, cek masa Bay Gazlavay ma kayawa. A wufey ngə bəlyawa hwaray daa dey adaw fa dey ngə ndəhay.»

Maslan ngə Gazlavay da vad a wuzda mayawa ngə Yesu

²⁶ Masa Elizabet aa ta hwaɗ kiya maakwaw na, Gazlavay a slərwa maslan anğa, Gabəriyel, a *Nezeret daa hwayak ngə *Galile,

²⁷ fa dam-sabara, kwakwa ngə ndaw mezəley *Jawzef. Jawzef e na, ara səkway ngə Bay *Davit zleezle. Mezəley ngə sabara ha, *Mari.

²⁸ Maslan ngə Gazlavay heyey kula! a mbəzey fa vəɗa, a car har, a ləvar: «Ya caka har, Mari. Bay Gazlavay a wufka kalah. Bay Gazlavay aa ta kah.»

²⁹ Mari ma cənda mey a na, mey a, a həbar ray. A wulkey daa ray anğa, a ləvey: «Mecey-har a, keɗe na, a wufey ngə ləvey na, kwara?»

³⁰ Ta', maslan ngə Gazlavay a, a ləvar: «Ka da zlurey ba Mari, maja ara Gazlavay ma pəska mey.

³¹ Ka da key hwaɗ, ka da yawa bəzey mezəle, ka da zəla bəzey a, Yesu.

³² A da key ndaw mahura, asaya, anğa Bəzey ngə Bay Gazlavay da vad. Bay Gazlavay a da tərda ngə bay aa slam a ngə Bay Davit, ndaw daa səkway anğa zleezle.

³³ A da wa səkway ngə *Israyel ngə sərmataw. Bay anğa fa da ndəvey daa ba səlak.»

³⁴ Mari aa guzlar a maslan ngə Gazlavay heyey, a ləvar: «Cek aha, a da key na, kwara? Maja ya sərə zel ba.»

³⁵ Maslan a, a mbəɗɗara, a ləvar: «Mesəfney ngə Bay Gazlavay da vad a sawa la a ray akah ta gədan anğa, a bərdaka la anda meezeɗ. Da ray ngene, bəzey a ma da yawa na, ara bəzey masa mapakaya wal ngada Gazlavay. Ndəhay a da zəlmara Bəzey ngə Gazlavay.

³⁶ Nəka, Elizabet, səkway akah, kwa anğa madanğwas na, anğa ta hwaɗ wure keɗe may. A da yawa bəzey mezəle.

Ndohay a ləvam anğa dərlay, ama wure keđe aa ta hwađ kiya maakwaw,

³⁷ maja cek masa ta banay fa Gazlavay na, daa ba.»

³⁸ Fa dəba ha, Mari a ləvar: «Yah ndaw ma ka sləra nğa Bay Gazlavay. Cek aha nğa key anda kah ma ləvey.» Ta', maslan nğa Gazlavay a, a mbəkda, a daw.

Mari a daw fa Elizabet

³⁹ Daa dar a nğene, *Mari a sləkdey, a wusey vaw, a daw a slala daa anğwa nğa *Jude.

⁴⁰ A wusey a slala ha, kula! a mbəzey a way *Zakari, ta', a car har a Elizabet.

⁴¹ Daa masa Elizabet ma cənda mecey-har nğa Mari na, bəzey da hwađ Elizabet a, a wusey. Wure nğene, *Mesəfney nğa Gazlavay a sawa a ray Elizabet.

⁴² Da ray nğene, aa guzley ta gədan, a ləvar a Mari: «Maaya nğa Gazlavay aa da ray akah, a fəna da ray nğusay siya tabiya. Asaya, maaya nğa Gazlavay aa da ray bəzey masa kah ma da yarawa!

⁴³ Yah na, wa may wa, amba maman nğa Bay adaw Mahura a sawa a way adaw anda keđe na!

⁴⁴ Ya səra kah maman nğa Bay adaw Mahura na, maja, daa masa yah ma cənda day akah, kah ma caya har na, bəzey da hwađ adaw a wusey ta meesəmey.

⁴⁵ Maaya nğa Gazlavay aa da ray akah, maja ka ta təba mey anğa la da ray cek ma da key fara fara.»

Mari a həlma Bay Gazlavay

⁴⁶ Fa dəba ha *Mari a ləvey:

«Ya fa həlma Bay Gazlavay ta mevel adaw cəpa.

⁴⁷ Ya faa səmey maja Gazlavay, ndaw ma ləhdaya,

⁴⁸ kwa yah, ndaw mahura fa mey nğa ndohay ba na, anğa fa nəkfaya dey, yah, ndaw ma ka sləra anğa.

Fara fara, dəga wure keđe, ndohay ma da yamawa tabiya, a daa guzlam da ray adaw, a ləvam:

“Maaya nğa Gazlavay aa da ray anğa”.

⁴⁹ A da ləvam anda keđe

maja Bay Gazlavay Mawaca-waca, ta kaya cek maaya la.

Anğa na, Bay Gazlavay pal.

⁵⁰ A katar maaya la mandaw mandaw

nğada ndohay ma namar ray.

⁵¹ Aa ta gədan nğa key sləra mahura,

aa wadatar ray nğa ndohay ma zlapam.

- 52 A badata bay hay ma wamata ndəhay ta gədan daa bay, a pata ndəhay masa ma namar ray nga mahura.
- 53 Ndəhay masa may fa catar na, a rəhdata ta cek mezəmey, masa-zleley hay na, a vəhdata ta har ba' kəne.
- 54 Ta jəndakwar la,
aləkwa ndəhay *Israyel hay, ma ka sləra anğa hay,
anda aa ma ləvtar zleezle a papan nga papa aləkwa hay.
- 55 A ləvtar na, a da key maaya ngada *Abəraham ta ngada ndəhay ma yamawa daa səkway anğa hay nga sərmataw.»
- 56 Mari a njeý da way Elizabet a key gweegwe kiya maakar. Fa dəba ha, ta', a vəhwa a way anğa.

Mey da ray mayawa nga Jan-Baptis

57 Kiya nga Elizabet ta wuswa cay nga yey. A yawa bəzey mezəle.

58 Meseembew anğa hay ta səkway anğa hay ma cəndamara masa Bay Gazlavay ta kar maaya la na, aa səmam ta ata Elizabet e.

59 Masa bəzey a, ma key luma pal cay na, meseembew anğa hay ta səkway anğa hay heyey a samawa aa kwakwas nga *mesley mandawal nga bəzey a ta nga pey mezəley. A wudam a pamar mezəley *Zakari, mezəley nga papaha.

60 Ama mamaha, a ləvtar: «Kəne ba, mezəley anğa na, *Jan.»

61 A mbəddamara, a ləvmar: «Ka zəla anda keđe na, kwara? Ndaw mezəley daa səkway akwar anda keđe daa ba.»

62 Ta', aa cəfdamara Zakari, papaha, ta har, amba a sərmara a wudəy nga zəla bəzey a me.

63 Zakari a, ta', aa cəfdəy hwadam kəslparah a nga wuzleley mezəley a. A wuzlala: «Mezəley anğa, Jan.» Ndəhay tabiya a rəzlam fa mezəley a.

64 Wure wure ngenə, Zakari a zlar meeguzley dəba, anğa madagazlam saba. Ta', a həlma Gazlavay ta gədan.

65 Meseembew anğa hay tabiya mandərzay a katar. Ndəhay daa anğwa daa hwayak nga *Jude he tabiya, fa kadamara meý a.

66 Ndəhay tabiya ma cəndamara meý a, a wulkam daa ray ata, a ləvam: «Bəzey a keđe na, a da tərey na, me?» A ləvam anda keđe maja maaya nga Bay Gazlavay aa da ray a fara fara.

Zakari a wuzey mey da ray slëra maaya masa Gazlavay ma ka

⁶⁷ Fa dëba ha, *Mesəfney nga Gazlavay a sawa a ray *Zakari, papaŋ nga bəzey heyey. A zlar nga wuzey mey anda *ndaw ma təla mey nga Gazlavay, a ləvey:

⁶⁸ «Həlmakwa Bay Gazlavay, Gazlavay aləkwa *Israyel hay, maja anğa ta jənta ndəhay anğa hay la, amba a ləhdata.

⁶⁹ Aa ta slərndakwar ndaw masa-gədan la, nga ləhdandakwar daa mebərey.

Ndaw aha, anğa daa səkway nga Bay Davit, ndaw ma ka slëra anğa zleezle.

⁷⁰ Bay Gazlavay taa guzlndakwar la dəga zleezle ta mey ndəhay ma təla mey anğa hay.

⁷¹ Ta ləvndakwar la, a da ləhdandakwar dasi har nga masa-gəra aləkwa hay, leŋ dasi har nga ndəhay

ma wudam nga hətmandakwar fa dey ba.

⁷² A wuzdərwa mewudəy-vaw anğa la, fa papaŋ nga papa aləkwa hay,

A sərfada *mejəwey-mey anğa la ta aləkwa.

⁷³ Daa mejəwey-mey a na, Gazlavay taa guzlar la

a *Abəraham papaŋ nga papa aləkwa zleezle, a ləvar,

⁷⁴ a ləhdandakwar la dasi har nga masa-gəra aləkwa hay, amba ya kakwa slëra ngada Gazlavay ta mandərzay ba,

⁷⁵ amba ya tərkwə ndəhay maaya fa Gazlavay, ndəhay ma ka slëra ta cəved e,

haa kasl fa meməcey aləkwa.

⁷⁶ Bəz adaw, kah may,

ka da tərey ndaw ma təla mey nga Bay Gazlavay da vad

maja ka da daw fa mey nga Bay Gazlavay nga dīyra cəved.

⁷⁷ Ka da wuzdatara a ndəhay nga Gazlavay na, Gazlavay a, a da ləhdata

maja a da mbəkdatara mebərey ata.

⁷⁸ A da ləhdata na, maja anğa na, maaya kalah, asaya, a sərey dey-ceceh kalah fa ndəhay.

Fa slərndakwar mewudəy da vad anda pas,

⁷⁹ amba a wadatar dey a ndəhay

ma njam daa ləvan masa fa da məcəm,

1:68 1.68 Ps 41.14; 72.18; 111.9; Lk 4.18-21; 7.16; 19.44 **1:69 1.69** Ps 132.17; Mt 20.30-31 **1:70 1.70** Rm 1.2; Iz 9.1-6; Mi 5.1-3 **1:71 1.71** Ps 106.10 **1:72 1.72** Ps 106.45; 105.8-9; Lev 26.42 **1:73 1.73** MC 22.16-18 **1:74 1.74-75** Tit 2.12, 14 **1:76 1.76** Mal 3.1; Mt 11.10; Mk 1.2; Lk 7.27 **1:77 1.77** Jer 31.34 **1:78 1.78** Mab 34.6; Iz 60.1-2; Mal 3.20

asaya, amba ya hətakwa nga njeý ta zazay.»

⁸⁰ Bəzey a heyey, fa gəley, fa gəley, lenjesl fa səkwa. Fa dəba ha, a daw a wuzlah-ley, aa manjakaya fetede, kasl pas masa anğa ma zlar nga wuzey mey nga Gazlavay fa mey nga ndəhay Israyel hay.

2

*Mey da ray mayawa nga Yesu
(Matiye 1.18-25)*

¹ Daa masa ata ma yamərwa *Jan-Baptis la na, Agustus, bay mahura da ray bay hay daa hwayak hay nga *Rawm, a ləvtar a mahura hay amba a sləfmata ndəhay daa hwayak anğa hay tabiya.

² Ngene, ara mesləfey ndəhay ngeeme. Mesləfey ndəhay a ngene na, a key daa masa Kiriniyus fa wata ndəhay daa hwayak nga Siri.

³ Ndəhay tabiya a diyam nga sləfwa vaw a. Kwa waawa na, a daw aa hwayak anğa, masa papaha ma yawa da hwad a.

⁴⁻⁵ *Jawzef may, a sləkdey da *Nezeret daa hwayak nga *Galile, a sləkdam ta kwakwa anğa *Mari, a diyam a Betəlehem daa hwayak nga *Jude nga sləfwa vaw. A diyam a Betəlehem na, maja Bay *Davit zleezle a yawa da hwad a. Jawzef na, anğa səkway nga Davit. Mari, kwakwa anğa ha na, aa ta hwad.

⁶ Ata ma wusam la a Betəlehem na, kiya nga Mari ta wuswa cay nga yey.

⁷ Mari a yawa bəzey mezəle, mahura anğa. Ta', a mbəza ta zana, a nada aa cek masa gənow hay ma zəmam cek da hwad a maja daa way meney nga mələk hay na, slam gada ata daa ba.

Maslan nga Bay Gazlavay a wuzdatara mayawa nga Yesu a mecəkwer hay

⁸ Daa hwayak a ngene, mecəkwer hay daha, manatakaya ta tavad da ley. Fa jədam gənow ata hay.

⁹ *Maslan nga Bay Gazlavay da vad ta', a wuztar vaw. Mewedey nga Bay Gazlavay a sawa a ray ata. Mecəkwer hay a, a zluram ga, aa wasam pər-par!

¹⁰ Ama maslan a heyey, a ləvtar: «Ka zluram ba, maja ya sawa na, ya handakwar mey maaya masa ma da vəltar meesəmey ga a ndəhay tabiya.

¹¹ Dasi tavaɗ keɗe, da Betəlehem, slala masa Bay *Davít ma yawa zleezle da hwaɗ a, ndaw masa ma da ləhdata ndəhay ta yawa la maja akwar. Ara *Kəriste, Bay Mahura.

¹² Yaw, amba ya wuzdakwara cek ŋga sərey mey a fara fara, ka da hətfamar bəzey-gevew * mambəzkaya ta zana, manadakaya daa cek masa gənow hay ma zəmam cek da hwaɗ a.»

¹³ Wure wure ŋgene, maslaŋ hay ŋga Gazlavay mekele a samawa ga, a tulakamara maslaŋ ŋga Gazlavay heyey. A həlmamara Gazlavay ta walay. A ləvam:

¹⁴ «Anja ndəhay ŋga həlmamara Gazlavay da vaɗ, asaya, anja Gazlavay ŋga vəltar zazay a ndəhay masa aa ma wuɗta da bəla.»

Mecəkwer hay a diyam a Betəlehem

¹⁵ Fa dəba ha, maslaŋ hay ŋga Gazlavay heyey a vəham a vaɗ. Ta', mecəkwer hay a, a slam yawa da wuzlah ata, a ləvam: «Bay Gazlavay ma wuzdandakwara cek keɗe na, nakwa la a Betəlehem, amba ya nəkakurwa cek masa ma key fetede.»

¹⁶ A sləkɗam, a diyam ta mewusey-vaw. A hətfamatar ata *Mari ta *Jawzef, leŋ bəzey-gevew manakaya daa cek masa gənow hay ma zəmam cek da hwaɗ a.

¹⁷ Ata ma hətfamatar la na, a kadamatara cek masa maslaŋ ŋga Gazlavay ma wuzdatara da ray bəzey a heyey.

¹⁸ Ndəhay tabiya ma cəndamara mey masa mecəkwer hay a ma kadamatara na, a rəzlam.

¹⁹ Ama ŋga Mari na, a pa mey a, aa mevel aŋga. Mandaw mandaw fa wulkey da ray a.

²⁰ Fa dəba ha, mecəkwer hay heyey a vəham fa gənow ata hay. A həslmar ray a Gazlavay maja aa mahura da ray ndəhay. A həlmamara da ray cek hay tabiya masa ata ma cəndamərwa, ta masa ata ma hətmərwa fetede, maja cek hay tabiya ta kam la anda maslaŋ ŋga Gazlavay ma wuzdatara heyey.

A pamar mezəley a Yesu

²¹ Fa dəba ha luma pal, ɗar ta wuswa cay ŋga sley mandawal ŋga bəzey a, ta pas ŋgene a pamar mezəley Yesu, mezəley masa maslaŋ ŋga Gazlavay da vaɗ ma wuzdara a mamaha daa masa ta key hwaɗ daa ba araŋ.

2:11 2.11 Mt 20.30-32; Jan 4.42; SNM 5.31; 13.23; 2Pi 1.11 * **2:12 2.12**
 bəzey-gevew: bəzey-ndedefez **2:14 2.14** Iz 57.19; Mt 10.13, 34; Mk 9.50; Lk
 1.79; 10.5-6; 12.51; 19.38, 42; 24.36; Jan 4.27; SNM 10.36; Ef 2.14, 17 **2:19 2.19**
 2.51 **2:21 2.21** 1.31

22 Fa dɔba nga *mesley mandawal nga bɔzey a, pas ta wuswa cay amba *Jawzef ta *Mari † a kam kwakwas nga tɔrey maaya fa Gazlavay anda kwakwas nga Mawiz ma lɔvey maja mawuda. Da ray ngene, ata Jawzef ta Mari a diyam aa berney nga Jeruzelem. Asaya, a handamara bɔzey ata nga wuzey a Bay Gazlavay,

23 maja mawuzlalakaya daa *mewey nga Bay Gazlavay, a lɔvey: «Bɔza hay mezɔle tabiya ma yamawa ngeeme na, ma pam wal ngada Bay Gazlavay.»

24 A diyam amba a vɔlam cek a Bay Gazlavay. A vɔlam na, magwada-gwada hay cew, da daa ba, makurgwadakw hay cew, anda kwakwas nga Gazlavay ma lɔvey.

Simeyanɔw a hɔlma Bay Gazlavay maja Yesu

25 Ndaw da *Jeruzelem e daha, mezɔley Simeyanɔw. Ndaw aha, ara ndaw maaya, fa sɔpa cɔvedɔ nga Gazlavay ta mevel pal, aa fa sɔkwa ndaw masa ma da sawa nga lɔhdata *Israyel hay. *Mesɔfney nga Gazlavay aa da ray a.

26 Mesɔfney a, ta lɔvar la: «Ka da mɔcey na, si ka hɔtar *Kɔriste, *ndaw masa Gazlavay ma wala nga lɔhdata ndɔhay la.»

27 Fa dɔba ha, Mesɔfney nga Gazlavay heyey, a handa aa *Way-mekey-kwakwas nga Gazlavay. Ta pas ngene, ata *Jawzef ta *Mari ta handamara Yesu, bɔzey ata heyey la, aa way a, amba a kam kwakwas da ray a anda *kwakwas nga Mawiz ma lɔvey.

28 Simeyanɔw a hɔtar bɔzey a, ta', a humbta a har, a kar suse a Gazlavay, a lɔvey:

29 «Wure kedɛ, Bay Gazlavay, mey masa kah ma lɔvya na, ta key cay.

Anda kedɛ, ka gwa nga mbɔkdaya,

yah, ndaw ma ka slɔra akah, nga mɔcey ta zazay.

30 Maja yah, ta dey adaw,

ya ta hɔtar ndaw ma da lɔhdata ndɔhay daa mebɔrey cay.

31 Ka wala ndaw aha na, ngada ndɔhay tabiya.

32 Anɔa anda slam-mewedey ngada ndɔhay da bɔla tabiya. Ndɔhay a da hɔlmamata ndɔhay akah hay Israyel, maja ndaw aha kedɛ.»

† 2:22 2.22 Jawzef ta Mari: Har-gɔdanɔ nga dɛrewel hay ta mey Gɔrek a lɔvey: «...pas ata ta wuswa cay nga tɔrey maaya...». Dɛrewel hay mekele a lɔvam: «...pas anɔa ta wuswa cay nga tɔrey maaya...». Ndɔhay a wulkam «ata» a wudɛy nga lɔvey Jawzef ta Mari. Kwa kwakwas nga Mawiz aa guzley da ray ngwas daada gway na, ama ndɔhay a wulkam Luk aa guzley da ray Jawzef may, maja Jawzef a ta gɔsfar la fa Mari daa masa anɔa mawuda. 2:22 2.22-24 Lev 12; Mesl 18.15-16 2:23 2.23 Mab 13.2 2:30 2.30-31 Iz 52.10 2:32 2.32 Iz 42.6; 49.6; 46.13

³³ Ata papaŋ nga Yesu ta mamaha a rəzlam da ray mey masa Simeyaŋw maa guzley da ray bəzey a.

³⁴ Ta', Simeyaŋw a pəstar mey. Fa dəba ha, a ləvar a Mari, mamaŋ nga Yesu: «Gazlavay a wala bəzey kede amba ndəhay Israyel ga a tədam aa mebərey, siya hay may, a mbəkdamara mekey mebərey, a səpmara Gazlavay ta cəved e. Anğa, ndaw ma wuzdatara a ndəhay ara Gazlavay ma wufey nga ləhdata ndəhay daa mebərey, ama ndəhay ga a da ngəldamara ba.

³⁵ A wuzdərwa mewulkey nga ndəhay ga mabadakaya la amba ndəhay tabiya a səpmara. Kah, mamaha na, mevel akah a tərkesley la anda ndaw ma ngəmka ta dəlaw.»

An a kar suse a Gazlavay

³⁶ Daa *Way-mekey-kwakwas nga Gazlavay heyey, ngwas ma təla mey nga Gazlavay daha, mezəley An. Anğa, dam nga Fanəwel, səkway nga Aser. Aa madanğwas cay. Daa sabara anğa, a ley zel, a njam mevey maasala.

³⁷ Fa dəba nga zel e ma məcey la, ngwas a, a njeý taava anğa, ngwas-vagay. Mevey anğa, kwakwar daanğafad a ray a məfad. Aa daa Way-mekey-kwakwas nga Gazlavay a mandaw mandaw, fa kar sləra a Gazlavay taa vad, taa pas, fa key *daliyam, fa dərey danğay.

³⁸ Masa Simeyaŋw ma pəstar mey cay na, wure wure ngene, An a ngəchey a cakay ata, a kar suse a Gazlavay. Fa dəba ha, aa guzley da ray bəzey a ngada ndəhay tabiya da *Jeruzelem masa fa səkwmarara amba Gazlavay a ləhdata.

³⁹ Masa ata *Jawzef ta *Mari ma ndəvdamərwa mekey kwakwas a tabiya cay anda kwakwas nga Bay Gazlavay ma ləvey na, a vəhmawa a slala ata, *Nezeret, da *Galile.

⁴⁰ Bəzey a, fa gəley, fa gəley, fa hətəy gədan, lenğesl fa səkwa. Mepəsey-mey nga Gazlavay aa da ray a.

Yesu anğa ta mevey kuraw a ray a cew

⁴¹ Fa mevey a, fa mevey a, ata *Jawzef, papaŋ nga Yesu, ta *Mari, mamaha a diyam a *Jeruzelem nga kawa gwagway nga *Pak.

⁴² Masa Yesu, anğa ta mevey kuraw a ray a cew na, ta', a ngəlmara, a diyam bama aa gwagway a, anda kwakwas ata ma ləvey.

⁴³ Masa gwagway a daa saba na, a vəhmawa a way, ama Yesu, bəzey ata na, ta njawa sem fa dəba da Jeruzelem e. Ata papaha, ta mamaha, ta səpmara daa ba.

44 A wulkam na, Yesu aa daa cøved ta ndøhay siya ma diyam ta ata. A kam daa cøved dar pal, ta', a søpmara da wuzlah sækway ata hay, ta da wuzlah jam ata hay.

45 Ama ta høtmar daa ba. Da ray ηgene, a vøham a Jeruzelem ηga søpmøwa.

46 Nηga dar maakar a na, a høtfamar daa *Way-mekey-kwakwas ηga Gazlavay. Anηga manjakaya da wuzlah *ndøhay maa sækada *kwakwas ηga Mawiz, anηga fa jøkfatar slømay, faa cødfafatar mey.

47 Ndøhay tabiya ma jøkfamar slømay, a røzlam maja lenηesl anηga, asaya, maja mey hay maaya masa anηga ma mbøddatara.

48 Ata papaha ta mamaha ma høtmar la na, a røzlam ga da ray a. Mamaha a løvar: «Bøz adaw, ka kandar anda kede na, maja me? Ala ta papakw fa søpmaka, mevel ala ta døsley sem.»

49 A mbøddatara, a løvtar: «Ka søpmaya maja me? Si ya njey daa way ηga Papay na, ka sørmara ba daw?»

50 Ama a sørmara mey a, a wufey ηga løvey kwara ba.

51 Ta', Yesu a samawa bama a slala *Nezeret heyey døba. A cøntar mey. Ama mamaha na, fa wulkadata cek hay a kede tabiya daa mevel anηga.

52 Yesu fa gøley, fa gøley. Lenηesl fa sækwa. Anηga maaya fa Gazlavay len fa ndøhay.

3

Jan-Baptis a wuzey mey ηga Gazlavay (Matiye 3.1-12; Mark 1.1-8; Jan 1.19-28)

1 Masa *Jan-Baptis ma da zla sløra anηga na, Bay Tiber, ta key mevey kuraw a ray a zlam cay daa bay da ray bay hay daa hwayak hay ηga *Rawm. *Pawns Pilat anηga bay daa hwayak ηga *Jude. *Herawt, aa bay daa hwayak ηga *Galile. Mølmaha *Følep, anηga bay da Iture ta da Tørakwanit. Lizaniyas aa bay daa hwayak ηga Abilenη.

2 Ata Han ta Kayif, ata mahura hay da ray ndøhay ma ka kwakwas ηga Gazlavay. Daa ηgene, Jan-Baptis, bøzey ηga *Zakari, aa da wuzlah-ley. Ta', Gazlavay a wuzdara mey anηga.

3 Da ray ηgene, *Jan a, a pøkta slam hay tabiya masa gweegwe ta wayam ηga Jurdenη. A wuztar mey ηga Gazlavay a ndøhay, a løvtar: «Mbøddamara menjey akwar, søpmara Gazlavay ta mevel pal, høtam *baptem, amba Gazlavay a mbøkdwara mebørey akwar.»

4 Cek aha ta key la anda *Izay, *ndaw ma tɔla mey nga Gazlavay zleezle, ma wuzlala daa dɛrewel nga Gazlavay, a lɔvey:

«Ndaw fa wudey da wuzlah-ley, a lɔvey:

Diyamar cɔved ɲgada Bay Mahura,

dɛymara cɔved e maaya maaya dɛr e.

5 Pɛshamata lapatam hay cɔpa.

Rarakadamata aɲgwa hay, leɲ dɛɲgwalay hay cɔpa.

Diymata cɔved hay magɛjvadatakaya ɲga tɛram dɛr e, sabalamata cɔved maaya ba hay.

6 Anda kedɛ, ndɔhay tabiya a hɛtmar Gazlavay la, ndaw ma da lɔhdandakwar daa mebɔrey.»

7 Daa masa ndɔhay ga fa samawa fa Jaɲ-Baptis, amba a katar baptem na, Jaɲ-Baptis a, a lɔvtar: «Hey! akwar bɔza hay ɲga kucsl hay! Ma lɔvkwar ka lɔham la daa banay masa Gazlavay ma da handɛrwa a ray akwar na, wa?

8 Kam cek maaya, amba ndɔhay a sɛrmara akwar ta mbɛddamara menjey akwar sem, akwar fa sɛpmara Gazlavay ta mevel pal. Ka da wulkam daa mevel akwar, ka lɔvam: “Papa alɛkwa na, ara *Abɛraham, maja ɲgene, Gazlavay a da sɛrfandakwar dey-ceceh.” Ka da lɔvam kɔne ba, maja ya fa lɔvkwar fara fara, Gazlavay a gwa ɲga tɛrdata aɲgwa hay kedɛ ɲga sɛkway ɲga Abɛraham may.

9 Wure kedɛ, zɛmba maɲgakaya cay ɲga ɲgɔmey wudez hay ta slaslalay a cɔpa. Kwa wudez wura wura ma yey babɔza maaya ba na, a da ɲgɔmamara, a pamar awaw fa vɔda.»

10 Ta', ndɔhay makustakaya aa cɛfdamara, a lɔvmar: «Kaa, ya da kam na, kwara?»

11 A mbɛddatara, a lɔvtar: «Ndaw masa zana aɲga hay cew daha na, ɲga vɔlar pal a ndaw masa zana aɲga daa ba. Asaya, ndaw masa cek mezɔmey daha na, ɲga wunkamara ta ndɔhay masa cek mezɔmey daa ba.»

12 Ndɔhay ma cakala budaw a samawa ɲga key baptem may, aa cɛfdamara Jaɲ, a lɔvam: «Bay ala, kaa ala na, ya da kam kwara?»

13 A mbɛddatara, a lɔvtar: «Ka daa cɛfdam dala ɲga budaw ma fɛna masa ɲgwamna maa cɛfda ba.»

14 Sewje hay may, a samawa, aa cɛfdamara kɔne, a lɔvam: «Kaa, ala na, ya da kam kwara?» A mbɛddatara, a lɔvtar: «Ka da tɔbam dala ɲga ndaw ta gɔdan ba. Ka daa dɛdfamatar mey a ray ndɔhay ba. Sasɔmam da ray dala masa ata ma vɔldamakwara fa mawurbay ɲga slɛra akwar gway.»

¹⁵ Ndəhay na, fa səkwmarə cek maaya ma da key. Da ray ɲgene, kwa waawa da wuzlah ata fa wulkey daa ray aɲga, da Jan a na, ara *Kəriste, *ndaw masa Gazlavay ma wala ɲga ləhdata ndəhay heyey kwa.

¹⁶ Anda keɖe, Jan a ləvtar a ndəhay tabiya: «Yah na, ya kakwar baptem ta yam daada gway, ama ndaw mekele ma fənya a sawa la. Kwa ya wusa ɲga pəska zewed ɲga tarak aɲga ba. Aɲga na, a da kakwar baptem ta *Mesəfney ɲga Gazlavay leɲ ta awaw.

¹⁷ Aɲga da gədak ta vəley mekəfey daw da har ɲga wunkey bəz-daw ta cekwesl e. Bəz-daw na, a da həla a wuded aɲga. Ama cekwesl e na, a da par awaw fa vəɖa, awaw masa ma məcey ba ɲga sərmataw.»

¹⁸ Anda keɖe, Jan a vəltar gəɖaɲ a ndəhay ta mey hay mekele mekele saya, a wuztar *Mey-maaya-mawiya.

¹⁹ Ama Jan a mbəɖar ray a Bay Herawt maja aa ma la Herawdiyət, ɲgwas ɲga məlmaha, ɲga ɲgwas aɲga, asaya, maja aa ma key cek hay mekele mekele maaya ba.

²⁰ Da ray ɲgene, Bay Herawt heyey a key cek maaya ba ma fəna saya, a kəzla Jan aa fərsəne.

Jan-Baptis a kar baptem a Yesu

(Matiye 3.1-12; Mark 1.1-8; Jan 1.19-28)

²¹ Masa *Jan-Baptis fa katar *baptem ɲgada ndəhay tabiya heyey na, Yesu a sawa amba a hətey baptem may. Ta', Jan-Baptis a kar baptem e. Fa dəba ha, Yesu a dərey daɲgay. Masa aa fa dərey daɲgay na, slam da vad bəɖaɲ! a wurey.

²² *Mesəfney ɲga Gazlavay a pawa salay a ray a, a nəkey anda makurgwadakw. Day a cənwa da vad, a ləvey: «Kah na, Bəzey adaw masa yah ma wuɖa kalah. Ya faa səmey ga da ray akah.»

Ndəhay daa səkway ɲga Yesu

(Matiye 1.1-17)

²³ Masa Yesu ma da zlar sləra aɲga na, aɲga ta mevey kwakwar maakar. Ndəhay a wulkam Yesu na, ara bəzey ɲga *Jawzef.

Jawzef na, bəzey ɲga Heley,

²⁴ Heley na, bəzey ɲga Matat,

Matat na, bəzey ɲga Levi,

Levi na, bəzey ɲga Melki,

Melki na, bəzey ɲga Janay,

Janay na, bəzey ɲga Jawzef,

25 Jawzef na, bəzey nga Matatijas,
 Matatijas na, bəzey nga Amus,
 Amus na, bəzey nga Nahum,
 Nahum na, bəzey nga Esəli,
 Esəli na, bəzey nga Nagay,
 26 Nagay na, bəzey nga Mat,
 Mat na, bəzey nga Matatijas,
 Matatijas na, bəzey nga Semeyin,
 Semeyin na, bəzey nga Jawzek,
 Jawzek na, bəzey nga Jawda,
 27 Jawda na, bəzey nga Jəwanan,
 Jəwanan na, bəzey nga Reza,
 Reza na, bəzey nga Zarubaabel,
 Zarubaabel na, bəzey nga Salatiyel,
 Salatiyel na, bəzey nga Neri,
 28 Neri na, bəzey nga Melki,
 Melki na, bəzey nga Adi,
 Adi na, bəzey nga Kwazam,
 Kwazam na, bəzey nga Elmadam,
 Elmadam na, bəzey nga Er,
 29 Er na, bəzey nga Yesu,
 Yesu na, bəzey nga Eliyezer,
 Eliyezer na, bəzey nga Jəwarim,
 Jəwarim na, bəzey nga Matat,
 Matat na, bəzey nga Levi,
 30 *Levi na, bəzey nga Simeyan,
 Simeyan na, bəzey nga Juda,
 Juda na, bəzey nga Jawzef,
 Jawzef na, bəzey nga Jawnam,
 Jawnam na, bəzey nga Eliyakim,
 31 Eliyakim na, bəzey nga Meleya,
 Meleya na, bəzey nga Mena,
 Mena na, bəzey nga Matata,
 Matata na, bəzey nga Natan,
 Natan na, bəzey nga Davit,
 32 *Davit na, bəzey nga Jese,
 Jese na, bəzey nga Awbet,
 Awbet na, bəzey nga Bəwaz,
 Bəwaz na, bəzey nga Sala,
 Sala na, bəzey nga Naasan,
 33 Naasan na, bəzey nga Aminadap,
 Aminadap na, bəzey nga Adəmin,
 Adəmin na, bəzey nga Arni,

3:27 3.27 Salatiyel: 1Mev 3.17; Es 3.2

3:30 3.30-33 Rut 4.18-22; 1Mev 2.1-14

3:31 3.31 Natan: 2Sam 5.14

Arni na, bəzey nga Esraṅw,
 Esraṅw na, bəzey nga Fares,
 Fares na, bəzey nga Juda,
³⁴ Juda na, bəzey nga *Jakwap,
 Jakwap na, bəzey nga Izak,
 Izak na, bəzey nga Abəraham,
 Abəraham na, bəzey nga Tara,
 Tara na, bəzey nga Nahwar,
³⁵ Nahwar na, bəzey nga Seruk,
 Seruk na, bəzey nga Ragaw,
 Ragaw na, bəzey nga Pelek,
 Pelek na, bəzey nga Eber,
 Eber na, bəzey nga Sala,
³⁶ Sala na, bəzey nga Kaynam,
 Kaynam na, bəzey nga Arfazat,
 Arfazat na, bəzey nga Sem,
 Sem na, bəzey nga Nəwe,
 Nəwe na, bəzey nga Lemek,
³⁷ Lemek na, bəzey nga Matuzala,
 Matuzala na, bəzey nga Henakw,
 Henakw na, bəzey nga Jaret,
 Jaret na, bəzey nga Meleliyel,
 Meleliyel na, bəzey nga Kaynam,
³⁸ Kaynam na, bəzey nga Enaws,
 Enaws na, bəzey nga Set,
 Set na, bəzey nga Adam,
 Adam a na, bəzey nga Gazlavay.

4

*Bay-malula a wufey nga bata Yesu
 (Matiye 4.1-11; Mark 1.12, 13)*

¹ Fa dəba ha masa *Jan-Baptis ma kar *baptem la a Yesu na, Yesu a vəhwa daa wayam nga Jurdeṅ heyey. *Mesəfney nga Gazlavay aa da ray a, ta', a handa a wuzlah-ley.

² Aa manjakaya fetede dər kwakwar məfad. Bay-malula a sawa a cakay a, a jada nga bata amba a key cek maaya ba. Daa masa Yesu aa da wuzlah-ley a na, anṅa fa zəmey cek daa ba. Fa dəba ha, may a car dəba.

³ Ta', bay-malula heyey aa guzlar, a ləvar: «Da kah Bəzey nga Gazlavay na, tərda anṅwa keḏe nga daf taw!»

⁴ Yesu a mbəḏdara, a ləvar: «Mawuzlalakaya daa dərəwel nga Gazlavay, a ləvey: “Ndaw na, a njeṅ ta cek mezəmey daada ba.”»

⁵ Fa dɔba ha, bay-malula heyey a tɔpda aa slam magɔlkaya a vad, wure ŋgene ta', a wuzdara hwayak hay masa bay hay ma wamata da bɔla cɔpa.

⁶ Ta', a lɔvar: «Ya vɔldakawa gɔdan ŋga wey da ray hwayak hay a kefe, ta zleyey hay da hwaɗ a cɔpa. Maja cek hay a kefe cɔpa mavɔldatakaya a har adaw, ya gwa ŋga vɔldata kwa ŋgada waawa masa yah ma wuɗey.

⁷ Anda kefe, da kah ma regedey fa mey adaw la na, cek hay a cɔpa ya vɔldatakawa la.»

⁸ Yesu a mbɔɗɗara, a lɔvar: «Mawuzlalakaya daa ɗerewel ŋga Gazlavay, a lɔvey: “Ka da ragadar na, si ŋgada Bay Gazlavay akah gway. Dɔrar dangay ŋgada Bay Gazlavay pal taava anga.”»

⁹ Asaya, bay-malula a handa aa berney ŋga *Jeruzelem, a tɔpda aa ray ŋga *Way-mekey-kwakwas ŋga Gazlavay, ta', a lɔvar: «Da kah Bɔzey ŋga Gazlavay na, jɔvey daa ray ŋga way kefe a hwayak,

¹⁰ maja mawuzlalakaya daa ɗerewel ŋga Gazlavay, a lɔvey: “Gazlavay a lɔvtar la a maslan anga hay ŋga jɔfmaka.”

¹¹ Mawuzlalakaya saya, a lɔvey: “A slɔwmaka la a har ata amba salay akah a gurzey fa angwa ba.”»

¹² Yesu a mbɔɗɗara, a lɔvar: «Mawuzlalakaya daa ɗerewel ŋga Gazlavay, a lɔvey: “Ka da jada Bay Gazlavay akah ba.”»

¹³ Masa bay-malula ta hɔtey mey ŋga jada Yesu daa saba na, ta', a daw, a mbɔkda ŋga pas mekele.

*Yesu a zlar slɔra anga daa hwayak ŋga Galile
(Matiye 4.12-17; Mark 1.14, 15)*

¹⁴ Yesu a vɔhwa aa hwayak ŋga *Galile, ta gɔdan ŋga *Mesɔfney ŋga Gazlavay da ray a. Daa hwayak a cɔpa, ndɔhay a zlamar ŋgaa guzley da ray a.

¹⁵ Yesu fa wuzey mey ŋga Gazlavay daa way-mewuzey-mey hay ŋga Gazlavay. Ndɔhay tabiya faa hɔmdamara.

*Ndɔhay da Nezeret a rɔsmara Yesu
(Matiye 13.53-58; Mark 6.1-6)*

¹⁶ Ta', Yesu a daw a *Nezeret, slala masa aa ma gɔley da hwaɗ a. Ta *pas memɔskey-vaw, a mbɔzey aa *way-mewuzey-mey ŋga Gazlavay anda aa ma daw maamandaw. A lecey, a daw fa mey ŋga ndɔhay amba a jɔngɔy ɗerewel ŋga Gazlavay.

17 Ta', a wɛlmar dɛrewel mapadakaya, masa *Izay, *ndaw ma tɛla mey nga Gazlavay, ma wuzlala zleezle. A pɛska dɛrewel e, a hɛtfey slam mawuzlalakaya ma lɔvey:

18 «Mesɔfney nga Bay Gazlavay aa da ray adaw,
Bay Gazlavay ta walaya la amba ya wuzdatara
*Mey-maaya-mawiya ngada masa-viya hay.

A slɛrdiwa

amba ya lɔvtar a ndɔhay majɔwtakaya
dasi har nga bay-malula na,
Gazlavay ta pɛskata sem.

A slɛrdiwa nga wurey dey nga wulaf hay,
nga lɔhey ndɔhay dasi har nga masa-gɛra ata hay.

19 A slɛrdiwa amba ya lɔvtar dɛr masa Bay Gazlavay
ma da wuzdɛrwa maaya anɔa a ray ndɔhay na,
ta wuswa cay.»

20 Fa dɔba ha, pad! pad! a pada dɛrewel e heyey, ta', a wɛldara a ndaw ma ka slɛra daa way a. A nɔey fa mey ata nga wuzey mey a. Ndɔhay cɔpa daa way a, fa nɛkmara.

21 Yesu a zlar ngaa guzltar dɔba, a lɔvey: «Mey mawuzlalakaya masa tasana akwar ma cɛndamara kedɛ na, mey a ta key cay wure kedɛ ngada akwar.»

22 Ndɔhay cɔpa a lɔvam da wuzlah ata: «Mey masa alɛkwa ma cɛndakwa fa Yesu kedɛ na, maaya.» A rɛzlam da ray mey anɔa hay maaya masa anɔa maa guzldata, ta', a lɔvam: «Haya, ara na, bɔzey nga *Jawzef, ba diya?»

23 Da ray nɔgene, Yesu a lɔvtar: «Fara fara ka daa guzlam mey-menɔey da ray adaw, ka lɔvam: “Ndaw ma sɛra ray nga slalak, mbɔlda ray akah!” Anda melɔvey ka da lɔvam: “Ala ma cɛndamara slɛra akah hay masa kah ma kata da Kapernayum la cɔpa. Yaw, ka kɔne da slala akah fedɛ may.”»

24 Ta', Yesu aa guzltar saya, a lɔvey: «Ya fa lɔvkwar fara fara, kwa ndaw ma tɛla mey nga Gazlavay wura wura na, fa tɔbmara maaya maaya daa hwayak masa aa ma yawa da hwad a na, daa ba.

25 Wulkam da ray *Eli, ndaw ma tɛla mey nga Gazlavay zleezle. Daa masa anɔa da bɛla na, mevey maakar ta kiya maakwaw, var ta pawa daa ba. May mahura ta key la daa hwayak nga *Israyel cɔpa. Ya fa lɔvkwar fara fara, daa nɔgene, nɔwas-vagay hay ga daha daa hwayak a,

26 ama Gazlavay ta slɛrda Eli fa nɔwas-vagay hay daa hwayak nga Israyel nga jɛnta daa ba sɛlak. A slɛrda na, si

fa ηgwas-vagay masa *Jəwif ba ma njeý da slala Sarəpta daa hwayak ηga Sidanɔw.

²⁷ Asaya, wulkam da ray Elize, ndaw ma təla mey ηga Gazlavay zleezle. Daa masa anɔa da bəla na, maasəkula hay ga daa hwayak ηga Israyel daha, ama kwa ta pərey ndaw pal dasi ata ηga mbəley daa maasəkula ha daa ba. A pərey na, si Naaman, ndaw Siri gway.»

²⁸ Masa ndəhay daa way-mewuzey-mey ηga Gazlavay heyey ma cəndamara mey a na, ata tabiya, mevel a catar ga da ray Yesu.

²⁹ Ta', a lacam, a dafamara, a badamara da wuzlah-way. A handamara aa mey-zelen, amba a təvdamara ηgada hwayak.

³⁰ Ama Yesu pat! a bey la da wuzlah ata, ndal! madaw anɔa.

*Yesu a bəley malula da ray ndaw
(Mark 1.21-28)*

³¹ Fa dəba ha, Yesu a daw a Kapernayum daa hwayak ηga *Galile. Fetede faa sərkadata ndəhay daa *way-mewuzey-mey ηga Gazlavay ta *pas meməskey-vaw.

³² Ndəhay a, a rəzlam da ray meesərkedey anɔa ha, maja aa guzley na, ta gədan masa Gazlavay ma vəldara.

³³ Daa way-mewuzey-mey a ηgene, ndaw daha, aa ta malula da ray. A zlar mewudey ta gədan, a ləvey:

³⁴ «Haya, Yesu, ndaw *Nezeret, walay akah ta ala malula hay me? Ka sawa ηгаа zəddandar daw? Ya səra fara fara, kah na, ndaw ηga Gazlavay, masa aa ma slərdərwa ηga key sləra anɔa.»

³⁵ Yesu aa bəcar a malula da ray ndaw aha, a ləvar: «Njeý teete. Bey da ray ndaw kefe.» Malula da ray ndaw a heyey dac! a tədda ndaw a, a hwayak fa mey ηga ndəhay tabiya, a bey da ray ndaw aha, kwa ta kar cek daa ba.

³⁶ Ndəhay cəpa fetede heyey a rəzlam, aa guzlam da wuzlah ata, a ləvam: «Haya! mey kefe na, ara səkway ηga mey wura, masa ndaw aha a təktar dəy a malula hay ηga bam da ray ndəhay kefe na!»

³⁷ Da ray ηgene, sləmay ηga Yesu fa zəley kwa daa wura daa wura cəpa daa hwayak a.

*Yesu a mbəley masa-macay hay ga
(Matiye 8.14-17; Mark 1.29-34)*

³⁸ Yesu a bey daa *way-mewuzey-mey ηga Gazlavay, a daw a way *Simanɔw. Maman ηga ηgwas ηga Simanɔw a,

vaw fa car, awaw fa vaw ga. Da ray ηgene, aa cɔfdamara Yesu ηga mbɔlda.

³⁹ A daw a gɔbey a ray a, ta', aa bɔcey amba macay a, a mbɔkda ηgwas aha. Macay a, mbak! a mbɔkda, awaw fa vaw heyey daa saba. Wure ηgene, ηgwas aha pɔrta! a lecey, ta', a vɔltar cek mezɔmey.

⁴⁰ Fa dɔba ha pas ma kɔzley la na, ndɔhay tabiya da slala ha masa ndɔhay ta macay hay da way ata hay daha, kwa macay hay wura wura, a handamatɔrwa fa Yesu. A patar har pal pal tabiya a ray, a mbɔldata.

⁴¹ Malula hay ga a bam da ray masa-macay hay a, a wudam, a lɔvam: «Kah Bɔzey ηga Gazlavay.» Ama Yesu aa bɔctar a malula hay a, a tɔkta ηgaa guzley maja a sɔrmara aηga *Kɔriste.

*Yesu a wuzey mey daa hwayak ηga Jude
(Mark 1.35-39)*

⁴² Slam ma wurey la na, Yesu a bey da wuzlah-way, a daw aa slam masa ndɔhay da hwad a daa ba. Ndɔhay ga fa sɔpmara, ta', a hɔtmar. Masa ata ma hɔtmar la na, a wudam amba Yesu a nje y ta ata, a mbɔkdata ba.

⁴³ Ama Yesu a lɔvtar: «Si ya daw a slala hay mekele may ηga wuzey *Mey-maaya-mawiya da ray mewey ηga Bay Gazlavay da ray ndɔhay, maja Bay Gazlavay a slɔrdiwa na, ηga key slɔra ha kɔne.»

⁴⁴ Ta', Yesu a daw a pɔkta slala hay a, a wuzey mey ηga Gazlavay daa way-mewuzey-mey hay ηga Gazlavay mekele mekele daa hwayak ηga *Jude.

5

Yesu a zɔley ndɔhay maakar ηgeeme ηga key gula aηga hay

(Matiye 4.18-22; Mark 1.16-20)

¹ Pas langar daha, Yesu, aηga da mey dɔhwa ηga Genezeret. Ndɔhay ga makustakaya, fa njanjɔrdam vaw ηgada cakay a, maja a wudam a cɔndamara mey ηga Gazlavay.

² Kwambiwal hay cew daha da mey dɔhwa ha. Ndɔhay ma kɔrza ewet, ata da hwad a daa saba, fa pɔrmata *tabaw ata hay. Yesu a hɔtatar kwambiwal hay a.

³ Ta', a tɔpey aa kwambiwal ηga ndaw mezɔley *Simanηw. Aa cɔfda Simanηw ha ηga ηgɔchada kwambiwal a nekɔfey

ngada wuzlah yam. Masa Simanɔw ma ngəchada kwambiwal a la na, Yesu ta', a njeɣ ta njeɣ a hwaɗ a, fa wuzdatara mey nga Gazlavay a ndəhay da mey dəhwa ha.

⁴ Fa dəba ha masa anɣa ma wuzdatara mey nga Gazlavay la na, a ləvar a Simanɔw: «Ŋgəchada kwambiwal akah aa slam masa yam da hwaɗ a selesen. Fetede, akwar ta mandala akah hay, kəzlamata tabaw akwar hay aa yam a, ka hətam ewet la.»

⁵ Simanɔw a mbəɗɗara, a ləvar: «Bay ala, tavaɗ tavaɗ keɗe, ala ta gəram la daa ewet e, ama kwa ya ta hətam daa ba səlak. Yaw, da ara kah ma ləɣya na, ya kəzlamata tabaw hay a, aa yam a cəŋga.»

⁶ Ta', a kəzlamata tabaw ata hay aa yam, wure ŋgene, a kəzlamata ewet ga daa yam a. Tabaw hay a, a zamar nga ngərey maja ewet ga kalah.

⁷ Anda keɗe, a gəvcamatərwa mandala ata hay daa kwambiwal mekele nga jənmata. Mandala ata hay a, a samawa, a rəhdamata kwambiwal hay cewete ta ewet, haa kwambiwal hay a, a wufam nga ndəkwaɗ asi yam.

⁸⁻⁹ Ata Simanɔw *Piyer ta mandala anɣa hay tabiya, mandəzay a katar maja ewet ga masa ata ma kəzlamara ha. Masa Simanɔw aha ma hətər maazla keɗe na, a regeɗey fa mey nga Yesu, a ləvar: «Bay Mahura, maaya na, ya ngəchey la da cakay akah, maja yah na, ndaw ta mebərey.»

¹⁰ Ata *Jak ta *Jan, bəza hay nga Zebede, ma kam sləra bama ta ata Simanɔw, mandəzay a katar may. Da ray ŋgene, Yesu a ləvar a Simanɔw: «Ka zlurey ba, dəga tasana ka da zəlwa ndəhay aa cəved nga Bay Gazlavay anda kah ma kəzrey ewet keɗe.»

¹¹ Ta', a ngəchadamata kwambiwal ata hay a rav-zazay, mbak! a mbəkdamata cek ata hay tabiya, a diyam asi Yesu.

*Yesu a pərey ndaw daa maasəkula
(Matiye 8.1-4; Mark 1.40-45)*

¹² Fa dəba ha, Yesu aa da slala lanɣar daha. Ndaw daha maasəkula fa vaw zlap zlap. Ndaw aha a hətər Yesu na, ta', a daw a regeɗey fa mey anɣa. A kar ambahw, a ləvar: «Bay adaw, da ka wufey na, ka gwa nga pərya daa maasəkula adaw keɗe.»

¹³ Yesu tal! a təlda har anɣa, a gəsfar, a ləvar: «Ya wufey amba maasəkula akah a pərey. Tərey ndaw mapərkaya dəba!» Wure wure ŋgene, maasəkula fa ndaw aha daa saba.

14 Ta', Yesu a kəta, a ləvar: «Ka da wuzda cek masa yah ma kakawa kede kwa a ndaw ba. Ama daw fa *ndaw ma ka kwakwas nga Gazlavay, amba a nəkaka. Fa dəba ha, vəlar cek a Gazlavay anda *kwakwas nga Mawiz ma ləvey, nga wuzey a ndəhay, maasəkula fa vaw akah daa saba.»

15 Ama ndəhay na, fa kadamara mey da ray Yesu ta gədan ta gədan cəngga. Da ray ngegene, ndəhay ga a samawa fa vəda, a kusam, amba a jəkam sləmay fa mey masa aa maa guzley, asaya, amba a mbəldata masa-macay hay.

16 Kwa ndəhay fa samawa ga na, Yesu a njeý da cakay ata mandaw mandaw ba, ama a bey la da wuzlah ata, a daw aa slam masa ndəhay da hwađ a daa ba, amba a dərey dangay a Gazlavay.

*Yesu a mbəley ndaw maahəlbakaya
(Matiye 9.1-8; Mark 2.1-12)*

17 Pas pal daha, Yesu faa sərkadata ndəhay. *Fariza hay ta *ndəhay maa sərkada kwakwas nga Mawiz manjatakaya fetede may. A samawa da slala hay mekele mekele da *Galile ta da *Jude, leŋ daa berney nga *Jeruzelem. Bay Gazlavay a vəlar gədan a Yesu nga mbəldata masa-macay hay.

18 Ndəhay daha, a samawa, a handamawa ndaw maahəlbakaya manakaya da ray bebele. A səpam cəved amba a mbəzdamara aa way masa Yesu aa da hwađ a, amba a pamara fa mey anga,

19 ama a hətam cəved ba maja ndəhay ga kalah. Anda kede, a təpam aa ray nga way a, a wuram slam daa ray nga way a, a tədamara ndaw maahəlbakaya kaa heyey da ray bebele anga ha ta laza, a wuzlah ndəhay makustakaya ga fa mey nga Yesu daa way a.

20 Masa Yesu ma nəka ndəhay a, fa təbmara anga ta gədan nga mbəlda ndaw ata na, ta', a ləvar a ndaw maahəlbakaya heyey: «Jam adaw, ya fa ləvka mebərey da ray akah daa saba.»

21 Ndəhay maa sərkada kwakwas nga Mawiz ta Fariza hay heyey a cəndamara mey kede na, a wulkam daa ray ata, a ləvam: «Ara səkway nga ndaw wura ma pa ray anga nga Gazlavay kede, na! Ma gwa ma mbəkda mebərey nga ndaw na, wa? Si Gazlavay pal taava anga ma gwa ma mbəkda mebərey nga ndaw, ba diya?»

22 Ama Yesu ta səra mewulkey ata sem, aa cəfđata, a ləvtar: «Ka wulkam anda kede, maja me?»

²³ Ya gwa ya lõvar: "Mebørey akah daa saba", da daa ba, ya gwa ya lõvar: "Sløkdøy, daw ta salay akah." Dasi mey hay cewete kede na, masa ta banay nga lõvey ngada yah na, wura? *

²⁴ Yaw, ya wudøy amba ka sømara yah, *Bøz nga Ndaw, yah ta gødan nga mbøkey mebörey nga ndøhay da bøla.» Anda kede, Yesu ta', a lõvar a ndaw maahølbakaya heyey: «Ehe, ya fa lõvka: "Sløkdøy, la bebele akah, daw a way."»

²⁵ Wure wure ngene, ndaw aha a sløkdøy, a lecey fa dey ata tabiya, a la bebele anga heyey, ta', a daw a way ta mehølmey Gazlavay.

²⁶ Ndøhay tabiya fetede a røzlam. A hølmamara Gazlavay ta menyey ray. A lõvam: «Cek masa nga menyey aløkwa, ya ta høtkwa daa ba na, ya ta høtkwar la tasana døba.»

*Yesu a zøla Levi nga søpa
(Matiye 9.9-13; Mark 2.13-17)*

²⁷ Fa døba ha masa Yesu ma ka maazla kede la, a bawa daa way a, a daw, a da nøkey dey na, a ray *ndaw ma cakala budaw mezøley *Levi. Anga manjakaya fa key sløra daa slam mecekeley budaw. Ta', Yesu aa guzlar, a lõvar: «Sawa, søpya.»

²⁸ Da ray ngene, Levi a, pørta! a sløkdøy, a mbøkdata cek anga hay tabiya, a daw asiya.

²⁹ Fa døba ha nekødøy, Levi a kar gwagway mahura ngada Yesu da way anga. Ndøhay ma cakala budaw ta ndøhay mekele makustakaya ga fetede, a zømamara daf nga gwagway a bama.

³⁰ *Fariza hay ta *ndøhay maa sørkada kwakwas nga Mawiz da wuzlah ata, aa nguram mey, a lõvmatar a *gula hay nga Yesu: «Ka zømam daf ta ndøhay ma cakala budaw lej ta ndøhay ma zløba kwakwas nga Mawiz na, kwara?»

³¹ Yesu a mbøddatara, a lõvtar: «Ndøhay masa ata wurwer na, mey ata ta ndaw ma vølda slalak daa ba. Ama ma wudøy mey nga ndaw ma vølda slalak na, si ndøhay masa-macay hay gway.

³² Yaw, ndøhay ma wulkam ata ndøhay maaya fa mey nga Gazlavay na, Gazlavay ta slørdiwa nga zøltta daa ba, ama a slørdiwa na, nga zøley ndøhay masa ta mebörey amba a mbøddamara menyey ata, a sømara Gazlavay ta mevel pal.»

* **5:23 5.23** Yesu a wudøy nga lõvey anga ta gøra nga lõvey: «Sløkdøy, daw ta salay akah», maja a gwamara nga høtmar cek masa aa ma da ka fara fara. Ama da a lõvey: «Mebørey akah daa saba» na, ta gøra nga lõvey ba, maja a gwamara nga høtmar cek aha fara fara ba. **5:24 5.24** Jan 5.36 **5:28 5.28** Mt 8.21-22 **5:29 5.29** Mt 9.10 **5:32 5.32** 19.10

Mey da ray mekey daliyam
(*Matiye 9.14-17; Mark 2.18-22*)

³³ *Fariza hay heyey a ləvmar a Yesu: «Gula hay nga *Jaŋ-Baptis ta pas lanġar fa kam *daliyam, fa dəräm danġay, asaya, gula ala hay fa kamara kəne may. Ama gula akah hay na, a zəmäm cek, a sam cek mandaw mandaw na, maja me?»

³⁴ Yesu a mbəđdatara ta mey-menġey, a lövey: «Da ndaw a zəlwa ndəhay aa mekey mələk nga kwakwa nga zəmey cek na, ndəhay a, a gwamara a kam daliyam daa masa zel-kwakwa ha aa da cakay ata daw? A kam daliyam ba səlak.

³⁵ Ama pas a, a sawa la, masa ata ma da kərzamara zel-kwakwa ha. Daa nġene dəba na, a kam daliyam la.»

³⁶ Fa dəba ha Yesu a nġatara mey a saya ta zana, a lövey: «Kwa ndaw ma nġərey zana mawiya nga dəpey zana magurma na, daa ba. Da a ka kəne na, ta nəsa zana mawiya sem, zana ha fa da cəmäm ta magurma daa ba.

³⁷ Asaya, ndaw a gwa nga zlərey wuzam meededek e aa kwene-kwene † magurma ba. Da a zləra a hwađ a na, wuzam a, a məsley, a nġəra kwene-kwene he la. Wuzam a, a mbəđey la, asaya, kwene-kwene he a nəsey la.

³⁸ Si ka zləra wuzam meededek e aa kwene-kwene mawiya.

³⁹ Da ndaw fa sey wuzam maməslkaya na, a wuđey nga sey meededek e saba, maja a wulkey wuzam maməslkaya na, a fəna meededek e.»

6

Yesu, anġa bay ma wey da ray pas meməskey-vaw
(*Matiye 12.1-8; Mark 2.23-28*)

¹ Ta *pas meməskey-vaw daha, ata Yesu ta gula anġa hay a diyam taa ley nga cek anda daw *. Gula anġa hay heyey a həbam cek aha, a babərmara, aa mbəđmara.

² Maja nġene, ndəhay da wuzlah *Fariza hay a ləvmatar: «Akwar fa kam cek matəkakaya daa *kwakwas nga Mawiz ta pas meməskey-vaw na, maja me?»

³ Yesu a mbəđdatara, a ləvtar: «Akwar ta janġamara daa đerewel nga Gazlavay cek masa *Davit ma ka zleezle na, daa ba daw? Ta pas lanġar daha, ata Davit ta ndəhay anġa hay, may fa catar, ama cek mezəmey fa ata daa ba.

5:33 5.33 Mt 6.16-17; 11.18-19; Lk 7.33-34 5:34 5.34 Mt 9.15 † 5:37 5.37

kwene-kwene: Ara cek anda des (gwajakwad) ama makakaya ta ambal. * 6:1 6.1 cek anda daw: Ta mey Pəlta na, mezəley «alkamaari», ta mey Nasara «le blé». 6:1 6.1 Mew 23.25 6:2 6.2 Mab 20.8-10 6:3 6.3-4 1Sam 21.2-7; Lev 24.5-9

⁴ Maja ηgene Davit e a mbøzey aa way ηga Gazlavay, a tøbwa peη masa mavøldakaya ηgada Gazlavay, ta' a zømey, asaya, a vøltar a ndøhay anηa hay may. Ama, peη e na, kwakwas ηga Mawiz a vøley cøved a ndøhay tabiya ηga zømamara ba, si ndøhay ma ka kwakwas ηga Gazlavay gway.»

⁵ Yesu aa guzltar saya, a løvtar: «Ma wey da ray pas memøskey-vaw na, ara yah, *Bøz ηga Ndaw.»

Yesu a dīyra har mamøckaya ηga ndaw ta pas memøskey-vaw

(Matiye 12.9-14; Mark 3.1-6)

⁶ Ta *pas memøskey-vaw daha saya, Yesu a daw aa *way-mewuzey-mey ηga Gazlavay. Ta', aa sørkadata ndøhay daa way a. Ndaw daha fetede, har-zømay mamøckaya.

⁷ *Ndøhay maa sørkada kwakwas ηga Mawiz ta *Fariza hay, ata fetede may. Fa jødmara Yesu da a da mbøley ndaw ta pas memøskey-vaw kwa. A jødmara anda kefe na, amba a høtam mey ηga kørza Yesu.

⁸ Ama Yesu a søra mewulkey ata. Da ray ηgene, aa guzlar a ndaw masa har mamøckaya heyey, a løvar: «Sløkfey, lecey fa mey ηga ndøhay tabiya.» Ndaw aha, ta', a sløkfey, a lecey.

⁹ Fa døba ha, Yesu aa guzltar a ndøhay ma jødmara heyey, a løvtar: «Yaw, ya wudfey yaa cøfdakwar, kwakwas aløkwa a løvey na, kwara? Ta pas memøskey-vaw na, aløkwa ta cøved ηga key maaya a ndaw daw, da daa ba, ηga key maaya ba daw? Aløkwa ta cøved ηga løhey ndaw daa memøcey daw, da daa ba, ηga mbøkey ndaw ηga møcey daw?»

¹⁰ Ta', Yesu a nøkta tabiya pal pal dagay, fa døba ha, aa guzlar a ndaw heyey, a løvar: «Tøldørwa har a.» Tal! a tøldara har a. Har a, ta', a dīyey aa slam a.

¹¹ Ama Fariza hay ta ndøhay maa sørkada kwakwas ηga Mawiz heyey na, mevel a catar ga. A zlamar mesley yawa da wuzlah ata, a løvam: «Ya da kadakwa ndaw Yesu kaa na, kwara?»

Yesu a weley ndøhay meslørey anηa hay kuraw a ray a cew

(Matiye 10.1-4; Mark 3.13-19)

¹² Daa dar hay a ηgene, Yesu a daw a anηwa ηga dørwa danηay. Fetede tavad tavad anηa fa dørey danηay a Gazlavay.

13 Masa slam ma wurey cay na, ta', a zelta gula anga hay a cakay a. A weley ndohay kuraw a ray a cew da wuzlah ata, a pata nga ndohay anga hay meslöre.

14 A pey nga ndohay meslöre a na, *Simanjw, ndaw masa aa ma par mezöley *Piyer heyey, ta malmaha *Andöre, *Jak, *Jan, *Fölep, *Bartelemey,

15 *Matiye, *Tuma, Jak bözey nga Alfe, Simanjw, ndaw da wuzlah ndohay ma wudam nga löhdamata ndohay ata hay dasi har nga masa-göra ata hay,

16 Jud bözey nga Jak, ta Juda Iskariyawt ndaw ma völda Yesu a har masa-göra anga hay.

Yesu a mböley masa-macay hay

(Matiye 4.23-25)

17 Fa döba ha, Yesu a pawa salay daa angwata ndohay anga hay meslöre. A lacam aa papalah aa slam masa ndohay anga hay siya hay ga da hwaɗ a. Ndohay mekele ga fetede daha a samawa daa hwayak nga *Jude. Kwa daa berney nga *Jeruzelem ta samawa la may. Asaya, ndohay siya a samawa daa berney nga Tir ta nga Sidanjw, berney hay masa da mey-bölay.

18 Ndohay a ngene a samawa nga cöney mey nga Yesu, asaya, a samawa amba Yesu a mböldata daa macay ata hay. Da wuzlah ndohay a ngene na, ndohay ta malula da ray daha fa söräm banay. Yesu ta', a böta malula da ray ndohay a.

19 Ndohay tabiya a söpam cöved nga gösey fa Yesu maja gödan daa vaw anga fa bawa nga mböldata ndohay tabiya.

Mey da ray maaya nga Gazlavay ta banay ma da sawa a ray ndohay

(Matiye 5.1-12)

20 Masa Yesu ma mböldata masa-macay hay cay na, a mbödey dey ngada fa ndohay anga hay, a lövtar:

«Akwar masa-viya hay,

maaya nga Gazlavay aa da ray akwar

maja Bay Gazlavay fa wey da ray akwar fara fara.

21 Akwar masa may fa cakwar wure keɗe,

maaya nga Gazlavay aa da ray akwar

maja Gazlavay a röhakwar la.

Akwar masa fa töwam wure keɗe,

maaya nga Gazlavay aa da ray akwar

maja kaa sanjöram la.

22 «Da ndohay fa rösmakwar,

fa mbədfmakwar dəba,
fa cədfmakwar, asaya,
faa guzlam mey hay maaya ba a ray akwar,
maja akwar gula adaw hay, yah, *Bəz ŋga Ndaw na,
maaya ŋga Gazlavay aa da ray akwar.

²³ Da masa ndəhay a fa kamakwar anda kefe na,
sasəmam, jəvam ta meeməlkey
maja Gazlavay a pəlkwara mawurbay akwar la
maaya maaya da gazlavay da vad.

Papaŋ ŋga papa ata hay a sərdamata banay
ta ndəhay ma təla mey ŋga Gazlavay zleezle na, kəne.

²⁴ Ama akwar masa-zleley hay na,
banay a sawa la a ray akwar
maja akwar ta zəməmara wiya akwar cay wure kefe.

²⁵ Akwar masa ma rəham sem wure kefe,
banay a sawa la a ray akwar,
maja may a cakwar la.

Akwar masa faa saŋgəram wure kefe,
ka da njam daa banay, ka təwam la.

²⁶ «Akwar masa ndəhay faa həmdamakwar wure kefe,
banay a sawa la a ray akwar.

Ara anda kefe papaŋ ŋga papa ata hay zleezle
maa həmdamata ndəhay ma təla mey ta membərzley.»

*Mey da ray mewudəy masa-gəra hay
(Matiye 5.38-48; 7.12a)*

²⁷ Yesu a ləvtar saya: «Wure kefe ya fa ləvkwar, akwar
ndəhay masa ma jəkam sləmay fa mey adaw: Wudmata
masa-gəra akwar hay, kamatar maaya a ndəhay masa ma
ŋgəldamakwar ba,

²⁸ pəsmatar mey a ndəhay masa ma nəsmakwar, dəram
danğay maja ndəhay ma sərdamakwar banay.

²⁹ Da ndaw a kədka a cakay baazlam na, mbəddara cakay
lanğar saya. Da ndaw a lakawa dawura akah na, mbəkda
ŋga la, vəldara dəŋ-kece saya.

³⁰ Kwa waawa maa cədfafaka cek na, vəlar. Da ndaw ta
ley cek la fa kah na, ka daa cədfa həz-hez † ba.

³¹ Wure kefe, kamatar cek maaya a ndəhay, anda akwar
ma wudam ŋga kamakwara maaya kəne may.

³² «Da ka wudam ndəhay ma wudmakwar daada gway
na, ka wulkam Gazlavay a kakwar maaya la maja daw?»

Maja kwa ndəhay masa ta mebərey na, fa wudmata ndəhay masa ma wudmata kəne.

³³ Da ka kam cek maaya ngada ndəhay masa ma kamakwar maaya gway na, ka wulkam Gazlavay a kakwar maaya la maja daw? Maja kwa ndəhay masa ta mebərey na, fa kamara kəne may.

³⁴ Yaw, da ka vələm cek hay a ndəhay masa ka wulkam wara a vəhdamakwara gway na, Gazlavay a vəkwar cek maaya la maja daw? Maja kwa ndəhay masa ta mebərey na, fa vələmatar cek hay a ndəhay masa wara a vəhdamatara kəne.

³⁵ Ama akwar na, wudmata masa-gəra akwar hay, kamatar maaya, vələmatar cek a ndəhay masa ma gwamara nga vəhdamakwara ba. Da akwar fa kamara anda keɗe na, Bay Gazlavay da vad a pəkwar mawurbay akwar la ga, a tərɗakwar la nga bəz anga hay, maja anga na, fa sərey dey-ceceh fa ndəhay masa ma kam suse ba, len fa ndəhay malamba hay.

³⁶ Kam maaya a ndəhay anda Papa aləkwa Bay Gazlavay ma key maaya a ndəhay.»

*Mey da ray membəkey mebərey nga ndəhay
(Matiye 7.1-5)*

³⁷ Yesu aa guzltar saya, a ləvtar: «Ka da wulkam daa mevel akwar, ka ləvam, “Anja mananɗ ngaa zəɗɗey maja mebərey anga na” kəne ba, maja Bay Gazlavay a daa zəɗɗakwar maja mebərey akwar kəne may. Ka da mbəɗmatar ray a ndəhay ba, anda keɗe Bay Gazlavay a mbəɗkwar ray daa ba may. Mbəkdamatara mebərey nga ndəhay, Gazlavay a mbəkɗakwara mebərey akwar la kəne may.

³⁸ Vələm cek a ndəhay, Gazlavay a vəkwar la kəne. A da kwiɣkwar ga aa gabal akwar mahura, a rəɗkwara, aa jəkakwara haa a rəhey, siya mbak. Bay Gazlavay a da wakwara cek ta daram masa akwar ma wamatara a ndəhay mekele may.»

³⁹ Fa dəba ha, Yesu aa guzltar ta mey-menɗey saya, a ləvtar: «Ndaw-wulaf a gwa nga ɗaɗa ndaw-wulaf cəla daw? Da ndaw-wulaf a ɗaɗa wulaf cəla na, ata cewete a təɗam la aa vəgeɗ.

⁴⁰ Yaw, ndaw maa sərkey na, a səra cek a fəna ndaw maa sərkada ba. Ama da ndaw a taa sərkey la maaya maaya na, anga anda ndaw maa sərkada ha gway.»

41 Ta', Yesu a ngey mey mekele saya, a lövey: «Ka näkey dey fa guzer daa dey nga malmakw, ama hwadam mahura masa daa dey akah na, ka wulkey da ray a ba na, kwara?»

42 Ka gwa nga lövar ngada malmakw, "Mälma adaw, dagay ya lakawa guzer daa dey akah la". Anja kah na, hwadam mahura daa dey akah daha, ama ka hëtar ba na, kwara? Kah, ndaw masa ta neneh cew! La hwadam daa dey akah la dagay, amba ka hëtar dey njed-njed nga ley guzer daa dey nga malmakw.»

Mey-mengey ta wudez meyey babëza maaya ta maaya ba (Matiye 7.16-20; 12.33-35)

43 Yesu a lövtar saya: «Fara fara, wudez masa maaya na, a yey babëza maaya ba na, daa ba. Yaw, wudez masa fa betey ta betey na, a yey babëza maaya na, daa ba may.

44 Kwa wudez wura wura a da serey na, fa babëza ha. Anda kefe, ka gwa nga ngöley säked fa manjaraf ba. Ka gwa nga ngöley gudav fa böz-tak ba.

45 Ndaw maaya na, fa wuzdërwa cek masa maaya daa mevel anga maaya. Ndaw malamba may, fa wuzdërwa cek maaya ba daa mevel anga maaya ba. Fara fara, mey masa ndaw maa guzlda na, fa wuzdërwa cek masa mabadakaya daa mevel anga.»

Mey-mengey ta way hay cew (Matiye 7.24-27)

46 Yesu a lövtar: «Ka zalmaya "Bay Mahura, Bay Mahura" ama ka kamara cek anda yah ma lövkwar ba na, maja me?»

47 Wure kefe amba ya wuzdakwara kwa waawa ma sawa fa yah, ma jökey slömay fa mey adaw, ma ka cek anda mey a la na,

48 ya wa ndaw aha ta ndaw ma wufey nga lömey way, ma zlöda salay nga way a maaya maaya kasl fa përad. A pa salay a, a ray a. Pas masa var ta pawa la, wayam a lawa, a zlëra way a, ama a gwa nga bözla ba maja salay nga way a mapakaya maaya da ray përad.

49 Ama ndaw ma cönda mey adaw, ma ka cek anda mey a daa ba na, ya wa ta ndaw ma pey salay nga way manjar nga zlödey. Pas masa var ta pawa la, wayam a lawa, a zlëra way a, way a körep! a bözley cëpa.»

7

Yesu a mbölda madërlam nga mahura nga sewje hay (Matiye 8.5-13)

¹ Masa Yesu ma wuzdatara mey anğa cay tabiya a ndəhay na, ta', a daw a Kapernayum.

² Fetede, ndaw Rawma daha, anğa mahura nğa sewje hay temere. Ndaw a nğene, a wudə madərlam anğa daha kalah. Ama madərlam a, vaw fa car ga, fa da məcey.

³ Masa ndaw a ma cənda mey da ray Yesu na, ta', a slərey ndəhay mahura hay nğa *Jəwif hay da slala ha nğene fa Yesu nğaa cəfdamərwa nğa sawa amba a mbəlda madərlam anğa ha.

⁴⁻⁵ Ndəhay mahura hay a, a wusam fa Yesu, a kamar ambahw, a ləvmar: «Maaya na, ka jəna mahura nğa sewje hay a. Ara ndaw maaya nğa jəney, maja a wudndakwar aləkwa Jəwif hay kalah, ara anğa ma ləmndakwara *way-mewuzey-mey nğa Gazlavay fede.»

⁶ Masa Yesu ma cənda mey a la na, ta', a diyam bama. A wusam gweegwe ta way nğa mahura nğa sewje hay heyey na, mahura nğa sewje hay a, a slərey jam anğa hay fa Yesu nğa ləvmar: «Mahura nğa sewje hay a ləvey: “Bay adaw, ka da gərwa vaw nğa sawa saba, maja ya wusa amba ka mbəzey a way adaw ba.»

⁷ Maja nğene, ya nəka na, ya wusa nğa wusey fa mey akah ba. Ama, da ka ta ləvey mey pal la na, madərlam adaw a mbəley la.

⁸ Ya ləvka anda kefe maja yah na, sewje hay mahura da ray adaw daha, asaya, yah mahura da ray sewje hay mekele may. Da ya ləvar nğada sewje lanğar “daw”, a daw. Da ya ləvar nğada ndaw lanğar “sawa”, a sawa. Da ya ləvar nğada beke adaw “ka sləra kefe”, a ka.»

⁹ Masa Yesu ma cənda mey a kefe la na, a mbafar ara mey ba. A mbəfey dey fa dəba nğada fa ndəhay ma diyam asiya, a ləvtar: «Ya fa ləvkwar, fara fara kwa ya ta hətey ndaw ma paya nğa ndaw anğa fara fara anda ndaw kefe daa ba səlak, kwa da wuzlah səkway adaw hay *Israyel hay, ya ta hətey daa ba.»

¹⁰ Ndəhay masa mahura nğa sewje hay ma slərdata heyey na, a vəhmawa a way, a hətfamar madərlam a, vaw fa car daa saba.

Yesu a sləkɗadərwa bəzey nğa nğwas-vagay daa meməcey

¹¹ Fa dəba ha, Yesu a diyam ta gula anğa hay leŋ ta ndəhay mekele mekele ga a slala Nayiŋ.

¹² Masa gweegwe fa da mbəzam a slala ha na, a cam ray ta ndəhay fa lamawa vagay nğa bəzey nğadaa cəvay. Ara

bəzey nga ngwas-vagay daha. Bəzey anğa ha pal ngene. Ndəhay ga da slala ha fa diyam asi vagay a.

¹³ Masa Bay Mahura ma hətar ngwas aha na, a kar dey-ceceh, a ləvar: «Dəka mevel, ka təway ba!»

¹⁴ Anğa ma ləvar la anda keđe na, ta', a ngəchey, a gəsfar har fa bəbele masa vagay da ray a heyey. Ta', ndəhay ma lamara vagay kaa, a lacam. Yesu aa guzlar a vagay a, a ləvar: «Bəz-gula, ya fa ləvka: "Sləkdəy!"»

¹⁵ Vagay kaa, ta', a sləkdəy, a njeý ta njeý, a zlar meeguzley. Yesu a ləvar a mamaha: «Ehe, bəzey akah!»

¹⁶ Ndəhay tabiya a rəzlam, a zluram, a həlmamara Gazlavay, a ləvam: «Tasana, ndaw mahura ma təla mey nga Gazlavay ta sawa la a wuzlah aləkwa.» A ləvam saya: «Gazlavay ta sawa la nga jəney ndəhay anğa hay.»

¹⁷ Ndəhay daa hwayak nga *Jude tabiya ta daa hwayak hay masa ta cakay tabiya ta cəndamara cek masa Yesu ma ka keđe la.

*Jan-Baptis a slərdata gula anğa hay cew fa Yesu
(Matiye 11.2-19)*

¹⁸ Daa masa *Jan-Baptis anğa daa fərsəne na, gula anğa hay aa guzlar da ray cek hay tabiya masa Yesu ma kata. Ta', Jan-Baptis a zəlwa gula anğa hay cew,

¹⁹ a slərdata fa Bay Mahura amba aa cəfdamara, a ləvmar: «Kah na, *Kəriste, ndaw ma da sawa nga ləhdata ndəhay heyey daw? Da daa ba, ya səkwam ndaw mekele ma da sawa daw?»

²⁰ Ta', a diyam. Masa ata ma wusam fa Yesu la na, a ləvmar: «Jan-Baptis a slərdandərwa ngaa cəfdaka, a ləvey: "Kah na, Kəriste, ndaw ma da sawa nga ləhdata ndəhay heyey daw? Da daa ba, ya səkwam ndaw mekele ma da sawa daw?"»

²¹ Ta pas ngene, Yesu fa mbəley masa-macay hay ga, kwa cek mecey wura wura cəpa, fa bəley malula hay da ray ndəhay ga, asaya, fa wurey dey nga wulaf hay ga.

²² Fa dəba ha, a mbəfdatara a ndəhay masa *Jan ma slərdata heyey, a ləvtar: «Diyam, kadamara cek masa akwar ma hətmar ta dey akwar, ta akwar ma cəndamara ta sləmay akwar a Jan-Baptis a. Ləvmar na, wulaf hay fa hətmar dey dəba, jegwer * hay fa diyam maaya maaya ta salay ata, maasəkula hay ta sədam sem, madagazlam hay fa cənam sləmay, ndəhay maməctakaya fa sləkdəmawa

7:12 7.12 1Bay 17.17 **7:15 7.15** 1Bay 17.22-23 **7:16 7.16** 1.68; 19.44; **ndaw ma təla mey nga Gazlavay:** Mt 16.14; 21.11, 46; 26.68; Mk 6.15; 8.28; 14.65; Lk 7.39; 9.8, 19; 22.64; 24.19; Jan 4.19; 6.14; 7.40; 9.17 * **7:22 7.22** jegwer: Ndaw masa salay pal maaya ba.

daa meməcey, ndəhay masa-viya hay fa cəndamara Mey-maaya-mawiya dəba.

²³ Ndaw ma mbəkda metəbey-mey adaw ba maja sləra masa yah ma ka na, maaya ŋga Gazlavay aa da ray a.»

Mey da ray Jan-Baptis

²⁴ Ndəhay masa *Jan-Baptis ma slərdata heyey ma diyam la na, Yesu a zlar maa guzlar da ray Jan-Baptis a, a ndəhay ga da cakay a, a ləvtar: «Akwar ma diyam a wuzlah-ley na, ŋga nəkwa me? Ka nəkmawa na, guzer masa memed ma wusa daw? Ara ŋga ba, ba diya?»

²⁵ Kaa, akwar ma diyam ŋga nəkwa na, me? Ka nəkmawa na, ndaw masa ma pey zana maaya fa vaw daw? Anja ndəhay masa ma pam zana maaya fa vaw na, ara ndəhay ma njam daa wiya da way bay hay, ba diya?

²⁶ Wuzdamiwa, ka diyam ŋga nəkwa na, wa? Ka nəkmawa na, *ndaw ma təla mey ŋga Gazlavay, ba diya? Ya fa ləvkwar, fara fara ara ŋga. Ama a fəna ndaw ma təla mey ŋga Gazlavay la saya,

²⁷ maja *Jan a na, ara ndaw masa mey ŋga Gazlavay mawuzlalakaya maa guzley da ray a, a ləvey:

“Bay Gazlavay a ləvar a Bəzey ŋga:

Ehe, ya fa slərey maslan-cəved adaw fa mey akah, amba a diykawa cəved akah.”»

²⁸ Yesu a ləvtar saya: «Ya fa ləvkwar fara fara, da wuzlah ndəhay da bəla na, kwa ndaw ma fəna Jan-Baptis daa ba. Ama ndaw mecəhe da wuzlah ndəhay masa Bay Gazlavay fa wey da ray ata na, ndaw aha a fəna Jan-Baptis.

²⁹ «Ndəhay cəpa fetede ma cəndamara mey ŋga Jan na, ta təbmara mey a la, a səmra Gazlavay fa key cek ta cəved e. Kwa ma cakala budaw hay ta təbmara la may. Ndəhay a ŋgene ta təbmara la amba Jan-Baptis a katar *baptem.

³⁰ Ama *Fariza hay ta *ndəhay maa sərkada kwakwas ŋga Mawiz ta təbmara cek masa Gazlavay ma wudey ŋgada ata na, daa ba, maja a wudam Jan-Baptis a katar baptem ba.»

³¹ Yesu aa guzlar mey mekele saya, a ləvtar: «Ya da wa səkway ŋga ndəhay masa wure kede kaa na, ta me? Ata anda me?»

³² Ata anda bəza hay masa manjatakaya fa yam mey da wuzlah ata, a ləvam: “Ala ta famakwar sləlam la, ama akwar ta gərvam daa ba. Ala ta zlamakwar walay vagay la, ama akwar ta təwam daa ba.”

33 Ya løvkwar anda keđe na, maja Jan-Baptis ta sawa la nga wuzkwar mey. A zəmey daf anda ndəhay mekele ba, a sey wuzam ba, ama ka løvam: “Anğa ta malula da ray.”

34 Yah, *Bəz nga Ndaw, ya sawa, ya fa zəmey cek, ya fa sey cek anda ndəhay mekele. Ama ka løvam: “Nəkmara, ndaw a keđe, a wulkey si nga zəmey cek ta nga sey wuzam ngada hwad anğa gway. Asaya, anğa na, ara jam nga ndəhay ma cakala budaw ta nga ndəhay ma zləba kwakwas nga Mawiz.”

35 Ama yah na, ya fa løvkwar, ndəhay a da səmra leŋgesl nga Gazlavay, anğa maaya na, ta fa ndəhay anğa hay tabiya ma təbmara leŋgesl e.»

Ngwas ta mebərey a mbədar bərdey fa salay nga Yesu

36 Ndaw Fariza daha, a zəla Yesu a way anğa nga zəmey daf. Yesu a daw a way ndaw aha, ta', a njam nga zəmey daf.

37 Da slala ha ngene ngwas daha, aa fa key mebərey kalah. A cənda masa Yesu fa zəmey daf da way ndaw Fariza ha na, ta', a daw ta kwalaba marəhkaya ta bərdey da har a way ndaw aha. Kwalaba ha nga anğwa maavərkwakaya mezəley «*albaatəra».

38 A regedey gweegwe ta salay nga Yesu. A təway haa matəway a, a gəcey fa salay nga Yesu, a takwadə salay a ta enğwec nga ray anğa, a kərza salay a, a səmdə, ta', a mbəddara bərdey heyey fa vəda.

39 Ndaw Fariza ma zəla Yesu nga zəmey daf heyey, ma hətar ngwas aha fa takwadə salay nga Yesu na, a wulkey daa ray anğa, a lövey: «Da ndaw keđe fara fara ara *ndaw ma təla mey nga Gazlavay na, anja a səra ngwas ma gəsfar fa salay keđe na, ara ngwas ta mebərey kalah.»

40 Da ray ngene, Yesu aa guzlar a ndaw Fariza ha, a løvar: «*Simanw, ya wudey ngaa guzka mey pal.» Simanw a mbəddara, a løvar: «Gweguzley taw, Bay adaw.»

41 Yesu a løvar: «Ndəhay cew daha, a lam dəvaz fa ndaw. Ndaw pal a ley gabal temere zlam. Ndaw lanğar a ley gabal kwakwar zlam †.

42 Ama ata cewete ta gwamara nga pəlmara dəvaz a daa ba. Anda keđe, ndaw ma vəldatara dəvaz a heyey, a mbəkdatara dəvaz a. Yaw, dasi ata cewete keđe na, ma da wudə ndaw ma mbəkdatara dəvaz a kalah na, wa?»

7:33 7.33 1.15 7:33 7.33-34 Mt 9.14; Mk 2.18; Lk 5.33 7:34 7.34 Mt 9.10
7:36 7.36 11.37 7:37 7.37-38 Mt 26.6-7; Mk 14.3 7:39 7.39 7.16 † 7:41
7.41 gabal temere zlam: Ta mey Gərek a lövey «deniye temere zlam.» Deniye
pal na, ara mawurbay nga sləra nga ndaw fa mevərndey. 7:42 7.42 Mt 18.27

⁴³ Simanjw a mbəɸdara, a ləvar: «Ya wulkey ma da wuɸa kalah na, ndaw masa aa ma mbəkɸara dəvaz ga da ray a heyey.» Ta', Yesu a ləvar: «Ahaw fara, ka taa guzley la, ara anɸa.»

⁴⁴ Fa dəɸa ha, ta', a mbəɸey dey fa nɸwas kaa heyey, a ləvar a Simanjw: «Ka fa hətar nɸwas keɸe, ba diya? Ya sawa na, a way akah, ama ka ta vəlya yam nɸa pərey salay daa ba. Anɸa na, ta pəryawa salay la ta matəway, ta takwadəyawa la ta enɸwec nɸa ray anɸa.

⁴⁵ Ya sawa a way akah, ka ta təɸya maaya maaya daa ba, ama anɸa na, dəga anɸa ma mbəzwa a way akah keɸe haa wure keɸe ta mbəkɸa nɸa səmɸayawa salay daa ba.

⁴⁶ Ka ta takwadəya mal fa ray daa ba, ama anɸa ta mbəɸya bəɸdey la fa salay aɸaw.

⁴⁷ Da ray nɸene, ya fa ləvka masa anɸa ma wuɸya keɸe na, fa wuzdərwa kwa anɸa ta mebərey ga kalah na, mebərey a daa saba. Ama ndaw ma wulkey anɸa ta mebərey ga daa ba, amba Bay Gazlavay a mbəkɸara mebərey a na, nɸene ara ndaw ma wuɸa Gazlavay nekəɸey gway.»

⁴⁸ Fa dəɸa ha, Yesu a ləvar a nɸwas heyey: «Mebərey akah daa saba.»

⁴⁹ Ndəhay masa manjatakaya nɸa zəmey ɸaf bama heyey, aa guzlam da wuzlah ata, a ləvam: «Keɸe na, ara wa masa ma gwa nɸa mbəkey mebərey nɸa ndaw keɸe na!»

⁵⁰ Ama Yesu a ləvar a nɸwas a heyey: «Bay Gazlavay ta ləhdaka cay daa mebərey, maja kah ma paya nɸa ndaw akah fara fara. Daw ta zazay.»

8

Ma pəkam ta Yesu na, wa hay wa?

¹ Fa dəɸa ha, Yesu a daw aa berney hay len a slala hay nɸa wuzey *Mey-maaya-mawiya da ray mewey nɸa Gazlavay da ray ndəhay. Ndəhay masa ma pəkam ta Yesu na, ara gula anɸa hay kuraw a ray a cew

² ta nɸusay masa anɸa ma bəley malula da ray ata, ta masa anɸa ma mbəldata daa macay. Nɸusay a na, ara *Mari da Magdala, nɸwas masa Yesu ma bəley malula maasala da ray a heyey,

³ Zaan, nɸwas nɸa Kuza ndaw ma nəkey dey fa zleley nɸa Bay *Herawt, len Suzan, ta nɸusay mekele mekele. Nɸusay a na, a jənmata ata Yesu ta gula anɸa hay kuraw a ray a cew ta zleley ata hay.

Mey-menjey ta ndaw maa kwecey hulfad a ley
(*Matiye 13.1-23; Mark 4.1-20*)

⁴ Daa berney hay mekele mekele ndəhay fa samawa fa Yesu. Masa ndəhay ga ata da cakay a na, Yesu ta', aa guzltar ta mey-menjey, a ləvey:

⁵ «Ndaw mehəvey daha, a daw ŋгаа kwecey hulfad a ley anga. Daa masa anga faa kwacada hulfad a na, hulfad lanjar a kəzley aa cəved. Ndəhay a diyam ta ray a. Diyan hay a ndamara.

⁶ Siya a kəzley aa slam masa pərad, a pəcwa nekədey na, a kweley maja yam daa slam aha daa ba.

⁷ Siya a kəzley a wuzlah hatak. A pəcwa da wuzlah hatak a. Hatak a njanjərda, a təkа ŋгаа gəley.

⁸ Ama siya a kəzley aa slam maaya, a pəcwa, a gəley, a yey babəza ga, a key temere.» Yesu a ləvtar ta gədan: «Da ndaw, anga ta sləmay na, ŋгаа cənda mey a maaya maaya.»

⁹ Gula hay ŋгаа Yesu aa cəfdamara amba a səmra mabara ŋгаа mey-menjey kefe.

¹⁰ Yesu a mbəddatara, a ləvtar: «Gazlavay ta vəkwar cəved la ŋгаа sərey mey hay mabadatakaya da ray mewey anga da ray ndəhay. Ama ndəhay siya hay na, ya wuzdatara ta mey-menjey. Anda kefe,

“Fa nəkam dey, ama a hətmar dey ba.

Fa jəkam sləmay, ama a cəndamara ba.”

¹¹ «Ehe, ya wuzdakwara mabara ŋгаа mey-menjey a. Hulfad na, ara mey ŋгаа Gazlavay.

¹² Ndəhay siya ata anda mey-cəved masa hulfad ma kəzley a hwad a. Ndəhay a fa jəkam sləmay fa mey ŋгаа Gazlavay, ama bay-malula a sawa, a la mey a la daa mevel ata, amba a təkta ŋгаа təbmara mey a maja Gazlavay a da ləhdata.

¹³ Ndəhay mekele ata anda slam masa pərad. A cəndamara mey ŋгаа Gazlavay, a təbmara ta meesəmey. Ama a hway slaslalay ba. A təbmara ŋгаа menjey nekədey gway. Anda kefe, ta pas masa cek maaya ba fa batata na, a mbəkdamara mey a.

¹⁴ Hulfad ma kəzley a wuzlah hatak na, anga anda ndəhay mekele ma cəndamara mey ŋгаа Gazlavay ama a mbəkdamara mey a daa walaŋ maja mewulkey ata aa da ray cek hay mekele mekele, ta da ray zleley leŋ da ray menjey daa wiya da bəla. Anda kefe, sləra masa ata ma kamara na, anga anda daw, babəza fa vəda daa ba, səfteker.

¹⁵ Hulfad ma kəzley aa slam maaya na, anɣa anda ndəhay siya ma jəkam sləmay, ma təbmara mey a aa mevel ata maaya maaya, a kam cek anda Gazlavay ma wudey. A təbmara mey a, a mbəkdamara ba. Anda keɖe, mey a, a yey daa mevel ata anda hulfad ma pəcwa ma yey ga.»

Mey-menɣey ta petərla
(Mark 4.21-25)

¹⁶ Yesu a ləvtar saya: «Da ndaw ta gəɖey awaw la aa petərla na, a dəpa ta maɣgayak ba, a pa asi harɣgawaw ba. Ama a pa aa slam mepey petərla ɣga wafa slam daa way a, amba ndəhay ma mbəzam a hwad a na, a hətmar dey.

¹⁷ Cek hay tabiya mabadakaya, a wuzwa la a palah. Cek masa ndəhay ma səmra ba na, a səmra la, asaya, a wuzwa la aa slam-mewedey.

¹⁸ Pam leɣgesl amba ka jəkam sləmay maaya maaya. Da ndaw ta təba mey ɣga Gazlavay la na, Gazlavay a jəna la ɣga təba mey a ma fəna ma fəna. Da ndaw ta təba mey ɣga Gazlavay daa ba na, kwa mey a nekəɖey masa anɣa ma wulkey daa mevel anɣa daha na, Gazlavay a badərwa la tabiya.»

Maman ɣga Yesu ta məlmaha hay na, ara wa hay wa?
(Matiye 12.46-50; Mark 3.31-35)

¹⁹ Fa dəba ha, ata maman ɣga Yesu ta məlmaha hay a diyam fa Yesu, ama ta gwamara ɣga wusey a cakay a daa ba, maja ndəhay ga kalah.

²⁰ Ndəhay fetede aa guzmar a Yesu, a ləvmar: «Ata mamakw ta məlmakw hay malacatakaya daa ambaw, a samawa fa akah, faa cəɖamaka.»

²¹ Ama Yesu a mbəɖɖatara, a ləvtar a ndəhay tabiya: «Mamay ta məlma adaw hay na, ara ndəhay masa ma jəkam sləmay fa mey ɣga Gazlavay, ma kam cek anda mey a ma lövey.»

Yesu a lacada bərgadan da wuzlah dəhwa
(Matiye 8.23-27; Mark 4.35-41)

²² Ta pas laɣgar daha, Yesu a təpam ta gula anɣa hay, aa kwambiwal, a ləvtar: «Təɣkwa a dey laɣgar ɣga dəhwa.» Ta', a diyam.

²³ Daa masa ata fa tənɣam na, Yesu aa daa dar. Wure ɣgene, bərgadan a zlar mekey da ray yam. Kwambiwal heyey, a rəhey ta yam, ndəhay da hwad a fa daa zəɖam.

²⁴ Da ray ngene, gula anga hay, a ngəcham a cakay a, a sləkɗadamara, a ləvmar: «Bay Mahura! Bay Mahura! Aləkwa fa da məckwa!»

Yesu ta', a sləkdey, aa bəcey ta gədan, a təkə bərgadan ta yam ma wusey heyey. Bərgadan heyey a key saba, yam a wusey saba.

²⁵ Yesu aa guzlar a gula anga hay a, a ləvtar: «Ka pamaya nga ndaw akwar fara fara ba na, maja me?»

Ama gula anga hay a, a zluram, a rəzlam, aa guzlam da wuzlah ata, a ləvam: «Ndaw a kaa na, ara wa? Masa aa guzlar kwa ngada bərgadan, kwa ngada yam, a cənar mey keɗe na!»

*Yesu a bəley malula hay da ray ndaw
(Matiye 8.28-34; Mark 5.1-20)*

²⁶ Ata Yesu ta gula anga hay a wusam aa hwayak nga ndəhay Gəraza hay ta dey lanjar nga dəhwa, dey ta' ngada *Galile.

²⁷ Ata ma wusam la na, Yesu a pawa salay daa kwambiwal a. Ndaw daa berney fetede daha a sawa a cada ray. Ndaw aha, aa ta malula da ray. Menjey ga, ta kəzley zana fa vaw daa ba. A njey na, da way ba, ama daa cəvay hay.

²⁸ Daa masa anga ma hətər Yesu na, a zlar mewudey, a tədey asi salay anga, aa guzlar ta gədan, a ləvar: «Yesu, Bəzey nga Gazlavay da vad, ka wudey fa yah na, me? Ambahw, ka da sərdaya banay ba!»

²⁹ Aa guzley anda keɗe, maja Yesu ma ləvar a malula ha nga bey da ray anga. Malula ha fa kar mandaw mandaw. Ndəhay anga hay a jəwmata har ta salay hay ta calalaw amba a njey da way, ama ndaw a, a key gədan, a dəsla calalaw a. Malula ha fa hwada a ley.

³⁰ Ta', Yesu aa cəɗɗa, a ləvar: «Mezəley akah na, me?» A mbəɗɗara, a ləvar: «Mezəley aɗaw na, "ga".» A ləvey anda keɗe maja malula hay ga da ray a daha.

³¹ Malula hay heyey na, a kamar ambahw a Yesu amba a bəлта aa vəgeɗ meseleleŋ e ba.

³² Daa slam aha ngene, ngaba nga vetem hay ga daha da mecəkwer da anɗwa. Malula hay da ray ndaw heyey a bərkwamara Yesu nga vəltar cəved amba a mbəzam a ray vetem hay a. Yesu ta', a vəltar cəved.

³³ Ta', malula hay a, a bam da ray ndaw aha, a diyam a mbəzam a ray vetem hay a. Wure ngene, vetem hay a tabiya a bam ray, a hwam ta gədan ngadaa heeleŋ, a tataram, a kwiyam saf! aa yam, a ɓabətam cəpa.

³⁴ Masa mecəkwer hay nga vetem hay kaa heyey ma hətmar cek ma key la anda keđe na, a hwam a wuzdamara mey a, a ndəhay daa berney a, leŋ a ndəhay da slala hay masa ta cakay.

³⁵ Ndəhay a, a samawa nga nəkey cek mekey fetede he. A wusmawa a cakay Yesu na, a hətfamar ndaw masa Yesu ma bəлта malula hay da ray anga heyey. Ndaw aha manjakaya da cakay Yesu, anga ta zana fa vaw. A səra leŋgesl dəba. Ndəhay ma samawa nga nəkey cek ma key heyey na, mandərzay a katar.

³⁶ Ndəhay fetede ma hətmar Yesu ma bəлта malula hay da ray ndaw heyey, a kadamatara a ndəhay ma samawa nga nəkey cek ma key heyey.

³⁷ Anda keđe, ndəhay tabiya daa hwayak nga Gəraza hay a ləvmar a Yesu nga daw la daa hwayak ata, maja fa zluram ga. Da ray ŋgene, Yesu a təpey aa kwambiwal nga daw.

³⁸ Ndaw masa Yesu ma bəлта malula hay da ray anga heyey, a kar ambahw a Yesu nga vəlar cəvedə amba a diyam cew e. Ama Yesu ta vəlar cəvedə nga diyam cew e daa ba, a vəhda, a ləvar:

³⁹ «Daw a way akah, ta kadatara cek mahura masa Gazlavay ma kakawa keđe tabiya a ndəhay.» Ta', ndaw aha a daw, a wuzda mey da ray cek masa Yesu ma ka tabiya da ray a heyey ŋgada ndəhay daa berney a tabiya.

Yesu a mbəley ŋgwas ta a sləkɔadərwa dam nga Jayirus daa meməcey

(Matiye 9.18-26; Mark 5.21-43)

⁴⁰ Ndəhay ga fa səkwmar a Yesu da dey langar nga dəhwa nga *Galile. Anga ma vəhwa la na, ndəhay a təbmara ta meesəmey.

⁴¹ Ndaw daha mezəley Jayirus. Anga *bay-ray nga *way-mewuzey-mey nga Gazlavay fetede. A wusey fa Yesu, a tədey asi salay anga. A kar ambahw nga daw a way anga,

⁴² maja dam anga daha, anga pal, mekele daa ba, vaw fa car, fa da məcey. Dam aha, mamba mevey kuraw a ray a cew.

Masa Yesu fa daw a way Jayirus a na, ndəhay fa ŋgacamara ta keđe ta keđe.

⁴³ Da wuzlah ndəhay a ŋgene, ŋgwas daha mambaz fa mbəɔwa da hwad, dəga mevey kuraw a ray a cew. Ta ndəvda zleley anga sem cəpa fa dakwter hay, ama kwa ndaw ma gwa a ray macay a daa ba.

44 Ngwas aha a ngöchey ngada fa Yesu ta fa dëba, a gësfar har fa mey nga zana anga. Wure wure ngene, mambaz anga heyey tañ! a dësley mey.

45 Yesu aa cëfdata ndəhay, a lövey: «Ma gësfaya na, wa?» Kwa waawa a lövey: «Ara yah ba, ara yah ba.» Ta', *Piyer a lövar: «Bay adaw, ray akah tabiya mazlärkaya ta ndəhay fa ngacamaka kaa na, ka lövey ma gësfaya wa na, kwara?»

46 Yesu a mbəddara, a lövar: «Ndaw ta gësfaya la, maja ya səra gədanj daa vaw adaw ta bey la.»

47 Ngwas aha, a nəka na, Yesu ta səra sem, a gwa a bada ray anga saba. Ta', a daw fa Yesu, aa faa wesey maja fa zlurey. A tədəy asi salay anga. Ta', a kada fa mey nga ndəhay tabiya a gësfar har fa zana nga Yesu na, maja me, asaya, a kada Yesu a mbəlda wure wure ngene na, kwara.

48 Fa dëba ha, Yesu a lövar: «Dam adaw, ka ta mbəley cay maja kah ma paya nga ndaw akah fara fara. Daw ta zazay.»

49 Masa Yesu faa guzlar ngada ngwas aha aran na, ndaw a sawa ta meslərey da way Jayirus, bay-ray nga way-mewuzey-mey nga Gazlavay heyey, a lövar: «Dam akah heyey, ta məcey sem. Ka da gərda vaw ta Bay Mahura saba.»

50 Ama Yesu ma cənda mey a na, a lövar a Jayirus: «Mevəl akah a da tədəy ba. Paya nga ndaw akah fara fara gway na, dam akah a mbəley la.»

51 Masa Yesu ma wusey la a way Jayirus na, kwa a vəley cəved a ndaw nga mbəzey asiya ba, si ma mbəzam asiya na, ata Piyer, *Janj, *Jak, leñ papanj nga dam aha ta mamaha gway.

52 Ndəhay tabiya fetede fa təwam, fa wudam maja dam aha. Ama Yesu a lövtar: «Ka təwam ba. Dam aha ta məcey daa ba, ama a key a ney aa dər.»

53 Ndəhay a, aa sanğəram a ray Yesu maja a sərmara dam aha ta məcey sem.

54 Yesu a ngöchey fa dam aha heyey, ta', a kərza fa har, aa guzlar ta gədanj, a lövar: «Bəzey, sləkdey!»

55 Mesəfney anga a vəhwa aa slam a, ta', a sləkdey wure ngene. Yesu a lövtar nga vəlmar cek mezəmey.

56 Papanj nga dam aha ta mamaha a rəzlam ga, ama Yesu a kətata, a lövtar: «Cek masa ma key keđe na, ka da kadamara ngada ndaw ba.»

9

*Yesu a slərdata gula anğa hay kuraw a ray a cew
(Matiye 10.5-15; Mark 6.7-13)*

¹ Yesu a kusta gula anğa hay kuraw a ray a cew, a vøltar gødanŋ nga key maazla amba a bølám malula hay wura wura tabiya da ray ndøhay, asaya, amba a mbølám masa-macay hay.

² Anğa ma vøltar gødanŋ la na, ta', a slərdata nga wuzey mey da ray mewey nga Gazlavay da ray ndøhay, asaya, nga mbøley masa-macay hay.

³ Ta', a løvtar: «Diyam, ama daa madaw akwar na, ka da lam cek a har ba, ka da lam zlanday ba, ka da lam gabal ba, ka da lam cek mezømey ba, ka da lam dala ba. Ndaw a da ley zana cew ba.

⁴ Kwa daa slam wura wura ndaw ma tøbkwar la a way anğa na, njam a way a ŋgene kasl pas masa akwar ma da diyam.

⁵ Kwa daa slam wura wura ndøhay ma tøbkwar daa ba na, raramatara lagwada fa salay akwar hay amba ka wuzdamatara ata ndøhay ta mebørey, diyam la da slala ha.»

⁶ Ta', gula anğa hay heyey a pøkam da slala hay mekele mekele daa hwayak nga *Galile, a wuzam *Mey-maaya-mawiya, a mbølám masa-macay hay, kwa daa wura daa wura cøpa.

*Ray a høbar a Bay Herawt
(Matiye 14.1-12; Mark 6.14-29)*

⁷ *Herawt, ndaw ma wa hwayak nga *Galile ŋgene, a cønda mey da ray ata Yesu ta gula anğa hay. Mey a, a høbar ray maja ndøhay faa guzlam mey hay mekele mekele. Ndøhay a løvam: «Ndaw aha na, ara *Jan-Baptis ma sløkdawa daa memøcey.»

⁸ Siya hay a løvam: «Ara *Eli ma wuzwa vaw.» Mekele hay a løvam: «Ara ndaw pal dasi ndøhay ma tøla mey nga Gazlavay zleezle ma sløkdawa daa memøcey.»

⁹ Ama Herawt a løvey: «Jan-Baptis na, ya ta dølra ray sem. Kaa ndaw masa yah ma cønda mey da ray a kefe na, ara wa døba wa?» Da ray ŋgene, a søpey cøvedŋ nga høtar Yesu.

*Yesu a vøltar cek mezømey a ndøhay ma føna gabal zlam
(Matiye 14.13-21; Mark 6.30-44; Jan 6.1-14)*

¹⁰ Fa døba ha, ndøhay meslørey nga Yesu kuraw a ray a cew heyey a vøhmawa fa Yesu, a kadamara cek hay tabiya

masa ata ma kamərwa daa mepəkey ata. Yesu ta', a ηgəлта taava ata, a diyam aa slam gweegwe ta slala Betsayda.

¹¹ Ama ndəhay ga ma cəndamara ata sem na, a diyam asi ata. Yesu a təfta ta meesəmey. A wuztar mey da ray mewey ηga Gazlavay da ray ndəhay, asaya, a mbəldata masa-macay hay.

¹² Yaw, mamba pas a kəzley na, gula anğa hay kuraw a ray a cew heyey a ηgəcham a cakay a, a ləvmar: «Ləvtar a ndəhay keđe ηga diyam a wuzlah-way, da daa ba, a slala hay ta cakay, amba a səpam slam-meney ta cek mezəmey, maja aləkwa da wuzlah-ley.»

¹³ Ama Yesu a ləvtar: «Akwar ta ray akwar, vəlmatar cek mezəmey!» Gula hay a, a mbəđdamara, a ləvmar: «Da har ala na, peη zlam ta ewet cew gway. Da ka wufey amba ndəhay tabiya keđe a zəmam cek na, si ya diyam ya hədkamawa kwa.»

¹⁴ Da wuzlah ndəhay a ηgene, zel hay a key gabal zlam. Yesu a ləvtar a gula anğa hay a: «Njadamata njakw! njakw! kwakwar zlam, kwakwar zlam.»

¹⁵ Gula anğa hay ta', a njadamata tabiya anda Yesu ma ləvtar.

¹⁶ Fa dəba ha, Yesu hal! a həлта peη zlam ta ewet cew heyey, ta', a baηgađa dey a vad, a kar suse a Gazlavay maja cek mezəmey a. Ta', a papəsa, a vəldatara a gula anğa hay amba a wunkamatara a ndəhay a.

¹⁷ Kwa waawa a zəmey haa a rəhey. Ta', gula anğa hay a cakalamara siya ηga cek hay a ma mbəkey. Macakalakaya ha, gadakar kuraw a ray a cew.

*Ndəhay a padamara Yesu na, ηga wa?
(Matiye 16.13-28; Mark 8.27-9.1)*

¹⁸ Ta pas lanğar daha, Yesu fa dərey dangay pal taava anğa. Gula anğa hay ata da cakay a. Ta', Yesu aa cəfđata, a ləvtar: «Yah na, ndəhay a padamaya na, ηga wa?»

¹⁹ Gula anğa hay a, a mbəđdamara, a ləvmar: «Ndəhay siya a ləvam kah na, *Jaη-Baptis. Mekele hay a ləvam kah na, *Eli, *ndaw ma təla mey ηga Gazlavay zleezle. Mekele hay saya a ləvam kah na, ndaw pal dasi ndəhay ma təla mey ηga Gazlavay zleezle ma sləkđawa daa meməcey.»

²⁰ Ta', Yesu aa cəfđata saya, a ləvtar: «Kaa akwar may, ka ləvam yah na, wa?» *Piyer a mbəđdara, a ləvar: «Kah na, *Kəriste, *ndaw masa Gazlavay ma wala ηga ləhdata ndəhay.»

21 Yesu a kətata gula anğa hay, a katar mey, a ləvtar: «Ka da wuzdamara mey a keđe a ndaw ba.»

22 A ləvtar saya: «Si yah, *Bəz nğa Ndaw, ya sərey banay la ga dğay. Mahura hay nğa *Jəwif hay, *bay-ray hay nğa ndəhay ma ka kwakwas nğa Gazlavay, leŋ *ndəhay maa sərkada kwakwas nğa Mawiz, a rəsmaya la, fa da təbmara ara Gazlavay ma slərđiwa na, daa ba. A da kəđmaya vğay. Ama nğa đar maakar a na, ya sləkđawa la daa meməcey.»

Mey da ray mesəpey Yesu

23 Ta', Yesu a ləvtar a ndəhay tabiya: «Da ndaw a wuđeŋ nğa səpya na, si a mbəkda mewulkey da ray ray anğa, a səpya ta mevel pal, si a bəsa banay ma da sawa a ray anğa mandaw mandaw maja yah, anda yah ma da məcey fa hwadam mazlanğalakaya.

24 Sərmara, kwa waawa ma wuđeŋ nğa ləhda heter anğa na, a key nğene, aa zəđda. Ama kwa waawa maa zəđda heter anğa maja yah na, a key nğene, a ləhda heter anğa ha.

25 Da ndaw a hətey cek hay tabiya masa anğa ma wuđeŋ da bəla keđe, ama aa zəđda heter anğa, da daa ba, a nəsa ray anğa na, mehətey cek hay a tabiya nğene, a jəna la daw?

26 Kwa waawa ma paya hwaray fa mey nğa ndəhay, da daa ba, ma key hwaray nğa təba mey adaw na, nğene, ta pas masa yah, *Bəz nğa Ndaw, yah ma da vəhwa ta mewədey adaw *, ta gədan mahura nğa Papay, leŋ ta gədan nğa maslan anğa hay da vad na, ya par hwaray la fa mey nğa Bay Gazlavay may.

27 Ya fa ləvkwar fara fara, ndəhay siya da wuzlah akwar feđe, fa da məcam daa ba, si ata ma hətmar mewey nğa Bay Gazlavay la dğay.»

Gula hay nğa Yesu a hətmar mewədey nğa Yesu (Matiye 17.1-8; Mark 9.2-8)

28 Fa dəba ha luma pal na, Yesu, ta', a nğəlta ata *Piyer, *Jan, leŋ *Jak. A təpam a anğwa amba Yesu a dərwa dangay fetəde.

29 Masa anğa fa dərey dangay na, dey anğa pəla! a mbədey, zana anğa a wədey mabara ndəđ-ndəđ.

30 Wure wure nğene, ndəhay daha cew faa guzlam ta Yesu a. Ara ata *Mawiz ta *Eli.

9:21 9.21 9.36 9:22 9.22 9.43-45; 17.25; 18.31-34; 24.6-7 9:23 9.23-24 14.27; 17.33; Mt 10.38-39; Jan 12.25-26; 1Pi 2.21 * 9:26 9.26 mewədey adaw: Nəka Heb 1.3. 9:26 9.26 12.9; Mt 10.33; 2Tm 1.8; 2.12 9:27 9.27 Mt 16.28 9:28 9.28-29 5.16 9:29 9.29-36 2Pi 1.16-18

³¹ A wuzmawa vaw daa mewedey nga Gazlavay da vad. Ata faa guzlam ta ata Yesu da ray slëra annga masa annga ma da ndövda ta fa memöcey annga da *Jeruzelem.

³² Ata Piyer ta gula hay cew heyey manatakaya cëkw-cakw daa ðar. Ama a slëkðam daa ðar, a hëtmar mewedey nga Yesu ta ndöhay cew heyey.

³³ Daa masa ndöhay a fa diyam la da cakay Yesu na, Piyer aa guzlar a Yesu, a lëvar: «Bay ala, maaya na, ya njakwa fede, amba ya kërçam slam hay maakar, pal ngada kah, pal ngada Mawiz, pal ngada Eli.» Ama Piyer a sëra mey masa annga maa guzlda ba.

³⁴ Masa Piyer faa guzley na, mekwtene a sawa, a sörtata. Mekwtene ma sörtata la na, gula annga hay heyey a zluram.

³⁵ Daa mekwtene he na, ðay a cënwa, a lövey: «Kede he ara Bözey ađaw, masa yah ma wala, jëkfamar slömay.»

³⁶ Fa dëba nga ðay ma cënwa ha na, *gula hay nga Yesu a da nëkam dey na, mbak! Yesu pal taava annga. Gula hay nga Yesu a, a njam teete, kwa cek masa ata ma hëtmar na, ta kadamara ngada ndöhay daa ba.

Yesu a bada cek da ray bözey

(Matiye 17.14-18; Mark 9.14-27)

³⁷ Pepërek e, ata Yesu ta gula annga hay maakar heyey a pamawa salay da anğwa heyey, ndöhay ga a diyam nga cadamërwa ray ta Yesu a.

³⁸ Da wuzlah ndöhay a ngene, ndaw daha a zlar mewudey, a lëvar a Yesu: «Bay ađaw, ya kaka ambahw. Nëka bözey ađaw kede, annga pal, mekele daa ba, jëna cey.

³⁹ Annga ta cek da ray, ta zlar la na, a wudey, a gucey, manğwafakw a bawa da mey. A sërda banay kalah, a mbëkda gweegwe ba.

⁴⁰ Ya ta katar ambahw la a gula akah hay amba a badamara cek da ray bözey a, ama ta gwamara daa ba.»

⁴¹ Yesu aa guzley, a lövey: «Hey! Akwar ndöhay marëzltakaya masa ma pamaya nga ndaw akwar fara fara ba kede. Ya da njey ta akwar na, haa ta vara? Ya da bëskwar na, haa ta vara?» Ta', a lëvar a ndaw aha: «Handiwa bözey akah ha fede.»

⁴² Masa bözey a gweegwe a wusey a cakay Yesu na, cek da ray a cëkw! a la bözey a, ba! a këlza a hwayak, a gucey. Ama Yesu aa bëçar a cek da ray bözey a, ta', a mböley. Yesu a lëvar a papaha: «Ehe, bözey akah.»

⁴³ Ndöhay tabiya a rëzlam, a lövam: «Fara fara Gazlavay na, aa ta gëdan.»

Yesu aa guzley saya da ray meməcey anğa ta masləkdawa anğa

(Matiye 17.22-23; Mark 9.30-32)

Daa masa ndəhay tabiya fa rəzlam da ray cek hay tabiya masa Yesu ma kata na, a ləvtar a gula anğa hay:

⁴⁴ «Wure kefe jəkam sləmay maaya maaya, pamara mey kefe aa ray: A da kərzamaya, yah, *Bəz nğa Ndaw, a da vəldamaya a har ndəhay.»

⁴⁵ Ama gula anğa hay ta cəndamara mey masa Yesu maa guzldatara nğene daa ba. Mabara nğa mey a mabadakaya fa ata, a gwamara nğa cəndamara ba dagay. A zluram nğaa cəfdamara Yesu da ray mey a.

Mahura na, wa?

(Matiye 18.1-5; Mark 9.33-37)

⁴⁶ Gula hay nğa Yesu a kam yawa da wuzlah ata, a wudam amba a sərmara mahura dasi ata na, wa.

⁴⁷ Ama Yesu a səra mewulkey ata. Ta', a ley bəzey mecəhe deŋ! a lacada a cakay a,

⁴⁸ a ləvtar: «Kwa waawa ma təba bəzey mecəhe kefe la maja a wudya na, a key nğene na, a təbey yah, ray adaw. Asaya, kwa waawa ma təbya la, a təbey nğene na, Bay Gazlavay, ndaw ma slərđiwa may. Ndaw masa mecəhe da wuzlah akwar tabiya na, mahura na, anğa.»

Ndaw masa-gəra aləkwa ba na, ara jam aləkwa

(Mark 9.38-40)

⁴⁹ Ta', *Jan a mbəddara a Yesu, a ləvar: «Bay ala, ala ta hətam ndaw daha la fa bəley malula da ray ndəhay ta mezəley akah. Ya wudam nğa təkmara maja ara ndaw da wuzlah aləkwa ba.»

⁵⁰ Ama Yesu a mbəddara, a ləvar: «Ka da təkmara ba. Ndaw masa-gəra akwar ba na, ara jam akwar.»

Ndəhay Samari a wudam nğa təbmara Yesu ba na, maja me?

⁵¹ Masa gweegwe cay Gazlavay a la Yesu fa vəfa a vad na, Yesu a kərza mevel nğa daw aa berney nğa *Jeruzelem.

⁵² Ta', a slərey ndəhay teesəf fa mey. A diyam a slala daha daa hwayak nğa *Safari nğa diymar slam-meney.

⁵³ Ama ndəhay daa slala ha, a gəmam nğa təbmata ba, maja a sərmara Yesu a wudəy nğa daw a Jeruzelem †.

9:45 9.45 18.34 **9:46 9.46-48** 22.24-26 **9:48 9.48** 10.16; 22.26; Mt 10.40; 20.26-27; Mk 10.43-44; Jan 13.20 **9:50 9.50** 11.23; Mt 12.30 **9:51 9.51** 24.50-51; Mt 19.1; Mk 10.1; SNM 1.9 **9:52 9.52** 10.33 † **9:53 9.53** Ndəhay Samari, ata masa-gəra nğa Jəwif hay. Anda kefe, a wudam Jəwif hay da Galile a diyam a Jeruzelem ta daa hwayak ata ba.

54 Masa gula anġa hay ata *Jak ta *Jan ma nœkmara ndœhay daa slala ha a gœmam nġa tœbmata ba na, ta', a lœvmar: «Bay Mahura, ka wufey yaa œœfdamawa awaw nġa pawa salay da vad nġa zœma slala ha keœe tabiya daw?»

55 Yesu pœla! a mbœfey dey nġada fa ata, ta', a mbœftar ray, a katar mey. [A lœvtar: «Ma hœldakwar nġaa guzley anda keœe na, mesœfney wura? Yah, *Bœz nġa Ndaw, ya sawa na, nġaa zœfey ndœhay ba, ama nġa lœhdata.].»

56 Ta', a diyam aa slala mekele.

*Mey da ray mesœpey Yesu
(Matiye 8.19-22)*

57 Ata fa diyam daa œœved, ndaw daha a lœvar a Yesu: «Kwa aa slam wura wura masa kah ma da daw na, ya daw la asi akah.»

58 Yesu a mbœddara, a lœvar: «Mbiga hay, ata ta vœged ata hay, œiyan hay, ata ta way ata hay. Ama yah, *Bœz nġa Ndaw na, kwa slam nġa ney nekœfey amba ya mœskey vaw da hwœf a na, daa ba.»

59 A lœvar a ndaw lanġar: «Sawa asi œfaw.» Ama ndaw aha a lœvar: «Bay œfaw, vœlya œœved amba ya daw ya jœhœrwa papay la œfagay.»

60 Yesu a mbœddara, a lœvar: «Mbœkdata ndœhay mamœctakaya nġa jœhmata ndœhay ata hay mamœctakaya. Kah na, daw ta wuzey mey da ray mewey nġa Gazlavay da ray ndœhay.»

61 Ndaw lanġar daha saya a lœvar: «Yah na, ya daw la asi kah Bay œfaw, ama vœlya œœved amba ya da catœrwa har a ndœhay da way ala hay la œfagay.»

62 Yesu a mbœddara, a lœvar: «Ndaw masa fa hœvey ta sla hay, a mbœfey dey fa dœba na, anġa letek ta ndaw ma wufey nġa daw taa œœved œfaw, ama a nœkey dey fa dœba aa œœved anġa magurma. Ndaw anda nġene na, a gwa mekey slœra nġa Bay Gazlavay ba sœlak.»

10

Yesu a slœrdata ndœhay kwakwar maasala a ray a cew

1 Fa dœba ha, Bay Mahura a weley gula hay mekele kwakwar maasala a ray a cew, amba a slœrdata tabiya cew cew teesœd fa mey anġa aa berney hay œœpa ta a slala hay tabiya masa anġa ta ray anġa ma da daw a hwœf a.

2 A nġatar mey, a lœvtar: «œek ta key la ga da ley, ama ndœhay nġa kamœrwa a way na, pœreh. Anda keœe, kamar

ambahw a bay nga ley a, nga slərwa ndəhay mekele saya a dey a nga kawa cek hay da ley a.

³ Yaw, anda keđe diyam, ya slərdakwar anda bəz-təban hay ngada wuzlah gədey-ley hay.

⁴ Ka da lam dala ba, ka da lam gabal ba, kwa ka da lam tarak hay ba. Ka da lacam daa cəvedf nga cey har a ndəhay ba.

⁵ Da ka mbəzam a way ndaw nga njeý, teesedf na, ləvam: "Anja way keđe nga njeý daa zazay."

⁶ Da ndaw ma wufey zazay nga njeý da way anga daha na, mepəsey-mey akwar a, a wusfar la. Da ndaw ma wufey zazay da way a daa ba na, mepəsey-mey akwar a, a vəhwa la fa akwar.

⁷ Da ndəhay da way a ta təbmakwar la, njam da way a ngene, zəmam cek, sam cek, masa ndəhay a ma vəldamakwara, maja ndaw ma ka sləra na, aa təde nga hətəy mawurbay nga sləra anga. Ka da səpmata fa way a fa way a ba.

⁸ Masa akwar ma wusam la aa berney wura wura, da ndəhay fetede a təbmakwar na, cek masa ndəhay a ma da vəldamakwara, zəmamara.

⁹ Mbəldamata masa-macay hay daa berney a, ləvmatar a ndəhay daa berney a: "Bay Gazlavay ta wuswa la gweegwe ta akwar nga wey da ray akwar."

¹⁰ Ama da ka wusam aa berney wura wura masa ndəhay a gəmam nga təbmakwar ba na, diyam aa slam masa ndəhay ga da hwadf a, ləvam:

¹¹ "Kwa lagwada daa berney akwar fa salay ala, ya raramakwara amba ya wuzdamakwara akwar ta kam cek maaya ba la. Asaya, si ka səmra Bay Gazlavay ta wuswa la gweegwe ta akwar nga wey da ray akwar!"»

¹² Yaw, Yesu aa guzltar saya, a ləvey: «Ya fa ləvkwar fara fara, ta pas nga sariya na, Gazlavay a da sərdara banay ta ndəhay daa berney a ngene ma fəna nga ndəhay daa berney nga *Sadawm.»

*Yesu a wuzda banay ma da sawa a ray ndəhay ma təbmara meý anga ba
(Matiye 11.20-24)*

¹³ «Haya! ndəhay da slala Kwaraziñ, banay a sawa la a ray akwar. Haya! ndəhay da slala Betsayda, banay a sawa la a ray akwar. Ya ta key maazla hay la da wuzlah akwar. Da ndəhay daa berney nga Tir ta nga Sidanw ta hətmatar maazla hay a la na, anja ta mbəfdamara menjeý ata sem

døga zleezle, anja ta kəzlam zana ŋga sak meeførey vaw sem fa vaw, asaya, anja ta pətkwalam sem daa bebədes ŋga wuzwa na, ata ta mbəddamara menjey ata da bəla cay.

¹⁴ Da ray ŋgene, ta pas masa Gazlavay ma da ka sariya da ray bəla na, Gazlavay a da sərdakwar banay ma fəna ŋga ndəhay daa berney ŋga Tir ta ŋga Sidanɲw.

¹⁵ Akwar, ndəhay da Kapernayum may, ka wulkam na, Gazlavay a ŋgəlkwar la a vad daw? Ara kəne ba. Sasəkar jak, a da kəzlakwar aa slam ŋga ndəhay maməctakaya.»

¹⁶ Yesu a ləvtar a gula anɲa hay: «Ndaw masa fa cənkwar mey na, a key ŋgene, a cənya mey may. Ndaw masa ma təba mey akwar ba na, a key a təbey mey adaw ba may. Asaya, ndaw ma rəsyə na, a key ŋgene a rəsa ndaw ma slərđiwa.»

Ndəhay kwakwar maasala a ray a cew heyey a vəhmawa da pəkey

¹⁷ Ndəhay meslərey hay kwakwar maasala a ray a cew heyey, a vəhmawa ta meesəmey ga, a ləvmar a Yesu: «Bay Mahura, daa masa ala faa guzlam ta mezəley akah na, kwa malula hay may a cənmandar mey.»

¹⁸ Yesu a mbəddatara, a ləvtar: «Yah, ya ta hətər *Satan la fa təđwa anda mezəmey ŋga var ma kawa da vad ŋgada hwayak.

¹⁹ Yaw, jəkam sləmay, ya ta vəlkwər gədan la ŋga pey salay a ray zezekw hay ta arac hay, asaya, ya ta vəlkwər gədan la ŋga fəna gədan ŋga masa-gəra hay ŋga Bay Gazlavay tabiya. Kwa cek fa da hətəkwər daa ba.

²⁰ Ama ka da sasəsam maja malula hay ma cənkwər mey ba. Sasəsam na, maja mezəley akwar hay mawuzlalatakaya da gazlavay da vad.»

*Yesu a kar suse a Gazlavay ta meesəmey
(Matiye 11.25-27; 13.16-17)*

²¹ Wure wure ŋgene, *Mesəfney ŋga Gazlavay a vələr meesəmey a Yesu. Ta', Yesu a həlma Gazlavay, a ləvey: «Waa Papay Bay Gazlavay, ndaw ma wa slam da vad ta da hwayak, ya fa kaka suse, maja ka ta wuzdərwa maaya akah la a ndəhay ma səra cek ba anda bəza hay mecəhe hay. Ama ŋgada ndəhay masa ta lenɲesl ma səra cek na, ka ta bəda maaya ha sem fa ata. Ahaw Papay, maja ta mbafaka sem ŋga ka kəne.»

10:13 10.13-14 Iz 23.1-16 **10:15 10.15** Iz 14.13, 15 **10:16 10.16** 9.48; Mt 18.5; Mk 9.37; Jan 13.20 **10:17 10.17** 9.10; Mk 6.30 **10:18 10.18** Jan 12.31; CWJ 12.9 **10:19 10.19** Ps 91.13 **10:20 10.20** Mab 32.32; Fəl 4.3; CWJ 3.5
10:21 10.21 4.18; Mt 11.25

22 Ta', a lœvtar a ndəhay: «Papay ta vœldatiwa cek hay tabiya sem asi har adaw. Kwa ndaw pal ma sœrya, yah, *Bœz ŋga Ndaw na, daa ba, si Papay. Asaya, kwa ndaw pal ma sœra Papay daa ba may, si yah, Bœz aŋga, leŋ ndəhay masa yah ma wudɛy ŋga wuzdatara.»

23 Fa dœba ha, ta', a mbœdɛy dey ŋgada fa gula aŋga hay, a lœvtar ŋgada ata taava ata: «Maaya ŋga Gazlavay aa da ray akwar maja akwar ma hœtmar cek masa Gazlavay ma ka kedɛ ta dey akwar.

24 Ama ya fa lœvkwar, ndəhay ma tœla mey ŋga Gazlavay zleezle ta bay hay ga, ta wudam la ŋga hœtmar cek masa akwar ma hœtmar kedɛ, ama ta hœtmar daa ba. Ta wudam la ŋga cœndamara cek masa akwar ma cœndamara kedɛ, ama ta cœndamara daa ba.»

Mey-menɣey ta ndaw Samari

25 Fetedɛ na, *ndaw maa sœrkada kwakwas ŋga Mawiz daha, a wudɛy ŋga jada Yesu. Ta', a slœkdɛy, aa cœfdɛ, a lœvar: «Bay adaw, ya da key amba ya hœtey heter mendœvey ba na, me?»

26 Yesu a mbœfdara, a lœvar: «Mawuzlalakaya daa kwakwas alœkwa na, kwariya? Masa kah ma janɣa na, ka cœnda na, kwara?»

27 Ndaw aha, a mbœfdara a Yesu, a lœvar: «Mey a, a lœvey: “Si ka wudɛ Bay Gazlavay akah ta mevel akah cœpa, ta mesœfney akah cœpa, ta gœdaŋ akah cœpa, ta leŋgesl akah cœpa. Si ka wudɛ meseembew akah anda kah ma wudɛ ray akah.”»

28 Yesu a mbœfdara, a lœvar: «Yawa, ka ta mbœddiwa la maaya kalah. Daw ta ka kœne, ka hœtey heter mendœvey ba la.»

29 Ama ndaw aha a wudɛy amba a bœla hwaray daa dey aŋga. Da ray ŋgene, aa cœfdɛ Yesu saya, a lœvar: «Meseembew adaw na, wa?»

30 Yesu aa guzlar saya, a lœvar: «Ndaw *Jœwif daha a slœkdɛy da *Jeruzelem, a daw a Jerikwaw. A da daw na, a har mayal hay. Mayal hay a, a kœrzamara, a kœfdmara, a mbœkdamara hœdek hœdek ŋga mœcey.

31 Fa dœba ha, *ndaw ma ka kwakwas ŋga Gazlavay daha, a daw taa cœved e ŋgene. A hœtar ndaw masa mayal hay ma kœfdmara heyey. Ta', a zleŋgedɛy, a daw dœreŋ ta aŋga.

32 Fa dœba ha, ndaw ma ka kwakwas ŋga Gazlavay mekele daha masa da wuzlah ndəhay ŋga *Levi, a daw taa slam aha ŋgene may. A hœtar ndaw masa mayal hay ma kœfdmara

heyey na, ta', a zlenjedey a daw dorenj ta anja, anda ndaw ngeeme heyey saya na, gway.

³³ Ama, ndaw-molak daha, ara ndaw *Samari, fa daw taa caved e ngene may. A wusey a cakay ndaw masa mayal hay ma kadmara kedfe na, a noka na, a kar dey-ceceh.

³⁴ Ta', a ngöchey a cakay a, a kar mal ta slalak fa mbölek e, a mbözra. Fa döba ha, a la a ray zengwaw anja, ta', a handa aa way meney nga molak hay, a nekfar dey.

³⁵ Peperek e, masa fa da daw aa mepökey anja na, ta' a völar dala a bay nga way a, a lövar: "Nökfayawa dey fa ndaw kedfe. Pas masa ya ta vöhwa cay daa mepökey adaw na, yah ta ray adaw, ya pölkawa cek tabiya masa ka maa zödda maja anja fa döba adaw la."»

³⁶ Masa Yesu ma ndövda mey-menjey kedfe cay na, ta', aa cöfda *ndaw maa sörkada kwakwas nga Mawiz heyey, a lövar: «Da wuzlah ndöhay maakar kedfe na, meseembew nga ndaw masa mayal hay ma kadmara kaa na, wa?»

³⁷ *Ndaw maa sörkada kwakwas nga Mawiz a, a mböddara, a lövar: «Meseembew anja na, ara ndaw masa ma sörfar dey-ceceh.» Ta', Yesu a lövar: «Daw, ta ka köne.»

Mey da ray ata Marta ta Mari

³⁸ Ata Yesu ta gula anja hay fa diyam daa caved. Masa ata ma wusam la a slala daha na, fetede, ngwas daha mezöley Marta, a ngöla Yesu a way anja.

³⁹ Dam-mamaha daha, mezöley *Mari, cökwan! a njey a cakay Bay Mahura, fa jökey slömay fa mey anja masa aa ma kada.

⁴⁰ Marta fa key slöra hay mekele mekele ga daa hejek. Ta', a sawa fa Yesu, a lövar: «Bay Mahura, dam-mama adaw a mbökdatiwa slöra hay tabiya a ray adaw anda kedfe na, a mbafaka gway daw? Lövar nga sawa nga jönya.»

⁴¹ Yesu a mböddara, a lövar: «Marta, Marta, ka fa höba ray akah maja ka fa key cek hay mekele mekele ga.

⁴² Ama cek pal mahura nga key daha. Ara cek masa Mari ma ka kedfe. Ndaw ma gwa nga töka daa ba.»

11

Mey da ray medörey-dangay (Matiye 6.9-13; 7.7-11)

¹ Ta pas langar daha, Yesu fa dörey dangay daa slam daha. Masa aa ma ndövda cay na, ndaw pal dasi gula anja hay, aa cöfda, a lövar: «Bay Mahura, sasörkadandar

medərey dangay anda *Jan maa sərkadata gula anğa hay cey.»

² Yesu a ləvtar: «Da akwar fa dəräm dangay na, ləvam:

Papaŋ Bay Gazlavay,

anja ndəhay tabiya ŋga namaka ray

maja kah na, Bay Gazlavay pal.

Maaya na, ka wa bəla tabiya.

³ Vəldar cek mezəmey ŋga wusndar fa dər a, fa dər a.

⁴ Mbəkdamara mebərey ala,

maja ala may, ala fa mbəkdamatara mebərey

ŋga ndəhay ma kamandar cek maaya ba.

Jəndar amba cek a batandar ŋga key mebərey ba.»

⁵ Yesu aa guzltar mey-menğey da ray medərey-dangay a gula anğa hay, a ləvtar: «Da ndaw da wuzlah akwar, jam anğa daha na, a daw fa anğa ta wuzlah-tavad amba aa cəfdə, a ləvar: “Jam adaw, vəlya peŋ maakar yaa dəfey cey,

⁶ maja mandala adaw ta sawa la da pəkey ta way adaw, ama cek mezəmey amba ya vəlar daa ba.”

⁷ Jam anğa ha a mbəfdara da way da way, a ləvar: “Ka sərdaya banay ba. Ya ta gərca mey-mbew cay, ala manatakaya ta bəz adaw hay. Ya gwa ya sləkdey amba ya vəlka peŋ ba.”»

⁸ Yesu a ləvey saya: «Ya fa ləvkwar kwa ndaw aha, a wufey ŋga sləkdey ba na, a sləkdey la. A da sləkdey na, maja ata jam ba, ama maja da ta vəlar daa ba na, jam anğa ha a daa cəfdə dey ga, hwaray fa da kar daa ba. Anda kefe, a vəlar cek tabiya masa jam anğa ha ma wufey la.

⁹ «Yah na, ya fa ləvkwar: Cacəfdam cek fa Bay Gazlavay, a vəldakwara la. Səpam cek fa Gazlavay, ka hətam la. Zəlam fa mey-mbew, a wurkwara la,

¹⁰ maja kwa waawa maa cəfdafar cek na, a vəlar la. Kwa waawa ma səpey cek fa vəda na, a hətey la. Kwa waawa ma zəley fa mey-mbew na, a wurara la.

¹¹ «Akwar papaŋ ŋga bəza hay, da bəzey akah aa cəfdafaka ewet na, ka vəlar zezekw la daw?

¹² Yaw, da aa cəfdafaka slesled na, ka vəlar arac la daw?

¹³ Akwar ndəhay malamba hay ma!, ka səmara ŋga vəley cek maaya ŋgada bəz akwar hay. Da kəne na, kaa wara Papakw akwar Bay Gazlavay da vad a vəltar Mesəfney anğa ŋgada ndəhay masa maa cəfdafamara ba na, kwara?»

Gədanŋa ŋga Bay Gazlavay a fəna gədanŋa Satanŋa
(*Matiye 12.22-30; Mark 3.20-27*)

¹⁴ Pas pal daha Yesu a bəley malula da ray ndaw ma gwa meeguzley ba daha. Masa anŋa ma bəla malula ha cay na, ndaw a, aa guzley dəba. Ndəhay tabiya fetede a rəzlam.

¹⁵ Ama ndəhay siya da wuzlah ata a ləvam: «Ara *Beyelzebul, bay ŋga mesəfney maaya ba hay ma vəlar gədanŋa bəley malula da ray ndəhay.»

¹⁶ Siya hay a səpam cəvedŋa ŋga jadamara, a ləvmar ŋga key maazla ŋga wuzda gədanŋa anŋa a sawa ta fa Bay Gazlavay.

¹⁷ Ama Yesu a sərə mewulkey ata, ta', a ləvtar: «Da ndəhay daa hwayak pal a kam vərəm da wuzlah ata na, hwayak a ŋgene a nəsey la. Daa vərəm a ŋgene, way hay a bəzlam la.

¹⁸ Da gula hay ŋga *Satanŋa, a kam vərəm da wuzlah ata na, kaa wara Satanŋa a, a da cəmtar ray ŋga wey da ray ata na, kwara dəba wura? Yaw, ya ləvkwara anda kedə na, maja ka ləvam ya bəley malula da ray ndəhay ta gədanŋa Beyelzebul.

¹⁹ Da kəne na, kaa gula akwar hay a bəlam malula ta gədanŋa ŋga wa? Ka ləvam ta gədanŋa ŋga Gazlavay, ba diya? Da ray ŋgene, gula akwar hay a, a wuzdamakwara la mey akwar ŋgene ara anŋa ba.

²⁰ Fara fara, ya bəley malula da ray ndəhay na, ara ta gədanŋa ŋga Gazlavay. A wufey ŋga ləvey, Gazlavay fa wey da ray akwar cay.»

²¹ Yesu a ŋgey mey saya, a ləvey: «Da ndaw masa-gədanŋa fa jəda zleley anŋa ta cek ma ka vərəm na, zleley anŋa ha mapakaya maaya maaya, cek a wusfar ba.

²² Ama da ndaw mekele ma fəna ta gədanŋa a sawa, a kərza ndaw aha, a pəslara cek mekey vərəm anŋa hay tabiya masa anŋa ma jəda zleley anŋa ta anŋa. A həlra zleley anŋa tabiya, a wunkatara a ndəhay anŋa hay.

²³ «Yaw, da ndaw aa ta yah daa ba na, ŋgene ndaw a ara masa-gəra adaw. Asaya, da ndaw a gəmey ŋga jənya ŋga bəcwa ndəhay aa cəvedŋa adaw ba na, a key ŋgene, aa wadatar ray.»

Mey da ray malula ma vəhwa a ray ndaw saya
(*Matiye 12.43-45*)

²⁴ Yesu aa guzley saya, a ləvey: «Da masa malula ta bey sem da ray ndaw na, a daw a pəkey da ley saw, a səpey slam ŋga məskey vaw. Da ta hətey daa ba na, a ləvey:

“Ngama ya vøhey aa slam adaw masa yah ma bawa da hwaɗ a heyey.”

²⁵ Ta', a vøhey a ray ndaw aha aa slam anɗa heyey, a hɗfar slam aha maɗiykaya maaya maaya.

²⁶ Da ray nɗene, malula ha a daw a nɗɗɗa malula hay mekele maasala ma fɗnmara ta hɗma. A samawa a ray ndaw a heyey. Anda keɗe, ndaw aha a da sɗrey banay ma fɗna masa nɗeeme.»

Maaya nɗa Gazlavay na, aa da ray wa hay wa?

²⁷ Masa Yesu ma kada mey keɗe la na, nɗwas daha da wuzlah ndøhay makustakaya kaa heyey, aa guzlar a Yesu, a lɗvar: «Maaya nɗa Gazlavay aa da ray nɗwas masa kah ma yawa da hwaɗ anɗa, kah ma sa dɗwa anɗa!»

²⁸ Yesu a lɗvar: «Ahaw, ama maaya nɗa Gazlavay nɗa sawa jak na, a ray ndøhay ma jɗkam slɗmay fa mey nɗa Gazlavay, ma kadamara slɗra ta mey a.»

*Ndøhay aa cɗɗamara Yesu nɗa key maazla
(Matiye 12.38-42)*

²⁹ Ndøhay ga fa kusmawa ma fɗna ma fɗna a cakay Yesu. Yesu a zlar nɗaa guzley, a lɗvey: «Ndøhay masa wure keɗe kaa na, maaya ba hay. Aa cɗɗam maazla masa da gazlavay da vad ma wuzda ara Gazlavay ma slɗdiwa. Ama a hɗmar maazla ha daa ba, si maazla anda ma key ta *Jawnas, *ndaw ma tɗla mey nɗa Gazlavay zleezle.

³⁰ Anda Gazlavay ma ka maazla ta Jawnas zleezle nɗada ndøhay daa berney nɗa Niniwe, ara kɗne may ta yah, *Bɗz nɗa Ndaw, ma da tɗrey nɗa maazla nɗada ndøhay masa wure keɗe.

³¹ Yaw, ta pas sariya masa Gazlavay ma da ka na, nɗwas ma key bay daa hwayak nɗa Saba zleezle, a lacawa ray la nɗa mbɗɗkar ray, akwar ndøhay masa wure keɗe, maja anɗa na, a sawa da dɗren nɗa cɗney mey maaya nɗa Bay *Salamanɗw, ndaw ta lenɗesl. Nɗkmara, da wuzlah akwar feɗe, ndaw ma fɗna Bay Salamanɗw daha!

³² Ta pas sariya na, ndøhay daa berney nɗa Niniwe heyey, a lacamawa ray la nɗa mbɗɗmakwar ray, akwar ndøhay masa wure keɗe, maja daa masa ata ma cɗdamara mey nɗa Gazlavay masa Jawnas ma wuzdatara na, ta mbɗɗdamara menɗey ata sem. Nɗkmara, da wuzlah akwar feɗe, ndaw ma fɗna Jawnas daha!»

Mey-menġey ta slam-mewedey
(*Matiye 5.15; 6.22-23*)

³³ Yesu aa guzltar ta mey-menġey: «Da ndaw ta gəfey awaw la aa petərļa nga wedey slam na, a dəpa ba. Ama a pa aa slam mepey petərļa nga wadā slam daa way a, amba ndəhay ma mbəzam a hwađ a na, a hətmar dey.

³⁴ Bəz nga dey akah na, fa wadā vaw akah anda petərļa ma wadā slam. Da bəz nga dey akah anġa maaya maaya na, kah daa slam-mewedey. Ama da dey akah aa maaya ba na, nġene, kah daa ləvaŋ.

³⁵ Anda keđe, wey vaw anja slam-mewedey daa kah nġene na, nga tərey nga ləvaŋ ba.

³⁶ Ama da vaw akah cəpa aa daa slam-mewedey, ləvaŋ da hwađ a kwa kuset kəđey daa ba na, nġene, vaw akah a da wedey anda petərļa ma wadā slam.»

Yesu a mbəđtar ray a Fariza hay ta ndəhay maa sərkada kwakwas nga Mawiz

(*Matiye 23.1-36; Mark 12.38-40*)

³⁷ Masa Yesu ma ndəvda meeguzley cay na, ndaw Fariza daha a zəla a way anġa nga zəmey đaf. Ta', a diyam, a mbəzam a way a, a nġam nga zəmey đaf.

³⁸ Ndaw Fariza heyey a rəzley, maja Yesu ta pəra har nga zəmey đaf anda kwakwas nga *Fariza hay a ma ləvey na, daa ba.

³⁹ Bay Mahura a ləvar: «Akwar Fariza hay, akwar fa pərmara dəba nga vəley nga đaf ta vəley nga yam akwar hay maaya maaya nga səpey kwakwas akwar, ama mevel akwar na, marəhkaya ta mewulkey nga leley, ta nga key maagway.

⁴⁰ Akwar ndəhay marəzltakaya hay! Gazlavay ma karawa dəba nga cek hay a na, ta karawa hwađ a daa ba daw?

⁴¹ Ama da ka wuđam mevel akwar nga tərey maaya fa mey nga Gazlavay, maaya na, ka vəlmatar cek masa daa vəley akwar hay a masa-viya hay.

⁴² «Banay a sawa la a ray akwar, akwar Fariza hay. Akwar fa wunkamata cek akwar hay tabiya slam kuraw, akwar fa vəldamara slam pal a Gazlavay, kwa cek hay mecəhe mecəhe ma cərda lar, ta gwaslaf nga lar mekele mekele daa jerne akwar hay na, akwar fa wunkamara kəne may. Ama ka sərřadamara nga key cek maaya ta cəved e a ndəhay ba. Asaya, ka wuđmara Gazlavay ba. Sasəkar jak, cek hay a nġene na, ara cek hay maaya nga key. Ka da mbəkdamara nga key cek hay siya hay ba may.

43 «Banay a sawa la a ray akwar, akwar Fariza hay, maja daa *way-mewuzey-mey nga Gazlavay na, ka wudam menjey aa slam maaya masa fa mey. Ka wudam ndəhay a camakwar har ta meney ray fa mey nga ndəhay makus-takaya ga.

44 Banay a sawa la a ray akwar, akwar Fariza hay, maja akwar anda cəvay hay ma hətey ba masa ma katar hezey a ndəhay ma diyam ta ray a, kwa a sərmara ba.»

45 Ndaw pal da wuzlah *ndəhay maa sərkada kwakwas nga Mawiz a mbəddara, a ləvar: «Waa bay ala, kaa guzley anda keđe na, a key ka cəfndar ala ndəhay maa sərkada kwakwas may.»

46 Yesu a mbəddara, a ləvar: «Akwar ndəhay maa sərkada kwakwas nga Mawiz may, banay a sawa la a ray akwar, maja akwar fa bamawa kwakwas hay maadakw a maadakw a masa ndəhay a gwamara nga səpmara ba. Ama ka gəmam nga jənmata nga səpey kwakwas hay a, kwa nekədey ba.

47 Banay a sawa la a ray akwar, akwar masa ma ləmamata cəvay hay nga ndəhay ma təla mey nga Gazlavay zleezle nga mbey, anja ara papaŋ nga papakw akwar hay ma kədmata jak.

48 Anda keđe, akwar fa wuzdamara a ndəhay sləra nga papaŋ nga papakw akwar hay ŋgene na, a mbafakwar. Ata na, ta kədmata ndəhay ma təla mey nga Gazlavay zleezle sem, akwar kwa ka ləmamata cəvay ata hay maaya maaya.

49 Maja ŋgene, Bay Gazlavay ma səra cek tabiya, a ləvey: “Ya da slərwa ndəhay ma təla mey adaw, ta ndəhay meslərey. A da sərdamata banay ta siya hay da wuzlah ata, siya hay may, a da kədmata vagay.”

50 Da ray ŋgene, mambaz nga ndəhay ma təla mey nga Gazlavay tabiya masa ma məcam dəga nga mezley nga bəla na, a hufey la a ray ndəhay masa wure keđe.

51 A kədam teesəd na, *Abel. Asaya, ta kədam ndəhay mekele mekele la haa kasl fa *Zakari masa ata ma kədmara daa walaŋ nga slam-mefəkey cek ŋgada Gazlavay ta *Way nga Gazlavay. Fara fara, ya fa ləvkwar, Gazlavay a katar sariya la a ndəhay masa wure keđe maja ata.

52 «Akwar ndəhay maa sərkada kwakwas nga Mawiz, banay a sawa la a ray akwar maja akwar ta bədamara mey nga Gazlavay sem fa ndəhay anda ndaw ma bəy lekəle nga mey-slam.»

⁵³ Masa Yesu ma bawa la da way ndaw Fariza heyey na, ndəhay maa sərkada kwakwas nga Mawiz ta Fariza hay, mevel a catar ga. Ta', aa cədfamara da ray mey hay mekele mekele,

⁵⁴ amba da ta hətam mey maaya ba la na, a dadədfamar mey.

12

Yesu a patar lenjesl a gula anğa hay
(Matiye 10.26, 27)

¹ Daa masa Yesu fa kam yawa ta *Fariza hay len ta *ndəhay maa sərkada kwakwas nga Mawiz heyey na, ndəhay ga ta kusam la, a key gabal weewe, kwa slam nga lecey daa ba. Yesu aa guzltar a gula anğa hay dğay, a ləvtar: «Wam vaw fa cek ma həsla peŋ nga Fariza hay. Anda meləvey, wam vaw fa Fariza hay, ndəhay masa ta neneh cew.

² Cek tabiya masa ndəhay ma bədamara, a wuzwa la a palah, cek hay masa ndəhay ma səmra ba na, a səmra la.

³ Maja ŋgene, cek tabiya masa akwar ma kadamara ta tavad daa ləvaŋ na, ndəhay tabiya a cəndamara la taa pas. Mey tabiya masa akwar maa səkdamara taa səkey da ver na, a wuzdamara la ta gədaŋ daa slam metəley mey.»

Maaya nga zlurey na, ta wa?
(Matiye 10.28-31)

⁴ Yesu a ləvtar: «Ya fa ləvkwar, jam adaw hay, ka da zluram ta ndəhay ma da kədfmakwar vagay ba, maja a da kədam na, vaw akwar daada gway. Fa dəba ha, fa da gwamara nga kamakwar cek mekele daa saba.

⁵ Amba ya wuzdakwara ndaw masa akwar ma da zluram ta anğa. Zluram na, ta Gazlavay gway, maja ta kədfkwar vagay la na, fa dəba ha, a gwa nga kəzlakwar aa vəged nga awaw magaza saya. Fara fara, ya fa ləvkwar, zluram ta anğa.

⁶ «Diyaŋ mecəhe mecəhe zlam na, a gwa nga hədfkedey dala cew daada, ba daw? Ama Gazlavay a sərtə diyaŋ hay a pal pal tabiya.

⁷ Akwar may, kwa enğwec nga ray akwar hay na, masləftakaya pal pal tabiya. Ka da zluram ba! Akwar na, Gazlavay a wudkwar a fəna diyaŋ hay mecəhe mecəhe ga ŋgene, ba daw?»

*Mey da ray mekey sede da ray Yesu
(Matiye 10.32-33; 12.32; 10.19-20)*

⁸ Yesu a lɔvtar saya: «Ehe, ya fa lɔvkwar saya, kwa waawa ma lɔvey fa mey nga ndɔhay, anɔa ndaw adaw na, nɔgene, yah, *Bɔz nga Ndaw, ya da lɔvey fa mey nga maslan hay nga Gazlavay da vad ta pas sariya, anɔa ndaw adaw may.

⁹ Ama ndaw ma lɔvey fa mey nga ndɔhay a sɔrya ba na, yah, Bɔz nga Ndaw, ya da lɔvey fa mey nga maslan hay nga Gazlavay ta pas sariya, ya sɔra ba may.

¹⁰ «Kwa waawa maa guzley mey maaya ba da ray adaw, yah, Bɔz nga Ndaw na, Gazlavay a mbɔkdara mebɔrey anɔa la. Ama ndaw ma cɔda *Mesɔfney nga Gazlavay na, Gazlavay fa da mbɔkdara mebɔrey anɔa daa ba sɔlak.

¹¹ «Da a handamakwar aa *way-mewuzey-mey nga Gazlavay nga key sariya, da daa ba, fa mey nga ndɔhay mahura hay ta bay hay amba a kamakwar sariya na, ka da zluram ba, ray akwar a da hɔbey da ray mey masa akwar ma da mbɔɔdamatara nga lɔhey ray akwar ba.

¹² Mey masa akwar ma da mbɔɔdamatara na, Mesɔfney nga Gazlavay a wuzdakwara la ta pas nɔgene.»

Mey-menɔey ta ndaw masa-zleley marɔzlkaya

¹³ Ndaw pal da wuzlah ndɔhay ga da cakay Yesu heyey a lɔvar: «Bay adaw, lɔvar a mɔlma adaw mahura nga wunkandara zleley nga papa ala ma mbɔkdandara cey!»

¹⁴ Yesu a mbɔɔdara, a lɔvar: «Jam adaw, ma paya nga dɔsley mey da wuzlah akwar ta nga wunkakwara zleley akwar na, wa?»

¹⁵ Fa dɔba ha, aa guzltar a ndɔhay tabiya, a lɔvtar: «Wam vaw, ka da sɔpam nga key zleley ta har akwar ba. Kwa ndaw, anɔa ta zleley ga na, heter anɔa fa da nɔey maja zleley a na, daa ba.»

¹⁶ Ta', aa guzltar mey-menɔey, a lɔvtar: «Ndaw daha, anɔa ta zleley ga. Ley anɔa hay ta kam cek la maaya maaya.

¹⁷ Anda kedɔ, ndaw aha, a wulkey, a lɔvey: «Slam nga pata cek adaw hay daa saba. Ya da key na, kwara?»

¹⁸ Fa dɔba ha, a lɔvey: «Aha! Ya sɔra cek masa yah ma da ka. Nɔgama ya hɔbta wuded adaw hay cɔpa, ya lɔmta mahura mahura, ya bɔcta daw adaw ta zleley adaw hay tabiya a hwad a.

¹⁹ Fa dɔba ha, ya da lɔvey: Zleley adaw fa da ndɔvey daa ba, a key mevey weewe la. Ya da mɔskey vaw, ya da zɔmey cek, ya da sey cek, ya da nɔey daa wiya.»

20 «Ama Gazlavay a ləvar a ndaw aha: “Kah na, ndaw marəzlkaya, dasi tavad keđe, ya da la mesəfney akah. Zleley masa kah ma bəca ŋgene na, ŋgada wa?”»

21 Da ray ŋgene, Yesu a wuzdatara mey a, a ndəhay da cakay a heyey, a ləvtar: «Ndəhay masa ma bəcam zleley da bəla keđe ŋgada ata ray ata na, a key ŋgene, a kam cek ma mbafar a Gazlavay ba. Ata letek ta ndaw a keđe.»

*Mey da ray mepey Gazlavay ŋga ndaw fara fara
(Matiye 6.25-34)*

22 Fa dəba ha, Yesu aa guzltar a gula aŋga hay, a ləvtar: «Maja ŋgene, ya fa ləvkwar fara fara, daa menjey akwar na, ray akwar a da həbey da ray cek mezəmey ta cek mesey ba. Asaya, ray akwar a da həbey da ray zana ŋga kəzley fa vaw akwar ba.

23 Ya ləvkwar anda keđe na, maja cek mezəmey a fəna heter akwar ba, zana may, a fəna vaw akwar ba.

24 «Yaw, wulkam da ray diyaŋ hay cey! Fa sləkam daa ba, fa ŋgəmam daw daa ba, kwa wudedə ata hay daa ba, ama Gazlavay fa vəltar cek mezəmey cəŋga. Akwar na, ka fənmata diyaŋ hay ba daw?

25 Da wuzlah akwar ndaw ma gwa ŋga pey kwa dər pal a ray dər aŋga da bəla ta mewulkey aŋga na, wa?

26 Da ka gwamara mekey cek mecəhe ba na, ka həbam ray da ray cek hay mekele na, maja me?

27 «Nəkmara meefekwey hay da ley cey! Aa fakwam na, kwara? A kam sləra ba, a cam zana ba, ama ya fa ləvkwar, kwa Bay *Salamanjw zleezle ta zleley ga ta gwa ŋga kəzley zana ma mbey anda meefekwey pal na, daa ba.

28 Gazlavay a ka amba kusaf aa fekwey tasana, ama mandaw na, kusaf a, a wewurey. Da Gazlavay fa key cek maaya ŋgada kusaf masa awaw ma da wawura anda keđe na, Gazlavay a nəfkakwar dey ma fəna kusaf a ŋgene daa ba daw? Akwar masa ma pamara Gazlavay ŋga ndaw akwar fara fara ba ŋgene, sərmara Gazlavay a kəzlkwar zana la ma fəna meefekwey hay a.

29 Anda keđe, ray akwar a da həbey mandaw mandaw da ray cek mezəmey ta da ray cek mesey ba. Ka da zluram maja cek hay a ba.

30 Ma həbam ray maja cek hay a ŋgene na, ndəhay da bəla keđe masa ma sərmara Gazlavay ba. Ama akwar na, Papakw akwar, Bay Gazlavay, a səra cek masa akwar ma wudam.

³¹ Anda keḏe, sɔpam na, Gazlavay ŋga wey da ray akwar. Fa dɔba ha, Bay Gazlavay a vɔldakwara cek hay siya la may.»

Mey da ray meɓɔcey zleley da gazlavay da vad
(Matiye 6.19-21)

³² Yesu a lɔvtar a gula anɔa hay: «Akwar na, ga daa ba anda tɔbaŋ hay masa ŋguyer kɔḏey, ama ka da zɔuram ba, maja ta mbafar la a Papakw akwar amba a vɔlkwar cek hay maaya masa anɔa ma ɗiytara ŋgada ndɔhay masa anɔa fa wey da ray ata.

³³ Hɔɗkadamata cek akwar hay, wunkamatara dala ha a masa-viya hay. Sɔpam ŋga ɓɔcey zleley * na, aa slam masa menjey ŋga sɔrmataw da vad. Fetede zleley akwar a fa da ndɔvey daa ba. Anda keḏe, mayal hay a gwamara ŋga lalamara daa ba, kwa maaca a gwa ŋga nɔsa ba.

³⁴ Sɔrmara, daa slam masa zleley akwar aa da hwad a na, mevel akwar may aa fetede.»

Mey da ray mewey vaw ŋga key slɔra ŋgada Gazlavay

³⁵ Yesu a lɔvtar: «Njam vaw madiykaya mandaw mandaw ŋga key slɔra ŋgada Gazlavay. Ka da mɔcmata petɔrla akwar hay ba,

³⁶ anda ndɔhay ma ka slɔra ma sɔkwmara bay ŋga way ma lawa daa gwagway ŋga kwakwa ta tavad. A sɔkwmara amba a wurmara mey-mbew fiyaw da masa ta vɔhwa cay, fa zɔley fa mey-mbew.

³⁷ Da bay ŋga way a sawa, a hɔɗfatar ata ta dey na, meesɔmey daha ŋgada ndɔhay ma ka slɔra hay a. Ya fa lɔkwara fara fara, bay ŋga way a, a pa zana ŋga slɔra fa vaw, a zɔltɔrwa, a njadata, a vɔltar cek mezɔmey.

³⁸ Kwa a vɔhwa ta wuzlah-tavad, kwa ta slam ŋгаа pɔrek, a hɔɗfatar ata ta dey na, meesɔmey daha ŋgada ndɔhay a.

³⁹ «Jɔkam slɔmay maaya maaya, da bay ŋga way a sɔra ɗar masa ndaw-mayal ma da daw a way anɔa na, a mbɔkda ndaw-mayal a ŋga slɔna way anɔa ha la daw?

⁴⁰ Yaw, akwar may, wam vaw maaya maaya maja yah, *Bɔz ŋga Ndaw, ya da vɔhwa na, kwa ka sɔrmara ɗar a ba.»

Mey da ray ndaw ma ka slɔra maaya ta maaya ba
(Matiye 24.45-51)

12:32 12:32 Iz 41.14; Lk 22.29 * **12:33 12:33** zleley: Yesu a wudey ŋga lɔvey na, da ka fa kar cek ma mbafar a Gazlavay na, mawurbay akah mapakaya da gazlavay da vad anda zleley akah maɓɔckaya a nɔsey ba, a ndɔvey ba. **12:33 12:33** Mt 6.19; 6.20; Lk 11.41; 18.22; SNM 2.45; 4.34-37; Kwa 3.1-2 **12:35 12:35-36** Mt 25.1 **12:36 12:36** CWJ 3.20 **12:39 12:39** Mt 24.43 **12:40 12:40** Mt 24.42

41 *Piyer aa cəfdə Yesu, a ləvar: «Bay Mahura, kaa guzley ta mey-menğey keđe na, ɲgada ala daw, ɲgada ndəhay tabiya daw?»

42 Bay Mahura a mbəddara, a ləvar: «Ndaw ma ka sləra maaya ta lenğesl na, wura? Ndaw ma ka sləra maaya ta lenğesl na, ara ndaw masa bay aɲga ma da pa ɲga mahura da ray ma ka sləra aɲga hay cəpa, amba a vəltar cek mezəmey daa masa may fa catar.

43 Da masa bay aɲga ha a sawa a hətfar aɲga fa ka sləra ha na, ndaw ma ka sləra ha aa səmey la.

44 Ya fa ləvkwar fara fara, bay aɲga ha, a da vəldara zleley aɲga hay cəpa a har aɲga amba a nəkfar dey.

45 Ama ndaw ma ka sləra masa ma ley mewulkey aɲga wal na, a ləvey: “Bay adaw fa da vəhwa gweegwe daa ba.” Ta’, a kədtə ndəhay ma ka sləra hay mezəle hay ta maɲgusa hay. A zəmey cek, a sey wuzam, a wey.

46 Fa dəba ha, bay aɲga ha na, a da vəhwa ta pas masa ndaw ma ka sləra ha fa wulkey da ray a daa ba, asaya, kwa fa da səra ler e daa ba. Bay aɲga ha a da bəla da way aɲga, a da sərda banay anda aɲga ma da sərdata banay ta ndəhay ma təba mey ɲga Gazlavay ba.»

47 Yesu a ləvar saya: «Ndaw ma ka sləra masa ma səra cek masa bay aɲga ma wudəy, ama a wey vaw fa sləra aɲga ba, asaya, a key cek masa aɲga ma ləvar ba na, ndaw aha, a hətey mekədey ga la.

48 Da ndaw ma ka sləra laɲgar a səra cek masa bay aɲga ma wudəy ba, ama ta key cek maaya ba la təde ɲga kədey na, a da hətey mekədey nekədey gway. Ndaw masa Gazlavay ta vəlar cek la ga a har aɲga na, a daa cəfdəfar ga kəne may. Ndaw masa Gazlavay ta vəlar sləra mahura la ɲga key na, a daa cəfdəfar ɲga ka sləra ha maaya maaya ma fəna.»

*Mey da ray ndəhay ma da wunkam d'ay maja Yesu
(Matiye 10.34-36)*

49 Yesu a ləvtar a gula aɲga hay: «Ya sawa na, ɲga pey awaw fa bəla keđe. Ya wudəy na, awaw a, a gədey dəga wure keđe.

50 Si a sərđamaya banay ga kasl fa meməcey †. Ray adaw fa həbey kasl pas masa banay a ma da ndəvey.

51 Ka wulkam ya sawa na, ya handawa zazay a bəla daw? Kay! Kəne ba. Ya fa ləvkwar, ya sawa ɲga wunkey ndəhay.

⁵² Døga wure keɗe, ndəhay zlam da way, a wunkam la, maakar a cəmam la a ray cew, cew a cəmam la a ray maakar.

⁵³ Yaw, bay nga way a wudkam ɗay la ta bəzey aŋga, bəzey a wudkam ɗay la ta papaha, ŋgwas a wudkam ɗay la ta dam aŋga, dam a wudkam ɗay la ta mamaha, maman nga bəzey a wudkam ɗay la ta ŋgwas nga bəzey aŋga, ŋgwas nga bəzey a wudkam ɗay la ta maman nga zel e.»

Mey da ray mesərey cek ma da key wure keɗe
(Matiye 16.2-3)

⁵⁴ Yesu a ləvtar a ndəhay ga da cakay a: «Anja ka hətmar gazlavay nga var fa lawa ta mey-aŋgwa †, wure ŋgene ka ləvam: “Var fa sawa.” Fa dəba ha, var a, a pey fara.

⁵⁵ Da ka hətmar memed fa kawa ta dey nga Məzam § na, ka ləvam: “Mawurbay a key la.” Fa dəba ha, mawurbay a, a key fara.

⁵⁶ Akwar ndəhay masa ta neneh cew, ka gwamara nga wunkamara cek ma key da bəla ta cek ma key da gazlavay da vad, ama ka səmra cek ma key wure keɗe ba na, maja me?»

Si ndaw a ɗiya mey ta ndaw ma wuda
(Matiye 5.25, 26)

⁵⁷ Yesu a ləvtar saya: «Akwar ta ray akwar ka səmra cek masa maaya nga key ba na, kwara?

⁵⁸ Da ndaw a wudka, akwar fa diyam cew e aa sariya na, ɗiyam mey a dōga daa cəved. Da daa ba na, a da handaka fa ndaw ma ka sariya, ndaw ma ka sariya ha a da veldaka a har sewje hay. Sewje hay may, a da kəzlamaka aa fərsəne.

⁵⁹ Ya fa ləvka, ka fa da bawa daa fərsəne he daa ba səlak, si kah ma pəla dəvaz a la tabiya ndav.»

13

Mey da ray membəɗfey menjey

¹ Daa ŋgene, ndəhay fetede daha, aa guzlmara a Yesu, a ləvmar: «Bay Pilat ta kəɗfey ndəhay *Galile la vagay daa masa ata fa həram gəna hay ŋgada Gazlavay. A cəma mambaz ata ta mambaz nga gəna hay a.»

² Yesu a mbəɗɗatara, a ləvtar: «Ka wulkam mebərey nga ndəhay Galile hay a ŋgene a fəna nga Galile hay siya, maja ata ma məcam anda ŋgene daw?»

12:52 12.52-53 14.26; 21.16; Mt 24.10; Mk 13.12 **12:53 12.53** Mi 7.6 † **12:54 12.54** var fa lawa ta mey-aŋgwa: Daa hwayak nga Jəwif hay var a sawa na, ta dey nga Dəhwa Mediterene. Dəhwa ha aŋga ta mey-aŋgwa nga Mafaw hay. § **12:55 12.55** dey nga Məzam: Ara «sud» ta mey Nasara.

³ Ya fa lõvkwar a fõna ba sөлak! Ama da akwar ta mbøddamara menjey akwar daa ba na, akwar cøpa ka daa zødam køne may.

⁴ Yaw, wulkam da ray ndøhay kuraw a ray a daaŋgafad masa way magølkaya maazøma da slala Siløwe ma bøzlwa a ray ata heyey. Ka wulkam na, a fønmeta ndøhay siya da *Jeruzelem ta mebørey daw?

⁵ Ya fa lõvkwar a fønmeta ba sөлak! Ama da akwar ta mbøddamara menjey akwar daa ba na, akwar cøpa ka daa zødam køne.»

Mey-menjey ta wudez ma yey ba

⁶ Yesu ta', a ŋgatar mey, a lõvtar: «Ndaw daha a røvey wudez aa ley aŋga. Fa døba ha, a sawa amba a ŋgøley babøza ŋga wudez e, ama wudez e, ta yey babøza daa ba.

⁷ Bay ŋga wudez e, a lõvar a ndaw ma jøfa ley aŋga ha: "Nøka wudez kefe, mevey maakar ya fa sawa amba ya ŋgøley babøza fa vøfa, ama babøza fa vøfa daa ba. Døsla wudez e, maja fa tøka slam ŋga maaya."

⁸ Ama ndaw ma jøfa ley a, a mbøddara, a lõvar: "Bay adaw, mbøkda ta lõmla kefe dagay, amba ya gudha siwurza, ya hølær gøraŋ asiya.

⁹ Da søfed na, a yey la kwa. Da ta yey daa ba cøŋga na, ka døsla."»

Yesu a mbøley ŋgwas ta pas memøskøy-vaw

¹⁰ Ta *pas memøskøy-vaw daha, Yesu faa sørkadata ndøhay daa *way-mewuzey-mey ŋga Gazlavay.

¹¹ Ŋgwas daha, aa ta malula da ray mevey kuraw a ray a daaŋgafad. Malula ha ta hurma sem. A gwa ŋga lecey der e ba.

¹² Masa Yesu ma høtar ŋgwas aha na, ta', a zøla, a lõvar: «Mamay, malula masa ma hurmaka ŋgene na, daa saba.»

¹³ Ta', a par har a ray. Wure wure ŋgene, ŋgwas aha deŋ! a lecey. A hølma Gazlavay.

¹⁴ Ama *bay-ray ŋga way-mewuzey-mey a, mevel a car maja Yesu ma mbøley ndaw ta pas memøskøy-vaw ŋgene. Da ray ŋgene, aa guzltar a ndøhay makustakaya daa way a, a lõvtar: «Dar maakwaw daha ŋga key sløra, da ka wudam membøley na, samawa ta pas hay a ŋgene, ama ka da samawa ta pas memøskøy-vaw ba!»

¹⁵ Bay Mahura a mbøddara a ndaw a, a lõvar: «Akwar, ndøhay masa ta neneh cew! Ta pas memøskøy-vaw na, akwar fa pøskamata sla akwar hay ta zøŋgwaw akwar hay da gezlen, ka handamata ŋga samawa yam, ba diya?

16 Yaw, ngwas daa səkway nga *Abərahām keɗe, anɗa majəwkaya da har *Sataŋ, bay-malula, mevey kuraw a ray a daanɗafad. Anɗa na, ya pəska ta pas meməskey-vaw ba na, maja me?»

17 Masa Yesu ma mbəɗɗatara anda keɗe la na, hwaray a katar a masa-gəra anɗa hay tabiya. Ama ndəhay makustakaya na, aa səmam da ray sləra hay mekele mekele maaya masa Yesu ma kata.

Mey-menɗey ta babəza nga bazlawar leŋ ta cek ma həsla makala

(Matiye 13.31-33; Mark 4.30-32)

18 Fa dəba ha, Yesu aa guzltar, a ləvtar: «Mewey nga Bay Gazlavay da ray ndəhay na, anɗa anda me? Ya da wa na, ta me?»

19 Ya wa ta babəza nga bazlawar masa ndaw ma la, ma rəba aa ley anɗa. Babəza nga bazlawar aha, ta', a pəcwa, a gəley mahura. Diyan hay a diyam way fa mey-har hay a.»

20 Yesu a ləvtar saya: «Ya da wa mewey nga Bay Gazlavay da ray ndəhay na, ta me?»

21 Ya wa ta cek ma həsla makala masa ngwas ma həley kuset kəɗey, ma jahada ta hapa nga makala ga, amba a həslərwa tabiya.»

Bay Gazlavay a wey na, da ray wa hay wa?

(Matiye 7.13, 14, 21-23)

22 Yesu fa daw ngada *Jeruzelem, a daw taa berney hay leŋ ta slala hay, faa səkadata ndəhay.

23 Daa nɗene ndaw daha, aa cəɗɗa, a ləvar: «Bay Mahura, Gazlavay a da ləhey daa mebərey na, ndəhay nekəɗey gway daw?» Ta', Yesu aa guzltar a ndəhay fetede, a ləvtar:

24 «Kam gədaŋ amba ka mbəzam taa mey-mbew meenɗəlez e aa slam masa Bay Gazlavay fa wey da ray ndəhay. Ya fa ləvkwar, ndəhay ga a jadamara la, amba a mbəzam, ama fa da gwamara daa ba.

25 «Yaw, pas pal bay nga slam aha a da sləkɗey nga gərca mey-mbew. Nɗene, ka da lacam aa ambaw, ka da zəlam fa mey-mbew, ka ləvam: “Bay ala, wurndara mey-mbew may taw!” Ama a da mbəɗɗakwara, a ləvkwar: “Ya səkwar ba! Ka samawa na, dama?”

26 Fa dəba ha, ka da zamar ngaa guzltar, ka ləvam: “Aləkwa ta zəmkwa cek la bama, aləkwa ta sakwa cek la bama, ka taa səkadandar la daa cəved ala hay mepəkey.”

27 A da ləvkwar saya: “Ya sərkwār ba! Ka samawa na, dama? Akwar ndəhay tabiya masa ma ka cek maaya ba hay, ɲgəcham la da cakay adaw.”

28 Ta pas masa akwar ma da hətmatar ata *Abərahām, *Izak, *Jakwap, leɲ ndəhay ma təla mey ɲga Gazlavay zleezle tabiya, manjatakaya da cakay Bay Gazlavay na, ɲgene, ka da təwam, ka daa pədam sler maja akwar mambəkdatakaya daa ambaw.

29 Ta pas masa Gazlavay ma da wuzdərwa bay ɲga na, ndəhay daa səkway hay mekele mekele a samawa la daa slam hay tabiya da bəla, ɲga key gwagway da vad.

30 Yaw, da wuzlah ndəhay madagway-dakw na, siya a da tərām ndəhay ɲgeeme, asaya, da wuzlah ndəhay ɲgeeme na, siya a da tərām ɲga madagway-dakw.»

Yesu a təway maja ndəhay daa berney ɲga Jeruzelem (Matiye 23.37-39)

31 Ta pas ɲgene, ndəhay da wuzlah *Fariza hay daha a ɲgəchamawa fa Yesu amba a wuzmar mey, a ləvmar: «Daw la fedə aa slam mekele maja Bay *Herawt a wudəy ɲga kədka vagay.»

32 Yesu a mbəddatara, a ləvtar: «Diyam ləvmar a mbiga * ha: “Ehe, ya fa bəley malula hay da ray ndəhay, ya fa mbəley masa-macay hay, tasana, mandaw, ɲga dər maakar a ya da ndəvda sləra adaw.”

33 Anda meləvey si ya ley cəved, ya daw tasana, mandaw, mandaw lanɲar saya, maja ndəhay a gwamara ɲga kədmara *ndaw ma təla mey ɲga Gazlavay dərəɲ ta *Jeruzelem ba sələk.»

34 Fa dəba ha, Yesu a ləvey: «Haya! Akwar ndəhay da Jeruzelem †, akwar ndəhay da Jeruzelem, Gazlavay a slərkwār ndəhay ma təla mey ɲga hay na, ka kədmata vagay. Asaya, a slərkwār maslan ɲga hay na, kaa zakamata ta ɲgwa. Ama mandaw mandaw ya wudəy amba ya bəckwar tabiya akwar anda gwagwar ma bəcta bəz ɲga hay asi kərpas, ama ka wudam ba.

35 Cəndamara, Gazlavay a da la har ɲga da ray akwar, Way-mekey-kwakwas akwar a da tərey yidəɲ. Yah fa ləvkwar, akwar fa da hətmaya fa dey daa saba haa ta pas masa akwar ma da ləvam: “Anja Bay Gazlavay ɲga

13:27 13.27 2Tm 2.19 13:30 13.30 Mt 19.30 * 13:32 13.32 mbiga: Yesu a zəla Bay Herawt «mbiga» maja daa mewulkey ɲga Jəwif hay, mbiga na, ara cek ɲga ley ma key cek ta dabaray, ama ndəhay a zluram ta ɲga ba maja ara cek mecəhe. † 13:34 13.34 Akwar ndəhay da Jeruzelem: Daa mey a kedə Yesu ta wusey a Jeruzelem daa ba araj, ama aa guzley anda ɲga gweegwe ta ata.

pəsar mey ngada ndaw masa aa ma slərdərwa ta mezəley aŋga.”»

14

Yesu a mbəley ndaw mambakaya ta mbey

¹ Ta *pas meməskey-vaw, Yesu ta', a daw a way ndaw pal da wuzlah mahura hay nga *Fariza hay nga zəmey dəf. Ndəhay manjatakaya fetede, fa sanjalamara Yesu ta dək-vaw da ray cek masa aa ma da ka.

² Ndaw da wuzlah ata daha, mambakaya ta mbey. Ndaw a malacakaya fa mey aŋga.

³ Yesu ta', aa guzltar ngada *ndəhay maa sərkada kwakwas nga Mawiz ta ngada Fariza hay, a ləvtar: «Kwakwas aləkwa a ləvey na, kwara? Membəley ndaw masa-macay ta pas meməskey-vaw na, maaya daw, maaya ba daw?»

⁴ Ama ndəhay a, a gəmam nga mbəddamara ba. Ta', Yesu a gəsfar har fa ndaw masa-macay heyey, mbal! a mbəlda, ta', a mbəkda nga daw.

⁵ Fa dəba ha, aa cəfdəta, a ləvtar: «Da ndaw da wuzlah akwar aŋga ta bəzey, da daa ba, aŋga ta sla, yaw, da bəzey a, da daa ba, sla ha a tədəy aa bəldaw na, ndaw aha a badərwa fiyaw fiyaw, kwa ta pas meməskey-vaw, daa ba daw?»

⁶ Kwa ndəhay a, ta gwamara nga mbəddamara aa mey nga Yesu a daa ba.

Ndaw a da pa ray aŋga nga mahura ba

⁷ Yesu fa nəkta ndəhay ma samawa nga zəmey dəf da way ndaw Fariza heyey. A səpam slam-menjey na, si nga ndəhay mahura hay. Maja ŋgene, Yesu a ŋgatar mey, a ləvtar:

⁸ «Da ndaw a zəlkwat nga zəmey dəf nga gwagway nga meley kwakwa na, ka da səpey nga njeŋ aa slam nga ndaw mahura ba. Da kaa tədəy ta zəlwa ndaw mahura da ray akah la aa gwagway a kwa.

⁹ Anda kede, bay nga way a, a sawa, a da ləvka: “Mbəkda slam kede a ndaw kede.” Maja ŋgene, ka da mbəkda slam aha, ka da njeŋ fa dəba ta hwaray a.

¹⁰ Ama da ta zəlmaka la nga zəmey dəf nga gwagway na, daw ta njeŋ fa dəba, amba bay nga way a, a sawa, a ləvka: “Jam adaw, sawa aa slam nga ndəhay mahura hay kede.” Anda kede, a həslka ray fa mey nga ndəhay tabiya daa gwagway a.

11 Yaw, fara fara kwa waawa ma pa ray anḡa nḡa mahura na, Gazlavay a da pa nḡa mecəhe, asaya, ndaw masa ma nada ray anḡa na, Gazlavay a da pa nḡa mahura.»

12 Yesu ta', aa guzlar a ndaw ma zəla nḡa zəmey daf heyey, a ləvar: «Da ka key gwagway na, ka da zəltərwa jam akah hay ba. Asaya, ka da zəltərwa məlmakw hay ba, ka da zəltərwa səkway akah hay ba, kwa meseembew akah hay masa-zleley hay ka da zəltərwa ba. Ka da zəltərwa ba maja ata may, a da zəlmaka kəne. A da pəlmakawa cek masa kah ma vəldatara la.

13 Ama da ka key gwagway na, zəlwa masa-viya hay, ndəhay masa maahəlbatakaya hay, ndəhay jegwer hay, leḡ wulaf hay.

14 Da ka zəlwa ndəhay anda keḡe hay nḡa zəmey daf na, maaya nḡa Gazlavay a sawa la a ray akah maja ndəhay a na, a gwamara nḡa vəhdamakawa cek aha ba. Ama Bay Gazlavay a da vəhdakawa ta pas masa ndəhay masa maaya fa mey nḡa Gazlavay, ma da sləkdamawa daa meməcey.»

*Mey-menḡey ta ndəhay mazəltakaya aa gwagway
(Matiye 22.1-10)*

15 Masa ndaw pal da wuzlah ndəhay ma zəmam daf ta ata Yesu heyey ma cənda mey a la na, ta', a ləvar a Yesu: «Meesəmey daha nḡada ndaw ma da zəmey daf nḡa gwagway daa bay nḡa Gazlavay da vad.»

16 Ta', Yesu a mbəḡdara ta mey-menḡey, a ləvar: «Ndaw daha a key gwagway, ta', a zəlwa ndəhay ga.

17 Pas təḡe nḡa zəmey cek na, a slərey madərlam anḡa fa ndəhay a nḡa ləvtar: “Samawa, maja cek tabiya madiykaya cay!”

18 Ama ata tabiya a kam ambahw pal pal. Ndaw nḡeeme a ləvar a madərlam a: “Ambahw, mbəkdaya maja ya ta həḡkey ley la, ya daw ya da nəkərwa.”

19 Ndaw lanḡar a ləvar: “Ambahw, mbəkdaya maja ya ta həḡkawa sla hay kuraw la nḡa key sləra, ya daw la ya jadatərwa!”

20 Mekele a ləvar saya: “Ya gwa ya daw ba maja ya ta kwakwa da ver.”

21 Madərlam a, a vəhey a cakay bay anḡa, a kadara mey masa ndəhay a ma ləvmar keḡe. Bay nḡa way a, mevel a car, a ləvar a madərlam anḡa: “Daw fiyaw aa slam masa ndəhay da hwaḡ a daha ta aa walaḡ-way hay. Nḡəlwa masa-viya hay, ndəhay masa maahəlbatakaya hay, masa wulaf hay, leḡ ndəhay jegwer hay.”

22 Fa dɔba ha nekɔfey, madɔrlam a, a vɔhwa, a lɔvar: “Bay adaw, ya ta zɔlwa ndɔhay la anda kah ma lɔvey, ama slam daa way a daha cɔngɔ.”

23 Ta', bay a, a lɔvar a madɔrlam a: “Daw a mey-cɔved daa zɔrdɔy-ɔngwa hay, tɔktɔrwa dɔy a ndɔhay ɔga samawa amba way adaw a rɔhey.

24 Ya fa lɔvkwɔr, kwa ndaw pal dasi ndɔhay masa yah ma zɔltɔrwa ɔgeeme heyey, fa da zɔmey daf ɔga gwagway adaw keɔe daa saba sɔlak!”»

ɔga tɔrey gula ɔga Yesu na, kwara?

(Matiye 10.37, 38)

25 Fa dɔba ha, Yesu fa diyam ta ndɔhay ga daa cɔved. Yesu pɔla! a mbɔdwa dey ɔgada fa ata, a lɔvtar:

26 «Da ndaw a wudɔy ɔga key gula adaw na, si a wudya a fɔna papaha ta mamaha, ɔngwas ɔnga ta bɔz ɔnga hay, mɔlmaha hay ta dam-mamaha hay, kwa heter ɔnga. Da daa ba na, a gwa ɔga key gula adaw ba.

27 Kwa waawa ma bɔsa banay ma da sawa a ray a maja ɔnga ma sɔpya daa ba na, fa da gwa ɔga key gula adaw daa ba.

28 Da ndaw da wuzlah akwar a wudɔy a lɔmey way mahura, teesɔd na, si a wulkey la dɔgay, way a, a key dala we. Fa dɔba ha, a nɔka da dala ɔnga a wusa ɔga kara slɔra ɔnga ha tabiya la kwa.

29 Da dala a wusa ba, ama da a zlar ma pa salay a cɔngɔ na, a gwa ɔga ndɔvda slɔra ɔga way a daa ba. ɔgene, ndɔhay tabiya masa ma hɔtmar way a, a daa sanɔgɔrfamar,

30 a lɔvam: “Ndaw keɔe da zlar melɔmey way, ama a gwa ɔga ndɔvda ba!”

31 «Yaw, da bay a wudɔy ɔga key vɔram ta bay mekele, si a wulkey da ray ndɔhay ɔnga hay gabal kuraw dɔgay. A wulkey da a gwa ma kɔdɔmata ndɔhay ɔga bay lanɔar ma sawa ta ndɔhay ɔnga hay gabal kwakwar cew ɔgene la kwa.

32 Da a wulkey fa da gwamara daa ba na, a slɔrey maslan ɔnga hay fa bay lanɔar heyey amba a njam ta zazay, daa masa bay a, a lawa dɔrenɔ dɔgay.»

33 Yesu a wuzdatara: «Anda keɔe, da kwa waawa da wuzlah akwar ta mbɔkdɔrwa zleley ɔnga lenɔ ndɔhay ɔnga hay daa ba na, a gwa ɔga key gula adaw ba.»

Mey da ray manda

(Matiye 5.13; Mark 9.50)

³⁴ Yesu a ləvtar: «Manda na, ara cek maaya. Ama da manda ha a cərey saba na, ya da kadakwa amba a cərey saya na, kwara?»

³⁵ Manda ha anɣa maaya saba. Kwa nɣa kwiyeɣ aa ley, kwa nɣa kwiyeɣ anda gəran, maaya saba. A da həlmara, a kwiɣdamara aa papalah saw. Da ndaw anɣa ta sləmay na, nɣa cənda meɣ a maaya maaya.»

15

Mey-menɣey ta təban meezədeɣ (Matiye 18.12-14)

¹ Ta pas lanɣar daha, ndəhay ma cakala budaw ta ndəhay ma zləba *kwakwas nɣa Mawiz, a nɣəcham tabiya fa Yesu amba a jəkfamar sləmay.

² *Fariza hay ta ndəhay maa sərkada kwakwas nɣa Mawiz aa nɣuram meɣ da wuzlah ata, a ləvam: «Ndaw keɣe a təbta ndəhay ma zləba kwakwas nɣa Mawiz, asaya, a zəmam dəf bama na, kwara?»

³ Anda keɣe, Yesu ta', aa guzltar ta meɣ-menɣey, a ləvtar:

⁴ «Da ndaw da wuzlah akwar, anɣa ta təban hay temere, da pal taa zədeɣ sem na, ndaw aha, a mbəkdata təban hay kwakwar zlam-letek a ray a zlam-letek da wuzlah-ley, a daw a səpərwa pal meezədeɣ a, haa anɣa ma hətərwa daa ba daw?»

⁵ Masa anɣa ma hətərwa la na, aa səmey ga. A cəpərwa təban anɣa ha fa pepesl *,

⁶ a sawa a way. Masa anɣa ma wuswa la na, a zəltərwa jam anɣa hay ta meseembew anɣa hay, a ləvtar: “Samawa, sasəmkwa bama maja təban adaw taa zədeɣ la, ya ta hətərwa cay.”

⁷ «Ya fa ləvkwar anɣa letek kəne, da gazlavay da vad na, meesəmey daha da ray ndaw pal ta mebərey ma mbəɣda menjeɣ anɣa. Meesəmey a, a fəna meesəmey da ray ndəhay kwakwar zlam-letek a ray a zlam-letek masa menjeɣ ata maaya, ma wuɣam nɣa mbədeɣ menjeɣ ata ba.»

Mey-menɣey ta dala meezədeɣ

⁸ Yesu aa guzltar ta meɣ-menɣey saya, a ləvtar: «Yaw, dala nɣa nɣwas daha siseɣ siseɣ † kuraw, ama pal zazad! aa zədeɣ. Ta', a gədeɣ awaw aa petərila, a faca way, a səpa ta dək-vaw kasl aa ma hətar dala ha.

14:35 14.35 Mt 11.15 15:1 15.1-2 Mt 9.10 15:3 15.3-7 Jan 10.11-15 15:4
15.4 Ez 34.11, 16 * 15:5 15.5 pepesl: «papay» ta meɣ Zədem. † 15:8 15.8
siseɣ: Daa nɣene na, siseɣ ara dala ga. Ta meɣ Gərek ara dala təde nɣa sləra
nɣa ndaw ma vərndeɣ da ley.

⁹ Masa anġa ma hëtar la na, a zëltërwa jam anġa hay ta meseembew anġa hay, a lëvtar: “Samawa, sasëmkwa bama maja dala adaw taa zëfey la, ya ta hëtar cay.”

¹⁰ Yaw, ya fa lövkwar ara letek këne da wuzlah maslan hay nġa Bay Gazlavay da vad na, meesëmey daha maja ndaw pal ta mebërey ma mbëdda menjey anġa.»

Mey-menġey da ray papaj ta bëza hay cew

¹¹ Yesu aa guzltar ta mey-menġey saya, a lëvtar: «Ndaw daha, bëz anġa hay cew.

¹² Masa matabëwa a lëvar a papaha: “Papay, wure kefe, wunkandara cek akah hay masa ala ma da wamara fa dëba akah. Yaw, masa nġada yah na, vëldiwa.” Ta’, papa ata ha a wunkatara.

¹³ Fa dëba ha d'ar nekëfey na, bëzey matabëwa ha, ta’, a hëdkadata cek hay maala nġa anġa tabiya. A daw ta dala ha aa hwayak dërenj. Daa hwayak a nġene, a zlar nġa key cek hay malamba, maja nġene, aa kwacada dala anġa heyey tabiya.

¹⁴ Masa anġa ma ndëvda dala anġa sem tabiya na, may mahura a key daa hwayak a, a hëtey cek nġa zëmey saba.

¹⁵ Ta’, a daw a key slëra da way ndaw fetede daha. Ndaw aha a slërda a ley nġa jëfey vetem hay amba a vëltar cek mezëmey.

¹⁶ Bëzey a, a wudëy nġa zëmey babëza nġa wudez masa vetem hay ma zëmamara, ama ndaw ma vëlar cëved daa ba.

¹⁷ A zlar mewulkey da ray cek masa aa ma ka, a lövey: “Ndëhay ma ka slëra nġa papay fa zëmam cek, fa rëham, fa mbëkdamara siya, ama yah na, may fa këfyä fefe!

¹⁸ Nġama ya mbëkda hwayak kefe, ya daw fa papay, ya lëvar: Papay, ya ta key mebërey la fa mey nġa Gazlavay, ta fa mey akah.

¹⁹ Wure kefe, ya wusa amba ka zëlyä bëzey akah saba. Nëkyä anda ndaw ma ka slëra akah gway.”

²⁰ Ta’, a slëkdäwa, a sawa fa papaha.

«Ama masa a lawa dërenj ta way nġa papaha dagay na, papaha a hëtar, a kar dey-ceceh. A hway a da cadërwa ray, slaslap! a slaslëpa.

²¹ Ta’, bëz anġa ha a lëvar: “Papay, ya ta key mebërey la fa mey nġa Gazlavay, ta fa mey akah. Wure kefe, ya wusa amba ka zëlyä bëzey akah saba.”

²² Ama, papaha a lëvtar a ma ka slëra anġa hay: “Wusmawa vaw, lamawa zana maaya, këzlamara fa vaw

nga bəzey adaw keđe. Lamawa dangwa nga bəz-mey-har, pamara a har. Lamawa tarak, ndəkwdamara a salay.

²³ Dadamərwa bəz-sla maabəlkaya masa aləkwa ma rəfkwa ngene. Hərmara, kakwa gwagway, sasəmkwa,

²⁴ maja bəzey adaw keđe anğa anda bəzey maməckaya, ama ta sləkɔwaw sem, anğa anda bəzey maazəɔkaya, ama yah ta hətar sem." Ta', ma ka sləra anğa hay a kamara anda bay ata ma ləvtar. Anda keđe, ndəhay a zlamar mekey gwagway ta meesəmey.

²⁵ «Daa masa ata fa kamara gwagway a na, bəzey mahura a lawa da ley. Masa anğa fa sawa da ley na, a cənda baazlam ta gaanğanj nga megərvey.

²⁶ Ta', a zəley ndaw ma ka sləra nga papaha pal, aa cəɔɔa, a ləvar: "Mekey da way a, me?"

²⁷ Ndaw ma ka sləra ha, a mbəɔɔara, a ləvar: "Məlmakw ta sawa cay, papakw ta həra bəz-sla masa aləkwa ma rəfkwa heyey sem, maja məlmakw a ta vəhwa sem, aa daha zay."

²⁸ Bəzey mahura heyey a key mevel, a gəmey nga mbəzey a way saba. Ama, papaha, ta', a daw fa anğa, a bərkwa nga mbəzey a way.

²⁹ Ama bəzey a, a mbəɔɔara a papaha, a ləvar: "Papay, jəkey sləmay: mevey weewe ya fa kaka sləra, ya fa təbkawa mey akah mandaw mandaw, ama ka ta vəlyə kwa bəz-ɔakw pal nga key gwagway ta mandala adaw hay daa ba.

³⁰ Ama bəzey akah keđe a vəhwa, ta ndəvdatərwa cek akah hay sem tabiya nga mesəpey ngwas-barlaw hay, ama ngada anğa na, ka hərara bəz-sla masa aləkwa ma rəfkwa heyey jak!"

³¹ Papaha a ləvar: "Bəz adaw, kah na, mandaw mandaw aləkwa cew e, cek tabiya masa yah ma wa na, ara nga akah.

³² Si ya kakwa gwagway ta meesəmey, maja məlmakw keđe, anğa na, anda bəzey maməckaya, ama ta sləkɔwaw sem, anğa anda bəzey maazəɔkaya, ama yah ma hətar sem!"»

16

Mey-menğey ta gula masa-wewer

¹ Ta pas lanğar daha, Yesu a ngatar mey a gula anğa hay, a ləvtar: «Ndaw daha aa ta zleley ga. Gula anğa mahura ma jəɔra zleley a daha. Ndaw daha a sawa, a ləvar a ndaw masa-zleley a: "Gula akah faa kwacadakawa zleley akah la."

² Bay nga gula heyey ta', a zələrwa, a ləvar: "Ya ta cəney mey maaya ba la da ray akah. Wuzdiwa sləra masa kah

ma ka tabiya, maja wure keƙe ka fa da key gula aƙaw daa saba!”

³ Gula aƙga kaa heyey a wulkey daa ray aƙga, a lɔvey: “Ya da key kwara? Bay aƙaw a da baɗaya daa slɔra aƙga. Gɔɗaƙ aƙaw ƙga hɔvey daa ba. Ƙga rɔkey na, hwaray a kaya la.

⁴ Aha! Wure keƙe ya sɔra cek masa yah ma da ka! Ƙgama ya kɔrzey jam hay. Anda keƙe, ta pas masa ta baɗaya sem daa slɔra aƙga na, jam aƙaw hay a, a ƙgɔlmaya a way ata hay.”

⁵ Masa aa ma wulkey la anda keƙe na, ta’, a zɔltɔrwa ndɔhay masa ma lam dɔvaz ƙga bay aƙga pal pal tabiya. A lɔvar a ndaw ƙgeeme: “Dɔvaz ƙga bay aƙaw da har kah na, we?”

⁶ Ndaw aha a mbɔɗɗara, a lɔvar: “Mal gwajakwad temere.” A lɔvar: “Larawa ɗerewel ƙga dɔvaz akah fiyaw, njeɗ, wuzlala fa vɔɗa kwakwar zlam.”

⁷ Ta’, aa cɔɗɗa ndaw laƙgar saya, a lɔvar: “Dɔvaz ƙga bay aƙaw da har akah na, we?” Ndaw aha a mbɔɗɗara, a lɔvar: “Daw sak temere.” A lɔvar a ndaw aha: “Larawa ɗerewel ƙga dɔvaz akah fiyaw, wuzlala fa vɔɗa kwakwar daaƙgafad.”

⁸ Kwa gula ha a key cek ta cɔved e ba na, ndaw masa zleley a, aa hɔmɗa maja a ka slɔra aha ta dabaray. Fara fara, ndɔhay da bɔla keƙe a kam cek ta dabaray da wuzlah ata ma fɔna ndɔhay ƙga Bay Gazlavay.»

⁹ Yesu a lɔvey saya: «Ya fa lɔvkwar, zleley da bɔla keƙe na, kɔrzadamara jam. Anda keƙe, da zleley a ta ndɔvey sem na, ka da hɔtam slam menjeɗ maaya ma ndɔvey ba da vad.

¹⁰ Ndaw masa ma key slɔra maaya ta cek mecɔhe na, a key slɔra maaya ta cek mahura la may. Ndaw ma key slɔra ta cɔved e ba ta cek mecɔhe na, a key slɔra ta cɔved e ba ta cek mahura la may.

¹¹ Da ray ƙgene, da ka kam slɔra maaya ba ta zleley masa ma vɔɗamakwara a har akwar da bɔla keƙe na, kaa wara zleley masa fara fara na, ma da vɔɗakwara na, wa?

¹² Ama da wure keƙe ka kam cek hay maaya ba ta zleley masa ndaw ma vɔɗakwara da bɔla keƙe na, fa dɔɓa ha, Gazlavay a vɔlkwar zleley la amba ka wamara daw?

(Matiye 6.24)

¹³ «Ndaw ma gwa ƙga key slɔra ƙgada bay hay cew daa ba, maja a da wuɗa bay laƙgar a fɔna bay laƙgar, da daa ba, a da nar ray a bay laƙgar, a rɔsa bay laƙgar. Ka gwamara ƙga sɔpmara Gazlavay leɗ zleley cewete daa slam a ba.»

14 Masa *Fariza hay ma cəndamara mey a kede na, aa sanğoram a ray Yesu maja a wudam dala kalah.

15 Ta', Yesu a ləvtar: «Akwar fa kam cek maaya fa dey nğa ndəhay, amba a ləvam akwar ndəhay maaya hay. Ama Gazlavay na, a səra mevel akwar. Cek masa ndəhay a nəkmara mahura fa mey ata na, ara cek nğa tede fa mey nğa Gazlavay.»

Mey hay mekele mekele nğa Yesu

(Matiye 11.13, 12; 5.18; 5.32; 19.9; Mark 10.11-12)

16 Yesu a ləvtar: «Kwakwas nğa *Mawiz ta ndəhay ma təla mey nğa Gazlavay fa wuzdamara mey nğa Gazlavay haa kasl *Jan-Baptis. Dəga daa nğene, ndəhay fa cəndamara *Mey-maaya-mawiya da ray *mewey nğa Gazlavay da ray ndəhay. Kwa waawa fa key gədañ amba a mbəzey a wuzlah ndəhay masa Gazlavay ma da wey da ray ata fara fara.

17 «Slam da vad' ta slam da hwayak, anğa ta gəra amba a ndəvey, ama cek mecəhe mawuzlalakaya daa mey nğa kwakwas nğa Mawiz kede nğaa vəsey na, anğa ta gəra ma fəna saya.

18 «Yaw, kwa waawa ma bəla nğwas anğa, a lawa mekele na, a key nğene, a ley vaw saw da palah. Asaya, kwa waawa ma la nğwas masa zel e ma bəla sem na, a key nğene, a ley vaw saw da palah may.»

Mey-menğey da ray ndaw masa-zleley ta ndaw masa-viya

19 Yesu aa guzltar ta mey-menğey saya, a ləvtar: «Ndaw daha, anğa ta zleley ga, a pey zana fa vaw na, maaya masa ndaw ma gwa nğa hədka ba. Aa daa wiya mandaw mandaw, fa zəmey cek maaya.

20 Ndaw mekele daha, anğa masa-viya, mezəley anğa Lazar, mbəlek fa vaw njaba-njaba. Manakaya fa mey-mbew nğa ndaw masa-zleley kaa heyey.

21 Aa fa wudəy nğa gədmey meepəsey nğa daf da hwayak daa slam mezəmey daf nğa ndaw masa-zleley heyey, ama ndaw ma vələr daa ba. Asaya, gədey hay fa samawa, fa ndəfdamara mbəlek fa vaw anğa.

22 «Fa dəba ha nekədey, ndaw masa-viya heyey, pam! a məcey. Maslañ hay nğa Gazlavay da vad' ta', a samawa, leñ! a lamara a vad' a cakay *Abəraham. Ndaw masa-zleley heyey, pam! a məcey may. Ndəhay ta', a jəhmara.

23 Ndaw masa-zleley kaa fa sərey banay ga da wuzlah ndəhay maməctakaya. A da banğada dey a vad' na, a hətər Abəraham manjakaya dərəñ, Lazar manjakaya da cakay a.

²⁴ Da ray ηgene, a wudey, a tɔlar mey, a lɔvar: "Papay Abɔraham, sɔrfaya dey-ceceh, slɔrdɔrwa Lazar amba a jɔhwɔa bɔz-mey-har anɔa aa yam na, a gɔciwa fa neneh adaw, maja ya fa sɔrey banay kalah daa awaw keɔe."

²⁵ «Ama Abɔraham a mbɔɔɔɔara, a lɔvar: "Bɔz adaw, wulkada, daa masa kah da bɔla, ka ta hɔtey zleley la ga, daa ηgene, Lazar fa sɔrey banay. Wure keɔe, feɔe, ala fa dɔkmar mevel, ama kah, ka fa sɔrey banay may."

²⁶ Asaya, daa walaη ala ta akwar na, vɔgeɔ selesen daha, cɔved ηga daw daa ba. Da ray ηgene, da ndɔhay feɔe a wudam ηga diyam fetede na, a gwamara ηga diyam ba. Asaya, da ndɔhay fetede a wudam ηga samawa feɔe na, a gwamara ba may."

²⁷ «Ndaw masa-zleley kaa heyey a lɔvar a Abɔraham: "Na, ya kaka ambahw papay Abɔraham, slɔrda Lazar a way papay."

²⁸ Mɔlma adaw hay zlam daha, ηga daw ηga wuztar, amba a samawa aa slam ηga banay keɔe saba."

²⁹ Abɔraham a mbɔɔɔɔara, a lɔvar: "Mɔlmakw hay na, si a jɔkam slɔmay fa mey ηga *Mawiz len fa mey ηga ndɔhay ma tɔla mey ηga Gazlavay."

³⁰ «Ndaw aha a lɔvar: "Kɔne ba, papay Abɔraham. Maaya na, si ndaw ma slɔkɔey daa memɔcey, a daw fa ata, ηgene, a mbɔɔɔdamara menjey ata la."

³¹ «Ama Abɔraham a lɔvar: "Da a jɔkam slɔmay fa mey ηga Mawiz ba, asaya, da a cɔndamara mey ηga ndɔhay ma tɔla mey ηga Gazlavay zleezle ba na, ηgene kwa mey ηga ndaw ma slɔkɔey daa memɔcey na, fa da tɔbmara daa ba may."»

17

Mey da ray meɔrey

(*Matiye 18.6-7, 15, 21-22; Mark 9.42*)

¹ Yesu a lɔvtar a gula anɔa hay: «Fara fara ndɔhay ma hɔdamata ndɔhay mandaw mandaw ηga key meɔrey na, daha. Ama banay a sawa la a ray ndaw masa ma hɔdata ndɔhay ηga key meɔrey.

² Nɔgada anɔa na, ηgama ata ma jɔwmar anɔgwa mahura a ɔay, a kɔzlamara aa bɔlay, da ray masa anɔa ma da hɔlda ndaw pal da wuzlah ndɔhay ma tɔba mey adaw hay keɔe ηga key meɔrey.

³ Wam vaw maaya maaya fa ray akwar!

«Da mɔlmakw ta key meɔrey la na, kɔta. Da ta mbɔɔɔda lenjesl anɔa ha la na, mbɔkɔara meɔrey anɔa ha.

⁴ Kwa da a kaka mebörey dey maasala fa pas pal na, ama da fa vëhwa fa kah dey maasala ha, a lëvka: “Ambahw, ara mebörey adaw, ambahw, ara mebörey adaw,” na, mbëkdara mebörey anja ha.»

Mey da ray metəbey mey nga Gazlavay

⁵ Ndəhay meslərey nga Yesu a lëvmar a Bay Mahura: «Vëldar gədanj saya amba ya təbmara mey akah ma fəna ma fəna.»

⁶ Bay Mahura a ləvtar: «Da akwar fa təbmara mey nga Gazlavay kwa kuset kəfey həma babəza nga bazlawar na, ngenə ka gwamara nga ləvmar a wudez mahura kəfə, “Məfey la fəfə, daw ta kəzley aa bəlay” na, a cənkwar mey la.»

Mey da ray ndaw ma ka sləra

⁷ Yesu a ləvey: «Da ndaw da wuzlah akwar gula anja fa həvar da ley, da daa ba, fa səkərar d'ahway, fa dəba ha, a sawa da ley na, bay anja a ləvar la nga sawa fiyaw fiyaw, amba a zəmey cek daw? Fa da ləvar kəne daa ba!

⁸ Sasəkər jak, a da ləvar: “Mbəfdata zana akah hay amba ka diyawa cek adaw mezəmey, həlyawa cek mezəmey ta cek mesey. Fa dəba ha, ka zəma nga kah may, ka sa nga kah may.”

⁹ Da gula ha a kara cek anda bay anja ha ma ləvar na, a kar suse la daw?

¹⁰ Akwar kwa kəne, da ka kamara sləra tabiya masa Gazlavay ma ləvkwar na, si ka ləvam: “Ala na, gula hay nga tede gway, ya kam sləra masa Gazlavay ma ləvndar nga key gway.”»

Yesu a mbəley ndəhay kuraw daa maasəkula

¹¹ Yesu fa daw a *Jeruzelem, a daw taa kwakway nga hwayak nga *Samari ta hwayak nga *Galile.

¹² A wusey gweegwe ta slala daha na, maasəkula hay kuraw a samawa ngada fa vəfə. A lacam dərənj ta anja.

¹³ A wudam, a ləvam: «Yesu, Bay Mahura, sərfandar dey-ceceh!»

¹⁴ Masa Yesu ma hətatar na, a ləvtar: «Diyam, wuzdamatara vaw akwar a ndəhay ma ka kwakwas nga Gazlavay.» Masa ata fa diyam, a nəkmara na, vaw ata ta səfey sem.

¹⁵ Ndaw pal da wuzlah ata daha anja ma hətar vaw anja ta səfey sem na, a mbəfwa dey, a vəhwa fa Yesu, a həlma Gazlavay ta gədanj.

16 A wuswa, a regedey fa mey nga Yesu, a kar suse. Ndaw aha ngene ara ndaw Samari.

17 Yesu ta', aa cəfdəta ndəhay da cakay anğa, a ləvtar: «Maasəkula hay ma səfam na, kuraw ba diya? Kaa si ndaw pal ma vəhwa fedə, siya hay na, ata dama?»

18 Ndaw ma wulkawa nga vəhwa amba a həlma Gazlavay daa ba, si ndaw-mələk kedə gway daw?»

19 Fa dəba ha, Yesu a ləvar a ndaw aha: «Sləkdey, daw, ka ta ləhey cay maja kah ma paya nga ndaw akah fara fara.»

*Mey da ray pas masa Bəz nga Ndaw ma da vəhwa
(Matiye 24.23-28, 37-41)*

20 Fa dəba ha, *Fariza hay aa cəfdamara Yesu, a ləvmar: «Gazlavay a da wuzdərwa anğa bay na, ta vara?» Yesu a mbəddatara, a ləvtar: «Gazlavay ma da wuzdərwa anğa bay na, ara cek masa ndaw ma gwa nga hətar ta dey ba.

21 Ndaw a gwa a ləvey “Ehe, a kedə,” da daa ba “A katay,” na, a gwa a ləvey kəne ba. Sərmara, mewey nga Bay Gazlavay aa da wuzlah akwar wure kedə.

22 Ta', a ləvtar a gula anğa hay: «Pas a, a sawa la masa akwar ma da wudəfəmə nga hətmaya yah, *Bəz nga Ndaw, fa dey kwa dəfə pal, ama ka hətmaya daa ba.

23 A da ləvmakwar: “Anğa fedə,” da daa ba “Anğa fatafay,” ama ka da diyam ba. Ka da hwam aa slam aha ba.

24 Anda ndəhay ma hətmar var ma zəmey ma wadə slam da vad ta slam da hwayak tabiya na, yah, Bəz nga Ndaw ya da vəhwa na, kəne.

25 Ama teesəf na, si ya sərey banay la ga dəgay. Asaya, ndəhay da bəla wure kedə a rəsmaya la.

26 Ta pas masa yah, Bəz nga Ndaw ma da vəhwa na, a da key anda cek ma key daa masa Nəwe anğa da bəla.

27 Daa ngene, ndəhay fa zəmam cek, fa sam cek, fa lam ngusay, fa vəldamata dam ata hay a way zel, haa kasl pas masa Nəwe ma mbəzey la aa kwambiwal mahura. Fa dəba ha, var a pawa ga, a rəhda slam da bəla, aa zəfdəta ndəhay cəpa.

28 Asaya, pas a, a da key anda cek ma key daa masa *Lut anğa da bəla. Daa ngene, ndəhay fa zəmam cek, fa sam cek, fa hədkam cek, fa hədkadamara cek ata hay, fa sləkam, fa ləmam way.

²⁹ Ama daa masa Lut ma bawa daa berney nga *Sadawm la na, awaw tēs! tēs! a kəzlwa da gazlavay da vad ta cek ma tēbey awaw, a paslata tabiya.

³⁰ A da key kəne ta pas masa yah, Bəz nga Ndaw, ma da wuzwa vaw.

³¹ «Ta pas a ηgene, ndaw masa manjakaya daa ambaw, masa cek anga hay a lamawa ta da way na, a da mbəzey nga latərwa ba. Da ndaw anga da ley na, a da vəhwa a way ba.

³² Sərfadamara cek ma key ta ηgwas nga Lut! *

³³ Kwa waawa ma wudəy nga ləhda heter anga na, a key ηgene, aa zəfda. Kwa waawa maa zəfda heter anga na, a key ηgene, a bada.

³⁴ Ya fa ləvkwar, dasi tavad ηgene, da ndəhay cew manatakaya daa slam a na, a da ηgəlam pal, a da mbəkdamara lanjar.

³⁵ Da ηgusay cew fa kəram fa lavar pal na, a da ηgəlam pal, a da mbəkdamara lanjar. [

³⁶ Da ndəhay cew fa həvam da ley na, a da ηgəlam pal, a da mbəkdamara lanjar.]»

³⁷ Gula anga hay aa cəfdamara, a ləvmar: «A da key dama, Bay Mahura?» A mbəfdatara, a ləvtar: «Daa slam masa cek maməckaya daha na, kwakucuh hay makustakaya fetede.»

18

Mey-menjey da ray ηgwas-vagay ta ndaw ma ka sariya

¹ Fa dəba ha, Yesu a ηgatar mey a gula anga hay amba a wuzdatara si a dəram danjay mandaw mandaw, a da gəram ba səlak.

² A ləvtar: «Ndaw ma ka sariya daa berney daha, a zlurey ta Gazlavay ba, a cəney mey nga ndaw ba.

³ Nηgwas-vagay daa berney a daha, fa daw fa vəfa mandaw mandaw, a ləvar: “Wunkandar ta masa-gəra adaw.”

⁴ Nηgwas a fa daw mandaw mandaw, ama ndaw aha a gəmey nga wunkata ba menjey ga. Fa dəba ha, ndaw aha, a wulkey daa mevel anga, a ləvey: “Kwa ya fa zlurey ta Gazlavay daa ba, asaya, kwa ya cəney mey nga ndaw ba na,

17:31 17.31 Mt 24.17-18; Mk 13.15-16 * **17:32 17.32** ηgwas nga Lut: Nηgwas nga Lut pəla! a mbədey dey fa dəba daa cəved na, ta tərey sem nga manda. Nəka MC 19.26. **17:32 17.32** MC 19.26 **17:33 17.33** 9.24; Mt 16.25; Mk 8.35 **17:37 17.37** Jəw 39.30 **18:1 18.1** 11.2; Rm 12.12; Fəl 4.6; Kwa 4.2; 1Tes 5.17

⁵ ama maja ngwas-vagay kefe, fa gərdaya, ngama ya kara sariya anga, ba na, a da həbya ray mandaw mandaw.”»

⁶ Fa dəba ha, Bay Mahura aa guzley saya, a ləvey: «Wulkam da ray mey nga ndaw ma ka sariya maaya ba maa guzley kefe.

⁷ Da ndaw maaya ba kefe ta jəna ngwas kefe la na, kaa wara Gazlavay na, a jənta ndəhay anga hay mawalatakaya masa fa dərmar dangay taa vad, taa pas daa ba daw? A zəney vaw nga jənta la daw?

⁸ Yaw, ya fa ləvkwar, a jənta la fiyaw fiyaw. Ama daa masa yah, *Bəz nga Ndaw, fa vəhwa a bəla na, ya hətfey ndəhay ma təbmara mey adaw da bəla la daw?»

Mey-menjey ta ndaw Fariza leŋ ta ndaw ma cakala budaw

⁹ Ndəhay siya fa wulkam, ata na, maaya fa mey nga Gazlavay. A nəkmata ndəhay mekele anda ndəhay ta mebərey. Da ray ngeney, Yesu aa guzley mey-menjey da ray ata,

¹⁰ a ləvey: «Ndəhay cew daha, a diyam nga dərmaawa dangay daa *Way-mekey-kwakwas nga Gazlavay. Ndaw pal, ara ndaw Fariza, ndaw langar, ara *ndaw ma cakala budaw.

¹¹ Masa ata daa Way-mekey-kwakwas nga Gazlavay a na, ndaw Fariza kaa heyey deŋ! a lecey, a dərey dangay da hwad da hwad, a ləvey: “Waa Bay Gazlavay, ya fa kaka suse, maja yah anda ndəhay mekele ba. Ata na, mayal hay, ata ndəhay ma kam cek maaya ba hay mekele mekele, ata ndəhay ma lam vaw saw da palah. Asaya, ya fa kaka suse, maja yah anda ndaw ma cakala budaw kefe ba.

¹² Fa luma pal na, ya fa key *daliyam dey cew. Daa cek tabiya masa yah ma hətey na, ya fa wunka slam kuraw, ya fa la slam pal, ya fa vəldakawa.”

¹³ Ama ndaw ma cakala budaw kefe a lecey dərəŋ, a wufey nga baŋgadə dey a vad ba, ta’, a kəda rav maja mebərey anga, a ləvey: “Bay Gazlavay, sərfaya dey-ceceh. Yah ndaw ta mebərey!”»

¹⁴ Ta’, Yesu aa guzlar saya, a ləvey: «Ya fa ləvkwar, ndaw ma cakala budaw a, a daw a way na, Gazlavay ta pa sem nga ndaw maaya fa mey anga. Ama ndaw Fariza heyey na, Gazlavay ta pa nga ndaw maaya fa mey anga daa ba. Sərmara, kwa waawa ma gəlda ray anga na, Gazlavay a da pa nga mecəhe, ama ndaw masa ma nada ray anga na, Gazlavay a da pa nga mahura.»

*Yesu a pøstar mey a bæza hay
(Matiye 19.13-15; Mark 10.13-16)*

¹⁵ Ndøhay a handamata bæzey ata hay fa Yesu, kwa masa da døba hay amba a patar har a ray, a pøstar mey. Masa gula anga hay ma høtmatar na, a kamatar mey a ndøhay a.

¹⁶ Ama Yesu a løvtar a ndøhay masa ta bæza hay a, nga ngøchadamatørwa. Ta', a løvtar a gula anga hay: «Mbøkdamatørwa bæza hay nga samawa fa yah! Ka da tøkмата ba, maja Gazlavay fa wey da ray ndøhay masa anda bæza hay.

¹⁷ Ya fa løvkwar fara fara, si ka tøba Bay Gazlavay nga wey da ray akah anda bæzey mecøhe ma tøba, da daa ba na, ka fa da mbøzey a wuzlah ndøhay masa Gazlavay ma wey da ray ata na, daa ba.»

Ndaw masa-zleley aa cøfda Yesu da ray mehøtey heter mendøvey ba

(Matiye 19.16-30; Mark 10.17-31)

¹⁸ Ndaw mahura nga *Jøwif hay daha, aa cøfda Yesu, a løvar: «Bay adaw, ndaw masa maaya, ya da key amba ya høtey heter mendøvey ba na, me?»

¹⁹ Yesu a mbøfdara, a løvar: «Ka zølya ndaw maaya na, maja me? Ndaw maaya na, Gazlavay pal taava anga.

²⁰ Yaw, ka sørta mewey hay nga Gazlavay, ba diya? Ara mey hay masa ma løvam: «Ka da ley vaw saw da palah ba, ka da køfey ndaw vagay ba, ka da leley ba, ka mbøzley a ray ndaw ba, natar ray ngada ata papakw ta mamakw.»

²¹ Ndaw aha, a mbøfdara a Yesu, a løvar: «Døga yah daa zariya adaw na, ya ta zløbta mewey hay a ngene daa ba sølak.»

²² Masa Yesu ma cønda mey anga la na, ta', a løvar: «Cek pal ma mbøkaka daha nga key saya. Hødkadata cek akah hay tabiya, wunkatara dala ha a masa-viya hay. Da ka ta ka la anda kedø na, ka da høtey zleley fa Gazlavay da vad. Masa kah ma vøldatara dala ha cay a masa-viya hay na, sawa, søpya.»

²³ Masa ndaw aha ma cønda mey nga Yesu a la na, anga ta meesømey daa ba, maja zleley anga ga kalah.

²⁴ Masa Yesu ma høtar ndaw aha anga ta meesømey daa ba na, ta', aa guzley, a løvey: «Anga ta banay ga ngada ndøhay masa-zleley amba a tøbmara Gazlavay nga wey da ray ata.

²⁵ Ahaw, anga ta banay ngada slagwama nga mbøzey taa vøged nga baatal. Ama anga ta banay ga ma føna saya

ngada ndaw masa-zleley nga t̄əba Bay Gazlavay nga wey da ray a.»

²⁶ Ndəhay ma cəndamara mey a na, a ləvam: «Da anda kefe na, ma da ləhey daa mebərey na, wa?»

²⁷ Yesu a mbəḏdatara, a ləvtar: «Cek masa ta banay fa ndəhay na, anğa ta banay fa Gazlavay ba.»

²⁸ *Piyer a ləvar: «Ehe wure kefe, ala ta mbəkdamatərwa cek ala hay sem, amba ya səpmaka.»

²⁹ Yesu aa guzltar, a ləvtar: «Ya fa ləvkwar fara fara, da ndaw a mbəkḏərwa way anğa ta ndəhay da way anğa cəpa, anda meləvey ngwas anğa, məlmaha hay, papaha ta mamaha, leḅ bəz anğa hay, amba Bay Gazlavay a wey da ray a na,

³⁰ daa masa anğa da bəla kefe, a hətey cek hay la ga ma fəna. Asaya, fa dəba nga mēndəvey nga bəla na, a hətey heter mēndəvey ba la.»

Yesu aa guzley nga dey maakar da ray meməcey anğa ta masləkḏawa anğa

(*Matiye 20.17-19; Mark 10.32-34*)

³¹ Fa dəba ha, Yesu a ngəлта gula anğa hay kuraw a ray a cew, a ləvtar: «Jəkam sləmay, ehe, wure kefe aləkwa fa nakwa a *Jeruzelem. Cek hay tabiya masa ndəhay ma təla mey nga Gazlavay zleezle ma wuzlalamara da ray aḏaw, yah, *Bəz nga Ndaw na, a da key.

³² Anda meləvey, a da vəldamaya a har ndəhay masa *Jəwif hay ba, a daa sanğəram a ray aḏaw, a da cəḏmaya, a da təfmaya meesleb aa dey,

³³ a da sləḏmaya ta laway. Fa dəba ha, a da kəḏmaya vagay. Nga ḏar maakar a, ya sləkḏawa la daa meməcey.»

³⁴ Ama gula anğa hay, kwa ta cəndamara mey a daa ba, maja mey a mabadakaya fa ata. Anda kefe, a sərmara cek masa Yesu ma wuḏey nga ləvey ba.

Yesu a wurey dey nga ndaw-wulaf

(*Matiye 20.29-34; Mark 10.46-52*)

³⁵ Yesu a wusey gweegwe ta Jerikwaw. Fetede, ndaw-wulaf daha manjakaya da mey-cəved fa rəkey.

³⁶ Masa aa ma cənda ndəhay ga fa yam mey, fa diyam taa cəved e na, ta', aa cəḏfata ndəhay a, a ləvtar: «Mekey me?»

³⁷ A ləvmar: «Yesu ndaw *Nezeret, fa sawa ta kefe.»

³⁸ Aa ma cənda la anda kefe na, a zlar mewuḏey, a ləvey: «Yesu, Bəzey nga *Davīt, ambahw sərfaya dey-ceceh!»

³⁹ Ndəhay ma diyam fa mey, a kamar mey, a ləvmar nga njeý teete. Ama ndaw-wulaf a, a wudeý ta gədaŋ cəŋga, a ləvey: «Bəzey nga Davit, ambahw sərfaya dey-ceceh!»

⁴⁰ Yesu ta', a lecey, a ləvtar a ndəhay da cakay anga nga ngəlmərwa ndaw-wulaf a. Masa wulaf a, ma wusey a cakay a na, Yesu, ta', aa cəfda, a ləvar:

⁴¹ «Ka wudeý ya kaka na, me?» Wulaf a, a mbəfdara, a ləvar: «Bay mahura, ya wudeý ka wuryawa dey adaw amba ya hətar dey cəŋga.»

⁴² Yesu a ləvar: «Dey akah nga wurey. Ka ta mbəley cay maja kah ma paya nga ndaw akah fara fara.»

⁴³ Wure wure ŋgene, dey anga ta', a wurey, a hətar dey dəba. Ta', a daw asi Yesu, a həlma Gazlavay. Masa ndəhay tabiya ma hətmar cek a na, a həlmamara Gazlavay may.

19

Mey da ray Zase, bay nga ndəhay ma cakala budaw

¹ Fa dəba ha, Yesu a wusey a slala Jerikwaw. A daw ta da slala ha.

² Feteđe ndaw daha mezəley Zase. Anga bay nga ndəhay ma cakala budaw, anga ndaw ta zleley ga.

³ Fa səpey cəved amba a hətar Yesu, ama a gwa nga hətar ba, maja anga medekwele, ndəhay ga fa təhmar dey.

⁴ Ta', a hway fa mey, a daw a təpey a ray bazlawar da mey-cəved masa Yesu ma da daw ta hwad a amba a hətar Yesu a.

⁵ Masa Yesu ma wusey la aa slam aha na, a banğadfa dey, a ləvar: «Zase, wuswa vaw, pawa salay, tasana ya da ney da way akah.»

⁶ Maja ŋgene, Zase a wuswa vaw, a pawa salay, a təba Yesu ta meesəmey.

⁷ Ama ndəhay ma hətmar na, aa ŋguram mey, a ləvam: «Haya! Ndaw aha keđe a da daw nga ney a way ndaw ta mebərey na, kwara!»

⁸ Zase ta', a lecey fa mey nga Bay Mahura, a ləvar: «Nəka, Bay Mahura, wure keđe ya da wunka cek adaw hay slam cew, ya da vəlda slam pal a masa-viya hay. Ngada ndəhay masa yah ma təktar dəy nga pəley dala nga budaw ma fəna na, ya da vəhdatara dala ha həma həma ŋgene dey məfad.»

⁹ Yesu a ləvar: «Tasana Gazlavay ta ləhdata ndəhay da way keđe cay daa mebərey, maja kah Zase, kah ndaw ma pa Gazlavay nga ndaw akah fara fara anda papan nga papa aləkwa *Abəraham zleezle may.

10 Fara fara yah, *Bəz nga Ndaw, ya sawa na, nga səpey ndəhay maazədtakaya ta nga ləhdata.»

Mey-menjey ta dala
(Matiye 25.14-30)

11 Ndəhay ga fa jəkfamar sləmay fa Yesu, a wulkam Gazlavay a da wuzdərwa anga bay wure wure ngene, maja anga gweegwe ta *Jeruzelem. Da ray ngene, Yesu aa guzltar ta mey-menjey saya,

12 a ləvey: «Ndaw daha, ata nga way ata ta bay. Aa fa da daw aa hwayak dərənj, amba a pamərwa aa bay. Fa dəba ha, a vəhwa aa hwayak anga.

13 Masa aa fa da daw na, ta', a zəltərwa madərlam anga hay kuraw, a vəltar dala gabal temere temere. Ta', a ləvtar: "Mbədəm har ta dala keđe, kasl pas masa yah ma da vəhwa." Fa dəba ha, ta', a daw.

14 «Ama ndəhay daa hwayak anga, a wudmara ba. Da ray ngene, a sləram ndəhay fa dəba anga, a ləvam: "Ya wudəm ndaw keđe nga key bay ala ba."

15 «Ta ngene he cəpa, ta pamərwa sem aa bay cənga. Ndaw a, ta' a vəhwa aa hwayak anga. Masa anga ma vəhwa cay na, ta', a zəltərwa madərlam anga hay masa aa ma vəltar dala heyey amba a sərə dala masa ata ma hətam a ray a.

16 «Madərlam ngeeme, a sawa fa mey anga, a ləvar: "Bay adaw, ya ta hətwa gabal temere temere kuraw la ta dala masa kah ma vəldiwa heyey."

17 «Bay a, a ləvar: "Maaya, ara mey ba. Kah, madərlam maaya. Maja ka ta key sləra ta cəved e la ta cek mecəhe. Anda keđe, ya paka nga wey da ray berney hay kuraw."

18 «Madərlam nga dey cew e, ta', a sawa, a ləvar: "Bay adaw, ya ta hətwa gabal temere temere zlam la ta dala masa kah ma vəldiwa heyey."

19 «Bay a, a ləvar a ndaw aha: "Kah na, ya paka nga wey da ray berney hay zlam."

20 «Ta', madərlam mekele a sawa fa anga saya, a ləvar: "Bay adaw, təba dala akah. Ya ta bəda la mahəztlakakaya daa bərtete,

21 maja ya fa zlurey ta akah. Kah na, ndaw ma sərey dey-ceceh fa ndaw ba, ka ley cek daa slam masa kah ma pa ba. Ka nğəmey daw daa slam masa kah ma sləka ba."

22 «Bay a, a ləvar: "Kah, madərlam maaya ba. Mey akah masa kah maa guzlda keđe na, ya da kaka sariya maja. Da

ka serya, yah, ya serey dey-ceceh fa ndaw ba, ya ley cek daa slam masa yah ma pa ba, ya ngomey daw daa slam masa yah ma slaka ba na,

²³ anja ka velda dala ha a har ndaw amba daa mavehwa adaw kefe, ya taberwa dala ha ta yam a ba daw?"

²⁴ «Ta', bay a, a lovtar a ndohay da cakay anga: "Tabmara dala da har anga, veldamara a ndaw masa ma hotey gabal temere temere kuraw heyey."

²⁵ Ndohay a, a lovmar: "Bay ala, nga anga gabal temere temere kuraw daha cay, ba diya?"

²⁶ Bay a, a lovtar: "Ya fa lovkwar, ndaw masa cek anga daha, a da velmar a dey a. Ama ndaw masa cek anga kuset kofey na, a da tabmara cek aha kuset kofey a ngene.

²⁷ Yaw, masa-gera adaw hay masa ma wufam ya key bay ata ba heyey na, kierzamatərwa, handamatərwa, kofmata vagay fa mey adaw fefe."»

Yesu a daw a Jeruzelem anda bay

(Matiye 21.1-11; Mark 11.1-11; Jan 12.12-19)

²⁸ Fa daba ha, Yesu maa guzley la na, ta', a daw ngadaa berney nga *Jeruzelem, ndohay ga fa sɔpmar wurzay.

²⁹ A wusey a Angwa nga *Awliviye, gweegwe ta slala Betfaje lej ta slala Betani. Masa anga ma wusey la fetefe na, ta', a slerey gula anga hay cew teesef ngada slala ha, a lovtar:

³⁰ «Diyam a slala fa mey alakwa katay. Da akwar ta wusam a slala ha la na, ka hotfam bez-zəngwaw majəwkaya la fetefe, masa kwa ndaw ta topey a ray a daa ba aran. Pəskamərwa, handamərwa fefe.

³¹ Da ndaw aa cəfdakwar, a lovey: "Ka pəskamara ka me?" na, ka mbəddamara, ka lovmar: "Bay Mahura a wufey."»

³² Gula hay cew heyey, ta', a diyam, a hotfamar cek aha anda Yesu ma lovtar.

³³ Masa ata fa pəskamara bez-zəngwaw a na, ndohay nga zəngwaw a, a lovmatar: «Ka pəskamara bez-zəngwaw a, keme?»

³⁴ A mbəddamatara, a lovmatar: «Bay Mahura a wufey.»

³⁵ Ta', a handamərwa fa Yesu, a ciyam zana ata hay a ray a. A tɔpdamara Yesu a ray bez-zəngwaw a.

³⁶ Masa anga fa daw na, ndohay a həslmar ray, a ciyam zana ata hay aa cəved amba a daw ta ray a.

³⁷ Daa ngene, Yesu anga gweegwe ta berney nga Jeruzelem. Masa anga fa daw taa cəved ma bərngawa daa Angwa nga Awliviye na, ndohay anga hay tabiya fetefe faa

səmam, a zlamar nga həlmamara Gazlavay ta gədan maja maazla hay tabiya masa ata ma hətmar.

³⁸ A ləvam: «Anja Bay Gazlavay nga pəsar mey a Bay masa aa ma slərdərwa ta mezəley anğa. Anja Bay Gazlavay a, nga handərwa zazay anğa a wuzlah ndəhay. Anja ndəhay nga həlmamara Gazlavay da vad!»

³⁹ *Fariza hay da wuzlah ndəhay a daha, a ləvmar a Yesu: «Bay, ləvtar a ndəhay akah hay nga njam teete.»

⁴⁰ Yesu, ta', a mbədfatara, a ləvtar: «Ya fa ləvkwar, da ta njam teete la na, kwa anğwa hay a wudam la.»

Yesu a təway maja ndəhay daa berney nga Jeruzelem

⁴¹ Masa Yesu ma wusey la gweegwe ta berney nga *Jeruzelem na, a nəka berney a, ta', a təway maja cek ma da hətfatar ndəhay da hwad a.

⁴² A ləvey: «Akwar ndəhay da Jeruzelem, ya wudəy anja tasana kefe na, ka sərmara cek ma da njadakwar daa zazay ta Gazlavay. Ama wure kefe, cek aha ta bəy sem fa dey akwar, ka gwamara nga hətmar saba.

⁴³ Pas a, a sawa la, masa masa-gəra akwar hay ma da zlərmakwar ray ta cek hay nga vəram. A gərcamakwar la aa berney a, kwa akwar fa da gwamara nga bawa daa saba.

⁴⁴ A da bəzlmara berney akwar cəpa. Kwa fa da mbəkam anğwa pal da ray cəla daa ba. Akwar ta bəz akwar hay na, a da kədmakwar cəpa vagay, maja akwar ta pam lenğesl fa pas masa Gazlavay ma sawa nga ləhdakwar na, daa ba!»

Yesu a bəltərwa ndəhay daa Way-mekey-kwakwas nga Gazlavay

(Matiye 21.12-17; Mark 11.15-19; Jan 2.13-22)

⁴⁵ Fa dəba ha, Yesu a mbəzey aa *Way-mekey-kwakwas nga Gazlavay. Fetefe na, ndəhay daha fa kam luma. A bəлта ndəhay ma hədkadam cek hay a,

⁴⁶ a ləvtar: «Mawuzlalakaya daa dərəwel nga Gazlavay, Gazlavay a ləvey: “Way adaw na, ara way amba ndəhay a dərmaya danğay da hwad a.” Ama akwar na, ka tərđamara way a kefe nga slam nga mayal hay!»

⁴⁷ Mandaw mandaw Yesu faa sərkadata ndəhay daa Way-mekey-kwakwas nga Gazlavay. *Bay-ray hay nga ndəhay ma ka kwakwas nga Gazlavay, ta *ndəhay maa sərkada kwakwas nga Mawiz, leŋ mahura hay nga *Jəwif hay, fa səpam cəved nga kədmara vagay.

19:38 19.38 Ps 118.26; Lk 2.14 **19:40 19.40** Hab 2.11 **19:41 19.41-44** 21.20-24
19:42 19.42 Mew 32.29; Lk 2.14 **19:44 19.44** 1.68; 21.6; Mt 24.2; Mk 13.2
19:46 19.46 Iz 56.7; Jer 7.11 **19:47 19.47** 21.37; 22.53; Mt 26.55; Mk 14.49;
 Jan 18.20

⁴⁸ Ama ta hətam cəved ŋga kərzamara daa ba, maja ndəhay tabiya fa jəkfamar sləmay maaya maaya.

20

Ma vəldara gədaŋ a Yesu na, wa?
(*Matiye 21.23-27; Mark 11.27-33*)

¹ Ta pas langar daha, Yesu faa sərkadata ndəhay daa *Way-mekey-kwakwas ŋga Gazlavay, fa wuztar *Mey-maaya-mawiya. *Bay-ray hay ŋga ndəhay ma ka kwakwas ŋga Gazlavay, ta *ndəhay maa sərkada kwakwas ŋga Mawiz, leŋ mahura hay mekele ŋga *Jəwif hay, a samawa fa aŋga.

² Aa cəfdamara, a ləvmar: «Wuzdandara, ma ləvka ŋga kata cek hay a kefe na, wa? Asaya, ma vəlka cəved ŋga kata na, wa?»

³ Yesu a mbəddatara, a ləvtar: «Yah may, amba yaa cəfdakwar mey pal. Wuzdamiwa cey.

⁴ Ma slərdərwa *Jaŋ-Baptis ŋga katar *baptem a ndəhay na, wa? Gazlavay daw, da daa ba, ndəhay daw?»

⁵ Ta', ndəhay a, a slam yawa da wuzlah ata, a ləvam: «Ya da mbəddakwa aa mey aŋga ha na, kwara? Da ya ləvkwa: "Ara Gazlavay, ma slərdərwa," na, a da mbəddandakwara, a ləvey: "Kaa ka təbmara mey ŋga Jaŋ-Baptis a ba na, maja me?"

⁶ Ama, da ya ləvkwa: "Ara ndəhay ma slərdamərwa" na, ndəhay tabiya a daa zakamandakwar ta aŋgwa amba a kəfmandakwar vagay, maja a wulkam Jaŋ-Baptis a, ara *ndaw ma təla mey ŋga Gazlavay.»

⁷ Da ray ŋgene, a mbəddamara, a ləvmar: «Ya sərmara ba.»

⁸ Ta', Yesu a mbəddatara, a ləvtar: «Yaw, da anda kefe na, ya fa da kadakwara ndaw ma vəlya cəved ŋga kata cek hay a kefe na, daa ba may.»

Mey-menğey da ray ndəhay ma təbmara Bəzey ŋga Gazlavay ba

(*Matiye 21.33-46; Mark 12.1-12*)

⁹ Fa dəba ha, Yesu, ta', aa guzltar a ndəhay ta mey-menğey, a ləvtar: «Ndaw daha a key jerne ŋga wudez hay mezəmey. Ta', a vəlta jerne he a har ndəhay ŋga kam sləra da hwaɸ a. Cay, ta', a daw aa slam dərəŋ, a njawa ga fetefe.

¹⁰ A wa təde aa kiya menğəley babəza ŋga wudez hay a na, ta', a slərey gula aŋga pal fa ndəhay ma ka sləra daa jerne he, amba a təbar babəza ŋga wudez hay a maala ŋga

anğa may. Gula ha, ta', a daw, a wusey aa jerne he. Ama ndəhay a, a kədmərwa, a bəlmərwa ta har ba' kəne.

¹¹ Fa dəba ha, bay nğa jerne he, a slərey gula anğa mekele saya. Anğa may, a kədmərwa anda ndaw ngeeme heyey cəngə, a cədmərwa, ta', a bəlmərwa ta har ba' kəne.

¹² Bay a, ta', a slərey gula anğa mekele nğa dey maakar saya. Anğa na, a kədmara haa a kamar mbəlek fa vaw, aa zakadamara a palah.

¹³ Da ray ngene, bay nğa jerne he, a wulkey, a ləvey: "Wure kedə, ya da key na, kwara? Nğama ya slərey bəzey da hwad adaw masa yah ma wuda kalah kedə, da a cənməy la kwa." Ta' a slərda.

¹⁴ Ama masa ndəhay ma kam sləra daa jerne heyey, ma hətməy bəzey a fa sawa na, aa guzlam da wuzlah ata, a ləvam: "Nəkmara, ndaw ma sawa katay, ara bəzey ma da wa jerne kedə fa dəba nğa papaha. Da ta wuswa la na, ya kədkwa vagay, amba jerne he a njeý nğada aləkwa."

¹⁵ Masa anğa ma wuswa la na, ta' aa zakadamara daa jerne he a palah, a kədmara vagay.»

Yesu aa cəfdəta ndəhay fetedə, a ləvey: «Wure kedə, ka wulkam bay nğa jerne he a da kadəta ndəhay a na, kwara?»

¹⁶ Yaw, ya fa ləvkwar bay nğa jerne he, a da sawa nğa kədtə ndəhay a cəpa vagay, a da vəlda jerne he a har ndəhay mekele.» Masa ndəhay a ma cəndamara meý a kedə na, a ləvam: «Anja Gazlavay nğa ka kəne ba!»

¹⁷ Yesu a nəkta, a ləvey: «Da ka wudəam cek aha nğa key kəne ba na, meý nğa Gazlavay mawuzlalakaya ma ləvey: "Anğwa meləmeý way masa ndəhay ma ləma way ma kəzlamara ta cakay na,

anja ara anğwa maaya, ma fəntə siya hay jak."

Mey a kedə na, a wudəy nğa ləvey me?»

¹⁸ Yaw, kwa waawa ta tədəy la a ray anğwa ha na, a nğərfey. Da anğwa ha ta kəzley la a ray ndaw na, a dəga kwəd-kwad.»

Ndəhay mahura hay a jadamara Yesu da ray mepəley budaw

(Matiye 22.15-22; Mark 12.13-17)

¹⁹*Ndəhay maa sərkada kwakwas nğa Mawiz, ta *bay-ray hay nğa ndəhay ma ka kwakwas nğa Gazlavay, a sərmara Yesu aa guzley meý-menğey kedə da ray ata. A wudəam nğa kərzamara Yesu ta pas a ngene, ama a zluram ta ndəhay.

²⁰ Da ray ngene, a zlamar nğa jədmara. Ta', a walam ndəhay, a slərdamata fa Yesu amba a jədam meý da meý

anġa. Ndəhay a, a pamata ray ata hay anda ndəhay maaya. A wudam nġa cənam mey maaya ba fa anġa, amba a kərzamara, a handamara fa ndəhay nġa nġwamna amba a kamar sariya.

²¹ Aa cəfdamara, a ləvmar: «Bay ala, ya sərmara mey masa kah maa guzlda, ta cek masa kah maa sərkadandara na, ara mey fara fara. Ka nəkta ndəhay cəpa letek fa mey akah. Ka faa sərkatadata ndəhay nġa njam anda Gazlavay ma wudəy fara fara.

²² Anda keđe, ya wudam nġaa cəfdamaka, kwakwas aləkwa na, a vəley cəved nġa pəley budaw a bay mahura *Sezere daw? A vəley cəved ba daw?»

²³ Ama Yesu a səra wewer ata, ta', a ləvtar:

²⁴ «Wuzmaya dala ha pal cey.» Masa ata ma wuzmar dala ha la na, aa cəfdata, a ləvtar: «Fa dala ha keđe, ara dey nġa wa? Ara mezəley nġa wa?» A mbəddamara, a ləvmar: «Ara nġa Sezere, bay mahura nġa *Rawm.»

²⁵ Ta', Yesu a ləvtar: «Anda keđe, cek masa nġa Sezere na, vəldamara a Sezere he. Cek masa nġa Gazlavay na, vəldamara a Gazlavay a.»

²⁶ A jədam mey da mey anġa fa dey nġa ndəhay tabiya, ama ta hətam mey da hwađ anġa nġa kərza daa ba. Sasəkar mey masa Yesu ma mbəddatara na, a rəzlam ga da ray a jak, a njam teete.

*Mey da ray masləkđawa nġa ndəhay daa meməcey
(Matiye 22.23-33; Mark 12.18-27)*

²⁷ Fa dəba ha, ndəhay *Saduse hay a nġəcham a cakay Yesu. Ndəhay a nġene ara ndəhay ma wulkam, ma ləvam da ndaw ta məcey sem na, fa da sləkđawa daa meməcey daa ba. Aa cəfdamara Yesu, a ləvmar:

²⁸ «Bay ala, zleezle *Mawiz ta wuzlalandakwar kwakwas la, a ləvey: “Da ndaw məlmaha ta məcey sem na, da nġwas nġa ndaw ma məcey a, ta yawa bəza hay daa ba na, si məlmaha a la nġwas-vagay a, amba a yamawa bəza hay nġada məlmaha maməckaya ha.”

²⁹ Yaw, məlman hay maasala daha, ata nġaa man, nġaa paŋ. Məlma ata mahura, leŋ! a ley nġwas. Fa dəba ha, ndaw aha pam! a məcey, ta hətey bəzey daa ba.

³⁰ Mambaray a, leŋ! a la nġwas-vagay a, aa pam! a məcey, ta hətey bəzey daa ba may.

³¹ Ma səpa nġa maakar a, leŋ! a la nġwas-vagay a saya, a məcey, ta hətey bəzey daa ba cənġa. Anda keđe, ata

maasala ata tabiya, ta lamara ngwas aha la, a mɛcam, ta hɛtam bɛzey ta ngwas aha daa ba.

³² Fa dɛba ha masa ta mɛcam sem na, ngwas aha pam! a mɛcey may.

³³ Anda kede, ta pas masa ndɛhay mamɛctakaya ma da slɛkɛdamawa na, ngwas aha a da key na, ngwas nga wa? Maja ata maasala ata cɛpa, ta lamara la nga ngwas ata.»

³⁴ Yesu a mbɛɛɛdatara, a lɛvtar: «Da bɛla kede, zel fa ley ngwas, ngwas fa ley zel.

³⁵ Ama fa dɛba nga memɛcey, zel hay ta ngusay masa Gazlavay ma nɛkta maaya nga slɛkɛdamawa daa memɛcey amba a njam da cakay anɛa na, ngene zel a ley ngwas daa saba, ngwas a ley zel daa saba.

³⁶ Daa masa ata da cakay Gazlavay na, ata anda maslan anɛa hay da vad, fa da mɛcam daa saba. Ta tɛram sem bɛza hay nga Gazlavay maja ta slɛkɛdamawa sem daa memɛcey.

³⁷ Kwa Mawiz zleezle na, ta wuzleley mey la nga wuzey, ndɛhay a slɛkɛdamawa la daa memɛcey. Yaw, daa masa anɛa maa guzley da ray awaw megɛɛey da ray kusaf na, a zɛla Bay Gazlavay, “Gazlavay masa *Abɛraham, *Izak, len *Jakwap ma namar ray.”»

³⁸ Yesu aa guzley saya, a lɛvey: «Fa Gazlavay na, ndɛhay mamɛctakaya ta ndɛhay ta dey na, ata cɛpa ta dey, maja Bay Gazlavay, ara Gazlavay nga ndɛhay ta dey, ba na, ara Gazlavay nga ndɛhay mamɛctakaya ba.»

³⁹ Siya hay da wuzlah ndɛhay maa sɛrkada kwakwas nga Mawiz a lɛvam: «Bay ala, ka taa guzley la maaya.»

⁴⁰ Da ray ngene ndɛhay a zluram ngaa cɛɛɛɛfamar mey mekele.

Kɛriste, anɛa bay nga Davit na, kwara?
(*Matiye 22.41-46; Mark 12.35-37*)

⁴¹ Yesu aa cɛɛɛɛdata ndɛhay fetede, a lɛvey: «Ndɛhay a lɛvam *Kɛriste, *ndaw masa Gazlavay ma wala nga lɛhdata ndɛhay na, ara bɛzey da hwad Bay *Davit na, kwara?»

⁴² Maja Davit ta ray anɛa, a wuzlala daa ɛɛɛɛwɛwɛl nga *Pɛsam, a lɛvey:

“Bay Gazlavay a lɛvar a Bay aɛaw Mahura:

Sawa, nɛey a har-zɛmay aɛaw amba ya wakwa da ray ndɛhay

⁴³ haa ta pas masa yah ma da pata masa-gɛra akah hay asi salay akah.”

44 Yaw, da Davit a zëla Këriste “Bay Mahura” na, kaa wara Këriste he ara bëzey da hwad Davit saya na, kwara?»

Yesu a këtata gula anğa hay fa ndəhay maa sərkada kwakwas nğa Mawiz

(Matiye 23.1-36; Mark 12.38-40)

45 Yesu a patar lenğesl a gula anğa hay fa mey nğa ndəhay tabiya da cakay a, fa jəkfamar sləmay. Aa guzltar a gula anğa hay a, a ləvtar:

46 «Wam vaw fa *ndəhay maa sərkada kwakwas nğa Mawiz. A wudam mepəkey ta dawura hay fa vaw nğa zlepey. A wudam ndəhay a camatar har ta meney ray fa mey nğa ndəhay. Daa *way-mewuzey-mey nğa Gazlavay na, a səpam slam-menjey fa mey nğa ndəhay amba ndəhay tabiya a hətmatar. Ta pas gwagway na, a səpam slam-menjey maaya.

47 Asaya, fa təbmatara cek hay nğa nğwas-vagay hay tabiya, ama da ata fa dərəm dangay na, a njam daa medərey-dangay a ga, amba ndəhay a ləvam ata maaya. Ya fa ləvkwar, Gazlavay a sərdata banay la, ma fəna nğa ndəhay mekele!»

21

Mey da ray nğwas-vagay masa-viya ma vəley cek a Gazlavay

(Mark 12.41-44)

1 Yesu anğa daa *Way-mekey-kwakwas nğa Gazlavay. A nəkey dey ta cakay, a hətatar ndəhay masa-zleley hay, fa kwiyam dala aa cek mecekeley dala.

2 A hətey nğwas-vagay masa-viya daha, fa kwiyey sisey sisey cew aa cek aha may.

3 Da ray nğene, Yesu a ləvey: «Ya fa ləvkwar fara fara, nğwas-vagay masa-viya kefe, ta vəley dala la ma fəna nğa ndəhay siya tabiya.

4 Ya ləvkwar anda kefe na, maja ndəhay siya, a vəlam dala nekədey daa dey zleley ata hay da way ga. Ama nğwas-vagay kefe, ta mərğa anğa ha cəpa, a vəlda zleley anğa tabiya, masa anğa ma da hədkey cek mezəmey ta anğa.»

Mey da ray mendəvey nğa bəla

(Matiye 24.1-14; Matiye 10.17-22; Mark 13.1-13)

5 Ndəhay siya aa guzlam da ray *Way-mekey-kwakwas nğa Gazlavay, a ləvam: «Way kefe, madiykaya ta anğwa ma mbey kalah, ta cek hay maaya ma hədkam ba masa ndəhay ma vəldamata a Gazlavay.» Yesu a ləvtar:

⁶ «Pas a, a sawa la, cek hay masa akwar ma hətmatar keđe na, a da bəzlam cəpa, kwa aŋgwa pal fa da mbəkey da ray cəla daa ba.»

⁷ Aa cəfdamara, a ləvmar: «Bay ala, cek aha a da key na, ta vara? Ya da sərmarara dər a ta wuswa cay na, fa me?»

⁸ Yesu a mbədfatara, a ləvtar: «Wam vaw, ka da vəlmatar cəved a ndəhay ŋga fəcmakwar ba. Ya ləvkwar anda keđe, maja ndəhay ga a samawa la, ta mezəley adaw, a da ləvam ara Gazlavay ma walata ŋga ləhey ndəhay daa banay. Asaya, a ləvam pas masa Gazlavay ma da ləhdata ndəhay ta wuswa cay. Ka da diyam asi ndəhay a ŋgene ba!

⁹ Ta pas masa akwar ma da cənəm labara ŋga vərəm hay, ta labara ŋga ndəhay ma cakalam mey ta bay ata hay na, ka da zluram ba, maja si cek hay keđe a kam la teesəd dğay. Ama ara mēndəvey ŋga bəla wure wure ŋgene ba.»

¹⁰ Fa dəba ha, aa guzley saya, a ləvey: «Hwayak laŋgar a da key vərəm ta hwayak laŋgar, bay laŋgar a da key həma a ray bay laŋgar.

¹¹ Hwiyak a wusey la ga. May a key la daa hwayak hay mekele mekele, asaya, macay hay a kəfdəm ndəhay la ga. Cek hay ma zlurey ndaw a kam la, asaya, cek hay ma rəzley ndaw a wuzmawa la da gazlavay da vad.

¹² «Ama wuskwaa cek hay a, a da kam na, a kərzamakwar la, a sərđamakwar banay la, a vəldamakwar la amba a kamakwar sariya daa *way-mewuzey-mey ŋga Gazlavay hay. A ndəkwdamakwar la aa fərsəne, a handamakwar la fa mey ŋga bay hay, ta fa mey ŋga mahura hay ŋga hwayak hay, maja yah.

¹³ Ka da sərəm banay a ŋgene na, amba ka hətəm cəved ŋga key sede da ray adaw.

¹⁴ Da ray ŋgene, sərmarara maaya maaya ka da zluram da ray mey masa akwar ma daa guzlam ba,

¹⁵ maja ya vəkwar leŋgesl la ŋгаа guzley mey maaya. Anda keđe, kwa masa-gəra akwar hay, fa da gwamara ŋga təfdamakwar daa ba.

¹⁶ Kwa papakw akwar hay, kwa mamakw akwar hay, kwa məlmakw akwar hay, kwa səkway akwar hay, kwa jam akwar hay, a wudmakwar la a way bay. Ndəhay siya da wuzlah akwar na, a kəfdmata la vagay.

¹⁷ Ndəhay tabiya a da ŋgəldamakwar ba, maja yah.

¹⁸ Ama, kwa eŋgwec ŋga ray akwar pal fa daa zədfey daa ba.

21:6 21.6 19.44 **21:7** 21.7-24 17.22-24 **21:10** 21.10 Mk 13.8 **21:12**
21.12 SNM 12.1-4; 18.12-17; SNM 24-26 **21:12** 21.12-19 Mt 10.17-22; Jan 16.1-4
21:14 21.14-15 12.11-12 **21:16** 21.16 Mi 7.6; Mt 10.35; Lk 12.52-53 **21:18**
21.18 1Sam 14.45; Mt 10.30; Lk 12.7

19 Bəsmara banay a, anda keđe, ka hətam heter mendəvey ba la.»

*Mey da ray hwayak nga Jeruzelem ma da pəlhey
(Matiye 24.15-21; Mark 13.14-19)*

20 Yesu aa guzltar a gula anğa hay saya, a ləvtar: «Da ka hətmatar sewje hay ta zlərmara berney nga *Jeruzelem sem nga key vəram na, daa nğene, sərmara berney a gweegwe cay a pəlhey.

21 Anda keđe, si ndəhay daa hwayak nga *Jude a hwam nga bəwa a anğwa, si ndəhay da Jeruzelem a bam, asaya, ndəhay da slala ta cakay a da mbəzam aa berney a saba.

22 Daa nğene, Bay Gazlavay a da sərdəta banay ta ndəhay daa hwayak a, amba cek hay tabiya mawuzlalakaya daa dərewel nga Gazlavay dəga zleezle na, a kam fara fara.

23 Daa dər hay a nğene, banay a sawa la a ray nğusay ta hwaf ta a ray nğusay masa ta bəza hay da har, maja banay mahura a sawa la aa hwayak a. Fara fara, Bay Gazlavay a cey mevel la a ray ndəhay daa hwayak a.

24 Masa-gəra hay a da kədmata ndəhay siya vagay ta dəlaw, siya, a da tərđamata nga beke hay, a da handamata aa hwayak hay mekele mekele da bəla. Anda keđe, ndəhay masa *Jəwif hay ba, a da wam da ray Jeruzelem, a da sərdəmata banay haa kasl pas masa mewey ata ha ma ndəvey.»

*Mey da ray ma vəhwa nga Bəz nga Ndaw
(Matiye 24.29-31; Mark 13.24-27)*

25 Yesu aa guzley saya, a ləvey: «Daa nğene, ndəhay a da zluram, a wulkam cek maaya ba a key la maja pas fa mbədey, kiya fa mbədey, wurzla hay fa mbədam. Da bəla na, səkway hay tabiya mandərzay a da katar maja membey mey nga yam ta vanğwala nga yam daa bəlay.

26 Ndəhay a da wulkam kalah fa cek hay ma da kam da bəla, anda keđe mandərzay a da kəfta vagay maja cek hay cəpa da gazlavay da vad, a wusam la.

27 Fa dəba ha, a da hətmaya yah, *Bəz nga Ndaw, ya fa sawa daa mekwtene ta gədan mahura, ta mewedey nga Bay Gazlavay.

28 Ama da cek hay a keđe fa zlamar mekey na, akwar na, lacam maaya maaya, banğadəmata dey akwar hay, maja yah, ndaw ma da ləhdakwar daa banay, gweegwe cay ya wuswa.»

*Mey-menjey ta gudav
(Matiye 24.32-35; Mark 13.28-31)*

²⁹ Fa dɔba ha, Yesu a ngatar mey a gula anɔa hay, a lɔvtar: «Nɔkmara gudav kedɛ ta wudez hay siya.

³⁰ Da masa akwar fa hɔtmatar gwaslaf hay a fa zlamar nɔa dedɛy na, ka sɔrmara kiya madaw a ley gweegwe cay.

³¹ Anɔa letek kɔne, da ka hɔtmatar cek hay a fa kam anda yah ma lɔvkwar kaa na, ka sɔrmara gweegwe cay, Gazlavay a wuzdɔrwa bay anɔa.

³² Ya fa lɔvkwar fara fara, cek hay a kedɛ tabiya, a da kam na, ndɔhay masa wure kedɛ ta mɔcam tabiya daa ba araɔ.

³³ Slam da vad ta slam da hwayak a ndɔvey la, ama mey adaw na, fa da ndɔvey daa ba sɔlak.»

Yesu a kɔtata ndɔhay da ray ma vɔhwa anɔa

³⁴ «Wam vaw fa menjey akwar. Wam vaw, ka da mbɔkdamara ray akwar nɔa sey cek haa ka wam ba leɔ nɔa sɔpey cek mezɔmey ta cek mesey kalah ba, asaya, ka da mbɔkdamara ray akwar nɔa wulkey kalah da ray menjey da bɔla ba. Ray akwar a da hɔbey fa cek hay a kedɛ ba, maja pas masa yah ma da vɔhwa na, kwa ka sɔrmara dar a ba, ya da hɔtfakwar dɔrfafay,

³⁵ anda ndaw ma kɔrzey cek ta gadan. Ta pas nɔgene, ya da katar sariya a ndɔhay da bɔla tabiya.

³⁶ Ya fa lɔvkwar, wam vaw, dɔram dangay mandaw mandaw, amba ka hɔtam gɔdan nɔa lɔhey fa cek hay ma da kam tabiya, asaya, nɔa lecey fa mey adaw, yah, *Bɔz nɔa Ndaw, ta mandɔrɔzay ba.»

³⁷ Mandaw mandaw Yesu a vɔrndeɔy daa *Way-mekey-kwakwas nɔa Gazlavay, fa wuzey mey. Ama taa kwad na, a daw a nawa daa anɔgwa nɔa *Awliviye.

³⁸ Mandaw mandaw taa pɔrek na, ndɔhay ga a diyam fa vɔda aa Way-mekey-kwakwas nɔa Gazlavay, amba a jɔkam slɔmay fa mey anɔa.

22

*Juda a vɔlda Yesu a har masa-gɔra anɔa hay
(Matiye 26.1-5, 14-16; Mark 14.1-2, 10-11; Jan 11.47-53)*

¹ Gwagway nɔa peɔ manjar cek ma hɔsla da hwad a mezɔley gwagway nɔa *Pak, gweegwe cay.

² *Bay-ray hay nɔa ndɔhay ma ka kwakwas nɔa Gazlavay, ta *ndɔhay maa sɔrkada kwakwas nɔa Mawiz, a sɔpam

cøved amba a kədfmara Yesu vagay, ama a zluram ta zagaba.

³ Fa dəba ha, *Satan kula! a mbəzey aa mevel nga Juda, ndaw mezəley Iskariyawt. Ara gula pal da wuzlah gula hay kuraw a ray a cew nga Yesu.

⁴ Juda ta', a daw a kamawa maday ta *bay-ray hay nga ndəhay ma ka kwakwas nga Gazlavay lenj ta mahura hay nga ndəhay ma jəda *Way-mekey-kwakwas nga Gazlavay amba a vəldatara Yesu.

⁵ Bay-ray hay ta mahura hay a, aa səmam ga. A ləvmar da ta vəldatara Yesu la na, a vəlmar dala.

⁶ Juda a təba nga vəldatara. A daw a səpey cøved, amba a vəldatara Yesu, kwa ndəhay a səmara ba.

Gula hay nga Yesu a səpam slam nga key gwagway nga Pak

(Matiye 26.17-25; Mark 14.12-21; Janj 13.21-30)

⁷ Gwagway nga peñ manjar cek ma həsla da hwad a, ta wuswa cay. Pas a ngene ara pas ma hərey bəz-təbanj hay nga key gwagway nga *Pak.

⁸ Da ray ngene, Yesu a slərdata ata *Piyer ta *Janj, a ləvtar: «Diyam ta diymandakwar slam ta cek mezəmey amba ya zəmkwa daf nga gwagway nga Pak!»

⁹ Ata Piyer ta Janj aa cədfamara, a ləvmar: «Ka wudey ya diyam nga diywa slam aha na, dama?»

¹⁰ A mbəddatara, a ləvtar: «Ehe, jəkam sləmay. Diyam aa berney nga *Jeruzelem. Masa akwar fa da mbəzam aa berney a na, ka cam ray la ta ndaw daha fa daw ta yam daa kwakulam. Diyam asiya. Aa way masa anga ma da mbəzey na,

¹¹ ləvmar a bay nga way a: “Bay ala a ləvey: Way masa yah ma da zəmam daf nga gwagway nga Pak ta gula adaw hay na, aa daa wura?”

¹² Fa dəba ha, a wuzkwar way mahura da ray way la. Daa way a na, cek hay tabiya daha nga key gwagway a. Ka da diymandakwara cek mezəmey amba ya zəmkwa daf nga gwagway a fetede.»

¹³ Fa dəba ha, a diyam, a hətfamatar cek hay tabiya anda Yesu ma ləvtar heyey. Ta', a diymata cek hay nga gwagway nga Pak a.

Yesu a zəmey daf ta ndəhay anga hay meslərey nga madagway-dakw

(Matiye 26.26-30; Mark 14.22-26; 1 Kwarinti hay 11.23-25)

14 Masa pas tēde nga zōmey daf nga gwagway nga *Pak heyey na, ta', Yesu a diyam aa way heyey, a njam ta ndəhay anga hay meslərey nga zōmey daf.

15 Yesu a ləvtar: «Ya ta wudəy la fara fara nga zōmey daf nga gwagway nga Pak kede ta akwar, wara a sərdamaya banay.

16 Ya fa ləvkwar, kwa ya fa da zōmey daf nga gwagway nga Pak a daa saba, si ta pas masa Bay Gazlavay ma da wey da ray ndəhay tabiya da vad. Ta pas ngene, mabara nga mey da ray gwagway nga Pak a, a wuzwa la fara fara.»

17 Fa dəba ha, Yesu leŋ! a la vəley ta cek mesey da hwad a, ta', a kar suse a Bay Gazlavay, a ləvtar: «Təbmara cek kede, samara akwar cəpa.

18 Ya fa ləvkwar fara fara, dəga wure kede, ya fa da sey cek aha ta akwar daa saba haa kasl pas masa Gazlavay ma da wuzdərwa bay anga fara fara.»

19 Fa dəba ha, leŋ! a ley peŋ, a kar suse a Bay Gazlavay, ta', a wunka, a vəldatara, a ləvtar: «Kede he na, ara vaw adaw mavəldakaya ngada akwar. Kamara anda kede amba ka sərfadamaya.»

20 Ata ma zəmamara daf cay na, ta', a vəldatara vəley ta cek mesey da hwad a heyey saya, a ləvtar: «Kede he na, ara mambaz adaw. Mambaz a, a da mbədwa maja akwar. Ta fa mambaz a, Gazlavay a jəwey mey mawiya ta ndəhay anga hay.

21 Ama nəka, ndaw masa ma daa zəfdəya na, anga fa zōmey daf fedə ta yah.

22 Fara fara, si yah, *Bəz nga Ndaw, ya məcey anda Gazlavay ma wudəy, ama banay a sawa la a ray ndaw masa ma daa zəfdəya!»

23 Aa cəfdam vaw da wuzlah ata, a ləvam: «Ma da ka cek aha kede na, ara wa?»

Mahura na, wa?

24 Fa dəba ha nekədey, *gula hay nga Yesu a kam yawa ga da wuzlah ata, a wudam amba a sərmara mahura da wuzlah ata na, wa.

25 Yesu a ləvtar: «Bay hay da bəla kede fa wam da ray ndəhay ta gədaŋ. Ata na, a wudam ndəhay ata hay aa həmdamata, a zəlmata bay hay ma ka sləra maaya.

26 Ama nga akwar na, kəne ba. Ndaw masa mahura da wuzlah akwar na, si a tərey anda matabəwa akwar. Ndaw masa ma wakwar na, si a tərey ndaw ma kakwar sləra.

27 Da wuzlah ndaw ma hølrawa daf ta ndaw ma zøma na, mahura na, wa? Mahura na, ara ndaw ma zøma, ba diya? Ama yah na, yah da wuzlah akwar, anda ndaw ma kakwar sløra.

28 «Akwar na, ndøhay masa dasi adaw mandaw mandaw daa masa ya fa sørey banay, akwar ta mbøkdamaya daa ba.

29 Yah may, ya vølkwar gødan amba ka wam da ray ndøhay anda Papay ma vølya gødan nga wey da ray ndøhay.

30 Da ray ngene, pas masa yah ma da wey da ray ndøhay na, akwar may, ka da njam aa slam maaya da cakay adaw, ya da zømkwa cek, ya da sakwa cek bama. Ka da njam aa slam-menjey nga bay hay, amba ka kamatar sariya ngada sækway nga *Israyel hay kuraw a ray a cew.»

Mey da ray ata Yesu ta Simanɥw Piyer

(Matiye 26.31-35; Mark 14.27-31; Jan 13.36-38)

31 Yesu a løvar a *Simanɥw *Piyer: «Simanɥw, Simanɥw, jøkey slømay, *Satan ta høtey cøved la amba a køfkwar * anda ndaw ma køfey daw nga wunkey bøz-daw ta cekwesl e.

32 Ama ya ta dørar danɥay la a Gazlavay maja kah, amba ka mbøkda nga tøba mey adaw ba. Pas masa ka ta vøhwa sem a fa yah cønɥa na, vøltar gødan a mølmakw hay may.»

33 Piyer a løvar: «Bay Mahura, kwa a handamaka aa førsøne na, ya søpka la, amba ya njakwa cew e, asaya, kwa a kødmaka vagay na, ya mækwa la cew e.»

34 Yesu a mbøddara, a løvar: «Ya fa løvka, Piyer, tasana wuskwaa gwagwalak a da cey døy na, ka ta løvey cay dey maakar, ka sørya ba, ka sørya ba.»

Mey da ray mewey vaw maja banay

35 Fa døba ha, Yesu a løvtar a gula anɥa hay: «Ta pas masa yah ma slørdakwar, dala da har daa ba, gabal daa ba, tarak daa ba heyey na, ka ta huram cek daa slam aha la daw?» A mbøddamara, a løvmar: «Ya ta huram cek daa ba.»

36 A løvtar: «Ama wure kefe na, ndaw masa dala anɥa daha, nga la a har, ndaw masa gabal anɥa daha, nga la. Ndaw masa dølawa anɥa daa ba, nga hødkada zana anɥa, nga hødkawa dølawa døba.

37 Daa dørewel nga Gazlavay, mey mawuzlalakaya da ray adaw a løvey: “Anɥa masløfkaya da wuzlah ndøhay ma køda ndøhay vagay!” Fara fara, si cek a kaya la anda mey mawuzlalakaya da ray adaw a cøma.»

22:27 22.27 Jan 13.4-5, 12-17 22:30 22.30 Mt 19.28 * 22:31 22.31 køfkwar:
Ata Piyer ta gula hay nga Yesu siya. 22:31 22.31 22.3 22:32 22.32 Mt 16.18;
Jan 21.15-17 22:34 22.34 22.61; Mt 26.75; Mk 14.72 22:35 22.35 9.2-3; 10.4
22:37 22.37 Iz 53.12

³⁸ Gula anğa hay a ləvmar: «Bay Mahura, dələw hay cew kede daha.» A mbəfdatara, a ləvtar: «Mey a kede mak.»

*Yesu a dərey danğay daa Anğwa nğa Awliviye
(Matiye 26.36-46; Mark 14.32-42)*

³⁹ Fa dəba ha, Yesu ta', a bey daa berney nğa *Jeruzelem, a daw nğadaa Anğwa nğa *Awliviye anda anğa ma daw mandaw mandaw taa kwad. Gula anğa hay ta', a diyam asiya.

⁴⁰ Anğa ma wusey la fetede na, ta', aa guzltar a gula anğa hay, a ləvtar: «Dəram danğay a Gazlavay nğa jənkwar amba cek a batakwar nğa key mebərey ba.»

⁴¹ Fa dəba ha, ta', a daw ta cakay, dərən nekədey. Da ndaw aa zekey anğwa na, a wusey aa slam aha. Ta', a regedey, a dərey danğay,

⁴² a ləvey: «Papay, da ka wudey na, ka gwa ka nğəchada banay kede dərən ta yah. Ta kəne he cəpa na, ka da ka anda yah ma wudey ba, ama ka anda kah ma wudey.» [

⁴³ Daa slam aha nğene, *maslan nğa Bay Gazlavay da vad, ta', a pawa salay nğa vələr gədan.

⁴⁴ Fa dəba ha, Yesu a dərey danğay ta gədan anğa cəpa maja mevel anğa fa tədey kalah. Mawurbay fa vaw anğa fa vavawa, fa gəcey anda mambaz ma gəcey a hwayak.]

⁴⁵ Anğa ma dərey danğay cay na, ta', a sləkdey, a vəhwa fa gula anğa hay. A hətfatar na, ata cək-w-cək daa dər maja ta wulkam la ga, a gəram.

⁴⁶ A ləvtar: «Ka nam maja me? Sləkdam, dəram danğay a Gazlavay nğa jənkwar amba cek a batakwar nğa key mebərey ba.»

*A kərzamara Yesu
(Matiye 26.47-56; Mark 14.43-50; Jan 18.3-11)*

⁴⁷ Masa Yesu ta ndəvda meeguzley daa ba aran na, ndəhay ga fa samawa ta ata Juda, ndaw pal dasi gula anğa hay kuraw a ray a cew heyey. Juda ha, aa fa mey ata. A nğəchey fa Yesu amba a car har anda mandala anğa fara fara.

⁴⁸ Ama Yesu a ləvar: «Juda, ka caya har amba kaa zəddaya, yah, *Bəz nğa Ndaw daw?»

⁴⁹ Masa ndəhay nğa Yesu ma hətmar cek aha na, aa cəfdamara Yesu, a ləvmar: «Bay Mahura, ka wudey ya kədmata ndəhay a ta dələw hay daw?»

⁵⁰ Ndaw pal da wuzlah ata, a nğəma madərlam nğa *ndaw mahura da ray ndəhay ma ka kwakwas nğa Gazlavay ta dələw, cərah! a cərha sləmay ta dey nğa zəmay.

⁵¹ Ama Yesu a løyey: «Cay, mak! Mbəkdamata n̄ga wam n̄ga ata.» A gəsfar har fa sləmay n̄ga ndaw aha, sləmay a, ta', a kəfey aa slam a.

⁵² Fa dəba ha, ta', aa guzltar n̄gada *bay-ray hay n̄ga ndəhay ma ka kwakwas n̄ga Gazlavay, ta n̄gada mahura hay n̄ga ndəhay ma jəda *Way-mekey-kwakwas n̄ga Gazlavay, leŋ n̄gada mahura hay n̄ga *Jəwif hay masa ma samawa n̄ga kərzamara, a ləvtar: «Ka samawa n̄ga kərzamaya ta dəlaw, ta zlanday faa har faa har anda yah ndaw-mayal na, maja me?»

⁵³ Mandaw mandaw yah da wuzlah akwar daa Way-mekey-kwakwas n̄ga Gazlavay, akwar ta səpmaya n̄ga kərzey daa ba. Ama pas a kefe ara pas akwar, amba ka kam cek anda akwar ma wudam da ray adaw, asaya, ara pas n̄ga *Satan, bay n̄ga ləvan, ma da ka sləra n̄ga da ray adaw.»

Piyer a løyey a səra Yesu ba

(Matiye 26.57, 58, 69-75; Mark 14.53, 54, 66-72; Jan 18.12-18, 25-27)

⁵⁴ Masa ata ma kərzamara Yesu cay na, ta', a handamara a way *ndaw mahura da ray ndəhay ma ka kwakwas n̄ga Gazlavay. *Piyer fa səpta ta meedəreŋ e.

⁵⁵ Da way ndaw mahura da ray ndəhay ma ka kwakwas a na, awaw magədkaya da palah-way daha. Piyer a daw cəkwan! a n̄jey a cakay ndəhay manjatakaya da mey awaw a.

⁵⁶ Dam ma ka sləra da way a daha, a hətar Piyer manjakaya da mey awaw a. Ta', a nəkfa, a løyey: «Ndaw kefe na, ara gula n̄ga Yesu.»

⁵⁷ Ama Piyer ma cənda anda kefe na, a cada mey, a løyey: «Kay! n̄gwas kefe, ya səra ndaw a ba.»

⁵⁸ Menjey nekəfey, ndaw mekele a hətar Piyer saya, a ləvar: «Kah na, ndaw pal dasi gula n̄ga hay.» Ama Piyer a mbəddara a ndaw aha, a ləvar: «Kay! yah dasi ata ba.»

⁵⁹ Fa dəba ha, menjey zəbat a saya na, ndaw mekele aa guzley ta gədan, a løyey: «Fara fara, ndaw kefe na, ara gula n̄ga, maja n̄ga ndaw *Galile.»

⁶⁰ Ama Piyer a mbəddara, a ləvar: «Ndaw kefe! ya səra mey masa kah ma wufey n̄ga løyey kefe ba.»

Wure wure n̄gene, masa ta ndəvda maa guzley daa ba aran na, gwagwalak a cey dəy.

⁶¹ Bay Mahura Yesu pəla! a mbəfey dey fa Piyer, a nəkfa. Piyer a sərfada mey masa Bay Mahura ma ləvar:

«Wuskwaa gwagwalak a da cey day tasana na, ka ta ləvey cay dey maakar ka sərya ba, ka sərya ba.»

⁶² Piyer ta', a bawa aa ambaw, a təway ga, a zəley marava.

Ndəhay aa sanğəram da ray Yesu

(Matiye 26.67, 68; Mark 14.65)

⁶³⁻⁶⁴ Ndəhay ma jədmara Yesu a, aa sanğərfamar. A sərtamara dey anğa ta zana, a kədmara, ta', aa cəfdamara, a ləvmar: «Səra ma kədka kedə na, wa? Wuzdandara cey!»

⁶⁵ Aa guzlməy mey hay mekele mekele, a cəfdamara.

Yesu fa mey nğa ndəhay ma sla yawa nğa Jəwif hay

(Matiye 26.59-66; Mark 14.55-64; Jan 18.19-24)

⁶⁶ Fa dəba ha, slam ma wurey cay na, mahura hay nğa *Jəwif hay, *bay-ray hay nğa ndəhay ma ka kwakwas nğa Gazlavay, leŋ *ndəhay maa səkada kwakwas nğa Mawiz, a kusam. A ləvmatar a ndəhay ma jədmara Yesu nğa handamərwa Yesu a fa mey ata, nğa key sariya. Ta', a handamərwa Yesu a, fa mey ata.

⁶⁷ Ndəhay mahura hay heyey ta', aa cəfdamara, a ləvmar: «Da kah *Kəriste, *ndaw masa Gazlavay ma wala nğa ləhdata ndəhay heyey na, kadandara.» Yesu a mbəfdatara, a ləvtar: «Kwa ya kadakwara yah Kəriste na, akwar fa da təbmara daa ba.

⁶⁸ Da yaa cəfdakwar mey pal na, akwar fa da mbəfdamiwa daa ba.

⁶⁹ Dəga wure kedə, yah, *Bəz nğa Ndaw, ya da njeŋ ta har-zəmay nğa Bay Gazlavay Mawaca-waca.»

⁷⁰ Ata tabiya a ləvmar: «Kaa kah na, Bəzey nğa Gazlavay dəba daw?» A mbəfdatara, a ləvtar: «Ahaw, anda akwar ma ləvam, yah, Bəzey nğa Gazlavay.»

⁷¹ Da ray nğene, aa guzlam, a ləvam: «Aləkwa ta ray aləkwa, ta cəndakwa cay da mey anğa, ya səpkwa ndaw nğaa guzldakwar da ray a na, keme seme!»

23

Yesu fa mey nğa Bay Pilat

(Matiye 27.1-2, 11-14; Mark 15.1-5; Jan 18.28-38)

¹ Mahura nğa *Jəwif hay makustakaya heyey tabiya, a sləkdam, a handamara Yesu fa mey nğa Bay Pilat.

² Fetedə, a zlamar nğa mbərzlafamar, a ləvam: «Ya hətfamar ndaw kedə fa nəsa hwayak ala, fa həldata ndəhay

nga vøldamara budaw a bay Rawma ba! A løyey anga *Køriste, bay mahura.»

³ Pilat aa cøfda Yesu, a løyar: «Kah na, bay nga Jøwif hay fara daw?» Yesu a mbøfdara, a løyar: «Anda kah ma løyey.»

⁴ Pilat aa guzltar a *bay-ray hay nga ndøhay ma ka kwakwas nga Gazlavay lej a ndøhay makustakaya fetede, a løyar: «Ya ta høtey mebørey fa ndaw kede tøde nga kørza daa ba.»

⁵ Ama ndøhay a, a mbørzlam cønga, a løyam: «Fa caradata ndøhay daa hwayak nga ndøhay Jøwif hay tabiya nga key cek maaya ba ta fa mewuzey mey anga hay mekele mekele. A zlarawa da *Galile, haa a wuswa fede.»

Yesu fa mey nga Bay Herawt

⁶ Ama masa Pilat ma cønda Yesu a sawa da *Galile na, ta', aa cøfdata ndøhay da cakay a, a løyar: «Ndaw kede ara ndaw Galile fara daw?»

⁷ Masa Pilat ma cønda Yesu a sawa da Galile, hwayak masa *Herawt ma wa na, ta', a slørdara a Bay Herawt, maja daa ðar a ngene Bay Herawt a, anga da *Jeruzelem fetede may.

⁸ Masa Bay Herawt a ma høtar Yesu na, aa sømey ga maja døga zleezle, anga fa wufey nga høtar, maja anga fa cøney mey da ray a. A wulkey daa mevel anga na, da Yesu a key maazla meedey anga la kwa.

⁹ Bay Herawt a, aa cødfafar mey hay mekele mekele, ama kwa Yesu a mbøfdara ba.

¹⁰ *Bay-ray hay nga ndøhay ma ka kwakwas nga Gazlavay, ta *ndøhay maa sèrkada kwakwas nga Mawiz ata fetede. A dadøffamar mey masa maadakw a.

¹¹ Bay Herawt a, ta sewje anga hay aa sanjgørfamar, a cøfmara. Ta', a pamar zana maaya membey fa vaw, a vøhdamara fa Bay Pilat saya.

¹² Daa ba na, ata Bay Herawt ta Bay Pilat a cømam ba, ama mezley døga ta pas ngene ata jam.

A døslmara sariya nga Yesu

(Matiye 27.15-26; Mark 15.6-15; Jan 18.39-19.16)

¹³ Masa Bay *Herawt ma vøhda Yesu sem fa Pilat saya na, ta', Pilat a kusta *bay-ray hay nga ndøhay ma ka kwakwas nga Gazlavay, ta mahura hay nga *Jøwif hay, lej zagaba,

¹⁴ a løyar: «Akwar ta handamørwa ndaw kede la fa yah, ka løyam fa nøsa hwayak ala. Ama ya taa cøfda la meedey

akwar, kwa ya ta hōtey mebōrey anda akwar ma lōvam na, daa ba.

¹⁵ Bay Herawt may, ta hōtey mebōrey a daa ba kōne. Ta', a vōhdōrwa fa alōkwa cōngā. Fara fara ndaw kefe ta key mebōrey tōde ngaa zōfey heter anga na, daa ba.

¹⁶ Yaw, ya slōda gway na, ya mbōkda.»

[

¹⁷ Fa mevey a, fa mevey a, gweegwe gwagway nga *Pak na, Pilat a pōskatar ndaw pal daa fōrsōne ngada ndōhay daa hwayak a.]

¹⁸ Ama ndōhay tabiya fetede a zlamar mewudey ta gōdan, a lōvam: «Kōdndara ndaw kefe vagay! Pōskandar Barabas!»

¹⁹ A kōzlamara Barabas aa fōrsōne na, maja anga ma hōldata ndōhay nga kam baazlam a ray bay nga berney a ta anga ma kōfey ndaw vagay.

²⁰ Pilat ta', aa guzltar ngada zagaba saya maja a wufey nga mbōkda Yesu.

²¹ Ama ndōhay a, a wudam ta gōdan, a lōvam: «Dōra fa hwadam mazlanjalakaya! Dōra fa hwadam mazlanjalakaya!»

²² Pilat ta', aa guzley nga dey maakar, a lōvtar: «Cek maaya ba masa anga ma key na, wura? Maja kwa ya ta hōtey mebōrey fa anga tōde ngaa zōfey mesōfney anga na, daa ba. Ya da slōda gway na, ya mbōkda.»

²³ Ama a wudam ta gōdan, aa cōfdamara, a lōvam: «Ya wufam Yesu na, ka dōra fa hwadam mazlanjalakaya.» Mewudey ata ha a fōnar ray a Pilat.

²⁴ Ta', a tōba nga key anda ata maa cōfdamara.

²⁵ A pōskatara ndaw masa ata ma wufam nga pōskey heyey. Ndaw a na, a kōzlamara aa fōrsōne, maja anga ma hōldata ndōhay nga key baazlam a ray bay nga berney a ta anga ma kōfey ndaw vagay heyey. Ta', a vōldatara Yesu amba a kamar cek anda ata ma wufam.

*A dōrmara Yesu fa hwadam mazlanjalakaya
(Matiye 27.32-44; Mark 15.21-32; Jan 19.17-27)*

²⁶ Daa masa fa handamara Yesu nga dōrey na, a cadamara ray ta *Simanw, ndaw da Siren fa sawa da ley. Sewje hay kaw! a kōrzamara Simanw a, a pamara hwadam mazlanjalakaya heyey a ray anga, a handa fa dōba nga Yesu.

²⁷ Ndōhay ga fa diyam asiya, asaya, ngusay fa diyam asiya ta matōway.

28 Ama Yesu pøla! a mbødwa dey fa ngusay a, a løvtar: «Ŋgusay da *Jeruzelem, ka tøwam maja yah ba, ama tøwam maja ray akwar, ta maja bøz akwar hay!

29 Maja pas nga banay a sawa la masa ndøhay a da løvam: “Meesømey daha ngada ngusay dørlay hay, masa ta yam bøza hay daa ba, masa ta vølam døwa a bøza hay daa ba sølak!”

30 Ndøhay a da zlamar ngaa guzley ngada anɔwa hay, a løvam: “Bøzlmawa a ray ala!” ta ngadaa heelenj hay, “Pøshamandar!”

31 Da fa gødmar awaw fa hwadam meendøbek e ngaa wurey na, kaa wara hwadam makwalakaya na, a gødmar kælmedek! daa ba daw?» *

32 Ta', a handamawa ndøhay mekele cew, ndøhay a, ara mayal hay, amba a kødmata ta ata Yesu daa slam a vagay.

33 A wusam aa slam masa ata ma zølmara «tetesl nga ray.» Ta', a dørmara Yesu aa slam aha, leŋ mayal hay cew heyey. Mayal hay a na, a dørmata fa hwadam mekele hay a cakay Yesu, pal ta har-zømay, lanɔar ta har-gula.

34 Yesu a løvey: «Papay, mbøkdatara mebørey nga ndøhay kefe † maja a sørmara cek masa ata ma kamara ba.»

Ndøhay ma dørmara Yesu a, a kødam caca amba a wunkamara zana anɔa hay da wuzlah ata.

35 Ndøhay tabiya malacatakaya fetede, fa nøkmara cek mekey. Mahura hay nga *Jøwif hay aa sanɔgørfamar, a løvam: «Anɔa ta løhey ndøhay la daa memøcey. Da masa anɔa *Køriste, *ndaw masa Gazlavay ma wala nga løhdata ndøhay na, nga løhda ray anɔa taw!»

36 Sewje hay, aa sanɔgørfamar may. A ngøcham a cakay a, a vølmar wuzam maakwiyanj a, a løvmar:

37 «Da kah, bay nga Jøwif hay na, løhda ray akah, ta har akah taw!»

38 A wuzlalam mey, a sløpmara fa hwadam masa ata mazlanɔalamara fa vøda heyey, a løvam: «Ndaw kefe, ara bay nga Jøwif hay.»

23:29 23.29 21.23 23:30 23.30 Aw 10.8; CWJ 6.16 * 23:31 23.31 Yesu a wa hwadam meendøbek e ta anɔa ray anɔa, ndaw masa ta mebørey daa ba. A wa hwadam makwalakaya ta ndøhay Jøwif hay masa ta mebørey ga. Anda kefe, Yesu a løvey Jøwif hay a da søram banay ma føna banay masa anɔa ma søra kefe. Nøka Ez 21.3. 23:31 23.31 1Pi 4.17 23:33 23.33 Iz 53.12 † 23:34 23.34 ndøhay kefe: Ndøhay a wulkam Yesu aa guzley da ray Jøwif hay ma wudam nga dørmara fa hwadam. Ndøhay mekele a wulkam Yesu aa guzley da ray sewje hay nga Rawm ma dørmara. Ndøhay mekele saya a wulkam Yesu aa guzley da ray ndøhay tabiya fetede. 23:34 23.34 Ps 22.19; Mt 5.44; Lk 6.28; SNM 7.60 23:35 23.35-36, 39 Ps 22.8; 109.3-5 23:36 23.36 Ps 69.22 23:37 23.37-38 Mt 27.11

³⁹ Ndaw pal da wuzlah mayal hay cew madərtakaya da cakay Yesu heyey na, a cəda Yesu, a ləvey: «Kah na, Kəriste, ba diya? Ləhda ray akah dəba taw, amba ka ləhdandar may!»

⁴⁰ Ama ndaw-mayal lanġar a kar mey, a ləvar: «Kah madərkaya anda anġa. Ka zlurey ta Gazlavay ba daw?»

⁴¹ Aləkwa na, sariya aləkwa təde fa sləra aləkwa maaya ba. Ama anġa na, kwa ta key mebərey daa ba səlak.»

⁴² Ta', aa guzley saya, a ləvey: «Yesu, pas masa kah ma da vəhwa nġa zəma bay akah na, sərfadaya may.»

⁴³ Yesu a mbəddara, a ləvar: «Ya fa ləvka fara fara, mezley dəga tasana, ya da njakwa cew e daa slam maaya da vad.»

Meməcey nġa Yesu

(Matiye 27.45-56; Mark 15.33-41; Jan 19.28-30)

⁴⁴⁻⁴⁵ Ta pas nġene, mamba wuzlah-pas na, pas sərət! a sərtey. Ləvanġ a key daa hwayak tabiya haa bərey maakar nġaa kwad. Daa *Way nġa Gazlavay zana ma ġərca *Slam masa Gazlavay aa da hwad a na, a nġərey pədak! cew da wuzlah.

⁴⁶ Yesu a wudey ta ġədanġ, a ləvey: «Papay, ya mbəkda kawa mesəfney adaw a har akah.» Masa anġa maa guzley la anda kede na, pam! a məcey.

⁴⁷ Mahura nġa sewje hay nġa Rawma hay, ma hətar cek aha ma key anda nġene na, a həlma Gazlavay, a ləvey: «Fara fara ndaw kede, ara ndaw maaya!»

⁴⁸ Ndəhay tabiya makustakaya fetede nġa nəkey dey fa cek ma key daa slam aha na, ta hətmar cek aha la, ata tabiya a vəhmawa a way ata hay ta mekədey rav.

⁴⁹ Jam nġa Yesu hay tabiya, ta nġusay ma samawa asiya dəga da *Galile, malacatakaya dorenġ, fa nəkam dey fa cek ma key tabiya.

A jəhmara vagay nġa Yesu

(Matiye 27.57-61; Mark 15.42-47; Jan 19.38-42)

⁵⁰⁻⁵¹ Ndaw daha mezəley *Jawzef. Ara ndaw da slala Arimate daa hwayak nġa *Jəwif hay. Ndaw aha aa maaya fa mey nġa Gazlavay. Fa səkwa mewey nġa Bay Gazlavay. Ara ndaw da wuzlah ndəhay mahura hay ma sla yawa nġa Jəwif hay. Ama ta pas masa ndəhay a ma kamar sariya a Yesu amba a kədmara vagay na, Jawzef e, ta təba mewulkey ata daa ba, ta təba sləra ata masa ata ma kamara na, daa ba.

⁵² Masa Yesu ma mæcey la na, Jawzef e a daw fa Bay Pilat, aa cæfdarawa nga vældara vagay nga Yesu amba a jøha. Ta', Bay Pilat a vølar cøved nga jøha.

⁵³ Anda kefe, Jawzef e, a padørwa salay ta vagay a fa hwadam mazlanjalakaya heyey. A mbøza ta maslaga, a handa aa cøvay maavørkwakaya daa pøraf. Cøvay a ngene, kwa ta pam vagay mekele a hwad a daa ba arañ.

⁵⁴ Ta pas ngene na, luma nga Gajava. Gweegwe pas a køzley amba *pas memøskey-vaw a zley.

⁵⁵ Ngusay masa ma lægdamørwa Yesu døga da *Galile heyey, ta', a diyam bama ta ata Jawzef heyey. A wuzadam dey aa cøvay a, a nøkmara a pamara vagay nga Yesu na, kwara.

⁵⁶ Fa døba ha, a vøham a way ata hay, a wam vaw ta cek hay mezey maaya leñ mal nga tekwedey fa vagay nga Yesu. Ta pas memøskey-vaw, ngusay a, a møskam vaw anda *kwakwas nga Mawiz ma løvey.

24

Yesu a sløkdawa daa memøcey

(Matiye 28.1-10; Mark 16.1-8; Jan 20.1-10)

¹ Fa døba nga *pas memøskey-vaw, pørek pørek ta pas luma nga Gudal, ngusay ma wam vaw ta cek hay mezey maaya heyey a lamata cek hay a, a diyam a mey cøvay nga Yesu.

² A høtfamar beeler mahura da mey cøvay a, magødbalakaya ta cakay.

³ A mbøzam aa cøvay a, ama ta høtfamar vagay nga Bay Mahura Yesu daa ba.

⁴ Daa ngene, ray ata a høbey. Ta', ndøhay cew daha a wuzmatar vaw. Zana nga ndøhay a, a wadam mabara ndøf-ndøf.

⁵ Ngusay a, mandørzay a katar, a jøkwdamara ray a hwayak. Ndøhay a, a løvmatar: «Ka søpmara ndaw masa ta dey da wuzlah ndøhay mamøctakaya na, kwara?»

⁶ Annga fefe daa saba, ta sløkdawa sem daa memøcey. Sørfadamara mey masa annga maa guzldakwara da *Galile heyey, a løvkwar:

⁷ "Si a vøldamaya, yah, *Bøz nga Ndaw, a har ndøhay ta mebørey amba a dørmaya fa hwadam mazlanjalakaya. Nga ðar maakar a, ya sløkdawa daa memøcey."»

⁸ Da ray ngene, a sørfadamara mey nga Yesu maa guzltar heyey.

⁹ Ta', a sləkɔdam da mey cəvay a, a diyam, a kadamatara cek hay ma kam tabiya a *gula hay ŋga Yesu kuraw a ray a letek, leŋ ŋgada gula aŋga hay siya.

¹⁰ Ŋgusay a na, ara ata *Mari da Magdala, Zaan, leŋ Mari mamaŋ ŋga *Jak ta ŋgusay mekele ma ləgdamata. Ara ata ma wuzdamara mey a, a ndəhay mezlərey ŋga Yesu.

¹¹ Ama ndəhay mezlərey ŋga Yesu a, a wulkam mey masa ŋgusay ma kadamara keɔe na, ara mey saw kəne. A təbmara ba.

¹² Ta ŋgene he cəpa, *Piyer pərtal! a lecey, a hway a mey cəvay a cəŋga. A wusey, ta', a gəbey, a wuzedey dey aa cəvay a, ama kwa ta hətey cek mekele daa ba, si maslaga. Ta', a vəhwa a way aŋga, ray a həbar da ray cek masa aa ma hətəwa.

Yesu a wuztar vaw a gula aŋga hay cew daa cəved ŋga Emayus

(Mark 16.12, 13)

¹³ Ta pas a ŋgene masa Yesu ma sləkɔfawa daa meməcey na, gula aŋga hay cew fa diyam ŋgada slala mezəley Emayus. Slala ha na, a key kələmeeter kuraw a ray a letek ta *Jeruzelem.

¹⁴ Ata faa guzlam da ray cek masa ma key cəpa daa ɔar hay a ŋgene.

¹⁵ Masa ata faa guzlam, fa kam yawa da wuzlah ata na, Yesu a kərzata daa cəved, ta', a diyam bama.

¹⁶ Ata fa hətmar maaya maaya, ama cek ma təkta ŋga sərmara ara Yesu na, daha.

¹⁷ Vaw ata tabiya maməckaya. Yesu aa cəɔɔata, a ləvtar: «Masa akwar fa samawa keɔe na, ka kam maɔay na, da ray me?» Ta', a lacam.

¹⁸ Ndaw dasi ata pal, mezəley Kəliyawpas, a ləvar: «Ndaw aɔaw, kah, ndaw-mələk da Jeruzelem keɔe daw? Ka ta cənda mey masa ma key daa ɔar hay a keɔe daa ba daw?»

¹⁹ Ta', aa cəɔɔata, a ləvtar: «Mekey ara mey a?»

A mbəɔdamara, a ləvmar: «Mey ma key da ray Yesu, ndaw Nezeret. Ara *ndaw ma təla mey ŋga Gazlavay mahura. Aŋga ta gədaŋ daa sləra aŋga, daa meeguzley maaya fa mey ŋga Gazlavay leŋ fa mey ŋga ndəhay tabiya.

²⁰ Ama *bay-ray hay ŋga ndəhay aləkwa hay ma ka kwakwas ŋga Gazlavay leŋ mahura aləkwa hay ta handamara la fa Rawma hay, a kamar sariya, a dərmara fa hwadam mazlaŋgalakaya ŋga məcey.

21 Ala na, ya wulkam ara anɔa ma da l hdandakwar al kwa *Israyel hay daa banay. Ama ta nɔgene he c pa, tasana kaa d r maakar anɔa ma m cey*.

22-23 Nɔgusay da wuzlah ala hay daha, nɔa fene taa p rek, ta diyam la a mey c vay anɔa, ama ta h tm rwa vagay anɔa daa ba. A v hmawa, a l vmandar: "Maslanɔ hay nɔa Gazlavay da vad a wuzmandar vaw, a l vmandar: Yesu ta sl kdawa sem daa mem cey, anɔa ta dey." Mey nɔa nɔgusay a ma c ndam rwa kefe na, a h bndar ray.

24 Nd hay da wuzlah ala siya ta diyam la a mey c vay a may. A h tm rwa cek aha anda nɔgusay ma kadamandara heyey. Ama Yesu na, ta h tm rwa daa ba.»

25 Da ray nɔgene, Yesu a l vtar: «Haya, akwar nd hay manjar lenɔesl. Akwar nd hay ma wusam vaw nɔa t ba mey nɔa nd hay ma t la mey nɔa Gazlavay ma wuzdamara zleezle tabiya ba.

26 Si *K riste a s rey banay la d gay, fa d ba ha, a daw a vad a njey aa slam anɔa mewedeɔey na, ka s rmara ba daw?»

27 Ta', Yesu a wuzdatara mey masa maa guzley da ray a daa d rewel nɔa Gazlavay tabiya. A zlar ma wuzdatara ta fa d rewel hay nɔa *Mawiz, fa d ba ha, a wuzdatara mey daa d rewel hay nɔa nd hay ma t la mey nɔa Gazlavay tabiya.

28 Masa ata ma wusam gweegwe ta slala masa gula anɔa hay cew ma wud m nɔa daw a hwad  a heyey na, Yesu a key anda a mb kdata, a daw fa mey.

29 Ama a kamar ambahw, a l vmar: «Njakwa fede bama maja pas fa da k zley, gweegwe tavad  cay.» Anɔa ta', a v hwa, a diyam, a mb zam aa way.

30 Fa d ba ha, a njam bama nɔa z mey d f. Yesu lenɔ! a ley penɔ, a kar suse a Gazlavay, ta', a wunka, a v ldatara.

31 Cek ma t kta nɔa s rmara heyey na, daa saba, a s rmara ara Yesu d ba. Ama wure wure nɔgene, a h tmar da cakay ata ha saba.

32 Da ray nɔgene, aa guzlam da wuzlah ata, a l vam: «Daa masa al kwa daa c ved , anɔa fa wuzdandakwara mey daa d rewel nɔa Gazlavay heyey na, mevel al kwa fa k sley anda lanja, ba diya?»

* **24:21 24.21** tasana kaa d r maakar anɔa ma m cey: Daa masa Yesu ma m cey fa hwadam mazlanɔgalakaya na, gula anɔa hay ray ata fa h bey, a s rmara cek ma da key saba. Ta pas nɔgene d r maakar, a wulkam Gazlavay fa da key cek nɔa j na Yesu daa saba. **24:21 24.21** 1.68; 2.38 **24:24 24.24** 24.12; Jan 20.3-10 **24:25 24.25-27** 24.45 **24:27 24.27** 24.44 **24:32 24.32** 24.45

33 Wure ṅgene, a sləkdam a vøham a Jeruzelem. A høtfamatar *gula hay ṅga Yesu kuraw a ray a letek heyey makustakaya ta ndøhay ata hay.

34 Ndøhay makustakaya heyey aa guzlmatar a gula hay cew heyey teesed, a løvmatar: «Fara fara Bay Mahura ta sləkɖawa sem daa memøcey! Ta wuzar vaw la a *Simanjw!»

35 Gula hay cew heyey ta', a kadamatara cek tabiya masa ma key daa cøved ṅga Emayus heyey, asaya, a wuzdamatara a sørmara ara Yesu na, daa masa anḡa fa wunka peṅ.

Yesu a wuztar vaw a gula anḡa hay

(Matiye 28.16-20; Mark 16.14-18; Jan 20.19-23; SNM 1.6-8)

36 Ama gula hay cew heyey, ta ndøvdamara ṅгаа guzley daa ba araṅ na, Yesu a daw a wuzlah ata, a løvtar: «Anja Gazlavay ṅga njadakwar daa zazay.»

37 Mandørzay a katar, a zluram, aa wasam maja a wulkam ara mamayam.

38 Ama Yesu a løvtar: «Ka zluram na, maja me? Akwar ta mewulkey cew cew, maja me?»

39 Nøkmata har adaw hay, ta salay adaw hay. Fara fara ara yah! Tatømamaya, nøkmaya maaya maaya amba ka sørmara fara fara ara yah. Maja mamayam na, anḡa ta aslaw ṅga vaw ta tetesl anda akwar ma høtmaya keɖe na, daa ba, ba diya?»

40 Daa masa anḡa faa guzltar anda keɖe na, a wuzdatara har anḡa hay, ta salay anḡa hay.

41 A tøbmara mey a, maaya maaya ba araṅ maja ata daa meesømey ga. Ray ata fa høbey, Yesu ta', aa cøɖɖata, a løvtar: «Cek mezømey da har akwar feɖe daha daw?»

42 Ta', a vølmar ewet maføkakaya.

43 Leṅ! a la, ta', a zøma fa mey ata.

44 Fa døba ha, a løvtar: «Daa masa aløkwa bama heyey na, ya ta løvkwar la, mey tabiya masa mawuzlalakaya daa ɖerewel ṅga *kwakwas ṅga Mawiz, ta daa ɖerewel ṅga ndøhay ma tøla mey ṅga Gazlavay, leṅ daa *Pøsam hay na, si mey a tabiya, a key cøma.»

45 Ta', a wurtara leṅgesl, amba a sørmara mabara ṅga mey daa ɖerewel ṅga Gazlavay.

24:34 24.34 Mk 16.7; 1Kwr 15.4-5 **24:36 24.36** 1Kwr 15.5; **Zazay ṅga Gazlavay:** Lk 2.14 **24:37 24.37** Mt 14.26; Mk 6.49 **24:41 24.41-43** Jan 21.5, 10; SNM 10.41 **24:44 24.44** 24.27; Jan 5.39; **Mawiz:** SNM 7.9-10, 25-27, 35, 37-39; Jan 5.46; **ndøhay ma tøla mey ṅga Gazlavay:** Iz 52.13-53.12; Aw 6.2; **Pøsam hay:** Ps 22.69 **24:45 24.45** 24.25-27, 32; Jan 20.9

⁴⁶ Fa dɔba ha, a lɔvtar: «Mawuzlalakaya zleezle, a lɔvey: “Si *Kɔriste a sɔrey banay, a mɔcey, ŋga dar maakar a, a slɛkdawa daa memɔcey.

⁴⁷ Si a wuzdamara mey da ray membɔfey menjey, ta da ray membɔkey mebɔrey, ŋgada ndɔhay da bɔla tabiya ta mezɔley ŋga Kɔriste. A da zlamara da *Jeruzelem.”

⁴⁸ Ara akwar ma da wuzdamatara cek hay masa akwar ma hɔtmatar kedɛ a ndɔhay.

⁴⁹ Yah, ya da slɛrdakwara Mesɔfney masa Papay ma lɔvey a da vɔldakwara heyey. Ama si ka njam daa berney ŋga Jeruzelem dɔgay, kasl pas masa Gazlavay ma da vɔlkwar gɔdan ma sawa da vad.»

Bay Gazlavay a la Yesu a vad

(Mark 16.19-20; SNM 1.9-11)

⁵⁰ Fa dɔba ha, Yesu ta', a badata gula anɔa hay daa berney a, a diyam gweegwe ta Betani. Fetede, ta', a banɔada har, a pɔstar mey.

⁵¹ Daa masa aa fa pɔstar mey na, ta', a mbɔkdata, Bay Gazlavay a la a vad.

⁵² Gula anɔa hay a, a ragadam ŋga hɔlmamara. Ta', a vɔhmawa a *Jeruzelem ta meesɔmey ga.

⁵³ Mandaw mandaw ata daa *Way-mekey-kwakwas ŋga Gazlavay, fa hɔlmamara Gazlavay.

**Mey-maaya-mawiya masa
Jan
ma wuzlala
Mey da ray
Mey-maaya-mawiya masa Jan ma
wuzlala**

Jan na, ara ndaw da wuzlah gula hay nga Yesu kuraw a ray a cew. Ara gula masa Yesu ma wudfa kalah (13.23; 21.20). Annga melman nga Jak, papa ata Zebede (Mt 4.21).

Derewel e anga wal nekofey ta masa Matiye, Mark, len Luk ma wuzlalamata. Jan na, a wuzda mabara nga mey nga Yesu, asaya aa guzley da ray slera masa Yesu ma ka. Jan a wufey ndohay a sarmara Yesu Koriste na, ara Mey nga Gazlavay masa aa daha ta Gazlavay daga bala ta zley daa ba araj. Mey nga Gazlavay a na, ta terey la nga ndaw-magadan. Ta sawa la a bala, amba ndohay a taram nga beza hay nga Gazlavay.

Daga daa faselawal 2 haa faselawal 12, Jan aa guzley da ray maazla hay maasala ma ruzla ndaw masa Yesu ma kata. Ta fa maazla hay a na, ya serkwa Yesu aa Bezey nga Gazlavay fara fara.

Daga daa faselawal 13 haa faselawal 21, Jan aa guzley da ray Yesu ma da mbakda bala. Aa guzley da ray Yesu ma ketata gula anga hay da ray menjey ata fa dafa nga memocey anga (13-16). Aa guzley da ray Yesu ma derar dangay a Gazlavay, ma kar ambahw amba a mbakdata gula anga hay asi har nga Gazlavay (17). Aa guzley da ray ndohay ma kersamara Yesu nga kofey vagay (18-19). Asaya, aa guzley da ray Yesu ma slakdawa daa memocey len da ray Yesu ma wuztar vaw a gula anga hay amba a veltar gadan (20-21).

Daa derewel e kefe na, mey mekele mekele daha nga voley gadan a ndohay:

Gazlavay a wudfa ndohay kalah (3.16-17)

Yesu a lovey: «Yah na, daf mevoley heter mendovey ba.» (6.35, 48)

Yesu a lovey: «Yah na, slam-mewedey.» (8.12; 9.5)

Yesu a lovey: «Yah na, mey-slam nga taban hay.» (10.7, 9)

Yesu a lovey: «Yah na, ndaw-mecakwer maaya.» (10.2-4, 11, 14)

Yesu a løyey: «Yah, ray adaw na, ya sləkɗadatərwa ndəhay daa meməcey, asaya, ya vəltar heter mendəvey ba.» (11.25-26)

Yesu a løyey: «Yah na, cəved ma handata ndəhay ŋgada fa Gazlavay.» (14.6)

Mey da ray Yesu Kəriste, ma zəlmara Mey ŋga Gazlavay

¹ Masa *Gazlavay ta ləma bəla daa ba arañ na, ndaw ma zəlmara Mey ŋga Gazlavay aa daha cay. Mey a manjakaya ta Gazlavay *. Mey a na, ara Gazlavay a ray anğa.

² Masa Gazlavay ta zlar ŋga ləmtərwa cek hay tabiya daa ba arañ na, Mey a manjakaya ta Gazlavay.

³ Gazlavay a katərwa cek hay tabiya ta fa ndaw aha. Kwa Gazlavay ta key cek manjar anğa na, daa ba.

⁴ Ara anğa ma vəltar heter a cek hay tabiya. Anğa fa wadatar dey a ndəhay amba a njam aa slam-mewedey, a səmra cek masa fara fara.

⁵ Anğa na, slam-mewedey, anğa fa wedey daa ləvanj. Ləvanj a, ta gwa ŋga sərta daa ba səlak.

⁶ Zleezle, ndaw daha mezəley *Janj †. Gazlavay ta slərdərwa la fa ndəhay.

⁷ A sawa ŋga wuzdatara a ndəhay mey da ray slam-mewedey a, amba kwa waawa a təba mey anğa da ray slam-mewedey a.

⁸ Fara fara, Janj na, ara slam-mewedey a ba. Ama a sawa na, amba a wuzey mey da ray a gway.

⁹ Ndaw ma zəlmara Mey ŋga Gazlavay heyey na, ara slam-mewedey fara fara. Masa anğa ma sawa a bəla na, a wadatar dey ŋga ndəhay tabiya.

¹⁰ Ndaw ma zəlmara Mey heyey ta sawa la a bəla. Gazlavay a ləma bəla na, ta fa anğa. Ama ndəhay da bəla ta səmra ara anğa na, daa ba.

¹¹ Anğa ta sawa la aa hwayak anğa, ama ndəhay daa hwayak anğa ha ta təbmara daa ba.

¹² Ama ŋgada ndəhay ma təbmara ta masa ma pamara ŋga ndaw ata fara fara na, ta vəltar gədanj la ŋga tərey bəza hay ŋga Gazlavay.

¹³ A təram bəza hay ŋga Gazlavay na, anda bəzey ma yawa da hwad ŋgwas ba, asaya, anda mewulkey ŋga ndaw-magədanj ma wudfey ŋga yey bəzey ba. Ama a təram bəza

* **1:1 1.1** Yesu ara Gazlavay ray anğa. Nəka Mt 1.23; Rm 9.5; Fəl 2.6; Kwa 1.19; 2.9; Tit 2.13; Heb 1.3; 2Pi 1.1; 1Jn 5.20. **1:1 1.1-2** MC 1.1-2.4; Janj 17.5; Fəl 2.6; 1Jn 1.1-2; CWJ 19.13-16 **1:3 1.3-4** 1.9-10; 5.26; 1Kwr 8.6; Kwa 1.16-17; Heb 1.2; CWJ 3.14 **1:5 1.5** MC 1.3-4 † **1:6 1.6** Janj masa keɗe na, ara Janj-Baptis. Nəka Janj 1.15. **1:6 1.6** Mt 3.1 **1:8 1.8** 1.20 **1:9 1.9-10** 8.12; 17.25; 1Jn 2.8 **1:12 1.12** 1Jn 3.1; Gal 3.26; 4.5

hay nga Gazlavay na, maja ara Gazlavay a, ray anga ma wudey amba a tɔram bɛz anga hay.

¹⁴ Yaw, Mey aha, ta tɔrey la nga ndaw-magɔdan, ndaw a ta njeɣ la da wuzlah ala. Maaya anga a ndɔvey ba, ta wuzdɔrwa mey masa fara fara la da ray Gazlavay. Ala ta hɛtmar gɔdan anga la. Gɔdan a na, ara gɔdan nga Bɛzey-menduleŋ masa Papaha ma vɛldara.

¹⁵ Daa masa Janj ma hɛtar na, a wuzey mey da ray a saya, a wudey ta gɔdan, a lɔvey: «Kede ara ndaw masa yah maa guzley zleezle da ray a heyey, ya lɔvey: “Ndaw a sawa la fa dɛba adaw. Anga na, a fɛnya ta gɔdan, maja daa masa ya ta yawa daa ba aranj na, ndaw aha aa daha cay.”»

¹⁶ Ndaw aha, aa maaya kalah. Maaya anga a ndɔvey ba. Maaya anga ha aa da ray alɛkwa tabiya. Maja ngene, aa fa pɛsndakwar mey kalah ma fɛna ma fɛna.

¹⁷ Gazlavay a vɛldandakwara *mewey anga na, ta har *Mawiz. Ama maaya anga ta mey masa fara fara da ray a na, a sawa ta fa *Yesu *Kɛriste.

¹⁸ Kwa ndaw pal ta hɛtar Gazlavay ta dey anga daa ba sɛlak. Ama Bɛzey-menduleŋ masa aa letek ta Gazlavay, manjakaya ta Papaha Bay Gazlavay na, ta wuzdandakwara Gazlavay a la.

Mey da ray Janj-Baptis

(Matiye 3.1-12; Mark 1.1-8; Luk 3.1-18)

¹⁹⁻²⁰ Pas pal daha, mahura hay nga *Jɔwif hay da *Jeruzelem a slɛram ndɔhay ma ka kwakwas nga Gazlavay ta ndɔhay *Levi hay † ta fa Janj. A slɛram ngaa cɛfdamɔrwa, anga na, wa? Janj ta bey mey ta bey daa ba. Ta zlurey nga mbɛddatara daa ba, a wuzdatara, a lɔvtar: «Kɛriste, ndaw masa Gazlavay ma wala nga lɛhdata ndɔhay na, ara yah ba.»

²¹ Aa cɛfdamara saya, a lɔvmar: «Kaa kah na, wa? Kah na, *Eli daw?» A mbɛddatara, a lɔvtar: «Kay! yah na, Eli ba.» Aa cɛfdamara saya, a lɔvmar: «Kah na, *ndaw ma tɛla mey nga Gazlavay § masa ala fa sɛkwɛmara heyey daw?» Janj a mbɛddatara, a lɔvtar: «Kay! yah na, ndaw a ba.»

1:13 1.13 3.3, 5-6; 1Pi 1.23; 1Jn 3.9 **1:14 1.14** Gal 4.4; Fɛl 2.7; 1Tm 3.16; Heb 2.14; 1Jn 4.2; **gɔdan nga Bɛzey-menduleŋ masa Papaha ma vɛldara:** Mt 17.2; Janj 2.11; 1Jn 1.1-3 **1:15 1.15** 1.24-27, 30; 5.31-34, 36 **1:17 1.17** 7.19; Mab 31.18 **1:18 1.18** 6.46; 14.8-9; Mab 33.20; Mt 11.27; 1Tm 6.16; 1Jn 4.12 † **1:19-20 1.19** ndɔhay Levi hay: Ara ndɔhay ma jɔnmata ndɔhay ma ka kwakwas. Ara ata ma jɔdmara Way-mekey-kwakwas nga Gazlavay, a nɛkfamar dey. Asaya, ara ndɔhay ma zla walay daa Way a, aa sɛrkadamata ndɔhay.

1:19-20 1.19-27 5.33 **1:19-20 1.20** 3.28 § **1:21 1.21** Daa Mewey hay 18.15, Mawiz a lɔvtar a Jɔwif hay fa dɛba anga na, ndaw ma tɛla mey mekele anda anga a sawa la. Nɛka Janj 1.25; 6.14; leŋ 7.40. **1:21 1.21** Mt 2.14; Janj 6.14

²² Ta', aa cəfdamara saya, a ləvmar: «Kaa kah na, wa dəba wa? Wuzdandara amba ya diyam, ya kadamatara ngada ndəhay ma slərdamandərwa. Ka pada ray akah na, nga wa?»

²³ *Janj a mbəddatara, a ləvtar: «Yah na, “ndaw ma wudey da wuzlah-ley, ma ləvey: Bay aləkwa mahura fa sawa, diymara cəvedŋ nga dər e.”

Mey a keđe na, ara anda Izay, ndaw ma təla mey nga Gazlavay maa guzley zleezle da ray adaw.»

²⁴ Da wuzlah ndəhay ma slərdamata fa Janj heyey na, *Fariza hay daha may.

²⁵ Aa cəfdamara, a ləvmar: «Da kah, *Kəriste, *ndaw masa Gazlavay ma wala nga ləhdata ndəhay ba, da kah, Eli ba, asaya, da kah ndaw ma təla mey nga Gazlavay heyey ba na, kaa ka katar *baptem a ndəhay na, kwara?»

²⁶ Janj a mbəddatara, a ləvtar: «Yah na, ya kakwar baptem ta yam, ama ndaw da wuzlah akwar daha, masa ka sərmara ba.

²⁷ Anŋa na, a da sawa fa dəba adaw, kwa ya fa da wusa nga pəska zewedŋ nga tarak anŋa daa ba.»

²⁸ Mey a keđe tabiya, a key da slala Betani masa da dey lanŋar nga dəhwa nga Jurdeŋ, slam masa Janj ma katar baptem a ndəhay da hwad a.

Janj-Baptis a wuzey mey da ray Yesu

²⁹ Pepərek e, *Janj a hətar Yesu fa sawa ngada fa vəda, ta', aa guzley, a ləvey: «Nəkmara, Bəz-təbanŋ nga Gazlavay *, ma da la mebərey nga ndəhay da bəla.

³⁰ Ara ndaw masa yah maa guzley zleezle da ray a heyey, ya ləvey: “Ndaw a sawa la fa dəba adaw. Anŋa na, a fənya ta gədanŋ, maja daa masa ya ta yawa daa ba aranŋ na, ndaw aha aa daha cay.”

³¹ Zleezle na, yah ta ray adaw, ya səra ara wa ba. Ama ya sawa nga wuzdatara ndaw aha a *Israyel hay ta *baptem masa yah ma ka ta yam.»

³² Janj a wuzey mey da ray ndaw aha, a ləvey: «Yah ma hətar *Mesəfney nga Gazlavay la ta dey adaw fa pawa salay da gazlavay da vadŋ anda makurgwadakw, a njeŋ a ray a.

³³ Daa masa yah ma hətar na, kwa ya ta səra daa ba aranŋ, ama Bay Gazlavay ma slərđiwa nga katar baptem a ndəhay

1:23 1.23 Iz 40.3 **1:25 1.25-26** 1.33; Mt 21.25 **1:27 1.27** 1.15; SNM 13.25

1:28 1.28 10.40; Mt 3.13 * **1:29 1.29** Bəz-təbanŋ nga Gazlavay: Ara mezəley nga Yesu. Anda meləvey, anŋa anda bəz-təbanŋ masa Jəwif hay ma hərmara ngada Gazlavay amba Gazlavay a mbəkdatara mebərey ata. **1:29 1.29** 1.36; Iz 53.6-7; 1Pi 1.19; 1Jn 2.2; CWJ 5.6 **1:30 1.30** 1.15 **1:32 1.32** Mt 3.16

ta yam ta wuzdiwa la, a løyva: “Ndaw masa kah ma da hëtar Mesəfney adaw ma da pawa salay a ray a na, ara anğa ma da katar baptem a ndəhay ta Mesəfney adaw.”

³⁴ Fara fara, yah, Jan, ya ta hëtar la ta dey adaw. Ya gwa nğa key sede da ray a, ya ləvey ndaw aha ara Bəzey nğa Gazlavay.»

Gula hay nğa Yesu ngeeme na, wa hay wa?

³⁵ Pepərek e, ata *Jan-Baptis ta gula anğa hay cew, ata daa slam mekey *baptem heyey saya.

³⁶ Masa *Jan ma hëtar Yesu fa daw na, a ləvtar: «Nəkmara, katađay na, *Bəz-təban nğa Gazlavay.»

³⁷ Gula hay nğa Jan heyey a cəndamara mey a na, ta', a diyam asi Yesu.

³⁸ Yesu a mbədfey dey fa dəba na, a hətatar gula hay nğa Jan heyey fa səpmar wurzay, ta', aa cəfdəta, a ləvtar: «Ka səpam fa yah na, me?» A mbəddamara, a ləvmar: «*Raabi*, slam akah menjey na, dama?» (*Raabi* na, anda meləvey ndaw maa sərkadata ndəhay.)

³⁹ A mbəddatara, a ləvtar: «Samawa taw, ka hətmar la.» Da ray ngene, a diyam, a sərmara slam anğa menjey heyey, a njam bama fetede haa pas a kəzley. (Daa masa ata ma cam ray ta Yesu na, gweegwe pas nğaa kwad.)

⁴⁰ Ndaw pal dasi ndəhay cew masa ma cəndamara mey nğa Jan-Baptis ma diyam asi Yesu heyey na, ara *Andəre, məlman nğa *Simanw *Piyer.

⁴¹ Ata ma mbəkdamara Yesu la na, Andəre a cam ray teesəf na, ta məlmaha Simanw. A ləvar: «Ya ta hətmar *Kəriste la.» (Kəriste anda meləvey *ndaw masa Gazlavay ma wala nğa ləhdata ndəhay.)

⁴² Ta', a handa Simanw fa Yesu. Yesu a nəka Simanw na, ta', a ləvar: «Kah na, Simanw, bəzey nğa Jan, ama dəga wure keđe, a da zəlmaka Sefas.» (Yaw, Sefas na, a wudfey nğa ləvey «Pərad» †.)

Yesu a zəlta ata Fəlep ta Nataniyel nğa key gula anğa hay

⁴³ Pepərek e, Yesu a wudfey nğa daw aa hwayak nğa *Galile. A daw a hətfar *Fəlep, ta', a ləvar: «Sawa, səpya.»

⁴⁴ (Fəlep ara ndaw daa berney nğa Betsayda, berney masa ata *Andəre ta *Piyer ma njam da hwad a.)

⁴⁵ Fa dəba ha, Fəlep a cam ray ta Nataniyel, a ləvar: «Sərfada zleezle na, *Mawiz ta wuzleley la daa dərəwel nğa kwakwas anğa da ray ndaw ma da sawa, ba diya? Asaya,

1:34 1.34 Bəzey nğa Gazlavay: 1.49; 5.18-23; 10.36; 11.27; 20.31; Mt 3.17; 27.54; SNM 9.20 **1:36 1.36** 1.29 **1:40 1.40-42** Mt 4.18-20 **1:41 1.41** 4.25 † **1:42 1.42** Pərad: Ara «Piyer» ta mey Gərek. Ta mey Hebəre may ara «Sefas». **1:42 1.42** Mt 10.2; 16.18

ndøhay ma tøla mey nga Gazlavay ta wuzlalam la da ray a may, ba diya? Ala ta hətmar ndaw aha la. Ara Yesu, bəzey nga *Jawzef. Ndaw aha, a sawa da *Nezeret.»

⁴⁶ Nataniyel a mbəǝǝdara, a ləvar: «Cek maaya a gwa a bawa da Nezeret may daw?» Fəlep a mbəǝǝdara, a ləvar: «Sawa taw, ka hətmar la.»

⁴⁷ Masa Yesu ma hətmar Nataniyel fa sawa fa vəǝǝ na, aa guzley da ray a, a ləvey: «Nəka, ndaw kedə na, ara ndaw *Israyel fara fara. Mevel anja maaya, a mbərzley ba.»

⁴⁸ Nataniyel aa cəǝǝǝ, a ləvar: «Ka sərya fa me?» Yesu a mbəǝǝdara, a ləvar: «Dəga Fəlep ta zəlkawa daa ba aran na, ya ta hətka sem dasi wudez.»

⁴⁹ Nataniyel a mbəǝǝdara dəǝǝ, a ləvar: «Bay aǝaw, kah na, Bəzey nga Gazlavay, kah bay nga Israyel hay!»

⁵⁰ Yesu a mbəǝǝdara, a ləvar: «Ka təǝa mey aǝaw maja yah ma ləvka yah ma hətka la dasi wudez heyey daw? Yaw, ka hətəy maazla hay ma fəna ngenə la saya.»

⁵¹ Ta', Yesu aa guzley saya, a ləvey: «Ya fa ləvkwar fara fara, ka da hətmar slam da vad mawurkaya. Maslan hay nga Gazlavay † fa təpam a vad, fa bərnəgamawa a hwayak, maja yah, Bəz nga Ndaw.»

2

Maazla masa Yesu ma ka ngeeme

¹ Fa dəǝǝ ha ǝar cew na, gwagway nga meley kwakwa da Kana daa hwayak nga *Galile daha. Maman nga Yesu, anja fetede daa gwagway a.

² Ta zəlmata ata Yesu ta gula anja hay la aa gwagway a may.

³ Yaw, masa gwagway a ta ndəvey daa ba aran na, wuzam * daa saba. Maman nga Yesu, ta', aa guzlar a Yesu, a ləvar: «Wuzam daa saba kaa na, kwara?»

⁴ Yesu a mbəǝǝdara, a ləvar: «Mamay, walay aləkwa da hwad a me? Pas masa yah ma da wuzda vaw aǝaw ngada ndøhay, yah na, wa na, ta wuswa daa ba aran.»

⁵ Ta', maman nga Yesu aa guzlar ngada ma ka sləra hay daa gwagway a, a ləvtar: «Cek masa anja ma da ləvkwar tabiya nga key na, kamara.»

1:45 1.45 Mew 18.15; Iz 9.5; 42.1-4; Ez 34.23; Mi 5.1-3 **1:49 1.49** 1.34; 12.13; Mt 27.42 † **1:51 1.51** Maslan hay nga Gazlavay: Mesəfney a kar a Jakwap, a nəka sasal majəkdakaya dəga da hwayak kasl a gazlavay a vad. Maslan hay nga Gazlavay fa təpam a gazlavay a vad, fa bərnəgamawa a hwayak ta fa sasal a. Ta fa mesəfney a ngenə, Jakwap a səra Gazlavay aa ta anja. Nəka MC 28.12.

2:1 2.1-11 4.46 * **2:3 2.3** wuzam: Wuzam a na, ara yam nga babəza nga wudez maməslkaya. **2:4 2.4** 7.6, 30; 8.20; 12.23; 13.1; 17.1; Lk 22.53

⁶ Fetede gəzla hay daha maakwaw, gəzla pal na, a key liter temere. Ara gəzla hay masa *Jəwif hay ma pam yam a hwaɗ a ŋga pərey har ta ŋga pərey cek ata hay anda kwakwas ata ma lövey.

⁷ Yesu aa guzltar ŋgada ma ka sləra hay heyey, a lövtar: «Rəhdamata gəzla hay kede ta yam.» Ta', ma ka sləra hay a, a rəhdamata pece pece.

⁸ Fa dəba ha, Yesu aa guzltar, a lövtar: «Wure kede kam yam a nekədey, handamara ŋgada bay-ray ŋga sləra ŋga gwagway a.» Ta', a kamar, a handamar.

⁹ Bay-ray a, aa cəkda yam a, ama ta tərey sem ŋga wuzam. A səra wuzam a, a sawa ta wura ba. Ama ndəhay ma ka sləra hay heyey na, a sərmara. Bay-ray ŋga sləra ŋga gwagway a, ta', a zələrwa zel-kwakwa ha,

¹⁰ aa guzlar, a lövar: «Kwa waawa ma key gwagway ŋga meley kwakwa na, a vəltar teesed a ndəhay mazəltakaya na, wuzam mecərey kalah. Fa dəba ha, da masa ndəhay mazəltakaya ha ta sam wuzam la ga na, a vəltar masa ma cərey pəreh, ba diya? Ama ŋga kah na, wuzam masa ma cərey kalah na, ka bəda haa wure kede daw?»

¹¹ Yesu a ka maazla anga ŋgeeme kede na, da Kana daa hwayak ŋga Galile. Ta fa maazla ha kede a wuzdərwa gədanj anga. Da ray ŋgene, gula anga hay a pamara ŋga ndaw ata fara fara.

¹² Fa dəba ha, ta', a sləkdam, a diyam a Kapernayum ta ata mamaha, məlmaha hay, leŋ gula anga hay. A njamawa fetede dar nekədey.

Yesu a bəltərwa ndəhay ma ka filaw daa Way-mekey-kwakwas ŋga Gazlavay

(Matiye 21.12, 13; Mark 11.15-17; Luk 19.45, 46)

¹³ Gwagway ŋga *Jəwif hay masa ata ma zəlmara *Pak gweegwe cay. Ta', Yesu a sləkdey, a daw a *Jeruzelem ŋga kawa gwagway a.

¹⁴ Masa anga ma wusey la na, a mbəzey aa *Way-mekey-kwakwas ŋga Gazlavay. Fetede, a hətfey ndəhay ma ka filaw ŋga sla hay, ŋga təbanj hay leŋ ŋga makurgwadakw hay. Asaya, a hətfey ndəhay manjatakaya daa slam ata hay membədey dala.

¹⁵ Ta', a cəmey laza ŋga key laway, a bəltərwa ndəhay ma ka filaw tabiya ta təbanj ata hay, leŋ sla ata hay daa Way-mekey-kwakwas ŋga Gazlavay a palah. A bəzlta taabal

hay nga ndəhay ma mbədam dala heyey. Dala kwakwac! kwakwac! aa kwecey.

¹⁶ Aa guzltar ngada ndəhay ma hədfkadam makurg-wadakw hay, a ləvtar: «Badamata cek hay a kefe la tabiya fefe! Ka da tərđamara way nga Papay, Bay Gazlavay, nga way ma ka filaw ba.»

¹⁷ Daa masa *gula hay nga Yesu ma hətmar cek masa Yesu ma ka na, a sərfadamara mey mawuzlalakaya daa đerewel nga Gazlavay ma ləvey: «Bay Gazlavay, way akah na, ya wuđa kalah, haa ya vəlda ray adaw maja way a.»

¹⁸ Mahura hay daa Way-mekey-kwakwas nga Gazlavay, aa guzltar a Yesu, a ləvtar: «Key maazla nga wuzdandara kah ta cəved nga kata cek hay a kefe.»

¹⁹ Yesu a mbəđdatara, a ləvtar: «Bəzlmara Way-mekey-kwakwas nga Gazlavay kefe, đar maakar ya ləma la aa slam a.»

²⁰ Ta', ndəhay a, a mbəđdamara, a ləvtar: «Haya! Mevey kwakwar məfad a ray a maakwaw, fa ləmamara way a kefe. Ama kah, ka ləvey ka ləma la aa slam a đar maakar na, kwara!»

²¹ Yaw, Yesu maa guzley da ray Way-mekey-kwakwas nga Gazlavay na, a key a ngey mey da ray ray anga.

²² Masa Yesu ma sləkdawa la daa meməcey na, gula anga hay a sərfadamara mey da ray Way-mekey-kwakwas masa Yesu maa guzlda heyey. Da ray ngene, a təbmara mey daa đerewel nga Gazlavay mawuzlalakaya zleezle, asaya, a təbmara mey masa Yesu maa guzlda.

Yesu na, a səra cek daa mevel nga ndaw-magədan

²³ Masa Yesu aa da *Jeruzelem nga key gwagway nga *Pak heyey na, ta key maazla hay la fetefe. Ndəhay ga a təbmara mey anga maja ata ma hətmar maazla hay masa aa ma kata.

²⁴ Ama ta ngene he cəpa, Yesu ta pata nga ndəhay anga hay fara fara na, daa ba, maja a səra mewulkey nga ndəhay a tabiya.

²⁵ Asaya, a wuđey kwa ndaw a kadar mey da ray ndəhay ba, maja a səra cek daa mevel nga ndaw-magədan.

3

Ata Yesu ta Nikwedem

¹ Ndaw daha, mezəley Nikwedem. Ara ndaw Fariza masa da wuzlah mahura hay nga *Jəwif hay.

2:16 2.16 Lk 2.49 **2:17 2.17** Ps 69.10 **2:18 2.18** 2.11 **2:19 2.19** Mt 26.61; 27.40; SNM 6.14 **2:21 2.21** 1Kwr 6.19 **2:22 2.22** 1.45; 12.16; 14.26; Lk 24.6-8, 27 **2:23 2.23** 2.11; 6.29; 7.31; 8.30; 9.38; 10.42; 11.45; 12.42; 20.29, 31; 16.9
3:1 3.1 Nikwedem: 7.50; 19.39

² Dasi tavaɗ pal daha, ndaw aha a daw a hətfar Yesu, aa guzlar, a ləvar: «Bay aɗaw, ya sərmara ara Gazlavay ma slərdakawa ŋɡaa sərkadata ndəhay. Ya sərmara, ma gwa ŋɡa key maazla hay anda kah ma kata keɗe na, si ndaw ma sawa ta fa Gazlavay.»

³ Yesu a mbəɗɗara, a ləvar: «Ehe, ya fa ləvka fara fara, da ndaw ta yawa ŋɡa dey cew daa ba na, aa da wuzlah ndəhay masa Gazlavay fa wey da ray ata na, daa ba.»

⁴ Nikwedem aa cəɗɗa saya, a ləvar: «Ndaw ta key mahura cay na, a gwa ŋɡa yawa ŋɡa dey cew saya daw? A gwa ŋɡa vəhey a hwaɗ mamaha ŋɡa yawa ŋɡa dey cew daw?»

⁵ Yesu a mbəɗɗara, a ləvar: «Fara fara, ya fa ləvka saya, da ndaw ta yawa ta fa yam, leŋ ta fa *Mesəfney ŋɡa Gazlavay daa ba na, aa da wuzlah ndəhay masa Gazlavay fa wey da ray ata na, daa ba.

⁶ Ndaw ma yawa da hwaɗ ndaw-magəɗan na, ara ndaw gway, ama ndaw ma yawa ta fa Mesəfney ŋɡa Gazlavay na, Mesəfney ŋɡa Gazlavay a, aa da ray a.

⁷ Ya ta ləvka la, si akwar ndəhay tabiya ka yamawa ŋɡa dey cew. Yaw, ka da rəzley da ray mey a ba.

⁸ Wulkey da ray memed mekey cey. Kwa daa wura daa wura na, fa key anda aa ma wuɗey. Ka fa cənda meebərey a, ama ka səra a sawa dama ba, ka səra a daw ama ba. Ndaw ma yawa ta fa Mesəfney ŋɡa Gazlavay na, aa kəne may.»

⁹ Ta', Nikwedem a mbəɗɗara, a ləvar: «Cek aha a da key na, kwara?»

¹⁰ Yesu a mbəɗɗara, a ləvar: «Kah, ndaw mahura maa sərkadata ndəhay da *Israyel, ba diya? Kaa ka səra cek aha ba, kwara?»

¹¹ Yaw, ya fa ləvka fara fara, yaa guzlam na, da ray cek masa ala * ma sərmara. Ya wuzam mey na, da ray cek masa ala ma hətmar ta dey ala. Ama akwar na, ka wuɗam ŋɡa təbmara mey ala ha ba.

¹² Nəka, da ya faa guzlkwar da ray cek hay ma kam da bəla keɗe na, ka gəmam ŋɡa təbmara mey aɗaw ba. Kaa wara yaa guzlkwar da ray cek hay masa da gazlavay da vaɗ na, ka da təbmara kwara?»

¹³ Kwa ndaw pal da bəla ta təpey a gazlavay a vaɗ na, daa ba. Si yah, *Bəz ŋɡa Ndaw ma bərnɡawa da vaɗ a.

¹⁴ Zleezle masa *Mawiz aa da wuzlah-ley na, ta vəɗey zezekw ŋɡa bərey magaza la. A jəwa fa hwaɗam, ta', a

3:2 3.2 Mt 22.16; Jan 2.11 **3:3 3.3** 1.13 **3:5 3.5** Tit 3.5 **3:6 3.6** 6.63
3:8 3.8 Ekz 11.5 * **3:11 3.11** ala: Anda meləvey, Yesu ta ndəhay mekele ma wuzam mey fara fara da ray Gazlavay. **3:11 3.11** 3.32; 8.26 **3:12 3.12** 12.32; 14.1-3; 17.5 **3:13 3.13** MM 30.4; Rm 10.6

banɔaɔa a vad. Yah, Bəz ŋga Ndaw, a da dərmaɔa fa hwadam, a da banɔaɔamaya a vad anda ŋgene may,

¹⁵ amba kwa waawa ma paya ŋga ndaw anɔa fara fara na, a hətəy heter mendəvey ba.»

¹⁶ Yaw, Gazlavay a wudta ndəhay da bəla kalah, haa a slərdərwa Bəzey anɔa mendulen amba kwa waawa ma pa ŋga ndaw anɔa fara fara na, aa zəɔəy ba, ama a hətəy heter mendəvey ba.

¹⁷ Gazlavay a slərdərwa Bəzey anɔa a bəla na, ŋga katar sariya a ndəhay ŋgaa zəɔam ba, ama ŋga ləham daa mebərey ta fa anɔa.

¹⁸ Ndaw ma təba mey ŋga Bəzey anɔa na, Gazlavay fa da kar sariya amba aa zəɔəy na, daa ba. Ama ndaw ma təba mey anɔa ba na, Gazlavay ta kar sariya cay la, maja aa ma pa Bəzey-mendulen ŋga Gazlavay ŋga ndaw anɔa fara fara ba.

¹⁹ Ahaw, Gazlavay ta slərdərwa Mewedey † anɔa la a bəla, ama ndəhay a wudam mewedey a ba. A wudam na, ləvan jak, maja ata fa kam cek hay malamba. Yaw, Gazlavay a da katar sariya ŋgaa zəɔdata na, maja.

²⁰ Kwa waawa ma key cek malamba na, a key a rəsa mewedey a, kwa fa da daw aa mewedey a daa ba. A zlurey maja cek hay malamba masa anɔa ma kata ha, a da wuzmawa.

²¹ Ama ndaw masa fa key cek hay maaya na, a mbəzey aa mewedey a la, amba ndəhay a hətmatar cek hay maaya masa anɔa ma kata na, ara cek hay masa Gazlavay ma wudəy.

Jan-Baptis a wuzey mey da ray Yesu sayə

²² Fa dəba ha, ata Yesu ta gula anɔa hay a sləkdam da *Jeruzelem, a diyam aa slam mekele daa hwayak ŋga *Jude he, a njam fetedə ta gula anɔa hay a, a katar *baptem a ndəhay.

²³ *Jan-Baptis may, fa katar baptem a ndəhay. A katar baptem a na, da Enanw gweegwe ta slala mezəley Salim, maja yam ga fetedə daha. Ndəhay fa diyam fa ata, fa kamatar baptem.

²⁴ Daa ŋgene, ta kərzamara Jan-Baptis aa fərsəne daa ba aran.

²⁵ Gula hay ŋga Jan-Baptis siya fa kam yawa ta ndaw *Jəwif daha da ray mepərey ta mepərey cek hay ŋga tərey

3:14 3.14 Mesl 21.9; Jan 8.28; 12.32-34; 18.32 **3:15 3.15** 20.31 **3:16 3.16** 3.36; 5.24; Rm 8.32; 1Jn 3.1; 4.9-10; 5.11, 13 **3:17 3.17** 12.47 **3:18 3.18** 5.22
 † **3:19 3.19** Mewedey a na, ara Yesu. Ləvan na, ara bay-malula. **3:19 3.19** 8.12 **3:20 3.20** Ef 5.11-13 **3:21 3.21** 1Jn 2.4 **3:22 3.22** 4.1-2 **3:24 3.24** Mt 4.12; 14.3

maaya fa mey nga Gazlavay anda kwakwas nga Jəwif hay ma ləvey.

²⁶ Gula hay nga Janj-Baptis heyey a diyam fa *Janj a, a ləvmar: «Bay ala, ka fa sərfada ndaw masa akwar cew e da dey lanjar nga wayam nga Jurdenj heyey, ba diya? Nəka, ndəhay ga fa diyam la ngada fa vəfa, aa fa katar baptem kaa na, kwara?»

²⁷ Janj-Baptis e, a mbədfatara, a ləvtar: «Ma gwa nga key cek anda ngene na, si ndaw masa Gazlavay ma vələr gədanj.

²⁸ Akwar ray akwar ta cəndamara la ta sləmay akwar, yah ma ləvkwar: “Yah na, *Kəriste, *ndaw masa Gazlavay ma wala nga ləhdata ndəhay ba. Ama yah na, ndaw masa Gazlavay ma slərdərwa teesəf da ray a nga diyey cəved anja.”

²⁹ Akwar fa sərmara, da ndaw a ley ngwas na, ngwas aha ara ngada ndaw aha. Ama gula-manjasl manjakaya da cakay a nga jəna, a cənda dəy anja na, aa səmey. Ara anda kefe, wure kefe yah daa meesəmey masa fara fara.

³⁰ Anja sləmay nga ndaw aha nga zəley ma fəna nga yah.»

Mey da ray Yesu, ndaw ma sawa ta da vad

³¹ Ndaw ma sawa ta da gazlavay da vad na, a fənta ndəhay tabiya. Ndaw masa da bəla na, ara ndaw-magədanj gway. Anda kefe, aa guzley na, si da ray cek hay masa ma kam da bəla gway. Ndaw ma sawa ta da gazlavay da vad na, [a fənta ndəhay tabiya.]

³² Anda kefe, aa guzley da ray cek masa anja ma hətər ta dey anja, ta masa anja ma cənda ta sləmay anja, ama ndəhay a təbmara mey anja ha ba cənja.

³³ Ndaw masa ma təba mey anja ha la na, a key a wuzdatara a ndəhay na, Gazlavay ara ndaw ma mbərzley ba fara fara.

³⁴ Ndaw masa Gazlavay ma slərdərwa na, aa guzley mey hay nga Gazlavay, maja Gazlavay ta vəlda Mesəfney anja tabiya sem a ray a.

³⁵ Gazlavay Papanj, a wuđa Bəzey anja, ta vələr gədanj la amba a wey da ray cek hay cəpa.

³⁶ Kwa waawa ma pa Bəzey a nga ndaw anja fara fara na, a hətəy heter mendəvey ba la. Ama kwa waawa ma təbra mey anja ba na, fa da hətəy heter mendəvey ba daa

ba. Anda keđe, Gazlavay fa cey mevel da ray a mandaw mandaw.

4

Mey da ray ata Yesu ta ηgwas Samari daha

¹⁻³ Ndəhay *Fariza hay a cəndamara na, *gula hay nga Yesu ga, a fəna nga *Jan-Baptis, asaya, Yesu fa katar *baptem a ndəhay ga, a fəna Jan-Baptis a. (Fara fara na, Yesu, ta ray anğa ta key baptem kwa ngada ndaw pal daa ba. Ama ara gula anğa hay ma kamara gway.) Masa Yesu ma cənda mey masa Fariza hay maa guzldamara heyey na, a sləkdey daa hwayak nga *Jude, a vəhey a *Galile.

⁴ Nga wusey a Galile he na, si a daw ta da *Samari.

⁵ Daa madaw anğa ha na, a wusey aa hwayak nga Samari, a slala Sikar gweegwe ta ley daha. Ara ley masa *Jakwap ma vəldara zleezle ngada bəzey anğa *Jawzef.

⁶ Bəldaw nga Jakwap a fetede daha. Yesu a gərey nga madaw. Ta', a məskey vaw da mey bəldaw a. Ara gweegwe da wuzlah-pas.

⁷ Wure ηgene, ηgwas Samari daha, a daw nga tədkawa yam daa bəldaw a. Ta', Yesu a ləvar: «Vəlya yam nga sey cey.»

⁸ Daa ηgene, gula hay nga Yesu ata sem a slala nga hədkawa cek mezəmey.

⁹ Ngwas Samari kaa, a mbəddara a Yesu, a ləvar: «Kah na, ndaw *Jəwif, ba diya? Kaa, kaa cəfdəy yam nga sey fa yah, ηgwas Samari na, kwara?» (Ngwas aha aa guzley anda keđe na, maja ndəhay Jəwif hay a zləram ta ndəhay Samari hay ba sələk.)

¹⁰ Yesu a mbəddara, a ləvar: «Da ka səra maaya masa Gazlavay ma ka ngada ndaw, asaya, da ka sərya, yah, ndaw maa cəfdafaka yam nga sey keđe na, anja ara kah ma daa cəfdafaya yam jak. Anda keđe, ya da vəlka yam masa ma vəley heter mendəvey ba.»

¹¹ Ngwas a, a ləvar: «Papay adaw, cek metədekey yam fa kah daa ba, asaya, bəldaw a, aa selesen. Kaa ka da hətərwa yam ma vəley heter mendəvey ba ha na, dama?»

¹² Bəldaw a keđe na, ara papaη nga papa ala Jakwap ma zləndara. Anğa ta bəz anğa hay leη gənaw anğa hay ta sam yam a la may. Kaa kah na, ka fəna Jakwap daw?»

¹³ Yesu a ləvar: «Kwa waawa ma sey yam a keđe, yam a kar la cənga.

14 Ama ndaw ma da sey yam masa yah ma da veldara na, kwa yam fa da kar daa saba sɔlak. Yam a, a da njeɣ daa aɲga, a ndɔvey ba, asaya, a da vɔlar heter mendɔvey ba.»

15 Ngwas a, a mbɔɔɔdara, a lɔvar: «Papay aɔaw, vɔlya yam a may taw, amba yam a kaya saba, asaya, amba ya sawa ɲga tɔɔkey yam feɔe saba na!»

16 Yesu aa guzlar, a lɔvar: «Daw, zɔlɔrwa zel akah, samawa feɔe.»

17 Ngwas a, a mbɔɔɔdara, a lɔvar: «Yah na, zel aɔaw daa ba.» Yesu a lɔvar: «Kah maa guzley la, ara aɲga. Ahaw, zel akah daa ba,

18 maja ka ta ley zel hay la zlam, asaya, ndaw masa akwar cew e wure keɔe na, ara zel akah ba fara. Ka taa guzley la ara aɲga.»

19 Ngwas a, a lɔvar: «Papay aɔaw, ya nɔkaka keɔe na, kah, *ndaw ma tɔla mey ɲga Gazlavay.

20 Papanj ɲga papa ala hay a dɔram daɲgay ɲgada Gazlavay na, daa aɲgwa keɔe. Ama akwar Jɔwif hay, ka lɔvam slam medɔrey-daɲgay ɲgada Gazlavay na, si da *Jeruzelem gway.»

21 Yesu a mbɔɔɔdara, a lɔvar: «Kwakwa, jɔkfaya slɔmay. Pas a, a wuswa la masa ndɔhay a da dɔrmar daɲgay a Papay, Bay Gazlavay, kwa daa wura daa wura. Fa da diyam ɲga dɔrwa daɲgay daa aɲgwa keɔe ta da Jeruzelem daada na, daa ba.

22 Akwar Samari hay, akwar fa dɔram daɲgay, ama ka sɔrmara ndaw masa akwar ma dɔrmar daɲgay a ba. Ala Jɔwif hay na, ya sɔrmara ndaw masa ala ma dɔrmar daɲgay, maja ndaw ma da lɔhdata ndɔhay na, a bawa daa sɔkway ala Jɔwif hay.

23 Pas a fa sawa, ta wuswa cay, masa ndɔhay ma nam ray a Bay Gazlavay Papanj fara fara na, a namar ray la ta mevel pal ta fa gɔɔaɲ ɲga Mesɔfney aɲga. Bay Gazlavay Papanj a wuɔta ndɔhay ma namar ray anda ɲgene.

24 Gazlavay na, ara Mesɔfney, ndaw a gwa ɲga hɔtar ta dey ba. Anda keɔe, ndɔhay ma namar ray na, si a namar ray ta mevel pal, ta fa gɔɔaɲ ɲga Mesɔfney aɲga.»

25 Ngwas a, a mbɔɔɔdara, a lɔvar: «Ya sɔra *Kɔriste, *ndaw masa Gazlavay ma wala ɲga lɔhdata ndɔhay na, a sawa la. Da masa ta sawa cay na, a wuzdandara cek hay tabiya maaya maaya la.»

26 Yesu a mbɔɔɔdara, a lɔvar: «Kɔriste he na, ara yah, ndaw masa maa guzla keɔe.»

²⁷ Daa masa Yesu faa guzlam ta ηgwas Samari kede heyey na, gula annga hay a vøhmawa, a røzlam ga maja aa faa guzley ta ηgwas. Ama kwa ndaw pal taa cøfda ηgwas aha: «Ka wufey fa ndaw a me?» na, daa ba. Asaya, kwa ndaw pal taa cøfda Yesu: «Kaa guzlam ta ηgwas aha maja me?» na, daa ba.

²⁸ ηgwas aha, mbak! a mbækda kwakulam annga da mey yam a, ta', a vøhey a slala. A daw a løvtar a ndøhay:

²⁹ «Samawa ta nøkmara ndaw katay cey, aa guzlya da ray cek masa yah ma kata tabiya! Da ara Køriste, ndaw masa Gazlavay ma wala nga løhdata ndøhay heyey kwa!»

³⁰ Ndøhay a, a bamawa daa berney a, ta', a diyam ηgada fa Yesu a.

³¹ Masa ηgwas aha ta vøhey sem a slala heyey na, gula hay nga Yesu aa guzmar a Yesu a, a løvmar: «Bay ala, zømey cek døba.»

³² Yesu a mbøfdatara, a løvtar: «Cek adaw mezømey daha masa akwar ma sømara ba.»

³³ Gula annga hay aa cøfdam vaw da wuzlah ata, a løvam: «Haya! Ndaw mekele ta handar cek nga zømey la daw?»

³⁴ Yesu a mbøfdatara saya, a løvtar: «Cek adaw mezømey na, ara mekey cek ma mbafar a ndaw ma slørdiwa, asaya, ara nga ndøvda sløra masa aa ma vøldiwa nga key.

³⁵ Ka wulkam, ka løvam: "Wure kede mendørey kiya møfad nga kawa cek da ley." Yah na, ya fa løvkwar, nøkam dey, cek da ley ta key cay, mendørey nga kawa.

³⁶ Ndaw ma karawa cek da ley a na, ta høtey mawurbay nga sløra annga cay. Da ray ηgene, ndaw ma sløka cek aha ta ndaw ma karawa cek aha da ley aa sømam daa slam a. Ara køne may, ηgada ndaw ma zølwa ndøhay nga høtey heter mendøvey ba.

³⁷ Mey a daha a løvey: "Ndaw a sløka daw, ama ma da karawa a way na, ndaw mekele." Mey a kede ara annga fara.

³⁸ Ya ta slørdakwar la nga kawa cek da ley masa akwar ma høvmara ba. Ma høvmara na, ndøhay mekele, ama ara akwar ma da zømam wiya da ray cek ata ha.»

³⁹ Ndøhay Samari hay ga da slala ha, a pamara Yesu nga ndaw ata fara fara maja ηgwas aha ma løvtar: «Ndaw aha aa guzlya da ray cek hay masa yah ma kata tabiya.»

⁴⁰ Maja ηgene, ata ma wusmawa fa Yesu heyey na, a kamar ambahw nga njeý ta ata. Yesu, ta', a njeý ta ata ðar cew, annga faa sørkadata.

41 Masa ata ma cəndamara mey anğa ha la na, ndəhay ga mekele saya a təbmara mey a.

42 Ta', aa guzmar a ηgwas a, a ləvmar: «Ya pamara ηga ndaw ala fara fara na, ara maja kah ma ləvndar heyey daada ba, ama maja ala ma cəndamara mey anğa ta sləmay ala. Wure keɖe, ya ta səmra cay, fara fara ara anğa ndaw ma da ləhdata ndəhay da bəla.»

Yesu a mbəlda bəzey ηga ndaw mahura ηga ηgwamna

43 Yesu ma key la ɖar cew da *Samarina, ta', a daw aa hwayak ηga *Galile* heyey dəba.

44 Yesu ta ray anğa taa guzley la, a ləvey: «*Ndaw ma təla mey ηga Gazlavay na, ndəhay daa hwayak anğa a rəsmara.»

45 Ama masa Yesu ma wusey la a Galile na, ndəhay fetede, a təbmara maaya maaya, maja ata ma hətmar maazla hay masa anğa ma kata la tabiya daa masa ata ma diyam aa gwagway ηga *Pak da *Jeruzelem.

46 Yesu ta', a daw a Kana saya, daa hwayak ηga Galile he, a slala masa aa ma tərda yam ηga wuzam heyey. Fetede, ndaw mahura ηga ηgwamna daha, bəzey anğa vaw fa car. Bəzey a, a lawa da Kapernayum.

47 Masa ndaw aha ma cənda Yesu ta sləkɖey sem da *Jude ηgada Galile na, anğa may, ta', a sləkɖey a daw fa Yesu a, a kar ambahw amba a diyam cew e, ηga mbəldərwa bəzey anğa da Kapernayum, maja bəzey anğa ha fa da məcey.

48 Yesu a ləvar: «Akwar siya hay, da ka ta hətam maazla hay ma rəzla ndaw daa ba na, anja akwar fa da təbmara mey aɖaw daa ba, ba diya?»

49 Ndaw mahura ηga ηgwamna heyey a mbəɖɖara, a ləvar: «Bay aɖaw, nakwa la fiyaw fiyaw maja bəzey aɖaw a fa bərzley.»

50 Yesu a mbəɖɖara, a ləvar: «Daw a way, bəzey akah a mbəley la.»

Ndaw aha, a təba mey ηga Yesu heyey, ta', a daw.

51 Masa anğa fa daw ηgada way na, ndəhay ma ka sləra anğa hay a cadamara ray daa cəved, a ləvmar: «Bəzey akah ta mbəley cay.»

52 Ndaw aha aa cəɖɖata, a ləvtar: «Bəzey a, a key ηgama ha na, dəga ηga vara?» A mbəɖɖamara, a ləvmar: «A kar ηgama, awaw fa vaw daa saba na, dəga ηgaa kwana ta bərey pal ηgaa pas.»

4:42 4.42 1Jn 4.14 * 4:43 4.43 Nezeret, slala masa Yesu ma gəley da hwad a na, aa da Galile. 4:44 4.44 Mt 13.57 4:46 4.46 2.1-11 4:46 4.46-53 Mt 8.5-13 4:48 4.48 Mk 13.22; 1Kwr 1.22

⁵³ Anda kedfe, ndaw aha, a sɛra bɛzey anɔa a key nɔama na, daa masa Yesu maa guzlar, ma lɛvar: «Bɛzey akah a mbɔley la» heyey. Da ray nɔgene, anɔa ta ndɔhay da way anɔa tabiya a pamara Yesu nɔa ndaw ata fara fara.

⁵⁴ Kedfe he, ara maazla nɔa dey cew e masa Yesu ma ka daa masa anɔa ma slɛkɔfey da Jude nɔgada Galile.

5

Yesu a mbɔlda ndaw maahɛlbakaya

¹ Fa dɔba ha, *Jɔwif hay a kam gwagway da *Jeruzelem. Yesu, ta', a daw aa gwagway a may.

² Daa berney nɔa Jeruzelem e, gweegwe ta mey-mbew mahura membɛzey aa berney a, mezɔley Slam-membɛzey nɔa tɔban hay, wurak nɔa yam daha. Wurak a na, a zɛlmara ta mey *Hebɔre «Betzata». Ray a mazlɛrkaya ta balak hay zlam.

³ Dasi balak hay a na, masa-bɔle hay ga manatakaya: wulaf hay daha, jegwer * hay daha, maahɛlbatakaya hay daha. [Ata manjatakaya fa sɛkwɛmara amba yam a wusey,

⁴ maja *maslan nɔa Bay Gazlavay fa pawa salay aa wurak aha, fa wusa yam a. Ndaw ma mbɛzey teesɛɔ aa yam ma wusey a na, a mbɔley kwa daa macay wura wura cɔpa.]

⁵ Fetede, ndaw daha anɔa maahɛlbakaya dɔga mevey kwakwar maakar a ray a daanɔafad.

⁶ Masa Yesu ma hɛtar ndaw aha manakaya na, a sɛra anɔa maahɛlbakaya menjey ga. Ta', aa cɔɔfa, a lɛvar: «Ka wudfey nɔa mbɔley daw?»

⁷ Ndaw aha a mbɔɔɔara, a lɛvar: «Bay aɔaw, masa yam fa wusey daa wurak na, kwa ndaw nɔa mbɔzɔaya aa yam a daa ba. Da ya lɔvey, ya daw may na, ndaw mekele ta mbɛzey sem teesɛɔ da ray aɔaw.»

⁸ Yesu aa guzlar, a lɛvar: «Slɛkɔfey, la gegɔɔɔɔɔ akah, daw ta salay akah.»

⁹ Wure wure nɔgene, ndaw aha ta mbɔley sem, ta', a la gegɔɔɔɔɔ anɔa, a daw.

Yesu a mbɔlda ndaw a na, ta pas memɛskey-vaw.

¹⁰ Masa mahura hay nɔa Jɔwif hay ma hɛtmar ndaw aha fa la gegɔɔɔɔɔ anɔa na, aa guzlar, a lɔvmar: «Tasana na, *pas memɛskey-vaw, ba diya? Kaa kwakwas alɛkwa a vɛlka cɔved nɔa la gegɔɔɔɔɔ akah gway daw?»

¹¹ A mbɔɔɔɔɔara, a lɔvtar: «Ndaw ma mbɔzɔaya na, a lɔvya “La gegɔɔɔɔɔ akah, daw ta salay akah.”»

12 Mahura hay nga Jëwif hay aa cëfdamara saya, a lëvmar: «Ara ndaw a wura, ma lëvka “la gegëded akah, daw” kefe na!»

13 Ama ndaw aha na, a sëra ndaw masa ma mbëlda ha saba, maja Yesu taa zëdfar sem da wuzlah ndëhay ga fetede.

14 Fa dëba ha, Yesu a cam ray ta ndaw aha daa *Way-mekey-kwakwas nga Gazlavay, ta', a lëvar: «Nëka, wure kefe, ka ta mbëley cay. Ka da key mebörey saba, daa ba na, banay mahura ma fëna kefe, a hëtfaka la.»

15 Ndaw aha ta', a daw fa mahura hay nga Jëwif hay heyey, a lëvtar: «Ara Yesu ma mbëldaya.»

16 Da ray ngene, a zëlar nga cekeley mey fa Yesu, maja aa ma mbëlda ndaw aha ta pas memëskëy-vaw.

17 Yesu ta', aa guzltar, a lëvtar: «Papay Bay Gazlavay fa key slëra mandaw mandaw, yah may, ya key slëra mandaw mandaw anda anga.»

18 Mahura hay nga Jëwif hay heyey a sëpam dabaray ta gëdanj ta gëdanj nga këdmara Yesu vagay maja aa maa guzltar a. Ma catar mevel na, mey da ray pas memëskëy-vaw daada saba, ama maja aa ma zëla Gazlavay Papaha. Ngene, a key a pa ray anga nga Gazlavay.

Mey da ray gëdanj masa Gazlavay ma vëldara a Yesu

19 Yesu aa guzltar a mahura hay nga *Jëwif hay ma cakalafamar mey heyey, a lëvtar: «Ya fa lëvkwara fara fara, yah Bëzey nga Gazlavay, ya gwa nga key cek taava adaw ba. Ya nëkey dey na, fa cek masa Papay ma ka, fa dëba ha, ya ka anda anga.

20 Fara fara, Papay na, a wudya, yah Bëzey anga, asaya, aa fa wuzdatiwa cek hay tabiya masa anga ray anga ma kata. A da wuzya cek hay ga ma rëzlam ndaw ma fëna masa akwar ma hëvmar kefe. Ka rëzlam la ga maja.

21 Yaw, Papay fa slëkdadatërwa ndëhay daa memëcey, fa vëltar heter. Yah, Bëzey anga may, ya da vëltar heter a ndëhay masa yah ma wudey nga vëldatara.

22 Yaw, ma da katar sariya a ndëhay na, ara Papay ba, ama ara yah, maja ta vëlya cëved la nga katar sariya a ndëhay,

23 amba ndëhay a namaya ray anda ata ma namar ray a Papay. Da ndaw a naya ray, yah, Bëzey anga ba na, fa da nar ray a Papay, ndaw ma slërdiwa daa ba may.

5:13 5.13 6.15; 11.54; 12.36; Mt 8.18; 13.36 5:14 5.14 Mt 9.2; Jak 5.16 5:15 9.11 5:18 5.18 mekëdey Yesu vagay: Mt 14.5; Janj 7.1, 25; 8.37, 40; 11.53; a zëla Gazlavay Papaha: 1.34; 3.3 5; 8.16-19; 10.17-18, 29-38; 14.8-11, 20, 28; 15.9-10; 16.27-28; 17.1-26 5:19 5.19 1.34 5:20 5.20 3.35 5:21 5.21 Rm 4.17; Ef 2.5; Janj 11.25 5:22 5.22 3.18; 5.27, 30; 9.39; 12.47-48; SNM 10.42; 1Jn 2.28 5:23 5.23 Fël 2.10-11

²⁴ «Ya fa ləvkwar fara fara, da ndaw fa jəkey sləmay fa mey adaw, asaya, da ndaw fa təba mey nga Papay, ndaw ma slərđiwa na, ndaw aha ta hətəy heter mendəvey ba cay. Sariya ngaa zəđda daa ba, ama ta sləkđawa sem daa meməcey.

²⁵ Ya fa ləvkwar fara fara, pas a, a sawa la, ta wuswa cay, masa ndəhay maməctakaya a da cəndamara đay adaw, yah, Bəzey nga Gazlavay. Ndəhay ma cəndamara, ma təbmara mey adaw na, a da njam ta dey.

²⁶ Papay aa ta gəđan nga vəley heter. Anda keđe, ta vəldiwa gəđan a la ngada yah, Bəzey anga may, amba ya vəltar heter a ndəhay.

²⁷ Asaya, ta vəlya cəved la nga katar sariya a ndəhay, maja yah, *Bəz nga Ndaw.

²⁸⁻²⁹ Pas a, a wuswa la masa ndəhay da vəged a da cəndamara đay adaw, asaya, a da bamawa daa cəvay ata hay. Ka da rəzlam fa cek hay a ngene ba. Anda keđe, ndəhay manjar mebərey na, a da sləkđamawa daa meməcey, a da hətam heter mendəvey ba, ama ndəhay ta mebərey na, yah, Bəzey nga Gazlavay, ya da katar sariya ngaa zəđdata.

³⁰ «Yah na, ya gwa nga key cek taava adaw ba, ama si ta gəđan nga Gazlavay. Da ya fa key sariya a ndaw na, ya ka anda Gazlavay ma ləvya. Sariya masa yah ma da ka na, aa fara fara, maja ya ka ta cəved e anda Gazlavay, ndaw ma slərđiwa, ma ləvya nga ka.»

Mey da ray ndəhay ma kam sede da ray Yesu

³¹ Yesu aa guzley saya, a ləvey: «Da ya key sede da ray adaw na, kaa wara ndəhay a da səmra mey masa yah maa guzlda, ara mey fara fara na, kwara?»

³² Ama ara ndaw mekele ma key sede da ray adaw. Ya səra, sede masa aa ma ka da ray adaw a na, aa fara fara.

³³ Akwar na, ka ta sləram ndəhay fa *Jan-Baptis la. Anga taa guzlkwar la da ray mey masa fara fara.

³⁴ Ama yah na, walay adaw ta ndaw amba a key sede da ray adaw na, daa ba. Yaa guzlkwar da ray Jan-Baptis na, ya wufey amba ka təbmara Gazlavay a ləhdakwar daa mebərey.

³⁵ Jan-Baptis a na, anga anda petərla magəđkaya nga wafə slam kwedek! kwedek! Pas pal daha akwar taa səmam la daa mewefey anga ha.

³⁶ Cek ma fəna mey masa Janj-Baptis maa guzley da ray adaw na, daha. Cek aha na, ara sləra masa Papay ma vəldiwa nğa key. Sləra masa yah ma ka ha na, fa wuzda fara fara ara Papay ma slərđiwa.

³⁷ Papay, ndaw ma slərđiwa may, anğa ray anğa taa guzley la da ray adaw, yah, Bəzey anğa. Ama akwar ma cəndamara dəy anğa daa ba, akwar ma hətmar ta dey akwar daa ba may.

³⁸ Akwar fa rəsmara mey anğa, maja akwar fa təbmara mey adaw, yah, Bəzey anğa masa anğa ma slərđiwa na, daa ba.

³⁹ «Akwar faa sərkam mey nğa Gazlavay maaya maaya amba ka hətam heter mēndəvey ba ta fa vəda. Ahaw, fara fara mey nğa Gazlavay a na, aa guzley da ray adaw.

⁴⁰ Ama nğa hətey heter mēndəvey ba ha na, ka wudam nğa samawa fa yah ba.

⁴¹ «Yah na, ya fa səpey amba ndəhay aa həmdamaya daa ba.

⁴² Ama akwar na, ya səra mewulkey akwar. Akwar fa wudmara Gazlavay daa ba.

⁴³ Yah na, ara Papay Bay Gazlavay ma slərđiwa, ka gəmam nğa təbmaya ba. Ama da ndaw mekele a sawa saw nğa ray anğa gway na, ka təbmara jak.

⁴⁴ Ka wudam amba ndəhay aa həmdamakwar. Ama ka wudam amba Gazlavay masa fara fara aa həmdakwar ba jak. Kaa wara ka da təbmara mey adaw na, kwara?

⁴⁵ «Ka wulkam ara yah ma da wudkwar fa mey nğa Gazlavay daw? Ara yah ba, ara *Mawiz ma da wudkwar, ndaw masa akwar ma wulkam a ləhdakwar la.

⁴⁶ Da fara fara akwar ta təbmara mey nğa Mawiz la na, ka təbmara mey adaw la may, maja Mawiz a, a wuzleley na, da ray adaw.

⁴⁷ Da ka təbmara mey nğa Mawiz ma wuzlala da ray adaw a ba na, kaa wara ka da təbmara mey adaw na, kwara?»

6

Yesu a vəltar cek mezəmey a ndəhay ma fəna gabal zlam (Matiye 14.13-21; Mark 6.30-44; Luk 9.10-17)

¹ Fa dəba ha, Yesu a sləkdəy, a zləngəy a dey lanğar nğa dəhwa nğa *Galile. A zəlmara dəhwa ha saya, dəhwa nğa Tiberiyat.

5:36 5.36 10.25, 38; 14.10-11; 15.24, 27 5:37 5.37 1.34; Mab 20.19; Mew 4.12
5:38 5.38 16.9 5:39 5.39 Lk 24.27, 44; SNM 13.27; 17.11; 2Tm 3.15-16; 1Pi
1.10-11 5:41 5.41 7.18 5:44 5.44 5.41 5:45 5.45 Mew 31.24-29 5:46
5.46 Mew 18.15, 18; Lk 24.27; Janj 6.14; SNM 3.22; 7.37 5:47 5.47 Lk 16.29-31

² Ndohay ga fa sɔpmar wurzay, maja ata ma hɔtam maazla hay masa Yesu ma kata nga mbɔley masa-macay hay.

³ Ata Yesu ta gula anɔa hay, ta', a tɔpam aa ray nga anɔwa, a njam fetede.

⁴ Daa ngene, gwagway nga *Jɔwif hay mezɔley *Pak gweegwe cay.

⁵ Yesu a banɔada dey na, a hɔtey ndohay ga fa samawa ngada fa vɔfa. Ta', aa cɔfda *Fɔlep, a lɔvar: «Ya da hɔdkakurwa cek mezɔmey ngada ndohay tabiya kede na, dama?»

⁶ Yesu aa guzlar anda ngene na, a key a jada Fɔlep maja anɔa na, ta sɔra cek masa aa ma da ka sem.

⁷ Fɔlep a mbɔddara, a lɔvar: «Kwa gabal temere cew * na, fa da wusa nga hɔdkawa cek mezɔmey amba kwa waawa a hɔtey nekɔdey nekɔdey na, daa ba.»

⁸ Gula mekele da wuzlah gula anɔa hay mezɔley *Andɔre, masa mɔlmanɔ nga *Simanɔw *Piyer, aa guzlar, a lɔvar:

⁹ «Bɔz-gula fede daha, anɔa ta peɔ † zlam leɔ ewet cew. Kaa ngada ndohay ga kede na, a da wusey wa?»

¹⁰ Yesu aa guzlar a gula anɔa hay, a lɔvtar: «Lɔvmatar a ndohay nga njam a hwayak.» Daa slam a ngene kwakwas mapɔckaya daha, ta', a njam fetede. Zel hay daa slam aha, a key gabal zlam.

¹¹ Yesu hal! a hɔlta peɔ hay a, a kar suse a Gazlavay, fa dɔba ha, a wunkatara a ndohay a. A hɔla ewet, a ka kɔne saya. A zɔmamara, a rɔham, siya mbak!

¹² Masa ata ma rɔham cay na, Yesu aa guzlar a gula anɔa hay, a lɔvtar: «Cakalamara siya masa mambɔkakaya, kwa kuset kede a da nɔsey nga tede ba.»

¹³ Gula hay nga Yesu a cakalamara siya nga peɔ zlam masa ata ma zɔmamara heyey na, a rɔhey gadakar kuraw a ray a cew.

¹⁴ Masa ndohay ma hɔtmar maazla masa Yesu ma ka na, aa guzlam, a lɔvam: «Fara fara, ndaw kede ara *ndaw ma tɔla mey nga Gazlavay masa ma lɔvam zleezle a da sawa a bɔla heyey.»

6:2 6.2 Mt 6.25; Jan 2.23 **6:3 6.3** anɔwa: Mt 5.1; 15.29; Mk 3.13; 6.46; Lk 22.39

6:4 6.4 2.13 * **6:7 6.7** gabal temere cew: Ta mey Gɔrek a lɔvey «deniye» temere cew. *Deniye* pal na, ara mawurbay nga slɔra nga ndaw fa mevɔrndeɔy.

6:8 6.8 Andɔre: 1.40; 12.22; Mt 4.18; Mk 13.3 † **6:9 6.9** peɔ: Peɔ kede na, a tamara ta hapa nga cek anda daw mezɔley «orge» ta mey Nasara. Ara daf ata masa ata ma zɔmamara mandaw mandaw. **6:11 6.11** 21.9, 13 **6:14 6.14** Mew 18.15, 18; Jan 1.21; 2.11; 5.46; 7.40; SNM 3.22-23

15 Ama Yesu a sɛra a da samawa nga pamara aa bay nga gɛdanj. Maja ngene, a mbɛkdata, a tɛpey ngada anjwa saya, a njeɣ taava anja fetede.

*Yesu a daw ta salay da ray dɛhwa nga Galile
(Matiye 14.22-33; Mark 6.45-52)*

16 Taa kwad a ngene, *gula hay nga Yesu a bɛrngamawa daa anjwa ngada mey dɛhwa.

17 Ta', a tɛpam aa kwambiwal, a diyam a Kapernayum a dey lanjgar nga dɛhwa ha. Tavad a kɛrzata daa masa ata fa tɛngam. Ama Yesu ta wusey a cakay ata daa ba aranj.

18 Memed fa key ga. Yam fa cewesley.

19 Masa gula hay nga Yesu a, fa diyam ta kwambiwal, a key kɛlemeeter zlam da daa ba maakwaw na, a hɛtmar Yesu gweegwe ta ata, fa daw ta salay da ray yam a. Da ray ngene, mandɛrzay a katar.

20 Ama Yesu aa guzltar, a lɛvtar: «Ara yah, ka da zluram ba!»

21 Da ray ngene, a wudam nga lamara aa kwambiwal a, ama wure wure ngene, kwambiwal a ta wusey sem a rav-zazay aa slam masa ata ma diyam aha.

Ndɛhay ga a sɛpmara Yesu

22 Pepɛrek e, ndɛhay ga ma lamawa ta dey lanjgar nga dɛhwa heyey, a nɛkmara na, ara kwambiwal pal daa slam aha daada. Asaya, a sɛpmara Yesu ta tɛpey aa kwambiwal a ta gula anja hay daa ba, ama ara gula anja hay taava ata ma tɛpam aa kwambiwal a nga tɛngɛy a dey lanjgar nga dɛhwa.

23 Ama fa dɛba ha, kwambiwal hay mekele a samawa da Tiberiyat, aa slam masa ndɛhay ga ma zɛmam peɣ masa Bay Mahura ma kar suse a Gazlavay maja heyey.

24 Yaw, ndɛhay ga heyey, a nɛkmara na, ata Yesu ta gula anja hay, ata fetede daa saba. Da ray ngene, a tɛpam kwambiwal hay ma samawa da Tiberiyat heyey, a diyam ngada Kapernayum, a sɛpmara Yesu.

Yesu, anja daf ma vɛley heter mendɛvey ba

25 Ndɛhay ga heyey a tɛngam ta kwambiwal hay a hɛtfamar Yesu aa ta dey lanjgar nga dɛhwa. Ta', aa cɛfdamara, a lɛvmar: «Bay ala, ka sawa fede kaa na, kwara? Ka wuswa nga vara?»

26 Yesu a mbɛfdatara, a lɛvtar: «Ya fa lɛvkwara fara fara, ka sɛpmaya na, maja akwar ma hɛtam maazla masa yah ma ka ba. Ama ka sɛpmaya na, maja akwar ma zɛmam cek haa ka rɛham.

²⁷ Ka da sɔpam ŋga hɔtey daf ma da nɔsey da bɛla keɔe ba. Ama sɔpam ŋga hɔtey daf mevɔley heter mendɔvey ba. Daf mevɔley heter mendɔvey ba ha na, ara yah, *Bɛz ŋga Ndaw ma da vɛldakwara, maja Papay, Bay Gazlavay, ta wuzda la ara ŋga ma vɛldiwa gɔdan a.»

²⁸ Ndɔhay a, aa cɔɔdamara Yesu saya, a lɔvmar: «Bay ala, kaa ya da kam slɛra ma mbafar a Gazlavay na, wura?»

²⁹ Yesu a mbɔɔɔdatara, a lɔvtar: «Slɛra ma mbafar a Gazlavay na, ara mepey ndaw masa ŋga ma slɛrdɛrwa ŋga ndaw ŋga fara fara.»

³⁰ Aa guzlmara a Yesu, a lɔvmar: «Kandar maazla masa ala ma da hɔtmar ta dey ala, amba ya sɛrmara ara Gazlavay ma slɛrdakawa, asaya, ya pamaka ŋga ndaw ala fara fara. Kaa ka da kandar maazla ha na, wura?»

³¹ Zleezle, papaŋ ŋga papa alɛkwa hay ta zɔmam cek mezɔley “man” † la da wuzlah-ley. Mawuzlalakaya daa ɔerewel ŋga Gazlavay, a lɔvey: “Ta vɛltar cek mezɔmey la ma kwiywa ta da vad.”»

³² Yesu a mbɔɔɔdatara, a lɔvtar: «Ya fa lɔvkwara fara fara, ma vɛlkwara cek mezɔmey ma kwiywa ta da vad na, ara *Mawiz ba, ama ara Gazlavay Papay ma vɛlkwara cek mezɔmey masa fara fara ma kwiywa ta da vad.»

³³ Ahaw, cek mezɔmey masa Gazlavay ma vɛldakwara na, ara ndaw ma pawa salay ta da vad. Ara ŋga ma da vɛltar heter mendɔvey ba a ndɔhay da bɛla.»

³⁴ A mbɔɔɔdamara a Yesu dɛba, a lɔvmar: «Bay ala, na vɛlndar cek mezɔmey a ŋgene mandaw mandaw taw!»

³⁵ Yesu a mbɔɔɔdatara saya, a lɔvtar: «Yah na, daf mevɔley heter mendɔvey ba. Da ndaw ta sawa la asi adaw na, may fa da car daa saba, asaya, da ndaw ma paya la ŋga ndaw ŋga fara fara na, yam fa da kar daa saba may.»

³⁶ Ya taa guzlkwar la, ya lɔvkwara: “Akwar ma hɔtmaya la ta dey akwar, ama ka tɛbmara mey adaw ba cɛŋga.”

³⁷ Ndɔhay tabiya masa Papay ma vɛldatiwa na, a samawa la asi adaw. Ndaw ma sawa asi adaw na, ya fa da bɛla daa ba,

³⁸ maja ya pawa salay da vad na, ŋga key cek anda yah ma wuɔey ba, ama ŋga key cek anda Gazlavay, ndaw ma slɛrdiwa, ma wuɔey.

³⁹ Gazlavay, ndaw ma slɛrdiwa, a wuɔey ndɔhay masa aa ma vɛldatiwa na, yaa zɔɔfey kwa pal da wuzlah ata ba. Ama

6:27 6.27 6.35 **6:29 6.29** 2.23 † **6:31 6.31** “man”: Ara cek mezɔmey masa Gazlavay ma vɛldatara ŋgada ndɔhay Israyel hay daa masa ata da wuzlah-ley mevey kwakwar mɛfad. **6:31 6.31** Ps 78.24; Mab 16.4, 31; Jan 6.49 **6:33 6.33** 6.41, 51 **6:34 6.34** 4.15; Mt 6.11 **6:35 6.35** 4.13-14; 6.48-58; 7.37 **6:36 6.36** 16.9; 20.29 **6:37 6.37** 17.2, 24 **6:38 6.38** 4.34; Mt 26.39

ya da slækdadatərwa daa meməcey ta pas masa bəla ma da ndəvey.

⁴⁰ Cek ma mbafar a Papay na, anja ndəhay tabiya ma sərmaya, yah, Bəzey anğa, ta ma pamaya nğa ndaw ata fara fara na, nğa hətam heter mendəvey ba. Ya da slækdadatərwa daa meməcey ta pas masa bəla ma da ndəvey.»

⁴¹ Masa Yesu ma ləvey «Yah na, dəf ma pawa salay ta da vad» heyey na, *Jəwif hay aa nğuram mey da ray a,

⁴² a ləvam: «Anğa na, Yesu, bəzey nğa *Jawzef, ba diya? Aləkwa fa sərmatakwa ata papaha ta mamaha kaa gway na! Kaa aa guzley, a ləvey anğa dəf ma pawa salay ta da vad na, kwara?»

⁴³ Yesu a mbəddatara, a ləvtar: «Mbəkdamara meəngurey-mey.

⁴⁴ Kwa ndaw ma gwa nğa sawa asi adaw ta gədan anğa na, daa ba. Si Papay, ndaw ma slərđiwa, ma handərwa. Yaw, ya da slækdadərwa daa meməcey ta pas masa bəla ma da ndəvey.

⁴⁵ Ndəhay ma təla mey nğa Gazlavay ta wuzlalam la, a ləvam: “Ara Gazlavay ma daa sərkadata ndəhay tabiya.” Yaw, kwa waawa ma jəkey sləmay fa Papay, ma təba meəsərkedey anğa na, a sawa la asi adaw.

⁴⁶ Sərmara na, kwa ndaw pal ma hətər Papay daa ba, si yah, ndaw ma sawa ta fa anğa gway.

⁴⁷ Ya fa ləvkwar fara fara, ndaw ma paya nğa ndaw anğa fara fara la na, ta hətey heter mendəvey ba cay.

⁴⁸ Yah na, dəf mevəley heter mendəvey ba.

⁴⁹ Zleezle papən nğa papakw akwar hay ta zəmam cek mezəmey la da wuzlah-ley, ama ta nğene he cəpa ta məcam sem cənğa.

⁵⁰ Ama ndaw ma zəma dəf ma pawa salay ta da vad na, fa da məcey daa ba.

⁵¹ Yah na, dəf mevəley heter mendəvey ba ma pawa salay ta da vad. Da ndaw ma zəmey dəf a la na, a da njeý nğa sərmataw. Dəf masa yah ma da vəldakwara ha na, ara aslaw nğa vaw adaw. Ya vəlda amba ndəhay da bəla a hətam heter mendəvey ba.»

⁵² Jəwif hay a kam yawa ta gədan da ray mey a keđe, aa cəfdam vaw da wuzlah ata, a ləvam: «Ndaw aha keđe a da vəldandakwara aslaw nğa vaw anğa nğa zəmey na, kwara?»

⁵³ Da ray ηgene, Yesu aa guzltar, a ləvtar: «Ya fa ləvkwar fara fara, da akwar ma zəmam aslaw ηga vaw adaw daa ba, asaya, da akwar ma sam mambaz adaw, yah, Bəz ηga Ndaw, daa ba na, ηgene, akwar fa da hətam heter mendəvey ba daa ba.

⁵⁴ Ndaw masa fa zəmey aslaw ηga vaw adaw ta masa fa sey mambaz adaw na, ta hətey heter mendəvey ba cay. Yaw, ya da sləkfadərwa daa meməcey ta pas masa bəla ma da ndəvey.

⁵⁵ Maja aslaw ηga vaw adaw na, ara cek mezəmey masa fara fara, asaya, mambaz adaw na, ara cek mesey masa fara fara.

⁵⁶ Ndaw ma zəmey aslaw ηga vaw adaw ta ma sey mambaz adaw na, a da njeý macəmkaya ta yah, yah may, ya da njeý macəmkaya ta anɣa.

⁵⁷ Papay, ndaw ma slərđiwa, aa ta dey, ya njeý dasi har anɣa. Anda keđe, ndaw masa fa zəmey aslaw ηga vaw adaw na, a da njeý dasi har adaw may.

⁵⁸ Yah na, đaf ma pawa salay ta da vad. Đaf a ara anda cek mezəmey masa papay ηga papakw akwar hay ma zəmamara zleezle ba, maja ta zəmamara cek aha la, ta məcam sem cəɣa. Ama ndaw ma zəma đaf masa yah ma da vəldara keđe na, a da njeý ta dey ηga sərmataw.»

⁵⁹ Keđe he, ara meesərkedey ηga Yesu daa *way-mewuzey-mey ηga Gazlavay da Kapernayum.

Mey da ray heter mendəvey ba

⁶⁰ Masa ndəhay a ma cəndamara meý ηga Yesu la na, ndəhay ga da wuzlah ata masa ma diyam asiya heyey a ləvam: «Mey anɣa ha keđe na, aa ta banay ηga cəney. Ma da gwa ηga jəkfər sləmay na, wa?»

⁶¹ Ama Yesu ta səra sem ndəhay a faa ηguram meý da ray meý anɣa ha. Ta', aa guzltar, a ləvtar: «Mey adaw a keđe na, fa həbkwər ray daw?

⁶² Yaw, kaa da wara akwar ma da hətmaya, yah, *Bəz ηga Ndaw, fa təpeý aa slam masa yah ma pawa salay da hwad a na, ka da ləvam kwara?

⁶³ Ara *Mesəfney ηga Gazlavay ma vəltar heter a ndəhay. Ndaw-magədan taava anɣa na, a gwa ηga njeý ta gədan anɣa daada ba. Mey masa yah maa guzldakwara keđe na, a sawa ta fa Mesəfney ηga Gazlavay, a vəltar heter a ndəhay.

⁶⁴ Ama ndəhay siya da wuzlah akwar, a təbmara meý adaw a ba.»

Døga zleezle, Yesu a sërta ndøhay masa ma da tømbara mey anja ba, asaya, a sëra ndaw ma da vølda a har masa-gëra anja hay nga kødey vagay.

⁶⁵ Yesu aa guzltar saya, a løvtar: «Ara maja ngene, yah ma løvkwat kwa ndaw ma gwa nga sawa asi adaw ta gødan anja na, daa ba, si Papay ma vølar cøved nga sawa gway.»

⁶⁶ Døga anja maa guzley ngene na, ndøhay ga dasi ndøhay ma diyam asi Yesu a, a mbøkdamara, a diyam asiya saba.

⁶⁷ Yesu, ta', aa guzltar a gula anja hay kuraw a ray a cew, a løvtar: «Kaa akwar may, ka wudam nga diyam na, gway daw?»

⁶⁸ *Simanjw *Piyer a mbøfdara, a løvar: «Bay ala, ya diyam na, fa wa døba wa? Mey akah na, a vøley heter mendøvey ba a ndøhay, ba diya?»

⁶⁹ Wure kefe, ala ta sèrmara cay, ya tømbara, kah na, ndaw nga Gazlavay masa aa ma slørdørwa nga key sløra anja.»

⁷⁰ Yesu a mbøfdatara, a løvtar: «Ma walakwar, akwar kuraw a ray a cew kefe na, ara yah, ba diya? Ama ndaw pal da wuzlah akwar daha na, anja gula nga *Satanj, bay-malula.»

⁷¹ Yesu aa guzley na, da ray Juda, bøzey nga Simanjw Iskariyawt. Juda ha na, kwa anja da wuzlah gula anja hay kuraw a ray a cew heyey na, ara anja ma da vølda Yesu a har masa-gëra anja hay nga kødey vagay.

7

Mey da ray Yesu ta mølmaha hay

¹ Fa døba ha, Yesu a pøkey daa hwayak nga *Galile. A wudëy nga daw nga pøkey daa hwayak nga *Jude ba, maja mahura hay nga *Jøwif hay fetede fa sèpmara nga kødey vagay.

² Daa ngene *gwagway nga Way-mekørcëy * gweegwe cay.

³ Ta', mølmaha hay aa guzltar, a løvmar: «Sløkdëy la da Galile fede, daw aa hwayak nga Jude amba ndøhay ma sèpmaka a høtmar sløra masa kah ma ka ta dey ata.

⁴ Maja kwa waawa, da a wudëy ndøhay tabiya nga sèrmara na, a bëy cek masa aa ma ka fa dey nga ndøhay ba. Ka fa key maazla hay mekele mekele anda kefe, kata fa mey nga ndøhay tabiya amba a sèrmaka.»

6:64 6.64 13.11; 16.9 **6:67 6.67-69** Mt 16.15-20; Mk 1.24 **6:71 6.71** 12.4

7:1 7.1 5.18 * **7:2 7.2** gwagway nga Way-mekørcëy: Ara gwagway mahura nga Jøwif hay. A kamara ðar daanqafad da Jeruzelem, daa hwayak nga Jude.

7:2 7.2 Lev 23.33-34; Mew 16.13-15

⁵ Kwa məlman ɲga Yesu hay a ta ray ata na, fa pamara Yesu a ɲga ndaw ata fara fara daa ba.

⁶ Yesu a mbəɗɗatara, a ləvtar: «Pas masa maaya ɲgada yah na, ta wuswa daa ba aran, ama ɲgada akwar na, kwa pas wura wura na, anɲa maaya.

⁷ Akwar na, ndəhay da bəla fa da hətam cəved ɲga rəsmakwar daa ba, ama yah na, fa rəsmaya, maja ya fa wuzdatərwa cek hay malamba masa ata ma kamata.

⁸ Akwar na, diyam aa gwagway a. Yah na, ya fa da daw daa ba, maja pas adaw ta wuswa daa ba aran.»

⁹ Fa dəba ha masa Yesu maa guzley la anda keɗe na, ta', a njeɲ da Galile he cəɲga.

Yesu aa sərkaɗata ndəhay daa gwagway ɲga Way-mekeɗceɲ

¹⁰ Masa məlman ɲga Yesu hay ata sem la aa gwagway heyey na, Yesu ta', a daw aa gwagway a may, ama a səhwey ta səhwey, kwa ndaw ma hətər daa ba.

¹¹ Mahura hay ɲga *Jəwif hay a səpmara daa gwagway a, a ləvam: «Ndaw a heyey aa dama?»

¹² Ndəhay ga daa gwagway a faa səkam mey da ray Yesu a, siya hay a ləvam: «Ara ndaw maaya.» Ndəhay siya may, a ləvam: «Kay! Ara ndaw maaya ba, fa betey ndəhay.»

¹³ Kwa ndaw ta gwa ɲga guzley da ray Yesu fa mey ɲga ndəhay daa ba, maja a zluram ta mahura hay ɲga Jəwif hay.

¹⁴ Masa gwagway a heyey ta key cay ɗar məfaɗ na, Yesu ta', a daw aa *Way-mekey-kwakwas ɲga Gazlavay, aa sərkaɗata ndəhay.

¹⁵ Mahura hay ɲga Jəwif hay ma cəndamara mey ɲga Yesu a na, a rəzlam, a ləvam: «Haya! Ndaw a kaa meeme, taa sərkey ɲga sərey mey ɲga Gazlavay daa ba, ama a sərta mey hay a maaya maaya na, kwara?»

¹⁶ Yesu a mbəɗɗatara, a ləvtar: «Mey masa yah maa sərkaɗatara a ndəhay keɗe na, ara mey adaw ba, ama ara mey ɲga Gazlavay, ndaw ma slərɗiwa.

¹⁷ Mey masa yah maa sərkaɗatara a ndəhay, da ara mey ɲga Gazlavay, da daa ba, da ara mey adaw na, ndaw ma wufey ɲga key cek ma mbafar a Gazlavay na, a səra la.

¹⁸ Ndaw maa sərkaɗata ndəhay ta gəɗan anɲa gway na, a key ɲgene, a səpey amba ndəhay aa həmdamara. Ama ndaw maa sərkaɗata ndəhay amba ndəhay aa həmdamara

ndaw ma slərdərwa na, ŋgene ara ndaw maaya ma mbərzley ba.

¹⁹ Zleezle *Mawiz ta wuzkwar kwakwas hay la ŋga səpey, ba diya? Ama kwa ndaw pal da wuzlah akwar ta səpa kwakwas a ta cəved e daa ba. Kaa ka səpmaya ŋga kədey vagay na, maja me?»

²⁰ Ndəhay a mbəɸdamara, a ləvmar: «Kah na, ta malula da ray. Ma wudey ŋga kəɸka vagay na, wa?»

²¹ Yesu a mbəɸdatara, a ləvtar: «Pas pal daha, ya ta mbəley ndaw la ta *pas meməskey-vaw. Akwar ta rəzlam la ga maja.

²² Wulkam cey, Mawiz ta wuzkwar kwakwas la ŋga *mesley mandawal. Kwakwas ŋga mesley mandawal a, a zley na, fa Mawiz ba, ama dəga fa papan ŋga papakw akwar hay zleezle. Kwa ta pas meməskey-vaw na, akwar fa slam mandawal ŋga bəza hay.

²³ Akwar fa slam mandawal ŋga bəzey kwa ta pas meməskey-vaw amba kwakwas ŋga Mawiz a zləbey ba. Kaa ka cam mevel a ray adaw maja yah ma mbəley ndaw ta pas meməskey-vaw na, kwara?

²⁴ Ka da wulkam da ray ndaw, ka ləvam anŋa maaya, da daa ba, anŋa maaya ba maja akwar ma hətmar ta dey gway na, kəne ba. Ama wulkam maaya maaya da ray cek masa ndaw aha ma ka amba kaa guzlam fara fara ta cəved e.»

Mey da ray ndəhay maa guzlam da ray Kəriste

²⁵ Ndəhay siya da *Jeruzelem aa guzlam da wuzlah ata, a ləvam: «Kede na, ara ndaw masa ata ma səpmara ŋga kədey vagay heyey, ba diya?

²⁶ Nəkmara, anŋa faa guzley fa mey ŋga ndəhay. Kaa aa guzlmara saba kwara? Mahura aləkwa hay ta səpmara la fara fara ara *Kəriste, *ndaw masa Gazlavay ma wala ŋga ləhdata ndəhay heyey fara daw?

²⁷ Yaw, Kəriste ma da sawa na, ya sərkwa slam masa anŋa ma sawa da hwaɸ a ba. Ama ndaw kede na, ya sərkwa slam masa anŋa ma sawa, ba diya?»

²⁸ Daa masa Yesu faa sərkadata ndəhay daa *Way-mekey-kwakwas ŋga Gazlavay na, aa guzley ta gədan, a ləvey: «Akwar na, ka səpmaya fara daw? Asaya, ka səpmara slam masa yah ma sawa da hwaɸ a fara fara daw? Ya sawa na, ŋga ray adaw ba, ama ara ndaw ma slərđiwa. Ndaw a, aa maaya fara fara. Akwar na, ka səpmara ndaw aha ba.

29 Yah na, ya sɛra ndaw aha, maja ya sawa da cakay a, asaya, ara anɔa ma slɛrdiwa.»

30 A sɛpam cɛved amba a kɛrzamara Yesu, ama kwa ndaw pal ta pafar har daa ba, maja pas anɔa ta wuswa daa ba aran.

31 Ta nɔgene he cɛpa, ndɛhay ga fa tɛbmara mey anɔa cɛnɔa. Aa guzlam, a lɛvam: «*Ndaw masa Gazlavay ma wala nɔa lɛhdata ndɛhay ma da sawa na, a key maazla hay ma fɛna nɔa ndaw keɛe la daw?»

Yesu a lɛvey ndɛhay fa da hɛtmar daa saba na, maja me?

32 Mey masa ndɛhay maa sɛkdamara da ray Yesu heyey na, *Fariza hay ta cɛndamara sem. Da ray nɔgene, Fariza hay a, ta *bay-ray hay nɔa ndɛhay ma ka kwakwas nɔa Gazlavay, a slɛram ndɛhay ma jɛɛa *Way-mekey-kwakwas nɔa Gazlavay nɔa kɛrzamɛrwa Yesu.

33 Yesu ta', aa guzley, a lɛvey: «Ya da njey da cakay akwar da bɛla keɛe na, nekɛɛey gway. Fa dɛba ha, ya da daw a cakay ndaw ma slɛrdiwa.

34 Ka sɛpmaya la, ama akwar fa da hɛtmaya daa saba, maja ka gwamara nɔa diyam aa slam masa yah ma da daw a hwad a ba.»

35 Mahura hay nɔa *Jɛwif hay aa cɛɛɛam vaw da wuzlah ata, a lɛvam: «A da daw na, ta', ama may ama, amba ya hɛtkwar saba na! A da daw fa ndɛhay alɛkwa hay Jɛwif hay ma njam da wuzlah Gɛrek hay daw? A daa sɛrkadatɛrwa Gɛrek hay daw?

36 Aa guzley, a lɛvey: “Ka sɛpmaya la, ama akwar fa da hɛtmaya daa saba, maja ka gwamara nɔa diyam aa slam masa yah ma da daw a hwad a ba.” Mey a keɛe na, a wudɛy nɔa lɛvey me?»

Mey da ray yam ma vɛley heter mɛndɛvey ba

37 Dar nɔa madagway-dakw nɔa *gwagway nɔa Way-mekɛrɛy na, ara dar mahura ma fɛnta dar hay siya nɔa gwagway a. Ta pas nɔgene, Yesu a lecey ta lecey fa mey nɔa ndɛhay, aa guzley ta gɛɛan, a lɛvey: «Da ndaw yam fa kar na, nɔa sawa fa yah nɔa sey.

38 Yaw, mawuzlalakaya daa ɛɛɛwɛl nɔa Gazlavay, a lɛvey: “Ndaw ma paya nɔa ndaw anɔa fara fara la na, yam ma vɛley heter mɛndɛvey ba fa vavawa daa mevel anɔa.”»

39 Yesu maa guzley anda keɛe na, da ray *Mesɛfney nɔa Gazlavay. Ndɛhay masa ma pamara Yesu nɔa ndaw ata fara fara na, a hɛtam Mesɛfney aha la. Daa nɔgene, Yesu

ta völdərwa Mesəfney a, a bəla daa ba aranj, maja Yesu ta təpey a vad n̄ga n̄jey aa slam an̄ga mewedeŷ daa ba aranj.

Ndəhay a wudkam dəy da wuzlah ata maja Yesu

40 Masa ndəhay ma cəndamara mey n̄ga Yesu la na, ndəhay siya da wuzlah ata aa guzlam, a ləvam: «Fara fara, ndaw keđe ara *ndaw ma təla mey n̄ga Gazlavay ma da sawa heyey.»

41 Ndəhay siya a ləvam: «Ara *Kəriste, *ndaw masa Gazlavay ma wala n̄ga ləhdata ndəhay.» Mekele hay saya a ləvam: «Kəriste he a da sawa na, daa hwayak n̄ga *Galile daw?»

42 Mawuzlalakaya daa dərewel n̄ga Gazlavay a ləvey: «Kəriste, ndaw masa Gazlavay ma wala na, a da bawa daa səkway n̄ga Bay *Davit, a da yawa da Betəlehem, slala masa Bay Davit e ma yawa zleezle da hwaď a.»

43 Anda keđe, ndəhay a, a wudkam dəy da wuzlah ata maja Yesu.

44 Ndəhay siya da wuzlah ata a wudkam n̄ga kərzamara Yesu, ama kwa ndaw pal ta pafar har daa ba.

Mahura hay n̄ga Jəwif hay a təbmara mey n̄ga Yesu ba

45 Masa ndəhay ma jəďa *Way-mekey-kwakwas n̄ga Gazlavay ma vəhmawa la na, *bay-ray hay n̄ga ndəhay ma ka kwakwas n̄ga Gazlavay ta *Fariza hay aa cəďdamata, a ləvmatar: «Akwar ma kərzamərwa daa saba maja me?»

46 Ndəhay ma jəďa Way-mekey-kwakwas heyey a mbəďdamatara, a ləvmatar: «Īga menjey ala, ya ta hətam ndaw maa guzley maaya anda an̄ga daa ba.»

47 Fariza hay aa guzlmatar saya, a ləvmatar: «Yaw, akwar may ta fəckwar sem aa cəved an̄ga n̄gene may daw?»

48 Ala Fariza hay na, ala fa təbmara mey n̄ga ndaw aha daa ba. Kwa ndaw mahura n̄ga *Jəwif hay pal fa təba mey n̄ga ndaw aha daa ba may.

49 Ndəhay ma təbmara mey an̄ga n̄gene na, ara ndəhay ma səmra *kwakwas n̄ga Mawiz ba, ara ndəhay masa Gazlavay ta nəsta sem.»

50 Nikwedem, masa ma daw fa Yesu zleezle heyey na, an̄ga da wuzlah Fariza hay a. Ta', a mbəďdatara, a ləvtar:

51 «Kwakwas aləkwa a vəley cəved n̄ga kərzey ndaw anda keđe ba. Si ya jəkfakwar sləmay, ya sərkwa cek masa aa ma ka la dəgay.»

52 Fariza hay siya a mbəďdamara, a ləvmar: «Kah may, kah ndaw *Galile daw? Jan̄ga dərewel n̄ga Gazlavay amba

ka sɛra kwa *ndaw ma tɛla mey nga Gazlavay pal masa ndaw Galile na, daa ba.»

Mey da ray ngwas daha ma ley vaw saw da palah

¹₅₃ Fa dɛba ha, aa wadɛm ray, kwa waawa a daw a way anɟa.

8

¹ Masa *Fariza hay maa wadɛm ray cay na, ta', Yesu a daw aa Anɟwa nga *Awliviye.

² Pepɛrek e, slam bɛɲ-bɛɲ na, ta', a vɛhwa aa *Way-mekey-kwakwas nga Gazlavay. Ndɛhay ga a ngɛcham a cakay a, ta', a njeɣ, aa sɛrkadata.

³ *Ndɛhay maa sɛrkada kwakwas nga Mawiz ta Fariza hay a handamawa ngwas daha fa mey nga Yesu a. Ngwas aha a kɛrzamɛrwa fa ley vaw saw da palah. Deɲ! a lacadamara ngwas aha a wuzlah ndɛhay tabiya,

⁴ aa guzɛmar a Yesu, a lɛvmar: «Bay ala, ehe, ngwas kedɛ, ya kɛrzamɛrwa fa ley vaw saw da palah.

⁵ Kwakwas nga Mawiz a lɛvey kwa ngwas wura wura ma ley vaw saw da palah anda kedɛ na, si meezekey anɟa ta anɟwa vagay. Kaa kah na, ka wulkey kwara?»

⁶ Aa guzɛmar a Yesu anda kedɛ na, a wudɛm a ngamar gadanɟ amba a hɛtam dabaray nga dadɛdfamar mey. Ama Yesu ta', aa cɛdkwey, a tɛhwey cek ta har fa hwiɣak.

⁷ Ndɛhay kaa heyey na, faa guzɛmar cɛɲga, faa guzɛmar cɛɲga. Ta', Yesu a, a lecey, aa guzɛtar, a lɛvtar: «Da ndaw pal dasi akwar ngene manɟar meberɛy daha na, nga ley anɟwa ha nga hazaka teesɛd cey.»

⁸ Fa dɛba ha, Yesu ta', aa cɛdkwey saya, a tɛhwey cek fa hwiɣak saya.

⁹ Masa ndɛhay ma handamɛrwa ngwas heyey ma cɛndamara Yesu maa guzɛley anda kedɛ la na, a sɛhwam pal pal, ndɛhay mahura hay teesɛd, mɛndɛrey Yesu taava anɟa, ngwas a malacakaya fa mey anɟa.

¹⁰ Yesu ta', a lecey, aa guzɛlar a ngwas a, a lɛvar: «Kwakwa, ndɛhay ma handamakawa heyey na, ata ama dɛba ama? Ndaw pal da wuzlah ata ta hazakaka la daw?»

¹¹ Ngwas aha a mbɛddara, a lɛvar: «Daa ba, bay adaw.» Yesu a lɛvar: «Yah may, ya fa da hazakaka daa ba. Daw, ama dɛga tasana ka da key meberɛy saba.»]

Yesu aa guzɛley da ray ray anɟa

¹² Yesu aa guzltar a ndəhay makustakaya daa Way-mekey-kwakwas heyey saya, a ləvtar: «Ma wadfa slam da bəla na, ara Yah. Ndaw ma səpya na, fa da pəkey daa ləvan daa saba, ama a da njeý daa slam-mewedey masa ma vəley heter mendəvey ba.»

¹³ *Fariza hay aa guzlmār, a ləvmār: «Ka faa guzley da ray akah ta mey akah. Maja ŋgene, mey masa kah maa guzlda ha na, ara mey fara fara ba.»

¹⁴ Yesu a mbəddatara, a ləvtar: «Kwa ya faa guzley da ray adaw ta mey adaw na, ama mey masa yah maa guzlda ha, ara mey fara fara. Ara mey fara fara na, maja ya sərə slam masa yah ma sawa da hwaɗ a, asaya, ya sərə slam masa yah ma da daw a hwaɗ a may. Ama akwar na, ka səmra slam masa yah ma sawa da hwaɗ a ba, ka səmra slam masa yah ma da daw a hwaɗ a ba may.

¹⁵ Akwar na, ka wulkam da ray ndaw, ka ləvam ndaw keɗe anɗa maaya, da daa ba, anɗa maaya ba, maja akwar ma hətmār ta dey daada gway. Mewulkey akwar ŋgene, ara mewulkey ŋga ndaw-magədan. Ama yah na, yaa guzley da ray ndaw ba.

¹⁶ Yaw, da ya taa guzley la da ray ndaw na, a key ŋgene, yaa guzley fara fara, maja ara yah taava adaw maa guzley da ray ndaw aha ba, ama ala ta Papay, ndaw ma slərɗiwa.

¹⁷ Mawuzlalakaya daa kwakwas akwar, a ləvey, da ndəhay cew taa guzlam la letək da ray cek na, ara mey fara fara, ba diya?

¹⁸ Yah na, ya faa guzley da ray adaw ta mey adaw. Papay, ndaw ma slərɗiwa faa guzley da ray adaw may.»

¹⁹ Fariza hay aa cəɗdamara, a ləvmār: «Papakw a na, aa dama?» Yesu a mbəddatara, a ləvtar: «Akwar na, ka səmra ba, ka səmra Papay ba may. Da ka səmra na, anja ka səmra Papay la may.»

²⁰ Yesu aa guzlda mey a keɗe na, anɗa manjakaya gweegwe ta slam mecekeley dala daa *Way-mekey-kwakwas ŋga Gazlavay. Aa faa sərkadata ndəhay daa Way a, ama kwa ta kəzamara daa ba, maja pas anɗa ta wuswa daa ba aran.

Yesu a patar lenɗesl ŋgada ndəhay ma təbmara mey anɗa ba

²¹ Yesu aa guzltar saya, a ləvtar: «Yah na, ya da daw. Fa dəba ha, ka səmra la, ama akwar fa da hətmaya daa saba.

8:12 8.12 1.5, 9-10; 3.19; 9.4-5; 11.9-10; 12.35-36, 46; Iz 49.6; Mt 5.14; Lk 2.32; 2Kwr 4.4, 6; Ef 5.8-14; 1Jn 1.5-7; 2.8; 3.14 **8:13 8.13** 5.31-32 **8:14 8.14** 3.2; 7.28-29, 33-36; 8.21-22, 42; 13.1, 33; 16.5, 10, 28; 17.8; 20.17 **8:15 8.15** 7.24 **8:17 8.17** Mew 19.15 **8:18 8.18** 5.36; 1Jn 5.9 **8:19 8.19** 5.18; 16.3 **8:20 8.20** 2.4

Anda keċċe, ka da mēcam ta mebörey da ray. Aa slam masa yah ma da daw na, akwar fa da gwamara nga diyam a hwaċ a daa ba.»

²² Mahura hay nga *Jēwif hay aa guzlam da wuzlah ata, a lēvam: «Ndaw aha aa guzley, a lēvey, aa slam masa anġa ma da daw na, ya gwakwa nga nakwa ba. A lēvey anda keċċe na, a da kēda ray anġa vagay kwa!»

²³ Yesu a mbēċċatara, a lēvtar: «Akwar na, ndēhay da ray hwayak keċċe. Ama yah na, ya sawa da gazlavay da vad. Akwar na, ndēhay nga bēla keċċe, ama yah na, ndaw nga bēla keċċe ba.

²⁴ Maja nġene, ya ta lēvkwar la: “Ka da mēcam ta mebörey da ray.” Da ka tēbmara “Yah na, ara Yah” * ba na, fara fara, ka da mēcam ta mebörey da ray.»

²⁵ Aa cēċdamara Yesu, a lēvmar: «Kah na, wa?» Yesu a mbēċċatara, a lēvtar: «Yah na, ndaw masa yah ma wuzdakwara dēga zleezle heyey.

²⁶ Mey hay ga da ray akwar daha amba yaa guzley da ray a. Anda keċċe, ya da mbēċkwar ray maja mebörey akwar. Fara fara, mey masa yah ma kada a ndēhay na, ara mey masa yah ma cēndērwa fa ndaw ma slērdiwa. Anġa na, ndaw maa guzley mey fara fara.»

²⁷ Yesu maa guzley anda keċċe na, da ray Papaha, Bay Gazlavay. Ama ndēhay a, a cēndamara ba.

²⁸ Maja nġene, Yesu aa guzltar saya, a lēvtar: «Da masa akwar ma banġadāmaya, yah, *Bēz nga Ndaw cay fa hwadam mazlanġalakaya na, daa nġene, ka sērmara la “Yah na, ara Yah.” Asaya, ka sērmara la, yah na, ya gwa nga key cek taava aċaw ba, ama ya kedey na, mey masa Papay maa sērkadiwa.

²⁹ Ndaw ma slērdiwa na, anġa ta yah, ta mbēkċdaya taava aċaw daa ba. Ya fa key cek mandaw mandaw ma mbafar.»

³⁰ Masa Yesu maa guzley la anda nġene na, ndēhay ga a tēbmara mey anġa.

Beke hay na, wa hay wa?

³¹ Yesu aa guzltar nġada *Jēwif hay masa ma tēbmara mey anġa dēba, a lēvtar: «Da akwar ta tēbmara mey aċaw la, ka mbēkċdamara ba na, nġene akwar gula aċaw hay fara fara.

³² Anda keċċe, ka sērmara mey masa fara fara la, mey a, a da pēskakurwa daa beke.»

8:21 8.21 8.14 **8:23 8.23** 3.31 * **8:24 8.24** Yah na, ara Yah: Gazlavay a wuzar vaw a Mawiz, a lēvar: «Mezēley aċaw na, “Yah na, ara Yah”» Nēka Mab 3.14, asaya, nēka Iz 43.10. **8:24 8.24** 13.19 **8:28 8.28** 3.14; 4.34; 5.18 **8:30 8.30** 2.23 **8:31 8.31** 14.15; 15.8

³³ A mbøfdamara, a løvmar: «Ala na, ndøhay daa sækway nga *Abøraham, kwa ndaw pal dasi ala masa beke na, daa ba sèlak! Kaa ka løvndar mey a, a da pèskandar daa beke na, kwara?»

³⁴ Yesu a mbøfdatara, a løvtar: «Ya fa løvkwar fara fara, kwa waawa ma key mebørey na, anja beke maja mebørey fa wa.

³⁵ Nøka, beke na, a sløfmara a wuzlah ndøhay masa da way bay anja ba, ama bøzey nga ndaw nga way a na, a sløfmara a wuzlah ndøhay da way a.

³⁶ Anda kefe, da ara yah, Bøzey nga Gazlavay, ma pèskakwar daa beke na, ka da njam akwar beke hay saba fara fara.

³⁷ Ahaw, ya sèra akwar na, ndøhay daa sækway nga Abøraham. Ama akwar fa sèpmaya nga køfey vagay, maja mey adaw ta mbøzkwar aa mevel daa ba.

³⁸ Yah na, ya kedey mey masa Papay ma wuzdiwa. Akwar na, ka kam cek masa papakw akwar ma kadakwara.»

³⁹ A mbøfdamara saya, a løvmar: «Ala na, ndøhay daa sækway nga Abøraham.» Yesu a løvtar: «Da akwar ndøhay daa sækway nga Abøraham na, anja ka kam cek anda anja ma ka la.

⁴⁰ Ama wure kefe, akwar fa sèpmaya nga køfey vagay, yah, ndaw masa ma wuzdakwara mey masa yah ma cøndørwa ta slømay adaw fa Gazlavay. Ya fa løvkwar, Abøraham na, ta key cek anda akwar ma kamara kaa na, daa ba.

⁴¹ Akwar na, akwar fa kam cek anda papakw akwar ma ka.»

A mbøfdamara a Yesu, a løvmar: «Ala na, bøza hay nga ndaw mekele ba, Papa ala na, pal, ara Bay Gazlavay.»

⁴² Yesu a mbøfdatara, a løvtar: «Da Gazlavay ara Papakw akwar na, anja ka wudmaya la, maja ya sawa da cakay a, asaya, yah fefe maja anja. Ya sawa na, nga ray adaw ba, ama ara anja ma slørdiwa.

⁴³ Kaa ka cøndamara mey adaw ba na, maja me? Ara maja akwar ma gømam nga jøkam slømay fa mey adaw ba.

⁴⁴ Anda kefe, papakw akwar na, *Satanj, bay-malula. Ka kam cek hay cøpa na, masa ma mbafar a papakw akwar a gway. Døga daa mezley nga bøla na, papakw akwar, bay-malula ha, fa køfta ndøhay vagay. Asaya, a njej daa cøved masa fara fara ba sèlak, maja mey masa fara fara fa bawa da mey anja daa ba. Membørzley na, aa da mey anja, maja

ara ndaw membərzley. Membərzley tabiya na, a sawa ta fa vəda.

⁴⁵ Yah na, ya faa guzlkwar mey masa fara fara. Da ray ηgene, ka təbmara mey adaw ba cəŋga.

⁴⁶ Ndaw pal da wuzlah akwar ma gwa ηga ləvya ya ta key mebərey la na, wa? Kaa da ya faa guzlkwar mey masa fara fara na, ka təbmara ba, maja me?

⁴⁷ Ndaw ma ləvey Gazlavay ara Papaha na, a jəkfar sləmay fa Gazlavay a. Ama akwar na, bəza hay ηga Gazlavay ba. Ara maja ηgene, akwar ma jəkam sləmay fa mey aŋga ba may.»

Yesu a fəna Abəraham na, kwara?

⁴⁸ *Jəwif hay a mbəddamara a Yesu, a ləvmar: «Ala maa guzmaka, ya ləvam kah, ndaw *Samari ηga tede, kah ta malula da ray heyey na, ara aŋga fara.»

⁴⁹ Yesu a mbəddatara, a ləvtar: «Kay, malula da ray adaw daa ba, ama a key ya həslar ray a Papay. Akwar na, ka gəmam ηga həslmaya ray ba.

⁵⁰ Kaazla yah ta ray adaw, ya fa wudfey ndaw ηga həslya ray daa ba, ama ndaw pal daha, a həslya ray la, ara aŋga ma da dəsla mey a.

⁵¹ Ya fa ləvkwar fara fara, ndaw ma cənya mey na, fa da məcey daa ba ηga sərmataw.»

⁵² Jəwif hay heyey a mbəddamara, a ləvmar: «Wure kefe, ya ta sərmara cay, kah na, ta malula da ray fara, maja *Abəraham ta məcey sem, ndəhay ma təla mey ηga Gazlavay ta məcam sem may. Kaa kah na, ka ləvey: “Ndaw ma cənya mey na, fa da məcey daa ba ηga sərmataw” na, kwara?

⁵³ Abəraham, papan ηga papa ala hay ma!, ta məcey sem. Kaa kah na, ka fəna Abəraham a daw? Asaya, ndəhay ma təla mey ηga Gazlavay may ta məcam sem. Kaa ka pa ray akah na, ηga wa may wa?»

⁵⁴ Yesu a mbəddatara, a ləvtar: «Da ya fa həsley ray na, mehəsley-ray adaw a, ara cek ηga tede. Ma həslya ray na, ara Papay, ndaw masa akwar ma ləvam: “Ara Gazlavay ala” heyey.

⁵⁵ Ama ka sərmara ndaw a ba, si yah pal ma səra. Da ya ləvey ya səra ba na, ηgene yah, ndaw membərzley anda akwar. Ama yah na, ya səra ndaw aha, asaya, ya fa jəkfar sləmay, ya fa təba mey aŋga.

⁵⁶ Abərahām, papaŋ ŋga papakw akwar, taa səmey la ga maja a wulkey a hətər masawa adaw la a bəla. Ahaw, ta hətər la, taa səmey la maja.»

⁵⁷ Da ray ŋgene, Jəwif hay aa guzmar, a ləvmar: «Mevey akah a wusa kwakwar zlam ba kaa gway na, ka hətərwa Abərahām a na, dama?»

⁵⁸ Yesu a mbədfatara, a ləvtar: «Ya fa ləvkwar fara fara, dəga Abərahām ta yawa daa ba aran na, “Yah na, ara Yah.”»

⁵⁹ Da ray ŋgene, mahura hay ŋga Jəwif hay aa kwalam aŋgwa ŋгаа zekey Yesu a vagay. Ama Yesu ta', a dəy, a bawa la daa *Way-mekey-kwakwas ŋga Gazlavay.

9

Yesu a wurey dey ŋga ndaw-wulaf

¹ Pas pal daha, Yesu fa pəkey daa berney ŋga *Jeruzelem. Fetede, a hətəy ndaw daha. Ndaw aha, aŋga wulaf dəga ŋga mayawa aŋga.

² Gula hay ŋga Yesu aa cəfdamara Yesu a, a ləvmar: «Bay ala, ndaw keđe a yawa, aŋga wulaf na, maja me? Ara maja mebərey aŋga daw? Da daa ba, maja mebərey ŋga ata papaha ta mamaha daw?»

³ Yesu a mbədfatara, a ləvtar: «Ara maja mebərey aŋga ba, asaya, ara maja mebərey ŋga ata papaha ta mamaha ba may. Ndaw aha, aŋga wulaf na, ara amba Gazlavay a ka sləra aŋga da ray a.

⁴ Pas, aa daha dāgay kaa na, maaya na, ya kakwa sləra ŋga ndaw ma slərđiwa, ba na, ya da hətəkwa har saba, maja tavad fa da key, kwa ndaw fa da gwa ŋga ka sləra ha daa saba.

⁵ Daa masa yah da bəla keđe na, ara yah ma wadā bəla ha.»

⁶ Fa dəba ha, aŋga maa guzley la anda keđe na, tef! a təfey meesleb a hwayak, ta', a dəy hahay ta meesleb e, a kwarara fa dey ŋga ndaw-wulaf heyey,

⁷ a ləvar: «Daw ta pərarawa dey daa wurak ŋga yam ŋga Siləwe.» (Siləwe he a wudey ŋga ləvey «ndaw-meslərey.») Ta', ndaw-wulaf heyey a daw a pərarawa dey daa wurak a, a vəhwa na, a hətər dey dəba.

⁸ Meseembew aŋga hay ta ndəhay ma hətmar maaman-daw fa rəkey heyey na, a hətmar aŋga fa hətər dey dəba, a ləvam: «Kede na, ara ndaw ma rəkey maamandaw fedə heyey, ba diya?»

⁹ Ndəhay siya a ləvam: «Ahaw, ara anğa.» Siya hay may a ləvam: «Ara anğa ba, ara ndaw ma lawa cəla.» Ndaw a, a ləvtar: «Ahaw, ara yah, ndaw-wulaf heyey.»

¹⁰ Ta', ndəhay a, aa cəfdamara, a ləvmar: «Kaa, dey akah a wurey kwara?»

¹¹ Ndaw a, a mbəddatara, a ləvtar: «Ndaw mezəley Yesu daha, ta', a dəy hahay, a kwarayawa fa dey adaw, fa dəba ha, a ləvya nğa daw nğa pərarawa dey daa wurak nğa yam nğa Siləwe. Da ray ngene, ta', ya daw. Masa yah ma pərarawa cay na, ya hətar dey dəba.»

¹² Ndəhay a, aa cəfdamara, a ləvam: «Ndaw aha, anğa dama?» A ləvtar: «Ya səra ba.»

¹³ Ta', a handamara ndaw masa Yesu ma wurara dey heyey fa *Fariza hay,

¹⁴ maja Yesu a dəy hahay, a wurara dey nğa ndaw a na, ta *pas meməskey-vaw.

¹⁵ Fa dəba ha, Fariza hay a, aa cəfdamara ndaw aha saya, a ləvmar: «Haa ka hətar dey anda keđe na, ndaw aha, a kada na, kwara?» A ləvtar: «A kwarayawa hahay fa dey. Ta', ya pəra dey a, cay, ta', ya hətar dey dəba.»

¹⁶ Ndəhay siya da wuzlah Fariza hay a, a kam yawa da wuzlah ata. Siya hay a ləvam: «Ndaw ma key cek anda keđe na, ara Gazlavay ma slərdərwa ba, maja a key sləra ta pas meməskey-vaw, ara cek masa kwakwas aləkwa ma təkə sem, ba diya?» Siya hay a ləvam saya: «Ndaw ta mebərey da ray na, a gwa nğa key maazla anda keđe daw?» Anda keđe, a kam yawa ga haa a wudkam dəy da wuzlah ata.

¹⁷ Fa dəba ha, ta', aa cəfdamara ndaw masa Yesu ma wurara dey heyey saya, a ləvmar: «Kaa kah may, ka da ləvey da ray ndaw ma wurkawa dey keđe na, kwara?» A mbəddatara, a ləvtar: «Yah na, ya ləvey ara *ndaw ma təla mey nğa Gazlavay.»

¹⁸⁻¹⁹ Ndaw aha a yawa anğa wulaf, ama wure keđe dey anğa ta wurey sem na, mahura hay nğa *Jəwif hay a təbmara mey a ba, si ata maa cəfdamata ata papaha ta mamaha la dagay. Ta', a zəlmatərwa, a ləvmatar: «Keđe na, ara bəzey akwar daw? A yawa na, fara fara anğa wulaf daw? Yaw, kaa wure keđe anğa fa hətar dey na, kwara?»

²⁰ A mbəddamatara, a ləvmatar: «Fara fara, ya səmərə ara bəzey ala, a yawa na, anğa wulaf.

²¹ Ama ya səmərə cek ma key ta anğa ba, asaya, ya səmərə ndaw ma wurara dey keđe ba may. Cacəfdamara anğa ray anğa, ara bəzey saya daw? A gwa nğa wuzdak-wara.»

²² Ata papaha ta mamaha aa guzlam anda keɗe na, maja fa zluram ta mahura hay nga Jəwif hay masa da wuzlah Fariza hay heyey. Mahura hay a, ta cəmam ɗay ata sem, a ləvam kwa waawa ma pa Yesu la nga *ndaw masa Gazlavay ma wala nga ləhdata ndəhay na, ngene a badamara ndaw aha daa *way-mewuzey-mey nga Gazlavay.

²³ Ara maja ngene, ata papaha ta mamaha heyey maa guzlam, ma ləvam: «Ara bəzey saba, cacəɗfamara taw!»

²⁴ Fariza hay a, a zəlmərwa ndaw masa Yesu ma wurara dey heyey saya, a ləvmar: «Wuzdandara fara fara ta mezəley nga Gazlavay, maja ala na, ya sərmara ndaw ma wurkawa dey keɗe, ara ndaw ta mebərey.»

²⁵ A mbəɗɗatara, a ləvtar: «Ayəwa, da aa ta mebərey, da aa ta mebərey daa ba na, ya səra ba. Ama yah ma sərey na, cek pal. Zleezle na, yah wulaf, ama wure keɗe, dey aɗaw ta wurey cay, ya fa hətar dey dəba.»

²⁶ Ndəhay a, a ləvmar saya: «Kaa ndaw aha na, a kaka me? A wurkawa dey a na, kwara?»

²⁷ A mbəɗɗatara, a ləvtar: «Yah ma wuzdakwara cay, ama ka wuɗam nga jəkfamaya sləmay ba. Kaa ka wuɗam ya wuzdakwara saya na, kwara? Ayəwa, da ka wuɗam nga key gula anɗa hay may kwa?»

²⁸ Da ray ngene, a cəɗmara ndaw aha, a ləvam: «Hey! Gula anɗa na, kah! Ala na, gula hay nga *Mawiz.

²⁹ Ala na, ya sərmara Gazlavay taa guzlar la a Mawiz, ama ndaw keɗe na, ya sərmara a sawa dama, ba.»

³⁰ Ndaw a, a mbəɗɗatara, a ləvtar: «Aayaa! Akwar ta rəzlmaya sem, maja ka sərmara ndaw a, a sawa na, dama ba. Kaa, anɗa na, ta wuryawa dey aɗaw sem!

³¹ Ya sərkwa ndəhay ta mebərey na, Gazlavay a jəkfatar sləmay ba. Ama da ndaw a nar ray a Gazlavay, a kar cek anda aa ma wuɗey na, ngene, a jəkfar sləmay la.

³² Dəga nga menjey aləkwa na, ya ta cənkwa ndaw ma wurey dey nga ndaw ma yawa, anɗa wulaf la daw?

³³ Da ndaw aha, ara Gazlavay ma slərdərwa ba na, a gwa nga key cek anda keɗe ba.»

³⁴ A mbəɗɗamara, a ləvmar: «Kah na, ndaw ta mebərey fara fara dəga nga mayawa akah, kaa ka wuɗey ngaa sərkadandar cek may daw?» Da ray ngene, ta', a badamara daa way-mewuzey-mey nga Gazlavay.

³⁵ Yesu a cənda na, ta badamara ndaw masa anɗa ma wurara dey heyey sem. Ta', a daw a həftar, a ləvar: «Kah ma pa *Bəz nga Ndaw la nga ndaw akah fara fara daw?»

³⁶ Ndaw a, a mbæddara, a lëvar: «Bëz nga Ndaw na, ara wa, Bay Mahura? Wuzdiwa cey, amba ya pa nga ndaw adaw fara fara na!»

³⁷ Yesu a lëvar: «Ka fa hëtar ndaw aha ta dey akah, ara yah, ndaw maa guzika kefe!»

³⁸ Ndaw aha, a lëvar: «Ya paka nga ndaw adaw fara fara, Bay Mahura!» Ta', ndaw aha a regedey fa mey anga.

Yesu a wata wulaf hay ta ndëhay ta mebërey

³⁹ Yesu aa guzley ta mey-mengey dëba, a lëvey: «Ya sawa a bëla kefe nga wuzdatara a ndëhay na, wulaf hay a da hëtmär dey, ndëhay ma hëtmär dey may, a da tëram wulaf hay.»

⁴⁰ Ndëhay *Fariza hay siya masa da cakay a, a cëndamara Yesu maa guzley anda kefe na, ta', aa cëfdamara, a lëvmar: «Kaa, ala na, wulaf hay may daw?»

⁴¹ Yesu a mbëddatara, lëvtar: «Da akwar ndëhay wulaf hay na, ngene fara fara akwar ta mebërey daa ba. Ama wure kefe, ka lëvam akwar fa hëtmär dey, maja ngene, ka da njam ta mebërey da ray.»

10

Mey-mengey ta ndaw-mecëkwer

¹ Yesu aa guzlar saya, a lëvtar: «Ya fa lëvkwar fara fara, ndaw ma mbëzey a gezlen tëban hay taa mey-mbew ba, ama a mbëzey ta ray-way na, ndaw a ngene ara ndaw-mayal ma sla day nga ndaw.

² Ama ndaw ma mbëzey a gezlen tëban hay taa mey-mbew na, ndaw a ngene ara mecëkwer * nga tëban hay a.

³ Ndaw ma jëdta tëban hay ta tavad a wurara mey-mbew ngada mecëkwer e, asaya, tëban anga hay, a cëndamara day anga. A zëlta tëban hay a pal pal ta mezëley ata, a badatërwa a palah.

⁴ Masa ta badatërwa cëpa cay na, mecëkwer e, a këzley fa mey ata, tëban hay a, a sëpmär wurzay maja a sërmara day anga.

⁵ Anda kefe, da ara ndaw mekele na, tëban hay a fa da sëpmara daa ba sëlak, ama a da hwam ta ndaw aha maja a sërmara day anga ba.»

⁶ Yesu aa guzlar ta mey-mengey anda kefe, ama ndëhay a cëndamara mabara nga mey a ba.

9:37 9.37 4.26 **9:39 9.39** 5.22 **9:40 9.40** Mt 15.14; 23.26 **9:41 9.41** 15.22

* **10:2 10.2** mecëkwer: Ara bay nga tëban hay, a këzley fa mey nga tëban anga hay. **10:4 10.4** 10.27; CWJ 14.4 **10:6 10.6** 16.25

Yesu a løyey, anga ndaw-mecəkwer maaya

⁷ Yesu aa guzley saya, a løyey: «Ya fa løykwara fara fara, yah na, mey-slam nga təban hay.

⁸ Ndəhay tabiya ma samawa teesef da ray adaw † ma mbəzam a gezlen təban hay a na, ara mayal hay ma bəzla ndəhay. Ama təban hay a, ta cənmatar mey daa ba.

⁹ Yah na, mey-slam. Da ndaw a mbəzwa ta fa yah na, ya ləhda. Ndaw a, a gwa a mbəzey, a bawa ta mandərzay ba. Asaya a gwa nga hətəy cek mezəmey.

¹⁰ Ndaw-mayal a sawa na, nga leley, nga kəfey ndaw vagay, asaya, ngaa zəfey ndaw. Ama yah na, ya ta sawa la a bəla amba ndəhay a hətam heter mendəvey ba ma fəna ma fəna.

¹¹ «Yah na, ndaw-mecəkwer maaya. Ndaw-mecəkwer maaya na, a vəlda ray anga maja təban anga hay.

¹² Ndaw ma səkərey maja dala daada gway na, ara ndaw-mecəkwer fara fara ba. Təban hay masa anga ma səkərata na, ara nga anga hay ba. Da ndaw aha a hətəy gədey-ley fa sawa ngada fa təban hay a na, a hway, a mbəkdata. Anda kefe, gədey-ley a kərzey təban hay a, siya hay, a kwakwacam ray.

¹³ Ndaw ma səkərey maja dala, ma hway, ma mbəkdata təban hay na, aa fa wulkey fa təban hay a daa ba.

¹⁴ «Yah na, ndaw-mecəkwer maaya. Ya sərta təban adaw hay, təban adaw hay may a sərmaya,

¹⁵ anda Papay ma sərya, yah may, ya səra Papay. Ya vəlda ray adaw maja təban adaw hay.

¹⁶ Səkway nga təban adaw hay mekele daha ‡, ama ata da wuzlah təban hay kefe daa ba. Si ya handatərwa a wuzlah kefe hay may, amba a cəndamara day adaw. A da cəmam ta təban hay a kefe, a da njam daa slam a, dasi har nga ndaw-mecəkwer pal.

¹⁷ «Papay fa wudya maja ya da vəlda ray adaw nga məcey, amba fa dəba ha, ya sləkəfawa daa meməcey.

¹⁸ Kwa ndaw ma gwa ngaa zədda ray adaw na, daa ba, si yah ma təba nga vəlda ray adaw nga məcey. Ya gwa

† **10:8 10.8** Ndəhay tabiya ma samawa teesef da ray adaw: Yesu aa guzley fede na, da ray ndəhay ma təla mey nga Gazlavay ba. Ama aa guzley da ray ndəhay ma pamara ray ata nga Kəriste, ndaw ma da ləhdata ndəhay daa mebərey.

10:8 10.8 Jer 23.1-2; Ez 34.2-3 **10:9 10.9** 14.6; Ps 23.2; Ez 34.14 **10:11 10.11** ndaw-mecəkwer maaya: Ps 23.1; Ez 34.11-16; Jer 23.3; Mt 18.12-14; Heb 13.20; CWJ 7.1; **a vəlda ray anga:** 15.13; Rm 5.8; 1Jn 3.16 **10:12 10.12** SNM 20.29

10:14 10.14 10.27; 2Tm 2.19 **10:15 10.15** Mt 11.27 ‡ **10:16 10.16** Səkway nga təban adaw hay mekele daha: Yesu aa guzley da ray ndəhay masa Jəwif hay ba hay ma da təbmara mey anga. **10:16 10.16** 11.52; Iz 56.8; Ez 34.23-24; 1Pi 2.25 **10:17 10.17** 3.35; 5.18

nga velda ray adaw nga macey, asaya, ya gwa nga hëtar aa slam a. Kede na, ara cek masa Papay ma løyva nga key.»

19 Masa Yesu maa guzley la anda kede na, *Jëwif hay a kam yawa da wuzlah ata saya.

20 Ndëhay ga da wuzlah ata a løyvam: «Annga ta cek da ray, annga malula. Ka jëkam slëmay fa mey annga na, maja me?»

21 Ndëhay siya a løyvam: «Ndaw ta cek da ray na, aa guzley anda kede ba. Malula na, a gwa nga wurey dey nga ndaw-wulaf daw?»

Mey da ray Jëwif hay ma rësmara Yesu saya

22 Fa mevey a, fa mevey a, *Jëwif hay fa kam gwagway nga sërfe dey mewurey *Way-mekey-kwakwas nga Gazlavay da *Jeruzelem. Daa ngene, gwagway a ta wuswa cay saya. Ara ta kiya memed.

23 Yesu fa pëkey dasi balak masa ata ma zëlmara Balak nga *Salamanjw daa Way-mekey-kwakwas nga Gazlavay a.

24 Fetede, Jëwif hay a zërmar ray, a løymar: «Ka fa hëbndar ray kalah kaa na, haa ta vara? Da kah *Këriste, *ndaw masa Gazlavay ma wala nga lëhdata ndëhay heyey na, kadandara la fara fara gway taw!»

25 Yesu a mbëd datara, a løytar: «Ya ta kadakwara cay, ama akwar ma tëbmara daa ba. Maazla hay tabiya masa yah ma kata na, ara ta gëdan nga Papay. Maazla hay a fa wuzda mey da ray adaw.

26 Ama akwar na, ka tëbmara ba maja akwar da wuzlah ndëhay adaw hay ba.

27 Ndëhay adaw hay a na, ata anda tëban hay, a sërmara day adaw, ya sërta pal pal. Da ya fa daw na, ata fa sëpmaya wurzay.

28 Ya da vëltar heter mendëvey ba, fa daa zëdam daa ba nga sërmataw. Kwa ndaw ma da gwa nga përsleta dasi har adaw na, daa ba.

29 Papay, ndaw ma vëdatiwa na, a fënta cek hay tabiya. Anda kede, kwa ndaw fa da gwa nga përsleta dasi har nga Papay na, daa ba may.

30 Ala ta Papay na, slëra ala letek.»

31 Jëwif hay aa kwalam angwa saya amba aa zakamara Yesu vagay.

³² Ama Yesu a mbœdɔɔtara, a lœvtar: «Ya ta key maazla hay maaya la ga fa mey akwar ta gœdaŋ ŋga Papay. Kaa ka daa zakamaya ta aŋgwa vagay na, maja maazla wura?»

³³ Jœwif hay a, a mbœdɔdamara, a lœvmar: «Ya ta wudam ŋgaa zakamaka ta aŋgwa vagay maja maazla maaya masa kah ma ka na, daa ba. Ama ya wudam ŋgaa zakamaka na, maja kah ma cœɔa Gazlavay. Asaya, kah na, ndaw-magœdaŋ ŋga tede gway na, kaa ka pa ray akah ŋga Gazlavay na, kwara?»

³⁴ Yesu a mbœdɔɔtara, a lœvtar: «Daa kwakwas akwar mawuzlalakaya, Gazlavay a lœvey: “Akwar na, gazlavay hay.”

³⁵ Ya fa sœrkwa mey mawuzlalakaya daa œerewel ŋga Gazlavay na, meevœsey aŋga daa ba, ba diya? Daa œerewel ŋga Gazlavay a zœlam gazlavay hay na, ndœhay masa Gazlavay maa guzlar.

³⁶ Yah na, Papay ta walaya la, ta slœrdiwa la a bœla. Ya ta lœvey la, yah na, Bœzey ŋga Gazlavay, ama ka lœvam a key ya cœɔa Gazlavay a. Kaa, kaa guzlam anda keœe na, kwara?

³⁷ Da ya fa kata slœra hay masa Papay ma vœldatiwa daa ba na, ŋgene akwar fa da tœbmara mey adaw daa ba.

³⁸ Ama da ya fa kata, ka tœbmara ba cœŋga na, tœbmara mey adaw maja maazla hay masa yah ma kata tarah taw, amba ka sœmra maaya maaya Papay aa ta yah, yah may, yah ta Papay.»

³⁹ Mahura hay ŋga Jœwif hay a sœpam cœved ŋga kœrzamara Yesu saya. Ama Yesu ta lœhfatar sem.

⁴⁰ Yesu ta', a zlœŋgey a dey-wayam ŋga Jurdeŋ saya, aa slam masa *Jan-Baptis ma zlar ŋga katar *baptem a ndœhay da hwad a heyey. Ta', a njeý fetede œar ga.

⁴¹ Ndœhay ga a samawa a cakay a, aa guzlam da ray a, a lœvam: «Jan-Baptis na, ta key maazla kwa dey pal daa ba, ama mey masa aa maa guzlda da ray ndaw aha keœe na, ara mey fara fara, membœrzley da hwad a daa ba.»

⁴² Anda keœe, ndœhay ga fetede a pamara Yesu ŋga ndaw ata fara fara.

11

Yesu, a slœkdœdœrwa Lazar daa memœcey

1-2 Ndaw da slala Betani daha mezœley Lazar. Dam-mamaha hay cew daha, ara ata Marta ta *Mari. Mari a na, ara ŋgwas masa ma wucar bœrdey fa salay ŋga Bay Mahura

Yesu, ma takwada ta engwec nga ray anga heyey. Pas pal daha, vaw a car a Lazar.

³ Dam-mamaha hay a, ta', a sloram ndaw fa Yesu nga ləvmar: «Bay adaw, jam akah masa kah ma wuda kalah heyey na, aa maaya daa ba.»

⁴ Yesu ma cənda mey a la na, ta', a ləvtar a gula anga hay: «Macay nga Lazar a na, fa da kəda daa ba. Ama a key amba a wuzdərwa gədan nga Bay Gazlavay, asaya, amba ndəhay a həslmaya ray, yah, Bəzey anga.»

⁵ Yesu na, a wudta ata Marta ta Mari leŋ Lazar a kalah.

⁶ Ama, masa aa ma cənda Lazar aa daa macay na, ta ngene he cəpa, aa manjakaya daa slam aha cənga haa dar cew.

⁷ Fa dəba ha, ta', a ləvtar a gula anga hay: «Vəhkwa aa hwayak nga *Jude.»

⁸ Gula anga hay a, a mbəfdamara, a ləvmar: «Kay! Bay ala, daa dar hay a keđe na, *Jəwif hay siya fetede fa səpmaka ngaa zekey ta anɣwa vagay, ba diya? Kaa ka wudfey ya vəhkwa a Jude saya na, kwara?»

⁹ Yesu a ləvtar: «Daa mevərndeŋ pal na, bərey kuraw a ray a cew, ba diya? Fara fara, da ndaw a pəkey taa pas na, a hətar dey maaya maaya, a tədeŋ ba, maja slam fa wedey.

¹⁰ Yaw, da ndaw a pəkey ta tavad na, a tədeŋ maja ləvan.»

¹¹ Masa anga maa guzley anda keđe na, ta', a ləvtar saya: «Jam aləkwa Lazar ta ney sem aa dar, ama ya daw la nga sləkfdərwa.»

¹² Gula anga hay a, a mbəfdamara, a ləvmar: «Bay ala, da a key a ney aa dar na, a sləkdeŋ la.»

¹³ Fara fara, Yesu a wudfey nga ləvtar na, Lazar ta məceŋ sem, ama gula anga hay a, a cəndamara na, anda ara dar fara gway.

¹⁴ Ta', Yesu a katarara mabara nga mey a dəba, a ləvtar: «Lazar ta məceŋ sem.

¹⁵ Ya faa səmey maja yah ma daw fa Lazar a daa ba araŋ. Wure keđe amba ka təbmara mey adaw na, nakwa la fa vəda.»

¹⁶ Anda keđe, *Tuma masa ata ma zəlmara Didim * a ləvtar a gula hay siya: «Nakwa la, aləkwa may, amba ya məckurwa bama ta Bay aləkwa.»

Mey da ray Yesu, ndaw ma vəley heter mendəvey ba

11:1-2 11.1-2 12.1-3; Lk 10.38-39 **11:3 11.3** 11.36 **11:4 11.4** 9.3; 17.1 **11:8**
11.8 8.59; 10.31 **11:9 11.9-10** 8.12; 12.35-36 **11:11 11.11** Mt 9.24 * **11:16**
11.16 Didim: Ara ta mey Gərek anda meləvey «cek nga dey». **11:16 11.16**
Mk 14.31; Rm 6.8; **Tuma:** 20.24

17 Masa Yesu ma wusey cay a Betani heyey na, a cɔnda Lazar ta key dar mɔfad cay daa cɔvay.

18-19 Ndɔhay *Jɔwif hay ga ta samawa la da *Jeruzelem aa vagay a, maja slala Betani ta Jeruzelem na, ata gweegwe, a key kɔlemeeter maakar gway. A samawa nga camatar har ngada ata Marta ta *Mari maja vagay nga mɔlma ata ha.

20 Masa Marta ma cɔnda Yesu fa sawa na, ta', a hway nga cadɔrwa ray. Mari na, manjakaya da way.

21 Marta a lɔvar a Yesu a: «Bay Mahura, da kah ma sawa la fiyaw na, anja mɔlma adaw fa da mɔcey daa ba.

22 Ta ngene he cɔpa, ya sɔra, kwa wure kedɛ cek masa kah maa cɔfdɛy fa Gazlavay na, a vɔldakawa la.»

23 Ta', Yesu a mbɔfdara, a lɔvar: «Mɔlmakw a na, a slɔkɔfawa la daa memɔcey.»

24 Marta a lɔvar: «Ahaw, ya sɔra na, a slɔkɔfawa la ta pas mendɔvey nga bɔla, masa ndɔhay tabiya ma da slɔkɔdamawa daa memɔcey.»

25 Ta', Yesu a mbɔfdara, a lɔvar: «Yah, ray adaw na, ya slɔkɔdatɔrwa ndɔhay daa memɔcey, asaya, ya vɔltar heter mendɔvey ba. Ndaw ma paya nga ndaw anɔga fara fara na, kwa a mɔcey na, a slɔkɔfawa la daa memɔcey a.

26 Asaya, ndaw ma hɔtey heter mendɔvey ba ha maja aa ma paya nga ndaw anɔga fara fara na, fa da mɔcey daa ba nga sɔrmataw. Ka wulkey da ray mey a kedɛ na, kwara? Ka tɔba mey a, aa mevel akah daw?»

27 Marta a mbɔfdara, a lɔvar: «Ahaw, Bay Mahura, ya tɔba. Ya sɔra kah na, *ndaw masa Gazlavay ma wala nga lɔhdata ndɔhay. Kah na, Bɔzey nga Gazlavay, ndaw masa aa ma lɔvey a sawa la a bɔla heyey.»

Yesu, a tɔway maja Lazar

28 Masa Marta maa guzley la anda kedɛ na, ta', a vɔhey a way. Aa sɔkar mey a *Mari, a lɔvar: «Bay Mahura ta sawa la, faa cɔfdaka.»

29 Mari a cɔnda na, ta', a slɔkɔfdɛy wure ngene, a daw fa Yesu,

30 maja Yesu a na, ta wusey a slala ha daa ba aran, ama anɔga daa slam masa Marta ma cadɔrwa ray heyey cɔnɔga.

31 *Jɔwif hay ma samawa nga camar har a Mari heyey, a nɔkmara na, Mari ta slɔkɔfawa sem da way, a bawa fiyaw. A wulkam na, Mari a, a daw a mey cɔvay nga tɔwawa. Ta', a sɔpmar wurzay.

32 Mari a wusey aa slam masa Yesu aa da hwad a. Anɔga ma hɔtar Yesu a na, ta', a tɔfdɛy asi salay anɔga, a lɔvar: «Bay

Mahura, da kah ma sawa la fiyaw na, anja mөлma adaw fa da mөcey daa ba.»

³³ Yesu a nөka na, ata Mari ta Jөwif hay da cakay a heyey, fa tөwam. Da ray ngene, mevel nga Yesu a kudfferey,

³⁴ aa cөfdata, a lөvtar: «Ka jөhmara vagay a na, dama?» A mbөddamara, a lөvmar: «Bay Mahura, sawa, nөka taw!»

³⁵ Yesu ta', a tөway.

³⁶ Jөwif hay a, aa guzlam da wuzlah ata, a lөvam: «Nөkmara cey, fa tөway, a wudfa Lazar a kalah!»

³⁷ Ama siya hay da wuzlah ata a lөvam: «Anğa ma wurara dey nga ndaw-wulaf heyey na, kaa a gwa nga tөka memөcey nga Lazar a ba daw?»

Yesu, a slөkfdadөрwa Lazar daa memөcey

³⁸ Fa dөba ha, mevel nga Yesu a kudfferey saya, ta', a daw a mey cөvay heyey. Cөvay a na, ara vөged maavөrkwakaya daa angwa mahura, beeler da mey a.

³⁹ Yesu a lөvtar: «Gөdbalamara beeler da mey a.» Marta, dam-mamanj nga ndaw mamөckaya ha, a mbөddara a Yesu, a lөvar: «Bay Mahura, a da zafandakwar, maja ta key dar mөfad cay daa cөvay.»

⁴⁰ Yesu a mbөddara, a lөvar: «Ya ta lөvka daa ba daw? Da kah ma tөba mey adaw la na, ka hөtar gөdanj nga Gazlavay la.»

⁴¹ Fa dөba ha, ta', a gөdbalamara beeler heyey dөba. Yesu a banğada dey a vad, a lөvey: «Papay, ya kaka suse maja kah ma jөkfaya slөmay.

⁴² Ya sөra ka fa jөkfaya slөmay mandaw mandaw, ama yaa guzley anda kedfe na, amba ndөhay da cakay adaw kedfe a tөbmara ara kah ma slөrdiwa a bөla.»

⁴³ Masa Yesu maa guzley la anda kedfe na, ta', a wudey ta gөdanj, a lөvey: «Lazar, bawa!»

⁴⁴ Lazar ndaw mamөckaya heyey pat! a bawa, har ta salay majөwtakaya ta maslaga, yaw, dey anğa may masөrtakaya ta zana. Yesu a lөvtar a ndөhay: «Pөskamara, mbөkdamara nga daw.»

A wudam nga kөdmara Yesu vagay

(Matiye 26.1-5; Mark 14.1, 2; Luk 22.1, 2)

⁴⁵ *Jөwif hay tabiya ma samawa nga camar har a *Mari heyey ta hөtmar maazla masa Yesu ma ka la. Siya hay da wuzlah ata a pamara Yesu nga ndaw ata fara fara.

⁴⁶ Ama ndөhay siya na, a diyam fa *Fariza hay, a kadamatara cek masa Yesu ma ka.

⁴⁷ Masa ata ma cəndamara cay na, ta', *bay-ray hay nga ndəhay ma ka kwakwas nga Gazlavay ta Fariza hay a zəlmətərwa mahura hay masa ma sla yawa nga Jəwif hay nga kusey da ray mey a, a ləvmatar: «Ndaw a fa key maazla kalah kaa na, ya da kakwa na, kwara?»

⁴⁸ Da mbak! ya mbəkɔdakwa nga key maazla hay anda keɔe na, ɔgene ndəhay tabiya a da təbɔmara mey anɔa. Anda keɔe, mahura hay nga *Rawm a da samawa, a da pəlhamara Way-mekey-kwakwas aləkwa, asaya, a da paslamata ndəhay aləkwa hay.»

⁴⁹ Ndaw pal da wuzlah ata daha mezəley Kayif. Ara *ndaw mahura da ray ndəhay ma ka kwakwas nga Gazlavay ta mevey a ɔgene. Ta', aa guzltar, a ləvtar: «Akwar kaa na, kwa ka səram cek ba.

⁵⁰ Cəndamara, maaya na, ndaw pal a məcey maja aləkwa tabiya, da ray Rawma hay ma da samawa nga paslamandakwar tabiya daa hwayak aləkwa.»

⁵¹ Mey masa Kayif maa guzldatara ɔgene na, ara mewulkey anɔa ba. Ama maja ta mevey a ɔgene, anɔa mahura nga ndəhay ma ka kwakwas nga Gazlavay na, Gazlavay ta vəlar gəɔaɔ la nɔaa guzley da ray cek ma da key: si Yesu a məcey maja Jəwif hay tabiya.

⁵² Yesu a məcey na, maja Jəwif hay daada ba, ama a məcey amba a cəmtar ray nga bəza hay nga Gazlavay masa maakwacatakaya ray da bəla cəpa ndav.

⁵³ Dəga ta pas ɔgene, a jəwmara mey ata nga kəɔey Yesu vagay.

⁵⁴ Ara maja ɔgene, Yesu a mbəkɔda mepəkey da wuzlah Jəwif hay. Ta', a daw aa slala fetede daha mezəley Efərayim gweegwe ta wuzlah-ley. A njam fetede ta gula anɔa hay.

⁵⁵ Daa ɔgene gwagway nga Jəwif hay mezəley «*Pak» gweegwe cay a wuswa. Ndəhay ga da slala hay mekele mekele a diyam a *Jeruzelem. A diyam na, dəga gwagway a araɔ amba a diyam vaw, nga tərey maaya fa mey nga Gazlavay nga key gwagway a.

⁵⁶ Ndəhay a, a səpmara Yesu. Masa ata daa *Way-mekey-kwakwas nga Gazlavay na, aa guzlam da wuzlah ata, a ləvam: «Ndaw aha, a sawa la aa gwagway a daw? A sawa daa ba daw? Ka wulkam na, kwara?»

⁵⁷ Aa guzlam anda keɔe na, maja bay-ray hay nga ndəhay ma ka kwakwas nga Gazlavay ta Fariza hay taa guzlmatar la, a ləvam: «Kwa waawa ma səra slam masa Yesu aa da hwaf a na, nga kada amba ma daw ma kərzarawa.»

12

Mari a mbədar bərdey fa salay nga Yesu (Matiye 26.6-13; Mark 14.3-9)

¹ Mendərey dər maakwaw nga key gwagway nga *Pak. Daa ngene, Yesu a sləkdey, a daw a Betani. Betani na, ara slala nga Lazar, ndaw masa Yesu ma sləkfadərwa daa meməcey heyey.

² Masa anğa ma wusey la fetede na, ta', a tamar daf. Marta a həlra daf a. Lazar aa da wuzlah ndəhay masa Yesu ma zəmamara daf a bama.

³ *Mari a lawa reta nga liter nga bərdey mezəley «*nar», bərdey a, a hədkey ba. Ta', a mbəddara fa salay nga Yesu. Fa dəba ha, Mari a, a takwada ta engwec nga ray anğa. Slam daa way a cəpa a zey bərdey a.

⁴ Da ray ngene, gula pal da wuzlah *gula hay nga Yesu mezəley Juda Iskariyawt, ndaw ma da vəlda Yesu a har masa-gəra anğa hay heyey, aa guzley, a ləvey:

⁵ «Anja a vəldandakwara bərdey a na, ya hədkadakwa dala ga * , ya vəldakwa dala ha nğada masa-viya hay, ba daw?»

⁶ Aa maa guzley anda ngene na, ta wulkey ta masa-viya hay fara fara daa ba, ama a wudəy nga lala dala ha maja anğa ndaw-mayal. Ara anğa ma kərza dala nga ata Yesu ta gula anğa hay, fa dəba ha, a lala dala ha nğada anğa.

⁷ Maja ngene, Yesu aa guzlar, a ləvar: «Mbəkda nğwas aha ceý! A key kaa na, a diya vaw adaw nğadaa cəvay cay.

⁸ Masa-viya hay na, akwar mandaw mandaw bama, ama yah na, ya fa da njeý da wuzlah akwar nga mandaw mandaw daa ba.»

A wudam nga kədmara Lazar vagay

⁹ *Jəwif hay ga a cəndamara na, Yesu sem a Betani. Da ray ngene, ta', a diyam a Betani a. A diyam na, maja Yesu daada ba, ama a wudam nga hətmərwa Lazar, ndaw masa Yesu ma sləkfadərwa daa meməcey heyey, fa dey.

¹⁰ Daa ngene, *bay-ray hay nga ndəhay ma ka kwakwas nga Gazlavay a jəwam meý da wuzlah ata nga kədey Lazar vagay may.

12:1 12.1-3 11.1-2 **12:2 12.2** Lk 10.40 **12:3 12.3** Lk 7.37-38 **12:4 12.4** Juda Iskariyawt: 6.71; 13.2, 27; 18.2; Mt 10.4 * **12:5 12.5** dala ga: Ta meý Gərek a ləvey «deniye» temere maakar. *Deniye* pal na, ara mawurbay nga sləra nga ndaw fa mevrəndey. **12:5 12.5** Iz 58.7; Mt 19.21; Jak 2.15-16 **12:7 12.7** 19.40
12:8 12.8 Mew 15.11 **12:9 12.9** 11.43-44

11 A jəwmara mey a na, maja ndəhay Jəwif hay ga fa təbmara mey ata daa saba. Ama a təbam na, mey nga Yesu dəba, maja aa ma sləkdəderwa Lazar a daa meməcey.

Yesu a mbəzey a Jeruzelem anda bay
(*Matiye 21.1-11; Mark 11.1-11; Luk 19.28-40*)

12 Peperək e, ndəhay ga ma diyam nga key gwagway nga *Pak da *Jeruzelem heyey, a cəndamara na, Yesu fa sawa a Jeruzelem e.

13 Maja ngene, a dəsłmawa mey-har hay nga wudez hay anda gendew, a diyam nga cadamərwa ray ta Yesu a. A wudam ta gədanj, a ləvam: «*Hawzana! Həlmakwa Bay Gazlavay! Anja Bay Gazlavay nga pəsar mey a Bay nga *Israyel hay, ndaw masa aa ma slərdərwa ta mezəley anja.»

14 Fetede, Yesu a hətey bəz-zəngwaw daha, ta', a təpey a ray a. Ara anda mawuzlalakaya daa dferewel nga Gazlavay zleezle, ma ləvey:

15 «Ndəhay daa berney nga *Siyanjw,
ka da zlıram ba.

Nəkmara, bay akwar fa sawa da ray bəz-zəngwaw.»

16 Daa ngene, gula anja hay a cəndamara cek ma key da wuzlah ata ba. Ama, masa Yesu ma təpey la a vad nga njeý aa slam-mewedey na, a sərfadamara anja mey nga Gazlavay maa guzley la da ray a, asaya, ndəhay ta kamar cek la a Yesu anda mey a maa guzley.

17 Ndəhay tabiya masa da cakay Yesu daa masa aa ma zəla Lazar daa cəvay, ta aa ma sləkdəderwa daa meməcey heyey na, fa kadamara mey a ngada ndəhay siya.

18 Maja ngene, ndəhay ga ma cəndamara mey a na, a samawa nga cadamara ray ta Yesu. A samawa na, maja ata ma cəndamara anja ma ka maazla ha.

19 *Fariza hay aa guzlam da wuzlah ata, a ləvam: «Ndaw a kefe na, ya gwakwa a ray a ba! Ehe, nəkmara, ndəhay tabiya fa səpmar wurzay cəngga!»

Ndəhay Gərek hay a səpmara Yesu

20 Ndəhay ma diyam a *Jeruzelem nga həlmey Bay Gazlavay daa gwagway nga *Pak na, Gərek hay da wuzlah ata daha may.

21 Gərek hay a, a diyam a cakay *Fəlep, ndaw ma sawa da Betsayda daa hwayak nga *Galile. Ta', aa guzlar, a ləvmar: «Bay ala, ya wudam nga cey ray ta Yesu.»

²² Følep a slækdey, a daw aa guzlar a *Andøre. Fa dæba ha, ta', a diyam cewete, aa guzmar a Yesu.

²³ Yesu a mbæddatara, a løvtar: «Pas a ta wuswa cay amba Gazlavay a wuzdərwa gədan adaw, yah, *Bəz nga Ndaw.

²⁴ Ya fa ləvkwar fara fara, da hulfad nga daw a kəzley a hwayak, ta pəshey daa ba na, a da njey salalay a kəne. Ama da ta pəshey sem aa hwiyak na, a pəcwa, a gəley, a key ray mahura.

²⁵ Anda keđe, kwa waawa ma wudfa heter anga na, a key ngenene, aa zədda. Ama kwa waawa ma wudfa heter anga ba da bəla keđe na, a key ngenene, a bada nga hətəy heter mendəvey ba.

²⁶ Kwa waawa ma wudfey nga kaya sləra na, si a səpya. Aa slam masa yah ma da daw na, ndaw ma ka sləra adaw a sawa la asi adaw. Papay a da həslar ray ngada ndaw ma ka sləra adaw a.»

Yesu aa guzley da ray meməcey anga

²⁷ «Wure keđe, ray adaw fa həbey. Ya daa guzley na, ya ləvey me? Ya fa da ləvey, Papay, ləhdaya daa banay ma da sawa a ray adaw wure keđe na, daa ba, maja ya sawa a bəla na, nga bəsa banay a keđe.

²⁸ Papay, wuzdərwa gədan akah amba ndəhay a həslmaka ray.» Maja ngenene, dəy a cənwa da gazlavay da vad, a ləvey: «Yah ta wuzdərwa gədan adaw cay, ama ya wuzdərwa la saya.»

²⁹ Ndəhay makustakaya fetede ma cəndamara dəy a na, aa guzlam, a ləvam: «Ara var maa bəcey.» Ndəhay siya a ləvam: «Ara maslan nga Gazlavay da vad maa guzlar.»

³⁰ Ama Yesu aa guzltar, a løvtar: «Dəy a, aa guzlwa na, ngada yah ba, ama ngada akwar.

³¹ Wure keđe, pas a ta wuswa cay amba Gazlavay a katar sariya a ndəhay da bəla. Wure keđe, pas a ta wuswa cay nga bəley bay-malula, ndaw ma wa bəla keđe.

³² Ama yah, da ta banğadəmayaya cay fa hwadam mazlanğalakaya a vad nga məcey na, ya da ngəлта ndəhay tabiya a cakay adaw.»

³³ Yesu aa guzley anda keđe na, a wudfey a wuzda a da məcey na, kwara.

³⁴ Zagaba tabiya a mbæddamara, a ləvmar: «Ya ta jangamara la daa dərewel nga kwakwas ala, a ləvey *Kəriste, *ndaw masa Gazlavay ma wala nga ləhdata ndəhay na, a da njey nga sərmataw, ba diya? Kaa kah, ka

løvey a da banƣadamarara *Bəz nƣa Ndaw a vad na, kwara? Bəz nƣa Ndaw a na, ara wa?»

³⁵ Yesu a mbəfdatara, a ləvtar: «Mewedey aa da cakay akwar, a da njeƣ nekəfey gway. Daa masa mewedey a, aa da cakay akwar kefe na, pəkam da hwaƣ a, amba ləvaƣ a hətfakwar saba. Da ndaw fa pəkey daa ləvaƣ na, a səra slam masa aa ma da daw a hwaƣ a ba.

³⁶ Daa masa mewedey a, aa da cakay akwar kefe na, si ka təbmara aa mevel akwar, amba ka təram nƣa ndəhay nƣa mewedey.» Masa Yesu maa guzltar la anda kefe na, ta', a nƣəchey dərəƣ ta ata, a bəy.

Mey nƣa Izay da ray Jəwif hay ma təbmara meƣ nƣa Yesu ba

³⁷ Yesu ta key maazla hay la ga fa meƣ nƣa *Jəwif hay, ama ta nƣene he cəpa, Jəwif hay a ta pamara Yesu nƣa ndaw ata fara fara daa ba cəƣƣa.

³⁸ Anda kefe, meƣ masa *Izay, *ndaw ma təla meƣ nƣa Gazlavay, maa guzley zleezle da ray Yesu heyey na, ta key la. Izay a, a løvey:

«Bay Gazlavay, ma təba meƣ akah
masa ala ma kadamara na, wa?

Bay Gazlavay, ka wuzdərwa gədaƣ akah na,
nƣada wa hay wa?»

³⁹ Yaw, Jəwif hay a ta gwamara nƣa təbmara meƣ nƣa Yesu a daa ba. Ara anda Izay a maa guzley zleezle saya, a løvey:

⁴⁰ «Gazlavay ta wulfatara dey ata sem
amba a hətmar dey saba.

Ta rəzlta sem

amba a sərmara ləƣgesl saba.

Anda kefe, fa da mbədam dey nƣada fa Gazlavay
amba ya mbəldata na, daa ba.»

⁴¹ Izay ma løvey anda kefe na, maja aa ma hətar gədaƣ nƣa Yesu, ta', aa guzley da ray Yesu a.

⁴² Ta nƣene he cəpa na, mahura hay nƣa Jəwif hay ga ta pamara Yesu la nƣa ndaw ata fara fara cəƣƣa, ama a wuzdamərwa a palah ba. A zluram ta *Fariza hay maja a da badamata daa *way-mewuzey-mey nƣa Gazlavay.

⁴³ Anda kefe, a wuƣam na, ndəhay nƣaa həmdamata da ray Gazlavay ma daa həmdata jak.

Mey nƣa Yesu a kərzata ndəhay ta sariya

⁴⁴ Yesu aa guzley ta gədan, a ləvey: «Ndaw ma paya nga ndaw anğa fara fara na, a key nğene, a pey yah taava adaw ba, ama a pa ndaw ma slərđiwa nğa ndaw anğa fara fara may.

⁴⁵ Yaw, ndaw ma hətya la na, ta hətar ndaw ma slərđiwa sem may.

⁴⁶ Yah na, ndaw ma wadfa bəla. Ya ta sawa la amba kwa waawa ma paya nğa ndaw anğa fara fara na, a njeý daa ləvan saba.

⁴⁷ Da ndaw a cənda mey adaw, a pafar lenğesl ba na, nğene ara yah ma da kar sariya nğaa zəfda ba. Maja yah na, yah ma sawa a bəla nğa katar sariya a ndəhay nğaa zədam daa ba. Ama ya sawa na, amba ndəhay da bəla a ləham daa mebərey.

⁴⁸ Ndaw ma wudfa ba, asaya, ndaw ma təba mey adaw ba na, cek ma da kar sariya na, daha: ara mey adaw ma da kərza ta sariya ta pas mendəvey nğa bəla.

⁴⁹ Mey masa yah ma kada na, ara mey adaw ba, ama ara Papay, ndaw ma slərđiwa, ma balayawa mey a amba yaa guzlda, ya wuzda a ndəhay.

⁵⁰ Ahaw, ya səra na, mey anğa a da vəlkwar heter mendəvey ba. Anda kefe, mey masa yah ma kada na, ya kada anda Papay ma ləvya.»

13

Yesu a pərtara salay nğa gula anğa hay

¹ Masa gwagway nğa *Pak anda mandaw na, Yesu a səra pas nğa meməcey anğa ta wuswa cay, a da mbəkda bəla kefe, a da vəhey nğada fa Papaha. Yesu na, ta wudfa ndəhay anğa hay da bəla sem. Ta pas nğene aa fa wuzda na, a wudfa kalah cənğa.

² Taa kwad a nğene, Yesu a zəmam daf ta gula anğa hay. Anja *Satan, bay-malula, ta bata Juda, bəzey nğa *Simanw Iskariyawt cay, amba Juda ha a vəlda Yesu a har masa-gəra anğa hay.

³ Yesu na, fa səra Gazlavay Papan ta vəldara gədan sem nğa wey da ray cek hay cəpa. A səra anğa na, a sawa ta fa Gazlavay. Asaya, a səra pas pal a da vəhey fa Gazlavay a, a vad.

⁴ Da ray nğene, Yesu ta', a mbəkda mezəmey daf, a sləkdey a cəkwa zana masa mahura fa vaw, ta', a jəwey zana mekele aa lafay.

⁵ Cay, a kawa yam aa taasa, a pørtara salay nga gula annga hay, a takwadatara yam a ta zana majøwkaya daa labay heyey.

⁶ Yesu a wusey ta'! fa Simanjw *Piyer na, Simanjw Piyer e, a løvar: «Bay Mahura, kah ta ray akah, amba ka pøryawa salay daw?»

⁷ Yesu a mbøddara, a løvar: «Cek masa yah ma ka keðe na, ka søra mey da ray a wure keðe ba aranj. Ama ngada fa mey nekøðey na, ka søra mey da ray a la.»

⁸ Piyer a mbøddara saya, a løvar: «Kay! Kah ta ray akah, ka pøryawa salay ba!» Yesu a løvar: «Da ya ta pørkawa salay daa ba na, kwa ka fa da høtey cek fa yah daa ba may.»

⁹ Simanjw Piyer a mbøddara, a løvar: «Bay Mahura, da anda keðe na, ka da pørya na, salay daada ba, ama pørtiwa har hay ta ray cøpa may.»

¹⁰ Yesu a løvar saya: «Da ndaw ma pørey sem na, a wuðey nga pørey vaw tabiya saba, si salay gway, maja dølay fa vøða daa saba, ba diya? Akwar gula adaw hay na, akwar tabiya mapørtakaya ama si ndaw pal manda-pørey.»

¹¹ Yesu maa guzley anda keðe na, a søra ndaw ma da vølda a har masa-gøra annga hay. Ara maja ngene, annga ma løvey: «Akwar cøpa mapørtakaya ba.»

¹² Masa Yesu ma pørtara salay cay na, ta', a køzla zana annga mahura heyey fa vaw, a vøhey aa slam annga mezømey ðaf. Ta', aa guzltar a gula annga hay a, a løvtar: «Akwar ta sørmara cek masa yah ma kakwara keðe la daw?»

¹³ Nøka, akwar fa zølmaya "Bay Mahura", asaya, "ndaw maa sørkadakwar". Ahaw, akwar maa guzlam la ara annga fara, yah na, ndaw maa sørkadakwar, asaya, yah Bay akwar Mahura.

¹⁴ Anda keðe, da yah Bay akwar Mahura, asaya, da yah ndaw maa sørkadakwar ma pørkwara salay na, si akwar may ka pøram salay nga ndaw a, nga ndaw a da wuzlah akwar may.

¹⁵ Yah ma ka anda keðe na, amba ka kamara køne may.

¹⁶ Ya fa løvkwar fara fara, ndaw ma ka sløra nga ndaw na, a føna bay nga sløra ha ba sølak, asaya, ndaw-meslørey na, a føna ndaw ma slørd a ba sølak.

¹⁷ Wure keðe akwar ma sørmara cay, da akwar fa kamara anda keðe na, maaya nga Gazlavay a sawa la a ray akwar.

¹⁸ «Yah maa guzley anda keðe na, da ray akwar cøpa ba. Ahaw, ndøhay masa yah ma walata na, ya søra

mewulkey ata tabiya. Ama maaya na, mey mawuzlalakaya daa dferewel nga Gazlavay zleezle a key fara. Mey a, a løyey: "Ndaw masa yah ma zəmam daf cew e daa völey pal ta tøyey sem nga masa-gəra adaw."

¹⁹ Ya kadakwara mey a la teesed dəga wure kede amba da cek aha ma da key ngene ta wuswa cay na, ka sərmara "Yah na, ara Yah".

²⁰ Ya fa ləvkwar fara fara, ndaw ma təba ndaw masa yah ma slərda na, a key ngene, a təbey na, yah, ray adaw. Yaw, da ndaw ta təbya la na, a key ngene, a təbey ndaw ma slərdiwa.»

Juda a da völda Yesu a har masa-gəra hay

(Matiye 26.20-25; Mark 14.17-21; Luk 22.21-23)

²¹ Masa Yesu maa guzley la anda kede na, ray anga a həbey, a løyey: «Ya fa ləvkwar fara fara, ndaw pal da wuzlah akwar a völdaya la a har masa-gəra adaw hay nga kədmaya vagay.»

²² Gula hay nga Yesu a nəkam vaw aa dey aa dey, ama kwa ta sərmara ndaw masa Yesu maa guzley da ray a na, daa ba.

²³ Gula pal dasi ata manjakaya da cakay Yesu a, gula ha ara gula masa Yesu ma wudfa kalah.

²⁴ *Simanjw *Piyer a kəbcar dey a gula ha amba gula ha aa cəfdə Yesu aa guzley na, da ray wa.

²⁵ Ta', gula ha a gənsley ngada fa Yesu, aa cəfdə, a ləvar: «Bay Mahura, ma da völdaka a har masa-gəra akah hay na, wa?»

²⁶ Yesu a mbəfdara, a ləvar: «Amba ya cey daf, ya key lar fa vəda, ya təldara a ndaw. Ndaw a ngene na, ara ndaw ma da völdaya a har masa-gəra adaw hay.» Yesu a cey daf dəba, a key lar fa vəda, ta', a təldara a Juda, bəzey nga Simanjw Iskariyawt.

²⁷ Dəga daa masa Juda ha ma təba daf da har Yesu a ngene na, wure wure ngene *Satanj, bay-malula, a mbəzey aa mevel nga Juda ha. Cay, Yesu ta', aa guzlar dəba, a ləvar: «Cek masa kah ma wudfey nga ka na, ka la fiyaw gway taw!»

²⁸ Kwa ndaw pal dasi gula hay a ma səra Yesu aa guzlar anda ngene maja me na, daa ba.

²⁹ Gula hay siya a wulkam na, Yesu a wudfey nga slərda Juda ha nga hədkawa cek hay nga gwagway, da daa ba, aa cəfdə nga vəltar cek a masa-viya hay maja ara anga ma kərza dala ata.

³⁰ Masa Juda ma tɔba daf da har Yesu heyey la na, ta', a bawa fiyaw aa ambaw. Daa ngene, tavad ta key cay.

Mey da ray mewey mawiya

³¹ Masa Juda ma bawa sem aa ambaw heyey na, Yesu aa guzley a lɔvey: «Dɔga wure keɔe, gɔɔan adaw, yah, *Bɔz nga Ndaw, fa wuzwa amba ndɔhay a hɔslmaya ray. Asaya, yah, Bɔz nga Ndaw, ya fa wuzda gɔɔan nga Gazlavay amba ndɔhay a hɔslmar ray.

³² [Maja ya fa wuzda gɔɔan nga Gazlavay a ndɔhay na,] Gazlavay a da wuzda gɔɔan adaw a ndɔhay may. Gweegwe cay a wuzdɔrwa gɔɔan a.

³³ Bɔz adaw hay, ya fa da njeɔ ta akwar ga daa saba. Ka da sɔpmaya, ama ya lɔvkwar anda yah ma lɔvtar a mahura hay nga *Jɔwif hay heyey: Aa slam masa yah ma da daw na, akwar fa da gwamara nga diyam a hwad a daa ba.

³⁴ Ehe, ya vɔlkwar *mewey mawiya: Wudam vaw. Maaya na, ka wudam vaw anda yah ma wudkwar keɔe.

³⁵ Da masa akwar fa wudam vaw na, ndɔhay tabiya a sɔmra la akwar gula adaw hay.»

Mey da ray ata Piyer ta Yesu

(Matiye 26.31-35; Mark 14.27-31; Luk 22.31-34)

³⁶ *Simanw *Piyer aa cɔɔɔa Yesu, a lɔvar: «Bay Mahura, ka da daw na, ama?» Yesu a mbɔɔɔara, a lɔvar: «Aa slam masa yah ma da daw keɔe na, ka gwa nga sɔpya wure keɔe ba aran, ama ka sɔpya la fa dɔba ha.»

³⁷ Piyer a lɔvar: «Bay Mahura, ya gwa nga sɔpka wure keɔe ba na, maja me? Si ya mɔceɔ maja akah.»

³⁸ Yesu a mbɔɔɔara, a lɔvar: «Kah na, ka gwa nga mɔceɔ maja yah fara daw? Ya fa lɔvka fara fara, wuskwaa gwagwalak a da ceɔ daf na, ka ta lɔvey cay dey maakar, ka sɔrya ba, ka sɔrya ba.»

14

Mey da ray cɔved ma daw ngada fa Gazlavay Papay

¹ Yesu aa guzltar a gula anga hay, a lɔvtar: «Ka daa lɔkam saba. Pamara Gazlavay nga ndaw akwar fara fara, asaya, pamaya nga ndaw akwar fara fara may.

² Fa Papay Bay Gazlavay da vad na, slam hay nga njeɔ suha daha. Ara maja ngene, yah maa guzlkwar, ya lɔvkwar: “Ya da daw nga diykwar slam da vad.”

³ Masa yah ma daw cay nga diykwara slam aha na, ya vèhwa la nga ngèlkwar amba ka njam aa slam masa yah ma da njeý a hwaɗ a may.

⁴ Slam masa yah ma da daw a hwaɗ a na, ka sèrmara cèved e.»

⁵ *Tuma aa cèɗɗa, a lèvar: «Bay Mahura, slam masa kah ma da daw a hwaɗ a na, ya sèrmara ba. Kaa wara ya da sèrmara cèved e na, kwara?»

⁶ Yesu a mbèɗɗara, a lèvar: «Yah na, cèved ma handata ndèhay ngada fa Gazlavay. Yah na, ndaw ma wuzda mey fara fara da ray Gazlavay. Asaya, yah na, ndaw ma vèltar heter mendèvey ba a ndèhay. Da ndaw a wuɗey nga daw fa Papay na, si a sawa ta fa yah.

⁷ Da ka sèrmaya na, ka sèrmara Papay la may. Dèga tasana, ka sèrmara Papay a, akwar ta hètmar la ta dey akwar.»

⁸ *Fèlep a lèvar: «Bay Mahura, wuzdandara Papakw a na, cay gway taw!»

⁹ Yesu a mbèɗɗara, a lèvar: «Dèga zleezle alèkwa bama kaa na, ka sèrya ba cènga daw, Fèlep? Ndaw ma hètya la na, a key ngene, a hètèy Papay a gway. Kaa ka lèvyà wuzdandara Papay a na, maja me dèba me?

¹⁰ Yah ta Papay, asaya, Papay aa ta yah na, ka sèra ba daw? Mey cèpa masa yah maa guzldakwara tabiya keɗe na, a sawa ta fa yah ba. Ama ara Papay masa aa ta yah heyey ma ka slèra anga.

¹¹ Tèbmara mey aɗaw masa yah ma lèvkwar, yah ta Papay, Papay may aa ta yah. Da ka tèbmara maja yah maa guzlkwar keɗe ba na, tèbmara maja maazla hay masa yah ma kata tarah taw!

¹² Ya fa lèvkwar fara fara, ndaw ma paya nga ndaw anga fara fara na, a kata maazla hay masa yah ma kata la may. A da key maazla hay mahura ma fèna, maja yah na, ya da vèhey * a cakay Papay a vad.

¹³ Cek hay tabiya masa akwar maa cèɗɗamara nga key ta mezèley aɗaw † na, ya kakwara la amba yah, Bèz nga Ndaw, ya wuzdatara gèɗan nga Papay a ndèhay amba a hèsmar ray.

14:3 14.3 12.26 **14:5 14.5** Tuma: 20.24 **14:6 14.6** Heb 10.20 **14:7 14.7** 8.19

14:9 14.9 12.45 **14:10 14.10** 3.35 **14:11 14.11** 5.18, 36; 10.37-38 * **14:12**

14.12 ya da vèhey: Yesu a daw fa Bay Gazlavay a vad, a da slèrwa Mesèfney nga Gazlavay a ray ndèhay anga hay. Asaya, a kar ambahw a Gazlavay maja ndèhay anga hay amba a hètam gèɗan nga key slèra nga Gazlavay. Nèka Jan 14.16-17. † **14:13 14.13** ta mezèley aɗaw: Anda melèvey, medrey-dangay ta gèɗan masa Yesu ma vèldara, asaya, aa cèɗɗey cek masa ma mbafar a Yesu.

14:13 14.13 15.16; 17.1

14 Yaw, da akwar faa cəfdafamaya cek n̄ga key ta mezəley adaw na, ya kakwara cek aha la.»

Mey da ray Mesəfney n̄ga Gazlavay ma da sawa

15 Yesu aa guzltar a gula an̄ga hay saya, a ləvtar: «Da akwar fa wudmaya na, si ka namar ray a *mewey adaw.

16 Ya dərər dangay la a Papay amba a slərkwār ndaw mekele n̄ga jənkwar. Ndaw a, a da n̄jey ta akwar n̄ga sərmataw.

17 Ara Mesəfney ma wuzda mey masa fara fara da ray Gazlavay. Ndəhay da bəla † a gwamara n̄ga təbmara daa ba, maja a hətmar ta dey ata daa ba, asaya, a sərmara ba. Ama akwar na, ka sərmara, maja an̄ga da wuzlah akwar, asaya, aa daa akwar.

18 «Ya fa da mbəkdakwar taava akwar anda matawak hay na, daa ba. Ya vəhwa la a wuzlah akwar.

19 Menjey nekədey fedə, ndəhay da bəla kedə fa da hətmaya daa saba. Ama akwar na, ka hətmaya la maja yah ta dey. Akwar may, ka da njam ta dey anda yah.

20 Da pas a ta wuswa cay na, ka sərmara la, Papay aa ta yah, akwar ta yah, yah may, yah ta akwar.

21 «Ndaw ma təba mewey adaw, asaya, ma nar ray na, ndaw a n̄gene a wudya. Nəka, Papay na, a wudā ndaw ma wudya. Yah may, ya wudā ndaw masa ma wudya, ya wuzar vaw n̄gada an̄ga.»

22 Ta', Jud aa cəfda, a ləvar: «Bay Mahura, ka da wuzey vaw na, n̄gada ala gway, ama n̄gada ndəhay da bəla cəpa ba na, maja me?» Maa cəfda ha na, ara Jud mekele, ba na, ara Juda Iskariyawt ba.

23 Yesu a mbəfdara, a ləvar: «Ndaw ma wudya na, a cənya mey la may. Anda kedə, Papay a wudā la may. Ala ta Papay ya da diyam fa ndaw aha, ya da njam daa slam a.

24 Ndaw ma wudya ba na, a cənya mey daa ba may. Mey masa yah maa guzlda kedə na, ara mey adaw ba, ama ara mey n̄ga Papay, ndaw ma slərđiwa.

25 «Ya fa kadakwara cek hay a tabiya, daa masa yah da wuzlah akwar kedə d̄gagay.

26 Cay na, Papay a slərkwār Mesəfney an̄ga la ta mezəley adaw. Ara Mesəfney a ma da jənkwar. A daa sərkadakwara cek hay tabiya. Asaya, a da sərfdakwara mey hay cəpa masa yah ma kadakwara.

14:15 14.15 14.21, 23; 15.10; 1Jn 5.3; 2Jn 6 14:16 14.16 7.39; 14.26; 15.26; 16.7, 13; 20.22; 1Jn 3.24; 4.13; SNM 1.4; 2.4 † 14:17 14.17 Ndəhay da bəla: Ndəhay masa ma wulkam da ray Gazlavay ba, a səpam na, si cek hay da bəla gway. Nəka Janj 15.18-25. 14:17 14.17 1Kwr 2.10-16 14:19 14.19 16.16; 8.14 14:20 14.20 5.18 14:21 14.21 14.15 14:23 14.23 CWJ 3.20 14:24 14.24 7.16 14:26 14.26 14.16

²⁷ «Ya mbekdakwar daa zazay, njam ta zazay adaw. Zazay adaw a na, anga wal ta zazay nga ndohay da bēla. Anda kefe, ka daa lēkam ba, ka da zluram ba.

²⁸ Akwar ma cōndamara la, yah ma lōvey: “Ya daw la fa Papay, fa dēba ha, ya vōhwa la fa akwar, ba diya?” Da ka wudmaya na, ngene, kaa sōmam la da ray yah ma da daw fa Papay a, maja Papay na, aa mahura da ray adaw.

²⁹ Ya kadakwara mey a la teesed dōga wure kefe amba da cek aha ma da key ngene ta wuswa cay na, ka tōbmara mey adaw ma fōna.

³⁰ Kwa ya fa daa guzlkwar ga daa saba, maja bay-malula, ndaw ma wa bēla kefe, fa sawa. Ama kwa fa da gwa nga kaya cek daa ba sōlak.

³¹ Ama a sawa na, amba ndohay da bēla a sōmra ya fa wufa Papay, asaya, ya fa kata cek hay tabiya anda anga ma lōvyā nga kata. Yaw, lacam! Nakwa la!»

15

Yesu a lōvey anga wudez ma yey babēza maaya

¹ Yesu aa guzltar a gula anga hay, a lōvtar: «Yah na, wudez * masa fara fara ma yey babēza maaya. Bay nga wudez e na, ara Papay.

² Mey-har adaw hay cōpa masa ma yam babēza ba na, Papay a dōsita. Ama masa ma yam babēza na, aa kōlhata amba a yam babēza ma fōna.

³ Mey masa yah ma wuzdakwara kefe na, ta pōrkwara mevel akwar sem.

⁴ Njam macōmkaya ta yah anda yah manjakaya macōmkaya ta akwar. Mey-har nga wudez madōslkaya sem na, a gwa nga yey babēza saya daw? Anga letek kōne, da akwar macōmkaya ta yah daa ba na, ka da tōram cek nga tede.

⁵ «Yah na, wudez. Akwar na, mey-har hay a. Da ndaw macōmkaya ta yah, yah may macōmkaya ta ndaw aha na, menjey nga ndaw aha a key la maaya fa mey nga Gazlavay. Maja da akwar macōmkaya ta yah daa ba na, akwar fa da gwamara nga key kwa meeme daa ba sōlak.

14:27 14.27 16.33; 20.19, 21 **14:28 14.28** 8.14 **14:29 14.29** 13.19 **14:30 14.30** 12.31 **14:31 14.31** 15.10; Mt 26.46 * **15:1 15.1** wudez masa fara fara ma yey babēza maaya: Wudez e na, a zōlmara ta mey Pēlta «*inabohi*». Zleezle Gazlavay a wa wudez e kefe ta Israyel hay. Ama Israyel hay ta tōram sem nga cek nga tede maja ata ma mbōdmar dēba a Gazlavay. Anda kefe, ata anda wudez ma yey babēza maaya ba. Nōka Jeremey 2.21. **15:1 15.1** Aw 10.1; Ps 80.9-12 **15:2 15.2** Mt 3.10 **15:3 15.3** 13.10 **15:4 15.4-5** 6.56; 15.7, 10, 16; Rm 11.17-18; 2Kwr 3.5; 4.7; 1Jn 2.6, 28; 3.6, 24

⁶ Da ndaw aa macəmkaya ta yah daa ba na, a da hazakadamara ndaw aha ta cakay anda mey-har hay nga wudez madəsltakaya ma hazakadamara ta cakay, fa dəba ha, a kweley. A kusmamara, a pam awaw fa vəda nga wewurey.

⁷ Da akwar macəmkaya ta yah, asaya, da akwar fa təbmara mey adaw mandaw mandaw na, cacəfdam kwa cek wura wura, ka hətam la.

⁸ Da akwar fa kam maaya mandaw mandaw na, ndəhay a sərmara la akwar gula adaw hay. Anda kefe, ndəhay a da həlmamara Papay maja.

⁹ Ya fa wudkwar anda Papay ma wudya may. Njam daa mewudey-vaw adaw.

¹⁰ Da akwar fa namar ray a mewey adaw na, ka njam la daa mewudey-vaw adaw. Ara anda yah ma nar ray a mewey nga Papay, yah manjakaya daa mewudey-vaw anga may.

¹¹ «Yaa guzlkwar anda kefe na, amba kaa səmam anda yah maa səmey kefe may, asaya, amba ka njam daa meesəmey masa fara fara.

¹² Ehe, ya kadakwara mewey adaw: Wudam vaw anda yah ma wudkwar kefe.

¹³ Ndaw ma vəlda heter anga nga məcey maja jam anga hay na, ngene ara mewudey-vaw mahura.

¹⁴ Da akwar fa kamara cek masa yah ma ləvkwar nga key na, ngene akwar jam adaw hay.

¹⁵ Ya fa da zəlkwar ndəhay ma ka sləra adaw hay daa saba maja ndaw ma ka sləra na, a səra cek masa bay anga ma key tabiya ba. Ama ya zəlkwar jam adaw hay, maja cek tabiya masa yah ma cəndərwa fa Papay na, ya ta wuzdakwara cay.

¹⁶ Ma walamaya nga key bay akwar na, ara akwar ba. Sasəkar jak, ara yah ma walakwar. Ya walakwar na, amba ka diyam, ka kamara sləra adaw, sləra ha a da njeý nga sərmataw. Anda kefe, Papay a da vəldakwara cek masa akwar maa cəfdafamara ta mezəley adaw.

¹⁷ Cek masa yah ma wudey fa akwar na, wudam vaw.»

Mey da ray ndəhay ma da rəsmata ata Yesu ta gula anga hay

¹⁸ Yesu aa guzltar a gula anga hay saya, a ləvtar: «Da ndəhay da bəla fa rəsmakwar na, sərmara a rəsam teesəd na, yah.

15:6 15.6 Mt 7.19 15:7 15.7 15.16 15:8 15.8 14.13; 17.1 15:9 15.9 13.1; 5.18 15:10 15.10 14.15 15:11 15.11 16.22, 24; 17.13; 1Jn 1.4 15:12 15.12 13.34; 1Jn 4.11 15:13 15.13 10.11 15:16 15.16 14.13; 15.7; 16.23-24; Mt 18.19; 1Jn 3.22; 5.14-15; Janj 6.70; 13.18 15:17 15.17 13.34 15:18 15.18 7.7

¹⁹ Da akwar anda ndəhay da bəla keɗe na, anja a wuɗmakwar la maja akwar ndəhay ata hay. Ama akwar na, ndəhay ata hay ba, maja ara yah ma walakwar wal da wuzlah ata. Ata ma rəsmakwar na, maja.

²⁰ Sərfadamara mey masa yah maa guzlkwar heyey: “Ndaw ma ka sləra ŋga ndaw na, a fəna bay ŋga sləra ha ba.” Da ta sərdamaya banay la na, a sərdamakwar banay la kəne may. Yaw, da ta cənmaya mey la na, a cənmakwar mey la may.

²¹ A da sərdamakwar banay a na, maja yah. A kamara anda keɗe na, maja a sərmara ndaw ma slərɗiwa a bəla ba.

²² Da yah ma sawa a bəla ŋga wuzɗatara mey ŋga Gazlavay daa ba na, anja meɓərey da ray ata ŋga kərzata daa ba. Ama wure keɗe masa yah ma sawa a bəla ŋga wuzɗatara mey ŋga Gazlavay sem keɗe na, ata ta mey ŋga guzley ŋga ləhɗata daa meɓərey ata daa ba.

²³ Ndaw ma rəsyə na, a key ŋgene, a rəsa Papay may.

²⁴ Yah ma key maazla hay masa ndaw ma gwa ŋga kata ba la da wuzlah ata. Anja da daa ba na, meɓərey da ray ata daa ba. Ama wure keɗe masa ata ma hətmatar maazla hay a ta dey ata la kaa na, a rəsmandar ta Papay cəŋga gway.

²⁵ Ama cek aha, a key anda mawuzlalakaya daa kwakwas ata, ma ləvey: “A rəsmaya ŋga tede gway.”

²⁶ Yesu aa guzltar a gula ŋga hay saya, a ləvtar: «Sərmara, ndaw ma da jənkwar a sawa la. A da sawa ta fa Papay. Masa yah ma daw cay a cakay Papay na, ya slərdakwara la. Ndaw aha na, ara *Mesəfney ŋga Gazlavay, a da wuzɗatara cəved masa fara fara a ndəhay. A da key sede da ray aɗaw.

²⁷ Akwar may, ka da kam sede da ray aɗaw, maja dəga yah ma zla sləra aɗaw na, aləkwa bama haa wure keɗe.

16

¹ «Yah ma ləvkwar anda keɗe na, amba kwa da fa sərdamakwar banay na, ka təɓmara mey aɗaw cəŋga, ka mɓəkdamara ba.

² A da bəlmakwar daa way-mewuzey-mey hay ŋga Gazlavay. Asaya pas a, a wuswa la masa ndəhay ma da kəɗmakwar vagay na, a wulkam a key ŋgene, a kamar cek maaya ŋgada Gazlavay.

³ A da kam cek maaya ba anda keɗe na, maja ta sərmara Papay daa ba, asaya, maja ta sərmaya daa ba may.

⁴ Ama ya wuzdakwara anda keɗe na, amba da pas a ta wuswa cay, fa kamakwar anda keɗe na, ka sərfadamara yah ma wuzdakwara cay la.»

Mey da ray Mesəfney nga Gazlavay ma da ka sləra anga

Yesu aa guzltar saya, a ləvtar: «Dəga yah ma zla sləra aɗaw, yah ma wuzdakwara mey a daa ba na, maja yah daha da cakay akwar ɗagay.

⁵ Wure keɗe, ya da daw a cakay ndaw ma slərɗiwa, kwa ndaw pal dasi akwar ma daa cəɗɗaya: “Ka daw ama?” na, daa ba.

⁶ Ama akwar ta mewulkey kalah maja yah ma ləvkwar anda keɗe he.

⁷ Yaw, ya faa guzlkwar mey masa fara fara, anga maaya ngada akwar amba ya vəhey fa Papay a vad. Fara fara, da ya ta vəhey daa ba na, *Mesəfney nga Gazlavay, ndaw ma da jənkwar heyey, fa da sawa daa ba. Ama da ya ta vəhey la na, ya slərdakwara la.

⁸ Da ta wuswa cay na, a da wuzdatara a ndəhay da bəla mey masa fara fara amba a sərmara mebərey ata, amba a sərmara cəved masa maaya, asaya, amba a sərmara sariya masa Gazlavay ma da ka.

⁹ A da sərmara mebərey ata na, maja ata ma pamaya nga ndaw ata fara fara ba.

¹⁰ A da sərmara cəved masa maaya na, maja ya fa da vəhey ngada fa Papay, akwar fa da hətmaya daa saba.

¹¹ A da sərmara sariya masa Gazlavay ma ka na, maja Gazlavay ta kar sariya cay a bay-malula, ndaw ma wa bəla keɗe.

¹² «Ya fa wuɗey ngaa guzlkwar da ray cek hay ga, ama wure keɗe na, anga ta banay amba ka cəndamara.

¹³ Da masa Mesəfney ma wuzda mey masa fara fara da ray Gazlavay heyey ta wuswa cay na, a da wuzdakwara mey masa fara fara da ray cek hay tabiya. Mey masa aa ma daa guzlda na, a sawa ta fa gəɗan anga ba. Ama a daa guzley mey masa anga ma cəndərwa da vad. A da wuzdakwara cek ma da key ngada fa mey.

¹⁴ Mesəfney a na, a da wuzdərwa gəɗan aɗaw amba ndəhay a həslmaya ray maja cek hay tabiya aa ma wuzdakwara na, a cəndərwa fa yah.

¹⁵ Cek hay tabiya masa Papay ma wata na, yah ma wata may. Ara maja ngene, yah maa guzlkwar, ya løyey cek hay tabiya masa Mesəfney a ma wuzdakwara na, a cəndərwa fa yah.»

Mey da ray gula hay nga Yesu ma da təwam ta ma daa səmam

¹⁶ Yesu aa guzltar a gula anğa hay saya, a ləvtar: «Menjey nekədey fedə, akwar fa da hətmaya fa dey daa saba. Fa dəba ha nekədey na, ka hətmaya la saya.»

¹⁷ Maja ngene, gula anğa hay siya aa guzlam da wuzlah ata, a ləvam: «Aa guzldakwar, a løyey: “Menjey nekədey fedə, ka hətmaya fa dey daa saba. Fa dəba ha nekədey na, ka hətmaya la saya.” Yaw, a løyey saya: “Ya da daw fa Papay a vad.” Mey hay a kedə na, a wudey nga løyey me?

¹⁸ A løyey: “Menjey nekədey” na, a wudey nga løyey me? Mey a, a cəney ba.»

¹⁹ Yesu a sərə gula anğa hay fa wudam ngaa cəfdamara. Anda kedə, ta', aa guzltar, a ləvtar: «Ya taa guzlkwar la, ya ləvkwar: “Menjey nekədey fedə, akwar fa da hətmaya fa dey daa ba. Fa dəba ha nekədey na, ka hətmaya la saya.” Kaa cəfdam vaw da wuzlah akwar na, nga sərey mey a kedə daw?

²⁰ Ya fa ləvkwar fara fara, cay na, ka təwam la, kaa hura la da wuzlah akwar, ama ndəhay da bəla siya na, aa səmam la. Ka lələkam la, ama fa dəba ha, kaa səmam la.

²¹ «Wulkam da ray ngwas ta hwaɗ taw! Da masa fa da yey na, hwaɗ a, a sərda banay. Ama da bəzey ta yawa cay na, a sərfada banay a saba, aa səmey maja aa ma hətey bəzey mawiya.

²² Wure kedə akwar may, daa mewulkey, ama ya hətkwar la saya. Anda kedə, ka daa səmam, kwa ndaw ma da təkakwar ngaa səmey a daa ba səlak.

²³ Ta pas a ngene, ka sərmata cek hay cəpa la, akwar fa daa cəfdafamaya nga sərey cek daa saba. Yaw, ya fa ləvkwar fara fara, da kaa cəfdam kwa meeme fa Papay ta mezəley adaw na, Papay a, a vəldakwara la.

²⁴ Haa wure kedə, ka taa cəfdam cek ta mezəley adaw daa ba aran. Anda kedə, cacəfdam cek, ka hətam la amba ka njam daa meesəmey masa fara fara.»

Mey da ray gədan nga Yesu da ray bəla

²⁵ Yesu aa guzltar a gula anğa hay saya, a ləvtar: «Yah maa guzlkwar tabiya na, ta mey-menjey. Yaw, pas a, a

wuswa la masa yah ma daa guzlkwar ta mey-menjey saba, ya da kadakwa mabara nga mey da ray Papay.

²⁶ Ta pas njene na, ka daa cɔɔfam cek fa Papay ta mezɔley adaw. Ka da wulkam ara yah ma daa cɔɔfakwara Papay kwa? Kay, kɔne ba, ama ara akwar ta ray akwar ma daa cɔɔdamara,

²⁷ maja Papay a ta ray anja a wudkwar. A wudkwar na, maja akwar ma wudmaya, asaya, maja akwar ma tɔbmara ya sawa na, da fa anja.

²⁸ Ya sawa a bɔla keɔe na, da cakay Papay. Wure keɔe, ya da mbɔkda bɔla ha, ya da vɔhey ngada fa Papay a.»

²⁹ Gula anja hay a mbɔɔdamara, a lɔvmar: «Nɔka, wure keɔe, ka fa wuzdɔrwa mey a maaya maaya, ka faa guzley ta mey-menjey daa saba.

³⁰ Wure keɔe, ala fa sɔrmara, kah na, ka sɔrta cek hay tabiya. Cek masa ndaw ma wudɔey ngaa cɔɔfaka na, ka ta sɔra sem. Maja njene, ya tɔbmara, kah na, ka sawa da fa Gazlavay.»

³¹ Yesu a mbɔɔdatara, a lɔvta: «Wure keɔe na, akwar ma tɔbmara la, ya sawa da fa Gazlavay dɔba daw?

³² Yaw, pas a, a sawa la, ta wuswa cay, masa akwar tabiya ka daa kwacam ray pal pal, kwa waawa a da daw a way anja, ka da mbɔkdamaya taava adaw. Ama fara fara, yah taava adaw ba, maja Papay aa ta yah.

³³ Yah maa guzlkwar mey tabiya keɔe na, amba akwar masa macɔmkaya ta yah keɔe, ka njam daa zazay. Ka sɔram banay la da bɔla keɔe, ama kam gɔdanj. Yah na, ya ta fɔna bɔla ha sem ta gɔdanj.»

17

Yesu a dɔrey dangay maja gula anja hay

¹ Fa dɔba ha, Yesu maa guzltar cay a gula anja hay heyey na, ta', a banɔɔa dey a vad, a dɔrey dangay a Gazlavay, a lɔvey: «Papay, pas masa yah ma da sɔrey banay na, ta wuswa cay. Wuzdɔrwa gɔdanj adaw, yah Bɔzey akah, a ndɔhay, amba yah may, ya wuzdɔrwa gɔdanj akah a ndɔhay.

² Ka ta vɔlya gɔdanj la nga wey da ray ndɔhay tabiya da bɔla. Anda keɔe, ya da vɔltar heter mendɔvey ba ngada ndɔhay masa kah ma vɔldatiwa asi har adaw.

³ Heter mendəvey ba ha na, ara amba ndəhay a sərmaka, kah na, Gazlavay pal masa fara fara, asaya, ara amba a sərmaya, yah Yesu *Kəriste masa kah ma slərdərwa.

⁴ Masa yah da bəla keđe na, ya ta wuzdatara gədanj akah cay a ndəhay. Asaya, yah ma ndəvda sləra masa kah ma vəldiwa nja key cay cəpa.

⁵ Wure keđe, Papay Bay Gazlavay, vəhdəya fa mey akah, həslyə ray saya, anda kah ma həslyə ray daa masa yah da cakay akah dəga bəla ta zlar nja ləmey daa ba aranj heyey.

⁶ «Yah ma wuzdaka la a ndəhay masa kah ma walata da bəla nja njam asi har adaw, amba a sərmaka. Ahaw, ndəhay a na, ara nja akah hay, ama kah ma vəldatiwa la asi har adaw, anda keđe, fa cənmake mey.

⁷ Wure keđe, a sərmara cek hay tabiya masa nja yah na, a samawa ta fa kah.

⁸ A sərmara na, maja mey masa kah ma wuzdiwa na, yah ma wuzdatara la, ta cəndamara la. A sərmara fara fara ya sawa da fa kah, asaya, ta təbmara la ara kah ma slərđiwa.

⁹ «Ya dərey danjay na, maja ndəhay a, ba na, maja ndəhay da bəla cəpa ba. Ahaw, ya dərey danjay maja ndəhay masa kah ma vəldatiwa asi har adaw. Ata na, ndəhay akah hay.

¹⁰ Yaw, ndəhay adaw hay tabiya na, ara ndəhay akah hay. Asaya, ndəhay akah hay tabiya na, ara ndəhay adaw hay. Ya fa wuzda gədanj adaw ta fa ndəhay masa kah ma vəldatiwa ha.

¹¹ Menjey nekədey fedə, ya da mbəkda bəla. Ata na, ata da bəla keđe mandaw mandaw. Ya da vəhey nğada fa kah. Papay Bay Gazlavay pal, nəkfatar dey ta gədanj akah, gədanj masa kah ma vəldiwa heyey. Anda keđe, a da njam macəmkaya pal anda aləkwa cew e macəmkaya pal.

¹² Daa masa ala bama heyey na, ya ta nəkfatar dey la ta gədanj masa kah ma vəldiwa. Yah ma nəkfatar dey la, kwa ndaw pal taa zədey daa ba, si ndaw masa ma daa zədey cənga, anda mey nja Gazlavay mawuzlalakaya zleezle * ma ləvey heyey.

¹³ Papay, wure keđe, ya fa da vəhey fa kah. Yaa cəfdaka anda keđe daa masa yah da bəla keđe amba ndəhay a, aa səmam anda yah maa səmey, a njam daa meesəmey masa fara fara.

17:3 17.3 1Jn 5.20 17:4 17.4 4.34 17:5 17.5 1.1-2; 8.58; 17.24 17:6 17.6 17.26 17:10 17.10 15.8 17:11 17.11-12 6.39; 13.18; *macəmkaya pal*: 10.30; 17.21-23; Gal 3.28 * 17:12 17.12 mey nja Gazlavay mawuzlalakaya zleezle: Nəka Ps 41.10ta Janj 13.18. 17:13 17.13 15.11

¹⁴ Yah na, yah ma wuzdatara mey akah la a ndəhay adaw hay, ama ndəhay siya da bəla fa rəsmata, maja ata na, ara ndəhay ŋga bəla saba. Yah may, yah ndaw ŋga bəla ba.

¹⁵ Papay, ya taa cəfdaka amba ka badata da bəla keđe la na, daa ba, ama yaa cəfdaka na, amba ka nəkfatar dey maja bay-malula a da katar cek maaya ba.

¹⁶ Ata na, ara ndəhay ŋga bəla keđe ba anda yah ndaw ŋga bəla keđe ba may.

¹⁷ Mey akah na, ara mey masa fara fara. Tərdata ndəhay a ŋga ndəhay akah hay ta fa mey akah masa fara fara ha.

¹⁸ Ehe, ya fa slərdata fa ndəhay da bəla anda kah ma slərdiwa may.

¹⁹ Yah na, ya vəldakawa heter adaw maja ata, amba ata may, a təram ndəhay akah hay fara fara ta fa mey akah masa fara fara keđe.

²⁰ «Ya dərey danğay na, maja ndəhay adaw hay keđe daada ba, ama ya dərey danğay maja ndəhay ma da pamaya ŋga ndaw ata fara fara ta fa mey masa ata ma da wuzdamatara.

²¹ Anda keđe, maaya na, ndəhay a njam macəmkaya pal anda kah Papay, kah ta yah, yah may, yah ta kah. Maaya na, a njam ta aləkwa, amba ndəhay siya da bəla a sərmara ara kah ma slərdiwa.

²² Yah ma vəldatara gədanj masa kah ma vəlđiwa heyey cay amba a njam macəmkaya pal anda yah ta kah macəmkaya pal may.

²³ Yah macəmkaya ta ata anda kah macəmkaya ta yah. Anda keđe, a da njam macəmkaya pal maaya maaya ma fəna, amba ndəhay siya da bəla a sərmara ara kah ma slərđiwa a bəla, asaya, amba a sərmara ka fa wudfta anda kah ma wudfya.

²⁴ «Papay, ahaw, kah ma vəldatiwa ndəhay a la. Aa slam da vad masa yah ma da njeý a hwad a na, ya wudəy anja ya njam bama ta ata. Anda keđe, a hətmar gədanj masa kah ma vəlđiwa heyey la, aa səmam da ray a. Vəlđiwa gədanj a, maja ka fa wudfya dəga bəla ta ləmey daa ba aranj.

²⁵ Papay, ndaw ma ka cek ta cəved e, ndəhay siya ga da bəla na, ta sərmaka daa ba aranj. Yah na, ya ta sərka cay, asaya, ndəhay adaw hay ta sərmara cay ara kah ma slərđiwa a bəla.

²⁶ Papay, ya ta wuzdaka la a ndəhay adaw hay a, amba a sərmaka. Ya wuzdaka la amba a sərmaka cəŋga, amba a

wudfam vaw anda kah ma wudfya kalah kedfe, asaya, amba ya njeý macemkaya ta ata.»

18

A kərzamara Yesu

(*Matiye 26.47-56; Mark 14.43-50; Luk 22.47-53*)

¹ Masa Yesu ma dərey danggay cay na, ta', a diyam ta gula anğa hay a dey lanğar nğa wayam nğa Sedəranw. Fetede na, jerne daha. A mbəzam ta gula anğa hay a, aa jerne he.

² Yaw, Juda, ndaw ma da vəlda Yesu a har masa-gəra anğa hay heyey, a səra slam aha, maja Yesu ta diyam la dey weewe a hwađ a ta gula anğa hay a.

³ Juda a nğəley sewje hay ga, asaya, a nğəley ndəhay ma jəda *Way-mekey-kwakwas nğa Gazlavay. Ara *bay-ray hay nğa ndəhay ma ka kwakwas nğa Gazlavay ta *Fariza hay ma slərdamata. Ta', a diyam aa jerne he dəba. Ata cəpa ta cek hay nğa vəram, ta petərļa hay, leŋ awaw mandəvdatakaya fa har fa har.

⁴ Yesu na, ta səra cek ma da hətfar sem. Da ray nğene, a nğəchey nğada fa ata, aa cəfdata, a ləvtar: «Ka səpam na, wa?»

⁵ A mbəđdamara, a ləvmar: «Ya səpam Yesu ndaw *Nezeret.» Ta', a ləvtar: «Yesu a na, ara yah.» Juda, ndaw ma da vəlda Yesu a heyey, aa da wuzlah ata.

⁶ Masa Yesu a maa guzley, ma ləvey: «Yesu a na, ara yah» heyey na, a zluram. Da ray nğene, a nğəcham ta dəba ta dəba, a tədam zləmbəla'-la'-la' a hwayak.

⁷ Ta', Yesu aa cəfdata saya, a ləvtar: «Ka səpam na, wa?» A mbəđdamara, a ləvmar: «Ya səpam Yesu ndaw Nezeret.»

⁸ Yesu a ləvtar: «Yah ma ləvkwar la Yesu a na, ara yah. Da ka səpam yah na, mbəkdamata ndəhay siya kedfe nğa diyam!»

⁹ A key anda kedfe na, amba mey nğa Yesu daa medərey-danggay anğa heyey a key. Mey a, a ləvey: «Kwa ya taa zədey ndaw pal dasi ndəhay masa kah ma vəldatiwa heyey na, daa ba.»

¹⁰ *Simanw *Piyer na, anğa ta dəlaw da har. Ta', a mədərwa daa way a, a nğəma mədərlam nğa *ndaw mahura da ray ndəhay ma ka kwakwas nğa Gazlavay kaa heyey, cərah! a cərhara sləmay ta dey nğa zəmay. A zəlmara ndaw masa Simanw ma cərhara sləmay a na, Malkus.

¹¹ Ama ta', Yesu aa guzlar a Piyer, a ləvar: «Mada dələw akah aa way a. Ka wulkey banay masa Papay ma wudey ya səra na, ŋga wusfaya ba daw?»

A handamara Yesu fa Han

¹² Sewje hay ga ta *bay-ray ata leŋ ndəhay ma jəfa *Way-mekey-kwakwas ŋga Gazlavay masa mahura hay ŋga *Jəwif hay ma slərdamata heyey na, a kərzamara Yesu dəba, a jəwmara.

¹³ A handamara teesəd na, a way Han *. Han aha na, ara mesey ŋga Kayif. Kayif e may, ara ndaw mahura da ray ndəhay ma ka kwakwas ŋga Gazlavay ta mevey a ŋgene.

¹⁴ Daa ŋgene na, Kayif a taa guzltar la ŋgada mahura hay ŋga Jəwif hay, a ləvtar: «Maaya na, ndaw pal a məcey, da ray aləkwa Jəwif hay tabiya ma da paslakwa.»

*Piyer a cey mey a ləvey aŋga gula ŋga Yesu ba
(Matiye 26.69, 70; Mark 14.66-68; Luk 22.55-57)*

¹⁵ Ata *Simanɔw *Piyer ta gula ŋga Yesu laŋgar daha a səpmar wurzay ŋga Yesu a. *Ndaw mahura da ray ndəhay ma ka kwakwas ŋga Gazlavay a, a səra gula ŋga Yesu laŋgar a. Da ray ŋgene, ta', gula ha a mbəzam ta Yesu a, a way ndaw mahura ha.

¹⁶ Ama Piyer na, aŋga ta daa ambaw, gweegwe fa meymbew. Gula laŋgar masa ndaw mahura ha ma səra heyey na, ta', a bawa aa ambaw, aa cəfda dam ma jəfa meymbew e ŋga mbəzdərwa Piyer. Ta', Piyer a mbəzey.

¹⁷ Dam ma jəfa meymbew e aa cəfda Piyer, a ləvar: «Hey! kah na, ndaw pal dasi gula hay ŋga ndaw aha may, ba diya?» Piyer a mbəddara, a ləvar: «Kay! Yah na, gula aŋga ba.»

¹⁸ Ndəhay ma ka sləra fetede leŋ ndəhay ma jəfa *Way-mekey-kwakwas ŋga Gazlavay heyey ta gədam awaw la, fa sətmarə maja memed fa key. Piyer heyey aa da cakay ata, fa sətəy awaw a may.

Yesu fa mey ŋga Han

(Matiye 26.59-66; Mark 14.55-64; Luk 22.66-71)

¹⁹ *Ndaw mahura da ray ndəhay ma ka kwakwas ŋga Gazlavay aa cəfda Yesu da ray gula aŋga hay ta da ray mey masa aa maa sərkatatara a ndəhay.

18:11 18.11 Mt 20.22; 26.39 * **18:13 18.13** Han ta key mahura da ray ndəhay ma ka kwakwas ŋga Gazlavay la teesəd da ray Kayif. Da ray ŋgene, Jəwif hay ga fa pamara ŋga ndaw mahura da ray ndəhay ma ka kwakwas cəŋga. **18:13 18.13** 18.24; Lk 3.2 **18:14 18.14** 11.49-50 **18:15 18.15-16** Mt 26.28 **18:17 18.17** 18.25

²⁰ Yesu a mbəḏdara, a ləvar: «Ya taa guzley la fa mey nga ndəhay tabiya, ya taa sərkedey ndəhay la mandaw mandaw daa *way-mewuzey-mey nga Gazlavay ta daa *Way-mekey-kwakwas nga Gazlavay masa *Jəwif hay ma cəmam tabiya a hwaḏ a. Yah ma bey mey ta bey daa ba səlak.

²¹ Kaa, kaa cəḏfaya na, maja me? Daw fa ndəhay ma cəndamara mey aḏaw, cacəḏdata, ata na, a sərmara mey masa yah ma wuzdatara ha maaya maaya.»

²² Daa masa Yesu faa guzley anda kede na, ndaw pal dasi ndəhay ma jəḏfa Way-mekey-kwakwas fetede, a sləngar matapa-har a Yesu. Ta', aa guzlar, a ləvar: «A mbəḏam mey ngada *ndaw mahura da ray ndəhay ma ka kwakwas nga Gazlavay na, kəne daw?»

²³ Yesu a mbəḏdara, a ləvar: «Da yah maa guzley mey maaya ba la na, wuzdiwa taw. Yaw, da yah maa guzley mey maaya la na, anja ka kəḏya fa me?»

²⁴ Fa dəḃa ha, Han a ləvtar a ndəhay heyey nga handamara fa Kayif, ndaw mahura da ray ndəhay ma ka kwakwas nga Jəwif hay ta mevey a ngene. Yesu a, majəwkaya cəngə.

*Piyer a cey mey a ləvey anga gula nga Yesu ba cəngə
(Matiye 26.71-75; Mark 14.69-72; Luk 22.58-62)*

²⁵ Masa *Simanjw *Piyer fa sətəy awaw fetede heyey na, ndəhay fetede he, aa cəḏdamara, a ləvmar: «Kah na, gula pal da wuzlah gula hay nga ndaw aha may, ba diya?» Ama Piyer a cada mey, a ləvey: «Kay! yah na, gula anga ba.»

²⁶ Fetede, ndaw ma ka sləra nga *ndaw mahura da ray ndəhay ma ka kwakwas nga Gazlavay daha. Ndaw aha ara səkway nga ndaw masa Piyer ma cərhara sləmay heyey. Ndaw aha, aa guzlar a Piyer, a ləvar: «Kah na, yah ma hətkwar la ta ata ndaw aha daa jerne, ba diya?»

²⁷ Piyer a cada mey cəngə. Daa ngene, gwagwalak ta', a cey ḏay.

*Yesu fa mey nga Bay Pilat
(Matiye 27.1, 2, 11-14; Mark 15.1-5; Luk 23.1-5)*

²⁸ Pərek pərek, a badamara Yesu da way Kayif, a handamara a way Pilat, Bay Rawma. Ama mahura hay nga *Jəwif hay na, a mbəzam a way a ba, maja a wuḏam nga zləbmara kwakwas ata ba, anda kede amba a gwamara nga zəmey ḏaf nga gwagway nga *Pak.

²⁹ Maja ṅgene, Bay Pilat, a bawa aa ambaw, a hɔ̄tfatar. Ta', aa cɔ̄fdata, a lɔ̄vtar: «Ka kɔ̄rzamɔ̄rwa ndaw a keɔ̄de na, a kawa me?»

³⁰ A mbɔ̄ɔ̄damara, a lɔ̄vmar: «Da ta key cek malamba daa ba na, anja ya handamɔ̄rwa fa kah la daw?»

³¹ Bay Pilat a mbɔ̄ɔ̄datara, a lɔ̄vtar: «Akwar ta ray akwar, ṅgɔ̄lmara ndaw a, dɔ̄slmara sariya aṅga anda kwakwas akwar ma lɔ̄vey.» Mahura hay ṅga Jɔ̄wif hay a mbɔ̄ɔ̄damara, a lɔ̄vmar: «Ala na, ta cɔ̄ved ṅga kɔ̄ɔ̄ɔ̄y ndaw vagay daa ba.»

³² Cek aha, a key anda keɔ̄de na, amba Yesu a mɔ̄cey fa hwadam mazlangalakaya anda aa ma lɔ̄vey a da mɔ̄cey heyey.

³³ Bay Pilat a mbɔ̄zey ta ray ṅgada way, a zɔ̄la Yesu. Ta', aa cɔ̄fda, a lɔ̄var: «Kah na, bay ṅga Jɔ̄wif hay daw?»

³⁴ Yesu a mbɔ̄ɔ̄dara, a lɔ̄var: «Kaa guzley anda keɔ̄de na, ara mewulkey akah daw, da daa ba, ara ndɔ̄hay ma kadamakawa daw?»

³⁵ Bay Pilat a mbɔ̄ɔ̄dara, a lɔ̄var: «Yah na, ndaw Jɔ̄wif daw? Ara sɔ̄kway akah hay ta *bay-ray hay ṅga ndɔ̄hay ma ka kwakwas akwar hay ma handamakawa fa yah keɔ̄de. Kaa ka key maaya ba na, me?»

³⁶ Yesu a mbɔ̄ɔ̄dara, a lɔ̄var: «Ya wey da ray ndɔ̄hay na, da bɔ̄la keɔ̄de ba. Da yah bay da bɔ̄la keɔ̄de na, anja gula aɔ̄aw hay a kɔ̄dam vaw la amba mahura hay ṅga Jɔ̄wif hay a kɔ̄rzamaya ba. Ama wure keɔ̄de, ya fa wey da ray ndɔ̄hay da bɔ̄la keɔ̄de daa ba.»

³⁷ Da ray ṅgene, Bay Pilat aa cɔ̄fda, a lɔ̄var: «Kaa kah na, bay dɔ̄ba daw?» Yesu a mbɔ̄ɔ̄dara, a lɔ̄var: «Anda kah ma lɔ̄vey, yah bay. Ya yawa, ya sawa a bɔ̄la na, ṅga wuzdatara mey masa fara fara a ndɔ̄hay. Kwa waawa ma sɔ̄pey cɔ̄ved masa fara fara na, ara ndaw ma jɔ̄key slɔ̄may fa mey aɔ̄aw.»

³⁸ Bay Pilat a mbɔ̄ɔ̄dara, a lɔ̄var: «Mey masa fara fara na, mey wura?»

A kamar sariya a Yesu

(Matiye 27.15-31; Mark 15.6-20; Luk 23.13-25)

Masa Bay Pilat maa guzley la anda keɔ̄de na, ta', a bawa aa ambaw saya fa mey ṅga Jɔ̄wif hay. A lɔ̄vtar: «Yah na, yah ma hɔ̄tey cek tɔ̄ɔ̄de ṅga kɔ̄ɔ̄ɔ̄y ndaw keɔ̄de vagay na, daa ba.

³⁹ Yaw, anda kwakwas akwar ma wudey na, si ya pɔ̄skakwar ndaw pal daa fɔ̄rsɔ̄ne ta gwagway ṅga *Pak.

Anda keɗe, ka wudam na, ya pɛskakwar bay nga *Jɛwif hay daw?»

⁴⁰ A wudam, a lɛvam: «Kay! ka mbɛkda ndaw keɗe ba. Ama pɛskandar na, Barabas.» Barabas a na, ara ndaw-mayal ma sla ɗay nga ndaw.

19

¹ Ta', Bay Pilat a lɛvtar a sewje hay nga slɛɗmara Yesu ta laway.

² Sewje hay a cam hatak, a paɗamar ray anda gursaw nga bay. Asaya, a kɛzɓmar zana magaza nga bay hay fa vaw.

³ Ta', a ngɛcham a cakay a, a sasanɗoram a ray a, a lɛvmar: «Zay daw, bay nga Jɛwif hay?» Fa dɛba ha, kanj! kanj! a vɛlmar matapa-har.

⁴ Ta', Bay Pilat a bawa aa ambaw saya, aa guzltar a Jɛwif hay, a lɛvtar: «Dagay, jɛkam slɛmay! Ya da badakwara ndaw aha aa ambaw amba ka sɛrmara kwa ya ta hɛtey cek maaya ba masa anɗa ma ka na, daa ba.»

⁵ Yesu ta', a bawa aa ambaw dɛba. Anɗa ta gursaw nga hatak heyey da ray, leɗ zana magaza heyey fa vaw. Pilat aa guzltar, a lɛvtar: «Ehe ndaw aha!»

⁶ Ama masa *bay-ray hay nga ndɛhay ma ka kwakwas nga Gazlavay ta ndɛhay ata hay ma hɛtmar na, a wudam ta gɛɗanɗ, a lɛvam: «Dɛra fa hwadam mazlanɗalakaya! Dɛra fa hwadam mazlanɗalakaya!» Pilat aa guzltar saya, a lɛvtar: «Ehe, ngɛlmara ndaw aha, dɛrmara ta har akwar fa hwadam mazlanɗalakaya ha, maja yah na, kwa yah ma hɛtey cek maaya ba masa anɗa ma ka na, daa ba.»

⁷ Jɛwif hay a mbɛɗdamara, a lɛvmar: «Kwakwas ala daha, anda kwakwas a ma lɛvey na, si mekɛɗey ndaw aha keɗe vagay maja taa guzley la, a lɛvey anɗa Bɛzey nga Gazlavay.»

⁸ Masa Bay Pilat ma cɛnda anɗa ma lɛvey anɗa Bɛzey nga Gazlavay na, mandɛrzay a kar ta gɛɗanɗ ta gɛɗanɗ.

⁹ A mbɛzey a way saya, ta', aa cɛɗa Yesu a, a lɛvar: «Kah na, ka sawa dama?» Ama kwa Yesu ta mbɛɗdara daa ba.

¹⁰ Da ray ngene, Bay Pilat aa guzlar, a lɛvar: «Kaa guzley ba keɗe na, ngada yah, ba diya? Ka sɛra, yah na, ya gwa nga mbɛkdaka, da daa ba, ya gwa nga dɛrka fa hwadam mazlanɗalakaya, ba diya?»

¹¹ Yesu a mbɛɗdara, a lɛvar: «Ka gwa nga wey da ray aɗaw ba, si Bay Gazlavay ma vɛlka cɛved. Anda keɗe,

ndaw ma vøldaya asi har akah keđe ta key mebørey sem ma fønka.»

¹² Masa Bay Pilat ma cønda mey a keđe na, a søpey cøved amba a mbøkda Yesu. Ama Jøwif hay a, a wudam ta gødan, a løvam: «Da kah ma mbøkda ndaw keđe sem na, ηgene, kah jam ηga bay mahura *Sezere * saba. Kwa waawa ma pa ray anga ηga bay na, ara masa-gøra ηga bay mahura Sezere, ba diya?»

¹³ Masa Bay Pilat ma cønda mey a keđe saya na, ta', a badørwa Yesu aa ambaw saya. A njeý a ray jannga anga mekey sariya mapakaya da ray slam macacølkaya ta anywa mezøley ta mey *Hebøre «Gabata».

¹⁴ Ara ta pas mediyey vaw ηga key gwagway ηga Pak. Ta wuzlah-pas † na, Bay Pilat a løvta a Jøwif hay a: «Ehe bay akwar.»

¹⁵ Ama a wudam ta gødan, a løvam: «Køđa vagay! Køđa vagay! Døra fa hwadam mazlanjalakaya.» Bay Pilat a mbøđdatara, a løvta: «Bay akwar gway na, ka wudam ya dørkwara fa hwadam mazlanjalakaya gway daw?» *Bay-ray hay ηga ndøhay ma ka kwakwas ηga Gazlavay a mbøđdamara, a løvmar: «Bay ala mahura mekele na, daa ba, si bay Sezere gway.»

¹⁶ Anda keđe, Bay Pilat a vøldatara Yesu amba a dørmara fa hwadam mazlanjalakaya. Ta', a kørzamara Yesu døba.

*A dørmara Yesu fa hwadam mazlanjalakaya
(Matiye 27.32-44; Mark 15.21-32; Luk 23.26-43)*

¹⁷ A badamørwa Yesu daa berney. Daa masa fa badamørwa ha na, Yesu fa la hwadam mazlanjalakaya masa ata ma da dørmara fa vøđa. A handamara ηgadaa slam mezøley ta mey *Hebøre «Gwalgwata», anda meløvey, «slam anda tetesl ηga ray ηga ndaw.»

¹⁸ Fetede, sewje hay ta', a dørmara Yesu fa hwadam mazlanjalakaya ha. A døram ndøhay cew saya a cakay a, pal ta har-zømay, lanjar ta har-gula, Yesu na, aa da wuzlah.

¹⁹ Bay Pilat ta', a løvta a ndøhay ηga wuzlalam mey ma løvey: «Yesu ndaw *Nezeret, bay ηga *Jøwif hay.» Asaya, a løvta ηga sløpmara fa hwadam masa Yesu mazlanjalakaya fa vøđa heyey.

19:11 19.11 10.18 * **19:12 19.12** Sezere ara bay mahura ηga Rawma hay ma wey da ray hwayak hay ga, kwa hwayak ηga Jøwif hay may. **19:12 19.12** 18.37; Lk 23.2; SNM 17.7 † **19:14 19.14** ta wuzlah-pas: Ta mey Gørek a løvey «Børey maakwaw.» Da Janj a sløfa anda Jøwif hay na, børey maakwaw ara ta wuzlah-pas fa aløkwa Mafaw hay. Da Janj a sløfa anda Rawma hay na, ara slam beñ! beñ! fa aløkwa. Nøka Mk 15.25.

²⁰ Jəwif hay ga ta jaŋgamara mey mawuzlalakaya ha la maja slam masa ata ma dərmara Yesu a na, aŋga gweegwe ta berney a. Asaya, ndəhay ga ta jaŋgamara mey a la maja mey a mawuzlalakaya na, ta mey Heberə ta mey Leteŋ leŋ ta mey Gərek †.

²¹ Maja ŋgene, *bay-ray hay ŋga ndəhay ma ka kwakwas ŋga Jəwif hay aa guzlar, a ləvmar: «Ka da mbəkda mey a mawuzlalakaya “Bay ŋga Jəwif hay” anda ŋgene ba. Ama mbədda, wuzlala: “Ndaw aha ta ləvey la: Yah na, yah bay ŋga Jəwif hay”.»

²² Bay Pilat a mbəddatara, a ləvtar: «Cek masa yah ma wuzlala sem na, a da njeŋ mawuzlalakaya anda ŋgene.»

²³ Masa sewje hay ma dərmara Yesu fa hwadam mazlaŋgalakaya cay na, ta', a həlmata zana aŋga hay, a wunkamara slam məfad, fa sewje he fa sewje he. Mambəkakaya zana aŋga maazəma masa mezəvey a daa ba dəga da vad haa kasl a hwayak.

²⁴ Sewje hay a, aa guzlar da wuzlah ata a ləvam: «Ya da ŋgərkwa zana ha ta ŋgərey ba, ama kədkwa caca amba ndaw pal a la.» Cek aha a key anda mey ŋga Gazlavay mawuzlalakaya zleezle ma ləvey:

«Ta wunkamara zana adaw hay sem da wuzlah ata, zana maazəma na, a kədam caca amba ndaw pal a la.»
Yaw, kefe he ara cek masa sewje hay ma kamara.

²⁵ Ata mamaŋ ŋga Yesu, ta dam-mamaha, ta *Mari ŋgwas ŋga Kəlawpas, leŋ Mari da Magdala, malacatakaya da cakay hwadam mazlaŋgalakaya masa ata ma dərmara Yesu fa vəda heyey.

²⁶ Yesu a nəka mamaha. Gula aŋga masa aa ma wudə kalah heyey may, aa da cakay mamaha ha. Ta', Yesu aa guzlar a mamaha, a ləvar: «Mamay, ŋgene na, bəzey akah.»

²⁷ Ta', aa guzlar a gula aŋga ha, a ləvar: «ŋgene na, mamakw.» Dəga ta pas a ŋgene gula ŋga Yesu a ta', a ŋgəla Mari a way aŋga.

(Matiye 27.45-56; Mark 15.33-41; Luk 23.44-49)

²⁸ Daa ŋgene, Yesu a səra ta ndəvda sləra aŋga cay. Ta', aa guzley, a ləvey: «Yam fa kaya.» Aa guzley anda kefe na, amba mey mawuzlalakaya daa dərəwel ŋga Gazlavay zleezle heyey na, a key.

²⁹ Fetefə, kwakulam daha marəhkaya ta yam ŋga babəza ŋga wudez meekwerek e. Sewje hay a jəhwəbam cek anda

† 19:20 19.20 Mey Heberə ara mey Jəwif, Leteŋ ara mey Rawma, Gərek ara mey masa ndəhay ga ma cəndamara daa hwayak hay mekele mekele ŋga Rawm.
19:24 19.24 Ps 22.19 19:25 19.25 Mt 27.55-56; Lk 23.49 19:26 19.26 13.23
19:28 19.28 Ps 22.16

gagəmay aa yam a heyey, a tərvađamara fa mey nga zlanday, a təđdamara a mey Yesu.

³⁰ Yesu maa səba yam nga babəza nga wudez meekwerek e heyey cay na, ta', aa guzley, a ləvey: «Sləra ađaw tabiya, ta ndəvey cay.» Fa dəba ha, a jəkwda ray, pam! a məcey.

Sewje a sləka Yesu aa cakay

³¹ Yesu a məcey na, ta pas masa *Jəwif hay fa điyam vaw ngadaa *pas meməskey-vaw. Ta pas a ngene, mahura hay nga Jəwif hay a wudam vagay hay a njam fa hwadam mazlanđalakaya hay heyey saba, asaya, maja pas meməskey-vaw § a ngene a fənta pas hay meməskey-vaw siya. Da ray ngene, ta', aa cəfdamara Bay Pilat nga ngərfey salay * hay nga ndəhay fa hwadam mazlanđalakaya, asaya, nga padamatərwa salay da ray hwadam hay a.

³² Anda keđe, sewje hay a ngərfamara salay hay nga ndaw ngəeme ta nga ndaw nga dey cew e masa madərtakaya da cakay Yesu heyey dəba.

³³ A wusam nga ngərfamara salay hay nga Yesu may na, a hətfamar ta məcey sem. Anda keđe, kwa ta ngərfamara salay anđa hay daa saba.

³⁴ Ama sewje pal da wuzlah ata, ta', a sləka ta zəwet aa cakay. Wure ngene, mambaz ta yam a mbəđwa.

³⁵ Ndaw ma kada mey a keđe na, ta hətar la ta dey anđa †. Mey masa aa ma kada na, ara mey fara fara. Yaw, anđa na, a səra ara mey fara fara. Anda keđe, a kada mey a na, amba akwar may, ka təbmarə mey a.

³⁶ Cek hay a tabiya ma kam keđe na, anda mey nga Gazlavay mawuzlalakaya zleezle, ma ləvey: «Kwa fa da ngərfamar tetesl pal daa ba.»

³⁷ Asaya, mey nga Gazlavay mawuzlalakaya mekele daha, a ləvey: «A hətmar ndaw masa ata ma sləkmara la.»

A jəhmara vagay nga Yesu

(Matiye 27.57-61; Mark 15.42-47; Luk 23.50-56)

³⁸ Fa dəba ha, ndaw da slala Arimate daha, mezəley *Jawzef. Ta', a daw fa Bay Pilat ngaa cəfdarawa vagay nga Yesu amba a jəha. Jawzef e na, ara ndaw ma təba mey nga Yesu, ama ta wuzda vaw anđa daa ba maja a zlurey

19:29 19:29 Ps 69.22 § **19:31 19:31** Pas meməskey-vaw a, a fənta pas meməskey-vaw siya na, maja ara ta gwagway nga Pak. * **19:31 19:31** menjərfey salay: A ngərfamatara salay na, amba a məcam fiyaw. **19:31 19:31** Mew 21.22-23 **19:34 19:34** 1Jj 5.6 † **19:35 19:35** Janj aa guzley da ray anđa ray anđa. Nəka Janj 19.26; 20.2; lej 21.24. **19:35 19:35** 15.27; 21.24 **19:36 19:36** Ps 34.20-21; Mab 12.46 **19:37 19:37** Zak 12.10; CWJ 1.7

ta mahura hay nga *Jəwif hay. Bay Pilat ta vəlar cəved la. Anğa ta', a daw a la vagay a.

³⁹ Nikwedem, ndaw masa ma hətfar Yesu a ta tavad heyey, ta', a diyam cew e ta Jawzef nga jəhey vagay a. Nikwedem ta ley mal mezey maaya nga cek mezəley «*mir» majahadəkaya ta cek mezəley «aləwes» la a har, a fəna kələw kwakwar maakar.

⁴⁰ Ata cewete ta', a lamara vagay nga Yesu a, a zləngmara ta maslaga, a takwadamar mal heyey anda Jəwif hay ma kamara daa masa ata fa da zləngam vagay.

⁴¹ Daa slam masa ata ma dərmarə Yesu a na, jerne daha. Daa jerne he cəvay mawiya daha, kwa ta pam vagay a hwad a daa ba arəj.

⁴² A jəhmara Yesu aa cəvay a na, maja ara hakwad, *pas meməskey-vaw gweegwe cay, asaya, maja cəvay a gweegwe fetede.

20

Yesu a sləkɖawa daa meməcey

(Matiye 28.1-8; Mark 16.1-8; Luk 24.1-12)

¹ Taa pərek ta luma nga Gudal, slam bej! bej! *Mari da Magdala, a daw nga nəkərwa cəvay nga Yesu. A wusey a mey cəvay a, a da nəkey dey na, beeler mahura ma gərca mey nga cəvay a manğəchadəkaya ta cakay.

² Anda keɖe, takw! a həla mahway ngada fa ata *Siməjw *Piyer ta gula lanğar masa Yesu ma wuɖa kalah heyey. Ta', aa guzltar, a ləvtar: «Ta lamara vagay nga Bay Mahura Yesu sem daa cəvay, ya sərmara a pamara aa wura ba.»

³ Da ray nğene, ata Piyer ta gula lanğar heyey, a sləkɖam, a diyam a mey cəvay a.

⁴ Ata cewete, a hwam ta hway, ama gula lanğar heyey a hway a fəna Piyer, a wusey teesed a mey cəvay a.

⁵ Ta', a wuzedey dey aa cəvay a, a hətey da hwad a na, maslaga hay makwiyydatakaya, ama ta mbəzey aa cəvay a daa ba.

⁶ Siməjw Piyer a wusey fa dəba anğa, ta', a mbəzey aa cəvay a. A hətatar maslaga hay makwiyydatakaya,

⁷ asaya, a hətar zana masa ata ma sləwɖamara ray nga Yesu ta anğa heyey. Zana ha na, macəmkaya ta maslaga hay heyey ba, ama mapadəkaya wal ta cakay.

⁸ Gula lanğar ma wusey teesed heyey, a mbəzey aa cəvay a may, a hətatar cek hay a, anda keɖe, a təba ma sləkɖawa nga Yesu daa meməcey.

⁹ Ama *gula hay nga Yesu ta cəndamara mey nga Gazlavay masa ma ləvey Yesu a da sləkɔfawa daa meməcey na, daa ba arañ.

¹⁰ Fa dəba ha, ta', gula hay cew heyey a vəham a way ata hay.

*Yesu a wuzar vaw a Mari da Magdala
(Matiye 28.9, 10; Mark 16.9-11)*

¹¹ Daa ŋgene, *Mari da Magdala ta', a vəhey a mey cəvay a. Deŋ! a lecey a mey cəvay a, fa təway. Masa aŋga fa təway a na, ta', a wuzedeŋ dey aa cəvay a.

¹² A da nəkey dey na, a ray maslaŋ hay nga Gazlavay cew ta zana hay mabara fa vaw. Ata manjatakaya cəma daa slam masa ata ma pamara vagay nga Yesu heyey, pal manjakaya daa slam-ray, pal daa slam-salay.

¹³ Maslaŋ hay nga Gazlavay heyey aa cəɔɔamara, a ləvmar: «Kwakwa, ka təway me?» A mbəɔɔdatara, a ləvtar: «Ta lamara vagay nga Bay aɔaw Mahura sem, ya səra a pamara aa wura ba.»

¹⁴ Masa ŋguas aha maa guzley la anda keɔe, a da mbəɔeŋ dey na, a ray Yesu malacakaya fetede, ama kwa ta səra ara aŋga na, daa ba.

¹⁵ Yesu a, aa cəɔɔa, a ləvar: «Kwakwa, ka təway me? Ka səpey na, wa?» Ŋguas aha, a wulkey na, ara ndaw ma jəɔa jerne he, ta', aa guzlar, a ləvar: «Papay aɔaw, da ara kah ma la na, wuzdiwa slam masa kah ma pa amba ya larawa aa slam a taw?»

¹⁶ Yesu ta', a zəla, a ləvar: «Mari!» Masa Mari ma cənda mezəley aŋga la na, pəla! a mbəɔeŋ dey ŋgada fa Yesu, ta', aa guzlar ta mey *Hebəre, a ləvar: «Rabuni,» anda meləvey «bay aɔaw».

¹⁷ Yesu aa guzlar, a ləvar: «Mbəkdaya, ka da zəndaya vaw ba, maja ya ta təpey fa Papay a vad daa ba arañ. Ama kah na, daw ta ləvtar a məlma aɔaw hay, ya təpey la fa Papay masa aŋga Papakw akwar may, fa Gazlavay masa aŋga Gazlavay akwar may.»

¹⁸ Ta', Mari da Magdala a daw fa *gula hay nga Yesu dəba, a kadatara, a ləvtar: «Ya ta hətar Bay Mahura Yesu la.» Asaya, Mari a kadatara mey masa Yesu a ma ləvar.

*Yesu a wuztar vaw a gula aŋga hay
(Matiye 28.16-20; Mark 16.14-18; Luk 24.36-49)*

¹⁹ Taa kwaɔ ta luma nga Gudal a ŋgene, *gula hay nga Yesu makustakaya daa way daha. Ta gərcamata mey-slam

hay sem ta lekəle maja ata fa zluram ta mahura hay nga *Jəwif hay. Ta', Yesu a daw a lecey a wuzlah ata, a ləvtar: «Anja Gazlavay nga njadakwar daa zazay.»

²⁰ Masa anğa ma ləvtar la anda keđe na, ta', a wuzdatara har anğa hay ta cakay anğa. Gula hay nga Yesu a, taa səmam la ga maja ata ma hətmar Bay Mahura ha.

²¹ Yesu aa guzltar saya, a ləvtar: «Anja Gazlavay nga njadakwar daa zazay. Anda Papay, Bay Gazlavay, ma slərđiwa a bəla na, yah may, ya slərdakwar nga key sləra adaw.»

²² Masa anğa maa guzltar anda keđe la na, ta', a səfney a ray ata, a ləvtar: «Təbam *Mesəfney nga Gazlavay a ray akwar.

²³ Da ka mbəkdamara mebərey nga ndaw na, Gazlavay a mbəkđara la may. Ama da akwar ma mbəkdamara mebərey nga ndaw daa ba na, Gazlavay fa da mbəkđara daa ba may.»

Tuma a key yawa

²⁴ Yaw, daa masa Yesu ma wuztar vaw a gula anğa hay na, *Tuma, masa ata ma zəlmara Didim *, gula pal dasi gula anğa hay kuraw a ray a cew, anğa da wuzlah ata daa ba.

²⁵ Masa Tuma ma sawa la a wuzlah ata na, a ləvmar: «Ala ta hətmar Bay Mahura la.» Ama Tuma a mbəđdatara, a ləvtar: «Da yah ma hətar vevek † nga mbəlek fa har nga medərey heyey daa ba, da yah ma pa bəz-mey-har adaw aa vevek nga mbəlek e daa ba, asaya, da yah ma pa har adaw aa cakay anğa daa ba na, ngene, ya fa da təba Yesu ta sləkđawa sem daa meməcey na, daa ba.»

²⁶ Luma pal fa dəba ha na, *gula hay nga Yesu a kusam aa way heyey saya. Tuma anğa da wuzlah ata dəba. Mey-slam hay magərcatakaya ta lekəle, ama Yesu ta' a sawa, a lecey a wuzlah ata, a ləvtar: «Anja Gazlavay nga njadakwar daa zazay.»

²⁷ Fa dəba ha, Yesu a ləvar a Tuma: «Təldərwa bəz-mey-har akah fedə, nəkta har adaw hay. Asaya, təldərwa har akah, pa aa cakay adaw. Mbəkda mekey yawa, təba ya ta sləkđawa sem daa meməcey.»

²⁸ Tuma a mbəđđara, a ləvar: «Kah na, Bay adaw Mahura, kah na, Gazlavay adaw!»

²⁹ Yesu a ləvar: «Kah ma təba mey a keđe na, maja kah ma hətya ta dey akah, ba diya? Maaya nga Gazlavay aa da

20:19 20.19 9.22; 14.27; 20.1 **20:20 20.20** 19.34; 20.25, 27 **20:21 20.21**
 17.18 **20:22 20.22** 14.16 **20:23 20.23** Mt 18.18 * **20:24 20.24** Didim: anda
 meləvey "cek nga dey". **20:24 20.24** Tuma: 11.16; 14.5; 20.27; 21.2 † **20:25**
20.25 vevek: vavay, vevəlek **20:26 20.26** 20.19

ray ndəhay ma təbmara ya ta sləkɗawa sem daa meməcey, masa kwa ta hətmaya ta dey ata daa ba.»

Mey da ray Mey-maaya-mawiya masa Janj ma wuzlala

³⁰ Yesu ta key maazla hay la ga mekele mekele meedey gula anja hay, ama maazla hay a tabiya mawuzlalatakaya daa ɗerewel keɗe daa ba.

³¹ Mey hay tabiya masa mawuzlalatakaya daa ɗerewel keɗe na, ara amba ka təbmara, Yesu na, ara Bəzey nja Gazlavay, ara *ndaw masa Gazlavay ma wala nja ləhdata ndəhay. Anda keɗe, da akwar fa təbmara mey anja na, ka da hətam heter mendəvey ba ta fa anja.

21

Yesu a wuztar vaw a gula anja hay maasala

¹ Fa dəba ha ɗar nekəɗey na, Yesu a wuztar vaw a gula anja hay saya. A wuztar vaw na, da mey dəhwa nja Tiberiyat. Ehe, mey da ray Yesu ma wuztar vaw a gula anja hay a.

² Ata *Simanjw *Piyer, *Tuma masa ata ma zəlmara Didim, Nataniyel ndaw da Kana daa hwayak nja *Galile, ta bəza hay nja Zebede, leŋ *gula hay nja Yesu cew mekele, ata tabiya daa slam a.

³ Simanjw Piyer a ləvtar: «Ya daw la aa ewet.» Ndəhay siya keɗe heyey a mbəɗdamara, a ləvmar: «Ala may, ya diyam asi akah.» Da ray njeŋe, ta', a diyam, a təpam aa kwambiwəl. Tavaɗ tavaɗ ata daa ewet e, ama kwa ta kərzam daa ba.

⁴ Taa pərek masa pas fa bawa na, Yesu a daw, a njeŋe a mey dəhwa ha. Ama gula anja hay ta sərmara ara anja na, daa ba.

⁵ Ta', Yesu aa guzltar, a ləvtar: «Bəz adaw hay, akwar ma kərzam ewet e la daw?» A mbəɗdamara, a ləvmar: «Ala ma kərzam daa ba.»

⁶ Yesu a ləvtar saya: «Lamara *tabaw akwar, kəzlamara ta dey nja zəmay, ka kəzlamawa la.»

Da ray njeŋe, a kəzlamara tabaw ata anda Yesu ma ləvtar. A hətam ewet ga da hwaɗ a. A gwamara nja ɗaɗamərwa tabaw a, aa kwambiwəl saba, maja ewet ga kalah da hwaɗ a.

⁷ Ta', gula masa Yesu ma wuɗa kalah heyey a ləvar a Piyer: «Ara Bay Mahura!» Masa Simanjw Piyer ma cənda ara Bay Mahura na, ta', a kəzla zana fa vaw maja ta cəkwa

zana sem amba a kørzey ewet. Ta', a jøvey daa kwambiwal gøv! aa yam, a daw ηgada fa Yesu.

⁸ Yaw, gula hay ηga Yesu siya na, ata gweegwe cay a rav-zazay, mendørey a wusa meeter temere saba. A diyam ta kwambiwal. Daa ηgene, fa đadãmara tabaw ata marøhkaya ta ewet ga da hwad a heyey.

⁹ A bønηgamawa daa kwambiwal. Masa ata ma bønηgamawa cay na, a høtam zay-awaw ta ewet da ray a leη peη.

¹⁰ Yesu aa guzltar, a løvtar: «Hølmawa ewet masa akwar ma kørzamørwa ηgene nekødefey.»

¹¹ Simaηw Piyer a tøpey aa kwambiwal a, ta', a đadãrawa tabaw a marøhkaya kaf! ta ewet hay ga mahura hay da hwad a heyey. Ewet hay a tabiya temere ta kwakwar zlam a ray a maakar. Tabaw a marøhkaya kaf!, ama kwa ta ηgørey daa ba.

¹² Yesu a løvtar: «Samawa, zømam cek.» Yaw, kwa gula pal da wuzlah ata ta key gødaη ηгаа cøfda kah na, wa na, daa ba gway, maja a sørmara fara fara ara Bay Mahura.

¹³ Yesu a ηgøchey, a la peη heyey, a wunkatara a gula aηga hay, asaya, a la ewet da ray zay-awaw, a vøldatara.

¹⁴ Døga ηga masløkđawa ηga Yesu daa memøcey na, ta pas ηgene, ara ηga dey maakar a masa aηga ma wuztar vaw a gula aηga hay.

Yesu aa cøfda Piyer

¹⁵ Masa ata ma ndøvdamara mezømey cek cay na, Yesu aa cøfda *Simaηw *Piyer, a løvar: «Simaηw, bøzey ηga *Jaη, ka wudya a fønta ndøhay kede daw?» Piyer a mbøđdara, a løvar: «Ahaw, Bay Mahura, ka fa søra ya wudka.» Yesu a løvar: «Nøkfatat dey fa ndøhay adaw hay, anda ndaw ma nøkfatat dey fa bøz-tøbaη aηga hay.»

¹⁶ Ta', Yesu a løvar ηga dey cew saya: «Simaηw, bøzey ηga Jaη, ka wudya daw?» Piyer a mbøđdara, a løvar: «Ahaw, Bay Mahura, ka fa søra ya wudka.» Yesu a løvar: «Key mecøkwer ηga ndøhay adaw hay anda ndaw ma søkørey tøbaη aηga hay.»

¹⁷ Ta', Yesu a løvar ηga dey maakar: «Simaηw, bøzey ηga Jaη, ka wudya daw?» Piyer na, ray aηga ta høbey sem maja Yesu maa cøfda ηga dey maakar, a løvar: «Ka wudya daw, ka wudya daw?» Ta', a mbøđdara, a løvar: «Bay Mahura, kah na, ka søta cek hay cøpa, ka fa søra ya wudka.» Yesu

a ləvar: «Nəkfatar dey fa ndəhay adaw hay anda ndaw ma nəkfatar dey fa təbaŋ aŋga hay.

¹⁸ Yaw, ya fa ləvka fara fara, daa masa kah daa gula akah na, ma dīya vaw akah ŋgada pəkey na, kah ta ray akah. Ka fa daw kwa aa wura aa wura. Ama da kah ta key maraw cay na, ka da baŋgadata har akah hay amba ndaw mekele a dīykawa vaw akah. A da handaka kwa aa slam masa kah ma wudəy ŋga daw ba.»

¹⁹ Ta mey a keđe na, Yesu a wudəy ŋga wuzda səkway ŋga meməcey ŋga Piyer. Piyer a da həlma Gazlavay ta fa meməcey aŋga ha. Fa dəba ha, Yesu a ləvar a Piyer: «Sawa, səpya.»

Mey da ray gula masa Yesu ma wudə kalah

²⁰ *Piyer a mbədey dey fa dəba, a da nəkey dey na, a ray gula masa Yesu ma wudə kalah heyey. Gula ha fa səptar wurzay. Ara gula masa ma gənsley ŋgada fa Yesu daa masa ata fa zəmam dəf, maa cəfdə, ma ləvey: «Bay Mahura ma da vəldaka a har masa-gəra akah hay na, wa?» heyey.

²¹ Piyer ma hətar la na, ta', aa cəfdə Yesu, a ləvar: «Bay Mahura, kaa ma da hətfar a gula keđe na, me?»

²² Yesu a mbəfdara, a ləvar: «Da ya wudəy a njeý ta dey da bəla keđe haa kasl mavəhwa adaw na, mey akah da hwad a me? Kah na, sawa, səpya.»

²³ Mey a, a cəney fa ndəhay ŋga Yesu siya na, anda gula ha fa da məcey daa saba. Fara fara Yesu ta ləvar a Piyer, gula ha fa da məcey daa saba na, daa ba. Ama a ləvar na, «Da ya wudəy a njeý ta dey da bəla keđe haa kasl mavəhwa adaw na, mey akah da hwad a me?»

²⁴ Yaw, gula ha na, ara ndaw ma hətatərwa cek hay a keđe ta dey aŋga, ara aŋga ma wuzdatara a ndəhay, asaya, ara aŋga ma wuzlatərwa aa dərewel keđe may. Ala na, ya sərmara mey hay a keđe ara mey hay masa fara fara.

²⁵ Yesu ta key cek hay la mekele mekele ga. Anja da cek hay a mawuzlalatakaya cəpa pal pal fa dərewel na, ya wulkey slam da bəla keđe ŋga pata dərewel hay a daa ba.

Slëra nga Ndëhay Meslërey nga Yesu Mey da ray ðerewel nga Slëra nga Ndëhay Meslërey

Derewel keðe ara ðerewel nga dey cew masa Luk ma wuzlala. A wuzda mezley nga Egëliz hay zleezle. Derewel e a zley ta mey da ray Gazlavay ma la Yesu a vad (fasëlawal 1) leŋ Mesëfney nga Gazlavay ma pawa salay a ray ndëhay nga Yesu (fasëlawal 2). Fa dëba ha, daa fasëlawal 3 haa 12, Luk aa guzley da ray ndëhay ma wuzdamara mey nga Yesu dëga da Jeruzelem haa a Samari. Ndëhay a na, ara ata Piyer, Etiyen leŋ Jak.

Fasëlawal 13 haa 20 aa guzley da ray Pawl mepëkey ngeeme, nga dey cew, leŋ nga dey maakar nga wuzey Mey-maaya-mawiya daa hwayak hay nga Gërek hay ta nga Rawma hay.

Fasëlawal 21 haa 28 aa guzley da ray sariya masa ndëhay Rawma hay ma kamara a Pawl maja Jëwif hay ma wudmara, a wudam nga këðmara vagay. Asaya, da ray bay-ray hay nga Rawma hay ma slërdamara Pawl a Rawm nga key sariya fa mey nga Bay Sezere.

Mey mahura daa ðerewel keðe na, ara mey ma lövey: «[...] ta pas masa Mesëfney nga Gazlavay ma da pawa salay a ray akwar na, ka hëtam gëdanj la. Fa dëba ha, ka da kam sede da ray adaw. Ka da kam sede teesed na, fa mey nga ndëhay da Jeruzelem, fa dëba ha, fa mey nga ndëhay da Jude, fa mey nga ndëhay da Samari, leŋ fa mey nga ndëhay da bëla tabiya.» (SNM 1.8)

Daa ðerewel e keðe na, mey mekele mekele daha nga wëley gëdanj a ndëhay:

Mey da ray mevëley cek a masa-viya hay (20.35)

Pawl a wuzey mey da ray Gazlavay (17.24-31)

Mey ngeeme

¹ Waa *Teyewfil,

Daa ðerewel adaw ngeeme na, ya ta wuzlalaka mey da ray Yesu la. Daa ðerewel e ya ta wuzlalatakawa cek hay tabiya masa Yesu ma kata la, leŋ mey masa anga maa sërkatatara a ndëhay, dëga ta pas masa anga ma zla slëra anga da bëla

2-3 haa kasl pas masa *Gazlavay ma la a vad. Masa *Yesu anğa da bëla na, anğa ta weley ndëhay anğa hay meslërey la. Fa dëba ha, Yesu a, a mëcey, ta', a slëkdawa daa memëcey, a wuztar vaw a ndëhay anğa hay. Fa dëba nga maslëkdawa anğa daa memëcey na, ðar kwakwar mëfad, anğa fa wuztar vaw maaya maaya ta fa cek hay mekele mekele, amba ndëhay meslërey a, a sërmara fara fara anğa ta dey. Asaya, aa guzlar da ray mewey nga Gazlavay da ray ndëhay. A këtata da ray cek hay masa ata ma da kamara na, ta gëdan ma sawa ta fa *Mesëfney nga Gazlavay.

4 Ta pas langar daha na, Yesu fa zëmam ðaf daa slam a ta ndëhay anğa hay meslërey. Ta', a këtata, a lövey: «Papay a lövey a vëlkwar cek la. Ya ta kadakwara cay, ba diya? Njam daa berney nga *Jeruzelem fëde, sëkwmar a cek aha.

5 *Jan a katar *baptem a ndëhay na, ta yam, ama daa ðar hay nekëfey fëde, ka hëtam baptem la ta Mesëfney nga Gazlavay.»

Bay Gazlavay a la Yesu a vad

6 Ndëhay meslërey nga Yesu a makustakaya da cakay a, aa cëfdamara, a lövmar: «Bay Mahura, ka da ðiya hwayak nga *Israyel amba ka wey da ray a na, wure kede daw?»

7 Yesu a mbëddata, a lövmar: «Akwar na, mey akwar da hwad a me? Ara Papay ma pa pas a, ara anğa pal ma wa ðar a.

8 Ama ta pas masa *Mesëfney nga Gazlavay ma da pawa salay a ray akwar na, ka hëtam gëdan la. Fa dëba ha, ka da kam sede da ray adaw. Ka da kam sede teesëd na, fa mey nga ndëhay da *Jeruzelem, fa dëba ha, fa mey nga ndëhay da *Jude ta fa mey nga ndëhay da *Samari, len fa mey nga ndëhay da bëla tabiya.»

9 Fa dëba ha Yesu ma ndëvda mey hay kede la na, Gazlavay ta', a la a vad, ndëhay da cakay a fa nëkmara, mekwtene sërat! a sërta, a hëtmara Yesu a saba.

10 Ata fa nëkam dey a vad aa slam masa Gazlavay ma la Yesu a cënga. Wure wure ngene, ndëhay cew daha malacatakaya da wuzlah ata, ta zana mabara fa vaw,

11 a lövmara: «Akwar, ndëhay *Galile hay, akwar malacatakaya, fa nëkam dey ngada vad ngada vad na, maja me? Yesu masa Bay Gazlavay ma la da wuzlah akwar a vad kede na, a vëhwa la, anda akwar ma hëtmara anğa ma daw ngada vad kede.»

A lam ndaw mekele aa slam a nga Juda Iskariyawt

¹² Fa dëba ha, ndëhay meslërey nga Yesu a bërngamawa daa Anḡwa nga *Awliviye. A vëhmawa a *Jeruzelem, anḡwa ha dërenj daa ba, a key këlemeeter pal gway.

¹³ Masa ata ma wusmawa la a Jeruzelem na, ta', a tëpam aa way da ray way, aa slam masa ata ma kusam mandaw mandaw da hwađ a. Ndëhay meslërey a na, ara *Piyer, *Janj, *Jak, *Andëre, *Fëlep, *Tuma, *Bartelemey, *Matiye, Jak bëzey nga Alfe, *Simanḡw, ndaw da wuzlah ndëhay ma wuđam nga lëhdamata ndëhay ata hay dasi har nga masa-gëra ata hay, lenj Jud bëzey nga Jak.

¹⁴ Ata tabiya fa kusam mandaw mandaw nga dërey danḡay a Gazlavay ta mevel pal. A kusam na, ta nḡusay mekele mekele, ta *Mari, mamanj nga Yesu, lenj ta mëlmanj nga Yesu hay.

¹⁵ Daa đar hay a nḡene, ndëhay ma tëba mey nga Yesu makustakaya daa slam a, a key temere ta kwakwar cew. Ta', Piyer a lecey a wuzlah ata, a lëvtar:

¹⁶⁻¹⁷ «Mëlma adaw hay, Juda anḡa zleezle na, da wuzlah alëkwa, alëkwa masa Yesu ma walandakwar amba ya kakwa slëra nḡada Bay Gazlavay. Ama ara anḡa ma wuzdatara cëved a ndëhay nga kërzey Yesu. Zleezle na, Bay *Davit taa guzley la ta gëdanj nga *Mesëfney nga Gazlavay da ray cek masa Juda ma da ka. Yaw, mey daa đerewel nga Gazlavay a nḡene ta key la fara fara anda mawuzlalakaya.»

¹⁸ Juda heyey, ta hëtey dala la maja cek malamba masa anḡa ma ka ha. Ta dala ha na, a hëđkada ley. Da ley anḡa ha, a tëđey, hwađ pëcakw! a pëckwey, tanday zad! a palah, pam! a mëcey.

¹⁹ Ndëhay da Jeruzelem tabiya ta cëndamara mey a la. Da ray nḡene, a zëlmara ley a ta mey ata «Hakëldama,» anda melëvey, ley nga mambaz.

²⁰ Piyer a lëvey saya: «Mawuzlalakaya daa đerewel nga *Pësam hay, a lëvey:

“Anja way anḡa, nga tërey yidenj,
ndaw nga njeý a hwađ a ba.”

Yaw, mawuzlalakaya saya, a lëvey:

“Si ndaw mekele a la slëra anḡa.”

²¹⁻²² «Da ray nḡene, maaya na, ndaw mekele a sawa asi alëkwa amba a key sede da ray maslëkđawa nga Bay Mahura Yesu. Si ya walakwa ndaw masa ala ma pëkam la bama ta ata Yesu aa wura aa wura. Ndaw masa alëkwa

ma da walakwa na, si ndaw aha anğa ta ala dëga ta pas masa *Jan-Baptis ma kar *baptem a Yesu haa kasl pas masa Gazlavay ma la Yesu a da wuzlah alëkwa a vad.»

²³ Fa dëba ha masa ata ma cëdamara mey nga Piyer la na, a lam ndëhay cew. Ara ata *Jawzef, masa ndëhay ma zëlmara Barsabas, mehëlmey Justus, lej Matiyas.

²⁴ Ta', a dëram dangay a Bay Gazlavay, a lëvam: «Bay Gazlavay, ka sërta mevel nga ndëhay tabiya, wuzndar ndaw pal dasi ndëhay cew kefe masa kah ma wudëy

²⁵ nga key *ndaw-meslërey nga Yesu aa slam a nga Juda. Juda na, ta mbëkda slëra ha sem nga daw aa slam masa anğa ma wudëy.»

²⁶ Ta', a wuzlalamata mezëley ata cewete nga weley ndaw pal dasi ata. Ma da bawa na, mezëley nga Matiyas. Da ray nğene, a pamara Matiyas a dey ndëhay meslërey kuraw a ray a pal heyey.

2

Mesëfney nga Gazlavay a pawa salay a ray ndëhay nga Yesu

¹ Masa pas nga gwagway nga *Pantekwat ta wuswa cay, ndëhay ma tëba mey nga Yesu tabiya makustakaya daa slam a.

² Wure wure nğene, a cëdamara cek ma kawa ta da vad anda memed maa bërey. Cek aha a rëhda way masa ata manjatakaya da hwad a heyey.

³ A hëtam cek anda neneh hay nga awaw ma gëdëy. Neneh hay a, a wunkam, a njam a ray ata pal pal tabiya.

⁴ Ata tabiya marëhtakaya ta *Mesëfney nga Gazlavay. A zlarar meeguzley ta mey hay mekele mekele masa ata ma sërmara ba, anda Mesëfney a ma vëldatara ngaa guzley.

⁵ Yaw, da *Jeruzelem e na, *Jëwif hay masa ma sëpam cëved nga Gazlavay ta mevel pal fetedë daha. A samawa daa hwayak hay da bëla tabiya.

⁶ Ata ma cëdamara cek maa bërey heyey la na, a kusmawa ga. Ata tabiya a rëzlam maja kwa waawa fa cënda mey anğa fa ndëhay ma tëba mey nga Yesu a, ata faa guzlam ta mey hay a.

1:21-22 1.21-22 Lk 1.2; 3.21; 24.51 **1:24 1.24** Jan 2.24-25 **1:26 1.26** MM 16.33 **2:1 2.1** Lev 23.15-21; Mew 16.9-11 **2:3 2.3-4** Lk 3.16 **2:4 2.4** Ata tabiya marëhtakaya ta Mesëfney nga Gazlavay: 4.31; 6.3, 5; 7.55; 8.17; 10.44; 11.15, 24; 13.9; 15.8; 19.2, 6; **meeguzley ta mey hay mekele mekele masa ata ma sërmara ba:** 4.31; 10.45-46; 19.6; 1Kwr 12.10; 14.2-12

⁷ A rëzlam, a wulkam, aa cëfdam vaw da wuzlah ata, a lëvam: «Ndëhay maa guzlam mey kefe, ata tabiya ndëhay daa hwayak nga *Galile, ba diya?

⁸ Kaa kwa waawa fa cënda mey anga fa ndëhay a faa guzlam na, kwara?

⁹ «Alëkwa fefe na, ndëhay ma samawa daa hwayak nga Parte, daa hwayak nga Medi ta daa hwayak nga Elam, daa hwayak nga Mezapawtami, daa hwayak nga *Jude, daa hwayak nga Kapadëwas, daa hwayak nga Panjw, daa hwayak nga Azi,

¹⁰ daa hwayak nga Fërizi, daa hwayak nga Pamfili, daa hwayak nga *Ejip, leŋ daa hwayak nga Libi masa gweegwe ta berney nga Siren. Asaya, da wuzlah alëkwa na, ndëhay ma samawa da *Rawm daha,

¹¹ ndëhay ma samawa da Këret daha, ta ndëhay Arap hay daha may. Da wuzlah alëkwa, siya hay ara ndëhay daa sëkway nga Jëwif hay, ta siya hay ma mbëzam nga sëpey kwakwas nga Jëwif hay. Ama alëkwa tabiya, ya fa cëndakwa ata faa guzlam ta mey hay mekele mekele masa daa hwayak alëkwa da ray slëra mahura masa Gazlavay ma ka!»

¹² Anda kefe na, ata tabiya a rëzlam, a sërmara nga key kwara ba, aa guzlam da wuzlah ata, a lëvam: «Cek aha kefe a wufey nga lëvey kwara?»

¹³ Ama ndëhay siya hay, aa sanjëräm a ray ndëhay ma tëba mey nga Yesu kaa heyey, a lëvam: «Ata tabiya mawatakaya ta wuzam.»

Piyer a wuztar mey a ndëhay makustakaya

¹⁴ Da ray ŋgene, *Piyer ta', a lacam ta ndëhay meslërey kuraw a ray a pal heyey, aa guzley ta gëdan fa mey nga ndëhay makustakaya heyey, a lëvtar: «Akwar ndëhay *Jëwif hay daa hwayak nga *Jude, leŋ akwar ndëhay tabiya ma samawa daa hwayak hay mekele mekele a *Jeruzelem, jëkam slëmay maaya maaya fa mey masa yah ma da wuzdakwara kefe amba ka sërmara mabara nga mey a.

¹⁵ Ndëhay kefe fa wam anda akwar ma lëvam na, daa ba, maja anga kaa na, pas ŋgaa përek, pas ma hëla maaca dagay.

¹⁶ Ama wure kefe cek aha kefe a key na, anda Jëwel, *ndaw ma tëla mey nga Gazlavay zleezle, ma lëvey:

¹⁷ "Gazlavay a lëvey,

Ta pas masa bëla gweegwe cay a ndëvey na,

ya vëltar Mesëfney adaw la a ndëhay tabiya.

Da ray ŋgene, bëz akwar hay mezële ta dam akwar hay,

a tëram la nga ndëhay ma tëla mey adaw hay.
Gula akwar hay na, ya da wuztar cek hay mawiya
masa Yah ma da kata.

Maraw hay da wuzlah akwar may,
mesëfney a katar la amba ya wuztar cek hay.

¹⁸ Ahaw, daa dar hay a ñgene,
ya vëltar Mesëfney adaw la a ndëhay
ma ka slëra adaw hay,

mezële hay ta mangusa hay tabiya,
a da tëram *ndëhay ma tëla mey adaw hay.

¹⁹ Ya key maazla hay la da gazlavay da vad,
ya key cek hay ma rëzla ndaw la da ray hwayak.
Mambaz, ta awaw, leñ kakas a bamawa la.

²⁰ Pas fa da wedey daa saba,
kiya a da mbëdëy magaza anda mambaz.
Fa dëba ha, Bay Mahura a vëhwa la
amba a key sariya da bëla.

Ta pas a ñgene, ndëhay a hëtmär gëdan anga la,
a da sërmara pas a ara pas mahura ma fëna siya hay.

²¹ Anda kefe, kwa waawa maa cëfda Bay Mahura
nga lëhda na, Bay Mahura a lëhda la.”»

²² Piyer a lövey saya: «Akwar, *Israyel hay, jëkfamaya
slëmay fa mey adaw kefe. Yesu ndaw *Nezeret na,
Gazlavay ta wuzdakwara la anga na, wa. Ka sërmara fara
fara maja Gazlavay ta key maazla hay la mahura ma rëzla
ndaw ta har anga da wuzlah akwar. Maazla hay a na, fa
wuzdakwara gëdan nga Gazlavay aa ta Yesu a.

²³ Ndaw aha, Gazlavay ta vëlda la a har akwar anda aa ma
wudëy. Dëga zleezle Gazlavay ta sëra cek masa akwar ma
da kamara sem. Cek aha na, ara akwar ma vëldamara Yesu
a har ndëhay ma sëra Gazlavay ba, amba a këdmara vagay
fa hwadam mazlangalakaya heyey. Akwar ta këdmara la,

²⁴ ama Gazlavay ta slëkdädërwa sem, a badërwa daa
banay nga memëcey maja gëdan nga memëcey a gwa a
ray a ba.

²⁵ Ehe, zleezle Bay *Davit maa guzley da ray Yesu, a lövey:
“Ya fa hëtar Bay Mahura mandaw mandaw fa mey adaw,
anga manjakaya ta har-zëmay adaw amba ya zlurey
ba.

²⁶ Da ray ñgene, mevel adaw faa sëmey,
ya zley walay ta meesëmey.

Kwa ya mëcey la na,

ya fa sækwa cek masa Gazlavay ma da kayawa,
 27 ya da njeý ta zazay maja ya sëra kah, Bay Gazlavay,
 ka mbækda mesëfney adaw
 aa slam nga ndëhay mamëctakaya daa ba,
 kwa ka fa da mbækda vaw adaw,
 yah, ndaw ma ka slëra akah,
 nga zey daa cëvay daa ba may.

28 Ka ta wuzdiwa cëved nga hëteý heter mendövey ba la,
 Ya daa sëmey ga, maja kah manjakaya ta yah.”»

29 Piyer a lëvtar saya: «Mëlma adaw hay Jëwif hay, ya
 gwa yaa guzlkwar mey masa fara fara da ray Davit e, Davit
 masa papan nga papa alëkwa zleezle. Ya fa lëvkwar anga
 ta mëceý sem, ta pëshamara sem aa cëvay. Cëvay anga ha,
 haa kasl tasana, aa daha fedë.

30 Anga na, ndaw ma tëla mey nga Gazlavay, a sëra
 Gazlavay ta jëweý mey la ta anga, a lëvar: “Fa dëba akah,
 ya da peý ndaw pal daa sækway akah nga key bay anda
 kah.”

31 Da ray ngene, Davit a sëra cek masa Gazlavay ma
 da ka ngada fa mey. A sëra *ndaw masa Gazlavay ma
 wala nga lëhdata ndëhay na, Gazlavay a slëkdfadërwa la
 daa memëceý. Davit e, aa guzley da ray maslëkdfawa nga
 *Këriste daa memëceý a, a lëvey Gazlavay ta mbækda ndaw
 aha da wuzlah ndëhay mamëctakaya daa ba, vaw anga ta
 zey daa cëvay daa ba.

32 Yesu kedë na, Gazlavay ta slëkdfadërwa sem daa
 memëceý, ala tabiya fa kam sede da ray a.

33 Gazlavay ta la sem a vad, a pa aa slam maaya a
 har-zëmay anga. Gazlavay Papan, ta’, a vëlar Mesëfney
 anga masa anga ma lëvar a da vëldara. Ta’, Yesu a
 slërdandakwara Mesëfney a, a ray alëkwa. Ara Mesëfney a
 ma vëldakwar gëdan nga key cek masa akwar ma hëtmär
 ta masa akwar ma cëndamara wure kedë.

34 Ya sërkwa Davit ta ray anga ta tëpeý a vad na, daa ba.
 Ama aa guzley da ray Këriste zleezle, a lëvey:

“Bay Gazlavay a lëvar a Bay adaw Mahura:

Sawa, njeý ta har-zëmay adaw

35 haa kasl pas masa yah ma da pata masa-gëra akah hay
 asi salay akah.”»

2:27 2.27 13.35 2:29 2.29 1Bay 2.10; SNM 13.36 2:30 2.30 2Sam 7.12-13, 16
 2:31 2.31 Ps 16.10 2:32 2.32 1.8 2:33 2.33 aa slam maaya a har-zëmay
 nga Gazlavay: 2.34; 3.13; 5.30-34; 7.55-56; Mk 16.19; Lk 20.42; 22.69; Rm 8.34;
 Ef 1.20; Kwa 3.1; Heb 8.1; 1Pi 3.22; **Gazlavay Papan, ta’, a vëlar Mesëfney**
annga masa annga ma lëvar a da vëldara: 1.4; Jan 14.16-17; 15.26 2:34
 2.34-35 Ps 110.1; Lk 20.42-43; Heb 1.13

36 Piyer a lëvtar saya: «Si Israyel hay tabiya a sërmara fara fara, ndaw masa Gazlavay ma pa nga Bay Mahura ta nga ndaw masa ma da lëhdata ndëhay na, ara Yesu, ndaw masa akwar ma dërmara fa hwadam mazlanjalakaya heyey.»

37 Ndëhay makustakaya heyey, a cëndamara mey a kefe na, mevel a tëdtar ga. A lëvmar ngada Piyer ta ngada ndëhay meslërey siya hay: «Kaa ya da kam na, kwara, mëlma ala hay?»

38 Piyer a mbëddatara, a lëvtar: «Mbëddamara menjey akwar, sëpmara Gazlavay ta mevel pal. Cacëfdam *baptem ta mezëley nga Yesu Këriste, amba Gazlavay a mbëkdakwara mebërey akwar. Anda kefe, Gazlavay a vëlkwar Mesëfney anga la.

39 Gazlavay a lëvey, a vëldatara Mesëfney anga la a ndëhay. A lëvey a da vëldakwara ngada akwar, ngada bëz akwar hay, ta ngada ndëhay masa dëren, ndëhay tabiya masa Gazlavay, Bay alëkwa, ma da zëlta.»

40 Ta', Piyer aa guzltar mey mekele mekele saya amba a tëbmara mey anga nga vëltar gëdan. A lëvtar: «Wudkam ta ndëhay malamba da bëla wure kefe, amba Bay Gazlavay a lëhdakwar daa sariya ma da kërzata.»

41 Ndëhay ga da wuzlah ndëhay a ngene, a tëbmara mey nga Piyer, ta', a hëtam baptem. Ta pas ngene, ndëhay a key gabal maakar ma samawa a dey ndëhay ma tëba mey nga Yesu.

Menjey nga ndëhay ma tëba mey nga Yesu

42 Mandaw mandaw ndëhay ma tëba mey nga Yesu fa jëkam slëmay fa meesërkedey nga ndëhay anga hay meslërey ta mevel pal, a njam macëmkaya pal anda mëlman hay, fa wunam pënj nga sërfedey memëcey nga Yesu, fa dëram dangay a Gazlavay daa slam a.

43 Ndëhay meslërey hay a fa kam maazla hay mekele mekele nga wuzdërwa gëdan nga Bay Gazlavay aa ta ata. Ndëhay tabiya a rëzlam da ray maazla hay a, a namar ray a Bay Gazlavay maja.

44 Ndëhay ma tëba mey nga Yesu na, macëmkaya fëy letek, a wunkamara zleley ata hay da wuzlah ata.

45 Anda melëvey, a hëdkadamata ley ata hay ta cek ata hay, a wunkamara dala ha da wuzlah ata tabiya. Kwa waawa a hëtey cek masa tëde nga wusa.

⁴⁶ Mandaw mandaw fa kusam aa *Way-mekey-kwakwas nga Gazlavay ta mevel pal. Da way ata hay na, a zëmam daf daa slam a ta meesëmey, ta mevel maaya.

⁴⁷ Ata fa hëlmamara Gazlavay. Ndëhay tabiya aa hëmdamata. Mandaw mandaw Bay Mahura fa zëlwa ndëhay mekele mekele masa ma lëham sem daa mebërey ngadaa dey ata.

3

Ndaw maahëlbakaya ma hëtar salay anga

¹ Ta pas langar daha, ata *Piyer ta *Jan fa diyam aa *Way-mekey-kwakwas nga Gazlavay nga dërwa dangay. Ara ta pas ngaa kwad, pas tëde medërey-dangay nga *Jëwif hay.

² Gweegwe ta mey-mbew nga Way-mekey-kwakwas a, mey-mbew ma zëlmara «Mey-mbew Membey,» ndaw daha manjakaya fetede. Ndaw aha, maahëlbakaya dëga nga mayawa anga. Mandaw mandaw ndëhay fa handamërwa, a njadamara fetede, amba a rëkey dala fa ndëhay ma mbëzam aa Way-mekey-kwakwas a.

³ Ta pas ngene, ndaw aha a hëtatatar ata Piyer ta Jan fa diyam aa Way-mekey-kwakwas a. Ta', aa cëfdafatar dala.

⁴ Ata Piyer ta Jan a nëkfamara, Piyer a lëvar: «Nëkfandar.»

⁵ Ndaw aha a nëkfata maaya maaya, a wulkey daa ray anga, a lëvey: «A da vëlmaya cek.»

⁶ Ama Piyer a lëvar: «Dala da har adaw na, daa ba sëlak, ama cek masa da har adaw na, ya vëldakawa la. Ta gëdan nga Yesu *Këriste, ndaw *Nezeret, ya fa lëvka, slëkdëy, daw ta salay akah.»

⁷ Ta', Piyer a kërza fa har-zëmay, a slëkfada. Wure wure ngene, salay nga ndaw aha, ta jerey cay.

⁸ Ta', a lecey, a jëvey, a zlar madaw. A mbëzam aa Way-mekey-kwakwas nga Gazlavay ta ata Piyer ta Jan heyey. Anga fa daw, fa jëvey, fa hëlma Gazlavay.

⁹ Ndëhay masa daa Way-mekey-kwakwas a tabiya a hëtmär anga fa daw, fa hëlma Gazlavay.

¹⁰ A sërmara ara ndaw masa salay maahëlbakaya ma njeý fa Mey-mbew Membey nga rëkey heyey. Ata tabiya a rëzlam ga da ray cek ma key ta anga, a sërmara cek masa ata ma da kam ba.

Piyer a wuzey mey daa Way-mekey-kwakwas nga Gazlavay

11 Ata *Piyer ta *Jan lej ndaw masa salay maahëlbaakaya heyey, ata dasi balak nga *Way-mekey-kwakwas nga Gazlavay mezëley «Balak nga *Salamanjw.» Ndaw aha, a gëmey nga mbëkdata ata Piyer ta Jan ba. Ndëhay tabiya fetede a hwamawa ngada fa ata, maja a rëzlam ga da ray ndaw masa salay maahëlbaakaya heyey.

12 Masa Piyer ma hëttatar ndëhay fa samawa na, a lëvtar: «Akwar ndëhay *Israyel hay, ka rëzlam anda kefe na, maja me? Ka nëkfamandar me? Ka wulkam ndaw kefe salay anga a jerey nga daw kaa na, ara ta gëdanj ala daw, da daa ba, maja ala ma kam cek maaya ta cëved e fa mey nga Gazlavay daw? Kay, këne ba!

13 Ara Gazlavay ma mbëlda ndaw aha, Gazlavay masa *Abëraham, *Izak, lej *Jakwap, papanj nga papa alëkwa hay zleezle, ma namar ray. Ara Gazlavay ma wuzdandakwara anga fa hëslar ray a Yesu, ndaw ma ka slëra anga. Akwar ta ray akwar, ka ta vëldamara Yesu a la a har mahura hay, kwa Pilat a wufey nga mbëkda, ama akwar ta tëbmara daa ba.

14 Yesu na, ara ndaw pal masa maaya ma sawa ta fa Gazlavay. Ama akwar ka wufmara ba, ka lëvmar a Pilat na, nga pëskakwar ndaw ma këda ndaw vagay jak.

15 Anda kefe, ndaw ma vëltar heter a ndëhay jak na, akwar ta këdmara sem, ama Gazlavay ta slëkfdërwa sem daa memëcey. Ala ta ray ala fa kam sede da ray maslëkfdëwa anga ha.

16 Ndaw masa akwar ma hëttmar da cakay adaw kefe na, ka sërmara. Salay anga a jerey na, ara ta gëdanj nga Yesu, maja ala ma pamara Yesu a nga ndaw ala fara fara. Maja ala fa pamara Yesu nga ndaw ala fara fara na, mbal! a mbëley maaya maaya anda akwar tabiya ma hëttmar ta dey akwar kefe.

17 «Ama wure kefe, mëlma adaw hay, ya sëra cek masa akwar ta mahura akwar hay ma kamara a Yesu na, a key ka sërmara ba.

18 Cek aha ma key kefe na, Gazlavay ta wuzda la ta mey ndëhay ma tëla mey anga hay zleezle, a lëvey, si cëma *Këriste masa anga ma da slërdërwa na, a sërey banay.

19 Maja ngene, ya fa lëvkwar: mbëddamara menjey akwar, mbëddmawa dey ngada fa Bay Gazlavay, amba a mbëkdakwara mebërey akwar.

20 Anda keđe, Gazlavay a mëskaçakwar vaw la. A slërkwar Këriste la, anda melëve, Yesu, ndaw masa aa ma wala nga lëhdakwar dëga zleezle heyey.

21 Wure keđe si Yesu a njawa da gazlavay da vad dëgay, haa kasl pas masa Gazlavay ma da dëyta cek hay tabiya mawiya anda anğa ma lëve zleezle. Gazlavay taa guzley la da ray mey a ta mey ndëhay ma tëla mey anğa hay.

22 Ara anda keđe *Mawiz maa guzley zleezle, a lëve: "Bay Gazlavay masa akwar ma namar ray, a da slërkwar *ndaw ma tëla mey anda yah. Ndaw a na, ara ndaw daa sëkway akwar anda yah may. Mey tabiya masa anğa ma daa guzldakwara na, jëkam slëmay fa vëđa.

23 Kwa waawa ma cënar mey a ndaw a ba na, Gazlavay a bada la da wuzlah ndëhay anğa hay, nğaa zëdëy."

24 «Yaw, fara fara, ndëhay ma tëla mey nga Gazlavay ga, dëga fa *Samiyel ta ndëhay ma tëla mey nga Gazlavay mekele mekele fa dëba anğa, ata tabiya ta wuzdamara mey da ray cek hay masa ma kam wure keđe la.

25 Mëlma adaw hay, Gazlavay maa guzley ta mey ndëhay ma tëla mey anğa hay keđe na, ara nğada akwar. Gazlavay a jëwam mey ta papa alëkwa hay zleezle, a lëvar a Abëraham: "Ya pëstar mey la a ndëhay da bëla tabiya ta fa sëkway akah." *Mejëwey-mey a keđe na, ara nğada akwar may.

26 Anda keđe, Gazlavay ta wuzdakwara Yesu, ndaw ma ka slëra anğa la. A slërdërwa na, nğada akwar dëgay. A slërdërwa amba a kakwar maaya, nga mbëdëdakwara menjey akwar maaya ba nğene.»

4

Ata Piyer ta Jan fa mey nga ndëhay ma ka sariya nga Jëwif hay

1 Masa ata *Piyer ta *Jan faa guzlmatar a ndëhay makus-takaya heyey na, ndëhay ma ka kwakwas nga Gazlavay, ta *bay-ray nga ndëhay ma jëđa Way-mekey-kwakwas, len ndëhay *Saduse hay, a samawa a cakay ata.

2 Mevel fa catar maja ata Piyer ta Jan faa sërkaçamata ndëhay, a lëvmatar ndëhay mamëctakaya a da slëkdamawa daa memëcey maja Yesu ta slëkdawa sem daa memëcey.

3 Mahura hay heyey, ta', a kërzamata ata Piyer ta Jan a, a handamata, a gërcamata aa fërsëne. Ama ta kamatar sariya ta pas nğene daa ba, maja pas daa saba.

⁴ Ta ñgene he cëpa, ndëhay ga da wuzlah ndëhay makustakaya ma cëndamara mey nga Piyer heyey ta tëbmara mey nga Yesu la cënga. Anda keđe, ndëhay ma tëba mey nga Yesu ta sëkam la a dey a, a key gabal zlam.

⁵ Pepërek e, bay-ray hay nga *Jëwif hay, ta mahura hay nga Jëwif hay, leñ *ndëhay maa sërkada kwakwas nga Mawiz, a kusam fetede da *Jeruzelem.

⁶ Da wuzlah ndëhay makustakaya ha na, ara ata Han, *ndaw mahura da ray ndëhay ma ka kwakwas nga Gazlavay, Kayif, Jan, Alekzandëre leñ ndëhay siya tabiya da way Han.

⁷ Ta', a handamatërwa ata Piyer ta Jan heyey, a la-cadamata fa mey ata, ndaw masa ma hëtar salay anga heyey aa da cakay ata. A cacëfdamata ata Piyer ta Jan, a lëvmatar: «Ka mbëldamara ndaw masa salay maahëlbakaya keđe na, ta gëdan wura? Ma vëldakwara gëdan nga key maazla keđe na, wa?»

⁸ Piyer, marëhkaya ta *Mesëfney nga Gazlavay, ta', a mbëddatara, a lëvtar: «Akwar, bay-ray hay ta mahura ala hay,

⁹ kaa cëfdamandar tasana maja ala ma kam cek maaya ngada ndaw maahëlbakaya keđe, daw? Kaa cëfdamandar, ndaw aha a hëtar salay anga na, kwara, ba diya?

¹⁰ Yaw, akwar cëpa ta ndëhay *Israyel hay tabiya, si ka sërmara ndaw malacakaya fa mey akwar keđe na, a hëtar salay anga ta gëdan nga Yesu *Këriste, ndaw *Nezeret. Ara anga masa akwar ma dërmara fa hwadam mazlangalakaya nga mëcey, ama Gazlavay ta slëkëfadërwa sem daa memëcey.

¹¹ Mawuzlalakaya daa dërewel nga Gazlavay da ray Yesu, a lövey:

“Anghwa masa akwar, ndëhay ma lëma way,

ma këzlamara ta cakay na,

anja ara anghwa maaya, ma fënta siya hay jak.”

¹² Ahaw, ya fa lëvkwar, Gazlavay a lëhdata ndëhay daa mebörey na, si ta fa Yesu gway. Ndaw mekele da bëla keđe masa Gazlavay ma vëlar gëdan nga lëhey ndëhay daa mebörey na, daa ba sëlak.»

¹³ Mahura hay ma sla yawa nga Jëwif hay fetede heyey na, a nëkmara na, ata Piyer ta Jan fa zluram daa ba sëlak. A rëzlam ga, maja a sërmara, ata Piyer ta Jan, ara ndëhay anda siya hay gway, ta jangam daa ba. A sërfadamara ata Piyer ta Jan ta pëkam la ta ata Yesu.

14 Masa mahura hay ma sla yawa ha ma hëtmar ndaw masa ma hëtar salay anğa heyey malacakaya da cakay ata Piyer ta Jan na, kwa ta gwamara nga mbëddamatara daa saba.

15 Da ray nğene, mahura hay a, a badamatërwa la daa way a, a zlamar mesley yawa da wuzlah ata.

16 A lëvam: «Ya da kadamatakwa ndëhay keđe na, kwara? Maja ndëhay da Jeruzelem tabiya a sërmara fara fara Gazlavay ta key maazla mahura la ta fa ata. Ya gwakwa ya rëskwa maazla ha keđe ba.

17 Ama amba mey keđe a daw fa mey fa mey saba, asaya amba ndëhay mekele a cëndamara ba na, si ya tëktakwa ndëhay cew keđe. Ya tëktakwa a da wuzdamara mey da ray Yesu a ndëhay saba sëlak.»

18 Ta', a zëlmata saya, a tëkmata nğaa sërkedey ndëhay da ray mey nga Yesu, asaya, a tëkmata kwa nga key mafay nğaa maaya ta ndëhay da ray Yesu.

19 Ama ata Piyer ta Jan a mbëddamatara, a lëvmatar: «Akwar ta ray akwar, nëkmara mey keđe cey. Maaya fa mey nga Gazlavay na, ya tëbam mey akwar da ray mey nga Gazlavay daw?

20 Ala na, si cëma yaa guzlam da ray cek hay masa ala ma hëtmar ta dey ala ta masa ala ma cëndamara ta slëmay ala.»

21-22 Mahura hay ma sla yawa nga Jëwif hay kaa heyey ta hëtam mey nga sërdamata banay daa ba, maja ndëhay tabiya fa hëlmamara Gazlavay maja maazla ha. Ndaw masa ma hëtar salay anğa ta maazla heyey, mevey anğa a fëna kwakwar mëfad. Maja mahura hay a ta hëtam mey da ray ata daa ba na, a kamatar mey ta gëdan saya, ta' a mbëkdamata.

Medërey-dangay nga ndëhay nga Yesu

23 Fa dëba ha, mahura hay ma sla yawa nga *Jëwif hay heyey ma mbëkdamata ata *Piyer ta *Jan la na, ta', a vëham fa ndëhay ata hay. A kadamatara mey masa *bay-ray hay nga ndëhay ma ka kwakwas nga Gazlavay ta mahura hay nga Jëwif hay kaa heyey ma lëvmatar.

24 Ndëhay ata hay a, a jëkfamatar slëmay. Ata tabiya ta', a dëram dangay nğada Gazlavay ta mevel pal, a lëvam: «Bay Gazlavay, Mawaca-waca, ara kah ma lëma slam da vad ta cek hay da hwad a, ara kah ma lëma slam da hwayak ta cek hay da hwad a, ara kah ma ka bëlay ta cek hay da hwad a.

25 Ara kah maa guzley zleezle ta mey ndaw akah, *Davít, papañ nga papa ala. Ka wuzdara ta fa Mesëfney akah amba a lövey:

“Ndëhay masa Jëwif hay ba fa yam mey na, maja me? A slam yawa nga tede nga nësey Bay Gazlavay na, maja me?”

26 Bay hay da bëla kefe fa cakalam mey, mahura hay fa kusam nga key vëram ta Bay Gazlavay leñ ta ndaw masa anja ma wala.”

27 Ahaw, cek aha ta key la anda kefe. Fara fara, Bay *Herawt ta *Pawns Pilat ta ndëhay masa Jëwif hay ba, ta *Israyel hay, ata tabiya ta kusam la daa berney a kefe, da ray Yesu, ndaw ma ka slëra akah masa kah ma wala nga lëhdata ndëhay.

28 Ata ma kamata cek hay tabiya kefe na, a kamara anda kah Bay Gazlavay ma wufey nga ka ta gëdanj akah dëga zleezle.

29 Wure kefe, Bay Gazlavay, nëka, ata fa kamandar mey ta gëdanj. Vëlndar gëdanj ngada ala, ndëhay ma ka slëra akah hay, nga wuzey mey akah ta mandërzay daa dey ba sëlak.

30 Wuzdërwa gëdanj akah! Mbëldata masa-macay hay, key maazla hay nga wuzwa gëdanj akah aa ta ala, ta gëdanj nga Yesu, ndaw ma ka slëra akah.»

31 Ata ma ndëvdamara medërey-dangay la na, slam masa ata ma kusam da hwađ a, a wusey gëđ-gëđ. Ata tabiya marëhtakaya ta *Mesëfney nga Gazlavay, a wuzdamara mey nga Gazlavay ta mandërzay daa dey saba.

Ndëhay nga Yesu a jënam vaw da wuzlah ata

32 Ndëhay ma tëba mey nga Yesu tabiya a njam mewulkey ata letek, mevel ata macëmkyaya pal. Ndaw masa ma lövey: «Zleley adaw na, yah pal ma wa» na, daa ba. Ama a wunkamara zleley ata hay da wuzlah ata.

33 Ndëhay meslërey nga Yesu a kam sede da ray maslëkdawa nga Bay Mahura Yesu daa memëcey na, ta gëdanj nga Gazlavay. Ata tabiya, Bay Gazlavay ta pëstar mey la ga.

34 Da wuzlah ata na, kwa ndaw ma hurey cek mezëmey daa ba. Ndaw masa ley anja daha, da daa ba, way anja daha na, a hëđkada. A handërwa dala ha

35 a har ndëhay meslërey a. Ndëhay meslërey a, a wunkamatara dala ha ngada ndëhay masa daa *mecëmey-ray nga ndëhay nga Yesu. A vëldamara dala ha ngada ndaw a ndaw a tëde nga wusa.

³⁶ Ndaw da wuzlah ndëhay nga Yesu a daha, mezëley *Jawzef. Annga ndaw daa səkway nga *Levi, a yawa da Sipëre. Ndëhay meslërey a, a zëlmara na, *Barnabas, anda melëvey «ndaw ma vëltar gëdan a ndëhay.»

³⁷ Ley annga daha. A hëdkada ley a. Fa dëba ha, a handërwa dala ha, a vëldatara a ndëhay meslërey hay.

5

Mey da ray ata Ananiyas ta ngwas anga Safira

¹ Ndaw daha mezëley *Ananiyas ta ngwas anga Safira, a cëmdamara dëy ata letek. Ta', Ananiyas a hëdkada ley ata.

² A wunka dala ha cew, ta', a bada siya. Siya may, a handatara a ndëhay meslërey heyey, a vëldatara anda ara dala nga ley ata ha cëpa. Ngwas anga a sëra cek masa zel e ma ka.

³ Ama *Piyer a lëvar: «Ananiyas, ka mbëkda *Satan amba a mbëzey aa mevel akah na, maja me? Ka ta baderwa siya nga dala nga ley akah ha sem. Anda kefe, ka ta mbërzla *Mesëfney nga Gazlavay sem.

⁴ Daa masa kah ma hëdkada daa ba na, kah ma wa, ba diya? Kwa kah ma hëdkada la kefe, kah ma wa dala ha. Ka wulkey daa ray akah nga key cek kefe na, maja me? Ka mbërzley kaa na, ndëhay ba, ama ka mbërzley Gazlavay.»

⁵ Masa Ananiyas ma cënda mey a la anda kefe na, a tëfey, pam! a mëcey. Mandërzay a katar kwa ara mey ba, a ndëhay ma cëndamara mey a.

⁶ Ta', gula hay a samawa, a mbëzmara vagay a, a badamërwa, a diyam a pëshamara aa cëvay.

⁷ Ler maakar fa dëba ha na, ngwas anga, a wuswa. Ama a sëra cek masa ma key ta zel e ba.

⁸ Piyer aa cëfda, a lëvar: «Kadiwa, ka hëdkadamara ley akwar na, dala ha kefe tar daw?» A mbëddara, a lëvar: «Ahaw, ya hëdkadamara këne.»

⁹ Anda kefe, ta', Piyer a lëvar: «Ka cëmdamara dëy akwar ta zel akah, nga jedey Mesëfney nga Gazlavay na, maja me? Ehe, gula hay ma pëshamara zel akah, ata fa mey-slam. A da pëshamaka këne may.»

¹⁰ Wure wure ngene, ngwas aha a tëfey fa mey anga, pam! a mëcey. Gula hay kefe heyey a mbëzmawa, a hëtfamara ta mëcey sem. Ta', a lamara, a handamara, a pëshamara a cakay zel e.

¹¹ Fa dëba ha, mandërzay a katar ga ara mey ba ngada ndëhay daa Egëliz tabiya ta ngada ndëhay ma cëndamara mey a.

Ndëhay meslërey nga Yesu a kam maazla hay

¹² Ndëhay meslërey nga Yesu fa kam maazla hay ga da wuzlah ndëhay nga wuzdërwa gëdan nga Gazlavay. Fa ðar a, fa ðar a, ndëhay ma tëba mey nga Yesu tabiya fa diyam aa *Way-mekey-kwakwas nga Gazlavay, fa kusam fetedë ta mevel pal dasi Balak nga *Salamanjw heyey.

¹³ Ndëhay siya ma tëbmara mey nga Yesu fara fara ba na, a wudam nga kusey ta ata ba, maja a zloram, ama ndëhay tabiya faa hëmdamata ndëhay ma tëba mey nga Yesu a cënga.

¹⁴ Mandaw mandaw ndëhay fa samawa a dey a, a dey a, zel hay, ngusay, fa tëbmara mey nga Bay Mahura, a cëmam a dey ndëhay nga Yesu heyey.

¹⁵ Maja ndëhay meslërey nga Yesu a fa kam maazla hay ta gëdan nga Gazlavay na, ndëhay a handamawa masa-macay hay a mey-cëved. A handamatërwa fetedë, a nadamata a ray bëbele hay, da daa ba, a ray gegëded hay, amba da masa *Piyer fa daw taa cëved e ngene na, meezed anga a wusey a ray siya hay, a mbëlam.

¹⁶ Ndëhay ga a samawa da slala hay mekele mekele masa gweegwe ta berney nga *Jeruzelem, a handamawa masa-macay hay, ta ndëhay masa ta malula da ray. Ndëhay a tabiya ta mbëlam sem.

A sërdamata banay ta ndëhay meslërey nga Yesu

¹⁷ Yaw, *ndaw mahura da ray ndëhay ma ka kwakwas nga Gazlavay ta ndëhay da cakay a, anda melëvey ndëhay masa da wuzlah *Saduse hay, sëlëj a katar ga ta ndëhay meslërey nga Yesu heyey. A slam yawa amba a sërdamata banay.

¹⁸ Ta', a kërzamata meedey ndëhay tabiya, a handamata aa fërsëne.

¹⁹ Ama dasi tavad ngene, maslan nga Gazlavay a pawa salay da vad, a wura mey-slam nga fërsëne he, a badatërwa ndëhay meslërey heyey, a lëvtar:

²⁰ «Diyam aa *Way-mekey-kwakwas nga Gazlavay, wuzdamatara mey hay tabiya da ray heter mawiya a ndëhay.»

²¹ Ndëhay meslërey heyey a cënmara mey a maslan a. Slam bën-bën na, ta', a diyam, a mbëzam aa Way-mekey-kwakwas nga Gazlavay heyey, a zlamar ngaa sërkadamata ndëhay.

Daa ngene, ndaw mahura da ray ndëhay ma ka kwakwas nga Gazlavay ta ndëhay da cakay a, a kusmatërwa bay-ray hay nga Jëwif hay tabiya nga sley yawa. Ta', a slëram

ndëhay nga ñgëlmatërwa ndëhay meslërey nga Yesu kaa heyey daa fërsëne.

²² Ndëhay heyey a wusam aa fërsëne he na, ta hëtfamatar ndëhay meslërey nga Yesu daa ba. Ta', a vëhmawa, a kadamatara a ndëhay mahura hay ma sla yawa kaa heyey,

²³ a lëvmatar: «Ala ta hëtfamatar daa ba. Ya wusam na, mey-slam magërcakaya maaya maaya, ndëhay ma jëdmata ata fa mey-slam a, ama ya wurmara mey-slam a, ya mbëzam aa way a na, ndëhay a, ata da hwad a daa saba.»

²⁴ *Bay-ray nga ndëhay ma jëda Way-mekey-kwakwas nga Gazlavay, ta *bay-ray hay nga ndëhay ma ka kwakwas nga Gazlavay kaa heyey a cëndamara na, mey a, a hëbtar ray, a sërmara cek ma key ta ndëhay meslërey kaa heyey ba.

²⁵ Ndaw daha, ta', a sawa, a lëvtar: «Ehe, jëkam slëmay, ndëhay masa akwar ma ndëkwdamata aa fërsëne heyey na, ata daa Way-mekey-kwakwas nga Gazlavay, faa sërkadamata ndëhay.»

²⁶ Ta', bay nga ndëhay ma jëda Way-mekey-kwakwas nga Gazlavay ta sewje anga hay a diyam, a ñgëlmatërwa ndëhay meslërey heyey. Sewje hay a, ta kamatar mey ta gëdan daa ba, maja a zluram ndëhay a daa zakamata ta angwaw.

²⁷ Fa dëba ha masa sewje hay a ma ñgëlmatërwa la na, ta', a lacadamata fa mey nga mahura hay ma sla yawa ha. *Ndaw mahura da ray ndëhay ma ka kwakwas nga Gazlavay heyey aa cëfdata,

²⁸ a lëvtar: «Ala ta tëkmakwar sem nga wuzey mey a ndëhay da ray ndaw aha, ama akwar fa kamara cënga. Fara fara, akwar ta wuzdamara mey a sem a ndëhay tabiya da *Jeruzelem. Asaya, ka wudam ndëhay tabiya a wulkam na, ara ala ma këdmara ndaw aha, ba diya?»

²⁹ *Piyer ta ndëhay meslërey siya a mbëddamara, a lëvmar: «Si cëma ya cënmar mey a Gazlavay da ray ala ma da cënmatar mey a ndëhay.

³⁰ Akwar ta këdmara Yesu la vagay fa hwadam mazlangalakaya. Ama Gazlavay nga papan nga papa alëkwa hay ta slëkdadërwa sem daa memëcey.

³¹ Yesu a na, ara ndaw masa Gazlavay ma la a vad a har-zëmay anga. A pa nga ndaw mahura, Bay ma lëhdata ndëhay. A ka këne amba a wurey cëved ngada ndëhay *Israyel hay nga mbëddamara menjey ata, nga sëpam Gazlavay ta mevel pal, amba Gazlavay a mbëkdatara meberëy ata.

³² Ala na, ya fa kam sede da ray cek hay a kefe. *Mesëfney nga Gazlavay fa key sede da ray a köne may, Mesëfney masa Gazlavay ma vëldatara a ndëhay ma cënmar mey.»

³³ Ndëhay mahura hay ma sla yawa heyey a cëndamara na, mevel a catar ga ara mey ba, a wudam nga këdmata vagay.

³⁴ Ama ndaw Fariza pal da wuzlah ata daha, mezëley anga Gamaliyel. Anga ndaw mahura maa sërkada *kwakwas nga Mawiz, ndëhay tabiya faa hëmdamara. Ta', a lecey da wuzlah mahura hay ma sla yawa kaa heyey, a lëvtar a ndëhay nga badamatërwa ndëhay meslërey nga Yesu a dagay.

³⁵ Fa dëba ha a lëvtar a mahura hay ma sla yawa ha: «Akwar Israyel hay, wam vaw da ray cek masa akwar ma da kamatara a ndëhay kefe.

³⁶ Sërfadamara, zleezle ndaw mezëley Tewdas ta sawa la, a lövey: "Yah, ndaw mahura." Ndëhay ga, a key temere mëfad ma sëpmara. Ama ndëhay mekele hay ta këdmara sem vagay. Ndëhay ma sëpmara tabiya heyey, taa kwacam ray sem, mey a daa saba.

³⁷ Fa dëba anga, ndaw daha mezëley Juda, ndaw *Galile. Anga ta sawa la daa dër hay masa ndëhay fa slëfam vaw. Anga ha na, ta hëldata ndëhay la nga sëpmara, ndëhay ga ta diyam la asiya. Fa dëba ha, ta', a këdmara vagay saya, ndëhay ma diyam asiya heyey taa kwacam ray sem may.

³⁸ Da ray ngene, ya fa lëvkwar: ka da hëbam ray maja ndëhay a kefe saba, mbëkdamata nga diyam. Mewulkey ata ta slëra ata ha, da a sawa ta fa gëdanj nga ndaw-magëdanj na, a ndëvey la.

³⁹ Ama da mewulkey ata ta slëra ata ha a sawa ta fa gëdanj nga Gazlavay na, ngene ka gwamara ngaa zëddamara daa ba. Wam vaw, ka da këdam vaw ta Gazlavay ba.»

Mahura hay ma sla yawa heyey, ta', a tëbmara mey anga.

⁴⁰ A zëlmatarëwa ndëhay meslërey heyey. A slëdmata, a lëvmatar: «Ka da wuzam mey da ray Yesu saba.» Ta', a mbëkdamata.

⁴¹ Ndëhay meslërey a, a slëkdam, a mbëkdamata ndëhay ma sla yawa heyey, ta', a diyam ta meesëmey maja Gazlavay ta nëkta la, ata tëde nga sërey banay maja Yesu.

⁴² Mandaw mandaw ata fa diyam aa Way-mekey-kwakwas nga Gazlavay lej a way ndëhay mekele mekele. Ata faa sërkadamatara *Mey-maaya-mawiya da ray Yesu a ndëhay fetëde, kwa a mbëkdamara ba. Ata fa wuzdamatara

Yesu na, *ndaw masa Gazlavay ma wala nga lëhdata ndëhay.

6

A walam ndëhay maasala nga jëney ndëhay meslërey nga Yesu

¹ Daa ngene, ndëhay ma tëba mey nga Yesu fa sëkmawa, a dey a, a dey a. Da wuzlah ata na, *Jëwif hay maa guzlam mey Gërek daha. A yam mey ta Jëwif hay mekele daa hwayak a ngene, a lëvam: «Ijgwas-vagay hay masa da wuzlah ala, fa hëtam cek mezëmey masa ata ma wunkamatara mandaw mandaw na, daa ba.»

² Da ray ngene, ndëhay meslërey kuraw a ray a cew heyey, ta', a kusmata ndëhay ma tëba mey nga Yesu tabiya, a lëvmatar: «Ala na, ya mbëkdamara mewuzey mey nga Gazlavay, amba ya wunkam daf na, a zlerda ba.

³ Mëlma ala hay, maaya na, ka walam *ndëhay maasala da wuzlah akwar, masa ndëhay faa hëmdamata, masa marëhtakaya ta *Mesëfney nga Gazlavay, ndëhay masa ta lëngesl, amba ya vëldamatara slëra ha asi har ata.

⁴ Ala na, ya vëldamara ray ala nga dërey dangay a Gazlavay, ta nga wuzey mey anga.»

⁵ Mey a kedë a mbafatar a ndëhay tabiya. Ta', a walam Etiyen, ndaw ma tëba mey nga Yesu maaya maaya, marëhkaya ta Mesëfney nga Gazlavay, lëj *Fëlep, Përakwar, Nikanawr, Timanw, Parmanas, asaya, Nikwala, ndaw Antiyaws masa ma mbëkda kwakwas anga zleezle nga sëpey kwakwas nga Jëwif hay.

⁶ Ta', a handamatërwa ndëhay maasala ha fa ndëhay meslërey heyey. Ndëhay meslërey a, ta', a dëram dangay, a pamatar har a ray, amba a kamara slëra ata ta gëdan nga Gazlavay.

⁷ Yaw, mey nga Gazlavay fa daw fa mey fa mey. Da *Jeruzelem ndëhay ma tëba mey nga Yesu fa sëkmawa a dey a, a dey a. Ndëhay ga ma ka kwakwas nga Gazlavay a tëbmara mey nga Yesu may.

A kërzamara Etiyen

⁸ Etiyen na, Bay Gazlavay ta pësar mey la ga, a vëlar gëdan anga. Da ray ngene, anga fa key maazla hay ga ma rëzley ndaw da wuzlah ndëhay.

⁹ Ama ndëhay siya hay a zllamar nga cakalafamar mey. Ara *Jëwif hay ma samawa daa berney nga Siren lej daa berney nga Alekzandëri. Ata da wuzlah ndëhay ma kusam daa *way-mewuzey-mey nga Gazlavay masa ata ma zëlmara «Way nga ndëhay ma bamawa daa beke.» Mekele hay ma cakalafamar mey na, a samawa daa hwayak nga Silisi lej daa hwayak nga Azi. A zllamar nga key yawa ta Etiyen e.

¹⁰ Ama ta gwamara a ray a daa ba, maja aa guzltar ta lengesl masa *Mesëfney nga Gazlavay ma vëldara.

¹¹ Da ray ngene, a diyam, a vëlmatar dala a ndëhay amba a mbërzlam a ray Etiyen e, a lëvam: «Ya cëndamara na, ndaw kefe fa cëfda *Mawiz, fa cëfda Gazlavay.»

¹² A hëldamata ndëhay cëpa, ta mahura hay nga Jëwif hay, lej ndëhay maa sërkada kwakwas nga Mawiz. Ta', a diyam, a kërzamara Etiyen, a handamara fa mahura hay ma sla yawa nga Jëwif hay.

¹³ Ta', a ngëlmawa ndëhay membërzley, amba a lëvam: «Mandaw mandaw, ndaw kefe faa guzley mey maaya ba da ray *Way-mekey-kwakwas nga Gazlavay ta da ray kwakwas nga Mawiz.

¹⁴ Ya cëndamara, a lëvey: “Yesu, ndaw *Nezeret, a bëzla Way alëkwa mekey kwakwas nga Gazlavay la, a mbëfdata kwakwas masa Mawiz maa sërkadandakwara la mekele.”»

¹⁵ Ndëhay tabiya manjatakaya daa way mesley yawa fetede a nëkmara Etiyen ndëzl a, dey anga fa wedey anda dey nga maslan nga Gazlavay da vad.

7

Etiyen aa guzltar ngada mahura hay ma sla yawa nga Jëwif hay

¹ *Ndaw mahura da ray ndëhay ma ka kwakwas nga Gazlavay aa cëfda Etiyen, a lëvar: «Mey masa ata ma kadamara kefe na, fara fara daw?»

² Etiyen a mbëfdata, a lëvey: «Mëlma adaw hay, ta papay hay, jëkfamaya slëmay. Gazlavay masa manjakaya daa slam ma wedey na, ta wuzar vaw la a *Abëraham, papañ nga papa alëkwa, daa masa anga daa hwayak nga Mezapawtami, ta yingey aa berney nga *Haranj daa ba aranj.

³ Gazlavay a lëvar: “Bey daa hwayak akah, mbëkdata sëkway akah hay, daw aa hwayak masa yah ma da wuzdakawa.”

⁴ Da ray ñgene, Abëraham a slëkdey daa hwayak nga ndëhay *Kalde, a daw a njeý aa berney nga Haran. Fa dëba nga memëcey nga papaha, Gazlavay, ta', a lëvar nga yingey da Haran a ñgadaa hwayak mekele. Maja ñgene, a sawa aa hwayak nga Kana, masa alëkwa *Jëwif hay da hwad a wure kefe.

⁵ Ta', a njeý aa hwayak a, ama daa ñgene, Gazlavay ta vëldara hwayak a ñgada Abëraham daa ba aran, kwa slam nekëdey nga pey salay daa hwayak a ñgene ta hëtey ñgada anga daa ba aran. Daa ñgene, Abëraham bëzey anga daa ba aran, ama Gazlavay ta lëvar la, a da vëldara hwayak a ñgene amba a wey da ray a, asaya amba bëza hay nga bëz anga hay a wamara fa dëba anga.

⁶ Gazlavay a lëvar saya: "Bëza hay nga bëz akah hay a da njam daa hwayak nga ndëhay mekele. Ndëhay a, a da wamata, a da kam beke nga ndëhay a, a da sërdamata banay haa mevey temere mëfad.

⁷ Ama fa dëba ha ya da katar sariya a ndëhay ma kadamata beke he, wara bëza hay a, a bamawa daa hwayak a, a vëhmawa, a ragadamaya la daa slam aha kefe."

⁸ Ta', Bay Gazlavay a jëwam mey ta Abëraham. *Mejëwey-mey aha na, ara ta fa *mesley mandawal. Anda kefe, Abëraham a yawa *Izak. Fa dëba ha luma pal na, a slara mandawal. Izak a slara nga bëzey anga, *Jakwap këne. Jakwap may, a slatara nga bëz anga hay kuraw a ray a cew * këne. Ma yamatërwa sëkway alëkwa hay kuraw a ray a cew kefe na, ara bëza hay nga Jakwap.

⁹ «Papan nga papa alëkwa hay a, masa bëza hay kuraw a ray a cew nga Jakwap heyey, sëlen a katar da ray *Jawzef, mëlma ata. Ta', a hëdkadamara nga key beke daa hwayak nga *Ejip. Ama Gazlavay aa ta anga,

¹⁰ fa jëfa, a lëhda daa banay anga hay tabiya. *Farawan, bay daa hwayak nga Ejip, a wulkey maaya da ray Jawzef maja Gazlavay ta vëlar lengesl la. Farawan, ta', a pa Jawzef nga ndaw mahura daa hwayak anga, ta da way anga tabiya.

¹¹ «Fa dëba ha, may ta key la ga daa hwayak nga Ejip ta daa hwayak nga Kana tabiya. Banay ga da ray ndëhay a

7:4 7.4 MC 11.31; 12.4 7:5 7.5 MC 12.7 7:6 7.6-7 MC 15.13-14 * 7:8 7.8 bëz anga hay kuraw a ray a cew: Sëkway hay kuraw a ray a cew nga Israyel hay na, ara ndëhay daa sëkway nga Ruben, daa sëkway nga Simeyanjw, daa sëkway nga Levi, daa sëkway nga Juda, daa sëkway nga Isakar, daa sëkway nga Zabulanjw, daa sëkway nga Jawzef, daa sëkway nga Benjamen, daa sëkway nga Dan, daa sëkway nga Naftali, daa sëkway nga Gat, len daa sëkway nga Aser. Nëka MC 35.23-26. 7:8 7.8 MC 17.9-14; 21.2-4; 25.26; 29.31-30.24; 35.16-18 7:9 7.9 MC 37.11, 28; 39.2, 21 7:10 7.10 MC 41.37-44

daha. Papanj nga papa alëkwa hay, bëza hay nga Jakwap heyey, a hëtam cek mezëmey saba.

¹² Ama Jakwap ma cënda cek mezëmey daha da Ejip na, ta', a slërdata bëz anja hay. Njgene ara meslërey njeeme.

¹³ A diyam nga dey cew na, Jawzef ta', a wuztar vaw a mëlmaha hay. Da ray njgene, Farawanj, a sërta sækway nga Jawzef hay.

¹⁴ Fa dëba ha, Jawzef ta', a slërey mëlmaha hay nga njgëlmërwa papaha Jakwap ta ndëhay da way anja tabiya nga samawa, amba a njam bama. Ndëhay a tabiya ata kwakwar maasala a ray a zlam.

¹⁵ Ta', Jakwap a daw a njeý a Ejip. A məcwa fetede. Bëz anja hay may, masa papanj nga papa alëkwa hay tabiya, a məcaw fetede.

¹⁶ Fa dëba ha, a handamata vagay ata hay aa hwayak nga Sikem, amba a pëshamatërwa fetede aa cëvay nga Abëraham. Cëvay a na, ara cëvay masa Abëraham ma hëdka fa bëza hay nga Hamawr da Sikem e zleezle, a vëltar dala anda ata ma wudam.

¹⁷ «Pas masa Gazlavay ma da ka cek anda anja ma lëvar a Abëraham zleezle na, gweegwe cay. Anda kedë, ndëhay *Israyel hay masa daa beke daa hwayak nga Ejip heyey fa yam a dey a, a dey a. Ata ga fetede.

¹⁸ Ta', a pam bay mekele da Ejip, bay a, a sëra Jawzef ba.

¹⁹ Bay a njgene, ta key wewer sem da ray sækway alëkwa hay Israyel hay, a sërdata banay ta papanj nga papa alëkwa hay heyey. A tëktar dëy a ndëhay Israyel hay a, nga këlzlamata bëz ata hay gevew saw, amba a məcaw.

²⁰ «Daa dëar a njgene, a yamërwa *Mawiz, anja bëzey membey, ma mbafar a Gazlavay. A gëley da way papaha kiya maakar.

²¹ Fa dëba ha, a badamërwa, a këlzlamara, ama dam nga Bay Farawanj lej! a la. Ta', a gëla anda bëzey da hwad anja.

²² Da ray njgene, Mawiz aa sërkey cek hay tabiya masa ndëhay da Ejip ma sërmara. Mawiz a tërey ndaw masa ta gëdanj, ta fa mey masa aa ma wuzda, asaya ta fa slëra masa aa ma ka.

²³ «Masa Mawiz ma key mevey kwakwar mëfad cay na, a jëwey vaw nga daw nga nëktërwa mëlmaha hay Israyel hay.

²⁴ Masa anğa ma wusey la na, a hëtar ndaw Ejip fa këdfa ndaw ata. Ta', a daw a jëna ndaw ata ha, a këdëy vaw aa slam a nğa anğa, a këdfa ndaw Ejip kaa heyey vagay.

²⁵ Mawiz a wulkey na, mëlma ha hay Israyel hay a sërmara ara ta fa anğa Gazlavay ma da badatërwa da Ejip, ama ata na, a sërmara ba.

²⁶ «Pepërek e saya, Mawiz a hëtfatar Israyel hay cew fa këdam vaw. A wudëy nğa wunkata amba a njam daa zazay, a lëvtar: “Haya, ndëhay këdë, akwar na, mëlman hay, ba diya? Kaa ka këdam vaw na, kwara?”

²⁷ Ama ndaw masa ma cakala mey na, a dëkda Mawiz, a lëvar: “Ma paka nğa bay nğa kandar sariya na, wa?”

²⁸ Ka wudëy ka këdya vagay anda kah ma këdfa ndaw Ejip nğaa kwana heyey daw?”

²⁹ Mawiz a cënda ndaw kaa maa guzlar anda këdë na, mandërzay a kar, ta', a hway aa hwayak nğa Madiyan. Manjakaya daa hwayak a na, anğa ndaw-mëlak. A yawa bëza hay mezële hay cew fetedë.

³⁰ «Fa dëba ha mevey kwakwar mëfad saya, Mawiz aa da wuzlah-ley, gweegwe ta anğwa nğa Sinay. Maslan nğa Gazlavay a pawa salay da vad, a wuzar vaw daa awaw, da wuzlah gwaslaf.

³¹ Mawiz a hëtar na, a rëzley. Masa anğa fa nğëchey a cakay a amba a nëka maaya maaya na, a cënda dëy nğa Bay Gazlavay maa guzlwa da hwad a, a lëvar:

³² “Yah, Gazlavay masa papan nğa papakw akwar hay ma ragadamar. Ahaw yah, Gazlavay masa Abëraham, Izak, len Jakwap ma namar ray.” Mawiz a zlurey, aa wesey, a wudëy nğa nëka saba.

³³ Bay Gazlavay a lëvar: “Cëkwa tarak da salay la, maja slam masa kah malacakaya da hwad a këdë na, slam aha ara slam masa Gazlavay aa da hwad a.

³⁴ Fara fara, ya fa hëtar banay nğa ndëhay adaw hay da Ejip, ya fa cënda matëway ata. Da ray nğene, ya pawa salay na, amba ya lëhdata daa beke. Wure këdë na, daw, ya slërdaka a Ejip.”

³⁵ «Yaw, Mawiz aha ara ndaw masa zleezle Israyel hay a ma wudmara ba, ma lëvmar: “Ma paka nğa bay nğa kandar sariya na, wa?” heyey. Ama Mawiz a na, ara ndaw masa Gazlavay ma pa nğa bay amba a lëhdata Israyel hay daa beke. Gazlavay a pa nğa bay nğa lëhdata na, ta fa maslan ma wuzar vaw da wuzlah gwaslaf heyey.

³⁶ Ara Mawiz ma badatërwa Israyel hay da Ejip ta maazla hay masa anğa ma kata kata maja Gazlavay aa ta anğa. A

kata maazla hay a na, daa hwayak nga Ejip, da mey Bëlay Magaza, lej da wuzlah-ley haa a key mevey kwakwar mëfad.

³⁷ Ara Mawiz a saya ma lëvtar a Israyel hay: “Gazlavay a slërkwar *ndaw ma tëla mey la mekele daa sëkway akwar anda anga ma slërdiwa kefe may.”

³⁸ Daa masa Jëwif hay makustakaya da wuzlah-ley heyey na, ara Mawiz a, ma handa mey ngada papañ nga papa alëkwa hay, mey masa maslan nga Gazlavay da vad maa guzlar daa angwaw nga Sinay. Asaya, ara anga ma tëbërwa *mewey nga Gazlavay ma vëley heter a ndëhay, amba a wuzdandakwara.

³⁹ «Ama papañ nga papa alëkwa hay a, a wudam nga cënmär mey a Mawiz a ba, a tëbmara mey anga ba, a wudam nga vëham a Ejip e cënga.

⁴⁰ Da ray ngene, a lëvmar a *Aranw, “Kandakwar kuley hay nga jëndakwar daa mepëkey alëkwa hay. Mawiz ma badandakurwa da Ejip kaa na, ya sërkwa cek ma kar ba.”

⁴¹ Ta’, a vëdam cek anda bëz-sla, a ragadamar, a tamara anda kuley ata, a kam gwagway ta meesëmey maja cek aha masa ata ma kamara ta har ata.

⁴² Ama Gazlavay pëla! a mbëdfatar dëba, a mbëkdata nga ragadam a wurzla hay da vad anda mawuzlalakaya daa dërewel nga ndëhay ma tëla mey nga Gazlavay zleezle. Daa dërewel e, Gazlavay a lëvey:

“Akwar ndëhay Israyel hay, daa masa akwar ma njam mevey kwakwar mëfad da wuzlah-ley na,
akwar ta hërmaya gënw hay la daw?

Akwar ta vëlmaya cek hay la daw?

⁴³ Daa ba sëlak! Ama ka tam na, kuley hay mekele mekele. Akwar ta lamara kuley mezëley Malakw la ta way a, a har. Asaya, akwar ta lamara kuley malëm kaya
anda wurzla mezëley Refan la.

Maja akwar ma lëmamata kuley hay a kefe,
ka ragadamatar na,
ya handakwar la këlen
ma fëna hwayak nga Babilanw saya.”»

⁴⁴ Etiyen a lëvtar saya: «Papañ nga papa alëkwa hay ta kërca way la zleezle da wuzlah-ley nga pey *akwatay nga mejëwey-mey nga Gazlavay a hwad a, a pëkam ta anga. Ara Gazlavay ma wuzdara a Mawiz, a da kërca way aha na,

kwara. Fa dëba ha, Mawiz ta kërca la anda Gazlavay ma wuzdara ha.

⁴⁵ Papanj nga papa alëkwa hay ta pëkam la ta Way-mekërcey aha, haa kasl Jesëwe ma key bay-ray ata. Ta pas masa Jesëwe ma key bay-ray ata na, Gazlavay a bëlta ndëhay masa Jëwif hay ba daa hwayak kedë fa mey fa mey, amba Jëwif hay a wamara hwayak a. Way-mekërcey nga Gazlavay ta ambal a na, aa daha haa kasl pas masa *Davit ma zëma bay anja.

⁴⁶ Davit ta hëtey maaya nga Gazlavay la, aa cëfda Gazlavay nga vëlar cëved amba a lëmar way mawiya ngada Gazlavay masa Jakwap ma ragadar.

⁴⁷ Ama, fa dëba ha, ara Bay *Salamanjw ma lëmra way mawiya ha ngada Gazlavay.

⁴⁸ «Ama Bay Gazlavay da vad a njeý daa way masa ndëhay ma lëmamara ta har ata ba. Anda *ndaw ma tëla mey nga Gazlavay zleezle ma lëvey:

⁴⁹ “Bay Gazlavay a lëvey:

Slam da vad na, ara slam nga bay adaw,

slam da hwayak may, ara slam-mepey-salay adaw.

Ka lëmamaya na, way wura?

Slam adaw memëskey-vaw na, wura?

⁵⁰ Ara yah ma kata slam hay tabiya, ba diya?”»

⁵¹ Etiyen a lëvtar saya: «Akwar ndëhay ray manjërdaakaya hay! Akwar fa wudmara Gazlavay ta mevel akwar pal daa ba, ka cënmar mey ba sëlak! Mandaw mandaw, ka wudam *Mesëfney nga Gazlavay a key slëra daa akwar ba. Akwar na, anda papakw akwar hay zleezle.

⁵² *Ndaw ma tëla mey nga Gazlavay, masa papanj nga papakw akwar hay ta sërdamara banay daa ba na, daha daw? Ndëhay ma wuzdamara mey da ray ndaw pal masa maaya ma da sawa na, ara papakw akwar hay a ma këdmata vagay, ba diya? Wure kedë, akwar may, ka taa dëdfamar mey la a ndaw masa maaya ha kedë, ka ta këdmara sem vagay.

⁵³ Akwar na, Gazlavay ta slërdakwara kwakwas anja la ta har maslanj anja hay da vad. Ama akwar ta sëpmara kwakwas a daa ba.»

Aa zakamara Etiyen ta anjwa

7:44 7.44 way mekërcey: Mab 25.9, 40 **7:45 7.45** Jes 3.14-17; 18.1; 2Sam 6
7:46 7.46 Ps 132.1-5 **7:47 7.47** 2Sam 7.5-7; 1Bay 6.1-38 **7:48 7.48** 17.24-25
7:49 7.49-50 Iz 66.1-2 **7:51 7.51** Mab 32.9; 33.5; Jer 4.4; Rm 2.28-29; **ka wudam Mesëfney nga Gazlavay a key slëra daa akwar ba:** Iz 63.10; Ez 2.3-5 **7:52 7.52** Lk 11.47-48 **7:53 7.53** 7.38; Heb 2.2

⁵⁴ Ndëhay ma ka sariya heyey, mevel a catar a ray Etiyen ara mey ba. A zam har maja mevel ta catar la ga da ray mey masa Etiyen ma kada.

⁵⁵ Ama Etiyen, marëhkaya ta *Mesëfney nga Gazlavay, a nëkey dey a vad, a hëtar mewedey nga Gazlavay, a hëtar Yesu malacakaya ta har-zëmay nga Gazlavay.

⁵⁶ Ta', a lëvey: «Ehe, slam da vad mawurkaya, ya fa hëtar *Bëz nga Ndaw malacakaya ta har-zëmay nga Gazlavay.»

⁵⁷ Masa ata ma cëndamara Etiyen ma lëvey anda kedë la na, a wudam ta gëdan, a dëzlmata slëmay ata hay ta har. Ata tabiya a cëmam a ray a,

⁵⁸ a dëdamara, a badamara la daa berney, aa zakamara ta anğwa. Masa ata fa daa zakamara na, a mbëkdamatërwa jëbe ata hay fa ndaw mezëley *Sawl.

⁵⁹ Daa masa ata faa zakamara na, Etiyen e a dërey dangay a Gazlavay, a lëvey: «Bay Mahura Yesu, tëba mesëfney adaw.»

⁶⁰ Ta', a regedey, a wudey ta gëdan, a lëvey: «Bay Gazlavay, mbëkdatara mebërey ata ha kedë.» Anğa ma lëvey anda kedë la na, pam! a mëcey.

8

1a Memëcey nga Etiyen e, a mbafar a Sawl.

Sawl a sërdata banay ta ndëhay nga Yesu

^{1b-3} Ta', ndëhay ma sëpa cëved nga Gazlavay ta mevel pal a lamara vagay nga Etiyen, a pëshamara aa cëvay. A tëwam ga maja memëcey anğa ha. Ta pas a nğene, banay mahura a sawa a ray ndëhay ma tëba mey nga Yesu da *Jeruzelem. *Sawl a, a sëpey cëved nga nësta ndëhay a. A daw a sëpta ndëhay mezële hay, ta nğusay fa way a, fa way a. A kërzata, a handata aa fërsëne. Daa nğene, ndëhay nga Yesu siya aa kwacam ray pal pal aa slam hay mekele mekele daa hwayak nga *Jude leŋ daa hwayak nga *Samari. Ndëhay daa *mecëmey-ray nga ndëhay nga Yesu masa mambëkakaya da Jeruzelem na, si ndëhay meslërey gway.

⁴ Ndëhay maa kwacam ray heyey, fa pëkam kwa aa wura aa wura, fa wuzam *Mey-maaya-mawiya.

Fëlep a wuzey Mey-maaya-mawiya daa hwayak nga Samari

⁵ Nga *Fëlep na, ta', a daw aa berney mahura daa hwayak nga *Samari. Masa anğa ma wusey la fetede na, a wuztar mey a ndëhay daa berney a da ray *Këriste, *ndaw masa Gazlavay ma wala nga lëhdata ndëhay.

⁶ Ndëhay daa berney a, a diyam, a kusam amba a cëndamara mey anğa, a nëkmara maazla hay masa anğa ma kata. Maja nğene, a jëkam slëmay maaya maaya fa mey masa Fëlep ma kadatara.

⁷ Malula a bey da ray ndëhay ga ta mewudey ta gëdan, ndëhay masa maahëlbatakaya ta jegwer hay a hëtmatar salay ata hay aa slam a.

⁸ Da ray nğene, ndëhay daa berney a aa sëmam ga, ara mey ba.

⁹ Daa berney a nğene, ndaw daha mezëley *Simanw. Masa Fëlep ta daw aa berney a daa ba aran na, Simanw fa key maazla hay ga, ama maazla hay a na, a sawa ta fa Gazlavay ba. Ta rëzley ndëhay ga la da Samari ta maazla hay a. A pa ray anğa nga ndaw mahura.

¹⁰ Maja nğene, ndëhay tabiya, bëza hay ta mahura hay daa hwayak a na, a tëbmara mey anğa. Aa guzlam da ray a, a lëvam: «Anğa na, ara ndaw ta gëdan masa ma zëlmara "gëdan mahura nga Gazlavay."»

¹¹ Ndëhay fetede a tëbmara mey nga Simanw a maaya maaya maja ta njeý la ga da wuzlah ata, ta rëzlta la ta maazla hay mekele mekele masa aa ma kata.

¹² Ama ta pas nğene, Fëlep a sawa, a wuztar *Mey-maaya-mawiya da ray Yesu Këriste, ta da ray mewey nga Gazlavay da ray ndëhay. Ndëhay masa ma tëbmara mey nga Fëlep e, ta hëtam *baptem la, kwa zel hay kwa nğusay.

¹³ Simanw, ndaw ma key maazla heyey, ta', a tëba mey a may. Fa dëba ha, a hëtey baptem, ta' a daw asi Fëlep, a mbëkda saba. A rëzley maja aa ma hëttatar maazla hay mahura masa Fëlep ma kata ta gëdan nga Gazlavay.

¹⁴ Fa dëba ha, ndëhay meslërey nga Yesu da *Jeruzelem a cëndamara na, ndëhay da Samari ma tëbmara mey nga Gazlavay la. Ta', a slërmatar ata *Piyer ta *Jan.

¹⁵ Masa ata Piyer ta Jan ma wusam la fetede na, ta', a dëram danğay a Gazlavay maja ndëhay a. Aa cëfdamara amba Mesëfney anğa a sawa a ray ata.

¹⁶ A dëram danğay a Gazlavay da ray ndëhay a na, maja *Mesëfney nga Gazlavay ta sawa kwa a ray ndaw pal dasi ata daa ba aran. Cek masa ata ma hëtam na, ara baptem ta mezëley nga Yesu Bay Mahura gway.

17 Da ray ñgene, ata Piyer ta Jan a pamatar har a ray. Ta', ndëhay a, a hëtam Mesëfney nga Gazlavay dëba.

18 Masa Simanw ma hëttatar ndëhay ma hëtam Mesëfney nga Gazlavay maja ndëhay meslërey a ma pamatar har a ray heyey na, ta', a vëltar dala ñgada ata Piyer ta Jan heyey,

19 a lëvtar: «Vëlmaya gëdan a may, amba da ya ta pey har la a ray kwa waawa na, ndaw a hëtey Mesëfney nga Gazlavay may.»

20 Ama Piyer a mbëddara, a lëvar: «Anja Gazlavay nga zëddaka ta dala akah ha cëpa, maja gëdan masa Gazlavay ma vëlda a ndëhay anga hay na, ka fa wulkey ka gwa nga hëdka ta dala.

21 Wure kedë mey akah daa slëra nga Gazlavay kedë daa ba, maja mevel akah ta mewulkey akah maaya ba fa mey nga Gazlavay.

22 Mbëkda mekey mebërey, cacëfdey ambahw fa Gazlavay maja mebërey akah. Da Gazlavay a mbëkdakawa mewulkey maaya ba daa mevel akah la kwa.

23 Ya nëka mevel akah na, matara. Kah ndaw masa sëlej, kah beke nga mebërey.»

24 Ta', Simanw heyey a mbëddatara ñgada ata Piyer ta Jan heyey, a lëvtar: «Ambahw, akwar ta ray akwar, dërmар dangay a Gazlavay maja yah, amba mey masa akwar ma lëvam kedë na, a hëtfaya ba.»

25 Masa ata Piyer ta Jan ma kam sede la da ray mey nga Bay Mahura Yesu, ma wuzdamatara la a ndëhay da Samari na, ta', a vëham a Jeruzelem. Ata fa diyam daa cëved na, a wuzam Mey-maaya-mawiya da slala hay mekele mekele daa hwayak nga Samari.

Ata Fëlep ta ndaw Etiyawpi

26 Maslan nga Gazlavay a lëvar a *Fëlep: «Slëkdey, daw ta da wurza taa cëved ma daw da *Jeruzelem ñgadaa berney nga Gaza. Cëved e a daw ta wuzlah ley.»

27-28 Fëlep, ta', a slëkdey, a daw. Daa cëved ñgene, a hëtar ndaw Etiyawpi fa daw a way. Anga ndaw mahura, *maangwafakaya nga key madërlam nga Kandas, ñgwas, bay ma wa hwayak nga Etiyawpi. Ara anga ma kërza dala nga Kandas a tabiya. Ndaw Etiyawpi a ta daw la a Jeruzelem, nga ragadar a Bay Gazlavay. Fa vëhwa ñgada way ta seret nga pëles. Anga fa jengey dërewel nga *Izay, *ndaw ma tëla mey nga Gazlavay zleezle.

29 *Mesëfney nga Gazlavay a lëvar a Fëlep: «Daw asi ndaw ta seret katay.»

³⁰ Følep, ta', a hway, a kërza ndaw aha daa cøved. Masa anga ma cønda ndaw a fa jengey daa ðerewel nga Izay, ndaw ma tøla mey nga Gazlavay na, ta', Følep aa cøfda, a løvar: «Ka fa cønda mey daa ðerewel masa kah ma jannga ngene daw?»

³¹ Ndaw Etiyawpi heyey a mbøddara: «Da ndaw ta kadiwa daa ba na, ya da cønda kwara?» Ta', a løvar a Følep heyey nga tøpwa aa seret anga ha. Følep, ta', a tøpey, a njeý a cakay a.

³² Mey daa ðerewel nga Gazlavay masa anga ma jannga ha na, mey a, a løvey:

«Annga na, anda tøban ma handamara nga hørey,
 anga anda böz-tøban ma tøway ba
 kwa masa fa handamara nga sley engwec anga,
 ta wura mey anga nga tøway anda ngene daa ba may.

³³ A pam dey a ray a ba anda cek saw,
 a kamar sariya ta cøved e ba.

Annga ta mbøkey bøzey da bøla
 nga zøley slømay anga daa ba,
 maja ta ndøvdamara heter anga da bøla sem.»

³⁴ Ndaw Etiyawpi heyey a løvar a Følep: «Ambahw, kadiwa cey! Ndaw ma tøla mey nga Gazlavay kaa na, aa guzley da ray wa? Aa guzley da ray anga ray anga daw, da ray ndaw mekele daw?»

³⁵ Ta', Følep a wuzdara mey daa ðerewel nga Gazlavay a. A zla ta fa mey masa ndaw a ma jannga kedø heyey, a wuzar mey da ray *Mey-maaya-mawiya nga Yesu.

³⁶ Masa ata fa diyam daa cøved, a wusam a mey yam daha. Ta', ndaw Etiyawpi a, a løvar: «Ehe, yam kedø daha. Ma tøkya nga høtey *baptem na, me?» [

³⁷ Følep a løvar: «Da ka ta tøba mey nga Yesu la ta mevel pal na, ka gwa nga høtey baptem.» Ndaw Etiyawpi a mbøddara, a løvar: «Ya ta tøba Yesu *Køriste la, anga Bøzey nga Gazlavay.»]

³⁸ Ta', ndaw Etiyawpi a, a løvar a ndaw ma kërza ray nga pøles nga lacada seret. Ata Følep ta ndaw Etiyawpi a, a pamawa salay, a mbøzam aa yam. Følep ta', a kar baptem a ndaw aha.

³⁹ Masa ata fa bamawa daa yam na, Mesøfney nga Gazlavay lej! a la Følep. Ndaw Etiyawpi a, a høtar saba, ama fa daw ta meesømey ga.

⁴⁰ Wure ngene, Følep a nøkey dey na, anga daa berney nga Azawtus. A daw ta mewuzey Mey-maaya-mawiya da

slala hay tabiya daa cøved haa kasl a wusey aa berney nga Sezere.

9

Sawl a tøba Yesu Bay Mahura

(SNM 22.6-16; 26.12-18)

¹ Daa ðar hay a ñgene, *Sawl heyey fa sərdata banay ta ndøhay ma səpa cøved nga Bay Mahura Yesu cənga. A ləvtar a da kəðta vagay. Ta', a daw fa *ndaw mahura da ray ndøhay ma ka kwakwas nga Gazlavay da *Jeruzelem.

² Aa cəfða ndaw aha nga wuzlalar leeter hay amba a handatara a *bay-ray hay daa way-mewuzey-mey hay nga Gazlavay daa berney nga Damas. A ka anda keðe, amba da ta hətəy ndøhay, kwa mezəle hay, kwa ñgusay, masa ma səpa cøved nga Yesu fetede la na, a kərzatərwa, a handatərwa a Jeruzelem.

³ Anğa fa daw daa cøved ma daw a Damas a, gweegwe cay a wusey na, wure wure ñgene, slam a wadawa pəray! da gazlavay da vad a ray a.

⁴ Ta', a tədey a hwayak, a cəney ðay nga ndaw ma zəla ta da vad, a ləvar: «Sawl, Sawl, ka sərdaya banay anda keðe na, maja me?»

⁵ Sawl heyey aa cəfða, a ləvar: «Bay Mahura, kah na, wa?» Day nga ndaw ma zəla heyey a mbəfðara, a ləvar: «Ara yah, Yesu, ndaw masa kah ma sərda banay.

⁶ Ama sləkdey, daw a Damas ðagay. Fetede, a wuz-damakawa cek masa kah ma da ka la.»

⁷ Ndøhay masa ma diyam ta Sawl a, ata malacatakaya kwa ta gwamara nga wurey mey daa ba maja mandərzay fa katar kalah. Ata fa cəndamara ðay nga ndaw maa guzley, ama ta hətmar ndaw aha daa ba.

⁸ Sawl a lecey, a wura dey, ama a gwa nga hətər dey saba. Ta', ndøhay a, a kərzamara fa har, a handamara a Damas.

⁹ Dar maakar, a hətər dey ba, a zəmey cek ba, kwa a sey yam ba.

¹⁰ Daa berney nga Damas a, ndaw ma səpa cøved nga Yesu fetede daha mezəley *Ananiyas. Bay Mahura a wudey nga wuzar cek masa aa ma da ka. Maja ñgene a zəla, a ləvar: «Ananiyas!» Ananiyas a zlar mey: «Away, Bay Mahura, yah keðe!»

¹¹ Bay Mahura a ləvar: «Sləkdey, daw wure wure keðe aa Cøved Cər-cər, səpa way nga Juda. Fetede, cacəfða ndaw

daha mezëley Sawl, ndaw daa berney nga Tars. Anja fa dërey dangay.

¹² Daa medërey-dangay a, cek a wuzar, a hëtar ndaw mezëley Ananiyas, ma daw fa vëdë nga par har a ray, amba dey anja a wurey, a hëtar dey saya.»

¹³ Ananiyas a mbëddara, a lëvar: «Bay Mahura, ndëhay ga taa guzlmaya la da ray ndaw aha. A lëvmaya anja ta sërdata banay la ga ta ndëhay akah hay da Jeruzelem.

¹⁴ Anja ma sawa fedë kaa na, ara bay-ray hay nga ndëhay ma ka kwakwas nga Gazlavay ma vëlmërwa cëved nga kërzey ndëhay tabiya ma tëba mey akah.»

¹⁵ Ta', Bay Mahura a lëvar a Ananiyas: «Slëkdëy, daw, maja ya ta wala ndaw aha sem amba a kaya slëra, a wuzdatara mey da ray adaw a ndëhay masa *Jëwif hay ba hay, a bay ata hay, leñ a ndëhay *Israyel hay.

¹⁶ Yah, ta ray adaw, ya da wuzdara banay masa anja ma da sëra ga daa slëra ha maja yah.»

¹⁷ Ananiyas, ta', a slëkdëy, a daw. A ndëkwey a way heyey, a hëtfar Sawl, ta', a par har a ray, a lëvar: «Sawl, mëlma adaw, Bay Mahura Yesu a slërdiwa fa akah. Ara anja ma wuzka vaw daa cëved masa ka fa sawa fedë. A slërdiwa amba ka hëtar dey cënga, amba Bay Gazlavay a rëhdaka ta Mesëfney anja.»

¹⁸ Wure ngene, cek hay anda meesëftey nga ewet a këzlmawa daa dey nga Sawl a. Dey anja wur! a wurey. A slëkdëy, a kamar *baptem.

¹⁹ Fa dëba ha, ta', a zëmey cek, a hëtar gëdan anja saya.

Sawl a wuzey mey nga Gazlavay da Damas

Sawl ta njawa la dër nekëdey ta ndëhay ma tëba mey nga Yesu da Damas.

²⁰ Wure wure ngene, ta', a daw aa *way-mewuzey-mey nga Gazlavay fetedë, a wuztar mey a ndëhay, a lëvtar Yesu na, ara Bëzey nga Gazlavay.

²¹ Ndëhay masa ma cëndamara mey anja tabiya a rëzlam, a lëvam: «Ndaw kedë na, ara ndaw maa zëddata ndëhay nga Yesu da *Jeruzelem heyey, ba diya? A sawa fedë kaa na, nga kërzata amba a handata fa *bay-ray hay nga ndëhay ma ka kwakwas nga Gazlavay heyey, ba diya?»

²² Ama fa dër a, fa dër a, *Sawl fa wuzey mey maaya maaya ma fëna ma fëna, a lëvey Yesu na, ara *ndaw masa Gazlavay ma wala nga lëhdaka ndëhay. Anda kedë, *Jëwif

hay daa berney nga Damas a, a sërmara a da mbëfdamara aa mey anga kwara saba.

²³ Fa dëba ha ðar ga, Jëwif hay a slam yawa amba a këdmara Sawl a vagay.

²⁴ Jëwif hay a fa jëdmara mey-mbew hay nga berney a taa vad, taa pas, amba a kërzamara Sawl a, a këdmara vagay. Ama wewer masa ata ma kamara na, Sawl a, ta cënda sem.

²⁵ Da ray ngene, ta tavad, gula anga hay, ta', a sëhwdamara a cakay mahwal nga Damas, a pamara aa cakarak, a tëldamara ta laza taa mangalaw nga mahwal a kasl a hwayak a dey langar nga berney a.

Sawl a vëhwa a Jeruzelem

²⁶ Fa dëba ha, *Sawl a vëhwa a *Jeruzelem *, a sëpey cëved nga cëmey ta ndëhay ma tëba mey nga Yesu, ama ndëhay nga Yesu a, a zluram ta anga, a wulkam anga ta tërey ndaw ma tëba mey nga Yesu fara fara daa ba.

²⁷ Ama *Barnabas na, ta', a ngëla, a handa fa ndëhay meslërey nga Yesu. A kadatara mey da ray Sawl ma hëtar Bay Mahura daa cëved nga Damas, ta mey masa Bay Mahura maa guzldara. A wuzdatara mey da ray Sawl a daa masa Sawl fa wuzda mey nga Yesu da Damas ta mandërzay daa dey daa ba.

²⁸ Dëga ta pas ngene, Sawl a njam ta ndëhay nga Yesu fetedë. A pëkam ta ata da Jeruzelem. A wuzey mey da ray Bay Mahura Yesu a ndëhay ta mandërzay daa dey daa ba.

²⁹ Aa guzltar a *Jëwif hay maa guzlam mey Gërek, a kam yawa ta ata. Ama ata na, a sëpam cëved nga këdmara vagay.

³⁰ Mëlman hay daa mey nga Yesu a cëndamara Jëwif hay a fa wudam nga këdmara vagay na, a ngëlmara aa berney nga Sezere da mey-bëlay, ta', a mbëzdamara aa kwambiwal nga daw aa berney nga Tars †.

³¹ Yaw, daa ngene, ndëhay daa *mecëmey-ray nga ndëhay nga Yesu daa hwayak nga *Jude, daa hwayak nga *Galile, leñ daa hwayak nga *Samari na, manjatakaya ta zazay. Fa ðar a, fa ðar a, fa hëtam gëdan daa metëbey-mey nga Yesu ma fëna ma fëna. Daa menjey ata na, fa namar ray a Gazlavay. *Mesëfney nga Gazlavay aa ta ata. Maja ngene, mecëmey-ray hay a fa sëkmawa a dey a, a dey a.

9:22 9.22 5.42 **9:23 9.23** 23.12 **9:23 9.23-25** 2Kwr 11.32-33 * **9:26 9.26** Sawl ta vëhwa a Jeruzelem fiyaw fiyaw daa ba, ama menjey ga. Nëka Gal 1.17-21. **9:26 9.26-27** 9.3-6, 20; Gal 1.18 **9:27 9.27** Barnabas: 4.36-37; 11.22-30; 12.25; 13.1-4, 7, 43-50; 14.12, 20; 15.2-12, 22, 35-39; 1Kwr 9.6; Gal 2.1, 9, 13 † **9:30 9.30** Tars: Ara berney masa Sawl ma yawa da hwad a (SNM 22.3).
9:30 9.30 11.25; Gal 1.21

Ene, ndaw maahëlbakaya, a hëtar salay anga

³² *Piyer fa pëkey kwa aa wura aa wura. Pas langar daha a daw nga nëkwa ndëhay ma tëba mey nga Yesu daa berney nga Lida.

³³ Daa berney a ngene, ndaw daha mezëley Ene, salay maahëlbakaya. Aa manakaya mevey daangafad, a gwa a lecey ba. Piyer a hëtar ndaw aha na,

³⁴ ta', a lëvar: «Ene, Yesu *Këriste ta mbëldaka sem. Lecey, pada gegëdedë akah ta har akah.» Wure ngene, ndaw aha a lecey.

³⁵ Ndëhay tabiya daa berney nga Lida ha ta ndëhay da Saranw, a hëtmär ndaw aha, maja ngene, ta', a tëbmara mey nga Bay Mahura Yesu.

Tabita a slëkdawa daa memëcey

³⁶ Daa berney nga Jawpe ngwas daha mezëley Tabita. Ara ngwas ma tëba mey nga Yesu. A zëlmara ta mey Gërek «Dawurkas,» anda melëvey «mëweney.» Anga mandaw mandaw fa key slëra maaya, fa jënta masa-viya hay.

³⁷ Ama vaw, ta', a car, pam! a mëcey. Masa anga ma mëcey la na, ta', a përmara vagay a, a pamara aa way da ray way.

³⁸ Ndëhay nga Yesu da Jawpe a cëndamara na, *Piyer aa da Lida fetedë. Berney nga Lida ha gweegwe ta berney nga Jawpe. Ta', a slëram ndëhay cew fa vëda, amba aa cëfdamërwa, a lëvmar: «Ambahw, nakwa la fa ala fiyaw cey!»

³⁹ Masa Piyer ma cënda anda kedë na, ta', a diyam ta ndëhay kaa heyey a Jawpe, kwa ta zënam vaw daa ba. A wusam, a ngëlmara Piyer, a handamara aa way masa da vad da ray way heyey. Ngusay fa yiden hay tabiya masa fetedë, a ngëchamawa a cakay Piyer, fa tëwam, a wuzdamara zana ata hay masa Tabita ma tëftara daa masa anga ta dey.

⁴⁰ Fa dëba ha Piyer a badatërwa ndëhay tabiya aa ambaw, a regedey, a dërey dangay a Gazlavay. Ta', a mbëdëy dey fa vagay a, a lëvar: «Tabita, slëkdëy.» Tabita a wura dey. Masa anga ma hëtar Piyer na, ta', a slëkdëy, a njey.

⁴¹ Piyer a kërza fa har, a jëna nga lecey. Ta', a zëltërwa ngusay fa yiden hay heyey len ndëhay ma tëba mey nga Yesu fetedë, a wuzdatara Tabita heyey, a hëtmär anga ta dey.

⁴² Mey a, a wusey fa ndëhay daa berney nga Jawpe tabiya. Ndëhay ga a tëbmara mey nga Bay Mahura.

⁴³ Piyer ta njej la ga daa berney nga Jawpe da way ndaw ma këfda ambal, mezöley *Simanjw.

10

Piyer a wuzar mey nga Gazlavay ngada Kwerney

¹ Ndaw daa berney nga Sezere daha mezöley Kwerney. Anja mahura nga sewje hay temere. Ata da wuzlah sewje hay nga Rawma hay mezöley «Sewje hay ma samawa da Itali.»

² Ndaw aha fa sëpa cëved nga Gazlavay ta mevel pal. Anja ta ndëhay da way anja hay ndav fa namar ray a Gazlavay anda *Jëwif hay. Fa jënta masa-viya hay ga da wuzlah Jëwif hay, fa dërey dangay a Gazlavay mandaw mandaw.

³ Ta pas langar daha, ta pas ngaa kwad bërey maakar, Gazlavay a wuzar cek a Kwerney a. A hëtar *maslan nga Gazlavay ma sawa da vad maaya maaya ta dey anja, maslan a mbëzey fa vëda. Ta', a zëla: «Kwerney!»

⁴ Kwerney a nëka maslan nga Gazlavay a, mandërzay a kar, a lëvar: «Bay adaw, mekey me?» Maslan nga Gazlavay kaa a mbëddara, a lëvar: «Gazlavay ta cënda medërey-dangay akah la, ta hëtka la masa kah fa jënta masa-viya hay. Cek hay a kedë a mbafar. Da ray ngene, aa fa sërfadaka.

⁵ Wure kedë, slërey ndëhay aa berney nga Jawpe nga zëlwa ndaw daha mezöley *Simanjw, masa mehëlmey *Piyer.

⁶ Anja da way ndaw daha ma këfda ambal mezöley Simanjw, way anja da mey-bëlay.»

⁷ Masa maslan nga Gazlavay maa guzlar heyey ma vëhey la na, Kwerney, ta', a zëlwa madërlam anja hay cew ta sewje pal da wuzlah sewje anja hay masa daa slëra anja. Sewje he ngene, ara ndaw ma sëpa cëved nga Gazlavay ta mevel pal.

⁸ Ta', a kadatara cek tabiya ma kam. Fa dëba ha, ta', a slërdata aa berney nga Jawpe fa Piyer.

⁹ Pëpërek e, ndëhay masa Kwerney ma slërdata heyey ata daa cëved gweegwe a wusam a Jawpe heyey. Gweegwe ta wuzlah-pas na, Piyer ta', a tëpëy aa papalah da ray way nga dërey dangay a Gazlavay.

¹⁰ Masa anja fa dërey dangay na, may fa car, a wufey daf nga zëmey. Daa masa fa tamar daf a na, Gazlavay ta', a wuzar cek.

11 A hëtar slam da vad mawurkaya, cek anda gwedeere a pawa salay a hwayak, cakay hay mëfad mabangdatakaya.

12 Daa gwedeere he, cek hay nga ley mekele mekele da hwad a, cek hay masa salay mëfad, cek hay ma diyam ta hwad ta hwad, leñ diyan hay.

13 Day a cënwa da vad, a lövey: «Piyer, lecey, sley dëy nga cek hay a kedë, zëmey!»

14 Ama Piyer a mbëfdara, a lövar: «'A'a, Bay Mahura, nga menjey adaw, cek masa kwakwas ala ma tëka sem na, ya ta zëmey daa ba arañ.»

15 Day heyey, ta', a cënwa saya, a lövar: «Cek masa Gazlavay ma lövey maaya nga zëmey na, ka da pada nga cek maaya ba na, köne ba.»

16 Day a, a cënwa dey maakar, fa dëba ha, cek aha ta', a vëhey aa slam a, a vad.

17 Piyer fa wulkada cek masa Gazlavay ma wuzdara, a wufey nga lövar na, me. Daa ngene, ndëhay masa Kwerney ma slërdata heyey faa cëfdam ndëhay, a lövam: «Way nga Simañw na, dama?» Ta', a diyam, a lacam daa ambaw dëgay.

18 A zëlam, a lövam: «Ndaw mezëley Simañw, masa mehëlmey Piyer daha na, anga fedë daw?»

19 Piyer a lawa daa slam medërey-dangay heyey, fa wulkey da ray cek masa Gazlavay ma wuzdara. Ta', *Mesëfney nga Gazlavay a lövar: «Ehe, ndëhay daha maakar fa sëpmaka.

20 Slëkdëy, bërñgey fa ata amba ka diyam bama. Ka da zlurey ba, maja ara Yah ma slërdatërwa.»

21 Piyer, ta', a bërñgawa fa ndëhay a, a lövtar: «Ara yah, ndaw masa akwar ma sëpmara. Ka samawa na, kwara?»

22 Ndëhay a, a mbëfdamara, a lövmar: «Ya samawa na, Kwerney, mahura nga sewje hay, ma slërdandërwa. Anga na, ndaw maaya fa Gazlavay, kwa anga ndaw Jëwif ba, anga fa sëpa mey nga Gazlavay anda Jëwif hay. Jëwif hay tabiya faa hëmdamara. Ndaw a na, maslan nga Gazlavay da vad ta sawa la fa vëda, a lövar nga sawa nga ngëlka a way anga, amba a jëkey slëmay fa mey masa kah ma da kadara.»

23 Piyer, ta', a ngëlta ngada way, a vëltar slam nga ney dasi tavad a ngene.

Piyer a daw a way Kwerney

Pepepek e, a slëkdam, a diyam ta ata Piyer heyey. Mëlmaha hay siya daa mecëmey-ray nga ndëhay nga Yesu da Jawpe a lëgdamata.

²⁴ Pepepek e saya, a wusam aa berney nga Sezere. Daa ngene, Kwerney ta zëltërwa sëkway anga hay, ta jam anga hay masa fara fara la, ata makustakaya, fa sëkwmata.

²⁵ *Piyer a wusey a way Kwerney. Masa anga fa mbëzey a way a na, Kwerney, ta', a car har, a regedey fa mey anga.

²⁶ Ama Piyer, ta', a slëkdam, a lëvar: «Lecey, yah na, ndaw anda akah.»

²⁷ Piyer faa guzlam ta Kwerney haa kasl ata ma wusam a palah-way. Fetede Piyer a hëtfey ndëhay ga makustakaya da way Kwerney a.

²⁸ A lëvtar: «Akwar, ka sërmara kwakwas nga *Jëwif hay ta tëka ndaw Jëwif sem nga ndëkwey a way ndëhay masa Jëwif hay ba hay, asaya, ta tëka sem kwa nga pëkey ta ata. Ama, Gazlavay ta wuzdiwa la, ya da nëka kwa waawa aa mazlëbkaya, a da kaya hezey na, këne ba.

²⁹ Da ray ngene, masa kah ma zëlyawa na, ya ta zlurey nga sawa daa ba. Ya wufey ya sëra ka zëlyawa na, kwara?»

³⁰ Kwerney a mbëddara, a lëvar: «Anga kaa dar maakar, ta bërey maakar ngaa kwad anda kefe, ya fa dërey dangay da way adaw. Daa ngene, ndaw daha a sawa a cakay adaw ta zana fa vaw ma wedey ndëf-nded,

³¹ a lëvya: «Kwerney, Gazlavay ta cënda medërey-dangay akah la. Fa sërfada masa kah ma jënta masa-viya hay heyey.

³² Anda kefe, slërey ndëhay aa berney nga Jawpe nga zëlwa ndaw mezëley *Simanjw masa mehëlmey Piyer. Anga da way ndaw mezëley Simanjw ma këfda ambal, way anga da mey-bëlay.»

³³ Wure ngene, ta', ya slërey ndëhay fa kah nga ngëlmakawa kefe. Suse, maja kah ma sawa. Wure kefe na, ala tabiya makustakaya fa mey nga Gazlavay nga jëkey slëmay fa mey masa Bay Mahura ma vëldakawa nga wuzdandara.»

Piyer a wuzey Mey-maaya-mawiya ngada Kwerney ta ndëhay da way anga

³⁴ Ta', *Piyer a zlar mewuzey mey, a lëvey: «Wure kefe ya sëra fara fara Gazlavay a weley ndëhay ta weley ba.

³⁵ Anda melëvey, ndaw ma nar ray a Gazlavay, ma key cek ta cëved e na, kwa anga daa sëkway wura wura, Gazlavay a tëba la.

36 Gazlavay ta slërdërwa mey anğa la a ndëhay *Israyel hay. Mey a na, ara *Mey-maaya-mawiya ma njadandakwar daa zazay ta fa Yesu *Këriste, Bay Mahura nga ndëhay tabiya.

37 Ka sërmarä cek ma key daa hwayak nga *Galile haa aa hwayak nga *Jude fa dëba ha masa *Jan-Baptis ma wuzey mey ta aa ma katar *baptem a ndëhay heyey, ba diya?

38 Ka sërmarä na, Gazlavay ta wala Yesu, ndaw *Nezeret la, a vëlar Mesëfney anğa ta gëdan anğa. Yesu a, a pëkta hwayak hay mekele mekele, a katar maaya a ndëhay, a pëskatërwa ndëhay tabiya masa dasi har nga bay-malula, a mbëldata. A kata slëra hay a anda kedë na, maja Gazlavay aa ta anğa.

39 «Ala na, ndëhay masa ma hëtmär la ta dey ala, ya kam sedë da ray cek hay masa anğa ma kata tabiya da *Jeruzelem ta daa hwayak hay mekele mekele nga *Jëwif hay. Ta dërmara la fa hwadam mazlangalakaya, a këdmara vagay.

40 Ama nga där maakar a, Gazlavay ta slëkdädërwa sem daa memëcey. Ta', a vëlar cëved nga wuzwa vaw a ndëhay.

41 A wuzwa vaw a na, ngada ndëhay tabiya ba, ama ngada ala, ndëhay masa aa ma walata ngeeme nga key sedë da ray a. Ala na, ta zëmam cek la, ta sam cek la bama ta Yesu a fa dëba ha masa Gazlavay ma slëkdädërwa cay daa memëcey.

42 Gazlavay a lëvndar ya wuzdamatara mey anğa a ndëhay, ya kam sedë da ray a, ya lëvam, Yesu ara ndaw masa Gazlavay ma pa nga key sariya a ndëhay masa ta dey ta a ndëhay mamëctakaya.

43 Ndëhay ma tëla mey nga Gazlavay tabiya taa guzlam la da ray Yesu a, a lëvam kwa waawa ma pa Yesu nga ndaw anğa fara fara na, Gazlavay a mbëkdara mebërey anğa la ta fa gëdan nga mezëley anğa.»

Ndëhay masa Jëwif hay ba a hëtam Mesëfney nga Gazlavay

44 Daa masa *Piyer faa guzley dägay, *Mesëfney nga Gazlavay a pawa salay a ray ndëhay tabiya ma jëkam slëmay fa mey anğa.

45 Ndëhay *Jëwif hay ma tëba mey nga Yesu ma samawa ta ata Piyer fetedë heyey a rëzlam ga, maja Gazlavay ta

vëltar Mesëfney anga la a ray ndëhay masa Jëwif hay ba hay may.

⁴⁶ Ndëhay Jëwif hay a, a cëndamara ndëhay a faa guzlam ta mey hay mekele mekele masa ata ma sërmara ba, fa hëslmar ray a Gazlavay. Ta', Piyer a lëvey:

⁴⁷ «Wure kedë ndëhay kaa ta hëtam Mesëfney nga Gazlavay cay anda alëkwa may. Kaa ya gwakwa nga tëktakwa nga hëtey *baptem ta yam daw?»

⁴⁸ Da ray ngene, a lëvtar nga kamatar baptem ta mezëley nga Yesu *Këriste. Ta', aa cëfdamara Piyer nga njey ta ata dar nekëdey.

11

Piyer aa guzley fa mey nga ndëhay nga Yesu da Jeruzelem

¹ Ndëhay meslërey nga Yesu ta mëlman hay daa mey nga Yesu masa daa hwayak nga *Jude, a cëndamara na, ndëhay masa *Jëwif hay ba ta tëbmara mey nga Gazlavay la may.

² Ta pas masa *Piyer ma vëhwa a *Jeruzelem na, Jëwif hay ma tëba mey nga Yesu a slam mey a ray a,

³ a lëvmar: «Ka mbëzey a way ndëhay masa Jëwif hay ba hay, masa mandawal manjar nga sley, ka zëmam cek bama daa slam a na, kwara!»

⁴ Ta', Piyer a wuzdatara cek hay ma kam dëga nga mezley. A kadatara pal pal, a lëvtar:

⁵ «Yah daa berney nga Jawpe, ya fa dërey dangay a Gazlavay, daa ngene, ta', Gazlavay a wuzya cek. Ya hëtar cek daha, a pawa salay da gazlavay da vad a cakay adaw, cek aha anda gwedeere, cakay hay mëfad mabangadatakaya.

⁶ Ya nëkey dey maaya maaya a hwad a na, ya hëtey cek hay ta salay mëfad mëfad, cek hay nga ley hay, cek hay ma diyam ta hwad ta hwad, len diyan hay.

⁷ Ya cënda day ma lëvya: "Piyer, lecey, sley day nga cek hay a kedë, zëmey!"

⁸ Ama ya mbëddara, ya lëvar: "'A'a, Bay Gazlavay, nga menjey adaw, cek masa kwakwas ala ma tëka sem na, ya ta zëmey daa ba aran."

⁹ Day heyey, ta', aa guzlya saya, a lëvey: "Cek masa Gazlavay ma lëvey maaya nga zëmey na, ka da pada nga cek maaya ba na, këne ba."

¹⁰ «Cek a kedë a key dey maakar, fa dëba ha cek aha tabiya, ta', a vëhey aa slam a, a vad.

¹¹ Wure wure ñgene, ndëhay maakar a wusmawa a way ndaw masa ala da hwađ a. Ara ndaw daa berney ñga Sezere daha ma slërdatërwa fa yah.

¹² *Mesëfney ñga Gazlavay a lëvya: “Daw ta ata, ka da zlurey ba.” Ta’, ya diyam bama aa hwayak ñga Sezere. Mëlma adaw hay maakwaw daa mey ñga Yesu da Jawpe masa da cakay adaw fede, ta’, ya diyam bama. Ya wusam, ala tabiya ya mbëzam a way ndaw aha.

¹³ Ndaw a, a kadandara cek masa anğa ma hëtar da way anğa. A lëvndar *maslan ñga Bay Gazlavay da vad, ta wuzar vaw la, a lecey fa mey anğa, a lëvar: “Slërey ndëhay aa berney ñga Jawpe ñga ñgëlwa ndaw mezëley *Simanw, masa mehëlmey Piyer.

¹⁴ Anğa na, a wuzdakawa cëved ma da lëhdakwar ta ndëhay da way akah la.”

¹⁵ «Masa ya fa zlar ñgaa guzltar na, Mesëfney ñga Gazlavay a pawa salay a ray ata cëpa anda anğa ma pawa salay a ray ala ñgeeme.

¹⁶ Daa ñgene, ya sërfada mey ñga Bay Mahura zleezle, ma lëvey: “*Jan a katar *baptem a ndëhay na, ta yam, ama akwar, ka hëtam baptem la ta Mesëfney ñga Gazlavay.”

¹⁷ Gazlavay a vëltar Mesëfney anğa, anda anğa ma vëldandara Mesëfney a daa masa ala ma tëbmara mey ñga Bay Mahura Yesu *Këriste. Anda keđe, yah na wa, ñga tëka Gazlavay ñga key cek masa aa ma wudëy na!»

¹⁸ Masa ata ma cëndamara mey keđe la na, a mbëkdamara meyey-mey. Ta’, a hëlmamara Gazlavay, a lëvam: «Kwa ñgada ndëhay masa Jëwif hay ba hay na, fara fara Gazlavay ta wurtar cëved cay amba a mbëđdamara menjey ata, a sëpmara Gazlavay ta mevel pal. Maja ñgene, ata may, a hëtam heter mendëvey ba la.»

Mecëmey-ray ñga ndëhay ñga Yesu da Antiyaws

¹⁹ Ta pas masa ata ma këđmara Etiyen heyey vagay na, fa dëba ha, a zlamar ñga sërdamata banay ta ndëhay ma tëba mey ñga Yesu. Ndëhay ñga Yesu a, aa kwacam ray pal pal. Siya ñga ndëhay a, a diyam kasl aa hwayak ñga Fenisi, aa hwayak ñga Sipëre, ta aa berney ñga Antiyaws. A wuzam mey ñga Gazlavay na, si a ndëhay *Jëwif hay gway.

²⁰ Ama ndëhay siya da wuzlah ndëhay maa kwacam ray heyey masa ndëhay Sipëre hay ta ndëhay Siren hay na, ta

wusam la a Antiyaws. Fetede, ta wuzmatar *Mey-maaya-mawiya la da ray Bay Mahura Yesu *Këriste, a ndëhay masa Jëwif hay ba hay may.

²¹ Gëdanj nga Bay Mahura aa ta ata. Maja ñgene, ndëhay ga a tëbmara mey anja, a sëpmara cëved anja.

²² Ndëhay daa *mecëmey-ray nga ndëhay nga Yesu da *Jeruzelem a cëdamara mey aha. Da ray ñgene, a slëram *Barnabas a Antiyaws.

²³⁻²⁴ Barnabas a na, anja ndaw maaya, marëhkaya ta *Mesëfney nga Gazlavay, fa pa Yesu nga ndaw anja fara fara. Masa anja ma wusey la a Antiyaws a na, a hëtar slëra masa Gazlavay ma ka da wuzlah ndëhay a ta fa maaya anja. Barnabas aa sëmey ga maja maaya nga Gazlavay a. Ta', a vëltar gëdanj a ndëhay tabiya. A lëvtar: «Namar ray a Bay Mahura mandaw mandaw ta mevel akwar cëpa, ka da mbëkdamara ba.» Maja ñgene, ndëhay ga a tëbmara mey nga Bay Mahura.

²⁵ Fa dëba ha Barnabas, ta', a daw aa berney nga Tars, a sëpërwa *Sawl.

²⁶ Masa anja ma hëtar la na, a ñgëlërwa aa berney nga Antiyaws. Ta', a ñjam cew e mevey pal daa mecëmey-ray nga ndëhay nga Yesu da Antiyaws a. Ata faa sërkadam ndëhay ga fetede. Ara daa berney a ñgene, ata ma zlamar nga zëlmata ndëhay nga Yesu «Këretiyen hay.»

²⁷ Daa ñgene, ndëhay ma tëla mey nga Gazlavay siya a slëkdam da Jeruzelem, a diyam a Antiyaws.

²⁸ Ndaw pal dasi ata daha mezëley Agabus. A lecey, a wuzda mey masa Mesëfney nga Gazlavay ma wuzdara, a lövey: «May mahura a key la fa bëla ndav.» Fara fara may a na, ta key la daa masa Këlawt aa daa bay.

²⁹ Masa anja ma lëvtar anda kedde la na, ndëhay nga Yesu fetede a cëdamara day ata. A wulkam maaya na, kwa waawa a slërwa cek tëde ta gëdanj anja, nga jëney mëlmanj hay daa mecëmey-ray nga ndëhay nga Yesu daa hwayak nga *Jude.

³⁰ Ta', a kamara këne. Cek hay macakalakaya ha na, a slërdamara ta har ata Barnabas ta Sawl nga vëley a *bay-ray hay daa mecëmey-ray nga ndëhay nga Yesu da Jude.

12

Bay Herawt a sërdata banay ta ndëhay ma tëba mey nga Yesu

11:20 11.20 Jan 7.35 **11:21 11.21** 2.41 **11:23-24 11.23** 13.43; 14.22; 15.32; 16.40; 18.23; 20.1, 28-31 **11:25 11.25** 9.30 **11:27 11.27** 13.1; 15.32 **11:28 11.28** 21.10 **11:29 11.29-30** 12.12, 25; Rm 15.26; 1Kwr 16.1; 2Kwr 8.4; 9.2, 12; Gal 2.10

¹ Daa ηgene, Bay *Herawt a zlar ma sərdata banay ta ndəhay mekele mekele daa *mecəmey-ray nga ndəhay nga Yesu.

² A kəda *Jak ta dəlaw vagay. Jak a na, ara məlman ηga *Jan.

³ Bay Herawt a nəka na, *Jəwif hay faa səmam maja anğa ma kəda Jak vagay. Ta', a kərza *Piyer saya, a kəzla aa fərsəne. A kərza Piyer na, daa dar hay nga gwagway mezəley «*Gwagway nga peη manjar cek ma həsla da hwad a.»

⁴ Ta', a ləvtar a sewje hay nga jədmara. Sewje hay a, ata məfad, məfad dey məfad a. Bay Herawt a, a wudey nga kar sariya a Piyer meedey ndəhay tabiya fa dəba nga gwagway nga *Pak.

⁵ Anda keđe, Piyer magərcakaya daa fərsəne, ama ndəhay daa mecəmey-ray nga ndəhay nga Yesu heyey fa dərəm danğay a Gazlavay mandaw mandaw ta mevel pal maja anğa.

Maslan nga Gazlavay da vad a badərwa Piyer daa fərsəne

⁶ Slam ma da wurwa amba Bay *Herawt a kar sariya a *Piyer na, ta tavad a ηgene, Piyer majəwkaya ta calalaw hay cew manakaya da wuzlah sewje hay cew ma jədmara heyey. Sewje hay mekele fa jədmara mey-slam nga fərsəne he saya.

⁷ Ta', *maslan nga Bay Gazlavay da vad a sawa, slam daa way a, a wedey pəray! Maslan a, a wusa Piyer aa cakay, a sləkədə, a ləvar: «Sləkdey fiyaw!» Masa maslan a faa guzlar na, calalaw hay heyey a kwiya da har Piyer.

⁸ Maslan a, a ləvar: «Diya vaw akah, pata tarak akah hay a salay.» Piyer, ta', a ka anda maslan a ma ləvar. Maslan a ləvar saya: «Sləha zana akah fa vaw, səpya.»

⁹ Piyer aa da siya, a bamawa daa fərsəne kasl ambaw. Ama Piyer ta səra cek masa maslan a ma kara ηgene ara cek fara fara na, daa ba. A wulkey ara mesəfney ma kar.

¹⁰ Masa ata fa diyam na, a mbəkdamatərwa sewje hay ηgeeme, a mbəkdamatərwa sewje hay nga dey cew e, a wusam fa mey-mbew nga bərey nga fərsəne masa ma bawa ηgadaa berney. Mey-mbew e a wurey taava anğa. Ta', a bamawa daa fərsəne he. A diyam taa cəved ma daw taa berney a. Fa dəba ha nekədey na, maslan nga Gazlavay a sem, a daw, a mbəkda Piyer fetede.

¹¹ Daa slam aha ηgene, Piyer, a səra cek masa ma key ta anğa na, ara cek fara fara. A ləvey: «Wure keđe, ya səra fara fara ara Bay Gazlavay ma slərwa maslan anğa,

nga lëndaya dasi har nga Herawt, asaya, daa cek maaya ba tabiya masa ndëhay *Jëwif hay ma wudam nga kamaya.»

¹² Masa Piyer ma sëra cek aha ma key anda kede la na, ta', a daw a way *Mari, mamanj nga Jan-Mark. Ndëhay ga makustakaya fetede, fa dëram dangay a Gazlavay.

¹³ Piyer a zëley fa mey-mbew, a këda kwetenj *. Dam ma key slëra da wuzlah ata fetede daha mezëley Rawde. Ta', a sawa nga nëka ma këda kwetenj e na, ara wa.

¹⁴ A wusey fa mey-mbew. Masa aa ma cënda ara dëy nga Piyer na, aa sëmey ga ara mey ba. Kwa nga wura mey-mbew e na, ta wura daa ba, ama a hway ta ray ngada way fa ndëhay da way a heyey, a lëvtar: «Piyer malacakaya fa mey-mbew.»

¹⁵ Ndëhay kaa a mbëddamara ngada dam aha, a lëvmar: «Malula fa kaka daw?» Ama anja fa lëvtar, fa lëvtar: «Fara fara ara anja.» Ndëhay a, a lëvam: «Da ara maslanj anja kwa †.»

¹⁶ Ama Piyer, fa zëley, fa këda kwetenj nga mey-mbew cënga, kwa ta mbëkda daa ba. Ta', a wurmara mey-mbew heyey. Masa ata ma hëtmara ara anja na, a rëzlam ga.

¹⁷ Piyer heyey, ta', a bangadatar har nga njam teete, ta', a kadatara mey da ray cek masa Bay Gazlavay ma ka nga badërwa daa fërsëne. A lëvtar: «Kadamara mey kede ngada *Jak ta ngada mëlmanj hay mekele daa *mecëmey-ray nga ndëhay nga Yesu.» Ta', a mbëkdata, a daw aa slam mekele.

¹⁸ Cay, slam ta', a wurey, sewje hay heyey a wuram mey hëbak a hëbak a, a sërmara nga key kwara ba. A lëvam: «Piyer a key na, kwara?»

¹⁹ Bay Herawt heyey, ta', a slërey ndëhay aa wura aa wura nga sëpmërwa Piyer e, ama ta hëtmërwa daa ba. Da ray ngene, Bay Herawt aa cëfdata sewje hay ma jëdmara Piyer heyey, ta', a lëvtar a ndëhay mekele nga këdmata vagay. Fa dëba ha, ta', Bay Herawt a, a slëkdey daa hwayak nga *Jude, a daw aa berney nga Sezere, a njawa fetede dëar nekëdey.

Memëcey nga Bay Herawt

²⁰ Daa ngene, Bay *Herawt mevel anja fa cey a ray ndëhay daa berney nga Tir ta ndëhay daa berney nga Sidanw. Ndëhay daa berney hay a, a hëdkam cek mezëmey na, daa hwayak nga Bay Herawt a. Da ray ngene, a cëmdamara dëy ata, a sëpam cëved nga daw fa vëda. Maja

12:12 12.12 Jan-Mark: 12.25; 13.13; 15.37; Kwa 4.10 * 12:13 12.13 kwetenj; parawal † 12:15 12.15 maslanj anja: Ndëhay Jëwif hay a wulkam maslanj nga Gazlavay fa ndaw a fa ndaw a na, daha, fa jëda ndaw a ndaw a. Maslanj a, a gwa a wuzwa vaw anda ndaw aha. Nëka Mt 18.10. 12:18 12.18-19 5.22-24

ngene, a vëlam dala a Bëlastus, madërlam mahura nga Bay Herawt amba a hëtam cëved nga wusey fa Herawt nga kar ambahw.

²¹ Masa pas nga key ambahw a Bay Herawt a heyey ma wuswa cay na, Herawt a pawa zana nga bay fa vaw, a daw, a njeý aa jaŋga aŋga fa mey nga ndëhay a, a zlar meeguzley.

²² Aa faa guzley na, ndëhay tabiya fetede a wudam, a lëvam: «Maa guzley kaa na, ara Gazlavay, ba na, ndaw ba.»

²³ Wure wure ngene, maslan nga Gazlavay da vad a këða Herawt a, maja aŋga ma tëba ndëhay a ma hëslmar ray, a pa ray aŋga nga Gazlavay. Ta', mëtal hay a zëmamara, fa dëba ha, a mëcey.

²⁴ Yaw, mey nga Gazlavay na, fa daw fa mey, fa mey. Ndëhay masa ma tëba mey nga Gazlavay a, fa sëkmawa, a dey a, a dey a.

²⁵ Fa dëba ha ata *Barnabas ta *Sawl ma ndëvdamara slëra ata da *Jeruzelem la na, a vëham aa berney nga Antiyaws. A diyam bama ta ata Janj-Mark.

13

A walamata ata Barnabas ta Sawl

¹ Daa *mecëmey-ray nga ndëhay nga Yesu daa berney nga Antiyaws masa da Siri na, ndëhay ma tëla mey nga Gazlavay daha, asaya, ndëhay maa sërkadam mey nga Gazlavay daha. Ndëhay a na, ara ata *Barnabas, Simeyanw masa ma pamar slëmay-wazlay «Matara», Lusiyus, ndaw Siren, Manayan masa ma gëlam ta Bay *Herawt daa slam a, lej *Sawl.

² Ta pas langar daha, ata fa dëram dangay a Gazlavay, fa kam *daliyam. Ta', *Mesëfney nga Gazlavay a lëvtar: «Pamatiwa ata Barnabas ta Sawl wal nga key slëra masa yah ma zëta maja.»

³ Anda keçe, fa dëba ha masa ata ma ndëvdamara mekey daliyam ta medërey-dangay cay na, a pamatar har a ray ata Barnabas ta Sawl heyey, ta', a mbëkdamata nga diyam aa slëra ha.

Ata Barnabas ta Sawl daa hwayak nga Sipëre

⁴ Anda keçe, *Mesëfney nga Gazlavay a slërdata ata *Barnabas ta *Sawl. A diyam aa berney nga Selesi. Fetede, a ndëkwam aa kwambiwal nga daw aa hwayak nga Sipëre masa da wuzlah bëlay. ⁵ A wusam aa berney nga Salamin daa hwayak nga Sipëre he. Fetede, a wuzdamara mey nga

Gazlavay a ndëhay *Jëwif hay daa *way-mewuzey-mey nga Gazlavay a. Janj-Mark, aa da wuzlah ata nga jënta.

⁶ A pëkmara hwayak a tabiya haa kasl a wusam aa berney nga Pafaws. Fetede, a hëtfamar ndaw Jëwif mezëley Bar-Yesu. Anja fa key maazla hay ma sawa ta fa Gazlavay ba. A mbërzley, a lëvey anja *ndaw ma tëla mey nga Gazlavay.

⁷ Bar-Yesu a, anja madërlam nga bay nga hwayak a. Bay a, mezëley Serziyas Pawlas, anja ndaw ta lengesl. A zëltërwa ata Barnabas ta Sawl a way anja, maja a wufey nga cëney mey nga Gazlavay fa ata.

⁸ Bar-Yesu, ndaw ma ka maazla ha, a zëlmara ta mey Gërek, Elimas. Ama Elimas na, a wufey mey nga ata Barnabas ta Sawl ba. A sëpey cëved amba a tëka bay a nga tëba mey nga Gazlavay.

⁹ Da ray ngene, Sawl, masa ata ma zëlmara ta mey Gërek Pawl, marëhkaya ta Mesëfney nga Gazlavay, a nëkfa ndaw aha,

¹⁰ a lëvar: «Kah ndaw membërzley! Kah, ndaw ma tëknata ndëhay tabiya! Kah, bëzey nga bay-malula! Kah, masa-gëra nga cek hay maaya tabiya! Slëra masa Bay Gazlavay ma ka na, ara slëra maaya ta cëved e. Ama kah, ka fa sëpey cëved mandaw mandaw nga nësa slëra ha!

¹¹ Ehe, wure kefe, Bay Gazlavay a da nëska, ka da wulfey. Haa ðar nekëdey, ka fa da hëtar mewëdey nga pas daa ba.» Wure wure ngene, slam tabiya a tërey lëvanj fa mey anja, a hëtar dey saba. A sëpey ndaw nga ðaða fa har.

¹² Bay heyey ma hëtar cek ma key anda kefe la na, a rëzley ga da ray mey nga Bay Mahura Yesu, ta', a tëba mey nga Gazlavay.

Ata Pawl ta Barnabas da Antiyaws daa hwayak nga Pisidi

¹³ Fa dëba ha, Pawl ta ndëhay ma lëgdamara a tëpam aa kwambiwal, a slëkdam daa berney nga Pafaws. A tëngam bëlay, a diyam a Perze masa daa hwayak nga Pamfili. Fetede na, Janj-Mark a mbëkdata, a vëhwa a *Jeruzelem.

¹⁴ Ata na, a slëkdam daa berney nga Perze he, a diyam a Antiyaws daa hwayak nga Pisidi. Ta *pas memëskey-vaw, a diyam, a njam aa *way-mewuzey-mey nga Gazlavay fetede.

¹⁵ Daa way a, ndëhay a jangamara ðerewel nga *kwakwas nga Mawiz lej nga ndëhay ma tëla mey. Fa dëba ha, *bay-ray hay daa way a, a slëram ndaw fa ata Pawl ta *Barnabas nga guzltar, a lëvtar: «Mëlma ala hay, da akwar ta

mey daha nga vøltar gødan a ndøhay makustakaya kefe na, ka gwamara ngaa guzlam wure kefe.»

¹⁶ Pawl, ta', a sløkdey, a lecey, a banğadfa har anğa, a zlar meeguzley, a løyey:

«Akwar, ndøhay Israyel hay, ta akwar masa daa sækway nga Jøwif hay ba ma sèpam mey nga Gazlavay, jækfamaya slømay.

¹⁷ Gazlavay masa ndøhay *Israyel hay ma namar ray na, ta walata papan nga papa alækwa hay la zleezle. Ta sækdata la ga daa masa ata daa hwayak nga *Ejip. Fa døba ha, ta badatørwa la daa hwayak nga Ejip ta gødan anğa mahura.

¹⁸ A key mevey kwakwar mæfad anğa fa nækfatar dey da wuzlah-ley.

¹⁹ Fa døba ha, a paslata sækway hay maasala da *Kanan cøpa, a vøldatara hwayak a, a ndøhay Israyel hay nga wàmara.

²⁰ Mevey masa Israyel hay ata daa beke ta masa ata da wuzlah-ley na, a key mevey temere mæfad ta kwakwar zlam.

«Fa døba ha, a patar bay-ray hay nga jønta papan nga papa alækwa hay a, haa kasl fa *ndaw ma tøla mey nga Gazlavay mezøley Samiyel ma sawa.

²¹ Daa ngene, ta', aa cøfdam bay. Anda kefe, Gazlavay a vøltar *Sawl, bøzey nga Kis, daa sækway nga Benjamin nga key bay ata. A wa hwayak a, mevey kwakwar mæfad.

²² Ta', Gazlavay a bada Sawl daa bay, a patar *Davit nga bay ata. Gazlavay aa guzley da ray a, a løyey: “Ya ta høtey ndaw ma mbafaya la, ara Davit, bøzey nga Jese. A da key slëra tabiya masa yah ma wufey.”

²³ Daa sækway nga Davit e na, Gazlavay ta bawa ndaw pal la ma da løhdata Israyel hay anda aa ma løyey zleezle * . Ndaw aha na, ara Yesu.

²⁴ Wuskwaa Yesu a da zlar slëra anğa na, *Jan-Baptis ta wuzdatara la a ndøhay Israyel hay tabiya, a løvtar: “Mbøddamara menjey akwar, mbøkdamara mekey mebørey, høtam *baptem.”

²⁵ Mamba Jan-Baptis a ndøvda slëra anğa na, a løvtar a ndøhay: “Ka wulkam yah na, wa? Yah na, ndaw masa akwar ma sækwmara heyey ba. Ama jøkam slømay, ndaw

13:15 13.15 15.21 **13:17 13.17** Mab 1.7; Mew 5.15 **13:18 13.18** Mab 16.35; Mesl 14.33-34; Mew 29.4 **13:19 13.19** Mew 7.1; Jes 14.1 **13:20 13.20** NMH 2.16; 1Sam 3.20 **13:21 13.21** 1Sam 8.5, 19; 10.21; 11.15 **13:22 13.22** 1Sam 16.12; 13.14 * **13:23 13.23** Gazlavay ta løyey la a Davit, ndaw pal daa sækway anğa a bawa la nga løhdata Israyel hay, a da wey nga sèrmataw. Nøka 2Sam 7.11-16. **13:23 13.23** Iz 11.1; Rm 1.3; CWJ 5.5 **13:24 13.24** Lk 3.3

ma da sawa fa dëba adaw daha, a fënya, kwa ya wusa nga pëska zewed nga tarak anga ba.”»

²⁶ Pawl a lëvtar saya: «Mëlma adaw hay, akwar masa daa sækway nga *Abëraham, ta masa daa sækway nga *Jëwif hay ba ma namar ray a Gazlavay, Gazlavay ta slërdandakwara *Mey-maaya-mawiya la ngada alëkwa amba a lëhdandakwar daa mebërey.

²⁷ Fara fara, ndëhay da Jeruzelem ta bay-ray ata hay ta sërmara Yesu ara wa na, daa ba. Mey nga ndëhay ma tëla mey nga Gazlavay masa ata ma janëgamara mandaw mandaw ta pas memëskey-vaw na, ta cëdamara daa ba may. Ama ta pas masa ata ma kamar sariya a Yesu nga këdëy vagay na, ta kamara la anda mey a ma lëvey.

²⁸ Kwa ta hëtam mey fa anga tëdë nga kar sariya nga këdëy vagay na, daa ba. Ta ngene he cëpa, ta', a kamar ambahw a Pilat nga këdëa vagay.

²⁹ Masa ata ma kamara cay tabiya anda dërewel nga Gazlavay maa guzley da ray Yesu a na, ta', a bërngadamërwa da ray hwadam, a pëshamara aa cëvay.

³⁰ Ama Gazlavay ta slëkëdëdërwa sem daa memëcey.

³¹ Yesu ta wuztar vaw la a ndëhay dëfar weewe, ndëhay masa zleezle ata ma pëkam bama daa hwayak nga *Galile haa kasl a Jeruzelem. Wure këdë, ndëhay a fa kam sede da ray a fa mey nga Israyel hay.

³² «Ala may, ya fa wuzdamakwara mey maaya da ray cek masa Gazlavay ma lëvtar zleezle a papan nga papa alëkwa hay a katara la heyey.

³³ Wure këdë Gazlavay ta kandakwara cek aha la ngada alëkwa, bëz ata hay, ta fa maslëkëdëwara nga Yesu daa memëcey. Anëga letëk ta mey mawuzlalakaya daa *Pësam cew ma lëvey:

“Kah na, Bëzey adaw,
dëga tasana yah Papakw.”

³⁴ Yaw, Gazlavay ta slëkëdëdërwa la daa memëcey, amba kwa a zey ba sëlak. Zleezle Gazlavay ta lëvey la:

“Ya pëskwar mey la, anda yah ma lëvar a Davit.
Fara fara, ya kakwara cek aha la.”

³⁵ Maja ngene, mawuzlalakaya daa dërewel mekele saya, a lëvey:

“Ndaw ma ka slëra akah na,
ka fa da mbëkda nga zey daa cëvay daa ba sëlak.”

³⁶ Davit e, daa masa anğa ta dey na, fa key slëra anda Gazlavay ma wudey. Ta', a mëcey, a pëshamara aa cøvay a cakay papaņ nga papaha hay, vaw anğa na, ta zey sem.

³⁷ Ama ndaw masa Gazlavay ma slëkdadërwa daa memëcey na, ta zey daa ba.

³⁸ Mëlma adfaw hay, si ka sërmarara fara fara, ala fa wuzdamakwara, Gazlavay a mbëkdatara mebërey nga ndëhay na, ta fa Yesu. Gazlavay ta mbëkdakwara mebërey akwar maja akwar ma sëpmara kwakwas nga Mawiz na, daa ba.

³⁹ Ama kwa waawa ma pa Yesu nga ndaw anğa fara fara na, Gazlavay ta mbëkdara mebërey anğa sem.

⁴⁰ Maja nğene, wam vaw fa mey nga ndëhay ma tëla mey hay zleezle ma kadamara, amba cek masa ata ma kadamara ha a wusfakwar ba. Ndëhay a, a lëvam:

⁴¹ "Akwar ndëhay ma rësmara mey nga Gazlavay, nëkmara! Ka da rëzlam, fa dëba ha, ka daa zëdfam, maja yah, Bay Gazlavay,

ya da key slëra mahura ta pas masa akwar ta dey kefe.

Kwa ndaw ta wuzdakwara mey da ray slëra ha la na, akwar fa da tëbmara daa ba."»

⁴² Masa ata Pawl ta Barnabas heyey ma bamawa daa waymewuzey-mey nga Gazlavay la na, ndëhay a, a lëvmatar nga vëhmawa ta pas memëskey-vaw mekele ma da sawa, amba aa guzlmatar da ray mey a saya.

⁴³ Fa dëba ha ndëhay maa waham ray cay na, ndëhay ga ta diyam la asi ata Pawl ta Barnabas. Ma diyam a na, ara Jëwif hay ta ndëhay siya hay ma mbëzam nga sëpey kwakwas nga Jëwif hay. Daa madfay ata ta ndëhay a na, ata Pawl ta Barnabas a vëlmatar gëdanj amba a njam mandaw mandaw daa maaya nga Gazlavay.

⁴⁴ Masa pas memëskey-vaw mekele heyey ma wuswa cay na, har-gëdanj nga ndëhay daa berney a, a kusam nga cëney mey da ray Bay Mahura Yesu.

⁴⁵ Ama Jëwif hay a nëkmata ndëhay ga makustakaya fetedë na, sëlëj a katar. A cëdfmara Pawl, a wudfam mey anğa ba.

⁴⁶ Ata Pawl ta Barnabas heyey ta', aa guzlmatar ta mandërzay daa dey daa ba, a lëvmatar: «Teesed na, anja si cëma ya wuzdamakwara mey nga Gazlavay ngada akwar Jëwif hay dğagay. Ama, ka tëbmara mey a ba. Anda kefe akwar fa wuzdamara, akwar tëdë nga njam da vad ta Gazlavay nga sërmataw ba. Da ray nğene, ya

mbëkdamakwar, ya diyam fa ndëhay mekele masa Jëwif hay ba.

⁴⁷ Ehe, Bay Gazlavay ta vëlndar *mewey anğa la, a løyey: "Ya ta paka la nga wedey fa mey nga ndëhay masa Jëwif hay ba hay, amba ka wuzdatara a ndëhay tabiya da bëla ya da lëhdata na, kwara." »

⁴⁸ Ndëhay masa Jëwif hay ba ma cëndamara mey a na, aa sëmam ga. Aa hëmdamara mey nga Bay Gazlavay. Ndëhay masa Gazlavay ma walata la nga hëtey heter mendövey ba na, a tëbmara mey nga Yesu.

⁴⁹ Anda kedë, ndëhay fa wuzdamara mey nga Bay Gazlavay kwa daa wura daa wura daa hwayak a nğene.

⁵⁰ Ama Jëwif hay da Antiyaws a hëldamata nğusay masazleley hay ma sëpa kwakwas nga Jëwif hay leñ ndëhay mahura hay daa berney a, nga sërdamata banay ta ata Pawl ta Barnabas. A bëlmatërwa daa hwayak ata.

⁵¹ Ata Pawl ta Barnabas, a raramara lagwada fa salay ata hay †. Ta', a diyam aa berney nga Ikwaniyum.

⁵² Ama ndëhay ma sëpa cëvedf nga Yesu da Antiyaws a na, a njam daa meesëmey fara fara, ata marëhtakaya ta *Mesëfney nga Gazlavay.

14

Ata Pawl ta Barnabas a wuzam mey nga Gazlavay da Ikwaniyum

¹ Ata Pawl ta *Barnabas a wusam aa berney nga Ikwaniyum. A diyam aa *way-mewuzey-mey nga Gazlavay fetedë anda ata ma diyam da Antiyaws. A wuzmatar mey da ray Yesu a ndëhay maaya maaya haa ndëhay masa *Jëwif hay ta ndëhay masa Jëwif hay ba hay ga fetedë, a tëbmara mey a.

² Ama Jëwif hay siya a gëmam nga tëbmara mey a ba. Anda kedë, a hëldamata ndëhay masa Jëwif hay ba hay nga wulkam maaya ba da ray ndëhay ma tëba mey nga Yesu.

13:46 13.46 3.26; 18.6 **13:47 13.47** Iz 49.6 **13:48 13.48** 11.18 **13:49 13.49** 2.41 † **13:51 13.51** raramara lagwada fa salay ata hay: Da Jëwif hay fa pëkam daa hwayak nga Jëwif hay ba hay na, a raramara lagwada fa salay ata hay leñ fa zana ata hay maja a wulkam lagwada ha a da zlëbta. Yesu a lëvtar a gula anğa hay, da ndëhay daa berney a tëbmara mey ata da ray anğa ba na, nga raramara lagwada fa salay ata hay kënë. Nëka Mt 10.14; Lk 9.5. Anda kedë, ata Pawl ta Barnabas a wuzdamatara a ndëhay daa berney a na, ata ta mebërey, mey nga ata Pawl ta Barnabas da hwad a daa saba. **13:51 13.51** 18.6; Lk 9.5 **14:1 14.1** 17.2 **14:2 14.2** 13.45

³ Ta ñgene he cëpa, ata Pawl ta Barnabas ta ñjam la ga da Ikwaniyum a cëñga. A wuzam mey da ray Bay Mahura ta mandërzay daa dey ba. A kam sede da ray Gazlavay, aa guzlam da ray maaya aña. Bay Gazlavay a wuzdërwa mey ata na, ara mey fara fara, a vëltar gëdan ñga key maazla hay ma rëzla ndaw.

⁴ Ta', ndëhay daa berney a, a wunkam cew maja mey a. Siya hay a tëbam mewulkey ñga Jëwif hay, siya hay may a tëbam mewulkey ñga ndëhay meslërey a.

⁵ Daa ðar hay a ñgene, ndëhay Jëwif hay ta ndëhay masa Jëwif hay ba hay leñ bay ata hay na, a cëmdamara ðay ata pal. A wudam ñga sërdamata banay ta ata Pawl ta Barnabas, a wudam ñgaa zakamata ta aña gwa vagay.

⁶ Masa ndëhay meslërey cew keðe ma cëndamara mey a la na, a hwam da Ikwaniyum, a diyam ñgadaa berney ñga Listëra, ñgadaa berney ñga Derbe masa daa hwayak ñga Likwani, leñ aa slala hay mekele mekele daa hwayak a.

⁷ Fetede may, ta wuzam *Mey-maaya-mawiya la.

Ata Pawl ta Barnabas a wuzam mey ñga Gazlavay da Listëra

⁸ Da Listëra, ndaw daha maahëlbakaya dëga ñga mayawa aña, a gwa ma daw ba.

⁹ Aa fa jëkey slëmay fa mey masa Pawl maa guzlda. Pawl a nëkfa, a sëra ndaw a fa tëba mey ñga Yesu, a gwa a hëtar salay aña la.

¹⁰ Pawl aa guzlar ta gëdan, a lëvar: «Slëkðey, lecey deñ! ta salay akah!» Ndaw a, ta', a jëvey, a zlar ma daw ta salay aña.

¹¹ Ndëhay a hëtmär cek masa Pawl ma ka, a zlamar ñga wudey ta mey ata Likwani, a lëvam: «Kuley hay ta samawa la fa alëkwa, a tëram anda ndëhay.»

¹² A pamata ata Pawl ta *Barnabas ñga kuley hay, ta', a zëlmara Barnabas *Zus* ta mezëley ñga kuley ata. A zëlmara Pawl may Hermes † maja ara Pawl maa guzltar.

¹³ Way ñga kuley mezëley Zus aa gweegwe ta mey-slam ñga berney a. Ta', ndaw ma ta kuley a, a handawa gusan hay ta meefekwey hay fa mey-slam ñga way ñga kuley a, amba a tamata ata Barnabas ta Pawl anda kuley ata hay.

14:3 14.3 2.22 **14:5 14.5** 14.19; 2Tm 3.11 **14:6 14.6** Mt 10.23 **14:8 14.8**
 3.2 **14:11 14.11** 28.6 * **14:12 14.12** Zus: Ndëhay Gërek hay na, kuley ata hay mekele mekele daha. Zus ara kuley mahura da ray kuley hay siya hay. † **14:12 14.12** Hermes: Hermes ara kuley masa ma tëla mey ñga Zus ta ñga kuley hay siya hay. **14:13 14.13-15** 10.25-26; Dan 2.46

14 Ama masa ata Barnabas ta Pawl ma cëndamara mey a kefe la na, a ngërmata zana ata hay, a hwam a wuzlah ndëhay a ta mewudey, a lëvam:

15 «Haya! Akwar ndëhay kefe, ka kam kefe na, sëkway nga me? Ala na, ndëhay anda akwar, ba diya? Ya samawa fefe nga wuzmakwar *Mey-maaya-mawiya. Ya fa lëvmakwar, mbëkdamara metey kuley hay masa ma gwa nga jënkwar ba ngene. Mbëdmawa dey fa Gazlavay, ndaw masa anga daha ta dey nga sërmataw, ma lëma slam da vad ta cek hay da hwad a, ma lëma slam da hwayak ta cek hay da hwad a, ara anga ma ka bëlay ta cek hay da hwad a.

16 Zleezle na, a mbëkdata ndëhay da bëla tabiya masa *Jëwif hay ba hay nga sëpam cëved anda ata ma wudam.

17 Ta ngene he cëpa, Gazlavay fa wuzdërwa gëdan anga da wuzlah ata mandaw mandaw cënga ta fa maaya anga masa anga ma ka. Anga fa pakwar var, fa vëlkwar cek mezëmey fa mevey a fa mevey a anda akwar ma wudam, fa rëhdakwar ta cek mezëmey, faa sëmdakwar ga.»

18 Kwa ata maa guzlmatar la anda kefe na, ata Barnabas ta Pawl a tëkmata ndëhay a ta banay nga mbëkdamara metey kuley a.

19 Fa dëba ha, Jëwif hay ma samawa da Antiyaws masa daa hwayak nga Pisidi, lej Jëwif hay ma samawa da Ikwaniyum, a hëldamata ndëhay daa berney nga Listëra ngaa zakamara Pawl ta anywa vagay. Ta', aa zakamara, a dëdamara la daa berney a ngada palah maja a wulkam anga ta mëcey sem.

20 Ama ndëhay ma tëba mey nga Yesu na, a kusam a cakay a. Pawl heyey, ta', a slëkdey, a vëhwa aa berney a.

Ata Pawl ta Barnabas a vëhmawa a Antiyaws masa da Siri

Peperëk e, Pawl, ta', a diyam ta Barnabas aa berney nga Derbe.

21 A wuzam *Mey-maaya-mawiya da Derbe he. Ndëhay ga fetede a tëbmara mey nga Yesu. Ta', ata Pawl ta *Barnabas a vëham aa berney nga Listëra, fa dëba ha, a vëham aa berney nga Ikwaniyum, lej a Antiyaws masa daa hwayak nga Pisidi.

22 Daa berney hay a, a vëlmatar gëdan a ndëhay ma tëba mey nga Yesu fetede nga jaram maaya maaya daa cëved nga Yesu. A lëvmatar: «Si ya sërkwa banay ga amba ya mbëzkwa aa slam masa Gazlavay fa wey da hwad a.»

²³ Daa mecëmey-ray hay nga ndëhay nga Yesu tabiya na, a walam ndëhay nga key *bay-ray hay. Masa ata ma walamata cay na, a kam *daliyam, a dëram danggay a Gazlavay maja ata. Ta', ata Pawl ta Barnabas a vëldamata ndëhay a, a har Bay Mahura masa ata ma pamara nga ndaw ata fara fara, amba a jëdfta.

²⁴ A diyam ta daa hwayak nga Pisidi, a wusam aa hwayak nga Pamfili.

²⁵ Da Pamfili a na, ngeeme, a wuzam mey nga Gazlavay daa berney nga Perze, fa dëba ha a diyam a wuzam mey daa berney nga Ataliya.

²⁶ Da Ataliya ha na, a diyam ta kwambiwal a Antiyaws masa daa hwayak nga Siri. Ara da Antiyaws a zleezle ndëhay nga Yesu fetede ma dëram danggay maja ata Pawl ta Barnabas amba Gazlavay a pëstar mey nga key slëra anga, slëra masa wure kefe ata ta kamara cay.

²⁷ Masa ata ma wusam a Antiyaws a la na, a kumata ndëhay daa *mecëmey-ray nga ndëhay nga Yesu fetede. A kadamatara cek hay tabiya masa Gazlavay ma ka ta ata. Asaya, a wuzdamatara cek hay masa Gazlavay ma ka nga wurtara cëved ngada ndëhay masa *Jëwif hay ba hay amba a pamara Yesu nga ndaw ata fara fara.

²⁸ Ata Pawl ta Barnabas ta njam la ga fetede ta ndëhay ma tëba mey nga Yesu.

15

Ndëhay nga Yesu a kusam da Jeruzelem

¹ Ndëhay siya hay a samawa daa hwayak nga *Jude ngadaa berney nga Antiyaws masa da Siri, aa sërkadamata mëlman hay daa mey nga Yesu, a lëvmatar: «Da akwar ma tëbmara *mesley mandawal anda *kwakwas nga Mawiz ma lëvey daa ba na, Gazlavay fa da lëhdakwar daa mebërey daa ba may.»

² Ata Pawl ta *Barnabas na, ta tëbmara mey a daa ba. Ta', a kam yawa ga ta ndëhay a da ray mey a. Mëlma ata hay daa mey nga Yesu da Antiyaws heyey, a walamata ata Pawl ta Barnabas lej ndëhay mekele da wuzlah ata, amba a diyam a *Jeruzelem ngaa guzlwa ta ndëhay meslërey hay, ta *bay-ray hay daa *mecëmey-ray nga ndëhay nga Yesu da ray mey a.

³ Da ray ngene, ndëhay daa mecëmey-ray da Antiyaws a, a vëlmatar cek hay nga jënta daa madaw ata a Jeruzelem. Ndëhay a, a diyam taa hwayak nga Fenisi lej taa hwayak

nga *Samari, fa diyam ta meeguzley da ray ndëhay masa *Jëwif hay ba hay, a lëvam ata ta mbëkdamara mekey meberëy sem, a tëbam mey nga Yesu dëba. Da ray ngene, masa mëlma ata hay daa mey nga Yesu tabiya fetede ma cëndamara na, aa sëmam ga.

⁴ A wusam a Jeruzelem na, ndëhay daa mecëmey-ray nga ndëhay nga Yesu, ta bay-ray hay, lej ndëhay meslërey nga Yesu a tëbmata ta meesëmey. Ata Pawl ta Barnabas a wuzdamatara cek hay tabiya masa Gazlavay ma ka ta fa ata.

⁵ Ama ndëhay *Fariza hay siya ma tëba mey nga Yesu na, a slëkdam, a lëvam: «Ndëhay masa Jëwif hay ba hay na, si a tëbmara nga sley mandawal, si ya lëvmatar nga sëpam kwakwas nga Mawiz.»

⁶ Ndëhay meslërey a, ta bay-ray hay a, a kusam tabiya da slam a nga nëkey mey a.

⁷ Masa ata fa kam yawa ga da ray mey a na, *Piyer ta', a slëkdey, a lëvey: «Mëlma adaw hay, ka sërmara zleezle Gazlavay a walaya da wuzlah akwar na, nga wuzey *Mey-maaya-mawiya a ndëhay masa Jëwif hay ba hay, amba a cëndamara, a tëbmara mey nga Yesu.

⁸ Gazlavay na, ara ndaw ma sëra mevel nga ndëhay tabiya. Annga ma vëltar Mesëfney annga la a ndëhay masa Jëwif hay ba hay anda aa ma vëldandakwara may. Anda kede, fa wuzdërwa, annga fa tëbta ndëhay a.

⁹ Gazlavay ta wunkandakwar ta ndëhay masa Jëwif hay ba hay na, daa ba. Ta përtara mevel ata la, maja ata ma tëbmara mey nga Yesu.

¹⁰ Kaa wure kede, ka jadamara Gazlavay na, maja me? Ka wudam ka tëkmatar dëy a ndëhay ma tëba mey nga Yesu nga sëpey kwakwas nga Mawiz na, maja me? Kwa papan nga papa alëkwa hay, kwa alëkwa, ya gwakwa nga sëpkwa kwakwas a tabiya ba!

¹¹ Sasëkar jak, ya fa sërkwä Gazlavay a lëhdandakwar na, ta fa maaya nga Bay Mahura Yesu, letek ta ndëhay Jëwif hay ba hay may!»

¹² Wure ngene, ndëhay makustakaya tabiya fetede a njam teete, a jëkam slëmay fa ata Barnabas ta Pawl. A wuzdamatara mey da ray maazla hay tabiya ma rëzla ndaw masa Gazlavay ma vëltar gëdan nga ka da wuzlah ndëhay Jëwif hay ba hay.

¹³ Masa ata ma ndëvdamara mey ata cay na, *Jak a zlar meeguzley may, a lëvey: «Mëlma adaw hay, jëkam slëmay!

14 Wure keđe *Simanɔw Piyer ta kadandakwara mey da ray pas masa Gazlavay ma zlar nga nêkfatar dey fa ndëhay Jëwif hay ba hay la. Dëga ta pas ñgene a weley ndëhay da wuzlah ata nga tërey ndëhay anğa hay.

15 Mey a, aa letek ta mey nga ndëhay ma tëla mey nga Gazlavay mawuzlalakaya daa ðerewel nga Gazlavay, ma lëvey:

16 Bay Gazlavay a lëvey:

“Way nga *Davit * ta bözley sem.

Fa dëba ha, ya vëhwa la,

ya lëma way a † la,

ya lacada aa slam a.

17 Anda keđe, ndëhay siya a sëpmaya la, yah Bay Gazlavay, kwa ndëhay daa hwayak hay wura wura tabiya, masa yah ma zëta nga key ndëhay adaw hay na, a sëpmaya la.

Ehe, Bay Gazlavay a lëvey anda keđe.

A key cek hay anda keđe na,

ara cek hay masa

18 aa ma wufey nga wuzdatërwa dëga zleezle.”»

19 Jak a lëvtar saya: «Maja mey a keđe, ya wulkey maaya na, ndëhay Jëwif hay ba hay ma mbëðmawa dey fa Gazlavay na, ya sërdamatakwa banay ba.

20 Ama, wuzlalamatakwa leeter, ya lëvmatakwa a da zëmam aslaw nga kuley nga zlëbta ba, a da lam vaw saw ba, a da zëmam aslaw nga cek metërðey ta tërðey ba, asaya, a da zëmam mambaz ba.

21 Maja dëga zleezle haa wure keđe na, fa wuzam mey da ray kwakwas nga Mawiz da slala hay tabiya, asaya, fa jangamara mey a daa way hay mewuzey mey nga Gazlavay ta *pas memëskey-vaw.»

A slërmatar leeter a ndëhay nga Yesu masa Jëwif hay ba hay

22 Masa *Jak ma ndëvda mey anğa la na, ndëhay meslërey, ta *bay-ray hay, len ndëhay daa *mecëmey-ray nga ndëhay nga Yesu tabiya, a cëmdamara ðay ata. Ta', a walam ndëhay da wuzlah ata, amba a slërdamata aa berney

* **15:16 15.16** Way nga Davit: Aa guzley da ray sëkway nga Davit, da daa ba, da ray aa ma wey da ray Israyel. † **15:16 15.16** ya lëma way a: Masa Gazlavay ma lëvey a lëma way nga Davit e la na, ara mey-menğey da ray maslëkfawa nga Yesu daa memëcey, ta da ray metëpey anğa a vad nga key Bay Mahura nga sëkway hay tabiya da bëla nga sërmataw. **15:16 15.16-18** Am 9.11-12; Iz 45.21 **15:19 15.19** Gal 5.3 **15:20 15.20** 15.29; 21.25; **aslaw:** 1Kwr 8.1-13; 10.23-33; **meley-vaw saw:** Lev 18.6-18; **aslaw nga cek metërðey ta tërðey:** Lev 17.15; **mambaz:** Lev 17.10-14 **15:21 15.21** 13.15

nga Antiyaws ta ata Pawl ta *Barnabas. A walam na, Jud ma zëlmara Barsabas, leŋ Silas. Ata cewete faa hëmdamata da wuzlah mëlman hay fetede.

²³ A wuzlalamatar leeter a har. Daa leeter e, a lëvam:

«Ara ala, mëlماكw akwar hay masa ndëhay meslërey nga Yesu, ta bay-ray hay nga mecëmey-ray nga ndëhay nga Yesu ma wuzlalamakwara leeter kefe.

Akwar masa Jëwif hay ba hay, ma tëba mey nga Yesu da Antiyaws, daa hwayak nga Siri, leŋ daa hwayak nga Silisi, ya camakwar har.

²⁴ Ya cëdamara ndëhay da wuzlah ala hay ta diyam la fa akwar. A hëbماكwar ray, a mbëfdamakwara leŋgesl ta mey ata hay. Ama ara ala ma slërdamata ba.

²⁵ Da ray ŋgene, ya cëdamara day ala pal, ya kam maday da ray mey a, ta', ya walam ndëhay amba ya slërdamata fa akwar. A diyam ta ata Pawl ta Barnabas ndëhay masa ala ma wufmata kalah.

²⁶ Ata Pawl ta Barnabas a na, ara ndëhay masa ma vëldamara ray ata sem nga key slëra nga Bay alëkwa Mahura Yesu *Këriste.

²⁷ Da ray ŋgene, ya slërmakwar Jud ta Silas, amba a wuzdamakwara mey a leték anda ala ma wuzlalamakwara kefe.

²⁸ Maja ta mbafar la a *Mesëfney nga Gazlavay leŋ ŋgada ala, amba ya vëlmakwar *mewey mekele saba, si mewey hay masa ala ma wuzlalamakwara kefe gway. Ehe, ala fa lëvmakwar:

²⁹ ka da zëmam aslaw nga kuley ba, ka da zëmam mambaz ba, ka da zëmam aslaw metërdëy ta tërdëy ba, ka da lam vaw saw ba. Da akwar ta tëkmata ray akwar hay la fa cek hay a kefe na, akwar ta kam maaya la.

Gazlavay nga njadandakwar daa zazay ŋga.»

³⁰ Ta', a mbëkdamata ndëhay masa ata ma walamata nga slërey heyey nga diyam aa berney nga Antiyaws. Masa ata ma wusam la na, ta', a kusmata ndëhay daa mecëmey-ray nga ndëhay nga Yesu fetede, a vëldamatara leeter heyey.

³¹ Ndëhay nga Yesu fetede a janğamara leeter e, aa sëmam ga da ray a, mey da hwađ a, a vëltar gëdan.

³² Ata Jud ta Silas heyey na, ata ndëhay ma tëla mey nga Gazlavay. Aa guzlmatar mey hay ga a mëlman hay daa mey nga Yesu. A vëlmatar gëdan amba a njam daa cëved nga Yesu.

³³ Ta', a njamawa nekødey fetede. Fa døba ha, a wudam nga vøhmawa fa ndøhay ma slørdamata heyey. Da ray ngene, mælma ata hay fetede heyey, a løvmatar: «Diyam ta zazay. Ka camatar har a ndøhay ma slørdamakurwa may.»

[
³⁴] ‡

³⁵ Ata Pawl ta Barnabas na, a njamawa da Antiyaws a. Ata ta ndøhay mekele ga, faa sækadamata ndøhay, fa wuzam *Mey-maaya-mawiya nga Bay Mahura.

Ata Pawl ta Barnabas a wudkam day

³⁶ Fa døba ha nekødey, Pawl a løvar a *Barnabas: «Nakwa la fa mælma aløkwa hay daa mey nga Yesu daa berney hay mekele mekele masa aløkwa ma wuzmatakwar mey nga Bay Mahura zleezle, amba ya nøkakurwa menjey ata na, aa kwara.»

³⁷ Barnabas na, a wudey a ngøla Jan-Mark asi ata.

³⁸ Ama Pawl a tøba ba, maja Jan-Mark a, ta mbøkdatørwa la daa hwayak nga Pamfili. A mbøkdatørwa na, daa masa slæra ata, ta ndøvey daa ba arañ.

³⁹ Ata Pawl ta Barnabas a kam yawa ga. Ta', a wudkam day. Da ray ngene, Barnabas a ngøla Jan-Mark, a diyam cew e, a tøjgam ta kwambiwal aa hwayak da wuzlah bølay mezøley Sipøre.

⁴⁰ Ama Pawl na, a ngøla Silas may. Mælma ata hay daa mey nga Yesu fetede a døram dangay a Gazlavay maja ata, amba Gazlavay a pøstar mey. Ata Pawl ta Silas, ta', a diyam.

⁴¹ A diyam a slala hay mekele mekele daa hwayak nga Siri lej daa hwayak nga Silisi. A vølmatar gødan a ndøhay daa mecømey-ray hay nga Yesu fetede.

16

Timawte a lægdata ata Pawl ta Silas

¹ Fa døba ha, Pawl a daw aa berney nga Derbe, asaya, a daw aa berney nga Listøra. Fetede, ndaw ma tøba mey nga Yesu daha mezøley Timawte. Mamaha dam *Jøwif ma tøba mey nga Yesu, ama papaha na, ndaw Gørek.

² Mølman hay daa mey nga Yesu da Listøra, ta daa berney nga Ikwaniyum faa hømdamara.

‡ **15:34 15.34** Daa d'erewel siya hay a løvam: «Silas na, ta' a njawa fetede. Jud na, a vøhey taava anga.» **15:37 15.37** 12.12 **15:38 15.38** 13.13 **15:39 15.39** 13.4 **15:40 15.40** 14.26 **16:1 16.1** 14.6; **Timawte:** Rm 16.21; 1Kwr 4.17; Føl 2.19; 2Tm 1.5 **16:2 16.2** 6.3; Føl 2.20, 22

³ Pawl a wudëy Timawte a lëgda aa slëra annga, ta', a ngëla. A slëra mandawal maja Jëwif hay da slëla hay fetedë na, a sërmarë papaha ara ndaw Gërek.

⁴ A diyam, a pëkam aa berney hay mekele mekele. Daa berney hay a na, a kadamatara mey majëwkaya nga ndëhay meslërey, ta nga *bay-ray hay nga ndëhay nga Yesu da *Jeruzelem heyey ngada ndëhay ma tëba mey nga Yesu fetedë. A lëvmatar nga tëbmara mey a.

⁵ Da ray ngene, ndëhay daa *mecëmey-ray nga ndëhay nga Yesu a hëtam gëdan nga tëbey mey nga Yesu ma fëna ma fëna. Fa ðar a, fa ðar a, ndëhay fa sëkmawa.

Gazlavay a wuzar cek a Pawl da Tërwas

⁶ Fa dëba ha, ata Pawl ta ndëhay ma lëgdamara a wudam a diyam nga wuzey mey nga Gazlavay daa hwayak nga Azi, ama *Mesëfney nga Gazlavay, a vëltar cëved ba. Da ray ngene, a diyam taa cëved ma daw ta daa hwayak nga Fërizi, lëj taa cëved ma daw ta daa hwayak nga Galati.

⁷ Masa ata ma wusam gweegwe ta hwayak nga Misi la na, a sëpam cëved nga daw aa hwayak nga Bitini, ama Mesëfney nga Yesu a vëltar cëved ba.

⁸ Ta', a diyam taa hwayak nga Misi, a wusam aa berney nga Tërwas da mey-bëlay.

⁹ Ta tavad, Gazlavay a wuzar cek a Pawl. Pawl a hëtar ndaw Masadëwan daha malacakaya, ndaw aha fa kar ambahw, a lëvar: «Sawa a Masadëwan amba ka jënnar.»

¹⁰ Fa dëba ha masa Gazlavay ma wuzdara cek aha cay a Pawl na, wure ngene, ya sëpam * cëved nga tëngëy ta kwambiwal a Masadëwan, maja ya sërmarë ara Gazlavay ma zëldar, amba ya wuzmatar Mey-maaya-mawiya a ndëhay daa hwayak a.

Lidi a tëba mey nga Bay Mahura da Fëlepi

¹¹ Da Tërwas na, ya tëpam aa kwambiwal, ya diyam kasl aa hwayak da wuzlah bëlay mezëley Samawtëras. Pepërek e, ya tëngam aa berney nga Niyapawlis. Ya pam salay.

¹² Ta', ya diyam ta salay aa berney nga Fëlepi masa berney mahura daa hwayak nga Masadëwan. Berney nga Fëlepi a na, ara berney masa Rawma hay ma wamara †. Ta', ya njam daa berney a, ðar nekëdëy.

16:3 16.3 Gal 2.3-5; 1Kwr 9.20

16:4 16.4 15.22-29

16:5 16.5 2.41

16:6

16.6 10.19 * 16:10 16.10 Luk, ndaw ma wuzlala ðerewel kedë, a kada mey da ray ata ma pëkam bama ta ata Pawl, Silas, lëj Timawte. † 16:12 16.12 berney masa Rawma hay ma wamara: Har-gëdan nga ndëhay fetedë na, Rawma hay. Ndëhay daa berney a, a sëpam mewey hay nga Rawm ta cëved e anda ndëhay daa berney nga Rawm ma sëpmarë.

¹³ Ta *pas memëskey-vaw, ta', ya bamawa daa berney a, ya diyam a mey wayam daha, maja ya wulkam da ya hëtfam slam medërey-dangay nga *Jëwif hay fetede la kwa. Masa ala ma hëtam slam medërey-dangay a la na, ta', ya njam, yaa guzlmatar a ngusay makustakaya fetede.

¹⁴ Ngwas pal da wuzlah ata daha mezëley Lidi, a sawa daa berney nga Tiyatir. Ara ngwas ma ka filaw nga zana magaza ma hëdkey ba. Annga ngwas Jëwif ba, ama fa nar ray a Gazlavay anda Jëwif hay. A jëkfandar slëmay, Bay Mahura a wurara mevel annga amba a tëba mey masa Pawl ma kada.

¹⁵ Anda kefe, ta', a hëtam *baptem ta ndëhay da way annga tabiya. A lëvndar: «Da ka nëkmara, ya fa tëba mey nga Bay Mahura Yesu fara fara na, samawa, njam a way adaw.» A kandar ambahw ta mevel annga ndav nga daw a way annga.

Ata Pawl ta Silas daa fërsëne daa berney nga Fëlepi

¹⁶ Ta pas langar daha, ala fa diyam aa slam medërey-dangay heyey saya na, ta', ya cam ray ta dam beke daha. Annga ta fakalaw da ray, a wudkey har. Bay annga hay fa hëtam dala ga maja annga ma wudkey har aha.

¹⁷ Dam beke he a sawa asi ala ta ata Pawl ta mewudey, a lëvey: «Ndëhay kefe ara ndëhay ma kam slëra nga Bay Gazlavay Mawaca-waca. Ata fa wuzmakwar cëved masa akwar ma da lëham daa meberëy ta da hwad a.»

¹⁸ Aa fa ka anda kefe d'ar ga haa Pawl a cey mevel a ray a. Pawl a, pëla! a mbëdëy dey, a lëvar a fakalaw da ray dam aha: «Fakalaw, ya fa lëvka ta mezëley nga Yesu *Këriste, bey da ray dam kefe.» Wure ngene, fakalaw kaa heyey, ta', a bey da ray dam aha.

¹⁹ Bay annga hay a, a nëkmara na, fa hëtam dala fa vëfa daa saba. Da ray ngene, ta', a kërzamata ata Pawl ta Silas. A d'ad'amata fa mahura hay nga Rawma hay, a handamata aa slam mekey sariya nga ndëhay tabiya.

²⁰ A handamata fa mey nga ndëhay Rawma hay ma ka sariya hay, a lëvmatar: «Ndëhay kefe fa handamawa mey aa berney alëkwa. Ara ndëhay *Jëwif hay,

²¹ ata faa sërkadamata ndëhay ta kwakwas mekele, kwakwas masa alëkwa Rawma hay ma təkakwa sem.»

²² Ndëhay tabiya fetede a cëmam a ray ata Pawl ta Silas. Ndëhay ma ka sariya hay a lëvmatar a ndëhay nga

cëkwmatarara zana fa vaw nga ata Pawl ta Silas nga gëdan, asaya, a lëvmatar nga slëdmata ta laway.

²³ Masa ata ma slëdmata la ga na, ta', a handamata aa fërsëne, a lëvmar a ndaw ma jëdfa fërsëne he nga jëdfa maaya maaya.

²⁴ Masa ndaw ma jëdfa fërsëne ma cënda anda kedë na, ta', a handata aa way masa da wuzlah daa fërsëne he, a ndëkwdatarara salay aa hwadam.

²⁵ Ta wuzlah-tavad na, ata Pawl ta Silas a dëram danggay a Gazlavay, a hëlmamara Gazlavay ta walay. Ndëhay siya majëwtakaya daa fërsëne he fa jëkfamatar slëmây.

²⁶ Wure wure ngene, hwiyak a wusey, salay nga way nga fërsëne he a wusey. Mey-slam hay tabiya a wuram, calalaw hay masa ata ma jëwmata ndëhay tabiya ta anga na, a pëskam.

²⁷ Ndaw ma jëdfa fërsëne he a slëkdey daa dëf, a nëkta mey-slam hay mawurtakaya, a wulkey da ndëhay daa fërsëne he ta hwam sem kwa. Da ray ngene, a mëdërwa dëlaw anga, amba a këfa ray anga.

²⁸ Ama Pawl aa guzlar ta gëdan, a lëvar: «Ka da këfa ray akah ba! Ala tabiya, ala daha!»

²⁹ Ndaw ma jëdfa fërsëne heyey, ta', aa cëfdëy awaw nga nëkey dey, a wusey vaw, a mbëzey aa slam masa ata Pawl ta Silas da hwad a heyey. A tëdëy asi salay ata, ta meewesey maja aa fa zlurey.

³⁰ Ta', a badatërwa daa slam aha, aa cëfdëta, a lëvtar: «Bay adaw hay, ya da key kwara amba ya lëhey daa mebërey na!»

³¹ Ata Pawl ta Silas a mbëfdamara, a lëvmar: «Pa Bay Mahura Yesu nga ndaw akah fara fara, a lëhdaka la daa mebërey, kah ta ndëhay da way akah.»

³² Ta', a wuzdamara mey nga Bay Mahura, ngada anga, ta ngada ndëhay da way anga tabiya.

³³ Dasi tavad a ngene na, ndaw ma jëdfa fërsëne heyey, ta', a ngëlta ata Pawl ta Silas, a përtara mbëlek ata hay nga meslëdëy heyey. Anga ta ndëhay da way anga tabiya, ta', a hëtam *baptem wure ngene.

³⁴ Ta', a handata ata Pawl ta Silas a way anga, a vëltar cek mezëmey. Anga ta ndëhay da way anga tabiya aa sëmam ga, maja ata ma pamara Gazlavay nga ndaw ata fara fara.

³⁵ Fa dëba ha, slam ma wurey la na, ndëhay Rawma hay ma ka sariya hay, a slëram sewje hay nga lëvmar a ndaw

ma jëda fërsëne nga mbëkdata ata Pawl ta Silas heyey nga diyam.

³⁶ Ndaw ma jëda fërsëne heyey a daw a lëvar a Pawl: «Ndëhay Rawma hay ma ka sariya hay ta vëlmaya cëved la nga mbëkdakwar. Anda kefe, ka gwamara ka bam, ka diyam ta zazay.»

³⁷ Ama Pawl a lëvtar a sewje hay ma slërdamatërwa heyey: «Ta kam sariya da ray ala daa ba sëlak, ama a slëdmandar meedey ndëhay tabiya, yaw, ala na, ndëhay Rawma hay may! A handamandërwa aa fërsëne, ama wure kefe, a wudam nga mbëkdamandar, ya diyam ta mayal a na, kwara dëba wura? A key ba. Si ndëhay ma ka sariya ha, a samawa, ata ray ata, a mbëkdamandar.»

³⁸ Sewje hay heyey, a diyam, a mbëdëdamatara mey masa ata Pawl ta Silas ma lëvmatar heyey a ma ka sariya hay a. Masa ata ma cëdamara ata Pawl ta Silas ata ndëhay Rawma hay na, a zluram.

³⁹ Daa ngene, a diyam ata ray ata fa ata Pawl ta Silas heyey, a kamatar ambahw. Ta', a badamatërwa daa fërsëne he, a lëvmatar nga diyam la daa berney ata.

⁴⁰ Masa ata Pawl ta Silas heyey ma bamawa la daa fërsëne na, ta', a diyam a way Lidi. A hëtfamatar mëlma ata hay ma tëba mey nga Yesu fetëde, a vëlmatar gëdan. Ta', a diyam aa slam mekele saya.

17

Ata Pawl ta Silas daa berney nga Tesalawnik

¹ Ata Pawl ta Silas a diyam taa berney nga Amfipawlis len taa berney nga Apawlani, a wusam a Tesalawnik. Fetëde, *way-mewuzey-mey nga Gazlavay daha.

² Pawl, ta', a daw aa way a, nga dërwa dangay anda anga ma ka mandaw mandaw. Pawl fa daw fa luma ha fa luma ha ta *pas memëskey-vaw luma maakar, fa kam yawa ta ndëhay makustakaya daa way a da ray dërewel nga Gazlavay.

³ Faa sërkatata ndëhay maaya maaya da ray dërewel nga Gazlavay, a lëvey si *Këriste na, a sërëy banay, a mëcey, fa dëba ha, a slëkdëfawa daa memëcey. Pawl a lëvtar: «Yesu masa yah ma wuzkwar mey da ray a wure kefe kaa na, ara Këriste, *ndaw masa Gazlavay ma wala nga lëhdata ndëhay.»

4 *Jëwif hay siya fetede a tëbmara mey a, a diyam asi ata Pawl ta Silas. Ndëhay siya hay ga da wuzlah Gërek hay masa ma sëpam mey nga Gazlavay anda Jëwif hay ta ngusay ga masa daa sëkway nga ndëhay mahura hay, a tëbmara mey a may.

5 Ama Jëwif hay siya may, sëlëj a katar. Ta', a kusam ndëhay saw kënë daa cëved hay. Ndëhay a, a diyam a kusmata ndëhay, a hëldamata nga yam mey daa berney a. Ta', a diyam a way ndaw nga Yesu, mezëley Jasanjw, a sëpmata ata Pawl ta Silas amba a handamata fa mey nga ndëhay ma ka sariya.

6 Ama ta hëtfamatërwa daa ba. Da ray ngene, ta', a dadamërwa Jasanjw ta mëlmanj hay mekele mekele daa mey nga Yesu, a handamatërwa fa mey nga mahura hay ma wamara berney a. A wudam, a lëvam: «Ndëhay kefe na, fa hëldamata ndëhay nga nësa hwayak kwa daa wura daa wura cëpa. Wure kefe, ta wusmawa la fedë saya.

7 Jasanjw ta tëbta la nga njam da way anja. Ndëhay a tabiya a tëbmara mewey nga Bay *Sezere saba, a lëvam bay mekele daha mezëley Yesu.»

8 Masa Jëwif hay a ma lëvam anda kefe la na, mevel nga mahura hay daa berney a, ta nga ndëhay makustakaya tabiya a kudferëy ta gëdanj.

9 Ndëhay mahura hay a, a tëkmatar dëy ngada ata Jasanjw ta ndëhay makërzatakaya heyey nga pëlam dala a ngwamna, amba baazlam a key saba. Ta', a mbëkdamata.

Ata Pawl ta Silas a diyam aa berney nga Bere

10 Ta tavad a ngene mëlmanj hay daa mey nga Yesu a slërdamata ata Pawl ta Silas aa berney nga Bere. A wusam fetede, a diyam aa *way-mewuzey-mey nga Gazlavay.

11 Ndëhay daa berney nga Bere he, mevel ata maaya, ata anda ndëhay daa berney nga Tesalawnik ba. A wudam nga jëkey slëmay fa mey da ray Yesu maaya maaya. Fa dër a, fa dër a, fa janjam mey nga Gazlavay amba a sërmara mey masa Pawl ma kada na, ara mey fara fara.

12 Da ray ngene, ndëhay *Jëwif hay ga da wuzlah ata a tëbmara mey nga Yesu. Ngusay Gërek hay ga masa-zleley hay, lëj ndëhay Gërek hay ga ta tëbmara mey a la may.

13 Ama Jëwif hay da Tesalawnik ma cëndamara Pawl fa wuzey mey nga Gazlavay daa berney nga Bere saya na, ta', a diyam a Bere he may. A zlamar nga hëldamata ndëhay daa berney a.

¹⁴ Da ray ñgene, mëlman hay daa mey nga Yesu fetede, a bam daa berney a ta ata Pawl. A handamara Pawl a, a mey-bëlay, ama ata Silas ta Timawte na, manjatakaya da Bere he.

¹⁵ Ndëhay ma handamara Pawl aha na, a diyam bama kasl aa berney nga Aten. Fetede Pawl a lëvtar: «Lëvmatar ñgada ata Silas ta Timawte nga samawa fa yah fiyaw fiyaw.» Ta', ndëhay a, a vëhmawa a Bere.

Pawl daa berney nga Aten

¹⁶ Masa Pawl fa sëkwta ata Silas ta Timawte daa berney nga Aten na, aa fa pëkey, a hëtey kuley hay ga fetede. Da ray ñgene, ray aña a hëbey.

¹⁷ A kam yawa daa *way-mewuzey-mey nga Gazlavay fetede ta *Jëwif hay len ta ndëhay Jëwif hay ba hay masa ma namar ray a Gazlavay. Asaya, fa ðar a, fa ðar a, aña fa daw aa luma, fa kam yawa ta ndëhay fetede.

¹⁸ Da wuzlah ndëhay ma kam yawa ha na, ndëhay ma tëbmara meesërkedey nga *Epikur hay * ta ndëhay ma tëbmara meesërkedey nga Sëstawik hay † daha. A zlamar mekey yawa ta aña may. Ndëhay siya hay a lëvam da ray a: «Ndaw masa baazlam kalah kede a wufey nga lëvey na, kwara?» Siya hay a lëvam: «A key aa sërkadandakwar mey da ray kuley hay daa hwayak mekele kwa.» Ndëhay a lëvam anda kede maja Pawl fa wuzey mey da ray Yesu ta da ray maslëkdawa daa memëcey.

¹⁹ Ta', a ñgëlmara Pawl, a handamara fa ndëhay mahura ma sla yawa. Ndëhay ma sla yawa ha mezëley ata na, Ariyawpaz ‡. A lëvam: «Meesërkey mawiya masa kah ma kada kede na, ya wufam ka wuzdandara,

²⁰ maja meesërkedey akah ha ala ta cëdamara ta slëmay ala daa ba aran. Ya wufam ya sërmara mabara nga mey a.»

²¹ Yaw, ndëhay Aten hay tabiya, ta mëlak hay ma njam daa berney a na, a kam slëra saba, si fa jëkam slëmay fa meesërkey hay mawiya mekele mekele, a kam maðay da ray a.

17:17 17.17 17.2, 4 * **17:18 17.18** Epikur hay: Ara gula hay nga ndaw Gërek mezëley Epikur. A wufam nga sërey banay ba. A wufam menjey daa zazay ta meesëmey gway. † **17:18 17.18** Sëstawik hay: Ara gula hay nga ndaw Gërek mezëley Zenew. A wulkam da ray mekey slëra maaya, kwa anja slëra ha ta banay na, a bësmera gway. **17:18 17.18** 4.2; 1Kwr 1.22 ‡ **17:19 17.19** Ariyawpaz: Ara mezëley nga aña da Aten, slam masa ndëhay mahura hay ma sla yawa daa berney a ma kusam aa slam aha. Fa dëba ha, a zëlmata ndëhay ma sla yawa hay a Ariyawpaz.

²² Ta', Pawl a lecey fa mey nga ndøhay ma sla yawa heyey, a løvtar: «Ndøhay Aten hay, ya nøka na, akwar fa søpmara kwakwas nga kuley akwar hay ta cøved e.

²³ Ya sëra maja daa masa ya fa pøkey daa berney akwar keðe na, ya ta høtey kuley akwar hay la ga malømtakaya. Daa slam lanjar ya ta høtey slam metey kuley la mawuzlalakaya fa vøða, a løvey: "Kuley ma sørey ba." Kwa ka sørmara kuley a ba, akwar fa ragadamar. Ama wure keðe ya ta sawa la nga wuzdakwara mey da ray a.

²⁴ Gazlavay na, ara ndaw ma løma bøla ta cek hay da hwað a tabiya. Anja Bay Mahura da ray cek hay da vad ta da hwayak. Anja na, a njeý daa way masa ndøhay ma lømamara ta har ba.

²⁵ Aa fa wuðey amba ndøhay a kamar cek na, daa ba, maja ara anja ma vølda heter leñ mesøfney a ndøhay tabiya da bøla, ara anja ma vølda kwa meeme tabiya.

²⁶ Ndaw masa Gazlavay ma løma pal ngeeme na, ara ta fa anja Gazlavay ma zlar nga key søkway hay nga ndøhay tabiya, amba a njam da bøla keðe. Asaya, Gazlavay ta pata ðar hay masa ndøhay ma da njam da bøla cay, ta pata kwakway nga hwayak ata hay cay.

²⁷ A lømtørwa ndøhay na, amba a søpmara, da kaa tøðe a høtfamar la kwa. Ama fara fara na, Gazlavay aa dørej kwa ta waawa ba.

²⁸ «Ara anda mawuzlalakaya, a løvey:

"Ya høtkwa heter nga søfney na, maja anja.

Ya høtkwa gøðan nga pøkey na, maja anja.

Aløkwa ta dey na, maja anja."

Anda ndøhay siya hay da wuzlah akwar ma zla walay hay ma løvam:

"Aløkwa may, bøz anja hay."

²⁹ «Aløkwa na, bøza hay nga Gazlavay. Anda keðe, ya da wulkakwa Gazlavay na, ara kuley ba. Anja anda kuley mavøðkaya ta børey magaza ba sølak, asaya, anja anda kuley maðøzlakaya ta anjwa ba. Kuley hay a keðe na, ara cek hay masa ndøhay ma kamata ta har ata, ta lenjesl ata.

³⁰ Gazlavay ta cey mevel da ray ndøhay zleezle na, daa ba, maja daa ngene ndøhay a sørmara mey anja ba ðagay. Ama, wure keðe, a løvtar a ndøhay da bøla tabiya kwa daa wura daa wura nga mbøðdamara menjeý ata, nga søpmara ta mevel pal.

³¹ Bay Gazlavay a lëvtar a ndëhay tabiya anda keđe na, maja anğa ta pa đar a cay nğa key sariya da bëla. A da ka sariya ha ta cëved e ta fa ndaw pal masa anğa ma wala. Ta wuzdërwa la a ndëhay tabiya fara fara ara ndaw aha ma da ka sariya ha maja Gazlavay ta slëkđadërwa ndaw a sem daa memëcey.»

³² Masa ndëhay ma cëndamara Pawl ma kada mey da ray maslëkđawa daa memëcey la na, ndëhay siya hay aa sanğërfamar. Ama siya hay a lëvam: «Ya wuđam ka sawa, ka kadandara mey a keđe ta pas mekele saya.»

³³ Pawl, ta', a daw, a mbëkdata.

³⁴ Ndëhay siya da wuzlah ata, a diyam asi Pawl, a tëbmara mey a. Ara ata Deni, ndaw mahura da wuzlah ndëhay ma sla yawa nğa Ariyawpaz a, ta nğwas mezëley Damaris, len ndëhay mekele mekele hay may.

18

Pawl daa berney nğa Kwarinti

¹ Fa dëba ha, Pawl a slëkđey da Aten, a daw aa berney nğa Kwarinti.

² Fetede, a hëtfey ndaw *Jëwif daha mezëley Akilas, ndaw aha a yawa daa hwayak nğa Panw. Akilas a, a sawa daa berney nğa *Rawm masa daa hwayak nğa Itali na, menjey ga daa ba. A samawa na, ta nğwas anğa Përesil, maja Këlawt, bay mahura nğa hwayak hay masa berney nğa Rawm ma wata, ta bëlta Jëwif hay sem tabiya daa berney a. Pawl, ta', a daw fa ata Akilas ta Përesil,

³ a njam bama, a kam slëra daa slam a, maja slëra ata letek. A kam way-mekërcey * nğa hëdkeđey.

⁴ Mandaw mandaw ta *pas memëskey-vaw, a daw aa *way-mewuzey-mey nğa Gazlavay fetede, a wuzdatara mey da ray Yesu a ndëhay Jëwif hay, kwa a ndëhay Gërek hay tabiya makustakaya daa way a. A sëpey nğa kusta ta mey amba ndëhay a, a tëbmara mey a.

⁵ Masa ata Silas ta Timawte ma samawa la daa hwayak nğa Masadëwan na, Pawl a mbëkda mekey way-mekërcey đagay. A wuztar *Mey-maaya-mawiya mandaw mandaw a Jëwif hay, a lëvtar Yesu na, ara *Këriste, *ndaw masa Gazlavay ma wala nğa lëhdata ndëhay.

⁶ Ama Jëwif hay a, a wuđam mey nğa Pawl ba, a cëđmara. Da ray nğene, Pawl a rara lagwada fa zana anğa a ray ata,

17:31 17.31 3.15; 10.42 **18:2 18.2** Akilas: Rm 16.3; 1Kwr 16.19; 2Tm 4.19

* **18:3 18.3** way-mekërcey: Ata na, a kam way-mekërcey ta ambal, da daa ba, ta zana macakaya ta engwec nğa dahway. **18:3 18.3** 20.33-34; 1Kwr 4.12; 9.12-18; 1Tes 2.9; 2Tes 3.7-9 **18:5 18.5-6** 3.26; 5.42 **18:5 18.5-11** 11.18

aa guzltar ta gëdan, a lëvtar: «Ka gëmam nga tëbmara mey a ba, anda kefe, Gazlavay a kakwar sariya la ngaa zëddakwar. Sërmara, ngene na, mey adaw da hwad a daa ba. Wure kefe, ya mbëkdakwar, ya daw la, ya wuzdatara mey a, a ndëhay masa Jëwif hay ba hay.»

⁷ Pëla! a mbëdftar dëba. A bawa daa way-mewuzey-mey nga Gazlavay heyey, a daw a way ndaw mezëley Titiyus Justus. Annga ndaw Jëwif ba ma nar ray a Gazlavay anda Jëwif hay. Way annga aa da cakay way-mewuzey-mey nga Gazlavay a.

⁸ Kërispus, *bay-ray nga way-mewuzey-mey nga Gazlavay a, a tëba mey nga Bay Mahura Yesu. Ndëhay da way annga hay a tëbmara mey a may. Ndëhay Kwarinti hay ma jëkam slëmay fa Pawl na, ata ga, a tëbmara mey nga Yesu, a hëtam *baptem.

⁹ Ta pas langar daha ta tavad, mesëfney a kar a Pawl. Daa mesëfney a, Bay Mahura a lëvar: «Ka da zlurey nga wuzey mey adaw ba, ka da njeý teete ba, wuzdatara a ndëhay cënga,

¹⁰ maja yah manjakaya ta kah. Kwa ndaw fa da gwa nga kërzaka nga sërdaka banay daa ba, maja ndëhay adaw hay ga daa berney a kefe daha.»

¹¹ Da ray ngene, Pawl manjakaya daa berney a mevey pal ta kiya maakwaw, fa wuzdatara mey nga Gazlavay a ndëhay fetefe.

¹² Masa Galiyaw, annga guverner daa hwayak nga Akay na, Jëwif hay, ta', a cëdamara dëy ata a ray Pawl. A kërzamara, a handamara fa mey nga ndëhay ma ka sariya fetefe.

¹³ A lëvam: «Ndaw kefe fa tëknata ndëhay nga dërey dangay a Gazlavay taa cëved mekele masa ma nësndakwara kwakwas alëkwa.»

¹⁴ Anja Pawl fa da mbëdftatara, ama Galiyaw ta', aa guzley, a lëvtar a Jëwif hay: «Akwar Jëwif hay, da ndaw a kefe ta key mebërey mahura la, da daa ba, ta key cek masa maaya ba mekele la na, ngene, ya jëkfakwar slëmay la.

¹⁵ Ama ka handamawa yawa da ray meesërkey akwar, da ray mezëley nga ndëhay akwar hay, ta da ray kwakwas akwar na, anda kefe, si akwar ta ray akwar, ka kamara sariya ha. Yah na, ya tëba nga key sariya da ray sëkway nga mey hay anda kefe ba.»

¹⁶ Ta', a bëlterwa daa slam mekey sariya ha.

¹⁷ Ndøhay tabiya a kørzamara Sawsten, bay-ray nga way-mewuzey-mey nga Gazlavay fetede, a kødmara fa meymbew nga way mekey sariya ha. Ama Galiyaw ta wulkey da ray mekødefy a daa ba sølak.

Pawl a vøhwa aa berney nga Antiyaws daa hwayak nga Siri

¹⁸ Fa døba ha, Pawl a njeý ðar ga da Kwarinti ta mølman hay daa meý nga Yesu fetede. Ta', a mbøkdata, a diyam ta ata Pøresil ta Akilas aa berney nga Senkøre amba a lam kwambiwal nga daw aa hwayak nga Siri. Da Senkøre na, Pawl ta høja ray anga la †, maja ta mbøðar la a Gazlavay, a løvar a da kar cek, wure keðe, ta ka cek aha cay. Ta', a tøpam aa kwambiwal, a diyam aa hwayak nga Siri.

¹⁹ A wusam aa berney nga Efez. Pawl a mbøkdata ata Pøresil ta Akilas nga njam fetede. Ta', a daw aa *way-mewuzey-mey nga Gazlavay, a kam yawa ta *Jøwif hay daa way a.

²⁰ Siya hay aa cøfdamara nga njeý nekødefy fa ata saya, ama Pawl a tøba ba.

²¹ A mbøkdata, a løvtar: «Da Gazlavay ta tøba la na, ya vøhwa la fa akwar saya.»

Ta', a sløkdefy daa berney nga Efez ta kwambiwal, a daw.

²² A wuseý aa berney nga Sezere, a peý salay, a daw a *Jeruzelem nga catar har a ndøhay daa *mecømey-ray nga ndøhay nga Yesu fetede. Fa døba ha, a daw aa berney nga Antiyaws masa da Siri.

²³ A njawa fetede nekødefy, a daw a pøkwa daa hwayak nga Galati ta daa hwayak nga Førizi, a daw a slala hay mekele mekele fetede. A vøltar gøðaný a ndøhay nga Yesu tabiya.

Apalaws a wuzey meý da ray Yesu

²⁴ Ndaw *Jøwif daha mezøley Apalaws, a daw, a wuseý a Efez. A yawa daa berney nga Alekzandøri. Apalaws a na, ara ndaw ma søra meeguzley maaya maaya, asaya, a søra ðerewel nga Gazlavay maaya maaya.

²⁵ Ndøhay taa sørkadamara maaya maaya la da ray Bay Mahura Yesu. A sørey na, si *baptem nga *Jan-Baptis gway, ama fa wuzdatara meý da ray Yesu a ndøhay ta meesømey, aa sørkadata ta cøved e cønga.

† **18:18 18.18** ta høja ray anga la: («ta høza ray» ta meý Gudal) Da ndaw Jøwif a mbøðar a Gazlavay nga key cek na, a mbøkda ray køne, a høja ba, a sla ba haa cek aha ma key. Fa døba ha, a høja ray anga, a vøldara engwec ehe a Gazlavay. Nøka Mesl 6.5-21. **18:19 18.19-20** 17.2 **18:21 18.21** Jak 4.15 **18:23 18.23** 14.22; 15.32 **18:24 18.24-25** 19.3-4; **Apalaws:** 1Kwr 1.12; 3.4-6

²⁶ A wuzey mey daa *way-mewuzey-mey nga Gazlavay fa ðar a, fa ðar a. Aa guzley ta mandërzay daa dey daa ba. Ata Përesil ta Akilas a cëndamara na, ta', a ngëlmërwa a way ata, a wuzmar mey nga Gazlavay amba a sëra ma fëna saya.

²⁷ Fa dëba ha, Apalaws a wufey nga daw aa hwayak nga Akay. Mëlman hay daa mey nga Yesu da Efez, ta', a vëlmar gëdan, a wuzlalamatar leeter ngada ndëhay ma tëba mey nga Yesu da Akay a, amba a tëbmara maaya maaya. Ta', Apalaws a daw. Masa Apalaws ma wusey la na, a jëney ndëhay ga ma tëba mey nga Yesu fetede maja maaya nga Gazlavay aa da ray a.

²⁸ Apalaws a kadatara mey a Jëwif hay fa mey nga ndëhay tabiya, a wuzdatara na, mewulkey ata, aa dër e ba. A wuzdatara daa ðerewel nga Gazlavay, fara fara Yesu na, ara *ndaw masa Gazlavay ma wala nga lëhdata ndëhay.

19

Pawl daa berney nga Efez

¹ Daa masa Apalaws anga daa berney nga Kwarinti daa hwayak nga Akay heyey na, Pawl, ta', a daw ta daa anywa hay, a wusey kasl aa berney nga Efez. A hëtfey ndëhay ma tëba mey nga Yesu nekëdey fetede.

² Ta', aa cëfdata, a lëvtar: «Akwar ta hëtam *Mesëfney nga Gazlavay la ta pas masa akwar ma tëbmara Yesu daw?» A mbëfdamara, a lëvmar: «Ïga menjey ala na, ala ma cënam mey da ray Mesëfney nga Gazlavay daa ba.»

³ Pawl aa cëfdata, a lëvtar: «Anda kedë, ka hëtam *baptem na, wura?» A mbëfdamara, a lëvmar: «Ya hëtam baptem nga *Jan.»

⁴ Pawl a lëvtar: «Zleezle Jan a key baptem na, ngada ndëhay masa ma wufam nga mbëfdamara menjey ata maaya ba. Jan a, a lëvtar a ndëhay *Jëwif hay, ndaw daha a sawa la fa dëba anga. Maaya na, a pamara nga ndaw ata fara fara. Ndaw a na, ara Yesu.»

⁵ Masa ata ma cëndamara mey a kedë la na, ta', a hëtam baptem ta mezëley nga Yesu Bay Mahura.

⁶ Pawl a patar har a ray. Mesëfney nga Gazlavay a sawa a ray ata, aa guzlam ta mey mekele mekele masa ata ma sërmara ba, a zlamar ma wuzdamara mey masa Gazlavay ma vëldatara nga kedey.

⁷ Ndëhay a tabiya a key kuraw a ray a cew.

⁸ Kiya maakar, Pawl fa daw fa daw aa *way-mewuzey-mey nga Gazlavay. Fetede, aa guzltar a ndëhay ta mandërzay daa dey ba da ray mewey nga Gazlavay da ray ndëhay. A kam yawa ta Jëwif hay a, aa guzltar meye mekele mekele amba a tëbmara meye da ray Yesu.

⁹ Ama ndëhay siya hay da wuzlah ata a gëmam nga tëbmara meye a ba. Aa guzlam meye maaya ba da ray cëved nga Bay Mahura fa meye nga ndëhay tabiya fetede. Da ray ngene, Pawl, mbak! a mbëkdata, ta', a ngëlta ndëhay masa nga Yesu, a diyam bama. Anda kefe, mandaw mandaw Pawl fa daw nga wuzey meye a ndëhay daa lekewel nga ndaw daha mezëley Tiranus.

¹⁰ Aa fa ka këne haa kasl mevey cew. Maja ngene, ndëhay daa hwayak nga Azi tabiya, kwa Jëwif hay, kwa ndëhay masa Jëwif hay ba, ta hëtam nga cëney meye nga Bay Mahura Yesu la.

Mey da ray bëza hay nga Seva

¹¹ Gazlavay fa key maazla hay mekele mekele ma rëzley ndaw ta fa Pawl.

¹² Daa ngene, ndëhay a lamatërwa zana nga slëra nga Pawl ta zana anga hay mekele mekele masa ma gësam la fa vaw anga, a handamara fa masa-macay hay. Anda kefe, ndaw masa macay ma gësey ta anga na, a mbëley. Ndaw masa ta malula da ray ma gësey ta anga may, malula ha a bey.

¹³ Daa ðar hay a ngene, *Jëwif hay daha, fa pëkam nga bëley malula da ray ndëhay. A jadamara nga bëley malula da ray ndëhay ta mezëley nga Bay Mahura Yesu. Anda kefe, a lëvmar a malula: «Ala fa lëvmaka ta mezëley nga Yesu, masa Pawl ma wuzda meye da ray a, bey da ray ndaw kefe.»

¹⁴ Bëza hay maasala nga ndaw daha mezëley Seva, ata fa kamara këne may. Seva na, ara ndaw da wuzlah *bay-ray hay nga ndëhay ma ka kwakwas nga Gazlavay.

¹⁵ Ama pas pal daha na, malula a mbëfdatara, a lëvtar: «Yesu na, ya sëra. Pawl may, ya sëra meye da ray a. Kaa akwar na, wa hay wa?»

¹⁶ Ndaw masa ta malula kaa heyey na, ta', a hway a ray ata. A fënta tabiya ta gëdan, a këfda, a katar mbëlek fa vaw, a ngërtara zana fa vaw, haa bëza hay a, a bamawa da way anga, a hwam ta vaw ba' këne.

17 Masa Jëwif hay, ta ndëhay Jëwif hay ba hay daa berney nga Efez e ma cëndamara mey a la na, ata cëpa, mandërzay a katar, a hëlmamara Bay Mahura Yesu ma fëna ma fëna.

18 Ndëhay ga masa ma tëbmara mey nga Yesu a diyam, a wuzdamara cek hay maaya ba hay masa ata ma kamara zleezle fa mey nga ndëhay tabiya, a kam ambahw maja.

19 Ndëhay ga masa ma kam slalak nga nësey ndëhay na, a handamatërwa dërewel ata hay masa ta mey hay ma nësey ndëhay mawuzlalakaya da hwad a na, aa kërmata ta awaw fa mey nga ndëhay tabiya. Dala nga dërewel hay a tabiya na, ga kalah *.

20 Anda kedë, ta fa gëdanj nga Bay Gazlavay, ndëhay ga a cëndamara mey nga Bay Mahura Yesu. Ndëhay ma tëbmara mey a, fa sëkmawa a dey a, a dey a.

Ndëhay a yam mey da Efez

21 Fa dëba nga cek hay a kedë ma kam la na, Pawl a wulkey maaya na, a daw a *Jeruzelem. A wudëy a daw aa hwayak nga Masadëwan ta aa hwayak nga Akay dëgay, wara a daw a Jeruzelem e. A lëvey: «Da yah ma wusey la a Jeruzelem na, si ya daw aa berney nga *Rawm may.»

22 Ta', a slërey ndëhay cew ma jënmara aa hwayak nga Masadëwan. Ndëhay a, ara ata Timawte ta Eraste. Ama Pawl na, a njeý daa hwayak nga Azi dëf nekëdëy.

23 Daa dëf hay a ngene, ndëhay a yam mey ga da Efez da ray cëved nga Bay Mahura Yesu.

24 Ndaw daa berney a daha, mezëley Demetëriyus. A vëdëy cek hay mecëhe mecëhe nga bërey ma hëdkey ba, masa ma nëkam anda way-mekey-kwakwas nga kuley mezëley Artemis †. Anja ta ndëhay ma ka slëra ha fa hëtam dala ga ta slëra ha ngene.

25 Demetëriyus ta', a zëltërwa gula anja hay ta ndëhay ma ka slëra hay anda anja, a lëvtar: «Akwar ndëhay kedë, ka sërmara slëra alëkwa kedë fa handandakwar zleley ga.

26 Ama akwar ta ray akwar fa cëndamara, akwar fa hëtmara cek masa ndaw mezëley Pawl ma ka. A lëvtar a ndëhay na, "Kuley masa ndëhay ma kamara ta har na, ara cek ma jëney ndaw ba." Maja ngene, ndëhay ga da Efez kedë ta mbëfdamara mewulkey ata sem, a tëbmara mey

19:17 19.17 5.11 * 19:19 19.19 dala ga kalah: Ndëhay a wulkam a key dala nga slëra daa mevey pal nga ndëhay temere ta kwakwar maakwaw. 19:20 19.20 2.41 19:21 19.21 23.11; Rm 1.10, 13 19:23 19.23 9.2; 2Kwr 1.8 † 19:24 19.24 Artemis: Ara kuley masa ndëhay ma ragadamar daa hwayak nga Azi ta daa hwayak nga Akay zleezle. A wulkam ara kuley mangusa. Way-mekey-kwakwas nga Artemis masa daa berney nga Efez e ara way mahura membey masa ma rëzlta ndëhay da bëla zleezle. 19:24 19.24 16.16

anğa. Ma tëbmara mey anğa na, ara ndëhay daa berney keđe daada ba, ama kwa ndëhay ga daa hwayak nga Azi tabiya.

²⁷ Da cek aha fa key anda keđe na, ndëhay a da rësmara slëra alëkwa ha. A da rësam slëra alëkwa daada ba, ama ndëhay a da mbëkdamara meregedey daa way-mekey-kwakwas nga kuley Artemis may. Fara fara kuley Artemis na, ara kuley mahura masa ndëhay daa wura daa wura daa hwayak nga Azi ta da bëla tabiya ma ragadamar. Ama da ndëhay ta tëbmara mey nga Pawl keđe la na, kuley a, fa da zëldamara slëmay daa saba.»

²⁸ Masa ndëhay ma cëndamara mey masa Demetëriyus ma kada anda keđe la na, mevel a catar ga. A wudam, a lëvam: «Artemis, kuley nga ndëhay Efez hay na, ara kuley mahura!»

²⁹ Mewudey a, a cëney fa ndëhay mekele mekele daa berney a na, ta', lenğesl ata a mbëdey. Ndëhay a đadãmata ata Gayus ta Aristarke, ndëhay daa hwayak nga Masadëwan masa ma lëgdamara Pawl, a hwam tabiya ngada bërakw.

³⁰ Pawl a wudëy nga daw fa ndëhay a, ama ndëhay ma tëbmara mey nga Yesu a tëkmara.

³¹ Ndëhay da wuzlah mahura hay ma wamara hwayak nga Azi na, ara jam hay nga Pawl. A slërmawa ndëhay fa vëda, a lëvmar a da daw a bërakw a ba.

³² Ndëhay makustakaya tabiya fetede na, ray ata ta hëbey sem, fa yam mey saw këne. Ndëhay siya a wudam, a lëvam mey pal, siya hay a wudam, a lëvam mey mekele. Ama harğëdan nga ndëhay da wuzlah ata na, a sërmara a kusam maja me ba.

³³ Ndaw *Jëwif daha, mezëley Alekzandëre. Jëwif hay mekele a walamara da wuzlah ndëhay Jëwif hay siya, a lacadamara fa mey nga ndëhay makustakaya amba a wuzdatara mey a maaya maaya. Alekzandëre a banğadã har ngaa guzley, a wudëy a wuztar mey a ndëhay makustakaya ha.

³⁴ Ama masa ata ma sërmara anğa ndaw Jëwif na, a zlamar ma wudam ta đay pal, a lëvam: «Artemis, kuley nga ndëhay Efez hay na, ara kuley mahura!» Haa ler cew, ata fa wudam anda keđe.

³⁵ Sekëreter mahura † daa berney a, a tëkta nga yey mey, ta', a njam teete. Sekëreter e a lëvtar: «Akwar ndëhay da Efez, ndëhay tabiya a sërmara anğwa nga kuley nga

19:26 19.26 17.29 **19:29 19.29** Aristarke: 20.4; 27.2; Kwa 4.10 † **19:35 19.35** Sekëreter mahura: ara ndaw mahura daa berney, ndaw ma handa mey nga ngwamna nga Rawm a ndëhay mahura hay daa berney a. Anğa ndaw da wuzlah ndëhay ma wamara berney a.

Artemis na, a kəzlwa da gazlavay da vad. Asaya, a sərmara ara ndëhay daa berney nga Efez ma jədmara way-mekey-kwakwas nga kuley mahura ha ta anğwa nga kuley a.

³⁶ Ndaw ma da rəsa mey keđe na, daa ba. Da ray nğene, si ka njam teete, ka wulkam maaya maaya đagay.

³⁷ Ka handamatərwa ndëhay a keđe na, maja me? Ta lalamawa cek daa way a la daw? Ta cədmara kuley a la daw?

³⁸ Dar hay daha mapakaya nga key sariya. Ndëhay ma ka sariya hay daha. Da Demetəriyus ta ndëhay anğa hay a wudam nga wudey ndëhay na, nğama a diyam a đəslmara sariya ha fa ata.

³⁹ Da ka wudam nga điyey mey mekele ma fəna keđe saya na, si ka handamara mey a fa mecəmey-ray mahura nğana nğwamna nga nəka mey a.

⁴⁰ Ama da ray cek ma key tasana keđe na, a gwamara nga pamandakwar mebərey, a da ləvam aləkwa fa wudkwa nga nəsey mewey nga *bay-ray hay daa berney a. Maja da mahura hay aa cəfdamandakwar da ray mekusey a keđe na, aləkwa fa da gwakwa nga mbəđdamatakwar daa ba.»

⁴¹ Fa dəba ha masa sekəreter heyey maa guzltar la anda keđe na, ta', a ləvtar a ndëhay makustakaya heyey nga diyam.

20

Pawl a pəkey da Masadəwan leŋ daa hwayak nga Gərek

¹ Fa dəba ha masa baazlam da Efez heyey ta ndəvey cay na, Pawl, ta', a kusta ndëhay ma təba mey nga Yesu fetede. Aa guzltar mey mekele mekele nga vəltar gədan. Cay, a catar har a ndëhay a, a mbəđtar mey, a wunkam, ta', a daw aa hwayak nga Masadəwan.

² Masa anğa fa pəkey daa hwayak a na, a vəltar gədan a ndëhay ma təba mey nga Yesu fetede ta mey hay mekele mekele ga. Fa dəba ha, a wusey aa hwayak nga Gərek hay *

³ A njeý daa hwayak a kiya maakar. Masa fa da ndəkwey aa kwambiwal nga daw aa hwayak nga Siri na, a cənda *Jəwif hay ta cəmdamara đay ata cay amba a kədmara vagay. Da ray nğene, a wulkey maaya na, a vəhey, a daw a Siri taa cəved ma daw a Masadəwan.

⁴ Pawl a diyam na, ta ata Sawpater, bəzey nga Pirus daa berney nga Bere, Aristarke ta Sekundus ndëhay daa berney

nga Tesalawnik, Gayus ndaw daa berney nga Derbe, len Timawte, Tisik ta Tërawfim ndëhay daa hwayak nga Azi.

⁵ Ndëhay a kefe na, a diyam teesed fa mey ala †, a sækwmandar da Tërwas.

⁶ Fa dëba nga Gwagway nga pen manjar cek ma hësla da hwað a, ala na, ya slëkdam daa berney nga Fëlepi, ya ndëkwam aa kwambiwal, ya diyam a Tërwas. Dar zlam fa dëba ha na, ya wusam a Tërwas a, ya hëtfamatar fetede. Ya njam luma pal.

Pawl a vëhwa fa ndëhay da Tërwas

⁷ Ta pas luma nga Dëram taa kwad, ya kusam nga zëmey daf nga sërfedey memëcey nga Yesu. Pawl ta', aa guzlar a ndëhay makustakaya. Annga faa guzley, faa guzley, kasl wuzlah-tavad, maja slam ta wurey la na, a da daw aa slam mekele.

⁸ Daa way da ray way masa ala makustakaya da hwað a, petërta hay daha ga daa way a.

⁹ Bëz-gula daha mezëley Yutik manjakaya daa feneeter nga way masa ala makustakaya da hwað a ha. Pawl fa wuzey mey, fa wuzey mey, gula kaa heyey a gërey nga menjey. Dar a kar, ta', a ney aa dar. Masa aa daa dar na, ta', a tëdwa da ray way masa nga maakar a da vad a hwayak. Ndëhay a slëkdamara, ama ta mëcey sem.

¹⁰ Pawl, ta', a bërngawa, a daw a ray bëz-gula ha, a ney a ray a, humbat! a humbta, a lëvtar a ndëhay: «Ka tëwam ba, aa ta dey.»

¹¹ Ta', Pawl a vëhey aa way da ray way heyey, a wuna pen, a zëmamara daa slam a. Aa guzley haa slam ma wurey. Fa dëba ha, ta', a daw.

¹² Bëz-gula heyey na, annga maaya maaya ta mbëley cay. Ndëhay a ngëlmara, a diyam a way. Masa ata ma hëtmär bëz-gula heyey ma mbëley cay na, mevel ata a dëkey, kwa ara mey ba.

Pawl a daw da Tërwas aa berney nga Mile

¹³ Pawl a wudëy nga daw a Asaws ta salay dëgay. Da ray ngene, a lëvndar nga daw ta kwambiwal fa mey a Asaws. Ta', ya diyam, ya sækwmarä daa Asaws a amba ya diyam bama.

¹⁴ Masa annga ma hëtfandar la da Asaws na, a ndëkwey aa kwambiwal may, ta', ya diyam aa berney nga Mitilen.

¹⁵ Ya slëkdam fetede, ta kwambiwal. Pepërek e, ya wusam aa kwakway nga hwayak da wuzlah bëlay mezëley

Kiyaw. Pepërek e mekele, ya tənḡdamara bəlay, ya diyam aa hwayak da wuzlah bəlay mekele mezəley Samaws. Pepërek e mekele saya na, ya wusam aa berney nga Mile.

¹⁶ Ya diyam a Mile, ya mbəkdamara berney nga Efez na, maja Pawl fa wuḡey nga njeý daa hwayak nga Azi ga daa ba. Anḡa fa wusey vaw nga daw aa berney nga *Jeruzelem, amba wuskwaa ḡar nga gwagway nga *Pantekwat a da wuswa na, anḡa ta wusey cay.

Pawl aa guzltar a bay-ray hay nga ndëhay nga Yesu da Efez

¹⁷ Masa Pawl aa daa berney nga Mile na, ta', a slërwa a Efez nga zəley *bay-ray hay daa *mecəmey-ray nga ndëhay nga Yesu fetede.

¹⁸ Masa bay-ray hay a ma wusam la a cakay a, a Mile na, Pawl a ləvtar: «Dəga yah ma sawa fa akwar nḡeeme aa hwayak nga Azi keḡe na, ka sərmara menjeý aḡaw da wuzlah akwar mandaw mandaw na, anḡa kwara.

¹⁹ Ya kar slëra a Bay Mahura na, ta meney ray, ta matəway daa dey, asaya, ya ta sərey banay la ga maja *Jəwif hay fa səpam cəved nga kəḡmaya vagay.

²⁰ Ka sərmara kwa ya ta bəy cek fa akwar masa ma jənkwar na, daa ba səlak. Ya fa wuzdakwara mey nga Gazlavay, ya faa sərkadakwara kwa daa papalah, kwa da way akwar hay.

²¹ Ya faa guzltar a Jəwif hay ta a ndëhay masa Jəwif hay ba hay, amba a mbəḡdamara menjeý ata, a mbəḡam dey fa Gazlavay, a səpmara ta mevel pal, a pamara Bay aləkwa Mahura Yesu nga ndaw ata fara fara.

²² Wure keḡe, ya fa daw a *Jeruzelem maja *Mesəfney nga Gazlavay ma təkya ḡay nga daw, ama ya səra cek ma da hətfaya fetede ba.

²³ Cek masa yah ma sərey na, kwa daa berney wura wura Mesəfney nga Gazlavay fa wuzdiwa, a sərdamaya banay la, a kəzlamaya la aa fərsəne.

²⁴ Ama kwa ya məcey, kwa yah ta dey, nḡada yah na, a mbafaya gway. Cek mahura nḡada yah na, ara nga ndəvey slëra masa Bay Mahura Yesu ma vəldiwa a har aḡaw nga key. Slëra ha, ara mewuzey *Mey-maaya-mawiya da ray maaya nga Gazlavay.

²⁵ «Ya ta pəkəy la da wuzlah akwar tabiya, ya ta wuzkwar mey la da ray mewey nga Gazlavay da ray ndëhay. Ama

wure keđe, ya sëra kwa ndaw pal dasi akwar fa da hëtya daa saba.

²⁶ Da ray ñgene, ya fa lëvkwar dëga tasana, da ndaw dasi akwar taa zëđey la na, mey adaw da hwad a daa ba,

²⁷ maja ya ta wuzdakwara mey hay tabiya la da ray cek masa Gazlavay ma wuđey nga ka. Kwa ya ta ßey mey fa akwar daa ba.

²⁸ Ya fa lëvkwar, wam vaw fa ray akwar, jëđmata ndëhay tabiya masa Mesëfney nga Gazlavay ma vëldakwara asi har akwar anda mecëkwer ma jëđta tëbanj anja hay. Kam mecëkwer nga ndëhay daa mecëmey-ray nga ndëhay nga Gazlavay. Ata na, Gazlavay a pata wal ñgada anja ta fa memëcey nga Bëzey anja.

²⁹ Ya sëra, pas masa ya ta daw sem na, ndëhay a mbëzmawa la a wuzlah akwar anda wagalak hay ma diyam a wuzlah tëbanj hay. A da nësmata ndëhay daa mecëmey-ray nga ndëhay nga Yesu.

³⁰ Kwa ndëhay da wuzlah akwar may, a mbëzlam la, amba a tëknamata ndëhay ma tëba mey nga Yesu nga diyam asi ata.

³¹ Anda keđe, wam vaw fa ray akwar. Sërfadamara, mevey maakar yah da wuzlah akwar, taa vad, taa pas, ya ta këtckwar la pal pal tabiya akwar, haa ya tëway maja akwar.

³² «Wure keđe, ya fa vëldakwar a har Gazlavay, ya këtckwar nga sërfedey mey da ray maaya nga Gazlavay. Anja na, a gwa a vëlkwar gëdanj nga tëbey mey nga Yesu ma fëna ma fëna, a gwa a vëlkwar cek hay maaya masa anja ma ßadatara a ndëhay anja hay tabiya.

³³ Dey ta kaya fa dala akwar, ta zleley akwar daa ba. Dey ta kaya kwa fa zana nga ndaw pal daa ba.

³⁴ Akwar ta ray akwar ka sërmara ya ta key slëra la ta har adaw, amba ya hëtey dala nga hëdkey cek mezëmey ñgada yah ta ñgada ndëhay ma lëgdamaya.

³⁵ Anda keđe, yah ma wuzdakwara la, si ka kam slëra amba ka jënmata ndëhay masa-viya hay. Sërfadamara mey nga Bay Mahura Yesu maa guzley ta mey anja, ma lëvey heyey: “Ndaw ma vëley cek, aa ta meesëmey a fëna ndaw ma tëba cek aha.”»

³⁶ Masa Pawl ma ndëvda meeguzley la na, ndëhay tabiya a ragadam. Pawl ta', a dërey dangay a Gazlavay ta ndëhay a daa slam a.

³⁷ Fa dëba ha, ndëhay tabiya a tëwam, cacam! a cacëmamara fa dadak, a camar har nga daw ta zazay.

³⁸ A tëwam ga na, maja annga ma lëvtar: «Akwar fa da hëtmaya daa saba.» Ta', a lëgdamara kasl aa slam metëpey kwambiwal.

21

Pawl a daw aa berney nga Jeruzelem

¹ Masa ala ma mbëkdamatërwa *bay-ray hay da Efez heyey cay na, ta', ya diyam ta kwambiwal cer aa hwayak da wuzlah bëlay mezëley Kwas. Pëpërek e, ya diyam ya wusam aa hwayak da wuzlah bëlay mekele mezëley Rawdes. Da fetedë, ta', ya diyam ta kwambiwal aa berney nga Patara.

² Da Patara ha, ya hëtam kwambiwal mekele ma daw aa hwayak nga Fenisi, ta', ya ndëkwam a hwad a, ya diyam.

³ Masa ala da wuzlah bëlay na, ya hëtmar hwayak nga Sipëre ta har-gula, ama ya diyam na, ngadaa hwayak nga Siri. Ta', kwambiwal a lecey da Tir daa hwayak nga Siri heyey, amba a padamata salay ta cek hay da hwad a.

⁴ Daa ngene ya pam salay, ya diyam, ya hëtfam ndëhay ma tëba mey nga Yesu fetedë. Ta', ya njam bama ta ata luma pal. *Mesëfney nga Gazlavay a wuztar cek ma da kar a Pawl da *Jeruzelem. Da ray ngene, ndëhay a, a lëvmar a Pawl na, a da daw a Jeruzelem e ba.

⁵ Ama masa ala ma kam luma pal la ta ata na, ta', ya slëkdam, ya diyam a pëkey. Ata tabiya ta ngwas ata hay, ta bëz ata hay, a lëgdamandërwa daa berney a haa a palah. Ya wusam a mey-bëlay na, ta', ya ragadam, ya dëram danggay a Gazlavay.

⁶ Masa ala ma dëram danggay cay na, ta', ya cam har pal pal da wuzlah ala tabiya, ya ndëkwam aa kwambiwal. Ata may, ta', a vëham a way ata hay.

⁷ Ya diyam ta kwambiwal da Tir aa berney nga Pëtawlemayis. Fetedë, ya pam salay. Ya camatar har a mëlma ala hay daa mey nga Yesu, ya njam dar pal bama.

⁸ Pëpërek e, ta', ya diyam, ya wusam aa berney nga Sezere. Fetedë, ndaw ma wuzey mey da ray Yesu daha mezëley *Fëlep. Annga na, ara ndaw pal da wuzlah *ndëhay maasala * masa ata ma walamata da Jeruzelem heyey. Ya diyam, ya njam da way annga.

⁹ Dam anğa hay mëfad, ta diyam a way zel daa ba aran, fa wuzam mey masa Gazlavay ma wuzdatara.

¹⁰ Masa ya ta njam cay ðar ga fetede na, *ndaw ma tëla mey daha mezëley Agabus a sawa da *Jude aa berney a.

¹¹ Ta', a wuswa fa ala, leŋ! a la senter nga Pawl, a jëwta salay anğa hay ta har anğa hay, a lëvey: «Ehe, Mesëfney nga Gazlavay a lëvey: “*Jëwif hay daa hwayak nga Jeruzelem a da jëwmara ndaw nga senter keðe anda yah ma jëwa har adaw ta salay adaw keðe, a da vëldamara a har ndëhay Jëwif hay ba hay.”»

¹² Masa ala ma cëndamara mey a keðe la na, ala ta ndëhay nga Yesu daa Sezere he, ya kamar ambahw a Pawl, a da daw a Jeruzelem e ba.

¹³ Ama Pawl a mbëðdandara, a lëvey: «Ka tëwam na, maja me? Ka wuðam ka pamaya mandërzay aa dey daw? Yah na, kwa a jëwmaya, kwa a këðmaya vagay da Jeruzelem e maja Bay Mahura Yesu na, cay.»

¹⁴ Anda keðe, ala ta gwamara nga mbëðdamara mewulkey anğa daa ba. Da ray ŋgene, mbak! ya mbëkdamara nga daw, ya lëvmar: «Bay Mahura Yesu nga key anda aa ma wuðey.»

¹⁵ Ya njam fetede ðar nekëðey saya, ta', ya diyam vaw, ya diyam a Jeruzelem.

¹⁶ Ndëhay ma tëba mey nga Yesu siya da Sezere, ta', a lëgdamandar a way ndaw daha mezëley Mënasanw. Ara ndaw daa hwayak nga Sipëre ma tëba mey nga Yesu dëga zleezle. Ya nam da way anğa fetede.

Pawl a daw a nëkërwa Jak

¹⁷ Masa ala ma wusam la a *Jeruzelem na, mëlman hay daa *mecëmey-ray nga ndëhay nga Yesu a tëbmandar ta meesëmey.

¹⁸ Pepërek e, ala ta ata Pawl, ta', ya diyam a way *Jak. *Bay-ray hay tabiya nga mecëmey-ray nga ndëhay nga Yesu makustakaya fetede.

¹⁹ Pawl, ta', a catar har, a wuzdatara cek hay tabiya maaya maaya, cek hay masa Gazlavay ma kata da wuzlah ndëhay masa *Jëwif hay ba hay ta fa slëra anğa.

²⁰ Ndëhay a ma cëndamara mey a ŋgene na, ta', a hëlmamara Gazlavay. A lëvmar a Pawl: «Mëlma ala, ka sëra da wuzlah ndëhay Jëwif hay na, ndëhay ma tëba mey nga Yesu, a key gabal weewe. Ata tabiya a wuðam mey nga *kwakwas nga Mawiz kalah cënga.

21 Ndëhay a, a cëndamara ka fa wuztar mey a Jëwif hay tabiya masa daa hwayak mekele hay, ka lëvtar nga mbëkdamara kwakwas nga Mawiz. Asaya, ka fa lëvtar a da slamatara mandawal nga bëz ata hay ba, a da sëpam kwakwas nga Jëwif hay saba.

22 Fara fara, kah ma sawa fedë kaa na, a cëndamara la. Ya da kakwa na, kwara?

23 Maaya na, ka ka cek masa ala ma da lëvmaka kedë. Nëka, ndëhay mëfad fedë daha ta mbadëamar la a Gazlavay.

24 Pas masa ata ma da kam kwakwas a Gazlavay nga ndëvey *mëbedëy ata ha na, gweegwe a wuswa. A da kam kwakwas a Gazlavay amba a tëram ndëhay mazlëbtakaya saba, fa dëba ha a hëjmataray ata hay †. Maaya na, ka diyam bama, ka hëdkatar cek hay nga key kwakwas a ta dala akah. Anda kedë, ndëhay tabiya a da sërmara mey hay masa ata ma cëndamara da ray akah na, ara mëbërzley. Asaya, a sërmara kah, ta ray akah, ka fa nar ray a kwakwas nga Mawiz a may.

25 Ngada ndëhay masa Jëwif hay ba hay ma tëba mey nga Yesu na, ala ta diymara mey a cay, ya ta wuzlalamatar leeter la da ray a, ya lëvmatar, a da zëmam aslaw nga kuley ba, a da zëmam mambaz ba, a da zëmam aslaw mëtërdëy ta tërdëy ba, a da lam vaw saw ba.»

26 Masa ata ma lëvmar anda kedë la na, Pawl, ta', a daw ta ndëhay mëfad heyey. Pëpërek e, a kam kwakwas a Gazlavay amba a tëram ndëhay mazlëbtakaya saba. Ata Pawl ta ndëhay mëfad heyey ta', a mbëzam aa *Way-mekey-kwakwas nga Gazlavay. A diyam fa ndëhay ma ka kwakwas nga Gazlavay fetedë, a lëvmatar: «Mëndërey dër maasala amba ya tëram ndëhay masa mazlëbtakaya saba. Masa ala ta tëram ndëhay masa mazlëbtakaya ba cay na, ya vëhmawa la nga vëley cek a Gazlavay.»

A kërzamara Pawl daa Way-mekey-kwakwas nga Gazlavay

27 Mamba dër maasala heyey a ndëvey, *Jëwif hay mekele ma samawa daa hwayak nga Azi a hëtmar Pawl daa *Way-mekey-kwakwas nga Gazlavay. A hëldamata ndëhay tabiya fetedë nga kërzamara Pawl, ta', a kërzamara.

28 A wudam, a lëvam: «Ndëhay *Israyel hay, jënmandar! Ehe, ndaw masa maa sërkadata ndëhay kwa daa wura daa wura ta mey maaya ba da ray ndëhay Israyel hay lej da ray *kwakwas nga Mawiz, asaya, da ray Way-mekey-kwakwas

nga Gazlavay heyey na, a keđe. Wure keđe kwa ndëhay masa Jëwif hay ba hay na, ta ngëltërwa sem aa Way-mekey-kwakwas nga Gazlavay amba a zlebmara way a!»

²⁹ A lëvam anda keđe maja ata ma hëtmatar ata Pawl ta Tërawfim, ndaw Efez, daa berney nga *Jeruzelem. A wulkam Pawl ta mbëzda la aa Way-mekey-kwakwas nga Gazlavay.

³⁰ Mey a keđe a cëney fa ndëhay tabiya da Jeruzelem na, a hwamawa da slala hay mekele mekele, a kusam aa way a. A kërzamara Pawl, a badamërwa aa ambaw. Ta', a gërcamata mey-slam hay nga Way-mekey-kwakwas a fiyaw fiyaw.

³¹ Masa ata fa da këdmara vagay na, *bay-ray nga sewje hay nga *Rawm a cënda ndëhay da Jeruzelem tabiya fa yam mey.

³² Wure wure ngene, a hëlwa sewje hay ta sewje mahura hay da ray sewje hay a, a hwamawa fa ndëhay makustakaya heyey. Masa ndëhay makustakaya ha ma hëtmatar la na, ta', a mbëkdamara Pawl, a këdmara saba.

³³ *Bay-ray nga sewje hay heyey, ta', a daw fa Pawl, a kërza, a lëvtar a sewje hay nga jëwmara ta calalaw cew. Ta', aa cëfdata ndëhay makustakaya, a lëvey: «Ara na, wa? A key na, me?»

³⁴ Ndëhay tabiya a lëvam mey wal wal. Bay a ta cënda mey a maaya maaya daa ba, maja ndëhay fa yam mey kalah. Da ray ngene, a lëvtar a sewje anga hay nga handamara Pawl aa way nga sewje hay.

³⁵ Masa ata ma wusam la fa slam metëpey nga mbëzey ngada way a na, sewje hay a lamara ta ley, maja ndëhay fa kam hëma a ray a.

³⁶ Ndëhay ga fa diyam asiya, fa wudam, a lëvam: «Këdmara vagay! Këdmara vagay!»

Pawl a kada mabara nga mey anga

³⁷ Masa ata fa da mbëzdamara Pawl aa way nga sewje hay heyey na, Pawl a lëvar a *bay-ray nga sewje hay a: «Ka vëlya cëved ngaa guzka la daw?» *Bay-ray nga sewje hay heyey aa cëfda, a lëvar: «Ka sëra meeguzley mey Gërek daw?»

³⁸ Kah na, ndaw *Ejip ma hëldata ndëhay nga këdey vaw daa dër hay a keđe ba daw? Ara kah ma handatërwa ndëhay gabal mëfad a wuzlah-ley nga nësa mewey nga *Rawm heyey, ba diya?»

³⁹ Pawl a mbëfdara, a lëvar: «Yah, ndaw *Jëwif. Ya yawa da Tars daa hwayak nga Silisi, berney masa ndëhay ma

zëldamara slëmay. Ambahw, vëlyä cëved, amba yaa guzltar a ndëhay kedë.»

⁴⁰ Bay-ray nga sewje hay heyey, ta', a vëlar cëved. Pawl denj! a lecey aa slam metëpey ngada way heyey, ta', a banqadä har amba ndëhay a sërmara fa wudëy ngaa guzley. Ndëhay a cëpa, a njam teete, ta', aa guzltar ta mey *Hebëre.

22

¹ Pawl a lëvtar: «Waa papay hay, ta mëlma adaw hay Jëwif hay, jëkam slëmay fa mey adaw masa yah ma da lëvkwar wure kedë da ray cek ma key ta yah.»

² Masa ata ma cëndamara anqä faa guzley ta mey ata Hebëre na, a njam teete ma fëna, ma fëna, a jëkam slëmay. Ta', Pawl a lëvtar dëba:

³ «Yah na, ndaw Jëwif, ya yawa da Tars daa hwayak nga Silisi. Ama ya göley da *Jeruzelem fedë, ya ta jengëy la fa Gamaliyel, ndaw maa sërkadaya ta cëved e da ray kwakwas nga papanj nga papa alëkwa hay. Yah ndaw ma key slëra ngada Gazlavay ta mevel adaw cëpa anda akwar tasana kedë may.

⁴ Ya ta sërdata banay la ga ta ndëhay ma sëpa cëved nga Yesu haa ndëhay a, a mëcam. Ya ta kërzey zel hay lenj ngusay la, ya ndëkwdata aa fërsëne.

⁵ *Ndaw mahura da ray ndëhay ma ka kwakwas nga Gazlavay ta mahura hay nga Jëwif hay tabiya a sërmara mey masa yah ma kada na, ara mey fara fara. Ta vëlmaya leeter hay masa ata ma wuzlalamatara a mëlmanj hay Jëwif hay daa berney nga Damas la a har. Leeter hay a, a vëlmaya cëved nga daw a Damas a nga kërzawa ndëhay ma sëpam cëved nga Yesu, amba ya jëwtërwa, ya handatërwa a Jeruzelem, amba mahura hay a kamatar sariya nga sërdamata banay.»

Pawl a kada mey da ray pas masa anqä ma tëba Yesu (SNM 9.1-19; 26.12-18)

⁶ «Mamba wuzlah-pas, ya fa daw daa cëved. Gweegwe ya wusey aa berney nga Damas na, wure wure ngene, slam a wadawa përay! da gazlavay da vad a ray adaw.

⁷ Ya tädëy a hwayak, ya cënda dëy ma lëvyä: “*Sawl, Sawl, ka sërdaya banay anda kedë na, maja me?”

⁸ Ya mbëddara, ya lëvey: “Bay Mahura, kah na wa?” A mbëddiwa, a lëvyä: “Ara yah, Yesu, ndaw *Nezeret, masa kah ma sërda banay.”

⁹ Ndëhay masa dasi adaw na, ta hëtmär slam-mewedey a la, ama ta cëndamara dëy masa maa guzlya na, daa ba.

¹⁰ Ta', ya cacëfdä, ya lëvar: "Bay Mahura, kaa ya da key na, kwara?" A mbëdfdiwa, a lëvya: "Slëkdëy, daw aa berney nga Damas. Fetedë, a da wuzdamakawa cek hay tabiya masa Gazlavay ma walaka nga kata."

¹¹ Slam-mewedey kaa heyey ta wulfayawa dey sem, ndëhay dasi adaw heyey, ta', a dädämaya fa har, a handamaya aa berney nga Damas a.

¹² «Daa berney a ñgene, ndaw mezöley *Ananiyas daha, aa fa sëpa cëved ñga Gazlavay ta mevel pal, fa sëpa *kwakwas nga Mawiz ta cëved e, *Jëwif hay daa berney nga Damas a tabiya faa hëmdamara.

¹³ A sawa a hëtfaya, a lecey a cakay adaw, a lëvya: "Sawl, mëlma adaw, dey akah nga wurey aa slam a." Wure wure ñgene, dey adaw ta', a wurey aa slam a, ya hëtar Ananiyas a maaya maaya.

¹⁴ Ananiyas ta', a lëvya: "Gazlavay masa papañ nga papa alëkwa hay ma ragadamar ta walaka la, amba ka sëra slëra masa aña ma wudëy ka kara, amba ka hëtar ndaw pal ma key cek ta cëved e ta dey akah, asaya, amba ka cënda dëy aña.

¹⁵ Maja ñgene, ka da key sede da ray ndaw aha, ka da wuztar mey a ndëhay tabiya da ray cek masa kah ma hëtar ta da ray cek masa kah ma cënda.

¹⁶ Kaa wure kedë ka sëkwey na, me? Slëkdëy, hëtey *baptem, cacëfdä Bay Mahura nga jënka, amba Gazlavay a mbëkdakawa mebërey akah."»

Mey da ray Gazlavay ma slërda Pawl fa ndëhay Jëwif hay ba hay

¹⁷ Pawl a lëvey saya: «Fa dëba ha ya vëhwa a *Jeruzelem. Pas pal daha, ya fa dërey dangay daa *Way-mekey-kwakwas nga Gazlavay na, Gazlavay a wuzya cek,

¹⁸ ya hëtar Bay Mahura. Ta', a lëvya: "Wusey vaw, bey fiyaw da Jeruzelem kedë, maja ndëhay daa berney a kedë fa da tëbmara mey masa kah ma da kada da ray adaw na, daa ba."

¹⁹ Ya mbëfdä, ya lëvar: "Bay Mahura, ata na, a sërmara fara fara, ya ta daw la aa *way-mewuzey-mey nga Gazlavay mekele mekele, ya kërzawa ndëhay ma tëba mey akah hay, ya kädta, ya këzlata aa fërsëne.

²⁰ Etiyen, ndaw ma key sede da ray akah na, ta pas masa ata ma këdmara vagay na, yah ta ray adaw, yah daha

fetede. Masa ata ma kədmara vagay la na, ta mbafaya la. Yah ma jədtara jəbe hay n̄ga ndəhay ma kədmara ha.”

²¹ Ama Bay Mahura a ləvya cəŋga: “Daw, ya slərdaka dərəŋ fa ndəhay masa *Jəwif hay ba hay.”»

Pawl fa mey n̄ga bay-ray n̄ga sewje hay n̄ga Rawm

²² Ndəhay makustakaya heyey fa jəkam sləmay fa Pawl haa kasl fa mey aŋga madagway-dakw, ma ləvey: «Daw, ya slərdaka dərəŋ fa ndəhay masa *Jəwif hay ba hay.» Masa ata ma cəndamara mey a la na, ta', a wudam, a ləvam: «Lamara ndaw kefe, kədmara vagay! Ka da mbəkdamara n̄ga njeŋ ta dey ba!»

²³ A wudam ta gədan, aa zakadamata zana ata hay a vad, a həlam hwiŋyak a vad.

²⁴ *Bay-ray n̄ga sewje hay heyey a ləvtar a ndəhay aŋga hay n̄ga handamara aa way n̄ga sewje hay heyey. A ləvtar n̄ga slədmara ta laway amba a wuzdərwa ndəhay makustakaya a wudam a ray a na, maja me.

²⁵ Ama masa ata ma jəwmara cay n̄ga slədeŋ na, Pawl a ləvar a mahura n̄ga sewje hay masa da cakay a: «Akwar ta cəved n̄ga slədeŋ ndaw Rawma masa sariya manjar n̄ga key aran daw?»

²⁶ Masa mahura n̄ga sewje hay ma cənda mey a kefe la na, ta', a daw fa *bay-ray ata heyey, aa cəfda, a ləvar: «Ka wudeŋ n̄ga kar a ndaw kefe na, me? Ndaw aha ara ndaw Rawma.»

²⁷ Bay-ray n̄ga sewje hay heyey, ta', a daw fa Pawl, aa cəfda, a ləvar: «Kadiwa, kah na, ndaw Rawma daw?» Pawl a mbəddara, a ləvar: «Ahaw.»

²⁸ Bay-ray n̄ga sewje hay heyey a ləvar: «Yah ma da tərey n̄ga ndaw Rawma kefe na, ya ta vəley dala la ga.» Pawl a mbəddara, a ləvar: «Ama yah na, ndaw Rawma dəga n̄ga mayawa adaw maja papay ndaw Rawma.»

²⁹ Ndəhay ma da slədmara n̄gaa guzley heyey, a cəndamara aŋga ma ləvey anda kefe na, a n̄gəcham la da cakay a. Masa bay-ray n̄ga sewje hay kaa heyey ma cənda Pawl aŋga ndaw Rawma na, a zlureŋ maja aŋga ma jəwa ta calalaw*.

Pawl fa mey n̄ga ndəhay mahura hay ma sla yawa n̄ga Jəwif hay

³⁰ *Bay-ray n̄ga sewje hay heyey, a wudeŋ a səra fara fara *Jəwif hay a wudmara Pawl na, maja me. Da ray n̄gene, pepərek e, ta', a pəska Pawl, a ləvtar a *bay-ray hay n̄ga

22:20 22.20 7.58; 8.1 22:21 22.21 9.15 22:22 22.22 21.36 22:25 22.25 16.37 * 22:29 22.29 N̄ga sərdeŋ banay ta ndaw Rawma manjar sariya n̄ga key na, mewey n̄ga Rawm a vəley cəved ba.

ndëhay ma ka kwakwas nga Gazlavay lej a ndëhay mahura hay ma sla yawa nga Jëwif hay tabiya nga kusam. Ta', a handërwa Pawl, a lacada fa mey ata.

23

¹ Pawl ta', a nekfata ndëhay mahura hay ma sla yawa makustakaya kaa heyey, a lëvtar: «Mëlma adaw hay, yah na, ya sëra daa mevel adaw slëra masa yah ma ka ngada Gazlavay haa kasl tasana na, annga maaya.»

² *Ndaw mahura da ray ndëhay ma ka kwakwas nga Gazlavay fetede daha mezëley *Ananiyas. A lëvtar a ndëhay malacatakaya da cakay Pawl a nga slëngmar maarawa.

³ Ta', Pawl a lëvar: «Gazlavay a këdka la, kah ndaw masa ta neneh cew! Kah manjakaya nga kaya sariya anda mey nga *kwakwas nga Mawiz ma lëvey, ama ka fa sëpa kwakwas a daa ba maja ka fa lëvtar a ndëhay nga këdmaya anda kede.»

⁴ Ndëhay da cakay a, a lëvmar: «Haya! Ka cëda *ndaw mahura da ray ndëhay ma ka kwakwas nga Gazlavay na, kwara?»

⁵ Pawl a mbëddata, a lëvtar: «Mëlma adaw hay, yah na, ya sëra ara ndaw mahura ba. Mawuzlalakaya daa dërewel nga Gazlavay, a lëvey: “Ka daa guzley mey maaya ba da ray bay nga ndëhay akah hay ba.”»

⁶ Pawl a sëra da wuzlah ndëhay mahura hay ma sla yawa makustakaya ha na, *Saduse hay daha, *Fariza hay daha. Maja ngene, aa guzley ta gëdanj fa mey ata, a lëvey: «Mëlma adaw hay, yah ndaw Fariza, bëzey nga ndaw Fariza. A kamaya sariya kede na, maja ya fa sëkwa maslëkdawa nga ndëhay daa memëcey.»

⁷ Annga ma lëvey la anda kede na, Fariza hay ta Saduse hay a, a zlamar mekey yawa, ndëhay makustakaya heyey a wunkam cew.

⁸ Ndëhay Saduse hay a wulkam ndëhay mamëctakaya a slëkdamawa daa memëcey daa ba. Asaya, a lëvam maslanj hay nga Bay Gazlavay da vad daa ba, kwa mesëfney hay wura wura daa ba may. Ama Fariza hay a lëvam cek hay a ngene tabiya na, daha.

⁹ Ndëhay fa kam baazlam ta gëdanj ta gëdanj, ndëhay maa sërkada kwakwas nga Mawiz masa Fariza hay, ta', a slëkdam, a kam mey ta gëdanj, a lëvam: «Ala ta hëtam mebërey fa ndaw kede kwa nekëdfe daa ba. Da maslanj

nga Gazlavay da vad ma sawa maa guzlar kwa, da daa ba, mesəfney kwa.»

¹⁰ Yawa ha fa key ta gëdanj ta gëdanj. Bay-ray nga sewje hay heyey a zlurey, a wulkey Jëwif hay a, a da pəwmara Pawl. Da ray ngene, a ləvtar a sewje anga hay nga diyam, nga ngəlmərwa Pawl la da wuzlah ndëhay a. Ta', a handamara aa way nga sewje hay.

¹¹ Dasi tavad a ngene, Bay Mahura Yesu a wuzar vaw a Pawl, a ləvar: «Ka da zlurey ba! Anda kah ma key sede da ray adaw da *Jeruzelem keđe na, si ka daw ka key sede da ray adaw daa berney nga *Rawm may.»

Jëwif hay a cəmdamara đay ata nga kəđey Pawl vagay

¹² Pepərek e, *Jëwif hay a kusam, a cəmdamara đay ata pal. A mbadəm, a ləvam a zəmam đaf ba, a sam yam ba, si ata ma kəđmara Pawl vagay la đagay.

¹³ Ndëhay a, ata a fəna ndëhay kwakwar məfad.

¹⁴ Ta', a diyam fa *bay-ray hay nga ndëhay ma ka kwakwas nga Gazlavay, ta fa mahura hay nga Jëwif hay, a ləvmatar: «Ala ta mbadəm sem, tasana, ya zəmam đaf ba, ya sam yam ba, si ala ma kəđmara Pawl vagay la.

¹⁵ Wure keđe, akwar ta ndëhay mahura hay ma sla yawa nga Jëwif hay mekele, si ka sləram fa bay-ray nga sewje hay nga *Rawm nga handərwa Pawl fa akwar. Ka ləvmar ka wudəm amba ka cacəfdamara saya, ka nəkmara mey anga maaya maaya. Ama, ala na, ya da lacam aa cəved, amba ya kəđmara vagay daa masa anga ta wuswa fa akwar daa ba aranj.»

¹⁶ Masa ata maa guzlam ngene na, bəzey nga dam-mamanj nga Pawl a ta cənda mey a sem. Ta', a daw a mbəzey aa way nga sewje hay heyey, a kadara mey a, a Pawl.

¹⁷ Pawl, ta', a zəlwa ndaw pal da wuzlah mahura hay da ray sewje hay a, a ləvar: «Handa gula keđe fa bay-ray akwar, a da kadar mey daha.»

¹⁸ Ndaw kaa ta', a handa gula keđe fa bay-ray ata heyey, a wusam, a ləvar: «Pawl, ndaw daa fərsəne heyey a zəlya, a ləvya ya handərwa gula keđe fa akah, mey anga daha nga kadakawa.»

¹⁹ *Bay-ray nga sewje hay kaa, a ngəla gula ha ta cakay. Ta', aa cəfda, a ləvar: «Ka ləvey na, kwara?»

²⁰ Gula kaa a mbəddara, a ləvar: «Jëwif hay ta cəmdamara đay ata cay pal, amba aa cəfdamaka mandaw ka handa Pawl fa ndëhay mahura hay ma sla yawa nga

Jëwif hay. A lëvam a wudam amba aa cëfdamara maaya maaya saya.

²¹ Ama ka da tëba mey ata ba, maja ndëhay a fëna kwakwar mëfad fa jëdmara daa cëved. Ata tabiya ta mbadam sem, a lëvam a zëmam daf ba, a sam yam ba, si ata ma këdmara Pawl la vagay d'agay. Ata ta mbadam sem, a kamara la. A sëkwam kaa na, mey masa kah ma da mbëd'datara.»

²² Da ray ngene, bay-ray nga sewje hay heyey a lëvar a gula ha: «Mey masa kah ma kadiwa kedë na, ka da wuzda kwa a ndaw ba.» Fa dëba ha, ta', a lëvar nga daw.

Bay-ray nga sewje hay a slërda Pawl fa Guverner Fëlekes

²³ Fa dëba ha, *bay-ray nga sewje hay heyey, ta', a zëlwa mahura nga sewje hay cew, a lëvtar: «Kusam sewje hay temere cew, ta sewje hay masa ma diyam ta pëles hay kwakwar maasala, leñ sewje hay masa ta zëwet hay temere cew. Akwar cëpa diyam vaw, nga daw aa berney nga Sezere ta bërey zlam-letek nga tavad.

²⁴ Asaya, sëpam pëles hay ngada Pawl, amba a tëpey, ka handamara ta zazay fa Guverner Fëlekes.»

²⁵ Ta', a wuzleley leeter, a lëvey:

²⁶ «Ara yah Këlawt Liziyas ma wuzlalakawa leeter kedë, ngada akah, bay adaw mahura, Guverner Fëlekes. Ya caka har.

²⁷ Ya wudëy yaa guzka da ray ndaw kedë. *Jëwif hay ma kërzamara, a wudam nga këdmara vagay. Masa yah ma cënda la anga ndaw Rawma na, ta', ya daw ta sewje hay, ya lëhdërwa dasi har ata.

²⁸ Ya wudëy nga sëra a wudmara na, maja me. Anda kedë, ta', ya handa fa ndëhay ata hay mahura ma sla yawa nga Jëwif hay.

²⁹ Ya nëka a wudmara na, da ray mey nga kwakwas ata gway. Aa ta key mebërey tëdë kwa nga këda vagay, kwa nga ndëkwda aa fërsëne na, daa ba.

³⁰ Ama ya cënda na, Jëwif hay ta cëmdamara d'ay ata cay nga këdmara vagay. Ya slërdakawa fiyaw fiyaw kedë na, maja. Ya lëvtar a ndëhay ma wudmara na, nga diyam nga wudmara fa akah.

Kedë ara mey adaw ngada akah.»

³¹ Ta', sewje hay, a ngëlmërwa Pawl anda bay-ray ata ma lëvtar. A handamara dasi tavad a ngene aa berney nga Antipatëris.

³² Pepërek e, sewje hay ma diyam ta salay, ta', a vëhmawa a way, a mbëkdamata sewje hay ta pëles hay nga handamara Pawl a.

³³ A wusam a Sezere heyey. Ta', a vëldamara leeter e a Guverner Fëlekes, Pawl may, a mbëkdamërwa asi har anga.

³⁴ Guverner kaa a jannga leeter e, ta', aa cëfda Pawl, a lëvar: «Kah na, daa hwayak wura?» Pawl a mbëfdara, a lëvar: «Yah, ndaw Silisi.»

³⁵ Daa ngene, Fëlekes a lëvar: «Da ndëhay ma wudmaka ta samawa la na, yaa cëfdaka la da ray mey a.» Ta', a lëvtar a sewje hay nga jëdmara daa way meney mahura nga guverner masa Bay *Herawt ma lëma.

24

Jëwif hay a wudmara Pawl saya da Sezere

¹ Fa dëba ha d'ar zlam, *Ananiyas, *ndaw mahura da ray ndëhay ma ka kwakwas nga Gazlavay, a wusey a Sezere. Mahura hay nga *Jëwif hay mekele mekele, leñ ndaw mezëley Tertulus ma sëra mewey nga Rawma hay a diyam bama ta ata Ananiyas a. A wusam fa mey nga Guverner Fëlekes a, amba a wudmara Pawl.

² Ta', a zëlmërwa Pawl. Masa Pawl ma wuswa a cakay ata la na, Tertulus a zlar nгаа guzlar da ray a, a guverner, a lëvey:

«Waa bay ala mahura Fëlekes, ala manjatakaya ta zazay fara fara maja kah. Ka ta d'iya hwayak alëkwa la amba cek tabiya da hwađ a, a daw maaya maaya, maja kah ndaw ta leñgesl maaya.

³ Ndëhay tabiya daa hwayak alëkwa fa tëbmara cek masa kah ma ka tabiya, ala fa kamaka suse.

⁴ Ama ya wudëy ya gërdaka ta mey hay ga ba. Da ray ngene, ya kaka ambahw nga jëkey slëmay fa mey ala nekëdëy, maja kah ndaw maaya ma sëra dey-ceceh fa ndaw.

⁵ Ya nëkmara ndaw kedë na, ndaw makëwkaya kalah, ara anga ma handërwa meyey-mey a wuzlah ndëhay Jëwif hay da bëla tabiya. Anga ndaw mahura nga ndëhay ma sëpam cëved membërzley masa ma zëlmata *Nezeret hay.

⁶ Asaya, anga na, a wudëy nga zlëba *Way-mekey-kwakwas nga Gazlavay. Ara maja ngene, ala ma kërzamërwa. [Ya wudam amba ya kamar sariya anda *mewey nga Jëwif hay ma lëvey,

⁷ ama Liziyas, *bay-ray nga sewje hay ta', a sawa, a tëba da har ala ta gëdan.

⁸ Ta', Liziyas a, a lëvtar a ndëhay ma wudmara ha, nga samawa fa mey akah kede.] Da ka cacëfda Pawl a na, ka sëra la, ya wudmara na, da ray mey fara fara.»

⁹ Jëwif hay fetede a lëvam: «Fara fara, mey masa Tertulus maa guzley kaa na, ara anga.»

Pawl a kada mabara nga mey anga fa mey nga Fëlekes

¹⁰ Guverner Fëlekes kaa heyey a lar har, a lëvar a Pawl ngaa guzley. Pawl, ta', a lëvey: «Ya sëra, mevey ga ara kah ma ka sariya daa hwayak kede. Anda kede, mevel adaw faa sëmey ga, amba ya kada mabara nga mey adaw fa mey akah.

¹¹ Masa yah ma daw a *Jeruzelem nga ragadawa a Gazlavay na, a fëna ðar kuraw a ray a cew ba. Da kaa cëfda mey a na, ka hëtfar la kënë.

¹² Kwa ndaw ta hëtfaya masa ala fa kam yawa ta ndaw daa *Way-mekey-kwakwas nga Gazlavay na, daa ba. Asaya, ndaw ta hëtfaya masa ya fa hëldata ndëhay nga yey mey daa way hay mewuzey mey nga Gazlavay, kwa daa berney na, daa ba.

¹³ Ata ma wudmaya kaa na, ndaw da wuzlah ata ma gwa ma wuzdakawa mey a, ara mey fara fara daha daw?

¹⁴ Ama ya wuzdakawa, yah na, ya fa ragadar a Gazlavay masa papan nga papa ala hay ma ragadar. Ya ragadar na, ta mesëpey cëved nga Yesu. Ata na, a lëvam cëved e ara cëved ma mbërzley ndëhay. Ama ya fa tëba *kwakwas nga Mawiz tabiya, ta mey mawuzlalakaya daa ðerewel hay nga ndëhay ma tëla mey nga Gazlavay tabiya may.

¹⁵ Yah, ya pa lengesl adaw si a ray Gazlavay, ya tëba mey ma lëvey a da slëkðadatërwa ndëhay maaya ta ndëhay maaya ba hay daa memëcey. Kwa ndëhay a ma wudmaya kede na, fa pam lengesl a ray mey a may.

¹⁶ Da ray ngene, ya fa key slëra ta mevel pal amba mandaw mandaw mevel adaw a njeý maaya fa Gazlavay lej fa mey nga ndëhay.

¹⁷ «Masa yah ma mbëkda berney nga Jeruzelem mevey ga la na, ta', ya vëhwa aa berney a, ya handatar dala nga jëney ndëhay masa-viya hay da wuzlah sëkway adaw hay *Jëwif hay ta nga key kwakwas a Gazlavay.

¹⁸ A hëtfamaya daa Way-mekey-kwakwas nga Gazlavay. Daa ngene, ya fa ndëvda mekey kwakwas nga Gazlavay amba ya tërey ndaw mazlëbkaya saba. Ndëhay da cakay adaw ga daa ba, ya fa key baazlam daa ba.

¹⁹ Ama Jëwif hay daa hwayak nga Azi ata fetede. Da ata ta mey da ray adaw daha na, anja ara ata ha ma da wudmaya fa mey akah jak.

²⁰ Da daa ba na, kaa cëfdata ndëhay fa mey akah kefe nga kadamakawa mebërey masa yah ma ka ta pas masa ata ma kërzamaya, ma handamaya fa mey nga ndëhay mahura hay ma sla yawa nga Jëwif hay taw.

²¹ Fara fara, fa mey nga ndëhay ma sla yawa na, ya ta lecey la, ya lëvey: “Ya fa səkwa pas masa Gazlavay ma da slëkdadatërwa ndëhay daa memëcey.” A wudmaya fa mey akwar kaa na, maja mey a kefe daw?»

²² Fëlekes na, a sëra mey da ray cëved nga Yesu maaya maaya. A gëmey nga dësla sariya ha wure ñgene ba, a lëvtar: «Ya da dësla sariya akwar na, si ta pas masa Liziyas, *bay-ray nga sewje hay heyey, ma sawa.» Ta', a lëvtar nga diyam a way.

²³ A lëvar a mahura nga sewje hay ma jëdmara Pawl nga jëdmara maaya maaya daa fërsëne, ama a da sërdamara banay ba, nga vëlmatar cëved a jam anga hay ma samawa nga jënmara.

Pawl fa mey nga Fëlekes

²⁴ Dar nekëdey fa dëba ha, Fëlekes, ta', a samawa ta ñgwas anga Dërusil, dam *Jëwif. Ta', a slërey, a zëlmërwa Pawl, amba a cënda mey da ray metëbey-mey nga Yesu *Këriste.

²⁵ Pawl, ta', aa guzltar da ray menjey ma mbafar a Gazlavay, ta da ray menjey ta mewey vaw fa cek hay saw, leñ da ray sariya masa Gazlavay ma da ka ta pas mendëvey nga bëla. Pawl fa wuzda mey a ñgene na, Fëlekes a zlurey, ta', a lëvey: «Wure kefe, mey a mak dagay. Mbëkdaya. Pas masa yah ma hëtey har la na, ya zëlka la saya.»

²⁶ Asaya a wulkey na, Pawl a vëlar dala la, da ray ñgene, a zëla Pawl dey weewe nga key maday.

²⁷ Fa dëba ha mevey cew, guverner mekele a njeý aa slam a nga Fëlekes, mezëley nga ndaw aha na, Parsiyus Festus. Fëlekes na, a gëmey nga pëskarawa Pawl daa fërsëne ba maja a wudey Jëwif hay aa sëmam da ray a.

25

Pawl fa mey nga Guverner Festus

¹ Festus a wuswa aa hwayak nga *Jëwif hay nga key guverner fetede. Fa dëba ha dar maakar, a slëkdey daa berney nga Sezere, a daw a *Jeruzelem.

² Da Jeruzelem e, *bay-ray hay nga ndëhay ma ka kwakwas nga Gazlavay, ta mahura hay nga Jëwif hay a samawa fa vëdfa, a wudmara Pawl saya. A kamar ambahw a Festus,

³ aa cëfdamara nga vëltar cëved amba a handatara Pawl a Jeruzelem e. Aa cëfdamara na, maja ta cëmdamara dëfay ata cay, amba a këdmara Pawl vagay daa cëved.

⁴ Ama Festus a mbëddatara, a lëvtar: «Pawl aa daa fërsëne daa berney nga Sezere. Yah kwa ya vëhey la fetedë daa dëfay hay a kedë.

⁵ Maaya na, ya diyam bama ta mahura akwar hay a Sezere he. Da ndaw a ta key cek maaya ba la na, a wudmara fetedë.»

⁶ Festus a njawa ta ata da Jeruzelem e, a key dëfay daangafad, da daa ba kuraw gway. Ta', a vëhwa aa berney nga Sezere. Pëpërek e, a njeý aa slam mekey sariya, a lëvey nga handamërwa Pawl.

⁷ Masa ata ma wudamërwa Pawl la na, Jëwif hay ma samawa da Jeruzelem a zlërmay ray. A wudmara, a mbërzlafamar a ray, ta mey hay maadakw a maadakw a hay ga. Ama ata ta ray ata, a gwamara nga wuzdamara mey da ray mey hay a fara fara ba.

⁸ Pawl, ta', a kada mabara nga mey anga, a lëvey: «Ya ta key meberëy da ray kwakwas nga Jëwif hay daa ba, ya ta zlëba *Way-mekey-kwakwas nga Gazlavay daa ba. Kwa *Sezere, bay mahura nga *Rawm na, yah ta key meberëy fa vëdfa daa ba.»

⁹ Yaw, Festus a wudëy aa sëmdata Jëwif hay. Da ray ngene, aa cëfda Pawl, a lëvar: «Ka tëba nga daw a Jeruzelem daw? Fetedë a da kamaka sariya fa mey adaw da ray mey masa ata ma wudmaka maja kedë.»

¹⁰ Pawl a mbëddara, a lëvar: «Wure kedë, yah malacakaya daa slam mekey sariya nga bay mahura nga Rawm. Da sariya a key ta cëved e na, anja maaya sariya adaw a, a key fedë. Ya ta key meberëy fa Jëwif hay daa ba. Kah ta ray kah, ka sëra maaya maaya.

¹¹ Da ya ta key meberëy la tëdë nga këdëy vagay na, ngene, këdmaya, ya tëba nga mëcëy. Ama ata ma wudmaya kedë na, ara membërzley. Da ray ngene, ndaw ma da gwa nga vëldaya asi har ata daa ba. Anda kedë, yah na, yaa cëfdëy cëved nga hendëy sariya adaw fa Sezere, bay mahura nga Rawm.»

¹² Festus a slam yawa ta ndëhay anga hay. Fa dëba ha, ta', a lëvar a Pawl: «Ka taa cëfdëy cëved la nga daw fa mey

nga Sezere, bay mahura nga Rawm. Anda kedë, ya vëlka cëved, ka daw fa anja.»

Pawl fa mey nga Bay Agëripa

¹³ Dar nekëdëy fa dëba ha, Bay Agëripa ta dam-mamaha Berenis, a diyam aa berney nga Sezere nga cey har a Festus.

¹⁴ A njam dar ga daa berney a. Da ray ngene, Festus ta', a kadara mey da ray Pawl heyey a Bay Agëripa ha, a lëvar: «Ndaw fedë daha, aa daa fërsëne dëga fa Bay Fëlekes.

¹⁵ Masa yah da *Jeruzelem na, *bay-ray hay nga ndëhay ma ka kwakwas nga Gazlavay ta mahura hay nga *Jëwif hay, a wudmara fa yah, aa cëfdamaya nga dësla sariya anja ha nga këda vagay.

¹⁶ Ama ya lëvtar, kwakwas nga Rawma hay a lëvey na, ndëhay Rawma hay a vëldamara ndaw masa ndëhay ma wudmara nga këdëy vagay saw saw ba. Si ndaw masa ata ma wudmara a sawa fa mey nga ndëhay ma wudmara ha, a cënda mey ata la dagay. Fa dëba ha, ndaw masa ata ma wudmara ha a kada mabara nga mey anja.

¹⁷ Ta', ya samawa fedë ta Jëwif hay aha. Ya ta njeý ga daa ba, pepërek e gway na, ta', ya daw aa slam nga sariya, ya lëvtar nga handamërwa ndaw aha.

¹⁸ Ndëhay ma wudmara ha, ta', a samawa. Ya wulkey na, a wudmara da ray anja ma key cek malamba hay. Ama, anja këne ba.

¹⁹ Si ata ma kam yawa da ray kwakwas ata, ta da ray ndaw daha mezëley Yesu. Ndaw aha ta mëcey sem, ama Pawl a lëvtar ta slëkdawa sem daa memëcey, anja ta dey.

²⁰ Ya sëra nga dësla mey a ba. Da ray ngene, ta', yaa cëfda Pawl, ya lëvar: «Ka tëba ma daw a Jeruzelem amba a dëslmakawa sariya akah fetedë daw?»

²¹ Ama Pawl a lëvya, a wudëy a njeý daa fërsëne, a sëkwa sariya anja fa Bay Mahura *Sezere gway. Anda kedë, ya lëvtar nga jëdmara dagay, wara ya slërda fa Sezere he.»

²² Bay Agëripa a lëvar a Festus: «Yah may, ya wudëy ya cënda mey nga ndaw aha.» Festus a mbëddara, a lëvar: «Mandaw na, ka cënda mey anja ha la.»

²³ Taa përek, Bay Agëripa ta Berenis a diyam ta ndëhay anja hay, fa hëslmatar ray. A mbëzam aa slam mekey sariya ta bay-ray hay nga sewje hay, leñ mahura hay daa berney a. Festus a lëvtar nga ngëlmërwa Pawl. Ta', a handamërwa Pawl a.

²⁴ Festus a lëvey: «Waa, Bay mahura Agëripa, ta ndëhay tabiya masa fedë, akwar fa hëtmar ndaw kedë, masa Jëwif

hay tabiya ma wudmara fa yah. A wudmara da Jeruzelem, ta', a samawa a wudmara fede may. Ata tabiya a lõvmaya ta gëdan, ya da mbëkda ba, si ya këda vagay.

²⁵ Ama nga yah na, yah ta hëtey meberëy fa vëda masa tëde nga këda vagay na, daa ba. Yaw, maja anga ta ray anga, taa cëdfey cëved la amba bay mahura nga *Rawm a dëslra sariya ha na, ya wulkey maaya ya slërdara fetede.

²⁶ Ama ya sëra mey masa yah ma da wuzlalar a bay mahura nga Rawm aha da ray sariya ha ba. Ara maja ngene, yah ma handërwa fa mey akwar, teesed na, fa mey akah dagay, Bay Agëripa. Cacëfda, amba ya sëra cek masa yah ma da wuzleley da ray a, a bay mahura nga Rawm.

²⁷ Daa mewulkey adaw, da ya slërda ndaw fa bay mahura nga Rawm nga dëslra sariya da ray a, ama ya ta wuzdara mey masa ata ma wudmara maja daa ba na, ngene, a cëney ba.»

26

Pawl a kadara mabara nga mey anga a Agëripa

¹ Bay Agëripa a lõvar a Pawl: «Ya vëlka cëved nga kada mabara nga mey akah.» Pawl, ta', a bançada har anga, a zlar nga kada mabara nga mey anga, a lõvey:

² «Waa Bay Agëripa, tasana yah faa sëmey ga, nga kada mabara nga mey adaw fa mey akah, da ray mey masa *Jëwif hay ma wudmaya tabiya,

³ maja kah na, ka sëra mey da ray kwakwas nga Jëwif hay maaya maaya. Asaya, ka sëra mey hay masa Jëwif hay ma kam yawa da ray a. Da ray ngene, jëkfaya slëmay ta dëk-vaw cey.

⁴ «Yaw, Jëwif hay tabiya a sërmara menjey adaw dëga daa zariya adaw haa wure kefe. A sërmara, menjey adaw da wuzlah ndëhay adaw hay, ta da *Jeruzelem.

⁵ Jëwif hay a kefe, a sërmaya dëga zleezle. Da a wudam na, a gwamara ma kam sede da ray adaw. A sërmara daa menjey adaw na, ya ta sëpa *kwakwas nga Mawiz la ta gëdan adaw ndav maja yah ndaw Fariza. *Fariza hay na, ara ndëhay Jëwif hay ma sëpam kwakwas nga Mawiz ta gëdan ata cëpa, ma fëna ndëhay mekele hay.

⁶ Wure kefe, fa kamaya sariya na, maja yah ma pa lenjesl adaw a ray cek masa Gazlavay ma lõvtar a papan nga papa ala hay zleezle a katara la heyey.

⁷ Cek masa Gazlavay ma lõvtar a da katara ha na, sëkway ala hay kuraw a ray a cew tabiya fa pam lenjesl a ray a, a

wudam nga hëtmar. Da ray ñgene, taa vad, taa pas, ata fa ragadamar a Bay Gazlavay. Waa Bay Agëripa, Jëwif hay a, a wudmaya na, maja.

⁸ Akwar Jëwif hay, Gazlavay a slëkfdatërwa ndëhay daa memëcey la, kaa ka tëbmara mey a ba na, maja me?

⁹ «Zleezle yah ta ray adaw, ya ta wulkey la, maaya na, si ya sëpey wewer mekele mekele amba ya nësa mezëley nga Yesu, ndaw *Nezeret.

¹⁰ Kede ara cek masa yah ma ka da Jeruzelem. *Bay-ray hay nga ndëhay ma ka kwakwas nga Gazlavay ta vëlmaya cëved la nga kërzey ndëhay ga ma tëba mey nga Yesu, ta', ya ndëkwdata aa fërsëne. Masa ata fa kamatar sariya nga këdmata vagay na, ya lövey maaya.

¹¹ Ya daw ya sërdata banay dey weewe daa way hay mewuzey mey nga Gazlavay tabiya. Ya tëktar day nga rësmara Yesu. Mevel ta caya la a ray ata kwa ara mey ba. Da ray ñgene, ya ta daw la ya sëptërwa kwa daa hwayak nga ndëhay Jëwif hay ba hay, ya sërdatërwa banay.»

Pawl a kada pas masa anga ma tëba Yesu

(SNM 9.1-19; 22.6-16)

¹² «Ara maja ñgene, yah ma daw aa berney nga Damas. Ara *bay-ray hay nga ndëhay ma ka kwakwas nga Gazlavay ma slërdamaya. Ya daw na, ta leeter da har masa ata ma wuzlalamara nga vëlya cëved nga kërzawa ndëhay.

¹³ Yaw, Bay Agëripa, ta wuzlah-pas ya fa daw daa cëved, ya hëtar slam ma wadawa a ray adaw. A wadawa da gazlavay da vad, ama a fëna mewedey nga pas. A wedey da ray adaw, ta ndëhay dasi adaw.

¹⁴ Ala tabiya ya tëdam a hwayak. Yah na, ta', ya cëney day nga ndaw maa guzlya ta mey *Hebëre, a lövya: “*Sawl, Sawl, ka sërdaya banay anda kede na, maja me? Kah fa nësa ray akah anda sla ma mbëzley zlanday nga mecëkwer anga.”

¹⁵ Ta', yaa cëfda, ya lövar: “Bay Mahura, kah na wa?” Bay Mahura a mbëddiwa, a lövya: “Ara yah, Yesu ndaw masa kah ma sërda banay.

¹⁶ Ama slëkdey, lecey ta lecey. Ya wuzka vaw kede na, maja ya ta walaka sem amba ka tërey ndaw ma ka slëra adaw. Ka da key sede da ray adaw, ka lövtar a ndëhay mey da ray kah ma hëtya tasana kede. Asaya, ka da kadatara cek masa yah ma da wuzdakawa.

¹⁷ Ya slërdaka fa *Jëwif hay, leñ fa ndëhay daa sëkway hay mekele. Kwa da a kamaka cek maaya ba na, ya löhdaka la dasi har ata.

18 Ya slërdaka fa ata na, amba ka wurtara lenjesl ata, amba ka badatërwa daa lëvarj ngadaa slam-mewedey. Ya slërdaka fa ata, amba ka badatërwa dasi har nga *Satan bay-malula, a mbëdmdawa dey ngada fa Gazlavay. Da ata ma pamaya la nga ndaw ata fara fara na, ya mbëkdatara mebërey ata la, asaya a hëtam slam-menjey la da wuzlah ndëhay nga Gazlavay.”»

Pawl aa guzley da ray slëra anja

19 Pawl a lëvey saya: «Waa Bay Agëripa, dëga mezley ta pas masa Bay Mahura ma wuzya vaw da vad ngene na, ya fa pey lenjesl a ray a, ya fa ka cek aha anda aa ma wuzdiwa.

20 Anda kedë, ya zlar nga wuzey mey ngeeme na, a ndëhay daa berney nga Damas, fa dëba ha, ya wuzdatara mey a, a ndëhay da *Jeruzelem, a ndëhay da *Jude tabiya, lej a ndëhay *Jëwif hay ba hay daa hwayak mekele mekele may. Ya lëvtar: “Si ka mbëdmdamara menjey akwar, mbëdam dey fa Gazlavay, sëpmara ta mevel pal. Kam slëra maaya fa mey nga Gazlavay nga wuzdërwa na, akwar ta mbëdmdamara menjey akwar sem.”

21 Ara maja ngene, Jëwif hay ma kërzamiwa daa *Way-mekey-kwakwas nga Gazlavay, a wudam nga këdmaya vagay.

22 Ama haa kasl tasana kedë, Gazlavay fa jënya. Maja ngene, wure kedë yah malacakaya fa mey akwar, ya fa wuzda mey nga Gazlavay fa mey nga ndëhay tabiya, kwa a mahura hay, kwa a ndëhay wura wura cëpa. Ya wuzey na, si mey nga *Mawiz ta mey nga ndëhay ma tëla mey nga Gazlavay maa guzlam da ray cek ma da key. A lëvam

23 *Këriste a sërey banay la. Anja, ara ndaw ngeeme da wuzlah ndëhay mamëctakaya ma da slëkëdamawa daa memëcey. Maja maslëkëdawa anja daa memëcey a na, a wuzdatara mewedey nga Gazlavay a Jëwif hay ta a ndëhay daa sëkway hay mekele tabiya.»

Pawl a lëvar a Bay Agëripa nga tëba mey nga Yesu

24 Masa Pawl fa kada mabara nga mey anja anda kedë na, ta', Festus a kar mey ta gëdan, a lëvar: «Pawl, ray akah ta mbëdëy sem, mesërey cek akah kalah ngene, ta nëskawa lenjesl sem.»

25 Pawl a mbëdmdara, a lëvar: «Waa bay mahura, lenjesl adaw, ta nësey daa ba. Mey masa yah ma kada kedë na, ara mey saw ba, ama ara mey fara fara.

²⁶ Bay Agëripa na, a sëra mey a kefe. Ya gwa ngaa guzlar ta mandërzay daa dey ba, maja ya wulkey a sëra mey da ray cek hay a tabiya, maja cek hay a maßadakaya daa ba, fa key fa dey nga ndëhay tabiya.

²⁷ Waa Bay Agëripa, ka tëba mey nga ndëhay ma tëla mey nga Gazlavay, ba diya? Yah na, ya sëra, ka fa tëba mey ata.»

²⁸ Ta', Agëripa a mbëddara, a lëvar: «Ka wulkey ka gwa nga tërdaya ndaw nga Yesu wure wure kefe la gway daw?»

²⁹ Pawl a mbëddara, a lëvar: «Yah fa dërey danggay a Gazlavay, amba kwa wure kefe, kwa ngada fa mey, kah ta ndëhay ma cëndamara mey adaw tasana kefe tabiya, ka tëram anda yah, ama a da jëwmakwar ta calalaw kefe ba may tarah.»

³⁰ Fa dëba ha, Bay Agëripa, ta Guverner Festus, ta Berenis heyey lej ndëhay tabiya da cakay ata, a slëkdam, a diyam.

³¹ Masa ata ma ngëcham la nekëdey na, aa guzlam da wuzlah ata, a lëvam: «Ndaw kefe ta key mebërey tëde nga këdey vagay ta nga ndëkwey anga aa fërsëne na, daa ba.»

³² Fa dëba ha, Agëripa a lëvar a Festus: «Ya gwakwa ya mbëkdakwa ndaw kefe, ama a key saba maja anga taa cëfdey cëved sem nga daw fa *Sezere, bay mahura da *Rawm.»

27

A slërdamara Pawl aa berney nga Rawm

¹ Masa ta slam yawa cay amba ya diyam * aa hwayak nga Itali ta kwambiwal na, ta', a vëldamata ata Pawl, ta danggay hay siya a har ndaw mezëley Juliyus, mahura nga sewje hay. Anga mahura da wuzlah sewje hay nga Rawm, masa ata ma zëlmata «Sewje hay nga Bay Agustus.»

² Ta', ya ndëkwam aa kwambiwal ma sawa daa berney nga Adëramit. Kwambiwal a, a daw ngadaa slam-mepey-salay mekele mekele ta dey bëlay nga hwayak nga Azi. Ta', ya diyam. Ala bama ta ata ndaw daha mezëley Aristarke, ndaw Masadëwan daa berney nga Tesalawnik. ³ Pepërek e, ya wusam aa berney nga Sidanjw. Juliyus, a sërfar dey-ceceh a Pawl, ta', a vëlar cëved nga pey salay nga daw aa berney a nga nëktërwa jam anga hay, amba a jënmara.

⁴ Fa dëba ha, ya tëpam aa kwambiwal saya. Ya gwamara nga diyam dër e ba, maja memed fa kawa a ray ala. Ta',

26:26 26.26 Jan 18.20 26:28 26.28 11.26 26:31 26.31 23.29 26:32 26.32

25.11-12 * 27:1 27.1 ya diyam: Luk, ndaw ma wuzlala mey hay kefe, a lëvey "ya diyam" na, maja ta cëmam la ta ata Pawl saya, a diyam bama haa a Rawm.

27:1 27.1 25.12 27:2 27.2 19.29 27:3 27.3 24.23; 28.2

ya diyam ta cakay hwayak da wuzlah bëlay mezëley Sipëre masa memed fa key ga daa ba.

⁵ Ya tənngam a dey bëlay gweegwe ta hwayak nga Silisi lenj hwayak nga Pamfili, ta', ya wusam a Mira daa hwayak nga Lisi.

⁶ Fetedë, mahura nga sewje hay heyey a sөpey kwambiwal mekele. A hətndar kwambiwal ma sawa daa berney nga Alekzandëri ma daw ngadaa hwayak nga Itali. Ta', a təpdandar aa kwambiwal a.

⁷ Dar ga, ala fa diyam nekədey, nekədey. Ya wusam gweegwe ta berney nga Kənit na, banay daha ga nga daw maja memed faa bərey. Memed e a təkndar nga daw fa mey, ta', ya slapalam ta fa slam da wuzlah bëlay mezëley Salmawne, nga wusey a dey langar nga hwayak da wuzlah bëlay mezëley Kəret, dey masa memed daa ba.

⁸ Ya diyam ta banay taa kwakway nga hwayak a, ya wusam aa slam da Kəret mezëley Slam-mepey-salay Maaya, masa gweegwe ta berney nga Laze.

⁹ Daa madaw ala ha na, ya ta kam dar ga sem. Ndëhay ta kamara *daliyam nga mbəkey mebərey sem. Anda meləvey, piya † gweegwe a wuswa, madaw ta kwambiwal a key saba maja bərgadanj fa key. Maja ngenë, Pawl a ləvey:

¹⁰ «Waa jam adaw hay, ya səra madaw aləkwa kedë a kandakwar banay ga la. Kwambiwal ta cek hay da hwad a, a da ndəkwa asi yam, a daa zədam. Ma daa zədam na, cek hay a daada ba, ama kwa aləkwa ray aləkwa may.»

¹¹ Mahura nga sewje hay heyey a cənda mey nga Pawl ba, ama a cəney na, mey nga ndaw ma hwada kwambiwal ta bay nga kwambiwal a gway.

¹² Slam-mepey-salay fetedë na, anga maaya nga lecey kwambiwal a hwad a ta piya ba. Daa ngenë har-gədanj nga ndëhay a, a wudam nga diyam. Da a gwamara ma wusam na, a wudam a diyam aa slam-mepey-salay daa berney nga Fenikis, amba a njam fetedë ta piya ha. Berney nga Fenikis na, aa daa hwayak nga Kəret da wuzlah bëlay heyey. Slam-mepey-salay da Fenikis ha na, aa ta har-gula nga ndaw ma nəkey dey ngada mey-anjwa lenj ta har-zəmay nga ndaw ma nəkey dey ngada wurza.

Bərgadanj a key da ray bëlay

† 27:9 27.9 piya: Daa hwayak hay a fetedë, piya a key ta kiya masa kalan daa hwayak nga ndëhay Mafaw hay. Anda meləvey, piya fetedë a key ta kiya mesəfed haa kasl kiya ma daw a ley. Anda kedë, maja ta piya ha na, madaw taa bëlay ta kiya ha maaya ba, maja bərgadanj fa key kalah. 27:9 27.9-10 2Kwr 11.26

¹³ Fa dëba ha, memed ta dey nga Mëzam a kawa nekëdey. A wulkam a hëtam cëved la nga wusey a Fenikis anda ata ma wudam. Da ray ngene, a dadamërwa bërey mandandal a ma lacada kwambiwal, a pamara a hwaç a. Ta', a diyam ta mey kwakway nga hwayak nga Këret.

¹⁴ Ama fa dëba ha nekëdey bërgadañ ta', a kawa. Bërgadañ a na, a zëlmara Erakilanw †, a sawa taa ançwa nga Këret.

¹⁵ A fëna kwambiwal ta gëdañ. Ya gwamara nga handamara kwambiwal a dër e saba. Mbak! ya mbëkdamara, memed e nga handa.

¹⁶ Fa dëba ha, ya diyam ta dëba hwayak mekele mecëhe da wuzlah bëlay mezëley Kwada. Hwayak a, a tëka memed nekëdey ma da sawa ngada ray ala. Fetede, ya bançadamërwa kwambiwal mecëhe § ngadaa kwambiwal mahura maja kwambiwal mecëhe a daa zëdey, ama aa ta banay ga maja memed e kalah.

¹⁷ Masa ndëhay ma hwada kwambiwal a ma pamara kwambiwal mecëhe heyey la aa kwambiwal mahura na, ta', a tëkdam laza fa kwambiwal mahura heyey. Asaya, ta', a këzlam cek aa bëlay nga tëka kwambiwal nga daw a rav-zazay nga hwayak nga Libi maja a zluram da a wusam haa a rav-zazay a na, a da slënam aa mawurbay. Fa dëba ha, mbak! a mbëkdamara kwambiwal a amba memed a handa aa wuzlah bëlay.

¹⁸ Memed e, fa key, fa key ta gëdañ cënga. Anda kedë, pepërek e, a këzlamata cek hay nga filaw masa daa kwambiwal a aa bëlay.

¹⁹ Pepërek e mekele, memed e fa key cënga. Cek hay masa maadakw a maadakw a fa kwambiwal a na, ndëhay ma hwada a cëkwmata, a hazakadamata aa bëlay ta har ata.

²⁰ Dar ga, ya hëtmars pas ba, ya hëtmatar wurzla hay ba, maja bërgadañ a. Fa key ta gëdañ, ta gëdañ haa ya wulkam ya lëham la na, daa ba.

²¹ Menjey ga, ndëhay daa kwambiwal a ta zëmam cek daa ba. Pawl ta', a lecey fa mey ata tabiya, a lëvtar: «Haya, jam adaw hay, anja da akwar ma tëbmara mey adaw la na, ya ta slëkdakurwa daa hwayak nga Këret daa ba. Da alëkwa ma slëkdakurwa da Këret e daa ba na, anja cek alëkwa hay kedë fa da nësam daa ba, fa daa zëdam daa ba.

† 27:14 27.14 Erakilanw: Ara memed ma kawa taa walañ nga dey ançwa lenç nga dey nga Pëlta. Ara bërgadañ mahura, a nësey cek hay ga. § 27:16 27.16 kwambiwal mecëhe: Ara kwambiwal nga lëhdata ndëhay da masa kwambiwal mahura ta nësey sem da wuzlah bëlay. 27:18 27.18 Jaw 1.5

²² Ama wure keðe, ya fa lõvkwar, kërzamara mevel, kwa ndaw pal dasi alëkwa fa daa zëðey daa ba, si kwambiwal ma daa zëðey gway.

²³ Dasi tavað keðe, Gazlavay, ndaw masa ma walaya, masa yah ma ragadar, ta slërwa maslanj anğa la da vad fa yah.

²⁴ A lõvya: "Pawl, ka da zlurey ba, fara fara si ka wusey, ka lecey fa mey nga Bay *Sezere da *Rawm nga kaka sariya. Gazlavay a lëhdata ndëhay tabiya daa kwambiwal keðe la, aa zëðam daa ba maja maaya anğa aa da ray akah."

²⁵ Da ray ñgene, jam adaw hay, kërzamara mevel, ka da zluram ba, maja ya sëra Gazlavay a ka la fara fara anda anğa ma lõvya.

²⁶ Ama si kwambiwal a lecey a ray hwiyak da wuzlah bëlay la ðagay.»

²⁷ Dar kuraw a ray a mëfað, memed e fa ðëkdandar daa bëlay nga Mediterene cënga. Ta wuzlah-tavað, ndëhay ma hwada kwambiwal a wulkam na, ala gweegwe ya wusam a ray-ðëgar.

²⁸ Ata a padamërwa salay ta bërey majëwkaya fa kwambiwal a, amba a wamara yam a. A hëtfamar yam a seleleñ, a key meeter kwakwar maakar a ray a maasala. A diyam fa mey nekëðey, a wamara yam saya, a hëtfamar yam a seleleñ, a key meeter kwakwar cew a ray a daanğafad.

²⁹ A zluram maja memed a da handa kwambiwal fa anğwa. Da ray ñgene, a padamatërwa salay ta bërey hay mëfað mandandal a mandandal a ma lacada kwambiwal fa ðëba nga kwambiwal a. A sëkwam slam nga wurey, ama slam a wurfatar gweegwe ba.

³⁰ Ndëhay ma hwada kwambiwal a, a wuðam ma bamawa da hwad a amba a lõham. Ta', a padamërwa salay ta kwambiwal mecëhe heyey aa yam. A kam anda a da padamatërwa salay ta bërey mandandal a mandandal a ma lacada kwambiwal fa mey nga kwambiwal mahura.

³¹ Ama Pawl a lõvtar a sewje hay, ta ñgada mahura ata: «Da ndëhay ma hwada kwambiwal a, a ñjam a hwad a ba na, akwar fa da gwamara nga lõhey daa bëlay a daa ba.»

³² Sewje hay heyey ta', a ðëslmara laza ma kërza kwambiwal mecëhe, a mbëkdamara aa yam, a daw.

³³ Gweegwe slam a wurey na, ta', Pawl a zëлта ndëhay tabiya nga zëmey ðaf, a lõvtar: «Akwar ta bësmara banay la ðar kuraw a ray a mëfað, akwar ta zëmam kwa meeme daa ba.

³⁴ Maaya na, ya zëmkwa daf nga hëtey gëdan nga lëhey. Kwa engwec pal fa ray nga ndaw da wuzlah akwar fa daa zëdey daa ba.»

³⁵ Masa anga ma lëvey la anda kefe na, leŋ! a ley peŋ, a kar suse a Gazlavay fa mey ata tabiya, ta', a hëbey, a zëmey.

³⁶ Da ray ŋgene, ata tabiya a kërzamara mevel. Fa dëba ha, a zëmam peŋ e may.

³⁷ Ala daa kwambiwal a tabiya a key temere cew ta kwakwar maasala a ray a maakwaw.

³⁸ Masa ata ma rëham la na, ta', a këzlamara cek anda daw daa kwambiwal a aa yam, maja a wudam kwambiwal a, a key dadakw ba.

Vangwala nga yam a hëba kwambiwal

³⁹ Fa dëba ha slam ma wurey la na, ndëhay ma hwada kwambiwal a hëtmar hwiyak, ama a sërmara slam aha ba. Daa slam aha, a hëtmar slam masa maaya nga lecey kwambiwal da ray-dëgar, mawurbay da hwad a. Da a gwamara na, anja a wudam nga handamara kwambiwal fetede, a wudam a mbëkdamara fetede.

⁴⁰ Da ray ŋgene, ta', a dëslmara laza nga bërey mëfad mandandal a mandandal a heyey, a mbëkdamata aa yam. Ta', a pëskamata laza hay masa ma jëwa hwadam ma hwada kwambiwal. Ta', a banğadamarara zana fa mey nga kwambiwal amba memed a handa a rav-zazay.

⁴¹ Ama kwambiwal kaa a daw, a hëtfey slam, yam da hwad a ga daa ba, deŋ! a lecey aa mawurbay daa yam a, mey a, caca'! aa mawurbay a, kwa a wusey ba sëlak. Vangwala nga yam a sawa a hëba hwadam fa dëba.

⁴² Maja ŋgene, sewje hay a wudam a këdmata ndëhay dangay hay vagay maja a zluram ndëhay a, a daa ndavam, a da lëham.

⁴³ Ama mahura nga sewje hay a wudëy ma lëhda Pawl, ta', a tëkta siya hay nga këdmata ndëhay dangay hay a. A lëvtar a ndëhay ma sërmara mendendevey nga jëvam teesed aa yam a, amba a wusam kasl a rav-zazay.

⁴⁴ Siya hay, a lëhmawa na, a kërzam har ta hwadam hay nga kwambiwal mahëbkaya. Anda kefe, ala tabiya ma lëhmawa sem a palah, kwa cek ma kandar daa ba sëlak.

28

Pawl anga daa hwayak da wuzlah bëlay mezëley Malta

¹ Fa dëba ha, masa ala ma lëham la aa hwayak da wuzlah bëlay a na, ya cëndamarara a lëvam hwayak a mezëley Malta.

² Ndëhay fetede ta tëbmandar la maaya maaya ta meesëmey. Var fa pey, memed daha. Maja ñgene, ndëhay a, a gëdmandar awaw mahura, a ñgëlmandar a cakay awaw a.

³ Pawl ta', a hëlwa sasam, a pa fa awaw a, anja kucsl daa sasam a daha. Awaw a car a zezekw e, a bawa, a za Pawl fa har, aa slëpet e fa har a.

⁴ Ndëhay daa hwayak a, a hëtmar zezekw kaa maslëptakaya fa har ança, a lëvam da wuzlah ata: «Fara fara ndaw kede, ara ndaw ma këda ray nga ndaw. Kwa ta lëhwa sem daa bëlay na, kuley alëkwa masa ma mbëdta ray a ndëhay na, ta hufar sem a ray, ta vëlar cëved nga njeý ta dey daa ba.»

⁵ Ama Pawl, ta', a kuca har, a këlza zezekw e aa awaw. Kwa ta cënda meceý nga zezekw e daa ba sëlak.

⁶ Ndëhay fa nëkmara, a wulkam, a lëvam: «Har ança a da hësley, da daa ba, ança ray ança a da mëceý wure ñgene.» Ama a njam ga, a nëkmara kwa cek ta kar a Pawl daa ba. Da ray ñgene, a hëtam mewulkey mekele saya, aa guzlam da ray a, a lëvam: «Ança na, ara kuley ma tërey nga ndaw.»

⁷ Bay nga hwayak a, mezëley Pubëliyus. Way ança ta ley ança hay aa gweegwe ta slam masa ala ma pam salay. Ança ta tëbndar la a way ança ta meesëmey. Ya njam da way ança ha ñar maakar.

⁸ Papan nga Pubëliyus a, aa manakaya, aa gwa ba, awaw fa vaw, fa kuhwey zay mambaz mambaz. Pawl ta', a daw fa vëda, a dërey dangay a Gazlavay, a par har a ray, ta', a mbëlda.

⁹ Fa dëba ha, masa-macay hay mekele mekele tabiya daa hwayak a, a samawa fa Pawl, ta', Pawl a mbëldata.

¹⁰⁻¹¹ Ndëhay daa hwayak nga Malta ha, a vëlmandar cek hay mekele mekele nga hëslmandar ray. Ya kam kiya maakar daa hwayak a. Masa ala fa da mbëzam aa kwambiwal amba ya diyam na, ta', a vëlmandar cek hay tabiya nga jënnar daa madaw ala ngada *Rawm saya.

Pawl a wusey a Rawm

Ya diyam ta kwambiwal ma sawa daa berney nga Alekzandëri. Kwambiwal a ta njeý la ta piya daa hwayak nga Malta ha. A zëlmara kwambiwal a «Kuley Mawusa hay *.»

28:2 28.2 2Kwr 11.27 **28:5 28.5** Mk 16.18; Lk 10.19 **28:6 28.6** 14.11

* **28:10-11 28.11** Kuley Mawusa hay: Ara kuley hay masa ndëhay Gërek ma hwada kwambiwal ma ragadamar. Kwa cek maacadakaya anda kuley hay a na, fa meý nga kwambiwal a daha.

¹² Ya tøjgam ta kwambiwal a, ya wusam aa berney nga Sirakuz, ya njam fetede dar maakar.

¹³ Ta', ya slëkdam da Sirakuz a ta kwambiwal a, ya diyam ta mey-bëlay, ya wusam aa berney nga Reziyaw. Pepërek e, memed ta dey nga Mëzam a zlar nga kawa, ta', ya diyam. Fa dëba ha dar cew ya wusam aa berney nga Puzawl, ya pam salay.

¹⁴ Daa berney a, ya hëtfam mëlman hay daa *mecëmey-ray nga Yesu. A zëlmandar amba ya njam ta ata luma pal. Ara anda kedë, ala ma diyam ngada *Rawm.

¹⁵ Yaw, mëlman hay daa mecëmey-ray nga Yesu daa berney nga Rawm a cëndamara mey da ray ala. Masa ata ma cëndamara na, ta', a samawa a cadamandar ray daa cëved ma daw a Rawm a. Siya hay a samawa a cadamandar ray daa luma nga Apiyus. Mekele hay a samawa a cadamandar ray da slala mezëley Way-Maakar-Mezëmey-Cek. Masa Pawl ma hëtatar na, a kar suse a Gazlavay, mevel anga a dëkey, a hëtey gëdan.

¹⁶ Masa ala ma wusam a Rawm la na, sewje mahura fetede a vëlar cëved a Pawl nga njeý daa way daha taava anga, ama sewje pal fa jëda daa way a.

Pawl fa mey nga Jëwif hay da Rawm

¹⁷ Fa dëba ha dar maakar, Pawl a zëltërwa mahura hay nga *Jëwif hay da *Rawm a way anga. A kusta, a lëvtar: «Mëlma adaw hay, ya sëra ya ta key cek maaya ba ngada ndëhay alëkwa hay na, daa ba, kwa ya ta nësa kwakwas nga papan nga papa alëkwa hay na, daa ba may, ama ta kërzamiwa la da *Jeruzelem, a vëldamaya a har Rawma hay.

¹⁸ Ata ta cacëfdamaya la da ray cek masa yah ma ka. Fa dëba ha, ta wudam la nga mbëkdamaya maja ta hëtam mebërey masa tëde nga këdya vagay na, daa ba.

¹⁹ Ama Jëwif hay ta tëbmar nga mbëkdamaya daa ba, da ray ngene, dabaray adaw mekele daa ba, si ya lëvtar nga handamërwa sariya adaw fa bay mahura nga Rawm. Ama ya ta sawa nga wudey sëkway adaw hay na, daa ba.

²⁰ Ehe, yah ma zëlkurwa na, maja kedë, amba ya hëtkwar, yaa guzlkwar. A jëwmaya ta calalaw kedë na, maja yah ma pa lengesl adaw a ray ndaw masa alëkwa Jëwif hay ma sëkwakwa.»

²¹ Jëwif hay a mbëfdamara, a lëvmar: «Ala ta hëtam leeter fa Jëwif hay masa daa hwayak nga *Jude da ray akah daa ba. Asaya, kwa ndaw pal da wuzlah mëlma ala hay ma

samawa daa hwayak a ta handandar mey maaya ba da ray akah daa ba may.

²² Ama ya wudam ya cëndamara mey da hwađ akah, maja ya sërmara ndëhay daa hwayak hay mekele mekele fa rësmata ndëhay ma tëba mey anda akah.»

²³ Ta', mahura hay nga Jëwif hay a, a pam đar masa ata ma da kusam ta Pawl saya.

Pawl a wuzey mey nga Gazlavay da Rawm

Masa đar a ma wuswa la na, ndëhay ga a kusam a way Pawl. Dëga ngaa përek haa pas ngaa kwad Pawl fa wuztar mey nga Gazlavay. A kadatara Bay Gazlavay a wey da ray ndëhay na, kwara. A jengëy đerewel da ray kwakwas nga Mawiz ta đerewel hay nga ndëhay ma tëla mey nga Gazlavay, amba ndëhay a, a mbëđdamara lenğesl ata hay, a tëbmara Yesu na, ara *ndaw masa Gazlavay ma wala nga lëhdata ndëhay.

²⁴ Siya hay a tëbmara mey nga Pawl, ama siya hay a gëmam nga tëbmara ba.

²⁵ Daa ngene, a kam yawa da wuzlah ata maja mewulkey ata wal wal. Masa ata fa da diyam na, Pawl ta', aa guzltar mey pal saya, a lëvtar: «Mey masa *Mesëfney nga Gazlavay maa guzley a papaŋ nga papakw akwar hay ta mey *Izay, *ndaw ma tëla mey nga Gazlavay zleezle heyey na, ara mey fara fara.

²⁶ Mesëfney a, a lëvar:

“Daw, lëvtar a ndëhay a:

Akwar fa jëkam slëmay maaya maaya,

ama ka cëndamara ba.

Akwar fa nëkam dey maaya maaya,

ama ka hëtmar dey ba.

²⁷ Maja ndëhay a, a gëmam nga cënam mey ba,

a dëzlmata slëmay ata hay,

a đëpmata dey ata hay.

A kamara këne amba a hëtmar dey ba,

a jëkam slëmay ba,

a tëbmara mey a, aa mevel ata ba.

Da ray ngene, fa da mbëđdamara menjey ata

amba ya mbëldata na, daa ba.”»

²⁸ Pawl a lëvtar saya: «Anda keđe, sërmara, Gazlavay a slërdërwa mey da ray melëhey daa mebërey na, a ndëhay masa *Jëwif hay ba hay. Ata na, a cëndamara mey a la!» [

²⁹ Fa dëba nga mey a keđe, Jëwif hay a diyam ta mekey yawa ta gëdaŋ da wuzlah ata.]

³⁰ Yaw, mevey cew Pawl manjakaya daa way masa annga fa pëley dala maja. Annga fa tëbta ndëhay tabiya ma samawa nga nëkmara.

³¹ Annga fa wuzey mey da ray mewey nga Gazlavay da ray ndëhay, aa sërkatata ndëhay da ray Bay Mahura Yesu *Këriste ta mandërzay daa dey daa ba. Kwa ndaw ma tëka daa ba.

Leeter masa Pawl ma wuzlalatar a Rawma hay Mey da ray

Leeter ngada Rawma hay

Pawl ma wuzlala leeter kede na, ta daw aa berney nga Rawm daa ba arañ. A wuzlala na, daa masa anga daa mepøkey anga nga dey maakar. A wufey nga daw a Rawm nga vøltar gødan a ndøhay fetede. Fa døba ha, a wufey ndøhay da Rawm a jønmara nga daw aa hwayak mekele. A wuzlala leeter e na, da way Gayus da Kwarinti (16.23). Ara Febe, ngwas ma jønta ndøhay daa mecømey-ray nga ndøhay nga Yesu da Senkøre, slala masa gweegwe ta Kwarinti, ma handa leeter e a Rawm (16.1-2).

Daa leeter e, Pawl a wuzlalatar da ray meesørkedey anga da ray Yesu. Da ndaw a wufey nga njeý maaya fa meý nga Gazlavay na, si a pa Yesu nga ndaw anga fara fara gway, ba na, cek mekele daa ba (1.17).

Daa mecømey-ray nga ndøhay nga Yesu da Rawm na, Jøwif hay daha, asaya, ndøhay masa Jøwif hay ba hay daha. Jøwif hay a fa søpmara kwakwas ata cønga. Ndøhay mekele mekele a wulkam ndøhay masa Jøwif hay ba hay si a søpmara kwakwas nga Jøwif hay may. Pawl a løvey, kwakwas nga Jøwif hay na, a løhey ndaw ba. Nga løhey na, si ndaw a tøba meý nga Yesu ta gødan nga Mesøfney nga Gazlavay. Ara daa fasølawal 1 haa 8 Pawl maa guzley anda kede.

Daa fasølawal 9 haa 11, Pawl a løvey kwa har-gødan nga Jøwif hay a tømara meý da ray Yesu ba na, a wulkey pas pal na, a tømara la.

Daa fasølawal 12 haa 16 Pawl aa guzley da ray menjeý nga ndøhay nga Yesu daa Egøliz lej da wuzlah ndøhay da bøla. Pawl a ndøvda leeter e na, ta meceý-har a ndøhay ga.

Daa ðerewel e kede na, meý mekele mekele daha nga vøley gødan a ndøhay:

Mey da ray meløhey daa mebørey (3.23; 6.23; 10.9)

Mesøfney nga Gazlavay a jønta ndøhay daa menjeý ata (8)

Cek masa ndaw ma da høtar maja anga maaya fa meý nga Gazlavay (5.1-5)

Mey da ray menjeý ta mewufey-vaw (13.8-10)

¹ Ara yah Pawl ma wuzlalakwara leeter kede. Yah ndaw ma ka slëra nga *Yesu *Këriste. Ara *Gazlavay ma walaya nga key *ndaw-meslërey nga Yesu, a paya nga wuzey mey anga maaya mawiya.

² *Mey-maaya-mawiya ha na, Gazlavay a lövey dëga zleezle a da slërdërwa ta fa ndëhay ma tëla mey anga. Mey nga ndëhay ma tëla mey anga ha na, mawuzlalakaya daa derewel nga Gazlavay.

³⁻⁴ Mey-maaya-mawiya ha na, ara mey da ray Bay alëkwa Mahura Yesu Këriste, Bëzey nga Gazlavay. A tërey nga ndaw-magëdan, a yawa daa sëkway nga Bay *Davit. Ama Gazlavay ta wuzdërwa la fara fara, ara Bëzey anga masa ta gëdan daa masa anga ma slëkfdädërwa daa memëcey ta gëdan nga Mesëfney anga.

⁵ Gazlavay ta wuzdiwa maaya anga la ta fa Yesu Këriste he. A paya nga ndaw-meslërey nga Yesu amba ya wuzdatara Mey-maaya-mawiya a ndëhay daa sëkway hay wura wura cëpa. Ya wuzdatara na, amba ndëhay a, a tëbmara mey anga, a namar ray. Anda kede, ya fa hëslar ray a Këriste.

⁶ Akwar Rawma hay may, akwar da wuzlah ndëhay a ngene, maja Yesu Këriste ta zëlkwar la nga tërey ndëhay anga hay.

⁷ Ya fa cakwar har, akwar ndëhay cëpa da *Rawm, akwar masa Gazlavay ma wudkwar kalah. Gazlavay ta zëlkwar la, ta tërdakwar la nga ndëhay anga hay.

Anja Papa alëkwa, Bay Gazlavay, ta Bay alëkwa Mahura Yesu Këriste nga pësmakwar mey, asaya, nga njadamakwar daa zazay.

Pawl a wudey nga daw nga nëktërwa Rawma hay

⁸ Yaw, teesed na, ya fa kar suse a Papay Bay Gazlavay ta fa Yesu *Këriste maja akwar tabiya. Ya fa kar suse he na, maja ndëhay da bëla tabiya fa zëldamakwar slëmay maja akwar ma tëbmara mey nga Yesu Këriste.

⁹ Gazlavay a sëra, daa masa ya fa dërey dangay na, ya fa sërfadakwar. Ya fa kar slëra ta mevel pal daa masa ya fa wuzda *Mey-maaya-mawiya da ray Bëzey anga.

¹⁰ Ya faa cëfda mandaw mandaw daa medërey-dangay adaw amba a vëlya cëved nga daw fa akwar anda aa ma wudey.

¹¹ Ahaw, ya wudey fara fara nga hətkwar fa dey amba ya wəlkwar gədan ma sawa ta fa *Mesəfney nga Gazlavay. Anda keđe, ka da hətam gədan ma fəna ma fəna daa cəved nga Yesu.

¹² Ya wudey nga ləvey na, ya da daw fa akwar a na, amba ya jənkwa vaw nga vəley gədan da wuzlah aləkwa. Anda meləvey, ya da hətey gədan maja akwar ma təbmara mey nga Yesu. Akwar may, ka da hətam gədan maja yah ma təba mey nga Yesu.

¹³ Məlma adaw hay, maaya na, ka sərmara ya ta wulkey la dey ga nga daw fa akwar, ama ya ta hətey har nga daw daa ba aran. Ya wudey nga daw fa akwar a na, nga kawa sləra nga jənkwar nga daw fa mey fa mey daa cəved nga Yesu anda yah ma jəntərwa ndəhay daa hwayak hay mekele mekele may.

¹⁴ Si ya wuzda Mey-maaya-mawiya a ndəhay tabiya, kwa ngada ndəhay daa berney hay nga Gərek hay, kwa ngada ndəhay daa slam hay mekele, asaya, kwa ngada ndəhay ta leŋgesl ma səra cek, kwa ngada ndəhay ma səra cek ba.

¹⁵ Ara maja ŋgene, yah ma wudey nga daw fa akwar Rawma hay may nga wuzdakwara Mey-maaya-mawiya.

Mey-maaya-mawiya aa ta gədan nga ləhey ndəhay

¹⁶ Ya fa da zlurey nga wuzey *Mey-maaya-mawiya na, daa ba, maja Mey-maaya-mawiya aa ta gədan nga Gazlavay nga ləhdata ndəhay ma pamara Yesu nga ndaw ata fara fara daa mebərey. Gazlavay a ləhey teesəd na, ndəhay *Jəwif hay, fa dəba ha, ndəhay masa Jəwif hay ba.

¹⁷ Mey-maaya-mawiya na, fa wuzdərwa Gazlavay a nəkta ndəhay, ata maaya fa mey aŋga na, kwara. A da nəkta ndəhay, ata maaya na, ta fa ata ma pamara Yesu nga ndaw ata fara fara gway, ba na, cek mekele daa ba. Ara anda mawuzlalakaya daa dərewel nga Gazlavay, ma ləvey: «Ndaw masa maaya fa mey nga Gazlavay na, ara ndaw ma pa Gazlavay a nga ndaw aŋga fara fara. Anda keđe, a hətey heter mendəvey ba la.»

Ndəhay tabiya ata ta mebərey na, maja me?

¹⁸ Gazlavay da vad fa cey mevel da ray mebərey nga ndəhay magədan tabiya. Ata fa kam cek hay malamba ngada ndəhay, a namar ray a Gazlavay ba səlak. Anda keđe, Gazlavay a da katar sariya maja ata fa təkmata ndəhay siya nga sərey mey masa fara fara da ray Gazlavay.

¹⁹ A da sərdata banay maja cəved mawuzdakaya maaya maaya cay ɲgada kwa waawa amba a sərey cek da ray Gazlavay. Ara Gazlavay a, ray ɲnga, ma wuzdatara cəved e fa mey ata. Ama ata ta səpmara cəved e daa ba.

²⁰ Fara fara, ndaw a gwa ɲga hətar Gazlavay ta dey ba, ama dəga ɲnga ma ləma bəla haa wure keɖe, ndəhay a gwamara ɲga sərmara ta fa cek hay masa ɲnga ma katərwa. Cek hay a na, fa wuzdərwa Gazlavay aa ta gədaɲ mendəvey ba ɲga sərmataw, asaya, ɲnga Gazlavay Mawaca-waca. Anda keɖe, fa mey ɲga Gazlavay na, mey ata ɲga wurey amba Gazlavay a sərfatar dey-ceceh fa mebərey ata na, daa saba.

²¹ Ndəhay a fa sərmara Gazlavay na, daha. Ama a namar ray ba, a kamar suse ba anda ara Gazlavay ata ba. A wulkam na, a ray cek hay ɲga tede. Ata na, anda ata daa ləvaɲ maja cek maaya ta maaya ba na, a sərmara ba.

²² A pamara ray ata ɲga ndəhay ta lenɲesl ma səra cek, anja ara ndəhay manjar-lenɲesl.

²³ Gazlavay masa ta gədaɲ, ndaw masa ta dey ɲga sərmataw na, ata fa namar ray daa ba. Sasəkar a nam ray na, ɲgada cek mavəɖkaya ta bərey anda ndaw-magədaɲ masa ma da məcey jak. Asaya, a nam ray na, ɲgada cek hay masa ata ma vəɖmata ta har ata hay aa slam a ɲga dīyaɲ hay, aa slam a ɲga cek hay masa salay məfad leɲ aa slam a ɲga zezekw hay.

²⁴ Ara maja ɲgene, Gazlavay ma mbəkdata sem amba a kam cek hay ma ka hezey masa ata ma wudam. Anda keɖe, fa nəsmara vaw ata ta cek hay ma ka hwaray.

²⁵ Yaw, ta mbəkdamara mey masa fara fara da ray Gazlavay sem amba a jəkam sləmay fa mey membərzley. A ragadam na, ɲgada cek hay masa Gazlavay ma katərwa jak, a namatar ray. Ama Gazlavay ta ray ɲnga masa ma katərwa cek hay a na, ta mbəkdamara sem jak. ɲnga na, Gazlavay pal masa ndəhay ma da həlmamara ɲga sərmataw. *Amen.

²⁶ Ara maja ɲgene, Gazlavay ta mbəkdata sem amba a kam cek hay malamba ma ka hwaray anda ata ma wudam kalah daa mevel ata. ɲgusay a mbəkdamara meney ta zel hay anda maamandaw, a nam ta ɲgusay cəla ata hay. ɲgene ara cek malamba, ara cek ɲga key kəne ba.

²⁷ Zel hay may kəne, a mbəkdamara meney ta ɲgusay. A wudam na, si ɲga nam ta zel hay cəla ata hay. Zel a ney ta zel cəla na, ara cek ma ka hwaray kalah. Anda keɖe, fa

handamawa banay ngada ray ata, tøde ta sløra ata maaya ba ha ngene.

²⁸ Ndøhay a ngene ta wudam nga sørmara Gazlavay daa ba. Ara maja ngene Gazlavay ma mbækdata sem amba a wulkam saw, a kam cek ta cøved e ba.

²⁹ Cek hay maaya ba daa mevel ata daha. Ata fa kam cek masa ta cøved e daa ba, fa sørdamata banay ta ndøhay, fa kam dey fa cek nga ndøhay, fa kam maagway, fa kam sølen, fa kødam ndøhay vagay, fa kam baazlam da wuzlah ata, fa kam wewer fa cek nga ndøhay, fa føcam ndøhay. Asaya, ata fa slam mey a ray ndøhay,

³⁰ fa kam mbaða fa ndøhay, a wudmara Gazlavay ba, fa cødam vaw saw, fa zlapam, faa hømdamara ray ata. Mandaw mandaw ata fa søpam wewer hay mekele mekele nga key cek hay maaya ba a ndøhay. A namatar ray ngada papa ata hay ta mama ata hay ba.

³¹ Ata manjar lengesl, aa guzlam ta neneh cew cew, a wudam vaw pøreh, a søram dey-ceceh fa ndaw ba.

³² Ama, ata fa sørmara, ndøhay ma kam cek hay maaya ba anda ngene na, Gazlavay a katar sariya la. Ndøhay anda ngene hay na, ata tøde nga kødey vagay maja mebørey ata. Ta ngene he cøpa, fa kam cek hay malamba ma føna ma føna, asaya, aa hømdamata ndøhay mekele ma kam cek hay malamba anda ata.

2

Gazlavay a da katar sariya a ndøhay na, kwara?

¹ Jam adaw hay, da akwar fa mbødmatar ray a ndøhay na, mey akwar nga wurey amba Gazlavay a sørfakwar dey-ceceh fa mebørey akwar na, daa ba, maja akwar ta mebørey anda ata may. Da ka mbødmatar ray a ndøhay na, a key ngene, ka mbødam ray ngada akwar ray akwar, maja akwar fa kam cek maaya ba letek anda ata.

² Ya sørkwa Gazlavay a key sariya la, a da sørdata banay ta ndøhay ma kam cek hay malamba. Sariya nga Gazlavay a na, ara ta cøved e fara fara.

³ Akwar ndøhay ma kam cek hay malamba, ka mbødmatar ray ngada ndøhay mekele ma kam cek malamba anda akwar na, ka wulkam Gazlavay a kakwar sariya ngaa zøddakwar daa ba daw?

⁴ Gazlavay na, ara ndaw maaya, a sørda banay ta ndaw fiyaw fiyaw maja mebørey anga ba. Annga fa bøsa mebørey a, kaa ka røsmara Gazlavay a jak na, kwara? Annga ma

kakwar maaya ngene na, amba ka mbøðdamara menjey akwar, ba diya?

⁵ Akwar, ndøhay masa ray manjørdakaya ngene, ka wuðam amba ka mbøðdamara menjey akwar ba. Anda keðe, akwar fa cøhadamawa sariya nga Gazlavay ngada ray akwar ma føna ma føna. Yaw, ta pas masa Gazlavay ma da cey mevel a ray ndøhay ta mebørey fara fara na, a da katar sariya tøðe ta mebørey ata.

⁶ A da pølra mawurbay a ndaw a, a ndaw a, tøðe fa sløra maaya ta maaya ba masa anga ma ka.

⁷ Ndøhay masa ma søpam nga key maaya mandaw mandaw na, a wuðam Gazlavay a hølstar ray, a njadata aa slam anga mewedey, a wuðam nga høtey heter mendøvey ba. Gazlavay a da vølda heter mendøvey ba ha na, ngada ata.

⁸ Ama ndøhay masa ma kam høma a ray Gazlavay, ma røsmara mey masa fara fara, ma søpam nga key cek hay malamba mandaw mandaw na, Gazlavay a cey mevel la ga a ray ata, a sørdata banay la.

⁹ Ahaw, ndøhay masa ma kam cek hay malamba na, a søram banay la ga, a tøwam la. Ma da sørey banay teesed na, ndøhay *Jøwif hay, fa døba ha, ndøhay daa søkway hay siya tabiya may.

¹⁰ Ama ndøhay ma kam cek hay maaya na, Gazlavay a da hølstar ray, a njadata daa zazay aa slam anga mewedey. A da ka køne ngada ndøhay anga hay tabiya, teesed na, ngada Jøwif hay, fa døba ha, ngada ndøhay daa søkway hay siya tabiya may,

¹¹ maja Gazlavay na, a weley ndøhay ta weley ba.

¹² Gazlavay ta wuzdara kwakwas anga la a *Mawiz. Da ndøhay masa ma sørmara kwakwas a ba, a kam mebørey na, ndøhay a, aa zøðam la tabiya, ama a daa zøðam na, maja kwakwas a ba. Jøwif hay na, a sørmara kwakwas a. Ata may, da a zløbmara kwakwas a na, Gazlavay a katar sariya la anda kwakwas a ma løvey.

¹³ Gazlavay a nøkta ndøhay, ata maaya fa mey anga na, maja ata ma cøndamara kwakwas a ta slømay daada ba, ama maja ata ma kamara cek anda kwakwas a ma løvey.

¹⁴ Yaw, ndøhay mekele masa Jøwif hay ba, ma sørmara kwakwas nga Mawiz ba na, ta pas langar ata ray ata fa kam cek hay anda kwakwas nga Mawiz a ma løvey cønga. Anda keðe, kwa a sørmara kwakwas a ba na, ata fa sørmara nga key cek hay ta cøved e cønga.

15 Menjey ata na, fa wuzda Gazlavay ta wuzdatara kwakwas a sem, aa daa mevel ata. Asaya, ta pas mekele, mewulkey ata fa wuzdatara cek masa ata ma kamara maaya ta maaya ba.

16 Fara fara, pas pal Gazlavay a katar sariya la a ndəhay ta fa Yesu *Kəriste. Ta pas ŋgene, Gazlavay a da wuzdərwa mewulkey masa maɓadəkaya daa mevel ŋga ndaw a, ŋga ndaw a. *Mey-maaya-mawiya masa yah ma wuzda na, fa ləvey kəne.

Jəwif hay a səpmara kwakwas ŋga Mawiz ba na, maja me?

17 Kaa akwar *Jəwif hay na, kwara? Ka ləvam akwar na, Jəwif hay, asaya, ka wulkam ka ləvam cek hay tabiya ata ta cəved e maja ka səpmara *kwakwas ŋga Mawiz, ka zlapam ka ləvam akwar ndəhay ŋga Gazlavay.

18 Ka səpmara cek masa Gazlavay ma wudəy, asaya, kwakwas ŋga Mawiz fa wuzdakwara cəved ŋga sərey cek masa maaya ta maaya ba.

19 Ka wulkam na, ka gwamara ŋga wuzmatar cəved ŋgada ndəhay masa wulaf hay * daw? Asaya, ka wulkam na, akwar ndəhay ma wadamatar dey a ndəhay masa daa ləvaŋ daw?

20 Ndəhay ma sərə cek ba na, ka wulkam ka gwamara ŋga kətmata la daw? Asaya, ka wulkam na, ka gwamara ŋгаа sərkadamata bəza hay † daw? Ka wulkam anda keɓe maja ka ləvam kwakwas ŋga Mawiz ta wuzdakwara cek hay sem cəpa ta fa mey masa fara fara.

21 Ehe, jəkam sləmay, akwar ndəhay masa maa sərkadamata ndəhay siya, kaa sərkam ray akwar ba na, maja me? Akwar ndəhay ma kətmata ndəhay siya ŋga leley ba, kaa ka lalam na, kwara?

22 Asaya, akwar fa ləvmatar a ndəhay ka da lam vaw saw ba, kaa ka lam vaw saw saya na, kwara? Ka ləvam saya ka tam kuley ba, kaa ka lalamata cek hay da ver-kuley hay saya na, kwara?

23 Akwar fa zlapam kalah, ka ləvam ka səpmara kwakwas ŋga Mawiz, ama akwar fa zləɓmara kwakwas a saya na, kwara? Anda keɓe, a key ka pamar hwaray a Gazlavay.

2:16 2.16 2.6; 1Kwr 4.5 **2:17 2.17** 9.4; Iz 48.1 * **2:19 2.19** wulaf hay, ndəhay masa daa ləvaŋ: Pawl a wudəy ŋгаа guzley da ray ndəhay masa Jəwif hay ba masa ma səpmara Gazlavay ba. **2:19 2.19** Mt 15.14 † **2:20 2.20** bəza hay: Pawl aa guzley da ray bəza hay fara fara ba, ama da ray ndəhay masa ma səpmara mey ŋga Gazlavay maaya maaya ba araŋ. **2:21 2.21** Mt 23.3-4; Jar 7.19

²⁴ Ara anda mawuzlalakaya daa derewel nga Gazlavay ma løyey: «Ndøhay siya faa guzlam mey maaya ba da ray Gazlavay maja akwar Jøwif hay.»

²⁵ Akwar Jøwif hay, ka løyam Gazlavay a særkwar ta fa *mesley mandawal. Da akwar fa søpmara kwakwas nga Mawiz ta cøved e na, mesley mandawal a, a jønkwar la. Ama da akwar fa søpmara kwakwas a ta cøved e daa ba na, mesley mandawal a ara cek nga tede ngada akwar, fa da jønkwar daa ba.

²⁶ Anda kedø, da ndaw mandawal manjar nga sley, a søpa kwakwas nga Mawiz ta cøved e na, Gazlavay a nøka ndaw a anda ndaw maslakaya mandawal ba daw?

²⁷ Da ray ngene, ndøhay daa sækway hay mekele mandawal manjar nga sley masa ma søpmara kwakwas ta cøved e, a mbøðmakwar ray la. A da mbøðmakwar ray na, maja akwar Jøwif hay, akwar ta kwakwas akwar mawuzlalakaya, asaya, akwar fa slam mandawal, ama ta ngene he cøpa, akwar fa zløbmara kwakwas a cønga.

²⁸ Ndaw a da sørey anga ndaw Jøwif fara fara na, ta fa me? A da sørey anga ndaw Jøwif fara fara na, ta fa cek masa ndaw ma gwa nga høtar ta dey fa vaw anga daada ba, anda meløyey, ta fa mesley mandawal daada ba.

²⁹ Ama ndaw Jøwif fara fara na, ara ndaw masa Gazlavay ma mbøðdara mevel anga sem. Ndaw maslakaya mandawal fara fara na, ara ndaw masa *Mesøfney nga Gazlavay fa key sløra daa mevel anga, ba na, ara ndaw masa ma søpey kwakwas mawuzlalakaya daada ba. Ndaw masa Jøwif fara fara na, ara ndaw masa Gazlavay maa hømnda, ba na, ara ndaw masa ndaw-magødanj maa hømnda ba.

3

Ndaw masa manjar mebørey na, daha daw?

¹ Da anda kedø na, *Jøwif hay a fønmeta ndøhay mekele fa mey nga Gazlavay na, ta me? *Mesley mandawal na, ara cek ma jøney ndaw daw?

² Ahaw, Jøwif hay a fønmeta ndøhay mekele na, ta cek hay ga. Teesød na, Gazlavay a vødatara mey anga na, ngada Jøwif hay a.

³ Fara fara, ndøhay ga da wuzlah ata fa tøbmara mey nga Gazlavay daa ba. Kaa Gazlavay na, a mbøðda mewulkey anga, a ka cek anda aa ma løyey saba maja ata daw?

⁴ Kay, fa da mbəfda daa ba. Kwa ndəhay tabiya fa mbərklam na, Gazlavay a da ka cek anda anğa ma ləvey cənğa. Ara anda mawuzlalakaya daa dərewel nğa Gazlavay ma ləvey:

«Kah, Bay Gazlavay, mey akah tabiya
ara mey fara fara ta cəved e.

Da ndaw aa dədfaka mey na,
ka gwa nğa wuzda ara mebərey akah ba.»

⁵ Da kwa ndəhay siya a da ləvam mebərey masa aləkwa ma kakwa fa wuzdərwa maaya nğa Gazlavay na, ya da ləkwə kwara? Yaa guzley kaa na, anda ndəhay magədan maa guzlam may. Kaa da Gazlavay a sərdandakwar banay maja mebərey aləkwa na, ya gwakwa nğa ləvey Gazlavay a na, fa key cek ta cəved e daa saba daw?

⁶ Kay, kəne ba! Gazlavay na, ara ndaw ma key cek ta cəved e. Da Gazlavay fa key cek ta cəved e daa ba na, kaa a da katar sariya a ndəhay ta cəved e na, kwara?

⁷ Da kwa ndaw a ləvey, mekey cek ta cəved e ba na, fa wuzdatara nğada ndəhay Gazlavay ara ndaw maa guzley mey fara fara, nğa wuzdərwa gədan anğa. Da kəne na, Gazlavay a daa zəfdata ndəhay maja mebərey ata na, fa me dəba me?

⁸ Ndəhay siya fa ləvam: «Kakwa cek hay maaya ba amba ndəhay a sərmara Gazlavay na, ara ndaw maaya kalah.» Ahaw, a ləvam anda kefe ba, kwara? Kwa ndəhay siya na, faa guzlam maaya ba da ray adaw, a ləvam ya faa guzley anda kefe may. Sariya a təfdata ndəhay a la, təde fa mewulkey ata maaya ba ha ngene.

Ndaw ma key cek anda Gazlavay ma wudəy na, daha daw?

⁹ Kaa wure kefe na, kwara? Aləkwa *Jəwif hay na, ya fənmatakwa ndəhay siya hay daw? Kay, ya fənmatakwa ba səlak! Ya ta wuzdakwara cay, ndəhay Jəwif hay ta ndəhay masa Jəwif hay ba cəpa na, mebərey fa fəntar ray.

¹⁰ Ara anda mawuzlalakaya daa dərewel nğa Gazlavay ma ləvey:

«Kwa ndaw masa maaya fa mey nğa Gazlavay na, daa ba,
kwa ndaw pal daa ba səlak.

¹¹ Kwa ndaw masa ta lenğesl ma səra cek na, daa ba,
kwa ndaw pal ma wudəy nğa səpa
cəved nğa Gazlavay na, daa ba.

¹² Ata cəpa ta mbəkdamara cəved nğa Gazlavay sem.
Ata cəpa daa slam a ta mbəfmar dəba sem a Gazlavay.

Kwa ndaw ma key cek maaya na, daa ba.

Kwa ndaw pal daa ba sɔlak.

¹³ Mey ma bawa da mey ata na,
maaya ba anda cɔvay mawurkaya ma zey.

Neneh ata na, fa tɔknata ndɔhay kalah.

Ndɔvez ŋga mey ata na,
a kɔdey ndaw vagay anda mewer ŋga zezekw.

¹⁴ Mey ma bawa da mey ata na,
ara mey meedɔwek e, ma nɔsa ndaw.

¹⁵ Salay ata na, fa hɔldata ŋga wusey vaw fiyaw fiyaw
ŋga kɔdey ndɔhay vagay.

¹⁶ Kwa daa wura daa wura daa mepɔkey ata na,
fa nɔsam cek hay, fa sɔrdamata banay ta ndɔhay.

¹⁷ Asaya, a sɔrmara ma handawa zazay
a wuzlah ndɔhay ba.

¹⁸ Ata na, a zluram ta Gazlavay ba sɔlak.»

¹⁹ Ahaw, alɔkwa fa sɔrkwa, cek hay tabiya masa *kwakwas ŋga Mawiz maa sɔrkada na, ara ŋgada ndɔhay masa Gazlavay ma vɔldatara kwakwas a. Anda kedɛ, kwa ndaw ma gwa ŋga wura mey amba a diya ray anɔa na, daa ba, ndɔhay cɔpa ta mebɔrey fa mey ŋga Gazlavay.

²⁰ Maja ŋgene, ndaw masa maaya fa mey ŋga Gazlavay maja anɔa ma sɔpa kwakwas ŋga Mawiz tabiya na, daa ba. Kwakwas a, a wuzwa na, mebɔrey ŋga ndɔhay gway.

Ndɔhay a da tɔram maaya fa mey ŋga Gazlavay na, kwara?

²¹ Wure kedɛ, Gazlavay ta wuztar cɔved la a ndɔhay amba a pata ŋga ndɔhay maaya fa mey anɔa. Cɔved e na, kwa mey ŋga *kwakwas ŋga Mawiz da hwad a daa ba sɔlak. Ama kwakwas a, lej ndɔhay ma tɔla mey ŋga Gazlavay taa guzlam la da ray cɔved e dɔga zleezle, a lɔvam Gazlavay a wuzwa cɔved la mawiya.

²² Gazlavay ma pata ŋga ndɔhay maaya fa mey anɔa na, maja ata ma pamara Yesu *Kɔriste ŋga ndaw ata fara fara. Gazlavay a pey ŋga ndɔhay maaya fa mey anɔa na, ndɔhay tabiya masa ma tɔbmara mey ŋga Yesu, maja Gazlavay a weley ndɔhay ta weley ba.

²³ Ndɔhay tabiya ta kam mebɔrey la. Anda kedɛ, ata dɔrenj ta maaya ŋga Gazlavay.

²⁴ Ama Gazlavay ta sɔrfatar dey-ceceh la, a tɔrdata ŋga ndɔhay maaya fa mey anɔa ta fa Yesu Kɔriste, ndaw masa

ma ləhdata daa mebərey. A ka kəne na, ara ŋga maaya, ba na, ta cek ba.

²⁵ Ara Yesu a masa Gazlavay ma velda ŋga məcey amba a mbəkdatara mebərey ŋga ndəhay ta fa mambaz aŋga. Ara mambaz a ma mbədwa fa hwadam mazlanjalakaya ŋgada ndəhay ma pamara ŋga ndaw ata fara fara. Gazlavay a ka anda keđe na, amba a wuzdatara a ndəhay, aŋga na, ndaw ma ka cek ta cəved e. Ahaw, daa masa aŋga ma sərdara banay ta ndəhay maja mebərey ata masa zleezle daa ba heyey na, Gazlavay ta ka cek ta cəved e la.

²⁶ Daa ŋgene, Gazlavay ta bəsa mebərey a la. Gazlavay a ka cek ta cəved e wure keđe may, maja ta fa meməcey ŋga Yesu na, a gwa ŋga key sariya ta cəved e. Asaya, a gwa ŋga pata ndəhay masa ma təbmara mey ŋga Yesu ŋga ndəhay maaya fa mey aŋga.

²⁷ Da anda keđe na, aləkwa ta cəved ŋga zlepey maja aləkwa ma kadakwa sləra maaya ta kwakwas ŋga Mawiz daw? Kay! aləkwa ta cəved daa ba. Aləkwa ta cəved daa ba na, maja me? Maja cek mahura fa mey ŋga Gazlavay na, ara mesəpey kwakwas ba, ama ara metəbey-mey ŋga Yesu.

²⁸ Ahaw, ya sərmara fara fara Gazlavay a nəka ndaw aŋga maaya fa mey aŋga na, maja ndaw a ma təba mey ŋga Yesu, ba na, maja aŋga ma səpa kwakwas ŋga Mawiz tabiya ba.

²⁹ Ka wulkam Gazlavay na, ara Gazlavay ŋga *Jəwif hay daada daw? Ndəhay masa Jəwif hay ba na, ara Gazlavay ata may, ba diya? Ahaw, fara fara aŋga na, ara Gazlavay ŋga ndəhay masa Jəwif hay ba may,

³⁰ maja Gazlavay na, aŋga pal. Da Jəwif hay a pamara Yesu ŋga ndaw ata fara fara na, Gazlavay a tərdata ŋga ndəhay maaya la fa mey aŋga. Yaw, da ndəhay daa səkway mekele a pamara Yesu ŋga ndaw ata fara fara na, Gazlavay a tərdata la ŋga ndəhay maaya fa mey aŋga may.

³¹ Anda keđe, da ya pakwa Yesu ŋga ndaw aləkwa fara fara na, a wudəy ŋga ləvey aləkwa fa tərdata kwakwas ŋga Mawiz ŋga cek ŋga tede daw? Kay, kəne ba! Sasəkar aləkwa fa kərzakwa kwakwas a maaya maaya ta har cew cew jak.

4

Gazlavay a tərda Abəraham maaya fa mey aŋga

3:24 3.24 5.17; Ef 2.8; Tit 3.7 **3:25 3.25** mambaz: Mt 26.28; Ef 2.13; Kwa 1.20; Heb 9.12-14; 1Jn 1.7; CWJ 1.5; 5.9; **zazay:** 5.1; 2Kwr 5.18-21; Ef 2.14-16; Kwa 1.20; **ndaw ma ka cek ta cəved e:** 1.17; 3.3-4 **3:27 3.27** 3.1, 21, 31; 8.2
3:28 3.28 Gal 2.16 **3:29 3.29-30** 3.22; 4.11-12 **3:31 3.31** 6.15; 8.2-4

¹ Yaw, kaa ya wulkakwa da ray *Abərahām, dede aləkwa zleezle na, kwara? Ta hətəy cek ta gədaŋ aŋga la daw?

² Da Gazlavay ta pa Abərahām ŋga ndaw maaya fa mey aŋga la ta fa sləra aŋga masa maaya * na, anja Abərahām a, təde a zlepey. Ama ta gwa ŋga zlepey fa mey ŋga Gazlavay daa ba.

³ Ara anda mawuzlalakaya daa dərewel ŋga Gazlavay ma ləvey: «Abərahām a təba mey masa Gazlavay ma ləvar. Anda kefe, Gazlavay a nəka na, aŋga ndaw maaya fa mey aŋga, maja aŋga ma pa ŋga ndaw aŋga fara fara.»

⁴ Ndaw ma key sləra na, a hətəy dala. Dala ha ara mawurbay ŋga sləra aŋga, ba na, a vəldamara ŋga tede ba.

⁵ Ama ndaw ma nəkey dey fa sləra aŋga ba, a pa Gazlavay ŋga ndaw aŋga fara fara na, Gazlavay a pa ndaw a la ŋga ndaw maaya fa mey aŋga. Ara Gazlavay ma gwa ŋga pa ndaw ta mebərey ŋga ndaw maaya fa mey aŋga maja Gazlavay a nəka na, ndaw a ma təba mey aŋga la.

⁶ Zleezle Bay *Davit taa guzley la letək kəne. A ləvey ndəhay masa Gazlavay ma pata ŋga ndəhay maaya fa mey aŋga kwa ta nəka sləra ata daa ba na, mepəsey-mey ŋga Gazlavay aa da ray ata.

⁷ Maaya ŋga Gazlavay aa da ray ndəhay
masa Gazlavay ma mbəkdatara mebərey ata sem.

Maaya ŋga Gazlavay aa da ray ndəhay
masa Gazlavay ma nəkey dey fa mebərey ata saba.

⁸ Maaya ŋga Gazlavay aa da ray ndəhay
masa Gazlavay ma sləfa mebərey ata saba.

⁹ Davit e maa guzley anda kefe na, a wufey ŋga ləvey maaya ŋga Gazlavay aha aa da ray ndəhay masa maslakaya mandawal daada gway daw? Kay, kəne ba! Maaya ŋga Gazlavay a na, aa da ray ndəhay masa mandawal manjar ŋga sley may. Ahaw, ya ta ləvkwa la: «Gazlavay a nəka na, Abərahām aŋga ndaw maaya fa mey aŋga, maja aŋga ma pa ŋga ndaw aŋga fara fara.»

¹⁰ Masa Gazlavay ma tərda Abərahām a ŋga ndaw maaya fa mey aŋga na, daa masa aŋga ta sla mandawal cay daw, daa ba daw? Fara fara daa ŋgene na, Abərahām a ta sla mandawal daa ba aran.

* **4:2 4.2** Daa masa Yesu aa da bəla na, Jəwif hay a ləvam Abərahām na, ara ndaw maaya fa mey ŋga Gazlavay maja sləra masa aa ma ka. (Nəka Jak 2.21-23.) Ama Pawl a ləvey Abərahām na, ara ndaw maaya fa mey ŋga Gazlavay maja aŋga ma pa Gazlavay ŋga ndaw aŋga fara fara. (Nəka 4.9leŋ Gal 3.6-9.) **4:2 4.2** Jak 2.21 **4:3 4.3** MC 15.6; Gal 3.6; Jak 2.23 **4:6 4.6-8** Ps 32.1-2

¹¹ Daa masa Abərahām ma sla mandawal daa ba aran na, Gazlavay ta nəka cay anğa ndaw maaya fa mey anğa, maja anğa ma pa Gazlavay a nğa ndaw anğa fara fara. Fa dəba ha, Gazlavay ta', a ləvar nğa sla mandawal. *Mesley mandawal a ngene na, fa wuzda anğa ndaw maaya fa mey nğa Gazlavay. Anda keđe, Abərahām na, ara papan nğa ndəhay masa mandawal manjar nğa sley, masa ma təbmara mey nğa Gazlavay.

¹² Asaya, anğa papan nğa ndəhay masa mandawal maslakaya may. Ya wufey nğaa guzley keđe na, da ray ndəhay maslakaya mandawal cəpa ba, ama yaa guzley na, da ray ndəhay maslakaya mandawal masa ma pamara Gazlavay nğa ndaw ata anda papa aləkwa Abərahām ma pa Gazlavay nğa ndaw anğa fara fara daa masa anğa ta sla mandawal daa ba aran.

Gazlavay a da vəltar a ndəhay ma pamara nğa ndaw ata fara fara na, me?

¹³ Gazlavay a ləvar nğada *Abərahām ta nğada bəza hay ma da yamawa da hwad anğa na, a da vəldatara bəla cəpa nğada ata. Gazlavay a da vəldatara bəla ha na, ara maja Abərahām ma nar ray a *kwakwas nğa Mawiz ba, ama maja aa ma pa Gazlavay a nğa ndaw anğa fara fara. Ara maja ngene, Gazlavay ma pa nğa ndaw maaya fa mey anğa.

¹⁴ Anja da Gazlavay a da vəltar cek a ndəhay maja ata ma səpam kwakwas daada na, ngene, mepey Gazlavay nğa ndaw fara fara, ara cek nğa tede. Asaya, anja cek masa Gazlavay ma ləvey a da vəldatara ha na, ara cek nğa tede may.

¹⁵ Yaw, da ndəhay a zləbmara kwakwas na, Gazlavay a cey mevel. Ama da anja kwakwas daa ba na, ndəhay a da zləbam me?

¹⁶ Anda keđe, cek maaya masa Gazlavay ma da vəlda na, a da vəldatara nğada ndəhay masa ma pamara nğa ndaw ata fara fara. A da vəldatara na, nğa maaya maja a wufey ndaw kalah. Gazlavay ma ləvey a da vəltar cek heyey na, ara nğada bəza hay ma da yamawa da hwad Abərahām tabiya. A da vəlda cek aha na, nğada ndəhay ma təba mey anğa masa ma səpmara kwakwas nğa Mawiz daada ba, ama nğada ndəhay mekele tabiya ma pamara nğa ndaw ata anda Abərahām zleezle. Abərahām na, ara papa aləkwa, aləkwa tabiya ndav.

¹⁷ Ara anda mawuzlalakaya daa dərewel nğa Gazlavay, Gazlavay a ləvar a Abərahām: «Ya ta paka la nğa papan

nga sækway hay ga.» Yaw, fa mey nga Gazlavay na, Abərahām ara papa aləkwa. Anğa ta pa Gazlavay la nga ndaw anğa fara fara, Gazlavay ma sləkfdadatərwa ndəhay daa meməcey, asaya, ma gwa nga kata cek hay masa ma kam daa ba arañ.

¹⁸ Kwa ndəhay siya a wulkam Gazlavay a gwa nga vələr cek ngada Abərahām anda aa ma ləvar heyey daa ba na, Abərahām a fa pa Gazlavay nga ndaw anğa fara fara cəngə. Anda kedə, anğa ta tərey la nga «papaŋ nga sækway hay ga» anda Gazlavay maa guzlar, a ləvar: «Bəza hay da hwad akah a laslam la ga anda wurzla hay.»

¹⁹ Daa masa Gazlavay maa guzlar ngene na, Abərahām a key mevey temere. Abərahām a səra anğa maraw, gədan anğa daa saba, asaya, a səra ngwas anğa Sara na, anğa madanğwas cay. Ta ngene he cəpa, Abərahām fa təba Gazlavay a kar cek la anda aa ma ləvar cəngə.

²⁰ Fara fara, anğa fa təba mey masa Gazlavay ma ləvar. A wulkey cew cew da ray cek masa Gazlavay ma da vəldara ba. Ama fa hətəy gədan ma fəna ma fəna daa metəbey-mey nga Gazlavay, fa həslar ray.

²¹ Yaw, Abərahām a səra Gazlavay aa ta gədan nga kara cek anda aa ma ləvar.

²² Ara maja ngene, Gazlavay ma pa nga ndaw maaya fa mey anğa.

²³ Mey ma ləvey: «Gazlavay a pa nga ndaw maaya fa mey anğa» na, mawuzlalakaya daa dərewel nga Gazlavay na, ngada Abərahām daada ba,

²⁴ ama mey a mawuzlalakaya ngada aləkwa may. Da aləkwa fa pakwa Gazlavay nga ndaw aləkwa fara fara, Gazlavay ma sləkfdatərwa Bay aləkwa Mahura Yesu daa meməcey na, Gazlavay a, a pandakwar nga ndəhay maaya fa mey anğa la may.

²⁵ Yesu a na, Gazlavay ta vəlda la a har ndəhay nga məcey maja mebərey aləkwa. Fa dəba ha, ta sləkfdawa sem daa meməcey amba Gazlavay a pandakwar nga ndəhay maaya fa mey anğa.

5

Cek masa ndaw ma da hətər maja anğa maaya fa mey nga Gazlavay na, wura?

¹ Ahaw, Gazlavay a tərdandakwar nga ndəhay maaya fa mey anğa na, maja aləkwa ma pakwa nga ndaw aləkwa

fara fara. Anda keɗe, aləkwa manjatakaya daa zazay fa mey anɗa maja Bay aləkwa Mahura, Yesu *Kəriste.

² Ara Yesu ma wəndakwar cəved amba ya sərkwə maaya nɗa Gazlavay maja aləkwa fa pakwa nɗa ndaw aləkwa fara fara. Aləkwa majaratakaya daa mey anɗa ta fa maaya anɗa ha. Asaya, aləkwa faa səmkwa maja ya sərkwə ya hətkwa mewedey anɗa la a ray aləkwa.

³ Ara nɗene daada ba, ama aləkwa faa səmkwa saya daa masa aləkwa fa sərkwə banay, maja banay a, a jəndakwar nɗa bəsey banay hay mekele mekele.

⁴ Məbəsey banay na, a wəley gədan nɗa jerey. Yaw, da aləkwa majaratakaya na, ya sərkwə ya da hətkwa cek masa Gazlavay ma ləvey a wəldandakwara la heyey.

⁵ Cek aha na, fa da pandakwar hwaray daa ba, maja Gazlavay ta wuzdərwa mewudəy-vaw anɗa sem ta fa Mesəfney anɗa masa aa ma wəldandakwara.

⁶ Daa masa aləkwa ta gədan nɗa ləhda ray aləkwa daa ba na, Kəriste ta məcey la maja aləkwa, aləkwa ndəhay ma kam həma a ray Gazlavay. A məcey a na, ta pas masa Gazlavay ma wala ɗar a.

⁷ Ya sərkwə anɗa ta banay amba ndaw a təba nɗa məcey aa slam a nɗa ndaw ma ka cek ta cəved e. Ayəwa, da kwa ndaw a gwa nɗa məcey aa slam a nɗa ndaw meekwed-mey kwa.

⁸ Ama kwa aləkwa ta məbərey na, ta nɗene he cəpa, Kəriste ta məcey la maja aləkwa cənɗa. Ara anda keɗe Gazlavay ma wuzda, anɗa fa wudndakwar kalah.

⁹ Wure keɗe, Gazlavay ta tərđandakwar la nɗa ndəhay maaya fa mey anɗa ta fa mambaz nɗa Yesu ma mbədwa daa meməcey anɗa. Anda keɗe, ya sərkwə fara fara Yesu Kəriste a ləhdandakwar la, Gazlavay fa da ceɗ mevel da ray aləkwa daa saba.

¹⁰ Daa masa aləkwa masa-gəra hay nɗa Gazlavay na, Gazlavay a ta cəmdakwar ɗay la ta anɗa ray anɗa, ta fa meməcey nɗa Bəzey anɗa. Wure keɗe, aləkwa macəmkaya ɗay ta anɗa. Anda keɗe, ya sərkwə fara fara a ləhdandakwar la maja Bəzey anɗa ma sləkɗawa sem daa meməcey.

5:1 5.1 3.21-30; **Gazlavay a tərđandakwar nɗa ndəhay maaya fa mey anɗa:** 3.25-26 **5:2 5.2** maaya nɗa Gazlavay: 3.21; 6.14; 2Kwr 6.1; 12.9; Gal 1.6; 5.4; Ef 2.5-8; 1Pi 1.10-11; 4.13-14; 5.10, 12; **mepey Yesu ndaw aləkwa fara fara:** Rm 3.24; 8.17-18; **mewedey anɗa:** 8.17-18; 9.23; 1Kwr 2.7; 2Kwr 3.18; 4.17; Kwa 1.27; 3.4; 1Tes 2.12; 2Tm 2.10; 1Pi 5.1 **5:3 5.3-5** Jak 1.2-3, 12; 1Pi 1.5-7 **5:5 5.5** 8.39; Ps 22.6; Heb 6.19 **5:6 5.6-7** 1Pi 3.18 **5:8 5.8** Jan 3.16 **5:9 5.9** 1.18; 1Tes 1.10 **5:10 5.10** 2Kwr 5.18-20; Kwa 1.20-22

¹¹ Ara kedfe daada ba, ama aləkwa faa səmkwā da ray Gazlavay maja Bay aləkwa Mahura Yesu Kəriste may. Ara maja anḡa, aləkwa macəmkaya ta Gazlavay.

Mey da ray Adam ta Kəriste

¹² Mebərey a sawa a bəla na, ta fa ndaw pal mezəley *Adam. Ndəhay a məcam na, maja mebərey a. Anda kedfe, meməcey fa paslata ndəhay da bəla maja ndəhay tabiya ata ta mebərey.

¹³ Dəga Gazlavay ta wuzdara kwakwas anḡa a *Mawiz daa ba aran na, mebərey aa daha da bəla cay. Ama daa masa kwakwas a daa ba aran na, Gazlavay fa sləfa mebərey nḡa ndəhay daa ba may.

¹⁴ Ama ta nḡene he cəpa dəga fa Adam haa kasl fa Mawiz na, ndəhay tabiya ta ləham fa meməcey daa ba cənḡa. Adam ta cənar mey a Gazlavay daa ba. Kwa ndəhay a ta kam mebərey anda Adam a daa ba na, ta məcam sem cənḡa. Ya gwakwa nḡa wa Adam a na, ta ndaw ma da sawa.

¹⁵ Ama Adam a na, ata letək ta ndaw ma da sawa ha ba. Mebərey nḡa Adam anḡa wal ta cek maaya masa Gazlavay ma da vəldatara a ndəhay maja mewudəy-vaw anḡa. Ahaw, fara fara ndəhay ga ta məcam sem maja mebərey nḡa ndaw pal. Ama, Gazlavay a katar maaya la ma fəna a ndəhay ga. A da katar maaya ha na, ta fa ndaw pal mezəley Yesu *Kəriste.

¹⁶ Cek masa ndəhay ma hətam ta fa Gazlavay na, a fəna cek masa ndəhay ma hətam ta fa ndaw pal mezəley Adam. Ara anḡa ma handərwa mebərey a bəla. Anda kedfe, mebərey masa ndaw pal ma ka ha na, sariya nḡa Gazlavay ta təfdata ndəhay sem maja. Ama maaya masa Gazlavay ma katara a ndəhay na, a pata ndəhay a nḡa ndəhay maaya fa mey anḡa. Anda kedfe, kwa ndəhay a, ata ta mebərey ga na, sariya nḡa Gazlavay fa da təfdata daa ba.

¹⁷ Ahaw, fara fara ndaw pal ta key mebərey la. Anda kedfe, meməcey ta kəfda ndəhay tabiya sem maja ndaw aha. Ama ndaw mekele daha wal, ara Yesu Kəriste. Ara ta fa anḡa, Gazlavay ma katar maaya a ndəhay ma fəna ma fəna, a ndəvey ba, a cəmtar dəy ta anḡa ray anḡa. Maja nḡene, ndəhay a hətam heter mendəvey ba la, asaya, a da wam da ray cek hay bama.

¹⁸ Nəka, ndəhay tabiya na, sariya ta təfdata sem maja mebərey nḡa ndaw pal, Adam. Ama ndaw pal daha, ara Yesu Kəriste. Anḡa na, ara ndaw ma key cek maaya ta

cøved e. Ara ta fa anġa Gazlavay a pata ndøhay nġa ndøhay maaya fa mey anġa. Da ray nġene, ndøhay a høtam heter mendøvey ba la.

¹⁹ Ahaw, ndøhay ga ata ta mebørey maja ndaw pal daha ma cønar mey a Gazlavay ba. Ama ndaw pal daha, ara Yesu Køriste. Anġa na, ta cønar mey la a Gazlavay. Da ray nġene, ndøhay ga ta tøram nġa ndøhay maaya la fa mey nġa Gazlavay maja ndaw aha.

²⁰ Gazlavay ta wuzdatara kwakwas anġa la a ndøhay. Anda keðe, ndøhay fa kam mebørey ma føna ma føna. Ama daa masa ndøhay fa kam mebørey ma føna ma føna na, Gazlavay fa key dey-ceceh, fa wuzdatara mewudfey-vaw anġa ma føna ma føna a ndøhay may.

²¹ Mebørey a høtey gøðanġ da ray ndøhay nġaa zøðdata na, ta fa memøcey. Ama wure keðe maaya nġa Gazlavay aa da ray ndøhay. Gazlavay na, aa ta gøðanġ nġa pata ndøhay nġa ndøhay maaya fa mey anġa. A wuzdørwa maaya anġa ha amba ya høtkwa heter mendøvey ba ta fa Bay aløkwa Mahura Yesu Køriste.

6

Ndaw nġa Yesu a key mebørey mandaw mandaw daw?

¹ Kaa wure keðe na, ya da løvkwā kwara? Maaya na, ya kakwa mebørey mandaw mandaw amba Gazlavay a sørfandakwar dey-ceceh, a wudndakwar ma føna ma føna daw?

² Kay, køne ba sølak! Ta dey nġa mebørey na, aløkwa anda ndøhay mamøctakaya. Mebørey a gwa a wandakwar saba. Kaa wara ya njakwa mandaw mandaw daa mebørey na, kwara døba wura?

³ Ka sørmara maaya daa masa aløkwa ma høtkwa *baptem na, aløkwa macømkaya ta Yesu *Køriste. Anda meløvey, aløkwa ma mæckwa la ta anġa may.

⁴ Daa masa aløkwa mamøctakaya ta Køriste daa yam nġa baptem na, nġene anda aløkwa mapøshatakaya ta anġa amba menjey aløkwa a tørey mawiya. Menjey aløkwa a tørey mawiya na, letek anda Gazlavay Papanġ ma sløkdødørwa Yesu daa memøcey ta gøðanġ anġa masa maaya kalah.

⁵ Ahaw, aløkwa ma mæckwa la anda anġa, anda keðe, aløkwa macømkaya ta anġa. Da ray nġene, ya da sløkdøkurwa daa memøcey anda anġa may.

6 Ya sərkwā daa masa Yesu ma mæcey fa hwadam mazlanḡalakaya na, menjey aləkwa masa zleezle aa fa hwadam a ta pas ḡgene may amba menjey aləkwa masa zleezle he a ndəvey. Anda keḡe, aləkwa beke ḡga mebərey saba,

7 maja ndaw masa mamæckaya na, mebərey a wa saba.

8 Yaw, da aləkwa mamæctakaya ta Kəriste na, ya sərkwā ya da njakwa ta dey bama ta ḡga may.

9 Ya sərkwā fara fara Kəriste na, ta sləkḡfawa sem daa memæcey. Yaw, ḡga fa da mæcey daa saba, memæcey fa da wey da ray a daa ba may.

10 Kəriste ta mæcey la dey pal maja ndəhay tabiya. Ta fa memæcey ḡga ha na, mebərey a gwa a wandakwar saba. Wure keḡe na, ḡga ta dey, manjakaya da cakay Gazlavay.

11 Akwar may, akwar kəne. Sərmara, akwar na, mamæctakaya, mebərey fa wakwar daa saba. Wure keḡe, akwar ta dey, manjatakaya ta Gazlavay maja akwar macəmkaya ta Yesu Kəriste.

12 Anda keḡe, ka da vəlmar cəveḡ a mebərey ḡga wey da ray vaw akwar ma da mæcey ḡgene ba. Cek hay maaya ba masa akwar ma wuḡam kalah na, ka da pamara mewulkey akwar a ray a ba.

13 Ka da vəldamara vaw akwar ḡgada mebərey amba a tərda vaw akwar ḡga cek ma ka sləra malamba ba. Ama vəldamara ray akwar na, ḡgada Gazlavay anda ndəhay masa mamæctakaya ma sləkḡfamawa daa memæcey. Vəldamara ray akwar tabiya a Gazlavay amba a tərdaḡwar ḡga ndəhay ma ka cek maaya ta cəveḡ e.

14 Anda keḡe, ara mebərey ma da wey da ray akwar saba, maja akwar fa səpmara *kwakwas ḡga Mawiz daa saba, ka səpam na, ḡga hətəy maaya ḡga Gazlavay.

Aləkwa na, ndəhay ma ka cek maaya daw, maaya ba daw?

15 Kaa ya da kakwa na, kwara? Da aləkwa fa səpkwa *kwakwas ḡga Mawiz daa saba, ya səpkwa maaya ḡga Gazlavay na, aləkwa ta cəveḡ ḡga key mebərey daw? Kay, daa ba!

16 Ka sərmara da ka vəldamara ray akwar ḡgada ndaw, ka ləvmar ka namar ray la na, akwar ma tərām sem ḡga beke ḡga hay, ba diya? Anda keḡe, da akwar ma vəlmar cəveḡ sem a mebərey ḡga wey da ray akwar na, ḡgene akwar beke hay ḡga mebərey a, asaya, akwar fa cəhadamawa memæcey a ray akwar. Ama da akwar fa namar ray a Gazlavay na, akwar ta tərām sem ḡga beke

annga hay, anda keɗe, a pakwar la nga ndəhay maaya fa mey annga.

¹⁷ Zleezle na, akwar beke nga meɓərey, ama wure keɗe akwar fa təɓmara mey nga Gazlavay masa ndəhay maa sərkadamakwara ta mevel pal. Ya kakwa suse a Gazlavay maja.

¹⁸ Gazlavay ta pəskakwar sem daa beke nga meɓərey. Anda keɗe, ka da kam cek masa maaya ta cəved e.

¹⁹ Ya wakwara mey a ta beke keɗe na, maja annga ta banay ngada akwar amba ka cəndamara mey a. Zleezle na, akwar anda beke hay. Ka ta vəldamara ray akwar la nga key cek hay malamba ma həldakwar nga rəsa Gazlavay. Ama wure keɗe na, vəldamara ray akwar tabiya ngada Gazlavay amba ka kam cek masa maaya ta cəved e anda akwar na, beke annga hay. Anda keɗe, menjey akwar a mbafar la a Gazlavay.

²⁰ Zleezle daa masa akwar beke nga meɓərey na, ka wufam nga key cek masa maaya ta cəved e ba.

²¹ Daa ngene na, akwar fa kam cek hay malamba masa fa pakwar hwaray wure keɗe. Kaa cek maaya masa akwar ma hətam da hwad a na, me? Sasəkar cek hay a ngene na, fa handawa meməcey a ray akwar jak, ba diya?

²² Wure keɗe na, Gazlavay ta pəskakwar sem daa beke nga meɓərey. Anda keɗe, akwar ndəhay ma ka sləra nga Gazlavay. Cek maaya masa akwar ma hətam na, ara menjey akwar maaya ma mbafar a Gazlavay. Asaya, menjey akwar a, a da vəkwar heter mendəvey ba nga sərmataw.

²³ Nəka, cek mehətey fa meɓərey na, ara meməcey. Ama cek masa Gazlavay ma vəlda nga maaya na, ara heter mendəvey ba maja aləkwa macəmkaya ta Yesu *Kəriste, Bay aləkwa mahura.

7

Kwakwas nga Mawiz a da wey da ray aləkwa saba na, ta vara?

¹ Məlma adaw hay, ya faa guzlkwar, akwar masa ma sərmara *kwakwas nga Mawiz. Ka sərmara kwakwas a, a wey da ray ndaw na, daa masa ndaw aha annga ta dey gway.

² Wakwa mey a ta ngwas da way zel. Daa masa zel e aa ta dey d'agay na, ngwas a, aa ta cəved nga ley zel mekele daa ba, maja kwakwas nga Mawiz a vəlar cəved ba. Ama da zel e ta məcey sem na, ngwas a, aa ta cəved nga ley zel mekele, kwakwas a, a təkə saba.

³ Anda kede, da ηgwas masa zel e aa ta dey, a ley zel mekele na, ηgene ηgwas aha ta ley vaw sem da palah. Ama da zel e ta mōcey sem na, kwakwas a, a vōlar cōved ηga ley zel mekele. ηgene, ara meley-vaw saw da palah ba.

⁴ Məlma adaw hay, ηgada akwar na, aa letek kōne may, kwakwas ηga Mawiz fa wey da ray akwar daa saba. Akwar anda ndōhay mamōctakaya maja *Kōriste ta mōcey la aa slam a ηga akwar. Wure kede, akwar na, ηgada anηa, ndaw masa Gazlavay ma slōkfdadōrwa daa memōcey. Akwar macōmkaya ta anηa amba ka kamar slōra maaya ma mbafar.

⁵ Zleezle daa menjey alōkwa na, alōkwa fa kakwa cek hay saw anda mevel alōkwa ma wudēy gway. Kwakwas ηga Mawiz a wuzdandakwara cek hay masa ma kar mebōrey a ndaw. Masa alōkwa ma sōrtakwa cek hay a la na, sasōkar alōkwa fa katakwa ma fōna ma fōna jak. Cek hay a fa hōldandakwar ηga key slōra maaya ba ma handawa memōcey a ray alōkwa.

⁶ Zleezle alōkwa anda beke hay maja kwakwas ηga Mawiz, alōkwa anda ndōhay magōrcatakaya daa fōrsōne. Wure kede, alōkwa mapōskatakaya dasi har ηga kwakwas a, amba ya kakwa slōra ηgada Gazlavay taa cōved mekele mawiya masa *Mesōfney ηga Gazlavay ma wuzdandakwara. Ya kakwa slōra ηgada Gazlavay taa cōved magurma masa kwakwas ηga Mawiz ma wuzdandakwara saba.

Kwakwas ηga Mawiz a wuzwa na, me?

⁷ Kaa wure kede na, ya da lōvkwa kwara? *Kwakwas ηga Mawiz na, ara cek maaya ba daw? Kay, kōne ba. Anja da kwakwas a daa ba na, ya fa da sōra mebōrey daha na, daa ba. Kwakwas a, a lōvey: «Ka da kam dey fa cek ηga ndaw ba.» Anja da kwakwas a ta lōvey kōne daa ba na, ya sōra mekey dey fa cek ηga ndaw na, ara mebōrey la daw?

⁸ Ama kwakwas a ta wurar cōved sem a mebōrey ηga key slōra daa yah. Mebōrey a ta hōldaya la ηga key dey fa cek ηga ndaw. Anja da kwakwas a daa ba na, mebōrey fa da hōtey gōdan ηga ray ndaw daa ba.

⁹ Zleezle daa masa ya sōra mey da ray kwakwas a ba na, yah ta dey, ya fa wey ηga yah. Ama daa masa ya ta cōnda mey da ray kwakwas a cay na, mebōrey ta hōtey gōdan sem da ray adaw.

¹⁰ Da ray ηgene, yah na, anda ndaw mamōckaya. Gazlavay ta vōldōrwa kwakwas aha la amba ndōhay a

høtam heter. Ama ηgada yah na, kwakwas a ta cøhadaya memøcey sem a ray.

¹¹ Ama masa yah ma cønda mey da ray kwakwas a la na, kwakwas a ta wurar cøved sem a mebørey ηga key sløra daa yah. Mebørey a ta høtey cøved sem ηga tøknaaya ta fa kwakwas a. Anda keðe, mebørey a ta cøhadaya memøcey sem a ray.

¹² Fara fara, kwakwas ηga Mawiz na, anηa maaya, mebørey da hwað a daa ba. Asaya, mey hay da ray kwakwas a na, a samawa fa Gazlavay. Ata maaya, mebørey da hwað a daa ba. A jønta ndøhay ηga key cek ta cøved e.

¹³ Anda keðe, cek masa maaya na, a gwa ηga handawa memøcey a ray adaw daw? Kay, køne ba! Ma handørwa memøcey a ray ndaw na, ara mebørey. Mebørey a ta høtey cøved sem ta fa cek masa maaya ηga handaya memøcey a ray. A key anda keðe na, amba ndøhay a sørmara mebørey ara cek maaya ba kalah ta fa kwakwas a.

Cek maaya ta maaya ba a cømam daa ndaw na, kwara?

¹⁴ Ya sørkwa *kwakwas ηga Mawiz na, a sawa ta fa Gazlavay, ama aløkwa na, ndøhay magødanη gway. Ya ta tøkwa beke ηga mebørey sem.

¹⁵ Fara fara, cek masa yah ma ka na, ya ka maja me na, ya søra ba, maja cek maaya masa yah ma wuðey na, ya ka ba. Ama ya key na, cek masa yah ma wuðey ba jak.

¹⁶ Da ya key cek masa yah ma wuðey ba na, ηgene, ya tøba, ya søra kwakwas a na, anηa maaya.

¹⁷ Anda keðe, da ya key cek maaya ba na, ara yah ma ka ba. Ara mebørey masa daa yah ma ka cek aha.

¹⁸ Ahaw, ya søra yah ta gødanη ηga key cek maaya ta cøved e na, daa ba. Anda meløvey yah na, ndaw-magødanη. Ya wuðey ηga key cek maaya ta cøved e, ama gødanη adaw daa ba.

¹⁹ Yaw, cek maaya masa yah ma wuðey ηga ka na, ya fa ka daa ba, ama ya key na, cek maaya ba masa yah ma wuðey ηga ka ba jak.

²⁰ Da ya key cek maaya ba masa yah ma wuðey ηga ka ba na, a wuðey ηga løvey ara yah ma ka ba. Ara mebørey masa daa yah ma ka cek aha.

²¹ Ya wuðey ηga key cek maaya, ama ya da key na, cek masa maaya ba gway. Keðe ara cek masa yah ma sanjala daa menjey adaw.

²² Daa mevel adaw na, ya fa wuðey fara fara ηga søpa *kwakwas ηga Gazlavay.

²³ Ama ya noka na, cek maaya ba ma fonya ray daha. Cek aha fa toka mewulkey adaw nga key cek masa maaya. Cek maaya ba ha ma fonya ray a na, ta tordaya sem nga beke nga meborey.

²⁴ Ay! Yah na, ndaw ta matoway daa dey. Yah na, memocey aa da ray adaw. Ma da lohdaya daa memocey a na, wa?

²⁵ Ara Gazlavay ma da lohdaya ta fa Bay alakwa Mahura Yesu *Koriste. Ara maja ngene, ya fa kar suse ta mevel adaw cəpa.

Anda kefe, daa mewulkey adaw na, ya wufey nga səpa kwakwas nga Gazlavay. Ama maja yah ndaw-magədan na, ya key na, cek masa ma handaya meborey a ray jak.

8

Mesəfney nga Gazlavay a jənta ndəhay daa menjey ata na, kwara?

¹ Wure kefe ndəhay masa macəmkaya ta Yesu *Koriste na, sariya nga Gazlavay fa da təddata daa ba.

² Meborey fa da hətəy gədan nga handawa memocey a ray alakwa daa saba, maja gədan nga *Mesəfney nga Gazlavay aa da ray alakwa. Gədan nga Mesəfney nga Gazlavay a, a vəlndakwar heter mawiya ta fa Yesu Koriste.

³ *Kwakwas nga Mawiz na, a gwa nga key sləra anda Gazlavay ba, maja bəle nga ndaw-magədan ta tərda kwakwas a sem nga cek manjar gədan. Gazlavay aa ta gədan ma fəna kwakwas nga Mawiz. Gazlavay a wuzda anga na, a wufey nga cəney meborey fa sləmay anga ba səlak, a kar sariya a ndaw-magədan maja meborey anga. Anda kefe, ta slərdərwa Bəzey anga la a bəla, a tərey nga ndaw-magədan, vaw anga anda alakwa ndəhay ma ka meborey. Gazlavay a ka anda kefe, nga lohdata ndəhay daa meborey ta fa memocey nga Bəzey anga ha. Anda kefe, ta fəna gədan nga meborey sem ta fa Bəzey anga ha.

⁴ Gazlavay a ka anda kefe na, amba ya tərkwə ndəhay ma ka cek ta cəved e fara fara anda kwakwas a ma wufey ya kakwa. Ya kakwa na, anda mewufey nga ndaw-magədan saba, ama ya kakwa anda Mesəfney nga Gazlavay ma wufey.

⁵ Ndəhay ma səpam nga njey anda ndəhay magədan ma wufam na, a wulkam mandaw mandaw da ray cek masa ma mbafatar gway. Ama ndəhay ma kam cek anda

Mesəfney nga Gazlavay ma wudey na, a wulkam mandaw mandaw da ray cek masa ma mbafar a Mesəfney a.

⁶ Da ndaw a wulkey mandaw mandaw da ray cek masa ma mbafar gway na, a key ngene, a cəhadəwa meməcey a ray anğa. Ama da ndaw a wulkey mandaw mandaw da ray cek ma mbafar a Mesəfney nga Gazlavay na, ngene, Gazlavay a da vəlar heter mawiya, asaya, a da njada daa zazay.

⁷ Ndəhay ma wulkam mandaw mandaw da ray cek masa ma mbafatar a vaw ata hay na, ata masa-gəra hay nga Gazlavay. Ata fa səpmara kwakwas nga Gazlavay daa ba, kwa a gwamara nga key sləra ta kwakwas a ba.

⁸ Ndəhay ma səpam nga key cek masa ma mbafatar a vaw ata hay gway na, ndəhay a, fa da mbafamar a Gazlavay daa ba.

⁹ Ama akwar na, akwar fa kam cek ma mbafar a vaw akwar hay daa ba. Ka səpam na, cek masa ma mbafar a Mesəfney nga Gazlavay maja Mesəfney a, aa da ray akwar. Ndaw masa Mesəfney nga Kəriste da ray a daa ba na, ndaw aha ara ndaw nga Kəriste ba.

¹⁰ Da Kəriste aa daa mevel akwar na, Mesəfney nga Gazlavay a vəlkwar heter mawiya la maja aa ma pakwar nga ndəhay maaya fa mey anğa. Kwa ka məcəm la, vaw akwar a zey la maja mebərey na, ka hətam heter mawiya la.

¹¹ Asaya, da Mesəfney nga Gazlavay ma sləkfadərwa Yesu Kəriste daa meməcey aa da ray akwar na, ngene Gazlavay a da sləkfadakurwa daa meməcey may. Anda kedə, a da sləkfadakurwa ha na, ta gədan nga Mesəfney anğa masa da ray akwar a.

¹² Məlma adaw hay, ara maja ngene si ya njakwa anda Mesəfney nga Gazlavay ma wudey, ba na, anda vaw aləkwa ma wudey ba.

¹³ Yaw, da akwar fa kam cek masa ma mbafar a vaw akwar gway na, ka məcəm la. Ama da akwar fa vəlmar cəved a Mesəfney nga Gazlavay nga jənkwar nga mbəkda mekey cek hay maaya ba na, ngene, ka hətam heter mawiya la.

¹⁴ Ndəhay cəpa masa ma vəlmar cəved a Mesəfney nga Gazlavay nga wey da ray ata na, ndəhay a ngene, ara bəza hay nga Gazlavay.

¹⁵ Mesəfney masa akwar ma təbmara nga wey da ray akwar a na, fa da tərdakwar nga beke hay daa ba, akwar

fa da njam ta mandərzay daa dey daa saba. Ama Mesəfney nga Gazlavay a, a da tərdakwar nga bəza hay nga Gazlavay, a da jəndakwar nga zəla Gazlavay a: «Aba», anda meləvey, «Papay.»

¹⁶ Mesəfney a, fa wuzdandakwara daa mevel aləkwa na, aləkwa bəza hay nga Gazlavay fara fara.

¹⁷ Ahaw, aləkwa na, bəza hay nga Gazlavay. Anda kefe, ya hətkwa cek masa anğa ma bəda maja aləkwa la. Ya da hətkwa cek aha na, bama daa slam a ta Kəriste maja da aləkwa ma sərkwə banay la bama ta Kəriste na, ya da njakwa bama ta anğa daa slam anğa mewedeŷ may.

Mey da ray mewedeŷ nga Kəriste

¹⁸ Ya sərə, banay masa aləkwa ma sərkwə wure kefe kaa na, ara cek mecəhe nga tede. Fara fara, slam-mewedeŷ nga Gazlavay masa aa ma vəldandakwara na, anğa maaya, a wam ta banay masa aləkwa ma sərkwə wure kefe ba.

¹⁹ Cek hay tabiya masa Gazlavay ma katərwa na, cek hay a fa səkwəmara dər masa Gazlavay ma da wuzdatərwa bəz anğa hay daa slam anğa mewedeŷ amba dər a, a wuswa fiyaw fiyaw.

²⁰ A səkwəmara maja cek hay tabiya masa Gazlavay ma katərwa na, ta tərəm sem nga cek nga tede. Ara cek hay a ma wufəm nga key kəne ba, ama ara Gazlavay ma la har anğa da ray ata. Ta ngene he cəpa, fa səkwəmara Gazlavay nga ka slərə anğa da ray ata cənğa.

²¹ Slərə ha na, ara Gazlavay ma da pəskatərwa dasi har nga ndaw ma nəsta, ma tərdata nga beke. Anda kefe, cek hay a tabiya a da hətam mewedeŷ nga Gazlavay bama daa slam a ta bəza hay nga Gazlavay. A da wam nga ata anda bəza hay nga Gazlavay.

²² Ya sərkwə dəga mezley nga bəla haa wure kefe, cek hay tabiya masa Gazlavay ma katərwa na, fa sərəm banay, a njaram anda nğwas ma da yey.

²³ Ma sərəm banay a daa masa ata fa səkwəmara na, ara cek hay a daada ba, ama aləkwa may fa njarakwa daa mevel aləkwa. Aləkwa na, ndəhay masa Gazlavay ma vəlndakwar Mesəfney anğa teesef da ray cek hay mekele masa anğa ma da vəldandakwara. Anda kefe, aləkwa fa səkwəkwə pas masa Gazlavay ma da tərđandakwar nga bəz anğa hay fara fara, a da pəskandakwar dasi har nga ndaw ma nəndakwar, amba kwa waawa a wey ray anğa.

²⁴ Gazlavay ta ləhdandakwar sem daa mebərey ama ya sərtakwa cek hay masa Gazlavay ma da ka da ray aləkwa tabiya ba aran. Aləkwa fa sərkwā fara fara ya hətkwa cek hay a la. Da ndaw ta hətar cek masa aa ma səkwa sem ta dey anğa na, a səkwa cek aha saba maja cek aha aa fa dey anğa cay. Ma da səkwa cek masa anğa ma hətar sem ngene na, wa dəba wa?

²⁵ Aləkwa na, fa səkwa kwa cek masa aləkwa ma hətkwa ta dey aləkwa daa ba aran. Anda keđe, ya bəskwa mevel nğa səkwa cek aha ta zazay.

²⁶ *Mesəfney nğa Gazlavay fa jəndakwar may, maja aləkwa gədan pəreh daa cəved nğa Gazlavay. Kwa ya sərkwā cek masa aləkwa ma daa cəfdakwa fa Gazlavay ba. Ama Mesəfney nğa Gazlavay a, ta ray anğa, fa dərər dangay a Gazlavay aa slam a nğa aləkwa. Aa cəfda Gazlavay ta mevel pal, aa guzlar a Gazlavay ta mey masa ma fənar ray a ndaw-magədan nğaa guzley.

²⁷ Gazlavay ma səra cek daa mevel nğa ndaw na, a cənda cek masa Mesəfney anğa ma wudəy, maja Mesəfney a faa cəfda Gazlavay amba a jənta ndəhay anğa hay anda Gazlavay ma wudəy.

²⁸ Nğada ndəhay ma wudmāra Gazlavay, ndəhay masa Gazlavay ma zəltā nğa key cek anda anğa ma wudəy na, ya sərkwā cek hay tabiya masa ata ma hətam na, ara Gazlavay ma ka amba a tərey nğa cek maaya nğada ata.

²⁹ Dəga zleezle na, Gazlavay ta walata ndəhay anğa hay cay. Asaya, ara anğa ma wudəy nğa tərdata ndəhay anğa hay a anda Bəzey anğa. A ka anda keđe na, amba Bəzey anğa a tərey bəzey maa-mey-ndaw da wuzlah ndəhay nğa Gazlavay masa anda məlman hay ga.

³⁰ Yaw, ndəhay masa Gazlavay ma walata ngene na, Gazlavay ta zəltərwa la nğa key ndəhay anğa hay may. Daa masa aa ma zəltā ha na, ta pata la nğa ndəhay maaya fa mey anğa may. Asaya, ndəhay masa aa ma pata nğa ndəhay maaya fa anğa na, ta handata sem aa slam anğa mewedəy may.

Gazlavay a wudndakwar mandaw mandaw

³¹ Kaa wure keđe na, mey mambəkakaya nğa ləvey daha saya daw? Gazlavay aa ta aləkwa, kaa ma da gwa a ray aləkwa na, wa?

³² Gazlavay ta bədərwa Bəzey anğa daa ba, ama ta slərdərwa la a bəla nğa məcəy maja aləkwa tabiya. Anda

Gazlavay ma slørdandakwara Bøzey an̄ga na, fara fara a vøldandakwara cek hay tabiya la may.

³³ Ma gwa n̄ga mbødtar ray n̄gada ndøhay masa Gazlavay ma walata na, wa? Kwa ndaw pal ma gwa daa ba, maja ara Gazlavay ma tørddata n̄ga ndøhay masa maaya fa mey an̄ga.

³⁴ Ndøhay masa Gazlavay ma walata na, ma gwa n̄ga tøfdata ta sariya na, wa? Kwa ndaw pal ma gwa daa ba, maja Yesu *Køriste ta møcey la, ta sløkdawa sem daa memøcey, wure kefe aa manjakaya ta har-zømay n̄ga Gazlavay, fa dørey dangay maja aløkwa.

³⁵ Ma da wunkandakwar ta Køriste amba a wufndakwar saba na, me? Kwa aløkwa daa banay, kwa mewulkey fa høbndakwar ray, kwa ndaw a cakalafandakwar mey, kwa aløkwa daa may, kwa aløkwa daa viya, kwa anja ndaw a wufey n̄ga kandakwar cek maaya ba, kwa ndaw a køfndakwar vagay na, cek hay a cøpa n̄gene, a gwa n̄ga wunkandakwar ta Køriste ba.

³⁶ Anda mawuzlalakaya daa ðerewel n̄ga Gazlavay, ma løvey:

«Bay Gazlavay, ndøhay fa søpmandar mandaw mandaw n̄ga køðey vagay maja ala ndøhay akah hay.

Fa mey n̄ga ndøhay na,

ala * anda tøban̄ hay masa ma handamata n̄ga hørey.»

³⁷ Ta n̄gene he cøpa, ya kakwa bay-gula la da ray banay hay a n̄gene tabiya ta gødan̄ n̄ga ndaw ma wufndakwar kalah.

³⁸ Ahaw, ya søra fara fara cek ma gwa ma wunkandakwar ta ndaw masa ma wufndakwar kalah ha na, daa ba. Kwa ya møckwa, kwa aløkwa ta dey, kwa maslan̄ hay n̄ga Gazlavay, kwa gødan̄ n̄ga bay hay masa da bøla kefe ta gødan̄ n̄ga mesøfney hay masa daa memed, kwa cek hay ma kam wure kefe ta cek hay ma da kam n̄gada fa mey,

³⁹ kwa maazla hay da gazlavay da vad, kwa daa vøged n̄ga awaw magaza, kwa cek wura wura mekele masa Gazlavay ma katørwa, kwa meeme cøpa a gwa n̄ga wunkandakwar ta mewufey-vaw n̄ga Gazlavay ba. Ara mewufey-vaw masa an̄ga ma wuzdørwa ta fa Yesu Køriste, Bay aløkwa Mahura.

8:32 8.32 5.8; Jan 3.16 **8:34 8.34** 4.25; SNM 2.33; Heb 7.25; 1Jn 2.1 **8:35**

8.35 2Kwr 5.14 * **8:36 8.36** ala: Daa Ps 44.23aa guzley da ray søkway n̄ga Jøwif hay, ama fefe na, Pawl aa guzley da ray ndøhay n̄ga Yesu. **8:36 8.36** Ps 44.23; 2Kwr 4.11 **8:37 8.37** 1Jn 5.4-5 **8:38 8.38** Ef 1.21; 1Kwr 3.22; 15.24; 1Pi 3.22 **8:39 8.39** 5.5; Jan 3.16; 2Kwr 13.13; Ef 1.4; 2.4; 1Tes 1.4; 2Tes 2.16

9

Mey da ray Israyel hay, ndəhay masa Gazlavay ma walata

¹ Mey masa yah ma daa guzlda keɗe na, ara meɗ fara fara, ya mbərzley ba, maja yah na, ndaw ŋga *Kəriste. Asaya, *Mesəfney ŋga Gazlavay fa wa mewulkey aɗaw, mewulkey aɗaw a fa wuzda, meɗ masa yah ma kada keɗe na, ara meɗ fara fara.

² Ya wuɗey ŋga ləvey na, mewulkey fa da kəɗya, mevel fa caya mandaw mandaw

³ da ray səkway aɗaw hay *Jəwif hay. Ala na, ŋga way ala pal. Da Gazlavay a səra na, ŋga nəsyə, ŋga wunkandar ta Kəriste amba məlma aɗaw hay Jəwif a ɗiyam.

⁴ Ata daa səkway ŋga *Israyel hay. Gazlavay ta walata sem ŋga təram bəz anɗa hay, ta wuzdatara gəɗaŋ anɗa la, ta jəwam meɗ la ta ata, ta wuzdatara kwakwas anɗa la, ta wuztar cəved la amba a dərmar ɗanɗay, ta wuzdatara cek maaya masa aa ma ləvey a da vɔɗdatara heyey la.

⁵ Ata na, ndəhay daa səkway ŋga papaŋ ŋga papa aləkwa hay zleezle *. Yesu Kəriste may, daa masa anɗa ndaw-magəɗaŋ na, anɗa ndaw daa səkway a. Ama ta ŋgene he cəpa na, ta təbmara meɗ anɗa daa ba. Kəriste he na, ara ndaw ma wata cek hay tabiya. Anja ndəhay ŋga həlmamara Gazlavay ŋga sərmataw. Amen.

⁶ Ya wuɗey ŋga ləvey meɗ masa Gazlavay maa guzlda na, ta key anda aa ma ləvey daa ba na, kəne ba. Meɗ a ta key la. Ama ya wuɗey ŋga ləvey, Israyel hay na, ara ndəhay ŋga Gazlavay cəpa ba.

⁷ *Abəraham ta yey bəza hay la. Ama bəza hay a cəpa na, ara bəz anɗa hay fara fara anda Gazlavay ma ləvey ba, maja Gazlavay taa guzlar la zleezle a Abəraham a, a ləvar: «Ara ta fa bəza hay ŋga bəz akah *Izak, sləmay akah ma da zəley.»

⁸ Anda meləvey, bəza hay masa Abəraham ma yatərwa na, ata tabiya bəza hay ŋga Gazlavay ba. Ama bəza hay ŋga Gazlavay fara fara na, ara bəza hay masa Abəraham ma yatərwa maja Gazlavay ma ləvar a da vɔlar bəza hay ga heyey.

9:2 9.2-3 Mab 32.32 **9:4 9.4** səkway ŋga Israyel hay: Mab 4.22; Aw 11.1; **gəɗaŋ ŋga Gazlavay:** Mab 16.10; 24.16-17; 40.34-35; **mejəwey-mey:** MC 17.7; Mab 24.7-8; **kwakwas anɗa:** Mab 20-24; **Gazlavay a da ka cek anda anɗa ma ləvey:** 3.2, 4; 4.13, 17; Gal 3.6, 14 * **9:5 9.5** papaŋ ŋga papa aləkwa hay: Anda meləvey, Abəraham, Izak, leŋ Jakwap ta bəz anɗa hay kuraw a ray a cew. **9:5 9.5** 15.8; Mab 3.6, 15; **Kəriste:** Mt 1.1; Rm 1.3-4 **9:6 9.6** 3.3-4; 2.28-29 **9:7 9.7** MC 21.12; Mt 3.9 **9:8 9.8** Gal 3.7; 4.23

⁹ Mey masa Gazlavay ma ləvar a Abərahāma a zleezle a da vələr cek heyey na, mey a, a ləvey: «Haa kasl səfed anda kede na, ya vəhwa la. Daa ŋgene, Sara ta yawa bəzey mezəle cay.»

¹⁰ Yaw, ara ŋgene daada ba. Rebeka may, ta yawa la, a yawa bəza hay cew. Ata ŋga papa ata pal. Papa ata ha na, ara dede aləkwa Izak zleezle.

¹¹⁻¹² Gazlavay a ləvar a Rebeka: «Bəzey mahura na, a da kar sləra ŋgada mecəhe.» Gazlavay maa guzlar anda kede na, daa masa bəza hay a, a səmāra ma key cek masa maaya ta maaya ba, ba arāŋ, ara daa masa ata da hwaď mama ata đagay. Gazlavay ma ləvey anda kede na, ŋga wuzda aŋga na, fa key cek mandaw mandaw anda aa ma wufey. A weley ndaw masa aa ma wufey. A walata na, maja sləra masa ndaw a ma ka ba.

¹³ Anda mawuzlalakaya daa đerewel ŋga Gazlavay ma ləvey:

«Ya weley na, Jakwap. Ezayu na, ya wuďa ba.»

¹⁴ Da kəne na, ya da ləvkwa kwara dəba wura? Gazlavay a na, ara ndaw ma key cek ta cəved e ba dəba daw? Kay, kəne ba!

¹⁵ Gazlavay ta ləvar la a *Mawiz zleezle: «Da ya wufey ŋga key maaya a ndaw na, ya ka. Asaya, da ya wufey ŋga sərey dey-ceceh fa ndaw na, ya sərfar.»

¹⁶ Anda kede, da Gazlavay a kar maaya a ndaw na, ara maja ndaw a ma wufey ba, asaya, maja sləra ŋga ndaw a ma ka ba, ama ara maja Gazlavay ma sərfar dey-ceceh.

¹⁷ Daa đerewel ŋga Gazlavay na, Gazlavay a ləvar a *Farawaŋ, bay ŋga *Ejip: «Yah ma paka aa bay na, amba ya wuzdərwa gədaŋ aďaw ta fa kah, asaya, amba ndəhay da bəla cəpa a zəldamaya sləmay.»

¹⁸ Anda kede, Gazlavay a gwa ŋga sərfar dey-ceceh a ndaw masa aa ma wufey, asaya, a gwa ŋga tərda ndaw ŋga macarakaya anda aa ma wufey.

Gazlavay a gwa ŋga key cek anda aa ma wufey

¹⁹ Da kwa ndaw a da ləvya: «Da anda kede na, Gazlavay a mbəďtar ray a ndəhay na, fa me dəba me? Ndəhay a gwamāra ŋga təkmarā cek masa aa ma wufey ŋga ka daw?»

²⁰ Kah ndaw-magədaŋ ŋga tede, kah na, wa may wa, amba ka kada yawa ta Gazlavay na! Maŋgayak maləmkaya

na, a gwa nga ləvar a ndaw ma ləma: «Ka ləmya anda kefe na, maja me daw?» Kay, a gwa ba!

²¹ Ndaw ma ləma maŋgayak a gwa nga key cek ta hahay nga meləmey anda aa ma wufey. A gwa nga wunka hahay a cew, pal a ləmda maŋgayak wal membey kalah, langar may, a ləmda maŋgayak masa saw kəne.

²² Yaw, da Gazlavay a ka anda ndaw ma ləma maŋgayak na, mey akah da hwaɗ a me? Gazlavay a wufey nga wuzdərwa na, aŋga fa cey mevel da ray ndəhay, asaya, a wufey nga wuzdərwa gədan aŋga a ndəhay. Ama ndəhay masa anja aŋga ma da cey mevel da ray ata ta masa aŋga ma da katar sariya ŋgaa zəɗdata na, fa bəsta kwa ara mey ba cəŋga.

²³ Gazlavay fa bəsta na, amba a wuzdatara gədan aŋga a ndəhay. A wufey nga pa gədan aŋga ha a ray ndəhay masa aŋga ma sərɗatar dey-ceceh. Ta ɗiɗta la dəga zleezle amba a hətam gədan aŋga ha.

²⁴ Ndəhay a na, ara aləkwa. Gazlavay a zəlndakwar na, da wuzlah ndəhay *Jəwif hay daada ba, ama da wuzlah ndəhay daa səkway mekele hay may.

²⁵ Ara anda Gazlavay maa guzley ta mey Awze, *ndaw ma təla mey aŋga, ma ləvey:

«Ndəhay masa ata ndəhay aɗaw hay zleezle ba na,
ya da zəlta ndəhay aɗaw hay.

Ndəhay masa ya wuɗta ba zleezle na,
ya da zəlta ndəhay aɗaw hay mawuɗtakaya kalah.

²⁶ Daa slam masa yah ma ləvtar la a ndəhay:

“Akwar ndəhay aɗaw hay ba” na,
yah, Gazlavay masa ta dey,
ya da zəlta “bəz aɗaw hay”.»

²⁷ *Izay, ndaw ma təla mey nga Gazlavay may, taa guzley la da ray *Israyel hay, a ləvey: «Anja kwa Israyel hay ata ga a sləfam ba anda mawurbay da wayam na, Gazlavay a da ləhey daa mebərey na, ndəhay nekəɗey da wuzlah ata gway.

²⁸ Fara fara Bay Gazlavay a da ka sləra aŋga cəpa fiyaw fiyaw da bəla anda aa ma ləvey.»

²⁹ Yaw, anda Izay a maa guzley dəga zleezle saya, a ləvey:

«Da Bay Gazlavay ma wa slam da vad tabiya
ta mbəkndakwar ndəhay nekəɗey

daa səkway aləkwa daa ba na,
anja ŋgene, ya ta paslakwa sem sle’

anda ndəhay daa berney nga Sadawm ta nga Gwamar.»

Mey da ray mepey Yesu nga ndaw fara fara

³⁰ Kaa wure keɗe, ya da ləvkwa na, kwara? Ya ləvkwa ndəhay *Jəwif hay ba na, fa səpam cəved amba Gazlavay a pata nga ndəhay maaya fa mey anɗa na, daa ba. Ama Gazlavay a pata nga ndəhay maaya fa mey anɗa na, maja ata ma pamara *Kəriste nga ndaw ata fara fara.

³¹ *Israyel hay na, fa səpam *kwakwas nga Mawiz amba Gazlavay a pata nga ndəhay maaya fa mey anɗa. Ama ta hətam amba a pata nga ndəhay maaya fa mey anɗa ha anda kwakwas a ma wuɗey na, daa ba.

³² Ta hətam daa ba maja me? Maja a wulkam Gazlavay a da pata nga ndəhay maaya fa mey anɗa na, ta fa cek masa ata ma kamara gway. Fa pamara Gazlavay nga ndaw ata fara fara na, daa ba. Anda keɗe, salay ata ta kəɗey sem fa anɗwa mekey mecembəɗey a ndəhay,

³³ anda mawuzlalakaya daa ɗerewel nga Gazlavay ma ləvey:

«Nəka, daa berney nga Siyanw na,
ya da pey anɗwa mekey mecembəɗey a ndəhay,
ara anɗwa ma təɗɗata ndəhay.
Ama kwa waawa ma zlembey ta anɗwa † ha na,
a zəley marava daa ba səlak.»

10

Mey da ray Jəwif hay ma da ləham

¹ Məlma aɗaw hay, cek masa yah ma wuɗey ta mevel aɗaw cəpa na, anja Gazlavay nga ləhɗata səkway aɗaw hay *Jəwif hay daa mebərey. Ya fa ɗərey danɗay mandaw mandaw maja ata.

² Ya gwa ya ləvey ata na, ta vəldamara ray ata la ta mevel ata cəpa nga səpey cəved nga Gazlavay. Kwa ta səpmara cəved e la ta mevel ata cəpa na, ama ta səpmara cəved masa fara fara na, daa ba.

³ Ata ta səpmara nga səpey cəved masa amba Gazlavay a pata nga ndəhay maaya fa mey anɗa na, daa ba. A səpam amba Gazlavay a pata nga ndəhay maaya fa mey anɗa na, ta fa cek hay masa ata ma kamara ta har ata gway. Anda keɗe, cəved fara fara masa Gazlavay ma da pata nga ndəhay maaya fa mey anɗa na, a wuɗam ba.

9:29 9.29 Iz 1.9 **9:30 9.30** 10.20 **9:31 9.31** 10.2-3 **9:32 9.32** 4.4-5 † **9:33 9.33** anɗwa: A wuɗey nga ləvey Yesu. Kwa waawa ma zlembey ta anɗwa ha na, anda meləvey, kwa waawa ma təba mey nga Yesu a. **9:33 9.33** Iz 8.14; 28.16; 1Pi 2.6-8 **10:1 10.1** 9.1-3 **10:2 10.2** SNM 22.3 **10:3 10.3** 1.17

⁴ Fara fara, dēga *Kēriste ma sawa a bēla na, gēdan̄ ŋga *kwakwas ŋga Mawiz ta ndəvey sem. A key anda kedē, amba Gazlavay a pey ŋga ndəhay maaya fa mey an̄ga na, ndəhay ma pamara ŋga ndaw ata fara fara.

Mey da ray ndəhay daa səkway wura wura ma da ləham

⁵ Masa *Mawiz maa guzley zleezle da ray ndaw ma wufey amba Gazlavay a pa ŋga ndaw maaya fa mey an̄ga maja aa ma səpa kwakwas an̄ga na, a ləvey: «Ndaw ma səpa kwakwas a mandaw mandaw, ma rəsa ba səlak na, a hətēy heter la ta fa kwakwas a.»

⁶ Ama cəved̄ amba Gazlavay a pa ndaw ŋga ndaw maaya fa mey an̄ga maja aa ma pa ŋga ndaw an̄ga fara fara na, cəved̄ e an̄ga wal. Mawuzlalakaya daa d̄erewel ŋga Gazlavay da ray cəved̄ e, a ləvey: «Kah ndaw-magēdan̄, ka da wulkey daa mevel akah, ka ləvey ma da təpey a gazlavay a vad̄ na, wa?» na, ka da ləvey kəne ba. Anda meləvey, ka da ləvey «Ma da təpey a gazlavay a vad̄ ŋga bərn̄gadərwa *Kēriste na, wa?» na, ka da ləvey kəne ba.

⁷ Asaya, «Ma da gwa ŋga mbəzey a wuzlah ndəhay maməctakaya na, wa?» na, ka da ləvey kəne ba may. Anda meləvey, ka da wulkam amba ndaw a daw a wuzlah ndəhay maməctakaya ŋga zəlwa Kēriste na, kəne ba.

⁸ Mawuzlalakaya daa d̄erewel ŋga Gazlavay, a ləvey: «Mey ŋga Gazlavay aa da cakay akah, ba na, d̄oren̄ ta kah ba. Aa da baazlam akah ta daa mevel akah.» Yaw, mey a na, ara mey masa ala ma wuzdamatara ŋgada ndəhay amba a təb̄mara.

⁹ Da kah ta mey akah, kah maa guzley la fa mey ŋga ndəhay, ka ləvey: «Yesu na, ara Bay Mahura,» asaya, da ka ta təba la ta mevel akah cəpa Gazlavay ta slək̄fadərwa sem daa meməcey na, ŋgene, Gazlavay a ləhdaka la.

¹⁰ Ndaw ma pa Gazlavay ŋga ndaw an̄ga fara fara la na, Gazlavay a, a pa ndaw aha ŋga ndaw maaya fa mey an̄ga la. Asaya, ndaw maa guzley ta mey an̄ga, a ləvey: «Yesu ara Bay Mahura» na, Gazlavay a ləhda ndaw a la.

¹¹ Ahaw, mawuzlalakaya daa d̄erewel ŋga Gazlavay, a ləvey: «Kwa waawa ma pa Gazlavay ŋga ndaw an̄ga fara fara na, a zəley marava daa ba səlak.»

¹² Anda kedē, ndaw *Jəwif ta ndaw Jəwif ba na, ata letek. Ata cəpa bay ata na, pal, ara Bay Mahura, ndaw ma katar maaya daa masa ata faa cəfd̄amara ŋga jənta.

13 Anda mawuzlalakaya daa derewel nga Gazlavay, ma løyey: «Kwa waawa maa cəfda Bay Mahura nga ləhda na, Bay Mahura ha a ləhda la.»

14 Kaa da ndəhay ta pamara Bay Mahura ha nga ndaw ata fara fara daa ba na, a daa cəfdamara nga ləhdata na, kwara? Yaw, kaa da ndəhay ta cəndamara mezəley nga Bay Mahura ha daa ba na, a da pamara nga ndaw ata fara fara ha na, kwara? Asaya, kaa da ndaw ta wuzey mey da ray Bay Mahura ha daa ba na, ndəhay a da cəndamara mey da ray a na, kwara?

15 Kaa da ndəhay maslərdatakaya nga wuzey mey a daa ba na, a da wuzdamara mey da ray Bay Mahura ha na, kwara? Anda mawuzlalakaya daa derewel nga Gazlavay, ma løyey: «Cek ma mbey anda ndəhay ma diyam nga wuzey *Mey-maaya-mawiya a ndəhay na, daa ba.»

16 Ama ndəhay tabiya ta təbmara Mey-maaya-mawiya ha aa mevel ata na, daa ba. Ara anda *Izay, *ndaw ma təla mey nga Gazlavay maa guzley zleezle, ma løyey: «Waa Bay Gazlavay, ma təba mey ala masa ala ma wuzdamara da ray akah na, wa?»

17 Anda kefe, amba ndaw a təba mey nga Gazlavay na, si a cənda mey a la dəgay. Mey masa aa ma cənda ha na, ara mey nga Kəriste.

18 Da anda kefe na, ya wufey nga səra Jəwif hay na, ta jəkam sləmay fa Mey-maaya-mawiya ha daa ba fara daw? Fara fara, ta jəkam sləmay la. Ara anda mawuzlalakaya daa derewel nga Gazlavay, ma løyey:

«Ndəhay ta diyam la nga wuzey mey nga Gazlavay da bəla tabiya.

Day ata ta cəney la aa wura aa wura cəpa, kwa aa slam masa dərəj.»

19 Ya wufey nga səra saya, *Israyel hay na, ta cəndamara mey a daa ba fara daw? Fara fara ta cəndamara la, ama ta gəmam nga təbmara daa ba. Ya səra anda kefe na, maja Gazlavay taa guzltar la dəga zleezle ta mey Mawiz, a løyey: «Ya da tərdakwar nga ndəhay ma ka sələj fa ndəhay daa səkway hay saw kəne.

Ya da ka amba mevel akwar a cey a ray ndəhay masa daa səkway hay manjar lenəsl.»

20 Fa dəba ha Izay may, ta zlurey ngaa guzley daa ba, a løyey:

«Gazlavay a løyey:

Ndəhay masa ta səpmaya daa ba na,

ta hõtmaya la ta dey ata.

Ya ta wuzda vaw adaw la ngada ndøhay

masa kwa maa cøfdamara mey adaw daa ba.»

²¹ Da ray ndøhay Israyel hay na, Gazlavay taa guzley la saya ta mey Izay, a løyey:

«Ya vørndey hipas, har adaw mawurkaya

nga tøbtørwa ndøhay ma kam høma a ray adaw

amba a vøhmawa, ama ata ta cønmaya mey daa ba.»

11

Mey da ray Gazlavay ma sørfatar dey-ceceh a Israyel hay

¹ Yaw, ya wudøy nga søra saya, da anda kaa na, Gazlavay ta mbøftar døba sem a ndøhay anga hay *Israyel hay daw? Kay, daa ba sølak! Yah ray adaw na, yah ndaw Israyel, yah daa søkway nga Benjamen. Benjamen e may, ara ndaw daa søkway nga *Abøraham.

² Fara fara, Gazlavay ta mbøftar døba a ndøhay anga hay Israyel hay masa aa ma walata døga zleezle na, daa ba. Ka sørfadamara mey mawuzlalakaya daa dferewel nga Gazlavay da ray *Eli ma tøyway fa mey nga Gazlavay maja Israyel hay heyey saba daw? A løyey:

³ «Waa Bay Gazlavay, ta kødmata ndøhay ma tøla mey akah hay sem cøpa vagay, mendørey yah pal taava adaw. Fa søpmaya nga køføy vagay may. Asaya, ta bøzlmata slam hay meføkey cek ngada kah sem.»

⁴ Kaa Gazlavay a mbøddara a Eli a na, kwariya? A mbøddara, a løyar: «Kay, mendørey kah pal taava akah ba! Ya ta bøy ndøhay gabal maasala la ngada yah. Ara ndøhay masa ta namar ray ngada kuley mezøley Bal daa ba.»

⁵ Yah, Pawl, ya fa løykwar, kwa haa wure kedø na, anga letøk køne may, Gazlavay ta mbøkey ndøhay siya la da wuzlah Israyel hay masa anga ma walata maja anga ma sørfatar dey-ceceh.

⁶ Gazlavay a walata ndøhay a na, maja anga ma sørfatar dey-ceceh, ba na, maja sløra ata ba. Anja da a walata maja sløra ata na, ngene ta sørfatar dey-ceceh daa ba.

⁷ Kaa wure kedø, mey a, a wudøy nga løyey na, kwara? Israyel hay na, ta høtam cek masa ata ma søpmara na, daa ba, si ndøhay nekøføy masa Gazlavay ma walata na, ta høtam la. Har-gødan nga ndøhay da wuzlah ata na, ta wudam nga cøndamara døy nga Gazlavay na, daa ba.

⁸ Anda mawuzlalakaya daa dferewel nga Gazlavay, ma lövey: «Gazlavay ta ngərdatara ray ata sem, ta wulfatara dey ata sem, ta dəzltara sləmay ata sem, haa wure keđe ata kəne cənga.»

⁹ Bay *Davit taa guzley la saya, a lövey:
«Cek hay masa ata ma zəmamara ngene na,
nga kərzata fa dʒay anda ngam-ngam ma kərzey cek,
anja nga tərey nga vəgedʒ amba a tədam a hwad a,
a səram banay təde fa sləra ata.»

¹⁰ Anja dey ata nga wulfey amba a hətmar dey saba,
anja nga gəbdamara dəba mandaw mandaw
maja banay ata.»

¹¹ Ya wufey nga səra mey a saya, *Jəwif hay ma zlanğadam daa cəved nga Gazlavay na, ta zlanğadam sem nga tar fara daw? Kay, daa ba səlak. Ama maja mebərey masa ata ma kamara na, ndəhay masa Jəwif hay ba hay ata ta cəved nga ləhey daa mebərey. A key anda ngene na, amba Jəwif hay a, a kam səleŋ ta ndəhay masa Jəwif hay ba hay.

¹² Jəwif hay ta kam mebərey la, maja ngene, Gazlavay ta katar maaya la a ndəhay da bəla tabiya. Jəwif hay ta zlanğadam sem daa cəved nga Gazlavay, maja ngene, Gazlavay ta', a pəstar mey a ndəhay masa Jəwif hay ba hay. Yaw, da Gazlavay ta katar maaya la a ndəhay masa Jəwif hay ba hay maja Jəwif hay ta zlanğadam sem daa cəved anğa na, kaa wara a katar maaya ma fəna ta pas masa ndəhay Jəwif hay tabiya ma da vəhmawa fa vəda nga ləhey, ba daw?

Mey da ray ndəhay masa Jəwif hay ba hay ma da ləham

¹³ Wure keđe, ya wufey ngaa guzlkwar ngada akwar ndəhay masa *Jəwif hay ba hay. Yah na, *ndaw-meslərey nga Yesu masa Gazlavay ma slərdərwa nga wuzey mey ngada akwar ndəhay masa Jəwif hay ba hay. Ya faa səmey ga da ray sləra adaw a.

¹⁴ Ya wufey na, səkway adaw hay Jəwif hay a nəkam dey fa sləra masa yah ma ka da wuzlah ndəhay masa Jəwif hay ba hay, a səpam cəvedʒ amba Gazlavay a ləhdata may.

¹⁵ Masa Gazlavay ma mbədtar dəba sem a ndəhay adaw Jəwif hay na, ta', a cəmtar dʒay nga ndəhay siya da bəla ta anğa ray anğa. Da anda keđe na, ta pas masa Gazlavay ma da təbta aa slam a na, ma da key na, me? Cek maaya a key la. Ndəhay masa maməctakaya a sləkdamawa la daa meməcey.

16 Sərmara, da ta cam peŋ la teeseŋ ŋga vəley ŋgada Gazlavay na, peŋ e siya tabiya na, ara ŋga Gazlavay a may. Asaya, da a vəlmar slaslalay hay ŋga wudez na, mey-har hay ŋga wudez e cəpa ŋgada aŋga may.

17 Səkway ŋga *Israyel hay na, aŋga anda wudez maaya marəvkaya masa mey-har hay siya maɔsɔltakaya. Ama akwar masa Jəwif hay ba na, akwar anda mey-har hay ŋga wudez saw manjəbtakaya fa wudez maaya marəvkaya masa mey-har hay siya maɔsɔltakaya heyey. Wure keɔe, ka da hətam cek maaya maja akwar manjəbtakaya fa wudez maaya heyey.

18 Da anda kaa na, ka da rəsmata ndəhay masa anda mey-har hay ŋga wudez maɔsɔltakaya ŋgene ba. Akwar fa zlapam da ray ata na, maja me? Akwar na, mey-har hay gway. Ma kərza slaslalay na, ara mey-har hay ba, ama ara slaslalay ma kərza mey-har hay, ba diya?

19 Da kwa ndəhay siya da wuzlah akwar a daa guzlam, a ləvam: «Gazlavay a ɔsɔlta mey-har hay a na, amba a njebey yah aa slam aha.»

20 Ahaw, kəne fara. Ama Gazlavay a ɔsɔlta na, maja ata ma pamara ŋga ndaw ata fara fara daa ba. Yaw, aŋga ma njebkwar aa slam ata na, maja akwar ma pamara ŋga ndaw akwar fara fara. Maja ŋgene, ka da zlapam saba, ama maaya na, ka zluram ta Gazlavay.

21 Jəwif hay na, ara ndəhay masa mapatakaya anda mey-har ŋga wudez masa maaya. Da Gazlavay ta sərfatar dey-ceceh daa ba na, ka wulkam a sərfakwar dey-ceceh la daw?

22 Nəkmara, Gazlavay na, a gwa a key maaya a ndaw, asaya, a gwa a cey mevel a ray ndaw may. Aŋga na, fa cey mevel da ray ndəhay masa ma zlangaɔam sem daa cəveɔ aŋga. Ama faa həmdakwar, akwar ndəhay masa daa cəveɔ aŋga. Si ka kamar cek ma mbafar mandaw mandaw, da daa ba na, a da ɔsɔlkwar anda mey-har hay ŋga wudez e may.

23 Jəwif hay na, da ata ta vəhmawa sem aa cəveɔ ŋga Gazlavay, a pamara ŋga ndaw ata fara fara na, Gazlavay a, a njeɔta la aa slam ata fa wudez masa maaya heyey saya, maja Gazlavay aa ta gəɔaŋ ŋga vəhɔatərwa, a njeɔta aa slam ata cəŋga.

24 Akwar ndəhay masa Jəwif hay ba, akwar na, anda mey-har hay ŋga wudez saw da ley masa ma ɔsɔlmərwa ŋga njebey fa wudez masa maaya. Yaw, da Gazlavay ta gwa ŋga ka cek masa ta banay anda keɔe sem na, ka wulkam aŋga

ta banay amba a vøhdaterwa Jøwif hay masa mapatakaya ta cakay heyey aa slam ata daw?

Mey da ray Israyel hay ma da ləham daa mebørey

²⁵ Məlma adaw hay, ya wufey ka sərmara mey mabadakaya daha, amba ka pamara ray akwar nga ndəhay ma səra cek kalah ba. Ahaw, *Israyel hay siya na, ray ata manğərdakaya. Ama ta pas masa ndəhay *Jøwif hay ba hay masa Gazlavay ma wufey nga ləhdata ta ləham cay na, Israyel hay siya hay a na, a mbəddamara menjey ata la, a pamara Gazlavay nga ndaw ata fara fara.

²⁶ Anda kefe na, Gazlavay a ləhdata ndəhay Israyel hay la cəpa anda mawuzlalakaya daa derewel anğa ma ləvey: «Ndaw ma da ləhdata ndəhay a da bawa

daa anğwa nga *Siyanjw*.

A da mbəkdatara mebørey nga ndəhay daa səkway nga Jakwap.

²⁷ Kefe he na, ara *mejəwey-mey adaw ta ata ta pas masa yah ma da mbəkdatara mebørey ata.»

²⁸ Ata ta təbmara *Mey-maaya-mawiya daa ba, anda kefe, ta təram sem nga masa-gəra hay nga Gazlavay. A key anda kefe na, amba akwar ndəhay Jøwif hay ba hay na, Gazlavay a ləhdakwar daa mebørey. Ama taa slam lanğar Gazlavay ta walata la maja ata na, ndəhay anğa hay mawudtakaya kalah, asaya, maja ta jəwam mey la ta papan nga papa ata hay zleezle.

²⁹ Da Gazlavay ta wala ndaw sem, asaya, da ta kar maaya la a ndaw a na, a da njey anda nğene, fa da mbədda mewulkey anğa daa ba.

³⁰ Akwar ndəhay masa Jøwif hay ba hay na, zleezle akwar fa namar ray a Gazlavay daa ba. Ama Gazlavay ta sərfakwar dey-ceceh la wure kefe, maja ndəhay Jøwif hay ma namar ray ba.

³¹ Wure kefe masa ata ma namar ray a Gazlavay ba nğene na, Gazlavay ta sərfakwar dey-ceceh la aa slam a nga ata. A key anda kefe amba ata may, a mbəddamara menjey ata amba Gazlavay a sərfatar dey-ceceh.

³² Yaw, anda kefe, Gazlavay na, ta vøltar cəved la a ndəhay tabiya amba a namar ray ba. A ka anda kefe amba anğa may, a sərfatar dey-ceceh a ndəhay ndav.

Mey da ray gədan nga Gazlavay

11:25 11.25 Mt 24.14; Jan 10.16 * **11:26 11.26** anğwa nga Siyanjw: A wufey nga ləvey ndəhay Jøwif hay, da daa ba, berney nga Jeruzelem. **11:26 11.26-27** Iz 59.20-21; 27.9; Jer 31.33-34 **11:29 11.29** 3.3-4; 15.8 **11:32 11.32** 3.22; Gal 3.22

³³ Nəka! Gazlavay fa sərɤfatar dey-ceceh fara fara a ndəhay. Anɤa ndaw ta lenɤesl, a sərta cek hay tabiya. Cek masa daa mevel anɤa na, ndaw ma gwa nɤa sərə daa ba. Cek masa aa ma wudɤey nɤa ka na, ndaw ma gwa nɤa sərə daa ba.

³⁴ Anda mawuzlalakaya daa dɤerewel nɤa Gazlavay ma ləvey:

«Ma sərə mewulkey nɤa Gazlavay na, wa?

Ma gwa nɤa kəta Bay Gazlavay na, wa?

³⁵ Ma vəlar cek a Gazlavay

ma fəna cek masa aa ma vəldara na, wa?

Kwa ndaw pal daa ba sələk.»

³⁶ Ma ləmtərwa cek hay cəpa na, ara anɤa. Fa nəkfatar dey fa cek hay a tabiya amba cek hay a, a njam na, dasi har anɤa. Anja ndəhay nɤa həlmamara Gazlavay nɤa sərmataw. *Amen.

12

Ya da kakwar sləra a Gazlavay na, kwara?

¹ Məlma adaw hay, Gazlavay ta sərɤfakwar dey-ceceh la ga kalah. Anda keɤe, ambahw, vəldamara ray akwar tabiya nɤada anɤa. Da ka vəldamara ray akwar tabiya nɤada anɤa ha na, a key nɤgene, ka vəlmar cek maaya ma mbafar. Keɤe ara cəved masa fara fara nɤa ney ray a Gazlavay.

² Ka da səpam kwakwas nɤa ndəhay masa da bəla keɤe ba. Vəlmar cəved a Gazlavay nɤa wey da ray akwar amba mewulkey akwar a mbəɤey, mevel akwar a key maaya. Da akwar fa kamara anda keɤe na, ka sərmara cek masa Gazlavay ma wudɤey la. Anda meləvey, ka sərmara cek masa maaya, ma mbafar, masa fara fara anda anɤa ma wudɤey.

³ Gazlavay na, ta kaya maaya la, ta paya la nɤa ndaw anɤa meslərey. Ara maja nɤgene, ya fa ləvkwar nɤada akwar tabiya, ndaw a da pa ray anɤa nɤa ndaw mahura ma fəna gəɤan anɤa ba. Ama kwa waawa nɤa nəka gəɤan anɤa amba a sərə anɤa na, kwara. Kwa waawa nɤa nəka menjey anɤa təɤe ta masa aa ma təba mey nɤa Gazlavay nɤgene na, cay gway.

⁴ Ka sərmara kwa waawa da wuzlah akwar na, anɤa ta vaw pal, ama mezəvey hay fa vaw a na, ata ga. Kwa mezəvey wura wura na, anɤa ta sləra anɤa wal.

⁵ Aləkwa may kəne, aləkwa ga, ama aləkwa cəpa ya ta tərkwə sem nɤa vaw pal maja aləkwa macəmkaya ta

11:33 11.33 Jəw 11.7; Ps 139.17 **11:34 11.34** Jəw 15.8; Iz 40.13 **11:35 11.35** Jəw 41.3 **11:36 11.36** 16.27; 1Kwr 8.6 **12:1 12.1** 6.13; 1Pi 2.5 **12:2 12.2** Ef 4.22-24; 1Tes 5.21 **12:3 12.3** 1.5; Mt 20.26; 1Kwr 12.11, 28; Ef 4.17 **12:4 12.4-5** 1Kwr 12.27

*Keriste. Aləkwa tabiya macəmkaya pal anda mezəvey nga vaw macəmkaya fa vaw nga ndaw pal.

⁶ Gazlavay ta vəldakwar gədan la mekele mekele anda aa ma wufey nga vəlda a ndaw a, ndaw a. Anda kefe, kwa waawa nga kada sləra ta gədan masa Gazlavay ma vəldara ha. Da ndaw anğa ta gədan nga təley mey nga Gazlavay na, nga təley mey masa Gazlavay ma wuzdara ngene gway.

⁷ Da ndaw aa ta gədan nga jəney ndəhay na, maaya a jənta. Da ndaw aa ta gədan ngaa sərkedey ndəhay na, maaya aa sərkadata.

⁸ Da ndaw aa ta gədan nga dəktar mevel a ndəhay amba a hətam gədan na, maaya a dəktar mevel. Da ndaw aa ta gədan nga wunka cek anğa ta ndəhay na, nga vəlda ta mevel maaya. Da ndaw aa ta gədan nga key *bay-ray daa *mecəmey-ray nga ndəhay nga Yesu na, nga ka sləra anğa ta cəved e. Da ndaw aa ta gədan nga key maaya a ndəhay masa daa banay na, nga katara ta meesəmey.

⁹ Si ka wudam vaw da wuzlah akwar ta mevel pal, ba na, ka da wudam vaw ta mey daada ba. Ka da təbmara nga key cek hay malamba ba. Ama səpam na, nga key cek masa maaya ta cəved e.

¹⁰ Wudam vaw da wuzlah akwar maja akwar cəpa na, məlman hay daa mecəmey-ray nga ndəhay nga Yesu. Anja kwa waawa nga nar ray a ndaw a, ndaw a da wuzlah akwar ta mevel maaya.

¹¹ Vəldamara ray akwar nga key sləra ta gədan akwar cəpa. Ka da tərəm ndəhay masa-mayad hay ba. Kamar sləra a Bay Mahura ta mevel akwar ndav.

¹² Akwar fa səkwam cek masa Gazlavay ma ləvey a da vəldakwara. Anda kefe, sasəmam mandaw mandaw. Da akwar daa banay na, bəsmara banay a. Kam gədan nga dərey danğay mandaw mandaw.

¹³ Ndəhay nga Gazlavay masa cek ata hay daa ba na, jənmata, asaya, təbmata maaya maaya a way akwar hay.

¹⁴ Ndəhay masa ma sərdamakwar banay na, cacəfdamara Gazlavay nga pəstar mey. Cacəfdam na, amba Gazlavay a pəstar mey, ba na, a nəsta ba.

¹⁵ Yaw, da ndəhay ata daa meesəmey na, sasəmam bama. Da ndəhay ata daa matəway na, təwam bama.

12:6 12.6-8 1Kwr 12.4-11; 12.27-14.40; 1Pi 4.10-11 **12:7 12.7-8** SNM 6.1-3; 2Kwr 9.5, 7 **12:9 12.9** 2Kwr 6.6; 8.24; 1Tm 1.5; 1Pi 1.22; 1Kwr 13.4-7 **12:10 12.10** 14.15; Janj 13.14-15; Gal 5.13; 6.3, 10; Ef 4.2; Fəl 2.2-3 **12:11 12.11** 8.9; Gal 5.25; CWJ 3.15 **12:12 12.12** 5.2-3; 8.24-25; Mt 24.13, 22; Lk 18.1; 1Kwr 10.13; 1Tes 2.14 **12:13 12.13** Gal 6.10; Heb 13.2 **12:14 12.14** Mt 5.44 **12:15 12.15** Jəw 30.25; 1Kwr 12.26; 2Kwr 11.29

¹⁶ Akwar da wuzlah akwar na, njam ðay macəmkaya letek. Ka da səpam ŋga tərey mahura da ray ndəhay siya daa mecəmey-ray akwar ba. Kwa sləra masa wura wura na, kamara ta meney ray. Ka da pamara ray akwar ŋga ndəhay ma səra cek hay kalah ba.

¹⁷ Da ndaw ta kakwar cek maaya ba la na, ka da madamara a ndaw a ba. Ama səpam na, ŋga key cek hay masa maaya masa ndəhay maa həmdamara.

¹⁸ Anja da ka gwamara na, kam cek hay masa təðe ta gədaŋ akwar amba ka njam ta ndəhay tabiya daa zazay.

¹⁹ Jam adaw hay, da ndaw ta kakwar cek maaya ba la na, ka da madamara a ndaw a ba. Mbəkdamara amba Gazlavay a cey mevel a ray a, maja mawuzlalakaya daa ðerewel ŋga Gazlavay, Gazlavay a ləvey: «Cek masa ndaw ma ka maaya ba na, ma da pəla na, yah. Ara yah, ma da kar cek maaya ba.»

²⁰ Mawuzlalakaya daa ðerewel ŋga Gazlavay saya, a ləvey: «Da masa-gəra akah, may fa car na, vəlar cek ŋga zəmey. Da yam fa kar na, vəlar yam ŋga sey. Da ka fa ka kəne na, hwaray a kar la, a mbəðda menjey anga la.»

²¹ Ka da mbəkda ray akah ŋga həbey maja ndaw ma kaka cek maaya ba amba ka madara na, kəne ba. Ama si ka key cek maaya amba ka key bay-gula da ray cek maaya ba ha.

13

Mey da ray meney ray ŋgada bay-ray hay ŋga ŋgwamna

¹ Maaya na, kwa waawa a natar ray ŋgada *bay-ray hay ŋga ŋgwamna, maja kwa waawa ma key bay-ray na, ara Gazlavay ma vəldara. Yaw, bay-ray hay tabiya ŋga ŋgwamna na, ara Gazlavay ma pata.

² Anda keðe, kwa waawa ma natar ray ba na, a key ŋgene a mbəkda cəved masa Gazlavay ma wuðey. Ndaw ma natar ray a bay-ray hay a ba na, sariya a təðda la.

³ Ndaw ma key cek ta cəved e na, a zlurey ta bay-ray hay ŋga ŋgwamna ba, ama ndaw ma key cek ta cəved e ba na, si a zlurey ta ata. Ka wuðam ŋga zlurey ta bay-ray hay ŋga ŋgwamna ba, ba diya? Anda keðe, si ka kam cek ta cəved e amba aa həmdamakwar.

⁴ Fara fara bay-ray hay ŋga ŋgwamna na, fa kamar sləra ŋgada Gazlavay ŋga jənkwar amba ka kam cek ta cəved e. Ama da akwar fa kam cek ta cəved e daa ba na, si ka zluram

ta bay-ray hay a, maja ata ta gədanŋa ŋga sərdamakwar banay. A da sərdamakwar banay a na, ŋga tede ba. Da ndəhay ma ka cek ta cəved e ba, bay-ray hay a fa sərdamata banay na, a key ŋgene, a kamar sləra a Gazlavay. Anda kefe, ata fa wuzdamərwa na, Gazlavay fa cey mevel a ray ndəhay ma ka cek ta cəved e ba.

⁵ Da anda kefe na, aŋga maaya amba ka namatar ray a bay-ray hay ŋga ŋgwamna. Ka namatar ray na, maja Gazlavay ma da sərdakwar banay daada ba, ama maja ka sərmara ara cek ta cəved e.

⁶ Ara maja ŋgene, akwar ma pəlam budaw may. Ndəhay ma cakala budaw a na, ara ndəhay masa Gazlavay ma pata ŋga ka sləra ha.

⁷ Cek masa ndəhay ŋga ŋgwamna ata ta cəved ŋga cəfdafamakwar na, vəldamatara. Da ara budaw na, vəldamatara a ndəhay ma cakala budaw a. Da ara dala ŋga cek mekele masa ŋgwamna maa cəfdafakwar na, vəldamara. Da ara ŋga ney ray ŋgada bay-ray hay ŋga ŋgwamna na, namatar ray.

Mey da ray menjey ta mewudey-vaw

⁸ Ka da njam ta dəvaz ŋga ndaw da ray akwar ba. Ama dəvaz pal da ray akwar daha amba ka pəlmara mandaw mandaw. Dəvaz a na, ara mewudey-vaw da wuzlah akwar. Ndaw ma wudey ndaw na, a key a nar ray fara fara ŋgada kwakwas ŋga Gazlavay.

⁹ Gazlavay a ləvey: «Ka da ley vaw saw ba, ka da kəfey ndaw vagay ba, ka da leley ba, ka da key dey fa cek ŋga ndaw ba.» *Mewey hay a kefe ta siya hay cəpa na, macəmkaya daa mey pal ma ləvey: «Wuɗa meseembew akah anda kah ma wuɗa ray akah.»

¹⁰ Ndaw ma wudey ndaw na, kwa fa da kar cek maaya ba ŋgada ndaw aha daa ba. Anda kefe, da ka wudey ndaw na, a key ŋgene, ka nar ray maaya maaya a kwakwas ŋga Gazlavay.

Mey da ray mewey vaw ŋga səkwey Yesu ma da vəhwa

¹¹ Wure kefe na, ka sərmara, pas a ta wuswa cay. Ara pas masa akwar ma da sləkdam daa ɗar. Ahaw, pas masa Gazlavay ma da ləhdakwar da bəla kefe na, aa gweegwe cay. Pas a na, aa gweegwe da ray pas masa akwar ma təbmara mey ŋga Yesu təlam heyey.

¹² Tavad fa ndøvey *, mamba slam a wurey †. Anda kefe, ya da kakwa cek maaya ba anda ndøhay daa løvanj saba. Ama jøwkwa vaw ta cek hay ma ka vøram nga key bay-gula da ray cek hay maaya ba anda ndøhay daa slam-mewedey.

¹³ Maaya na, menjey aløkwa a key maaya anda ndøhay daa slam-mewedey. Anda meløvey, ya da kakwa wasa malamba ba, ya da wakwa ba, ya da lakwa vaw saw da palah ba, ya da kakwa cek hay malamba ba, ya da tøkwa vaw ba, asaya, ya da kakwa sølenj fa cek nga ndaw ba may.

¹⁴ Anja maaya na, ka vølmar cøved a Bay Mahura Yesu *Køriste nga wey da ray akwar. Cek hay malamba masa akwar ma wudam kalah na, ka da kamara saba.

14

Mey da ray ndøhay masa ta gødanj lenj da ray ndøhay masa ta gødanj pøreh

¹ Ndøhay masa ta gødanj pøreh daa mey nga Gazlavay na, tøbmata a wuzlah akwar. Ka da mbødfmatar ray da ray mewulkey ata ba.

² Ya wudfey ngaa guzlkwar na, da ray cek mezømey. Ndøhay siya a wulkam na, cek hay tabiya mezømey. Anda kefe, ata na, a zømamara cek hay tabiya. Ama ndaw masa ta gødanj pøreh daa mey nga Gazlavay na, a zlurey nga zømey cek wura wura *, a zømey na, si gwaslaf nga lar daada gway.

³ Anda kefe, ndaw masa ma zømey aslaw na, a da røsa ndaw masa ma zømey gwaslaf nga lar daada gway ba. Yaw, ndaw masa ma zømey gwaslaf nga lar daada gway na, a da mbødfar ray a ndaw masa ma zømta cek hay tabiya ba may, maja ata cewete Gazlavay ta tøfta sem, ta mbøkdata daa ba.

⁴ Kaa kah na, wa amba ka mbødfar ray a ndaw ma ka sløra nga ndaw mekele na! Da ndaw a, a key sløra maaya, da a key sløra maaya ba na, si bay anja ma da nøka sløra anja ha gway. Fara fara, ndaw a, a key sløra ta cøved e la, maja

* **13:12 13.12** tavad fa ndøvey: Ara mey-menjey da ray bøla kefe ta ndøhay ma kam mebørey. A wudfey nga løvey bøla gweegwe a ndøvey. † **13:12 13.12** mamba slam a wurey: Ara mey-menjey da ray maaya nga Gazlavay ma da sawa a ray ndøhay. Ara pas masa aløkwa ma da njakwa ta Gazlavay da vad. **13:12 13.12** Ef 5.11; 6.11, 13; 1Jn 2.8 **13:13 13.13** Lk 21.34; Ef 5.18 **13:14 13.14** Føl 2.5; Kwa 3.15 **14:1 14.1** 15.7 **14:1 14.1-15.6** 1Kwr 8.1-13; 9.22; 10.23-33; Kwa 2.16, 20-22; 1Tm 4.4-5; Heb 13.9 * **14:2 14.2** a zlurey nga zømey cek wura wura: Ndøhay a zluram nga zømey cek wura wura na, maja aslaw masa kwakwas nga Jøwif hay ma tøkta sem, a wudam nga zømey ba, asaya, a wudam nga zømey aslaw nga kuley ba. **14:2 14.2** Dan 1.8; 1Kwr 10.25-28

Bay Mahura, bay anġa, aa ta gēdan ŋga jēna ndaw ma ka slēra ha ŋga key slēra maaya.

⁵ Ndaw mekele a wulkey đar hay mekele na, maaya a fēna đar hay siya. Ndaw mekele saya a wulkey đar hay cēpa na, ata letek. Anda keđe, anja kwa waawa ŋga sēra cek masa anġa ma wulkada daa mevel anġa maaya maaya.

⁶ Ndaw masa ma wulkey đar hay mekele a fēna siya hay na, a key ŋgene, a wuđey ŋga hēslar ray a Bay Mahura Yesu. Yaw, ndaw masa ma zēmta cek hay cēpa na, a key ŋgene, a wuđey ŋga hēslar ray a Bay Mahura may, maja fa kar suse a Gazlavay fa cek hay masa anġa ma zēmta ha. Asaya, ndaw masa ma zēmta cek hay cēpa ba na, a key ŋgene, a wuđey ŋga hēslar ray a Bay Mahura may, maja fa kar suse a Gazlavay fa cek hay masa anġa ma zēmta ha.

⁷ Ya sērkwā, kwa alēkwā ta dey da bēla keđe, kwa alēkwā ta mēckwā sem na, ya wakwā ray alēkwā ba.

⁸ Daa masa alēkwā ta dey keđe na, alēkwā manjatakaya ŋga kar slēra a Bay Mahura. Yaw, da masa alēkwā ma mēckwā sem may, ya mēckwā na, ŋga hēslar ray a Bay Mahura. Anda keđe, kwa alēkwā ta dey, kwa alēkwā mamēctakaya na, alēkwā cēpa ndēhay ŋga Bay Mahura Yesu *Kēriste.

⁹ Sērmara, Kēriste ta mēcey la, ama ta slēkđawa sem daa memēcey a ŋga key bay ŋga ndēhay masa ta dey ta masa mamēctakaya.

¹⁰ Da anda keđe na, kah, ka mbēđar ray a mēlmakw, ka me? Kah, ka rēsa mēlmakw, ka me? Alēkwā cēpa na, ya da nakwā fa mey ŋga Gazlavay, a kandakwar sariya.

¹¹ Anda mawuzlalakaya daa đerewel ŋga Gazlavay, ma lōvey:

«Yah, Bay Gazlavay masa ta dey, ya fa lōvey fara fara, ndēhay tabiya a da ragadam fa mey ađaw, kwa waawa a da hēslya ray, a da lōvey yah na, Gazlavay anġa.»

¹² Anda keđe, kwa waawa a da kada cek masa anġa ma ka fa mey ŋga Gazlavay.

Mey da ray mēpey lenġesl fa mēlman hay mekele mekele

¹³ Da anda keđe na, ya da mbēđtakwar ray a mēlma alēkwā hay saba. Ka da kam cek ŋga hēlda mēlmakw akwar ŋga key mebērey ba.

¹⁴ Yah na, yah ndaw ŋga Bay Mahura Yesu. Anda keđe, ya sēra fara fara, cek matēkakaya ŋga zēmey na, daa ba. Ama

da ndaw a wulkey cek keɗe aŋga maaya ba ŋga zəmeɣ na, cek aha aa maaya ba na, ŋgada aŋga gway.

¹⁵ Anda keɗe, da məlmakw a cey mevel a ray akah maja kah ma zəmeɣ cek wura wura na, ŋgene ka ta səpeɣ mewuɗey-vaw daa ba. *Kərɣste a məceɣ na, maja aŋga may. Maaya na, anja cek masa kah ma zəma na, aa zəɗɗa məlmakw ba.

¹⁶ Da ka wulkey cek aha aŋga maaya ŋga key, ama ka nəka ndəhay fa pamara ŋga cek maaya ba na, ŋgene, ka da ka ba.

¹⁷ Mewey ŋga Bay Gazlavay da ray ndəhay na, ara mey da ray cek mezəmeɣ ta cek meseɣ ba. Ama mewey ŋga Gazlavay da ray ndəhay na, ara menjeɣ maaya fa Gazlavay, menjeɣ daa zazay, asaya, menjeɣ daa meesəmeɣ masa Mesəfney aŋga ma vəɗərwə.

¹⁸ Yaw, da ndaw a kar sləra a Kərɣste anda keɗe na, a mbafar a Gazlavay la, asaya, ndəhay aa həmdamara ndaw a la may.

¹⁹ Maja ŋgene, kakwa gəɗaŋ ŋga key cek ma handawa zazay ta ŋga key cek ma jənnakwar ŋga həteɣ gəɗaŋ daa mey ŋga Gazlavay da wuzlah aləkwa.

²⁰ Ka da nəsmara sləra ŋga Gazlavay ta cek mezəmeɣ ba. Ahaw, fara fara cek mezəmeɣ cəpa na, aŋga maaya, ama da cek mezəmeɣ a da həɗda məlmakw ŋga key mebərey na, ŋgene, ŋgama kah ma zəma ba.

²¹ Ŋgama na, ka zəmam aslaw ba, ka sam wuzam ba. Kwa cek wura wura masa ma həɗda məlmakw ŋga key mebərey na, mbəkdamara.

²² Mey masa akwar ma təbmara da ray mezəmeɣ cek ta da ray mezəmeɣ cek ba na, ka da wuzdamara a ndaw ba, si akwar ta Gazlavay gway. Ndaw masa ma key cek ta mevel aŋga cəpa, a wulkey cew cew ba na, maaya ŋga Gazlavay aa da ray a.

²³ Ama ndaw masa fa wulkey cew cew da ray cek mezəmeɣ, a zəma cek aha na, ŋgene, Gazlavay a kar sariya la ŋgaa zəɗɗa maja ta zəma cek aha ta mevel pal daa ba. Yaw, kwa meeme masa ndaw ma ka ta mevel cew cew na, a key ŋgene, a key mebərey.

15

Mey da ray mekey maaya ŋgada ndəhay

¹ Aləkwa ndəhay masa ta gədan daa mey nga Gazlavay *, maaya na, ya jəntakwa ndəhay masa ta gədan pəreh daa mey a. Ya da kakwa cek masa ma mbafandakwar daada ba.

² Maaya na, kwa waawa a key cek masa ma mbafatar a ndəhay amba a jənta ndəhay nga hətey gədan daa mey nga Gazlavay a dey a, a dey a.

³ Ya sərkwə fara fara, *Kəriste na, ta key cek masa ma mbafar ngada ray anğa na, daa ba. Ama anda mawuzlalakaya daa dərewel nga Gazlavay, ma ləvey: «Ndəhay ta cədmaka la, kah Gazlavay, ama mecədey a ta vəhwa sem a ray adaw †.»

⁴ Cek hay tabiya masa mawuzlalakaya daa dərewel nga Gazlavay zleezle na, ara ngaa sərkadandakwar mey masa fara fara, amba ya pakwa ləngesl fa cek masa Gazlavay ma ləvey a vəldandakwara la heyey. Ya pakwa ləngesl na, maja mey mawuzlalakaya daa dərewel nga Gazlavay fa vəldandakwar gədan, asaya, fa jəndakwar amba ya bəskwa banay.

⁵ Anja Gazlavay ndaw ma vəltar gədan a ndəhay ta ma dəktar mevel a ndəhay nga vəkwar mewulkey maaya amba ka njam akwar macəmkaya dəy pal anda Yesu Kəriste ma wudey.

⁶ Anda keđe, akwar tabiya daa slam a, ka da cəmdamara dəy akwar pal nga həlmey Gazlavay papan nga Bay aləkwa Mahura, Yesu Kəriste.

Mey da ray ndəhay cəpa ma da həlmamara Bay Gazlavay

⁷ Təbmata ndəhay siya hay anda *Kəriste ma təbkwar. Təbmata amba a həslmar ray a Gazlavay.

⁸ Ya fa ləvkwar fara fara, Kəriste a sawa a bəla na, nga katar sləra ngada *Jəwif hay amba a wuzdatara Gazlavay na, ara ndaw ma mbərzley ba. A sawa na, nga key cek masa Gazlavay ma ləvtar a papan nga papa ata hay zleezle a katar la heyey.

⁹ Asaya, a sawa na, amba ndəhay masa Jəwif hay ba a həslmar ray a Gazlavay maja maaya anğa, anda mawuzlalakaya daa dərewel nga Gazlavay zleezle, ma ləvey:

«Ara maja keđe, yah ma da həslka ray

* **15:1 15.1** ndəhay masa ta gədan daa mey nga Gazlavay: Fede Pawl a wudey nga ləvey ndəhay masa ta gədan na, ara ndəhay ma səpam kwakwas nga Mawiz saba, ama ara ndəhay ma pamara Yesu nga ndaw ata fara fara. **15:1 15.1-2** 14.1-2; 1Kwr 8.1-2; 10.23-24 † **15:3 15.3** mecədey a ta vəhwa sem a ray adaw: Fede a wudey nga ləvey «mecədey a vəhwa a ray Yesu Kəriste». **15:3 15.3** Ps 69.10 **15:4 15.4** 1Kwr 10.11; 2Tm 3.16 **15:5 15.5** 12.16; Fəl 2.2-5 **15:7 15.7** 14.1 **15:8 15.8** Mt 15.24; SNM 3.25-26

fa mey nga ndəhay masa Jəwif hay ba hay.

Ya da həlmaka ta walay.»

¹⁰ Mawuzlalakaya daa dərewel nga Gazlavay saya, a ləvey:

«Akwar ndəhay masa Jəwif hay ba,
sasəmam daa slam a ta ndəhay nga Gazlavay.»

¹¹ Mawuzlalakaya saya, a ləvey:

«Akwar ndəhay Jəwif hay ba, həlmamara Bay Gazlavay.

Anja kwa ndaw daa səkway wura wura

nga həlma Bay Gazlavay.»

¹² *Izay, *ndaw ma təla mey nga Gazlavay taa guzley la saya, a ləvey:

«Ndaw a yawa la daa səkway nga Jese,

a da key bay nga ndəhay masa Jəwif hay ba may.

Ndəhay masa Jəwif hay ba na,

mewulkey ata aa da ray ndaw aha amba a ləhdata.»

¹³ Anja Gazlavay, ndaw ma vəltar gədan a ndəhay amba a pam ləngesl a ray a heyey na, ngaa səmdakwar mandaw mandaw, anja nga njadakwar daa zazay maja akwar ma pamara nga ndaw akwar fara fara. Anda keđe, cek masa anga ma da vəldakwara ha na, akwar fa səkwamara ta gədan nga *Mesəfney nga Gazlavay.

Mey da ray sləra nga Pawl

¹⁴ Məlma adaw hay, yah ta ray adaw ya fa ləvkwar, ya səra, fara fara akwar na, ndəhay ma wudam nga key cek maaya. Ka sərmara mey masa fara fara, ka gwamara nga kətmata ndəhay mekele ta mey a.

¹⁵ Ta ngene he cəpa, daa leeter adaw keđe, mey hay masa akwar ma cəndamara cay dəga zleezle na, ya sərfadakwara saya, ya zlurey ba. Ya zlurey ba na, maja Gazlavay ma kaya maaya la,

¹⁶ a paya nga key sləra nga Yesu *Kəriste ngada ndəhay masa *Jəwif hay ba hay. Yah ma vəlda ray adaw la fara fara ngada Gazlavay nga wuzey Mey anga maaya mawiya. Ya wuzdatara mey a, a ndəhay masa Jəwif hay ba, amba a təram nga cek mavəldakaya ngada anga masa ma mbafar kalah, cek masa *Mesəfney nga Gazlavay ma pa wal ngada Gazlavay a.

¹⁷ Anda keđe, ya faa səmey ga da ray sləra nga Gazlavay masa yah ma ka maja yah na, macəmkaya ta Yesu Kəriste.

¹⁸ Kwa ya fa da gwa ngaa guzley da ray cek mekele na, daa ba, si da ray sləra masa Kəriste ma ka ta fa yah, amba a handatərwa ndəhay masa Jəwif hay ba hay nga namar

ray a Gazlavay. A handatərwa na, ta fa mey masa yah ma wuzda leŋ ta fa cek masa yah ma kata.

¹⁹ Asaya, a handatərwa na, ta fa maazla hay mekele mekele ma rəzley ndaw masa anğa ma kata leŋ ta fa gədan nğa Mesəfney anğa. Anda keđe, yah ma wuzda *Mey-maaya-mawiya nğa Kərıste la dəga da *Jeruzelem haa kasl aa hwayak nğa İliri. Ya ta wuzda mey a la tabiya maaya maaya daa slam hay a ngene.

²⁰ Anda meləvey, ya wuzey mey a na, daa hwayak hay masa ndəhay ma cəndamara mey da ray Kərıste daa ba aran. Ya wufey nğa wuzey mey a daa hwayak hay masa ndəhay ma cəndamara mey da ray Kərıste cay ba, maja ndəhay a da wulkam ara anda ya ləmey way a ray salay nğa way masa ndaw mekele ma pa.

²¹ Ya ka anda keđe na, ya wufey nğa key anda mawuzlalakaya daa dərəwel nğa Gazlavay, ma ləvey:

«Ndəhay masa ta wuzdamatara mey
da ray a daa ba aran na, a hətmar la ta dey ata.
Ndəhay masa kwa ta cənam mey
da ray a daa ba na, a cəndamara mey a la.»

Pawl a wufey nğa daw a Rawm

²² Yah ma wulkey la dey ga nğa daw fa akwar a *Rawm, ama ya ta hətey har daa ba maja sləra ha keđe.

²³ Mevey ga, ya ta wufey la nğa daw fa akwar, ama sləra ta təkya sem. Wure keđe na, yah ma ndəvda sləra adaw cay daa hwayak hay feđe.

²⁴ Ya wufey nğa daw fa akwar dəba nğa njawa nekəfey nğa kawa matakwan akwar. Fa dəba ha, ya daw la aa hwayak nğa Espay. Yaw, ya wufey ka jənmaya nğa daw nğadaa hwayak a.

²⁵ Ama wure keđe na, ya wufey nğa daw fa ndəhay nğa Gazlavay da *Jeruzelem d'agay nğa jəntərwa,

²⁶ maja ndəhay daa *mecəmey-ray nğa ndəhay nğa Yesu da Masadəwan ta da Akay ta cakalam dala la nğa jəney masa-viya hay daa mecəmey-ray nğa ndəhay nğa Yesu da Jeruzelem e.

²⁷ Ara mevel ata ma wufey nğa cekeley dala ha. Ama fara fara si a jənmata ndəhay a maja ara cek anda dəvaz. Ya ləvey anda keđe na, maja ndəhay da Masadəwan ta da Akay a ata *Jəwif hay ba, ama ta hətam maaya nğa Gazlavay la ta fa Jəwif hay. Anda keđe, anğa maaya amba ndəhay Jəwif

hay ba hay a, a jənmata ndəhay Jəwif hay ta zleley ata hay may.

²⁸ Da yah ma ndəvdərwa sləra ha cay da Jeruzelem e, asaya, da yah ma vəldatara dala macakalakaya heyey cay a ndəhay fetede na, ŋgene, ya daw aa hwayak ŋga Espay dəba, ama ya da daw na, ta fa akwar.

²⁹ Ya səra, da yah ma wusey la fa akwar na, *Kəriste a pəskwar mey la maja yah ma daw a.

³⁰ Məlma adaw hay, ambahw, kakwa gədan ŋga dərey danğay a Gazlavay ta mevel aləkwa cəpa maja yah. Yaa cəfdakwar kaa na, ta mezəley ŋga Bay Mahura Yesu Kəriste, asaya, yaa cəfdakwar maja mewudəy-vaw masa *Mesəfney ŋga Gazlavay ma handərwa a wuzlah aləkwa.

³¹ Dəram danğay na, amba ndəhay ma səra Yesu Kəriste ba da *Jude a sərdamaya banay ba. Dəram danğay saya, amba cek masa yah ma da handatara a ndəhay ŋga Yesu da Jeruzelem heyey na, a təbmara ta meesəmey.

³² Anda kede, da Gazlavay ta təba la na, ya wusey la fa akwar ta meesəmey. Da yah ma wusey la na, ya məskey vaw la nekədəy da wuzlah akwar.

³³ Anja Gazlavay, ndaw ma handawa zazay mandaw mandaw a ray ndəhay, ŋga njeý ta akwar tabiya. *Amen.

16

Pawl a catar har a ndəhay siya da Rawm

¹ Ya faa guzlkwar da ray dam-mama aləkwa Febe, ŋgwas ma jənta ndəhay daa *mecəmey-ray ŋga ndəhay ŋga Yesu da Senkəre.

² Təbmara ŋgwas aha maaya maaya ta mezəley ŋga Bay aləkwa Mahura. Təbmara na, anda ndəhay ŋga Yesu ma təbam ndəhay. Da cek fa vəda daa ba na, jənmara maja anğa ta jəney ndəhay la ga. Kwa yah may, ta jənya la.

³ Camatar har ŋgada ata Pəriska ta zel e Akilas. Ara ndəhay masa ala ma kam sləra ŋga Yesu *Kəriste bama.

⁴ Ara ndəhay masa ma vəldamara ray ata la amba a ləhdamaya daa meməcey. Ya fa katar suse ga. Ma katar suse he na, yah daada ba, ama ndəhay cəpa masa daa mecəmey-ray ŋga ndəhay ŋga Yesu Kəriste masa *Jəwif hay ba fa kamatar suse may.

⁵ Camatar har a ndəhay ŋga Yesu masa ma kusam da way ata.

Camar har a Epayinet, jam adaw masa yah ma wuɗa kalah, ndaw masa ma tɔba mey nga Kɔriste ngeeme daa hwayak nga Azi.

⁶ Camar har a *Mari, ngwas masa ma kakwar slɔra la ga.

⁷ Camatar har ngada ata Andɔrawnikus ta Juniyas. Ara sɔkway adaw hay, ya ta zɔmam dangay la bama. Ata na, ara ndɔhay meslɔrey nga Yesu masa ndɔhay ma sɔrmata maaya maaya. Ata na, a tɔbmara mey nga Kɔriste teesɔɔ da ray adaw.

⁸ Camar har a Ampɔliyatus, jam adaw masa yah ma wuɗa kalah daa mecɔmey-ray nga ndɔhay nga Yesu Bay Mahura.

⁹ Camar har a Urbenj, ndaw masa alɔkwa ma kakwa slɔra nga Kɔriste bama. Camar har saya ngada jam adaw Estakis.

¹⁰ Camar har a Apel, ndaw masa ma sɔrey banay ga maja Kɔriste, ama ta njeɣ la aɗga ndaw nga Yesu fara fara cɔɗga.

Camatar har ngada ndɔhay da way Aristawbul may.

¹¹ Camar har a sɔkway adaw Herawdiyanjw.

Camatar har ngada ndɔhay daa sɔkway nga Narsis ma tɔbmara mey nga Bay Mahura.

¹² Camatar har ngada ata Tɔrifɔn ta Tɔrifawz, ndɔhay masa ma kam slɔra la ga ngada Bay Mahura.

Camar har may ngada jam adaw Persit, masa yah ma wuɗa kalah. Ara ngwas ma key slɔra la ga ngada Bay Mahura.

¹³ Camar har ngada Rufus, ndaw masa fa sɔpa mey nga Gazlavay ta cɔved e. Camar har a mamaha masa ma wadaya vaw anda aɗga mamay.

¹⁴ Camatar har ngada ata Asinkɔrit, Fɔlegwanj, Hermes, Patɔrawbas, Hɔrmas, asaya, camatar har ngada mɔlmanj hay daa mecɔmey-ray nga ndɔhay nga Yesu masa ata bama.

¹⁵ Camatar har ngada Filalagw, Juleɣ leɗ Nere ta dammamaha. Camar har ngada Awlimpas, asaya, camatar har ngada ndɔhay nga Yesu masa ata bama.

¹⁶ Cam har da wuzlah akwar cɔpa pal pal, akwar mɔlmanj hay daa Yesu Kɔriste. Ndɔhay daa mecɔmey-ray nga ndɔhay nga Kɔriste cɔpa a camakwar har.

Mey nga madagway-dakw

¹⁷ Mɔlma adaw hay ya fa kakwar ambahw, pam lenjesl ta ndɔhay ma handamawa mewuɗkey-dɔɣ a wuzlah akwar

maja a da nɛsmara meesərkey masa akwar ma cɛndamara da ray *Kəriste. Ka da njam ta ata daa slam a ba.

¹⁸ Fara fara, səkway nga ndəhay anda n̄gene na, fa kamar slɛra a Kəriste Bay aləkwa Mahura daa ba, ama a kam slɛra na, maja hwaɗ ata daada gway. Faa zɛɗdamata ndəhay masa ma sɛra cek ba ta mey ata hay maaya maaya masa ma betey ndəhay.

¹⁹ Ndəhay tabiya a sɛrmara akwar fa namar ray ngada Bay Mahura, ara maja n̄gene, ya faa sɛmey ga da ray akwar. Cek mahura na, pam len̄gesl nga wunkey cek masa maaya ta maaya ba. Cek masa maaya ba na, ka da kamara ba.

²⁰ Gazlavay, ndaw ma handawa zazay a ndəhay na, a fɛna *Satan̄ la ta gɛdan̄, a da pa Satan̄ a asi salay akwar. Anja maaya nga Bay aləkwa Mahura Yesu nga n̄jey ta akwar.

²¹ Timawte, ndaw masa ala ma kam slɛra cew e, a cakwar har. Ndəhay aɗaw hay ata Lusiyus, Jasan̄w len̄ Sawsipater a camakwar har may.

²² Yah Tertiyus, ndaw ma wuzlala mey nga Pawl tabiya daa leeter keɗe, ya fa cakwar har ta mezɔley nga Bay Mahura Yesu, ndaw masa ma cɛmndakwar.

²³ Gayus, ndaw masa yah ma n̄jey da way an̄ga a cakwar har. Ara ndaw masa ndəhay nga Yesu ma kusam da way an̄ga nga dɛrey dan̄gay. Eraste, ndaw ma kɛrza dala nga ngwamna daa berney feɗe, ta mɛlma aləkwa Kartus a camakwar har may.

[
²⁴ Anja maaya nga Bay aləkwa Mahura Yesu Kəriste nga n̄jey ta akwar tabiya. *Amen.]

Mehəlmey Gazlavay

²⁵ Həlmakwa Bay Gazlavay. An̄ga na, a gwa a vɛlkwar gɛdan̄ nga n̄jey daa cɛved an̄ga ta fa *Mey-maaya-mawiya masa yah ma wuzdatara a ndəhay da ray Yesu *Kəriste. Zleezle na, Mey-maaya-mawiya ha mabadakaya fa dey nga ndəhay.

²⁶ Ama wure keɗe na, mey a ta wuzwa cay ta fa ndəhay ma tɛla mey an̄ga ma wuzlalamara zleezle da ray Kəriste. Anda keɗe, səkway hay masa *Jɛwif hay ba da bɛla tabiya ta jɛkam slɛmay fa mey a la anda Gazlavay ma lɛvey, Gazlavay masa aa ta dey nga sɛrmataw. A wuɗey ndəhay tabiya a jɛkam slɛmay fa Mey-maaya-mawiya ha, amba a tɛbmara, a namar ray.

16:17 16.17 Mt 7.15; 2Tes 3.6; Tit 3.9-10; 2Jn 10 **16:18 16.18** Fɛl 3.19; Kwa 2.4
16:19 16.19 1.8 **16:20 16.20** 1.7 **16:21 16.21** Timawte: SNM 16.1 **16:23**
16.23 Eraste: 2Tm 4.20 **16:25 16.25** Ef 1.9; 3.4-5; Kwa 1.26 **16:26 16.26** 1.2,

²⁷ Anja ndəhay nga həlmamara Gazlavay nga sərmataw!
Ara anga pal taava anga, ndaw ma səra cek. Həlmakwa
maja Yesu Kəriste. *Amen.

Leeter masa Pawl ma wuzlala ngeeme a

Kwarinti hay

Mey da ray

Leeter ngeeme ngada Kwarinti hay

Pawl a wuzlala leeter ngada ndəhay daa mecəmey-ray nga Yesu daa berney nga Kwarinti na, daa masa anga daa berney nga Efez. (SNM 18.1-21).

Kwarinti na, ara berney mahura daa hwayak nga Gerek hay. Berney aha aa da mey-bəlay mahura. Anda keɗe daa berney a, ndəhay ga ma samawa daa hwayak hay mekele mekele daha, a ragadam ngada kuley hay mekele mekele may. Menjey ata na, maaya ba. Cek hay maaya ba masa ata ma kamara na, fa nəsta ndəhay daa mecəmey-ray nga Yesu. Maja ngene, Pawl a wuzlalatar leeter hay məfad. Da wuzlah leeter hay a na, cew ata daha daa Derewel nga Gazlavay haa wure keɗe, cew hay may taa zəɗam sem.

Pawl a wuzlala leeter e maja a cənda na, da wuzlah ndəhay daa mecəmey-ray nga Yesu, mey mekele mekele daha: fa təram vaw da wuzlah ata (fasəlawal 1 haa 4), fa kam cek malamba (fasəlawal 5), fa wudam vaw da wuzlah ata (fasəlawal 6), mey da ray meley ngwas (fasəlawal 7), mey da ray menjey da wuzlah ndəhay ma ta kuley hay, ma zəmamara aslaw nga kuley a (fasəlawal 8 haa 10), mey da ray mezəmey ɗaf nga sərfeɗey meməcey nga Yesu (fasəlawal 11), mey da ray gəɗaŋ nga Mesəfney nga Gazlavay masa Gazlavay ma vəlda a ndaw a, ndaw a, nga key sləra mekele mekele daa mecəmey-ray nga ndəhay nga Yesu (fasəlawal 12 haa 14), leŋ mey da ray ndəhay nga Yesu ma da sləkɗamawa daa meməcey (fasəlawal 15).

Daa leeter e keɗe na, mey mekele mekele daha nga vəley gəɗaŋ a ndəhay:

Mewuɗey-vaw (fasəlawal 13)

Mey da ray gəɗaŋ masa Mesəfney nga Gazlavay ma vəldatara a ndəhay anga hay nga key sləra anga. (fasəlawal 12 haa 14)

Mecey-har

¹ Ara yah Pawl ma wuzlalakwa leeter keɗe, yah ndaw masa *Gazlavay ma wala nga key *ndaw-meslərey nga

*Yesu *Køriste. Ya wuzlalamara na, ala ta mөлma alөkwa Sawsten.

² Ya wuzlalamara leeter keđe ngada akwar, ndөhay daa *mecөmey-ray nga ndөhay nga Yesu masa daa berney nga Kwarinti, akwar masa Gazlavay ma walakwar wal amba ka njam macөmkaya ta Yesu Køriste. A walakwar bama ta ndөhay tabiya masa fa dөrmar dangay a Bay alөkwa Mahura Yesu Køriste, kwa daa wura daa wura. Anğa na, Bay ata Mahura, asaya, anğa na, Bay ala Mahura may.

³ Anja Papa alөkwa, Bay Gazlavay, ta Bay alөkwa Mahura Yesu Køriste nga pөsmakwar mey, asaya, nga njadamakwar daa zazay.

Mey da ray maaya nga Gazlavay da ray ndөhay anğa hay daa berney nga Kwarinti

⁴ Ya fa kar suse a Gazlavay adaw mandaw mandaw maja maaya anğa ma pawa salay a ray akwar ta fa Yesu *Køriste.

⁵ Daa masa akwar macөmkaya ta Yesu Køriste na, Gazlavay ta kakwar maaya la ga amba ka kamar slөra. Anda keđe, ta vөлkwar gөdөnj nga wuzey mey anğa a ndөhay la, asaya, ta vөлkwar lenğesl la nga cөnda mey anğa hay tabiya.

⁶ Mey da ray Køriste masa ala ma wuzdamakwara na, aa daa mevel akwar mandaw mandaw.

⁷ Anda keđe, akwar masa fa sөkwmara Bay alөkwa Mahura Yesu Køriste ma da wuzwa vaw na, Gazlavay ta vөлkwar gөdөnj la nga key slөra wura wura tabiya.

⁸ Ara Gazlavay ma da vөлkwar gөdөnj anğa nga njeý maaya fa mey anğa haa pas masa Bay alөkwa Mahura ma da vөhwa nga key sariya amba a hөtfakwar manjar mebörey.

⁹ Gazlavay ta zөлkwara la amba ka njam macөmkaya ta Bөzey anğa, Yesu Køriste, Bay alөkwa Mahura. Gazlavay na, cek masa aa ma lövey a ka la na, a ka la fara fara.

Ndөhay nga Yesu da Kwarinti a wudkam dөy

¹⁰ Mөлma adaw hay, ya fa kakwar ambahw ta mezөley nga Bay alөkwa Mahura Yesu *Køriste amba ka cөmam dөy. Ka da wudkam dөy da wuzlah akwar ba. Njam macөmkaya ta mevel letek, ta mewulkey letek.

¹¹ Mөлma adaw hay, yaa guzley anda keđe na, maja ndөhay daa sөkway nga Kelөwe ta kadamiwa la, a lövmaya, akwar fa tөram vaw ta tөrey da wuzlah akwar.

¹² Ehe, jøkam slømay fa cek masa yah ma wuḍey ṅḡaa guzlkwar. Akwar ta mewulkey wal wal da wuzlah akwar. Ndəhay siya a ləvam a səpam na, yah, Pawl. Siya hay a ləvam a səpam na, Apalaws. Siya hay a ləvam a səpam na, *Piyer. Siya hay mekele saya a ləvam a səpam na, Kəriste.

¹³ Ka wulkam na, Kəriste ṅḡa mawunkakaya weewe daw? Yah, Pawl na, ya ta məcey la fa hwadam mazlanḡalakaya maja akwar daw? Akwar ta hətam *baptem ta mezəley aḍaw la daw?

¹⁴ Ya fa kar suse a Gazlavay maja ya ta key baptem ṅḡada ndaw da wuzlah akwar daa ba, ama si ṅḡada ata Kərispus ta Gayus daada gway.

¹⁵ Anda keḍe, kwa ndaw pal fa da ləvey ta hətey baptem la ta mezəley aḍaw na, daa ba.

¹⁶ A', fara, ya ta katar baptem la ṅḡada ata Estefanas ta ndəhay da way ṅḡa. Ayəwa, da ya ta key baptem ṅḡada ndəhay mekele la kwa, ya səra ba.

¹⁷ Kəriste a slərđiwa na, ṅḡa katar baptem a ndəhay ba, ama a slərđiwa ṅḡa wuzey *Mey-maaya-mawiya. Daa masa ya fa wuzda Mey-maaya-mawiya na, ya wuzda ta mewulkey ṅḡa ndaw-maḡəḍaṅ ba. Ya ka anda keḍe na, amba meməcey ṅḡa Kəriste da ray hwadam mazlanḡalakaya a tərey ṅḡa cek ṅḡa tede ba.

Yesu Kəriste a wuzḍərwa ḡəḍaṅ ta lenḡesl ṅḡa Gazlavay

¹⁸ Ndəhay masa ma zlanḡadam sem daa cəved ṅḡa Gazlavay na, a wulkam mey da ray meməcey ṅḡa *Kəriste fa hwadam mazlanḡalakaya na, ara mey ṅḡa tede. Ama ṅḡada aləkwa, ndəhay masa Gazlavay ma ləhdata cay na, ya sərkwa meməcey ṅḡa Kəriste a wuzwa ḡəḍaṅ ṅḡa Gazlavay ṅḡa ləhdata ndəhay.

¹⁹ Mey ṅḡa Gazlavay a ləvey:

«Ndəhay ma sərmara cek na,

ya da tərda mesərey cek ata ha ṅḡa cek ṅḡa tede.

Ndəhay masa ta lenḡesl na,

ya da tərda lenḡesl ata ha ṅḡa cek ṅḡa tede.»

²⁰ Da kəne na, ndəhay ma sərmara cek na, mesərey cek ata ha, a da vəltar me? Yaw, *ndəhay maa sərkada kwakwas ṅḡa Mawiz na, meesərkedey ata ha a jənta fa mey ṅḡa Gazlavay la daw? Ndəhay ma ka yawa wure keḍe kaa na, mekey yawa ata ha a vəltar me? Gazlavay ta wuzda cay,

1:12 1.12 3.4; **Apalaws:** 3.5-6, 22; 4.6; 16.12; SNM 18.24; 19.1; **Piyer:** 1Kwr 3.22; 9.5; 15.5; Gal 2.911-14; 2Kwr 10.7 **1:14 1.14** Kərispus: SNM 18.8; **Gayus:** Rm 16.23-24 **1:16 1.16** Estefanas: 16.15 **1:18 1.18** Rm 1.16; 2Kwr 4.3 **1:19 1.19** Iz 29.14; Jəw 12.13, 17; Iz 19.12-14; 44.25 **1:19 1.19-20** 3.18-20; Mt 11.25; Rm 1.22

mesərey cek da bəla kaa na, ara cek nga tede, a ləhey ndaw ba.

²¹ Ndəhay da bəla keđe a səram cek hay mekele mekele. Ta hətmar cek masa Gazlavay ma ka ta lenğesl anğa la, ama kwa ta səmara Gazlavay daa ba. Maja nğene, a mbafar a Gazlavay amba ndəhay ma təba mey anğa a ləham na, ta fa mey masa ala ma wuzdamara da ray meməcey nga Yesu fa hwadam mazlanğalakaya. Mey masa ala ma wuzdamara ha na, ndəhay da bəla a padamara nga cek nga tede.

²² Anda keđe, *Jəwif hay a wudam nga hətey maazla amba a səmara mey masa ala ma wuzdamara na, ara mey fara fara. Gərek hay na, a wudam nga sərey cek ta lenğesl ata gway.

²³ Ama ala na, ya wuzam mey da ray Kəriste ma məcey fa hwadam mazlanğalakaya. Jəwif hay ma cəndamara mey a na, a cam mevel, a wulkam a key ya cədmara Gazlavay. Ndəhay masa Jəwif hay ba ma cəndamara mey a na, a ləvam ara mey nga tede.

²⁴ Ama ndəhay masa Gazlavay ma zəлта, kwa Jəwif hay, kwa Jəwif hay ba, nğada ata na, Kəriste a wuzwa gədan nga Gazlavay, asaya, a wuzwa lenğesl maaya nga Gazlavay.

²⁵ Cek nga Gazlavay masa ndəhay ma wulkam ara cek nga tede na, cek aha, anğa ta lenğesl maaya a fəna lenğesl nga ndaw-magədan. Sləra nga Gazlavay masa ndəhay ma wulkam a ka anda ndaw masa-bəle na, sləra ha, makakaya ta gədan ma fəna gədan nga ndaw-magədan.

²⁶ Məlma adaw hay, wulkam cey. Akwar masa Gazlavay ma zəlkwar na, akwar səkway nga ndəhay wura? Fa dey nga ndəhay da bəla na, ndəhay ta lenğesl ga da wuzlah akwar daa ba. Asaya, ndəhay ta gədan, leŋ ndəhay mahura hay da wuzlah akwar ga daa ba.

²⁷ Sasəkar jak, Gazlavay a weley na, ndəhay masa ndəhay da bəla * ma wulkam ara cek hay nga tede amba a patar hwaray a ndəhay masa ta lenğesl. Gazlavay a weley na, ndəhay masa ndəhay ma wulkam ata masa-bəle hay amba a patar hwaray a ndəhay masa ta gədan.

²⁸ Gazlavay a weley na, ndəhay saw nga tede masa ndəhay ma rəsmata amba aa zədfdata ndəhay mahura hay.

²⁹ Maja nğene, kwa ndaw pal fa da zlepey fa mey nga Gazlavay daa ba.

1:21 1.21 Rm 1.19-20 **1:22 1.22** Mt 12.38; Jan 4.48; SNM 17.18, 32 **1:23 1.23** 2.14; Gal 3.1; 5.11 **1:24 1.24** 1.18; 2.5; Kwa 2.3 **1:25 1.25** 2Kwr 13.4

1:26 1.26 Jan 7.48 * **1:27 1.27** ndəhay da bəla: Ara ndəhay ma namar ray a Gazlavay ba. Nəka 1Kwr 5.10. **1:27 1.27-28** Rm 12.16; Jak 2.5; Lk 1.51-53; 6.20

³⁰ Yaw, ara maja slëra masa Gazlavay ma ka, akwar macëm kaya ta Yesu Këriste. Gazlavay a vëlndakwar lenjesl na, ta fa Këriste he. Ara ta fa Yesu Këriste he saya, Gazlavay ma pandakwar nga ndëhay maaya fa mey anga, a walandakwar wal ngada anga, asaya, a lëhdandakwar daa memëcey.

³¹ Anda kefe, a key anda mawuzlalakaya daa dërewel nga Gazlavay, ma lëvey: «Da ndaw a wufey nga zlepey na, nga zlepey da ray slëra masa Bay Gazlavay ma ka gway.»

2

Pawl a wuzey mey da ray memëcey nga Yesu

¹ Mëlma adaw hay, masa yah ma daw fa akwar nga wuzdakwara mey mabadakaya nga Gazlavay heyey na, ya taa guzley ta mey masa mazlëdkaya daa ba, asaya, ya taa guzley ta mey masa ma hëbkwar ray daa ba.

² Daa masa yah da wuzlah akwar na, ya ta kërza mevel la nga wulkey si da ray Yesu *Këriste ma mëcey fa hwadam mazlangalakaya gway.

³ Daa ngene, yah masa-bële, mandërzay fa kaya, ya faa wesey.

⁴ Masa ya fa wuzdakwara mey nga Gazlavay na, ya taa guzley ta mewulkey nga ndaw-magëdan amba ka tëbmara mey adaw na, daa ba. Ama ara gëdan nga *Mesëfney nga Gazlavay ma wuzdakwara mey adaw a na, ara mey fara fara.

⁵ Da ray ngene, ka pamara Yesu nga ndaw akwar fara fara na, ara maja lenjesl nga ndëhay ba, ama ara maja gëdan nga Gazlavay.

Mey da ray lenjesl maaya nga Gazlavay

⁶ Ta ngene he cëpa, ala faa sër kadamata ndëhay ma tëbmara mey nga Gazlavay maaya maaya ta lenjesl masa fara fara da ray a. Yaa sër kadamata na, nga sërey cek ta lenjesl nga ndaw-magëdan ba, asaya, ta lenjesl nga bay hay da bëla kefe ba, bay hay masa Gazlavay ma daa zëfdata.

⁷ Ama mesërey cek masa ala maa guzlam da ray a kefe na, ara ta lenjesl nga Gazlavay. Ara cek mabadakaya dëga zleezle fa dey nga ndëhay. Dëga bëla ta zley daa ba aran na, Gazlavay ta wufey la nga lëhdandakwar ta fa lenjesl e amba ya mbëzkwa aa slam anga mewedey.

⁸ Bay hay ma wam da bēla keɗe ta sɛrmara lenɗesl e daa ba. Da ta sɛrmara la na, anja ta dɛrmara Bay alɛkwa Mahura, ndaw masa ta gɛɗan, fa hwadam mazlanɗagalakaya daa ba.

⁹ Cek masa Gazlavay ma ka ha na, anɗa anda mawuzlalakaya daa ɗerewel nɗa Gazlavay ma lɔvey:

«Cek masa Gazlavay ma diya

nɗada ndɔhay masa aa ma wudta na,

ara cek ma fɛna mewulkey nɗa ndaw-magɛɗan.

Kwa ndaw pal ta hɛtar cek aha ta dey anɗa daa ba,

kwa ndaw pal ta cɛnda ta slɛmay anɗa daa ba may.»

¹⁰ Ara nɗada alɛkwa Gazlavay ma wuzdandakwara cek aha nɗene ta fa Mesɔfney anɗa. Mesɔfney a, a sɛrta cek hay tabiya, kwa mewulkey nɗa Gazlavay mabɔɗakaya na, a sɛra.

¹¹ Ndaw na, a sɛra mewulkey nɗa ndaw mekele daw? Si ndaw aha ray anɗa ma sɛra mewulkey anɗa, ba diya? Anɗa letek ta Gazlavay may, ma sɛra mewulkey nɗa Gazlavay na, wa? Si Mesɔfney anɗa.

¹² Mesɔfney masa da ray alɛkwa na, a sawa ta fa ndɔhay magɛɗan ba, ama ara Mesɔfney masa Gazlavay ma vɛldandakwara amba ya sɛrmatakwa cek hay maaya tabiya masa Gazlavay ma vɛldandakwara.

¹³ Daa masa ala faa guzlmatar a ndɔhay na, yaa guzlmatar ta mey masa ndɔhay maa sɛrkadamandar ta lenɗesl ata ba, ama ara *Mesɔfney nɗa Gazlavay maa sɛrkadandar nɗaa guzley. Anda keɗe, ala fa wuzdamara mey masa fara fara da ray Gazlavay. Ya wuzdamara na, nɗada ndɔhay masa ta Mesɔfney nɗa Gazlavay da ray ata.

¹⁴ Ndaw masa ta Mesɔfney nɗa Gazlavay da ray a daa ba na, a gwa nɗa tɛba mey nɗa Mesɔfney nɗa Gazlavay ba. A cɛnda mey a ba, a wulkey ara mey nɗa tede, maja ma gwa nɗa nɛka mey a ta ma gwa nɗa cɛnda na, si ndaw ta Mesɔfney nɗa Gazlavay da ray a gway.

¹⁵ Ndaw ta Mesɔfney nɗa Gazlavay na, a gwa nɗa nɛkta cek hay tabiya, a sɛrta cek hay maaya ta maaya ba. Ama ndaw aha na, ndaw ma gwa nɗa sanɗala daa ba.

¹⁶ Anɗa letek anda mey nɗa Gazlavay mawuzlalakaya ma lɔvey:

«Ma sɛra mewulkey nɗa Bay Gazlavay na, wa?

Ma da slar yawa a Bay Gazlavay na, wa?»

Ama alɛkwa * na, mewulkey alɛkwa letek ta nɗa Kɛriste.

2:8 2.8 Lk 23.34 2:9 2.9 Iz 52.15 2:12 2.12 Rm 8.15 2:13 2.13 2.4; 12.10 2:14 2.14 1.18, 23; Jan 3.5-12; 2Kwr 3.14-18 * 2:16 2.16 alɛkwa: Pawl ta ndɔhay mekele ta Mesɔfney nɗa Gazlavay da ray ata. 2:16 2.16 Iz 40.13; Rm 11.34

3

Mey da ray ndəhay ma ka sləra ŋga Gazlavay

¹ Məlma adaw hay, ŋгаа guzley ŋgada akwar anda yah maa guzley ŋgada ndəhay masa ta *Mesəfney ŋga Gazlavay da ray na, ya gwa ba. Ama yaa guzlkwar na, anda ŋgada ndəhay da bəla ma kam cek anda ata ma wudam gway, maja akwar anda bəza hay mecəhe daa cəved ŋga *Kəriste.

² Yaa sərkadakwar na, cek masa ta gəra ba arañ. Anğa letek anda bəzey ma sey dəwa ma zəmey daf ba arañ. Akwar may, kwa wure kedə, mey masa ta gəra na, ka cəndamara ba arañ anda bəzey ma gwa ŋga zəmey daf ba arañ,

³ maja ləngesl akwar na, anda ŋga ndəhay da bəla daada gway. Akwar fa kam səleŋ da wuzlah akwar, akwar fa təram vaw da wuzlah akwar. Da ray ŋgene, mewulkey akwar na, anda ŋga ndəhay da bəla daada gway. Menjey akwar na, anda ŋga ndəhay da bəla gway may.

⁴ Da ndaw da wuzlah akwar a ləvey: «Ya səpey na, Pawl,» ndaw mekele a ləvey: «Ya səpey na, Apalaws,» mey hay a kedə na, ara mewulkey ŋga ndaw da bəla, ba daw?

⁵ Apalaws na, wa? Yah Pawl na, wa? Ala na, ndəhay ma ka sləra ŋga Gazlavay gway. A slərdandərwa amba ka təbmara mey da ray Kəriste. Kwa waawa da wuzlah ala, a key sləra masa Gazlavay ma vəldara.

⁶ Ala na, anda ndəhay mehəvey *. Yah na, ndaw ma sləka cek, Apalaws na, ndaw ma mbədar yam. Ama Gazlavay na, ndaw ma gəlda cek aha.

⁷ Maja ŋgene, ndaw ma sləka cek ta ndaw ma mbədar yam na, ara ndəhay ŋga tede. Ara Gazlavay pal ma gwa ŋga gəlda cek aha, ara anğa ma wey da ray a.

⁸ Ndaw ma sləka cek ta ndaw ma mbədar yam na, ata letek, Gazlavay a da pəlar kwa ŋgada waawa tədə fa sləra anğa.

⁹ Ala cew e na, ala fa kam sləra ŋgada Gazlavay. Akwar na, anda ley ŋga Gazlavay.

Asaya, akwar na, anda way ŋga Gazlavay maləmkaya.

¹⁰ Gazlavay ta vəlya gədaŋ la ŋga zley sləra ha. Yah na, anda ndaw meləmey way, ma pa salay ŋga way maaya

3:1 3.1 Jan 16.12 **3:2 3.2** Heb 5.12-13; 1Pi 2.2 **3:3 3.3** 1.10-11; Gal 5.19-20

3:4 3.4-5 1.12 * **3:6 3.6** ndəhay mehəvey: Pawl a wudəy ŋga ləvey ara anğa ma zlar ŋga wuzey mey ŋga Gazlavay da Kwarinti. Fa dəba ha, Apalaws a daw, a vəltar gədaŋ ta mey a saya. Ama ara Gazlavay ma gwa ŋga jənta ndəhay da Kwarinti amba a diyam fa mey fa mey daa cəved ŋga Gazlavay. **3:6 3.6** SNM 18.4, 11, 24-28 **3:8 3.8** 4.5 **3:9 3.9** Mt 13.3-9; Ef 2.20-21; 1Pi 2.4-6

maaya ta aŋgwa. Wure keɗe, ndaw mekele ta sawa la nga lɔma way a. Ama si kwa waawa a pey lenɗesl maaya maaya daa melɔmey way a.

¹¹ Salay nga way mapakaya cay, ara Yesu Kɔriste. Ndaw ma gwa nga pey salay nga way mekele daa saba.

¹² Da ray salay nga way a na, ndɔhay siya a lɔmamara way a ta bɔrey maaya, siya hay ta aŋgwa maaya, ndɔhay mekele may a kɔɗmara ta hwadam, siya hay a kɔrcamara ta guzer, da daa ba, ta panay.

¹³ Ta pas masa Gazlavay ma da ka sariya na, slɔra nga kwa waawa a wuzwa la fa dey nga ndɔhay, maja ta pas a nɗene na, awaw magɔɗkaya a wuzɗerwa slɔra maaya ta maaya ba nga ndaw a nga ndaw a la.

¹⁴ Da way masa ndaw ma lɔma taa wurey daa ba na, nɗene, a hɔtey mawurbay nga slɔra aŋga la.

¹⁵ Da way masa ndaw ma lɔma taa wurey sem na, nɗene, a hɔtey mawurbay nga slɔra aŋga daa ba. Ndaw aha na, a lɔhey la, ama melɔhey a na, ta banay, anda ndaw melɔhey daa awaw.

¹⁶ Ka sɔrmara fara fara, akwar na, anda way masa Gazlavay ma nɗey da hwad a, asaya, Mesɔfney nga Gazlavay aa da mevel akwar.

¹⁷ Ndaw ma bɔzla way masa Gazlavay ma nɗey da hwad a na, Gazlavay aa zɔɗɗa ndaw aha la may, maja way a, ara way nɗada Gazlavay taava aŋga. Way masa Gazlavay ma nɗey da hwad a ha na, ara akwar, ray akwar.

¹⁸ Wam vaw, ka da batam ray akwar ba. Da ndaw da wuzlah akwar, a wulkey a sɔrey cek kalah da bɔla keɗe na, nga key anda a sɔra cek ba, amba a tɔrey ndaw ma sɔra cek masa fara fara.

¹⁹ Yaa guzley anda keɗe na, maja mesɔrey cek da bɔla keɗe na, ara cek nga tede fa mey nga Gazlavay. Maja nɗene, mey nga Gazlavay aa guzley a lɔvey: «Gazlavay a kɔrzata ndɔhay ma sɔra cek hay la anda ndaw ma kɔrzey cek ta gadaŋ. A kɔrzata na, maja wewer ata maaya ba masa ata ma kamara nɗene.»

²⁰ Mey nga Gazlavay faa guzley saya, a lɔvey: «Bay Gazlavay na, a sɔra mewulkey nga ndɔhay ma sɔra cek hay. A sɔra mewulkey ata ha na, ara cek nga tede.»

²¹ Anda keɗe, ndaw a da zlepey maja ndaw ba, maja cek hay tabiya na, nɗada akwar.

²² Anda meløvey, yah Pawl, Apalaws leŋ *Piyer na, ala tabiya ŋgada akwar. Bøla keŋe, menjey ta dey, leŋ memøcey na, ara ŋgada akwar. Asaya, cek hay ma kam wure keŋe ta cek hay ma da kam ŋgada fa mey na, ara ŋgada akwar.

²³ Ama akwar na, ŋgada Køriste, Køriste may, ŋgada Gazlavay.

4

Mey da ray ndøhay meslørey ŋga Yesu Køriste

¹ Sørmara, ala na, ndøhay ma ka sløra ŋga *Køriste. Mey ŋga Gazlavay masa maŋadakaya na, Gazlavay ta mbøkandara la a har ala amba ya wuzdamatara a ndøhay.

² Da a mbøkam cek a har ndaw amba a nøkey dey fa vøda na, si ndaw aha a nøkfar dey fara fara anda ndaw ma mbøkara ha ma løvar.

³ Da akwar, da daa ba, ndøhay ma ka sariya da bøla keŋe, fa nøkmara sløra aŋaw anda maaya ba, ŋgada yah na, a tødya mevel ba. Kwa yah may, ya gwa ŋga nøka sløra aŋaw ba.

⁴ Cek masa yah ma ka maaya ba na, ya søra ba, ama ŋga løvey yah ndaw maaya na, ya gwa ŋga løvey køne ba may, maja ma da dølsla mey da ray aŋaw na, ara Bay Mahura pal taava aŋga.

⁵ Maja ŋgene, ka daa guzlam maaya ba da ray sløra ŋga ndøhay ba. Søkwmarara đar masa Bay Mahura Yesu ma da ka sariya. Ta pas masa aa ma da vøhwa na, a wuzdatørwa cek hay maŋadatakaya masa daa løvan la a palah. Cek hay masa ndøhay ma wulkam daa mevel ata na, a wuzdatørwa la may. Anda keŋe, Gazlavay a da hølma kwa waawa tødfe fa sløra masa aa ma ka.

⁶ Mølma aŋaw hay, ya ta wuzkwar cek la da ray ala ta Apalaws amba a jønkwar ŋgaa sørkey cek hay maaya maaya. Ya wudfey ka kam anda ala, anda mey a daha, ma løvey: «Mey majøwkaya masa mawuzlalakaya cay na, ndaw a da zløngey ta ray a ba.» Anda keŋe, ka da hølmar ray a ndaw laŋgar, ka røsmara ndaw laŋgar na, køne ba.

⁷ Ma pa kwa waawa da wuzlah akwar ŋga ndaw mahura da ray ndøhay siya na, wa? Ma vøldakwara cek hay tabiya na, ara Bay Gazlavay, ba diya? Da ara Gazlavay ma vøldakwara na, kaa ka zlapam anda ara Gazlavay ma vøldakwara ba, kwara?

⁸ Ka wulkam akwar ta høtam cek hay tabiya cay! Akwar na, ndøhay masa-zleley hay dølba! Akwar na, bay hay, ama

ala na, bay hay ba. Mewulkey akwar a ngene na, fara daw? Da akwar bay hay fara na, ara cek maaya amba ya zəmkwa bay a bama daa slam a.

⁹ Ala ndəhay meslərey nga Yesu Kəriste na, ya wulkey Gazlavay ta pandar sem nga ndəhay mecəhe hay. Ala na, anda ndəhay masa sariya ta kərzata sem, ma da kadamata wasa nga kədey vagay fa mey nga ndəhay tabiya. A kamara kəne fa mey nga ndəhay da bəla ta fa mey nga maslan hay nga Gazlavay.

¹⁰ Ndəhay a pamandar nga ndəhay ma ka cek hay saw maja ala fa wuzam mey da ray Kəriste. Ama akwar na, ndəhay ta lenjesl maja akwar macəmkaya ta Kəriste. Ala anda ndəhay masa-bəle hay, ama akwar na, masa-gədan hay. Ala na, ndəhay a hətmandar fa dey ba, ama akwar na, ndəhay fa həslmakwar ray.

¹¹ Haa wure kefe, may fa candar, yam fa kandar, zana fa vaw ala gwanjada-ɗay-ɗay, ndəhay fa sərdamandar banay, ala fa pəkam saw, way ala hay daa ba,

¹² ya kam sləra ta gədan ala nga hətey cek nga zəmey. Da ndəhay a cəfdamandar na, yaa cəfdamara Gazlavay nga katar maaya. Da ndəhay a sərdamandar banay na, ya bəsmara gway.

¹³ Da ndəhay aa guzlam maaya ba da ray ala na, yaa guzlmatar ta mey maakwad a. Haa wure kefe, fa dey nga ndəhay na, ala anda cek hay makwiydakaya da ray-təkal, ala anda cek hay nga tede.

¹⁴ Ya wuzlalakwara mey kefe na, nga pakwar hwaray ba, ama amba ya kətkwar anda akwar bəz adaw hay masa yah ma wudta kalah.

¹⁵ Kwa ndəhay ga a sləfam ba faa sərkadamakwar da ray Kəriste, ama papakw akwar na, ara yah pal gway. Yah anda papakw akwar na, maja akwar macəmkaya ta Yesu Kəriste daa masa yah ma wuzdakwara *Mey-maaya-mawiya.

¹⁶ Anda kefe, ya kakwar ambahw, kam cek anda yah ma ka.

¹⁷ Ara maja ngene, ya fa slərdakwara Timawte, bəz adaw masa yah ma wuda kalah, anga ndaw ma key sləra ta cəved e daa mecəmey-ray nga Bay Mahura. Ya slərdakwara na, amba aa sərkadakwara cek masa yah ma ka daa menjey adaw daa cəved nga Kəriste saya. A daa sərkadakwara na, anda yah maa sərkadata ndəhay daa *mecəmey-ray nga

ndəhay ɲga Yesu mandaw mandaw kwa daa wura daa wura cəpa.

¹⁸ Ndəhay siya da wuzlah akwar fa zlapam maja a wulkam na, ya fa da vəhey fa akwar daa saba.

¹⁹ Ama da Gazlavay ta təba la na, gweegwe ya vəhey fa akwar saya. Da masa yah ma wusey la na, ya hətfatar ndəhay ma zlapam hay a la. Anda kefe, ya da sanjalawa na, mey masa ata maa guzldamara daada ba, ama ya da sanjalawa sləra masa ata ma kamara may.

²⁰ Ya fa sərkwā, mewey ɲga Bay Gazlavay da ray ndəhay na, a wuzwa ta fa gədan ɲga *Mesəfney ɲga Gazlavay, ba na, a wuzwa ta fa mey meeguzley gway ba.

²¹ Akwar, ka wudam na, kwara? Ka wudam ya sawa fa akwar ta laway da har daw? Da daa ba, ya sawa ta mevel maaya amba ya wuzdakwara ya fa wudkwar daw?

5

Mey da ray ndaw ma key cek malamba

¹ Ya fa cənda fa ndəhay daa wura daa wura, a ləvam ndaw da wuzlah akwar daha fa ley vaw saw. Kwa ndəhay ma səmra Gazlavay ba na, fa kam cek anda ɲga ma ka ɲgene daa ba. A ləvmaya ndaw a fa ney ta ɲgwas ɲga papaha.

² Sasəkar ka təwam ba jak daw? Ka zlapam na, kwara? Ndaw ma key cek anda ɲgene na, si ka bəlmara la da wuzlah akwar*.

³ Yah na, yah da wuzlah akwar fetefe ba, ama mevel adaw aa ta akwar. Ya ta dəsla mey da ray ndaw ma key cek malamba anda ɲgene cay anda yah da wuzlah akwar.

⁴ Ya dəsla mey a na, ta mezəley ɲga Bay aləkwa Mahura Yesu. Anda kefe, ta pas masa akwar macəmkaya daa slam a na, mevel adaw a da njeɲ ta akwar, asaya, gədan ɲga Bay aləkwa Mahura a da njeɲ ta akwar may.

⁵ Daa mecəmey akwar a ɲgene, vəldamara ndaw aha a bay-malula ɲga sərda banay ta vaw ɲga, amba Gazlavay a ləhda mesəfney ɲga ta pas masa Bay aləkwa Mahura ma da vəhwa.

⁶ Ka zlapam na, maja me? Mezlepey na, ara cek maaya ba. Ka səmra cek ma həsla hapa ɲga makala kuset kədfey na, a gwa ɲga həsla hapa ɲga makala madakaya ga, ba diya?

4:17 4.17 Timawte: 16.10; SNM 16.1; 2Kwr 1.1 **4:19 4.19** da Gazlavay ta təba la: SNM 18.21; Jak 4.15 **4:20 4.20** 2.4; 15.24 **4:21 4.21** 2Kwr 1.23; 13.10 **5:1 5.1** Lev 18.8 * **5:2 5.2** da wuzlah akwar: A wufey ɲga ləvey, daa mecəmey-ray ɲga ndəhay ɲga Yesu. **5:2 5.2** 6.12; 10.23 **5:3 5.3-4** Kwa 2.5 **5:5 5.5** 1Tm 1.20

Anğa letek kəne, mebərey nga ndaw pal na, a gwa nga nəsə mecəmey-ray akwar tabiya.

⁷ Anda ala *Jəwif hay maa zakadamara cek ma həsla peŋ da way ala hay masa gwagway nga *Pak gweegwe cay na, akwar may, bəlmara ndaw aha la maja anğa na, anda cek ma həsla peŋ maaya ba da wuzlah akwar. Anda kefe, ka da təram anda hapa nga makala madakaya təlam manjar cek ma həsla da hwaɗ a. Ya sərə fara fara Gazlavay ta tərɗakwar sem manjar mebərey ta fa meməcey nga *Kəriste. Anda Jəwif hay ma hərmara bəz-təbaŋ ngada Gazlavay ta gwagway nga Pak na, Kəriste na, anğa anda bəz-təbaŋ aləkwa ma məcey maja aləkwa.

⁸ Anda kefe, kakwa gwagway! Ama ya kakwa gwagway a na, ta peŋ manjar cek ma həsla da hwaɗ a. Anda meləvey, mbəkɗakwa mekey maagway. Tərkwa ndəhay manjar mebərey, ndəhay maaya masa ma ka cek ta cəveɗ e.

⁹ Daa leeter aɗaw laŋgar daha na, ya ta wuzlalakwar la, ya ləvkwar ka da cəmam ɗay ta ndəhay ma lam vaw saw ba.

¹⁰ Yaa guzley na, da ray ndəhay nga bəla kefe ba. Da bəla kefe na, ndəhay ma lam vaw saw, ndəhay ma kam dey fa cek hay nga ndəhay, mayal hay leŋ ndəhay ma tam kuley hay daha. Da ndaw a ləvey a njeɗ ta ndəhay a daa slam a ba na, ngeɗe si a mbəkɗa bəla kefe kwa.

¹¹ Ama yaa guzley na, da ray ndəhay ma səpam cəveɗ nga Yesu Kəriste. Da ndaw a ləvey anğa fa səpa cəveɗ nga Yesu, fa ɗəba ha, a ley vaw saw, da daa ba, a key dey fa cek nga ndaw, da daa ba, a teɗ kuley hay, da daa ba, a cəfeɗ ndaw, da daa ba, a sey wuzam, a weɗ, da daa ba, a leɗey na, ngeɗe, ka da njam ta ndaw aha daa slam a ba. Kwa ɗaf na, ka da zəmam daa slam a ba may.

¹²⁻¹³ Ndəhay ma səpam cəveɗ nga Yesu ba na, ara yah ma da katar sariya ba. Ara Gazlavay ma da katar sariya. Ama akwar na, si ka saŋgalamata ndəhay da wuzlah akwar, ba diya? Mey nga Gazlavay mawuzlalakaya, a ləvey: «Ndaw ma key cek malamba na, bəlmara la da wuzlah akwar.»

6

Mey da ray sariya

¹ Da ndaw da wuzlah akwar ta təram vaw la ta ndaw mekele da wuzlah akwar na, ndaw aha a wuda fa ndəhay ma ka sariya masa ma sərmara Gazlavay ba na, kwara? A

da wuda fa ndəhay a ηgene ba səlak. Anja maaya na, a wuda fa ndəhay ηga Gazlavay.

² Ka sərmara, ma da ka sariya ηgada ndəhay da bəla tabiya na, ara ndəhay ηga Gazlavay, ba diya? Da ara akwar ndəhay ηga Gazlavay ma da kamatar sariya a ndəhay da bəla na, kaa cek mecəhe anda ηgene, ka gwamara ηga dəslmara mey da ray a ba na, kwara?

³ Sərmara, kwa maslan hay ηga Gazlavay da vad* na, ara aləkwa ma da kamatakwar sariya. Yaw, da ara anda kefe na, kaa ya gwakwa ηga dəsley mey hay da bəla kefe ba na, maja me?

⁴ Ndəhay masa ma sərmara Gazlavay ba na, mey ata ta akwar, ndəhay ma təba mey ηga Yesu, daa ba. Da kəne na, ka handamara mey ma key da wuzlah akwar ηgada fa ata amba a dəslmakwara na, kwara?

⁵ Yaa guzlkwar anda kefe na, amba hwaray a kakwar. Fara fara, ndaw pal masa ta lenjesl da wuzlah akwar ηga diykwara mey hay na, daa ba daw?

⁶ Nəkmara cek masa akwar ma kamara! Akwar fa wudam vaw da wuzlah akwar, asaya, ka wudam vaw a na, fa mey ηga ndəhay ma sərmara Gazlavay ba. Ngene na, ara cek maaya daw?

⁷ Fara fara, akwar fa wudam vaw da wuzlah akwar. Mewudey vaw akwar a ηgene a wudey ηga ləvey akwar fa kam cek maaya anda Gazlavay ma wudey na, daa ba səlak. Da ndaw a kakwar cek maaya ba, da daa ba, a lalakwar na, maaya na, ka bəsmara gway, ka da wudmara ba.

⁸ Ma kam cek maaya ba ηgada ndəhay na, ara akwar ta ray akwar jak. Kwa məlmakw akwar hay siya daa cəved ηga Yesu na, akwar fa lalamatara cek ata hay.

⁹ Ka sərmara fara fara, ndəhay ma kam cek maaya ba na, fa da mbəzam aa slam masa Gazlavay fa wey da vad na, daa ba. Pam lenjesl, ka da fəcam ray akwar ba. Sərmara, ndəhay ma kam cek malamba, ndəhay ma ta kuley hay, ndəhay ma lam vaw saw da palah, zel hay ma lam vaw ta zel cəla ta ηgusay ma lam vaw ta ηgwas cəla,

¹⁰ ndəhay ma lalam cek hay ηga ndəhay mekele, ndəhay ma kam dey fa cek ηga ndəhay, ndəhay ma sam wuzam ma wam, ndəhay ma kam mbada fa ndəhay len ndəhay ma bəzla ndəhay, fa da mbəzam aa slam masa Gazlavay fa wey da vad na, daa ba.

6:2 6.2-3 Rm 5.17; 2Pi 2.4; Jud 6; CWJ 1.6 * **6:3 6.3** maslan hay ηga Gazlavay da vad: Ara maslan hay siya masa ma rəsmara Gazlavay zleezle. Nəka Jud 6; 2Pi 2.4. **6:7 6.7** Mt 5.39-40; Rm 12.17 **6:9 6.9-10** 15.50; Gal 5.19-21

¹¹ Zleezle na, ndəhay da wuzlah akwar fa kam cek maaya ba kəne. Ama wure kede na, Bay aləkwa Mahura Yesu *Kəriste ta *Mesəfney nga Gazlavay aləkwa ta pərmakwar sem, akwar manjar mebərey, ta walamakwar sem wal ngada Gazlavay, ta tərđamakwar sem nga ndəhay maaya fa mey nga Gazlavay.

Mey da ray menjey maaya ma mbafar a Gazlavay

¹² Ndəhay siya da wuzlah akwar fa wulkam, a ləvam: «Cek matəkakaya nga key na, daa ba.» Ahaw fara, cek matəkakaya daa ba, ama cek hay siya fa da jənkwar daa ba. Ya wulkey yah ta cəved nga key cek wura wura tabiya, ama ya fa da vəlda ray adaw nga tərey beke nga cek hay a na, daa ba.

¹³ Akwar fa wulkam saya, ka ləvam: «Gazlavay a karawa cek mezəmey maja hwad, a karawa hwad may maja cek mezəmey.» Ahaw fara, ama Gazlavay a ka la amba a ndəvdata cek hay a cewete. Gazlavay a ləmrəwa vaw nga ndaw na, nga key cek malamba ta anga ba. Ama a ləmrəwa na, amba ya səpkwa Bay aləkwa Mahura Yesu *Kəriste. Asaya, ara Bay Mahura ma wey da ray vaw nga ndaw.

¹⁴ Gazlavay ta sləkđadərwa Bay aləkwa Mahura Yesu sem daa meməcey, aləkwa may, a da sləkđandakurwa daa meməcey ta gədan anga.

¹⁵ Ka sərmara vaw akwar hay na, ata anda mezəvey hay nga vaw nga Kəriste, ba daw? Ya gwa ya cəmda mezəvey hay nga vaw nga Kəriste a dey nga ngwas-barlaw daw? Kəne na, fa da key daa ba səlak.

¹⁶ Ndaw ma nam ta ngwas-barlaw na, vaw ata ta tərey sem anda ndaw pal na, ka sərmara ba daw? Ara anda mawuzlalakaya daa đerewel nga Gazlavay, ma ləvey: «Ata cewete, a tərəm anda ndaw pal.»

¹⁷ Ndaw ma vəlda ray anga a Bay Mahura Yesu na, mevel anga ta nga Bay Mahura ha na, ata letek.

¹⁸ Maja ngene, ka da lam vaw saw ba. Mebərey hay mekele cəpa masa ndəhay ma kamara na, a njeý fa vaw ata ba. Ama ndaw ma ley vaw saw na, a key ngene, a nəsa vaw anga.

¹⁹ Vaw akwar ara slam-menjey nga *Mesəfney nga Gazlavay na, ka sərmara ba daw? Gazlavay a vəldakwara Mesəfney anga amba a njeý daa akwar. Vaw akwar hay na, ara akwar ma wamara ba, ama ara Gazlavay ma wa.

²⁰ Gazlavay ta mbəḍkurwa sem ngada anḡa ta cek maaya nḡa ləhdakwar daa mebərey. Maja nḡene, həslmar ray a Gazlavay ta cek masa akwar ma kamara ta vaw akwar.

7

Mey da ray meley nḡwas

¹ Wure keḍe, amba ya mbəḍdakwara aa mey masa akwar maa cəḍfamaya daa leeter akwar heyey. Ka ləvmaya, maaya na, ndaw a ley nḡwas ba.

² Ama, maja ndəhay fa lam vaw saw nḡene na, nḡama kwa waawa nḡa ley nḡwas, nḡwas may, nḡa ley zel.

³ Maaya na, zel a vəldara vaw a nḡwas anḡa, nḡwas may, a vəldara vaw a zel e.

⁴ Nḡwas na, a gwa nḡa wa vaw anḡa ba, ama ara zel e ma wa. Ndaw-mezəle may, a gwa nḡa wa vaw anḡa ba, ama ara nḡwas anḡa ma wa.

⁵ Anda keḍe, ka da təkam vaw da wuzlah akwar ba, si daa maḍay akwar nḡa ḍar nekəḍey amba ka dərām danḡay a Gazlavay kwa. Fa dəba ha, kamara anda maamandaw cəḡḡa. Da daa ba na, akwar fa da gwamara nḡa jəḍmara vaw akwar daa ba, *Satan a da batakwar.

⁶ Yaa guzlkwar anda keḍe na, a key, ya təkakwar ḍay ba, ama a key, ya vəkwar cəveḍ amba ka kamara kəne.

⁷ Da anda yah ma wuḍey na, ya wuḍey ndəhay tabiya a njam manjar nḡwas anda yah. Ama Gazlavay a vəlda ḡəḍan nḡada ndəhay na, wal wal. Nḡada ndaw lanḡar a vəlar ḡəḍan nḡa ley nḡwas, nḡada ndaw lanḡar, a vəlar ḡəḍan nḡa nḡey manjar nḡwas.

⁸ Wure keḍe na, ya wuḍey nḡaa guzltar nḡada ndəhay masa manjar nḡusay ta nḡada nḡwas-vagay hay. Maaya na, ka njam kəne manjar nḡwas anda yah, da daa ba, manjar zel.

⁹ Ama da ka gwamara nḡa bəsmara ba na, maaya na, zel a ley nḡwas, da daa ba, nḡwas a ley zel. Nḡama zel a ley nḡwas, da daa ba, nḡwas a ley zel da ray mewuḍey nḡa ley vaw saw nḡene ma da fənkwar ray.

¹⁰ Yaw, wure keḍe ya wuḍey nḡaa guzltar a ndəhay masa ta nḡusay, asaya, a nḡusay masa ta zel hay masa ata daa *mecəmey-ray nḡa ndəhay nḡa Yesu. Yaa guzley na, ara mey aḍaw ba, ama ara Yesu Bay Mahura maa guzley, a ləvey: nḡwas a da bey dasi zel e ba.

¹¹ Da nḡwas a mbəkda zel e na, nḡa nḡey kwa a ley zel mekele ba. Da a wuḍey nḡa ley zel saya na, nḡa vəhey asi

zel e magurma nga diymərwa mey ata aa slam a. Zel may, a da bəla ngwas anğa ba.

¹² Wure keđe, ya wudəy ngaa guzley ngada ndəhay mekele. Mey masa yah ma daa guzlda keđe na, ara mey nga Bay Mahura saba, ama ara mey adaw gway. Ya fa ləvkwar, da ndaw ma təba mey nga Yesu *Kəriste aa ta ngwas masa ma təba mey nga Yesu Kəriste ba, asaya, da ngwas a ta təba la nga njeý ta anğa na, a da bəla ngwas aha ba.

¹³ Anğa letek kəne may, da ngwas ma təba mey nga Yesu aa ta zel masa ma təba mey nga Yesu ba, asaya, da zel e ta təba la nga njeý ta anğa na, ngwas aha a da bey ba.

¹⁴ Yaa guzley anda keđe na, maja ndaw masa ma təba mey nga Yesu daa ba aran kaa na, anğa gweegwe ta Gazlavay maja anğa macəmkaya ta ngwas anğa masa ma təba mey nga Yesu sem. Ngada ngwas masa ma təba mey nga Yesu daa ba aran kwa kəne may, anğa gweegwe ta Gazlavay maja zel e. Da daa ba na, bəz ata hay fa da njam maaya fa mey nga Gazlavay daa ba. Ama fara fara bəz ata hay na, ata da wuzlah ndəhay nga Gazlavay.

¹⁵ Ama da ndaw ma təba mey nga Yesu ba fa wudəy nga bəla ngwas anğa ma təba mey nga Yesu na, mbəkdamara nga bəla. Anda keđe, ndaw ma təba mey nga Yesu, kwa da ara zel, kwa da ara ngwas na, ata macəmkaya daa saba. Mbəkdamata nga wunkam ta zazay, maja Gazlavay a zəlkurwa na, nga njeý daa zazay.

¹⁶ Kah, ngwas ma təba mey nga Yesu, ka səra fara fara, zel akah a ləhey la daa mebərey maja kah daw? Kah, ndaw ma təba mey nga Yesu, ka səra fara fara, ngwas akah a ləhey la daa mebərey maja kah daw?

Mey da ray menjey nga ndəhay masa Gazlavay ma zəlta

¹⁷ Cek mahura daa mey a keđe na, ara mey masa yah maa sərkatatara a ndəhay nga Yesu daa mecəmey-ray hay tabiya. Maaya na, kwa waawa a ka sləra masa Gazlavay ma vəldara nga ka, asaya, nga njeý anda daa masa Gazlavay ma zəla.

¹⁸ Da Gazlavay a zəla ndaw ta sla mandawal daa ba aran na, ngene, a da sla mandawal saba. Yaw, da Gazlavay a zəla ndaw ta sla mandawal sem na, nga njeý ta mandawal anğa maslakaya ha, kwa a key cek ba.

¹⁹ Kwa mandawal maslakaya, kwa manjar nga sley na, ara cek nga tede, maja a jəney ndaw fa mey nga Gazlavay

ba. Cek mahura na, ara meney ray a *mewey nga Gazlavay.

²⁰ Si kwa waawa a njeý anda daa masa Gazlavay ma zøla.

²¹ Daa masa Gazlavay ma zølka na, kah beke daw? Da køne na, ka da wulkey ba. Ama da kah ta cøved amba ka pøska ray akah daa beke na, søpa cøved e.

²² Beke masa Bay Mahura *Køriste ma zøla na, ta bawa sem daa beke maja anga macømkaya ta Bay Mahura ha. Yaw, ndaw-beke ba masa Køriste ma zøla may, ta tørey sem beke nga Køriste he.

²³ Gazlavay ta mbødkurwa sem ngada anga ta cek maaya nga løhdakwar daa mebørey. Ka da tøram beke nga ndøhay saba.

²⁴ Mølma aðaw hay, kwa waawa nga njeý anda daa masa Gazlavay ma zøla.

Mey ngada ndøhay manjar ngwas leŋ ngada ngwas-vagay hay

²⁵ Wure keðe, ya wuðey ngaa guzlar ngada ndøhay masa manjar ngusay, ta ngada ngusay masa manjar zel hay. Mey a na, ara Bay Mahura ma wuzdiwa ba, ama ara mewulkey aðaw gway. Ta ngene he cøpa, jøkfamaya slømay cønga maja yah na, Gazlavay ta sørfaya dey-ceceh la, amba yaa guzley meý masa fara fara ta gøðan nga Bay Mahura.

²⁶ Maaya na, ndøhay a njam anda ata manjatakaya gway. Yaa guzley anda keðe, maja wure keðe banay hay kalah.

²⁷ Da ndaw anga ta ngwas na, a da bøla ngwas anga ha ba. Da ndaw ngwas anga daa ba na, a da ley ngwas ba.

²⁸ Ama da ndaw a ley ngwas na, ara mebørey ba, da sabara a ley zel na, ara mebørey ba. Sømara, ndøhay ma lam ngwas, da daa ba, ngusay ma lam zel na, a søram banay la ga da bøla keðe. Ya fa wuðey banay a, a sawa a ray akwar ba.

²⁹ Mølma aðaw hay, ya fa løvkwar, ðar nga key sløra nga Gazlavay ga daa saba. Anda keðe, ðøga wure keðe, ndøhay ta ngusay na, nga njam anda ata ta ngusay daa ba.

³⁰ Ndøhay masa fa tøwam na, nga njam anda ata daa matøway daa ba. Ndøhay daa meesømey, nga njam anda ata daa meesømey daa ba. Ndøhay ma høðkam cek, nga njam anda cek hay masa ata ma høðkamata ha ngene na, ara ngada ata ba.

³¹ Ndəhay ma kam sləra ta cek hay da bəla keđe, nga njam anda ata fa kam sləra ta cek hay a daa ba. Ya ləvkwar anda keđe, maja bəla keđe fa da njeý ga daa ba.

³² Ya wuđeý na, ray akwar a həbey ba. Ndaw masa ta ley ngwas daa ba na, mewulkey anga aa da ray Bay Mahura, a wuđeý nga key cek ma mbafar a Bay Mahura.

³³ Ama ndaw masa ta ngwas na, mewulkey anga aa da ray cek hay da bəla, a wuđeý nga key cek nga mbafar a ngwas anga.

³⁴ Anda keđe, lengesl anga fa həbey. Asaya, ngwas manjar zel, da daa ba, sabara na, mewulkey anga aa da ray Bay Mahura. A wuđeý nga vəlda mevel anga ta vaw anga cəpa a Gazlavay. Ngwas masa ta zel na, mewulkey anga aa da ray cek hay da bəla. A wuđeý nga kar cek ma mbafar a zel e.

³⁵ Yaa guzlkwar anda keđe na, nga jənkwar, ba na, a key ya təkakwar dəy ba. Ama ya wuđeý na, ka kam cek ta cəved e, asaya, ka kamar sləra a Bay Mahura ta mevel pal.

³⁶ Ya wuđeý ngaa guzlkwar wure keđe da ray bəz-gula ta kwakwa anga masa ta larawa a way daa ba aran. Da bəz-gula ha, a wulkey anga fa kar cek maaya ba a kwakwa anga, maja fa zənar vaw nga larawa, asaya, da anga fa wuđeý nga ney ta anga na, nga larawa a way anga anda aa ma wuđeý, ara mebərey ba.

³⁷ Ama da bəz-gula ha fa wulkey daa ray anga, a ləvey, maaya na, a la kwakwa anga ba, asaya, da ndaw a təkər dəy ba, da a bəsa nga njeý kəne na, ngene, ara cek maaya.

³⁸ Yaw, ndaw ma ley kwakwa na, a key ngene, a key cek maaya. Ndaw ma ley kwakwa ba na, a key ngene, a key cek maaya ma fəna saya.

³⁹ Ngwas masa zel e ta məcey daa ba aran na, anga ta cəved nga ley zel mekele daa ba. Ama da zel e ta məcey sem na, anga ta cəved nga ley zel mekele anda aa mewuđeý, ama nga ley na, ndaw masa ma təba meý nga Yesu *Kəriste.

⁴⁰ Ama fa yah na, ngama a ley zel ba, maja da anga pal taava anga na, a da njeý maaya maaya da ray masa anga da way zel. Keđe he ara mewulkey adaw. Ya wulkey yah may, yah ndaw masa ta *Mesəfney nga Gazlavay da ray.

8

Mey da ray aslaw nga kuley

¹ Wure keđe na, ya daa guzley da ray aslaw nga kuley. Fara fara, aləkwa tabiya, ya sərkwā cek anda akwar ma

løvam. Mesørey cek na, fa zlapadata ndøhay. Ama mewudfey-vaw na, fa vøltar gødan a ndøhay daa *mecømey-ray nga ndøhay nga Yesu.

² Da ndaw a zlepey, a wulkey a sørey cek kalah, ñgene, cek masa Gazlavay ma wudfey na, a søra ba aran.

³ Ama ndaw ma wudfa Gazlavay ta mevel anga pal na, Gazlavay a søra ndaw aha.

⁴ Yaw, aslaw nga kuley na, ya zømkwa daw? Ya zømkwa ba daw? Ya sørkwa kuley na, ara cek nga tede. Asaya, ya sørkwa Bay Gazlavay na, anga pal.

⁵ Fara fara, cek hay da gazlavay da vadf ta da bøla daha masa ndøhay fa ragadamatar anda ngada Gazlavay. Cek hay a na, ara kuley hay. Kuley hay a na, ata ga. Asaya, bay hay mekele mekele daha fa wam da ray ndøhay, anda ata na, gazlavay nga ndøhay a.

⁶ Ama ngada aløkwa na, Gazlavay anga pal letek, ara Papa aløkwa. Cek hay tabiya da bøla na, ara anga ma katørwa. Menjey aløkwa na, ara ngada anga. Bay Mahura na, anga pal may, ara Yesu *Køriste. Gazlavay a katørwa cek hay tabiya ta fa anga. Ara anga ma vøldakwar heter.

⁷ Ama ndøhay siya da wuzlah akwar a sømara mey masa fara fara ha kefe ba. Haa wure kefe fa zømam aslaw nga kuley, anda ata fa tam kuley cønga. Ata ta gødan daa cøvedf nga Gazlavay daa ba aran. Maja ñgene, a wulkam aslaw nga kuley masa ata ma zømamara na, ta nøsta sem fa mey nga Gazlavay.

⁸ Sømara, cek mezømey na, fa da tørdandakwar nga ndøhay maaya fa mey nga Gazlavay na, daa ba. Da ya zømkwa aslaw nga kuley na, a jønndakwar ba, da ya zømkwa ba na, a nøsey cek ba may.

⁹ Akwar na, ta cøvedf nga zømey kwa meeme anda akwar ma wudam. Ama pam lenjesl! Da daa ba, ndøhay masa ta gødan pøreh daa mey nga Gazlavay na, a da kam mebørey maja akwar.

¹⁰ Yaw, wulkey da ray ndaw masa ta gødan pøreh daa mey nga Gazlavay. Da a høkka, kah, ndaw masa ma søra cek, ka fa zømey aslaw daa way nga kuley na, ñgene, a hølda ndaw aha nga zømey aslaw nga kuley a daa ba daw?

8:1 8.1 SNM 15.29; Rm 12.16; **mewudfey-vaw:** 13.1-7; 14.1; 16.14; Jan 13.34; Rm 15.1-2; 2Kwr 8.7-8, 24; Gal 6.10; Ef 5.2 **8:1 8.1-13** Rm 14.1-15.6 **8:3 8.3** 13.12; Gal 4.9 **8:4 8.4** 10.19-20; Mew 4.35, 39; 6.4-5; Gal 4.8-9 **8:6 8.6** 12.5-6; Jan 1.3-4; Ef 4.5-6; Kwa 1.16 **8:7 8.7-12** 10.23-33 **8:8 8.8-9** Rm 14.13, 15, 17, 21; Gal 5.13

¹¹ Maja ηgene, mǝlmakw masa ta gǝdan pǝreh ηgene, masa Kǝriste ma mǝcey maja anɣa na, a da zlenɣedey daa cǝved masa maaya maja mesǝrey cek akah ha ηgene.

¹² Da akwar fa kamara kǝne na, ηgene a key ka kamatar cek maaya ba a mǝlmakw akwar hay masa ta gǝdan pǝreh, asaya, a key ka dakalamatara mevel ata. Ka kam cek maaya ba ηgene na, ηgada mǝlmakw akwar hay daada ba, ama a key ka kamar cek maaya ba ηgada Kǝriste ray anɣa may.

¹³ Maja ηgene, da mǝlma adaw a zlenɣedey daa cǝved masa maaya maja cek masa yah ma zǝma na, ηgene, ya fa da zǝmey aslaw daa saba sǝlak amba mǝlma adaw a zlenɣedey ba.

9

Mey da ray ndǝhay meslǝrey ηga Yesu

¹ Yah na, ndaw ma waya ba, ya key cek anda yah ma wudfey, ba diya? Yah na, *ndaw-meslǝrey ηga Yesu. Ya ta hǝtar Bay alǝkwa Mahura Yesu la ta dey adaw *, ba diya? Fara fara, ara maja slǝra adaw ηgada Bay Mahura Yesu, akwar ma tǝbmara mey anɣa.

² Kwa da ndǝhay siya a tǝbmara yah na, ndaw-meslǝrey ηga Yesu ba, ama akwar na, ka sǝrmara fara fara yah ndaw-meslǝrey ηga Yesu. Akwar macǝmkaya ta Bay Mahura Yesu maja yah ma wuzdakwara *Mey-maaya-mawiya. Ngene, fa wuzdǝrwa yah na, ndaw-meslǝrey ηga Yesu fara fara.

³ Ndǝhay maa guzlam mey maaya ba a ray adaw na, ya da mbǝdfatara ηgada ata, ya lǝvtar:

⁴ yah ta cǝved ηga hǝtey cek mezǝmey ta ηga sey cek maja slǝra masa yah ma ka, ba daw?

⁵ Ndǝhay meslǝrey hay mekele ηga Bay Mahura Yesu *Kǝriste ta mǝlmaha hay lej *Piyer ata ta ηgusay, fa pǝkam bama. Kaa yah na, ta cǝved ηga ley ηgwas ma tǝba mey ηga Yesu, ya pǝkam cew e, ba daw?

⁶ Ma da key slǝra ηga hǝtey cek mezǝmey na, si ala ta *Barnabas gway daw?

⁷ Ndaw-sewje ma hǝtey mawurbay ηga slǝra anɣa ba, daha daw? Ndaw ma rǝvey wudez, cek ma tǝka ηga zǝmey babǝza ηga wudez e daha daw? Mecǝkwer ηga gǝnaw hay, cek ma tǝka ηga sey dǝwa ηga gǝnaw hay a daha daw?

* **9:1 9.1** Gazlavay a wuzar cek a Pawl, a hǝtar Bay Mahura daa masa anɣa fa dǝrey dangay da Jeruzelem. (SNM 22.14, 18; Gal 1.16) **9:1 9.1-2** 4.9, 15; 15.8-10; 2Kwr 2.14-17; 3.1-3; 5.18-20; 10.7-8, 13; 11.5, 13; 12.11-13; Gal 1.1 **9:4 9.4** Lk 10.7-8; Mt 10.10 **9:6 9.6** Barnabas: SNM 4.36; 11.22-26; **slǝra masa Pawl ma key ηga hǝtey cek mezǝmey:** SNM 18.3

⁸ Mey masa yah maa guzlda keɗe na, ara mewulkey nga ndəhay magədan daada ba, kwa *kwakwas nga Mawiz na, faa guzley kəne may.

⁹ Mawiz ta wuzleley la, a ləvey: «Daa masa sla fa key sləra da ley na, ka da par beben a mey ba.» Ka wulkam, Gazlavay fa wulkey na, da ray sla hay daada daw?

¹⁰ Kay, kəne ba! Gazlavay aa guzley anda keɗe na, ngada aləkwa. Ndaw mehəvey na, a wulkey a da hətey cek mezəmey. Maaya na, a zəmey cek masa anga ma həva ha may. Ndaw ma dəgey daw na, maaya na, a zəmey daw a may.

¹¹ Ala fa wuzdamakwara mey nga Gazlavay anda ndaw ma sləkey hulfad a ley. Yaw, da ka vəlmandar cek maja na, a kafakwar kalah daw?

¹² Da ndəhay mekele ata ta cəved nga hətey cek mezəmey fa akwar na, ala may, ala ta cəved nga hətey cek mezəmey fa akwar ma fənta, ba diya? Anja nga key na, kəne, ama kwa ala taa cəfdafamakwar cek nga jənnadar daa ba. Sasəkar jak, banay hay tabiya na, ala fa bəsmara, maja ala ta wudam nga key cek ma təkta ndəhay nga cəndamara Mey-maaya-mawiya da ray Kəriste na, daa ba.

¹³ Ka səmara ndəhay ma ka sləra daa *Way-mekey-kwakwas nga Gazlavay na, fa hətam cek mezəmey fa sləra masa ata ma kamara ha ngene. Ndəhay ma həram gənaw nga vəley a Gazlavay na, a gwamara nga zəmam aslaw masa ata ma vəldamara a Gazlavay a ngene may.

¹⁴ Anja letək kəne ngada ndəhay ma wuzdamara Mey-maaya-mawiya may, maja Bay aləkwa Mahura Yesu ta ləvey la, ndəhay ma wuzdamara Mey-maaya-mawiya na, nga hətam cek mezəmey fa sləra ata ha.

¹⁵ Ama, yah na, ya taa cəfdəy cek daa ba səlak. Ka wulkam ya wuzlalakwara leeter keɗe na, amba ka slərmaya cek daw? Kay, kəne ba! Da yaa cəfdafakwar cek maja sləra adaw na, kwa ya fa da hətey cek amba ya zlepey daa saba. Anda keɗe, ngama yah ma məcey.

¹⁶ Ngada yah na, mewuzey Mey-maaya-mawiya ara cek amba ya zlepey ta anga ba, maja ara sləra masa Gazlavay ma təkya day nga ka. Da ya wuzda Mey-maaya-mawiya ha ba na, banay a hətfaya la.

¹⁷ Da ara mewulkey adaw taava adaw nga wuzey Mey-maaya-mawiya a ndəhay na, anja ngene na, maaya a pəlmīwa mawurbay nga sləra adaw. Ama ara Gazlavay ma

təkya dƣay nƣa ka slɛra ha. Anda keƣe, ya key na, slɛra masa mavɛldakaya nƣada yah nƣa key gway.

¹⁸ Kaa, mawurbay adaw na, daa ba daw? Mawurbay adaw na, daha. Ara mewuzey Mey-maaya-mawiya nƣa tede. Yah ta cɛved nƣaa cɛdfafatar cek hay fa ndɛhay maja ya fa wuzda Mey-maaya-mawiya, ama kwa ya taa cɛdfey cek daa ba sɛlak.

Mey da ray Mey-maaya-mawiya ma daw fa mey fa mey

¹⁹ Yah na, kwa ndaw ma təkya dƣay nƣa key cek na, daa ba. Ama, ya ta vɛlda ray adaw la nƣa tɛrey beke nƣa ndɛhay tabiya amba ya jɛney ndɛhay ga ma fɛna ma fɛna nƣa tɛbey mey da ray Yesu *Kɛriste.

²⁰ Daa masa yah da wuzlah *Jɛwif hay na, ya njey, ya key cek anda ata ma kamara, amba ya jɛnta nƣa tɛbey mey da ray Yesu Kɛriste. Kwakwas nƣa *Mawiz na, anƣa ta gɛdan da ray adaw daa ba, ama da yah da wuzlah ndɛhay ma sɛpa kwakwas a na, si ya key cek anda ata ma kamara, amba ya jɛnta nƣa tɛbey mey da ray Yesu Kɛriste.

²¹ Da yah da wuzlah ndɛhay ma sɛpam kwakwas nƣa Mawiz ba na, ya key cek anda ata ma kamara, amba ya jɛnta nƣa tɛbey mey da ray Kɛriste may. Ya ta lɛvey ya sɛpa *mewey nƣa Gazlavay ba na, daa ba, maja fara fara, ya fa sɛpa mewey nƣa Kɛriste.

²² Daa masa yah da wuzlah ndɛhay ma tɛba mey nƣa Yesu masa ta gɛdan pɛreh na, si ya key cek anda ata ma kamara, amba ya jɛnta nƣa tɛbey mey da ray Yesu Kɛriste. Ya kata cek hay wal wal tabiya anda ndɛhay tabiya ma kamara, amba ndɛhay mekele mekele a lɛham.

²³ Ya kata cek hay a tabiya keƣe na, amba *Mey-maaya-mawiya a daw fa mey fa mey, asaya, amba Gazlavay a pɛsya mey, anda anƣa ma pɛstar mey a ndɛhay mekele may.

²⁴ Daa kwakurɗa nƣa mahway na, ndɛhay ga ma hwam, ama ndaw ma da key bay-gula nƣa hɛtey cek na, ndaw pal gway. Yaw, akwar may, kam gɛdan nƣa hway anda bay-gula daa kwakurɗa ha amba ka hɛtey cek.

²⁵ Kwa waawa ma wudɛy nƣa key kwakurɗa na, si a vɛlda ray anƣa, a mbɛkdata cek hay mekele mekele ma nɛsa ndaw, aa sɛrkey maaya maaya la dƣagay. A vɛlda ray anƣa anda keƣe na, nƣa key bay-gula, nƣa hɛtey cek. Ama cek masa anƣa ma da hɛtar fa mawurbay anƣa nƣgene na, fa da njey ga daa ba. Alɛkwa na, ya vɛldakwa ray alɛkwa anda nƣgene amba ya hɛtkwa cek masa ma da njey nƣa sɛrmataw.

²⁶ Maja ṅgene, yah na, ya hway saw daa kwakurɗa ba. Asaya, yah na, anda ndaw mewedeɓey har. Har adaw a daw a ley ba.

²⁷ Yah na, ya fa sərda banay ta vaw adaw, ya fa kəta vaw adaw ta gədaŋ ta gədaŋ, ya fa wey da ray vaw adaw amba yah, ndaw masa ma wuzda Mey-maaya-mawiya a ndəhay na, Gazlavay a kəzlaya ta cakay ba.

10

Mey da ray kuley hay

¹ Məlma adaw hay, ya wudeɓey ka sərɓadamara cek masa Gazlavay ma ka ta papaŋ ṅga papa aləkwa hay zleezle daa masa ata fa səpmar wurzay ṅga *Mawiz. Gazlavay ta sərtata la ta mekwtene * tabiya ata. Asaya, ata tabiya ta zləŋgam la ta daa Bəlay Magaza.

² Ata tabiya, Gazlavay ta katar *baptem la daa mekwtene leŋ daa bəlay a, amba a cəmta ta Mawiz.

³ Ata tabiya, ta zəmam cek ma sawa ta fa Gazlavay la daa slam a,

⁴ asaya, ta sam yam ma sawa ta fa Gazlavay la may. Yam masa ata ma samara ha na, a bawa daa pərad masa Gazlavay ma vəldatara. Pərad aha fa daw así ata. Pərad aha na, ara *Kəriste.

⁵ Ta ṅgene he cəpa, ndəhay ga da wuzlah ata, a kam cek ma mbafar a Gazlavay ba. Maja ṅgene, ta məcām sem da wuzlah-ley.

⁶ Cek hay a ma kam ṅgene na, a pandakwar leŋgesl amba cek hay malamba masa papaŋ ṅga papa aləkwa hay ma kamara ṅgene na, ya kakwa ba.

⁷ Ndəhay siya da wuzlah ata ta tam kuley hay la. Aŋga letek anda ma wuzlalakaya zleezle daa dɛrewel ṅga Gazlavay, a ləvey: «Da mey kuley, ndəhay a njam ṅga zəmey cek ta ṅga sey wuzam. Fa dəba ha, a lacam, a gərvam da mey kuley a.» † Akwar na, ka da tam kuley anda ata ba.

⁸ Ndəhay siya da wuzlah ata ta lam vaw saw la da palah, maja ṅgene, ndəhay gabal kwakwar cew a ray a maakar (23.000) ta məcām la pas pal. Aləkwa na, ya da lakwa vaw saw da palah anda ata ba.

9:27 9.27 Rm 8.13; 13.14 * **10:1 10.1** Nəka Mab 13.21 ta 14.22-29. Mekwtene he a wuzwa Gazlavay aa ta ata. Mezləŋgey bəlay a wuzwa Gazlavay ma ləhdata sem. **10:1 10.1** Mab 13.21; 14.21-29 **10:3 10.3** Mab 16.13-35; Mew 8.3; Ps 78.24-25 **10:4 10.4** Mab 17.6; Mesl 20.11; Ps 78.15 **10:5 10.5** Mesl 14.29-30; Ps 78.31; Heb 3.17; Jud 5 **10:6 10.6** Mesl 11.4, 34; Ps 106.14 † **10:7 10.7** Megərvay ata ṅgene, a həldata ṅga ley vaw saw da palah. Nəka Mab 32.6. **10:8 10.8** Mesl 25.1-9

⁹ Ndəhay siya da wuzlah ata ta jadamara Bay Gazlavay la, haa zezekw hay a zamata, ta', a məcam. Aləkwa na, ya da jadakwa Bay Mahura Kəriste anda ata ma jadamara Bay Gazlavay ba.

¹⁰ Ndəhay siya da wuzlah ata taa nguram mey la †, maja ngene, maslaŋ nga Bay Gazlavay masa ma kədey ndaw vagay ta kəfta sem vagay. Akwar na, ka daa nguram mey anda ata ba.

¹¹ Cek hay maaya ba ma hətfatar papaŋ nga papa aləkwa hay a ngene na, amba ndəhay a pam lenğesl. Ta wuzlalamata cek hay a ma kam ngene la aa dərewel nga Gazlavay amba a pandakwar lenğesl, aləkwa masa ta dey da bəla masa fa da ndəvey kefe.

¹² Maja ngene, ndaw ma wulkey aa majarakaya na, si a wey vaw, da daa ba na, a da tədey.

¹³ Banay ma sawa a ray akwar nga jadakwar na, aa letek ta banay ma sawa a ray ndəhay tabiya. Gazlavay na, cek masa aa ma ləvey a ka la na, a ka fara fara. Gazlavay a, a jənkwar la, anda kefe, cek ma da jadakwar nga fənkwar ta gədaŋ daa ba. Da masa banay fa sawa a ray akwar nga jadakwar na, Gazlavay a da vəkwar gədaŋ amba ka bəsmara banay a, asaya, a vəkwar cəved amba ka ləham.

¹⁴ Anda kefe, jam adaw hay, hwam dorenj ta kuley hay.

¹⁵ Yaa guzlkwar anda kefe kaa na, maja ya sərə akwar ndəhay ta lenğesl. Mey masa yah maa guzlda kefe na, ara mey fara fara. Akwar ta ray akwar, wulkam da ray mey a cey!

¹⁶ Daa masa aləkwa fa zəmkwa dəf nga sərfevey meməcey nga Kəriste na, aləkwa fa kakwa suse a Gazlavay maja cek mesey daa voley, ya sərkwə aləkwa macəmkaya ta Kəriste maja mambaz anğa. Daa masa aləkwa fa zəmkwa peŋ na, ya sərkwə aləkwa macəmkaya ta Kəriste maja vaw anğa.

¹⁷ Ma zəmamara peŋ e na, aləkwa ga, ama peŋ e na, anğa pal gway. Maja ngene, aləkwa macəmkaya pal.

¹⁸ Wulkam da ray ndəhay *Israyel hay zleezle, ata fa həram gənaw hay da ray slam-mefəkey cek a Gazlavay. Ndəhay ma zəmam aslaw mavəldakaya ngada Gazlavay na, ata macəmkaya ta Gazlavay.

10:9 10.9 Mesl 21.5-6 † **10:10 10.10** Nəka Mesl 16.41; 17.5, 10. **10:10 10.10** Mesl 14.2, 36; 16.41; 17.6-15; Ps 106.25-27; Heb 3.17-18 **10:11 10.11** 7.29-31; Rm 15.4 **10:12 10.12** Gal 6.1 **10:13 10.13** 1.9; Jak 1.13-14 **10:14 10.14** 1]ŋ 5.21 **10:16 10.16** 11.24-25; Lk 22.17-20 **10:17 10.17** 12.27 **10:18 10.18** Lev 7.11-21

19 Yaw, mey a keɗe, a wuɗey nga ləvey na, kwara? A wuɗey nga ləvey, kuley ta aslaw nga kuley a na, ara cek hay fara fara ba.

20 Ama da ndəhay ma sərmara Gazlavay ba fa tam kuley na, a vəldamara aslaw a, a mesəfney maaya ba hay, ba na, a Gazlavay ba. Ya wuɗey na, ka cəmam ta mesəfney maaya ba hay a ba.

21 Ka sam cek masa mavəldakaya ngada mesəfney maaya ba hay, asaya, ka sam cek nga sərfedey meməcey nga Bay Mahura saya na, kwara? Ka zəmam ɗaf masa mavəldakaya ngada mesəfney maaya ba hay, asaya, ka zəmam ɗaf nga sərfedey meməcey nga Bay Mahura saya na, kwara?

22 Da ya kakwa kəne na, Bay Mahura a da ceɗ mevel a ray aləkwa, ba diya? Ka wulkam na, ya fənkwa Bay Mahura ta gəɗaɗ daw?

Mey da ray cek ma da jənta ndəhay nga səpey mey nga Gazlavay

23 Ndəhay siya da wuzlah akwar, fa wulkam, a ləvam: «Cek matəkakaya nga key na, daa ba.» Ahaw, fara, cek matəkakaya daa ba, ama cek hay tabiya maaya nga key ba. «Cek matəkakaya nga key na, daa ba.» Ama cek hay tabiya a gwamara nga jənmata ndəhay daa *mecəmey-ray nga ndəhay nga Yesu ba.

24 Ka da nəkam dey fa cek hay ma jənmakwar daada ba, ama nəkam dey fa cek hay ma jənam ndəhay mekele may.

25 Aslaw tabiya masa akwar ma hətam daa luma na, ka gwamara nga həɗkamara, ka zəmamara. Ka da wulkam da ray a ba səlak, ka daa cəɗfamara ara aslaw nga me ba.

26 Yaa guzley anda keɗe na, maja mawuzlalakaya daa ɗerewel nga Gazlavay, a ləvey: «Bəla ta cek hay da hwad a tabiya na, ara nga Bay Gazlavay.»

27 Anda keɗe, da ndaw ma təba mey nga Yesu *Kəriste ba ta zəlkwar la nga zəmey ɗaf da way aɗga, da akwar ma təbmara la nga daw a way aɗga ha na, ɗaf masa ata ma vəldamakwara na, zəmamara, ka da wulkam da ray a ba səlak, ka daa cəɗfamara ara aslaw nga me ba.

28 Ama da ndaw a ləvkwar: «Aslaw keɗe, ara aslaw nga kuley» na, ɗgene, ka da zəmamara ba. Ka zəmamara ba maja ndaw ma kadakwara ɗgene, a da wulkey.

29 Yaa guzley na, maja mewulkey akwar ba, ama maja mewulkey nga ndaw aha. Fara fara, cek matəkakaya nga

10:19 10:19 8.4 10:20 10:20 Mew 32.17; Ps 106.37; CWJ 9.20 10:21 10:21
 2Kwr 6.15-16 10:22 10:22 Mew 32.21 10:23 10:23 6.12; 8.7-12 10:23
 10:23-33 Rm 14.1-15.6 10:24 10:24 10.32; 13.5; Rm 15.1-2; Fəl 2.4 10:25
 10:25 Rm 14.2 10:26 10:26 Ps 24.1; 89.12 10:28 10:28 8.7

zəmey na, daa ba. Kaa, ya da key cek anda mewulkey nga ndaw mekele na, maja me?

³⁰ Da ya zəmey cek na, ya kar suse a Gazlavay maja cek aha. Kaa ndaw aa guzley maaya ba da ray adaw maja yah ma zəma cek masa yah ma kar suse sem a Gazlavay maja na, kwara?

³¹ Maja ngene, kwa ka zəmam cek, kwa ka sam cek, kwa ka kam cek wura wura na, kamara amba sləmay nga Bay Gazlavay a zəley.

³² Ka da kam cek masa ma həldata ndəhay nga kam mebərey ba, kwa ngada ndəhay *Jəwif hay, kwa ngada ndəhay masa Jəwif hay ba hay, kwa ngada ndəhay daa mecəmey-ray nga ndəhay nga Yesu, ka da kam ba.

³³ Njam anda yah, cek hay tabiya masa yah ma ka na, ya wufey amba a mbafatar a ndəhay tabiya. Ya nəkey dey na, fa cek ma da jənya yah taava adaw ba, ama ya fa nəkey dey fa cek ma da jəney ndəhay ga may, amba Gazlavay a həldata daa mebərey.

11

¹ Yah na, ya fa key cek anda Kəriste. Akwar may, kam cek anda yah ma ka.

Mey da ray ngwas ta zel fa mey nga Gazlavay

² Ya fa həlmakwar maja akwar fa sərfadamaya mandaw mandaw, asaya, maja akwar fa kamata cek hay anda yah maa sərkadakwa.

³ Ama ya wufey na, ka sərmara, *Kəriste na, anğa *bay-ray nga ndəhay tabiya, zel na, anğa bay-ray nga ngwas anğa, Gazlavay may, anğa bay-ray nga Kəriste.

⁴ Da ndaw-mezəle fa dərar danğay a Gazlavay, asaya, fa wuzey mey nga Gazlavay fa mey nga ndəhay ta jikwew da ray na, ngene a key a rəsa Kəriste, ndaw masa ma wa.

⁵ Ngwas may, da anğa fa dərar danğay a Gazlavay, da daa ba, fa wuzey mey nga Gazlavay fa mey nga ndəhay na, a da mbəkda ray ba' kəne ba, nga jəwey adikwaw a ray, da daa ba na, a key ngene, a rəsa zel e. Ngwas aha na, hwaray a da kar anda ngwas masa ray mahəjkaya.

⁶ Da ngwas a jəwey adikwaw a ray ba na, nga həja ray * anğa. Ama, maja mehəjey ray, da daa ba, mesley ray, a key hwaray na, ngene nga jəwey adikwaw a ray.

⁷ Da ndaw-mezəle fa da dərar danğay a Gazlavay na, a da pey jikwew a ray ba, maja anğa na, a lawa Gazlavay, asaya,

10:30 10.30 Rm 14.6; 1Tm 4.4 **10:31 10.31** Kwa 3.17 **10:32 10.32** Rm 14.13

10:33 10.33 9.19-22 **11:1 11.1** 4.16 **11:2 11.2** 2Tes 2.15; 3.6 **11:3 11.3**

3.23; MC 3.16; Ef 5.23 * **11:6 11.6** a həja ray: a həza ray

aa fa wuzdərwa gədan̄ ŋga Gazlavay. Ama ŋgwas na, aa fa wuzdərwa gədan̄ ŋga zel e.

⁸ Gazlavay ta ley tetesl daa vaw ŋga ŋgwas ŋga ləmey ndaw-mezəle na, daa ba. Ama a ley na, tetesl daa vaw ŋga ndaw-mezəle ŋga ləmey ŋgwas.

⁹ Gazlavay ta ləma ndaw-mezəle maja ŋgwas na, daa ba, ama a ləma ŋgwas maja ndaw-mezəle.

¹⁰ Maja ŋgene, ŋgwas na, si a jəwey adikwaw a ray maja maslan̄ hay ŋga Gazlavay † da vad̄. Mejəwey adikwaw a ray ŋgene a wuzwa an̄ga fa nar ray a zel e.

¹¹ Ama daa menjey aləkwa ta Bay Mahura na, ŋgwas a wa ray an̄ga ba, ndaw-mezəle may, a wa ray an̄ga ba.

¹² Kwa Gazlavay a ləma ŋgwas ta tetesl ŋga ndaw-mezəle na, ama ara ŋgwas ma yarawa ndaw-mezəle cəŋga. Ata cewete na, ara Gazlavay ma ləmtərwa, Gazlavay masa ma katərwa cek hay tabiya.

¹³ Akwar ta ray akwar, wulkam cey: ŋgwas na, a dərar dan̄gay a Gazlavay ray ba' kəne fa mey ŋga ndəhay na, maaya daw?

¹⁴ Kwa waawa a səra da ndaw-mezəle an̄ga ta en̄gwec fa ray ga na, ara hwaray ŋgada ndaw aha.

¹⁵ Ama ŋgwas, da an̄ga ta en̄gwec fa ray səlep səlep na, ara cek maaya kalah ŋgada an̄ga, maja Gazlavay a vəldara en̄gwec maazəma na, amba a bərdə ray an̄ga.

¹⁶ Da ndaw fa key yawa da ray mey a na, si a səra kwakwas ala mekele da ray mey a keđe na, daa ba. Kwa kwakwas mekele ŋga ndəhay daa *mecəmey-ray hay ŋga Yesu da ray mey a na, daa ba may.

Mey da ray mezəmey daf ŋga sərfeđey meməcey ŋga Bay Mahura Yesu

(Matiye 26.26-29; Mark 14.22-25; Luk 22.14-20)

¹⁷ Ehe, ya wudəy ŋgaa guzlkwar mey mekele daha. Ya fa da kakwar suse maja mey a daa ba. Mekusey akwar tabiya na, fa d̄iykwaw daa ba, ama a key a nəskwar jak.

¹⁸ Cek ŋgeeme na, ya fa cənda fa ndəhay, a ləvam daa mekusey akwar ŋga dərey dan̄gay a Gazlavay na, akwar fa walam vaw ta weley da wuzlah akwar. Ya wulkey taa slam lan̄gar na, akwar fa kamara kəne fara.

11:7 11.7 MC 1.26-27 **11:8 11.8-9** MC 2.18-23; 1Tm 2.13 † **11:10 11.10** maja maslan̄ hay ŋga Gazlavay: Ndəhay a wulkam Pawl a wudəy ŋga ləvey maslan̄ hay ŋga Gazlavay na, ata da wuzlah ndəhay daa medərey-dan̄gay. Anda keđe, a wudam cek hay tabiya a kam ta cəveđ e. Ndəhay mekele a wulkam a ləvam maslan̄ hay na, fa sərtamara ray ata fa mey ŋga Gazlavay may. Nəka Iz 6.2.

19 Yaw, maaya na, mewudkey-day a key da wuzlah akwar amba ndohay ma sɔpmara mey nga Yesu ta cɔved e, a sɔram kwa.

20 Daa mekusey akwar akwar fa zɔmam daf, ama ara nga sɔrfedey memɔcey nga Bay Mahura fara fara ba,

21 maja kwa waawa fa wusey vaw nga zɔma daf anga. Anda keɔe, ndohay siya, may fa catar, ama siya hay, fa wam.

22 Akwar na, ta way akwar hay, ba diya? Zɔmamatɔrwa daf a, samatɔrwa cek akwar hay a da way akwar hay gway taw. Ka wudam nga rɔsmata ndohay daa mecɔmey-ray nga ndohay nga Yesu daw? Ka wudam nga pamatar hwaray a ndohay masa-viya hay daw? Ka wudam yaa guzlkwar na, kwara? Ka wulkam na, ya kakwar suse la daw? Kay! Ya fa da kakwar suse daa ba sɔlak.

23 Cek masa yah maa sɔrkadakwara keɔe na, ara Bay Mahura Yesu maa sɔrkadiwa. Dasi tavad masa ata ma da vɔldamara Bay Mahura Yesu a har masa-gɔra anga hay nga sɔrdamara banay na, Yesu a, leŋ! a ley peŋ,

24 a kar suse a Gazlavay maja, a wunka, ta', aa guzley, a lɔvey: «Keɔe he, ara vaw adaw mavɔldakaya ngada akwar. Kamara anda keɔe amba ka sɔrfadamaya.»

25 Masa ata ma ndɔvdamara mezɔmey daf la na, leŋ! a la vɔley ta cek mesey da hwad a, ta', aa guzley saya, a lɔvey: «Keɔe he na, ara mambaz adaw. Ta fa mambaz a, Gazlavay a jɔwey mey mawiya ta ndohay anga hay. Da akwar fa da samara na, kamara anda yah ma ka keɔe amba ka sɔrfadamaya.»

26 Anda keɔe, ta pas masa akwar fa zɔmamara peŋ keɔe ta akwar fa samara cek aha keɔe na, ngene, akwar fa wuzdamara mey da ray memɔcey nga Bay Mahura, dɔga wure keɔe haa kasl ma vɔhwa anga.

27 Anda keɔe, da ndaw a zɔma peŋ, a sa cek mesey nga Bay Mahura saw saw na, a key ngene, a key meɔɔrey maja anga ma rɔsa vaw ta mambaz nga Bay Mahura ha.

28 Da ray ngene, si ndaw a nɔka ray anga la dɔgay, fa dɔba ha, a gwa nga zɔmey peŋ e, ta nga sey cek mesey a.

29 Ndaw ma zɔma peŋ ta ma sey cek mesey a ta meney ray ba na, ngene, ta wulkey da ray memɔcey nga Bay Mahura daa ba. Anda keɔe, Gazlavay a da cey mevel da ray a.

30 Ara maja ngene, masa-macay hay ta masa-bɔle hay ga da wuzlah akwar daha. Asaya, siya hay ga ta mɔcam sem.

11:19 11.19 Mew 13.2-4; 1Jn 2.19 11:22 11.22 Jak 2.5-6 11:23 11.23-25
10.16; Mt 26.26-28 11:25 11.25 mejɔwey-mey: Jer 31.31-34; Lk 22.20; 2Kwr
3.6; Heb 8.6; **mambaz:** Mab 24.6-8; Heb 9.12 11:26 11.26 Mt 26.29 11:27
11.27 11.20-22; Heb 10.29 11:28 11.28 2Kwr 13.5

³¹ Da kwa waawa da wuzlah aləkwa a nəka ray anğa la ɗagay, wara cay a zəmey ɗaf nğa sərfeɗey meməcey nğa Bay Mahura na, ngene, Gazlavay fa da cey mevel a ray aləkwa daa ba.

³² Ama, da Bay Gazlavay fa sərɗandakwar banay na, a key ngene, a kəɗndakwar amba ta pas masa Gazlavay ma da katar sariya a ndəhay da bəla na, sariya ha, a kərzandakwar anda ndəhay siya hay ba.

³³ Anda keɗe, məlma aɗaw hay, da masa akwar ta kusam la nğa zəmey ɗaf nğa sərfeɗey meməcey nğa Bay Mahura na, səkwam vaw da wuzlah akwar la ɗagay.

³⁴ Da ndaw may fa car na, nğa zəmwa ɗaf da way anğa la ɗagay, amba daa masa akwar makustakaya na, Gazlavay a cey mevel a ray akwar ba. Da ray mey hay mekele na, da masa ya ta wusey la fa akwar na, ya ɗiyta mey hay a la.

12

Mey da ray gəɗan masa Mesəfney nğa Gazlavay ma vəlɗatara a ndəhay

¹ Məlma aɗaw hay, wure keɗe ya daa guzlkwar da ray gəɗan mekele mekele masa *Mesəfney nğa Gazlavay ma vəlɗa nɗada ndaw a, ndaw a maja mewuɗey-vaw anğa. Ya wuɗey na, ka cəɗdamara mey da ray gəɗan a maaya maaya.

² Ka sərmara daa masa akwar ta təram ndəhay nğa Yesu *Kəriste daa ba aran na, akwar fa tam kuley hay. Kuley hay na, aa guzlam ba, ama akwar fa vəlɗamara ray akwar a kuley hay nğa wamakwar ma fəna ma fəna, ka gwamara nğa jaram ba.

³ Maja ngene, ya wuɗey na, ka sərmara fara fara, da ndaw anğa ta Mesəfney nğa Gazlavay da ray a na, ndaw aha, a gwa nɗaa guzley, a ləvey: «Kuse! Yesu nğa nəsey» na, daa ba. Ama, da ndaw aa guzley, a ləvey: «Yesu ara Bay aləkwa Mahura» na, ngene, ndaw aha aa guzley ta gəɗan nğa Mesəfney nğa Gazlavay.

⁴ Gəɗan masa Mesəfney nğa Gazlavay ma vəlɗatara a ndəhay nğa key sləra anğa na, a wuzwa wal wal fa ndaw a fa ndaw a, ama ara Mesəfney a pal ngene ma vəlɗatara a ndəhay.

⁵ Sləra hay masa Bay Mahura Yesu ma vəlɗatara nɗada ndəhay na, ata wal wal may, ama ya kakwa sləra nɗada Bay Mahura pal gway.

⁶ Gazlavay a veltar gədan wal wal ngada ndəhay nga key sləra anğa, ama ara Gazlavay pal ma velda gədan nga key sləra hay a tabiya.

⁷ Gədan nga Mesəfney nga Gazlavay fa wuzwa vaw wal wal ngada kwa waawa da wuzlah akwar. A key anda ngene na, nga jəney ndəhay tabiya.

⁸ Mesəfney nga Gazlavay a vəlar lenjesl maaya ngada ndaw ngaa guzley maaya. Ngada ndaw lanğar, Mesəfney a, a vəlar gədan nga sərey cek hay amba a wuzdatara a ndəhay.

⁹ Ngada ndaw lanğar saya, Mesəfney nga Gazlavay a vəlar gədan nga təbey mey nga Yesu fara fara aa mevel anğa. A səra a gwa a key cek ma fəna gədan anğa ta fa Mesəfney nga Gazlavay a. Ngada ndaw mekele, Mesəfney nga Gazlavay a vəlar gədan nga mbəley masa-macay hay. Ara Mesəfney nga Gazlavay a pal ngene ma velda gədan nga key sləra hay a.

¹⁰ A vəlar ngada ndaw lanğar gədan nga key maazla hay. Ngada ndaw mekele, a vəlar gədan nga təley mey masa Gazlavay ma wuzdara. Ngada ndaw mekele, a vəlar gədan nga sərey sləra nga Mesəfney nga Gazlavay ta nga sərey sləra nga mesəfney maaya ba. Ngada ndaw lanğar saya, a vəlar gədan ngaa guzley ta mey hay mekele mekele masa anğa ma cənda ba. Ngada ndaw lanğar saya, a vəlar gədan nga mbəddey mey masa ndaw ma cənda ba.

¹¹ Ara Mesəfney nga Gazlavay a pal taava anğa ma gwa nga velda gədan nga key sləra hay a tabiya. Mesəfney a, a wunkey gədan mekele mekele anda aa ma wudəy ngada kwa waawa.

Mey da ray mecəmey-ray nga ndəhay nga Kəriste

¹² Yaw, vaw nga ndaw-magədan na, anğa pal, ama mezəvey hay mekele mekele daha. Kwa mezəvey hay ga fa ndaw daha, ama vaw na, anğa pal gway. *Kəriste na, aa kəne may.

¹³ Daa masa aləkwa ma hətkwa *baptem na, aləkwa tabiya ta təkwa vaw pal sem ta gədan nga *Mesəfney nga Gazlavay pal. Aləkwa tabiya, kwa *Jəwif hay, kwa ndəhay masa Jəwif hay ba, kwa beke hay, kwa beke hay ba, Gazlavay a vəldakwar na, Mesəfney anğa ha ngene pal.

¹⁴ Vaw nga ndaw na, anğa ta mezəvey pal daada ba, ama anğa ta mezəvey hay ga.

15 Da salay a løyey: «Yah mezøvey nga vaw ba maja yah na, har ba», kwa da aa guzley køne na, anga mezøvey nga vaw ba fara daw?

16 Da slømay a løyey: «Yah mezøvey nga vaw ba, maja yah na, dey ba», kwa da aa guzley køne na, anga mezøvey nga vaw ba fara daw?

17 Da vaw nga ndaw ara dey daada na, ngene ndaw aha a da jøkey slømay ta me? Da vaw nga ndaw, ara slømay daada na, ngene ndaw aha a da cønda mezey nga cek hay ta me?

18 Ama Gazlavay ta katørwa mezøvey hay nga vaw la tabiya aa slam anga, aa slam anga, anda aa ma wudøy.

19 Da Gazlavay a pey mezøvey nga vaw pal daada na, ngene, ara vaw ba.

20 Ya sørkwa, mezøvey hay nga vaw na, ata ga, ama vaw na, anga pal gway.

21 Anda kedø, dey a gwa a løyey: «Walay adaw ta har daa ba» na, køne ba. Asaya, ray a gwa a løyey: «Walay adaw ta salay daa ba» na, køne ba.

22 Sasøkar jak, mezøvey nga vaw masa kah ma pa nga cek nga tede ngene, da mezøvey a daa ba na, ka møyey.

23 Mezøvey hay nga vaw masa ma mbafandakwar ba na, ya wakwa vaw ta anga jak, ba diya? Mezøvey hay nga vaw masa aløkwa ma badatakwa fa dey nga ndøhay na, ya pakwa løygesl kalah na, a ray ata jak, ba diya?

24 Mezøvey hay nga vaw masa ma mbam na, nga ata, ya pakwa løygesl a ray ata ba. Gazlavay a pata mezøvey nga vaw nga ndaw cøpa, a hølstar ray. A hølstar ray ma føna na, ngada mezøvey hay masa ma nøkam anda cek nga tede.

25 A patørwa mezøvey hay tabiya aa slam a na, amba vaw a wunkey ba, asaya, amba mezøvey hay a jønám vaw da wuzlah ata.

26 Da mezøvey nga vaw pal fa sørey banay na, mezøvey hay nga vaw tabiya a søram banay asiya may. Da fa hølmar ray a mezøvey nga vaw pal na, mezøvey hay siya tabiya aa sømam may.

27 Yaw, akwar na, vaw nga Køriste. Kwa waawa na, anga mezøvey pal nga vaw nga Køriste he.

28 Daa *mecømey-ray nga ndøhay nga Yesu na, Gazlavay ta pey ndøhay la mekele mekele nga key sløra anga. Ngeeme na, a pey ndøhay mesløyey nga Yesu. Nga dey cew e na, a pey ndøhay ma tøla mey anga. Nga dey maakar a na, a pey ndøhay maa sørkada ndøhay. Asaya, ngada ndøhay mekele a vøltar gødanj nga key maazla hay. Ngada

ndəhay mekele, a vəltar gədan̄ ŋga mbəley masa-macay hay. Ŋgada ndəhay mekele, a vəltar gədan̄ ŋga jəney ndəhay. Ŋgada ndəhay mekele, a vəltar gədan̄ ŋga key *bay-ray. Ŋgada ndəhay mekele saya, a vəltar gədan̄ ŋga guzley ta mey hay mekele mekele masa ata ma sərmara ba.

²⁹ Ndəhay tabiya na, ata ndəhay meslərey ŋga Yesu daw? Ndəhay tabiya na, fa təlam mey ŋga Gazlavay daw? Ndəhay tabiya na, faa sərkadamatara mey ŋga Gazlavay a ndəhay daw? Ndəhay tabiya na, fa kam maazla hay daw?

³⁰ Ndəhay tabiya na, fa mbəlam ndəhay daa macay daw? Ndəhay tabiya na, faa guzlam ta mey hay masa ata ma sərmara ba daw? Ndəhay tabiya na, fa mbəddamara mey hay masa ndəhay ma cəndamara ba a ndəhay mekele daw?

³¹ Ama sləra hay masa Mesəfney ŋga Gazlavay ma vəldatara a ndəhay ma fənta siya hay na, kamara ta mevel pal.

Mey da ray mewudəy-vaw

Wure kefe, ya da wuzkwar cəved maaya ma fənta cəved hay mekele.

13

¹ Kwa yaa guzley ta mey hay mekele mekele, kwa yaa guzley ta mey ŋga maslan̄ hay ŋga Gazlavay, ama da ya wudəy ndaw ba na, ŋgene, yah na, letek ta gwangwan̄w, da daa ba, ta mawiyar ma wurzley sləmay.

² Da Gazlavay a vəlya gədan̄ ŋga təley mey an̄ga a ndəhay, kwa ya sərtə cek hay tabiya, kwa ya cənda mey hay ŋga Gazlavay masa mabadatakaya, kwa ya təba mey ŋga Gazlavay kalah haa ya gwa ya ləvar ŋgada an̄gwa: «Sləkdey, daw», fa dəba ha, an̄gwa ha a daw na, kwa ta ŋgene he cəpa, da ya wudəy ndaw ba na, ŋgene, yah cek ŋga tede.

³ Da ya wunkatara cek adaw hay tabiya a ndəhay masa-viya hay, kwa da ya vəlda ray adaw ŋga wewurey maja ndəhay, ama da ya wudəy ndaw ba na, ŋgene kwa fa da jənya daa ba.

⁴ Ndaw ma wudəy ndaw na, a bəsta ndəhay tabiya, a key cek hay maaya ŋgada ndəhay, a key səlen̄ fa ndəhay ba, a zlepey ba, a gəlda ray an̄ga ba.

⁵ Ndaw ma wuɗey ndaw na, a key cek ma ka hwaray ba, a wulkey da ray cek hay ngada anɗa taava anɗa ba, a cey mevel ba, a pey mey aa mevel ba.

⁶ Ndaw ma wuɗey ndaw na, aa səmey da ray cek hay maaya ba hay ba, ama aa səmey da ray cek hay masa maaya fara fara.

⁷ Ndaw ma wuɗey ndaw na, a bəsa cek ma key maaya ba tabiya fa mey anɗa, a wuzda ba, a tɔba mey nɗa Gazlavay mandaw mandaw, a wulkey Gazlavay a da diyta cek hay tabiya, asaya, a bəsta cek hay wura wura cəpa.

⁸ Mewuɗey-vaw na, fa da ndəvey daa ba səlak. Ama, metəley-mey nɗa Gazlavay na, a ndəvey la. Gədan nɗaa guzley mey hay mekele mekele masa ndəhay ma cəndamara ba na, a ndəvey la. Yaw, mesərey-cek may, a ndəvey la.

⁹ Fara fara, cek hay a, a ndəvam la, maja mesərey-cek aləkwa ta metəley-mey nɗa Gazlavay na, a wuzdatərwa cek hay cəpa ba, si nekəɗey gway.

¹⁰ Ama ta pas masa Gazlavay ma da wuzdandakwara cek masa maaya tabiya na, cek masa aləkwa ma sərkwā nekəɗey heyey na, a ndəvey la.

¹¹ Daa masa yah daa bəzey na, ya faa guzley anda bəza hay, ya fa wulkey anda bəza hay, asaya, ya fa cəndata cek hay anda bəza hay. Ama wure keɗe na, ya ta tərey ndaw mahura sem, ya ta mbəkda mekey cek hay anda bəza hay sem.

¹² Wure keɗe, aləkwa fa hətmatakwa cek hay maaya maaya daa ba, ya nəktakwa cek hay anda ndaw ma nəkey cek daa banɗəra manəskaya. Ama pas pal na, ya da hətmatakwa cek hay tabiya fa dey aləkwa maaya maaya. Wure keɗe na, mesərey-cek aɗaw, anɗa nekəɗey gway. Pas a, a wuswa la masa yah ma da sərta cek hay tabiya maaya maaya anda Gazlavay ma sərya maaya maaya keɗe may.

¹³ Yaw, cek hay maakar daha fa da ndəvam daa ba. Cek hay a na, ara metəbey-mey nɗa Gazlavay, mesəkwey cek fa Gazlavay, leɗ mewuɗey-vaw. Cek hay maakar ata keɗe na, fa da ndəvam daa ba, ama cek mahura da wuzlah ata na, ara mewuɗey-vaw.

14

Mey mekele saya da ray gədan masa Mesəfney nɗa Gazlavay ma vəɗdatara a ndəhay

¹ Teesed na, sɔpam ɲga wudey vaw da wuzlah akwar. Asaya, vɔdamara ray akwar may ɲga hɔtey gɔɗan masa *Mesɔfney ɲga Gazlavay ma vɔdatara ɲgada ndɔhay ɲga key slɛra aɲga. Vɔdamara ray akwar kalah na, ɲga hɔtey gɔɗan ɲga tɔley mey masa Gazlavay ma wuzdara ɲgada ndɔhay.

² Ndaw maa guzley mey hay masa ma cɔney ba na, a key ɲgene, aa guzlar a Gazlavay, ba na, aa guzley ɲgada ndɔhay ba, maja ndɔhay a cɔdamara mey masa aɲga maa guzlda ha ba. Aa guzley ɲgene na, ta gɔɗan ɲga Mesɔfney ɲga Gazlavay, aa guzley da ray cek hay maɓadatakaya.

³ Ama *ndaw ma tɛla mey masa Gazlavay ma wuzdara na, a key ɲgene, aa guzlar a ndɔhay. Mey aɲga a vɔltar gɔɗan a ndɔhay, a jɔnta amba a tɔɓmara mey ɲga Gazlavay maaya maaya, asaya, a dɔktar mevel.

⁴ Ndaw maa guzley mey masa ndɔhay ma cɔdamara ba na, ɲgene, mey a, a jɔney aɲga ray aɲga gway. Ndaw ma tɛla mey masa Gazlavay ma wuzdara na, a key ɲgene, a jɔnta ndɔhay daa *mecɔmey-ray ɲga ndɔhay ɲga Yesu tabiya.

⁵ Ya wudey na, akwar tabiya, kaa guzlam ta mey masa ndɔhay ma cɔdamara ba, ama ya wudey ma fɛna saya na, ka tɛlam mey masa Gazlavay ma wuzdakwara may. Da ndaw aa guzley ta mey masa ndɔhay ma cɔdamara ba, maaya na, ndaw ɲga mbɔɗɗa mey a daha amba mey a, a jɔnta ndɔhay tabiya daa mecɔmey-ray ɲga ndɔhay ɲga Yesu. Da ndaw ɲga mbɔɗɗa mey a daa ba na, ɲgene, ndaw ma tɛla mey masa Gazlavay ma wuzdara na, a jɔnta ndɔhay a fɛna ndaw maa guzley ta mey masa ndɔhay ma cɔdamara ba.

⁶ Mɛlma aɗaw hay, da ya daw fa akwar, yaa guzlkwar ta mey mekele mekele masa akwar ma cɔdamara ba, ɲgene, mey a, a da jɔnkwar na, kwara? Da ya kadakwara mey maɓadakaya ɲga Gazlavay ba, da ya wuzdakwara cek hay mekele ba, da ya tɔley mey masa Gazlavay ma wuzdiwa ba, asaya, da yaa sɛrkadakwar ba na, ɲgene, a key ya jɔnkwar daw?

⁷ Aɲga letek ta cek hay ma ka walay anda slɛlam ta ganjaval. Da ka fa slɛlam saw na, ndaw a da cɔnda ɗay ɲga walay masa kah ma fa ha na, kwara? Da ka kɔɗa ganjaval saw na, ndaw a da cɔnda ɗay ɲga walay masa kah ma kɔɗa ha na, kwara?

⁸ Mefey taalam nga zøley ndøhay ngadaa vøram na, køne may. Da ndaw ma fa taalam a maaya maaya daa ba na, ndaw fa da søra ara madaw ngadaa vøram na, daa ba.

⁹ Ngada akwar may køne. Da kaa guzlam mey masa ndøhay ma cøndamara ba, ndøhay a da cøndamara mey masa akwar maa guzldamara ha na, kwara? Anda kedfe, mey akwar a, a da tørey nga cek nga tede.

¹⁰ Mey hay mekele mekele ga daha da bøla. Kwa søkway wura wura faa guzley ta mey anga na, a cønda.

¹¹ Anda kedfe, da ndaw aa guzlya ta mey anga, ama ya cønda mey a ba na, ndaw a ngene anga ndaw-mølak fa mey adaw. Yah may, yah mølak fa mey anga.

¹² Yaw, maja akwar fa wudam nga høtey gødan nga key sløra hay masa Mesøfney nga Gazlavay ma vøldatara ngada ndøhay anga hay na, maaya na, ka søpam nga høtey teesed na, gødan nga key sløra hay ma gwa nga jønmata ndøhay daa mecømey-ray nga ndøhay nga Yesu.

¹³ Maja ngene, ndaw masa ta gødan ngaa guzley ta mey masa ndøhay ma cøndamara ba na, nga dørey danggay a Gazlavay amba Mesøfney nga Gazlavay a vølar gødan nga mbødda mey a ta mey masa ndøhay ma cøndamara.

¹⁴ Da ya dørar danggay a Gazlavay ta mey masa yah ma cønda ba na, fara fara mevel adaw fa dørey danggay, ama yah na, kwa ya cønda ba sølak.

¹⁵ Anda kedfe, ya da key na, kwara? Ya da dørey danggay ta mey masa yah ma cønda ba ta gødan nga Mesøfney nga Gazlavay, asaya, ya da dørey danggay ta mey adaw ta lenjesl adaw may. Ya da zley walay ta mey masa yah ma cønda ba ta gødan nga Mesøfney nga Gazlavay, asaya, ya da zley walay ta mey adaw ta lenjesl adaw may.

¹⁶ Da kah, ka fa kar suse a Gazlavay ta mey masa ndøhay ma cøndamara ba na, ndaw ma søra mey nga Gazlavay ba da wuzlah akwar na, a gwa nga tøba, a løvey: «*Amen» na, kwara? A gwa ba, maja a cønda mey masa kah maa guzlda ha ba.

¹⁷ Kwa ka fa kar suse a Gazlavay maaya maaya daa medørey-danggay a na, ama medørey-danggay a, a gwa nga jøna ndaw aha ba.

¹⁸ Ya fa kar suse a Gazlavay maja ya faa guzley mey hay ga masa ndøhay ma cøndamara ba a fønkwar.

¹⁹ Ama, da masa yah da wuzlah ndøhay nga Yesu makustakaya na, ngama yah maa guzley mey pal ta mey masa ndøhay ma cøndamara amba yaa sørkadata, da ray

yah ma daa guzley ga ta mey masa ndəhay ma cəndamara ba.

²⁰ Məlma aɗaw hay, daa menjey akwar na, ka da wulkam anda bəza hay ba, ama wulkam anda ndəhay ma sərmara mey ŋga Gazlavay maaya maaya. Ka da kam cek malamba daa sləra akwar ba. Təram anda bəza hay da mey dəwa masa ma sərmara ŋga key cek malamba ba.

²¹ Mawuzlalakaya daa dferewel ŋga Gazlavay, a ləvey:

«Bay Gazlavay a ləvey:

“Ya daa guzltar a ndəhay aɗaw hay ta mey masa ata ma cəndamara ba.

Ahaw, ya daa guzltar ta mey ŋga ndəhay daa hwayak mekele.

Ama ta ŋgene he cəpa na, ndəhay aɗaw hay fa da jəkfamaya sləmay daa ba cəŋga.”»

²² Anda keɗe, ŋgada ndəhay ma təba mey ŋga Yesu ba, meeguzley ta mey masa ndəhay ma cəndamara ba na, ara cek ma wuzwa ŋgada ata, Gazlavay a katar sariya la. Ŋgada ndəhay ma təba mey ŋga Yesu na, kəne ba. Ŋgada ata, metəley-mey ŋga Gazlavay na, ara cek ma wuzwa Gazlavay aa da wuzlah ata. Ŋgada ndəhay ma təba mey ŋga Yesu ba na, kəne ba.

²³ Wulkam cey: da masa akwar ndəhay ŋga Gazlavay makustakaya tabiya, ndəhay ma təba mey ŋga Yesu ba, da daa ba, ndəhay ma samawa ŋga jəkam sləmay saw a samawa a wuzlah akwar, a hətfamakwar akwar faa guzlam ta mey hay masa ndəhay ma cəndamara ba na, a padamakwar ŋga ndəhay ta malula da ray, daa ba daw?

²⁴ Ama da akwar tabiya fa təlām mey masa Gazlavay ma wuzdakwara, ndəhay ma təba mey ŋga Yesu ba ta ndəhay ma samawa ŋga jəkam sləmay saw a samawa, a hətfamakwar na, mey a, a da wuzdatara mebərey ata. Asaya, mey akwar a, a da vəltar mewulkey da ray menjey ata maaya ba,

²⁵ cek hay maɓadatakaya daa mevel ata, a da wuzwa a palah. Maja ŋgene, a da ragadamar a Gazlavay, a da həlmamara, asaya, a da ləvam: «Fara fara, Gazlavay aa da wuzlah akwar.»

Mekey cek ta cəved e daa mecəmey-ray ŋga ndəhay ŋga Yesu

²⁶ Maja ŋgene, məlma aɗaw hay daa *mecəmey-ray ŋga ndəhay ŋga Yesu, ka da kam na, kwara? Da masa akwar makustakaya daa slam a na, ndaw pal da wuzlah akwar ŋga zley walay, ndaw mekele ŋgaa sərkadata ndəhay ta mey

nga Gazlavay, ndaw mekele nga wuzda cek masa Gazlavay ma wuzdara a ndəhay, ndaw mekele ngaa guzley ta mey masa ndəhay ma cəndamara ba, ndaw mekele saya nga mbədda mey a, a ndəhay. Ka kamata cek hay tabiya ngene na, nga jəney ndəhay daa mecəmey-ray nga ndəhay nga Yesu amba a diyam fa mey fa mey.

²⁷ Da ndaw aa guzley ta mey masa ndəhay ma cəndamara ba na, ndəhay cew, da daa ba, maakar gway ngaa guzlam pal pal, ndaw pal nga mbədda mey masa ata maa guzdamara ha a ndəhay.

²⁸ Da ndaw nga mbədda mey a daa ba na, ngene, ndaw maa guzley ta mey masa ndəhay ma cəndamara ba ha na, a daa guzley ta gədan fa mey nga ndəhay ba, ama ngaa guzley da hwaɗ da hwaɗ ngada ray anga ta ngada Gazlavay gway.

²⁹ Ngada ndəhay ma təla mey nga Gazlavay na, ndəhay cew, da daa ba, maakar ngaa guzlam gway, ndəhay siya na, nga jəkam sləmay da mey a ara mey nga Gazlavay fara fara kwa.

³⁰ Daa masa ndaw masa faa guzley na, da Gazlavay a wuzar mey a ndaw mekele daa mekusey akwar na, maaya na, ndaw masa ngeeme a njeý teete ɗagay.

³¹ Akwar tabiya akwar, akwar ta cəved nga təley mey nga Gazlavay, ama gwaguzlam pal pal amba ndəhay tabiya aa səkam maaya maaya, asaya, amba a hətam gədan.

³² Ndaw masa aa ta gədan nga təley mey nga Gazlavay na, ara anga ma wey da ray gədan aha,

³³ maja mekey cek ta cəved e ba na, a mbafar a Gazlavay ba. Gazlavay a wuɗey na, ya njakwa ta zazay.

Njam anda ndəhay daa mecəmey-ray nga ndəhay nga Yesu siya.

³⁴ Masa akwar makustakaya daa slam a na, ngusay nga njam teete. Ata ta cəved ngaa guzley daa ba, nga namatar ray a zel hay anda mawuzlalakaya daa *mewey nga Gazlavay.

³⁵ Da mey daha masa ata ma cəndamara ba na, a daa cəɗfamara daa mekusey a ba, ama ngaa cəɗfamata fa zel ata hay da way. Ngwas aa guzley daa mekusey nga ndəhay nga Yesu na, maaya ba.

³⁶ Ka wulkam mey nga Gazlavay a zlawana, fa akwar gway daw? Ka wulkam mey nga Gazlavay a wusey na, fa akwar daada daw?

³⁷ Da ndaw a wulkey aa ta gədanŋ ŋga *Mesəfney ŋga Gazlavay, da daa ba, aa ta gədanŋ ŋga wuzey mey ŋga Gazlavay na, ŋga səra, mey masa yah ma wuzlalakwara kede na, ara mey masa Bay Mahura ma wuzdiwa.

³⁸ Da ndaw aha a jəkey sləmay fa mey masa yah ma wuzlalakwara kede ba na, ŋgene, Gazlavay fa da səra ndaw aha daa ba.

³⁹ Da ray ŋgene, məlma adaw hay, səpam teesed na, gədanŋ ŋga təley mey ŋga Gazlavay. Asaya, da ndəhay faa guzlam ta mey hay masa ndəhay ma cəndamara ba na, ka da təkмата ba.

⁴⁰ Cek masa mahura na, si ka kamata cek hay tabiya daa mekusey akwar maaya maaya, asaya, ka kamata ta cəved e.

15

Mey da ray masləkdawa ŋga Yesu Kəriste daa meməcey

¹ Məlma adaw hay, ya wudəy ŋgaa guzlkwar saya da ray *Mey-maaya-mawiya masa yah ma wuzdakwara zleezle masa akwar ma təbmara. Ahaw, akwar ta təbmara mey a la fara fara aa mevel akwar.

² Ta fa metəbey Mey-maaya-mawiya ha na, Gazlavay a ləhdakwar la, ama si akwar fa təbmara anda yah ma wuzdakwara, ka mbəkdamara ba. Da daa ba na, metəbey mey a ŋgada akwar na, ara cek ŋga tede.

³ Ya taa sərkadakwara mey masa Yesu maa sərkadawa la. Mey masa mahura da hwad a na, ara *Kəriste ma məcey maja mebərey aləkwa anda mawuzlalakaya daa dərewel ŋga Gazlavay.

⁴ Ta jəhmara la, ŋga dəar maakar a ta sləkdwara sem daa meməcey anda mawuzlalakaya daa dərewel ŋga Gazlavay.

⁵ Masa aŋga ma sləkdwara cay daa meməcey a na, ta wuzar vaw la a *Piyer, asaya, ta wuztar vaw la a ndəhay aŋga hay meslərey siya.

⁶ Fa dəba ha, ndəhay aŋga hay a fəna temere zlam ta hətmar la ata cəpa daa slam a may. Ndəhay ma hətmar na, har-gədanŋ da wuzlah ata, ata daha ta dey dəgay, ama siya hay ta məcam sem.

⁷ Ta wuzar vaw la a *Jak. Fa dəba ha, ta wuztar vaw la a ndəhay aŋga hay meslərey tabiya saya.

⁸ Fa dɔba ata tabiya, kwa yah anda bɔzey masa ma yawa rav-baŋ na, ta wuzya vaw la may.

⁹ Dasi ndɔhay meslɔrey ŋga Yesu Kɔriste tabiya na, yah mecɔhe da wuzlah ata. Yah na, ya wusa amba a zɔlmaya *ndaw-meslɔrey ba, maja ya ta sɔrdata banay la ta ndɔhay daa *mecɔmey-ray ŋga ndɔhay ŋga Yesu Kɔriste.

¹⁰ Ama maja mepɔsey-mey ŋga Gazlavay da ray adaw na, ya ta tɔrey ndaw masa akwar ma hɔtmar wure kedɛ la. Mepɔsey-mey aŋga ha na, ara cek ŋga tede ŋgada yah ba, sasɔkar jak, ya ta key slɔra la ga, ma fɔna ndɔhay meslɔrey mekele. Ma ka slɔra ha na, ara yah ta gɔdaŋ adaw ba, ama fara fara ara maja mepɔsey-mey ŋga Gazlavay aa da ray adaw.

¹¹ Anda kedɛ, kwa da ara yah ma wuzda Mey-maaya-mawiya, kwa da ara ndɔhay meslɔrey mekele na, ara cek letek. Ala tabiya ala, ya wuzam mey letek masa akwar ma tɔbmara aa mevel akwar.

Mey da ray ndɔhay ma da slɔkɔamawa daa memɔcey

¹² Ala fa wuzdamara ya lɔvam *Kɔriste ta slɔkɔdawa sem daa memɔcey. Kaa, ndɔhay siya da wuzlah akwar a lɔvam ndɔhay fa da slɔkɔamawa daa memɔcey daa ba na, kwara?

¹³ Da fara fara ndɔhay fa da slɔkɔamawa daa memɔcey daa ba na, ŋgene, Kɔriste ta slɔkɔdawa daa memɔcey daa ba may.

¹⁴ Da fara fara Kɔriste ta slɔkɔdawa daa memɔcey daa ba na, ŋgene, mey ŋga Gazlavay masa ala ma wuzdamara na, ara mey ŋga tede, ka tɔbmara mey a ŋga tede may.

¹⁵ Da kɔne na, ala ta mbɔzlam sem a ray Gazlavay maja ala ta lɔvmatar la a ndɔhay, Gazlavay ta slɔkɔadɔrwa Kɔriste sem daa memɔcey. Ama da ndɔhay fa da slɔkɔamawa daa memɔcey daa ba na, ŋgene, Gazlavay ta slɔkɔadɔrwa Kɔriste daa memɔcey daa ba may.

¹⁶ Da Gazlavay fa da slɔkɔadɔrwa ndɔhay daa memɔcey daa ba na, ŋgene, Kɔriste may, Gazlavay ta slɔkɔadɔrwa daa memɔcey daa ba.

¹⁷ Da Gazlavay ta slɔkɔadɔrwa Kɔriste daa memɔcey daa ba na, ŋgene, ka tɔbmara mey aŋga ŋga tede, asaya, akwar ta mebɔrey cɔŋga.

¹⁸ Anda melɔvey saya, ndɔhay ma tɔbmara mey ŋga Kɔriste masa ma mɔcam sem na, taa zɔdam sem.

¹⁹ Da alɔkwa fa pakwa Kɔriste ŋga ndaw ma da jɔndakwar fara fara, ama da a jɔndakwar daa masa

aləkwa da bəla daada na, ɲgene, anja matəway daa dey aləkwa a fəna ɲga ndəhay mekele la.

²⁰ Ama fara fara na, Kəriste ta sləkɗawa sem daa meməcey. Anja na, ara ndaw masa ma sləkɗawa teesef daa meməcey. Anda keɗe, a wuzwa fara fara ndəhay mekele a sləkɗamawa la daa meməcey may.

²¹ Meməcey a sawa a bəla na, ta fa ndaw pal, mezəley *Adam. Yaw, ma wura cəvedf amba ndəhay a sləkɗamawa daa meməcey na, ara ndaw pal may, mezəley Yesu Kəriste.

²² Ndəhay tabiya a məcām maja ata macəmƙaya ta Adam aha. Ama ndəhay tabiya masa macəmƙaya ta Kəriste na, a sləkɗamawa la daa meməcey anda anja may.

²³ Ama kwa waawa a da sləkɗawa daa meməcey na, fa dəle fa dəle. Kəriste ta sləkɗawa sem teesef daa meməcey. Ta pas masa aa ma da vəhwa na, ndəhay anja hay a sləkɗamawa la daa meməcey may.

²⁴ Fa dəba ha, bəla a ndəvey la. Kəriste a daa zəɗdata mesəfney hay maaya ba hay ta gədan ɲga bay ata hay tabiya. A da key bay-gula da ray bay hay ma wam da bəla. Fa dəba ha, a da vəldara bay anja a Gazlavay Papan aa slam a.

²⁵ Ama si Kəriste a wey da ray cek hay tabiya haa kasl Gazlavay Papan ma pata masa-gəra anja hay tabiya asi salay anja dʒagay.

²⁶ Masa-gəra ɲga madagway-dakw masa Gazlavay ma daa zəɗda na, ara meməcey.

²⁷ Yaw, mawuzlalakaya daa dferewel ɲga Gazlavay, a ləvey: «Gazlavay ta pata cek hay tabiya la asi har ɲga Bəzey anja.» Ahaw, mawuzlalakaya anda ɲgene, ama fara fara, Gazlavay na, fa da njeɲ asi har ɲga Bəzey anja daa ba, maja ara anja ma pata cek hay tabiya asi har ɲga Bəzey anja ha.

²⁸ Masa Gazlavay Papan ta pata cek hay tabiya cay asi har ɲga Bəzey anja na, Bəzey anja ha may, a da vəlda ray anja asi har ɲga Papaha masa ma vəldara cek hay tabiya. Anda keɗe, Gazlavay Papan a da wey maaya maaya da ray cek hay tabiya.

²⁹ Wulkam da ray ndəhay siya da wuzlah akwar ma hətam *baptem maja ndəhay maməctakaya cey. Da fara fara ndəhay maməctakaya a sləkɗamawa daa meməcey

15:20 15.20 6.14; Kwa 1.18 **15:21 15.21-22** 15.45-49; MC 3.17-19; Rm 5.12, 14, 18 **15:22 15.22** 2Kwr 5.17 **15:23 15.23** 15.51-52; 1Tes 4.16 **15:24 15.24** Dan 2.44 **15:25 15.25** Ps 110.1; Mt 22.44 **15:26 15.26** CWJ 1.18; 20.14; 21.4
15:27 15.27 Ps 8.6 **15:28 15.28** Rm 11.36

daa ba na, a hɔtam baptem maja ndɔhay mamɔctakaya na, maja me?

³⁰ Asaya, da ndɔhay mamɔctakaya fa slɔkɔdamawa daa ba na, ala ta ray ala, ya fa vɔldamara ray ala ŋga sɔrey banay mandaw mandaw na, maja me?

³¹ Ahaw, mandaw mandaw ya fa hɔtar memɔcey ta dey adaw. Mɔlma adaw hay, ya kadakwara cek hay tabiya keɔe na, maja fara fara ya faa sɔmey da ray akwar, akwar masa macɔmkaya ta Yesu Kɔriste Bay alɔkwa Mahura.

³² Feɔe da Efez, masa-gɔra hay ga daha, ya ta kɔfey vaw la ta ata anda ta cek hay ŋga ley masa-hɔma. Da ya kɔfey vaw anda ŋgene maja mewulkey ŋga ndaw-magɔɔaŋ daada na, mekɔfey-vaw a, a da jɔnya na, kwara? Da ndɔhay mamɔctakaya a slɔkɔdamawa daa ba na, ŋgene, a key anda mey daha ma lɔvey: «Zɔmkwa cek, sakwa cek, mandaw na, alɔkwa daa saba.»

³³ Pam lenjesl, maja da akwar fa pɔkam ta ndɔhay ma kam cek malamba na, akwar may ka kam cek malamba la anda ata.

³⁴ Kam cek ta cɔveɔ e, ka da kam cek malamba saba. Ndɔhay siya da wuzlah akwar daha masa ma sɔmara Gazlavay ba. Yaa guzlkwar anda keɔe na, ŋga pakwar hwaray.

Mey da ray vaw ŋga ndaw ma slɔkɔdawa daa memɔcey

³⁵ Da kwa ndaw a gwa a wulkey daa ray aŋga, a lɔvey: «Gazlavay a da slɔkɔɔaɔrwa ndaw daa memɔcey na, kwara? Vaw ŋga ndaw ma slɔkɔdawa daa memɔcey, a da nɔkey na, kwara?»

³⁶ Ndaw ma wulkey anda ŋgene na, ara ndaw manjar lenjesl. Hulfaɔ masa kah ma slɔka a ley na, a pɔcwa ama masa maslɔkakaya cɔma na, a zey.

³⁷ Hulfaɔ masa kah ma slɔka, kwa ara daw, kwa ara meeme na, ka slɔkey na, babɔza daada gway, ka slɔka ta panay a tabiya ba.

³⁸ Hulfaɔ hay na, ata wal wal, gwaslaf hay a may, ata wal wal. Masa kah ma slɔka la na, Gazlavay a pɔcrawa, a key gwaslaf anda Gazlavay ma wuɔey.

³⁹ Cek hay tabiya masa ta mesɔfney na, ata ta vaw wal wal may. Anda melɔvey, vaw ŋga ndaw-magɔɔaŋ na, aŋga wal ta ŋga gɔnaw hay, wal ta ŋga ɔiyaŋ hay, asaya, wal ta ŋga ewet hay.

⁴⁰ Cek hay da gazlavay da vad daha, cek hay da bēla daha may. Membey nga cek hay da gazlavay da vad anga wal ta membey nga cek hay da bēla.

⁴¹ Mewedey nga pas na, anga wal, mewedey nga kiya na, anga wal may. Mewedey nga wurzla hay anga wal saya, kwa da wuzlah wurzla hay na, mewedey ata wal wal.

⁴² Maslækɗawa daa meməcey na, kəne may. Vagay masa ta pəshamara cay na, anga anda hulfad, a da zey. Vaw masa ma slækɗawa daa meməcey na, fa da zey daa ba səlak.

⁴³ Masa ta pəshamara vagay cay aa cəvay na, vagay a, a da zey, ara cek nga tede, asaya, a mbey fa dey ba. Ama masa ta slækɗawa cay daa meməcey na, a zey ba, a njeɣ anga ta gəɗan, asaya, a mbey fa dey kalah.

⁴⁴ Da a pəsham vagay na, a pəsham ngeɣe, aslaw nga vaw gway. Masa ta slækɗawa cay na, a terey vaw masa *Mesəfney nga Gazlavay ma ləma mawiya. Aləkwa ta vaw da bēla keɗe, ba diya? Sərmara, ya hətkwa vaw mekele la masa Mesəfney nga Gazlavay ma ləma.

⁴⁵ Ara anda mawuzlalakaya daa ɗerewel nga Gazlavay, ma ləvey: «*Adam masa ngeeme na, ara ndaw-magəɗan masa Gazlavay ma vəlar heter.» Adam masa nga madagway-dakw na, ara *Kəriste ma terey nga Mesəfney ma vəltar heter mawiya a ndəhay.

⁴⁶ Vaw masa Mesəfney nga Gazlavay ma ləma na, ara vaw ngeeme ba. Anda keɗe, masa ngeeme na, ara vaw nga ndaw-magəɗan da bēla keɗe ɗagay, fa dəba ha, vaw masa Mesəfney nga Gazlavay ma ləma.

⁴⁷ Adam, ndaw ngeeme na, ara ndaw-magəɗan masa Gazlavay ma ləma ta hwiyak. Ama Adam nga dey cew e na, a pawa salay da gazlavay da vad.

⁴⁸ Ndəhay magəɗan na, vaw ata anda vaw nga ndaw masa Gazlavay ma ləma ta hwiyak. Ndəhay da gazlavay da vad na, vaw ata anda vaw nga ndaw ma pawa salay da gazlavay da vad may.

⁴⁹ Wure keɗe na, vaw aləkwa anda vaw nga ndaw masa Gazlavay ma ləma ta hwiyak. Pas pal na, vaw aləkwa a da terey anda vaw nga ndaw ma pawa salay da gazlavay da vad.

⁵⁰ Məlma adaw hay, ya fa ləvkwar, aa slam masa Gazlavay fa wey da vad na, ndaw fa da mbəzey a hwaɗ a ta vaw masa da bēla keɗe daa ba. Cek hay ma da zam na, a gwa nga cəmam ta cek hay ma da njam nga sərmataw ba.

⁵¹ Jøkam sləmay, ya daa guzlkwar da ray cek mabadakaya *: ndəhay siya da wuzlah aləkwa tabiya fa da məcam daa ba, ama aləkwa tabiya, vaw aləkwa a da mbədey.

⁵² A da key na, daa masa fa famara taalam nga madagway-dakw. Vaw aləkwa a da mbədey fiyaw fiyaw anda ndaw ma kəbcey dey. Masa ta famara taalam cay na, ndəhay maməctakaya a sləkdamawa la daa meməcey ta vaw masa ma da məcey saba. Aləkwa siya masa ta dey, aləkwa tabiya vaw aləkwa a da mbədey.

⁵³ Anda meləvey, vaw aləkwa ma da zey na, a da tərey nga vaw ma da zey saba. Ahaw, vaw aləkwa ma da məcey na, a da tərey nga vaw ma da məcey saba.

⁵⁴ Masa vaw aləkwa ta mbədey cay kəne na, ηgene, mey mawuzlalakaya daa dərəwel nga Gazlavay a da key fara fara anda mawuzlalakaya ha. Mey a, a ləvey: «Meməcey daa saba, Gazlavay ta fəna meməcey sem ta gədan.»

⁵⁵ «Haya, bay-meməcey, gədan akah na, anğa ama dəba ama?

Haya, bay-meməcey, ləvat akah masa kah ma məlta ndəhay ta anğa na, anğa ama dəba ama?»

⁵⁶ Ləvat ma məlta ndəhay nga məcam na, ara mebərey. Kwakwas nga *Mawiz na, fa vəlar gədan a mebərey ηgaa zəddata ndəhay.

⁵⁷ Ama həlmakwa Gazlavay, maja ara anğa ma vəldakwar gədan nga fəna meməcey ta fa Bay aləkwa Mahura Yesu Kəriste.

⁵⁸ Maja ηgene, məlma adaw hay mawudtakaya, kam gədan, kwa cek a da vəhdakwar ηgada fa dəba ba. Kamara sləra nga Bay Mahura Yesu mandaw mandaw ta mevel pal. Ka səmra sləra masa akwar ma kamara ta gədan anğa na, ara cek masa nga tede ba.

16

Mey da ray mecekeley dala ηgada ndəhay da Jeruzelem

¹ Ya daa guzlkwar wure keče na, da ray mey nga dala masa akwar ma da cakalamara ηgada ndəhay nga Yesu da *Jeruzelem. Ka da kamara anda yah ma ləvtar ηgada ndəhay daa *mecəmey-ray nga ndəhay nga Yesu da Galati may.

* **15:51 15.51** cek mabadakaya: Pawl aa guzley da ray pas masa Kəriste ma da vəhwa. **15:51 15.51** 1Tes 4.15 **15:52 15.52** taalam: Mt 24.31; 1Tes 4.16 **15:53 15.53** 2Kwr 5.4 **15:54 15.54** Iz 25.8 **15:55 15.55** Aw 13.14 **15:56 15.56** Rm 4.15; 6.14 **15:57 15.57** Rm 7.24-25 **15:58 15.58** 16.13 **16:1 16.1** SNM 11.29-30; 2Kwr 8.1-9

² Fa luma ha, fa luma ha na, kwa waawa da wuzlah akwar nga ley dala daa dey masa anga ma hɔtar tɔde ta gɔdan anga, nga cakala, amba da masa yah ma wusey la fa akwar na, ka cakalam dala mekele saba.

³ Yah ma wusey la fa akwar na, ya slɔrdata ndɔhay masa akwar ma walamata nga handamara dala akwar a, a Jeruzelem la. Ya slɔrdata la ta leeter da har masa yah ma da wuzlalatar da ray dala ha.

⁴ Da maaya ya daw may na, ngene, ya diyam la bama daa slam a.

Mey da ray cek masa Pawl ma da ka

⁵ Ya fa da daw aa hwayak nga Masadɔwan amba ya cam ray ta ndɔhay daa mecɔmey-ray hay nga Yesu fetede. Fa dɔba ha, ya wusey la fa akwar.

⁶ Ayɔwa, da ya njeɣ la fa akwar nekɔdeɣ kwa, da ya ndɔnda kiya nga memed la fa akwar kwa. Anda kede, masa ya fa da mbɔkdakwar cay na, ka jɔnmaya la kwa nga daw aa slam wura wura mekele.

⁷ Da ya wusey fa akwar amba ya njeɣ nekɔdeɣ gway na, ya wudeɣ ba. Ama da Bay Mahura ta tɔba la na, ya wudeɣ nga njeɣ fa akwar ga.

⁸ Ya njeɣ la da Efez haa kasl gwagway nga *Pantekwat ma wuswa,

⁹ maja ya ta hɔteɣ har la ga nga key slɔra maaya nga Gazlavay, asaya, masa-gɔra hay ga fede daha.

¹⁰ Da Timawte ta wusey la fa akwar na, tɔbmara maaya maaya, amba a njeɣ ta mandɔrzay daa dey ba, maja anga fa key slɔra nga Bay Mahura anda yah may.

¹¹ Kwa ndaw a da rɔsa ba sɔlak. Jɔnmara amba a vɔhwa fa yah ta zazay, maja ya fa sɔkwta fede, anga ta mɔlman hay mekele *.

¹² Da ray mɔlma alɔkwa Apalaws na, ya ta kar ambahw la dey weewe, ya lɔvar, maaya na, a daw ta mɔlman hay mekele ma da diyam fa akwar, ama a wudeɣ nga daw wure kede ba sɔlak. Ama, da masa ta hɔteɣ har la na, a daw la.

Mey nga madagway-dakw

¹³ Ka da nam dɔr ba, njam maaya maaya daa cɔved nga Gazlavay, ka da zluram ba, kam gɔdan.

¹⁴ Cek hay tabiya masa akwar ma kamata na, kamara ta mewudeɣ-vaw.

16:5 16.5 SNM 15.21; 2Kwr 1.15-16 **16:6 16.6** Rm 15.24 **16:7 16.7** 4.19

16:8 16.8-9 SNM 19.8-10 **16:10 16.10** Timawte: 4.17 * **16:11 16.11** Ndɔhay mekele a wulkam na, meɣ Garek a lɔvey: «maja ala ta mɔlman hay mekele fa sɔkwmara fede.» **16:12 16.12** Apalaws: 1.12 **16:13 16.13** 15.38; Ps 31.25; Ef 6.10 **16:14 16.14** 8.1; Jan 13.34; Rm 13.8-10; 2Kwr 6.6; Gal 6.10; Ef 5.2

¹⁵ Məlma adaw hay, ka sərmara Estefanas ta ndəhay da way anğa, ba diya? Ata na, ndəhay masa ngeeme ma təbmara mey nğa Yesu *Kəriste daa hwayak nğa Akay. Ta vəldamara ray ata la nğa jəney ndəhay nğa Yesu. Ya kakwar ambahw,

¹⁶ ndəhay anda ngene na, namatar ray. Asaya, namatar ray a ndəhay ma kam sləra bama ta ata.

¹⁷ Ya faa səmey da ray ata Estefanas, Fartunatus leŋ Akaykus ma samawa fa yah. Masa yah ma hətatar na, anda ya hətəy ngene na, akwar tabiya akwar.

¹⁸ Ta dəkmaya mevel la anda ata ma dəkmakwar mevel may. Səkway nğa ndəhay anda ngene na, həslmatar ray.

¹⁹ Ndəhay nğa Yesu daa mecəmey-ray hay daa slam hay mekele mekele daa hwayak nğa Azi a camakwar har. Ata Akilas ta nğwas anğa Pəriska †, leŋ ndəhay nğa Yesu masa ma kusam da way ata na, a camakwar har maaya maaya ta mezəley nğa Bay Mahura Yesu.

²⁰ Ndəhay nğa Yesu tabiya fedə, a camakwar har may. Akwar tabiya, cam har da wuzlah akwar cəpa pal pal, anda akwar məlman hay.

²¹ *Yah, Pawl, ya cakwar har.* Ara yah ta har adaw, ma wuzlalakwara mecey-har a kefe.

²² Ndaw ma wuda Bay Mahura ba na, anja Gazlavay nğa nəsa. «*Maranata.*» Anja Bay aləkwa Mahura nğa sawa.

²³ Anja maaya nğa Bay aləkwa Mahura Yesu nğa njeŋ ta akwar.

²⁴ Akwar ndəhay nğa Yesu Kəriste, ya fa wudkwar, akwar tabiya akwar.

16:15 16.15 Rm 16.5; **Estefanas:** 1.16 **16:18 16.18** Fəl 2.29; 1Tes 5.12
 † **16:19 16.19** Pəriska: A zəlmara daa slam mekele Pəresil. Nəka SNM 18.2.
16:19 16.19 Rm 16.5; **Azi:** CWJ 1.4, 11 **16:20 16.20** Rm 16.16 **16:21**
16.21 Gal 6.11; Kwa 4.18; 2Tes 3.17; Flm 19 **16:22 16.22** Gal 1.8-9; CWJ 22.20;
Maranata: Jud 14; CWJ 1.7 **16:24 16.24** 4.21; 2Kwr 2.4; 11.11; 12.15; Fəl 1.8;
 2.17; 1Tes 2.8; 3.12; 2Tm 3.10; Flm 9

**Leeter masa Pawl ma wuzlala
nga dey cew a
Kwarinti hay
Mey da ray
Leeter nga dey cew ngada Kwarinti
hay**

Leeter e keɗe na, ara Pawl ma wuzlalatara ngada ndəhay daa mecəmey-ray nga Yesu daa berney nga Kwarinti. A wuzlalatara na, daa masa anɗa daa hwayak nga Masadəwan (2.13; 7.5; 9.2).

Pawl a wuzlala leeter keɗe na, maja a wufey nga vəhey a Kwarinti saya nga dey maakar. A da vəhey a na, maja anɗa ma cəney mey hay mekele mekele fetede ma daw ba. Asaya, Pawl a wufey wuskwaa a da wusey a Kwarinti na, ta diymata mey hay a cay.

Da wuzlah ndəhay daa mecəmey-ray nga Yesu da Kwarinti a na, ndəhay maa sərkaɗa ndəhay ta cəved e ba daha (11.3-6). Ndəhay a fa pamara ray ata nga ndəhay meslərey nga Yesu ma fəna Pawl. A ləvam Pawl fa key sləra ta cəved e daa ba (1.15-18). A mbərzɗafamar a ray Pawl, a ləvam ta zəma dala masa ata ma cakalamara ngada masa-viya hay da Jeruzelem heyey sem (12.16-18). Anda keɗe, Pawl a wuzdatara daa leeter e keɗe, menjey anɗa na, aa maaya daa masa anɗa da wuzlah ata, fa key sləra ta cəved e. (1.12; 12.12).

Daa leeter e keɗe na, mey mekele mekele daha nga voley gəɗanɗa ndəhay:

Gazlavay a wuzdərwa gəɗanɗa anɗa mahura ta fa aləkwa ndəhay ma təba mey anɗa (4.1-17)

Mewedey ta ləvanɗa na, a cəmam ba (6.14-18)

Mecey-har

¹ Ara yah Pawl, masa *Gazlavay ma walaya nga key ndaw-meslərey nga *Yesu *Kəriste. Ara ala ta Timawte ma wuzlalamakwara leeter keɗe.

Ya wuzlalamakwara ngada akwar ndəhay daa *mecəmey-ray nga ndəhay nga Yesu daa berney nga Kwarinti, asaya, ngada akwar ndəhay ma təba mey nga Yesu daa hwayak nga Akay * tabiya.

* **1:1 1.1** Akay: Ara hwayak mahura nga Gərek hay, Kwarinti ara berney da hwaɗ a. **1:1 1.1** Gal 1.1; **Timawte:** 1Kwr 4.17

² Anja Papa aləkwa, Bay Gazlavay, ta Bay aləkwa Mahura Yesu Kəriste n̄ga pəsmakwar mey, asaya, n̄ga n̄jadamakwar daa zazay.

Pawl a kar suse a Gazlavay

³ Həlmakwa Gazlavay, Papan̄ n̄ga Bay aləkwa Mahura Yesu *Kəriste. Ara Gazlavay Papan̄ ma sərey dey-ceceh fa ndəhay mandaw mandaw, asaya, ara n̄nga ma dəktar mevel a ndəhay kwa daa banay wura wura cəpa.

⁴ Daa banay tabiya masa ala fa sərmara kefe na, Gazlavay fa vəlndar gədan̄. A ka kəne na, amba ya dəkmatar mevel a ndəhay siya ma səram banay mekele mekele anda n̄nga ma dəkndar mevel may.

⁵ Ya sərmara Kəriste ta sərey banay la ga, ala may, fa səram banay. Anda kefe, Gazlavay fa dəkndar mevel daa banay a maja ala macəmkaya ta Kəriste.

⁶ Da ala fa səram banay na, ara amba Gazlavay a vəlkwar gədan̄, asaya, amba a ləhdakwar daa mebərey. Fara fara, da Gazlavay fa vəlndar gədan̄ na, ara amba a vəlkwar gədan̄ n̄ga bəsey banay masa ala ma bəsmara may.

⁷ Wure kefe, ya ta sərmara cay, akwar ta mbəkdamara cəved n̄ga Gazlavay daa ba səlak, asaya, akwar ta bəsmara banay la anda ala. Da ray n̄gene, Gazlavay fa vəlkwar gədan̄ anda n̄nga ma vəlndar gədan̄ may.

⁸ Məlma adaw hay, maaya na, ka sərmara ala ta səram banay la daa hwayak n̄ga Azi. Fara fara, ala ta səram banay la ga. Banay a, ta fənn̄dar ray sem. Ala ta wulkam amba ya n̄jam ta dey na, daa ba.

⁹ Ya ləvam na, ya da məcmawa fetefē. Ama cek aha a key kəne na, amba ya sərmara gədan̄ ala daada na, a wusa ba, si gədan̄ n̄ga Gazlavay, maja ara n̄nga ma sləkɸadatərwa ndəhay daa meməcey.

¹⁰ Gazlavay ta ləhdandar sem daa meməcey a n̄gene. Asaya, a ləhdandar la daa banay hay mekele mekele. Ahaw, mewulkey ala aa da ray a, fara fara a ləhdandar la daa banay hay mekele mekele.

¹¹ Akwar may, maaya na, ka jənmandar daa medərey-dan̄gay. Anda kefe, ara ndəhay ga ma da dəram dan̄gay maja ala. Yaw, Gazlavay a təba medərey-dan̄gay a la, maja n̄gene, ndəhay ga a da kamar suse.

Pawl a mbəɸda mewulkey n̄nga

¹² Ya sɛrmara, daa menjey ala da bɛla keɗe na, ala fa kam cek ta cɛved e ɲgada ndɛhay tabiya. Ahaw, ya kam cek ta cɛved e ma fɛna na, da wuzlah akwar. Ala fa sɛpam ɲga key cek ma mbafar a Gazlavay mandaw mandaw, ya bɛm mey ta bɛy ba. Keɗe he ara cek maa sɛmdandar. Akwar ma sɛrmara menjey ala da wuzlah akwar la. Yaw, ara Gazlavay ma jɛnndar ɲga ka kɛne. Ma jɛnndar ɲga njej a na, ara mewulkey ɲga ndaw-magɛɗan ba, ama ara mepɛsey-mey ɲga Gazlavay ma vɛlndar gɛɗan.

¹³⁻¹⁴ Sɛrmara mey masa ala ma wuzlalamakwara daa leeter ala hay na, mey mabadakaya da hwaɗ a daa ba, ka gwamara ɲga cɛndamara mey a maaya maaya. Ama haa wure keɗe na, akwar ma cɛndamara mey a tabiya daa ba aran. Yaw, ya wulkam maaya na, ka cɛndamara mey keɗe maaya maaya. Ya wudam ka cɛndamara ta pas masa Bay Mahura Yesu ma da vɛhwa na, kaa sɛmam la da ray ala, anda ala ma daa sɛmam da ray akwar may.

¹⁵⁻¹⁶ Fara fara, ya sɛra, ka cɛndamara mey aɗaw la. Anda keɗe, ya ta wuɗey la ɲga daw fa akwar a Kwarinti, fa dɛba ha, ya daw a Masadɛwan. Anja ya da vɛhwa da Masadɛwan na, ta fa akwar saya, amba ka jɛnmaya ɲga daw aa hwayak ɲga *Jude. Anda keɗe, da masa yah ma daw ɲga dey cew la na, ya jɛnkwar la dey cew. Ama ya ta hɛtey har ɲga daw fa akwar daa saba.

¹⁷ Yah ma wuɗey ɲga daw fa akwar a saba na, ɲga maaya daw? Kay, ɲga maaya ba. Maja da yah, Pawl, ya ta wulkey la ɲga key cek na, ara anda ndɛhay da bɛla keɗe ma wulkam ba. Yah na, ndaw ma wulkey cew cew ma lɛvey: «Ahaw, ya ka cek keɗe la,» fa dɛba ha, «Kay, ya ka saba» na, kɛne ba.

¹⁸ Gazlavay ta ray anɲa a sɛra mey masa yah ma kadakwara na, ara mey cew cew ba.

¹⁹ Maja Yesu *Kɛriste, Bɛzey ɲga Gazlavay, masa yah Pawl, Silas leɲ Timawte ma wuzmakwar mey da ray a na, aa guzley mey cew cew ba, aa guzley mandaw mandaw na, mey masa fara fara.

²⁰ Ara ta fa Yesu, Gazlavay ma lɛvey «Ahaw», a da kata cek hay tabiya masa aa ma lɛvey. Ara maja Yesu a, alɛkwa fa lɛvkwa «*Amen» ɲga hɛlma Bay Gazlavay.

²¹ Asaya, ara Gazlavay ma vɛlndakwar gɛɗan amba ya njakwa daa mecɛmey-ray ɲga ndɛhay ɲga Kɛriste. Ara anɲa ma walandakwar.

²² Ta slɛrdɛrwa Mesɛfney anɲa la a ray alɛkwa. Mesɛfney anɲa ha, ara anda cek matɛhkaya fa danɲay alɛkwa ɲga

wuzey aləkwa na, ndəhay aŋga hay, amba a vəlndakwar cek hay maaya mekele masa aa ma badata ŋgada aləkwa.

²³ Wure keɗe ya fa ləvey fa mey ŋga Gazlavay, da ya mbərzley na, Gazlavay ŋga kəɗya. Yah ma vəhey fa akwar a Kwarinti daa saba na, ara maja ya wudɗey ŋga sərdakwar banay saba.

²⁴ Sləra ala na, ara ŋga təkmaɗar ɗay ŋga təbey mey ŋga Yesu daw? Kay! Kəne ba, maja akwar fa təbmara mey ŋga Yesu Kəriste maaya maaya, akwar fa mbəkdamara daa ba. Cek masa ala ma wudam fa akwar na, ara ŋga key sləra daa slam a bama, amba kaa səmam.

2

¹ Da ray ŋgene, ya wulkey ŋga vəhey fa akwar saba na, maja ka da wulkam kalah saya.

² Yaw, da ka da wulkam kalah maja yah ma daw fetede na, yah may, ya daa səmey na, kwara? Kwa ndaw pal ma daa səmdaya daa ba, maja akwar ta ray akwar faa səmam daa ba may.

³ Maja ŋgene, ya ta wuzlalakwar leeter mekele la, maja yah ma daw fa akwar daa saba ha. Anja da yah ma daw la na, ya fa daa səmey da ray akwar daa ba. Kaa anja ma daa səmdaya na, akwar, ba diya? Ta ŋgene he cəpa na, ya fa pakwar ŋga ndəhay adaw hay cəŋga. Ya səra fara fara da ya faa səmey na, akwar may ka daa səmam.

⁴ Daa masa ya fa wuzlalakwara leeter e na, yah ta matəway daa dey, mevel fa təɗya, mewulkey fa da kəɗya. Ya wuzlalakwara na, amba ka cam mevel ba, ama amba ka səmara ya fa wudkwar kalah cəŋga.

Mey da ray ndaw daha ma key mebərey

⁵ Məlma adaw hay, da ndaw da wuzlah akwar ta key cek malamba la na, a ka cek aha ŋgada yah ba, ama ŋgada akwar tabiya may. Da ta membərzley da hwaɗ a daa ba na, a ka cek aha ŋgada har-gədan ŋga ndəhay da wuzlah akwar.

⁶ Ndaw aha na, ndəhay ga ta kətmara la, ta mbəɗmar ray la. Ama wure keɗe na, cay dəba.

⁷ Maja ŋgene, si ka mbəkdamara mebərey aŋga, dəkmar mevel, da daa ba na, mevel aŋga a da təɗey, mewulkey a da kəɗa.

⁸ Anda keɗe, ya faa cəɗɗakwar, kamar cek amba a səra, akwar fa wudmara cəŋga.

⁹ Yah ma wuzlalakwara leeter heyey na, amba ya sɛra da akwar fa tɛbmara mey masa yah ma kadakwara heyey tabiya kwa. Ahaw, akwar fa tɛbmara mey adaw maja akwar ma kɛtmara ndaw aha. Wure keɛɛ, si ka mbɛkdamara mebɛrey aɲga.

¹⁰ Yaw, da akwar ma mbɛkdamara mebɛrey ɲga ndaw la na, yah may, ya mbɛkdara la. Anda melɛvey, da ndaw ta kaya cek maaya ba la na, cay gway, ya mbɛkdara mebɛrey aɲga. Ya mbɛkdara mebɛrey aɲga fa mey ɲga *Kɛriste na, maja akwar.

¹¹ Ya mbɛkdara mebɛrey aɲga na, amba *Satan, bay-malula, a hɛtey gɛɗan da ray alɛkwa saba. Ya sɛrkwa bay-malula ha na, aɲga ta wewer kalah.

Pawl daa berney ɲga Tɛrwas

¹² Yah Pawl, ya slɛkɛy daa hwayak ɲga Azi, ta', ya daw aa berney ɲga Tɛrwas ɲga wuzey *Mey-maaya-mawiya da ray *Kɛriste. Fetede na, ya nɛka Yesu Bay Mahura ta diyawa cɛved maaya maaya ɲga wuzey mey aɲga cay.

¹³ Ama mevel adaw ta tɛɛy sem maja yah ma hɛtar mɛlma alɛkwa Tit fetede daa ba. Da ray ɲgene, ya ta mbɛkdatɛrwa ndɛhay da Tɛrwas a sem, ta', ya daw aa hwayak ɲga Masadɛwan.

¹⁴ Ama ta ɲgene he cɛpa na, hɛlmakwa Gazlavay. Ara aɲga ma njadandakwar macɛmkaya ta Kɛriste. A lɛgdandar a wuzlah ndɛhay aɲga hay ɲga wuzdatara a ndɛhay, Kɛriste na, fa key bay-gula da ray masa-gɛra aɲga hay. Fa slɛrdandar aa wura aa wura ɲga wuzey mey da ray Yesu Kɛriste amba ndɛhay a sɛrmara Yesu a. Mesɛrey Yesu na, aɲga anda cek mezey maaya, ma zey aa wura aa wura cɛpa.

¹⁵ Ahaw, ala na, anda cek mezey maaya masa Kɛriste ma vɛldara a Gazlavay. Cek mezey maaya ha na, ara ɲgada ndɛhay tabiya maja ala fa wuzdamara mey ɲga Kɛriste ɲgada ndɛhay masa Gazlavay ma da lɛhdata daa mebɛrey lej ɲgada ndɛhay ma daa zɛɛam.

¹⁶ ɲgada ndɛhay masa Gazlavay ma da lɛhdata ɲgene na, ala ma tɛram sem anda cek mezey maaya. Anda keɛɛ, a tɛbmara mey ala la, asaya, a hɛtam heter mendɛvey ba la. Yaw, ɲgada ndɛhay masa faa zɛɛam na, ala anda cek mamɛckaya ma zafatar. Anda keɛɛ, mezey a faa zɛɛdata. Kaa ta gɛɗan ala daada na, ya gwamara ɲga key cek anda keɛɛ daw?

2:9 2.9 7.15; 10.6 **2:11 2.11** 1Pi 5.8 **2:12 2.12** 1Kwr 16.9 **2:13 2.13** 1Tes 3.1; **Tit:** 2Kwr 7.6, 13-14; 8.6, 16, 23; 12.18; Gal 2.1, 3; 2Tm 4.10; Tit 1.4; **Masadɛwan:** 7.5; SNM 20.1 **2:15 2.15** 1Kwr 1.18 **2:16 2.16** ya gwamara ɲga key cek daw?: 3.5-6

¹⁷ Ndəhay ga fa wuzam mey nga Gazlavay amba a hətam dala anda ndəhay ma ka filaw hay. Ala na, anda ata ba. Ara Gazlavay ma slərdandar nga key sləra anğa. Ya wuzdamara mey nga Gazlavay ta mevel pal fa mey anğa, ta gədanj nga Kəriste.

3

Mey da ray sləra nga Pawl daa Mejəwey-mey Mawiya

¹ Da ray mey a keđe na, ndəhay da wuzlah akwar a da ləvam, ala fa zlapam saya daw? Kay, kəne ba! Yaw, akwar fa wufam amba ya wuzlalamakwar leeter nga wuzey ala na, ndəhay meslərey nga Yesu daw? Asaya, amba ndəhay mekele a sərmara ala ndəhay meslərey nga Yesu na, ala fa wufam ka wuzlalamandar leeter da ray a daa ba. Ndəhay mekele hay na, fa wufam leeter hay anda nğene, ama ala na, anda ata ba.

² Aa slam a nğa leeter e na, ara akwar ray akwar. Akwar anda leeter da har ala, mawuzlalakaya daa mevel ala amba kwa waawa a gwa nğa jangə, a səra.

³ Ahaw fara, akwar na, anda leeter masa *Kəriste ma wuzlala, masa aa ma slərdərwa ta fa ala. Ta wuzlala leeter e ta har daa ba, ama a wuzlala ta fa *Mesəfney nga Gazlavay, Gazlavay ndaw masa anğa daha ta dey nğa sərmataw. Asaya, leeter e mawuzlalakaya fa beeler * ba, ama mawuzlalakaya daa mevel nğa ndəhay.

⁴ Ala ma ləvam anda keđe na, maja ala fa pamara Gazlavay nğa ndaw ala fara fara ta fa Kəriste.

⁵ Ala ta ray ala na, ya ta wusmara nğa ka sləra ha daa ba, ama ara Gazlavay ma vəlndar gədanj nğa ka.

⁶ Fara fara, ara anğa ma vəlndar gədanj nğa ka sləra ha nğa wuzdamatara *Mejəwey-mey Mawiya masa Gazlavay ma jəwa ta ata nğada ndəhay. Mejəwey-mey Mawiya ha na, ara anda kwakwas mawuzlalakaya zleezle heyey saba, ama ara meney ray nğada Mesəfney nğa Gazlavay. Nəka, kwakwas mawuzlalakaya zleezle na, aa zədfey ndaw. Ama Mesəfney nğa Gazlavay na, a vəley heter mendəvey ba nğada ndaw.

⁷ Zleezle *mewey hay kuraw daa *kwakwas nğa Mawiz na, mawuzlalakaya fa beeler. Daa nğene, Gazlavay fa

2:17 2.17 4.2; Fəl 1.15-17; 1Tes 2.3, 5, 10; 1Pi 4.11 **3:1 3.1** 5.12; 10.12; SNM 18.27 **3:2 3.2** 1Kwr 9.1-2 * **3:3 3.3** beeler: Pawl a wulkey a ray mewey hay kuraw nğa Gazlavay mawuzlalakaya fa beeler nğada Mawiz. (Nəka Mab 24.12.) Jeremey ta ləvey la mewey mawiya na, mawuzlalakaya daa mevel nğa ndəhay. (Nəka Jer 31.33.) **3:3 3.3** Mab 24.12; Jer 31.33; Ez 36.26 **3:5 3.5** 2.16; Rm 15.18 **3:6 3.6** Janj 6.36; Rm 7.5-6; 8.2, 6, 10; 1Kwr 11.25

wuzda mewedey an̄ga a ndəhay. Yaw, mewedey a ta wadawa la a ray *Mawiz ara mey ba, haa *Israyel hay a gwamara nga nəkmarā Mawiz a saba maja a latar dey. Ama mewedey a ta n̄jey ga daa ba. Fara fara, kwakwas nga Mawiz na, aa zədey ndaw. Ama fa wuzdərwa mewedey nga Gazlavay a ndəhay cənga.

⁸ Kaa sləra nga Mesəfney nga Gazlavay a wuzwa mewedey nga Gazlavay ma fəna kwakwas nga Mawiz ba kwara?

⁹ Nəka, kwakwas a, a katar sariya ngaa zəddata. Anja da kwakwas ma key sariya ha ta wuzdərwa mewedey nga Gazlavay la na, kaa Mejəwey-mey Mawiya a fəna ba kwara? Ara ta fa vəda Gazlavay ma pandakwar nga ndəhay maaya fa mey an̄ga, ba diya?

¹⁰ Anda kefe, mewedey ma sawa ta fa kwakwas zleezle na, ata letək ta mewedey masa mawiya kefe ba. Mewedey masa mawiya a fəna ta gədaŋ, a tərda masa magurma nga cek nga tede.

¹¹ Ahaw, kwakwas masa zleezle na, a n̄jey nekədey gway, ama ta wuzdərwa mewedey nga Gazlavay la. Yaw, anja da kwakwas a ŋgene a gwa nga wuzdərwa mewedey nga Gazlavay na, kaa Mejəwey-mey Mawiya, ma da n̄jey nga sərmataw, a wuzdərwa mewedey nga Gazlavay ma fəna kwakwas a daa ba daw?

¹² Maja ŋgene, daa meesərkey ala na, ala faa guzlam ta mandərzay daa dey daa ba, maja ya sərmara mey a, ara mey fara fara.

¹³ Zleezle Mawiz ta sərta dey an̄ga la ta zana maja a nəka mewedey nga Gazlavay da ray a fa ndəvey. Anda kefe, a wufey Israyel hay nga sərmara mewedey a fa ndəvey ba. Ala na, ya bam cek anda an̄ga ba.

¹⁴ Israyel hay a na, a gəmam nga cəndamara ba. Kwa haa wure kefe, ray ata maŋgərdakaya cənga. Ahaw, da fa jaŋgam mey daa dərewel hay nga *Mejəwey-mey Magurma na, a cəndamara ba, anda dey ata masərtakaya ta zana cənga. Ndaw masa ta zana masərtakaya daa dey na, si Kəriste ma gwa nga la zana masərtakaya ha amba a cənda mey a.

¹⁵ Haa wure kefe, da fa jaŋgam daa dərewel hay nga Mawiz na, a cəndamara ba cənga, anda leŋgesl ata masərtakaya ta zana.

¹⁶ Ama da ndaw ta mbədda men̄jey an̄ga sem, a sawa asi Bay Mahura na, zana ma sərta dey an̄ga ŋgene ta ley sem.

¹⁷ A key anda keɗe maja Bay Mahura na, Mesəfney nga Gazlavay aa da ray a. Nəka, da Mesəfney nga Gazlavay aa da ray kwa waawa na, ndaw aha fa da njeɗ beke nga kwakwas nga Mawiz daa saba.

¹⁸ Anda keɗe, aləkwa tabiya ma təba mey nga Yesu na, dey aləkwa masərtakaya ta zana daa saba. Aləkwa fa wuzdakurwa mewedeɗey nga Bay Mahura Yesu amba ndəhay a hətmar. Ta fa mewedeɗey a na, aləkwa ma tərkwə sem letek ta anɗa. Yaw, mewedeɗey a na, fa sawa ta gədan ta gədan a ray aləkwa. Keɗe he ara sləra masa Bay Mahura ma ka ta fa Mesəfney nga Gazlavay.

4

Pawl a wuzey mey nga Gazlavay

¹ Gazlavay ta sərɗandar dey-ceceh la. Ta', a vəlndar sləra masa ala fa kamara keɗe. Ara maja nɗene, ala fa məcmara vaw daa ba, kwa ala fa da mbəkdamara sləra ha daa ba.

² Ala na, fa da ndəkwdamara ray ala aa cek hay ma ka hwaray masa ndəhay maɓadamata ta bey na, daa ba. Ala fa səpam cəved nga fəceɗ ndəhay daa ba, asaya, ala fa jahadamarə mey nga Gazlavay ta mey hay membərzley na, daa ba. Ama ala na, fa kam sləra amba ndəhay a sərmara mey masa fara fara maaya maaya. Anda keɗe, ta fa sləra ala masa Gazlavay ma səra anɗa maaya na, ya wuɗam ndəhay tabiya nga pamandar nga ndəhay ma ka sləra ta cəved e.

³ Ndəhay mekele fa cəndamara *Mey-maaya-mawiya masa ala ma wuzdamara na, daa ba. Ata anda dey ata masərtakaya ta zana. Ndəhay a nɗene na, ara ndəhay daa cəved maa zəɗey ndaw.

⁴ Ndəhay a, a cəndamara Mey-maaya-mawiya ba na, maja *Satan, bay-malula, ma wa bəla keɗe, a tərdata ndəhay a nga ndəhay manjar lenɗesl, a njam daa ləvan. Anda keɗe, ndəhay a fa da hətmar mewedeɗey nga Mey-maaya-mawiya daa ba. Mewedeɗey a na, fa wuzdərwa gədan nga *Kəriste. Kəriste he na, a lawa Gazlavay kərad!

⁵ Daa sləra ala nga mewuzey mey nga Gazlavay na, yaa guzlam da ray ala, ray ala ba, ama yaa guzlam na, da ray Yesu Kəriste. Anɗa na, Bay Mahura da ray ndəhay tabiya. Ala na, ndəhay ma ka sləra nɗada akwar maja Yesu.

⁶ Daa masa Gazlavay ma ləma bəla na, a ləvey: «Anja slam-ləvan nga weɗey.» Yaw, ara Gazlavay a nɗene ma handərwa mewedeɗey anɗa a ray ala may. A ka anda keɗe

3:17 3.17 Jan 8.32, 36; Rm 8.2; Gal 5.1, 13 **3:18 3.18** 4.6; 1Kwr 2.7 **4:1 4.1** 3.4, 6 **4:2 4.2** 2.17; 6.4 **4:3 4.3** 1Kwr 1.18 **4:4 4.4** bay-malula, ma wa bəla keɗe: Jan 12.31; Ef 2.2; **a lawa Gazlavay kərad!:** Kwa 1.15; Heb 1.3 **4:5 4.5** 1.24

amba ya hətmar mewedey a fa wedey fa dey nga Kəriste. Ara maja ngene, ala fa wuzdamara Mey-maaya-mawiya nga Kəriste ngada ndəhay.

⁷ Ala na, ndəhay magədan gway, gədan fa ala daa ba, anda mangayak nga hahay. Ama mewedey a na, aa da ray ala, anğa maaya kalah. Gazlavay a ka anda keđe nga wuzwa gədan mahura nga ka sləra ha na, a sawa ta fa vəda, ba na, ta fa ala ba.

⁸ Ala ta səram banay la mekele mekele, ama banay a ta fəndar ray daa ba. Ala ta zluram la, ama ala ta məcmara vaw daa ba.

⁹ Masa-gəra ala hay fa sərdamandar banay, ama Gazlavay aa ta ala cənga. Fa bədslamandar a hwayak, ama ala ma məcam daa ba.

¹⁰ Ndəhay fa səpmandar nga kədey vagay anda ata ma kədmara Yesu heyey. Ama ala ta dey cənga, amba ndəhay a sərmara Yesu may, anğa ta dey.

¹¹ Ahaw, daa menjey ala na, ndəhay fa səpmandar nga kədey vagay maja ala fa səpmara cəvedə nga Yesu. Kwa ala ndəhay magədan ma da məcam na, ama ala ta dey cənga. Anda keđe, ndəhay a sərmara Yesu may, anğa ta dey.

¹² Da ray ngene, ala fa səram banay haa kasl fa meməcey maja Mey-maaya-mawiya, amba ka hətam heter mendəvey ba.

¹³ Mawuzlalakaya daa dərewel nga Gazlavay, a ləvey: «Yah ma pa Gazlavay nga ndaw adaw fara fara la, ara maja ngene, yah ma wuzda mey anğa.» Ala na, kəne may, ala fa pamara Gazlavay nga ndaw ala fara fara. Ara maja ngene, ala fa wuzdamara mey a, a ndəhay.

¹⁴ Ya sərmara ara Gazlavay ma sləkfdədərwa Bay Mahura Yesu daa meməcey, yaw, a sləkfdəndərwa la may amba ya njakwa bama ta Yesu a. A da handandakwar, aləkwa cəpa, fa mey nga Yesu a.

¹⁵ Sləra masa ala ma kamara, ta banay masa ala ma bəsmara keđe na, ara maja akwar, amba maaya nga Gazlavay a sawa a ray ndəhay ma fəna ma fəna. Anda keđe, ndəhay ga a da kamar suse a Gazlavay, a həlmamara.

Pawl a mbəkda sləra nga Gazlavay ba na, maja me?

¹⁶ Ara maja ngene, ala fa da mbəkdamara sləra ha daa ba səlak. Kwa gədan ala pəreh, ama daa mevel ala na, ala fa hətam gədan nga Gazlavay a dey a saya mandaw mandaw.

¹⁷ Nəka, banay masa ala ma sərmara kaa na, a ndəvey la pas pal. Yaw, ya hətam mewedey la a ray ala maja banay a. Mewedey a na, a fənta cek hay cəpa, a da njeý nga sərmataw. Da masa mewedey a, aa da ray ala na, banay masa ala ma sərmara keđe na, ya wulkam ara cek mecəhe gway.

¹⁸ Mewulkey ala na, aa da ray cek hay da bəla keđe ba, ama ya wulkam da ray cek nga Gazlavay masa ndaw ma gwa nga hətar ta dey ba. Ya sərkwa cek hay masa aləkwa ma hətmatakwa ta dey da bəla keđe na, a da njam nekədey gway, ama cek hay ma hətam ta dey ba na, a njam nga sərmataw.

5

¹ Da bəla keđe, vaw aləkwa fa da njeý ga daa ba. Vaw aləkwa na, anğa anda way-mekərcey ma da pərey dey pal. Ama ya sərkwa Gazlavay a vəlndakwar vaw mekele mawiya la da gazlavay da vad, anğa anda way ma da njeý nga sərmataw. Way a na, ara ndaw-magədan ma ləma ba, ama ara Gazlavay ma ləma.

² Nəka, wure keđe da bəla kaa na, aləkwa fa təkwa. Fara fara, aləkwa fa wudkwa amba Gazlavay a vəldandakwara way masa da gazlavay da vad a.

³ Anda keđe, ta pas masa aləkwa ma mbəzkwa la aa way a na, mesəfney aləkwa fa da njeý taava anğa manjar vaw na, daa ba.

⁴ Daa masa aləkwa ta vaw aləkwa anda way-mekərcey da bəla keđe na, ya fa njarakwa anda ndaw meley cek maadaw a. Ta ngene he cəpa na, aləkwa fa wudkwa nga cəkwa vaw aləkwa masa ma da məcey keđe anda ndaw mecəkwey zana fa vaw na, daa ba. Ama ya wudkwa na, Gazlavay a vəlndakwar vaw mekele masa ma da njeý nga sərmataw anda ndaw mekəzley zana mawiya. Anda keđe, vaw masa ma da njeý nga sərmataw, a njeý aa slam a nga vaw masa ma da məcey.

⁵ Yaw, ara Gazlavay ma diyndakwar amba ya hətkwa vaw mawiya kəne. Ta slərdərwa Mesəfney anğa la teesəd a ray aləkwa nga wuzwa a da vəldandakwara vaw mawiya maaya masa anğa ma bəda ngada aləkwa.

⁶ Ara maja ngene, aləkwa fa kərzakwa mevel mandaw mandaw daa menjeý aləkwa da bəla. Ya sərkwa daa masa aləkwa ta vaw aləkwa da bəla keđe na, aləkwa dərəj ta Yesu Bay Mahura.

⁷ Anda meløvey na, ya ta høkwar Yesu a ta dey aløkwa daa ba aran, ama aløkwa fa pakwa nga ndaw aløkwa fara fara cəŋga.

⁸ Ahaw, aløkwa fa kərzakwa mevel mandaw mandaw daa menjey aløkwa da bəla. Ama ya wudkwa na, ya mbəkɗakwa vaw aløkwa da bəla keɗe amba ya nakwa, ya njakwa ta Bay Mahura bama.

⁹ Yaw, maja ŋgene kwa masa aløkwa ta vaw aløkwa da bəla keɗe aran, da daa ba, kwa masa aløkwa ma wuskwa cay fa vəɗa na, cek masa aløkwa ma wudkwa kalah na, ara nga kar cek masa ma mbafar.

¹⁰ Maja aløkwa cəpa na, ya wuskwa la fa mey nga *Kəriste amba a kandakwar sariya. A da nəkta cek hay maaya ta maaya ba masa aløkwa ma kakwa da bəla. Yaw, a da pəlar mawurbay a ndaw a, a ndaw a, təɗe fa sləra anga.

Mey da ray Yesu ma cəmtar ɗay nga ndəhay ta Gazlavay

¹¹ Ya sərkwā, Bay Mahura Yesu a kandakwar sariya la. Maja ŋgene, ala fa namar ray ta mevel ala cəpa. Anda keɗe, si ya səpam cəɗeɗ nga jənmata ndəhay nga sərey mey masa fara fara. Gazlavay na, a sərndar maaya maaya. Asaya, ya wulkey na, akwar may, ka sərmaya fara fara.

¹² Mey tabiya masa ala maa guzɗamara keɗe na, ndəhay da wuzlah akwar a wulkam, a key ya zlapam cəŋga daw? Kay, kəne ba. Ama ya wuzmakwar na, mey da ray ala amba kaa səmam da ray sləra ala. Fa dəba ha, da ndəhay siya fa slam mey a ray ala na, ka gwamara nga lacafamandar a ray, ka kam sede da ray ala. Ndəhay ma slam mey a ray ala ha na, ara ndəhay ma zlapam fa sləra ata da bəla keɗe gway, a wulkam fa cek hay masa daa mevel ata ba.

¹³ Ndəhay siya a wulkam ala na, ndəhay manjar ləŋgesl. Yaw, da ala ndəhay manjar ləŋgesl na, ara maja ala ma vəɗdamara ray ala ŋgada Gazlavay. Ama da ala ndəhay ta ləŋgesl na, ara nga jənmakwar.

¹⁴ Fara fara, sləra masa ala ma kamara na, ya kamara maja *Kəriste fa wudndakwar kalah. Aløkwa fa sərkwā, anga na, ta məcey sem aa slam a nga ndəhay tabiya. Anda meløvey, ndəhay tabiya ta məcam sem ta anga may.

¹⁵ Fara fara, Yesu a məcey aa slam a nga ndəhay tabiya na, amba ndəhay da bəla a njam anda ata ma wudam saba, ama amba a njam nga səpey cəɗeɗ nga Yesu. A səpmara

5:7 5.7 1Kwr 13.12; 1Pi 1.8-9 **5:8 5.8** Fəl 1.23 **5:9 5.9** Kwa 1.10; 1Tes 4.1
5:10 5.10 11.15; Iz 2.12; Dan 7.9-10; 12.2; SNM 17.31; Rm 2.6; 1Kwr 3.13-15; 4.5;
 Fəl 3.19; 2Tes 1.7-10 **5:11 5.11** 4.2; 6.4; 1Kwr 9.22 **5:12 5.12** 1.14; 3.1 **5:14**
5.14 Jan 17.23; Rm 8.35; Gal 2.20; Ef 3.19; 5.2, 25; 1Jn 3.16

cøved nga Yesu a na, maja anga ma mæcey, ta anga ma slækdawa daa memæcey maja ata.

¹⁶ Ara maja kefe, ya særmata ndøhay ta fa cek ata hay da bæla saba. Ahaw, fara fara zleezle na, ya særmara Kæriste na, anda ndøhay magødan ma wulkam, ama wure kefe, ala fa wulkam da ray a køne saba.

¹⁷ Ndaw masa macæmkaya ta Kæriste na, ta tørey sem nga ndaw mawiya. Menjey anga masa zleezle ta mbødey sem, ta tørey sem mawiya.

¹⁸ Ara Gazlavay ma ka cek aha tabiya. Ara Gazlavay ma cæmdakwar ta anga ray anga ta fa memæcey nga Kæriste. Wure kefe, Gazlavay ma vøldar sløra la. Sløra ha na, ara nga wuzey mey ngada ndøhay mekele masa Gazlavay ma wufey nga cømey ta ata.

¹⁹ Anda meløvey, Gazlavay a slørdørwa Kæriste na, maja a wufey nga cømey ta ndøhay tabiya. A sløfa mebørey ata saba. Anda kefe, a slørdandar na, nga wuzey mey a ndøhay masa Gazlavay ma wufey nga cømey ta ata ha.

²⁰ Ala na, ndøhay meslørey nga Kæriste. Ara anda Gazlavay ta ray anga ma zølkwar maja ara anga ma balandar mey. Anda kefe, ya kamakwar ambahw ta mezøley nga Kæriste, samawa asi har nga Gazlavay, amba ka cømam ta anga.

²¹ Yesu Kæriste na, ta key mebørey daa ba sølak. Ama Gazlavay ta pa sem nga ndaw ta mebørey aa slam a nga aløkwa, amba da aløkwa macæmkaya ta Kæriste he na, Gazlavay a pakwar nga ndøhay maaya fa mey anga.

6

Mey da ray sløra nga ndaw-meslørey nga Yesu

¹ Wure kefe, Gazlavay aa ta ala daa sløra masa ala ma kamara cøpa. Gazlavay ma kakwar maaya la. Anda kefe, ala fa kamakwar ambahw, ka da tørdamara maaya nga Gazlavay a nga cek nga tede ba.

² Wulkam fa mey nga Gazlavay maa guzley zleezle, ma løvey:

«Ta pas masa amba ya kakwar maaya na,
ya ta jøkfwakwar slømay la.

Ta pas masa amba ya løhdakwar na,
ya ta jønkwakwar la.»

5:15 5.15 Rm 6.3-4; 7.4; 14.7-9 **5:17 5.17** Iz 43.19; Rm 6.4; Gal 6.15; Ef 4.24;
CWJ 21.5 **5:18 5.18** Rm 5.10 **5:19 5.19** Rm 3.24-26; Kwa 1.20 **5:20 5.20**
Mt 10.40; Iz 52.7 **5:21 5.21** Jan 8.46; Rm 8.3; 1Kwr 1.30; Gal 3.13; Heb 4.15
6:1 6.1 Rm 5.2; 1Kwr 15.10

Nəkmara dəba taw, wure keɗe pas a ta wuswa cay amba Gazlavay a kakwar maaya, fara fara pas a ta wuswa cay amba a ləhdakwar.

³ Ala fa wudam nga key cek kwa wura wura nga təkta ndəhay nga təbmara mey nga Gazlavay na, daa ba, maja ya wudam ndəhay a slam mey a ray sləra ala ba.

⁴ Ama daa sləra ala ha cəpa na, ala fa wuzdamara, ala na, ndəhay ma ka sləra nga Gazlavay fara fara.

Kwa ala daa banay,

kwa fa pamandar dey a ray daa ba,

kwa cek fa fənnar ray,

ala fa bəsmara gway.

⁵ Nəka, ta kəɗmandar la,

ta handamandar la aa fərsəne,

asaya, ta həldamata ndəhay la nga key həma a ray ala.

Ahaw, sləra ta fənnar ray la haa ya gwamara nga ney ba,

asaya, ya gwamara nga hətey cek mezəmey ba.

⁶ Fara fara, ala na, fa kam cek ma mbafar a Gazlavay,

ya sərmara mey nga Gazlavay fara fara,

ala ndəhay meekweɗ-mey, mevel ala maaya,

*Mesəfney nga Gazlavay aa da ray ala.

Asaya, ya wudmata ndəhay ta mevel pal.

⁷ Ala fa wuzdamara mey masa fara fara a ndəhay,

maja Gazlavay fa vəlndar gədaŋ.

Yaw, ta fa cek hay a keɗe tabiya na, ala fa wuzdamara,

ala na, ndəhay ma ka sləra nga Gazlavay fara fara.

Cek ala ma ka vərəm ta masa-gəra ala hay,

ta cek ala ma jəɗndar fa masa-gəra ala hay na,

ara mekey cek ta cəved e keɗe fa mey nga Gazlavay.

⁸ Ndəhay siya faa həmdamandar,

siya hay may, fa rəsmandar.

Ndəhay siya saya fa namandar ray,

siya hay may, fa cəɗmandar.

Ala na, ndəhay maa guzlam mey masa fara fara,

ama ta ŋgene he cəpa, a padamandar

ŋga ndəhay membərzley.

⁹ A ləvam saya, ala na, ndaw ma sərndar daa ba,

ama anja ndəhay tabiya a sərmandar jak, ba diya?

Ndəhay a wulkam na,

ala fa da njam ga da bəla daa ba,

ama nəkmara taw, ala daha ta dey cəŋga.

Ta sərdamandar banay la ga,

ama ta kəɗmandar vagay daa ba.

¹⁰ Ata fa kamandar cek ma ka matəway aa dey,
ama ala mandaw mandaw daa meesəmey cəŋga.

Ndəhay a nəkmandar na, ala anda masa-viya hay,
ama ala fa jənam ndəhay ga
ŋga hətey menjey maaya fa Gazlavay.

Ndaw a nəkndar anda cek ala daa ba,
ama fara fara cek ma həcndar na, daa ba səlak.

¹¹ Akwar ndəhay da Kwarinti, ala na, ma kadamakwara
mey daa mevel ala la cəpa, kwa ya ta cam mey fa akwar
daa ba səlak.

¹² Ala na, ya wudmakwar kalah, ama ma wudmandar ba
na, akwar jak.

¹³ Ehe, ya faa guzlkwar anda akwar bəz adaw hay,
wudmandar anda ala ma wudmakwar may, wudmandar
ma fəna ma fəna ta mevel pal.

Mewedey ta ləvaŋ na, a cəmam daw?

¹⁴ Ya fa ləvkwar fara fara, ndəhay ma təba mey ŋga Yesu
ba na, ka da cəmam dəy ta ata ba. Cek maaya ta cek maaya
ba a cəmam aa slam a daw? Mewedey ta ləvaŋ na, a cəmam
aa slam a daw?

¹⁵ Ata *Kəriste ta *Satan, bay-malula na, a cəmam dəy
daw? Yaw, ndaw ma təba mey ŋga Yesu ta ndaw ma təba
mey ŋga Yesu ba na, cəved ata letək daw?

¹⁶ Asaya, kuley hay na, slam ata daa *Way-mekey-
kwakwas ŋga Gazlavay daha daw? Aləkwa na, anda Way-
mekey-kwakwas ŋga Gazlavay, Gazlavay, ndaw masa aŋga
daha ta dey ŋga sərmataw. Ara anda aa ma ləvey: «Yah,
Gazlavay, ya da njeŋ ta ndəhay adaw hay. Yah na, Gazlavay
ata, ata may, ndəhay adaw hay.»

¹⁷ Ara maja ŋgene, Bay Gazlavay a maa guzltar a ndəhay
aŋga hay, a ləvtar:

«Wudkam ta ndəhay malamba hay,
ka da njam daa slam a saba.

Njam manjar mebərey,

anda keđe, yah na, ya təkwar la ŋga ndəhay adaw
hay.

¹⁸ Yah na, Papakw akwar,

akwar may, bəz adaw hay, mezəle hay ta maŋgusa hay.

Ara Bay Gazlavay masa ta gədan

ma fənta cek hay cəpa maa guzley anda keđe.»

6:10 6.10 matəway: 7.4; Rm 5.3; 12.12; **meesəmey:** 8.9; Fəl 2.17; 4.12-13; 1Tes 1.6
6:13 6.13 1Kwr 4.14 **6:14 6.14-16** 1Kwr 6.9-13; 10.21; Ef 5.5-11 **6:16**
6.16 Lev 26.12; Jer 32.38; Ez 37.27; 1Kwr 3.16 **6:17 6.17** Iz 52.11; CWJ 18.4
6:18 6.18 2Sam 7.14; Iz 43.6; Am 4.13; CWJ 11.17

7

¹ Ahaw, jam adaw hay, mey hay tabiya masa Gazlavay ma løyey keđe na, a kandakwara la anda aa ma løyey. Anda keđe, si ya mbəkđakwa cek hay tabiya masa ma zləba, kwa vaw aləkwa, kwa mesəfney aləkwa *. Si ya nakwar ray a Gazlavay, anda keđe, ya da njakwa maaya fa mey anğa.

Pawl aa səmey da ray Kwarinti hay

² Wudmandar maaya maaya dəba. Ala ta kam cek maaya ba ngada ndaw pal dasi akwar na, daa ba. Ala ma nəsam ndaw daa cəvedŋga Gazlavay na, daa ba. Ala ta fəcam cek ngə ndaw pal dasi akwar na, daa ba.

³ Yaa guzley anda keđe na, a key ya mbəđkwar ray ba. Ara anda yah ma løyey, ala fa wudmakwar kalah, kwa cek fa da wunkandakwar na, daa ba sələk. Kwa da ara ngə njeý ta dey, kwa da ara ngə məceý na, aləkwa bama cəngə.

⁴ Ahaw, ya sərə na, akwar ndəhay adaw hay fara fara. Ya faa səmey da ray akwar. Yah na, ya ta sərey banay la ga, ama mevel adaw ta dəkey la, ya faa səmey ga cəngə.

⁵ Kwa daa masa ala ma wusmawa a Masadəwan feđe na, ya ta hətam cəvedŋga məskey vaw daa ba, maja banay hay mekele mekele daha. Ndəhay ta cakalafamandar mey la, asaya, ray ala ta həbey la da ray cek hay mekele mekele.

⁶ Ama Gazlavay na, ara ndaw ma dəkar mevel a ndaw masa ləngesl anğa ta mbədeý sem maja banay ma hətfar. Ara anğa ma slərdərwa Tit ngə dəkndar mevel may.

⁷ Ma dəkndar mevel e na, ara masawa ngə Tit e daada ba, ama ara mey masa anğa ma kadandara da ray akwar may. Ahaw, Tit e, a ləvndar akwar ta dəkmar mevel la may, asaya, akwar fa wudam ngə hətmaya fa dey cəngə. Akwar fa zəlam marava da ray cek maaya ba masa akwar ma kamara, asaya, akwar fa wudam ngə key gədaŋ ngə jənmaya fa masa-gəra adaw hay. Masa yah ma cənda mey a keđe na, yah daa meesəmey ara mey ba.

⁸ Leeter masa yah ma wuzlalakwara heyey na, ya sərə ta wulkadakwar la ga. Anja dey pal daha, ya da zəley marava da ray a, maja leeter e ngene ta wulkadakwar la. Ama ya fa da zəley marava da ray leeter e daa saba.

⁹ Wure keđe, ya faa səmey da ray leeter e. Yaa səmey maja leeter e ma wulkadakwar da ray malamba akwar hay daada ba, ama yaa səmey maja mewulkey akwar a

* **7:1 7.1** cek masa ma zləba mesəfney aləkwa: Ara mewulkey ngə zlepeý, ngə key maagway, da daa ba, ngə key cek hay maaya ba mekele mekele. **7:1 7.1** 1jŋ 3.3 **7:2 7.2** 6.13; 12.17 **7:3 7.3** 6.11; Fəl 1.7 **7:4 7.4** 6.10 **7:5 7.5** 2.13; 4.8 **7:6 7.6** 1.3-4; **Tit:** 2.13 **7:8 7.8** 2.4

ta mbøfdakwara menjey akwar sem. Mewulkey akwar a ŋgene a mbafar a Gazlavay. Anda kefe, leeter ala ha na, ta kakwar cek maaya ba na, daa ba sölak.

¹⁰ Anda meløvey, da ndaw fa wulkey da ray menjey aŋga maaya ba amba a mbøfda anda Gazlavay ma wudfey na, mewulkey aŋga ŋgene na, a mbøfdara menjey aŋga la. Ara anda kefe, Gazlavay ma da løhda ndaw a daa mebørey. Kwa waawa ma wulkey anda ŋgene, a zøley marava da ray a daa ba. Ama da mewulkey ŋga ndaw anda ŋga ndøhay da bøla ma mbøfdamara menjey ata ba na, ŋgene he, ara mewulkey ma hendey ndaw aa memøcey.

¹¹ Fara fara, mewulkey akwar ŋgene a mbafar a Gazlavay. Nøkmara cek masa aŋga ma ka fa akwar døba taw. Wure kefe, akwar ma mbøfdamara menjey akwar cay. Ka wudam ŋga wuzdamara, akwar na, da wuzlah ndøhay ma kam mebørey ba. Akwar ma cam mevel la da ray mebørey ŋga ndøhay da wuzlah akwar. Akwar ma zluram la. Akwar fa wudam ŋga høtmaya fa dey saya. Yaw, ka wudam ŋga key cek masa Gazlavay ma wudfey døba, ka wudam ŋga køtmara ndaw masa ma key cek maaya ba heyey. Wure kefe, daa mey a kefe, akwar fa wuzdamara kwa ta fa meeme na, akwar ta zay da mey.

¹² Ya fa løvkwar, fara fara leeter masa yah ma wuzlalakwara heyey na, ara maja ndaw ma key cek maaya ba ŋgene daada ba, asaya, ara maja ndaw masa ndaw a ma kar cek maaya ba ŋgene daada ba may. Ama ya wuzlala na, amba ya wuzdakwara fara fara fa mey ŋga Gazlavay, akwar fa wudmaya ta mevel pal.

¹³ Ara maja ŋgene, mevel ala ma døkey cay wure kefe. Ahaw, mevel ala ma døkey cay, ama yaa sømam ma føna ma føna na, maja Tit aa daa meesømey maja ray aŋga fa høbey da ray akwar tabiya fetefef daa saba.

¹⁴ Nøka, daa masa yah ma slørda Tit e fa akwar na, yah maa hømdakwar la meedey aŋga. Anda kefe, akwar ta pamaya hwaray daa ba. Mey masa ala ma løvmakwar mandaw mandaw na, ara mey masa fara fara. Anda kefe, cek masa yah maa hømdakwar fa mey ŋga Tit maja na, akwar fa wuzdamara fa mey ŋga Tit e ta fa sløra akwar, mehømey a, ara aŋga fara.

¹⁵ Daa masa Tit ma wusey fa akwar na, akwar ma tøbmara la maaya maaya, ka namar ray, ka cønmar mey. Anda kefe, daa masa aŋga fa sørfada cek masa akwar ma kamar tabiya na, a wudkwar ma føna ma føna.

16 Yah Pawl may, ya faa sɔmey da ray akwar maja akwar ndɔhay adaw hay fara fara.

8

Dala nga jɔney ndɔhay daa mecɔmey-ray nga ndɔhay nga Yesu

¹ Mɔlma adaw hay, ya wudam nga kadamakwara cek masa ndɔhay nga Yesu daa hwayak nga Masadɔwan ma kamara. Cek aha fa wuzdɔrwa na, maaya nga Gazlavay aa da ray ata.

² Ndɔhay a ta sɔram banay la, ama ata daa meesɔmey cɔnga. Ata cɔpa masa-viya hay, ama a vɔlam ta har cew cew, ta vɔlam dala la ga nga key slɔra nga Gazlavay.

³ Ya fa lɔvkwar fara fara, ata ta vɔlam dala la tɔde ta gɔdan ata, haa a fɔna gɔdan ata ha. Ara ata ta ray ata ma samawa fa ala,

⁴ a kamandar ambahw, aa cɔfdamandar amba ya vɔlmatar cɔvedɔ nga jɔnmata ndɔhay daa *mecɔmey-ray nga ndɔhay nga Yesu da *Jeruzelem may.

⁵ Nɔka, cek masa ata ma kamara na, ta fɔna masa ala ma wulkam da ray a sem. Teesed na, a vɔldamara ray ata ngada Bay Mahura, fa dɔba ha, a tɔbmara mey ala amba a kamara cek anda Gazlavay ma wudɔy.

⁶ Da fa akwar na, Tit ta zlarawa cay nga cakalarawa dala ha. Ara maja ngene, ala ma lɔvmar amba a vɔhey fa akwar saya nga ndɔvdɔrwa slɔra masa maaya ngene.

⁷ Akwar na, fa huram cek daa ba. Anda melɔvey, akwar ma tɔbmara mey nga *Kɔriste la maaya maaya, akwar fa wuzdamara *Mey-maaya-mawiya ta cɔvedɔ e. Gazlavay ta wurkwara lenjesl la nga sɔrey mey masa fara fara. Akwar ma vɔldamara ray akwar la cɔpa nga key slɔra anga, asaya, ka wudmandar kalah. Yaw, maja akwar fa huram cek daa ba kedɔ na, maaya na, ka wuzdamara akwar ta meesɔmey nga vɔley dala ha ta har cew cew.

⁸ Mɔlma adaw hay, yah maa guzley anda kedɔ na, a key ya tɔkakwar dɔy nga vɔley dala ba. Ama yaa guzlkwar da ray ndɔhay siya hay maa sɔmam nga vɔley dala, amba ka hɔtam gɔdan, ka wuzdamɔrwa mewudɔy-vaw akwar ngada ndɔhay siya hay may.

⁹ Ka sɔmara Bay alɔkwa Mahura Yesu Kɔriste na, ta kakwar maaya la. Anga na, aa daa wiya fa Bay Gazlavay da vadɔ, ama ta mbɔkdɔrwa wiya ha la, a sawa a bɔla, a tɔrey nga ndaw masa-viya, maja akwar. A tɔrey nga ndaw

masa-viya na, amba ka hɔtam wiya da gazlavay da vad may.

¹⁰ Yah maa guzley keɗe na, a key ya tɔkakwar ɗay ba. Ama ya wuɗey ka sɔrmara mewulkey aɗaw da ray mevɔley dala ha. Nga mevɔɗey ara akwar ma wulkam teesɗ nga vɔley dala. Ara akwar ma cakalamara dala ha teesɗ. Maaya na, ka ndɔvdamara mecekeley dala ha dɔba.

¹¹ Wure keɗe, kamara slɔra ha ta mevel akwar cɔpa anda akwar ma zlamara ngeeme, ndɔvdamara mecekeley dala ha la. Vɔlam dala ha na, tɔɗe ta gɔɗan akwar.

¹² Maja da ndaw a vɔley cek a Gazlavay ta meesɔmey, ta mevel anɗa cɔpa, asaya, tɔɗe ta gɔɗan anɗa na, Gazlavay a tɔba la. Ama da cek anɗa daa ba na, Gazlavay a sɔra.

¹³ Ka da wulkam a key ya sɔrdakwar banay amba ndɔhay siya a njam daa wiya na, kɔne ba. Ama ya wuɗey na, ndɔhay tabiya nga njam kal kal.

¹⁴ Wure keɗe na, cek mezɔmey fa akwar suha. Anda keɗe, anɗa maaya amba ka jɔnmata ndɔhay masa cek mezɔmey fa ata pɔreh. Yaw, ta pas masa cek mezɔmey fa akwar pɔreh, ama fa ata suha na, a jɔnmakwar may. Anda keɗe, ka da njam kal kal.

¹⁵ Mey aɗaw keɗe na, aa letek ta mey nga Gazlavay maa guzley da ray cek mezɔmey ma kɔzlwa ta da vad zleezle, a lɔvey:

«Ndɔhay masa ma hɔlmawa cek mezɔmey a ga la na,
ta katar kalah daa ba.
Ndɔhay ma hɔlmawa nekɔɗey na,
ta katar pɔreh daa ba may.»

Tit a da diyam ta mandala anɗa hay a Kwarinti

¹⁶ Ya kamar suse a Gazlavay maja Tit ta wuɗey la nga jɔnkwar anda ala may. Ta wuɗey la nga jɔnkwar ta mevel pal. Ara Gazlavay ma ka amba Tit e, a tɔba nga jɔnkwar.

¹⁷ Tit e ta tɔba la anda ala ma lɔvmar nga daw fa akwar saya. Ara maja ala ma lɔvmar daada ba, ama ara anɗa ta ray anɗa ma wuɗey nga daw fa akwar a.

¹⁸ Ya slɔram ndaw pal da wuzlah ala la nga diyam cew e. Ndaw aha na, ndɔhay daa mecɔmey-ray hay nga Yesu tabiya faa hɔmdamara kalah maja slɔra anɗa maaya daa mewuzey *Mey-maaya-mawiya.

¹⁹ Ala ma da slɔrdamara na, ara maja keɗe daada ba. Ama ara ndɔhay daa *mecɔmey-ray nga ndɔhay nga Yesu ma walamara amba ya pɔkam bama nga jɔnndar daa mecekeley dala heyey. Slɔra maaya masa ala ma kamara

keɗe na, ya kamara nga hɛslar ray a Bay Mahura, ray anɗa, asaya, nga wuzwa na, ya wuɗam nga joney ndɛhay kalah.

²⁰ Ala fa wam vaw nga kɛrzey dala masa akwar ma cakalamɛrwa ga keɗe amba ndɛhay a slam mey a ray slɛra ala ha ba.

²¹ Anda keɗe, ya wuɗam nga key slɛra maaya na, fa dey nga Bay Gazlavay daada ba, ama fa dey nga ndɛhay may.

²² Ya slɛram ndaw mekele la da wuzlah ala, asi ata Tit e saya. Ndaw a na, ala ta sanɗalamara la dey weewe daa slɛra hay masa anɗa ma kata. Anda keɗe, ya sɛrmara, anɗa ta vɛlda ray anɗa la nga key slɛra ngada Gazlavay. Wure keɗe, ta vɛlda ray anɗa la ma fɛna saya ngada akwar maja aa ma coney mey maaya da ray akwar.

²³ Tit na, ala mandaw mandaw cew e, ara ndaw masa ala fa kam slɛra cew e nga jɛnkwar. Yaw, ndɛhay cew ma diyam ta Tit e na, ara ndɛhay masa ndɛhay daa mecɛmey-ray hay nga Yesu ma slɛrdamata fa akwar. A kam slɛra ha na, amba ndɛhay a hɛslmar ray a *Kɛriste.

²⁴ Wuɗmata fa mey nga ndɛhay tabiya amba ndɛhay daa mecɛmey-ray hay ma slɛrdamata heyey a cɛndamara, asaya, amba a sɛrmara masa ala maa hɛmdamakwar heyey na, anja fara.

9

Mey da ray mevɛley cek a Gazlavay ta meesɛmey

¹ Mɛlma adaw hay, kwa yah maa guzlkwar da ray dala masa ala ma da slɛrdamara ngada ndɛhay nga Yesu da *Jeruzelem heyey daa saba na, cay gway.

² Ya sɛra na, akwar may, fa wuɗam nga jɛnmata. Yah ma kadatara mewulkey akwar nga jɛnmata ndɛhay da Jeruzelem sem a ndɛhay daa hwayak nga Masadɛwan, ya lɛvtar: «Ndɛhay daa hwayak nga Akay * ta zɛlamar cay dɛga nga mevɛɗey nga joney ndɛhay nga Yesu da Jeruzelem.» Masa ndɛhay da Masadɛwan ma cɛndamara slɛra akwar masa maaya ngene na, a vɛltar gɛɗan a ndɛhay ga da wuzlah ata nga joney ndɛhay da Jeruzelem e may.

³ Ehe, ya fa slɛrdakwara ata Tit ta ndɛhay cew ngene nga jɛnmakwar nga cekeley dala ha taazak, amba yah maa hɛmdakwar keɗe na, a tɛrey nga cek nga tede ba. Anda keɗe, da ala ma wusam la fa akwar na, ya hɛtfamar cek hay tabiya maɗiytakaya cay, anda yah ma lɛvey.

⁴ Da masa ala ma wusam la fa akwar ta ndəhay da Masadəwan a, asaya, da dala ha manjar nga cekeley na, hwaray a da kaya fa mey ata, maja ya ta ləvtar cay ka cakalamara dala ha la fara fara. Nğada akwar may, hwaray a kakwar la.

⁵ Ara maja nğene, yah ma wulkey nga slərdata ndəhay maakar nğene teesed fa mey adaw. Ya wudəy amba a jənmakwar nga cekeley dala ha taazak, anda akwar ma ləvmandar. Anda kedə, wuskwaa ya da wusey na, akwar ma cakalamara cay. Nğene, mecekeley dala ha a da wuzwa na, ara akwar ma wudam nga cakalamara ta mevel pal, ba na, ta menjərbey-mey ba.

⁶ Sərfadamara, mey daha a ləvey: «Ndaw ma sləkey nekədəy na, a da hətey cek nekədəy may. Yaw, da a sləkey ga na, a da hətey cek ga may.»

⁷ Anda kedə, si ndaw a vəley cek anda aa ma wudəy. Ka da vəldamara ta menjərbey-mey ba. Ndaw a da təkakwar dəy ta təkəy ba may. Ama vəldamara na, ta meesəmey, maja Gazlavay a wudəy na, ndaw masa ma vəley cek ta meesəmey.

⁸ Sərmara, Gazlavay na, anğa ta gədan nga vəlkwar cek hay ga. Anda kedə, kwa meeme fa da həckwar daa ba səlak. Ka da hətam cek hay masa ma fəna amba ka vəldamara nga key sləra ma mbafar a Gazlavay.

⁹ Ara anda mey nga Gazlavay mawuzlalakaya, ma ləvey: «Ndaw masa maaya na,

har anğa mawurkaya nga jəney masa-viya hay.

Maaya anğa masa anğa ma ka nğene,
anğa daha nga sərmataw.»

¹⁰ Ma vəlda hulfad nga sləkey ta ma vəlda dəf nga zəmey a ndəhay na, ara Gazlavay. A da vəlkwar hulfad hay cəpa masa akwar ma wudam nga sləkey may. Hulfad a, a da pəcwa, a da yey ga. Anda kedə, ka da kamatar maaya nğada ndəhay ma fəna ma fəna.

¹¹ Fara fara, a vəlkwar cek hay la ga mekele mekele amba ka gwamara nga jənmata ndəhay siya hay ma fəna ma fəna. Anda kedə, ndəhay ga a da həlmamara Gazlavay maja cek masa akwar ma vəldamatara ta har ala amba ya handamatara.

¹² Cek masa akwar ma vəldamara nğene na, ara nga jənta ndəhay nga Gazlavay da Jeruzelem masa daa banay daada ba, ama amba ndəhay ga a kamar suse a Gazlavay maja may.

¹³ Ndohay ma da hotmar cek masa akwar ma da kamara ngene na, a da helmamara Gazlavay maja akwar fa cennar mey a Gazlavay. Anda kefe, akwar fa wuzdamara na, akwar fa tɔbmara *Mey-maaya-mawiya nga *Keriste. Yaw, ndohay a da helmamara Gazlavay maja akwar ndohay masa har mawurkaya nga joney ndohay nga Gazlavay da Jeruzalem, asaya, maja akwar ndohay ma jenam ndohay cɔpa.

¹⁴ A da wudmakwar kalah maja maaya nga Gazlavay ga da ray akwar. Anda kefe, a da dɔram dangay maja akwar.

¹⁵ Hɔlmakwa Gazlavay maja maaya anga kalah.

10

Mey da ray gɔdan nga Pawl maja anga ndaw-meslɔrey nga Yesu

¹ Yah, Pawl, ta ray adaw, ambahw, ya wudfey ngaa guzlkwar cey. Ndohay faa guzlam da ray adaw, a lɔvam, da masa yah da wuzlah akwar na, ya zlurey ta akwar. Ama da ya ta ngɔchey sem nekɔfey ta akwar na, yaa bɔcey taa bɔcey, mandɔrzay a kaya ba. Fara fara, yah na, ya wudfey nga key ndaw maaya meekwed-mey anda *Keriste.

² Anda kefe, ya kakwar ambahw, maaya na, ka mbɔddamara menjey akwar, amba da yah ma wusey la fa akwar na, ka tɔkmaya fay ngaa bɔckwar ba. Asaya, ndohay ga da wuzlah akwar a wulkam saw, a lɔvam ya key slɔra na, anda ndohay nga bɔla gway. Ndohay ma lɔvam anda ngene na, ya daa bɔctar taa bɔcey.

³ Fara fara, ala ndohay magɔdan, ama daa slɔra nga Gazlavay na, ya kam vɔram anda ndohay magɔdan ba.

⁴ Cek ala hay ma ka vɔram a na, a sawa da bɔla kefe ba, ama ara Gazlavay ma vɔldandara. Cek hay a na, ata ta gɔdan nga pɔlhata slam hay masa masa-gɔra nga Gazlavay ma bam a hwad a. Asaya, ta cek hay a na, ya gwamara nga gɔrcamatara mey nga ndohay maa guzlam saw ta membɔrzley.

⁵ Asaya, ta cek hay a na, ya gwamara nga nɔsmara mey nga ndohay ma zlapam saw, ma tɔkmata ndohay nga sɔrey Gazlavay. Ta cek hay a na, ya wudam nga mbɔddamara mewulkey ata maaya ba tabiya amba a tɔbmara mey nga Keriste.

⁶ Da akwar fa wuzdamara, akwar fa namar ray fara fara a Keriste na, anda kefe, ya da kɔtmata ndohay siya masa ma namar ray ba.

⁷ Nəka, akwar na, ka wulkam fa cek hay masa ma hətey fa dey gway. Da ndaw a ləvey, anğa ndaw nğa Kəriste na, maaya a səra ala na, ndəhay nğa Kəriste anda anğa may.

⁸ Bay Mahura Yesu ma pandar nğa mahura na, a pandar amba ya nəsmakwar ba, ama amba ya jənmakwar. Kwa ya fa zlepey kalah maja na, hwaray fa da kaya daa ba.

⁹ Yaw, ka da wulkam a key ya zluradakwar ta leeter adaw hay ba.

¹⁰ Ndəhay siya fa ləvam: «Daa leeter hay nğa Pawl na, Pawl a təktar dəy a ndəhay nğa key cek masa ta banay nğa key, asaya, aa bəcey taa bəcey. Ama da aa da wuzlah aləkwa na, a pəskey vaw ba, a gucey ta gucey, mey masa anğa maa guzlda na, ara mey nğa tede.»

¹¹ Ndaw maa guzley anda ngene na, si a wulkey maaya maaya, a səra cek masa ala ma wuzlalamara ta wuzleley kaa na, ya kamara la da masa ala ma wusam la fa akwar.

¹² Ndəhay siya fa pamata ray ata nğa mahura hay. Fara fara ya gwa nğa wa ray adaw, ya ləvey yah letek ta ata ba. A nəkam dey na, fa ray ata gway, a ləvam ndaw ma fənta daa ba. Ata na, ndəhay manjar lenğesl.

¹³ Ala na, ya fa zlapam anda ngene daa ba. Ama ya zlapam na, da ray sləra masa Gazlavay ma vəldandara nğa key gway. Daa masa Gazlavay ma wusdandar fa akwar heyey na, ya ta zləngdamara kwakway nğa sləra ala daa ba. Ya zlapam na, da ray sləra masa Gazlavay ma vəldandara ha gway.

¹⁴ Daa masa ala ma diyam fa akwar na, ya ta zləngdamara slam masa Gazlavay ma vəldandar cəved nğa key sləra da hwađ a na, daa ba. Fara fara, ala ta wusam la teesəd fa akwar nğa kadakwara *Mey-maaya-mawiya nğa Kəriste.

¹⁵ Anda keđe, ala fa da zlapam da ray sləra masa ndəhay mekele ma kamara na, daa ba, maja sləra ata ha na, wal ta masa nğa Gazlavay ma vəldandara. Ala fa səkwam na, amba ka təbmara mey nğa Yesu ma fəna ma fəna, amba sləra ala da wuzlah akwar a key maaya ma fəna saya. Ta ngene he cəpa, ala fa da zləngdamara slam masa Gazlavay ma slandara na, daa ba.

¹⁶ Fa dəba ha, ya gwamara nğa diyam aa hwayak hay mekele masa dərəj ta akwar nğa wuzwa Mey-maaya-mawiya nğada ndəhay fetede. A da key anda keđe maja sləra masa ndəhay mekele ma kamara sem daa slam masa

Gazlavay ma vøldatara na, ya wudam nga zlepey da ray a ba.

¹⁷ Yaw, mawuzlalakaya daa ðerewel nga Gazlavay, a lövey: «Da ndaw a wufey nga zlepey na, nga zlepey da ray sløra masa Bay Gazlavay ma ka gway.»

¹⁸ Ahaw, fara fara ndaw maaya na, ara ndaw masa Gazlavay maa hømnda, ba na, ara ndaw masa maa hømnda ray anga ba.

11

Mey da ray ndøhay ma pamara ray ata nga ndøhay meslørey nga Yesu

¹ Ambahw, vølmaya cøved wure kefe amba yaa guzlkwar anda ndaw manjar-lengesl cey. Fara fara, yaa cøfdakwar, bøsmara mey adaw.

² Mevel fa caya da ray ndøhay ma batamakwar ñgene, maja ya wudkwar kalah anda Gazlavay ma wudkwar. Ka sørmara yah na, anda papakw akwar, ya ta pakwar la anda dam-sabara masøpkaya ñgada ndaw pal daha. Ndaw aha na, ara *Køriste masa yah ma da handakwar fa vøða, akwar maaya maaya manjar nga nøsey.

³ Ama ya fa zlurey, da a da mbøðdamakwara lengesl nga wudkakwar ta Køriste amba ka søpmara maaya maaya saba kwa. A da key anda *Ev ma tøba mey nga zezekw ma bata zleezle heyey.

⁴ Kwa waawa ma sawa ñгаа sørkadakwar mey masa fara fara ba na, ka vølmar cøved na, kwara? Ndøhay anda ñgene na, aa guzlam da ray Yesu mekele, ba na, da ray Yesu masa ala maa guzlam da ray a ba. Mesøfney masa akwar ma høtam fa ata na, ara *Mesøfney nga Gazlavay masa akwar ma høtam heyey ba. Asaya, ata fa wuzam *Mey-maaya-mawiya wal ta masa akwar ma tøbmara heyey. Ama ta ñgene he cøpa, akwar fa jøkfamatar slømay cønga na, kwara?

⁵ Ndøhay masa akwar ma wulkam ara ndøhay meslørey maaya ñgene na, a fønmay ba sølak.

⁶ Ayøwa, da maja yah na, ya søra meeguzley maaya maaya ba kwa, ama ya sørtta cek hay masa yah maa guzley da ray a cønga. Cek masa yah ma søra na, ya ta wuzdakwara la maaya maaya dey weewe.

⁷ Zleezle masa yah ma wuzdakwara Mey-maaya-mawiya nga Gazlavay heyey na, yah maa cødfakwar cek daa ba,

ba diya? Anda keɗe, ya ta nada ray aɗaw la fa mey akwar amba ya galdakwar daa mey nga Gazlavay. Ya key ngene na, ara meɓeɗey daw?

⁸ Daa masa ya fa wuzey mey fa akwar heyey na, ma jɔnmaya ta dala na, ara ndəhay daa *mecəmey-ray nga ndəhay nga Yesu daa slam mekele. Yaw, ya ta həley dala ata la amba ya jənkwar.

⁹ Daa ngene na, mɔrga fa kaya, ama yah taa cəɗɗafakwar cek daa ba, maja ndəhay nga Yesu da Masadəwan ta samawa la nga vɔlmaya cek hay mekele mekele masa fa yah daa ba. Anda keɗe, ya taa cəɗɗafakwar cek daa ba. Kaazla kwa ya fa daa cəɗɗafakwar cek daa ba may.

¹⁰ Fara fara, kwa ndaw da slala wura wura masa daa hwayak akwar Akay ma gwa nga təkya nga zlepey maja yah maa cəɗɗafakwar cek ba na, daa ba. Ya ləvkwar anda keɗe na, ta mezəley nga Kəriste, ndaw masa anga daha ta yah.

¹¹ Ka wulkam yah maa cəɗɗafakwar cek daa ba heyey na, a key ya wudkwar ba daw? Kay, kəne ba. Kwa Gazlavay ta ray anga na, a sɔra ya fa wudkwar.

¹² Mewulkey aɗaw kaa na, ya fa da mbəɗɗa daa ba cənga. Anda keɗe, ndəhay maa səkadam mey masa fara fara ba fa da hətam dabaray nga zlepey da ray ala daa ba. A gwamara nga ləvey sləra ala letək na, daa ba.

¹³ Ndəhay a ngene na, ara ndəhay meslərey masa fara fara ba. A mbəzlam kalah daa sləra ata. A pamara ray ata nga ndəhay meslərey nga Kəriste.

¹⁴ Mey a keɗe, a rəzley ndaw ba, maja kwa ta pas langar na, *Satan, bay-malula, ray anga, fa pa ray anga nga maslan nga Gazlavay mewedey.

¹⁵ Yaw, da Satan, ray anga, fa ka anda keɗe na, kaa wara ndəhay ma ka sləra anga, a pamara ray ata nga ndəhay nga Gazlavay ma ka cek ta cəved e, ba kwara? Ta pas masa Gazlavay ma da ka sariya na, a sərdata banay la fa sləra ata ha.

Mey da ray banay nga Pawl

¹⁶ Ambahw, yaa guzlkwar saya, ndaw a da wulkey, yah na, ndaw manjar-lengəsl ba. Da akwar fa wulkam kəne na, vɔlmaya cəved amba ya zlepey nekəɗey may.

¹⁷ Fara fara, mey masa yah maa guzlda keɗe na, a mbafar a Bay Mahura ba. Da ya fa zlepey na, ya daa guzley anda ndaw manjar-lengəsl.

18 Ndohay ga fa zlapam kalah da ray cek hay da bēla. Yah may, ya wudēy ŋga zlepey kōne.

19 Akwar na, ka wulkam ka lōvam akwar ndohay ma sēra cek hay, ba diya? Kaa ka bōsmara ndaw manjar-lenḡesl na, kwara?

20 Ahaw, ndohay fa tōrdamakwar ŋga beke hay, faa fiymakwara cek akwar hay, fa lalamakwara cek hay cōpa, fa rōsmakwar, asaya, fa slōngmakwar matapa-har. Ta ŋgene he cōpa, akwar fa bōsmara gway.

21 Ambahw, yah na, hwaray fa kaya ŋga lōvkwar, maja vaw adaw ta pōskey ŋga kakwar kwa meeme anda ata daa ba.

Wure keḡe, amba yaa guzley anda ndaw manjar-lenḡesl. Ya zlepey da ray cek hay anda ndohay mekele ma zlapam may.

22 Ndohay a lōvam ata na, *Hebōre hay. Kaa yah na, ndaw Hebōre he may. A lōvam ata na, *Israyel hay. Kaa yah na, ndaw Israyel ehe may. A lōvam ata na, ndohay daa sōkway ŋga *Abōraham. Yaw, yah may, ndaw daa sōkway ŋga Abōraham a, ba diya?

23 Asaya, a lōvam, ata na, ndohay ma ka slōra ŋga *Kōriste. Yah may, yah ndaw ma ka slōra ŋga Kōriste ma fōnta jak, ba diya? Ya faa guzlkwar wure keḡe na, anda ndaw manjar-lenḡesl fara fara. Ya lōvey, yah na, ya fa ka slōra ŋga Gazlavay ma fōnta. Yah na, ta kōzlamaya la aa fōrsōne dey ga ma fōnta, ta kōḡmaya la dey ga ma fōnta, asaya, ya ta sōrey banay la ga haa kasl fa memōcey.

24 Mahura hay ŋga *Jōwif hay ta slōḡmaya la, laway kwakwar maakar a ray a zlam-letek haa dey zlam.

25 Mahura hay daa hwayak ŋga *Rawm ta kōḡmaya la ta zlanday dey maakar. Pas pal daha, ndohay ta hazakamaya la ta aḡgwa haa kasl fa memōcey. Asaya, kwambiwal ta tōḡdaya la aa yam dey maakar. Dey pal daha na, a mbōkdiwa daa yam a, ya vōrndawa, ya nawa daa yam a.

26 Ya ta pōkey la aa hwayak hay ga. Ya ta sōrey banay la. Anda melōvey, wayam a wudēy ŋga laya dey weewe, mayal hay a wudam ŋga lalamata cek adaw hay, a wudam ŋga kōḡmaya. Ndohay Jōwif hay sōkway adaw hay lenḡ ndohay masa Jōwif hay ba ta sōrdamaya banay la. Fara fara, yah ma sōrey banay la daa wura daa wura, kwa daa berney hay, kwa da wuzlah-ley, kwa daa bōlay, yah ma sōrey banay la

11:22 11.22 Fōl 3.5; Rm 11.1 11:23 11.23 slōra: 1Kwr 15.10; fōrsōne: SNM 16.23 11:23 11.23-29 4.8-12; 1Kwr 4.11-13; 12.26 11:24 11.24 Mew 25.3 11:25 11.25 SNM 14.19; 16.22

ga. Asaya, ndəhay ma mbərzlam, ma ləvam ata na, ndəhay nga Yesu, ta sərdamaya banay la may.

²⁷ Ahaw, yah ma key sləra la haa ya sərey banay ga. Ta pas lanğar ya ney ba, may fa caya, yam fa kaya. Ta pas lanğar si ya key *daliyam. Asaya, ya hətey zana nga kəsley fa vaw ba, memed a wufey nga kəfyə.

²⁸ Banay mekele mekele daha, ama ya fa da kadatərwa siya daa saba. Daa ngene na, mewulkey adaw aa da ray cek pal daha. Ya wulkey mandaw mandaw da ray ndəhay daa mecəmey-ray hay nga Yesu tabiya,

²⁹ maja yah na, da ndaw anğa masa-bəle daa mey nga Gazlavay na, bəle anğa ha a wusfaya may. Da ndaw a key mebərey na, a gəfyə fa mevel anda awaw.

³⁰ Da ya ləvey si ya həsley ray na, ngene ya da həsley ray da ray bəle adaw.

³¹ Gazlavay, Papan nga Bay aləkwa Mahura Yesu, a səra yah na, ya mbərzley ba. Anja ndəhay nga həlmamara nga sərmataw.

³² Zleezle masa yah daa berney nga Damas, Aretas, bay nga hwayak a na, ta pey ndaw la nga wey da ray berney a. Ndaw ma wey da ray berney a ta', a weley ndəhay nga lacam aa cəved ma bawa daa berney a amba a kərzamaya.

³³ Ama ndəhay ma təba mey nga Yesu fetede a pamaya aa lelek, a jəwam zewed fa vəda, a təldamaya ngada dəbay taa manğalaw nga mahwal nga berney a. A bərnğadamaya a hwayak, a dəba berney a. Anda kefe, yah ma ləhwa sem dasi har nga ndəhay a.

12

Yesu Bay Mahura a wuzar cek hay a Pawl

¹ Wure kefe si ya zlepey cənga. Ahaw, ya səra na, mezlepey a ara cek nga tede. Ama ya wufey ngaa guzley da ray cek hay masa yah ma hətatar ta dey adaw, masa Bay Mahura ma wuzdatiwa.

² Ya sərey ndaw pal daha *, ara ndaw nga Kəriste. Gazlavay a la fa vəda a vad, cay, ta', a vəhwa. Anğa kaa mevey kuraw a ray a məfad fa dəba ha. Ayəwa, da ndaw aha ma daw la a vad ta vaw anğa fara, da daa ba, da ara cek anda mesəfney ma kar kwa, yah na, ya səra ba, si Gazlavay ma səra gway.

11:26 11.26 SNM 9.23; 14.5 **11:27 11.27** 6.5 **11:29 11.29** 1Kwr 9.22; Gal 6.2

11:30 11.30 12.5; 1Kwr 1.31 **11:31 11.31** 1.23 **11:32 11.32-33** SNM 9.23-25

* **12:2 12.2** ndaw pal daha: Ndaw aha na, ara Pawl a, ray anğa. A wuzda ray anğa fefe ba na, maja a wufey nga zlepey kalah ba.

³⁻⁴ Ahaw, fara fara Gazlavay ta la ndaw a la a vad a cakay a. Da ndaw aha ta daw la ta vaw anğa fara, da daa ba, da ara cek anda mesəfney ma kar kwa, yah na, ya səra ba, si Gazlavay ma səra gway. Mey masa anğa ma cəndərwa da vad a na, ndaw-magədan a gwa nğaa guzlda mey a ba. Ara mey masa ndaw-magədan aa ta cəved nğa wuzda daa ba may.

⁵ Anda kefe, ya da zlepey da ray cek aha ma key ngene. Ama maja cek mekele masa ma hətfaya na, ya fa da zlepey da ray a daa ba, si da ray cek ma wuzda yah na, ndaw masa-bəle.

⁶ Kwa anja da ya fa zlepey na, ya faa guzley saw anda ndaw manjar-lenğesl daa ba, maja ya fa zlepey da ray cek hay masa fara fara. Ama ya da njeý teete amba ndəhay a pamaya nğa ndaw ga ma fəna cek masa ata ma hətmar fa yah ba, da daa ba, ma fəna cek masa ata ma cəndamara fa yah ba may.

⁷ Nəka, yah na, anja təde ya zlepey da ray cek hay masa Bay Mahura ma wuzdatiwa kefe. Ama ya ta zlepey daa ba maja cek fa caya mandaw mandaw. Cek aha a sləkya anda hatak. Ara meslərey nğa *Satan, bay-malula, nğa kəfdaya vaw. Cek ma caya ha na, ara amba ya zlepey saba.

⁸ Haa ya dərar danğay dey maakar a Bay Mahura nğa nğəchada banay kefe la dərən ta yah.

⁹ Ama a mbəddiwa, a ləvya: «Maaya adaw da ray akah na, a wusa amba ka bəsa banay a gway, maja da ndaw, anğa masa-bəle na, gədan adaw a key sləra la daa ndaw aha maaya maaya jak.» Da ara anda kefe na, yah daa meesəmey, ya zlepey da ray bəle adaw kefe amba gədan nğa *Kəriste a njeý daa yah.

¹⁰ Ara maja kefe mevel adaw ma dəkey kwa da ray bəle adaw a, kwa a cədmaya, kwa a cakalafamaya mey, kwa a sərdamaya banay dey ga, kwa yah ta mewulkey kalah maja Kəriste na, ya daa səmey cənğa. Ya səra, da yah masa-bəle na, Kəriste a da vəlya gədan ma fəna jak.

Mewulkey nğa Pawl da ray ndəhay Kwarinti hay na, kwara?

¹¹ Nəka, ya ta zlepey la, ya taa həmda ray adaw la anda ndaw manjar-lenğesl, ama ara akwar ma kamara, ba na, ara mebərey adaw ba. Anja ma daa həmdamaya na, akwar jak ba diya? Kwa anja ka ləvam ya sərey cek ba, ama ndəhay masa akwar ma wulkam ara ndəhay meslərey masa maaya heyey na, a fənmaya ba səlak.

¹² Daa masa yah da wuzlah akwar heyey na, ya ta b̄osa la nga key sl̄era mandaw mandaw ta akwar c̄ంగా. Gazlavay ta j̄onya la nga key maazla hay mekele mekele. Maazla hay a, a wudam nga l̄ovey na, yah *ndaw-mesl̄orey nga Yesu fara fara.

¹³ Yaw, cek hay maaya masa yah ma katara ngada nd̄ohay nga Yesu daa hwayak hay mekele na, yah ma kakwara daa ba daw? Aȳowa, da maja yah maa c̄ɔdfafakwar cek nga j̄onya daa ba heyey kwa. Da ngene ara meb̄orey na, ambahw, mb̄ekdamiwa meb̄orey a.

¹⁴ Wure keɔfe, ya ta d̄iya vaw cay nga daw fa akwar saya, nga dey maakar. Masa yah ma wusey la na, ya fa daa c̄ɔdfafakwar cek nga j̄onya daa ba c̄ంగా. Ya daw na, maja zleley akwar ba, ama maja akwar ray akwar gway. N̄oka, yah na, anda papakw akwar. Ma v̄elmatar cek nga z̄omey a b̄eza hay mec̄ehe na, ara papa ata hay, ba na, ara b̄eza hay ma v̄elmatar ngada papa ata hay ba.

¹⁵ Kwa yaa z̄ɔɔda dala adaw c̄ɔpa maja akwar, kwa ya v̄olda ray adaw c̄ɔpa kasl fa mem̄oɔey maja akwar, ngada yah na, a kaya cek ba. Ya daa s̄omey c̄ంగా. Aȳowa, ka wud̄maya saba kaa na, maja da ya fa wud̄kwar kalah kwa.

¹⁶ Akwar na, ka s̄ɔrmara ya ta s̄ɔrdakwar banay amba ka v̄elmaya cek ngada yah na, daa ba. Ama nd̄ohay siya da wuzlah akwar fa l̄ovam: «Pawl na, a pa ray aṅga nga ndaw maaya, ama aṅga ndaw masa-wewer. Ta t̄ɔknandakwara dala al̄ekwa sem.»

¹⁷ Kaa ya t̄ɔknakwara dala akwar ha na, kwara? Ndaw pal dasi nd̄ohay masa yah ma sl̄ɔrdata fa akwar heyey na, ta t̄ɔknakwara cek akwar hay daa ba, ba diya?

¹⁸ N̄oka, ya ta kar ambahw la a Tit nga daw fa akwar, ata ta m̄elma al̄ekwa lan̄gar masa akwar ma s̄ɔrmara maaya maaya heyey. Kaa Tit e ta t̄ɔknakwara cek akwar hay sem daw? Cek masa Tit ma karawa fa akwar ngene na, ara cek letek ta masa yah ma ka may, ba diya? Mewulkey ala na, letek.

¹⁹ D̄ɔga zleezle, ka wulkam a key ya wud̄am nga m̄ɔɔey ray ala daa mey hay a keɔfe daw? Ara k̄one ba! Yaa guzlam na, fa mey nga Gazlavay anda *K̄ɔriste ma wud̄ey. Jam adaw hay, ala faa guzlmakwar na, maja ya wud̄am amba ka h̄ɔtam ḡɔdaṅ nga daw fa mey fa mey daa c̄ɔved̄ nga Gazlavay.

²⁰ Ya fa zlurey da ya da wusey fa akwar a na, menjey akwar a da mbafaya ba kwa. Da ara anda ngene na, menjey

aɗaw a da mbafakwar ba may. Ya zlurey ya da hɗɗafakwar, akwar fa tɗeram vaw ta tɗerey, siya hay fa kam sɗelɗ fa ndɗohay siya, akwar fa cam mevel da wuzlah akwar, asaya, akwar fa wudkam ɗay, akwar fa cɗɗam vaw ta cɗɗey, akwar fa slam mey ta sley da wuzlah akwar, akwar fa zlapam, asaya, akwar fa kam cek saw.

²¹ Ayɗwa, yah ma da vɗehy fa akwar a na, ya zlurey, da Gazlavay alɗkwa a da paya hwaray fa mey akwar kwa. Ya fa zlurey saya maja da ya da hɗɗfey ndɗohay malamba hay ga fa kam meɓerey anda zleezle cɗɗga kwa. Anda melɗvey, ata ta mbɗɗdamara mewulkey ata maaya ba ɗgene daa ba. A wulkam mandaw mandaw ɗga key cek ma nɗesa ndaw, a lam vaw saw, asaya, a kam cek ma ka hwaray cɗɗga. Da ata ta mbɗɗdamara mewulkey ata hay maaya ba ɗgene daa ba na, ya da tɗway fa mey akwar maja ata.

13

Pawl a patar lenjesl a Kwarinti hay ɗga madagway-dakw

¹ Ya da daw fa akwar kaa na, ɗga dey maakar, ba diya? Da yah ma wusey la na, ya da zɗlmatakurwa ndɗohay ma kam cek malamba hay. Ya daa cɗɗamatakwa anda mawuzlalakaya daa ɗerewel ɗga Gazlavay, ma lɗvey: «Kwa cek wura wura maaya ba masa ndaw ma ka, ɗga sɗerey mey da ray a fara fara na, maaya na, ndɗohay cew, da daa ba, maakar a nɗkmara mey a, a kam sede da ray mey a.»

² Daa masa yah ma daw fa akwar ɗga dey cew heyey na, yah ma patar lenjesl la ɗgada ndɗohay ma kam meɓerey ta ɗgada ndɗohay siya cɗpa. Ahaw, wure keɗe na, yah ɗɗerɗ ta akwar ama ya lɗvkwar saya, da yah ma wusey la fa akwar ɗga dey maakar na, ya fa da sɗɗfatar dey-ceceh a ndɗohay cɗpa ma kam meɓerey daa ba.

³ Akwar na, ka wudam ya wuzdakwara ara *Kɗriste ma balaya mey ɗgaa guzley daw? Fara fara, ya fa wuzdakwara, Kɗriste he na, ara ndaw masa-bɗle fa mey akwar ba, ama aa fa key slɗra da wuzlah akwar ta gɗɗan ɗɗga.

⁴ Fara fara, daa masa ata ma ɗɗrmara Kɗriste fa hwadam mazlanɗgalakaya heyey na, ta tɗerey sem ɗga ndaw masa-bɗle, ama ta slɗkɗawa sem daa memɗcey ta gɗɗan ɗga Gazlavay. Anda keɗe, ala macɗmkaya ta ɗɗga keɗe na, ala masa-bɗle hay may. Ama ya wuzdamakwara la, ala daha ta dey bama ta ɗɗga ta gɗɗan ɗga Gazlavay.

⁵ Wulkam da ray menjey akwar, nɔkmara ray akwar cey, akwar fa pamara Yesu nga ndaw akwar fara fara daw? Akwar fa sɔrmara na, Yesu Kɔriste aa ta akwar, ba diya? Da ka sɔrmara anɔa ta akwar ba na, ngene, akwar fa pamara Yesu nga ndaw akwar fara fara daa ba.

⁶ Asaya, ya wudfey na, ka sɔrmara fara fara, ala fa pamara Yesu nga ndaw ala fara fara ta fa cek masa ala ma kamara.

⁷ Ya dɔram dangay a Gazlavay amba cek masa maaya ba na, ka kamara ba sɔlak. Ya wudam nga pamara ray ala nga ndɔhay ma ka cek ta cɔved e na, daa ba. Kwa da akwar fa sɔrmara cek hay masa ma wuzda ala ndɔhay meslɔrey nga Yesu ba na, ya wudam amba ka kam cek masa maaya ngada ndɔhay cɔnga.

⁸ Anda keɔe, ya kɔɔam vaw na, amba mey masa fara fara a daw fa mey fa mey gway. Mey masa fara fara ha na, ya wudam nga nɔsmara ba.

⁹ Ahaw, da akwar ta gɔɔan daa cɔved nga Gazlavay na, kwa anja gɔɔan ala pɔreh na, ya daa sɔmam cɔnga. Anda keɔe, ala fa dɔrmar dangay a Gazlavay amba a jɔnkwar nga daw fa mey fa mey daa cɔved anɔa.

¹⁰ Mɔlma adaw hay, ka sɔrmara yah ma wuzlalakwara mey hay masa daa leeter keɔe teesɔ na, maja me daw? Ara maja ta pas masa yah ma da wusey fa akwar na, maaya na, ndɔhay tabiya ta mbɔɔdamara menjey ata cay. Anda keɔe, ya fa da kakwar mey ta key na, daa saba. Fara fara, Gazlavay ta vɔlya gɔɔan la nga kakwar mey, amba ka diyam fa mey fa mey daa cɔved anɔa, ama ta vɔlya gɔɔan amba ya nɔskwar na, daa ba sɔlak.

Mey nga madagway-dakw

¹¹ Mɔlma adaw hay, wure keɔe mey adaw daa saba. Njam daa meesɔmey. Maaya na, ka diyam fa mey fa mey daa cɔved nga Gazlavay, ka vɔlmatar gɔɔan a ndɔhay mekele da wuzlah akwar, ka cɔmam ɔay, ka njam daa zazay. Anda keɔe, Gazlavay ndaw ma wudfa ndaw, ndaw ma njadata ndɔhay daa zazay, a nɔkfakwar dey la may.

¹² Cam har da wuzlah akwar cɔpa pal pal, anda akwar mɔlman hay. Yaw, ndɔhay ma tɔba mey nga Yesu cɔpa feɔe a camakwar har may.

¹³ Anja maaya nga Bay alɔkwa Mahura Yesu *Kɔriste nga njey ta akwar, anja mewudfey-vaw nga Gazlavay nga njey ta akwar, asaya, anja *Mesɔfney nga Gazlavay nga cɔmkwar ray tabiya.

Leeter masa Pawl ma wuzlalatara a Galat hay Mey da ray leeter ngada Galat hay

Leeter e keɗe na, ara Pawl ma wuzlalatara ngada ndəhay daa mecəmey-ray nga Yesu daa hwayak nga Galati fa dɔba masawa anɗa fa ata (SNM 16.6; 18.23). Daa leeter keɗe na, Pawl a ləvey: «Cek mahura na, ara mepey Yesu Kəriste nga ndaw fara fara ta mewuɗey ndəhay mekele.» (5.6)

Da wuzlah ndəhay nga Yesu da Galati na, Jəwif hay daha, Jəwif hay ba hay daha may. Jəwif hay siya a ləvam si ndəhay Jəwif hay ba hay a tɔbmara mewey hay tabiya nga Jəwif hay, si a slam mandawal anda Jəwif hay amba a tɔram ndəhay nga Yesu. Pawl a ləvey, mey ata ha ngene, ara mey nga Gazlavay ba, maja ndaw a gwa nga tɔrey ndaw maaya fa mey nga Gazlavay ta fa cek masa anɗa ma ka ba, ama si ta fa mepey Yesu nga ndaw fara fara gway. (2.15-21)

Daa fasəlawal 5 haa 6, Pawl a ləvey si ndəhay nga Yesu a njam maaya maaya, a jɔnam vaw da wuzlah ata maja mewuɗey-vaw nga Kəriste. Gazlavay ta vɔlndakwar Mesəfney anɗa la nga jɔndakwar nga njeɗ maaya kəne may.

Daa leeter e keɗe na, mey mekele mekele daha nga vɔley gɔdan a ndəhay:

Kwakwas nga Mawiz a gwa nga tɔrda ndaw maaya fa mey nga Gazlavay ba, ama ara Yesu ma tɔrda ndaw maaya fa mey nga Gazlavay (3.10-14)

Mey da ray cek hay maaya ma sawa ta fa Mesəfney nga Gazlavay (5.22-23)

Mecey-har

¹ Ara yah, Pawl, ma wuzlalakwara leeter keɗe. Yah *ndaw-meslərey nga *Yesu *Kəriste. Ara ndaw ma walaya nga key ndaw-meslərey a ba, asaya, ara ndəhay ma slərdamiwa ba. Ma pamaya nga ndaw-meslərey na, ara Yesu Kəriste he ta ray anɗa leɗ *Gazlavay Papan ma sləkdadərwa Yesu a daa meməcey.

² Ala macəmtakaya ta mɔlma aləkwa hay siya feɗe, ya camakwar har, akwar ndəhay daa mecəmey-ray hay nga Yesu daa hwayak nga Galati.

³ Anja Papa aləkwa, Bay Gazlavay, ta Bay aləkwa Mahura Yesu Kəriste n̄ga pəsmakwar mey, asaya, n̄ga n̄jadamakwar daa zazay.

⁴ Kəriste ta vəlda ray an̄ga la maja mebərey aləkwa, amba a ləhdandakwar da bəla masa maaya ba kefe. Kəriste he ma ka anda kefe na, a key a nar ray a mey masa Gazlavay Papa aləkwa ma wufey.

⁵ Anja ndəhay n̄ga həlmamara Gazlavay n̄ga sərmataw. *Amen.

Mey da ray Mey-maaya-mawiya

⁶ Gazlavay ma zəlkwār amba ka səpmara na, menjey a ga daa ba. A zəlkwār na, maja aa ma sərey dey-ceceh fa akwar ta fa mewufey-vaw n̄ga *Kəriste. Wure kefe, akwar fa mbəkdamara Gazlavay a, akwar fa təbām *Mey-maaya-mawiya mekele. Ya fa rəzley ga da ray akwar maja.

⁷ Fara fara Mey-maaya-mawiya mekele na, daa ba. Ama ndəhay mekele daha fa həbmakwar ray. A wudam n̄ga nəsmara Mey-maaya-mawiya n̄ga Kəriste.

⁸ Ala ta wuzdamakwara Mey-maaya-mawiya ha la. Anda kefe, da ndaw mekele, kwa ala, kwa maslan̄ n̄ga Gazlavay da vad, a wuzkwār Mey-maaya-mawiya mekele wal na, anja Gazlavay n̄ga nəsa.

⁹ Ala ta kadamakwara la, ama ya kadakwara wure kefe saya. Da ndaw a wuzkwār Mey-maaya-mawiya mekele wal ta masa akwar ma təbmara kefe na, anja Gazlavay n̄ga nəsa ndaw aha.

¹⁰ Yaw, wure kefe ka wulkam na, ya fa səpey amba ndəhay aa həmdamaya daw? Kay, kəne ba! Ya səpey na, amba Gazlavay aa həmdaya. Asaya, ka wulkam ya fa səpey amba ya mbafatar a ndəhay daw? Kay, kəne ba, maja da ya fa səpey amba ya mbafatar a ndəhay cəngga na, anja n̄gene, ya fa da key ndaw ma ka sləra n̄ga Kəriste daa ba.

Pawl a tərey ndaw-meslərey n̄ga Yesu na, kwara?

¹¹ Məlma adaw hay, ya wufey ka sərmara *Mey-maaya-mawiya masa yah ma wuzdakwara na, ara mewulkey n̄ga ndəhay ba.

¹² Mey a na, ara ndaw ma kadiwa ba, ara ndaw maa sərkadiwa ba, ama ara Yesu *Kəriste ma wuzdiwa mey a.

¹³ Akwar ta cəndamara mey da ray menjey adaw zleezle la, daa masa ya fa səpey kwakwas n̄ga *Jəwif hay. Daa n̄gene, ya ta sərdara banay la ga kalah ta ndəhay daa

mecəmey-ray hay nga Yesu. Ya ta wudəy la ngaa zəfdata cəpa.

¹⁴ Ya ta nar ray la a kwakwas nga Jəwif hay ma fənta Jəwif hay mekele masa mandala adaw hay. Ya ta vəlda mevel adaw la cəpa a kwakwas nga papan nga papa ala hay zleezle.

¹⁵ Ama Gazlavay ta sərfaya dey-ceceh la, ta walaya sem dəga ya ta yawa daa ba aran, ta zəlya la amba ya tərey ndaw ma ka sləra anja maja a mbafar.

¹⁶ Gazlavay ta wuryawa dey la, ta wuzdiwa Bəzey anja la amba ya wuzdatara Mey-maaya-mawiya da ray a, a ndəhay masa Jəwif hay ba hay. Daa ngene, kwa ya taa cəfdey ndaw nga slaya yawa daa ba.

¹⁷ Asaya, ya ta daw a *Jeruzelem nga jəkey sləmay fa ndəhay meslərey nga Yesu masa ngeeme daa ba may. Ama wure wure ngene, ya ta daw la aa hwayak nga Arap hay. Fa dəba ha, ta', ya vəhwa aa berney nga Damas.

¹⁸ Fa dəba ha, mevey maakar na, ya ta daw la aa berney nga Jeruzelem amba ya camawa ray ta *Piyer, ya sərmawa vaw. Ya njamawa cew e luma cew gway.

¹⁹ Fetede, ya ta hətey *ndaw-meslərey mekele daa ba, si *Jak, məlman nga Bay aləkwa Mahura gway.

²⁰ Mey masa yah ma wuzlalakwara kedə na, ara mey fara fara. Gazlavay a səra a key ya mbərzley ba.

²¹ Fa dəba ha, ta', ya daw aa hwayak nga Siri ta nga Silisi.

²² Maja ngene, ndəhay daa mecəmey-ray hay nga ndəhay nga Kəriste daa hwayak nga *Jude ta hətmaya ta dey ata daa ba.

²³ Ama ata fa cənam mey masa ndəhay mekele maa guzlam da ray adaw ma ləvam: «Ndaw ma sərdandakwar banay zleezle heyey na, wure kedə fa wuzda Mey-maaya-mawiya masa aa ma wudəy nga nəsa heyey.»

²⁴ Ta', ndəhay a, a həlmamara Gazlavay maja yah.

2

Ndəhay meslərey nga Yesu a təbmara Pawl

¹ Fa dəba ha, mevey kuraw a ray a məfad, ta', ya diyam ta *Barnabas a *Jeruzelem saya. Ya ta ngəla Tit la may.

² Yah ma daw a Jeruzelem e na, maja Gazlavay ma ləvya, maaya na, ya daw. Fetede, ala ta gucam la ta cakay ta *bay-ray hay nga ndəhay ma təba mey nga Yesu. Ya ta kadatara

1:13 1.13-14 SNM 8.3; 9.1; Fəl 3.5-6; 1Kwr 15.9 **1:15 1.15-16** Jer 1.5; SNM 9.3-5; 22.21; Rm 1.5; 1Kwr 9.1; 15.10 **1:18 1.18** SNM 9.26-28 **1:19 1.19** Mt 13.55 **1:21 1.21** SNM 9.30 **2:1 2.1-2** 1Kwr 15.2; Fəl 2.16; **Barnabas:** SNM 4.36; **Tit:** 2Kwr 2.13 **2:1 2.1-10** SNM 15.1-19

mey da ray *Mey-maaya-mawiya masa yah ma wuzdatara a ndəhay masa *Jəwif hay ba la, maja ya wudey sləra adaw masa yah ma ka ta masa ya fa ka wure kede a tərey nga cek nga tede ba.

³ Tit masa ma ləgdaya na, ara ndaw Gərek. Ama kwa ta təkmar dəy nga sley mandawal anda Jəwif hay na, daa ba.

⁴ Ama ndəhay ma təbmara mey nga Yesu fara fara ba ta samawa la a wuzlah ala, a wudam nga təkmar dəy a Tit e nga sley mandawal. Ndəhay a, a samawa a wuzlah ala na, ta mayal a, amba a sanjalmandar da ala fa wam ray ala maja ala macəmkaya ta Yesu *Kəriste kwa. A wudam nga tərdamandar beke hay nga kwakwas nga Jəwif hay cənga.

⁵ Ala ta təbmatara mey ata kwa nga menjey nekədey daa ba sələk. Mey-maaya-mawiya masa fara fara kede na, ya wudam a nəsmara ba, amba a njey nga mey masa fara fara ngada akwar.

⁶ Daa masa ya fa kadatara mey da ray Mey-maaya-mawiya masa yah ma wuzdatara a ndəhay na, bay-ray hay heyey masa ata ma zəlmata mahura hay ta pam mey mekele a ray Mey-maaya-mawiya ha daa ba. Yaw, da ata mahura hay, da ata mahura hay ba, ngada yah na, ara cek nga tede, maja fa mey nga Gazlavay na, ndəhay tabiya ata letek.

⁷ Ama sasəkar jak, a sərmara Gazlavay ta vəlya sləra la nga wuzey Mey-maaya-mawiya anda aa ma vəldara ngada *Piyer. Ngada yah na, a ləvyə nga wuzey Mey-maaya-mawiya a ndəhay masa Jəwif hay ba hay, ngada Piyer may, a ləvar nga wuzey Mey-maaya-mawiya a ndəhay Jəwif hay.

⁸ Yaw, ara Gazlavay ma vəlar gədanj a Piyer nga tərey *ndaw-meslərey nga Yesu ngada fa Jəwif hay. Ara Gazlavay a ma vəlya gədanj nga tərey ndaw-meslərey nga Yesu ngada fa ndəhay Jəwif hay ba hay may.

⁹ Ata *Jak ta Piyer lej *Jan masa ndəhay ma təba mey nga Yesu ma zəlmata bay-ray ata hay na, a sərmara Gazlavay ta vəldiwa sləra kede la fara fara nga key maja maaya anga. Maja ngene, a gagazamandar har ngada ala ta Barnabas, anda meləvey, mey ala ta ata letek. Ala ta wulkam la daa slam a ta ata amba ala ta Barnabas ya diyam nga wuzdamatara Mey-maaya-mawiya a ndəhay masa Jəwif hay ba hay. Ata may, a diyam a wuzdamatara ngada ndəhay Jəwif hay.

¹⁰ Aa cəfdamandar na, cek pal gway. Ara nga jəney masa-viya hay daa *mecəmey-ray nga ndəhay nga Yesu da

Jeruzelem. Ara cek masa yah ma ka ta mevel adaw cəpa.

Mey da ray ata Piyer ta Pawl daa berney nga Antiyaws

¹¹ Fa dəba ha, *Piyer a sawa aa berney nga Antiyaws daa hwayak nga Siri. Ya ta mbəfar ray la maja aa ma key cek maaya ba.

¹² Yaw, daa masa Piyer ma wuswa a Antiyaws na, aa fa zəmey daf ta ndəhay masa *Jəwif hay ba hay. Ama fa dəba ha, ndəhay Jəwif hay masa da cakay *Jak ma wusmawa na, Piyer a mbəkda mezəmey daf ta ndəhay Jəwif hay ba ha, a ngəchey ta cakay. A ka anda keđe na, maja a zlurey ta Jəwif hay ma ləvam si ndəhay masa Jəwif hay ba tabiya a slam mandawal.

¹³ Anda keđe, Piyer na, ara ndaw masa ta neneh cew. Ndəhay Jəwif hay mekele ma təba mey nga Yesu ta təram ndəhay masa ta neneh cew la anda Piyer e may. Kwa *Barnabas ta ray anga ta tərey ndaw masa ta neneh cew sem anda ata may.

¹⁴ Daa masa yah ma hətatar ata fa nəsmara *Mey-maaya-mawiya masa fara fara daa menjey ata ngenə na, ta', yaa guzlar ngada Piyer fa mey nga ndəhay tabiya: «Kah ndaw Jəwif, ama ka ta səpa kwakwas nga ndəhay Jəwif hay na, daa ba. Ka ta key cek la anda ndəhay masa Jəwif hay ba ma kamara. Anda keđe, ka ləvtar a ndəhay masa Jəwif hay ba nga səpey kwakwas nga Jəwif hay na, maja me?»

Ndaw a tərey maaya fa mey nga Gazlavay na, kwara?

¹⁵ Ala na, *Jəwif hay fara fara ma yey ta yey. Ala na, wal ta ndəhay daa səkway hay mekele. Ndəhay a na, fa səpmara *kwakwas nga Mawiz daa ba, ata ndəhay ta mebərey.

¹⁶ Ama ya səpmara ndaw aa maaya fa mey nga Gazlavay maja aa fa səpa kwakwas nga Mawiz na, kəne ba, si aa fa pa Yesu nga ndaw anga fara fara. Ala may, ya ta pamara Yesu *Kəriste he la nga ndaw ala fara fara amba ya təram ndəhay maaya fa mey nga Gazlavay. Ala maaya fa mey nga Gazlavay na, maja ala fa səpmara kwakwas nga Mawiz daa ba, ama maja ala fa təbmara mey nga Kəriste. Mesəpey kwakwas nga Mawiz na, a tərda ndaw maaya fa mey nga Gazlavay ba səlak.

¹⁷ Ala Jəwif hay ma təbmara mey nga Yesu na, ala fa pamara Kəriste nga ndaw ala fara fara amba ya təram ndəhay maaya fa mey nga Gazlavay. Daa masa ala fa pamara Kəriste nga ndaw ala fara fara na, a padamandar nga ndəhay ta mebərey maja ala fa səpmara kwakwas nga

Mawiz daa saba. Da anda keɗe na, Kōriste fa mbəzdandar aa meɓerey daw? Kay, kōne ba səlak.

¹⁸ Da ndaw a mbəkda meney ray a kwakwas ŋga Mawiz maja a sēra fa da jēna daa ba, ama fa dēba ha, a vəhwa ŋga nar ray cəŋga na, anda keɗe, ndaw aha ta key meɓerey sem.

¹⁹ Daa mesəpey kwakwas ŋga Mawiz na, ya ta tōrey la anda ndaw maməckaya. Anda meləvey, kwakwas ŋga Mawiz na, ara cek ŋga tede ŋgada yah. Ara kwakwas a ma tərdaya anda ndaw maməckaya amba ya njeɗ ta dey ŋga kar slēra ŋgada Gazlavay. Daa masa ata ma dərmarā Kōriste fa hwadam mazlanḡalakaya ŋga mōcey na, ara anda a dōram na, yah, ŋga mōcey may.

²⁰ Anda meləvey, menjeɗ aɗaw masa anda zleezle na, daa saba, ama wure keɗe Kōriste aa ta yah. Maja ŋgene, cek hay tabiya masa yah ma kata daa masa yah ta dey da bēla keɗe na, ya kata ta meney ray a Bōzey ŋga Gazlavay. A wuɗya kalah, a vōlda heter aŋga ŋga mōcey maja yah.

²¹ Gazlavay a pandakwar ŋga ndəhay maaya fa meɗ aŋga na, ara maja aləkwa fa səpkwa kwakwas ŋga Mawiz ba, ama ara maja dey-ceceh aŋga gway. Ya fa da rōsa maaya ŋga Gazlavay a keɗe daa ba. Da ndaw a gwa ŋga tōrey maaya fa meɗ ŋga Gazlavay maja aa fa səpa kwakwas ŋga Mawiz na, anja ŋgene na, memōcey ŋga Kōriste ara cek ŋga tede.

3

Gazlavay a da ləhda ndaw na, kwara?

¹ Akwar Galat hay na, manjar lenḡesl. Ta wuzdamakwara meɗ da ray memōcey ŋga Yesu *Kōriste fa hwadam mazlanḡalakaya la maaya maaya fa meɗ akwar tabiya, ba diya? Kaa ma batakwar na, wa?

² Ya wuɗey ŋgaa cəɗɗakwar meɗ pal. Gazlavay ta vəkwar Mesəfney aŋga la. A vōldakwara na, maja akwar ma səpmara *kwakwas ŋga Mawiz daw? Kay, kōne ba. Aa ma vōldakwara na, maja akwar ma jəkam sləmay fa *Mey-maaya-mawiya, asaya, maja akwar ma təbmara meɗ a, aa meɗel akwar.

³ Daa masa akwar ma zlamar ŋga səpey cəveɗ ŋga Yesu, ka səpmara na, ta gəɗaŋ ŋga *Mesəfney ŋga Gazlavay, ba diya? Kaa wure keɗe, ka mbəkdamara Mesəfney ŋga Gazlavay a, ka kam slēra ta gəɗaŋ akwar daada na, maja me? Akwar ndəhay manjar lenḡesl anda keɗe na, kwara?

⁴ Akwar ta sɛram banay la ga amba ka tɔbmara mey nga Yesu. Mesɛrey banay akwar a ngene na, ara cek nga tede daw? Anja nga tɛrey nga cek nga tede ba.

⁵ Yaw, Gazlavay a vɛlkwar Mesɛfney anɔa na, maja akwar ma sɛpmara kwakwas nga Mawiz daw? Kay, kɛne ba. Gazlavay a key maazla hay da wuzlah akwar na, maja akwar ma sɛpmara kwakwas nga Mawiz daw? Kay, kɛne ba. Ama Gazlavay a vɛlkwar Mesɛfney anɔa, a key maazla hay da wuzlah akwar na, maja akwar ma jɛkam slɛmay fa Mey-maaya-mawiya ta akwar ma tɔbmara mey a, aa mevel akwar.

⁶ Wulkam da ray *Abɛraham taw, mawuzlalakaya daa ɔerewel nga Gazlavay, a lɔvey: «Abɛraham a pa Gazlavay nga ndaw anɔa fara fara. Ara maja ngene, Gazlavay ma pa nga ndaw maaya.»

⁷ Anda kedɛ na, sɛrmara, ndɔhay ma pamara Gazlavay nga ndaw ata fara fara na, ara bɛza hay nga Abɛraham fara fara.

⁸ Mawuzlalakaya daa ɔerewel nga Gazlavay zleezle da ray cek ma da key, a lɔvey Gazlavay a tɔrdata ndɔhay masa *Jɔwif hay ba nga ndɔhay maaya fa mey anɔa. A ka anda kedɛ na, maja ata ma pamara Gazlavay a nga ndaw ata fara fara. Mey maaya kedɛ na, Gazlavay taa guzdara la dɔga zleezle a Abɛraham, a lɔvar: «Ndɔhay daa sɛkway hay tabiya a hɛtam mepɛsey-mey adaw la ta fa kah.»

⁹ Abɛraham ta pa Gazlavay la nga ndaw anɔa fara fara, maja ngene, Gazlavay ta pɛsar mey la. Yaw, ndɔhay tabiya masa ma pamara Gazlavay nga ndaw ata fara fara na, Gazlavay ta pɛstar mey la may anda Abɛraham a.

¹⁰ Ndɔhay tabiya ma wulkam ata maaya fa mey nga Gazlavay maja ata fa sɛpmara kwakwas nga Mawiz na, Gazlavay a nɛsta la. Ara anda mawuzlalakaya daa ɔerewel nga Gazlavay ma lɔvey: «Kwa waawa ma sɛpa kwakwas nga Mawiz tabiya masa mawuzlalakaya daa ɔerewel nga Gazlavay mandaw mandaw ba na, Gazlavay a nɛsa la.»

¹¹ Fara fara, ndaw fa da tɛrey maaya fa mey nga Gazlavay maja anɔa fa sɛpa kwakwas nga Mawiz na, daa ba. Yaa guzley anda kedɛ na, maja mey nga Gazlavay a lɔvey: «Ndaw masa maaya fa mey nga Gazlavay na, ara ndaw ma pa Gazlavay nga ndaw anɔa fara fara. Anda kedɛ, a hɛtey heter mendɔvey ba la.»

¹² Ama mawuzlalakaya saya daa ɔerewel nga Gazlavay, a lɔvey: «Kwa waawa ma sɛpa kwakwas nga Mawiz mandaw

mandaw, ma rësa ba sëlak na, a hëtey heter la.» Mey a, a wufey nga lövey, mesëpey kwakwas nga Mawiz na, ara cek wal ta mepey Gazlavay nga ndaw fara fara.

¹³ Yaw, Gazlavay ta nësndakwar sem maja alëkwa fa sëpkwa kwakwas nga Mawiz ta cëved e daa ba. Ama Këriste ta sawa la a bëla, ta la menësey alëkwa sem a ray anga amba a lëhdandakwar daa menësey a. Ara anda mawuzlalakaya daa dërewel nga Gazlavay, ma lövey: «Ndaw masa ata ma lëwmara fa hwadam * na, Gazlavay ta nësa sem.»

¹⁴ Yesu Këriste a ka cek aha anda kedë na, amba Gazlavay a pëstar mey a ndëhay masa Jëwif hay ba, letek anda Gazlavay ma pësar mey a Abëraham heyey. Asaya, kwa waawa ma pa Këriste nga ndaw anga fara fara na, a hëtey Mesëfney nga Gazlavay la masa aa ma lövey zleezle a da vëldatara a ndëhay anga hay heyey.

Kwakwas nga Mawiz na, a gwa ngaa vësa mey masa Gazlavay ma jëwa daw?

¹⁵ Mëlma adaw hay, ya wufey ya wakwara mey masa Gazlavay ma jëwa ta cek ma key mandaw mandaw daa menjey alëkwa. Yaw, da ndëhay cew, a jëwam mey ta cëved e fa mey nga ndëhay na, kwa ndaw a gwa ngaa vësa mey a ba, kwa ndaw a gwa nga pey a dey a ba.

¹⁶ Fara fara, Gazlavay ta lëvar la a *Abëraham a da pësar mey ngada anga ta ngada bëzey ma da yawa da hwad anga. Mawuzlalakaya daa dërewel nga Gazlavay, ta lövey ngada bëza hay ma da yamawa da hwad anga cëpa na, daa ba. Anda melövey, ndëhay ga ba. Ama aa guzley na, da ray bëzey da hwad anga pal letek gway, anda melövey *Këriste.

¹⁷ Ehe, mabara nga mey masa yah ma wufey ngaa guzldakwara ha: Gazlavay ta jëwey mey la ta Abëraham, asaya, ta ka la amba mey ata majëwkaya ha a pëskëy ba. Fa dëba ha, mevey temere mëfad ta kwakwar maakar na, Gazlavay a wuztar *mëwey anga a *Jëwif hay amba a sëpmara. Mëwey a, fa da pëska *mëjëwey-mey nga ata Gazlavay ta Abëraham daa ba, fa da nësa mëjëwey-mey a daa ba may.

¹⁸ Yaw, da Gazlavay a pëskwar mey la maja akwar ma sëpmara *kwakwas nga Mawiz na, anja ngene ara

3:12 3.12 Lev 18.5; Rm 10.5 * **3:13 3.13** ma lëwmara fa hwadam: Mawuzlalakaya daa Mew 21.22-23, a lövey, da masa a këdam ndaw vagay maja aa ma key cek maaya ba na, a lëwmara vagay a fa hwadam nga par hwaray. Pawl a wufey nga lövey na, mëmëcey nga Yesu fa hwadam mazlangalakaya na, aa këne. **3:13 3.13** Mew 21.23; Rm 8.3; 2Kwr 5.21 **3:14 3.14** 3.2-5; Jwl 3.1-2 **3:16 3.16** MC 12.7; 17.7-8 **3:17 3.17** Mab 12.40

mepøsey-mey masa anğa meløvey heyey saba. Ama a da pøskwar mey na, maja anğa ma løvey a pøskwar mey la. Anda keđe, Gazlavay a kar maaya a Abøraham † na, maja aa ma løvey a kara la.

¹⁹ Da anda keđe na, Gazlavay a wuzdatara mewey a, a Jøwif hay na, maja me? Gazlavay a wuzdatara mewey a na, amba ndøhay a sørmara cek maaya ba masa ata ma kamara. Gazlavay a wuzdatara mewey a na, nğa njej nekøđey haa kasl masawa nğa bøzey da hwad Abøraham heyey. Ara bøzey masa Gazlavay ma løvar a Abøraham a da pøsar mey heyey. Gazlavay ta wuzdərwa kwakwas a la ta fa maslañ anğa hay da vad. Maslañ anğa hay a ta wuzdamərwa la ta fa ndaw ma cømtar đay a ndøhay ta Gazlavay ‡.

²⁰ Ndaw ma cøma đay na, a diyey mey da wuzlah ndøhay cew. Ama daa masa Gazlavay ma jøwey mey ta Abøraham na, ara anğa pal taava anğa ma ka gway, ndaw ma cømtar đay na, daa ba.

Kwakwas nğa Mawiz a jønta ndøhay na, kwara?

²¹ *Kwakwas nğa Mawiz na, aa guzley wal ta mey daa *mejøwey-mey nğa Gazlavay daw? Kay, køne ba! Da fara fara kwakwas nğa Mawiz a vøltar heter mawiya a ndøhay na, anja Gazlavay a pata ndøhay nğa ndøhay maaya fa mey anğa la ta fa kwakwas a may.

²² Ama mawuzlalakaya daa đerewel nğa Gazlavay na, ndøhay tabiya da bøla, mebørey fa wey da ray ata. Ara anda keđe amba Gazlavay a vøldatara cek masa aa ma løvey a da vøldatara a ndøhay ma tøbmara mey nğa Yesu *Køriste. A vøldatara na, maja ata fa pamara Yesu nğa ndaw ata fara fara.

²³ Zleezle daa masa ala ndøhay *Jøwif hay ma tøbmara mey nğa Køriste daa ba arañ na, kwakwas nğa Mawiz ta jøđndar la anda ndøhay daa førsøne haa kasl Gazlavay ma wuzdandara cøved nğa tøbey mey nğa Køriste.

²⁴ Ara anda keđe, kwakwas nğa Mawiz ma jøđndar haa kasl masawa nğa Køriste a bøla. A sawa na, amba ya tøram ndøhay maaya fa mey nğa Gazlavay, maja ala ma pamara Køriste he nğa ndaw ala fara fara.

²⁵ Wure keđe na, ala fa tøbmara mey nğa Køriste, kwakwas nğa Mawiz fa da jøđndar daa saba.

† **3:18 3.18** Gazlavay a kar maaya a Abøraham: Nøka Galat hay 3.14ta SNM 2.17, Gazlavay a løvey: «Ya vøltar Mesøfney adaw la a ndøhay tabiya.» **3:18 3.18** Rm 4.14; 11.6 ‡ **3:19 3.19** Ndaw ma cømtar đay a ndøhay ta Gazlavay fede na, ara Mawiz. **3:19 3.19** Rm 4.15; **maslañ nğa Gazlavay da vad:** SNM 7.38, 53; Heb 2.2 **3:20 3.20** Mew 6.4 **3:21 3.21** Rm 7.13; 8.2 **3:22 3.22** Rm 3.9-30; 11.32 **3:23 3.23** 4.3 **3:24 3.24-25** Rm 10.4

²⁶ Akwar tabiya bəza hay ɲga Gazlavay maja akwar fa təbmara mey ɲga Yesu Kəriste, anda meləvey, akwar macəmkaya ta Yesu Kəriste.

²⁷ Akwar ta hətam *baptem la, maja ɲgene, akwar macəmkaya ta Kəriste. Wure keđe, akwar ta təram sem anda Kəriste he ta ray aɲga.

²⁸ Wure keđe, ndəhay Jəwif hay ta ndəhay Jəwif hay ba na, ata letək fa mey ɲga Gazlavay. Kwa beke hay ta ndəhay ma wam ray ata, kwa zel hay ta ɲgusay, ata letək fa mey ɲga Gazlavay. Anda meləvey, akwar tabiya, akwar letək fa mey ɲga Gazlavay maja akwar macəmkaya ta Yesu Kəriste.

²⁹ Yaw, da akwar ndəhay ɲga Kəriste na, anda keđe, akwar bəza hay ma yamawa da hwaď *Abəraham may. Maja ɲgene, Gazlavay a da pəskwar mey anda aa ma ləvey a da pəsar mey ɲgada Abəraham ta ɲgada bəza hay da hwaď aɲga heyey.

4

Gazlavay a pata ndəhay ɲga bəz aɲga hay na, kwara?

¹ Ehe, ya wudəy ɲgaa guzlkwar saya: wulkam da ray bəzey ma da wa zleley ɲga papaha taw. Daa masa aɲga bəzey daɲay na, kwa zleley tabiya masa mapakaya ɲgada aɲga na, a gwa a wa ba aran, aɲga anda beke.

² Daa ɲgene, ndəhay a nəkfamar dey, asaya, a nəkfamar dey fa cek aɲga hay may. A nəkfamar dey na, haa kasl pas masa papaha ma ləvey bəzey a ta gəley cay.

³ Aləkwa na, anda bəzey a may. Daa masa aləkwa ma sərkwə cek masa Gazlavay ma wudəy fara fara daa ba aran na, aləkwa beke hay ɲga cek hay mekele mekele masa ndəhay ma namatar ray da bəla keđe.

⁴ Ama daa masa Gazlavay ma wusdərwa daɲ a cay na, ta', a slərdərwa bəzey aɲga a bəla. Bəzey a, a tərey ɲga ndaw-magədaɲ, a yawa da hwaď ɲgwas. Ta səpa *kwakwas ɲga Mawiz la.

⁵ Gazlavay a ka anda keđe na, amba bəzey aɲga ha a ləhdata ndəhay ma səpmara kwakwas ɲga Mawiz a, asaya, amba Gazlavay a, a tərđandakwar ɲga bəz aɲga hay.

⁶ Ahaw, akwar na, bəz aɲga hay fara fara. Ya sərkwə maja Gazlavay ta slərwa Mesəfney ɲga Bəzey aɲga la a ray aləkwa tabiya. Ara Mesəfney a, ma mbəzey aa aləkwa amba ya zəlkwa Gazlavay «Aba,» anda meləvey, Papay.

⁷ Yaw, maja cek hay tabiya masa Gazlavay ma kakwara kede na, akwar beke hay saba, ama akwar bæza hay nga Gazlavay. Asaya, maja akwar bæza hay nga Gazlavay na, Gazlavay a da vëlkwar cek hay maaya tabiya masa aa ma diytara ngada bæz anga hay.

Menjey nga Galat hay a hæbar ray a Pawl

⁸ Zleezle, daa masa akwar ma sërmara mey fara fara da ray Gazlavay daa ba arañ na, akwar beke hay, akwar fa nam ray ngada mesəfney hay ma samawa ta fa Gazlavay ba.

⁹ Ama wure kede, ka sërmara mey fara fara da ray Gazlavay, ngama ya lövey, Gazlavay a sërkwara fara fara. Kaa, ka vëham nga sөpey mesəfney hay a, kwara dëba wura? Ara cek hay masa-bële, a gwamara nga jënmakwar ba. Ka wudam nga terey beke ata hay saya na, maja me?

¹⁰ Akwar fa walam ðar hay mekele ma fënta siya hay, asaya, akwar fa walam kiya hay, ta gwagway hay lenj mevey hay ma fënta siya hay nga key kwakwas.

¹¹ Ray adaw fa hæbey fa menjey akwar, maja slëra adaw masa yah ma ka da wuzlah akwar a da terey nga cek nga tede kwa.

¹² Mëlma adaw hay, ya fa kakwar ambahw, tëram anda yah, beke nga *kwakwas nga Mawiz saba, maja ya ta terey la anda akwar ndəhay masa *Jëwif hay ba hay. Zleezle na, akwar ta kamaya cek maaya ba daa ba.

¹³ Akwar fa sërfadamara yah ma wuzdakwara *Mey-maaya-mawiya ngeeme na, maja vaw fa caya.

¹⁴ Daa ngene, macay adaw a, ta sërdakwar banay la. Ama kwa akwar ta rësmaya daa ba, akwar ta bëldamaya mey daa ba. Sasëkar jak, akwar ta tëbmaya la anda yah na, *maslan nga Gazlavay da vad, da daa ba, anda yah na, Yesu *Këriste.

¹⁵ Daa ngene, akwar ta meesəmey ga, ama wure kede, kaa sëmam saba na, kwara? Ya sëra fara fara daa ngene anja da ka gwamara na, akwar ta wuzlkamatërwa dey akwar hay la ngada yah.

¹⁶ Kaa wure kede, ya ta terey masa-gëra akwar sem maja ya faa guzlkwar mey fara fara daw?

¹⁷ Ndəhay ma wudam amba ka sөpam kwakwas nga Mawiz heyey na, fa ðađamakwar amba mewulkey akwar a terey anda nga ata. Ama a kamara anda ngene na, nga nëskwar, ba na, nga diykwar ba. A wudam ka wudkam ta yah, ka mbëkdamaya, ka tëbam mewulkey ata.

18 Da ndøhay a cømam døy ta akwar nga key cek maaya na, ngene, ara cek maaya mandaw mandaw, kwa daa masa yah da wuzlah akwar, kwa daa masa yah da wuzlah akwar daa ba.

19 Akwar masa anda böz adaw hay, ya fa sørey banay maja akwar saya. Mesørey banay adaw a na, anda hwad ma car ngada ngwas ma da yey. Ya da sørey banay a haa kasl mewulkey akwar ma tørey anda nga Køriste.

20 Ya wudfey nga daw nga njeý ta akwar wure kede amba ya slakwar yawa. Fara fara, ray adaw fa høbey, maja ya søra cek masa yah ma da kakwara ba.

Mey da ray bøza hay cew nga Abøraham

21 Akwar ndøhay ma wudam nga neý ray a *kwakwas nga Mawiz, ya wudfey ngaa cøfdakwar: akwar ta cøndamara kwakwas nga Mawiz maa guzley na, daa ba daw?

22 Mawuzlalakaya daa dferewel nga Gazlavay, a løvey na, *Abøraham anga ta bøza hay cew. Bøzey lançar na, ara ngwas beke mezøley Agar ma yarawa. Bøzey lançar may, ara ngwas masa beke ba mezøley Sara ma yarawa.

23 Bøzey ma yawa ta ngwas beke na, a yawa ta fa mewulkey nga ndaw-magødan. Ama bøzey ma yawa ta ngwas masa beke ba na, a yawa maja Gazlavay ma løvar a Abøraham a da vølar bøzey.

24 Ya gwa ya wata ngusay cew kede ta *mejøwey-mey hay cew masa Gazlavay ma jøwa ta ndøhay. Agar ngwas beke na, a wuzwa mejøwey-mey nga Gazlavay ta *Mawiz daa anywa nga Sinay zleezle. Bøza hay masa Agar ma yatørwa a tøram beke anda anga.

25 Agar a na, mapakaya anda mejøwey-mey nga Gazlavay masa aa ma jøwa daa anywa nga Sinay daa hwayak nga Arap hay heyey. Aa mapakaya saya anda berney nga *Jeruzelem wure kede, maja ndøhay daa berney a, ata beke nga kwakwas nga Mawiz.

26 Ama Jeruzelem masa da gazlavay da vad na, anga anda Sara, ngwas masa beke ba. Ara anga mama aløkwa.

27 Ara anda mawuzlalakaya daa dferewel nga Gazlavay ma løvey:

«Sesømey Jeruzelem, kah anda ngwas-dørlay
masa ta yey bøzey daa ba.

Wudfey ta meesømey, kah anda ngwas

masa hwad ta car nga mayawa bøzey daa ba,

Maja ngwas-dərlay masa zel e a wuda saba na,
a da hətey bəza hay ga ma fəna nga ngwas ta zel e.»

²⁸ Məlma adaw hay, akwar na, bəza hay nga Gazlavay anda *Izak, bəzey nga ngwas masa beke ba masa Gazlavay ma ləvey zleezle a da vəldara a Abərahəm heyey.

²⁹ Daa ngene, bəzey ma yawa ta fa mewulkey nga ndaw-magədan na, fa sərda banay ta bəzey masa ma yawa ta fa gədan nga *Mesəfney nga Gazlavay. Wure kede, ndəhay fa kamara kəne may.

³⁰ Ama mawuzlalakaya daa dərewel nga Gazlavay, a ləvey na, kwara? A ləvey na: «Bəla ngwas beke la ta bəzey anga. Bəzey nga ngwas masa beke ba na, a da zəma way nga papaha tabiya, ama bəzey nga ngwas beke na, kwa fa da zəmey cek nga papaha daa ba səlak.»

³¹ Yaw, ngwas beke na, aləkwa bəz anga hay ba, ama aləkwa bəza hay nga ngwas masa beke ba ma yamawa ta gədan nga Mesəfney nga Gazlavay.

5

Ndəhay nga Yesu a da təram beke nga kwakwas nga Mawiz saya na, kwara?

¹ *Kəriste ta pəskandakurwa sem dasi har nga *kwakwas nga Mawiz amba ya wakwa ray aləkwa fara fara. Da ray ngene, kam gədan, wam ray akwar, ka da vəlmar cəved a ndaw nga tərdakwar beke nga kwakwas nga Mawiz saba.

² Jəkfamaya sləmay, yah Pawl, ya faa guzlkwar, da ka slam mandawal amba ka səpam kwakwas nga Mawiz saya na, ngene, cek masa Kəriste ma ka ngada akwar na, ara cek nga tede.

³ Yaw, ya fa kətkwar saya, kwa waawa ma təba nga sla mandawal na, si a səpa kwakwas nga Mawiz a tabiya, kwa a mbəkey kwakwas a pal ba.

⁴ Da akwar fa səpam nga tərey maaya fa mey nga Gazlavay ta fa kwakwas nga Mawiz na, ngene, ka ta wudkam sem ta Kəriste. Maaya nga Gazlavay aa da ray akwar daa ba səlak.

⁵ Ala na, ya sərmara Gazlavay a pandar nga ndəhay maaya la fa mey anga maja ala fa pamara Kəriste nga ndaw ala fara fara. Ta fa gədan nga *Mesəfney nga Gazlavay ala fa səkwmarə amba Gazlavay a pandar nga ndəhay maaya fa mey anga ha.

⁶ Yaw, ngada ndaw macəmkaya ta Yesu Kəriste na, ta sla mandawal la, kwa ta sla daa ba na, fa da mbədey cek fa

anğa daa ba. Cek mahura na, ara mepey Yesu Kəriste nğa ndaw fara fara ta mewudəy ndəhay mekele.

⁷ Zleezle na, akwar fa kam gədan nğa daw fa mey fa mey daa cəved nğa Yesu. Kaa wure keđe, ma təkakwar nğa səpa mey masa fara fara na, wa dəba wa?

⁸ Mey hay masa ndəhay maa guzldamara nğa batakwar na, mey hay a, ara mey hay nğa Gazlavay ba, maja ara Gazlavay a ma walakwar.

⁹ Mey hay maaya ba ngene a da zəvey fa mey fa mey, anda cek ma həsla hapa nğa makala na, anğa kuset kədey, ama a həsla hapa nğa makala madakaya cəpa.

¹⁰ Ta ngene he cəpa, ya səra mewulkey akwar na, fa da key wal ta nğa yah daa ba, maja aləkwa tabiya macəmkaya ta Yesu Kəriste. Ndaw masa ma həbkwar ray na, kwa da ara waawa na, Gazlavay a kar sariya la.

¹¹ Məlma adaw hay, ndəhay fa mbərzlafamaya, a ləvam ya fa wuzey mey, ya ləvey si ndəhay a slam mandawal cəngə. Kaa da anda keđe na, a sərdamaya banay maja me dəba me? Ndəhay fa sərdamaya banay cəngə keđe na, a wuzwa fara fara yaa sərkadata ndəhay amba a ləham na, si ta fa meməcey nğa Kəriste fa hwadam mazlangalakaya gway.

¹² Ndəhay ma həbmakwar ray da ray *mesley mandawal na, anja nğa njam anda gənaw hay maanğwadatakaya.

¹³ Məlma adaw hay, Gazlavay a zəlkwar na, amba ka təram ndəhay ma wam ray ata. Ama mewey ray akwar aha na, ta vəkwar cəved nğa key cek hay maaya ba ma bawa daa mewulkey nğa ndaw-magədan na, daa ba. Sasəkar jak, wudam vaw da wuzlah akwar, asaya, jənam vaw da wuzlah akwar.

¹⁴ Kwakwas nğa Mawiz cəpa na, macəmkaya tabiya daa mewey pal ma ləvey: «Si ka wudə meseembew akah anda kah ma wudə ray akah.»

¹⁵ Ama da akwar fa zam vaw da wuzlah akwar, asaya, akwar fa zəmam vaw da wuzlah akwar anda gənaw hay masa-həma na, si ka pam lenğesl, ka mbəkdamara cek hay a ngene, da daa ba na, ka daa zədam ray akwar.

Mey da ray mewulkey nğa ndaw-magədan ta sləra nğa Mesəfney nğa Gazlavay

¹⁶ Ehe, jəkam sləmay, ya fa ləvkwar, vəlmar cəved a *Mesəfney nğa Gazlavay nğa wey da ray akwar. Anda keđe,

akwar fa da kam cek hay maaya ba ma bawa daa mewulkey nga ndaw-magədan na, daa saba.

¹⁷ Cek hay maaya ba masa mevel nga ndaw-magədan ma wufey nga ka na, ata wal ta cek hay masa Mesəfney nga Gazlavay ma wufey ya kakwa. Asaya, cek hay masa Mesəfney nga Gazlavay ma wufey ya kakwa na, ata wal ta cek hay masa mevel nga ndaw-magədan ma wufey nga ka. Cek hay a na, ata wal wal, a cəmam ba. Ara maja ngene, ka gwamara nga key cek mandaw mandaw anda akwar ma wufam ba.

¹⁸ Ama da Mesəfney nga Gazlavay fa wey da ray akwar na, ngene *kwakwas nga Mawiz fa da wey da ray akwar daa saba.

¹⁹ Ya sərkwā fara fara, cek hay masa mevel nga ndaw-magədan ma wufey nga ka na, ara meley-vaw saw, mewulkey mandaw mandaw da ray cek hay ma nəsa ndaw, leŋ mekey cek hay ma ka hwaray.

²⁰ Asaya, cek hay masa mevel nga ndaw-magədan ma wufey nga ka na, ara meney ray a kuley hay, mekey maazla hay maaya ba, merəsey vaw, mewudkey dəy, mekey səleŋ, mecey-mevel kalah, mesəpey nga fəney ndaw mekele, meweley vaw ta weley, leŋ mewudkey dəy ta ndəhay mekele.

²¹ Yaw, cek hay masa mevel nga ndaw-magədan ma wufey nga ka na, mekele daha saya, ara mekey maagway fa cek nga ndaw, mewey ta wuzam, mekusey daa slam a nga key cek hay malamba leŋ mekey cek hay mekele mekele masa malamba anda keđe hay. Ya ta kətkwā la, ama wure keđe, ya kətkwā saya, ndəhay ma kam cek anda keđe hay na, fa da njam da wuzlah ndəhay masa Gazlavay fa wey da ray ata na, daa ba.

²² Ama da Mesəfney nga Gazlavay fa wey da ray ndaw na, ndaw a, a key sləra maaya, anga anda wudez ta slaslalay maaya ma yey babəza. Cek hay maaya ma sawa ta fa Mesəfney nga Gazlavay na, ara mewufey-vaw, meesəmey, zazay, mebəsey banay, mesərey dey-ceceh fa ndaw, mekey maaya, mekey cek ta cəved e mandaw mandaw,

²³ metərey nga ndaw meekwed-mey, leŋ mewey vaw fa mekey cek hay saw. Yaw, kwakwas nga Mawiz na, a təkta ndəhay nga key cek hay anda keđe ba.

²⁴ Ndəhay nga Yesu *Kəriste na, ta mbəkdamara cek hay maaya ba masa ata ma wufam nga kamara sem. A

mbəkdamara na, ara anda a dərmatə cek hay maaya ba ha fa hwadam mazlaŋgalakaya.

²⁵ Ara Mesəfney ŋga Gazlavay ma vəlndakwar menjey mawiya. Da ray ŋgene, vəlkwār cəved a Mesəfney ŋga Gazlavay a ŋga wey da ray aləkwa.

²⁶ Ya da gəlkwā ray ba, ya da padatakwa ndəhay mekele ŋga cek hay saw ba, asaya, ya da kakwa səleŋ da wuzlah aləkwa ba may.

6

Mey da ray ndəhay ŋga Yesu ma da jənam vaw

¹ Məlma adaw hay, da ka hətam ndaw da wuzlah akwar fa key mebərey na, ara akwar ndəhay masa ta *Mesəfney ŋga Gazlavay da ray keđe ma da jənmara ndaw aha, ma da vəhdəmərwa aa cəved maaya. Ama ka da jənmara ha na, ta mevel maaya ta mey maakwad a. Kwa waawa da wuzlah akwar ŋga wey vaw maja a da tədey aa mebərey ŋga ndaw aha.

² Da banay da wuzlah akwar daha na, jənam vaw. Da masa akwar fa kamara kəne na, a key ŋgene, ka namar ray a mewey ŋga *Kəriste.

³ Da ndaw a wulkey aŋga mahura, anja aŋga mahura ba na, a key ŋgene, a bəmey ray aŋga.

⁴ Kwa waawa ŋga nəka menjey aŋga. Da a nəka aa maaya na, ŋgaa səmey da ray menjey aŋga ha gway, ba na, a da wulkey da ray menjey ŋga ndaw mekele ba.

⁵ Yaw, kwa waawa ŋga nəkey dey fa sləra aŋga masa Gazlavay ma vəldara.

⁶ Asaya, kwa waawa maa sərkey mey ŋga Gazlavay na, maaya a wunkamara cek aŋga hay ta ndaw maa sərkada ha.

Mey-menjey da ray menjey ŋga ndaw ta makawa cek hay da ley

⁷ Ka da bəmam ray akwar ba, Gazlavay a wudəy ndaw ŋga kada wasa ba. Cek wura wura masa ndaw ma sləka a ley na, a da kawa da ley a na, cek aha.

⁸ Anda meləvey, da ndaw a key cek ma mbafar a vaw aŋga daada gway na, ŋgene, a daa zədda ray aŋga. Ama da a key cek ma mbafar a *Mesəfney ŋga Gazlavay na, ŋgene, a da hətey heter mēndəvey ba ma sawa ta fa Mesəfney ŋga Gazlavay a.

⁹ Da anda kede na, si ya kakwa cek hay maaya ngada ndohay, ya da gerkwa ba. Fara fara, da masa ya ta gerkwa daa ba, pas a ma wuswa cay na, ya hokwa mawurbay nga slora alakwa la.

¹⁰ Anda kede, daa masa alakwa ma hokwa har la kaa na, kakwa maaya a ndohay tabiya. Kakwa maaya ma fona saya na, ngada ndohay ma toba mey nga Yesu *Koriste.

Mey nga madagway-dakw

¹¹ Nəkmara, mey nga madagway-dakw kede na, mawuzlalakaya mahura mahura, *ara yah ma wuzlalakwara ta har adaw.*

¹² Ndohay daha fa təkmaƙwar day nga səpey *kwakwas nga Mawiz ta fa *mesley mandawal. A təkmaƙwar day a na, maja mewulkey nga ndaw-magədan gway. A kamara anda kede na, a wudam ndohay aa həmdamata. Asaya, a wudam nga wuzey mey da ray meməcey nga *Koriste fa hwadam mazlangalakaya ba, maja ndohay *Jəwif hay a da sərdamata banay.

¹³ Kwa ndohay ma sla mandawal hay a ta ray ata na, fa namar ray a kwakwas nga Mawiz tabiya daa ba. A wudam si ka slam mandawal na, amba a zlapam da ray akwar maja akwar ma təbmara mey ata.

¹⁴ Yah na, ya faa səmey si da ray meməcey nga Bay alakwa Mahura Yesu Koriste fa hwadam mazlangalakaya gway, kwa ya faa səmey da ray cek mekele na, daa ba. Maja meməcey nga Yesu Koriste fa hwadam a na, ya nəkta cek hay da bəla kede anda cek hay nga tede fa mey adaw. Yah may, anda ndaw ma məcey fa hwadam mazlangalakaya masa ta mbəkdata cek hay da bəla sem.

¹⁵ Kwa ndaw ta sla mandawal la, kwa ta sla daa ba na, fa da mbədey cek daa ba. Cek mahura na, ara Gazlavay ma tərdandakwar nga ndohay mawiya.

¹⁶ Anja Gazlavay nga vəltar zazay, nga sərfatar dey-ceceh a ndohay ma səpmara mey a kede, leŋ a ndohay daa səkway nga *Israyel masa ma təbmara mey nga Gazlavay fara fara.

¹⁷ Dəga wure kede, anja ndaw nga həbya ray saba maja vevek * nga mbəlek fa vaw adaw fa wuzdərwa yah ndaw nga Yesu.

6:9 6.9 2Tes 3.13 **6:10 6.10** Jan 13.34; Rm 12.10; 13.8; 14.15; 1Kwr 8.1; *fəsalawal* 13; 2Kwr 8.7-8; Gal 5.6, 13-14; Ef 5.2; Fəl 2.2; 1Tes 3.12; 4.9; 1Tm 1.5; Heb 13.1; 2Pi 1.7 **6:11 6.11** 1Kwr 16.21 **6:12 6.12** 5.2, 11 **6:14 6.14** 1Kwr 1.23, 29, 31; 2.2; Gal 2.19 **6:15 6.15** 5.6; Rm 6.3-4; 2Kwr 5.17; Ef 4.24
6:16 6.16 Ps 125.4-5 * **6:17 6.17** vevek: vavay, vevəlek **6:17 6.17** 2Kwr 4.10

¹⁸ Məlma adaw hay, anja maaya nga Bay aləkwa Mahura Yesu Kəriste nga njeý ta akwar tabiya. *Amen.

Leeter masa Pawl ma wuzlalatar a Efez hay Mey da ray Leeter ngada Efez hay

Leeter e keɗe na, ara Pawl ma wuzlalatar ngada ndəhay daa mecəmey-ray nga Yesu daa berney nga Efez, asaya ngada ndəhay daa mecəmey-ray hay mekele mekele nga Yesu daa berney hay gweegwe ta Efez e. Pawl a wuzlala leeter e na, daa masa anɗa daa fərsəne. A kəzlamara aa fərsəne he na, maja anɗa ma wuzey Mey-maaya-mawiya. Ma handa leeter e a Efez na, ara Tisik (6.21).

Pawl a sərta ndəhay mekele mekele daa mecəmey-ray nga Yesu da Efez na, maja ta wuzey mey nga Gazlavay la fetede mevey maakar (SNM 19-20).

Mey mahura masa daa leeter keɗe na, ara cek masa Gazlavay ma wudey nga ka (1.10). «Cek masa aa ma wudey nga ka ha na, ara mecəmey ray nga cek hay da gazlavay da vad ta cek hay da bəla tabiya asi har nga Bay pal, Kəriste.» Cek masa aa ma wudey nga ka ha, a da key na, ta fa mecəmey-ray nga ndəhay nga Yesu.

Daa leeter keɗe na, Pawl aa guzley da ray Gazlavay ma wudta ndəhay kalah (1-2.10). Fa dəba ha, aa guzley da ray Jəwif hay ta Jəwif hay ba hay ma təram nga səkway pal ta fa Kəriste (2.11–3.13). Pawl a kətata Efez hay amba a njam maaya maaya, a təbmara mey nga Yesu ma fəna ma fəna, a njam anda ata ma njam zleezle saba (fasəlawal 4 haa 6).

Daa leeter e keɗe na, mey mekele mekele daha nga vəley gədaŋ a ndəhay:

Gazlavay ta kandakwar maaya la ta fa Yesu Kəriste
(fasəlawal 1 haa 2)

Si zel hay a wudmata ngwas ata hay, ngusay a namatar
ray a zel ata hay (5.22-33)

Mey da ray ma key vərəm ta bay-malula (6.10-20)

Mecey-har nga Pawl a Efez hay

¹ Ara yah, Pawl, ma wuzlalakwara leeter keɗe, yah ndaw masa *Gazlavay ma wala nga key *ndaw-meslərey nga *Yesu *Kəriste.

Leeter keɗe ara ngada akwar, ndəhay nga Gazlavay daa berney nga Efez, akwar macəmkaya ta Yesu Kəriste, asaya, akwar ma təbmara mey anɗa ta mevel pal.

² Anja Papa aləkwa, Bay Gazlavay, ta Bay aləkwa Mahura Yesu Kəriste n̄ga pəsmakwar mey, asaya n̄ga n̄jadamakwar daa zazay.

Cek hay maaya masa Gazlavay ma vəldatara a ndəhay ta fa Yesu Kəriste

³ Həlmakwa Gazlavay, Papan̄ n̄ga Bay aləkwa Mahura Yesu *Kəriste. Mepəsey-mey an̄ga kwa wura wura ma sawa ta da vad̄, aa da ray aləkwa. Ya hət̄kwa mepəsey-mey a na, maja aləkwa macəmkaya ta Kəriste.

⁴ Sərfadamara, dəga Gazlavay ta ləma bəla daa ba aran̄ na, ta walandakwar sem n̄ga cəmey ta Kəriste, amba ya tər̄kwa ndəhay maaya fa mey an̄ga, ndəhay masa ta mebərey ba. Gazlavay a wud̄ndakwar kalah,

⁵ maja n̄gene, ta walandakwar sem dəga zleezle n̄ga tərey bəz an̄ga hay ta fa Yesu Kəriste. Gazlavay a ka kəne na, maja ta mbafar la, a wud̄fey n̄ga ka kəne.

⁶ Da ray n̄gene, həlmakwa Gazlavay maja aa ma wud̄ndakwar kalah. A wuzdərwa mewud̄fey-vaw a na, ta fa sləra masa Bəzey an̄ga mawud̄kaya kalah ma ka n̄gada aləkwa.

⁷ Maja aləkwa macəmkaya ta Kəriste na, Gazlavay ta ləhdandakurwa sem dasi har n̄ga bay-malula, asaya, ta mbək̄dandakwara mebərey sem ta fa mambaz n̄ga Yesu ma mbədfwa daa meməcey an̄ga. Anda ked̄e, Gazlavay a wuzdandakwara mesərey dey-ceceh an̄ga ta mewud̄fey-vaw an̄ga ha na, aa ga kalah n̄gada aləkwa.

⁸ Ta kandakwar maaya la ga kalah, ta vəln̄dakwar ləngesl maaya la,

⁹ ta wuzdandakwara cek masa maʔadəkaya dəga zleezle sem, anda meləvey, cek masa aa ma wud̄fey n̄ga ka ta fa Kəriste.

¹⁰ Ta pas masa d̄ar a ta wuswa cay na, a da ndəvda cek masa aa ma wud̄fey n̄ga ka ha. Cek masa aa ma wud̄fey n̄ga ka ha na, ara n̄ga cəmtar ray a cek hay da gazlavay da vad̄ ta cek hay da bəla tabiya asi har n̄ga Bay pal, Kəriste.

¹¹ Gazlavay ta wud̄fey sem amba cek hay tabiya a kam maaya maaya anda an̄ga ma wud̄fey n̄ga ka. Ta wud̄fey sem dəga zleezle n̄ga walandar ala *Jəwif hay wal amba ya təram ndəhay an̄ga hay macəmkaya ta Kəriste.

1:3 1.3 2.6; 2Kwr 1.3 **1:4 1.4** 5.27; Jan̄ 15.16; 17.24; 2Tes 2.13 **1:5 1.5**
 Jan̄ 1.12 **1:6 1.6** Mt 3.17; Rm 5.2; Kwa 1.13 **1:7 1.7** meləhey dasi har n̄ga
 bay-malula: Kwa 1.13-14; **mambaz:** Ef 2.13; Rm 3.25-26; Kwa 1.20; 1Jn̄ 5.7;
mewud̄fey-vaw an̄ga ga kalah: Ef 2.7 **1:9 1.9-10** 1.22; Kwa 1.16, 20 **1:11**
1.11 1.4; Rm 8.28-29

¹² Da ray ngene, ala ndəhay masa ngeeme ma pamara Kəriste nga ndaw ala fara fara na, ala fa həlmamara Bay Gazlavay maja maaya anğa kalah.

¹³ Akwar ndəhay masa Jəwif hay ba hay may, akwar ta cəndamara *Mey-maaya-mawiya la. Ara mey maaya fara fara ma ləhdakwar maja akwar ma pamara Kəriste nga ndaw akwar fara fara. Maja ngeene, Gazlavay ta vəkwar Mesəfney anğa la a ray akwar anda aa ma ləvey zleezle a da vəldatara a ndəhay anğa hay. Mesəfney a na, ara anda cek matəhkaya fa danğay nga sərey akwar na, ndəhay anğa hay.

¹⁴ Maja aləkwa ma hətkwa *Mesəfney nga Gazlavay na, ya sərkwara fara fara Gazlavay a da vəldandakwara cek hay maaya tabiya masa anğa ma ləvey a da vəldatara a ndəhay anğa hay heyey. Ya da hətkwa cek hay a na, daa masa aləkwa ta ləhkwa cay daa cek hay maaya ba da bəla kefe * . Anda kefe, həlmakwa Bay Gazlavay maja aa ta gədan.

Pawl a kar suse a Gazlavay daa medərey-danğay

¹⁵ Anda kefe, dəga yah ma cənda akwar fa təbmara mey nga Bay aləkwa Mahura Yesu, ta akwar fa wudmata ndəhay nga Gazlavay cəpa na,

¹⁶ ya fa key suse a Gazlavay maja akwar mandaw mandaw. Daa masa ya fa dərey danğay a Gazlavay na, ya fa sərfadakwar.

¹⁷ Ya fa dərey danğay a Gazlavay nga Bay aləkwa Mahura Yesu *Kəriste. Gazlavay a, ara Papan ta gədan. Yaa cəfda amba a vəkwar lenğesl, a wuzdakwara ray anğa amba ka sərmara maaya maaya.

¹⁸ Asaya, ya faa cəfda Gazlavay amba a pa mewedey anğa aa mevel akwar, amba ka sərmara cek hay maaya kalah masa aa ma da vəldakwara. Da ray ngeene, cek hay maaya kalah ha na, akwar fa səkwara maja ka sərmara ka hətam la fara fara. Ka hətam la fara fara, maja Gazlavay a zəkwar nga tərey bəz anğa hay. Ya faa cəfda saya amba ka sərmara mepəsey-mey anğa masa maaya ara mey ba, masa aa ma diya amba a vəldatara a ndəhay anğa hay.

¹⁹ Asaya, ya faa cəfda Gazlavay amba ka sərmara gədan anğa ma jəndakwar, aləkwa ndəhay ma təba mey nga Yesu. Gədan anğa ha na, a fənta gədan hay nga cek hay tabiya.

1:13 1.13 4.30; 2Kwr 1.22; Kwa 1.5 * **1:14 1.14** Ya da hətkwa cek hay maaya tabiya masa Gazlavay ma ləvey a da vəldakwara na, ta pas masa Bay Mahura Yesu ma da vəhwa a bəla (Rm 8.23). **1:14 1.14** 4.30; 2Kwr 1.22 **1:16 1.16** Kwa 1.3 **1:17 1.17** 5.17; MM 2.6; Kwa 1.9-10 **1:18 1.18** 4.4; Kwa 1.12 **1:19 1.19-20** 2Kwr 13.4; Kwa 2.12

²⁰ Ara gədan masa ma sləkɗadərwa Kəriste daa meməcey. Ara gədan a saya ma təpda Kəriste he a vad ŋga njeɣ aa slam maaya ta har-zəmay ŋga Gazlavay.

²¹ Fetede, Kəriste he fa wey da ray mesəfney hay maaya ta maaya ba hay tabiya masa ma wam da ray cek hay tabiya da vad ta da bəla. Gədan ŋga Yesu na, a fənta gədan ŋga bay hay tabiya ma wam wure keɗe da bəla ta ŋga bay hay tabiya ma da wam ŋgada fa mey.

²² Ahaw, Gazlavay ta pata cek hay tabiya sem asi har ŋga Kəriste. Asaya a pa Kəriste ŋga *bay-ray ŋga mecəmey-ray ŋga ndəhay aŋga hay.

²³ Yaw, mecəmey-ray ŋga ndəhay aŋga hay na, ara anda vaw aŋga. Kəriste fa wuzwa vaw a ndəhay tabiya da bəla. A wuzwa vaw na, ta fa mecəmey-ray ŋga ndəhay aŋga hay a. Ara aŋga ma vəltar heter a cek hay tabiya kwa daa wura daa wura cəpa.

2

Gazlavay a vəɗndakwar heter na, ta fa Yesu

¹ Zleezle masa akwar ta təbmara mey ŋga *Kəriste daa ba araŋ na, akwar anda ndəhay maməctakaya, maja akwar ta mebərey, akwar fa kam cek hay malamba.

² Daa ŋgene, menjeɣ akwar na, maaya ba, anda ndəhay da bəla keɗe ma sərmara Gazlavay ba. Akwar fa təbmara mey ŋga *Sataŋ, bay-malula, ma wey da ray mesəfney maaya ba hay ma pəkam daa memed da bəla. Bay-malula ha na, aŋga fa wata ndəhay ma rəsmara mey ŋga Gazlavay haa wure keɗe.

³ Daa masa aləkwa ma təbkwa mey ŋga Kəriste daa ba araŋ na, aləkwa kəne may, maja daa ŋgene na, ya kakwa cek hay maaya ba tabiya anda mevel aləkwa ma wudəy. Aləkwa fa kakwa cek hay tabiya anda lenɡesl aləkwa ta vaw aləkwa ma wudəy. Maja cek hay maaya ba hay a na, Gazlavay a da ceɣ mevel ga a ray aləkwa anda aa ma ceɣ mevel a ray ndəhay siya may.

⁴ Ama Gazlavay na, ara ndaw ma sərey dey-ceceh fa ndaw. Ta wudndakwar la ga kalah.

1:20 1.20 SNM 2.33; Kwa 3.1 **1:21 1.21** 6.12; Rm 8.38; Gal 4.8-9; Kwa 1.13, 16, 20; 2.9-10, 15, 20 **1:22 1.22** 1.10; 4.15; 5.23; Ps 8.7; Kwa 1.18; 2.19 **1:23 1.23** mecəmey-ray ŋga ndəhay ŋga Yesu ara anda vaw aŋga: 2.16; 4.1-16, 25; 5.30; 1Kwr 12.4-11, 27; Kwa 2.19; **Kəriste aa daa mecəmey-ray ŋga ndəhay aŋga hay:** 2.14, 18; 4.1-6; Kwa 3.15; **Gazlavay a njeɣ ta ndəhay aŋga hay:** 3.19; 4.10 **2:1 2.1** 2.5 **2:2 2.2** 6.12; Jaŋ 12.31; 14.30; SNM 26.18; 1Jŋ 2.16 **2:3 2.3** 5.6, 8; Rm 1.28; Kwa 3.6 **2:4 2.4** Rm 8.39; 9.16; Jak 5.11

⁵ Da ray ηgene, kwa daa masa aləkwa anda ndəhay maməctakaya maja mebərey aləkwa na, Gazlavay ta cəmdakwar la ta Kəriste, ta vəlndakwar heter mawiya la. Sərfadamara, ara ta fa maaya ηga Gazlavay a, akwar ma ləham daa mebərey.

⁶ Gazlavay ta sləkfdandakurwa sem daa meməcey daa slam a ta Yesu Kəriste na, maja aləkwa macəmkaya ta Kəriste he. Asaya, ta njadandakwar sem daa slam a ta anga da gazlavay a vad ηga wey da ray cek hay tabiya.

⁷ A wuzdərwa maaya anga ηgada aləkwa ta fa Yesu Kəriste anda keđe na, amba a wuzdatara a ndəhay ηgada fa mey, mesərey dey-ceceh anga ta mewudəy-vaw anga ha na, anga ga kalah.

⁸ Yaw, ara ta fa maaya anga ha Gazlavay ma ləhdakwar daa mebərey maja akwar ma təbmara mey ηga Yesu. Akwar ma ləham a na, ara ta gədan akwar ba, ama ara Gazlavay ma vəldakwara gədan ηga ləhey a.

⁹ Gazlavay ma ləhdakwar na, ara maja sləra akwar maaya masa akwar ma kamara ba. Anda keđe, ka da zlapam maja ba.

¹⁰ Yaw, ara Gazlavay ma ka amba ya cəmkwa ta Yesu Kəriste. Da ray ηgene, Gazlavay ta vəlndakwar heter mawiya la amba ya kakwa sləra hay masa maaya kalah. Sləra hay masa maaya hay a na, Gazlavay ta dīyndakwara cay amba ya kakwa.

Jəwif hay ta Jəwif hay ba hay macəmkaya pal ta fa Yesu Kəriste

¹¹ Da ray ηgene, wulkam, zleezle akwar na, kwara? Akwar ta yamawa daa səkway ηga *Jəwif hay daa ba. Jəwif hay a, a zəlmakwar na, ndəhay manda-sla mandawal hay. Ata na, a ləvam ata ndəhay maslatakaya mandawal. Ama *mesley mandawal na, ara cek masa ndəhay ma kamara fa vaw ata hay gway.

¹² Ahaw, daa ηgene na, akwar dərən ta *Kəriste, *ndaw masa Gazlavay ma wala ηga ləhdata ndəhay. Akwar na, ndəhay daa səkway ηga *Israyel hay ba, akwar məlak hay. Akwar daa *mejəwey-mey ηga Gazlavay ta Israyel hay daa ba. Daa mejəwey-mey a, Gazlavay a ləvtar a da njeý ta ata ηga mandaw mandaw. Akwar manjatakaya da bəla, Gazlavay aa ta akwar daa ba, ka njam na, ηga ray akwar gway.

2:5 2.5 2.8; Rm 3.24; 6.13; Kwa 2.12-13 **2:6 2.6** 1.3; Kwa 2.12; 3.1 **2:7 2.7** 1.7; Rm 5.20 **2:8 2.8** Mt 20.15; Janj 4.10; SNM 15.11; Gal 2.16 **2:9 2.9** Rm 3.28; 1Kwr 1.31; 2Tm 1.9; Tit 3.5 **2:10 2.10** Tit 2.14 **2:11 2.11** 5.8; **mesley mandawal:** Gal 5.6; Fəl 3.3 **2:11 2.11-13** Rm 11.17 **2:12 2.12** Rm 9.4; 1Kwr 15.19; Kwa 1.21-22; 1Tes 4.13; **Gazlavay aa ta akwar ba:** 2.19

13 Ama akwar masa dāreŋ ta Gazlavay heyey na, wure kede, akwar macəmkaya ta Yesu Kəriste. Gazlavay ta ŋgəchadakurwa la a cakay a, ta fa mambaz ŋga Kəriste ma mbədwa daa meməcey aŋga.

14 Fara fara, ara Kəriste ta ray aŋga ma handərwa zazay a wuzlah aləkwa. A handərwa zazay a daa masa aŋga ma cəmtar dāy a ndəhay Jəwif hay ta ndəhay Jəwif hay ba hay, ŋga key səkway pal. Zleezle na, ndəhay Jəwif hay ta ndəhay Jəwif hay ba hay a ŋgəlam vaw ba. Menḡəley-vaw ata ba ŋgene na, ta tərey sem anda zleŋger da wuzlah ata ma wunkata. Anda kede, ta fa meməcey ŋga Yesu na, zleŋger e, ta pəlhey sem.

15 *Kwakwas ŋga Mawiz na, mewey hay ga da hwaɗ a daha. Ama Kəriste ta ŋgəchada kwakwas a sem ta cakay, amba a cəmtar dāy ŋga ndəhay Jəwif hay ta ndəhay Jəwif hay ba hay ŋga tərey səkway pal macəmkaya ta aŋga. Ara maja ŋgene, zazay daha da wuzlah səkway hay cew e.

16 Ta fa meməcey aŋga fa hwadam mazlaŋgalakaya na, Kəriste ta vavəsa menḡəley-vaw ba da wuzlah səkway hay cew kede heyey sem ŋga tərey səkway pal. Anda kede, ta fa meməcey aŋga ha na, ta cəmtar dāy cay ta Gazlavay.

17 Kəriste a sawa na, ŋga wuzey *Mey-maaya-mawiya ma handawa zazay ŋgada akwar Jəwif hay ba hay ma sərmara Gazlavay ba zleezle, ta ŋgada ala Jəwif hay masa ma sərmara Gazlavay.

18 Yaw, ara ta fa Kəriste he aləkwa cəpa ma hətkwa cəved ŋga daw a cakay Gazlavay, Papan, ta fa gədan ŋga Mesəfney aŋga pal.

19 Anda kede, akwar ndəhay masa Jəwif hay ba hay na, akwar mələk hay saba, akwar maslah hay saba. Ama wure kede na, akwar səkway pal ta ndəhay ŋga Gazlavay, akwar ndəhay daa vəgeɗ ŋga way pal ta ndəhay ŋga Gazlavay.

20 Akwar na, anda aŋgwa hay ma dəzla way. Salay ŋga way a na, ara ndəhay meslərey ŋga Yesu ta ndəhay ma təla mey ŋga Gazlavay. Yesu Kəriste ta ray aŋga na, ara aŋgwa mahura ma vəlar gədan a way a.

21 Ara ta fa Yesu Kəriste he, way a ma njeɣ maaya maaya ta gədan, a səkey, a key mahura amba way a, a tərey way ŋga Bay Gazlavay.

2:13 2.13 akwar masa dāreŋ ta Gazlavay: 2.17; 3.6; **mambaz:** 1.7; Gal 1.4
2:14 2.14 zazay: 2.16; 4.3; Kwa 1.20; **aləkwa səkway pal maja Yesu:** 1.23;
 Rm 10.12; 1Kwr 12.13; Gal 3.28 **2:15 2.15** 2Kwr 5.17; Kwa 2.14 **2:16 2.16**
 1.23; Rm 5.10; Kwa 1.20-22 **2:17 2.17** Iz 57.18-19; SNM 2.39 **2:18 2.18** 3.12;
 Rm 5.2 **2:19 2.19** 2.12; 3.6; Heb 12.22-23 **2:20 2.20** Mt 16.18; 1Kwr 3.10-11;
 CWJ 21.14 **2:21 2.21** 1Kwr 3.16

²² Maja akwar macɛmkaya ta Kɛriste na, Kɛriste he ta cɛmkwar la ta ndɛhay anɔa hay mekele amba akwar may, ka tɛram anda way a. Ara way masa Gazlavay ma nɔey da hwad a ta fa Mesɛfnɛy anɔa.

3

Pawl a wuzɛy Mey-maaya-mawiya nɔada ndɛhay Jɛwif hay ba hay

¹ Ara maja nɔgene, yah Pawl, ya fa dɛrey dangay maja akwar mandaw mandaw. Yah daa fɛrsɛne maja slɛra nɔa Yesu *Kɛriste, masa yah ma ka nɔada akwar *Jɛwif hay ba hay.

² Akwar ma cɛndamara mey da ray slɛra masa Gazlavay ma vɛldiwa nɔa key maja akwar la, ba diya? A vɛldiwa slɛra ha na, maja maaya anɔa.

³ Gazlavay ta wuzdiwa mey masa mabadakaya dɛga zleezle sem amba ya sɛra mey a. Yaw, daa leeter kedɛ na, ya taa guzlkwar la nekɛdɛy da ray mey mabadakaya ha.

⁴ Masa akwar fa janɔamara leeter he na, ka sɛmra la, yah na, ya sɛra mey masa mabadakaya da ray Kɛriste maaya maaya.

⁵ Zleezle na, Gazlavay ta wuzdatara mey mabadakaya ha a ndɛhay daa ba. Ama wure kedɛ, ta wuzdatara la ta fa Mesɛfnɛy anɔa nɔada ndɛhay masa aa ma walata wal nɔa tɛrey ndɛhay meslɛrey nɔa Yesu ta nɔa tɛrey ndɛhay ma tɛla mey anɔa hay.

⁶ Ehe, mey mabadakaya ha na, a lɛvey Jɛwif hay ba hay na, a hɛtam cek hay maaya masa Gazlavay ma dɛytara nɔada ndɛhay anɔa hay la letɛk ta ndɛhay Jɛwif hay. Jɛwif hay ba hay ta Jɛwif hay na, ta tɛram sem anda vaw pal ta fa Kɛriste. Asaya, cek masa Gazlavay ma lɛvey a da vɛldatara a ndɛhay anɔa hay na, ndɛhay Jɛwif hay ba hay a da hɛtam letɛk anda ndɛhay Jɛwif hay may. A hɛtam cek hay maaya kedɛ na, maja ata ma tɛbmara *Mey-maaya-mawiya, asaya, maja ata macɛmkaya ta Yesu Kɛriste.

⁷ Mey-maaya-mawiya ha na, Gazlavay ta paya la nɔa wuzda a ndɛhay maja maaya anɔa. Ara ta fa gɛdan anɔa, yah ma tɛrey ndaw ma ka slɛra anɔa ha.

⁸ Yah na, ndaw mecɛhe da wuzlah ndɛhay nɔa Gazlavay tabiya. Ta nɔgene he cɛpa, Gazlavay ta sɛrfaya dey-ceceh la, ta paya la nɔa wuzɛy Mey-maaya-mawiya a ndɛhay Jɛwif hay ba hay. Ya fa wuzdatara mɛpɛsey-mey ma sawa ta fa

Køriste. Cek maaya daa mepøsey-mey a tabiya na, ndaw-magədan̄ a gwa a səra ba.

⁹ Asaya, a paya nga wuzda mey mabadakaya zleezle heyey a ndəhay tabiya, amba a səmra cek hay a, a da kam na, kwara. Ara Gazlavay, ndaw ma ləma slam da vad̄ ta slam da hwayak, ma b̄ada mey a dəga zleezle.

¹⁰ Ama wure kefe ta wuzdərwa sem ta fa ndəhay daa *mecəmey-ray nga ndəhay nga Yesu. A wuzdərwa ta fa ata na, amba maslan̄ an̄ga hay da vad̄ ta *bay-ray ata hay a səmra len̄gesl maaya nga Gazlavay ma sərey cek hay mekele mekele cəpa.

¹¹ Dəga bəla ta zlar nga ləmey daa ba aran̄ na, Gazlavay a, a ka kəne maja ta wud̄ey sem. A ka na, ta fa Yesu Køriste, Bay aləkwa Mahura.

¹² Anda kefe, ya gwakwa nga ngəchakwa asi har nga Bay Gazlavay ta mandərzay daa dey daa ba maja aləkwa macəmkaya ta Yesu Køriste, asaya, maja aləkwa ndəhay ma pamara Yesu nga ndaw aləkwa fara fara.

¹³ Maja n̄gene, ya kakwar ambahw, ka da məcmara vaw akwar maja yah ma sərey banay maja akwar ba. Banay yah ma səra kefe na, sasəkar jak a da kakwar maaya n̄gada fa mey.

Mey da ray mewud̄ey-vaw nga Yesu Køriste

¹⁴ Ara maja n̄gene, yah ma regedey fa mey nga Gazlavay Papan̄, nga dərar dangay maja akwar.

¹⁵ Ara an̄ga ma patar mezəley a səkway hay da gazlavay da vad̄ ta da bəla cəpa, maja an̄ga Papa aləkwa.

¹⁶ Gazlavay aa ta gədan̄, cek hay tabiya ata dasi har an̄ga. Da ray n̄gene, ya fa dərar dangay amba a vəlkwar gədan̄ ta fa Mesəfney an̄ga. Anda kefe, gədan̄ an̄ga ha nga n̄jey daa akwar ma fəna ma fəna.

¹⁷ Anja *Køriste nga n̄jey daa mevel akwar maja an̄ga ndaw akwar fara fara. Asaya, anja akwar nga wud̄mara Gazlavay, anja akwar nga wud̄am vaw da wuzlah akwar. Da akwar fa wud̄am vaw kəne na, ka da hətam gədan̄ anda wudez masa slaslalay a dərən̄ daa vəged̄, da daa ba, anda way maləmkaya maaya maaya wurza ha mapakaya ta an̄gwa.

¹⁸ Anda kefe, akwar ta ndəhay nga Gazlavay siya, ka səmra la, Yesu Køriste na, fa wud̄ndakwar kalah. Ka səmra la, mewud̄ey-vaw an̄ga ha na, kwakway a daa ba.

¹⁹ Ahaw, mewudfey-vaw anğa ha na, ta fəna lenğesl nga ndaw-magədan sem. Ama ya fa dərey danğay amba ka sərmara mewudfey-vaw anğa ha fara fara cənğa. Anda kefe, ka da hətam menjey maaya letək anda nga Gazlavay, asaya, Gazlavay a, ray anğa, a da njej ta akwar mandaw mandaw.

²⁰ Yaw, Gazlavay a, a gwa nga vəlndakwar cek ma fəna masa aləkwa maa cəfdafakwar, asaya, a gwa nga kandakwar cek masa ma fəna mewulkey aləkwa, maja anğa fa key sləra daa mevel aləkwa ta gədan anğa.

²¹ Həlmakwa Bay Gazlavay maja ndəhay daa *mecəmey-ray nga ndəhay nga Yesu lenj maja Yesu Kəriste he ray anğa. Anja ndəhay nga həlmamara Gazlavay nga sərmataw. *Amen.

4

Mey da ray mecəmey-ray nga ndəhay nga Yesu

¹ Maja cek hay tabiya masa Gazlavay ma kakwara ta fa *Kəriste na, yah Pawl, ya fa kətkwar, yah ndaw masa daa fərsəne maja Bay aləkwa Mahura. Akwar masa Gazlavay ma zəlkwar nga tərey bəz anğa hay na, ya fa kətkwar amba menjey akwar a key anda aa ma wudfey.

² Anda meləvey, daa cek hay masa akwar ma kamara cəpa na, kamara ta meney ray, ta meekwed-mey, ka da cam mevel saw saw ba. Da ndəhay da wuzlah akwar ta kamakwar cek hay maaya ba la na, bəsmara gway, wudam vaw da wuzlah akwar.

³ *Mesəfney nga Gazlavay ta cəmkwar ray la pal. Anda kefe, kam gədan amba ka njam macəmkaya daa zazay.

⁴ Aləkwa ndəhay daa *mecəmey-ray nga ndəhay nga Yesu na, aləkwa ma tərkwə sem anda vaw pal. Ara Mesəfney nga Gazlavay pal da ray aləkwa. Asaya, aləkwa masa Gazlavay ma zəlndakwar na, aləkwa fa səkwakwa cek hay maaya letək masa Gazlavay ma da vəldataa a ndəhay anğa hay.

⁵ Bay aləkwa Mahura, anğa pal. Mey masa aləkwa ma təbkwa, anğa pal. *Baptem, anğa pal.

⁶ Gazlavay masa aləkwa ma nakwar ray may, anğa pal. Anğa Papa aləkwa tabiya, fa wey da ray aləkwa tabiya, fa key sləra da wuzlah aləkwa tabiya, asaya, aa daa mevel aləkwa tabiya.

3:19 3.19 1.23; 5.2, 25; 2Kwr 5.14; Kwa 2.9-10 **3:20 3.20** Kwa 1.29 **4:1 4.1**
 3.1 **4:2 4.2** 5.2; Rm 8.13; Gal 6.8; Kwa 3.9; Kwa 3.12-13 **4:3 4.3** 2.14-16; Kwa
 3.14-15 **4:4 4.4** 1.23; 2.18 **4:5 4.5** Jan 10.16; 1Kwr 8.6; **baptem:** Mt 28.19;
 Rm 6.3-4 **4:6 4.6** 1Kwr 12.6

⁷ Ama Kəriste ta vəlndakwar gədan la wal wal nga key sləra anğa. A vəldandakwara gədan a na, ta har cew cew, anda aa ma wudəy nga vəlda sləra a ndaw a, a ndaw a.

⁸ Ara maja nğene, mawuzlalakaya daa dferewel nga Gazlavay, a ləvey:

«Daa masa anğa ma təpey a vad na,

Ta handata masa-gəra anğa hay

masa aa ma kərzatərwa daa vəram la.

Fa dəba ha, ta', a vəley cek hay mekele mekele a ndəhay.»

⁹ Yaw, mey ma ləvey: «Anğa ma təpey a vad na,» a wudəy nga ləvey kwara? Mey a, a wudəy nga ləvey na, Kəriste ta pawa salay la a bəla fedə dğay.

¹⁰ Kəriste ma pawa salay a bəla heyey na, ara anğa saya ma təpey a vad haa a wusey a cakay Bay Gazlavay, amba a wey da ray cek hay kwa daa wura daa wura cəpa.

¹¹ Gədan masa wal wal a na, ara Kəriste he ta ray anğa ma vəltar a ndəhay. A vəltar gədan a siya hay nga tərey ndəhay meslərey anğa hay, siya hay nga tərey ndəhay ma təla mey nga Gazlavay, siya hay may nga wuzey *Mey-maaya-mawiya a ndəhay. Siya hay saya a vəltar gədan nga tərey anda mecəkwer hay nga ndəhay ma təba mey nga Yesu, aa sərkadamata ndəhay da ray mey nga Gazlavay.

¹² Kəriste he a ka kəne na, amba ndəhay a, a jənmata ndəhay nga Gazlavay nga key sləra nğada anğa. Anda kedə, ndəhay daa mecəmey-ray nga ndəhay nga Kəriste, a hətam gədan daa mey nga Gazlavay la ma fəna ma fəna.

¹³ Ahaw, aləkwa tabiya ya cəmkwa ray la pal daa metəbey-mey pal nga Bəzey nga Gazlavay, asaya, ya da sərkwə Bəzey a fara fara. Da ray nğene, ya da tərkwə ndəhay manğaratakaya daa mey nga Gazlavay, anda meləvey, ya da tərkwə ndəhay maaya kalah anda Kəriste.

¹⁴ Anda kedə, aləkwa anda bəza hay saba, aləkwa anda hwahwayak masa memed ma həla saw saw saba. Yaw, ndəhay ma mbərzlam fa da gwamara nga batamandakwar ta meesərkedey ata, amba ya təbkwa membərzley ata ha nğaa zəfdandakwar na, daa saba.

¹⁵ Maaya na, ya mbərzlakwa ba, ya wuzkwa mey maaya fara fara da ray Gazlavay, asaya, ya wudkwa vaw da wuzlah aləkwa. Da aləkwa fa kakwa kəne na, ya nakwa la fa mey fa mey haa ya tərkwə anda Kəriste. Anğa na, *bay-ray nga ndəhay daa mecəmey-ray anğa.

16 Ara an̄ga ma cəmtar ray n̄ga ndəhay an̄ga hay anda vaw n̄ga ndaw pal maləmkaya ta mezəvey hay mekele mekele. Da mezəvey n̄ga vaw hay cəpa ata wurwer na, n̄gene vaw tabiya a gəley, a hətəy gədan̄. Ara kəne may n̄gada ndəhay daa mecəmey-ray n̄ga ndəhay n̄ga Yesu. Da ndəhay a, fa wudam vaw da wuzlah ata, asaya, da kwa waawa fa ka sləra an̄ga na, mecəmey-ray a, a hətəy gədan̄ la ma fəna ma fəna.

Pawl a kətata Efez hay n̄ga mbəddamara menjey ata

17 Ara maja n̄gene, yah, Pawl, ya fa kətkwar, asaya, ya fa pakwar len̄gesl ta mezəley n̄ga Bay aləkwa Mahura, ya ləvkwar: ka da njam anda ndəhay ma sərmara Gazlavay ba saba. Mewulkey n̄ga ndəhay a na, saw kəne.

18 Ata daa ləvan̄. Cek masa Gazlavay ma wudəy na, a gwamara n̄ga cəndamara ba. Ata mələk hay fa mey n̄ga Gazlavay, ta hətam heter mendəvey ba na, daa ba, maja a gəmam n̄ga cəndamara ba sələk, a sərmara Gazlavay ba.

19 Hwaray daa dey ata daa ba, a kam cek anda mevel ata ma wudəy. Fa lam vaw saw da palah mandaw mandaw, fa kam cek hay malamba mekele mekele may.

20 Ama akwar na, aa sərkadamakwar da ray *Kəriste na, anda n̄gene ba.

21 Akwar ta cəndamara mey da ray Kəriste la, ba diya? Akwar masa macəmkaya ta Yesu na, taa sərkadamakwara mey fara fara masa Yesu a ma wuzdandakwara la, ba diya?

22 Zleezle na, ka wudam n̄ga key cek hay malamba ma bata ndaw. Cek hay malamba hay a ta nəskwar sem. Yaw, maaya na, ka mbəkdamara menjey akwar masa zleezle n̄gene, anda ndaw ma mbəkda zana magurma.

23 Mbəddamara mevel akwar ta len̄gesl akwar tabiya.

24 Təbmara menjey mawiya masa Gazlavay ma dīykwara anda ndaw ma kəzley zana mawiya fa vaw. Menjey a na, ara menjey maaya ta cəved e, ma mbafar a Gazlavay anda mey n̄ga Gazlavay masa fara fara maa sərkadandakwara.

25 Da ray n̄gene, ka da mbəzlam saba. Maaya na, kwa waawa n̄gaa guzley mey maaya fara fara a ndaw, maja aləkwa tabiya macəmkaya anda vaw pal.

26 Da mevel fa cakwar na, wam vaw, ka kam mebərey ba. Ka da vərndam daa mecey-mevel haa pas a kəzley ba.

27 Ka da vəlmar cəved n̄gada bay-malula n̄ga wey da ray akwar ba.

²⁸ Da ndaw fa leley na, anja nga leley saba. Ama maaya na, nga key sløra maaya ta har anga, amba a høtey cek, a jøney ndøhay masa-viya hay may.

²⁹ Ka daa guzlam mey malamba a ndøhay ba. Ama da akwar faa guzlam na, gwaguzlam mey maaya ma jønta ndøhay daa mey nga Gazlavay, mey maaya ma dīyta ndøhay masa ma jækfamakwar slømay.

³⁰ Ka da kam cek ma car mevel a *Mesøfney nga Gazlavay ba, maja Mesøfney a, ara anda cek matøhkaya fa danjay akwar nga sørey akwar na, ndøhay nga Gazlavay. Mesøfney a, a da njey a ray akwar haa ta pas masa Gazlavay ma da læhdakwar daa cek hay maaya ba da bøla keðe.

³¹ Mbækdamara mepøley cøhwal ta mepey mey aa mevel da ray ndaw, leñ mecey-mevel da ray ndaw. Mbækdamara mekey baazlam da wuzlah akwar ta mekey mbaða fa ndaw. Cek hay malamba tabiya anda keðe na, ngøcham dørenj ta ata.

³² Anda keðe, tøram ndøhay maaya, wuðam vaw, søram dey-ceceh da wuzlah akwar. Mbækdamatara mebørey nga ndøhay da wuzlah akwar anda Gazlavay ma mbækdakwara mebørey akwar ta fa Køriste may.

5

Mey da ray menjey maaya nga ndøhay ma tøba mey nga Yesu

¹ Wure keðe, akwar na, bøza hay nga Gazlavay mawuðtakaya. Da ray ngene, kam cek maaya anda Gazlavay ma ka.

² Daa menjey akwar tabiya na, wuðam vaw da wuzlah akwar anda *Køriste ma wuðndakwar. Ta vølda ray anga la nga møcey maja aløkwa, anda gønaw masa ndøhay ma hørmara zleezle nga vøley a Gazlavay. Anda keðe, a mbafar a Gazlavay anda cek mezey maaya.

³ Akwar na, ndøhay nga Gazlavay. Da ray ngene, da wuzlah akwar na, anga maaya ba nga ley vaw saw da palah, ta nga key cek hay ma ka hwaray, leñ nga key dey fa cek nga ndaw. Søkway nga cek hay anda ngene na, kwa nga cøney da wuzlah akwar ba sølak.

⁴ Ka daa guzlam mey hay saw ba, asaya, ka daa guzlam mey hay ma ka hwaray ba. Mey hay anda ngene na, maaya ba. Maaya na, ka kam suse a Gazlavay.

4:28 4.28 1Tes 4.11 **4:29 4.29** 5.4; Kwa 3.8; 4.6; Jak 3.10 **4:30 4.30** 1.13-14; Iz 63.10; Rm 8.23; Gal 5.25 **4:32 4.32** Mt 6.14; 18.22-35; Kwa 3.12-13 **5:1 5.1** Mt 5.48; 1Jn 3.1 **5:2 5.2** 3.17-18; 4.2, 15-16; 1Kwr 8.1; 2Kwr 5.14; Gal 6.10; Føl 2.2; Kwa 2.2; 3.14-15; **a vølda ray anga:** Gal 1.4; Heb 10.5-10 **5:3 5.3** Kwa 3.5 **5:3 5.3-5** Gal 5.19-21 **5:4 5.4** 4.29; Kwa 3.8

⁵ Sərmara maaya maaya, ndəhay ma lam vaw saw da palah, ta ndəhay ma kam cek hay ma ka hwaray na, fa da mbəzam aa slam masa Kəriste ta Gazlavay fa wam da vad na, daa ba. Fa da hətam cek hay maaya masa Gazlavay ma da vəldatara a ndəhay anğa hay na, daa ba. Asaya, ndəhay ma kam dey fa cek nğa ndaw na, fa da mbəzam aa slam aha daa ba may, maja da fa kam dey fa cek nğa ndaw na, a ragadamar a cek aha aa slam a nğa Gazlavay.

⁶ Ara maja cek hay malamba hay ngene, Gazlavay ma da cey mevel a ray ndəhay ma namar ray ba. Da ray ngene, ka da vəlmatar cəved a ndəhay nğa batamakwar ta mey hay saw ba.

⁷ Kwa ka da cəmam ta ndəhay anda ngene ba səlak.

⁸ Zleezle na, akwar daa ləvanj. Ama wure keđe na, akwar daa slam-mewedey maja akwar macəmkaya ta Bay Mahura. Anda keđe, kam cek anda ndəhay ma njam daa slam-mewedey,

⁹ maja ndəhay ma njam daa slam-mewedey na, a kam cek maaya, a kam cek ta cəved e, a mbəzlam ba.

¹⁰ Səpam nğa key cek masa ma mbafar a Gazlavay.

¹¹ Ka da kam cek hay malamba anda ndəhay daa ləvanj ma kamara ba. Cek hay masa ata ma kamara ngene na, ara cek nğa tede. Ama wuzdamara cek masa ata ma kamara maaya ba ha ngene.

¹² Fara fara, kwa nğaa guzley da ray cek hay masa ata ma kamara ta mebey a ngene na, a key hwaray.

¹³ Ama da cek malamba mabadakaya ta wuzwa sem a palah na, ndəhay a hətmar maaya maaya, a sərmara ara cek malamba.

¹⁴ Anda meləvey, daa slam-mewedey na, cek malamba a hətey maaya maaya. Ara maja ngene mey daha fa ləvey:

«Kah, ndaw masa manakaya,

Sləkdey daa dər.

Kah, ndaw masa maməckaya,

Sləkəwa daa meməcey a.

Amba mewedey nğa Kəriste a sawa a ray akah.»

¹⁵ Da ray ngene, wam vaw fa menjey akwar, ka da kam cek hay anda ndəhay manjar lenjesl hay ba. Ama kam cek hay anda ndəhay ta lenjesl maaya.

¹⁶ Da akwar ma hətam har la nğa key cek maaya na, kamara, maja wure keđe na, ndəhay fa kam cek hay malamba kalah.

5:5 5.5 Rm 5.17 **5:6 5.6** Rm 1.18; Ef 2.3; Kwa 2.4, 8; 3.6 **5:8 5.8** ləvanj; 2.3, 11-12; 4.17-18, 22; Kwa 3.7; Tit 3.3; **slam-mewedey:** Janj 8.12; Kwa 1.13; 1Pi 2.9
5:9 5.9 Gal 5.22-23 **5:10 5.10** Rm 12.2; 1Tes 5.22 **5:13 5.13** Janj 3.20-21
5:14 5.14 Iz 26.19; 60.1; Rm 13.11; Jak 5.8 **5:16 5.16** Kwa 4.5

17 Anda keɗe, ka da rəzlam ba, ama səpam na, ŋga sərey cek maaya masa Bay Mahura ma wuɗey fa akwar.

18 Ka da sam wuzam ŋga wey ba, maja wuzam na, a nəsə menjey ŋga ndaw. Ama vəlmar cəved a *Mesəfney ŋga Gazlavay ŋga njeɗ daa mevel akwar mandaw mandaw.

19 Zlam walay da wuzlah akwar ta meesəmey, walay hay masa Mesəfney ŋga Gazlavay ma vəlkwār gədaŋ ŋga zla. Zlam walay hay daa *Pəsam hay *, ta walay hay mekele ma həlma Bay Gazlavay. Zlamar walay hay ŋga həlma Bay akwar Mahura, həlmamara ta mevel akwar cəpa.

20 Kamar suse a Gazlavay Papa aləkwa maja cek hay tabiya. Kamar suse mandaw mandaw ta mezəley ŋga Bay aləkwa Mahura Yesu Kəriste.

Mey da ray menjey ŋga ŋgwas ta zel e

21 Akwar ndəhay masa ma namar ray a *Kəriste na, nam ray a ndaw a, a ndaw a da wuzlah akwar may.

22 Akwar ŋgusay, namatar ray a zel akwar hay, ara cek ma mbafar a Bay Mahura.

23 Maja zel na, ara *bay-ray ŋga ŋgwas, anda Kəriste ma key bay-ray ŋga ndəhay daa mecəmey-ray aŋga. Mecəmey-ray ŋga ndəhay aŋga hay a na, ara anda vaw aŋga. Ara Kəriste he ma ləhdata ndəhay daa mecəmey-ray aŋga ha daa mebərey.

24 Da ray ŋgene, anda ndəhay daa mecəmey-ray ŋga Kəriste ma namar ray a Kəriste he na, akwar ŋgusay may, namatar ray a zel akwar hay daa cek hay tabiya masa akwar ma kamara.

25 Akwar zel hay may, wuɗmata ŋgwas akwar hay anda Kəriste ma wuɗta ndəhay daa mecəmey-ray aŋga. Ta vəlɗa ray aŋga la ŋga məcey maja ata,

26 amba a tərdata ŋga ndəhay maaya manjar mebərey ta fa yam ŋga *baptem, asaya, ta fa mey aŋga.

27 Kəriste a vəlɗa ray aŋga na, amba a təbta ndəhay daa mecəmey-ray aŋga anda ndaw ma ley kwakwa mem-bey, asaya, amba ndəhay aŋga hay a, a tərām ndəhay mapərtakaya, kwa mebərey ta cek maaya ba fa ata na, daa ba.

5:17 5.17 1.17; Rm 12.2 **5:18 5.18** MM 23.31-35; Rm 13.13 * **5:19 5.19** Pəsam hay na, ara walay hay masa Bay Davit ta ndəhay Jəwif hay mekele ma zlamata zleezle. Walay hay a na, mawuzlalatakaya daa mey ŋga Gazlavay ŋga *Mejəwey-mey Magurma. Ta mey Pelta a zəlmara «*Jabuura*». **5:19 5.19-20** Ps 33.2-3; Kwa 3.16-17; Heb 13.15 **5:21 5.21** 1Pi 5.5 **5:21 5.21-6.9** Kwa 3.18-4.1; 1Pi 2.18-3.7; 1Tm 2.1-13; Tit 2.1-10; 1Jn 2.12-17 **5:22 5.22** 1Kwr 14.34-35 **5:22 5.22-24** Kwa 3.18; Tit 2.5; 1Pi 3.1 **5:23 5.23** 1.22; 1Kwr 11.3 **5:25 5.25** 3.19 **5:25 5.25-28** 1.23; Kwa 3.19; 1Pi 3.7 **5:26 5.26** baptem: Rm 6.3-4; Tit 3.5; Heb 10.22 **5:27 5.27** 1.4; 2Kwr 11.2; Fəl 1.10; Kwa 1.22

²⁸ Ara anda keɗe, zel may, si a wuɗa ngwas anɗa anda anɗa ma wuɗa ray anɗa. Ndaw ma wuɗa ngwas anɗa na, a key ngene, a wuɗey ray anɗa.

²⁹ Fara fara, ndaw ma wuɗa ray anɗa ba na, daa ba. Ama kwa waawa fa zomey cek, fa wey vaw ta ray anɗa anda Kɛriste ma wey vaw ta ndəhay daa mecəmey-ray anɗa may.

³⁰ Kaa aləkwa na, ndəhay daa mecəmey-ray nɗa Kɛriste, ba diya?

³¹ Mawuzlalakaya daa mey nɗa Gazlavay, a ləvey: «Maja ngene, ndaw-mezəle a mbəkda papaha ta mamaha, amba a cəmam ta ngwas anɗa, a tɛram anda ndaw pal.»

³² Mey a keɗe na, mey mahura mabadakaya da hwaɗ a daha. Yah na, ya fa ləvkwar, mey a keɗe aa guzley da ray Kɛriste ta ndəhay daa mecəmey-ray anɗa.

³³ Mey a faa guzley may nɗada akwar. Anja kwa waawa da wuzlah akwar nɗa wuɗa ngwas anɗa anda anɗa ma wuɗa ray anɗa. Akwar nɗusay may, kwa waawa nɗa nar ray a zel e.

6

Menjey nɗa bəza hay da cakay papa ata hay ta mama ata hay na, kwara?

¹ Akwar bəza hay, akwar macəmkaya ta Bay Mahura, cənmatar mey a papakw akwar hay ta mamakw akwar hay maja ara cek maaya.

²⁻³ *Mewey nɗa Gazlavay daha fa ləvey: «Natar ray nɗada ata papakw ta mamakw.» Mewey a keɗe na, ara mewey nɗeeme daa masa Gazlavay ma ləvey a da kandakwar cek maaya, da aləkwa ta səpkwa mey a la. Cek maaya ha na, ara «Ka hətam zazay la, ka njam la ga da bəla keɗe.»

⁴ Akwar papaŋ hay may, ka da kam cek nɗa catar mevel a bəz akwar hay ba. Ama, kətmata, sasərkadamata maaya maaya anda Bay Mahura ma wuɗey.

Mey da ray beke hay ta ndəhay ma wamata

⁵ Akwar beke hay, namatar ray a bay akwar hay da bəla keɗe ta mevel pal, cənmatar mey. Namatar ray anda akwar ma namar ray a *Kɛriste.

⁶ Ka da cənmatar mey na, fa dey ata daada amba aa həmdamakwar ba, ama kam cek masa Gazlavay ma wuɗey ta gədaŋ akwar cəpa, maja akwar na, anda beke hay nɗa Kɛriste.

⁷ Kamatar slëra a bay akwar hay ta meesəmey anda ka kamara na, ngada Bay Mahura, ba na, ngada ndaw-magədan̄ ba.

⁸ Sərmara, da ndaw ta key slëra maaya la kwa an̄ga beke, kwa an̄ga beke ba na, Bay Mahura a pəlra mawurbay an̄ga la.

⁹ Yaw, akwar ndəhay ma wamata beke hay may, kərzamata beke akwar hay ta cəved e, ka da həlmatar dey ba. Si ka sərmara na, akwar ta beke akwar hay a na, Bay akwar pal da gazlavay da vad̄ daha. An̄ga na, a weley ndaw ta weley ba, a nəkta ndəhay tabiya letek fa mey an̄ga.

Ma da key vəram ta bay-malula na, ta me?

¹⁰ Ehe, mey adaw mekele ngada akwar: Njam macəmkaya ta Bay Mahura amba ka hətam gədan̄ an̄ga masa mahura.

¹¹ Jəwmata vaw akwar hay ta cek hay ma ka vəram masa Gazlavay ma vəldakwara. Anda keđe, ta pas masa bay-malula fa da batakwara na, ka hətam gədan̄ la n̄ga fəna wewer an̄ga.

¹² Ya da kakwa vəram na, ta ndəhay magədan̄ ba, ama ta *bay-ray hay n̄ga mesəfney maaya ba hay masa ta gədan̄ ga, ma wam da ray cek hay daa ləvan̄ da bəla keđe. Asaya, ya da kakwa vəram na, ta mesəfney maaya ba hay ma wam da vad̄.

¹³ Ara maja n̄gene, lamata cek hay tabiya ma ka vəram masa Gazlavay ma vəldakwara heyey. Anda keđe, da masa pas n̄ga vəram ta wuswa cay na, ka jaram la fa masa-gəra akwar hay. Ka da kam vəram ta masa-gəra akwar hay a haa mendəvey a. Fa dəba ha, ka da lacam deŋ e! akwar bay-gula hay.

¹⁴ Jəwmata vaw akwar hay maaya maaya, anda meləvey, njam ta mey masa fara fara ta membərzley da hwad̄ a daa ba. Mey masa fara fara ha na, ara anda senter masa ndaw-sewje ma jəwda vaw amba a key vəram ta gəra ba. Kam cek ta cəved e. Mekey cek ta cəved e na, ara anda zana n̄ga bərey masa sewje ma bərda fa dadak n̄ga key vəram.

¹⁵ Diyam vaw n̄ga wuzey *Mey-maaya-mawiya ma handawa zazay. Mediyey vaw a na, ara anda tarak masa sewje ma pa a salay amba a jerey.

¹⁶ Daa cek hay masa akwar ma kamata cəpa na, pamara Yesu n̄ga ndaw akwar fara fara mandaw mandaw. Ka kamara kəne na, ara anda mbaray masa sewje ma kərza a

6:8 6.8 2Kwr 5.10; Kwa 3.24-25 **6:9 6.9** Kwa 3.25; 4.1; Jak 2.1 **6:10 6.10** Jan 15.5; 1Kwr 16.13 **6:11 6.11** Jak 4.7 **6:11 6.11-17** 2Kwr 10.4; 1Tes 5.8; Iz 59.17 **6:12 6.12** 1.21; 2.2; 1Pi 5.8-9 **6:13 6.13** Rm 13.12 **6:14 6.14** Iz 11.5
6:15 6.15 Iz 52.7; Rm 10.15

har. Ta mbaray a, ka da jaram fa lõvat hay tabiya ta awaw da mey a masa bay-malula ma da mөлkwar ta anğa.

¹⁷ Sərmara na, Gazlavay ta lõhdakwar cay. Meləhey a ngene na, ara anda jikwew nga bərey masa sewje ma pa a ray nga key vəram. Mey nga Gazlavay masa Mesəfney anğa ma vəldakwara na, kərzamara maaya maaya, ara anda dəlaw nga key vəram ta bay-malula.

¹⁸ Dəram dangay mandaw mandaw ta gədaŋ masa *Mesəfney nga Gazlavay ma vəldakwara. Cacəfdamara Gazlavay nga jənkwar kwa daa meeme tabiya. Daa medərey-dangay akwar na, ka da gəram ba, mayad a da kakwar ba. Dəram dangay maja ndəhay tabiya ma təbmara mey nga Gazlavay.

¹⁹ Daa medərey-dangay akwar a na, sərfadamaya may, amba Gazlavay a balaya mey hay maaya maaya ta pas masa yah ma daa guzley fa mey nga ndəhay. Cacəfdamara Gazlavay amba yaa sərkadatara mey mabadakaya daa Mey-maaya-mawiya a ndəhay ta mandərzay daa dey daa ba.

²⁰ Yesu *Kəriste ta walaya la nga key ndaw anğa meslərey, amba ya wuzda Mey-maaya-mawiya ha. Ara maja ngene, ata ma kəzlamaya aa fərsəne. Da ray ngene, dəram dangay maja yah, amba ya wuzda Mey-maaya-mawiya fa mey nga ndəhay ta cəved e, anda Gazlavay ma wudəy.

Mey nga madagway-dakw

²¹ Ya fa wudəy amba ka sərmara menjey adaw fedə. Da ray ngene, Tisik masa mөлma aləkwa daa cəved nga *Kəriste, a kadakwara sləra adaw ta menjey adaw ha la. Anğa ndaw masa yah ma wuda kalah, anğa fa key sləra nga Bay Mahura ta mevel pal.

²² Maja ngene, ya fa slərdakwara Tisik e amba ka sərmara menjey ala fedə, asaya, amba a vəlkwar gədaŋ.

²³ Akwar mөлma adaw hay, anja Gazlavay Papa aləkwa ta Bay aləkwa Mahura Yesu Kəriste nga njadamakwar daa zazay, nga handamawa mewudəy-vaw a wuzlah akwar, asaya, nga njadamakwar daa metəbey-mey.

²⁴ Anja maaya nga Gazlavay nga njey ta ndəhay tabiya ma wudməra Bay aləkwa Mahura Yesu Kəriste ta mewudəy-vaw masa fara fara mendəvey ba.

6:17 6.17 Iz 40.2; Heb 4.12 **6:18 6.18-19** 3.14; Lk 18.1; SNM 4.29; Rm 15.30; Kwa 4.2-4 **6:20 6.20** 3.2; 2Kwr 5.20; Kwa 4.4 **6:21 6.21-22** Tisik: SNM 20.4; Kwa 4.7-8; 2Tm 4.12; Tit 3.12 **6:23 6.23** zazay, mewudəy-vaw: 2Kwr 13.11
6:24 6.24 Gal 6.18; 1Pi 1.8

Leeter masa Pawl ma wuzlalatara a Fəlepi hay Mey da ray Leeter ngada Fəlepi hay

Egəliz daa berney nga Fəlepi na, ara Pawl ma pa. A pa daa masa anğa fa pəkey nga dey cew nga wuzey Mey-maaya-mawiya (SNM 16.6-40). Pawl a wuzlalatara leeter keđe a Fəlepi hay na, daa masa anğa daa fərsəne. A wuđeý nga katar suse maja mejəney ata (1.13).

Har-gədan nga ndəhay a wulkam Pawl aa daa fərsəne da Rawm, siya a ləvam aa daa fərsəne da Sezere, siya hay saya a ləvam aa daa fərsəne da Efez.

Fəlepi hay a, a cəndamara Pawl aa daa fərsəne. Da ray nge ta', a cakalam dala, a slərdamara Epafərawdıt nga handara a Pawl. Asaya, a ləvmar a Epafərawdıt e nga njamawa ta Pawl amba a jəna daa sləra (4.10-20). Feteđe vaw ta car la ga a Epafərawdıt. Anğa ma key nğama la na, ta', Pawl a ləvar nga vəhwa fa Fəlepi hay nga katar suse.

Mey mahura nga Pawl daa leeter e keđe na, ara meý da ray Yesu (2.6-11). Yesu ta mbəkdərwa bay anğa ta mewedeý anğa sem da vad amba a nar ray a Gazlavay, a key cek anda Gazlavay ma wuđeý. Maja nge, Gazlavay ta', a pa nga ndaw mahura da ray cek hay tabiya. Maja nge, Pawl a ləvtar a Fəlepi hay nga bəsmara banay amba a hətam cek maaya ma fəna.

Kwa Pawl anğa daa fərsəne, ta sərey banay la ga maja Yesu, ama ta nge he cəpa, a ləvey anğa ta meesəmey maja aa ma pa Yesu nga ndaw anğa fara fara. Meesəmey a nge daha da wuzlah ndəhay masa macəmkaya ta Bay Mahura, kwa ata daa banay kwa ata ta gədan pəreh.

Daa leeter e keđe na, meý mekele mekele daha nga vəley gədan a ndəhay:

Mey da ray menjey nga Yesu (2.5-11)

Mey da ray menjey nga ndəhay nga Yesu (2.14-15)

Mey da ray ma daw fa meý fa meý daa meý nga Gazlavay (3.12-14)

Mey da ray meesəmey mandaw mandaw (4.4)

Ka da wulkam ba səlak (4.6, 19)

Mecey-har

¹ Ara yah Pawl leñ Timawte, ndəhay ma ka sləra nga *Yesu *Kəriste, ma wuzlalamakwara leeter keđe.

Ya wuzlalamakwara ngada akwar, ndəhay nga *Gazlavay tabiya daa berney nga Fəlepi, akwar masa macəmkaya ta Yesu Kəriste. Asaya, ta ngada akwar, *bay-ray hay, ta ndəhay ma jəna ndəhay nga Yesu.

² Anja Papa aləkwa, Bay Gazlavay, ta Bay aləkwa Mahura Yesu Kəriste nga pəsmakwar mey, asaya, nga njadamakwar daa zazay.

Pawl a key ambahw a Gazlavay maja Fəlepi hay

³ Daa masa ya fa wulkey da ray akwar na, ya fa kar suse a Papay Bay Gazlavay maja akwar.

⁴ Daa masa ya fa dərey dangay a Gazlavay maja akwar na, ya faa səmey,

⁵ maja dəga akwar ma təbmara mey nga Yesu haa wure kefe, akwar fa jənmaya nga wuzey *Mey-maaya-mawiya.

⁶ Gazlavay ta zla sləra maaya ha la da wuzlah akwar. Ya səra fara fara a handa la fa mey fa mey, haa aa mendəvey a ta pas masa Yesu *Kəriste ma da vəhwa.

⁷ Masa ya fa wulkey da ray akwar tabiya ta meesəmey kaa na, ara cek maaya kalah, maja ya fa wudkwar kalah. Akwar ta vəlmaya gədan la. Ngene, kwa wure kefe yah daa fərsəne, kwa yah fa mey nga ndəhay ma ka sariya, ya fa wuzdatara Mey-maaya-mawiya na, ara mey fara fara. Maja ngene, akwar tabiya ta hətam mepəsey-mey nga Gazlavay la anda yah.

⁸ Ahaw, ya fa wudkwar tabiya ta mewudəy-vaw ma sawa ta fa Yesu Kəriste. Gazlavay a səra, mey adaw kefe ara mey masa fara fara.

⁹ Daa medərey-dangay adaw a Gazlavay maja akwar na, ya faa cəfdə amba ka wudam vaw ma fəna ma fəna, amba ka səmra mey masa fara fara maaya maaya, asaya, amba ka səmra cek masa maaya nga key.

¹⁰ Anda kefe, ka səmra nga wunkey cek maaya ta maaya ba la amba ta pas masa Kəriste ma da vəhwa na, a hətfakwar, akwar ndəhay maaya, manjar mebərey.

¹¹ Asaya, ka da kam cek maaya ta cəved e mandaw mandaw ta gədan nga Yesu Kəriste. Anda kefe, ndəhay a da namar ray a Gazlavay, a da həlmamara.

Cek ma təkə Mey-maaya-mawiya nga daw fa mey fa mey na, daha daw?

1:1 1.1 Timawte: 1Kwr 4.17 **1:3 1.3** Rm 1.8-10; 1Kwr 1.4; 1Tes 1.2-3 **1:6 1.6** 2.13; **pas masa Kəriste ma da vəhwa:** 1.10 **1:7 1.7** 2Kwr 7.3; Ef 3.1
1:8 1.8 1Kwr 16.24; 2Kwr 5.14 **1:9 1.9** Kwa 1.9-10 **1:10 1.10** Rm 12.2; Ef 5.27; Heb 5.14; **pas masa Kəriste ma da vəhwa:** 1Kwr 1.8; 2Kwr 5.10; Fə 1.6; 2.16 **1:11 1.11** Jan 15.8; Jak 3.17

12 Məlma adaw hay daa *mecəmey-ray nga ndəhay nga Yesu, ya wufey ka sərmara kwa ya fa sərey banay na, banay a, ta jəna *Mey-maaya-mawiya la nga daw fa mey fa mey.

13 Fara fara, ndəhay tabiya ma jədmara way nga bay, ta ndəhay mekele tabiya fedə, a sərmara yah daa fərsəne na, maja *Kəriste.

14 Asaya, har-gədan nga məlma adaw hay ta pamara Bay Mahura Yesu la nga ndaw ata ma fəna ma fəna maja yah daa fərsəne. Da ray ngene, ta hətam gədan la nga wuzdamara mey nga Gazlavay fa mey fa mey, ta mandərzay daa dey daa ba.

15 Ya səra fara fara, ndəhay siya hay da wuzlah ata, a wuzdamara mey da ray Kəriste ta səleŋ maja yah, a wudam nga nəsmara mezəley adaw. Ama siya hay na, a wuzdamara mey a ta mevel maaya.

16 Ndəhay a, a kamara anda kedə na, maja fa wudmaya, a sərmara Bay Gazlavay ma slərdiwa fedə amba ya wuzdatara Mey-maaya-mawiya na, ara mey masa fara fara.

17 Ndəhay masa səleŋ hay heyey, a wuzdamara mey da ray Kəriste na, a key ngene, a wudam nga key sləra nga Gazlavay ta cəved e ba, ama a wudam nga sərdamaya banay saya a ray masa yah daa fərsəne kedə.

18 Kwa a wuzdamara mey nga Kəriste ta mevel maaya, kwa ta mevel maaya ba na, mey adaw da hwad a me? Kwa a wuzdamara kwara kwara na, yah na, ya faa səmey maja mey nga Kəriste fa daw fa mey fa mey. Ahaw, yaa səmey la ma fəna,

19 maja ya səra, banay hay a ngene a da ka amba ya ləhey * maja medərey-danğay akwar ngada Bay Gazlavay maja yah, ta mejəney ma sawa ta fa Mesəfney nga Yesu Kəriste †.

20 Cek masa yah ma səkwa, masa yah ma wufey kalah na, ya wufey hwaray a kaya da ray menjey adaw ba səlak. Anda kedə, ya wufey ya njeŋ ta gədan dəga wure kedə haa nga sərmataw amba ndəhay a namar ray a Kəriste maja yah, kwa yah ta dey, kwa a kədmaya vagay.

21 Ngada yah, cek mahura daa menjey adaw na, ara Kəriste. Yaw, meməcey na, ara cek adaw mehətey.

1:12 1.12 Ef 3.1; 2Tm 2.9 **1:15 1.15-17** 2Kwr 2.17 * **1:19 1.19** ya ləhey: Pawl a ləvey mey letek ta masa daa Jəw 13.16. Ndəhay a wulkam Pawl fa wulkey da ray meləhey dasi har nga ndəhay ma nəsmara mezəley anğa, da daa ba, a gwa a bawa daa fərsəne, da daa ba, a daw a njeŋ ta Yesu da vad. † **1:19 1.19** Mesəfney nga Yesu Kəriste: Ara Mesəfney nga Gazlavay. Ara Yesu Kəriste ma slərdərwa. Nəka Jan 14.16. **1:19 1.19** Rm 15.30 **1:21 1.21** Gal 2.20; Kwa 3.3-4

²² Ama da yah ta dey na, ya gwa ya key sləra maaya nga jəney ndəhay la saya. Wure keđe, ya səra cəved masa yah ma da ley saba.

²³ Ya fa wulkey cew cew. Ya wufey kalah na, ya mbəkda bəla keđe amba ya daw ya njam ta Kəriste. Ara cek maaya kalah.

²⁴ Ama cek mahura ma fəna saya na, si ya njeý ta dey amba ya jənkwar dāgay.

²⁵ Maja ngeñe, ya fa səra fara fara ya njeý da bəla keđe la dāgay, asaya, ya səra ya da njeý ta akwar tabiya amba ya jənkwar nga təba mey nga Gazlavay ma fəna ma fəna, asaya, amba kaa səmam daa cəved anga.

²⁶ Ta pas masa yah ma da daw fa akwar saya na, ka həlmamara Yesu Kəriste la ma fəna saya, maja yah ta akwar.

Si menjeý akwar a key letek anda Mey-maaya-mawiya ma ləvey

²⁷ Cek mahura na, si menjeý akwar a key letek anda *Mey-maaya-mawiya nga *Kəriste ma ləvey. Kwa ya ta həteý har la nga daw fa akwar, kwa ya ta həteý har daa ba, ya wufey ya cənda na, akwar manjatakaya maaya maaya daa mey nga Gazlavay, mevel akwar macəmkaya letek, akwar fa kədam vaw ta mevel pal, amba ndəhay a təbmara Mey-maaya-mawiya ha ta mevel maaya.

²⁸ Ka da zloram ta masa-gəra akwar hay ba sələk. Akwar ma zloram ba ngeñe na, fa wuzda masa-gəra akwar hay a ata daa cəved nga meezədeý, ama akwar na, daa cəved nga meləhey. Ara cek masa Gazlavay ma ka.

²⁹ Ahaw, Bay Gazlavay ta kakwar maaya la amba ka təbmara mey nga Kəriste. Nga təbey mey anga daada ba, ama amba ka səram banay maja anga may.

³⁰ Zleezle daa masa yah da cakay akwar na, akwar ma hətmaya la ya fa kədeý vaw ta masa-gəra hay daa sləra nga Yesu. Wure keđe, akwar fa cəndamara ya fa kədeý vaw saya. Akwar may fa kədam vaw daa sləra ha anda yah.

2

Kam cek anda Yesu Kəriste ma ka

¹ Akwar macəmkaya ta *Kəriste keđe na, fa vəlkwar gədan, ba diya? Mewufey-vaw anga fa vəlkwar gədan, ba diya? Akwar macəmkaya ta *Mesəfney nga Gazlavay, ba diya? Akwar fa səram dey-ceceh fa ndəhay, ba diya?

² Anda keđe, ya fa ləvkwar, wuđam vaw, cəmdamara day akwar letek, cəmdamara mevel akwar letek, mewulkey akwar letek, amba yaa səmey ma fəna ma fəna.

³ Ka da kam cek maja ray akwar daada ba. Ka da pamata ray akwar nga mahura hay ba, ama nəkmata ndəhay anda a fənmakwar, namatar ray.

⁴ Kwa waawa a da səpey cek nga jəna ray anğa daada ba, ama nga jəney ndəhay mekele da wuzlah akwar may.

⁵ Da wuzlah akwar na, kam cek anda Yesu Kəriste ma ka.

⁶ Anğa na, letek ta Gazlavay, ama ta nğene he cəpa, ta səpey cəved amba a pa ray anğa anda Gazlavay daa ba.

⁷ Ama mbak! a mbəkdərwa bay * anğa ta mewedey anğa da vad,

a pa ray anğa nga ndaw ma ka sləra nga ndəhay, a yawa, anğa ndaw-magədaŋ.

Daa masa anğa ndaw-magədaŋ na,

⁸ a pa ray anğa nga mecəhe,

a nar ray a Gazlavay mandaw mandaw

haa a vəlda ray anğa nga məcey,

kwa fa hwadam mazlanğalakaya †.

⁹ Ara maja nğene, Gazlavay leŋ! a la aa slam da vad, slam maaya ma fənta slam hay tabiya.

A par mezəley ma fəna mezəley nga cek hay cəpa.

¹⁰ Da ray nğene, cek hay tabiya kwa da vad,

kwa da bəla keđe, kwa ndəhay maməctakaya hay,

a da həslmar ray a Yesu a,

a da ragadamata merenğwez ata hay fa mey anğa.

¹¹ Asaya, ndəhay tabiya a da wuzdamara Yesu Kəriste na, ara Bay Mahura.

Anda keđe, a da həlmamara Gazlavay Papan maja.

Wad'am anda wurzla hay ma wad'am da gazlavay da vad

¹² Jam adaw hay, daa masa yah da wuzlah akwar na, akwar fa cənmar mey a Gazlavay mandaw mandaw. Nğene ara cek maaya. Ama kwa wure keđe yah da wuzlah akwar daa ba keđe na, cənmar mey mandaw mandaw anda yah da wuzlah akwar cənğa. Nğene ara cek maaya ma fəna saya.

2:2 2.2 Jan 13.34; 1Kwr 1.10-11; Gal 6.10; Ef 5.2; 1Jn 4.12 **2:3 2.3** Rm 12.10;

Gal 5.26 **2:4 2.4** 1Kwr 10.24 **2:5 2.5** Jan 13.15; Rm 13.14; 15.5 **2:6 2.6**

Jan 1.1-2; 17.5; Heb 1.3 * **2:7 2.7** mbak! a mbəkdərwa bay anğa: Nəka Jan 17.5.

2:7 2.7 Jan 1.14; Rm 8.3; 2Kwr 8.9; Heb 2.14, 17 † **2:8 2.8** hwadam

mazlanğalakaya: Nğa Jəwif hay na, meməcey fa hwadam mazlanğalakaya na, ara cek ma key hwaray kalah. Nəka Gal 3.13. **2:8 2.8** Jan 10.17; Heb 5.8; 12.2

2:9 2.9 SNM 2.33; Ef 1.21; Heb 1.4 **2:10 2.10-11** Iz 45.23; Jan 5.23; Rm 10.9;

CWJ 5.13

Da ray ηgene, kamara sløra masa Gazlavay ma vøldakwara haa mendøvey a, ta meney ray ga fa mey anga. Anda keðe, akwar fa wuzdamara Gazlavay ta løhdakwar sem.

¹³ Kamara anda keðe maja ara Gazlavay ma ka sløra anga daa mevel akwar, amba ka wuðam nga key cek masa ma mbafar, asaya, amba ka høtam gøðan nga key cek maaya masa anga ma wuðey nga key.

¹⁴ Daa menjey akwar tabiya na, ka da kam cek ta meenjurey-mey ba, ta meyey-mey ba,

¹⁵ amba ka tøram nga ndøhay masa mey da ray ata daa ba, manjar mebørey. Anda meløvey, da wuzlah ndøhay manjar nga køtey ta ndøhay manøstakaya hay da bøla keðe na, ka da njam, akwar bøza hay nga Gazlavay, mebørey fa akwar daa ba. Anda keðe, ka da waðam da wuzlah ata anda wurzla hay ma waðam da gazlavay da vad,

¹⁶ maja akwar fa wuzdamatara mey ma vøltar heter mendøvey ba. Da akwar fa kamara anda keðe na, ta pas masa *Køriste ma da vøhwa, ηgene ya gwa ya høsley ray la fa mey nga Gazlavay maja akwar. Ngene, a wuzdørwa sløra aðaw masa yah ma ka ta gøðan la a palah, ara sløra saw ba.

¹⁷ Metøbey mey akwar ara anda cek mevøley a Gazlavay. Kwa da ndøhay a køðmaya vagay, memøcey aðaw a tørey anda cek mevøley a Gazlavay a dey cek masa akwar ma vøldamara a Gazlavay. Da anda keðe na, ya faa sømey, ya wuðey amba akwar may kaa sømam anda yah.

¹⁸ Akwar may, maaya na, kaa sømam køne, anda keðe, sasømkwa daa slam a.

Mey da ray ata Timawte ta Epaførawdit

¹⁹ Ya fa wulkey fara fara, da Bay Mahura Yesu ta wuðey la na, daa ðar a keðe ya slørda Timawte la fa akwar. Masa ta vøhwa cay na, a kadiwa mey masa aa ma cøndørwa fa akwar, amba mey a, a vølya gøðan.

²⁰ Ndaw fa wulkey da ray akwar anda yah na, daa ba, si Timawte pal. Anga na, fa wulkey fara fara da ray akwar.

²¹ Ndøhay siya hay tabiya a søpam cek si ηgada ata gway, a wulkam da ray cek masa Yesu *Køriste ma wuðey ba.

²² Ama Timawte na, ka sømara ya kam sløra cew e amba *Mey-maaya-mawiya a daw fa mey fa mey. Anga ta jønya la ga anda bøzey ma kam sløra ta papaha. Da ray ηgene,

akwar ta sanğalamara la, ka sərmara anğa ndaw ma ka sləra ta cəved e.

²³ Anda kedə, ya wudəy nğa slərey fa akwar na, anğa. Ya da slərda na, ta pas masa ta dəslmara sariya adaw cay.

²⁴ Asaya, ya wulkey da Bay Mahura ta wudəy la na, yah may, gweegwe cay, ya daw fa akwar.

²⁵ Məlma aləkwa Epafərawdıt, ndaw masa akwar ma slərdamiwa amba a sawa a jənya daa cek hay masa yah ma wudəy heyey na, ala ta kam sləra la cew e. Anğa ta jənya la, anda ndaw ma jəney mandala anğa daa vəram. Ama wure kedə, ya wulkey si ya slərdakwara,

²⁶ maja matakəwam akwar tabiya fa kar, a wudəy nğa hətkwar fa dey. Ta wulkey la ga, maja akwar ma cəndamara vaw ta car la.

²⁷ Fara fara vaw ta car la ga, nekədəy a məcey. Ama Gazlavay ta sərfar dey-ceceh la, ta mbəlda sem. A sərey dey-ceceh na, fa anğa pal ba, ama fa yah may. A wudəy amba ya sərey banay ma fəna ma fəna ba.

²⁸ Yaw, ya wudəy ya slərdakwara fiyaw fiyaw amba da masa akwar ma hətmar la saya na, kaa səmam. Anda kedə, yah kwa, ya gwa ya wulkey ga saba.

²⁹ Ta pas masa ta wusey la na, təbmara ta meesəmey ga, maja anğa məlmakw akwar daa mecəmey-ray nğa Bay Mahura. Həslmar ray nğada ndaw masa anda nğene,

³⁰ maja nekədəy a məcey daa sləra nğa Kəriste. Ta təba la nğa vəlda kwa heter anğa amba a jənya maja akwar tabiya.

3

Gazlavay a pata ndəhay nğa ndəhay maaya fa mey anğa na, kwara?

¹ Məlma adaw hay, ehe, ya ləvkwar saya, sasəmam maja akwar macəmkaya ta Bay Mahura Yesu. Yah na, ya gərey ba nğa wuzlalakwar mey masa ya ta wuzdakwara sem, amba a jənkwar nğa njeý daa cəved maaya.

² Pam leŋgesl ta ndəhay ma ka cek hay maaya ba hay, makəwtakaya anda gədəy hay. Ata na, ara ndəhay ma ləvam si ka slam mandawal * amba Gazlavay a təbkwar anda ndəhay anğa hay.

³ Ndəhay maslakaya mandawal fara fara na, ara aləkwa, maja aləkwa ndəhay nğa Gazlavay. Aləkwa fa dərkwə danğay a Gazlavay ta gədan nğa Mesəfney anğa. Asaya,

2:25 2.25 4.18 2:29 2.29 1Kwr 16.16, 18 3:1 3.1 2.18 * 3:2 3.2 ndəhay ma ləvam si ka slam mandawal: Ndəhay a ara ndəhay maaya ba maja a slam mandawal nğa tərey maaya fa Gazlavay ama mevel ata na, ta mbəddamara daa ba. 3:2 3.2 2Kwr 11.13

aləkwa fa həslkwa ray maja Yesu *Kəriste. Aləkwa fa pakwa lenğesl aləkwa a ray kwakwas masa ndəhay ma kamara na, daa ba.

⁴ Da kwakwas a ara cek maaya na, anja nğene yah may, ya pa lenğesl adaw la a ray a. Da ndaw a wulkey a ləhey la maja kwakwas a na, yah may, ya fəna ndaw a nğene la ga ta mewulkey.

⁵ Yah ndaw *İsrayel, daa səkway nğa Benjamen. Yah na, ndaw *Hebəre masa fara fara maja papay ta mamay na, ara ndəhay Hebəre hay fara fara. Ya yawa, ya key luma pal, a slamiwa mandawal. Ndəhay ma səpa *kwakwas nğa Mawiz fara fara na, yah da wuzlah ata, maja yah ndaw Fariza.

⁶ Ya ta səpa kwakwas nğa Mawiz la maaya maaya kalah haa ya sərdəta banay ga ta ndəhay ma təba mey nğa Yesu. Da ndaw a wulkey Gazlavay a pa nğa ndaw maaya fa mey anğa maja aa ma səpa kwakwas nğa Mawiz na, anja daa nğene, yah ndaw maaya, mey da ray adaw daa ba.

⁷ Cek hay masa yah ma kata zleezle nğene na, ya nəkta anda cek hay ma jənmaya. Ama wure keđe, yah ndaw nğa Kəriste kaa na, ya nəkta cek hay a anda cek hay nğa tede.

⁸ Fara fara, ya nəka kwa meeme anda cek nğa tede. Ya nəka anda cek nğa tede na, maja cek maaya ma fəna cek hay tabiya daha. Cek maaya ha na, ara mesərey Yesu Kəriste, Bay adaw. Ara maja anğa, yah ma mbəkdata cek hay tabiya, ya nəkta anda zay nğa tede, amba ya tərey ndaw nğa Kəriste,

⁹ ya njam ala macəmkaya cew e. Zleezle ya ləvey, yah, ndaw maaya fa mey nğa Gazlavay maja ya fa səpa kwakwas nğa Mawiz. Ama wure keđe, ya fa da ləvey kəne daa saba. Gazlavay a paya nğa ndaw maaya fa mey anğa na, maja yah ma təba mey nğa Kəriste. Ara Gazlavay ma paya nğa ndaw maaya fa mey anğa, maja yah ma pa Kəriste nğa ndaw adaw fara fara.

¹⁰ Kwa cek mekele masa yah ma wudəy na, daa ba. Ya wudəy na, si nğa sərey Kəriste ta gədan anğa masa ma sləkdadərwa daa meməcey. Asaya, ya wudəy ya sərey banay anda anğa ma səra, ya wudəy ya tərey anda anğa daa masa anğa ma məcey.

¹¹ Da anda keđe na, ya wulkey Gazlavay a sləkdadiwa la daa meməcey anda Kəriste.

Mekey gədan nga daw fa mey fa mey daa cəved nga Gazlavay

¹² Ya gwa ya ləvey ya ta tərey sem anda *Kəriste na, daa ba. Anda meləvey, ya gwa ya ləvey ya key mebərey saba na, kəne ba. Ama ya fa key gədan ma fəna ma fəna amba ya təba Kəriste ta har cew cew, maja Yesu Kəriste ta təbya sem ngada anğa.

¹³ Məlma adaw hay, ya gwa ya ləvey ya ta tərey sem anda Kəriste na, daa ba aran. Ama wure keđe, ya fa key gədan nga key cek pal daha, ya wulkey da ray cek fa dəba adaw ba, ama ya wudəy nga daw fa mey fa mey. Ya hway ta gədan anda ndəhay ma kam kwakurda, amba ya hətey cek masa ya ta hətar daa ba aran.

¹⁴ Ya hway ta cəved e, kasl aa mēdəvey a, maja Gazlavay fa zəlya da vad amba a vəldiwa cek nga mahway adaw maja Yesu Kəriste.

¹⁵ Yaw, aləkwa masa mawiya daa cəved nga Gazlavay saba kaa na, si ya kakwa kəne. Da akwar fa səpam nga key cek wal na, Gazlavay a jənkwar la nga səra cek masa maaya nga key ta cəved e.

¹⁶ Cek mahura na, nakwa mandaw mandaw taa cəved nga Gazlavay masa ngeeme aləkwa ma nakwa da hwad a.

¹⁷ Məlma adaw hay, akwar tabiya kam cek anda yah. Nəkam dey fa ndəhay ma kam cek anda ala, kamara kəne.

¹⁸ Ndəhay ga menjey ata fa wuzdərwa ata na, masa-gəra hay nga Kəriste † ma məcey fa hwadam mazlanğalakaya. Ya ta kadakwara mey a keđe la dey ga. Wure keđe, ya fa kadakwara saya ta matəway daa dey.

¹⁹ Pas masa dər ata daa saba na, Bay Gazlavay a da kəzlata aa awaw magaza. A wudam cəved nga Bay Gazlavay ba səlak, ama lenğesl ata, mapakaya mandaw mandaw da ray cek hay masa mevel ata ma wudəy. A kam cek hay ma ka hwaray, ama faa səmam da ray cek hay a. A wulkam si da ray cek hay da bəla keđe gway.

²⁰ Ama ngada aləkwa na, wulkakwa da ray slam da vad, way aləkwa menjey fara fara. Aləkwa fa səkwakwa Yesu Kəriste, Bay aləkwa Mahura ma da sawa da vad. Ara ndaw ma da ləhdandakwar.

3:12 3.12 1Tm 6.12; 2Tm 4.7; Heb 12.1 **3:14 3.14** 1Kwr 9.24-25 **3:16 3.16** Gal 6.15-16 **3:17 3.17** 1Kwr 4.16; 1Pi 5.3 † **3:18 3.18** masa-gəra nga Kəriste: Ndəhay a wulkam Pawl aa guzley da ray ndəhay ma ləvam ata ndəhay nga Yesu ama mey da ray meməcey nga Yesu a tərdata ndəhay maaya fa Gazlavay na, a cədamara ba. A wulkam si ndaw a səpa kwakwas nga Mawiz amba a tərey maaya fa Gazlavay. Nəka 3.2. **3:18 3.18** 1Kwr 1.23; Gal 6.12 **3:19 3.19** Rm 16.18 **3:20 3.20** Ef 2.6; Heb 13.14

²¹ Vaw aləkwa masa ta gədan̄ daa ba, ma da məcey keđe na, Yesu a da tərda n̄ga vaw masa ta gədan̄, letek ta vaw an̄ga. A da tərda vaw aləkwa na, ta gədan̄ masa an̄ga ma da wey da ray cek hay tabiya ta an̄ga.

4

¹ Da ray n̄gene, məlma adaw hay mawudtakaya, n̄jam maaya maaya daa cəved̄ n̄ga Bay Mahura anda yah ma ləvkwar. Ya fa wudkwar kalah, matakvam akwar fa kaya, ya wudfey n̄ga hətkwar fa dey saya. Ya faa səmey da ray akwar, maja akwar ma wuzdamara sləra adaw ara sləra maaya.

Cek hay maaya n̄ga key

² Waa Evawdi ta Sintik, n̄gusay daa *mecəmey-ray n̄ga ndəhay n̄ga Yesu, ya kakwar ambahw, cəmam dəy maja akwar macəmkaya ta Bay Mahura.

³ Yaw, kah Sizige *, məlma adaw maaya masa yah ma kakwa sləra cew e, ya kaka ambahw may, jənta n̄gusay a amba a n̄jam daa zazay. Ya ləvka anda keđe na, maja ala ta kədfam vaw la ga bama ta n̄gusay a daa sləra, amba ndəhay mekele mekele a təbmara Mey-maaya-mawiya. Ala ta n̄gusay a, ya ta kam sləra la bama ta ata Kəleman̄ lēn̄ ndəhay mekele hay ma jənmaya daa sləra ha. Gazlavay ta wuzlala mezəley ata sem cəpa aa dərewel n̄ga ndəhay ma da hətam heter mendəvey ba.

⁴ Sasəmam mandaw mandaw maja akwar macəmkaya ta Bay Mahura. Ya fa ləvkwar saya, sasəmam.

⁵ Kam cek maaya amba ndəhay tabiya a nəkmakwar akwar ndəhay meekwed̄-mey hay. Kamara kəne maja gweegwe † Bay Mahura a vəhwa.

⁶ Ka da wulkam ba səlak, ama daa cek hay tabiya ma fənkwar ray na, kadamara a Gazlavay, dərmar dan̄gay, cacəfdamara n̄ga jənkwar, kamar suse.

⁷ Da akwar fa kamara anda keđe na, Gazlavay a njadakwar la daa zazay, maja akwar macəmkaya ta Yesu *Kəriste. Zazay a, a fəna lēngesl n̄ga ndaw. Da zazay a daha na, akwar fa da wulkam daa ba.

Kam cek hay maaya

3:21 3.21 Rm 8.29; 1Kwr 15.25, 28, 43-53; Kwa 3.4 **4:1 4.1** 1Tes 2.19-20

* **4:3 4.3** Sizige: Ara mezəley ta mey Gərek ma wudfey n̄ga ləvey «mandala daa sləra». **4:3 4.3** SNM 3.5 **4:4 4.4** 2.18 † **4:5 4.5** gweegwe: Mey Gərek a ləvey: «Bay Mahura gweegwe.» Ndaw a gwa n̄ga cənda anda mawuzlalakaya, da daa ba, a gwa n̄ga cənda «Bay Mahura aa gweegwe ta aləkwa mandaw mandaw». **4:5 4.5** 1.10; Rm 13.11-12; 1Kwr 16.22; Heb 10.25; Jak 5.8; 1Tes 5.1-2 **4:6 4.6** Ps 37.5; Mt 6.25; 1Pi 5.7 **4:7 4.7** Jan̄ 14.27; Kwa 3.15

⁸ Məlma adaw hay, ya wudəy ya ndəvda mey adaw dəba. Ya ləvkwar, pamara lenğesl akwar a ray cek hay maaya, masa ndəhay maa səmam da ray a. Anda meləvey, mey masa fara fara, cek masa ndəhay maa həmdamara, cek masa ta cəved e, cek manjar nga zləbey, cek ma mbafatar a ndəhay, lenj cek masa ndəhay maa guzlam da ray a maaya.

⁹ Cek hay a tabiya masa yah maa sərkadakwara, lenj masa akwar ma təbmara, masa akwar ma cəndamara fa yah, ta masa akwar ma hətmar fa yah na, kadamara sləra. Da akwar ta kadamara sləra ta cek hay a cəpa la na, Gazlavay, ndaw ma njadata ndəhay daa zazay, a njeý la ta akwar.

Pawl a katar suse a Følepi hay

¹⁰ Ya fa kar suse a Bay Mahura Yesu, ya faa səmey ga maja akwar ta hətam cəved nga jənmaya la saya. Zleezle, akwar fa wulkam da ray adaw fara fara nga jənmaya, ama menjeý ga, akwar ta hətam cəved daa ba, si wure keđe.

¹¹ Ya ləvkwar anda keđe na, a key ya rəkey maja viya fa kaya ba. Yah na, ya taa sərkey sem nga njeý ta meesəmey da ray cek da har adaw gway.

¹² Anda meləvey, kwa yah daa viya, kwa zleley adaw ga, ya səra menjeý kəne. Kwa cek mezəmey daha, kwa may fa caya, kwa ya ta cek hay ga ma fənmaya ta gədañ, kwa cek a wusya ba na, ya taa sərkey menjeý ta zazay cay. Kwa daa banay, kwa daa wiya,

¹³ ya gwa ya key cek tabiya maja *Kəriste fa vəlya gədañ.

¹⁴ Ta ngeñe he cəpa na, akwar ta jənmaya la ga daa banay adaw cəngga.

¹⁵⁻¹⁶ Akwar, Følepi hay, sərfadamara zleezle masa yah ma zlar nga wuzey *Mey-maaya-mawiya ngeeme fetede heyey. Daa masa yah da Tesalawnik na, akwar ta slərmaya cek hay la dey ga nga jənya. Masa yah ma mbəkdərwa hwayak nga Masadəwan tabiya la na, ndəhay daa Egəliz hay mekele ta jənmaya daa ba, si akwar gway.

¹⁷ Ka da wulkam a key ya səpey dala fa akwar ba, ama ya wudəy ka kamara anda keđe maja ya səra Bay Gazlavay a pəskwar mey la maja cek hay a masa akwar ma vəldamiwa.

¹⁸ Ya fa ləvkwar, cek hay tabiya masa akwar ma slərdamiwa ta har Epafərawdıt na, ta wusdərwa la. Cek aha ta wusya la haa a fəna masa yah ma wudəy. Wure keđe na, cek ma həcyə daa saba. Cek hay masa akwar ma vəldamiwa

ha na, aa maaya kalah a mbafar a Gazlavay anda cek hay mevəley ngada anğa masa mezey maaya.

¹⁹ Gazlavay aləkwa anğa ta zleley masa ma ndəvey ba. Da ray ngene, cek masa da har akwar daa ba na, a vəkwar la, maja akwar macəmkaya ta Yesu Kəriste.

²⁰ Anja ndəhay nğa həlmamara Gazlavay Papa aləkwa mandaw mandaw nğa sərmataw. *Amen.

Mey nğa madagway-dakw

²¹ Camatar har a ndəhay nğa Gazlavay tabiya macəmkaya ta Yesu *Kəriste. Məlma aləkwa hay daa *mecəmey-ray nğa ndəhay nğa Yesu masa ala bama feđe a camakwar har may.

²² Asaya, ndəhay nğa Yesu tabiya, a camakwar har. Fara fara ma camakwar har a ga kalah na, ndəhay ma ka sləra da way bay da *Rawm.

²³ Anja maaya nğa Bay Mahura Yesu Kəriste nğa njeý ta akwar.

Leeter masa Pawl ma wuzlalatar a Kwalaws hay Mey da ray

Leeter ngada Kwalaws hay

Leeter e keđe na, Pawl a wuzlala daa masa anğa daa fərsəne (4.3, 10, 18). Ndəhay ga a wulkam anğa daa berney nğa Rawm. Pawl a wuzlalatar leeter e keđe ngada ndəhay nğa Yesu daa berney nğa Kwalaws. Ara Pawl ma handa Mey-maaya-mawiya fa ndəhay a ba, ama ara Epafəras (1.7). Pawl a wuzlala leeter e na, maja Epafəras ta sawa la fa Pawl a, a ləvar ndəhay fa batamata ndəhay ta meesərkey maaya ba (Fəl 1.23). Ara ata Tisik ta Awnezim ma handamara leeter e a ndəhay da Kwalaws (4.7-8). Daa nğene ta wuzlalatar la ngada ndəhay nğa Yesu daa berney nğa Efez leŋ a Filemanjw may.

Da wuzlah ndəhay daa Egəliz da Kwalaws a na, ndəhay mekele mekele daha faa sərkadam ndəhay saw. Jəwif hay siya aa sərkadam ndəhay saw, a ləvam: «Da ndaw fa təba mey nğa Yesu fara fara na, si ndaw a, a səpa kwakwas nğa Jəwif hay may.» Gərek hay na, a wulkam saw, a ləvam Gazlavay, anğa maaya, ama ara anğa ma wa bəla ba. A wulkam Yesu na, ndaw ta vaw anda aləkwa ba, da daa ba, anğa ndaw saw gway. Pawl a wuzlala leeter keđe nğa ləvtar mewulkey nğa Jəwif hay ta Gərek hay nğene na, anğa maaya ba.

Daa leeter e keđe Pawl a ləvtar mey masa fara fara na, ara Kəriste, ndaw masa Gazlavay ma wala nğa ləhdata ndəhay. Yesu Kəriste aa ta gədan da ray cek hay tabiya, «maja ara ta fa anğa, Gazlavay ma ləmta cek hay tabiya da vad ta cek hay tabiya da bəla...» (1.16). Kəriste ta məcəy la fa hwadam mazlanğalakaya, ta sləkɔfawa sem daa meməcəy. Anda keđe, a wuzwa aa ta gədan da ray cek hay tabiya (2.14-15). Si Jəwif hay a təbmara mey nğa Yesu amba a ləham, maja kwakwas ata fa da ləhdata daa ba (2.20-23). Daa mendəvey nğa leeter e na, Pawl aa guzltar da ray menjey maaya nğa ndəhay nğa Yesu, kwa da wuzlah ndəhay daa Egəliz, kwa da way ata hay, kwa da wuzlah ndəhay da bəla.

Daa leeter e keđe na, mey mekele mekele daha nğa vəley gədan a ndəhay:

Yesu na, a lawa Gazlavay kərad! (1.13-20)

Menjey ta Yesu (2.6-7)

Mezley walay a Gazlavay (3.16)

Mekətey ngada ngusay, ngada zel hay, leŋ ngada bəza hay (3.18-21)

Mecey-har

¹ Ara yah, Pawl, ma wuzlalakwara leeter keŋe, yah ndaw masa *Gazlavay ma wala nga key *ndaw-meslərey nga *Yesu *Kəriste. Ya wuzlalamara na, ala ta məlma aləkwa Timawte.

² Leeter e keŋe, ara ngada akwar, ndəhay nga Gazlavay daa berney nga Kwalaws, akwar, məlma adaw hay macəmkaya ta Kəriste, masa ma təbmara mey anga ta mevel pal.

Anja Papa aləkwa, Bay Gazlavay, nga pəskwar mey, nga njadakwar daa zazay.

Pawl a kar suse a Gazlavay maja Kwalaws hay

³ Daa masa ala fa dəram danɣay a Gazlavay, Papan nga Bay aləkwa Mahura Yesu *Kəriste, maja akwar na, ala fa kamar suse mandaw mandaw.

⁴ Ya kamar suse na, maja ya cəndamara akwar fa pamara Yesu Kəriste nga ndaw akwar fara fara. Asaya, ya kamar suse maja akwar fa wudmata ndəhay nga Gazlavay cəpa.

⁵ Yaw, ka təbmara mey nga Yesu, ka wudam vaw da wuzlah akwar na, maja akwar fa səkwmarə cek hay masa ka səmra fara fara ka hətam la, cek hay masa Gazlavay ma diykwara da vad. Zleezle masa akwar ma cəndamara *Mey-maaya-mawiya, masa fara fara na, akwar taa sərkam la da ray cek hay masa akwar ma da hətmatar da vad a.

⁶ Mey-maaya-mawiya ha, fa daw fa mey fa mey da bəla tabiya, fa mbədda mevel nga ndəhay amba a kam cek maaya. Anda keŋe, fa mbəddakwara mevel akwar amba ka kam cek maaya may. A mbəddakwara mevel akwar a na, dəga ta pas masa akwar ma cəndamara mey a, ta masa akwar ma səmra fara fara, maaya nga Gazlavay aa da ray akwar.

⁷ Ara Epafəras, mandala aləkwa masa yah ma wudkwa kalah, maa sərkadakwara mey da ray maaya nga Gazlavay a. Ya kam sləra daa slam a. Ara ndaw ma key sləra nga Kəriste ta cəved e aa slam ala.

⁸ Ara anga maa guzɪndar da ray mewudəy-vaw da wuzlah akwar masa *Mesəfney nga Gazlavay ma vəldakwara.

⁹ Maja nɣene, dəga ta pas masa Epafəras ma wuzdandara mey da ray akwar na, ala ta mbəkdamara medərey-danɣay

a Gazlavay maja akwar daa ba. Yaa cəfdamara Gazlavay amba cek masa ma mbafar na, ka sərmara maaya maaya. Asaya, yaa cəfdamara Gazlavay amba Mesəfney anğa a vəkwar lenğesl, a jənkwar nğa cəney cek hay da ray Gazlavay maaya maaya.

¹⁰ Anda keđe, daa menjey akwar, ka da kam cek hay masa Bay Mahura Yesu ma wudəy, ka da kam cek hay ma mbafar mandaw mandaw. Maja nğene, ka da kam sləra wura wura tabiya maaya, ka da sərmara Gazlavay ma fəna ma fəna.

¹¹ Ya dərəm danğay saya na, amba Gazlavay, ndaw manjakaya daa slam-mewedəy, a vəkwar gədan anğa mahura, amba ka bəsmara banay ta dək-vaw.

¹² Anda keđe, ka da kamar suse a Gazlavay, Papa aləkwa, ta meesəmey. Ara anğa ma wurkwara cəved, amba akwar may, ka hətam cek masa aa ma bəda nğada ndəhay anğa hay daa slam anğa mawadəkaya.

¹³ Papa aləkwa a badandakurwa daa ləvan nğa bay-malula, a pandakwar a har Bəzey anğa mawudəkaya kalah.

¹⁴ Ara Bəzey anğa ha ma vəlda heter anğa, amba a pəskandakwar dasi har nğa bay-malula, asaya, Gazlavay a mbəkdandakwara mebərey aləkwa ta fa Bəzey anğa ha.

Yesu Kəriste, anğa mahura da ray cek hay tabiya

¹⁵ Kwa ndaw pal ta hətar Gazlavay daa ba, ama Bəzey anğa, Yesu *Kəriste, masa ndəhay ma hətmar na,

a lawa Gazlavay a, a key cek anda anğa.

Yesu a, ara Bəzey mahura nğa Gazlavay,
ara anğa mahura da ray cek hay tabiya
masa Gazlavay ma ləmtərwa.

¹⁶ Anğa mahura maja ara ta fa anğa,
Gazlavay ma ləmta cek hay tabiya da vad
ta cek hay tabiya da hwayak,

cek hay tabiya masa aləkwa ma gwakwa
nğa nəktakwa ta dey

len cek hay tabiya masa ma hətam ba.

Ta fa Bəzey anğa ha, aa ta ləmtərwa cek hay
masa ta gədan la,

kwa maslan anğa hay da vad, kwa bay hay da bəla,

ta *bay-ray hay nğa mesəfney maaya ba hay len kuley
hay.

Yaw, Gazlavay a ləmtərwa cek hay a tabiya na,

ta fa har nga Bøzey anga ha,
 asaya, a læmtərwa ngada Bøzey anga ha *.

17 Kəriste he na, anga daha dōga bōla ta zley daa ba aran.
 Ara ta fa anga, cek hay tabiya mapatakaya
 daa slam ata hay ta cəved e.

18 Ara anga bay-ray nga ndəhay daa Egəliz.
 A wey da ray ndəhay daa Egəliz a
 anda ray nga ndaw ma wey da ray vaw anga.
 Ndəhay daa Egəliz na, ara anda vaw anga.
 Heter mawiya na, a zley ta fa anga.

Anga na, ara Bøzey mahura,
 ara anga ma sləkdfawa teesed daa meməcey.
 Maja ngene, a fənta cek hay tabiya.

19 Kəriste anga mahura da ray cek hay tabiya na,
 maja ta mbafar la a Gazlavay amba mevel nga Kəriste
 he
 a key letek ta mevel anga.

20 Asaya, Gazlavay ta slərdərwa Bøzey anga ha la
 amba a cəmtar dāy kwa a cek hay da vad,
 kwa a cek hay da hwayak, cəpa ta anga.

Ta handawa zazay la, a handərwa na,
 ta fa mambaz nga Bøzey anga ma mbədfwa
 fa hwadam mazlangalakaya.

21 Zleezle akwar na, ta mbədfmar dəba la a Gazlavay,
 akwar masa-gəra anga hay maja akwar ta mewulkey maaya
 ba, asaya, maja akwar ma kam cek hay maaya ba.

22 Ama wure kefe, Gazlavay ta cəmkwar dāy la ta fa
 Bøzey anga, maja Bøzey anga ha ta tərey ndaw-magədan
 la, ta məcey la fa hwadam mazlangalakaya. A cəmkwar
 dāy na, amba ka təram ndəhay maaya fa mey anga manjar
 mebərey, masa ndaw a gwa ma mbədkwar ray ba.

23 Anda kefe, si ka pamara Yesu nga ndaw akwar fara
 fara mandaw mandaw, ka da njam ta mevel cew cew ba,
 ama njam ta mevel pal. Cek hay masa ka sərmara fara
 fara ka hətam la da vad na, səkwmara, ka da mbəkdamara
 ba. Cek hay masa akwar ma səkwmara ha na, ara anda
 akwar ma cəndamara daa *Mey-maaya-mawiya. Mey-
 maaya-mawiya ha, ara mey masa ndəhay ma wuzdamara
 a ndəhay da bōla cəpa. Kwa yah, Pawl, sləra adaw na, ara
 nga wuzey mey a may.

* **1:16 1.16** ta fa har[...]ngada Bøzey anga: Nəka 1Kwr 8.6ta Rm 11.36. **1:16**
1.16 1.13; Jan 1.3, 19; Heb 1.2 **1:17 1.17** Jan 1.1; 8.58 **1:18 1.18** bay-ray nga
 ndəhay daa Egəliz: 2.19; 3.15; Ef 1.22-23; **teesed**: SNM 4.2; 26.23; 1Kwr 15.20;
 CWJ 1.5 **1:19 1.19** 2.9-10; Jan 1.16; Ef 1.23 **1:20 1.20** Rm 3.25-26; Ef 1.9-10,
 21; 2.13-16 **1:21 1.21-22** Rm 5.10; Ef 2.12-13; 5.27 **1:23 1.23** 2.7; Ef 3.17;
 1Tm 3.16; Heb 3.6

Slëra masa Pawl ma ka ngada Egëliz

²⁴ Wure kefe, ya faa sëmey da ray banay ma sawa a ray adaw maja akwar. Zleezle *Këriste ta sërey banay la. Yah fa sërey banay may maja mecëmey-ray nga Egëliz masa anda vaw nga Këriste he. Ya sërey banay a na, amba ya ndövda slëra anga.

²⁵ Ya ta tërey ndaw ma ka slëra ngada ndëhay daa Egëliz la, maja ara Gazlavay ma vëldiwa slëra ha a har adaw amba ya wuzdakwara mey anga tabiya ngada akwar masa *Jëwif hay ba hay.

²⁶ Mey a na, zleezle mabadakaya. Ndëhay a sërmara mey a ba. Ama wure kefe, Gazlavay ta wuzdërwa la a ndëhay anga hay.

²⁷ Gazlavay a wufey nga wuzdatara cek masa aa ma wufey nga ka. Cek aha na, ara cek maaya kalah ma handawa mepësey-mey a ray sëkway hay tabiya. Mey a masa mabadakaya ma wuzwa a palah na, ara Yesu Këriste ma njeý aa mevel akwar. Ara maja Yesu a, akwar fa sërmara Gazlavay a da mbëzdakwar aa slam anga maaya.

²⁸ Anda kefe, mey masa ala ma wuzdamara a ndëhay tabiya na, ara mey da ray Këriste. Da ray ngene, ala fa këtmeta ndëhay tabiya, ala faa sërkadamatar cek hay ta lenjesl masa Gazlavay ma vëldandara. Ya kam slëra anda kefe na, amba ndëhay tabiya masa daa cëved nga Këriste, a tëram ndëhay mangaratakaya daa mey nga Gazlavay.

²⁹ Ara maja kefe, ya key slëra ta gëdan tabiya masa Këriste ma vëldiwa, amba ya ndövda slëra ha.

2

¹ Yaw, ya wufey na, ka sërmara ya fa key gëdan maja akwar Kwalaws hay, maja ndëhay da Lawdise, len maja ndëhay mekele masa ma sërmaya ba.

² Ya fa key gëdan, maja akwar tabiya na, amba ya vëlkwar gëdan nga tëbey mey nga Gazlavay ma fëna ma fëna, asaya amba ka wuzdam vaw da wuzlah akwar ta mevel pal. Ya fa key gëdan maja ya wufey ka sërmata cek hay masa Gazlavay ma wuzdatërwa da ray Këriste, amba ka wulkam cew cew da ray cek hay a ba. Ya wufey ka sërmara maaya maaya anda kefe na, amba Gazlavay a pëskwar mey ta mepësey-mey mekele mekele tabiya. Anda kefe, ka da sërmara mey mabadakaya nga Gazlavay maaya maaya. Mey mabadakaya ha na, ara Këriste.

³ Ara ta fa Kəriste he, ya gwakwa nga hət kwa lenjesl, ya gwakwa nga sər kwa cek maaya masa mabadatakaya da har anğa.

⁴ Yaa guzlkwar anda keđe na, amba ndaw a batakwar ta mey hay ma mbədda lenjesl nga ndaw ba.

⁵ Kwa yah da wuzlah akwar daa ba na, ama mevel adaw aa ta akwar mandaw mandaw cənğa. Ya faa səmey maja ya səra, akwar fa kam cek hay ta cəved e, asaya, akwar fa pamara Kəriste nga ndaw akwar fara fara, akwar fa wulkam cew cew daa ba.

Pam lenjesl ta ndəhay ma wudam nga batamakwar

⁶ Wure keđe, akwar ta təbmara Yesu *Kəriste la amba a key Bay akwar Mahura. Anda keđe, njam, kam cek anda anğa ma wudey.

⁷ Yaw, njam ta anğa, anda wudez masa slaslalay a dərən daa vөгed. Təbmara mey nga Yesu ma fəna ma fəna anda ata maa sər kadamakwara. Kamar suse a Gazlavay mandaw mandaw.

⁸ Pam lenjesl ta ndəhay maa guzlam saw maja a da batamakwar ta meesərkey ata hay. Meesərkey a, a sawa ta fa Kəriste ba, ama a sawa ta fa kwakwas hay masa ndəhay ma kamara lej ta fa cek hay mekele mekele masa ndəhay ma namatar ray da bəla keđe.

⁹ Si ka jəkam sləmay fa Kəriste gway, maja kwa daa masa anğa ma njeý da bəla na, a lawa Papaha Bay Gazlavay, mevel anğa na, letek ta nga anğa.

¹⁰ Akwar macəmkaya ta Kəriste nğene na, ka hətam heter mawiya ma sawa ta fa anğa la, heter e nğene a həkwar daa ba. Kəriste he anğa mahura da ray ndəhay, anğa mahura da ray kuley hay, anğa mahura da ray maslan hay nga Bay Gazlavay da vad, anğa mahura kwa da ray cek hay tabiya.

¹¹ Zleezle na, Gazlavay ta ləvtar la a *Jəwif hay nga slam mandawal amba a wuzdamara fara fara ata ndəhay anğa hay. Ama daa mecəmey akwar ta Kəriste na, Gazlavay ta kakwar cek mekele la anda *mesley mandawal a. Cek aha na, ara membədey mevel akwar maaya ba ma həldakwar nga key mebərey. Gazlavay a ka ta fa har nga ndaw ba, ama ta fa Kəriste.

¹² Masa ata ma kamakwar *baptem na, ta pas nğene ara anda akwar daa cəvay ta Yesu Kəriste daa slam a. Daa masa akwar fa bamawa daa yam nga baptem e na, anğa anda akwar ta sləkdamawa daa meməcey sem ta Kəriste he, maja ka səmara Gazlavay aa ta gədan nga sləkdatərwa

ndəhay daa meməcey. Gazlavay ta wuzdərwa gədanj anğa ha la ta pas masa aa ma sləkɗadərwa Kəriste daa meməcey.

¹³ Zleezle na, akwar anda ndəhay maməctakaya maja akwar ta mebərey, asaya, maja akwar da wuzlah ndəhay nğa Gazlavay ba, ka səpmara *mewey nğa Gazlavay ba. Ama wure keɗe, Gazlavay ta sləkɗadakurwa sem ta Kəriste amba a vəlkwar heter mawiya. Gazlavay ta mbəkɗandakwara mebərey aləkwa hay sem cəpa.

¹⁴ Zleezle na, aləkwa ta mebərey
maja aləkwa ma zləbkwa mewey nğa Gazlavay.
Ama Gazlavay ta mbəkɗandakwara mebərey aləkwa ha sem.

A mbəkɗandakwara na,
anda ndaw ma pəley dəvaz da ray ndaw mekele.

A mbəkɗandakwara ta fa Kəriste
masa aa ma məcey fa hwadam mazlanɗgalakaya.

¹⁵ Maja meməcey anğa ha na,
Gazlavay ta təba gədanj da har kuley hay
ta da har madərlam hay nğa bay-malula sem.

Ta key bay-gula la da ray ata.
Ta wuzda la fa mey nğa ndəhay tabiya a fənta ta gədanj.

¹⁶ Yaw, anda keɗe, ka da jəkam sləmay fa ndaw ma wufey nğa həbkwar ray ta mey nğa kwakwas da ray cek mezəmey ta da ray cek mesey ba. Asaya, ka da jəkam sləmay fa ndaw ma həbkwar ray da ray mekey gwagway nğa Jəwif hay ba, kwa da ray mekey gwagway nğa maslawa nğa kiya ba, kwa da ray *pas meməskey-vaw ba.

¹⁷ Kwakwas hay a ngene na, ata anda meezed nğa cek fara fara ma da sawa. Cek aha fara fara na, ara Kəriste.

¹⁸ Ndəhay mekele fa kam cek amba ndəhay a wulkam ata ndəhay meekwed-mey hay. Ata fa dərām danɗay a maslan hay nğa Gazlavay. Mandaw mandaw ata fa zlapam, a ləvam Gazlavay fa wuztar cek. Da fa ləvmakwar akwar daa cəved maaya ba na, ka da təbmara ba! Ndəhay a ngene, ata fa zlapam nğa tede, mewulkey ata na, ara mewulkey nğa ndaw-magədanj.

¹⁹ Ndəhay a ngene, ata macəmkaya ta Kəriste ba. Kəriste na, ara *bay-ray nğa ndəhay daa Egəliz. A wey da ray ndəhay daa Egəliz a anda ray nğa ndaw ma wey da ray vaw tabiya. Ndəhay ma təbmara mey anğa na, ata anda vaw anğa. Ndəhay macəmkaya ta anğa na, fa hətam gədanj ta fa anğa. Ata macəmkaya daa slam a na, anda vaw nğa ndaw

mazəvkaya ta dəmbazl hay. Ndəhay a, fa hətam gədaŋ ta fa Gazlavay ŋga təbey mey aŋga ma fəna ma fəna, anda aŋga ma wudəy.

²⁰⁻²¹ Ka sərmara, akwar maməctakaya ta Kəriste. Da ray ŋgene, gədaŋ ŋga cek hay mekele mekele masa ndəhay ma namatar ray da bəla kefe fa da wam da ray akwar daa saba. Yaw, akwar fa njam, ka kam cek hay anda ndəhay ma sərmara Yesu ba na, maja me? Kwakwas ata hay fa ləvam: “Ka da lamara cek kefe ba!”, “Ka daa cəkdamara cek kefe ba!”, da daa ba, “Ka da wusmara cek kefe ba!” Ka namatar ray a kwakwas ata hay a ŋgene na, maja me?

²² Da ndəhay fa səpmara kwakwas hay a ŋgene na, kwakwas hay a, aa zədam la. Kwakwas hay a na, ara mey hay matəktakaya ta meesərkey masa ndəhay magədaŋ ma kamara.

²³ Fara fara, ndəhay a wulkam kwakwas hay a, ara cek maaya ma vəley leŋgesl, maja fa dərəm daŋgay anda mevel ata ma wudəy, fa nam ray, fa səram banay ta vaw ata hay. Da ray ŋgene, ndəhay a nəkmata kwakwas hay a anda cek maaya. Ama kwakwas hay a, a gwamara ŋga jənmara ndaw ba, maja a gwamara ŋga jənmara ndaw ŋga wey da ray leŋgesl aŋga ba, a gwamara a təkmarara ndaw ŋga key cek malamba ba.

3

Gazlavay a vəlkwar menjey mawiya ta fa Kəriste

¹ Ka sərmara Gazlavay ta sləkfdandakurwa sem daa meməcey ta *Kəriste daa slam a. Da ray ŋgene, pamara leŋgesl akwar a ray cek hay ŋga Gazlavay da vad, daa slam masa Kəriste manjakaya da hwaɸ a, ta har-zəmay ŋga Gazlavay.

² Mandaw mandaw wulkam da ray cek hay ŋga Gazlavay da vad a. Ka da wulkam da ray cek hay da bəla ba.

³ Ka pamara leŋgesl akwar a ray cek hay da vad a na, maja menjey akwar zleezle daa masa akwar ta sərmara Kəriste daa ba araŋ na, ta ndəvey sem, ama wure kefe, menjey akwar mawiya aa mabadakaya da har Kəriste maja akwar macəmkaya ta Gazlavay.

⁴ Ta pas masa Kəriste, ndaw ma vəlkwar heter, ma da wuzwa vaw na, akwar may, ka da wuzmawa vaw ta aŋga daa mewedəy aŋga.

2:19 2.19 1.18; Ef 4.16 **2:20-21 2.20** 2.9-10; Gal 4.3-5, 9 **2:20-21 2.21-22** Iz 29.13; Mt 15.9; 1Tm 4.3; Heb 13.9 **3:1 3.1** 2.12; Ef 1.20 **3:2 3.2** Mt 6.33 **3:3 3.3** Rm 6.4; 2Kwr 5.14 **3:4 3.4** Gal 2.20; Fəl 1.21; **mewedəy ŋga Gazlavay:** 1.27; Fəl 3.21; 1Kwr 15.43; 1Jn 3.2

⁵ Yaw, da ray ηgene, mbəkdamara mekey cek hay maaya ba da bəla. Anda meləvey, mbəkdamara meley vaw saw, mewulkey ηga key cek maaya ba ma nəsa ndaw, mesəpey ηga key cek hay maaya ba ma ka hwaray, mesəpey ηga key cek malamba, asaya, mekey dey fa cek ηga ndəhay. Mekey dey fa cek ηga ndəhay na, ara anda mepey cek aha, aa slam a ηga Gazlavay.

⁶ Kede na, ara cek hay maaya ba hay masa Gazlavay ma da cey mevel a ray ndəhay ma namar ray ba.

⁷ Zleezle daa masa akwar fa kam cek hay malamba fa mey ηga Gazlavay na, menjey akwar a, ta key la anda ηga ata ha may.

⁸ Ama wure kede, mbəkdamara mecey-mevel, mekey cek ηga cey mevel a ndaw, mekey maagway, mecədey-vaw, meeguzley mey saw. Mbəkdamata cek hay kede tabiya.

⁹ Asaya, ka da mbərzlam da wuzlah akwar ba, maja akwar ta mbəkdamara menjey akwar zleezle sem, asaya, maja akwar ta mbəkdamara sləra masa akwar ma kamara zleezle sem may.

¹⁰ Akwar ndəhay mawiya. Gazlavay ta vəlndakwar menjey mawiya la, aa fa dīya menjey a mandaw mandaw amba a tərey anda ηga anğa, amba ka sərmara Gazlavay maaya maaya.

¹¹ Anda kede, cek ma wunkata ndəhay *Jəwif hay ta səkway hay mekele daa saba, cek ma wunkata ndəhay maslatakaya mandawal ta ndəhay manda-slam mandawal na, daa saba. Kwa ndəhay marəzltakaya hay, kwa ndəhay ma səra cek ba, kwa beke hay, leη ndəhay masa beke hay ba na, ata letək fa mey ηga Gazlavay. Ama cek mahura na, ara Kəriste. Anğa daa mevel ηga ndəhay anğa hay tabiya.

¹² Gazlavay a walakwar, a tərdakwar ndəhay anğa hay. Anğa fa wudkwar. Da ray ηgene, daa menjey akwar cəpa na, səram dey-ceceh fa ndəhay, njam ta mevel maaya, kam sləra ta meney ray, təram ndəhay meekwedf-mey, ka da cam mevel saw saw ba.

¹³ Ka da cam mevel da wuzlah akwar ba. Da ndaw ma kaka cek maaya ba la na, mbəkdamara mebərey anğa ha. Mbəkdamatara mebərey ηga məlmakw akwar hay anda Bay aləkwa Mahura Yesu ma mbəkdamakwara mebərey aləkwa hay may.

¹⁴ Cek mahura na, wudam vaw da wuzlah akwar, maja da akwar fa wudam vaw da wuzlah akwar na, ka da njam

3:5 3.5 Rm 6.6, 11; Gal 5.24; Ef 4.19; 5.3 **3:5 3.5-8** Gal 5.19-21 **3:6 3.6** Ef 5.6 **3:7 3.7** Rm 1.18; Ef 5.8 **3:8 3.8** Ef 4.29; 5.4 **3:9 3.9** Ef 4.22, 25 **3:10 3.10** MC 1.26-27; Ef 4.24 **3:11 3.11** 2.11; Gal 3.28; 1Kwr 12.13 **3:12 3.12-15** Ef 4.2-4 **3:13 3.13** Ef 4.32

macəmkaya tabiya daa slam a ta mevel pal.

¹⁵ Anja zazay nga Kəriste nga wa mevel akwar. Gazlavay a zəlkwar nga njeý daa slam a na, amba ka hətam zazay anğa ha nģene. Kamar suse mandaw mandaw.

¹⁶ Pamara mey nga Kəriste aa mevel akwar maaya maaya. Sasərkam da wuzlah akwar nga njeý maaya ta Gazlavay. Kətam vaw da wuzlah akwar ta lenģesl fara fara. Zlamar walay nga *Pəsam hay, zlamar walay nga həlma, asaya, zlamar walay hay masa Mesəfney anğa ma kadakwara. Zlamar walay a Gazlavay ta mevel akwar cəpa, kamar suse.

¹⁷ Daa cek hay cəpa masa akwar ma kamara ta mey hay cəpa masa akwar maa guzlam na, kamara ta mezəley nga Bay Mahura Yesu. Kamara ta mekey suse a Gazlavay, Papa aləkwa, maja Yesu.

Mey da ray menjey nga ndəhay nga Yesu

¹⁸ Akwar nģusay, namatar ray a zel akwar hay, maja meney ray na, ara cek maaya ma mbafar a Bay Mahura Yesu.

¹⁹ Akwar zel hay may, wudmata nģwas akwar hay, ka da kam həma a ray ata ba.

²⁰ Akwar bəza hay, cənmatar mey a papakw akwar hay ta a mamakw akwar hay daa cek hay cəpa, maja mecəney-mey akwar a nģene na, a mbafar a Bay Mahura Yesu.

²¹ Akwar papan hay, ka da kam cek nga catar mevel a bəz akwar hay ba, maja har ata a da rəwey nga key cek maaya.

²² Akwar beke hay, namatar ray a bay akwar hay da bəla kede daa cek hay tabiya. Ka namatar ray na, daa masa ata da cakay akwar nga mbafatar daada ba, ama namatar ray kwa da masa ata da cakay akwar daa ba may. Sasəkar jak, kamatar sləra ta mevel pal maja akwar fa namar ray a Bay aləkwa Mahura Yesu.

²³ Kwa sləra wura wura masa akwar ma kamara na, kamara ta mevel pal, kamara sləra ha anda nģada Bay aləkwa Mahura, ba na, anda nģada ndaw-maģədaŋ ba.

²⁴ Ka səmra Bay Mahura masa akwar ma kamar sləra na, ara *Kəriste. Ara Bay Mahura ha ma da pəlkwara mawurbay nga sləra akwar a, a da vəldakwara cek masa aa ma bada da vad nģada ndəhay anğa hay.

²⁵ Ama ndəhay ma kam maagway na, Gazlavay a pəltara la anda sləra masa ata ma kamara. Gazlavay na, a weley ndaw ta weley ba.

4

¹ Akwar bay hay, kamatar cek a beke akwar hay ta cæved e. Særfadamara Bay akwar da vad daha may.

Ndøhay nga Gazlavay a da kam na, me?

² Mandaw mandaw dærmær dangay a Gazlavay. Mayad a da kakwar daa medørey-dangay akwar ba, asaya, kamar suse.

³ Daa medørey-dangay akwar, særfadamandar may, cacæfdamara Gazlavay nga dæyndara cæved maaya nga wuzey mey anga amba yaa særkadamatara mey mabadakaya da ray *Køriste a ndøhay. Ka særmara, wure kede yah daa færsøne na, maja mey a.

⁴ Dæram dangay a Gazlavay nga jønya daa mewuzey mey a, amba yaa guzltar a ndøhay na, a cændamara mey a maaya maaya, anda Gazlavay ma løyva nga ka sløra ha.

⁵ Wam vaw maaya maaya fa menjey akwar da wuzlah ndøhay ma tæbmara mey nga Yesu Køriste ba. Mandaw mandaw da masa akwar ta hætam har la na, jønmeta ndøhay a nga særmara mey nga Køriste may.

⁶ Da masa akwar faa guzlam na, gwaguzlam mey hay maaya masa ndøhay ma wudam nga jøkey slømay fa vøda. Anda kede, da ndaw aa cæfdakwar da ray Yesu na, ka særmara mey masa akwar ma da mbæddamara.

Mecey-har nga madagway-dakw

⁷ Tisik, masa mælma alækwa daa cæved nga Yesu *Køriste, ndaw masa yah ma wudæ kalah, anga fa key sløra nga Bay Mahura Yesu ta mevel pal. Ala cew ala ndøhay ma ka sløra nga Bay Mahura ha. Tisik e na, a kadakwara cek hay cøpa la da ray adaw.

⁸ Maja ngene, ya fa slørdakwara amba ka særmara menjey ala fede, asaya, amba a vølkwar gødan.

⁹ Ya fa slørdata ta Awnezim, mælma alækwa mawudkaya daa *mecømey-ray nga ndøhay nga Yesu. Anga na, ara ndaw ma søpa cæved nga Yesu Køriste ta mevel pal. Ara ndaw ma sawa fa akwar. Ata cewete, a kadamakwara mey da ray cek hay fede la cøpa.

¹⁰ Aristarke, masa anga wure kede daa færsøne ta yah, fa cakwar har. *Mark, ndaw daa sækway nga *Barnabas, fa cakwar har may. Ara ndaw masa yah maa guzlkwar da ray a heyey. Yaw, da masa ta wusey la fa akwar na, tæbmara maaya maaya.

¹¹ Jesøwe *, masa ata ma zəlmara Justus, fa cakwar har may. Ndəhay maakar a keđe, ara Jəwif hay ma təbmara mey nga Yesu masa ma jənmaya daa sləra amba ndəhay a təbmara Gazlavay nga bay ata. A vəlmaya gədaŋ ga. Wure keđe, Jəwif hay mekele fa jənmaya fede na, daa ba, si ara ndəhay maakar a keđe, ma jənmaya gway.

¹² Epafəras, ndaw akwar, fa cakwar har may. Anŋa ndaw ma ka sləra nga Yesu Kəriste fara fara. Mandaw mandaw fa dərey daŋgay a Gazlavay ta mevel pal maja akwar. Fa dərey daŋgay amba ka mbəkdamara metəbey mey nga Yesu ba, ka təram ndəhay manŋaratakaya daa mey nga Gazlavay, asaya, amba ka səmara maaya maaya cek masa ma mbafar a Gazlavay.

¹³ Fara fara ya fa səra Epafəras aha fa sərey banay daa sləra maja akwar, asaya, maja ndəhay nga Yesu da Lawdise ta ndəhay da Hirapawlis.

¹⁴ *Luk, dakwter masa ala ma wudmara kalah, leŋ Demas fa camakwar har may.

¹⁵ Camatar har a ndəhay nga Yesu da Lawdise, asaya, camar har a Nimfa, leŋ a ndəhay nga Yesu ma kusam da way anŋa.

¹⁶ Masa akwar ma jaŋgamara leeter masa yah ma wuzlalakwara keđe la na, slərdamatara a ndəhay daa Egəliz da Lawdise amba a jaŋgamara may. Ndəhay daa Egəliz da Lawdise nga slərdamakwara leeter masa yah ma wuzlalatara amba ka jaŋgamara may.

¹⁷ Ləvmar a Arkip nga pey leŋgesl fa sləra masa Bay Mahura Yesu ma vəldara, nga key gədaŋ amba a ndəvda.

¹⁸ *Ara yah, Pawl, ta har adaw, ma wuzlalakwara mecey-har a keđe.* Sərfadamara yah na, yah daa fərsəne. Anja maaya nga Gazlavay nga njeŋ ta akwar.

* **4:11 4.11** Jesøwe: Ta mey Gərek mawuzlalakaya «Yesu». Jesøwe ara Yesu ta mey Hebəre. **4:12 4.12** Epafəras: 1.7; Flm 23 **4:14 4.14** Luk: 2Tm 4.11; Flm 24; **Demas:** 2Tm 4.10 **4:15 4.15** Lawdise: CWJ 3.14 **4:17 4.17** Arkip: Flm 2 **4:18 4.18** 1Kwr 16.21; Ef 1.1; 3.1

**Leeter masa Pawl ma wuzlala
ngeeme a
Tesalawnik hay
Mey da ray
Leeter masa Pawl ma wuzlala
ngeeme a Tesalawnik hay**

Leeter e keɗe, ara Pawl ma wuzlalatara a Tesalawnik hay. Ndəhay ga a wulkam ara ɗerewel mawuzlalakaya teesɗ da ray siya hay daa Mejəwey-mey Mawiya. Pawl a wuzlalamara leeter e na, ata bama ta ata Silas leŋ Timawte. Ara maja ngeene, Pawl ma ləvey: «Ala, ala» dey weewe (1.1).

Tesalawnik na, ara berney masa ndəhay fa kam filaw ga da hwaɗ a. Ara maja ngeene, Jəwif hay ta ndəhay daa hwayak hay mekele mekele daa berney a daha. Masa Pawl aa daa berney a na, Jəwif hay siya ta təbmara meesərkedey aŋga daa ba. Da ray ngeene, mevel a catar, a wuɗam mey aŋga ba. Anda keɗe, ndəhay daa mecəmey-ray nge Yesu fetede, a səhwdamata ata Pawl ta Silas aa berney nge Bere ta tavad (SNM 17.10). Fa dəba ha, Pawl a daw a Aten.

Masa Pawl aŋga daa berney nge Aten na, ta', a slərda Timawte fa Tesalawnik hay amba a cəndərwa mey da ray menjey ata daa cəved nge Yesu (3.1-3). Timawte a vəhwa a hətfar Pawl da Kwarinti. A ləvar a Pawl, ndəhay da Tesalawnik fa təbmara mey nge Yesu ma fəna ma fəna. Ta ngeene he cəpa na, ndəhay a, a wulkam Yesu a da vəhwa ta vara. Ndəhay ma məcam masa aŋga ta vəhwa daa ba aran na, a da diyam ama? Pawl ta mbəɗɗatara la aa mey ata ha daa leeter e keɗe daa fasəlawal 4 ta 5. Ama teesɗ na, a ləvtar a wuɗta kalah, a wuɗey nge hətatar fa dey saya (1.2-3.13). Asaya a vəltar gədaŋ nge njeŋ daa cəved nge Yesu, nge daw fa mey fa mey daa cəved e (4.1-12).

Daa leeter e keɗe na, mey mekele mekele daha nge vəley gədaŋ a ndəhay:

Menjey maaya ma mbafar a Gazlavay (4.1)

Yesu a vəhwa la (4.13-5.11)

Cek hay maaya masa ndəhay nge Yesu ma da kamara (5.12-22)

Cek masa Gazlavay ma wuɗey fa ndəhay (5.16-18)

Mecey-har

¹ Ara yah, Pawl, ma wuzlala leeter keɗe. Ala ta ata Silas leŋ Timawte, ya camakwar har, akwar ndəhay daa Egəliz

da Tesalawnik, akwar masa macɛmkaya ta *Gazlavay Papa alɛkwa leŋ ta Bay alɛkwa Mahura *Yesu *Kɛriste.

Anja Gazlavay ŋga pɛskwar mey, asaya ŋga njadakwar daa zazay.

Pawl a kar suse a Gazlavay maja Tesalawnik hay

² Daa masa ala fa dɛram dangay a Gazlavay na, ala fa wulkam da ray akwar mandaw mandaw, ala fa kamar suse a Gazlavay maja akwar tabiya.

³ Asaya, daa medɛrey-dangay ala a Gazlavay Papa alɛkwa na, ala fa sɛrfadamara slɛra masa akwar ma kamara, maja akwar fa pamara Yesu ŋga ndaw akwar fara fara. Ala fa sɛrfadamara akwar fa kam slɛra ta gɛdan maja ka wudmara Yesu, asaya, akwar fa pam leŋgesl mandaw mandaw a ray cek masa ka sɛrmara ka hɛtam la ta fa Bay alɛkwa Mahura Yesu *Kɛriste.

⁴ Mɛlma adaw hay daa *mecɛmey-ray ŋga ndɛhay ŋga Yesu, ya sɛrmara Gazlavay a wudkwar kalah, asaya, ta walakwar la ŋga key ndɛhay aŋga hay.

⁵ Sɛrmara daa masa ala fa wuzdamakwara *Mey-maaya-mawiya na, mey a, a wusey fa akwar na, ara ta mey meeguzley daada ba, ama ta gɛdan ŋga *Mesɛfney ŋga Gazlavay may. Mey masa ala maa guzldamara na, ya sɛrmara ara mey fara fara. Daa masa ala da wuzlah akwar na, ka sɛrmara menjey ala. Ya ta kam cek la ŋga jɛnkwar.

⁶ Akwar na, akwar fa kam cek anda ala, asaya, akwar fa kam cek anda Bay Mahura Yesu. Akwar ta sɛram banay la ga, ama ka ta tɛbmara mey ŋga Gazlavay la cɛŋga, ka tɛbmara ta meesɛmey, meesɛmey masa Mesɛfney ŋga Gazlavay ma vɛldakwara.

⁷ Anda kedɛ, akwar fa kam cek maaya haa ndɛhay ŋga Gazlavay tabiya da Masadɛwan leŋ da Akay a nɛkam dey fa akwar, a kamara kɛne.

⁸ Fara fara mey ŋga Bay alɛkwa Mahura a zlawana, fa akwar haa a wusey fa ndɛhay da Masadɛwan leŋ da Akay. Asaya, kwa ndɛhay daa wura, daa wura, fa cɛndamara akwar fa tɛbmara mey ŋga Gazlavay. Da ray ŋgene, ala fa daa guzlmatar da ray metɛbey-mey akwar na, daa saba,

⁹ maja ndɛhay a fa zɛldamakwar slɛmay, a lɛvam akwar ta tɛbmandar la maaya maaya daa masa ala da wuzlah akwar. Asaya, a lɛvam akwar ta mbɛkdamara metey kuley

sem amba ka sɔpam Gazlavay masa ta dey, Gazlavay masa fara fara.

¹⁰ Anda keɗe, akwar fa sɔkwɛmara Bɔzey ŋga Gazlavay ma da vɔhwa da gazlavay da vad. Bɔzey a na, ara Yesu masa Bay Gazlavay ma slɛkɗadɔrwa daa memɔcey heyey. Ara anɔga ma da ka amba Gazlavay a ceɣ mevel a ray alɛkwa ba ta pas masa Gazlavay ma da ka sariya.

2

Mey da ray slɛra ŋga Gazlavay masa Pawl ma ka da Tesalawnik

¹ Mɔlma ala hay daa *mecɔmey-ray ŋga ndɔhay ŋga Yesu, akwar ta ray akwar, ka sɔrmara ala ma diyam fa akwar heyey na, ara ŋga tede ba.

² Asaya, ka sɔrmara daa masa ala ma wusam fa akwar daa ba aran na, ndɔhay daa berney ŋga Fɛlepi ta sɔrdamandar banay la, ta cɔɗmandar la. Masa ala ma wusam la fa akwar na, ndɔhay ga ta kam hɔma la a ray ala may. Ama Gazlavay ta vɔlndar gɔɗan la, amba ya wuzdamakwara Mey anɔga maaya mawiya cɔnɔga.

³ Masa ala fa wuzam meɣ da ray cɔved maaya a ndɔhay na, ya wuzdamara na, ta membɔrzley da hwaɗ a daa ba, asaya, ala fa kam slɛra ta mevel maaya, ala fa batam ndɔhay daa ba.

⁴ Ama Gazlavay ta sangalandar la, ta sɛra la, ala ndɔhay anɔga hay fara fara. Anda keɗe, ta vɔldandara *Mey-maaya-mawiya ha la amba ya wuzdamara a ndɔhay. Maja ŋgene, yaa guzlam na, amba a mbafatar a ndɔhay ba, ama amba a mbafar a Gazlavay ma sɛra mevel ala.

⁵ Ka sɔrmara daa masa ala da wuzlah akwar na, ala faa guzlam meɣ maaya maaya ŋga mbafakwar ŋga fɛcmakwar daa ba, ala fa wulkam amba ya batam cek fa ndɔhay na, daa ba. Mey masa ala ma kadamara, kwa Gazlavay na, a sɛra ara meɣ fara fara.

⁶ Ala ta wudam amba kwa waawa a hɔlmandar na, daa ba. Kwa akwar, kwa ndɔhay mekele, ala ta wudam amba ndaw a hɔlmandar na, daa ba.

⁷ Ala na, ya gwamara ŋga weɣ da ray akwar maja ala ndɔhay meslɔrey ŋga Yesu. Ama ala ta kamara kɔne daa ba. Ala na, ndɔhay meekwed-mey da wuzlah akwar anda maman maaya ma nɔkey dey fa bɔz anɔga hay.

⁸ Ala fa wudmakwar kalah. Da ray ηgene, ala ta wuzdamakwara Mey-maaya-mawiya nga Gazlavay la. Ama ala ta meesəmey nga key cek mekele ma fəna saya. Ala ta meesəmey ga nga vəldamara kwa ray ala maja akwar, maja ala ta wudmakwar sem kalah.

⁹ Məlma ala hay daa mecəmey-ray nga ndəhay nga Yesu, sləra masa ala ma kamara ta gədan̄ ta gədan̄ ηgada akwar na, akwar fa sərɤadamara, ba diya? Daa masa ala fa wuzdamakwara Mey-maaya-mawiya nga Gazlavay na, ala ta məskam vaw daa ba, ala ta kam sləra la taa vad, taa pas, amba ya njam fa har akwar ba.

¹⁰ Daa masa ala da wuzlah akwar, akwar ndəhay ma təba mey nga Yesu na, menjey ala an̄ga maaya na, maja ala fa jəkam sləmay si fa Gazlavay, ala fa kam cek ta cəved̄ e, asaya, kwa ndəhay faa guzlam mey maaya ba da ray ala daa ba. Kwa akwar na, ka sərɤmara menjey ala. Gazlavay may, a səra.

¹¹ Asaya, ka sərɤmara ala ta kam cek la kwa ηgada waawa da wuzlah akwar anda papən̄ ma key cek ηgada bəz an̄ga hay.

¹² Ala fa vəlmakwar gədan̄, ala fa dəkmakwar mevel, asaya, ala faa guzlmakwar mandaw mandaw amba ka njam, ka kam cek anda Gazlavay ma wudɤey. Ara an̄ga ma zəlkwar nga njey a wuzlah ndəhay masa an̄ga fa wey da ray ata amba ka sərɤmara maaya an̄ga.

¹³ Yaw, ala fa kamar suse a Gazlavay mandaw mandaw saya na, maja daa masa ala fa wuzdamakwara mey nga Gazlavay na, akwar ta jəkam sləmay la. Akwar ta təbmara mey a anda mey nga ndəhay magədan̄ daa ba, ama ka təbmara na, anda mey nga Gazlavay. Fara fara mey a, ara mey nga Gazlavay. Mey a, a vəkwar gədan̄ ηgada akwar ndəhay nga Gazlavay.

¹⁴ Məlma ala hay daa mecəmey-ray nga ndəhay nga Yesu, ndəhay akwar hay ta sərɤdamakwar banay la anda *Jəwif hay ma sərɤdamata banay ta ndəhay daa Egəliz hay nga Gazlavay daa hwayak nga *Jude. Anda keɸe, akwar anda ndəhay ma təba mey nga Yesu *Kəriste daa hwayak nga Jude he masa Jəwif hay ma sərɤdamata banay.

¹⁵ Jəwif hay na, ta kəɸmata ndəhay ma təla mey nga Gazlavay la zleezle. Jəwif hay mekele hay ta kəɸmara Bay Mahura Yesu la vagay. Asaya, Jəwif hay mekele hay saya ta sərɤdamandar banay la may. Ndəhay a ηgene, Gazlavay faa

səmey da ray ata daa ba. Ata masa-gəra hay nga ndəhay tabiya.

¹⁶ A təkmandar nga wuzey mey nga Gazlavay a ndəhay masa Jəwif hay ba hay, mey masa ma da ləhdata. Jəwif hay a, ata ta mebərey ga, ama ata fa kam mebərey mandaw mandaw a dey a, a dey a. Anda kefe, Gazlavay a bəsa mebərey ata ha saba, a cey mevel a ray ata, a katar sariya.

Pawl a wufey nga daw nga nəktərwa Tesalawnik hay sayə

¹⁷ Məlma ala hay daa *mecəmey-ray nga ndəhay nga Yesu, ala na, ta wudkam la ta akwar nga dər nekəfey, ama mevel ala anğa ta akwar cənğa. Ala ta kam gədan la nga vəhey fa akwar, maja ala fa wudam nga hətmakwar fa dey saya.

¹⁸ Ara maja nğene, ala ta wudam la nga vəhey fa akwar. Fara fara yah, Pawl, ta ray adaw, ya ta kəfey vaw la dey weewe nga daw fa akwar, ama *Satan ta təkndar sem.

¹⁹ Ya wudam nga vəhey fa akwar na, maja akwar ndəhay masa ala fa pamara mewulkey ala a ray akwar, akwar ndəhay ma vəlmandar meesəmey, asaya, ara akwar ma da wuzdamandara ala ta kam sləra maaya la. Maja nğene, ya daa səmam fa mey nga Bay aləkwa Mahura Yesu ta pas masa anğa ma da vəhwa.

²⁰ Fara fara ala fa həlmamara Bay aləkwa Mahura maja akwar, asaya, ala faa səmam maja akwar.

3

¹ Masa ala ma cənam mey da ray akwar daa ba heyey na, ya gwamara nga bəsmara ba. Anda kefe, ala ta wulkam la, maaya na, ya njam da Aten taava ala,

² ya slərdamara Timawte fa akwar. Timawte he na, ara məlma aləkwa daa mecəmey-ray nga ndəhay nga Yesu, ala ma kam sləra nga Gazlavay bama nga wuzey *Mey-maaya-mawiya da ray *Kəriste. Da ray nğene, ya ta slərdamara la fa akwar nga jənkwar, asaya, nga vəlkwar gədan daa mey nga Yesu.

³ Ya slərdamara na, amba banay masa akwar ma səmərəna, a mbədda lenğesl kwa nga waawa da wuzlah akwar ba. Akwar na, ka səmərəna maaya maaya, banay hay a na, ara cek ma key daa menjey aləkwa, aləkwa ndəhay nga Gazlavay.

2:15 2.15 SNM 2.23; 9.23, 29; 13.45, 50; 14.2, 5, 19; 17.5, 13; Rm 11.28; 2Kwr 11.23-29 2:16 2.16 Mt 23.31-33 2:17 2.17 3.10 2:19 2.19-20 1Kwr 9.24-25; Fəl 4.1; 2Tes 1.4 3:1 3.1 SNM 17.15 3:2 3.2 Timawte: 1.1 3:3 3.3 Ef 3.13; 2Tes 1.4; 2Tm 3.12

⁴ Daa masa ala da wuzlah akwar na, ya ta lõvmakwar la, ya da sèrkwa banay. Ka sèrmara fara fara banay a, ta wuswa la.

⁵ Da ray ñgene, daa masa ala ma gwamara ñga vøhey fa akwar daa ba heyey na, ya gwamara ñga bøsmara ba. Ta', ya slørda Timawte fa akwar amba ya cønda mey da ray akwar, da akwar fa tøbmara mey ñga Yesu cøñga may kwa. Ya zlurey maja Satan a da batakwar. Da ta batakwar sem na, sløra masa ala ma kamara da wuzlah akwar heyey na, a da tørey ñga cek ñga tede.

⁶ Timawte ta daw la fa akwar, wure kefe ta vøhwa cay fa ala. Taa guzldar mey maaya la da ray akwar, a lõvey akwar ta gødan daa mey ñga Yesu, asaya, akwar fa wudam vaw da wuzlah akwar. A lõvey saya, akwar fa sèrfadamandar maaya maaya cøñga. Akwar fa wudam ñga høtmandar saya anda ala ma wudam ñga høtmakwar saya may.

⁷ Mølma ala hay daa mecømey-ray ñga ndøhay ñga Yesu, ala fa sèram banay kalah, ama daa masa ala ma cøndamara, akwar ta gødan daa mey ñga Yesu na, mey a ta vøldar gødan la ga.

⁸ Wure kefe, ala ta meesømey ma føna ma føna maja akwar fa tøbmara mey ñga Bay Mahura ta mevel pal.

⁹ Fara fara, ala faa sømam ga maja akwar. Ala fa kamar suse a Gazlavay, ama kwa ya kamar suse høma kwara na, suse ala ha a wusa ba.

¹⁰ Ala fa døram danğay taa vad, taa pas mandaw mandaw ta mevel pal amba ya høtmakwar fa dey, asaya, amba yaa sèrkadamakwar cek masa akwar ma sèrmara daa ba aran da ray cøved ñga Gazlavay.

¹¹ Anja Gazlavay Papa aløkwa ta ray anğa leñ Bay aløkwa Mahura Yesu ñga wurmandara cøved amba ya diyam fa akwar.

¹² Asaya, anja Bay aløkwa Mahura ñga ka amba ka wudam vaw da wuzlah akwar ma føna ma føna, asaya, amba ka wudmata ndøhay tabiya anda ala ma wudmakwar may.

¹³ Anja Bay aløkwa Mahura ñga vølkwar gødan amba cek malamba a njeý aa mevel akwar ba, asaya, amba ta pas masa anğa ma da vøhwa a bøla ta ndøhay anğa hay na, akwar ndøhay maaya manjar mebørey fa mey ñga Gazlavay Papa aløkwa.

4

Mey da ray menjey maaya ma mbafar a Gazlavay

¹ Məlma ala hay daa *mecəmey-ray nga ndəhay nga Yesu, wure keđe ya wudam ngaa guzlmakwar da ray cek mekele. Zleezle na, ala taa sərkadamakwar la da ray menjey maaya ma mbafar a Gazlavay. Fara fara menjey akwar a, aa kəne. Ama wure keđe, ala faa cəfdamakwar ta mezəley nga Bay Mahura Yesu, ala faa cəfdamakwar ta mevel pal amba ka səpam menjey maaya ma mbafar a Gazlavay ma fəna ma fəna.

² Ala taa sərkadamakwar la da ray cek hay nga key, maja ara Bay Mahura Yesu ma pandar ngaa sərkada. Ka sərmara cek hay masa ala maa sərkadamakwara ha, ba diya?

³ Gazlavay a wufey na, ka təram ndəhay manjar mebərey, ka da lam vaw saw ba.

⁴ Maaya na, kwa waawa da wuzlah akwar a səra nga njeý maaya maaya ta ngwas anga anda Gazlavay ma wufey, amba ndəhay aa guzlam maaya ba da ray menjey akwar ba.

⁵ Ka da səpam nga key cek malamba ba. Ma kam cek anda ngene na, ara ndəhay ma sərmara Gazlavay ba.

⁶ Da ray mey a keđe na, ndaw a da kar cek maaya ba a məlmaha ba, a da bata ba səlak, maja Bay aləkwa Mahura a da sərdata banay ta ndəhay ma kam cek malamba anda ngene. Ala ta kətmakwar la zleezle da ray cek aha.

⁷ Yaw, Gazlavay ta zəlndakwar nga key cek hay malamba daa ba, ama a zəlndakwar na, amba ya tərkwə ndəhay maaya fa mey anga.

⁸ Ndaw ma rəsa mey a keđe na, a rəsey ngene na, ndaw ba, ama a rəsey Gazlavay ma vəkwar Mesəfney anga. Mesəfney anga ha na, maaya, manjar mebərey.

⁹ Akwar fa wudam vaw da wuzlah akwar. Da ray ngene, ala fa da wuzlalamakwar da ray mewufey-vaw na, daa saba, maja Bay Gazlavay taa sərkadakwar cay nga wufey vaw da wuzlah akwar.

¹⁰ Fara fara, akwar fa wudam vaw da wuzlah akwar, akwar fa wudmata ndəhay nga Yesu tabiya masa daa hwayak nga Masadəwan. Məlma ala hay daa mecəmey-ray nga ndəhay nga Yesu, ya kamakwar ambahw amba ka wudam vaw ma fəna ma fəna saya.

¹¹ Asaya, kam gədanj amba ka njam daa zazay, amba kwa waawa a nəkey dey fa sləra masa fa mey anga, amba kwa

waawa a zəmey cek si ta fa mawurbay anɔa, anda ala ma kətmakwar zleezle.

¹² Da akwar fa kamara kəne na, ndəhay ma təba mey nga Yesu ba a namakwar ray la. Asaya, akwar fa da rəkam cek fa ndəhay daa ba.

Mey da ray pas masa Bay Mahura Yesu ma da vəhwa

¹³ Məlma ala hay daa *mecəmey-ray nga ndəhay nga Yesu, ya wudam ka sərmara cek ma da key da ray ndəhay nga Yesu maməctakaya amba ka təwam anda ndəhay mekele ba. Ndəhay mekele he na, fa pam lenɔesl nga hətəy heter nga njeɔ ta Yesu nga sərmataw daa ba.

¹⁴ Ya sərkwa Yesu ta məceɔ sem, fa dəba ha, ta sləkɔdawa sem daa meməceɔ. Da ray nɔgene, sərmara fara fara ndəhay nga Yesu maməctakaya na, Gazlavay a sləkɔɔadətərwa la daa meməceɔ amba a njam ta Yesu a.

¹⁵ Mey masa ala ma daa guzlmakwar wure keɔe na, ara mey masa Bay Mahura Yesu maa sərkadatarə a ndəhay. Mey a, a ləvey, ta pas masa Yesu ma da vəhwa a bəla na, aləkwa masa ta dey da bəla keɔe, aləkwa fa da nakwa teeseɔ da ray ndəhay maməctakaya nga ceɔ ray ta anɔa daa ba.

¹⁶ Anda meləvey, ta pas nɔgene, Gazlavay aa guzlwə la ta ɔəɔanɔ. Maslan nɔga mahura a wudeɔ la ta ɔəɔanɔ, ɔay nɔga taalam nɔga Gazlavay a cənwa la. Fa dəba ha, Bay aləkwa Mahura Yesu ta ray anɔa, a pawə salay da vadɔ. Ndəhay anɔa hay maməctakaya na, a sləkɔɔamawa la daa meməceɔ teeseɔ,

¹⁷ fa dəba ha, aləkwa masa ta dey na, Gazlavay a həlndakwar la ta ndəhay maməctakaya heyey aa mekwteɔe, amba ya cakwa ray ta Yesu daa memedɔ da vadɔ. Anda keɔe, ya da njakwa nɔga sərmataw ta Bay aləkwa Mahura Yesu.

¹⁸ Maja nɔgene, dəkam mevel da wuzlah akwar ta mey a keɔe.

5

Ma da ɔiyey vaw nɔga səkweɔ Yesu ma da vəhwa na, kwara?

¹ Məlma ala hay daa *mecəmey-ray nga ndəhay nga Yesu, mey da ray pas masa Yesu ma da vəhwa na, ala fa da wuzlalamakwar da ray a daa ba,

4:11 4.11 2.9; Ef 4.28; 2Tes 3.10, 12 4:12 4.12 1Kwr 5.12-13; Kwa 4.5 4:13
 4.13 1Kwr 15.18-19; Ef 2.12 4:13 4.13-17 5.1-2; 1Kwr 15.51-52 4:14 4.14
 Rm 14.9; 1Kwr 15.3-4, 12, 20 4:15 4.15 1Kwr 7.10, 25 4:16 4.16 1Kwr 15.23
 4:17 4.17 Jan 12.26; Rm 5.17; Fəl 3.20

² maja akwar ta ray akwar, ka sɛrmara pas masa Yesu ma da vɛhwa na, a sɛrey ba, aɲga anda pas masa ndaw-mayal ma da mbɛzey a way ndaw ta tavaɗ ma sɛrey ba.

³ Da masa ndɛhay fa lɛvam: «Ala daa zazay, cek ma da hɛtfandar daa ba» na, ɲgene, banay a da sawa a ray ata dɛrfafay anda hwaɗ ma car ɲgada ɲgwas ma da yawa. Ndɛhay ma wulkam anda ɲgene na, fa da lɛham daa ba sɛlak.

⁴ Ama, akwar, mɛlma ala hay daa mecɛmey-ray ɲga ndɛhay ɲga Yesu na, akwar ndɛhay masa ma njam daa lɛvaɲ ba. Da ray ɲgene, pas masa Yesu ma da vɛhwa na, fa da hɛtfakwar dɛrfafay anda ndaw-mayal ma hɛtfey ndaw na, daa ba.

⁵ Akwar tabiya na, ndɛhay ma njam daa slam-mewefey, ma sɛkwɛmara pas ɲga Yesu ma da vɛhwa. Alɛkwa ndɛhay ma njam daa lɛvaɲ ba, asaya, alɛkwa ndɛhay ɲga tavaɗ ba.

⁶ Maja ɲgene, ya da njakwa anda ndɛhay mekele ba. Ya da nakwa dɛr ba, ama njakwa ta mewey vaw, asaya, pakwa lɛɲgesl fa ray alɛkwa.

⁷ Ndɛhay a nam na, ta tavaɗ. Ndɛhay a sam wuzam, a wam na, ta tavaɗ may.

⁸ Ama alɛkwa na, ndɛhay ma sɛkwɛmara pas ɲga Yesu ma da vɛhwa. Da ray ɲgene, pakwa lɛɲgesl fa ray alɛkwa. Njakwa mandaw mandaw daa metɛbey-mey ɲga Yesu, asaya, wudkwa vaw da wuzlah alɛkwa. Menjey anda keɗe na, ara anda ndaw ma bɛrɗa dadak aɲga ta zana ɲga bɛrey ɲga key vɛram. Pakwa lɛɲgesl fa melɛhey masa alɛkwa ma hɛtkwa ta fa Yesu. Mepey lɛɲgesl fa melɛhey a na, ara anda ndaw ma pey jikwew ɲga bɛrey ɲgadaa vɛram.

⁹ Yaw, Gazlavay a walandakwar na, amba a sɛrdandakwar banay ba. Ama a walandakwar amba a lɛhdandakwar ta fa Bay alɛkwa Mahura Yesu *Kɛriste.

¹⁰ Yesu Kɛriste he ta mɛcey la maja alɛkwa amba ya njakwa daa slam a ta aɲga. Pas masa aa ma da vɛhwa, kwa alɛkwa ta dey, kwa alɛkwa mamɛctakaya na, ya njakwa la daa slam a ta aɲga.

¹¹ Da ray ɲgene, vɛlam gɛdaɲ da wuzlah akwar, jɛnam vaw da wuzlah akwar ɲga tɛbey mey ɲga Yesu ma fɛna ma fɛna anda akwar ma kamara wure keɗe.

Mey ɲga madagway-dakw

5:2 5.2 1.2-3, 10; 2.19; 3.13; 5.23; Mt 24.36; Fɛl 4.5; 2Tes 1.7, 10; 2.1-2; **anda pas masa ndaw-mayal ma sawa:** Mt 24.43; 2Pi 3.10; CWJ 3.3; 16.15 5:3 5.3 Jer 6.14-15; Mt 24.39 5:5 5.5-8 Rm 13.11-12; Ef 5.8-9 5:8 5.8 Ef 6.11-17 5:9 5.9 1.10; 2Tes 2.14 5:10 5.10 4.14; Rm 14.8-9

12 Məlma ala hay daa *mecəmey-ray nga ndəhay nga Yesu, ya kamakwar ambahw, namatar ray a ndəhay ma kam sləra nga Gazlavay da wuzlah akwar. Ata na, ara ndəhay masa Bay Mahura ma pata nga *bay-ray hay da wuzlah akwar, amba a kətmakwar nga səpey cəved anğa.

13 Namatar ray maaya maaya, asaya, wudmata maja ata fa kam sləra nga Gazlavay. Njam ta zazay da wuzlah akwar.

14 Məlma ala hay daa mecəmey-ray nga ndəhay nga Yesu, ya kamakwar ambahw, kətmata masa-mayad hay, vəlmatar gədaŋ a ndəhay masa ta mandərzay daa dey, jənmata ndəhay masa-bəle daa mey nga Gazlavay. Bəsmata ndəhay tabiya.

15 Wam vaw! Da ndaw a kakwar cek maaya ba na, ka da kamar cek maaya ba kəne ba. Ama daa menjey akwar na, kam gədaŋ mandaw mandaw amba ka kam cek hay maaya da wuzlah akwar, asaya, amba ka kam cek maaya ngada ndəhay tabiya.

16 Njam mandaw mandaw daa meesəmey.

17 Dəram daŋgay a Gazlavay mandaw mandaw, ka da gəram ba.

18 Kamar suse a Gazlavay, kwa daa meeme cəpa, maja a wufey amba akwar ndəhay nga Yesu *Kəriste na, ka kamara kəne.

19 Ka da təkmarə sləra nga *Mesəfney nga Gazlavay ba.

20 Ka da rəsmara mey hay nga ndəhay ma təla mey nga Gazlavay ba.

21 Saŋgalamata mey hay a maaya maaya dāgay. Da mey hay a, a samawa ta fa Gazlavay fara fara na, ŋgene, təbmara mey hay a, aa mevel akwar.

22 Ka da kam cek malamba ba səlak.

23 Anja Gazlavay ta ray anğa, ndaw ma njadata ndəhay daa zazay, ŋga ka amba ka təram ndəhay manjar mebərey, ŋga jəfa mesəfney akwar, heter akwar, ta vaw akwar cəpa maaya maaya, amba ta pas masa Bay aləkwa Mahura Yesu Kəriste ma da vəhwa na, a hətfakwar manjar mebərey.

24 Gazlavay ma zəlkwə ŋga njeŋ ta anğa na, a ndəvda sləra ha la fara fara, maja cek masa anğa ma ləvey a ka la na, a ka la.

25 Məlma ala hay daa mecəmey-ray nga ndəhay nga Yesu, dəram daŋgay a Gazlavay maja ala may.

5:12 5.12 1Kwr 16.15-18; 1Tm 5.17 5:14 5.14 2Tes 3.6, 11, 15 5:15 5.15 Rm 12.17; Fəl 1.10 5:16 5.16 Fəl 4.4 5:17 5.17 5.25; Lk 18.1; Rm 12.12; Ef 6.18; Kwa 4.2 5:18 5.18 Ef 5.19-20 5:19 5.19 Ef 4.30 5:21 5.21 1Kwr 14.29; Ef 5.10; 1Jŋ 4.1 5:23 5.23 5.1-2; 2Kwr 13.11 5:24 5.24 1Kwr 1.8-9; Fəl 1.6; 2Tes 3.3 5:25 5.25 1.2-3; Rm 15.30

²⁶ Camatar har maaya maaya a mөлman hay daa mecəmey-ray nga ndəhay nga Yesu tabiya.

²⁷ Ya kakwar ambahw ta mezəley nga Bay Mahura, janğamara leeter kefe fa mey nga ndəhay nga Yesu tabiya.

²⁸ Anja maaya nga Bay aləkwa Mahura Yesu Kəriste nga njeý ta akwar.

**Leeter masa Pawl ma wuzlala
nga dey cew a
Tesalawnik hay
Mey da ray
Leeter masa Pawl ma wuzlala nga
dey cew a Tesalawnik hay**

Leeter e keɗe ara Pawl ma wuzlalatar a Tesalawnik hay. A wuzlalatar na, maja ndəhay daa Egəliz da Tesalawnik ta cəndamara mabara nga mey daa leeter ngeeme masa aa ma wuzlalatar na, daa ba.

Ndəhay faa sərkaɗamata ndəhay, a ləvam gweegwe Yesu a vəhwa. Ndəhay siya da Tesalawnik ma cəndamara meesərkey a na, a ləvam, da gweegwe Yesu a vəhwa na, kaa mekey sləra keme seme? Daa leeter nga dey cew keɗe na, ara mey hay masa Pawl maa guzldata cay daa leeter ngeeme.

A wuɗey kwa fa sərkaɗamata banay ta ndəhay daa berney nga Tesalawnik na, si ndəhay a, a pamara Yesu Kəriste nga ndaw ata fara fara cəngga (1.4-12).

Ta wuzda cek ma da key daa masa Yesu ma da vəhwa la maaya maaya (2.1-5). A ləvey, Yesu a da vəhwa na, si ndaw masa-həma a sawa la ɗagay, ndaw a, a təkta ndəhay nga namar ray a Gazlavay (2.3-4).

Pawl a wuɗey na, ndəhay a sərmara Gazlavay fa wuɗta fara fara, asaya ta ləhɗata sem maja ata ma təbmara Mey-maaya-mawiya, a kam cek ma mbafar a Gazlavay. Si a bəsmara banay maja Yesu Kəriste (2.13-3.5).

Pawl a kətata maja ata masa-mayaɗ hay, a mbəzam aa mey masa mey ata da hwad a daa ba. Anda keɗe, Pawl a wuɗey a mbəɗdamara menjey ata maaya ba ha ngene (3.6-15).

Daa leeter e keɗe na, mey hay maakar daha nga vəley gəɗan a ndəhay da ray mepəsey-mey (2.16-17; 3.5; 3.16)

Mecey-har

¹ Ara yah, Pawl, ma wuzlalakwara leeter keɗe. Ala ta ata Silas lej Timawte, ya camakwar har, akwar ndəhay daa Egəliz da Tesalawnik, akwar masa macəmkaya ta *Gazlavay Papa aləkwa lej ta Bay aləkwa Mahura *Yesu *Kəriste.

² Anja Papa aləkwa, Bay Gazlavay, ta Bay aləkwa Mahura Yesu Kəriste n̄ga pəsmakwar mey, asaya, n̄ga njadamakwar daa zazay.

Pawl a veltar gədan̄ a Tesalawnik hay n̄ga bəsmara banay

³ Məlma ala hay daa *mecəmey-ray n̄ga ndəhay n̄ga Yesu, si ya kamar suse a Gazlavay mandaw mandaw maja akwar. Ara cek maaya amba ya kamar suse anda keđe, maja akwar fa təbmara mey n̄ga Yesu ma fəna ma fəna, asaya, maja akwar fa wudam vaw da wuzlah akwar ma fəna ma fəna.

⁴ Maja n̄gene, da ala da wuzlah ndəhay mekele daa Egəliz hay n̄ga Gazlavay na, ala faa guzlam da ray akwar ta meesəmey, maja kwa ndəhay fa sərdamakwar banay kwara kwara na, akwar fa bəsmara banay a, akwar fa təbmara mey n̄ga Yesu *Kəriste cəngə.

⁵ Menjey akwar a n̄gene, fa wuzda Gazlavay na, ara ndaw ma da katar sariya a ndəhay təđe fa sləra ata. Ahaw, ara maja menjey akwar a n̄gene, Gazlavay ma da tərđakwar n̄ga ndəhay maaya ma da njam da wuzlah ndəhay masa an̄ga fa wey da ray ata. Akwar fa bəsmara banay a na, maja.

⁶ Fara fara, Gazlavay na, fa key cek ta cəved e. Anda keđe, Gazlavay a da sərdata banay ta ndəhay ma sərdamakwar banay may.

⁷ Akwar ndəhay masa fa səram banay wure keđe kaa na, Gazlavay a da məskadakwar vaw, ala may kəne. Gazlavay a da məskadandakwar vaw na, ta pas masa Bay aləkwa Mahura Yesu ma da pawa salay da vad̄ ta maslan̄ an̄ga hay ma da wuzdamərwa gədan̄ an̄ga.

⁸ A da sawa na, ta awaw magədkaya, a da sərdata banay ta ndəhay ma sərmara Gazlavay ba len̄ ta ndəhay ma təbmara *Mey-maaya-mawiya da ray Bay aləkwa Mahura Yesu ba.

⁹ A sərdata banay la, a daa zəfdata n̄ga sərmataw, a da njadata dərən̄ ta Bay aləkwa Mahura, asaya, dərən̄ ta slam an̄ga menjey mewedey.

¹⁰ Cek hay a keđe a da kam na, ta pas masa Bay aləkwa Mahura Yesu ma da vəhwa. A da vəhwa amba ndəhay an̄ga hay, a həlmamara maja sləra an̄ga, asaya, amba ndəhay tabiya masa ma təbmara mey an̄ga a həslmar ray. Akwar may, akwar da wuzlah ndəhay a n̄gene, maja akwar ma təbmara mey masa ala ma wuzdamakwara.

¹¹ Ara maja n̄gene, ala ma dəram dan̄gay mandaw mandaw a Gazlavay maja akwar. Ala faa cəfdamara

Gazlavay amba a tɔrdakwar ndɔhay maaya tɔde nɔga hɔtey heter mendɔvey ba masa aa ma zɔlkwar maja. Ala faa cɔfdamara amba a jɔnkwar nɔga key cek hay maaya tabiya masa akwar ma wudam nɔga kamara, asaya, amba a jɔnkwar daa slɔra masa akwar ma kamara maja akwar ma pamara nɔga ndaw akwar fara fara. Yaa cɔfdamara nɔga jɔnkwar na, ta gɔdan nɔga.

¹² Da ray nɔgene, ndɔhay a da hɔlmamara Bay alɔkwa Mahura Yesu maja akwar. Asaya, Bay alɔkwa Mahura Yesu a da hɔslkwar ray may. Cek aha a da key na, maja mepɔsey-mey nɔga Gazlavay alɔkwa ta Bay alɔkwa Mahura Yesu Kɔriste aa da ray akwar.

2

Mey da ray cek ma da key teesed da ray Yesu ma da vɔhwa

¹⁻² Mɔlma adaw hay daa *mecɔmey-ray nɔga ndɔhay nɔga Yesu, ya wudɔy nɔgaa guzlkwar da ray pas masa Bay alɔkwa Mahura Yesu *Kɔriste ma da vɔhwa, asaya, da ray alɔkwa ma da kuskwa fa mey nɔga. Ndɔhay fa lɔvam dɔr masa Bay Mahura ma da vɔhwa heyey na, ta wuswa cay. Ama ya fa kakwar ambahw, ka da hɔbɔm ray maja ba. Kwa ndɔhay a lɔvam ara Gazlavay ma wuzdatara mey da ray dɔr a, kwa ndɔhay ta wuzam mey la da ray a, ka da tɔbmara ba. Asaya, kwa ndaw a lɔvey ta janɔga la daa leeter masa ala ma wuzlalamara na, ka da tɔbmara mey a ba, ka da zluram ba.

³ Ka da vɔlmar cɔved kwa nɔgada waawa nɔga batakwɔr ba sɔlak. Dar a fa da wuswa daa ba aran, si ndɔhay ga ma mbɔdmar dɔba la a Gazlavay dɔgay, asaya, si ndaw masa-hɔma * a sawa la dɔgay, ndaw masa Gazlavay ma daa zɔfda aa awaw.

⁴ Ndaw masa-hɔma ha, a da tɔkta ndɔhay nɔga ney ray, kwa nɔgada Gazlavay, kwa nɔgada meeme cɔpa. A da lɔvey nɔga mahura da ray cek hay a tabiya. Anda kedɔ, a da mbɔzey aa *Way-mekey-kwakwas nɔga Gazlavay amba a nɔjey aa slam maaya daa way a, a da lɔvey nɔga na, Gazlavay.

⁵ Daa masa yah da wuzlah akwar heyey na, ya taa guzlkwar la da ray cek hay a, ba diya? Ka sɔrfadamara saba daw?

1:11 1.11 1Tes 1.2-3; 5.24 **2:1-2 2.1-2** 1Tes 4.15-17; 5.1-2 **2:1-2 2.2** 1Tm 1.10;

4.14 * **2:3 2.3** ndaw masa-hɔma: Ara Sataɔ ba, ama ara masa-gɔra mahura nɔga Kɔriste. Nɔka 1Jɔ 2.18, 22. **2:3 2.3** 1Tm 4.1; 1Jɔ 2.18 **2:4 2.4** Ez 28.2; Dan 11.36; CWJ 13.5-6

⁶ Wure keɗe, cek fa tɔka ndaw masa-hɔma ha ŋga sawa. Ka sɔrmara cek ma tɔka ha. Ndaw aha fa da wuzwa vaw wure keɗe na, daa ba arañ, si pas a ma wuswa.

⁷ Fara fara, gɔɗañ ŋga ndaw masa-hɔma ha na, fa hɔldata ndɔhay ga ŋga kam cek hay malamba, ama gɔɗañ a mabadakaya. Ndaw manjakaya ŋga tɔka gɔɗañ a † na, daha. A da tɔka gɔɗañ a haa ta pas masa anɗa manjakaya daa slam anɗa daa saba.

⁸ Fa dɔba ha, ndaw masa-hɔma heyey a da wuzwa vaw dɔba. Ama daa masa Bay Mahura Yesu ma da vɔhwa daa mewɗey anɗa na, a kɔɗa la vagay ta memed ma bawa da mey anɗa, aa zɔɗɗa la kudap! ta gɔɗañ anɗa.

⁹ Masa Yesu ma vɔhwa a bɔla daa ba arañ keɗe na, ndaw masa-hɔma ma da sawa heyey na, a sawa la, a da key slɔra ta gɔɗañ ŋga *Satan, bay-malula. A da key maazla hay mekele mekele, a da batata ndɔhay ta fa maazla hay len ta fa cek hay ma rɔzla ndaw.

¹⁰ A da sawa ŋga key cek hay malamba mekele mekele ŋga batata ndɔhay ma daa zɔɗam. A daa zɔɗam na, maja ata ma tɔbmara mey masa fara fara ba, asaya, maja ata ma rɔsmara mey a. Anja da ta tɔbmara mey masa fara fara ha la na, Gazlavay a lɔhdata la.

¹¹ Yaw, a tɔbmara mey masa fara fara ba, da ray ŋgene, Gazlavay a vɔltar mewulkey maaya ba, amba a tɔbam mey membɔrzley.

¹² Da ray ŋgene, ndɔhay ma tɔbmara mey masa fara fara ba, asaya, ma wudam ŋga key cek hay malamba kalah na, sariya ŋga Gazlavay a tɔɗɗata la.

Mey da ray ndɔhay masa Gazlavay ma walata ŋga lɔhey daa meɔrey

¹³ Akwar, mɔlma ala hay daa *mecɔmey-ray ŋga ndɔhay ŋga Yesu na, Bay alɔkwa Mahura fa wudkwar kalah. Daa masa bɔla ta lɔmey daa ba arañ na, Gazlavay ta walakwar sem ŋga lɔhey daa meɔrey. A lɔhdakwar na, ta gɔɗañ ŋga Mesɔfney anɗa. Mesɔfney a, a tɔrdakwar ŋga ndɔhay ŋga Gazlavay ma kam cek ma mbafar a Gazlavay. A lɔhdakwar maja akwar ma tɔbmara mey masa fara fara. Da ray ŋgene,

† **2:7 2.7** Ndaw manjakaya ŋga tɔka gɔɗañ a: Daa 2.6Pawl a lɔvey: «cek fa tɔka ndaw masa-hɔma ha.» Daa 2.7a lɔvey ara ndaw ma tɔka. Pawl a wudɗey ŋga lɔvey na, kwara? Ndɔhay siya a wulkam ara bay mahura ŋga Rawma hay, da daa ba, ara mewey ŋga hwayak ŋga Rawm. Ndɔhay mekele saya a wulkam ara Mesɔfney ŋga Gazlavay, da daa ba, Egɔliz. Ndɔhay siya saya a wulkam ara Mey-maaya-mawiya maasɔrkadakaya ŋgada ndɔhay tabiya daa ba arañ ma tɔka (Mt 24.14). **2:8 2.8** Iz 11.4; CWJ 19.15 **2:9 2.9** Mt 24.24; CWJ 13.11-13 **2:11 2.11** 2Tm 4.4 **2:12 2.12** 1.6-8

si ya kamar suse a Gazlavay mandaw mandaw maja akwar.

¹⁴ Gazlavay a zəlkwar nga tərey ndəhay anğa hay na, ta fa *Mey-maaya-mawiya masa ala ma wuzdamakwara. A zəlkwar amba a həslkwar ray anda anğa ma həslar ray a Bay aləkwa Mahura Yesu *Kəriste.

¹⁵ Da ray ngene, akwar məlma ala hay, mey masa ala ma wuzdamakwara kwa ta mey gway, kwa ta daa leeter na, pamara mey a aa lenjesl akwar, təbmara ma fəna ma fəna.

¹⁶ Gazlavay, Papa aləkwa, a wudndakwar, aa fa dəkndakwar mevel mandaw mandaw, asaya, a ka amba ya pakwa lenjesl a ray cek maaya masa anğa ma da vəldandakwara. A dəkndakwar mevel na, ta fa maaya anğa. Asaya, a ka amba ya pakwa lenjesl a ray cek maaya ha na, ta fa maaya anğa may. Anja Bay aləkwa Mahura Yesu Kəriste ta ray anğa, len Gazlavay Papa aləkwa

¹⁷ nğa dəkmaqwar mevel, nğa vəlmakwar gədan amba ka kam cek hay mandaw mandaw tabiya masa maaya, asaya, amba kaa guzlam mey masa maaya mandaw mandaw.

3

Pawl aa cəfdəy medərey-danğay

¹ Məlma ala hay daa *mecəmey-ray nğa ndəhay nğa Yesu, wure kefe, ya wudam nğaa guzlmakwar da ray cek mekele. Yaa cəfdamakwar nğa dərey danğay maja ala, amba mey nğa Bay Mahura Yesu a daw fa mey fa mey, kwa ndaw a gwa nğa təkə ba, asaya, amba ndəhay a təbmara mey a, aa həmdamara anda akwar may.

² Dəram danğay maja ala saya, amba Gazlavay a jədndar fa ndəhay malamba hay, maja ndəhay ga fa təbmara mey nğa Gazlavay daa ba.

³ Ya sərkwə Bay Mahura na, ara ndaw ma mbəkda ndaw anğa ba. A da vəlkwə gədan, asaya, a da jədkwə amba *Satan a zlanğadadəkwar ba.

⁴ Aləkwa macəmkaya ta Bay Mahura Yesu, anda kefe, ya sərmara fara fara akwar fa kamara cek masa ala maa sərkadamakwara, asaya, ka da kamara mandaw mandaw.

⁵ Anja Bay Mahura nğa jənkwar amba ka sərmara Gazlavay fa wudkwə kalah, asaya, amba ka bəsmara banay anda *Kəriste ma bəsa.

Mey da ray mekey sləra

⁶ Məlma ala hay daa *mecəmey-ray nga ndəhay nga Yesu, yaa guzlmakwar ta mezəley nga Bay aləkwa Mahura Yesu *Kəriste, ya ləvmakwar, ndəhay masa-mayad hay * masa daa mecəmey-ray nga ndəhay nga Yesu na, ka da cəmam ta ata ba. Masa-mayad hay a na, a təbmarā cek masa ala maa sərkadamakwara ba.

⁷ Akwar ta ray akwar, ka sərmarā, maaya na, ka kam cek anda ala ma kamara. Daa masa ala da wuzlah akwar na, ala ta kam mayad daa ba,

⁸ ala maa cəfdam cek mezəmey fa ndaw nga maaya daa ba. Sasəkar jak, ala ta kam sləra la ga, taa vad, taa pas, amba ya njam fa har akwar ba.

⁹ Daa masa ala fa wuzdamakwara mey nga Gazlavay na, ala ta cəved ngaa cəfdamakwar cek mezəmey, ama ala taa cəfdamakwar daa ba. Ya kam sləra ta har ala na, amba yaa sərkadamakwar nga key sləra anda ala.

¹⁰ Masa ala da wuzlah akwar heyey na, ya taa guzlmakwar la, ya ləvam: «Ndaw ma wudəy nga key sləra ba na, ka da vəlmar cek mezəmey ba may.»

¹¹ Yaa guzlmakwar anda kedə na, maja ya cəndamara a ləvam, ndəhay siya da wuzlah akwar ata masa-mayad hay. A wudam nga kam sləra ba, ama a mbəzam aa mey hay nga ndəhay mekele masa mey ata da hwad a daa ba.

¹² Səkway nga ndəhay anda ngene na, ala fa kətmata ta mezəley nga Bay Mahura Yesu Kəriste, ya ləvmatar: «Kam sləra ta cəved e, amba ka zəmam cek ta fa mawurbay akwar.»

¹³ Akwar, məlma ala hay na, kam cek maaya ta cəved e cənga, ka da gəram ba.

¹⁴ Da ndaw da wuzlah akwar a təba mey masa ala ma wuzlalamara daa leeter kedə ba na, wam vaw ta ndaw aha, ka da kam jam ta anğa ba, amba hwaray a kar.

¹⁵ Ama ndaw a na, ka da pamara nga masa-gəra akwar ba, ama sasəkar jak, kətmara anda məlmakw akwar cənga.

Mey nga madagway-dakw

¹⁶ Bay Mahura na, ara ndaw ma njadata ndəhay daa zazay. Anja anğa, ta ray anğa, nga njadakwar mandaw mandaw daa zazay, kwa daa cek hay wura wura tabiya. Anja Bay Mahura nga njeý ta akwar, akwar tabiya.

* **3:6 3.6** ndəhay masa-mayad hay: Ara ndəhay masa ma kam sləra ba, maja ata masa-mayad fara fara, da daa ba, ara ndəhay masa ray ata fa həbey da ray mavəhwa nga Yesu gweegwe cay. **3:6 3.6** 3.12; 1Tes 5.14 **3:8 3.8** 1Tes 2.9 **3:9 3.9** SNM 18.3; 1Tes 1.6; **aa cəfdamakwar cek mezəmey:** 1Kwr 9.4 **3:10 3.10** 1Tes 4.11 **3:11 3.11** 1Tm 5.13 **3:12 3.12** Ef 4.28 **3:13 3.13** Gal 6.9 **3:14 3.14** 1Kwr 5.9, 11 **3:15 3.15** Mt 18.15-17; 1Tes 5.14 **3:16 3.16** 2Kwr 13.11

¹⁷ *Ara yah, Pawl, ta har adaw, ma wuzlalakwara mecey-har a kede.* Ya wuzlala mezəley adaw ta har adaw daa mendəvey nga leeter adaw hay tabiya anda kede amba ka sərmara ara yah ma wuzlala ta har adaw.

¹⁸ Anja maaya nga Bay aləkwa Mahura Yesu *Kəriste nga njeý ta akwar ndav.

**Leeter masa Pawl ma wuzlala
ngeeme a
Timawte
Mey da ray
Leeter masa Pawl ma wuzlala
ngeeme a Timawte**

Leeter e keɗe ara Pawl ma wuzlala ngada Timawte. Timawte na, ara bəzey nga ndaw Gerek. Mamaha na, ara ngwas ma təba mey nga Yesu, ara dam Jəwif ma yey ta yey. Pawl a səram vaw ta Timawte na, daa mepəkey anga nga dey cew (SNM 16.1-3). Maa sərkada Timawte nga wuzey mey nga Gazlavay na, ara Pawl. Ara maja ngene, anga anda bəzey da hwaɗ anga. Pawl ta vəlar sləra la ga mekele mekele a Timawte, ta slərda la a Tesalawnik leŋ a Kwarinti. A pa nga bay-ray nga Egəliz hay.

Masa ata ma pəskamərwa Pawl la ngeeme daa fərsəne na, ta', a daw a wuzey mey nga Gazlavay cənga. A wuzlalara leeter a Timawte na, masa anga daa hwayak nga Masadəwan. Daa leeter e na, Pawl a kəta Timawte da ray mekey sləra daa Egəliz nga Yesu.

Pawl a wuzlalar leeter a Timawte na, dey cew. Daa masa ngeeme keɗe na, a kətata ndəhay daa mecəmey-ray nga Yesu, a kətata bay-ray hay (3.1-13). Asaya, a kəta Timawte he, a ləvar nga njeŋ ndaw ma ka sləra nga Yesu Kəriste maaya. A ləvar nga nəkey dey fa ndəhay daa mecəmey-ray hay nga Yesu.

Daa leeter e keɗe na, mey mekele mekele daha nga vəley gədaŋ a ndəhay:

Medərey-danŋay (2.1-8)

Metəbey mey nga Yesu na, a fəna mesəpey zleley (6.6-10)

Mesəpey nga key cek maaya (6.11-12)

Mecey-har

¹ Ara yah Pawl ma wuzlalakawa leeter keɗe, yah, *ndaw-meslərey nga *Yesu *Kəriste. Ara *Gazlavay ndaw ma ləhdandakwar, ta Yesu Kəriste ndaw masa aləkwa ma pakwa leŋgesl aləkwa a ray a, ma pamaya nga ndaw-meslərey.

² Ya wuzlala na, ngada kah, Timawte, ndaw masa ma tōrey sem nga bōz adaw fara fara, maja kah ma tōba mey nga Yesu Kōriste masa yah ma wuzdakawa.

Anja Gazlavay, Papa alōkwa ta Yesu Kōriste, Bay alōkwa nga pōsmaka mey, nga sōrfamaka dey-ceceh, asaya, nga njadamaka daa zazay.

Mey da ray ndōhay maa sōrkadam ndōhay ta membōrzley

³ Daa masa ya fa da daw aa hwayak nga Masadōwan na, ya ta lōvka la nga njei daa berney nga Efez. Anda kedē, ya wudēy ka njei fetedē cōnga amba ka tōkta ndōhay maa sōrkadam ndōhay ta membōrzley.

⁴ Si ndōhay a, a mbōkdamara nga hōbēy ray da ray mamba hay saw ta da ray mezōley hay nga papan nga papa ata hay zleezle ma gōrey ndaw nga tede ngene. Mey hay a ngene na, fa handawa yawa ga, fa da jōnta nga sōrey cek masa Gazlavay ma wudēy nga ka nga lōhey ndōhay na, daa ba. Ya sōrkwa cek aha na, maja alōkwa ma tōbkwa mey nga Gazlavay.

⁵ Yaa cōfdaka nga tōkta ndōhay a ngene na, maja ya wudēy ndōhay a nga wudam vaw da wuzlah ata. Anda melōvey, si a njam ta mevel maaya, a kam cek maaya, asaya, a tōbmara mey nga Gazlavay fara fara.

⁶ Ndōhay siya ta zlanḡadam sem daa cōved maaya. Ata fa kam yawa da ray mey hay saw kōne.

⁷ A wudam ngaa sōrkadamatara *kwakwas nga Mawiz a ndōhay. Aa sōrkadamatara ha na, anda ndōhay ma sōra cek, ama ata ta ray ata, a cōndamara mey masa ata ma wuzdamatara ha ba.

Kwakwas nga Mawiz mapakaya na, ngada wa hay wa?

⁸ Ya sōrkwa da alōkwa fa sōpkwa *kwakwas nga Mawiz fara fara na, kwakwas a, aa maaya.

⁹ Sōmara, ndōhay maaya fa mey nga Gazlavay na, kwakwas a ara ngada ata ba. Ama, kwakwas a na, ara ngada ndōhay ma cōnmar mey a Gazlavay ba, ngada ndōhay ma cōnam mey ba, ngada ndōhay masa-maagway, ngada ndōhay ta mebōrey, ngada ndōhay ma namar ray ba, ta ngada ndōhay maa sanḡeram da ray cōved nga Gazlavay. Asaya, kwakwas a na, ara ngada ndōhay ma

1:2 1.2 Timawte: 1Kwr 4.17; **bōz adaw:** 1Kwr 4.15; 1Tes 2.11; Tit 1.4 **1:3 1.3** Efez: SNM 20.1; **ndōhay maa sōrkadam ndōhay ta membōrzley:** 4.1-10; 6.3-5, 20-21; 2Tm 2.16-18, 23-26; Tit 1.10-16; 3.9-11 **1:4 1.4** 4.7; 6.20; 2Tm 2.16, 23; 4.4; Tit 1.14 **1:5 1.5** 1.14, 19; 2.15; 4.12; Rm 12.9; 13.10; 1Kwr 8.1; Gal 6.10; 2Tm 1.3, 13; 3.10; Tit 1.15 **1:6 1.6** 1.4; 6.4, 20; Tit 1.10 **1:8 1.8** Rm 7.12, 16

kədmata papa ata hay, da daa ba, ma kədmata mama ata hay vagay, ta ɲgada ndəhay ma kədam ndəhay vagay,

¹⁰ ɲgada ndəhay ma lam vaw saw, ta ɲgada zel hay ma lam vaw ta zel cəla ta ɲgada ɲgusay ma lam vaw ta ɲgwas cəla, leɲ ɲgada ndəhay ma hədkadam ndəhay ɲga beke. Kwakwas a saya na, ara ɲgada ndəhay ma mbərzlam, ta ɲgada ndəhay ma mbaɗam saw kəne. Yaw, anda keɗe kwakwas a na, ara ɲgada kwa waawa ma key cek maaya ba wura wura cəpa, masa wal ta meesərkedey aləkwa masa maaya.

¹¹ Meesərkedey aləkwa ha na, aa daa *Mey-maaya-mawiya. Mey-maaya-mawiya ha na, a wuzdandakwara Gazlavay aa ta gəɗaɲ, aa daa wiya mandaw mandaw. Ara aɲga ma vəldiwa Mey-maaya-mawiya ha amba ya wuzdatara a ndəhay.

Pawl a kar suse a Yesu Kəriste

¹² Ya fa kar suse a Yesu *Kəriste, Bay aləkwa Mahura. Ya fa kar suse maja a wulkey yah na, yah təɗe ɲga ka sləra aɲga. Da ray ɲgene, ta paya la ɲga ndaw ma ka sləra aɲga. Ara aɲga ma vəlya gəɗaɲ ɲga ka sləra aɲga ha.

¹³ Zleezle na, ya faa guzley mey maaya ba da ray aɲga, ya fa sərdata banay ta ndəhay aɲga hay, ya fa key həma a ray ndəhay aɲga hay a. Ama aɲga na, ta sərfaya dey-ceceh la, maja a səra cek hay masa yah ma kata na, a key ya səra ba. Ya səra ba na, maja yah ma təba mey aɲga daa ba araɲ.

¹⁴ Bay aləkwa Mahura ta pəsyə mey la ga. A vəlya gəɗaɲ amba ya təba mey aɲga, asaya, amba ya wudta ndəhay.

¹⁵ Mey masa yah ma daa guzlda kaa na, ara mey masa fara fara. Maaya na, ndəhay cəpa a təbmara mey a ta mevel pal. Ya fa ləvkwar, Yesu Kəriste na, ta sawa la a bəla amba a ləhdata ndəhay daa mebərey. Ndaw ma fənta ndəhay ta mekey mebərey na, ara yah.

¹⁶ Fara fara yah, ndaw ma fənta ndəhay ta mekey mebərey, ama Yesu Kəriste ta sərfaya dey-ceceh la cəɲga. A ka kəne na, amba a wuzdatara a ndəhay, aɲga ndaw meekweɗ-mey fara fara. A wuzdatara anda keɗe na, ɲga vəltar gəɗaɲ a ndəhay ma da təbmara mey aɲga, amba a hətam heter mendəvey ba.

¹⁷ Anja Bay Gazlavay ɲga zəma bay aɲga ɲga sərmataw. Ara ndaw masa ta dey, a məcey ba sələk.

Ndaw a gwa ɲga hətar ta dey ba.

Aŋga na, Gazlavay pal.
Anja ndəhay ŋga həslmar ray,
ŋga həlmamara ŋga sərmataw. *Amen.

Pawl a vəlar gədaŋ a Timawte

¹⁸ Timawte, bəz adaw, ya mbəkdaƿa meƿ keƿe a har akah. Mey a na, aa letek ta meƿ masa ndəhay ma təla meƿ ŋga Gazlavay maa guzlam da ray sləra masa kah ma da ka. Sərfadərwa meƿ ata ha, amba ka həteƿ gədaŋ ŋga key sləra maaya maaya.

¹⁹ Anda keƿe, ya wuƿeƿ ka ka sləra ha ta meƿel maaya, asaya, ka pa Gazlavay ŋga ndaw akah fara fara. Ndəhay siya hay a wuƿam ŋga kamara kəne ba. Maja ŋgene, fa pamara Gazlavay ŋga ndaw ata fara fara daa saba.

²⁰ Ata Himene ta Alekzandəre na, ata da wuzlah ndəhay a may. Ya ta vələdata sem a har *Satanj *, bay-malula, amba a pam leŋgesl, aa guzlam meƿ maaya ba da ray Gazlavay saba.

2

Mey da ray menjey daa mecəmey-ray ŋga ndəhay ŋga Yesu

¹ Cek ŋgeeme, masa yah ma wuƿeƿ ŋga ləƿey na, ndəhay ŋga dərmar daŋgay a Gazlavay ŋga cacəfdafamar cek, ŋga kamar ambahw, asaya, ŋga kamar suse maja ndəhay tabiya.

² Maaya na, a dərma daŋgay a Gazlavay maja bay hay, ta mahura hay tabiya ma wa hwayak hay, amba ya sərkwa banay ba, ya njakwa ta zazay. Da ray ŋgene, ya nakwa ray a Gazlavay, asaya, ya njakwa ta mekey cek maaya.

³ Medərey-daŋgay a na, ara cek maaya ma mbafar a Gazlavay, ndaw ma ləhdandakwar.

⁴ A mbafar na, maja a wuƿeƿ ndəhay cəpa ŋga ləham, asaya, a wuƿeƿ ndəhay cəpa a sərmara meƿ masa fara fara.

⁵ Mey a keƿe aa ŋgada ndəhay tabiya.

Fara fara Gazlavay na, aa pal gway.

Ma cəma ndaw-magədaŋ ta Gazlavay na, ndaw pal.

Ndaw a na, ara Yesu Kəriste.

⁶ Ta sawa la, ta vələda heter aŋga la ŋga ləhey ndəhay tabiya daa mebərey. Ta ka la anda keƿe ta pas masa Gazlavay ma

1:17 1.17 Rm 16.27 **1:18 1.18** 4.14; 6.12; 1Kwr 9.24-25; 2Tm 4.7-8; Jud 3 **1:19**

1.19 1.5 * **1:20 1.20** a har Satanj: Ndəhay a wulkam Pawl a wuƿeƿ ŋga ləƿey: «Ya ta bəлта ata Himene ta Alekzandəre sem daa mecəmey-ray ŋga ndəhay ŋga Yesu.» Nəka 1Kwr 5.13. **1:20 1.20** Himene: 2Tm 2.17; **Alekzandəre:** 2Tm 4.14; **Satanj:** 1Kwr 5.5 **2:1 2.1** Ef 6.18-19; Fəl 4.6 **2:2 2.2** Es 6.10 **2:3 2.3** Tit 3.4 **2:4 2.4** Ez 18.23; 2Tm 2.25-26; 2Pi 3.9 **2:5 2.5** Mew 6.4-5; 1Kwr 8.6; Rm 3.29-30; 10.12-13

wufey, amba a wuzdatara fara fara Bay Gazlavay a wufey nga ləhdata ndəhay tabiya.

⁷ Bay Gazlavay ta paya la nga maslan anğa, ta nga ndaw anğa meslərey. A slərđiwa na, nga wuzdatara mey masa fara fara a ndəhay masa *Jəwif hay ba hay, amba a təbmara. Yaa guzlkwar keđe na, fara fara, ya mbərzley ba.

⁸ Yaw, ya wufey na, zel hay nga dərmar danggay a Gazlavay kwa daa wura daa wura. Daa medərey-danggay a na, nga banğadəmata har ata hay a vad ta mevel maaya, ta mecey-mevel ba, ta metərey-vaw ba.

⁹ Ya wufey na, ngusay may a da pam zana nga zlepey ba, a da pam zana ma kəđtar dey a ndəhay ba. A da tərđamata ray ata hay nga zlepey ba. Dangwa hay ta bersle hay, len zana hay masa dala kalah ma həđkey ba na, a da pamara ba.

¹⁰ Ama nga wuzdamərwa membey ata ta fa sləra maaya masa ata ma kamara. Yaw, ngusay ma ləvam fa namar ray a Gazlavay na, si a kamara kəne.

¹¹ Daa meesərkey daa way nga Gazlavay na, si ngusay a njam teete, a jəkam sləmay ta meney ray fa ndaw maa sərkadata.

¹² Ya vəltar cəved a ngusay ngaa sərkadamata zel hay ba. A da lam ray da ray zel hay ba, ama si a njam teete.

¹³ Ya ləvey anda keđe, maja Bay Gazlavay a ləmwa teesəd na, zel, mezəley *Adam. Fa dəba ha, a ləmwa ngwas, mezəley *Ev.

¹⁴ Asaya, *Satan, bay-malula, ta bata Adam nga key mebərey na, daa ba, ama a betey na, ngwas. Anda keđe, ara ngwas ma cənar mey a Gazlavay ba.

¹⁵ Kwa ta ngene he cəpa, ngusay a ləham la ta fa mayawa bəza hay, ama a da ləham na, si ata fa təbmara mey nga Gazlavay mandaw mandaw, fa wudam vaw, a njam maaya fa mey nga Gazlavay, asaya, a zlapam ba.

3

Bay-ray hay nga ndəhay daa Egəliz na, wa hay wa?

¹ Ehe, mey masa yah ma daa guzlđa kaa na, ara mey masa fara fara. Ndaw ma wufey nga key *bay-ray nga ndəhay daa Egəliz na, a key ngene, a səpey nga key sləra masa maaya.

2:6 2.6 Mk 10.45; 2Kwr 5.15; Gal 1.4; Tit 2.14; 1Jn 3.16; **pas masa Gazlavay ma wufey:** Gal 4.4; Tit 1.3 **2:7 2.7** ndaw-meslərey: 1.11-17; Gal 1.1; 2.7-8; Ef 3.7; 2Tm 1.11 **2:8 2.8** 1Pi 3.7 **2:9 2.9** 1Pi 3.3-5 **2:10 2.10** 5.10 **2:11 2.11-12** 1Kwr 14.34 **2:13 2.13** MC 2.7, 21-22; 1Kwr 11.8-9 **2:14 2.14** MC 3.1-6, 13; 2Kwr 11.3

² Yaw, nga key bay-ray na, si ndaw maaya masa ndəhay faa guzlam mey maaya ba da ray a daa ba, si ndaw masa ta ngwas pal. Ndaw a, a da wey ba. A da key cek hay saw ba. A wey vaw fa ray anğa, menjey anğa, aa maaya fa dey nga ndəhay. A təbey mələk hay a way anğa. A gwa ngaa sərkadata ndəhay maaya maaya.

³ Ara ndaw ma vəlda ray anğa ngada wuzam ba, ndaw ma kədey vaw ba, ama ndaw meekwed-mey, ma wudəy mey ba, ma səpey dala kalah ba.

⁴ Si a kərza way anğa maaya maaya, amba bəz anğa hay a cənmar mey ta meney ray mandaw mandaw.

⁵ Ya lövey anda keđe na, maja da ndaw a səra ma kərza way anğa ba na, a da key bay-ray nga ndəhay daa Egəliz na, kwara?

⁶ Nga key bay-ray na, ka da pam ndaw ma təba mey nga Yesu təlam ba. Da kaa təde, a da zlepey * kwa, fa dəba ha, Bay Gazlavay a da kar sariya anda aa ma kar sariya a Satan.

⁷ Asaya, ndaw aha na, si ndəhay ma təba mey nga Yesu ba faa həmdamara may. Anda keđe, fa da rəsmara daa ba, asaya, ndaw aha fa da kəzley aa gadan nga *Satan daa ba may.

Ma jəna ndəhay daa Egəliz na, wa hay wa?

⁸ Ndəhay ma jəna ndəhay daa Egəliz na, si ndəhay maaya ta lenjesl. Si aa guzlam ta cəved e, a daa guzlam ta neneh cew cew ba. A da sam wuzam ga ba, a da səpam dala ta cəved malamba ba.

⁹ Si a təbmara mey fara fara masa Gazlavay ma wuzdan-dakwara, a kərzamara mey a ta mevel maaya.

¹⁰ Nga pey ndəhay ma jəna ndəhay daa Egəliz na, si ka sanğalamata la dagay. Da cek maaya ba fa ata daa ba na, ka pamata nga ndəhay ma jəna ndəhay daa Egəliz.

¹¹ Ngwas ata hay may †, si a pam lenjesl kəne. A daa guzlam mey saw a ray ndəhay ba, a da wam ba, ama si a kam cek hay maaya maaya ta cəved e.

¹² Ndaw ma jəna ndəhay daa Egəliz na, si ndaw masa ta ngwas pal. Si a kərzata bəz anğa hay ta ndəhay da way anğa hay maaya maaya.

¹³ Da ndəhay ma jəna ndəhay daa Egəliz fa kamara sləra ata maaya maaya na, ndəhay a həslmatar ray la. Asaya, a hətam gədan la ga, maja ata fa pamara Yesu *Kəriste nga ndaw ata fara fara.

3:2 3.2-7 Tit 1.6-9; 1Pi 5.1-4 **3:3 3.3** 2Tm 2.24 * **3:6 3.6** a da zlepey: A wudəy a lövey: «A da gəley ray». **3:7 3.7** 2Kwr 8.21; SNM 6.3 † **3:11 3.11** Ngwas ata hay may: Ta mey Gərek a gwa a cəney may «I]gusay ma jəna ndəhay daa Egəliz». **3:11 3.11** Tit 2.3

Mey da ray mey fara fara masa Bay Gazlavay ma wuzdərwa a ndəhay

¹⁴ Ya fa wulkey, menjey nekəfey fefe, ya daw la fa kah, ama ya fa wuzlalakawa mey kefe cəpa dʒagay.

¹⁵ Da ya ta wusey gweegwe daa ba na, mey masa yah ma wuzlalakawa daa leeter kefe na, ya wuzlalakawa amba ka səra, ndəhay ŋga Gazlavay a da njam na, kwara. Ndəhay aŋga hay a na, ara ndəhay daa *mecəmey-ray ŋga ndəhay ŋga Yesu macəmkaya ta Gazlavay, ndaw masa aa daha ta dey ŋga sərmataw. Ndəhay daa mecəmey-ray ŋga ndəhay ŋga Yesu a, faa sərkadamata ndəhay ta mey masa fara fara da ray Gazlavay, fa lacam maaya maaya da ray mey a.

¹⁶ Ahaw, fara fara, mey a masa aləkwa ma təbkwə na, aa mahura. Mey a zleezle mabadakaya, ama Gazlavay ta wuzdərwa la a palah. Mey a fa ləvey:

Kərīste ta sawa la a bəla, a yawa aŋga ndaw-magədan, Mesəfney ŋga Gazlavay ta wuzdərwa la

aŋga na, ndaw maaya ma key cek ta cəved e.

*Maslan hay ŋga Bay Gazlavay da vad
ta hətmar la ta dey ata.

Ndəhay ta wuzdamara mey da ray a la

a ndəhay daa səkway hay mekele mekele.

Ndəhay siya da bəla ta pamara la

ŋga ndaw ata fara fara.

Bay Gazlavay ta la sem a vad aa slam-mewedey.

4

Mey da ray ndəhay maa sərkadam ndəhay ta membərzley

¹ *Mesəfney ŋga Gazlavay ta kada la maaya maaya, a ləvey: ta pas masa bəla gweegwe a ndəvey na, ndəhay siya a mbəkdamara metəbey mey ŋga Yesu la. Ndəhay a ŋgene, a da cənmatar mey ŋgada mesəfney maaya ba hay ma bata ndəhay, a da təbmara meesərkedey ata masa ta membərzley.

² A da təbmara mey a na, ta mey ndəhay masa ta neneh cew maa guzlam si ta membərzley. Ndəhay ta neneh cew e, a sərmara ŋga wunkey cek maaya ta maaya ba saba. Ara anda lenjesl ata ta mbəfey sem.

³ A təkмата ndəhay ŋga ley ŋgwas. Asaya, a vələm cəved a ndəhay ŋga zəmey cek hay mekele mekele ba. Ama Gazlavay a katərwa cek hay a ŋgene na, ŋga zəmey. Anda

keđe, ndəhay ma təba mey anğa ma sərmara mey masa fara fara na, nğa zəməmara ta mekey suse a Gazlavay.

⁴ Cek hay tabiya masa Gazlavay ma katərwa na, aa maaya. Cek nğa mbəkey na, daa ba, ama ndəhay nğa kamar suse a Gazlavay maja.

⁵ Fara fara, mey nğa Gazlavay ta medərey-danğay na, a tərdata cek hay a maaya fa mey nğa Gazlavay.

Mey da ray ndaw ma ka sləra maaya nğa Yesu Kəriste

⁶ Si kaa sərkadatar a cek hay keđe nğada məlmakw hay daa Egəliz. Da ka faa sərkadata na, kah ndaw ma ka sləra maaya nğa Yesu *Kəriste. Ka fa hətey gədan daa cəved nğa Gazlavay maja mey anğa masa kah ma təba, ta meesərkey maaya masa kah ma səpa.

⁷ Ama mamba hay saw na, a mbafar a Gazlavay ba, ka da jəkey sləmay fa vəfa ba. Daa menjey akah na, si ka key cek maaya mandaw mandaw, anda Gazlavay ma wufey.

⁸ Da ndaw a hway amba vaw anğa a pəskey na, ara cek ma jəna nekədey. Ama da ndaw aha fa nar ray a Gazlavay na, ngene ara cek maaya ma fəna cek tabiya, maja a səra a da hətey heter mendəvey ba wure keđe ta nğada fa mey.

⁹ Mey masa yah ma daa guzlda kaa na, ara mey masa fara fara. Maaya na, ndəhay cəpa a təbmara mey a ta mevel pal.

¹⁰ Fara fara, aləkwa fa sərkwa banay daa sləra, aləkwa fa kakwa gədan daa sləra ha maja mewulkey aləkwa aa da ray Gazlavay, ndaw masa aa daha ta dey nğa sərmataw. A gwa a ləhdata ndəhay cəpa ndav, ama a da ləhey fara fara na, ndəhay ma təbmara mey nğa Kəriste.

¹¹ Ləvtar a ndəhay nğa kamara cek hay a keđe, sasərkadata mandaw mandaw da ray a.

¹² Kwa anja kah gula dğay na, ndaw a da rəska ba. Ama ka sləra akah amba ndəhay ma təba mey nğa Yesu Kəriste, a nəkam dey fa kah. Ka wuzdatara ta fa mey akah meeguzley, ta fa menjey akah, ta fa mewufey-vaw akah, ta fa kah ma təba mey nğa Yesu, leŋ ta fa kah ma səpa *mewey nğa Gazlavay ta mevel pal.

¹³ Vəlda ray akah nğa jənğey mey nğa Gazlavay fa mey nğa ndəhay mandaw mandaw. Vəltar gədan, sasərkadata haa kasl pas masa yah ma wusey fa kah. ¹⁴ Sərfada gədan masa *Mesəfney nğa Gazlavay ma vəldakawa. A vəldakawa gədan a na, ta pas masa ndəhay ma təla mey nğa Gazlavay maa guzlam da ray akah, ta *bay-ray hay

4:3 4.3 nğa ley nğwas: 1Kwr 7.1; **cek mezəmey:** MC 9.3; Rm 14.2; Kwa 2.21; Heb 13.9; **mekey suse:** Rm 14.6; 1Kwr 10.30 **4:4 4.4** MC 1.31; SNM 10.15
4:6 4.6 1.10 **4:7 4.7** 1.4 **4:8 4.8** 6.6 **4:10 4.10** Tit 3.4 **4:12 4.12** 1.5;
 Tit 2.7 **4:13 4.13** 2Tm 3.15-16

nga ndəhay daa *mecəmey-ray nga ndəhay nga Yesu ma pamaka har a ray heyey.

¹⁵ Kata cek hay a keđe tabiya maaya maaya, vəlda ray akah nga ka sləra keđe tabiya. Anda keđe, ndəhay tabiya a da hətmaka, ka fa daw fa mey fa mey daa sləra akah.

¹⁶ Wey vaw fa ray akah, asaya, wey vaw fa mey masa kah maa sərkatatara a ndəhay, kata cek hay a keđe mandaw mandaw. Da ka fa ka anda keđe na, ka ləhda ray akah la, asaya, ka ləhdata ndəhay ma jəkfamaka sləmay la.

5

Mey da ray menjey nga Timawte da wuzlah ndəhay nga Yesu

¹ Da ndaw-maraw ta key cek maaya ba la na, ka daa bəcar taa bəcey ba, ama gwaguzlar ta dək-vaw anda ngada papakw. Kətata mezəle hay anda ara məlmakw hay.

² Gwaguzltar a madanɣwas hay anda kaa guzley ngada mamakw. Kətata nɣusay siya ta sabara hay, njeɣ ta ata, ta mevel maaya anda dam-mamakw hay.

Mey da ray nɣwas-vagay hay

³ Dəktar mevel a nɣwas-vagay hay, jənta daa masa ndaw nga jənta daa ba səlak.

⁴ Da nɣwas-vagay bəz anɣa hay mahura daha, da daa ba bəza hay nga bəz anɣa hay daha na, si bəza hay a, aa sərkam nga key cek anda Gazlavay ma wufey ngada ndəhay da way ata hay dɣagay, a nəkfamatar dey. Maaya na, a jənmata ndəhay da way ata masa ma gəlmata zleezle he. Da fa kamara kəne na, a mbafar a Gazlavay.

⁵ Nɣwas-vagay manjakaya taava anɣa fara fara masa ndaw nga jəna daa ba na, mewulkey anɣa aa da ray Gazlavay. A dərar danɣay, a kar ambahw taa vad, taa pas amba a jəna.

⁶ Ama nɣwas-vagay ma key cek saw masa ma mbafar gway na, kwa anɣa ta dey na, anɣa anda ndaw maməckaya.

⁷ Sasərkatatara meɣ a keđe amba ndəhay aa guzlam meɣ maaya ba da ray ata ba.

⁸ Yaw, maaya na, ndaw ma təba meɣ nga Yesu a jənta ndəhay daa səkway anɣa. Teesed na, a jəney ndəhay da way anɣa hay dɣagay. Da a jənta ba na, a key nɣgene, a rəsa cəved nga Gazlavay. Anda keđe, ta key cek maaya ba sem, a fəna ndaw masa ma təba meɣ nga Yesu ba.

⁹ Ka da wuzleley a wuzlah mezəley nga nɣwas-vagay hay masa akwar ma jənmata na, si mezəley nga nɣwas-vagay

masa mevey kwakwar maakwaw, da daa ba, ma fəna. Si ɲgwas aha na, zel e meməcey heyey pal gway, kwa ta ley mekele daa ba,

¹⁰ asaya, si ɲgwas masa ndəhay faa həmdamara sləra aɲga. Anda meləvey, ta gəlta bəz aɲga hay la maaya maaya, ndəhay ma samawa a way aɲga na, ta təbta la maaya maaya. Asaya, ta pərtara salay ɲga ndəhay ma təba mey ɲga Yesu la, ta jənta ndəhay ma səram banay la, ta key cek hay maaya la mekele mekele.

¹¹ Ama ɲgwas-vagay hay masa sebelen hay na, ka da wuzlalata mezəley ata hay ba, maja da kaa təde a da lam zel saya kwa. Da mezəley ata hay mawuzlalatakaya, ama da ta wudam sem ɲga ley zel saya na, ɲgene a da mbəkdamara cəved ɲga *Kəriste.

¹² Anda kede, sariya a kərzata la, maja ata ma zləbmara mey masa ata ma jəwmara zleezle ɲga njeý taava ata heyey sem ɲga key sləra ɲga Yesu.

¹³ Asaya, anja kwa ɲgwas-vagay hay masa sebelen hay ta lam zel hay daa ba, da ka ta wuzlalata mezəley ata hay la na, a da təram masa-mayaɗ hay ɲga pəkey way ɲga ndəhay saw fa mey-mbew e, fa mey-mbew e. Ama cek maaya ba masa ma fəna saya na, a da təram masa baazlam hay, a ndəkwdamata ray ata hay aa mey ɲga ndəhay, aa guzlam da ray cek hay masa ata ta cəved ɲga guzley da ray a daa ba.

¹⁴ Ara maja ɲgene, ya wudəy na, ɲgwas-vagay hay masa sebelen hay na, si a lam zel, a yamawa bəza hay, a wam daa hejek ata hay, amba masa-gəra aləkwa hay a hətam mey ɲga guzley a ray aləkwa ba.

¹⁵ Yah ma ləvey anda kede na, maja ɲgwas-vagay hay sebelen hay mekele mekele ta mbəkdamara cəved maaya sem, ɲga səpey cəved ɲga *Satan.

¹⁶ Da ɲgwas-vagay hay daa səkway ɲga ɲgwas ma təba mey ɲga Yesu daha na, ɲgwas aha ɲga jənta. A da mbəkdata amba ndəhay daa *mecəmey-ray ɲga ndəhay ɲga Yesu a jənmata ba. Anda kede, ndəhay ɲga Yesu a da jənam na, ɲgwas-vagay hay masa kwa ndaw ɲga jənta daa ba səlak.

Mey da ray bay-ray hay daa Egəliz

¹⁷ *Bay-ray hay ma kam sləra maaya maaya daa Egəliz na, ata təde ɲga hətey mawurbay ɲga sləra ata da mey cew. Fara fara təde ɲga hətey mawurbay na, *bay-ray hay

ma kam gədanŋa nga wuzdamakwara mey nga Gazlavay ta ŋgaa sərkadamakwar.

¹⁸ Yaw, mey nga Gazlavay fa ləvey: «Daa masa sla fa key sləra da ley na, ka da par bebenŋa a mey ba.» Mey nga Gazlavay fa ləvey saya: «Ndaw ma ka sləra na, aa tədeŋa nga hətəy mawurbay nga sləra aŋga.»

¹⁹ Da ndaw a handaka mey maaya ba da ray bay-ray nga ndəhay daa Egəliz na, ka da təba ba. Ka da təba na, si ndəhay cew, da daa ba, maakar, ma kam sede la da ray mey a.

²⁰ Da ndaw a key mebərey na, mbədar ray fa mey nga ndəhay tabiya, amba ndəhay siya hay a kam mandərzay nga key mebərey.

²¹ Ya fa kaka ambahw fa mey nga Gazlavay, fa mey nga Yesu *Kəriste, ta fa mey nga maslanŋa hay nga Gazlavay da vad masa aa ma walata, təba mey a kedə. Daa sləra masa kah ma ka na, ka da weley ndəhay ta weley ba, wudta ndəhay tabiya letək.

²² Ka da wusey vaw nga pey har a ray ndaw amba a key sləra daa Egəliz ba, sanjala la dagay, ka da mbəzda ray akah aa mebərey nga ndəhay ba. Anda kedə, jəda ray akah maaya maaya.

²³ Yaw, ka da sey yam daada ba, ama sey wuzam * nekədey, amba hwad ma caka mandaw mandaw ŋgene, a caka saba, vaw akah a key ŋgama.

²⁴ Mebərey nga ndəhay siya, kwa manjar nga sengeley na, ndəhay tabiya a səmra. Ama mebərey nga ndəhay siya, ndəhay a da səmra na, si ata ma sanjalamata la dagay.

²⁵ Ara kəne may, cek masa ndaw ma ka maaya na, a bey ba. Kwa aa mabadakaya, nekədey a na, a wuzwa la a palah.

6

Mey da ray beke hay

¹ Maaya na, beke hay cəpa a namatar ray ŋgada bay ata hay maaya maaya, amba ndəhay aa guzlam mey maaya ba da ray Gazlavay ba, asaya, amba aa guzlam mey maaya ba da ray mey masa aləkwa maa sərkadakwa ba.

² Beke hay siya na, bay ata hay fa təbmara mey nga Yesu. Anda kedə, ata cəpa məlmanŋa hay ta bay ata hay a, daa mey nga Yesu. Ama beke hay a, da a namatar ray ba maja a

5:17 5.17 1Tes 5.12 **5:18 5.18** Mew 25.4; Lk 10.7; 1Kwr 9.9, 12-14 **5:19 5.19** Mew 19.15; Mt 18.16; 2Kwr 13.1 **5:20 5.20** Gal 2.14; Ef 5.11 **5:22 5.22** 4.14

* **5:23 5.23** wuzam: Ara wuzam anda masa Mafaw hay ma samara ba, ama ara wuzam mekele masa Pawl ma wudəy Timawte nga sa anda slalak. **6:1 6.1-2** Ef 6.5; Tit 2.9-10; Flm 8-20; 1Pi 2.18

lövam ata mөлman hay na, ηgene maaya ba. Sasəkar jak, maaya na, a kamatar sləra ma fəna ma fəna. A kamatar sləra kəne na, maja bay ata hay masa ata ma jənmata daa sləra ha na, ara ndəhay ma təba mey ηga Yesu masa Gazlavay ma wudta kalah.

Mey da ray meesərkey maaya ba ta da ray mesəpey zleley

Yaw, cek hay masa yah ma wuzdatakawa cəpa kede, si kaa sərkadatara a ndəhay, vəltar gədan ηga kamara kəne.

³ Ama ndəhay siya faa sərkadam mey mekele wal. A gəmam ηga təbmara mey fara fara ηga Yesu *Kəriste Bay aləkwa Mahura ba. Mey masa aləkwa maa sərkadakwa da ray menjey maaya ta Gazlavay na, a gəmam ηga təbmara ba.

⁴ Ndəhay ηgene a zlapam kalah, a səram cek ba, mewulkey ata maaya ba. A wudam ηga key yawa saw, ta ηga tərey vaw kalah da ray mey hay. Cek hay masa ata ma kamata ηgene na, a handawa səleη, metərey-vaw, ta mecəfey-vaw, leη mewulkey maaya ba da ray ndəhay.

⁵ Ata fa təram vaw mandaw mandaw maja mewulkey ata maaya ba, a sərmara cek masa fara fara saba. A wulkam maaya ba, a lövam mesəpey cəved ηga Gazlavay na, ara cəved ηga hətey zleley.

⁶ Ahaw, mesəpey cəved ηga Gazlavay na, ara zleley mahura, ama si ndaw ma səpa cəved e aa səmey da ray cek masa aa ma hətar da bəla, kwa aa ga daa ba.

⁷ Fara fara, ya yakurwa a bəla na, ta cek da har ba, ya da məkwa na, kəne may.

⁸ Anda kede, da aləkwa fa hətkwa cek ηga zəmey ta zana ηga kəzley fa vaw na, ηgene mak.

⁹ Ndəhay ma səpam zleley na, bay-malula fa batata ηga key mebərey, a tədām asi har anηa anda cek ma kəzley aa gadan. Ndəhay a, a səpam cek hay saw ma nəsa ndəhay, masa maa zəddata.

¹⁰ Mewudfey dala kalah na, a handawa cek hay maaya ba tabiya. Ndəhay mekele a mbəkdamara cəved ηga Gazlavay maja ata fa səpam dala kalah, fa handamawa banay ta mewulkey kalah a ray ata.

Pawl a kəta Timawte

¹¹ Ama kah Timawte, ndaw ηga Gazlavay, hway la dərən ta cek hay maaya ba ηgene tabiya. Maaya na, ka səpey ηga key cek ta cəved e, ka njey ta Gazlavay mandaw mandaw, ka

təba mey nga Yesu maaya maaya, ka wudta ndəhay tabiya, ka bəsa banay, ka tərey ndaw meekwed-mey.

¹² Key gədan daa cəved nga Gazlavay amba ka hətey heter mendəvey ba masa Gazlavay ma zəlka maja. Ara anda kah ma wuzda fa mey nga ndəhay ga, kah ndaw ma təba Yesu *Kəriste sem.

¹³ Ehe, ya wuzdakawa mey kefe fa mey nga Gazlavay ma veltar mesəfney a cek hay tabiya, ta fa mey nga Yesu Kəriste ma key sede maaya maaya fa mey nga Bay *Pawns Pilat.

¹⁴ Ya fa ləvka, nar ray a mewey masa Gazlavay ma veldakawa. Ka da zləba ba, daa menjey akah na, ndaw a da mbədka ray ba, haa kasl pas masa Bay aləkwa Mahura Yesu Kəriste ma da vəhwa.

¹⁵ A da vəhwa na, ta pas masa Gazlavay ma wudəy. Bay Gazlavay na, anga pal ma wata cek hay tabiya, aa daa wiya mandaw mandaw.

Anga Bay Mahura da ray bay hay cəpa.

¹⁶ Anga pal, ndaw masa ta dey nga sərmataw, a məcəy ba. Anga na, manjakaya daa slam-mewedəy.

Mewedəy anga kalah,

ndaw a gwa nga ngəchey a cakay a ba.

Kwa ndaw pal ta hətər Gazlavay ta dey anga na, daa ba, kwa fa da gwa nga hətər daa ba.

Anja ndəhay nga həlmamara.

Anja nga zəma Bay anga nga sərmataw. Amen.

Pawl a kətata ndəhay masa-zleley hay

¹⁷ Ləvtar a ndəhay masa-zleley hay da bəla kefe, a da zlapam ba. Zleley ata masa ma da ndəvey ngene na, ləvtar a da pamara lenjesl ata a ray a ba, maja ara cek ma da jənta ba. Ama ləvtar nga pam lenjesl na, a ray Gazlavay, ndaw ma da vəlndakwar cek tabiya ta har cew cew amba yaa səmkwa.

¹⁸ Ləvtar nga kam cek maaya mandaw mandaw. Mekey cek maaya ha na, ara anda zleley ata. Ləvtar nga təram ndəhay mevəley ta har cew cew.

¹⁹ Da fa kamara kəne na, a key ngene, a bəcam zleley menəsey ba ngada fa mey, amba a hətəm heter masa fara fara.

Mey nga madagway-dakw

²⁰ Waa Timawte, wey vaw maaya maaya fa mey masa Gazlavay ma mbəkdaakawa a har akah. Ka da ndəkwdə

ray akah aa mey hay saw ba. Meesərkey masa ndəhay ma wulkam ara mey fara fara, anja ara mey fara fara ba ŋgene na, ka da ndəkwda ray akah a hwaɗ a ba.

²¹ Ndəhay siya hay a ləvam ata na, a təbmara meesərkey a ŋgene. Anda keɗe, ta mbəkdamara cəved ŋga Gazlavay sem.

Anja maaya ŋga Gazlavay ŋga njeɣ ta akwar.

Leeter masa Pawl ma wuzlala nga dey cew a

Timawte Mey da ray

Leeter masa Pawl ma wuzlala nga dey cew a Timawte

Pawl a wuzlala leeter keɗe na, daa masa anɗa daa fərsəne da Rawm saya (1.8). Fara fara anɗa daa banay, a nəka na, ndaw mekele da cakay a daa ba, si Luk taava anɗa gway. Asaya, a wulkey a da məcey. A wuzlala leeter e na, ngada Timawte, ndaw masa anɗa ma wuɗa kalah anda bəzey anɗa. Timawte he na, anɗa da Efez nga vɛltar gədanɗ a ndəhay daa mecəmey-ray nga ndəhay nga Yesu fetede.

Pawl a wuzlala leeter e keɗe na, amba Timawte a daw a hətfar fiyaw. Pawl a, a wuɗey nga vɛlar gədanɗ, asaya, nga kəta da ray sləra nga key ngada fa mey, maja a wulkey anɗa na, Rawma hay fa da kəɗmara vagay.

Mey mahura daa leeter e keɗe na, ara mey da ray menjey maaya daa cəved nga Yesu. Menjey maaya daa cəved nga Yesu na, ara anda ndaw-sewje mejerey daa vərəm. Nga njeɗ maaya ha na, si ndaw a bəsa banay, asaya, si a pa Yesu nga Bay anɗa Mahura, a key hwaray maja ba. Pawl a wuɗey Timawte a key baazlam da ray mey hay saw ba, a mbəɗtar dəba ngada ndəhay ma ka cek malamba hay, asaya, a wuɗey amba a key cek anda Pawl ma ka. Pawl a wuɗey meesərkedey anɗa ta meesərkedey maaya nga bay-ray hay mekele mekele na, Timawte a mbəkda ba.

Daa leeter e keɗe na, mey mekele mekele daha nga vɛley gədanɗ a ndəhay:

Mekey hwaray nga kedey mey da ray Bay aləkwa Mahura ba (1.8-10)

Maaya na, gula hay a hwam dərənɗ ta cek maaya ba (2.22)

Derewel nga Gazlavay aa ta gədanɗ nga jənta ndəhay (3.16)

Mecey-har

¹ Ara yah, Pawl, ma wuzlalakawa leeter keɗe. Yah na, *ndaw-meslərey nga *Yesu *Kəriste anda *Gazlavay ma wuɗey. Gazlavay a slərdaya fa ndəhay amba ya wuzdatara mey da ray heter mendəvey ba masa Gazlavay ma ləvey a da vɛldatara a ndəhay macəmkaya ta Yesu Kəriste heyey.

² Ya wuzlala leeter kefe na, ngada kah, Timawte, bəz adaw masa yah ma wudfa kalah.

Anja Gazlavay, Papa aləkwa ta Yesu Kəriste, Bay aləkwa nga pəsmaka mey, nga sərfamaka dey-ceceh, asaya, nga njadamaka daa zazay.

Pawl a kar suse a Gazlavay maja Timawte

³ Ya fa sərfadaka mandaw mandaw taa vad, taa pas daa medərey-danğay adaw. Ya fa kar suse a Gazlavay maja kah. Ya fa nar ray ta mevel maaya anda papañ nga papa ala hay ma namar ray zleezle.

⁴ Masa kah ma təway * heyey na, ya fa sərfada. Anda kefe, matakam akah fa kaya. Ya wudfey nga hətka fa dey amba yaa səmey ga.

⁵ Ya kar suse a Gazlavay maja ya fa sərfada, ka ta pa Yesu *Kəriste la nga ndaw akah fara fara ta mevel pal, anda mamañ nga mamakw Lawis ta mamakw Enis ma pamara nga ndaw ata fara fara teesed da ray akah. Ahaw, ya səra ka fa pa Yesu nga ndaw akah fara fara may.

⁶ Da ray ngene, ya fa ləvka saya: key sləra ma fəna ma fəna ta gədan masa Gazlavay ma vəldakawa daa masa yah ma paka har a ray heyey.

⁷ Fara fara, Mesəfney masa Gazlavay ma vəldandakwara na, ara Mesəfney nga key sləra ta mandərzay daa dey ba. Mesəfney anğa ha, a vəldakwar gədan, a jəndakwar nga wudfey vaw, a pandakwar lenğesl nga wey vaw.

⁸ Da ray ngene, ka da key hwaray nga kedey mey da ray Bay aləkwa Mahura ba. Fara fara yah daa fərsəne maja anğa. Anda kefe, ka da key hwaray nga kedey mey da ray adaw ba may. Ama maja *Mey-maaya-mawiya na, bəsa banay ta gədan masa Gazlavay ma vəldakawa anda yah ma bəsa.

⁹ Gazlavay ta ləhdandakwar la, ta zəldakwar la amba ya təkwa nga ndəhay anğa hay. A ka anda kefe na, maja cek hay maaya hay masa aləkwa ma kakwa ba, ama maja aa ma wudfey nga pəsndakwar mey cəngə. Daa masa bəla ta zlawa daa ba aran, Gazlavay a wudfey nga pəsndakwar mey maja sləra masa Yesu Kəriste ma da ka.

¹⁰ Wure kefe, mepəsey-mey a ta wuswa cay, maja Yesu Kəriste, ndaw ma ləhdandakwar, ma sawa a bəla. Ara maja anğa, gədan nga meməcey daa saba, asaya, ara anğa

1:2 1.2 Timawte: 1Tm 1.2; 1Kwr 4.17 **1:3 1.3** Fəl 3.5; 1Tm 1.5 * **1:4 1.4** ma təway: Daa masa Pawl fa da mbəkdata ndəhay da Efez na, Timawte ta təway la maja. Nəka SNM 20.37ta 1Tm 1.3. **1:5 1.5** SNM 16.1 **1:6 1.6** a paka har a ray: 1Tm 4.14; 5.22 **1:7 1.7** Rm 8.15 **1:8 1.8** 2.9; Rm 1.16 **1:9 1.9** Ef 2.8-9; Tit 3.5

ma vøltar heter mendøvey ba a ndøhay ta fa Mey-maaya-mawiya.

¹¹ Yah na, Gazlavay ta paya la nga ndaw anga meslørey, amba ya wuzdatara Mey-maaya-mawiya kede a ndøhay, yaa sèrkadata.

¹² Da ray ngene, ya fa sørey banay daa førsøne kede. Ama hwaray fa kaya maja daa ba, maja ya sèra ndaw masa yah ma pa nga ndaw adaw fara fara. Ya sèra fara fara anga na, aa ta gødan nga jøfa Mey-maaya-mawiya masa aa ma mbækdiwa a har adaw haa kasl pas masa aa ma da vøhwa.

¹³ Da masa ka fa wuzey mey nga Gazlavay na, wuzey mey hay maaya fara fara letek ta mey hay masa yah ma wuzdatakawa maaya. Tøba mey a amba ka høtey gødan daa mey nga Yesu ma føna ma føna, wudta ndøhay maja kah macømkaya ta Yesu Køriste.

¹⁴ Mey-maaya-mawiya masa Gazlavay ma mbækdakawa a har akah kede na, ka da vøley cøved a ndaw nga mbøfda mey a wal ba. Ka da ka anda kede ta gødan nga *Mesøfney nga Gazlavay masa aa daa mevel aløkwa.

Mey da ray Awnesifar

¹⁵ Ka sèra, ndøhay tabiya ma tøba mey nga Gazlavay daa hwayak nga Azi na, ta mbækdamaya sem. Kwa ata Figel ta Hørmawzen may, ta mbækdamaya sem.

¹⁶ Ama Awnesifar na, ta pas langar fa sawa nga vølya gødan. Anja Bay Gazlavay nga pøstar mey a ndøhay da way anga. Awnesifar na, kwa ta key hwaray ta ndøhay nga nøkyawa daa førsøne na, daa ba. ¹⁷ Ama, sasøkar jak, anga ma sawa aa berney nga *Rawm fede na, ta', a søpya ta døk-vaw haa aa ma høtya.

¹⁸ Ka fa sèra maaya maaya anga ta jønya la ga daa masa yah da Efez. Anja Bay Gazlavay nga sørfar dey-ceceh ta pas sariya.

2

Mey da ray ndaw nga Yesu ma key sløra maaya

¹ Bøz adaw, jerey maaya maaya amba Gazlavay a vølka gødan ma føna ma føna ta fa maaya anga masa aløkwa ma høtkwa fa Yesu *Køriste.

² Mey masa kah ma cønda fa yah zleezle masa yah ma wuzda fa mey nga ndøhay ga heyey na, wuzdatara a ndøhay ma tøba mey nga Yesu ta mevel pal ma gwamara ngaa sèrkadamatara a ndøhay mekele.

³ Da banay a hōtfaka maja Yesu Kōriste na, bōsa banay a anda kah na, sewje anġa masa maaya.

⁴ Da sewje masa maaya, anġa daa vōram, a wudey amba bay anġa aa hōmda na, kwa a wulkey ta cek hay mekele ba, si ta vōram a gway.

⁵ Wulkey may, da ray ndōhay ma kam kwakurda. Da ndaw ta ka ta cōved e daa ba na, a gwa nġa hōtey cek maja anġa ma fōnta ndōhay mekele na, daa ba.

⁶ Wulkey da ray ndaw mehōvey, fa sōrey banay kalah. Anja maaya na, anġa ma da zōma cek masa anġa ma hōva ha teesedf.

⁷ Yaw, wulkey da ray mey adaw hay masa yah ma kadakawa kedē. Anda kedē, Bay alōkwa Mahura a vōlka lenġesl la nġa cōnda mabara nġa mey adaw hay a tabiya.

⁸ Wulkey da ray Yesu Kōriste, sōkway nġa Bay *Davit. Ta mōcey la, ama ta slōkdawa sem daa memōcey. Kedē ara *Mey-maaya-mawiya masa yah ma wuzdatara a ndōhay.

⁹ Ara maja Mey-maaya-mawiya ha, wure kedē ya fa sōrey banay haa a jōwmaya ta calalaw aa fōrsōne, anda yah ndaw-mayal ma sla dāy nġa ndaw. Ama mey nġa Gazlavay na, majōwkaya daa ba. Ndōhay mekele fa wuzdamara cōnġa.

¹⁰ Da ray nġene, ya fa bōsa banay tabiya ma sawa a ray adaw, amba ndōhay masa Gazlavay ma walata, a lōham ta fa Yesu Kōriste, a nġam ta Gazlavay daa slam anġa mewedey nġa sōrmataw.

¹¹ Ehe, mey masa yah ma daa guzlda kaa na, ara mey masa fara fara:

«Da alōkwa ta mōckwa ta Yesu la na,
ya slōkdakurwa la nġa nġey ta dey ta anġa may.

¹² Da alōkwa ta bōskwa banay a la na,
ya da wakwa da ray cek hay bama ta anġa may.

Ama da alōkwa ta lōvkwa sem ya sōrkwa ba na,
anġa may, a da lōvey a sōrndakwar ba.

¹³ Kwa da ya mbōkdakwa mey anġa na,
ama anġa na, fa da mbōkda mey anġa daa ba,
maja a gwa nġa nōsa ray anġa ba.»

Mey da ray slōra ma mbafar a Gazlavay

¹⁴ Wurtar slōmay da ray mey kedē a ndōhay. Kōtata ta mezōley nġa Gazlavay, amba a kam baazlam saw da ray mey hay ba. Fara fara, mekey baazlam saw na, ara cek nġa tede, a nōsta ndōhay ma jōkam slōmay fa baazlam a.

15 Kah na, key gədan, amba Gazlavay aa səmey da ray akah. Ka sləra akah maaya anda ndaw ma key sləra ma par hwaray ba. Anda meləvey, wuzdatara mey masa fara fara a ndəhay ta cəved e.

16 Yaw, baazlam mehursley na, ka da ndəkwey a hwaf a ba, maja ara cek ma mbafar a Bay Gazlavay ba. Ndəhay ma kam baazlam anda ŋgene na, faa zədam daa cəved ŋga Bay Gazlavay ma fəna ma fəna.

17 Mey masa ata ma wuzdamara na, a bədhey anda mbəlek gurlej. Ata Himene ta Filet na, ata da wuzlah ndəhay ma kam baazlam a.

18 Ta mbəkdamara mey masa fara fara sem, a mbərzlam, a ləvam Gazlavay ta sləkfdatərwa ndəhay daa meməcey cay. Da ray ŋgene, ndəhay mekele hay, ta mbəkdamara cəved ŋga Gazlavay sem maja mey ata ha.

19 Ama mey masa Gazlavay ma kada na, aa fara fara, a mbədey ba. Mey a na, anda salay ŋga way masa ta gədan. Ehe, mey mawuzlalakaya da ray a, a ləvey: «Bay Gazlavay a sərta ndəhay aŋga hay.» Mawuzlalakaya saya, a ləvey: «Kwa waawa ma zəla Gazlavay Bay aŋga na, si a mbəkda mekey cek hay maaya ba hay.»

20 Da way ndaw mahura na, ka hətfey cek hay mezəmey cek na, taasa hay ŋga bərey maaya daada ba. Ama vəley hay ta gandaf hay daha may. Siya, ŋga zəmey cek ta pas gwagway. Siya, ŋga zəmey cek ta pas mabara.

21 Yaw, da ndaw ta mbəkdata cek hay maaya ba tabiya sem na, aŋga anda taasa ŋga bərey maaya, aŋga mapakaya wal ŋgada Bay aŋga. Ndaw a na, aŋga maaya ŋga kar sləra ŋgada Bay aŋga. Aŋga madiykaya vaw ŋga kar sləra tabiya masa maaya.

22 Yaw, hway dərəŋ ta cek hay maaya ba masa gula hay ma wudam ŋga kamara. Key cek ta cəved e, təba mey ŋga Yesu ma fəna ma fəna, wudəy ndaw. Njam ta zazay ta ndəhay ma dərəm danğay a Bay aləkwa Mahura Yesu ta mevel maaya.

23 Da ndəhay fa kam yawa saw na, ka da ndəkwey a hwaf a ba, maja ka səra mekey yawa saw na, a handawa mekəfey-vaw.

24 Ndaw ma ka sləra ŋga Gazlavay na, a key baazlam ba. Si a katar maaya ŋgada ndəhay tabiya, a tərey ndaw ma wuzey mey maaya, a bəsa cek ma key maaya ba tabiya fa mey aŋga.

²⁵ Ndəhay ma təbmara mey anğa ba na, si aa sərkadata ta dək-vaw. Da kaa təde Gazlavay a jənta la kwa, amba a mbəddamara mevel ata nğa sərey cəved masa maaya fara fara.

²⁶ Da ray ngene, a mbəddamara mewulkey ata maaya ba ngene, a ləham daa gadan nğa bay-malula masa ma kərzata amba a kamar cek anda aa ma wudəy heyey.

3

Mey da ray banay ta pas masa bəla gweegwe a ndəvey

¹ Səra maaya maaya, ta pas masa bəla gweegwe a ndəvey na, banay a sawa la a ray ndəhay,

² maja ndəhay a da wudam na, si ray ata hay gway. A da wudam dala kalah, a da zlapam, a da cədmara Gazlavay, fa da təbmara mey nğa papa ata hay ta mama ata hay daa saba, fa da kam suse a ndaw daa saba. Cek maaya nğa Gazlavay na, a da rəsmara,

³ fa da wudam ndəhay daa saba, kwa ndəhay da way ata hay na, fa da wudmata daa ba, fa da səram dey-ceceh fa ndəhay daa saba, a da kam mbadfa fa ndəhay, fa da wam vaw fa ray ata daa saba, a da təram ndəhay masa-həma. Cek hay masa maaya na, fa da wudam daa ba,

⁴ a daa dədam mey a ray ndəhay, a da kam cek hay saw, a da zlapam kalah. Fa da wudmara Gazlavay daa ba, ama a da kam na, si cek hay masa ma mbafatar gway.

⁵ A da pamara ray ata anda ndəhay nğa Gazlavay, ama a da rəsmara gədan nğa Gazlavay. Ama kah na, hway la ta ndəhay ngene.

⁶ Kwa wure kece, ndəhay da wuzlah ata fa diyam a way ndəhay nğaa sərkadamata. A mbəzam anda ndəhay maaya, amba nğusay manjar lenğesl a təbmatara mey ata. Nğusay a ngene ta kam mebərey la ga. A wudam nğa cəney mey hay mekele mekele masa ma mbafatar.

⁷ Mandaw mandaw, a wudam nğaa sərkey cek, ama a gwamara nğa sərmara mey masa fara fara ba sələk.

⁸ Ndəhay ma səpmata way hay ngene, a wudam mey masa fara fara ba, anda ata Janes ta Jambəres * zleezle ma təram masa-gəra nğa Mawiz. Ndəhay ma səpmata way hay a na, mewulkey ata maaya ba, a pamara Gazlavay nğa ndaw ata fara fara ba.

2:25 2.25-26 1Tm 2.4 3:1 3.1 1Tm 4.1; 2Pi 3.3; 1Jn 2.18; Jud 18 3:2 3.2-4
Gal 5.19-21 3:5 3.5 Mt 7.15, 21; Rm 2.19-20; Tit 1.16 3:6 3.6 Tit 1.11 * 3:8
3.8 Janes ta Jambəres na, daa mewulkey nğa Jəwif hay, ara ndəhay Ejip hay ma kam maazla merəzley ndəhay fa mey nğa Bay Ejip amba a nəsmara mey nğa ata Mawiz ta Aranw. Nəka daa dərəwel nğa Mab 7.11, 22. 3:8 3.8 Mab 7.11, 22; 8.3, 14; 1Tm 6.4-5

⁹ Ama fa da gwamara nga diyam fa mey fa mey daa ba, maja mewulkey ata maaya ba ngene a wuzwa la a palah, anda mewulkey maaya ba nga ata Janes ta Jambøres ma wuzwa zleezle.

Pawl a kəta Timawte

¹⁰ Ama kah na, ka səra cek masa yah maa sərkadatara tabiya a ndəhay. Ka səra menjey adaw maaya maaya. Ka səra mewulkey adaw da ray cek hay masa yah ma da kata tabiya. Ka səra ya fa pa Gazlavay nga ndaw adaw fara fara. Ka səra yah ndaw meekwed-mey, ya fa wufey ndaw, yah malacakaya deŋ e da ray mey nga Gazlavay.

¹¹ Ka səra ndəhay ta sərdamaya banay la. Ka səra yah daa banay ga. Ka səra cek maaya ba masa ndəhay ma kamiwa daa hwayak nga Antiyaws ta daa hwayak nga Ikwaniyum, ta daa hwayak nga Listəra. Ahaw, ta sərdamaya banay la ga, ama mandaw mandaw Bay Gazlavay fa ləhdaya dasi har ata.

¹² Yaw, kwa waawa macəmkaya ta Yesu *Kəriste, ma wufey nga səpa cəved nga Gazlavay fara fara na, si a sərey banay dasi har nga ndəhay.

¹³ Ama ndəhay maaya ba ta ndəhay ma mbərzlam na, menjey ata fa nəsey ta gədaŋ ta gədaŋ, fa fəcam ray ata, asaya, fa fəcmata ndəhay mekele hay may.

¹⁴ Ama kah na, lecey deŋ e da ray mey hay masa ndəhay nga Gazlavay maa sərkadamakawa masa kah ma təba ta mevel pal. Lecey deŋ e da ray mey hay a maja ka sərta ndəhay maa sərkadamaka na, aa sərkadamaka ta cəved e.

¹⁵ Asaya, lecey deŋ e da ray mey hay a maja ka səra mey daa dərewel nga Gazlavay dəga kah daa bəzey. Mey hay a, a gwa a paka lenjesl nga pey Yesu Kəriste nga ndaw akah fara fara, amba Gazlavay a ləhdaka.

¹⁶ Mey tabiya mawuzlalakaya daa dərewel nga Gazlavay na, a sawa ta fa Mesəfney anga. A jənnədakwar nga sərey cəved masa fara fara. A kətnədakwar da ray cek hay maaya ba. A wuzdandakwara cek masa aləkwa ma kakwa maaya ba amba ya mbəfdakwa menjey aləkwa. Asaya, a pandakwar lenjesl amba ya sərkwə nga key cek maaya ta cəved e.

¹⁷ Da ray ngene, ndaw nga Gazlavay a gwa nga key sləra tabiya masa maaya, maja vaw anga madiykaya nga ka sləra ha.

4

Pawl a kəta Timawte nga wuzey mey nga Gazlavay

¹ Yesu *Kəriste a vəhwa la nga zəma bay anğa, ta nga katar sariya a ndəhay maməctakaya hay ta masa ta dey hay. Da ray nğene, ya fa ləvka saya fa mey nga Gazlavay, ta fa mey nga Yesu Kəriste,

² wuzdatara mey nga Gazlavay a ndəhay. Kwa fa wudam nga cəndamara, kwa fa wudam nga cəndamara daa ba na, wuzdatara mey a mandaw mandaw cəngə. Da ndəhay fa kam cek maaya ba na, wuzdatara mebərey ata ha, patar leŋgesl. Vəltar gədaŋ amba a kam cek maaya. Sasərkadata ta mevel maaya.

³ Ya ləvka anda kefe maja pas a, a wuswa la, masa ndəhay ma da gəmam nga cəndamara mey nga ndəhay maa sərkadamata mey masa fara fara saba. Ama a da səpam nga key cek maaya ba anda mevel ata ma wudəy. A da kusam ndəhay mekele mekele ga nğaa sərkadamata. Ndəhay maa sərkadamata ha, a da wuzmatar na, cek hay masa ma mbafatar nga cəney.

⁴ Fa da jəkam sləmay fa mey masa fara fara daa saba. A da jəkam sləmay si fa mamba hay saw.

⁵ Ama kah na, jəda ray akah kwa daa meeme cəpa, bəsa banay, wuzdatara *Mey-maaya-mawiya a ndəhay, ka sləra akah masa Bay Gazlavay ma vəldakawa haa mendəvey a.

Pawl a ndəvda sləra anğa

⁶ Yah na, anda cek ma vəley nğada Gazlavay, pas adaw ta wuswa cay, mamba ya da məcey.

⁷ Ya ta ka sləra nga Yesu *Kəriste la ta mevel adaw ndav anda ndaw ma key bay-gula daa wudəy *. Ya ta ndəvda sləra masa Gazlavay ma vəldiwa nga key sem anda ndaw ma key kwakurda maaya. Da ray mey hay masa aləkwa ma təkwa na, kwa ya ta mbəkey mey pal daa ba sələk.

⁸ Wure kefe, mawurbay nga sləra adaw masa yah ma da hətər na, fa səkwyə da vad məja yah ma kar sləra ta cəved e a Bay Mahura. Ara anğa ma da katar sariya a ndəhay tabiya ta cəved e. A da vəldiwa mawurbay a ta pas masa anğa ma da ka sariya. A da vəlda na, nğada yah taava adaw ba, ama a da vəlda nğada ndəhay tabiya masa ma səkwmara mavəhwa anğa ta meesəmey.

Mey da ray ndəhay mekele

4:1 4.1 SNM 10.42; 2Kwr 5.10; 1Pi 4.5

4:2 4.2 SNM 20.20, 31; Tit 1.13 4:3

4.3 1Tm 1.10; 4.1 4:4 4.4 1Tm 1.4

4:6 4.6 Fəl 2.17; 2Pi 1.14 * 4:7 4.7

wudəy: megərtey-vaw, mewekey-vaw
1Tm 1.18

4:7 4.7-8 1Kwr 9.24-25; Fəl 3.12-14;

⁹ Wuswa vaw, sawa, høtfaya,

¹⁰ maja Demas ta mbəkdaya sem. A wudəy n̄ga səpey cek hay masa da bəla kefe kalah. An̄ga sem a Tesalawnik. Kəresens an̄ga sem a Galati, Tit an̄ga sem a Dalmati.

¹¹ Wure kefe na, si ala ta *Luk gway. Da ka fa sawa na, n̄gələrwa *Mark a har maja a jənya la daa sləra.

¹² Ya ta slərda Tisik sem a Efez.

¹³ Da masa ka fa sawa na, sawa ta daa berney n̄ga Tərwas, təbyawa zana aɗaw n̄ga memed da har Karpus. Latərwa ɗerewel hay a har saya. Ya wudəy kalah na, ɗerewel masa n̄ga ambal.

¹⁴ Alekzandəre, ndaw-mbəzla, ta sərdaya banay la ga. Bay Gazlavay a sərda banay la təɗe fa sləra an̄ga ha may.

¹⁵ Wey vaw, ba na, a da sərdaka banay kəne may, maja an̄ga masa-gəra aləkwa, a təba mey masa aləkwa ma wuzdakwa a ndəhay ba səlak.

¹⁶ Ata ma handamaya n̄geeme fa mey n̄ga ndəhay ma ka sariya amba ya mbəɗda mey aɗaw na, kwa ndaw ta sawa n̄ga jənya daa ba. Ndəhay tabiya ta mbəkdamaya sem. Anja Gazlavay n̄ga mbəɗtar ray maja ba.

¹⁷ Ama Bay Mahura na, aa ta yah, fa jənya. Ta vəlya gəɗan̄ la n̄ga wuzda mey an̄ga tabiya, amba ndəhay masa *Jəwif hay ba ma samawa daa hwayak hay mekele mekele ga a cəndamara mey a. Asaya, Bay Mahura ta ləhdaya la da mey mabar.

¹⁸ Ya səra Bay Mahura a ləhdaya la daa cek hay maaya ba tabiya, a jəɗya la amba ya daw aa slam masa an̄ga ma wey da ray ndəhay da vad. Anja ndəhay n̄ga həlmamara Bay Mahura n̄ga sərmataw! *Amen.

Mey n̄ga madagway-dakw

¹⁹ Catar har n̄gada ata Pəresil † ta Akilas. Catar har a ndəhay da way Awnesifar may.

²⁰ Eraste, a lawa da Kwarinti. Tərawfim na, ya mbəkɗərwa da Mile maja vaw fa car.

²¹ Wuswa vaw, wuskwaa kiya n̄ga memed a da wuswa na, kah ma sawa cay.

Ata Ebulus, Pudens, Linus, leŋ Kəlawdiya ta məlma aləkwa hay daa mecəmey-ray n̄ga ndəhay n̄ga Yesu mekele tabiya feɗe a camaka har.

4:10 4.10 Fəl 2.21; **Demas:** Kwa 4.14; Flm 24; 1Jn 2.15; Tit: 2Kwr 2.13 **4:11**
4.11 Luk: Kwa 4.14; **Mark:** Kwa 4.10 **4:12 4.12** Tisik: Kwa 4.7-8 **4:13**
4.13 SNM 20.6 **4:14 4.14** Mt 16.27; **Alekzandəre:** 1Tm 1.20 **4:16 4.16**
 1.15 **4:17 4.17** Dan 6.21; Ps 22.22; SNM 1.8; 23.11 **4:18 4.18** 2Kwr 1.10; Fəl
 1.19-20 † **4:19 4.19** Pəresil: A zəlmara daa slam mekele Pəriska. Nəka SNM
 18.2. **4:19 4.19** Pəresil ta Akilas: SNM 18.2; **Awnesifar:** 2Tm 1.16-17 **4:20**
4.20 Eraste: SNM 19.22; Rm 16.23; **Tərawfim:** SNM 21.29

²² Anja Bay aləkwa Mahura nga njeɣ ta kah. Anja maaya nga Gazlavay nga njeɣ ta akwar.

Leeter masa Pawl ma wuzlalara a Tit Mey da ray leeter ngada Tit

Leeter keɗe ara Pawl ma wuzlala ngada Tit. Tit na, ara ndaw Jəwif ba (Gal 2.3). Ta jəna Pawl la daa sləra anɗa. Daa masa Pawl fa sərey banay daa mecəmey-ray nɗa ndəhay nɗa Yesu da Kwarinti na, Tit ta jəna la ga. Pawl a wuzlalara leeter e keɗe daa masa Tit aa daa hwayak nɗa Kəret, fa jənta ndəhay daa mecəmey-ray nɗa Yesu fetede amba a njam maaya maaya (1.5).

Pawl a kəta Tit gweegwe letek ta anɗa ma kəta Timawte daa leeter anɗa ngeeme. A wudey na, Tit a kətata ndəhay daa mecəmey-ray nɗa Yesu maaya maaya, ndəhay masəkakaya hay, nɗusay meecər e, zariya hay ta beke hay (2.1-15). Pawl a wuzda Yesu Kəriste na, ta wəlda heter anɗa la amba ndəhay a ləham daa mebərey (2.14). Pawl a ləvar na, nɗa njey maaya amba ndəhay nɗa Yesu a nəkam dey fa wəɗa, a kam cek letek anda anɗa.

Daa leeter e keɗe na, mey mekele mekele daha nɗa wəley gəɗan a ndəhay:

Maaya nɗa Gazlavay aa da ray ndəhay (2.11-14)

Mesəfney nɗa Gazlavay aa da ray aləkwa (3.4-8)

Mecey-har

¹ Ara yah Pawl ma wuzlalakawa leeter keɗe. Yah, ndaw ma ka sləra nɗa *Gazlavay, asaya, yah, *ndaw-meslərey nɗa *Yesu *Kəriste.

Gazlavay ta slərɗaya la nɗa wuzey mey anɗa a ndəhay masa aa ma walata amba a pamara Yesu nɗa ndaw ata fara fara, asaya, amba a sərmara mey masa fara fara. Mey masa fara fara ha na, aa sərkadata ndəhay nɗa njam anda Gazlavay ma wudey.

² Anda keɗe, ndəhay a sərmara fara fara a da hətam heter mendəvey ba. Ya sərkwa fara fara na, maja dəga bəla ta zley daa ba aran na, Gazlavay a ləvey a da wəltar heter mendəvey ba ha a ndəhay. Yaw, Gazlavay na, a mbərzley ba səlak,

³ ta wuzdərwa heter mendəvey ba ha la daa ɗar masa aa ma pa. A wuzdərwa na, ta mey ndəhay maa sərkadamara mey anɗa a ndəhay. Ta wəldiwa sləra nɗa mewuzey mey

anğa ha la may. Anda keđe, ya wuzda mey a, a ndəhay mekele maja ara Gazlavay, ndaw ma ləhdandakwar, ma ləvya nğa wuzda mey a.

⁴ Ya wuzlala leeter e keđe nğada kah, Tit. Kah na, ka ta tərey sem nğa bəz adaw fara fara, maja kah ma təba mey nğa Yesu Kəriste anda yah.

Anja Gazlavay, Papa aləkwa, ta Yesu Kəriste, ndaw masa ma ləhdandakwar, nğa pəsmaka mey, asaya nğa njadamaka daa zazay.

Sləra masa Pawl ma vəldara a Tit nğa key da Kəret

⁵ Ya ta mbəkđakawa la da Kəret amba ka dıyta cek hay masa manjar nğa dıyam, asaya, amba ka pey ndəhay nğa key *bay-ray nğa *mecəmey-ray nğa ndəhay nğa Yesu fa slala ha, fa slala ha tabiya anda yah ma ləvka.

⁶ Yaw, ndaw ma da key bay-ray na, si anğa ndaw maaya masa ndəhay a gwamara nğa mbəđmar ray ba, si aa ta nğwas pal gway, si bəz anğa hay, a təbmara mey nğa Yesu, si menjey nğa bəz anğa hay a, a key maaya amba ndəhay tabiya a sərmara, ata fa kam cek malamba daa ba, asaya, ata fa jəkam sləmay fa mey nğa ndəhay mandaw mandaw.

⁷ Yaw, bay-ray nğa mecəmey-ray nğa ndəhay nğa Yesu, a key sləra na, nğa Gazlavay. Maja nğene, si anğa ndaw maaya masa ndəhay a gwamara nğa mbəđmar ray ba. A da zlepey fa mey nğa ndəhay ba, a da cey mevel saw saw ba, a da vəlda ray anğa nğada wuzam ba, a da kəđey vaw ba, asaya, a da səpey dala ta cəved malamba ba.

⁸ Ama si a təbta ndəhay ma samawa a way anğa maaya maaya, si a wudəy mekey cek mandaw mandaw masa maaya, si anğa ndaw masa ta mewulkey maaya, si a key cek ta cəved e, si a njeý ndaw manjar mebərey, asaya, si a wey vaw fa ray anğa.

⁹ Mey fara fara masa aləkwa maa sərkadakwa a ndəhay na, si bay-ray a, a təba mey a maaya maaya aa mevel anğa. Anda keđe, a gwa a vəltar gədan nğəhay ta mey a. Asaya, nğada ndəhay masa ma təbmara mey a ba na, a da wuzdatara mewulkey ata, anğa maaya ba.

¹⁰ Ndəhay ga, a wudam nğa jəkey sləmay fa ndəhay mekele ba. Ndəhay a, faa guzlam mey saw kəne, fa batamata ndəhay. Yaa guzley har-gədan na, da ray *Jəwif hay ma təbmara mey nğa Yesu.

1:3 1.3 3.4; daa dar masa aa ma pa: 1Tm 2.6 **1:4 1.4** Tit: 2Kwr 2.13; **bəz adaw:** 1Tm 1.2 **1:5 1.5** SNM 14.23 **1:6 1.6-9** 1Tm 3.2-7; 1Pi 5.1-4 **1:9 1.9 2.1; 1Tm 1.10** **1:10 1.10** 1Tm 1.6 **1:10 1.10-16** 3.9-11; 1Tm 1.3-7

¹¹ Si ka tøkмата аmbа аа sərkađamата ndəhay saba, mаja fa nəsmата ndəhay tabiya da way hay mekele mekele. Аа sərkađam а ndəhay na, mey masa ta cəved e ba, mаja а wuđam dala gway.

¹² Ndaw Kəret pal da wuzlah ata daha, masa-kələŋ. Ndaw аha, zleezle а ləvey: «Ndəhay da Kəret na, ara ndəhay membərzley, ata anda cek ŋga ley hay, ata ndəhay masa-mayađ hay, а wulkam na, ŋga zəmey cek gway.»

¹³ Yaw, ndaw masa-kələŋ e taa guzley la fara fara. Mаja ŋgene, katar mey а ndəhay mаa guzlam mey saw kəne ŋgene, аmbа а təbmarа mey masa fara fara ta mevel pal,

¹⁴ а mbəkdamara mejəkey sləmay fa mey ŋga Jəwif hay mаa guzlam saw. Asaya, katar mey аmbа а mbəkdamara mejəkey sləmay fa mewey ŋga ndəhay masa ma rəsmara mey masa fara fara ha sem.

¹⁵ Da ndaw, аŋga ta mevel maaya na, cek hay tabiya masa аŋga ma kata na, ata maaya may. Ама ndəhay masa mevel maaya ba, masa ma təbmarа mey ŋga Gazlavay ba na, cek hay tabiya masa ata ma kamata na, maaya ba. Ата fa wulkam mandaw mandaw da ray cek hay maaya ba, аsaya, kwa masa ata fa kam cek hay maaya ba ha na, hwaray а katar ba.

¹⁶ Ата fa ləvam а sərmara Gazlavay, ама cek hay maaya ba masa ata ma kamara na, fa wuzdərwa а sərmara Gazlavay ba. Ата fa jəkam sləmay fa mey ŋga Gazlavay daa ba. Ата fa kam cek masa Gazlavay ma wuđey ŋga hətar fa dey ba. Asaya, cek masa maaya na, а gwamara ŋga kamara ba.

2

Ndəhay а da səpmara mey ŋga Gazlavay na, kwara?

¹ Ама kah Tit na, sasərkađata ndəhay fara fara anda mey ŋga Gazlavay ma ləvey.

² Ləvtar а ndəhay masəktakaya а da wam ba, ŋga kam sləra ta cəved e аmbа ndəhay а namatar ray, ŋga təram ndəhay masa ta mewulkey maaya, ŋga təbmarа mey ŋga Gazlavay maaya maaya аа mevel ata, ŋga wuđmata ndəhay ta mevel pal, аsaya, ŋga pamara Gazlavay ŋga ndaw ata fara fara kwa ata daa banay.

³ Ŋgada ŋgusay masəktakaya may, ləvtar kəne, аmbа а ŋjam fara fara anda Gazlavay ma wuđey. Anda meləvey, а daa guzlam mey saw а ray ndəhay ba, а da vəldamara ray

ata ngada wuzam ba. Ngusay masəktakaya ha nga kətmata

⁴ ngusay meecər e *, amba ngusay meecər e hay a, aa sərkam nga wudmata zel ata hay ta bəz ata hay.

⁵ Ngusay masəktakaya ha nga kətmata ngusay meecər e amba a tərām ngusay masa ta mewulkey maaya, masa mazləbtakaya ba, asaya, amba a kam sləra maaya maaya da way ata hay, a kam cek maaya a ndəhay, a tərām ngusay ma nam ray a zel ata hay. Maaya na, ngusay a, a kamara kəne amba ndəhay aa guzlam mey maaya ba da ray mey nga Gazlavay ba.

⁶ Ngada gula hay na, ləvtar kəne may, vəltar gədanj nga tərām ndəhay masa ta mewulkey maaya

⁷ da ray cek hay tabiya.

Kah may, si ka key cek hay na, masa maaya hay gway, amba ndəhay a nəkam dey fa cek masa kah ma ka, a kamara kəne. Yaw, masa ka faa sərkadata ndəhay na, sasərkadatar mey fara fara ta cəved e.

⁸ Gweguzley mey masa fara fara amba kwa waawa a gwa nga mbədka ray da ray mey a ba. Da ray ngene, ndəhay ma wudam ngaa guzley maaya ba da ray mey akah na, hwaray a da katar maja ta hətam mey maaya ba da ray aləkwa daa ba.

⁹ Ngada beke hay na, ləvtar nga namatar ray mandaw mandaw a bay ata hay. Daa sləra ata hay tabiya na, nga kam cek masa ma mbafamatar a bay ata hay. Asaya, a da kam yawa ta bay ata hay a ba.

¹⁰ A da lalamatara cek hay nga bay ata hay a ba, ama nga kam cek masa maaya mandaw mandaw, amba bay ata hay a, a pamata nga ndəhay fara fara. Da ray ngene, ndəhay a da namar ray a meesərkey da ray Gazlavay, ndaw ma ləhdandakwar.

¹¹ Maaya na, ndəhay nga Gazlavay a kamara cek masa yah maa guzlda kefe maja Gazlavay ta wuzdərwa maaya anjga la a ndəhay tabiya, amba a ləhdata daa mebərey.

¹² Gazlavay ma wuzdərwa maaya anjga na, amba ya sərkwə nga mbəkey mekey cek hay masa ma mbafar ba, asaya, nga mbəkey mesəpey cek hay malamba da bəla. Yaw, masa aləkwa da bəla kefe na, si ya njakwa ndəhay masa ta mewulkey maaya, si ya njakwa ndəhay ma kam cek ta cəved e, masa ma jəkam sləmay ta mevel pal fa Gazlavay.

2:3 2.3 1Tm 3.11; 1Pi 3.1-5 * **2:4 2.4** ngusay meecər e: Ngusay meecər e na, ara ngusay masa ma kam ngwas təlām. **2:5 2.5** Ef 5.22-24 **2:6 2.6** 1Jn 2.14 **2:7 2.7** 1Tm 4.12; Fəl 3.17 **2:8 2.8** 1Pi 2.15 **2:9 2.9-10** 1Tm 6.1-2 **2:10 2.10** 3.4 **2:12 2.12** Ef 1.4; 1Jn 2.16

¹³ Anda keŋe, ya njakwa, ya sɛkwakwa pas maaya masa Yesu *Kɛriste, ndaw ma lɛhdandakwar, ma da vɛhwa, ma da wuzdɛrwa gɛdanj anɟa. Ara anɟa Bay Gazlavay alɛkwa mahura.

¹⁴ Ta vɛlda heter anɟa la, ta mɛcey la maja alɛkwa amba a lɛhdandakwar daa mebɛrey, amba a tɛrdandakwar ndɛhay manjar mebɛrey, amba a tɛrdandakwar nɟa ndɛhay anɟa hay, ndɛhay ma wuɖam nɟa key slɛra maaya mandaw mandaw.

¹⁵ Sasɛrkadatara cek masa yah ma wuzlalakawa keŋe a ndɛhay. Vɛltar gɛdanj, kɛtata ndɛhay masa ma jɛkam slɛmay maaya maaya ba. Gwaguzltar ta gɛdanj masa Gazlavay ma vɛldakawa. Anda keŋe, anja ndɛhay nɟa rɛsmaka maja meesɛrkey akah keŋe ba.

3

Nɛɛhay nɟa Yesu a nɟam da bɛla na, kwara?

¹ Lɛvtar saya a ndɛhay nɟa Yesu nɟa namatar ray a mahura hay nɟa nɟwamna, nɟa jɛkfamatar slɛmay, nɟa kam cek hay tabiya masa maaya.

² Asaya, lɛvtar a da slam mey a ray ndɛhay ba, a da tɛram vaw ba, ama nɟa nɟam ndɛhay meekweɖ-mey, masa ma kam cek maaya nɟada ndɛhay tabiya.

³ Gwaguzltar nɟa kamara anda keŋe maja zleezle na, alɛkwa ndɛhay marɛzltakaya may, alɛkwa fa jɛkakwa slɛmay fa ndɛhay daa ba, alɛkwa fa zlɛɛkwa cɛveɖ masa fara fara, ya wuɖkwa na, nɟa key cek hay malamba masa ma mbafamandakwar gway. Alɛkwa fa kakwa maagway, alɛkwa fa kakwa dey fa cek nɟa ndɛhay, ya wuɖkwa nɟa hɛtey ndɛhay fa dey ba, ndɛhay mekele a wuɖam nɟa hɛtmandakwar fa dey ba may.

⁴ Ta nɟene he cɛpa na, Gazlavay, ndaw ma lɛhdandakwar, ta wuzdɛrwa la, anɟa fa key maaya nɟada ndɛhay, anɟa fa wuɖta ndɛhay kalah.

⁵ Anda melɛvey, Gazlavay ta lɛhdandakurwa la maja maaya anɟa. A lɛhdandakwar maja alɛkwa ma kakwa cek maaya ta cɛveɖ e daw? Ara maja nɟene ba. Ama a lɛhdandakwar maja aa ma sɛrey dey-ceceh fa alɛkwa. A lɛhdandakwar na, a pɛrndakwara mevel alɛkwa ta gɛdanj nɟa *Mesɛfney nɟa Gazlavay ma yandakurwa mawiya, ma vɛlndakwar heter mendɛvey ba.

2:13 2.13 1Kwr 1.7; 1Tes 1.10 **2:14 2.14** 3.14; Mab 19.5; Ez 11.20; Gal 1.4; Ef 2.10; 1Tm 2.6; Heb 13.12; 1Pi 2.9; 1Jn 3.16 **3:1 3.1** Rm 13.1-7; 1Pi 1.13-17
3:3 3.3 1Kwr 6.11; Ef 5.8 **3:4 3.4** 1.3; 2.10-11; 1Tm 1.1; 2.3; 4.10; Tit 3.6 **3:5**
3.5 Jan 3.5; Rm 6.4; Ef 2.8-9; 5.26; 2Tm 1.9; 1Pi 1.3

⁶ Bay Gazlavay ta pa Mesəfney anğa ha la ga a ray aləkwa ta fa Yesu *Kəriste, ndaw ma ləhdandakwar;

⁷ amba ya hətkwa heter mendəvey ba. Heter mendəvey ba ha, aləkwa fa sərkwā, Gazlavay a da vəldandakwara. A pa Mesəfney anğa a ray aləkwa, a vəlndakwar heter mendəvey ba na, maja ta sərfindakwar dey-ceceh la, ta tərđandakwar nğa ndəhay anğa hay maaya fa mey anğa la.

⁸ Mey masa yah ma daa guzlda kaa na, ara mey masa fara fara. Ya wudfey na, kaa sərkadatara mey a keđe dey ga mandaw mandaw nğada ndəhay, amba ndəhay masa ma təbmara mey nğa Gazlavay na, a kam cek mandaw mandaw maaya. Mey hay masa aləkwa maa sərkadatakwara a ndəhay na, ara mey hay maaya masa ma jəney ndəhay.

⁹ Da ndəhay fa kam yawa saw na, ka da ndəkwey aa mey a ba. Da ndəhay daa səkway adaw, *Jəwif hay, fa kam yawa da ray papaŋ nğa papa ala hay zleezle na, ka da ndəkwey aa mey a ba, ka da key baazlam ta ata ba. Asaya, ka da key yawa da ray *kwakwas nğa Mawiz ba. Mekey yawa ha ngene, ara cek nğa tede, a jəney ndaw ba.

¹⁰ Da ndaw a handawa mewudkey-dəy a wuzlah ndəhay daa *mecəmey-ray nğa ndəhay nğa Yesu na, kəta ndaw aha. Da anğa fa ka cek aha cəŋga na, kəta dey pal saya. Ama da a jəkey sləmay ba cəŋga na, ka da cəmam ta ndaw aha ba.

¹¹ Ka səra səkway nğa ndəhay anda ngene na, ara ndəhay masa maazədtakaya daa cəved nğa Gazlavay. Ata fa kam cek mandaw mandaw maaya ba, sləra ata fa wuzda mebərey ata.

Mey nğa madagway-dakw

¹² Ya da slərka *Artemas, da daa ba, Tisik. Da ndaw pal dasi ata ta wusey la fa kah na, key gədan nğa sawa a Nikwapawlis a cakay adaw. Ya wulkey ta kiya memed na, ya da daw fetede.

¹³ Zenas, ndaw ma səra mewey nğa nğwamna, ta Apalaws fa pəkam *. Da masa ata fa da sləkdam da slala akwar na, jənta daa mepəkey ata ha amba cek a həctar ba.

¹⁴ Ndəhay masa ma təba mey nğa Yesu anda aləkwa na, nğaa sərkam nğa key cek maaya mandaw mandaw, amba

3:6 3.6 Rm 8.9-16; 1Kwr 6.11; Gal 5.25; **ndaw ma ləhdandakwar:** 2.13; Fəl 3.20; 2Tm 1.10; Tit 3.4; 2Pi 1.11; 1Jn 4.14 **3:7 3.7** Rm 3.24 **3:9 3.9** 1.14; 1Tm 1.4 **3:9 3.9-11** 1.10-16 **3:10 3.10** Mt 18.15-17 **3:12 3.12** Tisik: Kwa 4.7-8 * **3:13 3.13** fa pəkam: Zenas ta Apalaws fa pəkam nğa wuzey mey nğa Gazlavay. Nəka SNM 15.3ta 1Kwr 16.6. **3:13 3.13** Apalaws: 1Kwr 1.12

a jɔnmata ndɔhay masa daa banay. Da ray ŋgene, ndɔhay alɔkwa, a da njam ta mekey cek masa maaya.

¹⁵ Ndɔhay tabiya masa da cakay adaw fedɛ, a camaka har. Catar har ŋgada jam alɔkwa hay ma tɔbmara mey ŋga Yesu fetedɛ.

Anja maaya ŋga Gazlavay ŋga njeɣ ta akwar tabiya.

Leeter masa Pawl ma wuzlalara a Filemanjw Mey da ray leeter ngada Filemanjw

Pawl a wuzlalara leeter keɗe a Filemanjw na, daa masa anɗa fa wuzlalatar a ndəhay Kwalaws hay. (Kwa 4.10-17; Flm 23-24.) A wuzlala leeter e, daa masa anɗa daa fərsəne. Ndəhay a wulkam leeter e na, ara Tisik ma handara a Filemanjw cewete ta leeter ngada Kwalaws hay (Kwa 4.7-9).

Filemanjw na, ara jam nɗa Pawl, a nɗey daa berney nɗa Kwalaws. Pawl a wuzar Mey-maaya-mawiya, ta', a təba, a tərey ndaw nɗa Yesu (aya 2). Anɗa na, ara ndaw masa-zleley, beke anɗa hay daha. Beke anɗa pal daha mezəley Awnezim. Ta hway la da way bay anɗa ha. A hətfar Pawl daa fərsəne, ta', a təba mey nɗa Yesu, a tərey ndaw nɗa Yesu may (aya 10). Fa dəba ha, Pawl a slərdərwa Awnezim e fa bay anɗa ta leeter e keɗe. Daa mewey nɗa Rawma hay, beke masa ma hway sem na, bay anɗa a gwa a kəɗa vagay. Ara maja nɗene, Pawl a wuzlalara leeter keɗe a jam anɗa Filemanjw amba aa cəfɗa nɗa sərfar dey-ceceh a Awnezim, a təba anda məlmanj daa mey nɗa Yesu (aya 16).

Mecey-har

¹ Ara yah Pawl, ndaw daa fərsəne maja sləra nɗa *Yesu *Kəriste ma wuzlalakawa leeter keɗe, ala ta məlma aləkwa Timawte.

Ya wuzlalamakawa nɗada kah, Filemanjw, jam ala masa aləkwa ma kakwa sləra nɗa *Gazlavay bama.

² Asaya, ya wuzlalamatara nɗada dam-mama aləkwa Apiya, leɗ nɗada Arkip, ndaw masa ma jənnakwar daa cəved nɗa Yesu anda ndaw ma jəney ndaw daa vəram. Ya wuzlalamatara nɗada ndəhay nɗa Yesu ma kusam da way akah may.

³ Anja Papa aləkwa, Bay Gazlavay, ta Bay aləkwa Mahura Yesu Kəriste nɗa pəsmakwar mey, asaya, nɗa njadamakwar daa zazay.

Pawl a key suse a Gazlavay maja Filemanjw

⁴ Mandaw mandaw masa ya fa dərey danɗay a Gazlavay na, ya fa sərfadaka, Filemanjw. Ya fa kar suse maja kah,

⁵ maja ya cənda kah fa wudta ndəhay n̄ga Gazlavay tabiya, ka fa pa Bay Mahura Yesu n̄ga ndaw akah fara fara.

⁶ Da masa ya fa dərey dangay na, ya faa cəfda Gazlavay n̄ga jəndakwar n̄ga sərey mepəsey-mey an̄ga tabiya masa aləkwa ma hətkwa ta fa *Kəriste maja aləkwa macəmkaya, aləkwa fa pakwa Yesu n̄ga ndaw aləkwa fara fara.

⁷ Məlma adaw, mewudəy-vaw akah taa səmdaya la, ta vəlya gədan̄ la kwa ara mey ba, maja kah ma dəkta mevel a ndəhay n̄ga Gazlavay.

Pawl fa kar ambahw a Filemanjw maja Awnezim

⁸ Yaw, yaa cəfdaka n̄ga key cek masa yah ma da ləvka kefe maja ka wudta ndəhay n̄ga Yesu. Yah təde n̄ga təkaka dəy n̄ga ka cek aha maja yah na, *ndaw-meslərey n̄ga *Kəriste.

⁹ Ama ya təkaka dəy ba. Maja ya wudka kalah, maaya na, yaa cəfdaka taa cəfdey. Ara yah, Pawl, ndaw-maraw masa majəwkaya daa fərsəne maja yah ma wuzey mey n̄ga Yesu Kəriste, maa cəfdaka,

¹⁰ ya fa kaka ambahw maja Awnezim. An̄ga ta tərey sem anda bəzey adaw daa fərsəne kefe, maja ara yah ma ka amba a təba mey n̄ga Gazlavay.

¹¹ Zleezle na, Awnezim e ta jənka daa ba, ama wure kefe na, a jənka la anda aa ma jənya.

¹² Wure kefe ya fa slərdakawa, an̄ga masa anda mevel adaw.

¹³ Yah daa fərsəne maja yah ma wuzda *Mey-maaya-mawiya. Ya wudəy na, an̄ja a n̄jey da cakay adaw mandaw mandaw daa masa yah daa fərsəne kefe amba a jənya aa slam a n̄ga akah.

¹⁴ Ama ya wudəy n̄ga ndəvda mey da ray Awnezim e yah taava adaw ba, si kah ma təba mewulkey adaw da ray a la dəgay. N̄ga key cek maaya na, ya wudəy n̄ga təkaka dəy ta təkəy ba, ama si ka key cek masa maaya anda mevel akah ma wudəy.

¹⁵ Da Awnezim e ta mbəkda sem n̄ga dər nekədey, amba fa dəba ha a vəhey, ka n̄jam n̄ga tar kwa.

¹⁶ Kwa an̄ga beke akah na, wure kefe an̄ga beke daada saba, maja an̄ga məlma aləkwa mawudkaya kalah daa mey n̄ga Yesu. Yah na, ya wudəy kalah, ama ya səra ka da wudəy ma fənya. Ka da wudəy maja an̄ga beke akah, asaya, ka da

wuɔa maja aŋga məlmakw daa mey ŋga Bay Mahura Yesu.

¹⁷ Anda keɔe, da ka fa paya ŋga mandala akah daa sləra ŋga Yesu na, təba Awnezim e anda kah ma təbya.

¹⁸ Da ta kaka cek maaya ba la, da ta zəmka dəvaz akah la na, ŋgene, mey a tabiya a ray aɔaw.

¹⁹ Ehe, ya wuzlalakawa mey keɔe ta har aɔaw, *yah Pawl ma da pəlkawa*. Kah may, dəvaz aɔaw da ray akah daha. Ara yah ma ka amba ka təba mey ŋga Yesu ŋga hətəy heter mendəvey ba na, ka sərfada saba daw?

²⁰ Ambahw məlma aɔaw, kayawa cek keɔe maja mewuɔey-vaw ŋga Bay Mahura Yesu. Dəkya mevel maja aləkwa macəmkaya ta Kəriste.

²¹ Daa masa ya fa wuzlalakawa leeter kaa na, ya səra fara fara ka pey sləmay la fa mey aɔaw, ka da ka anda yah ma wuɔey. Ya səra cek masa kah ma da ka na, a fəna cek masa yah maa cəɔɔaka ŋga key.

²² Ya fa wuɔey ŋgaa cəɔɔaka cek pal saya, ɔiyaya slam ŋga ney da way akah, maja ya wulkey Gazlavay a cənda medərey-danɔay akwar la, a vəhɔaya la fa akwar saya.

Mecey-har ŋga madagway-dakw

²³ Epafəras masa ala daa fərsəne cew e maja Yesu *Kəriste, a cakwar har ha.

²⁴ Yaw, *Mark, Aristarke, Demas, leŋ *Luk, ndəhay masa ala ma kam sləra ŋga Gazlavay bama, a camakwar har may.

²⁵ Anja maaya ŋga Bay Mahura Yesu Kəriste ŋga njeɔ ta akwar.

Leeter ngada Hebøre hay Mey da ray Leeter ngada Hebøre hay

Leeter ngada Hebøre hay na, ndaw ma sɛra mezɛley nga ndaw ma wuzlala daa ba. Hebøre hay na, ara ndøhay Jøwif hay. Ndaw ma wuzlala leeter e keɛɛ a wuɛey nga vøltar gøɛɛn ngada Jøwif hay masa ma tøbmara mey nga Yesu. A vøltar gøɛɛn nga tøbey mey nga Yesu ma føna ma føna kwa ata daa banay.

Ndaw ma wuzlala leeter e na, a wuzda Yesu na, a fønta maslan hay nga Gazlavay, a fønta ndøhay ma tøla mey nga Gazlavay zleezle, asaya, a føna Mawiz, maja anga na, Bøzey nga Gazlavay (fasølawal 1 haa 3). Asaya, a wuzda anga na, ndaw mahura da ray ndøhay ma ka kwakwas nga Gazlavay masa fara fara. A da njeý ndaw ma ka kwakwas nga sørmataw. Anga ta vølda ray anga la dey pal nga møcey maja mebørey nga ndøhay tabiya. Anda keɛɛ, Yesu ta handawa Mejøwey-mey Mawiya la aa slam a nga Mejøwey-mey Magurma masa Gazlavay ma jøwa ta ndøhay anga hay ta fa Mawiz.

Nðøhay ma tøbø mey nga Yesu na, ata daa cøved mawiya døba. A gwamara nga søpey cøved magurma saba. Maaya na, a sørfadamata ndøhay masa zleezle ma pamara Gazlavay nga ndaw ata fara fara, ata masa ma høtam gøɛɛn daa cøved anga. (Nøka fasølawal 11.) Mey madagway-dakw daa leeter e na, ara mey da ray menjeý nga ndøhay ma tøbø mey nga Yesu. Si a njam maaya maaya daa mecømey-ray nga Yesu.

Daa leeter e keɛɛ na, mey mekele mekele daha nga vøley gøɛɛn a ndøhay:

Mey nga Gazlavay aa ta gøɛɛn nga key sløra daa ndaw (4.12)

Mey da ray mejøwey-mey mawiya (8.8-13)

Mey da ray ndøhay zleezle ma pamara Gazlavay nga ndaw ata fara fara (11.1-12.13)

Nøkakwa dey na, si fa Yesu gway (12.2)

Mey da ray Yesu, ndaw ma wuzdørwa mewedey nga Gazlavay

¹ Zleezle na, *Gazlavay taa guzltar la ngada papañ nga papa aləkwa hay dey ga ta cəved hay mekele mekele ta mey ndəhay ma təla mey anğa hay weewe.

² Ama wure keđe daa masa bəla gweegwe a ndəvey keđe na, taa guzIndakwar la ta mey Bəzey anğa. Gazlavay a ləma bəla ta slam da vad cəpa na, ta fa Bəzey anğa ha, asaya, Gazlavay ta wala la nga wey da ray cek hay tabiya.

³ Ma wuzdərwa mewedeŷ nga Gazlavay na, ara anğa. Bəzey a na, a lawa Gazlavay kərad! Mey anğa na, aa ta gədaŋ. Ara ta mey anğa ha aa ma kərza bəla ta slam da vad. Masa anğa ma diytara cəved cay * a ndəhay amba a njam manjar mebərey fa mey nga Gazlavay na, ta', a təpey a vad, a njeŷ ta har-zəmay nga Bay Gazlavay ma wey da ray cek hay tabiya.

Yesu a fənta maslaŋ hay nga Gazlavay tabiya

⁴ Bəzey a na, a fənta maslaŋ hay nga Gazlavay. Mezəley masa Gazlavay ma vəldara na, a fəna nga maslaŋ hay a may.

⁵ Sərmara, Gazlavay ta ləvar kwa ngada maslaŋ anğa pal: «Kah na, Bəzey adaw, dəga tasana yah Papakw» na, daa ba səlak. Asaya, taa guzley da ray maslaŋ anğa pal, a ləvey:

«Yah na, Papaha,
anğa na, Bəzey adaw,»
na, daa ba may.

⁶ Ama masa anğa fa da slərdərwa Bəzey anğa maa-mey-ndaw † a bəla na, taa guzley la, a ləvey:

«Akwar, maslaŋ adaw hay tabiya, ragadamar!»

⁷ Da ray maslaŋ anğa hay na, aa guzley, a ləvey:

«Maslaŋ adaw hay na, ara ndəhay ma ka sləra adaw hay. Ata anda memedf, asaya, ata anda neneh nga awaw.»

⁸ Ama ngada Bəzey anğa na, taa guzlar la, a ləvey:

«Kah na, Bay Gazlavay, ka da zəma bay akah nga sərmataw. Ka da wey da ray ndəhay akah hay ta cəved e.

⁹ Ka wufey na, mekey cek ta cəved e, ba na,

1:2 1.2 Bəzey anğa: 3.6; 5.8; **a ləma bəla ta slam da vad:** Jan 1.2; Kwa 1.16;

Heb 11.3 * **1:3 1.3** ma diytara cəved cay: A wufey nga ləvey Yesu a diytara cəved nga ndəhay na, ta fa meməcey anğa fa hwadam mazlaŋgalakaya. **1:3 1.3** 2Kwr 4.4; Kwa 1.15; **har-zəmay:** 8.1 **1:4 1.4** Ef 1.21; Fəl 2.9 **1:5 1.5** Ps 2.7; 2Sam 7.14; Mt 3.17; SNM 13.33; Heb 5.5 † **1:6 1.6** Bəzey anğa

maa-mey-ndaw: A wufey nga ləvey Gazlavay anğa ta bəzey hay mekele mekele na, kəne ba, ama a wufey nga ləvey Yesu fa wey da ray cek hay tabiya nga Gazlavay anda bəzey maa-mey-ndaw ma wey da ray cek nga papaha. Nəka 2.11-13; Kwa 1.15, 18, leŋ Rm 8.29. **1:6 1.6** Ps 89.28; 97.7 **1:7 1.7** Ps 104.4

1:8 1.8-9 Ps 45.7-8

mekey cek ta zlabay ba.

Maja ngene, ya ta walaka la, yah, Gazlavay akah.

Ya taa sœmdaka la,

asaya, ya ta vœlka gœdan la

ma fœna nga ndœhay mekele masa akwar bama.»

¹⁰ Gazlavay aa guzley da ray Bœzey anga saya, a lœvey:

«Bay Mahura, ara kah ma lœma bœla dœga daa mezley a.

Ara kah ma lœma slam da vad ta har akah.

¹¹ Cek hay a cœpa a ndœvam la, ama kah na,

ka da njeý nga sœrmataw.

Ahaw, cek hay a tabiya a da nœsam

anda zana magurma.

¹² Ka da takwamata

anda ndaw ma tekwemey zana magurma.

Cek hay a cœpa, ka da mbœdfdata

anda ndaw ma mbœdey zana manœskaya.

Ama kah na, ka da njeý kœne, ka fa da mbœdey daa ba,

kah daha nga sœrmataw.»

¹³ Gazlavay aa guzlar ngaada Bœzey anga, a lœvar:

«Sawa njeý ta har-zœmay adaw

amba ya wakwa da ray ndœhay

haa ta pas masa yah ma pata masa-gœra akah hay cay

asi salay akah.»

Ama taa guzley anda ngene kwa ngaada maslan anga pal na, daa ba sœlak.

¹⁴ Kaa maslan hay nga Gazlavay na, wa hay wa? Maslan hay nga Gazlavay na, ara mesœfney hay ma ka slœra nga Gazlavay gway. Gazlavay fa slœrdata nga jœney ndœhay masa ma da lœham.

2

Ya da rœskwa mey nga Gazlavay ba

¹ Gazlavay taa guzlnakwar la ta mey Bœzey anga. Anda kefe, si ya wakwa vaw ma fœna ma fœna fa mey masa alœkwa ma cœndakwa ha, da daa ba na, ya zlanjadakwa la aa cœved mekele.

² Mey masa maslan hay nga Gazlavay ma kadamara zleezle na, ta wuzwa la ara mey fara fara. Ndœhay masa ma rœsmara mey a, ma tœbmara ba na, Gazlavay ta sœrdata banay la tœde fa mebœrey ata ha.

³ Ama alœkwa na, alœkwa ta cœndakwa mey da ray melœhey la ma fœna mey masa maslan hay nga Gazlavay ma kadamara ha. Anda kefe, da alœkwa fa rœskwa mey a, ya tœbkwa ba na, ngene, ya da lœhkwa na, kwara? Ara

Bay Mahura ta ray anğa ma wuzda mey da ray meløhey a teesef. Fa døba ha, ndøhay masa ma cøndamara mey a na, ta wuzdamandakwara la ara mey fara fara.

⁴ Gazlavay may, ta wuzda la ara mey fara fara ta fa gødan anğa len ta fa maazla hay mekele mekele masa anğa ma kata. Asaya, Gazlavay ta vøltar gødan nga Mesøfney anğa la a ndøhay nga key sløra mekele mekele anda aa ma wufey.

Yesu a møcey na, maja wa hay wa?

⁵ Yaa guzlam na, da ray menjey nga ndøhay da bøla mawiya ngada fa mey. Daa menjey a na, Gazlavay fa da vøltar cøved ngada maslan anğa hay nga wam da ray ndøhay daa ba.

⁶ Sasøkar jak, mawuzlalakaya daa dferewel nga Gazlavay, a løvey:

«Ndaw-magødan na, wa may wa
 amba kah, Bay Gazlavay, ka wulkey da ray a na!
 Ndaw-magødan na, wa may wa
 amba ka nekfar dey na!

⁷ Ka ta tərda la nga mecøhe da ray maslan akah hay
 nga menjey nekødey,
 fa døba ha, ka ta hølma la, ka ta hølslar ray la anda bay.

⁸ Ka ta vøldata cek hay sem cøpa asi har anğa *.»
 Yaw, Gazlavay ta vøldata cek hay sem cøpa asi har nga ndaw-magødan, kwa cek pal masa anğa ma wey da ray a ba na, daa ba. Ta ngene he cøpa wure kedø, aløkwa fa høtkwa ndaw-magødan fa wey da ray cek hay tabiya na, daa ba.

⁹ Ama ya sørkwa *Yesu na, ta tørey la nga mecøhe da ray maslan hay nga Gazlavay nga menjey nekødey, amba a møcey maja ndøhay tabiya maja dey-ceceh nga Gazlavay. Ahaw, ya sørkwa Yesu na, Gazlavay fa hølma, fa hølslar ray ga. A ka køne na, maja aa ma sørey banay daa memøcey.

¹⁰ Ara Gazlavay ma kata cek hay tabiya. Cek hay a tabiya a njam na, maja anğa. Anda kedø, ta mbafar la a Gazlavay amba a tərda Yesu nga ndaw ma gwa nga kata cek hay tabiya maaya maaya ta fa banay masa aa ma søra. Gazlavay a ka anda kedø na, amba ndøhay ga a tøram nga bøk anğa hay, a mbøkdata aa slam anğa mewedøey, maja ara Yesu ma da handata nga løhey.

¹¹ Yesu fa tərdata ndøhay nga ndøhay maaya manjar mebørey fa mey nga Gazlavay. Ndøhay maaya ha na, Papa

2:3 2.3 10.29; 12.25 **2:4 2.4** Jan 2.11; SNM 2.22; 1Kwr 12.4-11; 2Kwr 12.12

2:6 2.6-8 Ps 8.5-7 * **2:8 2.8** asi har anğa: Ta mey Gørek na, a løvey: «asi salay anğa». **2:8 2.8** 1Kwr 15.27 **2:9 2.9** Føl 2.8-9 **2:10 2.10** 1Kwr 8.6; 12.2; SNM 3.15

ata letek ta Yesu a. Ara maja ηgene, Yesu ma zelta «mølma adaw hay». Kwa hwaray a kar nga zelta køne ba.

¹² Yesu a løvar a Gazlavay:

«Ya daa guzltar a mølma adaw hay
da ray cek masa kah ma ka.

Ya da hølmake fa mey nga ndøhay akah hay tabiya.»

¹³ Aa guzley saya, a løvey:

«Yah na, ya da pa Gazlavay
nga ndaw adaw mandaw mandaw.»

A løvey saya:

«Yah kefe, yah ta ndøhay adaw hay
masa Gazlavay ma vøldatiwa.»

¹⁴ Ndøhay anga hay a na, ata ndøhay magødan. Ara maja ηgene, Yesu ma tøyey nga ndaw-magødan anda ata may. A ka køne na, amba ta fa memøcey anga aa zøfda *Satan, bay-malula, ma handørwa memøcey a bøla.

¹⁵ Ndøhay da bøla kefe na, ata anda beke hay daa menjey ata tabiya maja fa zluram ta memøcey. Ara maja ηgene, Yesu a møcey na, amba a pøskatørwa ndøhay daa beke he, a zluram ta memøcey saba.

¹⁶ Yaw, Yesu a sawa a bøla na, nga jøney maslan hay nga Gazlavay ba, ama a sawa nga jøney ndøhay daa sækway nga *Abøraham.

¹⁷ Ara maja ηgene, si a tøyey nga ndaw-magødan anda mølma hay daa cek hay tabiya. A ka køne na, amba a tøyey nga *ndaw mahura da ray ndøhay ma ka kwakwas nga Gazlavay, ndaw masa ma søyey dey-ceceh fa ndaw, ma ka sløra nga Gazlavay ta cøved e. Sløra anga na, ara nga vøley ray anga nga møcey amba a mbøkdatara mebørey nga ndøhay.

¹⁸ Fara fara, daa masa Yesu fa søyey banay na, Satan ta jada la nga bata. Anda kefe, Yesu a gwa nga jønta ndøhay masa Satan fa jadata nga betey.

3

Yesu a fønna Mawiz

¹ Mølma adaw hay daa *mecømey-ray nga ndøhay nga Yesu, Gazlavay ta zølkwar la nga tøyey ndøhay anga hay. Anda kefe, wulkam da ray Yesu, ndaw masa Gazlavay ma slørdørwa nga key ndaw mahura da ray ndøhay ma ka kwakwas anga. Ara ta fa anga aløkwa ma tøkwa mey nga

2:11 2.11 Mt 25.40; 12.50; Jan 20.17 **2:12 2.12** Ps 22.23 **2:13 2.13** Iz 8.17-18
2:14 2.14 2.17; Jan 1.14; **bay-malula:** Jan 8.44; 12.31; 1Jn 3.8; CWJ 12.10 **2:15**
2.15 Rm 8.21 **2:16 2.16** Iz 41.8-9 **2:17 2.17** 4.14; 5.2; Føl 2.7; 1Jn 2.2 **2:18**
2.18 4.15; Mt 4.1-11

Gazlavay, aləkwa fa wuzdakwa mey a fa mey nga ndəhay tabiya.

² Ara Gazlavay ma pa nga ka sləra ha. A ka sləra ha na, ta cəved e anda *Mawiz ma ka sləra anğa ta cəved e ngada ndəhay nga Gazlavay tabiya zleezle may.

³ Yesu na, si ndəhay aa həmdamara ma fəna Mawiz. Ara kəne may, ndaw ma ləma way na, aa həmdamara a fəna way a.

⁴ Ka sərmara, kwa way wura wura na, ndaw ma ləma daha. Ama ma katərwa cek hay tabiya na, ara Gazlavay.

⁵ Mawiz na, ara ndaw ma ka sləra ta cəved e da wuzlah ndəhay nga Gazlavay tabiya. Ara anğa ma wuzdatara mey masa Gazlavay ma daa guzlda ngada fa mey.

⁶ Ama ma wey da ray ndəhay nga Gazlavay tabiya ta cəved e na, ara *Kəriste, Bəzey nga Gazlavay. Da aləkwa fa jarkwa maaya maaya daa mey nga Gazlavay masa aləkwa ma təbkwa, asaya, da aləkwa fa səkwakwa cek masa Gazlavay ma da vəldandakwara ta meesəmey na, ngene, aləkwa ndəhay anğa hay.

Mey da ray meməskey-vaw nga ndəhay nga Gazlavay

⁷ Maja ngene, *Mesəfney nga Gazlavay a ləvey:

«Da akwar fa cəndamara dəy nga Gazlavay tasana na,

⁸ ka da dəzlmata sləmay akwar hay ba.

Ka da kamara anda papan nga papakw akwar hay zleezle ma kam həma a ray Gazlavay ba.

Daa ngene, ata da wuzlah-ley, ta jadamara Gazlavay la.»

⁹ Gazlavay aa guzley, a ləvey:

«Da wuzlah-ley a, ta hətmatar cek hay maaya tabiya masa yah ma kata daa mevey kwakwar məfad la.

Ama ta ngene he cəpa, ta jadamaya la cənga.

¹⁰ Ara maja ngene, yah ma cey mevel a ray ata.

Ta', yaa guzley, ya ləvey: "Mewulkey ata, anğa maaya ba, cek masa yah ma wufey amba a kamara na, ta sərmara daa ba."

¹¹ Daa masa yah ma cey mevel heyey na,

ya ta mbedey la, ya ləvey:

"Kwa fa da mbəzam aa slam masa yah ma dıytara nga məskey vaw na, daa ba səlak."»

¹² Məlma adaw hay, wam vaw! Ndəhay masa ta mevel maaya ba, ma təba mey nga Gazlavay ba na, kwa ndaw pal da wuzlah akwar a da tərey anda ata ba, maja mevel maaya

3:1 3.1 4.14 **3:2 3.2** Mesl 12.7 **3:6 3.6** Bəzey nga Gazlavay: 5.8; **aləkwa fa səkwakwa cek:** 3.14; 4.14; 6.18-19; 9.28; 10.22-24, 35; 13.14; Kwa 1.23; Fəl 3.20; 2Tm 4.8 **3:7 3.7-11** Ps 95.7-11 **3:8 3.8** Mab 17.7; Mesl 20.2-5 **3:11 3.11** Mesl 14.21-23

ba anda ngene na, a da zlanɗaɗadakar ta Gazlavay, ndaw masa anɗa daha ta dey nga sɔrmataw.

¹³ Ama maaya na, ka dɔkam mevel da wuzlah akwar mandaw mandaw, amba *Satan a batakwar nga key mebɔrey ba, kwa ndaw pal da wuzlah akwar fa da dɔzla slɔmay daa ba. Ahaw, dɔkam mevel da wuzlah akwar, maja tasana keɗe, Gazlavay a wuɗey ngaa guzɓɓɗakwar saya.

¹⁴ Mey nga Gazlavay masa alɔkwa ma tɔbkwa dɔga nga mezley a haa mendɔvey a na, da alɔkwa fa jara kwa maaya maaya daa mey a na, ngene, alɔkwa ndɔhay nga *Kɔriste.

¹⁵ Mawuzlalakaya daa dɔrewel nga Gazlavay, a lɔvey: «Da akwar fa cɔndamara dɔy nga Gazlavay tasana na, ka da dɔzɓmata slɔmay akwar hay ba.

Ka da kamara anda papan nga papakw akwar hay zleezle ma kam hɔma a ray Gazlavay ba.»

¹⁶ Ma cɔndamara dɔy nga Gazlavay ta ma kam hɔma a ray a na, wa hay wa? Ara ndɔhay tabiya masa *Mawiz ma badatɔrwa daa hwayak nga *Ejip.

¹⁷ Gazlavay a cey mevel mevey kwakwar mɔfad na, da ray wa hay wa? A cey mevel na, da ray ndɔhay a ma kam mebɔrey. Anda keɗe, ata cɔpa ta mɔcam sem da wuzlah-ley.

¹⁸ Gazlavay ta mbedey la, a lɔvey: «Kwa fa da mbɔzam aa slam masa yah ma dɔytara nga mɔskey vaw na, daa ba sɔlak.» A mbedey kɔne na, maja wa hay wa? A mbedey na, maja ndɔhay a ma cɔnmar mey ba.

¹⁹ Fara fara, ya sɔrkwa ta hɔtam nga mbɔzey aa slam memɔskey-vaw a daa ba, maja ata ma tɔbmara mey nga Gazlavay daa ba.

4

¹ Zleezle na, Gazlavay taa guzley la amba ya mbɔzkwa aa slam masa anɗa ma dɔyɓɓɗakwara nga mɔskey vaw. Mey a na, aa daha cɔnɗa. Anda keɗe, wakwa vaw, anja ndaw pal da wuzlah akwar nga mbɔkey fa dɔba ba.

² Ta wuzdamandakwara mey maaya nga Gazlavay la anda ata ma wuzdamatara a papan nga papa alɔkwa hay zleezle may. Ama ata na, mey a ta jɔnta daa ba, maja ata ma tɔbmara mey a ta mevel pal daa ba. Anda keɗe, ta hɔtam nga mbɔzey aa slam memɔskey-vaw masa Gazlavay ma dɔytara daa ba.

³ Ama alɔkwa na, ya ta tɔbkwa mey a la. Anda keɗe, ya hɔtkwa nga mbɔzey aa slam memɔskey-vaw a la. Gazlavay

taa guzley la da ray ndøhay masa ma tøbmarā mey a ba, a løyey:

«Daa masa yah ma cey mevel heyey na,
ya ta mbedfey la, ya løyey:

“Kwa fa da mbøzam aa slam masa yah ma ðiytara
nga møskey vaw na, daa ba sölak.”»

Ama Gazlavay na, ta ndøvda sløra anga sem døga nga mezley nga bøla, ba diya?

⁴ Ya sèrkwa na, maja mawuzlalakaya da ray *pas memøskey-vaw daa ðerewel nga Gazlavay, a løyey: «Gazlavay ta kata sløra anga hay la tabiya ðar maakwaw, nga ðar maasala ha na, a møskey vaw.»

⁵ Anda mawuzlalakaya heyey saya, a løyey: «Kwa fa da mbøzam aa slam masa yah ma ðiytara nga møskey vaw na, daa ba sölak.»

⁶ Ndøhay ma cøndamara mey maaya nga Gazlavay teesef na, ta høtam nga mbøzey aa slam masa Gazlavay ma ðiytara ha na, daa ba, maja ata ma cønmar mey ba. Anda keðe, ndøhay mekele a høtam nga mbøzey la aa slam memøskey-vaw a cønga.

⁷ Maja ngene, Gazlavay ta pey ðar mekele la, a zøla ðar a «tasana». Fa døba ha mevey ga, taa guzley la da ray ðar a ta mey *Davit. Mey a na, ara mey makadakaya heyey ma løyey:

«Da akwar fa cøndamara ðay nga Gazlavay tasana na,
ka da døzlmata slømay akwar hay ba.»

⁸ Da fara fara Jesøwe ta handata papan nga papa aløkwa hay la aa slam memøskey-vaw masa Gazlavay ma ðiytara na, anja ngene, Gazlavay fa daa guzley da ray ðar memøskey-vaw mekele fa døba ha na, daa saba.

⁹ Anda keðe, ya sèrkwa, ngada ndøhay nga Gazlavay na, memøskey-vaw daha. Memøskey-vaw a na, ara anda Gazlavay ma møskey vaw nga ðar maasala ha.

¹⁰ Yaw, kwa waawa ma mbøzey aa slam memøskey-vaw nga Gazlavay a na, a da møskey vaw fa døba nga sløra anga anda Gazlavay ma møskey vaw fa døba nga sløra anga may.

¹¹ Maja ngene, kakwa gødan aamba ya høtkwa membøzey aa slam memøskey-vaw masa Gazlavay ma ðiya ha. Wakwa vaw aamba kwa ndaw pal da wuzlah aløkwa a key høma a ray Gazlavay anda papan nga papa aløkwa hay ba. Da daa ba na, ndaw aha a daa zøðey.

¹² Mey nga Gazlavay na, aa ta gødan, fa key sløra daa ndaw, a zømey a føna dølaw masa mey a cew. Mey a

na, a mbøzey kasl aa mevel nga ndaw anda dølawa ma wunka mezøvey hay nga tetesl ma mbøzey kasl aa sasøraf. A wuzdørwawa mewulkey daa mevel nga ndaw, asaya, a wuzdørwawa cek masa ndaw ma wudfey nga ka.

¹³ Cek mabakaya fa dey nga Gazlavay na, daa ba. Cek hay tabiya masa anga ma kata na, fa høtam fa dey anga maaya maaya. Cek hay tabiya masa aløkwa ma kakwa na, ya wuzdakwa la fa mey anga.

Yesu anga ndaw mahura da ray ndøhay ma ka kwakwas nga Gazlavay

¹⁴ Ndaw aløkwa mahura da ray ndøhay ma ka kwakwas nga Gazlavay masa ma tøpey a cakay Gazlavay a vad na, daha. Ara Yesu, Bøzey nga Gazlavay. Maja ngøene, jarakwa maaya maaya daa mey nga Gazlavay masa aløkwa ma tøkwa ta masa aløkwa ma wuzdakwa fa mey nga ndøhay tabiya.

¹⁵ Ndaw aløkwa mahura da ray ndøhay ma ka kwakwas nga Gazlavay a ta sørfandakwar dey-ceceh la daa banay aløkwa maja aløkwa ndøhay masa-bøle hay. Anga na, ta sørey banay la anda aløkwa, ta jadamara la nga betey dey weewe ta fa cek hay mekele mekele nga key mebørey, ama kwa ta key mebørey daa ba.

¹⁶ Anda kefe, ngøchakwa ngada fa Bay Gazlavay, ndaw masa ma wudfta ndøhay kalah. Ngøchakwa ta mandørzay daa dey daa ba amba a sørfandakwar dey-ceceh, a kandakwar maaya, a jønndakwar ta pas masa aløkwa daa banay.

5

¹ Kwa *ndaw mahura da ray ndøhay ma ka kwakwas nga Gazlavay wura wura, a walamara na, da wuzlah ndøhay. Sløra anga na, ara mekey kwakwas nga Gazlavay maja ndøhay. A vølar cek a Gazlavay, asaya, a hørar gønaw ngada Gazlavay, amba Gazlavay a mbøkdatara mebørey nga ndøhay.

² *Ndaw mahura da ray ndøhay ma ka kwakwas nga Gazlavay na, anga ray anga, anga ndaw-magødan anda ndøhay mekele may. Anda kefe, a gwa nga jøkfatat slømay fa ndøhay ma sørmara cek ba ta ndøhay masa fa zlangadam la daa cøved masa maaya.

4:12 4.12 Iz 49.2; 55.11; Jer 17.10; Jan 12.48; Ef 6.17; 1Pi 1.23; CWJ 1.16
 4:14 4.14 5.8; 8.1; **ndaw mahura da ray ndøhay ma ka kwakwas nga Gazlavay:** 2.17-18; 3.1; 5.1, 4-6; 7.24-28; 8.3; 9.7, 11 4:15 4.15 2.18; 5.2; 7.26; 9.12; 1Jn 3.5 4:16 4.16 10.19 5:1 5.1 4.14 5:2 5.2 2.17-18; 4.15; 7.28

³ Maja anğa ndaw-magədan na, a hərey gənaw nğa vəley nğada Gazlavay maja mebərey nğa ndəhay daada ba, ama maja mebərey anğa may.

⁴ Ndaw a gwa a pa ray anğa nğa ndaw mahura da ray ndəhay ma ka kwakwas nğa Gazlavay ta ray anğa ba. Si Gazlavay ma pa anda aa ma pa *Aranjw.

⁵ *Kəriste may ta pa ray anğa nğa ndaw mahura da ray ndəhay ma ka kwakwas nğa Gazlavay ta ray anğa na, daa ba. Ama ara Gazlavay ma pa, aa guzlar, a ləvar:

«Kah na, Bəzey adaw,
dəga tasana yah Papakw.»

⁶ Daa slam langar, mawuzlalakaya saya, Gazlavay a ləvar:
«Ka da njeý ndaw ma ka kwakwas adaw nğa sərmataw
anda Melkisedek.»

⁷ Daa masa Yesu Kəriste anğa da bəla na, a sərə Gazlavay aa ta gədan nğa ləhda daa meməcey. Anda kefe, ta dərər dangay la ta mewudey, ta matəway daa dey a Gazlavay. Gazlavay ta jəkfər sləmay la, ta sləkfdərwa la daa meməcey, maja aa ma nar ray.

⁸ Kwa anğa Bəzey nğa Gazlavay na, taa sərkey nğa ney ray la ta fa banay masa aa ma sərə.

⁹ Masa Gazlavay ma tərda nğa ndaw ma gwa nğa kata cek hay tabiya maaya maaya cay na, ndəhay ma namar ray tabiya a hətam meləhey la ta fa vəda nğa sərmataw.

¹⁰ Yesu a gwa a ləhdata, maja Gazlavay ma pa nğa ndaw mahura da ray ndəhay ma ka kwakwas anğa anda Melkisedek.

Ka da mbəkdamara mey nğa Gazlavay ba

¹¹ Mey hay ga daha nğaa guzley nğada akwar da ray *Kəriste, ndaw aləkwa mahura da ray ndəhay ma ka kwakwas nğa Gazlavay. Ama anğa ta banay amba ya wuzdakwara mey da ray a maaya maaya, maja akwar fa da cəndamara fiyaw fiyaw daa ba.

¹² Pas a ta wuswa cay təfe amba kaa sərkadamata ndəhay. Ama haa wure kefe, si ndəhay aa sərkadamakwar da ray mey hay nğa Gazlavay masa ngeeme masa akwar ma cəndamara cay cəngə. Akwar na, anda bəza hay ma sam dəwa ma wusmara nğa zəmey daf ba aranj.

¹³ Kwa waawa ma sey dəwa daada na, anğa bəzey mecəhe dğay. Cek masa maaya ta maaya ba na, a gwa nğa wunkata ba.

¹⁴ Ndøhay mahura hay a zømam na, daf. Ata na, makøtatakaya, a gwamara nga wunkey cek masa maaya ta maaya ba.

6

¹ Maja ngene, nakwa fa mey fa mey, sasørkakwa cek masa nga ndøhay mahura hay. Ya da njakwa daa meesørkey nga ndøhay masa ma sørmara mey nga Køriste tølám ba. Aløkwa taa sørkakwa cek hay masa ngøeme daa metøbey mey nga Yesu Køriste cay. Anda meløvey, aløkwa taa sørkakwa cay da ray membøkey mekey cek ma hendey ndaw aa memøcey, asaya, da ray mepey Gazlavay nga ndaw fara fara.

² Aløkwa taa sørkakwa cay da ray *baptem mekele mekele, da ray mepey har a ray ndøhay *, da ray masløkdfawa nga ndøhay daa memøcey, leŋ da ray sariya masa Gazlavay ma da døsla ma da njeý nga sørmataw.

³ Ahaw, nakwa fa mey fa mey! Da Gazlavay ta tøba la na, ya daa sørkakwa meesørkey nga ndøhay mahura hay døba.

⁴ Ndøhay masa ma mbødfmar døba sem a Gazlavay na, a gwamara a vøhmawa ngaa cødfey ambahw fa Gazlavay saya na, kwara? Ta njam la dey pal daa mewedey nga Gazlavay. Cek da vadf masa Gazlavay ma vøldatara ngada ndøhay anga hay na, taa cøkdamara la. *Mesøfney nga Gazlavay ta sawa la a ray ata may.

⁵ Ta sørmara la mey nga Gazlavay na, ara mey maaya fara fara. Asaya, ta sørmara maazla hay ma da kam ngada fa mey la.

⁶ Ama, ta ngene he cøpa, ta mbødfmar døba sem a Gazlavay cønga. Ndøhay a, a gwamara nga vøhmawa ngaa cødfey ambahw fa Gazlavay saba, maja da ndaw ta mbødfar døba sem a Gazlavay na, a key ngene, anda a døra Bøzey nga Gazlavay fa hwadam mazlaŋgalakaya saya. Asaya, a key ngene, anda a cøfa fa mey nga ndøhay.

⁷ Wulkakwa da ray ley ceý! Ley masa var fa pey da hwadf a maaya maaya na, cek daa ley a, a key maaya maaya ngada ndaw nga ley a. Anda kedfe, a wuzwa maaya nga Gazlavay aa da ray ley a.

⁸ Ama da ley a, guzer ta hatak ta tøba sem na, ngene ara ley maaya ba. Ley a fa da njeý ga daa ba, Gazlavay a da

5:14 5.14 13.9; Rm 16.19; 1Kwr 14.20; Ef 4.14 6:1 6.1 9.14 * 6:2 6.2 mepey har a ray ndøhay: Ara cek mekey nga wuzda ndaw aha mapakaya wal ngada Gazlavay amba Mesøfney nga Gazlavay a sawa a ray a, kwa daa baptem, kwa daa sløra wura wura ngada Gazlavay. Nøka SNM 13.2-3; 1Tm 4.14. 6:2 6.2 Jan 3.25-26; SNM 19.1-6 6:4 6.4-6 2.1-3; 5.8; 10.26-29; 12.25; Mt 12.31; 1Jn 5.16

nøsa, a da mbækda aa kusaf, fa dōba ha, awaw a daa wura kəlmedek!

⁹ Jam adaw hay, kwa da yaa guzlmakwar anda keđe na, ya sərmara fara fara, akwar daa cəved maaya masa ma da ləhdakwar.

¹⁰ Gazlavay na, ara ndaw ma key cek ta cəved e, aa fa sərfada sləra maaya masa akwar ma kamara. Asaya, aa fa sərfada akwar fa wudmara. Akwar fa wuzdamərwa mewufey-vaw akwar a ta fa sləra masa akwar ma kamara zleezle ngada ndəhay mekele daa *mecəmey-ray nga ndəhay nga Yesu. Kwa wure keđe, akwar fa kamara kəne.

¹¹ Ya wudam na, kwa waawa da wuzlah akwar a key gədan nga njeý kəne haa mendəvey a, ka da gəram ba, amba ka hətam cek hay tabiya masa akwar ma səkwmara.

¹² Ka da təram ndəhay masa-mayađ hay ba, ama njam anda ndəhay ma təba mey nga Gazlavay masa majaratakaya. Ata na, a hətam cek masa Gazlavay ma ləvey a da vəldatara a ndəhay anga hay heyey la. Kam cek anda ata.

Mey da ray Gazlavay ma da katar maaya ngada ndəhay anga hay

¹³ Masa Gazlavay ma ləvar a *Abərahāam a da kar maaya heyey na, ta mbedey la fara fara, a ka cek aha la. Ndaw ma fəna Gazlavay na, daa ba. Anda keđe, ta mbedey la ta mezəley anga.

¹⁴ A ləvey:

«Fara fara, ya da pəska mey, ya da vəlka bəza hay ga ara mey ba.»

¹⁵ Masa Abərahāam ma cənda mey a la na, ta', a səkwa ta dək-vaw. Anda keđe, Abərahāam ta hətəy cek masa Gazlavay ma ləvar a da kara heyey la.

¹⁶ Da ndəhay fa mbađam na, a mbađam ta mezəley nga ndəhay masa mahura da ray ata hay. *Membedey na, a dəsla mey da wuzlah ndəhay.

¹⁷ Maja ngene, Gazlavay a mbedey amba ndəhay masa aa ma ləvey a da katar maaya heyey na, a sərmara fara fara, a katara la, a mbəđda mewulkey anga ba. Anda keđe, a mbedey, a ləvtar a da katar cek maaya.

¹⁸ Mey ma ləvey Gazlavay a da katar maaya ngada ndəhay anga hay, leŋ mbedey anga na, ara mey hay cew masa a mbəđam ba, maja Gazlavay na, a mbərzley ba səlak. Aləkwa masa ta ngəchakwa sem ngada fa Gazlavay keđe na, mey hay a keđe fa vəldakwar gədan

ga amba ya sækwakwa cek masa Gazlavay ma lövey a da völdandakwara heyey.

¹⁹ Cek masa alækwa ma sækwakwa ha na, fa jarandakwar maaya maaya amba ya njakwa majaratakaya fa mey nga Gazlavay. Maja ñgene, *Slam masa Gazlavay aa da hwaɗ a na, zana ma gërca slam aha a wurey la, anda keɗe, ya mbæzkwa la a hwaɗ a, a cakay Gazlavay.

²⁰ Yesu ta mbæzey sem aa slam aha ñgene teesef da ray alækwa. A mbæzey na, maja alækwa, maja anɗa ta tærey sem nga *ndaw mahura da ray ndøhay ma ka kwakwas nga Gazlavay nga sèrmataw anda Melkisedek.

7

Mey da ray Melkisedek

¹ Melkisedek na, ara bay daa berney nga Salem, asaya, anɗa *ndaw ma ka kwakwas nga Gazlavay, Gazlavay Mawaca-waca. Daa ñgene na, *Abøraham ta fəntərwa bay hay la ta gədaŋ daa vøram. Masa anɗa fa vøhwa na, ta', Melkisedek a daw, a cadərwa ray, a pəsar mey.

² Abøraham a wunka cek masa anɗa ma təbtərwa daa vøram a, slam kuraw, a la slam pal, a vøldara a Melkisedek e. Mezøley anɗa Melkisedek na, a wufey nga lövey «bay ma key cek ta cøved e.» Asaya, Melkisedek e anɗa «bay ma wufey zazay da wuzlah ndøhay,» maja anɗa bay nga Salem. Salem na, a wufey nga lövey «zazay».

³ Anɗa na, ðerewel nga Gazlavay faa guzley da ray papaha ta mamaha, leŋ da ray sækway anɗa hay na, daa ba. Asaya, faa guzley da ray mayawa anɗa ta memøcey anɗa daa ba. Anɗa na, anda Yesu, Bøzey nga Gazlavay, anɗa ndaw ma ka kwakwas nga Gazlavay nga sèrmataw.

⁴ Nækmara ceɗ! Melkisedek na, anɗa ndaw mahura, ba daw? Maja kwa Abøraham zleezle, Papanɗa nga papa alækwa hay na, ta wunka cek hay masa anɗa ma təbtərwa daa vøram la slam kuraw, ta vøldara slam pal sem.

⁵ Kwakwas nga *Mawiz a vøley cøved a ndøhay daa sækway nga *Levi masa ma ka kwakwas, nga tøbey cek pal daa kuraw nga cek hay tabiya da har ndøhay *Israyel hay. Kwa Israyel hay a, ara mølma ata hay daa sækway nga Abøraham. Ta ñgene he cøpa, fa tøbam cek da har ata cəŋga.

⁶ Melkisedek na, anɗa daa *sækway nga Levi ba, ama ta ñgene he cøpa, ta tøbey cek pal daa kuraw la da har

Abøraham. Abøraham masa Gazlavay ma lõvar a da kar maaya heyey na, ara anğa ma pøsar mey ngada Melkisedek ba, ama ara Melkisedek ma pøsar mey a Abøraham.

⁷ Ka sørmara, ndaw ma pøsey mey a ndaw na, aa mahura da ray ndaw aha. Anda kefe, Melkisedek na, aa mahura da ray Abøraham.

⁸ Ndøhay ma ka kwakwas daa sækway nga Levi ma tøbam cek pal daa kuraw na, ata ndøhay masa ma da møcam gway. Ama Melkisedek masa ma tøba cek pal daa kuraw da har Abøraham heyey na, aa ta dey nga sørmataw, anda dferewel nga Gazlavay ma lõvey.

⁹ Ya gwakwa ya lõvkwa ndøhay daa sækway nga Levi masa ma tøbam cek pal daa kuraw da har ndøhay mekele na, ta vølmar la a Melkisedek may, maja papan nga papa ata Abøraham ma vølar la.

¹⁰ Anda meløvey, masa Abøraham ma vølar cek a Melkisedek e na, ta yawa bøzey daa ba aran. Ama kwa ta yawa bøzey daa ba aran na, Abøraham a vølar cek a Melkisedek e. Ara anda ata cewete ta Levi, bøzey ma da yawa daa sækway anğa may. Anda kefe, a wufey nga lõvey Melkisedek na, a fønta ndøhay daa sækway nga Levi.

Mey da ray Yesu, ndaw ma ka kwakwas anda Melkisedek

¹¹ Daa *mewey nga *Israyel hay na, ndøhay ma ka kwakwas nga Gazlavay na, si ndøhay daa sækway nga *Levi gway. Sløra nga ndøhay a ngene na, ara anda *Aranw, papan nga papa ata hay zleezle, ma ka. Sløra ha na, a gwa nga ndøvda cek masa Gazlavay ma wufey nga ka ba. Da a gwa nga ndøvda na, anja Gazlavay fa da pey ndaw ma ka kwakwas mekele masa anda Melkisedek na, daa saba.

¹² Da Gazlavay ta mbødda ndaw ma ka kwakwas anğa sem na, ngene, si mewey nga Israyel hay a mbødey may.

¹³ Bay aløkwa Mahura Yesu masa aløkwa maa guzlkwa da ray a kefe na, sækway anğa wal ta *sækway nga Levi. Kwa ndaw daa sækway anğa pal masa anğa *ndaw ma ka kwakwas nga Gazlavay na, daa ba.

¹⁴ Ya sørkwa fara fara Yesu na, a yawa daa sækway nga Juda. Daa masa *Mawiz maa guzley da ray ndøhay ma ka kwakwas na, kwa taa guzley da ray sækway a daa ba.

¹⁵ Ndøhay ma ka kwakwas nga Gazlavay masa daa sækway nga Levi na, a gwamara nga handamata ndøhay fa Gazlavay ba. Mey a kefe, fa wuzwa maaya maaya maja Gazlavay ta pey ndaw mekele la nga ndaw ma ka kwakwas anğa anda Melkisedek.

16 Ndaw a, a tøyey ndaw ma ka kwakwas nga Gazlavay na, ta fa mewey nga ndaw-magədan ba, ama ta fa gədan nga heter mendəvey ba,

17 maja mawuzlalakaya daa dferewel nga Gazlavay, a lövey:

«Ka da njeý ndaw ma ka kwakwas adaw nga sərmataw anda Melkisedek.»

18 Anda keđe, mewey masa zleezle na, mahazakadakaya sem maja ara cek nga tede, a jəney ndaw ba.

19 Kwakwas nga Mawiz na, ta gwa nga ləhdata ndəhay daa ba. Ama wure keđe, aləkwa ma pakwa lengesl a ray cek mahura maaya masa aləkwa ma səkwakwa heyey la. Ara ta fa cek aha aləkwa ma da ngəchakwa ngada fa Gazlavay.

20-21 Asaya, Gazlavay a pa Yesu nga ndaw ma ka kwakwas anga na, ta mbedey la maja. Ama ndəhay mekele ma təram nga ndəhay ma ka kwakwas zleezle na, Gazlavay ta mbedey maja daa ba. Ahaw, Gazlavay ta mbedey la maja Yesu, a lövey:

«Yah, Bay Gazlavay akah, ya fa mbedey,

kwa ya fa da mbədda mey adaw daa ba səlak:

“Ka da njeý ndaw ma ka kwakwas adaw nga sərmataw.”»

22 Maja ngene, ya sərkwa fara fara, Yesu na, ara anga ma handərwa *mejəwey-mey maaya ma fəna masa zleezle.

23 Cek mekele daha saya, ndəhay ma ka kwakwas masa daa səkway nga Levi na, ata ga maja fa məcəm, fa pam mekele, fa məcəm, fa pam mekele.

24 Ama Yesu na, aa daha nga sərmataw, sləra anga nga mekey kwakwas na, fa da ndəvey daa ba.

25 Maja ngene, Yesu aa ta gədan mandaw mandaw nga ləhdata ndəhay masa ma ngəcham ngada fa Gazlavay ta fa anga. A gwa a ka kəne maja aa ta dey nga sərmataw, anga fa dərər dangay mandaw mandaw a Gazlavay maja ata.

26 Yesu na, ara *ndaw mahura da ray ndəhay ma ka kwakwas nga Gazlavay masa ma gwa nga jənnəkwar. Anga na, aa maaya fa Gazlavay, manğəra fa vəfa daa ba, mebərey da ray a kwa nekədey daa ba. Gazlavay a pa wal, aa da wuzlah ndəhay ta mebərey daa saba, a la a vad a cakay a.

27 Yesu na, anga anda mahura hay da ray ndəhay ma ka kwakwas nga Gazlavay mekele hay ba. Ata na, fa vəlam cek a Gazlavay mandaw mandaw, ngeeme, maja mebərey ata, fa dəba ha, maja mebərey nga ndəhay. Ama Yesu na, si

a ka kəne na, daa ba. A vølar cek a Gazlavay dey pal gway na, mak, mekele daa ba. Cek aha na, ara anġa ma vølda ray anġa nġa mæcey.

²⁸ Kwakwas nġa Mawiz a pey nġa ndøhay ma ka kwakwas nġa Gazlavay na, ndøhay magədanġ gway. Ndøhay a na, ara ndøhay ta mebørey. Ama daa masa Gazlavay ma mbedey na, *membedey a, ta nġey sem aa slam a nġa kwakwas nġa Mawiz. Gazlavay a pey nġa ndaw mahura da ray ndøhay ma ka kwakwas anġa na, Bøzey anġa. A pa na, nġa sərmataw. Gazlavay ta tərda sem nġa ndaw ma gwa nġa kata cek hay tabiya maaya maaya.

8

Mey da ray Yesu, ndaw mahura da ray ndøhay ma ka kwakwas nġa Gazlavay

¹ Fara fara ndaw aləkwa mahura da ray ndøhay ma ka kwakwas nġa Gazlavay na, daha. Ara Yesu, aa manjakaya ta har-zəmay nġa Bay Gazlavay da vad, fa wey da ray cek hay tabiya. Kede he ara *bay-ray nġa mey masa ala ma wudam nġa løvey.

² Anġa na, a ka sløra anġa daa Way-mekərcey fara fara masa da vad, daa *Slam masa Gazlavay aa da hwad a masa fara fara. Ara slam masa Gazlavay ma diya da vad, ba na, ara slam masa ndaw ma diya da hwayak ba.

³ *Ndaw mahura da ray ndøhay ma ka kwakwas nġa Gazlavay wura wura na, sløra anġa ara nġa vøley cek ta nġa hørar gənaw a Gazlavay. Anda kede, Yesu na, si a vølar cek a Gazlavay may.

⁴ Da haa wure kede anġa da bøla na, anġa kwa fa da key *ndaw ma ka kwakwas nġa Gazlavay na, daa ba. Fa da key daa ba na, maja ndøhay ma vølam cek a Gazlavay anda *kwakwas nġa Mawiz ma løvey na, daha cay.

⁵ Ndøhay ma ka kwakwas a na, a kamara sløra ata daa way nġa Gazlavay. Ama sløra masa ata ma kamara ha na, ara anda meezed e, ba na, ara anda da gazlavay da vad ba. Cek aha, ta key la kəne ta Mawiz may. Daa masa fa da kərca way nġada Gazlavay na, Gazlavay a løvar: «Jøkey slømay maaya maaya, kərca way a ta cøved e anda yah ma løvka daa anġwa nġa Sinay heyey.» ⁶ Ama wure kede, sløra masa Yesu ma ka na, a fəna sløra masa ndøhay ma ka kwakwas a ma kamara. Asaya, Yesu a cəmtar dāy nġa

7:27 7.27 5.3, 9; 7.25; 9.12, 26, 28; 10.10, 12; Rm 6.10; 1Pi 3.18 **7:28 7.28** 5.1-2, 8; 7.19; Ps 2.7 **8:1 8.1** 4.14; **har-zəmay:** 1.3, 13; 7.25; 10.12; 12.2, 25; Ps 110.1; Mt 22.44; SNM 2.33; Rm 8.34; Ef 1.20; Kwa 3.1 **8:2 8.2** 8.5 **8:5 8.5** 9.9; 10.1; Kwa 2.17; **way mekərcey:** 9.2; Mab 25.9, 40

ndøhay ta Gazlavay amba Gazlavay a jøwey mey mawiya ta ata. *Mejøwey-mey Mawiya ha na, a fønā mejøwey-mey masa zleezle maja cek masa Gazlavay ma løvey a da katara a ndøhay daa mejøwey-mey mawiya na, a fønā cek masa aa ma løvey daa mejøwey-mey masa zleezle.

Mey da ray mejøwey-mey mawiya

⁷ Da *mejøwey-mey ngeeme ta gwa nga ka cek tabiya anda Gazlavay ma wufey la na, anja ngene, Gazlavay fa da jøwey mey mekele daa saba.

⁸ Ama Gazlavay ta mbøftar ray sem a ndøhay anga hay maja mebørey ata. A løvtar:

«Yah, Bay Gazlavay, ya løvey: pas a, a wuswa la masa yah ma da jøwey mey mawiya ta ndøhay Israyel hay

lenj ta ndøhay daa sækway nga Juda.

⁹ Mejøwey-mey a na, fa da key anda mejøwey-mey masa yah ma ka ta papaŋ nga papa ata hay zleezle daa masa yah ma badatørwa daa hwayak nga Ejiip heyey na, daa ba.

Ndøhay a ta søpmara mejøwey-mey a ta cøved e daa ba. Ara maja ngene, yah ma mbøftar døba.

¹⁰ Yah, Bay Gazlavay, ya løvey:

Mejøwey-mey masa yah ma da ka ta ndøhay *Israyel hay ngada fa mey na, ara mewuzey kwakwas adaw ngada ata, ahaw, ya wuzlalatara la aa mevel ata.

Ya da tørey Gazlavay ata, ata may, a da tøram ndøhay adaw hay.

¹¹ Kwa ndaw ma daa sèrkada ndaw daa hwayak anga, da daa ba, mølmaha, a løvar: “Si ka søra Bay Gazlavay” na, daa ba, maja ata tabiya, kwa bøza hay, kwa mahura hay na, a sørmaya la.

¹² Yaw, ya mbøkdatara maŋgøra ata la, kwa ya fa da sørfada mebørey ata daa saba.»

¹³ Masa Gazlavay maa guzley da ray mejøwey-mey mawiya na, ta tørda mejøwey-mey masa ngeeme sem nga magurma. Cek wura wura masa magurma na, gweegwe cay aa zøfey.

9

Mey da ray mejøwey-mey masa ngeeme

¹ Daa *mejëwey-mey masa ngeeme, *mewey hay daha. Mewey hay a fa wuzdatara cøved a ndøhay nga søpey Gazlavay. Asaya, slam daha nga dørey danğay masa ndøhay ma diymara.

² Ta kørkam way la, way a na, mawunkakaya ta zana slam cew. Slam masa ngeeme na, a zølmara *Slam maaya nga Gazlavay. Daa slam aha na, petørla mahura ta neneh nga awaw hay maasala daha, asaya, taabal daha. Peñ mavøldakaya ngada Gazlavay mapakaya da ray a. ³ Slam ta da døba zana na, a zølmara *Slam masa Gazlavay aa da hwad a.

⁴ Daa slam aha na, slam-meewurey cek mezey maaya ngada Gazlavay daha, slam aha makakaya ta børey magaza. Asaya, *akwatay nga hwadam daha, børey magaza makakaya fa vøða. Daa akwatay a na, taasa makakaya ta børey magaza daha. Daa taasa ha na, cek mezømey mezøley «*man» da hwad a daha. Danğwar nga *Arañw masa maa fekwey heyey aa daa akwatay a, asaya, beeler hay cew masa Gazlavay mawuzlala mewey anğa hay fa vøða heyey, ata daa akwatay a may. *Akwatay a na, ara akwatay nga sørfedey mejëwey-mey nga Gazlavay ta ndøhay.

⁵ Da ray akwatay a na, cek hay cew daha ta zlara mavødtakaya ta børey magaza. Cek hay a na, ata anda maslañ hay nga Gazlavay, fa wuzdamørwa Gazlavay aa daa slam aha. Fa ciymata zlara ata hay a ray slam mewucey mambaz amba Gazlavay a mbøkdatarata mebörey nga ndøhay. Ama wure keðe, ya gwa nga kada mey da ray cek hay masa daa slam aha cøpa ba.

⁶ Yaw, cek hay daa way a na, mapatakaya anda keðe. Ndøhay ma ka kwakwas nga Gazlavay fa mbøzam mandaw mandaw aa slam masa ngeeme nga key sløra ngada Gazlavay.

⁷ Aa slam masa ta døba zana na, si ndaw mahura da ray ndøhay ma ka kwakwas ma mbøzey a hwad a gway. A mbøzey na, dey pal fa mevey. A mbøzey na, si ta mambaz nga gønaw da har nga vøley ngada Gazlavay amba Gazlavay a mbøkdara mebörey * anğa, asaya, amba a mbøkdatarata mebörey nga ndøhay mekele.

9:2 9.2 way mekørcey: 8.5; 9.11-12; Mab 26.1-30; **petørla:** Mab 25.31-39; **taabal:** Mab 25.23-30 **9:3 9.3** Mab 26.31-33; Lev 16.2; Heb 6.19; 9.7, 12; 10.20 **9:4 9.4** slam-meewurey cek: Mab 30.1-6; **akwatay:** Mab 25.10-16; **man:** Mab 16.32-35; **danğwar nga Arañw:** Mesl 17.21-25; **beeler hay cew:** Mab 25.16 **9:5 9.5** Mab 25.18-22 **9:6 9.6** 10.11; Mesl 18.2-6 *** 9:7 9.7** mebörey: Daa mewulkey nga Jøwif hay na, Gazlavay a mbøkey na, mebörey masa ndaw ma ka tesude ba. **9:7 9.7** 5.3; 9.25; 13.11; Lev 16.2-16

⁸ *Mesəfney nga Gazlavay a wufey nga lövey ta mey a keđe na, slam masa ngeeme, da aa daha aran na, cəved nga mbəzey aa Slam masa Gazlavay aa da hwađ a ta dəba zana a wurey ba aran.

⁹ Cek hay a cəpa keđe na, ara anda mey-mengey ma wuzwa cek hay masa ma kam wure keđe. Anda melövey, cek masa ndaw ma vəldara a Gazlavay ta mehərey gənaw ngada Gazlavay na, a gwa nga tərda mevel nga ndaw aha maaya fa mey nga Gazlavay ba.

¹⁰ Cek hay a keđe na, ara mewey hay da ray cek mezəmey, da ray cek mesey, leŋ da ray mesəpey kwakwas nga pərey cek amba a təräm ndəhay ma zləba kwakwas saba gway. Ara na, mewey hay nga ndəhay magədan gway, fa da njeý ga daa ba. A da njeý nekəđey haa ta pas masa Gazlavay ma mbəđdata cek hay cəpa mawiya.

Mey da ray Kəriste ma vəlda ray anga maja aləkwa

¹¹ Wure keđe *Kəriste ta sawa la. Anğa na, *ndaw mahura da ray ndəhay ma ka kwakwas nga Gazlavay ma handandakwara maaya anğa masa aləkwa ma hətkwa wure keđe. A ka sləra anğa na, daa way mahura ma fəna Way-mekərey masa zleezle. Way a na, aa maaya kalah, ara ndaw-magədan ma ləma ba. Way a na, aa da bəla keđe ba.

¹² Masa Kəriste ma mbəzey aa *Slam masa Gazlavay aa da hwađ a heyey na, ta mbəzey ta mambaz nga kwakwaba daa ba, ta mbəzey ta mambaz nga bəz-sla daa ba. Ama a mbəzey na, ta mambaz anğa, ray anğa. A mbəzey na, dey pal gway nga sərmataw. Anda keđe, ta ləhdandakwar sem daa mebərey nga sərmataw.

¹³ Anda kwakwas aləkwa ma lövey na, da ndaw ta zləba kwakwas la na, si a wucmar mambaz nga kwakwaba, da daa ba, nga gusan fa vaw. Da daa ba na, si a lam sla-bəlak, a ndəlmara, a kwiýdamara bebədes e a ray ndaw aha. Anda keđe, ndaw ma zləba kwakwas a na, a tərey ndaw ma səpa kwakwas a maaya maaya dəba.

¹⁴ Da anda keđe na, mambaz nga Kəriste na, a fəna cek masa ata ma kamara ngene ba daw? Mambaz anğa na, a fəna mambaz nga gənaw hay ba daw? Kəriste na, kwa ta key mebərey daa ba, ta vəlda ray anğa la a Gazlavay ta gədan nga *Mesəfney nga Gazlavay masa mendəvey ba nga sərmataw. Mambaz anğa na, a pərndakwara mevel amba ya kakwa cek malamba nga handandakwar aa meməcey

saba. Anda keđe, ya da kakwa sløra nga Gazlavay, ndaw masa anğa daha ta dey nga sərmataw.

¹⁵ Maja nğene, Kəriste na, ara ndaw ma cəmtar dəy nga ndəhay ta Gazlavay amba Gazlavay a jəwey mey mawiya ta ndəhay a. Anda keđe, ndəhay masa Gazlavay ma zəlta na, a hətam maaya anğa masa aa ma ləvtar a da vələdatara heyey la. Maaya anğa ha a da njeý da ray ata nga sərmataw. A hətam la, maja Kəriste ta məcey la. Meməcey anğa ha, a ləhdata ndəhay daa mebərey masa ata ma kamara daa masa ata daa *mejəwey-mey ngeeme heyey.

¹⁶ Yaw, ya sərkwə da ndaw a mbədey mey na, si ndaw aha a məcey la dəgay amba mey aha, a key.

¹⁷ Da ndaw aa ta dey na, membədey-mey anğa ha a key ba aran, si ndaw aha ma məcey la amba membədey-mey anğa a key.

¹⁸ Ara maja nğene, kwa mejəwey-mey masa ngeeme a zley na, ta mambaz.

¹⁹ Ta pas masa Gazlavay ma jəwa mey ta ndəhay *Israyel hay na, teesəd na, *Mawiz a wuzdatara *mewey masa Gazlavay ma vələdatara a ndəhay dəgay. Fa dəba ha, a ley mambaz nga bəz-sla ta nga kwakwəba, a jahada ta yam. Asaya, a ley mey-har nga wudez, a ley enğwec nga təban mandəvkaya magaza. A padə enğwec e fa mey-har nga wudez heyey, a jəhwəba aa mambaz a. A wuca fa dərewel masa mewey nga Gazlavay mawuzlalakaya fa vəda, asaya, a wuctara fa ndəhay tabiya.

²⁰ Aa guzley, a ləvey: «Gazlavay a jəwey mey ta akwar na, ta fa mambaz a keđe. A ləkwəwə nga namar ray a mewey hay daa mejəwey-mey a.»

²¹ Asaya, Mawiz a wucey mambaz heyey fa Way-məkərcey leñ fa cek hay tabiya mekey sløra daa way a may.

²² Anda kwakwas nga Mawiz ma ləvey na, har-gədan nga cek hay a tərəm maaya na, ta fa mambaz. Si mambaz a mbədwə la dəgay amba Gazlavay a mbəkdatara mebərey nga ndəhay.

Mey da ray Kəriste ma vələda ray anğa maja mebərey nga ndəhay

²³ Ya taa guzkwəwə la, ya ləkwəwə cek masa *Mawiz maa sərkwədatara a ndəhay nga key na, anda meezeđ nga cek hay masa fara fara da vad gway, ba na, ara cek hay a fara fara ba. Cek masa Mawiz maa sərkwədatara a ndəhay nga key na, aa fa tərdata cek hay cəpa maaya ta fa mehərey gənaw

hay ngada Gazlavay. Ama ngada cek hay da gazlavay da vad na, mehørey gønaw hay ngada Gazlavay na, ara cek nga tede. Si mekey cek mekele ma fønã. Cek aha na, ara Yesu *Køriste ma vølda ray anga nga kødey vagay.

²⁴ Køriste na, ta mbøzey aa *Slam masa Gazlavay aa da hwađ a daa Way-mekørcøy masa ndøhay magøđan ma kørcamara ta har ata na, daa ba. Slam aha ngene na, ara anda meezed e, ba na, ara Slam nga Gazlavay fara fara ba. Ama Køriste a mbøzey na, aa slam da gazlavay da vad, Slam masa Gazlavay aa da hwađ a fara fara. Wure keđe, aa daa slam aha fa dørar dangay a Gazlavay maja aløkwa.

²⁵ Asaya, *ndaw mahura da ray ndøhay ma ka kwakwas nga Gazlavay na, fa mbøzey fa mevey a fa mevey a aa Slam masa Gazlavay aa da hwađ a daa Way-mekørcøy. A mbøzey na, ta mambaz nga gønaw da har. Ama Køriste na, ta daw dey weewe aa Slam masa Gazlavay aa da hwađ a da vad nga vølda ray anga nga møcey maja aløkwa na, daa ba.

²⁶ Da ta vølda ray anga la dey weewe na, anja ngene, ta sørey banay la may dey weewe døga nga mezley nga bøla. Ama ta wuzdørwa vaw anga la dey pal daa masa bøla fa da ndøvey keđe. Ta vølda ray anga la nga møcey amba a la mebørey nga ndøhay.

²⁷ Ndaw-magøđan na, a da møcey dey pal gway, fa døba ha, Gazlavay a kar sariya.

²⁸ Køriste may, ta vølda ray anga la dey pal nga møcey køne amba a la mebørey nga ndøhay ga da bøla. A da wuzwa vaw nga dey cew na, maja mebørey nga ndøhay saba, ama nga løhdata ndøhay masa fa sækwmara.

10

¹ Cek hay masa maaya ma da kam ngada fa mey na, kwakwas nga Mawiz na, fa wuzdandakwara maaya maaya daa ba. Ama a wuzndakwar na, cek anda meezed e gway. Ndøhay ma søpmara Gazlavay ta fa kwakwas a na, kwa fa da tøram maaya fa mey nga Gazlavay maja na, daa ba sølak. Kwakwas a, a wuđey na, ndøhay a høram gønaw hay ngada Gazlavay fa mevey a, fa mevey a cønga.

² Da mehørey gønaw a wusa nga tørddata ndøhay maaya fa mey nga Gazlavay nga sørmataw na, anja ngene, ndøhay fa da wulkam da ray mebørey ata daa saba, asaya, fa da høram gønaw mekele a Gazlavay daa saba.

³ Ama sasøkar jak, ta fa mehørey gønaw na, ndøhay fa wulkam da ray mebørey ata fa mevey a fa mevey a,

⁴ Maja mambaz nga gusan ta nga kwakwaba na, a gwa a la mebörey da ray ndaw ba sölak.

⁵ Maja ngene, daa masa Këriste ma da sawa a böla na, taa guzlar la a Gazlavay, a lövar:

«Ka fa wudëy amba ndaw a hërka gë naw,

a vëlka cek na, daa ba,

ama ka ta vëlyavaw nga ndaw-magëdan la.

⁶ Mehöre y gë naw ma fëkmara da ray slam-mefëkey cek, ta mehöre y gë naw ngada kah

amba ka mbëkda mebörey na, a mbafaka ba.

Ka wudëy na, ndëhay a namaka ray.

⁷ Anda kefe, ya ta lövka la: “Bay Gazlavay, ehe yah kefe, ya sawa a böla na, nga key slëra masa kah ma wudëy anda mawuzlalakaya da ray adaw daa dërewel akah.”»

⁸ Këriste aa guzlar teesëd ngada Gazlavay na, a lövey:

«Ka fa wudëy amba ndaw a hërka gë naw,

a vëlka cek na, daa ba.

Ka faa sëmey da ray gë naw masa ma hërmara

ma fëkmara da ray slam-mefëkey cek na, daa ba.

Asaya, mehöre y gë naw nga mbëkey mebörey nga ndaw na, a mbafaka ba may.»

Ta ngene he cëpa, kwakwas nga Mawiz a wudëy na, si ndëhay a vëlam cek a Gazlavay anda ngene cënga.

⁹ Fa dëba ha, Këriste a lövey saya: «Ehe, yah kefe, ya sawa a böla na, nga key slëra masa kah ma wudëy.» Këriste aa guzley anda ngene na, a wudëy nga lövey ta vavësa mekey kwakwas ta gë naw anda masa zleezle sem. Ta', a bawa kwakwas mekele mawiya.

¹⁰ Yesu Këriste na, ta kar slëra la a Gazlavay anda Gazlavay a ma wudëy. Ta vëlda ray anga la dey pal nga mëcey maja alëkwa. Anda kefe, ta tërdandakwar sem nga ndëhay manjar mebörey fa mey anga.

¹¹ Ndëhay ma ka kwakwas nga Gazlavay na, a kamara slëra ata mandaw mandaw ta melecey. Ata fa hëram gë naw hay nga key kwakwas letëk mandaw mandaw a Gazlavay. Ama mehöre y gë naw ata ngene, a la mebörey da ray ndaw ba sölak.

¹² Ama Këriste na, ta vëlda ray anga la nga mëcey dey pal amba a mbëkdatara mebörey nga ndëhay nga sërmataw. Fa dëba ha, ta', a daw a nje y a har-zëmay nga Gazlavay.

¹³ Fetëde, aa manjakaya fa sëkwa pas masa Gazlavay ma da pata masa-gëra anga hay asi salay anga.

14 Ta tərdata ndəhay sem maaya fa mey nga Gazlavay manjar mebərey nga sərmataw, maja aa ma vəlda ray anğa nga məcey. A vəlda ray anğa ha na, dey pal gway.

15 *Mesəfney nga Gazlavay may, ta wuzdandakwara cek aha la maaya maaya. Teesəd na, aa guzley, a ləvey:

16 «Bay Mahura a ləvey:

“Ya da jəwey mey ta ata daa đar hay a ngene.

*Mejəwey-mey a na, ya da ka

amba kwakwas adaw a njeý aa mevel ata,
asaya, ya da wuzlala aa lenğesl ata.”»

17 Fa dəba ha, aa guzley saya, a ləvey:

«Ya fa da wulkey da ray mebərey ata

lenj da ray sləra ata maaya ba ngene na, daa saba.»

18 Maja ngene, da Gazlavay ta mbəkda mebərey nga ndaw sem na, mehərey gənaaw nga mbəkey mebərey na, daa saba.

Mey da ray menğəcheý fa Bay Gazlavay ta mevel maaya

19 Məlma adaw hay, maja mambaz nga Yesu ma mbədwa na, ya gwakwa nga mbəzey la aa *Slam masa Gazlavay aa da hwad a.

20 Ta wurndakwar cəved mawiya la masa ma da handandakwar aa heter mendəvey ba ta fa zana menğərey daa *Way nga Gazlavay heyey, anda meləvey, ta fa vaw nga *Kəriste masa ma məcey fa hwadam mazlangalakaya heyey.

21 Ndaw aləkwa mahura da ray ndəhay ma ka kwakwas daa Way nga Gazlavay na, daha. Anğa na, *bay-ray nga way a.

22 Anda keđe, si ya nğəchakwa fa Gazlavay ta mevel maaya, ta metəbey mey nga Gazlavay ta mevel pal, ta mevel manjar mebərey, asaya, vaw aləkwa may mapərkaya ta yam masa maaya.

23 Gazlavay ta ləvey la, a da ləhdandakwar. Gazlavay na, a ka cek aha la anda aa ma ləvey. Anda keđe, aləkwa fa ləvkwa fa mey nga ndəhay tabiya, aləkwa fa təbkwa aa mevel aləkwa cek masa Gazlavay ma ləvey a da ka heyey. Mbəkdwakwa mewulkey cew cew.

24 Aləkwa cəpa si ya jənkwa vaw da wuzlah aləkwa amba ya vəkwa gədanj da wuzlah aləkwa nga wudəy vaw, asaya, nga key cek maaya.

25 Ya da mbəkdwakwa nga daw aa *mecəmey-ray nga ndəhay nga Yesu anda ndəhay siya ma mbəkdamara na, kəne ba. Ama si ya vəkwa gədanj da wuzlah aləkwa ma

fəna ma fəna, maja pas masa Bay Mahura ma da sawa na, anğa gweegwe cay.

²⁶ Aləkwa taa sərkwakwa la da ray mey masa fara fara. Ama fa dəba ha, da ya kakwa mebərey tesude na, kwa ya həkwar gənw na, cek mekele nğa vəley a Gazlavay nğa mbəkey mebərey aləkwa daha daw? Daa ba səlak.

²⁷ Da kəne na, kwa cek mekele nğa key daa ba, si mesəkwey sariya ta mandərzay daa dey, sariya masa Gazlavay ma da ka nğaa zəddata masa-gəra anğa hay aa awaw menjem-njem e.

²⁸ Kwa waawa ma rəsa *kwakwas nğa Mawiz masa ndəhay cew, da daa ba, ndəhay maakar ma kam sede da ray a la na, a da kədmara ndaw aha vagay, fa da sərfamar dey-ceceh daa ba.

²⁹ Da anda nğene na, ka wulkam na, kwara? Ndaw ma rəsa Bəzey nğa Gazlavay, ma pa mambaz nğa Yesu nğa cek nğa tede, mambaz nğa *Mejəwey-mey Mawiya masa ma pəra mevel anğa, asaya, ma cəda *Mesəfney nğa Gazlavay ma wuzdandakwara maaya nğa Gazlavay na, Gazlavay a da kada ndaw a na, kwara? A da sərda banay ta ndaw aha ma fəna nğene saya.

³⁰ Fara fara, ya sərkwakwa ndaw masa maa guzley, ma ləvey: «Cek masa ata ma kamiwa maaya ba na, ya pəla la, ya da katar sariya.» Asaya, ndaw a, aa guzley, a ləvey: «Bay Gazlavay a da katar sariya a ndəhay anğa hay.»

³¹ Da sariya nğa Gazlavay, ndaw masa anğa daha ta dey nğa sərmataw, ta təfda ndaw la na, ndaw aha a zəley marava la.

³² Sərfadamara menjey akwar zleezle daa masa akwar ma təbmara nğa njeý daa mewedey nğa Bay Gazlavay təlam. Fa dəba ha nekəfey, akwar ta səram banay la ga, ama akwar ta bəsmara banay a la.

³³ Daa nğene, ta cədmata ndəhay siya da wuzlah akwar la fa mey nğa ndəhay ga, ta sərdamata banay la. Ndəhay siya da wuzlah akwar ta dəkmatar mevel la a ndəhay ma cədmata ha nğene.

³⁴ Ahaw, akwar ta səram dey-ceceh la fa ndəhay masa ata ma kəzlamata aa fərsəne maja Yesu. Asaya, daa masa ndəhay fa vamakwara cek akwar hay na, akwar ta mbəkdamatara la ta meesəmey nğa təbmara, maja ka sərmara akwar ta cek hay maaya mekele ma fəna, ma da njeý nğa sərmataw.

³⁵ Maja ñgene, pamara Gazlavay ñga ndaw akwar fara fara cõnga, ka da mbõkdamara ba. Da akwar fa kamara kõne na, Gazlavay a põlkwara mawurbay akwar la ma fõna.

³⁶ Maaya na, ka bõsmara banay cõnga amba ka kam anda Gazlavay ma wudẽy, asaya, amba ka hõtam cek masa Gazlavay ma lõvey a da võldakwara heyey.

³⁷ Yaa guzley anda kefe na, maja
«menjey nekõdey fefe, fara fara mendõrey nekõdey gway,
ndaw ma da sawa heyey na, a sawa la,
aa fa sawa, fa da zõnwa vaw daa ba sõlak.»

³⁸ Gazlavay aa guzley, a lõvey saya:
«Ndaw adaw maaya na, ara ndaw ma paya
ñga ndaw anga fara fara.
Anda kefe, a hõtey heter mendõvey ba la.
Ama da ndaw a võhey fa dõba na,
ya fa daa sõmey da ray a daa ba.»

³⁹ Alõkwa na, sõkway ñga ndõhay masa ma võham sem fa dõba amba aa zõdam na, kõne ba, ama alõkwa na, ndõhay ma pamara Gazlavay ñga ndaw ata fara fara. Anda kefe, Gazlavay a lõhdandakwar la.

11

Mepey Gazlavay ñga ndaw fara fara na, a wudẽy ñga lõvey kwara?

¹ Mepey Gazlavay ñga ndaw fara fara na, a wudẽy ñga lõvey cek masa alõkwa ma sõkwakwa fa Gazlavay na, ya sõrkwa ya hõtowa la fara fara. Kwa alõkwa ta hõtowa ta dey alõkwa daa ba na, ya sõrkwa ara cek fara fara.

² Ara anda kefe, ndõhay masa zleezle ma pamara Gazlavay ñga ndaw ata fara fara. Ara maja ñgene, Gazlavay maa hõmdata.

³ Alõkwa fa pakwa Gazlavay ñga ndaw alõkwa fara fara. Ara maja ñgene, ya sõrkwa Gazlavay a lõma slam da vad ta slam da hwayak ta fa mey anga meeguzley gway. Anda melõvey, cek hay masa alõkwa ma hõtatakwar ta dey alõkwa na, Gazlavay a katõrwa ta fa cek masa alõkwa ma hõtatakwar ta dey alõkwa ba.

⁴ Yaw, *Abel ta pa Gazlavay la ñga ndaw anga fara fara. Anda kefe, ta võlar cek la a Gazlavay ta mevel pal ma fõna ñga mõlmaha *Kayin. Maja ñgene, Gazlavay ta tõba cek masa anga ma võldara heyey la, a pa ñga ndaw maaya fa mey anga. Kwa Abel e ta mõcey sem na, aa faa

guzlndakwar anda aa ta dey cəŋga, maja aa ma pa Gazlavay ŋga ndaw anġa fara fara.

⁵ Henakw ta pa Gazlavay la ŋga ndaw anġa fara fara. Da ray ŋgene, Gazlavay a la a vad a cakay a, kwa ta məcey ta məcey daa ba, kwa ndaw ma hətar daa saba. Masa Gazlavay ta la Henakw a daa ba aran na, Henakw fa kar cek ma mbafar a Gazlavay, anda mawuzlalakaya daa đerewel ŋga Gazlavay.

⁶ Da ndaw ta pa Gazlavay ŋga ndaw anġa fara fara daa ba na, ndaw aha fa da kar cek ma mbafar a Gazlavay daa ba. Kwa waawa ma wudey ŋga ŋgəchey ŋgada fa Gazlavay ŋga dərey danġay na, si a səra Gazlavay na, daha, asaya, si a səra Gazlavay fa katar maaya ŋgada ndəhay ma səpmara.

⁷ Nəwe ta pa Gazlavay la ŋga ndaw anġa fara fara. Maja ŋgene, ta pas masa Gazlavay ma wuzdara cek hay ma da kam ŋgada fa mey masa kwa ta hətatar ta dey anġa daa ba aran na, Nəwe he ta jəkfər sləmay la a Gazlavay cəŋga. Ta', aa cedey kwambiwal mahura anda way ŋga ləhda ray anġa ta ndəhay da way anġa hay. Nəwe ma pa Gazlavay ŋga ndaw anġa fara fara ŋgene na, a wuzdərwa ndəhay siya da bəla fa pamara Gazlavay ŋga ndaw ata fara fara daa ba. Anda kedə, Gazlavay may, a pa Nəwe ŋga ndaw maaya fa mey anġa.

⁸ *Abərahāma ta pa Gazlavay la ŋga ndaw anġa fara fara. Maja ŋgene, daa masa Gazlavay a ma zəla heyey na, ta jəkfər sləmay la. Da ray ŋgene, ta', a daw aa hwayak masa Gazlavay ma ləvar a da vəldara heyey. Slam masa anġa ma daw a hwad a na, kwa ta səra fedə na, daa ba.

⁹ Abərahāma ta pa Gazlavay la ŋga ndaw anġa fara fara, maja ŋgene ta', a daw a njeý daa hwayak masa Gazlavay ma ləvar a da vəldara heyey, ama anġa manjakaya anda ndaw-məlak. Anda kedə, a njeý daa way-məkərcey. Ata *Izak ta *Jakwap may, Gazlavay a ləvey a da vəldatara hwayak a anda aa ma ləvey a da vəldara a Abərahāma. Ata may, a njam daa way-məkərcey anda Abərahāma a.

¹⁰ Abərahāma na, fa səkwa berney masa salay a mapakaya maaya maaya. Ara Gazlavay ta ray anġa ma pa kwakway ŋga berney a, asaya, ara anġa ma ləma berney a.

¹¹ Yaw, Abərahāma ta pa Gazlavay la ŋga ndaw anġa fara fara. Da ray ŋgene, kwa anġa maraw, asaya, kwa ŋgwas anġa Sara aa dərlay na, ta key hwad la cəŋga. Abərahāma

a særa Gazlavay ma løyvar a da vølar bøyzey heyey na, a mbørzley ba.

¹² Ara anda keðe, Abøraham, ndaw masa fa sækwey memøcey na, ta yawa bøza hay la, sækway anga ta key la ga anda wurzla hay da vad, a sløfam ba anda mawurbay da wayam.

¹³ Ndøhay a keðe cøpa ta pamara Gazlavay la nga ndaw ata fara fara haa kasl fa memøcey ata. Ata ta høtam cek masa Gazlavay ma løyvey a da vøldatara heyey na, daa ba. Ama a sørmara pas pal na, Gazlavay a vøldatara la anda aa ma løyvey a. Da ray ngene, ata faa sømam da ray a, taa guzlam la, a løyvam ata na, ata anda møyak hay da bøla keðe, fa da njam daa ba, kwa hwaray ta katar nga løyvey køne na, daa ba.

¹⁴ Ndøhay a maa guzlam anda ngene na, a wudfey nga løyvey ata fa søpam hwayak ngada ata ray ata.

¹⁵ Ta wulkam da ray hwayak masa ata ma mbøkdamerwa na, daa ba. Da ta wulkam la na, anja a vøham la aa hwayak a saya.

¹⁶ Fara fara a søpam na, hwayak masa maaya, anda meløyvey slam da gazlavay da vad. Ara maja ngene, Gazlavay ma løyvey, anga Gazlavay ata, kwa hwaray fa da kar nga løyvey køne na, daa ba. Nøka, Gazlavay ta døytar berney maaya la, ba diya?

¹⁷⁻¹⁸ Gazlavay aa guzlar a Abøraham, a løyvar: «Ara ta fa bøza hay nga bøy akah Izak, slømay akah ma da zøley.» Fa døba ha, Gazlavay a jada Abøraham a nga vøldara bøyzey anga mendulen Izak nga hørey. Abøraham ta pa Gazlavay la nga ndaw anga fara fara, maja ngene, ta', a la bøyzey a, a daw nga hørara ngada Gazlavay.

¹⁹ Abøraham a særa Gazlavay na, a gwa nga sløkfaderwa ndaw daa memøcey. Anda keðe, a høtar bøyzey anga Izak na, ara anda a sløkfawa daa memøcey.

²⁰ Izak ta pa Gazlavay la nga ndaw anga fara fara, maja ngene, ta', a pøstar mey ngada ata Jakwap ta Ezayu da ray cek ma da kam ngada fa mey.

²¹ Jakwap may, ta pa Gazlavay la nga ndaw anga fara fara. Da ray ngene, daa masa Jakwap a fa da møycey na, ta pøstar mey la ngada bøza hay nga *Jawzef, fa døba ha, a døra dangay fa zlanday anga, a hølma Gazlavay.

²² Jawzef ta pa Gazlavay la nga ndaw anga fara fara. Maja ngene, daa masa anga fa da møycey na, taa guzltar la a

ndəhay *Israyel hay, a ləvtar, cay na, a bam la daa hwayak nga *Ejip. Asaya, taa guzltar la da ray cek masa ata ma da kam ta tetesl anğa.

²³ Ata papan nga *Mawiz ta mamaha ta pamara Gazlavay la nga ndaw ata fara fara. Anda kedə, daa masa ata ma yamərwa Mawiz a na, ta bədamara la ta bəy kiya maakar da way. A nəkmara bəzey a na, a mbey ara mey ba. Ata na, kwa ta zluram ta mey nga bay Ejip daa ba.

²⁴ Masa Mawiz a ta gəley cay na, a wudəy a zəlmara bəzey nga dam nga bay *Farawan, bay Ejip ba. A wudəy nga zəley kəne ba na, maja anğa fa pa Gazlavay nga ndaw anğa fara fara may.

²⁵ A wudəy nga sərey banay ta ndəhay nga Gazlavay da ray aa ma da njeý nekəđey daa meesəmey daa mekey mebərey.

²⁶ A wudəy na, ndəhay a rəsmara maja *Kəriste, da ray anğa ma da hətəy zleley ga da Ejip ngenə. A wudəy kəne na, maja anğa fa səkwa mawurbay nga sləra anğa masa Gazlavay ma da vəldara ngada fa mey.

²⁷ Mawiz ta pa Gazlavay la nga ndaw anğa fara fara, maja ngenə, ta bawa sem daa hwayak nga Ejip. Kwa mevel nga bay da Ejip e fa cey na, ta ngenə he cəpa, Mawiz ta zlurey daa ba səlak. Anğa malacakaya deŋ e anda ta hətəy Gazlavay la, Gazlavay masa kwa ndaw ta hətəy ta deý anğa daa ba səlak.

²⁸ Mawiz ta pa Gazlavay la nga ndaw anğa fara fara, maja ngenə, a zlar nga key gwagway mezəley «*Pak». A ləvtar a ndəhay Israyel hay nga wucam mambaz nga gənaw fa meýslam ata hay amba maslan nga Gazlavay masa ma kəđta ndəhay vagay a sawa a kəđta bəz ata hay maa-mey-ndaw saba.

²⁹ Israyel hay ta pamara Gazlavay la nga ndaw ata fara fara. Ara maja ngenə, daa masa ata ma zləngdamara bəlay magaza na, bəlay a, a wunkey cew, daa cəved ata na, yam da hwad a daa ba. Ama ndəhay Ejip hay ma səpmatar wurzay ma wudəy nga zləngam may na, ta', yam a, a cəmey aa slam a, a bəbətata.

³⁰ Asaya, Israyel hay ta pamara Gazlavay la nga ndaw ata fara fara. Ara maja ngenə, ata ma zlərmara mahwal nga berney nga Jerikwaw đar maasala, ta', mahwal a, a bəzley.

³¹ *Rahap ngwas-barlaw daha, ta pa Gazlavay la nga ndaw anğa fara fara may. Maja ngenə, anğa ma təbta

ndøhay meslørey masa ma slørdamatørwa nga sengeley berney a. Ara maja ngene, Gazlavay ta køða vagay anda aa ma kødta masa-gøra anga hay na, daa ba.

³² Yaw, ya daa guzley da ray *Zedeyanw, *Barak, *Sam-sanw, *Jefte, *Davít, *Samiyel lej ndøhay ma tøla mey nga Gazlavay na, kwara sura? Ya fa da høtey har ngaa guzley da ray ata pal pal na, daa ba.

³³ Ata may, ta pamara Gazlavay la nga ndaw ata fara fara, maja ngene, ta fønmata hwayak hay mekele mekele la ta gødan daa vøram. Ta kam cek la ta cøved e anda Gazlavay ma wudëy. Ta høtam cek masa Gazlavay ma løvey a da vødatara heyey la. Ta gørcamatara mey nga mabar hay la maja a da pøwmata.

³⁴ Ta møcmara awaw masa ma gøfey ta gødan la. Ta løham la daa masa fa da kødmata ta dølawa. Ata na, ta tøram la nga masa-bøle hay, ama Gazlavay ta vøltar gødan la. Ta jaram la daa vøram, ta fønmata sewje hay ma samawa daa hwayak hay mekele mekele sem ta gødan.

³⁵ Nguşay may, ta pamara Gazlavay la nga ndaw ata fara fara. Ara maja ngene, ata ma høtmatar ndøhay mamøctakaya fa sløkdamawa daa memøcey.

Yaw, ndøhay siya ta søram banay la ga ta mekøfey haa a møcam. Ama ta wudam nga løhey daa banay a na, daa ba. A wudam nga møcey daa banay a amba Gazlavay a sløkdadatørwa daa memøcey, a vøltar menjey masa ma føna da bøla kefe.

³⁶ Ndøhay mekele na, ta bøsmara mecøfey la, ta bøsmara laway la. Asaya, ta jøwmata la ta calalaw, ta gørcamata la aa førsøne. Ama ta ngene he cøpa ta bøsmara la.

³⁷ Siya hay da wuzlah ata na, taa zakamata la ta angwaga vagay, siya hay, ta dølwmata la cew cew. Siya hay, ta ngømamata la ta dølawa vagay. Ndøhay siya ta pøkam la saw køne, ata masa-viya hay, a køzlam fa vaw na, zana nga ambal nga dækw daa ba nga tøban, ta søram banay la ga.

³⁸ Ndøhay maaya ngene na, slam da bøla kefe tøde nga njeý ngada ata ba. Fa pøkam saw da wuzlah-ley, da daa ba, da angwaga, a nam daa bødám hay, da daa ba, daa vøged hay anda ndøhay masa ta bølwmata sem.

³⁹ Ndøhay a kefe tabiya ta pamara Gazlavay la nga ndaw ata fara fara. Ara maja ngene, Gazlavay ma pata nga ndøhay maaya fa mey anga. Ama ta høtam cek maaya masa

11:31 11.31 Jes 2.11-12; 6.21-25; Mt 1.5; Jak 2.25 **11:32 11.32** NMH 6.11-8.32; 4.6-5.31; 13.2-16.31; 11.1-12.7; 1Sam 16.1**haa** 1Bay 2.11; 1Sam 1.1-25.1 **11:33 11.33** NMH 14.6-7; 1Sam 17.34-36; Dan 6.1-27 **11:34 11.34** Dan 3.23-25 **11:35 11.35** 1Bay 17.17-24; 2Bay 4.18-37 **11:36 11.36** Jer 20.2; 37.15 **11:37 11.37** 2Mev 24.21 **11:38 11.38** 1Sam 13.6

Gazlavay ma lövey a da vëldatara a ndøhay anğa hay heyey na, daa ba.

⁴⁰ Fara fara, Gazlavay ta ðey cek la maaya kalah ngada alækwa, amba ta pas masa ta ndøvda slëra anğa cay na, a vëldandakwara cek aha ngada alækwa ta ata bama da mey pal.

12

¹ Ndøhay a tabiya ma pamara Gazlavay nğa ndaw ata fara fara ngene, fa zlërmindakwar ray nğa vëlmandakwar gëdanj. Ata fa wuzdamandakwara, ya da pakwa Gazlavay nğa ndaw alækwa fara fara na, ta fa banay masa ata ma ðësmara ngene. Maja ngene, hazakadakwa cek hay ma tækndakwar nğa daw fa mey fa mey çëpa. Hazakakwa ma fëna na, mebörey ma tækndakwar nğa daw fa mey fa mey daa mey nğa Gazlavay. Jarakwa, nakwa fa mey fa mey haa kasl mendøvey a.

² Nækakwa dey na, si fa Yesu. Ya da mbëkdakwa ba, maja ara anğa ma pandakwara çöved nğa løhey, asaya, ara anğa ma da jëdndakwar haa mendøvey a. Ta tëba la nğa këdmara fa hwadam mazlangalakaya, kwa hwaray ta kar nğa mëcey daa ba. A tëba maja a wulkey a da høtey meesømey masa Gazlavay ma ðadara nğa vëldara fa dëba ha. Wure keðe, anğa manjakaya ta har-zømay nğa Gazlavay ma wey da ray cek hay çëpa.

³ Ahaw, wulkam da ray Yesu a. Ndøhay malamba hay ta rësmara la, ta sërdamara banay la, ama ta ðësa la çëpa. Anda keðe, ka da gëram ba, ka da mëcmara vaw ba.

Mey da ray mekøtey nğa Gazlavay

⁴ Akwar fa këðam vaw amba ka kam mebörey ba, ama kwa ndaw pal da wuzlah akwar ta mëcey daa mekøðey-vaw a daa ba aranj.

⁵ Akwar fa sërfadamara mey masa Gazlavay ma dëkakwar mevel ta anğa heyey, ba diya? Gazlavay aa guzlkwar anda aa maa guzltar ngada bëz anğa hay, a lövey: «Bëz adaw, da yah, Bay Gazlavay,

ya fa sërdaka banay nğa këtka na, tëba mekøtey a.

Da ya fa mbëdka ray na, ka da cey mevel ba.

⁶ Maja yah, Bay Gazlavay, ya køtey na, ndaw masa yah ma wuða.

Ya sërdey banay na,

ta ndøhay çëpa masa yah ma pata nğa bëz adaw hay.»

⁷ Gazlavay a sêrdakwar banay na, a key a kêtqwar. Anda keđe, Gazlavay a pakwar na, anda böz anğa hay. Bözey masa papaha a keta ba na, daha daw?

⁸ Gazlavay na, fa kêtata böz anğa hay cêpa. Anda keđe, da aa fa kêtqwar daa ba na, ŋgene akwar böz anğa hay fara fara ba, akwar bôza hay manjar papaŋ.

⁹ Yaw, papa alêkwa hay da bêla na, fa kêtmandakwar, anda keđe, alêkwa fa namatakwar ray. Kaa wara ya nakwar ray a papa alêkwa Bay Gazlavay ma fêna ba na, kwara? Da alêkwa fa nakwar ray na, ya da hêtqwa heter mendövey ba.

¹⁰ Papa alêkwa hay masa da bêla keđe a kêtmandakwar ŋga menjey nekêdefey gway anda mevel ata ma wufey. Ama papa alêkwa masa da vad na, a kêtndakwar ŋga dîyndakwar amba ya têrkwa ndêhay anğa hay maaya anda anğa ŋga sêrmataw.

¹¹ Daa masa Gazlavay fa kêtndakwar na, a mbafandakwar ba, a candakwar mevel. Ama, ndêhay ma têbmara mekêtey a na, a hêtam menjey maaya la ta zazay fa dêba ha.

Ndêhay ŋga Gazlavay a da njam na, kwara?

¹² Anda keđe, ka da mœcmara vaw ba, kam gêdan ŋga daw fa mey fa mey.

¹³ Maaya na, ka sêpmara cêved ŋga Gazlavay dêr e amba ndêhay siya da wuzlah akwar masa-bêle hay a mbêkdamara mey ŋga Gazlavay ba, a sêpmara Gazlavay maaya maaya.

¹⁴ Sêpam ŋga njey ta zazay ta ndêhay tabiya, kam gêdan amba ka kam cek ma mbafar a Gazlavay, da daa ba na, kwa ndaw fa da hêtar Gazlavay ta dey anğa daa ba.

¹⁵ Wam vaw, kwa waawa da wuzlah akwar a da mbêdar dêba a Gazlavay masa fa wudndakwar kalah keđe ba. Asaya, wam vaw amba kwa waawa da wuzlah akwar a tœrey anda slaslalay ŋga wudez masa meedêwek e * ba, da daa ba na, a da pey har, a da nœsta ndêhay siya ta dœdêwek anğa ha.

¹⁶ Wam vaw, kwa waawa da wuzlah akwar a da key cek malamba ba, a da rêsa cek maaya ŋga Gazlavay anda Ezayu ba. Ezayu a na, ta lœvar la a mœlmaha mecêhe ŋga key mahura da ray a amba a vœlar cek mezœmey gway.

12:7 12.7 Mew 8.5 **12:10 12.10** Mt 5.48; Rm 5.2; Jak 3.17 **12:11 12.11**
 12.14; Jak 3.17-18 **12:12 12.12** Iz 35.3 **12:13 12.13** MM 4.26 **12:14 12.14**
 12.11; Mk 12.30-31; Ps 34.15; 1Kwr 7.15 * **12:15 12.15** slaslalay ŋga wudez
 masa meedêwek e: Mey a keđe a patar lœngesl a ndêhay da ray mesœpey kuley
 hay. (Nœka Mew 29.17.) Ndêhay siya hay a wulkam mey a keđe a wufey ŋga
 lœvey mepey mey aa mevel. **12:15 12.15** Mew 29.17; Gal 1.6 **12:16 12.16**
 MC 25.29-34

¹⁷ Ka sèrmara fa dèba ha, Ezayu ta wufey la amba papaha a pèsar mey cəŋga, haa a sèpa mepèsey-mey a ta matəway daa dey. Ama papaha ta pèsar mey daa saba, maja Ezayu a gwa ŋga mbəfdə cek maaya ba masa aŋga ma ka heyey saba.

¹⁸ Sərmara, daa masa *Israyel hay ata da wuzlah-ley na, ata ta ŋgəcham la a cakay aŋgwa ŋga Sinay, cek masa ndaw ma gwa ŋga gəsfar. Ama akwar na, ka ta ŋgəcham a cakay cek masa ndaw ma gwa ŋga gəsfar anda Israyel hay zleezle na, daa ba. Daa ray ŋga aŋgwa ha na, awaw fa gədey njem! njem! da ray a, ləvanj bək-bek asaya, bərgadanj fa key ta gədanj da ray a.

¹⁹ Asaya, daa aŋgwa ha na, taalam fa cənwa, dəy fa cənwa. Israyel hay a ma cəndamara na, a təwam, a wufam amba Gazlavay aa guzltar saba,

²⁰ maja mey masa ata ma cəndamara na, a fəntar gədanj. Gazlavay aa guzltar, a ləvtar: «Kwa ndaw, kwa cek ŋga ley ma gəsfar fa aŋgwa ha na, hazakamara ta aŋgwa haa a məcey.»

²¹ Cek masa ata ma hətmar a na, ta zluradata sem kalah. Kwa *Mawiz may, aa guzley, a ləvey: «Ya faa wesey maja mandərzay fa kaya.»

²² Ama akwar na, ka ta ŋgəcham la aa aŋgwa ŋga *Siyanjw, aa berney ŋga Gazlavay, Gazlavay ndaw masa aŋga daha ta dey ŋga sərmataw. Berney a na, ara *Jeruzelem masa da gazlavay da vad. Fetede maslanj hay ŋga Gazlavay makustakaya ga, a sləfam ba, fa kam gwagway.

²³ Asaya, akwar ta ŋgəcham la a cakay bəza hay ŋga Gazlavay masa maa-mey-ndaw † makustakaya fetede may. Bəza hay a na, ara ndəhay masa Gazlavay ma wuzlalatara mezəley ata sem aa dərewel aŋga. Ata fa kam gwagway da vad may. Akwar ta ŋgəcham la a cakay Gazlavay, Gazlavay masa ma katar sariya a ndəhay da bəla tabiya. Akwar ta ŋgəcham la a cakay ndəhay masa ma kam sləra ta cəved e ma təram maaya kalah fa mey ŋga Gazlavay.

²⁴ Akwar ta ŋgəcham la a cakay Yesu, ndaw masa ma mbəfdərwə mambaz aŋga amba ya təkwa ndəhay maaya fa mey ŋga Gazlavay. Yesu a na, ara ndaw ma handərwə *Mejəwey-mey Mawiya masa Gazlavay ma jəwa ta aləkwa. Mambaz masa aŋga ma mbəfdərwə na, a

12:17 12.17 MC 27.30-40 **12:18 12.18-19** Mab 19.16-22; 20.18-21 **12:20 12.20** Mab 19.12-13 **12:22 12.22** 13.14; Gal 4.26; CWJ 5.11; 21.2 † **12:23 12.23** bəza hay ŋga Gazlavay masa maa-mey-ndaw: Ara ndəhay tabiya ma təba mey ŋga Yesu manjatakaya da cakay Gazlavay. **12:23 12.23** Lk 10.20

wuzwa cek maaya ma fəna cek masa mambaz nga *Abel ‡ ma wuzdərwa.

²⁵ Anda keđe, wam vaw, jəkfamar sləmay a ndaw masa maa guzlkwar, ka da mbədmar dəba ba. Zleezle na, ndəhay ta jəkfamar sləmay a ndaw ma wuzdatara mey nga Gazlavay da bəla keđe daa ba. Ara maja ngene, Gazlavay ma sərdata banay ta ndəhay a. Aləkwa masa fa cəndakwa dəy nga Yesu, ndaw maa guzldakwar ta da vad keđe, da ya jəkfakwar sləmay ba na, kaa ya da ləhkwa daa banay a kwara?

²⁶ Zleezle na, dəy nga Gazlavay ta cənwa la, hwiyak ta wusey la. Ama wure keđe, Gazlavay aa guzley da ray cek masa aa ma da ka, a ləvey: «Ya wusa hwiyak la dey pal saya. Ya da wusey na, hwiyak daada ba, ama slam da gazlavay da vad may.»

²⁷ Mey masa ma ləvey «dey pal saya» a wuzwa cek hay tabiya masa Gazlavay ma katərwa na, a wusam la. Asaya, cek hay a, aa zədam la. A ka kəne amba cek hay masa ma wusam ba na, aa zədam ba, a njam kəne.

²⁸ Anda keđe, kakwar suse a Gazlavay maja aa ma vəldakwar berney masa ma pəlhey ba, slam masa Gazlavay fa wey da ray ndəhay anğa hay nga sərmataw. Kakwar cek masa ma mbafar, nakwar ray.

²⁹ Sərmara, Gazlavay masa aləkwa ma həlmakwa na, anğa anda awaw maa wurey cek.

13

Mey da ray menjey maaya nga ndəhay nga Gazlavay

¹ Akwar ndəhay nga Gazlavay, wudam vaw da wuzlah akwar cənğa anda akwar məlman hay.

² Anda keđe, sərfadamara nga təbey məlak hay a way akwar hay ta meesəmey. Ndəhay mekele ta təbam məlak hay la kəne, anja a təbam na, maslan hay nga Gazlavay, kwa ta sərmara daa ba.

³ Wulkam ta ndəhay daa fərsəne, anda akwar bama ta ata daa fərsəne he may. Asaya, wulkam ta ndəhay masa fa sərdamata banay, anda akwar may, fa səram banay bama ta ata.

‡ **12:24 12.24** Mambaz nga Yesu a fəna nga Abel na, kwara? Ndəhay siya a ləvam mambaz nga Yesu na, a wuzwa dey-ceceh ta mewudey-vaw nga Gazlavay, ama mambaz nga Abel na, a wuzwa Abel ma wufey nga kədəy ndəhay malamba hay. Ndəhay siya a ləvam mambaz nga Yesu a fəna mebərey ta gədan. **12:24 12.24** 8.6; 9.12; Abel: MC 4.10. **12:25 12.25** 6.4-6; 8.1; Mab 20.22 **12:26 12.26** Mab 19.18; Hag 2.6, 21 **12:28 12.28** 13.14 **12:29 12.29** Mew 4.24 **13:1 13.1** 6.10; 10.24; 13.16; 1Pi 1.22 **13:2 13.2** MC 18.1-8; 19.1-3; Jəw 31.32; Rm 12.13; 1Tm 3.2; 5.10; 1Pi 4.9; 3Jn 8 **13:3 13.3** 10.34; Mt 25.36

⁴ Kwa waawa nga jøkey slømay fa mey masa Gazlavay ma løvey da ray meley ngwas. Anda keðe, kwa waawa a da ley vaw saw da palah ba. Sørmarā, Gazlavay a katar sariya la ngada ndøhay ma lam vaw saw da palah ta ngada ndøhay ma kam cek hay malamba.

⁵ Kwa waawa a da wulkey kalah da ray dala ba. Sasømam ta cek masa da har akwar gway, maja Gazlavay ta ray anga taa guzley la, a løvey: «Ya fa da mbøðka døba daa ba. Kwa ya fa da mbøkdaka daa ba.»

⁶ Anda keðe, kwa waawa da wuzlah aløkwa a gwa nga løvey ta mandørzay daa dey daa ba:

«Bay Gazlavay na, ara ndaw ma jønya.

Maja ngene, ya fa da zlurey kwa ta meeme daa ba, maja ndaw ma gwa nga kaya cek maaya ba na, daa ba.»

⁷ Wulkam ta *bay-ray akwar hay daa *mecømey-ray nga ndøhay nga Yesu masa ma wuzdamakwara mey nga Gazlavay zleezle. Yaw, wulkam da ray menjey ata, asaya, da ray memøcey ata. Pamara Gazlavay nga ndaw akwar fara fara anda ata.

⁸ Yesu *Køriste na, a mbøðey ba døga zleezle haa wure keðe, anga daha nga sørmataw.

⁹ Wam vaw maja ndøhay faa sørkadamata ndøhay ta meesørkey mekele mekele masa wal ta meesørkey masa fara fara nga Gazlavay. Ndøhay a ngene, a da zlanğadadamakwar ta meesørkey ata da ray mesøpey kwakwas da ray cek mezømey. Ama kwakwas da ray cek mezømey a na, kwa ta jønta ndøhay masa ma søpmara kwakwas a na, daa ba sølak. Anga maaya amba ndøhay a høtam gødan daa cøved nga Gazlavay ta fa maaya nga Gazlavay, da ray mesøpey kwakwas da ray cek mezømey.

¹⁰ Aløkwa na, ta slam aløkwa meføkey cek * ngada Gazlavay, ama ndøhay ma ka kwakwas nga Gazlavay ata ta cøved nga zømey cek da ray slam aha daa ba.

¹¹ Ata na, a høram gønaw. *Ndaw mahura da ray ndøhay ma ka kwakwas nga Gazlavay na, a mbøzey ta mambaz a aa *Slam masa Gazlavay aa da hwad a nga vøldara a Gazlavay nga mbøkey mebørey nga ndøhay. Aslaw a na, a badamara ta cakay, aa wurmara fetede.

¹² Yesu na, køne may, a da køðmara na, ta', a badamara la daa berney nga *Jeruzelem ta cakay. A sørey banay

13:4 13.4 1Kwr 7.2-4; 1Tes 4.3-8 **13:5 13.5** Mew 31.6, 8; Føl 4.11-12; 1Tm 6.7-10 **13:6 13.6** Ps 118.6 **13:7 13.7** 6.12; 1Kwr 4.16 **13:9 13.9** Rm 14.2;

Kwa 2.20-22; 1Tm 4.3 * **13:10 13.10** slam aløkwa meføkey cek: Fede a wufey ngaa guzley da ray Slam masa Gazlavay aa da hwad a da vad. Ara slam masa Køriste ma mbøzey a hwad a. **13:11 13.11** 9.7; Lev 16.27

anda ηgene na, amba a tərdata ndəhay ηga ndəhay maaya manjar mebørey ta fa mambaz an̄ga.

¹³ Da anda keđe na, ya da səpkwa kwakwas ηga *Jəwif hay saba. Bakwa la ta cakay, nakwa fa Yesu amba a pamandakwar hwaray bama ta an̄ga.

¹⁴ Da bəla keđe na, aləkwa manjatakaya daa berney masa ma da njeɣ ηga sərmataw ba, ama ya səpkwa ta səpey na, berney masa Gazlavay ma da ləma ηgada fa mey.

¹⁵ Anda keđe, kakwa suse a Gazlavay mandaw mandaw ta mezəley ηga Yesu. Mekey suse a ηgene na, ara anda cek mevəley ηgada Gazlavay ma bawa da mey aləkwa ηga həlma.

¹⁶ Maaya na, ka kam cek masa maaya da wuzlah akwar, asaya, ka jənam vaw. Mekey cek anda ηgene na, ara anda mevəley cek masa ma mbafar a Gazlavay.

¹⁷ Maaya na, ka namatar ray a bay-ray akwar hay, ka cənmatar mey. Ara ata ma nəkfamakwar dey daa menjeɣ akwar, maja Gazlavay a daa cəfdəta da ray sləra ata masa ata ma kamara ηgada akwar. Anda keđe, da akwar fa namatar ray na, a kamara sləra ata la ta meesəmey, da daa ba na, har a da rəwtar. Da har ta rəwtar sem na, ηgene, fa da jənkwar daa ba sələk.

¹⁸ Ambahw, dəram dan̄gay a Gazlavay maja ala. Ya sərmara fara fara, mevel ala maaya, ya wuđam ηga key cek ta cəved e mandaw mandaw.

¹⁹ Yaa cəfdəkwar kalah na, ηga dərey dan̄gay a Gazlavay amba a vəlya cəved ηga vəhey fa akwar wure keđe.

Mepəsey-mey

²⁰ Ara Gazlavay ma vəlndakwar zazay. Ara an̄ga ma sləkđadərwa Bay aləkwa mahura Yesu da wuzlah ndəhay maməctakaya. Yesu a na, ta tərey la anda mecəkwer aləkwa mahura ma nəkfandakwar dey, maja an̄ga ma məceɣ maja aləkwa. Ta fa mambaz an̄ga ma mbəđwa na, Gazlavay ta jəwey mey la ta aləkwa ηga sərmataw.

²¹ Anja Gazlavay ηga vəlkwar gədan̄ amba ka kam cek tabiya maaya anda aa ma wuđey. Anja ηga ka sləra an̄ga ta aləkwa ta gədan̄ ηga Yesu *Kəriste, amba ya tərkwə ndəhay maaya fa mey an̄ga. Anja ndəhay ηga həlmamara ηga sərmataw. *Amen.

Mey ηga madagway-dakw

13:12 13.12-13 11.26; Mt 27.31-33 **13:14 13.14** 11.9-10, 13, 16; 12.22, 28; Fəl 3.20; 2Kwr 5.6; 1Pi 2.11; CWJ 21.2 **13:15 13.15** Ef 5.19-20; Ps 50.14, 23
13:16 13.16 Gal 6.10; Fəl 4.18 **13:17 13.17** Ez 3.17; SNM 20.28-31; 1Kwr 16.16
13:18 13.18 10.22; Rm 15.30; 2Kwr 1.12; SNM 24.16 **13:20 13.20** zazay: 12.14; Rm 5.1; 2Kwr 13.11; **mejəwey-mey:** 8.6; **mambaz:** 9.12 **13:21 13.21** Ef 2.10; Fəl 2.12-13

²² Məlma adaw hay, ya fa kakwar ambahw, təbmara mey adaw masa ma da vəkwar gədaŋ daa leeter kefe ta meesəmey. Leeter kefe na, aa zazam daa ba.

²³ Yaw, ya wufey ŋga wuzdakwara, məlma aləkwa Timawte na, ta bawa cay daa fərsəne. Da ta wuswa la fiyaw fefe na, ya da diyam cew e fa akwar.

²⁴ Camatar har a *bay-ray akwar hay ta a ndəhay ŋga Yesu fetefe tabiya may. Məlma aləkwa hay daa *mecəmey-ray ŋga ndəhay ŋga Yesu daa hwayak ŋga Itali a camakwar har may.

²⁵ Anja Gazlavay ŋga pəskwar mey, akwar tabiya ndav.

**Leeter masa
Jak
ma wuzlala
Mey da ray
Leeter masa Jak ma wuzlala**

Ma wuzlala leeter keɗe na, ara Jak, «ndaw ma ka slɛra nga Gazlavay lenj nga Bay Mahura Yesu Kɛriste.» (1.1) Ndɛhay ga a wulkam Jak a ara mɛlmanj nga Yesu (Mt 13.55). Ara ndaw pal dasi bay-ray hay daa Egɛliz da Jeruzelem (Gal 2.9; SNM 15.13-21). Ta vɛlda ray anjga la nga wuzey mey nga Gazlavay ngada Jɛwif hay fetede.

Jak a wuzlala leeter keɗe ngada ndɛhay nga Gazlavay daa sɛkway hay kuraw a ray a cew maakwacatakaya ray da bɛla tabiya. (1.1; SNM 8.1-3; 11.19). Ara maja ngenɛ, ndɛhay ma lɛvam a wuzlala leeter e na, ngada Jɛwif hay gway. Ndɛhay siya a wulkam Jak a wuzlala na, ngada Jɛwif hay daada ba, ama ngada ndɛhay nga Yesu tabiya (2.1). Leeter e na, faa sɛrkadata ndɛhay, asaya, fa vɛltar gɛdanj amba a kam cek anda mey nga Gazlavay ma lɛvey. Jak a wudɛy ndɛhay a wuzdamɛrwa ata ndɛhay nga Yesu na, ta fa slɛra masa ata ma kamara, ba na, ta fa mey masa ata ma tɛbmara daada ba.

Daa leeter keɗe na, mey hay mahura maakar daha:

Da ndaw a lɛvey anjga ndaw nga Yesu na, si a njeɣ anda Yesu (fasɛlawal 1, 2, 4)

Meweley ndaw ta weley na, ara cek maaya ba (2.1-13; 5.1-6)

Ndaw nga Yesu na, si a wey vaw fa mey masa anjga maa guzlda (3.1-12; 4.11-12)

Daa leeter e keɗe na, mey mekele mekele daha nga vɛley gɛdanj a ndɛhay:

Mɛbɛsey banay ta meesɛmey (1.2)

Mewey vaw fa meeguzley saw (3.1-12)

Vɛram ta mɛtɛrey-vaw da wuzlah ndɛhay a sawa na, dama? (4.1-4)

Mey da ray mɛdɛrey-danjay (5.13-15)

Mecey-har

¹ Yah, *Jak, ndaw ma ka slɛra nga *Gazlavay lenj nga Bay Mahura *Yesu *Kɛriste, ya fa cakwar har, akwar

ndəhay ɲga Gazlavay daa səkway hay kuraw a ray a cew maakwacatakaya ray da bəla tabiya.

Mey da ray meesəmey daa banay

² Məlma adaw hay, da banay hay mekele mekele a hətfakwar na, sasəmam ga cəɲga,

³ maja ka səmərə na, Gazlavay a wudey ɲga jadəkwar ta fa banay hay a, da akwar fa təbmara mey aɲga fara fara kwa. Anda kefe, ka da hətam gədan ma fəna ɲga njeɲ daa cəved ɲga Gazlavay.

⁴ Bəsmara banay a haa aa mēndəvey a, amba ka təram ndəhay masa maaya kalah, manjar mebərey, ndəhay ɲga Gazlavay fara fara.

Mey da ray medərey-danɲay

⁵ Da ndaw da wuzlah akwar a sərə cek maaya masa aa ma da ka ba na, ɲgaa cəfda Gazlavay, amba a wuzdara cek aha, maja Gazlavay a fa vəley ləɲgesl maaya mandaw mandaw a kwa waawa maa cəfda. ɲgada ndaw maa cəfdafar ləɲgesl na, a mbədar ray ba.

⁶ Ama si ndaw a, aa cəfda ta mevel pal, si a sərə daa mevel aɲga, fara fara Gazlavay a vəldara cek aha la. Da ndaw a, aa ta mewulkey cew cew na, aɲga anda yam daa bəlay masa memed ma cawasla saw kəne.

⁷ A da wulkey daa ray aɲga amba a hətey cek da har Bay Gazlavay ba,

⁸ maja aa ta mewulkey cew cew daa cek hay tabiya masa aɲga ma ka, a gwa ɲga njeɲ daa cəved pal ba.

Ndaw masa-zleley ta ndaw masa-viya ata letek fa mey ɲga Gazlavay

⁹ Anja məlma aləkwa hay masa-viya hay daa *mēcəmey-ray ɲga ndəhay ɲga Yesu ɲgaa səmam maja Gazlavay a tərdata la ɲga ndəhay mahura hay fa mey aɲga da vad.

¹⁰ Asaya, anja ndaw ɲga Yesu masa-zleley, kwa Gazlavay ta tərda sem ɲga mēcəhe na, ɲgaa səmey cəɲga. A sərə a da məcey * anda meefekwey masa ma da bətey fiyaw fiyaw.

¹¹ Da pas fa tey na, a bəta meefekwey a, a kəzley a hwayak, membey aɲga daa saba, ta nəsey sem. Yaw, ndaw

1:1 1.1 Jak: Mt 13.55; SNM 12.17; 15.13; 21.18; 1Kwr 15.7; Gal 1.19; 2.9; 1Pi 1.1

1:2 1.2-3 Rm 5.3-5; 1Pi 1.6-7 **1:5 1.5** MM 2.6 **1:6 1.6** 5.13; Mt 7.7; 21.21-22;

Ef 4.14 **1:9 1.9 2.5** * **1:10 1.10** A sərə a da məcey: Ndaw masa-zleley a sərə a da məcey, a gwa ɲga la zleley aɲga a har ba. Anda kefe, ndaw masa-zleley ma təba mey ɲga Yesu na, aa səmey maja a sərə a da hətey cek ma fəna zleley aɲga ha. **1:10 1.10 5.1** **1:10 1.10-11** Jəw 14.2; Ps 90.5-6; Iz 40.6-8

masa-zleley may, a da ndøvey dey pal kəne, kwa daa mekey sləra aŋga.

Mey da ray meḃəsey banay

¹² Maaya ŋga Gazlavay aa da ray ndaw masa ma ḃəsa banay tabiya ma hətfar. Fa dəḃa ŋga banay a na, Bay Gazlavay a da pa ŋga ndaw maaya, maja aŋga ta key bay-gula sem. A da vələr heter mendøvey ba masa aa ma løvey a vøldatara la a ndəhay masa ma wudmara heyey.

¹³ Da ndaw a wudəy ŋga key cek maaya ba na, ŋgene ndaw a, a da løvey: «Ara Gazlavay ma handaya amba ya ka cek aha» na, kəne ba. Fara fara, ndaw a gwa ŋga bata Gazlavay ba, asaya, Gazlavay fa hendey ndaw ŋga key cek maaya ba na, daa ba.

¹⁴ Da ndaw a wudəy ŋga key cek maaya ba na, ara mewulkey aŋga maaya ba ma bata, ma zlangadada daa cəved masa maaya.

¹⁵ Fa dəḃa ha, mewulkey aŋga maaya ba ha a handa ndaw a ŋga key meḃərey. Meḃərey a, a da wey da ray ndaw a haa aa zəfda.

¹⁶ Məlma adaw hay mawudtakaya, ka da təḃmara mey masa ndəhay ma ləvmakwar ma fəna mey adaw keḃe ba.

¹⁷ Sərmara, cek hay maaya tabiya masa ma jənmandakwar na, fara fara a sawa da vad fa Gazlavay Papan ma kata cek hay ma wadəm da vad, anda meløvey, pas ta kiya leŋ wurzla hay. Gazlavay na, a mbəḃey ba səlak. Anda pas ma kəzley ma key ləvaŋ na, Gazlavay a mbəḃey kəne ba.

¹⁸ Ta mbafar la a Gazlavay amba a vəlndakwar heter mendøvey ba ta fa mey aŋga masa fara fara. Gazlavay a ka kəne amba aləkwa ndəhay aŋga hay na, ya tərkwə mahura da ray cek hay tabiya masa aa ma katərwa.

Mey da ray meḃəney mey ŋgada Gazlavay

¹⁹ Məlma adaw hay mawudtakaya, maaya na, kwa waawa ŋga wusey vaw ŋga cənda mey masa ndaw maa guzlda, a daa guzley fiyaw fiyaw ba, asaya, a da ceḃ mevel fiyaw fiyaw ba may.

²⁰ Fara fara, da ndaw mevel fa car na, a gwa a key sləra ma mbafar a Gazlavay ba.

²¹ Da ray ŋgene, mbəkdamara cek hay maaya ba ma nəsmakwar. Asaya, mbəkdamara mekey meḃərey. Təḃmara mey masa Gazlavay ma pakwara aa mevel akwar

ta mey maakwad a, maja mey a kede na, a gwa nga ləhdakwar.

²² Ka da wulkam nga jəkey sləmay fa mey nga Gazlavay daada gway na, kəne ba. Maaya na, ka kam cek anda mey a maa guzley. Da daa ba na, a key ngene, ka bəmam ray akwar.

²³ Ahaw, da ndaw a jəkey sləmay fa mey nga Gazlavay gway, ama a ka cek anda mey a maa guzley ba na, ngene, ndaw a, ta tərey sem anda ndaw ma nəka dey anga daa banğəra.

²⁴ A nəka dey anga maaya maaya, fa dəba ha, masa ta la dey sem na, a daw, a sərfada dey anga ha saba.

²⁵ Ama da ndaw a sanğala kwakwas nga Gazlavay ta dək-vaw, asaya, da ndaw aha a jəkey sləmay fa kwakwas a, a sərfada, a səpa na, ngene Gazlavay a kar maaya la maja. Fara fara, Gazlavay a kar maaya la maja kwakwas a, anga maaya kalah, a gwa nga ləhda ndaw daa mebərey.

Mey da ray menjey maaya ma mbafar a Gazlavay

²⁶ Yaw, da ndaw a wulkey daa mevel anga, anga ndaw ma səpa mey nga Gazlavay ta cəved e, ama a wey vaw fa mey masa anga maa guzlda ba na, ngene mesəpey mey nga Gazlavay a ngada anga na, ara cek nga tede, a key a bəmey ray anga.

²⁷ Ama fa Gazlavay Papa aləkwa na, amba ndaw a səpa mey anga fara fara, a mbafar a Gazlavay a na, si ndaw aha a nəkey dey fa matawak hay ta ngwas-vagay hay daa banay ata. Asaya, si ndaw aha a wey vaw fa ray anga maja mebərey da bəla kede a da zləba.

2

Meweley vaw ta weley ara cek maaya daw?

¹ Məlma adaw hay, akwar masa fa təbmara mey nga Yesu *Kəriste Bay aləkwa Mahura, ndaw masa ta gədanj ma fənta cek hay tabiya ngene na, ka da walam vaw ta weley da wuzlah akwar ba.

² Wulkam cey! Ndəhay cew a mbəzam a wuzlah akwar daa mekusey, lanğar ta zana fa vaw maaya ta danğwa da har maaya, lanğar ndaw masa-viya, anga ta zana maaya ba manğərkaya.

³ Ka camar har ngada ndaw ta zana maaya heyey, ka ləvmar: «Ndaw mahura, njeý fa janğga maaya kede», ama

1:21 1.21 Kwa 3.8; 1Pi 2.1 **1:22 1.22** 2.17; Mt 7.24, 26; Rm 2.13 **1:25 1.25** 2.12, 24; Ps 19.8; Jan 13.17; Rm 8.2; Gal 6.2 **1:26 1.26** 3.2, 10; Ps 34.14; 141.3
1:27 1.27 Ps 10.14, 18; Iz 1.17; Mt 25.35-36 **2:1 2.1** 2.1-9; Mew 1.17; 10.17; 16.19; 2Mev 19.7; Jəw 34.19; Ps 82.2; MM 24.23; Mt 5.45; SNM 10.34; Rm 2.11; 10.12; Gal 2.6; Ef 6.9; Kwa 3.25; 1Pi 1.17

ngada ndaw masa-viya heyey na, ka ləvmar: «Lecey ta lecey», da daa ba, ka ləvmar: «Njey fetede a hwayak.»

⁴ Da akwar fa kamara kəne na, a key ngene, ka walam vaw ta weley, ba daw? Anda kedde, meweley vaw ta weley ngene na, a sawa daa mewulkey akwar maaya ba ngene.

⁵ Məlma adaw hay mawudtakaya, jəkam sləmay maaya maaya. Gazlavay ta walata masa-viya hay da bəla kedde sem amba a pamara Yesu nga ndaw ata fara fara, a ləham. Asaya, ta walata sem amba a mbəzam aa slam masa Gazlavay fa wey da vad, slam masa aa ma ləvey a da vəldatara ngada ndəhay ma wudmara heyey.

⁶ Ama akwar na, ka ta rəsmata masa-viya hay sem. Akwar fa sərmara, masa-zleley hay fa sərdamakwar banay kalah da bəla kedde, ba diya? Asaya, ara ata ma fadamakwar ngada fa mey nga ndəhay ma ka sariya, ba diya?

⁷ Yaw, maa sanğəram da ray mezəley maaya nga Yesu Kəriste masa anğa ma vəldakwara na, ara ata, ba diya?

⁸ Mawuzlalakaya daa dərewel nga Gazlavay, a ləvey: «Si ka wuda meseembew akah anda kah ma wuda ray akah.» Da akwar fa namar ray ngada *mewey nga Bay Gazlavay a kedde na, ngene ara cek maaya.

⁹ Ama da ka walam vaw ta weley da wuzlah akwar na, ngene ara mebərey. Anda kedde, mewey a, aa zəfdakwar la maja akwar ma zləbmara.

¹⁰ Kwa ndaw a nar ray a kwakwas nga Gazlavay cəpa, ama da ta mbəkda mewey pal sem daa kwakwas a na, ngene ta key mebərey sem da ray kwakwas a cəpa.

¹¹ Ya ləvey anda kedde na, maja mewey pal ma ləvey: «Ka da ley vaw saw da palah ba», mekele saya a ləvey: «Ka da kəfey ndaw vagay ba». Da ka ta ley vaw saw da palah daa ba, ama da ka ta kəfey ndaw vagay sem na, ngene ka ta zləba kwakwas nga Gazlavay a sem.

¹² Maja ngene, ya fa ləvkwar, wam vaw fa mey masa akwar ma daa guzldamara, asaya, wam vaw fa menjey akwar da bəla, maja akwar na, ndəhay masa Gazlavay ma da katar sariya ta fa mewey anğa, mewey masa ma gwa nga badakurwa daa mebərey.

¹³ Da ndaw ta sərey dey-ceceh fa ndəhay siya daa ba na, Gazlavay fa da kar sariya ta dey-ceceh daa ba may. Ama da ndaw ta sərey dey-ceceh la fa ndəhay na, ngene ndaw a, fa da zlurey fa Gazlavay ta pas sariya na, daa ba.

Mey da ray ndaw ma wuzda metəbey-mey anğa ta fa sləra anğa

¹⁴ Məlma adaw hay, da ndaw a ləvey anğa fa təba mey nğa Gazlavay, ama a ka cek anda Gazlavay ma ləvar nğa ka ba na, ngene metəbey-mey nğa ndaw aha ta tərey sem nğa cek nğa tede, fa da ləhda daa mebərey daa ba səlak.

¹⁵ Yaw, da məlmakw, da daa ba, dam-mamakw daa *mecəmey-ray nğa ndəhay nğa Yesu zana ata daa ba, a hətam cek nğa zəmey mandaw mandaw ba,

¹⁶ ka ləvtar: «Anja ka njam daa zazay, anja ka hətam zana fa vaw, asaya, anja ka hətam cek mezəmey haa ka rəham», ama da ka ta vəltar cek masa nğa jənta daa ba na, mey akah ngene ara mey nğa tede, ba diya?

¹⁷ Anda kede, metəbey mey nğa Gazlavay na, aa kəne may. Da ka təba mey nğa Gazlavay, ama da ka kada sləra ta mey a ba na, metəbey mey nğa Gazlavay ngene ara cek nğa tede nğada kah.

¹⁸ Ama da kwa ndaw a gwa a ləvya: «Ndaw lanğar a təba mey nğa Gazlavay gway, lanğar saya a kar sləra maaya nğada Gazlavay.» Nğada ndaw ma ləvey kəne na, yah, *Jak, ya da mbəfdara, ya ləvar: «Ka gwa nğa wuzdiwa metəbey mey nğa Gazlavay manjar sləra daw? Ama yah na, ya gwa nğa wuzdakawa metəbey-mey adaw ta fa sləra masa yah ma ka.»

¹⁹ Asaya, ka fa təba Gazlavay na, anğa pal, ba diya? Ngene, ara cek maaya. Ama kwa mesəfney hay maaya ba na, fa təbmara mey a kəne may, a zluram ta mey a.

²⁰ Fara fara, da ndaw ta təba mey nğa Gazlavay sem, ama a key sləra ma mbafar a Gazlavay ba na, ngene, metəbey mey a, ta tərey sem nğa cek nğa tede. Kah ndaw marəzlkaya, ka wudəy ya wuzdakawa mey a saya daw?

²¹ Sərfada *Abərahəm, papañ nğa papa aləkwa zleezle taw. Gazlavay a pa nğa ndaw maaya fa mey anğa na, kwariya? A pa nğa ndaw maaya na, ta fa cek maaya masa aa ma ka. Cek aha na, ara aa ma vəlda bəzey anğa *Izak nğa sley dəy a nğada Gazlavay heyey.

²² Anda kede, ka səra Abərahəm ta təba mey nğa Gazlavay la. Metəbey-mey anğa ta cəmam la aa slam a ta sləra masa aa ma ka nğada Gazlavay. Sləra masa Abərahəm ma ka ha fa vəlar gədan nğa təbey mey nğa Gazlavay ma fəna ma fəna.

²³ Cek aha kede a key anda mey mawuzlalakaya daa derewel nğa Gazlavay zleezle, ma ləvey: «Abərahəm a

pa Gazlavay nga ndaw anga fara fara. Ara maja ngene, Gazlavay ma pa nga ndaw maaya.» Da ray ngene, Gazlavay a zəla Abərahāma a «jam adaw.»

²⁴ Anda keḏe, ya sərkwā na, Gazlavay a gwa nga pa kwa waawa nga ndaw maaya fa mey anga maja ndaw a ma təba mey anga daada ba, ama maja sləra maaya masa aa ma ka may.

²⁵ Asaya, wulkam da ray ngwas-barlaw *Rahap. Ta təbta ndəhay meslərey hay nga *Israyel hay la a way anga, ta jənta la nga badatərwa da slala Jerikwaw taa cəved mekele. Anda keḏe, Rahap a, Gazlavay ta pa sem nga ndaw maaya fa mey anga maja sləra maaya masa aa ma ka ngene.

²⁶ Fara fara, da ndaw fa səfney daa saba na, ngene ta məcey sem. Metəbey-mey nga Gazlavay na, aa kəne may. Da ndaw a ləvey aa fa təba mey nga Gazlavay, ama a kada sləra ba na, metəbey mey anga ha ngene ara cek nga tede.

3

Mey da ray mewey vaw fa meeguzley saw

¹ Məlma adaw hay, ka da tərām cəpa nga ndəhay maa sərkadām mey nga Gazlavay a ndəhay ba, maja ala ndəhay maa sərkadām ndəhay na, ta pas sariya, Gazlavay a daa cəḏandar ma fəna ndəhay siya hay.

² Aləkwa cəpa fa kakwa mebərey mekele mekele mandaw mandaw. Ama da ndaw fa key mebərey daa meeguzley anga daa ba na, ngene ara ndaw maaya fara fara ma gwa nga wa vaw anga cəpa.

³ Nəka, pəles na, anga mahura, ama aləkwa fa ndəkwa kwa lagambal, cek mecəhe, a mey amba a cənndakwar mey. Anda keḏe, ya gwakwa ya handakwa aa slam masa anda aləkwa ma wuḏkwa. ⁴ Asaya, wulkam da ray kwambiwal mahura masa memed ma handa ta gədaŋ. Ara cek mahura, ama ndaw ma hwada kwambiwal a na, a hwada ta hwadam mecəhe, a gwa a handa aa slam masa aa ma wuḏey.

⁵ Yaw, neneh may, aa kəne. Ara cek mecəhe da wuzlah mezəvey nga vaw hay tabiya, ama ta neneh na, ndaw a gwa aa guzley mey maadakw a ma nəsa ndaw.

Nəkmara, zay-awaw ndez kəḏey na, a gwa a gəḏey, aa kəra sidam da ley * tabiya.

2:23 2.23 MC 15.6; 2Mev 20.7; Rm 4.3 **2:25 2.25** Jes 6.17; Mt 1.5; Heb 11.31

2:26 2.26 2.17, 20 **3:2 3.2** 1.26 **3:2 3.2-10** Ps 141.3; MM 10.19 **3:3 3.3**

Ps 32.9 * **3:5 3.5** sidam da ley: slam da ley masa wuḏez kəḏ-keḏ!

⁶ Neneh na, an̄ga anda awaw maa wura slam. Ara mezəvey pal da wuzlah mezəvey n̄ga vaw aləkwa hay, ama a gwa a n̄sa vaw tabiya maja mey hay malamba da bəla tabiya na, ara an̄ga ma badatərwa. A n̄sa ndaw dəga mayawa an̄ga haa meməcey an̄ga. Neneh na, aa wura ndaw kəlmedek! ta awaw magaza.

⁷ Ndaw a gwa a wey da ray cek hay tabiya: cek hay da ley ta dīyan̄ hay ta cek hay ma diyam ta hwad̄ ta hwad̄, leŋ ewet hay daa yam cəpa. Ahaw, a wey da ray ata tabiya.

⁸ Ama n̄ga neneh na, ndaw a gwa a wa ba səlak. Ara cek malamba, a wusey kalah, an̄ga marəhkaya ta mewer, a gwa a kəfey ndaw.

⁹ Ta neneh aləkwa na, aləkwa fa həlmakwa Bay Gazlavay, Papa aləkwa. Yaw, aləkwa fa sərkwā Gazlavay a ləm̄ta ndəhay na, kərad̄! anda an̄ga. Ama ta n̄gene he cəpa, aləkwa fa cədkwa ndəhay ta neneh e cəŋga.

¹⁰ Mepəsey-mey leŋ mey menəsey ndaw na, a gwa n̄ga bawa da mey ndaw pal. Məlma adaw hay, ya da kakwa kəne ba.

¹¹ Daa wurak n̄ga yam pal na, yam mawuryayak a ta yam mecərey a gwamara a gəcwa daa slam a daw?

¹² Məlma adaw hay, gudav a gwa a yey səked̄ daw? Asaya, wudez mekele may a gwa a yey gudav daw? Wurak n̄ga yam mawuryayak a na, a gwa n̄ga gəcwa yam maaya daw?

Mey da ray leŋgesl masa Gazlavay ma vəlda a ndəhay an̄ga hay

¹³ Da ndaw ta leŋgesl ma səra cek da wuzlah akwar daha na, si a wuzda menjey an̄ga maaya ta fa sləra masa aa ma ka ta mey maakwad̄ a, leŋ ta leŋgesl masa Gazlavay ma vəldara.

¹⁴ Ama da akwar fa kam sələn̄ kalah, asaya, da akwar fa wudkam d̄fay, n̄gene, kwa ka da zlapam maja leŋgesl akwar a ba. Da daa ba na, mezlepey akwar ta sələn̄ akwar n̄gene na, fa tərda mey masa fara fara n̄ga mey membərzley.

¹⁵ Leŋgesl akwar n̄gene na, a sawa ta fa Gazlavay da vad̄ ba, ara leŋgesl n̄ga bəla ked̄e, ara leŋgesl n̄ga ndəhay magədan̄ gway, a sawa ta fa *Satan̄, bay-malula.

¹⁶ Nəka, da ndəhay fa kam sələn̄, fa wudkam d̄fay na, n̄gene ndəhay a, a kam cek ta cəved̄ e saba, cek hay maaya ba hay cəpa fa ata daha.

¹⁷ Ama lenjesl ma sawa ta fa Gazlavay da vad na, meborey da hwaɗ a daa ba, fa handawa zazay lenj meeguzley ta mey maakwaɗ a, a wuzlah ndəhay, a sərey dey-ceceh fa ndəhay, a cəmtar ɗay a ndəhay, a key sləra maaya mandaw mandaw, a weley ndaw ta weley ba, asaya, a betey ndaw ba.

¹⁸ Ndəhay ma cəmamatar ɗay a ndəhay na, fa handamawa zazay a wuzlah ndəhay. Mawurbay ŋga sləra ata na, ara menjey maaya fa mey ŋga Gazlavay.

4

Ka da kam jam ta bəla ba

¹ Mecekeley-mey ta mekəɗfey-vaw da wuzlah akwar a sawa na, dama? A sawa na, daa mevel akwar ma kəɗfey vaw ŋga key cek hay maaya ba.

² Akwar fa wuɗam ŋga hətey cek hay mekele mekele, ama ka hətam ba. Ara maja ŋgene akwar fa kəɗam ndəhay vagay. Asaya, akwar fa kam səlenj, akwar fa səpam cek, ama ka hətam ba. Da ray ŋgene, akwar fa təram vaw, akwar fa kəɗam vaw da wuzlah akwar. Ka hətam cek masa akwar ma wuɗam ba na, maja akwar faa cəɗfamara cek aha fa Bay Gazlavay daa ba.

³ Da akwar faa cəɗfam cek fa Gazlavay, ka hətam ba na, ara maja akwar ta mewulkey maaya ba. Anda meləvey, kaa cəɗfam na, cek masa ma mbafakwar daada gway.

⁴ Akwar ndəhay ma mbəkdamara Gazlavay sem, anda ŋgwas ma mbəkda zel e ma ley vaw saw! Akwar ma təbmara mewulkey ŋga bəla keɗe, a key ka rəsmara Gazlavay na, ka sərmara ba daw? Fara fara, kwa waawa ma təɓa mewulkey ŋga bəla keɗe na, a tərey masa-gəra ŋga Gazlavay la.

⁵ Mey ŋga Gazlavay a ləvey: «Gazlavay a wuɗey cek mekele a key sləra daa mevel aləkwa ba, si Mesəfney aŋga masa aa ma pa a ray aləkwa gway.» Ka wulkam na, mey a keɗe aa guzley ŋga tede daw?

⁶ Ama fa kandakwar maaya ma fəna ma fəna cəŋga. Ara anda mawuzlalakaya daa ɗerewel ŋga Gazlavay, ma ləvey: «Ndəhay masa ma zlapam na, Gazlavay a mbəɗtar dəɓa la. Ama ndəhay meekweɗ-mey na, Gazlavay a katar maaya la.»

⁷ Da ray ngene, namar ray a Gazlavay, jaram maaya maaya amba *Satan a batakwar ba, ngene Satan a, a hway la dorej ta akwar.

⁸ Ngöcham fa Gazlavay *, anga may, a ngöchawa la fa akwar. Akwar masa ta meborey ngene, toram ndohay maaya manjar meborey. Akwar ndohay masa ta mewulkey cew cew ngene, pərmara mevel akwar.

⁹ Sərmara akwar na, ndohay maaya ba. Wudam, təwam maja meborey akwar. Anja meesengorey akwar nga terey nga matəway. Ka daa səmam saba, ama ndərbam dey.

¹⁰ Pamara ray akwar nga mecəhe fa mey nga Gazlavay, anda keđe, Gazlavay a gəldakwar la.

Ka da slam mey a ray ndohay ba

¹¹ Məлма adaw hay, ka da slam mey a ray ndohay anda akwar ndohay ma ka sariya ba. Ndaw ma sley mey a ray məlmaha, asaya, a mbədar ray na, ngene anga letək ta ndaw maa guzley mey maaya ba da ray *mewey nga Gazlavay, a pa mewey a nga vagas. Da ka ka anda ngene na, ka fa nar ray a mewey a daa saba, ama ka ta terey sem nga ndaw ma rəsa mewey a.

¹² Ara Gazlavay taava anga ma vəldandakwara mewey a, asaya, ara anga pal ma gwa nga katar sariya a ndohay. Anda keđe, ara anga pal ma gwa nga ləhda ndaw daa sariya ha, ara anga pal ma gwa ngaa zəfda may. Kah na, wa, amba ka sley mey a ray məlmakw anda ndohay ma ka sariya na!

Mekətey da ray mezlepey

¹³ Jəkfamaya sləmay, akwar ndohay ma ləvam: «Tasana, da daa ba, mandaw na, ya diyam la a slala daha, ya kamawa mevey pal, fetede ya mbədmawa har, ya hətam dala ga.»

¹⁴ Akwar maa guzlam anda keđe na, ka sərmara cek ma da key mandaw ba, maja ka sərmara menjey akwar da bəla keđe ba. Menjey akwar a ara anda kakas mecəhe ma wuzwa vaw nekəfey, fa dəba ha, aa zəfey caca'!, kwa a hətey saba.

¹⁵ Maaya na, ka ləvam: «Da Bay Gazlavay ta təba la, ala daha ta dey na, ya da kam cek kəfey ta kəfey.»

¹⁶ Ama wure keđe akwar fa zlapam daa meeguzley akwar kalah. Mezlepey anda ngene na, maaya ba.

4:7 4.7 Ef 6.12; 1Pi 5.8-9 * **4:8 4.8** ngöcham fa Gazlavay: A wufey nga ləvey mesəpey mewey anga ta medərey-dangay ngada anga. **4:8 4.8** Ps 18.21, 25; Iz 1.16; Zak 1.2-3; Mal 3.6-7 **4:9 4.9** Lk 6.25 **4:10 4.10** 4.6; 1Pi 5.6 **4:11 4.11** Ps 101.5; 1Pi 2.1 **4:12 4.12** Rm 14.4; 1Kwr 4.5 **4:13 4.13-14** MM 27.1; Lk 12.18-20 **4:14 4.14** Jəw 7.9-10; Ps 39.6 **4:15 4.15** SNM 18.21; Rm 1.10; 1Kwr 4.19; 16.7 **4:16 4.16** 1Tm 6.17; 1Jn 2.16

¹⁷ Yaw, kwa waawa ma sɛra mekey maaya a ndaw, ama da ta ka daa ba na, ɳgene ta key meɔrey sem.

5

Mey da ray masa-zleley hay

¹ Jɔkfamaya slɛmay wure keɔe, akwar ndɔhay masa-zleley hay. Tɔwam, wudam, maja banay mahura a sawa la a ray akwar.

² Zleley akwar hay a, ta zam sem. Maaca ta zɔmta zana akwar hay sem.

³ Dala akwar ta key maadar sem. Maadar a ɳgene na, a wuzɔrwa meɔrey akwar la ta pas mekey sariya. Kwa aslaw ɳga vaw akwar na, aa zɔɔey la cɔpa daa sariya ha, maja maadar a ɳgene. Fara fara, kaa zɔɔam la anda cek maa wurey kɔlmedek! Menjey nekɔɔey, ɔɔla a ndɔvey la, ama akwar na, ka wulkam si ɳga ɔɔey zleley ga da ɔɔla keɔe gway.

⁴ Nɔka, mawurɔay ɳga ndɔhay ma ka slɛra da ley akwar hay na, akwar ta pɔlmata daa ba. Cɔndamara matɔway ɳga ndɔhay a. Matɔway a, ta wusey sem kasl fa Bay Gazlavay Mawaca-waca.

⁵ Akwar fa kam wiya da ɔɔla keɔe, akwar fa kam cek anda akwar ma wudam. Akwar faa ɔɔdamara vaw akwar anda gɔnaw hay ɳga hɔrey.

⁶ Akwar fa kamatar sariya ɳgada ndɔhay manjar meɔrey, ka kɔɔmata vagay, kwa ta kam hɔma a ray akwar daa ba.

Mey da ray mesɔkwey Yesu ta dɔk-vaw

⁷ Da ray ɳgene, mɔlma aɔaw hay, sɔkwakwa ta dɔk-vaw pas ɳga Bay Mahura Yesu ma da vɔhwa. Nɔkmara, ndaw mehɔvey cey! A sɔkwa mey-var, amba a slɔkey. Fa dɔɔa ha, a sɔkwa daw aɳga ha ta dɔk-vaw amba a nɔhey maaya maaya haa kasl fa var ɳga madagway-dakw.

⁸ Akwar may, si ka sɔkwamara Bay alɔkwa Yesu ta dɔk-vaw. Ka da gɔram ba, maja pas masa aɳga ma da vɔhwa na, gweegwe cay.

⁹ Mɔlma aɔaw hay, ka daa ɳguram mey da ray ndɔhay ba, daa ba na, Gazlavay a da kakwar sariya. Kwa wure keɔe, aa fa mey-slam ɳga way mekey sariya, fa da mbɔzey aa way a ɳga key sariya.

4:17 4.17 Lk 12.47 5:1 5.1 1.10; Lk 6.24 5:1 5.1-6 MM 15.6; Iz 5.8-10; Am 6.3-7 5:2 5.2-3 Mt 6.19-20 5:4 5.4 Mab 3.7; Lev 19.13; Jer 22.13; Mal 3.5 5:5 5.5 Jer 12.3; 25.34 5:7 5.7 Jwl 2.23; 2Pi 3.3 5:8 5.8 Rm 13.11-12; 1Tes 5.5-8; Heb 10.25, 37 5:9 5.9 Mt 7.1-2

¹⁰ Məlma adaw hay, sərfadamara ndəhay ma təla mey hay maa guzlam anda Bay Gazlavay ma ləvtar. Banay ma hətfatar la, ta bəsmara banay a la. Anda kedə, bəskwa banay anda ata ma bəsmara ɲgene may.

¹¹ Aləkwa fa ləvkwa, anja maaya ɲga Gazlavay ɲga njeɣ a ray ndəhay ma bəsmara banay ma hətfatar. Sərfadamara mey da ray Jəwab ma bəsa banay zleezle. Yaw, sərmara daa mēndəvey ɲga banay a na, Gazlavay ta kar maaya la, maja Bay Gazlavay a na, ara ndaw ma sərey dey-ceceh fa ndəhay, asaya, fa katar maaya.

¹² Məlma adaw hay, cek mahura na, ka da mbaɗam ba səlak, kwa ta slam da vad, kwa ta slam da hwayak, kwa ta meeme, maja Gazlavay a da kakwar sariya. Da ahaw na, ləvam «ahaw», da kəne ba na, ləvam «kəne ba». ɲgene, a wusa gway.

Mey da ray medərey-danɣay

¹³ Ndaw masa fa sərey banay da wuzlah akwar daha daw? ɲga dərey danɣay a Gazlavay. Ndaw masa ta meesəmey da wuzlah akwar daha daw? ɲga həlma Gazlavay ta walay.

¹⁴ Ndaw masa-macay da wuzlah akwar daha daw? ɲga zəlwa *bay-ray hay daa Egəliz amba a dərām danɣay a Gazlavay maja anɣa, a takwadamar mal ta mezəley ɲga Bay Mahura.

¹⁵ Daa medərey-danɣay ata ha na, da ta təbmara la aa mevel ata Gazlavay a mbəlda ndaw a la na, ɲgene, a mbəlda la. Bay Gazlavay a sləkɗadərwa la daa macay anɣa ha. Asaya, da ndaw a, ta key mebərey la na, Gazlavay a mbəkɗara la.

¹⁶ Da ray ɲgene, wuzdamata mebərey akwar hay da wuzlah akwar, dərmar danɣay pal pal da wuzlah akwar a Gazlavay amba ka mbəlam daa macay. Medərey-danɣay ɲga ndaw masa maaya fa mey ɲga Gazlavay na, aa ta gədanɣa.

¹⁷ Nəka, *Eli na, anɣa ndaw-magədanɣ andə aləkwa. Ta dərār danɣay la a Gazlavay ta mevel pal amba var a pawa ba. Da ray ɲgene, mevey maakar ta kiya maakwaw var ta pawa daa ba səlak.

¹⁸ Fa dəba ha, a dərār danɣay a Gazlavay saya amba var a pawa. Maja ɲgene, var ta', a pawa dəba, cek hay da ley ta kam la.

5:10 5.10 Mt 5.12; Heb 11.32-38 **5:11 5.11** 1.12; Mab 34.6; Jəw 1.21-22; 2.10; 42.10-17 **5:12 5.12** Mt 5.34-37 **5:13 5.13** 1.5-6; SNM 16.25 **5:14 5.14** Mk 6.13 **5:15 5.15** Mt 9.2; Mk 16.18 **5:16 5.16** Ps 32.3-5; 38.4-6; MM 28.13; 1Jɲ 1.8-9 **5:17 5.17** 1Bay 17.1 **5:18 5.18** 1Bay 18.42-45

Mey da ray ndaw ma vəhdərwa ndaw ta mebərey aa cəved ŋga Gazlavay

¹⁹ Məlma adaw hay, da ndaw da wuzlah akwar ta zlenğedey sem daa cəved masa fara fara na, maaya na, ndaw mekele a vəhdərwa aa cəved ehe.

²⁰ Sərmara, kwa waawa ma vəhdərwa ndaw ta mebərey aa cəved masa fara fara na, ŋgene, a key a ləhda heter ŋga ndaw a. Kwa ndaw a, aa ta mebərey ga na, Gazlavay a mbəkdara la.

**Leeter masa
Piyer
ma wuzlala ngeeme
Mey da ray
Leeter masa Piyer ma wuzlala
ngeeme**

Leeter keɗe ara Simanɗw Piyer, ndaw-meslɔrey nga Yesu Kɔriste, ma wuzlala. Mezɔley Piyer a na, ara Yesu ma para (Luk 6.14). Jak, Jan leɗ Piyer e na, ata jam maa-sɔba-dey ngaa gwar. Daa mezley nga mecɔmey-ray nga ndɔhay nga Yesu na, Piyer e ta key bay-ray la nga ndɔhay nga Yesu (SNM 2.14; 15.7).

Piyer a lɔvey anɗa da Babilanɗw (5.13). Ndɔhay ga a wulkam anɗa da Rawm, ama a wa berney a ta Babilanɗw, berney masa Jɔwif hay zleezle ma njam da hwaɗ a anda mɔlak hay da wuzlah ndɔhay ma sɔra Gazlavay ba. A wuzlatara leeter e ngada ndɔhay nga Yesu maakwacatakaya ray daa hwayak hay mekele mekele (1.1). Ata na, ndɔhay fa rɔsmata, fa sɔrdamata banay maja ata ndɔhay nga Yesu. Piyer a wudey nga vɔltar gɔɗan amba a bɔsmara banay a, a diyam fa mey fa mey daa cɔved nga Yesu (5.12). A vɔltar gɔɗan, a lɔvtar nga pamara mewulkey ata a ray maaya nga Gazlavay masa ata ma da hɔtmar ta pas masa Yesu ma da vɔhwa. Asaya, a lɔvtar nga kam cek maaya anda Gazlavay ma wudey, maja ata na, ara sɔkway masa Gazlavay ma wala (2.9).

Daa leeter e na, Piyer aa guzltar ngada ndɔhay nga Yesu masa zleezle ma sɔpam kwakwas hay mekele mekele. Anda melɔvey, aa guzley ngada Jɔwif hay ta ngada ndɔhay masa Jɔwif hay ba hay ma sɔpam kwakwas nga Mawiz leɗ ngada ndɔhay ma tam kuley hay. Ata na, ta hɔtam heter mawiya cay, anda keɗe, menjey ata, anɗa anda nga papan nga papa ata hay zleezle saba. Asaya, menjey ata, anɗa anda nga ndɔhay da cakay ata ba may (1.13-2.4). Ata fa bɔsmara banay maja Yesu.

Daa leeter e keɗe na, mey mekele mekele daha nga vɔley gɔɗan a ndɔhay:

Mey da ray meɔsey banay (1.7; 3.13-17)

Mey da ray Yesu Kɔriste, anɗa anda anɗwa maaya melɔmey way (2.4; 2.6)

Mey da ray alɔkwa, ndɔhay nga Gazlavay (2.9-10)

Mey da ray banay masa Kəriste ma bəsa maja aləkwa (1.3; 2.21; 2.23; 3.18–4.46)

Mecey-har

¹ Ara yah *Piyer ma wuzlalakwara leeter keđe, yah *ndaw-meslərey nga *Yesu *Kəriste.

Ya wuzlalakwara ngada akwar ndəhay masa *Gazlavay ma walakwar sem, akwar ndəhay masa mələk hay maakwacatakaya ray daa hwayak nga Panj, daa hwayak nga Galati, daa hwayak nga Kapadəwas, daa hwayak nga Azi, lej daa hwayak nga Bitini.

² Dəga zleezle na, Gazlavay Papanj ta walakwar cay nga tərey ndəhay anğa hay anda aa ma wufey. A pakwar wal ta fa Mesəfney anğa amba ka namar ray a Yesu Kəriste, asaya, amba ka təram nga ndəhay anğa hay maaya manjar mebərey ta fa mambaz anğa.

Anja maaya nga Gazlavay ta zazay anğa nga njeý ta akwar ma fəna ma fəna.

Mey da ray meləhey

³ Həlmakwa Gazlavay, Papanj nga Bay aləkwa Mahura Yesu *Kəriste. Ta sərfandakwar dey-ceceh la ga, ta yandakurwa la nga dey cew ta fa aa ma sləkďadərwa Yesu Kəriste daa meməcey. Ara maja nğene, aləkwa fa sərkwa daa mevel aləkwa, ya sləkďakurwa la daa meməcey may.

⁴ Anda keđe, akwar fa səkwmarə cek hay maaya masa Gazlavay ma bədata ngada ndəhay anğa hay. A bədatara cek hay a na, da gazlavay da vad. Fetede na, cek hay a, a zam ba, a nəsam ba, a mbəďam ba.

⁵ Gazlavay na, ndaw masa ta gəďanj. A jəďkwar la amba a ləhdakwar maja akwar fa pamara nga ndaw akwar fara fara. Meləhey a nğene, Gazlavay a da wuzďərwa fara fara na, ta pas masa bəla ma da ndəvey.

⁶ Ara maja nğene, kwa wure keđe, masa akwar daa banay wura wura ma da njeý nekəďey keđe na, sasəmam cəngə.

⁷ Banay a nğene na, fa wuzďərwa akwar fa pamara Gazlavay nga ndaw akwar fara fara daw, daa ba daw? Nəka bərey magaza cey, kwa ara cek maaya na, a nəsey la. Ama nga sərey anğa maaya na, si a pamara aa awaw. Anğa letek kəne ta akwar ma pamara Gazlavay nga ndaw akwar fara fara. Mepey Gazlavay nga ndaw fara fara na, a fəna bərey magaza ta maaya, ba daw? Ta nğene he cəpa, fa jadamakwar nga sərey, da akwar fa pamara Gazlavay nga

ndaw akwar fara fara kwa. Anda keɗe, ta pas masa Yesu Kəriste ma da wuzwa vaw na, Gazlavay a həslkwar ray la, a həlmakwar la, aa həmdakwar la maja akwar ma pamara nga ndaw akwar fara fara ha.

⁸ Akwar ma hətmar Yesu ta dey akwar daa ba, ama akwar fa wudmara cəŋga. Akwar fa hətmar wure keɗe daa ba, ama akwar fa pamara nga ndaw akwar fara fara cəŋga. Ara maja ŋgene, akwar ta meesəmey, meesəmey a ga ara mey ba, kwa ndaw a gwa nga ləvey ba.

⁹ Akwar ta meesəmey ga na, maja Gazlavay ta ləhdakwar sem. Meləhey a na, ara mawurbay masa akwar ma hətam maja akwar ma pamara Yesu nga ndaw akwar fara fara.

¹⁰ Zleezle ndəhay ma təla mey nga Gazlavay ta səpam cəved la mekele mekele amba a səmra Gazlavay a da ləhdata ndəhay daa mebərey anda aa ma ləhdakwar na, kwara. Ndəhay a taa guzlam la da ray maaya nga Gazlavay masa aa ma da vəldandakwara.

¹¹ Ndəhay a na, Mesəfney nga Kəriste aa da ray ata. Mesəfney a ta wuzdatara banay masa Kəriste ma da bəsa la. Asaya, ta wuzdatara gədaŋ masa Kəriste ma da hətar la fa dəba nga banay a. Ndəhay ma təla mey nga Gazlavay a ta səpam cəved la nga sərey cek hay a, a da kam na, ta vara, asaya, a da kam na, kwara.

¹² Gazlavay ta wuzdatara la, a ləvey, mey masa ata ma wuzdamara da ray cek hay a na, ara ŋgada ata ba, ama ŋgada akwar. Wure keɗe, ndəhay ma wuzda *Mey-maaya-mawiya fa wuzdamakwara mey da ray cek hay a. A wuzdamakwara mey a na, ta gədaŋ nga *Mesəfney nga Gazlavay ma sawa da gazlavay da vad. Kwa maslaŋ hay nga Gazlavay da vad may, a wudam nga sərmata cek hay a.

Mey da ray menjey maaya ma mbafar a Gazlavay

¹³ Maja ŋgene *, diyam vaw maaya maaya nga key sləra ŋgada Gazlavay. Wam vaw, pamara mewulkey akwar a ray maaya nga Gazlavay masa akwar ma da hətam ta pas masa Yesu Kəriste ma da wuzwa vaw.

¹⁴ Namar ray mandaw mandaw a Papakw akwar Bay Gazlavay da vad. Zleezle daa masa ka səmra Yesu *Kəriste ba araŋ na, akwar fa kam cek hay maaya ba saw masa ma mbafakwar gway. Ama wure keɗe na, ka da kamata cek hay a saba.

1:7 1.7 Jəw 23.10; Ps 66.10; Iz 48.10; 1Kwr 3.13 **1:8 1.8** Jan 20.29; 2Kwr 5.7
1:9 1.9 Rm 5.2; 6.22; Ef 1.14 **1:10 1.10-11** Lk 24.46; 1Kwr 15.3-4; 2Pi 1.19-21
1:12 1.12 Ef 3.9-10 * **1:13 1.13** maja ŋgene: «Maja ŋgene» a wufey nga ləvey «maja meləhey ta maaya nga Gazlavay» Nəka 1.10. **1:14 1.14** Rm 12.2; Ef 2.3; 4.17-18

¹⁵ Gazlavay ta zəlkwar la nga tōrey ndəhay anğa hay. Anğa na, ndaw maaya manjar mebərey. Akwar may, daa menjey akwar cəpa na, təram ndəhay maaya manjar mebərey anda anğa.

¹⁶ Ya ləvkwar anda keđe na, maja mawuzlalakaya daa đerewel nga Gazlavay, Gazlavay a ləvey: «Njam manjar mebərey, maja yah na, yah ndaw manjar mebərey.»

¹⁷ Daa masa akwar fa đəram danğay na, ka zəlmara Gazlavay «Papaŋ». Maja nğene, daa menjey akwar mambəkakaya da bəla keđe na, namar ray a Gazlavay maaya maaya. Anğa na, ndaw ma ka sariya nğada ndaw a, ndaw a, ta cəved e təde fa sləra masa anğa ma ka, kwa a weley ndaw ta weley ba.

¹⁸ Akwar fa sərmara, Gazlavay ta mbəđkurwa sem amba ka ləham daa menjey nga papakw akwar hay zleezle. Menjey akwar anda nga papakw akwar hay zleezle nğene na, ara cek nga tede, fa da jənkwar nga ləhey daa ba. Gazlavay ta mbəđkurwa ta cek anda dala masa ma da ndəvey na, daa ba.

¹⁹ Ama, a mbəđkurwa na, ta mambaz nga Kəriste ta ray anğa, ndaw masa ta gədan. Kəriste he na, anğa ta mebərey daa ba, anğa anda bəz-təbaŋ maaya masa wurwer nga hōrey nga voley nğada Gazlavay.

²⁰ Gazlavay ta wala la nga məcey dəga bəla ta ləmey daa ba aran. Wure keđe daa masa bəla fa da ndəvey keđe na, ta wuzdərwa la amba a ləhdakwar.

²¹ Ka pamara Gazlavay nga ndaw akwar fara fara na, ta fa Yesu Kəriste. Ara Gazlavay a ma sləkđadərwa daa meməcey, asaya, ara anğa ma həslar ray. Anda keđe, akwar fa pamara Gazlavay nga ndaw akwar fara fara, asaya akwar fa sərmara ara anğa pal ma da jənkwar.

²² Akwar ta təram sem nga ndəhay manjar mebərey fa mey nga Gazlavay maja akwar ma namar ray a mey masa fara fara, amba ka wudmata məlmakw akwar hay maaya maaya ta mevel pal. Anda keđe, wudam vaw maaya maaya ta mevel akwar cəpa.

²³ Ka sərmara, akwar na, ta hətam heter mawiya la ta fa mey nga Gazlavay. Mey a na, a da njeý nga sərmataw, a vəltar heter mawiya a ndəhay. Ka hətam heter e na, ta fa ndaw masa ma da məcey ba, ama ta fa Gazlavay, ndaw masa anğa daha ta dey nga sərmataw.

1:15 1.15-16 Lev 19.2 **1:17 1.17** Iz 63.16; Jer 3.19; Mt 6.9; 16.27; Rm 2.6; Jak 2.1; 1Pi 4.5 **1:18 1.18** Mt 20.28; 1Kwr 7.23; 6.20 **1:19 1.19** 1.1-2; Janj 1.29; SNM 20.28; 1Kwr 5.7; Ef 1.7; Heb 9.12 **1:20 1.20** Ef 1.4 **1:21 1.21** ma həslar ray: 5.1; Rm 5.2 **1:22 1.22** 2.17; 3.8; 4.8; Rm 12.9; Gal 6.10; 2Pi 1.7; 1Jn 4.11
1:23 1.23 Janj 1.13; Heb 4.12; Jak 1.18

24 Anda mawuzlalakaya daa d̄erewel nga Gazlavay ma l̄ovey:

«Nd̄ohay maḡodaŋ na, ata anda kwakwas ma p̄ocwa da ley. Membey ata, aŋga anda meefekwey da ley.

Kwakwas na, a kweley la, meefekwey may, a k̄ozley la,

25 ama mey nga Bay Gazlavay na, a da n̄jey nga s̄ermataw.»

Mey a na, ara Mey-maaya-mawiya masa ata ma wuzdamakwara heyey.

2

1 Anda kefe, mb̄ekdamara mekey cek maaya ba tabiya, ka da f̄ecam ndaw ba s̄olak, ka da t̄eram nd̄ohay masa ta neneh cew ba, ka da t̄eram nd̄ohay masa s̄oleŋ hay ba, ka daa guzlam mey maaya ba da ray nd̄ohay ba s̄olak.

2 Anda b̄eza hay da mey d̄owa ma wudam nga sey d̄owa amba a ḡolam na, akwar may, t̄ōm̄ara mey nga Gazlavay masa fara fara amba ka ḡolam ta mey a, ka l̄oham.

3 Si ka kamara k̄one maja «akwar ta s̄ermara cay fara fara Bay Mahura na, aa maaya.»

Mey da ray nd̄ohay masa Gazlavay ma walata

4 N̄ḡocham nḡada fa Bay Mahura. Ara aŋga ma v̄eltar heter a nd̄ohay. Aŋga na, anda aŋgwa mahura mel̄omey way masa nd̄ohay ma k̄ozlamara ta cakay. Ama Gazlavay ta wala sem. A n̄oka na, aŋga maaya kalah.

5 Akwar na, t̄eram anda Bay Mahura, ndaw masa ta dey, amba akwar nd̄ohay masa ta dey anda aŋga na, Gazlavay a lakwar, a l̄emdakwar way nḡada Mes̄ofney aŋga. Fa d̄ōba ha, ka t̄eram nga nd̄ohay aŋga hay ma ka kwakwas, ka v̄eldamara ray akwar nḡada aŋga ta mevel pal anda *Mes̄ofney nga Gazlavay ma wufey. Kwakwas a, a mbafar la a Gazlavay maja Yesu *K̄eriste.

6 Maja mawuzlalakaya daa d̄erewel nga Gazlavay, a l̄ovey: «Ehe, ya ta weley aŋgwa masa maaya la,

ya ta pa la aa berney nga Siyaŋw *,

ara aŋgwa mahura masa bay-ray.

Kwa waawa ma zlembey ta aŋgwa ha na,

a z̄oley marava daa ba s̄olak.»

7 Nḡada akwar nd̄ohay masa ma pamara Yesu nga ndaw ata fara fara na, aŋgwa ha aa maaya a f̄onta cek hay tabiya. Ama nḡada nd̄ohay ma pamara Yesu nga ndaw ata fara

1:24 1.24-25 Iz 40.6-8; Jak 1.10-11 2:1 2.1 Ef 4.25; Jak 1.21; 4.11 2:2 2.2
1Kwr 3.2 2:3 2.3 Ps 34.9 2:4 2.4 Ps 118.22; Iz 28.16 2:5 2.5 2.9; Rm 12.1;

Ef 2.21-22 * 2:6 2.6 Siyaŋw: Ara mez̄oley mekele nga berney nga Jeruzelem.

Ama fefe, a wufey nga l̄ovey nd̄ohay daa mec̄omey-ray nga nd̄ohay nga Yesu.

2:6 2.6 Iz 28.16; Rm 9.33

fara ba na, aa kəne ba. Mawuzlalakaya daa dɛrewel nga Gazlavay, a ləvey:

«Aɲgwa meləmey way masa ndəhay ma ləma way ma kəzlamara ta cakay na,

ara aɲgwa maaya meləmey way ma fənta siya hay jak.»

⁸ Mawuzlalakaya daa slam mekele saya, a ləvey:

«Aɲgwa ha na, ara aɲgwa mekey mecembədey a ndəhay, ara aɲgwa ma təɖdata ndəhay.»

A təɖdata ndəhay na, maja ta gəmam nga təbmarə mey nga Gazlavay daa ba. Zleezle na, Gazlavay ta ləvey la, si a təɖam kəne.

⁹ Ama akwar na, səkway masa Gazlavay ma wala, akwar ndəhay ma ka kwakwas nga Gazlavay, akwar ndəhay mapatakaya wal ngada Gazlavay, akwar səkway masa Gazlavay ma pa ngada aɲga ray aɲga. Gazlavay ta badakurwa sem daa ləvaɲ ngadaa slam aɲga mewədey masa maaya kalah, amba ka wuzdamara ngada ndəhay cek hay mahura masa aɲga ma kata.

¹⁰ Zleezle na, akwar ndəhay nga Gazlavay ba, ama wure keɖe, akwar ndəhay aɲga hay. Zleezle na, Gazlavay fa sərfakwar dey-ceceh daa ba, ama wure keɖe, fa sərfakwar dey-ceceh dəba.

Mey da ray menjey maaya da wuzlah ndəhay ma təba mey nga Gazlavay ba

¹¹ Jam adaw hay, sərmara, akwar na, anda mələk hay da bəla keɖe. Slam akwar menjey na, da bəla feɖe ba. Maja ngeɛne, ya fa ləvkwar, ambahw, cek hay maaya ba masa mevel akwar ma wuɖey gway na, ka da kamara saba. Cek hay a na, a daa zəɖda heter akwar.

¹² Akwar da wuzlah ndəhay ma sərmara Gazlavay ba, njam, kam cek maaya mandaw mandaw. Anda keɖe, kwa aa dəɖfamakwar mey, a ləvam akwar ndəhay maaya ba na, a həlmamara Gazlavay la ta pas masa aɲga ma da sawa, maja ata ma hətmar sləra maaya masa akwar ma kamara.

¹³ Namatar ray a *bay-ray hay cəpa maja Yesu Bay aləkwa Mahura. Anda meləvey, namar ray ngada bay nga hwayak maja aɲga mahura da ray ndəhay siya hay,

¹⁴ asaya, namatar ray a mahura hay nga hwayak maja ara ndəhay meslərey nga bay nga hwayak. Aɲga fa slərdata

2:7 2.7 Ps 118.22; Mt 21.42; SNM 4.11 **2:8 2.8** Iz 8.14; Rm 9.33 **2:9 2.9**
 1.2; Mab 19.5-6; Lev 19.2; Mew 4.20; 7.6; 14.2; Iz 9.1; 43.21; 61.6; SNM 26.18; Rm
 5.17; 2Kwr 4.6; Ef 5.8; Tit 2.14; Heb 13.12; 1Pi 2.5; CWJ 1.6; 20.4 **2:10 2.10** Aw
 2.25; Rm 9.25 **2:11 2.11** 1.1, 17; Ps 39.13; Rm 7.15, 17-23; Gal 5.17; Heb 13.14
2:12 2.12 Iz 10.3; Mt 5.16; 2Kwr 5.10 **2:13 2.13-14** Rm 13.1-7; Tit 3.1

nga kətata ndəhay ma ka cek ta cəved e ba ta nga həsltar ray a ndəhay ma ka cek ta cəved e.

¹⁵ Ta fa sləra akwar maaya ngene na, Gazlavay a wufey ka gərcamatara mey nga ndəhay marəzltakaya ma sərmara Gazlavay ba, maa guzlam mey saw kəne ngene.

¹⁶ Akwar ndəhay nga Yesu na, akwar beke hay ba. Ama ka da ləvam akwar beke ba kaa na, ka kam cek maaya ba anda mevel akwar ma wufey na, kəne ba. Sasəkar jak, təram ndəhay ma ka sləra nga Gazlavay.

¹⁷ Namatar ray a ndəhay tabiya. Wudmata məlmakw akwar hay daa mey nga Gazlavay. Namar ray maaya maaya a Gazlavay. Cənməray mey a bay nga hwayak.

Mey da ray mebəsey banay anda Yesu ma bəsa

¹⁸ Akwar ndəhay ma ka sləra nga ndəhay, namatar ray maaya maaya a *bay-ray akwar hay. Ka da nam ray na, ngada bay-ray hay masa maaya ma wudmakwar daada ba. Ama namatar ray a bay-ray hay masa maaya ba hay may.

¹⁹ Da akwar fa bəsmara banay hay mekele mekele ma sawa a ray akwar lək-lək maja ka wudam nga namar ray a Gazlavay na, ngene, ara cek maaya ma mbafar a Gazlavay.

²⁰ Da a kədmakwar maja akwar ma kam cek maaya ba, ka bəsmara na, ma daa həmdakwar maja na, wa? Ama da ka kam cek maaya, fa dəba ha, a sərdamakwar banay lək-lək gway, asaya, da akwar fa bəsmara banay a na, ngene, ara cek maaya ma mbafar a Gazlavay.

²¹ Ahaw, Gazlavay a zəlkwar na, nga key kəne, maja *Kəriste may, ta sərey banay la maja akwar. Anda kəde, ta wuzkwar cəved la amba ka kam cek anda anga ma ka.

²² Yesu na, ta key mebərey daa ba səlak, ta mbərzley kwa dey pal daa ba.

²³ Daa masa fa cədmara na, ta cədta daa ba. Daa masa fa sərdamara banay na, kwa ta key həma a ray ata daa ba. Ama a pa mewulkey anga na, a ray Gazlavay, ndaw ma ka sariya ta cəved e.

²⁴ Daa masa ata fa dərmara fa hwadam mazlangalakaya na, ta la mebərey aləkwa sem cəpa a ray anga. A ka kəne na, amba ya mbəkdakwa mekey mebərey, ya kakwa cek ta cəved e anda Gazlavay ma wufey. Ara ta fa banay anga ha ngene, aləkwa ma ləhkwa.

2:15 2.15 3.16 **2:16 2.16** 1Kwr 6.11, 19-20; Gal 5.13 **2:17 2.17** 1.22; 3.16; MM 24.21; Mt 22.21; Gal 6.10; Fəl 2.12 **2:18 2.18** Ef 6.5-8 **2:18 2.18-3.7** Ef 5.21-6.9 **2:19 2.19-20** 5.12 **2:20 2.20** 4.14 **2:21 2.21** Mt 16.24; 20.26-28; Jan 13.15; Rm 15.5 **2:22 2.22** Iz 53.9; Jan 8.46; Heb 4.15 **2:23 2.23** 3.9; Iz 53.7; Mt 26.55-56, 67; 27.14, 27-31 **2:24 2.24** Iz 53.4, 5; Rm 6.2, 11; Kwa 2.14; Heb 9.28

²⁵ Ahaw, zleezle na, akwar anda tɔ̃baŋ hay maazɔ̃ftakaya, ama wure kede, Gazlavay ta vɔ̃hdakurwa sem asi har ŋga mecɔ̃kwer akwar ma da jɔ̃dkwar.

3

Mey da ray ŋgusay ta da ray zel hay

¹ Anda ndɔ̃hay ma namatar ray a bay ata hay na, akwar ŋgusay may, namatar ray a zel akwar hay. Anda kede, da zel hay ma tɔ̃ba mey ŋga Gazlavay ba daha na, a mbɔ̃ddamara mevel ata la, a tɔ̃bmara mey ŋga Gazlavay la maja menjey akwar, aŋga maaya. Kwa anja akwar taa guzlmatar mey pal daa ba na, a tɔ̃bmara mey ŋga Gazlavay la,

² maja zel akwar hay fa nɔ̃kmara menjey akwar masa maaya, asaya, a sɔ̃rmara akwar fa namatar ray.

³ Ka da wulkam a ray mediyey vaw ŋga mbey ba. Anda melɔ̃vey, metɔ̃rdey ray ŋga zlepey, mepey dangwa ŋga bɔ̃rey magaza ta bersle ma hɔ̃dkey ba, asaya, mepey zana ŋga slɔ̃may.

⁴ Ama maaya na, membey akwar a bawa ta daa mevel akwar. Anda melɔ̃vey, tɔ̃ram ŋgusay meekwed-mey, ŋgusay ta zazay ta ndɔ̃hay. Kede he ara cek maaya ma ndɔ̃vey ba. Ara cek ma mbey fa dey ŋga Gazlavay ma fɔ̃nta cek hay tabiya.

⁵ Ara anda kede, ŋgusay masa zleezle ma sɔ̃pmara cɔ̃ved ŋga Gazlavay ta mevel pal ma tɔ̃ram ŋga ŋgusay ma mbam. A namatar ray a zel ata hay,

⁶ anda zleezle Sara ma nar ray a zel e, *Abɔ̃raham. A zɔ̃la «Bay adaw». Anda kede, da akwar fa kam slɔ̃ra maaya ta mandɔ̃rzay daa dey daa ba na, akwar anda dam aŋga hay.

⁷ Akwar zel hay may, si ka kamatar maaya a ŋgwas akwar hay. Sɔ̃rmara ata na, gɔ̃dan pɔ̃reh. Hɔ̃slmatar ray, maja ata may, Gazlavay ta vɔ̃ltar heter la anda aa ma vɔ̃ldakwara maja maaya aŋga. Da akwar fa kamara kɔ̃ne na, kwa cek fa da tɔ̃ka Gazlavay ŋga tɔ̃ba medɔ̃rey-dangay akwar na, daa ba.

Mey da ray mesɔ̃rey banay maja mekey cek ta cɔ̃ved e

⁸ Yaw, mey adaw mekele daha saya. Maaya na, akwar cɔ̃pa ka cɔ̃mam dɔ̃ay, ka sɔ̃ram dey-ceceh da wuzlah akwar, ka wudam vaw da wuzlah akwar maja akwar mɔ̃lman hay daa mey ŋga Gazlavay. Kam maaya a ndɔ̃hay. Ka da pamara ray akwar ŋga mahura da ray ndɔ̃hay ba.

⁹ Da ndaw fa kakwar cek maaya ba na, ka da madamara ba. Da ndaw fa cœdkwar na, ka da cœdmara ba. Sasëkar jak, lœvmar a ndaw aha na, «Gazlavay nga kaka maaya», maja daa masa Gazlavay ma zœlkwar nga tœrey ndœhay anga hay na, ta lœvkwar la a da kakwar maaya.

¹⁰ Mawuzlalakaya daa dœrewel nga Gazlavay, a lœvey: «Ndaw ma wudœy nga njey maaya ta meesœmey na, si a kœrza megewec nga mey anga amba aa guzley mey malamba ba, si a mbœkda membœrzley.

¹¹ Asaya, nga mbœkda mekey cek maaya ba, nga key cek maaya, nga sœpey amba a njey ta zazay ta ndœhay mandaw mandaw.»

¹² Fara fara, Bay Gazlavay fa nœkfatar dey fa ndœhay ma ka cek ta cœved e, aa fa jœkfatar slœmay daa medœrey-dangay ata. Ama ndœhay ma ka mebœrey na, Bay Gazlavay a mbœdtar dœba.

¹³ Anda kedœ, da akwar fa kam cek maaya ta cœved e ta mevel akwar cœpa na, ma da gwa nga kakwar cek maaya ba na, wa?

¹⁴ Kwa da akwar fa sœram banay maja akwar ma kam cek ta cœved e na, ngene, maaya nga Gazlavay aa da ray akwar. Anda kedœ, ka da zluram ta ndœhay ma da sœrdamakwar banay ba, ray akwar a da hœbey ba.

¹⁵ Ama daa mevel akwar na, hœslmar ray ngada *Kœriste pal taava anga. Anga na, Bay akwar Mahura. Njam vaw madiykaya mandaw mandaw amba da aa cœfdamakwar ka pamara mewulkey akwar a ray Kœriste maja me na, ka mbœddamatara maaya maaya.

¹⁶ Ka mbœddamatara na, ta mey maakwad a, ta meney ray, ta mevel maaya. Anda kedœ, da faa guzlam mey maaya ba da ray menjey akwar maaya daa cœved nga Kœriste na, hwaray a katar la.

¹⁷ Fara fara, da Gazlavay a wudœy ka sœrey banay na, ngama mesœrey banay da ray mekey cek maaya, da ray mesœrey banay da ray mekey cek maaya ba.

¹⁸ Ahaw, Kœriste ta ray anga ta sœrey banay la, ta vœlda ray anga la dey pal nga mœcey nga mbœkey mebœrey nga ndœhay tabiya. Anga na, ara ndaw manjar mebœrey, a mœcey a na, maja ndœhay ta mebœrey. A ka kœne amba a handata ndœhay fa Gazlavay. A kœdmara vagay na,

daa masa anɗa ndaw-magɗan, ama ara *Mesɗfney nɗa Gazlavay ma slɛkɗadɗrwa.

¹⁹ Anda keɗe, ta fa Mesɗfney a na, ta daw la nɗa wuztar mey nɗa Gazlavay a mesɗfney hay magɗcatakaya *.

²⁰ Mesɗfney hay a nɗene na, ara mesɗfney nɗa ndɗhay masa zleezle ma cɗnmar mey a Gazlavay ba. Gazlavay fa sɛkwta ta dɛk-vaw daa masa Nɗwe faa cada kwambiwal mahura heyey. Daa nɗene, ndɗhay ta mbɗzam la aa kwambiwal a, yam ta handata la, ta lɗham la. Ma lɗham a na, ndɗhay ga daa ba, ndɗhay daanɗafad gway.

²¹ Nɗene na, a wuzwa *baptem ma lɗhdakwar daa meɗerey wure keɗe. Mekey baptem na, ara nɗa pɗrey dɗlay fa vaw ba, ama ara nɗa jɗwey mey ta Gazlavay ta mevel maaya mapɗkaya. Baptem e, a lɗhdakwar na, maja Yesu Kɗriste ma slɛkɗawa daa memɗcey.

²² Yesu Kɗriste he na, ta tɗpey sem a vad, manjakaya ta har-zɗmay nɗa Gazlavay. Fa wey da ray maslan hay ta cek hay mekele mekele masa ta gɗan da gazlavay da vad.

4

Mey da ray menjey zleezle ta masa wure keɗe

¹ Ya sɗrkwa daa masa *Kɗriste anɗa ndaw-magɗan na, ta sɗrey banay la ga. Maja nɗene, akwar may, kam gɗan, wulkam letek anda anɗa da ray mesɗrey banay, maja kwa waawa ma bɗsa banay na, a key meɗerey saba.

² Dɗga wure keɗe haa kasl fa memɗcey akwar na, ka da kam cek anda mevel nɗa ndaw-magɗan ma wuɗey ba, ama kam cek anda Gazlavay ma wuɗey.

³ Menjey akwar masa zleezle na, anɗa anda menjey nɗa ndɗhay ma sɗra Gazlavay ba. Ka ta njam la ga daa mekey cek ma ka hwaray, daa mekey dey fa cek nɗa ndaw, daa mewey, daa mekey wasa malamba, daa mesey wuzam kalah. Asaya, akwar ta nam ray la nɗada kuley hay mekele mekele. Nɗene, ara cek maaya ba kalah, mak dɗba.

⁴ Fara fara wure keɗe, ndɗhay ma sɗra Gazlavay ba fa rɗzlam ga da ray akwar, maja akwar fa kam cek hay malamba ta ata daa saba. Maja nɗene, ata fa cɗfmakwar.

3:18 3.18 2.21; Rm 5.6-8; 6.10; Heb 4.15; 7.27 * **3:19 3.19** mesɗfney hay magɗcatakaya: Ara mesɗfney nɗa ndɗhay masa ma tɗmara mey nɗa Nɗwe ba, da daa ba, ara maslan hay ma cɗnmar mey a Gazlavay saba. Ata daa slam mesɗkwey sariya nɗa Gazlavay. **3:19 3.19-20** MC 6.2; 2Pi 2.4; Jud 6 **3:20 3.20** MC 6.14-22 **3:21 3.21** Rm 6.3-4; Heb 10.22 **3:22 3.22** SNM 1.9; Ef 1.21; **har-zɗmay:** Mt 22.44; Rm 8.34; SNM 2.33 **4:1 4.1** 2.24; 2Kwr 4.10; Gal 5.24 **4:2 4.2** 2.21 **4:3 4.3** Gal 5.19-21; Ef 2.3; Tit 3.3

⁵ Ama pas pal na, a kadamara cek hay maaya ba masa ata ma kamara ha ngene la a Gazlavay, ndaw masa ta diya vaw cay nga katar sariya a ndəhay masa ta dey leŋ a ndəhay masa maməctakaya.

⁶ Ara maja ngene, Kəriste ma wuzda *Mey-maaya-mawiya kwa ngada ndəhay maməctakaya. Ahaw, Gazlavay ta katar sariya sem, anda aŋga ma katar sariya a ndəhay tabiya *. Ama, a wuztar Mey-maaya-mawiya ha na, amba Mesəfney nga Gazlavay a vəltar gədanŋ nga njeŋ maaya maaya anda Gazlavay.

Mey da ray menjeŋ da wuzlah ndəhay ma təba meŋ nga Gazlavay

⁷ Gweegwe cay bəla a ndəvey. Anda kefe, wam vaw, pam leŋgesl fa ray akwar, amba ka gwamara nga dərmar danŋay a Gazlavay.

⁸ Cek mahura na, wudam vaw da wuzlah akwar ta mevel pal, maja da mewudəy-vaw daha na, ka gwamara nga mbəkdamara mebərey nga ndəhay dey ga †.

⁹ Təbmata ndəhay ma samawa a way akwar maaya maaya ta meesəmey ta menjərbey-mey ba.

¹⁰ Kwa waawa na, Gazlavay ta vəlar gədanŋ la wal nga key cek. Kwa waawa nga kada sləra ta gədanŋ a nga jəney ndəhay mekele. Anda kefe, ka da təram ndəhay ma ka sləra hay maaya ta gədanŋ wal wal masa Gazlavay ma vəlda a ndaw a, a ndaw a.

¹¹ Da ndaw aa ta gədanŋ ngaa guzley na, nga wuzey meŋ nga Gazlavay. Da ndaw a wudəy nga jəney ndəhay na, nga jənta ta gədanŋ masa Gazlavay ma vəldara. Kamara kəne amba ndəhay tabiya a həlmamara Gazlavay ta fa Yesu *Kəriste maja cek hay tabiya masa akwar ma kamara. Ara aŋga ndaw masa ta gədanŋ, ndaw masa fa həlmamara nga sərmataw. *Amen.

Mey da ray mesərey banay maja Yesu Kəriste

¹² Jam adaw hay, da banay hay maadəkwa a mekele mekele a sawa a ray akwar na, ka da rəzlam maja ba. Banay a, a sawa na, nga jadəkwar amba Gazlavay a nəka mevel akwar, da akwar fa təbmara meŋ aŋga fara fara kwa. Ara cek merəzley ndaw ba.

4:5 4.5 1.17; 2Tm 4.1 * **4:6 4.6** katar sariya a ndəhay tabiya: Sariya a wudəy nga ləvey meməcey. Ndəhay tabiya a məcam la dey pal. Nəka CWJ 20.6. **4:7 4.7** 1Kwr 10.11; 1Tes 5.5-8; 1Jn 2.18 † **4:8 4.8** Nəka 1Kwr 13.5; Ef 4.32ta Mt 18.21-22. Ndəhay mekele a wulkam meŋ a, a gwa nga ləvey «...da ka wudam ndəhay na, Gazlavay a da mbəkdamakwara mebərey aləkwa.» Nəka Mt 5.7. **4:8 4.8** 1.22; Jak 5.20 **4:9 4.9** Heb 13.2 **4:10 4.10** Rm 12.6-8 **4:11 4.11** Rm 12.7; 1Kwr 10.31; 12.8; Jak 3.1 **4:12 4.12** 1.7

¹³ Da masa akwar fa sɛram banay anda *Kɛriste ma sɛra na, ɲgene sasɛmam. Anda keɔe, ta pas masa ndɛhay tabiya ma da hɛtmar gɛɔan ɲnga ma da wuzwa na, kaa sɛmam la ga ma fɛna saya.

¹⁴ Da a cɛɔmakwar maja akwar ndɛhay ɲnga Kɛriste na, ɲgene, maaya ɲnga Gazlavay aa da ray akwar, maja *Mesɛfney ɲnga Gazlavay, Mesɛfney masa ta gɛɔan ma fɛnta cek hay tabiya aa da ray akwar.

¹⁵ Da ndaw da wuzlah akwar a sɛrey banay maja aa ma key cek maaya ba, da daa ba, aa ma kɛɔey ndaw vagay, aa ma leley, da daa ba, aa ma ndɛkwey aa mey ɲnga ndɛhay na, ɲgene, ndaw fa daa hɛmda maja banay a daa ba.

¹⁶ Ama da ndaw a sɛrey banay maja ɲnga ndaw ɲnga Kɛriste na, ɲgene, hwaray a da kar maja ba. Sasɛkar jak, ɲnga hɛlma Gazlavay maja ata ma zɛlmara ndaw ɲnga Kɛriste he.

¹⁷ Pas a ta wuswa cay amba Gazlavay a katar sariya a ndɛhay. A da zlar na, ta fa alɛkwa ndɛhay ɲnga hay. Da a zlar ta fa alɛkwa ndɛhay ɲnga hay na, kaa wara ndɛhay ma tɛba *Mey-maaya-mawiya ɲnga Gazlavay ba na, a da kam kwara?

¹⁸ Mawuzlalakaya daa ɔferewel ɲnga Gazlavay, a lɛvey: «Da ndɛhay ma ka cek maaya ta cɛved e a da lɛham ta gɛra na, kaa wara ndɛhay maaya ba ma rɛsmara Gazlavay na, a da kam kwara?»

¹⁹ Da anda keɔe na, ndɛhay ma sɛram banay fa cek masa Gazlavay ma wuɔey na, ɲnga vɛldamara ray ata tabiya ɲgada Gazlavay, ndaw ma lɛmtɛrwa, ma nɛkfatar dey mandaw mandaw. Asaya, ɲnga kam cek maaya mandaw mandaw.

5

Mekɛtey ɲgada ndɛhay ɲnga Yesu

¹ Wure keɔe, ya faa guzltar a *bay-ray hay ɲnga Egɛliz da wuzlah akwar. Yah may, yah bay-ray anda ata. Daa masa *Kɛriste fa sɛrey banay na, ya ta hɛtar la ta dey aɔaw. Asaya, ya mbɛzey la a wuzlah ndɛhay masa ma da hɛtam mewɛɔey ɲnga Kɛriste masa Gazlavay ma da wuzɔerwa.

² Da ray ɲgene, akwar bay-ray hay, ya fa kakwar ambahw, nɛkfamatar dey fa ndɛhay ma tɛba mey ɲnga Yesu masa Gazlavay ma pata asi har akwar, anda ndaw-mecɛkwer ma nɛkey dey fa gɛnaw ɲnga hay. Nɛkfamatar dey ta mevel

akwar cəpa anda Gazlavay ma wudey, ta metəkey dəy ba. Ka da kamara sləra ha maja dala ba, ama kamara maja ka wudmata ndəhay a.

³ Ka da wam da ray ndəhay masa Gazlavay ma pata asi har akwar a ta maagway ba, ama təram ndəhay maaya fa mey ata amba a nəkam dey fa akwar.

⁴ Anda keđe, ta pas masa Yesu Kəriste, mecəkwer mahura, ma da vəhwa na, a pəlkwara mawurbay akwar la, a da njadakwar aa slam-mewedey ma da njeý nga sərmataw.

⁵ Akwar gula hay, ya fa ləvkwar, namatar ray a ndəhay mahura hay da wuzlah akwar. Akwar cəpa, kwa waawa nga nar ray a ndaw a, a ndaw a da wuzlah akwar, asaya, jənam vaw da wuzlah akwar, maja mawuzlalakaya daa dərewel nga Gazlavay, a ləvey:

«Ndəhay masa ma zlapam na, Gazlavay a mbəftar dəba la. Ama ndəhay meekwed-mey na, Gazlavay a katar maaya la.»

⁶ Da anda keđe na, namar ray a Gazlavay, ndaw ma wey da ray cek hay tabiya amba a pakwar nga mahura hay ta pas anga ma wudey.

⁷ Kwa meeme ma həbkwara ray na, mbəkdamara tabiya a har anga, maja anga na, ara ndaw ma nəkfakwar dey.

⁸ Wam vaw, ka da nam dər ba! Masa-gəra akwar, *Satan, bay-malula, fa pəkey ta wura ta wura nga kərzey kwa waawa, anda mabar ma key həma nga kərzey cek amba a hambəda.

⁹ Jaram, ka da vəlmar cəved nga wey da ray akwar ba. Pamara Gazlavay nga ndaw akwar fara fara mandaw mandaw. Sərmara, məlmakw akwar hay ma təba mey nga Yesu da bəla tabiya ta səram banay la anda akwar may.

¹⁰ Banay akwar a na, fa da njeý nga sərmataw daa ba. Ama Gazlavay ndaw ma kandakwar maaya mandaw mandaw ta zəldakwar la nga njeý daa mewedey anga nga sərmataw daa masa aləkwa macəmkaya ta Kəriste. Anda keđe, Gazlavay ta ray anga, a da tərdakwar nga ndəhay masa ta gədan, majaratakaya, kwa daa meeme, kwa ndaw ma da gwa nga təddakwar daa ba.

¹¹ Anja nga njeý anga ndaw masa ta gədan nga sərmataw. *Amen.

Mecey-har nga madagway-dakw

¹² Silas ta jənya la nga wuzlalakwara leeter mecəhe keđe. Anga na, ara məlma aləkwa masa yah ma pa nga ndaw

5:2 5.2 Jan 21.15-17; SNM 20.28; 1Tm 6.5 5:3 5.3 2Kwr 1.24; Fəl 3.17; Tit 2.7
5:4 5.4 1Kwr 9.24-25; 1Pi 1.4 5:5 5.5 MM 3.34; 29.23; Ef 5.21; Jak 4.6 5:6
5.6 Jak 4.10 5:7 5.7 Ps 55.23; Mt 6.25-30; Fəl 4.6 5:8 5.8 Ps 22.14; 1Tes 5.5-8
5:9 5.9 Ef 6.11-12; Jak 4.7 5:10 5.10 1Tes 2.12

adaw fara fara. Ya wuzlalakwa na, amba ya vɛlkwar gɛdan, asaya, ya wudɛy nga wuzdakwara fara fara maaya nga Gazlavay aa da ray akwar. Njam ta maaya nga Gazlavay, ka da mbɛkdamara ba sɛlak.

¹³ Mɛlma alɛkwa hay daa *mɛcɛmey-ray nga ndɛhay nga Yesu fede da *Babilanw* masa Gazlavay ma walata anda akwar, a camakwar har. Yaw, Mark masa yah ma pa anda bɛzey adaw, a cakwar har may.

¹⁴ Cam har da wuzlah akwar maaya maaya anda akwar mɛlman hay.

Anja Gazlavay nga njadakwar daa zazay, akwar tabiya, ndɛhay masa nga Kɛriste.

5:12 5.12 Silas: 1Tes 1.1 * **5:13 5.13** Babilanw: Har-gɛdan nga ndɛhay a wulkam «Babilanw» ara Rawm, berney mahura masa bay Rawma ma njeɣ da hwaɗ a. Nɛka CWJ 17.5. **5:13 5.13** Mark: Flm 24 **5:14 5.14** Rm 16.16; 2Kwr 13.11

**Leeter masa
Piyer
ma wuzlala nga dey cew
Mey da ray
Leeter masa Piyer ma wuzlala nga
dey cew**

Ara Simanjw Piyer, ndaw-meslōrey nga Yesu Kōriste, ma wuzlala saya. A wuzlalatarā ngada ndōhay nga Yesu daa Egēliz hay da bēla tabiya.

A wuzlala leeter e na, maja a sōra gweegwe cay a mōcey. A wudēy fa dōba anga na, ndōhay a sōrfadamara meesārkedey anga (1.13-14). Daa ngene, ndōhay ma tōba mey nga Yesu ngēeme ga ta mōcam sem, ama kwa Yesu ta vōhwa daa ba aran. Da ray ngene, ndōhay ga ray ata fa hōbey maja. Asaya, ndōhay maa sōrkada ndōhay ta membōrzley lej ndōhay maaya ba hay ta samawa la a wuzlah ndōhay daa Egēliz. Aa sanjōram a ray ndōhay ma ka cek ta cōved e.

Daa fasōlawal 1 Piyer a lōvtar nga kam gōdan nga njeý daa metōbey mey nga Gazlavay anda Gazlavay ma zōlta. Daa fasōlawal 2 a lōvtar nga pam leñgesl ta ndōhay maa sōrkadam mey masa fara fara ba, asaya, nga pam leñgesl ta ndōhay maaya ba hay. Daa fasōlawal 3 a lōvtar nga wam vaw fa menjeý ata, si a vōldamara ray ata fara fara a Gazlavay maja Yesu fa da vōhwa. Yesu a wuswa vaw fiyaw ba na, maja a wudēy ndōhay a mbōfdamara menjeý ata, asaya, a wudēy kwa ndaw pal aa zōdēy ba (3.9, 11).

Daa leeter e kedē na, mey mekele mekele daha nga vōley gōdan a ndōhay:

Mey da ray Gazlavay ma vōldakwar cek hay cōpa nga jōndakwar (1.3-4)

Mey da ray ndōhay ma da tōram nga ndōhay ma-jaratakaya masa ta gōdan (1.5-8)

Mey da ray dār pal ta mevey pal, ata letēk fa Gazlavay (3.8)

Mecey-har

¹ Ara yah *Simanjw *Piyer ma wuzlalakwara leeter kedē, yah ndaw ma ka slōra nga *Yesu *Kōriste, asaya, yah ndaw anga meslōrey.

Leeter e kedē ara ngada akwar ndōhay ma tōba mey nga Yesu. Daa metōbey mey a na, akwar ta hōtam cek maaya la

anda ala. Ya tɔ̀bkwa mey nga Yesu na, maja Yesu a vɔley cɔved ngada kwa waawa nga lɔhey, a weley ndaw ta weley ba. Yesu Kɔriste na, ara Gazlavay, ndaw ma lɔhdandakwar.

² Anja *Gazlavay nga pɔskwar mey, nga njadakwar daa zazay anga ma fɔna ma fɔna maja akwar ma sɔrmara Gazlavay ta Bay alɔkwa Mahura Yesu maaya maaya cay.

Ndɔhay nga Gazlavay a da njam na, kwara?

³ Gazlavay ta vɔlndakwar cek hay cɔpa la ta fa gɔdan anga amba ya njakwa macɔmkaya ta anga, ya kakwa cek fara fara anda aa ma wufey. Ara Gazlavay a ma wuzdandakwara ndaw masa ma zɔlndakwar amba ya sɔrkwa gɔdan anga fara fara, asaya, amba ya hɔtkwa maaya anga.

⁴ Ara ta fa gɔdan anga lej ta fa maaya anga ha, anga ma vɔlndakwar cek hay maaya mahura masa aa ma lɔvey a da vɔldandakwara dɔga zleezle heyey. Cek hay a na, maaya kalah, a fɔna cek hay tabiya. A ka anda kedɛ na, amba ta fa cek hay a kedɛ na, ka lɔham fa mewulkey maaya ba ma nɔsa ndaw da bɔla kedɛ. Asaya, a ka anda kedɛ amba ka tɔram ndɔhay ta mevel maaya anda anga.

⁵ Maja nɔgene, kam gɔdan. Daa menjey akwar na, kam cek ta cɔved e maja akwar ma pamara Yesu *Kɔriste nga ndaw akwar fara fara. Da masa akwar fa kamara kɔne na, kam gɔdan saya nga sɔrey Gazlavay ta nga sɔrey cek masa aa ma wufey.

⁶ Da akwar ma sɔrmara cek hay masa Gazlavay ma wufey la na, maaya, ka wam vaw fa ray akwar may. Da akwar ma wam vaw la fa ray akwar na, maaya, ka bɔsmara banay hay tabiya may. Da akwar ma bɔsmara banay hay tabiya la na, maaya, ka vɔldamara ray akwar fara fara a Gazlavay anda anga ma wufey may.

⁷ Da akwar fa vɔldamara ray akwar fara fara a Gazlavay na, maaya, ka wufam vaw da wuzlah akwar anda mɔlman hay may. Da akwar fa wufam vaw da wuzlah akwar na, maaya, ka wufmata ndɔhay mekele hay may.

⁸ Da akwar fa kamata cek hay a kedɛ ma fɔna ma fɔna na, nɔgene, ka tɔram ndɔhay masa ta gɔdan ma ka cek maaya la. Anda kedɛ, ka sɔrmara Bay alɔkwa Mahura Yesu Kɔriste la ma fɔna.

⁹ Ama ndɔhay ma kamata cek hay a kedɛ ba na, a hɔtmar dey maaya maaya ba, ata anda wulaf hay. Ndɔhay a nɔgene, Bay Gazlavay ta mbɔkdatara mebɔrey ata masa zleezle sem na, a sɔrfadamara saba daw?

¹⁰ Məlma adaw hay, Gazlavay ta zəlkwar sem, ta walakwar sem. Maja ηgene, kam gədan ma fəna saya amba ka njam maaya maaya anda Gazlavay ma zəlkwar, ta aa ma walakwar ηgene. Da akwar fa kam cek hay anda ηgene na, ka zlangadam daa cəved ηga Gazlavay daa ba.

¹¹ Anda kefe, Gazlavay a vəlkwar cəved la ta meesəmey amba ka mbəzam aa mewey ηga Yesu Kəriste ma da njeη ηga sərmataw. Yesu Kəriste na, Bay aləkwa Mahura, ndaw ma ləhdandakwar.

¹² Ara maja ηgene, kwa ka sərmata cek hay a, asaya, kwa akwar fa təbmara mey fara fara masa akwar maa səkadamara cay maaya maaya na, ya fa sərfadakwara cek hay a cəηga.

¹³ Anda kefe, daa masa yah daha ta dey da bəla kefe na, maaya na, ya sərfadakwara cek hay a saya amba kaa zəfdamara daa ray ba.

¹⁴ Ya fa səra mamba cay ya məcey anda Bay aləkwa Mahura Yesu Kəriste ma wuzdiwa.

¹⁵ Anda kefe, ya kəfey vaw la ta gədan adaw cəpa amba kwa daa masa yah daa saba na, ka gwamara ηga sərfadamara cek hay a mandaw mandaw.

Mey da ray mewefey ma sawa a ray Yesu

¹⁶ Ahaw, zleezle, ala ta kadamakwara mey da ray masawa ηga Yesu *Kəriste Bay aləkwa Mahura la, ndaw masa ta gədan. Ya kadamakwara ha na, anda ndəhay ma kam mamba saw kəne ba, ama ala ta dey ala, ya ta hətmar gədan anğa la, gədan a, aa mahura.

¹⁷ Fara fara, Gazlavay Papan ta həslar ray la, ta slərwa mewefey la a ray a daa masa dəy ηga Gazlavay Mawacawaca ma cənwa, ma ləvey: «Kefe he, ara Bəzey adaw masa yah ma wudə kalah, ya faa səmey ga da ray a.»

¹⁸ Daa masa ala bama ta ata Yesu a daa ray ηga anğwa ηga Gazlavay na, dəy a ma cənwa da gazlavay da vad la, ala ma cəndamara la ta sləmay ala.

¹⁹ Ala ma cəndamara dəy a ηgene na, ta vəlndar gədan la saya ηga təbey mey ηga ndəhay ma təla mey ηga Gazlavay ma kadamara zleezle. Maaya na, ka pam lenğesl fa mey ata ha maja mey a na, anğa anda petərila ma wəfey daa slam-ləvan haa slam ma wurey, haa batay * ma bawa. Fa dəba ha, ka da hətmatar cek hay tabiya maaya maaya.

1:11 1.11 2Tm 4.18; **ndaw ma ləhdandakwar:** 2.20; 3.18; Tit 3.6 **1:12** 1.12 Jud 5 **1:14 1.14** 2Kwr 5.1; 2Tm 4.6; Jan 21.18-19 **1:16 1.16-18** Mt 17.1-8

* **1:19 1.19** batay: Ara «wurzla-banğay» ta mey Məkan. A wufey ηga ləvey Kəriste. Nəka daa CWJ 22.16.Aa guzley da ray mavəhwa ηga Yesu a bəla, da daa ba, da ray pas masa ndaw ma təba Yesu aa mevel anğa. **1:19 1.19** Ps 119.105; Rm 1.2; 13.12; 1Pi 1.10-11

²⁰ Ya fa ləvkwar, mey nga ndəhay ma təla mey daa derewel nga Gazlavay zleezle na, kwa ndaw pal ma gwa nga wuzda ta gədan anga daada na, daa ba. Kede ara mey mahura nga sərey teesed dagay.

²¹ Mey nga ndəhay ma təla mey nga Gazlavay daa derewel e na, ara mewulkey nga ndaw-magədan ba, ama ara *Mesəfney nga Gazlavay ma vəltar gədan nga wuzda mey ma sawa ta fa Gazlavay.

2

Mey da ray ndəhay maa sərkada ndəhay ta membərzley

¹ Zleezle na, ndəhay ma pamara ray ata nga ndəhay ma təla mey nga Gazlavay daha da wuzlah ndəhay *Israyel hay. Ndəhay maa sərkada ndəhay ta membərzley a samawa la a wuzlah akwar kəne may. A da samawa na, ngaa sərkadangakwar mey membərzley ngaa zəddakwar. Anda kede, a da rəsmara Bay Mahura Yesu, ndaw ma ləhdata. Maja ngene, Gazlavay a sərdata banay la fiyaw, aa zəddata la.

² Ndəhay ga a təbmatara mey ata la, a da kam cek malamba anda ata. Ndəhay a daa guzlam mey maaya ba da ray cəved masa fara fara nga Gazlavay maja ata fa kam cek malamba anda ndəhay ma mbərzley heyey.

³ Ndəhay maa sərkada ndəhay ta membərzley ngene na, a kam dey fa cek nga ndəhay kalah. A fəcmakwara cek akwar hay cəpa ta mey ata hay membərzley ngene. Dəga zleezle Gazlavay ta dəsla sariya ata cay. Anda kede, a daa zəddata fiyaw.

⁴ Ya ləvey anda kede maja kwa maslan hay nga Gazlavay da vad masa ma kam mebərey ma!, Gazlavay ta sərftar dey-ceceh daa ba, ta kəzlata sem aa slam mesərey banay. Fetede, majəwtakaya daa ləvan ta calalaw, fa səkwmaras pas masa Gazlavay ma da dəsla sariya da ray ata.

⁵ Kwa ndəhay masa zleezle ma kam mebərey may, Gazlavay ta sərftar dey-ceceh daa ba. Gazlavay ta pawa var la mahura, yam ta rəhda bəla la, bəla masa ndəhay malamba ga da hwaɗ a, yam ta həta sem cəpa. Si Nəwe, ndaw maa guzltar a ndəhay nga kam cek ta cəved e, ta ndəhay da way anga hay maasala ma ləham gway.

⁶ Asaya, Gazlavay ta katar sariya la ngada ndəhay daa berney nga *Sadawm ta nga *Gwamar. Ta wawurta berney hay a sem ta ndəhay da hwaɗ a cəpa kəlmedek! Anda kede,

Gazlavay fa wuzda ngada ndəhay masa malamba na, a da sərdata banay kəne.

⁷ Ndaw daa berney nga Sadawm a daha, mezəley *Lut. Anğa ndaw maaya ma ka cek ta cəved e. Mevel anğa fa cey kalah da ray ndəhay ma kam cek malamba. Anğa na, Gazlavay ta ləhda sem daa berney a

⁸ maja anğa ndaw maaya. Aa manjakaya ta way da wuzlah ndəhay a, anğa fa hətatar cek hay malamba masa ndəhay a ma kamara, asaya, fa cənda mey hay maaya ba masa ndəhay a maa guzldamara. Cek hay a tabiya kefe fa car mevel kalah mandaw mandaw maja anğa na, ndaw ma ka cek ta cəved e.

⁹ Anda kefe, Bay Gazlavay aa ta gədan nga ləhdata ndəhay masa ma namar ray. Asaya, aa ta gədan nga pata ndəhay ma kam cek malamba ta cakay amba a sərdata banay ta pas masa anğa ma da katar sariya.

¹⁰ Ma da səram banay kalah na, ndəhay ma kam cek malamba saw anda vaw ata ma wudəy, a təbmara Bay Gazlavay nga wey da ray ata ba.

Ndəhay maa sərkada ndəhay ta membərzley heyey na, a kam cek anda ata ma wudam, a zlapam. A zluram nga cədmata maslan hay nga Gazlavay daa slam-mewedey da vad* ba.

¹¹ Maslan hay nga Gazlavay da vad na, a fənmata ndəhay maa sərkada ndəhay ta membərzley heyey ta gədan. Ama maslan hay a fa cədmata ndəhay mahura hay a fa mey nga Bay Gazlavay daa ba.

¹² Ndəhay a na, a kam cek hay saw anda cek hay nga ley manjar lenjesl masa makatakaya nga kərzey ta nga kədey. A cədam cek hay masa ata ma sərmara ba. Anda kefe, a da məcam saw anda cek hay nga ley.

¹³ Ta sərdata banay la ta ndəhay. Anda kefe, Gazlavay a da sərdata banay maja may. Maa səmdata na, ara mekey cek malamba fa mey nga ndəhay gway, kwa taa pas. Daa masa akwar fa zəmam cek bama, ata faa səmam nga batamakwar na, ara cek maaya ba, ma ka hwaray.

¹⁴ A wulkam na, si nga ley vaw saw da palah gway. Mekey mebərey na, a bəltar mey ba. A batam nga key mebərey na, ndəhay masa ta gədan pəreh daa mey nga Gazlavay. Ara

2:6 2.6 MC 19.24-25; Lk 17.29; Jud 7 **2:7 2.7** MC 19.1-16 **2:9 2.9**

Jəw 4.7; 1Kwr 10.13; CWJ 3.10 * **2:10 2.10** maslan hay nga Gazlavay daa slam-mewedey da vad: Ndəhay siya a wulkam ara maslan hay nga Gazlavay, siya hay a wulkam ara maslan hay maaya ba ma rəsmara Gazlavay zleezle. Nəka Jud 8-10. Ndəhay mekele a wulkam ara ndəhay mahura hay masa da cakay Gazlavay. **2:10 2.10** Jud 7-8 **2:11 2.11** Jud 9 **2:12 2.12** Jud 10
2:13 2.13 Jud 12

ndəhay ma wudam cek mandaw mandaw na, si ngada ata gway. Ndəhay a na, Gazlavay ta nəsta sem.

¹⁵ Ta zlanğadəm sem daa cəved ŋga Gazlavay, a lam cəved masa maaya ba anda ŋga ndaw mezəley Balam, bəzey ŋga Bawzar. Balam a na, ara ndaw zleezle ma key cek maaya ba ŋga hətey dala.

¹⁶ Balam a na, ara *ndaw ma təla mey ŋga Gazlavay. Ama Gazlavay ta mbədar ray la maja aa ma nar ray ba, haa madi-zəngwaw, cek ma gwa ŋga guzley ba ma! aa guzlar anda ndaw. Aa guzlar na, ŋga təka sləra anğa maaya ba saw ŋgene.

¹⁷ Ndəhay maa sərkada ndəhay ta membərzley a na, ata anda wurak masa yam maa səkey sem da hwad a. Asaya, ata anda gazlavay ŋga var masa memed ma təra, ma pey var ba. Gazlavay ta diytar slam cay daa ləvan mebək-bək e.

¹⁸ Ata faa guzlam mey hay mezlepey saw kəne. A kam cek malamba saw anda ata ma wudam. Anda kefe, fa batamata ndəhay masa ma ləhmawa təlam dasi har ŋga ndəhay masa ma sərmara cəved ŋga Gazlavay ba.

¹⁹ Ndəhay maa sərkada ndəhay ta membərzley a na, a ləvmatar a ndəhay kwa waawa a da wey ray anğa. Anja ŋgene, ata ray ata ha na, ata beke hay ŋga mebərey, maja kwa cek wura wura fa wa ndaw na, ndaw aha anğa beke ŋga cek aha.

²⁰ Ndəhay ma səpa Yesu *Kəriste Bay aləkwa Mahura, ndaw ma ləhdandakwar na, ta ləham cay daa cek hay maaya ba cəpa da bəla ma nəsa ndaw. Ama fa dəba ha, da ndəhay a, a mbəkdamara ray ata ŋga key cek maaya ba ha cəngə na, ŋgene, cek aha fa wata. Anda kefe, menjey ata a da nəsey ma fəna masa ŋgeeme.

²¹ Ngada ata na, ŋgama ta sərmara cəved maaya ŋga Gazlavay kefe daa ba sələk, da ray masa ata ma sərmara cay, a mbəkdamara aa walaŋ, a namar ray a *mewey ŋga Gazlavay saba.

²² Cek aha kefe anğa letək anda mey a daha ma ləvey: «Gədey a kərɔfadərwa cek, fa dəba ha, a vəhey, a zəma saya.» Asaya, anda mey a daha ma ləvey: «Vetem mapər kaya maaya maaya na, a vəhey, a ney aa ndələb.»

3

Mey da ray mavəhwa ŋga Bay Mahura

2:14 2.14 Mt 5.28; 2Tm 3.6 **2:15 2.15** Mesl 22.7, 17; Jud 11 **2:16 2.16** Mesl 22.28-31 **2:17 2.17** Jud 13 **2:19 2.19** Jan 8.34; Rm 6.16 **2:20 2.20** 1.11; Mt 12.45 **2:21 2.21** Lk 12.47-48 **2:22 2.22** MM 26.11

¹ Jam adaw hay, kefe he ara leeter nga dey cew e masa yah ma wuzlalakwara. Daa leeter hay cewete kefe na, ya fa sɛrfadakwara mey masa akwar ma sɛrmara cay amba ka wulkam maaya maaya da ray a.

² Ya wufey na, ka sɛrfadamara mey masa ndəhay ma təla mey nga Gazlavay zleezle ma wuzdamara. Asaya, sɛrfadamara mewey hay nga Bay aləkwa Mahura, ndaw ma ləhdandakwar. Aa guzlkwar ta mey ndəhay anɣa hay meslərey masa anɣa ma slərdata fa akwar nɣaa sɛrkadamakwara.

³ Teesed na, ya wufey ka sɛrmara, masa gweegwe cay bəla a ndəvey na, ndəhay ma kam cek saw anda ata ma wufam a samawa la. A daa sanɣeram a ray akwar,

⁴ a da ləvam: «Naa! Yesu a ləvey a vəhwa la, kaa aa dama dəba ama? Haa papaŋ nga papa aləkwa hay a məcam, ama ta vəhwa daa ba. Yaw, dəga nga mezley nga bəla haa wure kefe kwa cek ta mbədfey daa ba.»

⁵ Ndəhay maa guzlam anda kefe na, cek pal daha ta sɛrfadamara daa ba tesufe. Cek a na, ara Gazlavay ma ləma slam da vad ta slam da hwayak dəga zleezle ta fa mey anɣa masa anɣa maa guzlda. A ləma slam da hwayak na, ta yam. A wunkata yam ta hwiyak wal wal.

⁶ Asaya, Gazlavay a pasla bəla zleezle, a rəhda ta yam. A ka kəne na, ta fa mey anɣa meeguzley.

⁷ Ara ta fa mey anɣa meeguzley a, slam da vad ta slam da hwayak masa wure kefe a njeɣ haa pas masa Gazlavay ma da katar sariya nɣada ndəhay ta mebərey nɣaa zəfdata. Ta pas a nɣene, slam da vad ta slam da hwayak a daa wureɣ ta awaw.

⁸ Ama jam adaw hay, cek pal daha na, si ka sɛrfadamara. Sɛrmara, fa Bay Gazlavay na, dɛr pal anda mevey gabal, mevey gabal may anda dɛr pal.

⁹ Ndəhay siya a wulkam cek masa Bay Gazlavay ma ləvey a ka la heyey na, a wuseɣ vaw nga ka ba. Ara kəne ba. Anɣa fa səkwaɣwar ta dək-vaw maja a wufey kwa ndaw pal aa zədfey ba. Ama a wufey na, kwa waawa a mbəfda menjeɣ anɣa, a mbəkda mekey mebərey.

¹⁰ Pas masa Bay Mahura ma da vəhwa na, a da sawa dərfaɣay, anda ndaw-mayaɣ. Ta pas a nɣene, ndəhay a da cənam cek ma rəvey ta ɣədaŋ. Daa nɣene, slam da vad a da yeyihey. Awaw a da wawurta cek hay da gazlavay da

vad tabiya. Asaya, bəla ta cek hay da hwađ a cəpa a da yeyihey*.

¹¹ Da cek hay a tabiya a daa zəđam anda keđe na, maaya menjey akwar a mbafar a Gazlavay. Si ka vəldamara ray akwar fara fara a Gazlavay anda anğa ma wuđeey, ka səpmara Gazlavay a ta cəved e.

¹² Akwar na, fa səkwmaras pas masa Gazlavay ma da sawa nğa kar sariya a bəla. Anda keđe, kam cek ta gədañ akwar cəpa amba đar a, a wuswa fiyaw fiyaw. Ta pas a ngene, slam da vad a da wewurey, aa yihey cəpa, awaw a da wawurta cek hay da gazlavay da vad tabiya.

¹³ Gazlavay ta ləvndakwar la a da vəlndakwar slam da vad ta slam da hwayak mekele mawiya masa cek hay cəpa da hwađ a, a da key ta cəved e. Keđe he ara cek masa aləkwa ma səkwakwa.

¹⁴ Ara maja ngene, jam adaw hay, ya fa ləvkwar, daa masa akwar fa səkwmaras đar a ngene na, kam gədañ amba ka njam akwar ndəhay manjar mebərey, ndəhay maaya fa mey nğa Gazlavay, asaya, amba ka njam daa zazay ta anğa.

¹⁵ Sərmara dəba taw, Bay aləkwa Mahura Yesu *Kəriste na, fa səkwakwar ta dək-vaw, ta vəhwa fiyaw daa ba, maja a wuđeey ndəhay tabiya a mbəđdamara menjey ata amba a ləham daa mebərey. Keđe he ara cek masa məlma aləkwa Pawl, ndaw masa aləkwa ma wuđkwa kalah, ma wuzlalakwara daa leeter anğa hay. A wuzlalakwara na, ta leñgesl masa Gazlavay ma vəldara.

¹⁶ Daa leeter hay masa aa ma wuzlalata cəpa na, da aa faa guzley da ray mey a keđe na, aa guzley letək kəne. Daa leeter anğa hay a na, mey hay ta banay daha nğa cəney. Anda keđe, ndəhay marəzltakaya leñ ndəhay ma səra cek maaya maaya ba na, a mbəđdamara mey a wal, a wuzdamara ta cəved e ba, anda ata ma wuzdamara mey hay mekele daa đerewel nğa Gazlavay ta cəved e ba may. Ara anda keđe, ata ma handamawa mey a ray ata nğaa zəđdata.

Mey nğa madagway-dakw

¹⁷ Jam adaw hay, akwar na, ka sərmara, ala ma pamakwar leñgesl cay da ray cek hay a. Da ray ngene, wam vaw fa ndəhay ma nəsa mey nğa Gazlavay. Ka da vəlmatar cəved nğa batamakwar ba. Da daa ba na, a da

* **3:10 3.10** a da yeyihey: Ndəhay siya a wulkam mey Gerek a ləvey: «bəla ta cek hay da hwađ a cəpa na, Gazlavay a da katar sariya.» **3:10 3.10** 1Tes 5.1-2; 1Pi 4.7 **3:12 3.12-13** Iz 60.21; 1Kwr 6.9; CWJ 21.1, 27 **3:15 3.15** 3.9; Rm 2.4

zlanɗadadamakwar daa cøved masa akwar majaratakaya da hwaɗ a ŋgene †.

¹⁸ Ama sɔpmara Yesu *Køriste Bay aløkwa Mahura, ndaw ma læhdandakwar, anda akwar ma kamara mandaw mandaw, amba a slørwa maaya aŋga a ray akwar ma føna ma føna, asaya, amba ka sɔpmara Yesu a ma føna ma føna. Anja ndøhay ŋga hølmalamara døga wure keɗe haa ŋga sørmataw. [*Amen.]

† **3:17 3.17** cøved masa akwar majaratakaya da hwaɗ a ŋgene: A wuɗey ŋgaa guzley da ray metøbey-mey ata. **3:17 3.17** Mk 13.5; 1Kwr 10.12; 1Pi 4.7 **3:17 3.17-18** Jud 24-25 **3:18 3.18** 1.11

**Leeter masa
Jan
ma wuzlala ngeeme
Mey da ray
Leeter masa Jan ma wuzlala
ngeeme**

Leeter kede kwa mezøley nga ndaw da hwaɗ a daa ba na, ndəhay a wulkam ara Jan ma wuzlala. Asaya, ara anɗa ma wuzlala leeter nga dey cew e ta nga dey maakar a. Daa leeter hay a maakar ata na, mey da hwaɗ a, a səram ba ta mey daa *Mey-maaya-mawiya masa Jan ma wuzlala*. Ara Jan a ma wuzlala *Cek ma wuzar a Jan* may.

Jan ma wuzlalata leeter hay a kede na, anɗa maraw cay. A njeɗ da Efez. Daa nɗene Egəliz hay daa wura daa wura daha. Ndəhay mekele mekele fa pəkam nga wuzey mey a ndəhay daa berney hay. Ndəhay siya da wuzlah ata a wuzam mey maaya ba wal ta Mey-maaya-mawiya. Da ray nɗene, ndəhay a təbmara Mey-maaya-mawiya na, ara mey nga Gazlavay fara fara saba. A wulkam mebərey da ray ata daa ba. Yesu Kəriste ta sawa la a bəla anda ndaw-magədan na, a təbmara ba. Kwa a wudam mey nga Yesu ba. Meməcey anɗa na, ara cek nga tede nɗada ata.

Da ray nɗene, Jan a wuzlala leeter e kede na, a ləvey ndəhay a gwamara nga səmara Gazlavay, ray anɗa, ta Bəzey anɗa Yesu Kəriste. Ndaw nga Yesu fara fara na, ara ndaw ma wudta ndəhay nga Yesu siya hay.

Daa leeter e kede na, mey mekele mekele daha nga vəley gədan a ndəhay:

Gazlavay na, ara anɗa ma wada slam. Maaya na, ya njakwa daa mewedey a (1.5-7)

Da yaa cəfdakwa ambahw fa Gazlavay maja mebərey aləkwa na, a mbəkdandakwara la (1.8-10)

Ya da sərkwaa aləkwa bəza hay nga Gazlavay na, maja aləkwa fa wudkwa vaw (3.1-3)

Mey da ray mewudəy-vaw nga Gazlavay (4.7-10)

Mey da ray heter mendəvey ba (5.11-12)

Gazlavay fa jəkfatar sləmay fa bəz anɗa hay (5.14-15)

Mey da ray Yesu, ndaw ma vəltar heter a ndəhay

¹ Ya wuzlalakwara mey keɗe, da ray ndaw mezəley Mey * ɲga Gazlavay ma vɛltar heter a ndəhay. Dəga bəla ta zley daa ba arañ na, aɲga daha. Ndaw a na, ala ta cəndamara mey aɲga la ta sləmay ala, ala ta hətmar la ta dey ala. Fara fara, ala ta hətmar la, ala ta gəsfamar la ta har ala.

² Daa masa ndaw ma vɛltar heter a ndəhay a ma wuzwa vaw na, ala ta hətmar la. Da ray ɲgene, ala fa kam sede da ray a, ala fa wuzdamakwara mey da ray heter mendəvey ba masa aɲga ma vɛlda ha. Ndaw aha, aɲga da cakay Papa aləkwa Bay *Gazlavay, aɲga ta wuzndar vaw la.

³ Cek masa ala ma hətmar ta masa ala ma cəndamara na, ya wuzdamakwara may amba ya ɲjakwa macəmkaya pal. Ya ɲjakwa macəmkaya pal, asaya, aləkwa macəmkaya ta Papa aləkwa leɲ ta Bəzey aɲga, *Yesu *Kəriste.

⁴ Ya wuzlalamakwara mey a keɗe amba ya ɲjakwa daa meesəmey masa fara fara.

Mey da ray slam-mewedey

⁵ Gazlavay na, ara aɲga ma waɗa slam, ləvaɲ fa vɛɗa kwa nekəɗey daa ba. Keɗe ara mey masa ala ma cəndamərwa fa Yesu *Kəriste, ya kadamakwara.

⁶ Da ya ləvkwa aləkwa macəmkaya ta aɲga, anja aləkwa daa ləvaɲ cəɲga na, a key ɲgene, ya mbərزلakwa, aləkwa fa kakwa cek masa ta cəveɗ e daa ba.

⁷ Ama da aləkwa daa slam-mewedey anda Gazlavay manjakaya daa slam-mewedey na, aləkwa macəmkaya pal. ɲgene, mambaz ɲga Yesu, Bəzey aɲga, fa pərndakwara mebərey aləkwa tabiya.

⁸ Da ya ləvkwa aləkwa ndəhay ta mebərey ba na, ɲgene, a key ya təkna kwa ray aləkwa ta har aləkwa, mey masa fara fara daa mevel aləkwa daa ba.

⁹ Ama da aləkwa fa wuzdakwa mebərey aləkwa a Gazlavay na, anda keɗe, a mbəkɗandakwara mebərey aləkwa la, asaya, a pərndakwara mevel aləkwa, cek hay maaya ba tabiya fa aləkwa daa saba, maja aɲga na, a mbərزلey ba, a kata cek hay tabiya ta cəveɗ e.

¹⁰ Da ya ləvkwa aləkwa ta kakwa mebərey daa ba na, ya pakwa Gazlavay ɲga ndaw membərزلey, mey aɲga daa mevel aləkwa daa ba.

* **1:1 1.1** Mey: Feɗe na, «mey» ara Kəriste. Gazlavay a wuztar vaw a ndəhay na, ta fa Kəriste. Nəka Jan 1.1. **1:1 1.1** 2.13-14; Jan 1.1-2, 14; **heter:** 4.14; 6.35; 8.12; 11.25 **1:2 1.2** sede: Jan 15.27 **1:4 1.4** Jan 15.11 **1:5 1.5** 1Tm 6.16 **1:5 1.5-7** Jan 8.12 **1:6 1.6** 2.4 **1:7 1.7** 3.5; Iz 2.5; Heb 9.12; CWJ 1.5 **1:9 1.9** Ps 32.3-5

2

¹ Böz adaw hay, ya wuzlalakwara mey keđe amba ka kam mebörey saba. Ama, da ndaw ta key mebörey la na, ndaw ma lacafandakwar a ray daha da cakay Papa aləkwa. Ndaw aha ara Yesu Kəriste, ndaw manjar mebörey.

² Ara anğa ma vəlda ray anğa nğa məcey amba Gazlavay a mbəkđandakwara mebörey aləkwa. A məcey maja mebörey aləkwa daada ba, ama a məcey maja mebörey nğa ndəhay da bəla tabiya.

Mey da ray mewudəy-vaw

³ Da aləkwa fa nakwa ray a *mewey nğa Gazlavay na, ngene, ya sərkwā Gazlavay fara fara.

⁴ Da ndaw a ləvey a səra Gazlavay, ama a key cek anda Gazlavay ma wudəy ba na, ngene, ndaw aha a key a mbərzley, mey masa fara fara daa mevel anğa daa ba.

⁵ Ama ndaw ma key cek anda Gazlavay ma wudəy na, ndaw a, a wudā Gazlavay fara fara. Ngene, ya sərkwā aləkwa macəmkaya pal ta Gazlavay.

⁶ Ndaw masa ma ləvey anğa macəmkaya mandaw mandaw ta Gazlavay na, si menjey anğa a key anda nğa Yesu.

⁷ Jam adaw hay, mey da ray mekey cek masa Gazlavay ma wudəy masa yah ma wuzlalakwara keđe na, ara mewey mawiya ba, ama ara mewey zleezle, masa ka sərmara dəga akwar ma təbmara mey nğa Yesu təlam. Mewey masa zleezle keđe na, ara mey masa akwar ma cəndamara cay.

⁸ Ama ta ngene he cəpa, mewey masa yah ma wuzlalakwara keđe na, ara mewey mawiya. Mey masa fara fara da ray mewey a ta wuzwa cay ta fa menjey nğa *Kəriste. Akwar may, menjey akwar ta mbəđey sem mawiya. A sərey ara mewey mawiya na, maja ləvanj fa ndəvey, slam-mewedəy fara fara ta zlar cay nğa wedey.

⁹ Ndaw masa ma ləvey anğa manjakaya daa slam-mewedəy, ama a wudā məlmaha ba na, ngene, anğa daa ləvanj cənğa.

¹⁰ Ndaw masa ma wudā məlmaha na, ara ndaw masa daa slam-mewedəy, kwa cek ma gwa nğa təđda ndaw a aa mebörey daa ba.

¹¹ Ama ndaw ma wudā məlmaha ba na, anğa daa ləvanj, fa daw daa ləvanj, a səra slam masa anğa ma daw a hwad a ba, maja ləvanj ta tərda sem nğa wulaf.

¹² Bəz adaw hay, ya wuzlalakwara leeter keđe na, maja Gazlavay ta mbəkdakwara mebərey akwar sem, maja Yesu Kəriste.

¹³ Akwar masa papaŋ ŋga bəza hay, ya wuzlalakwara maja ka sərmara Yesu Kəriste, anğa daha dəga bəla ta zley daa ba aran. Akwar masa gula hay, ya wuzlalakwara maja akwar ta fənmara bay-malula sem ta gədan.

¹⁴ Bəz adaw hay, ya wuzlalakwara maja ka sərmara Gazlavay, Papa aləkwa. Akwar, papaŋ ŋga bəza hay, ya wuzlalakwara maja ka sərmara Yesu Kəriste anğa daha dəga bəla ta zley daa ba aran. Akwar, gula hay, ya wuzlalakwara maja akwar ta gədan, mey ŋga Gazlavay aa daa mevel akwar, akwar ta fənmara bay-malula sem ta gədan.

¹⁵ Ka da səpam ŋga njeŋ anda ndəhay da bəla keđe ba, kwa cek hay da bəla * ha na, ka da wuđam ba. Da ndaw a wuđey cek hay da bəla keđe na, a wuđa Gazlavay Papa aləkwa ba.

¹⁶ Bəla na, aa kwara? Ndəhay fa səpam cek hay maaya ba anda ata ma wuđam. Cek masa ata ma hətam fa ndaw na, a wuđam ŋgada ata. A zlapam da ray zleley ata hay. Cek hay a tabiya keđe na, a sawa ta fa Gazlavay, Papa aləkwa ba, ama ara cek hay ŋga bəla.

¹⁷ Sərmara bəla keđe na, a ndəvey la, ta cek hay da hwađ a tabiya masa ndəhay ma wuđam kalah. Ama ndaw ma key cek anda Gazlavay ma wuđey na, a da njeŋ ŋga sərmataw.

Mey da ray masa-gəra hay ŋga Kəriste

¹⁸ Bəz adaw hay, bəla gweegwe cay a ndəvey. Anda akwar ma cəndamara na, masa-gəra mahura ŋga *Kəriste a sawa la. Kwa wure keđe, masa-gəra hay ŋga Kəriste ga daha. Maja ŋgene, ya sərkwa bəla gweegwe cay a ndəvey.

¹⁹ Ndəhay a ŋgene, a bam da wuzlah aləkwa, ama mevel ata anda ŋga aləkwa ba. Da mevel ata anda ŋga aləkwa na, anja a njam macəmkaya ta aləkwa la, fa da bam daa ba. Ama ta bam sem. Mebey ata ŋgene, a wuzwa ata tabiya ara ndəhay aləkwa hay ba.

²⁰ Akwar na, Kəriste ta slərkwar *Mesəfney ŋga Gazlavay la a ray akwar amba a pakwar ŋgada anğa. Anda keđe, akwar tabiya ka sərmara mey masa fara fara da ray Kəriste he.

2:12 2.12 SNM 4.12 **2:13 2.13-14** 1.1-2 * **2:15 2.15** bəla: Fede «bəla» a wuđey ŋga ləvey cek hay cəpa ma mbafamar a Gazlavay ba. Nəka Jak 4.4. **2:15 2.15** Jak 4.4 **2:16 2.16** MM 27.20; Rm 13.14; Ef 2.3; Jak 4.16 **2:17 2.17** Mt 7.21; 1Kwr 7.31 **2:18 2.18** 4.3; Mt 7.15; 2Jŋ 7 **2:19 2.19** SNM 20.30
2:20 2.20 2.27

²¹ Ya wuzlalakwara na, maja ka sɛrmara mey masa fara fara ba daw? Kay! maja ɲgene ba. Ya wuzlalakwara na, maja ka sɛrmara mey masa fara fara, asaya, ka sɛrmara membɛrzley daa mey masa fara fara ha na, daa ba.

²² Ndaw membɛrzley na, ara wa? Ara ndaw masa ma lɔvey Yesu na, ara Kɛriste ba. Ndaw a ɲgene na, ara masa-gɛra mahura ɲga Kɛriste. Ndaw a, a rɛsa Papa alɛkwa Bay Gazlavay, asaya, a rɛsa Bɛzey aɲga.

²³ Kwa waawa ma rɛsa Bɛzey ɲga Gazlavay na, a key ɲgene, a rɛsa Bay Gazlavay Papanj may. Ama kwa waawa ma tɔba Yesu, ma lɔvey fa mey ɲga ndɔhay Yesu ara Bɛzey ɲga Gazlavay na, ndaw a ɲgene, a tɔba Bay Gazlavay Papanj la may.

²⁴ Akwar na, wam vaw da ray mey masa akwar ma cɛndamara dɛga akwar ma tɔbmara mey ɲga Yesu tɔlam, anja mey a ɲga njeɲ aa mevel akwar mandaw mandaw. Mey masa akwar ma tɔbmara ha, da aa daa mevel akwar na, akwar may, ka njam la macɛmkaya ta Bɛzey ɲga Gazlavay lej ta Papaha.

²⁵ Fara fara, Kɛriste ta lɔvey la a da vɛlndakwar cek. Cek a na, ara heter mendɔvey ba.

²⁶ Ya wuzlalakwara mey kedɛ da ray ndɔhay ma sɛpam cɛved ɲga zlanɲadadamakwar.

²⁷ Akwar na, Kɛriste ta slɛrkwar Mesɛfnɛɲ ɲga Gazlavay la a ray akwar amba a walakwar ɲgada aɲga. Da Mesɛfnɛɲ aɲga, aa da ray akwar na, ka sɛpam ndaw mekele ɲгаа sɛrkadakwar daa saba. Mesɛfnɛɲ a faa sɛrkadakwara cek hay tabiya. Cek masa aa maa sɛrkadakwara ha na, ara cek fara fara, membɛrzley da hwaɗ a daa ba. Da ray ɲgene, tɔbmara meesɛrkey aɲga, njam macɛmkaya ta Kɛriste.

²⁸ Ahaw, bɛz aɗaw hay, Kɛriste a wuzwa vaw la. Njam macɛmkaya pal ta aɲga amba pas a ma wuswa la na, ya zlurakwa fa mey aɲga ba, hwaray a kandakwar ba.

²⁹ Ka sɛrmara Kɛriste na, ara ndaw maaya ma ka cek ta cɛved e. Anda kedɛ, ka sɛrmara kwa waawa ma key cek ta cɛved e kɛne na, ara ndaw masa Gazlavay ma tɛrda sem ɲga bɛzey aɲga.

3

Ya da sɛrkwa alɛkwa bɛza hay ɲga Gazlavay na, kwara?

¹ Nɛkmara, Gazlavay Papa alɛkwa ma wuɗndakwar cey. A wuɗndakwar kalah, haa a lɔvey alɛkwa bɛz aɲga hay.

Fara fara aləkwa bəz anğa hay. Ndəhay da bəla keđe a sərmara Gazlavay ba. Ara maja nğene, a sərmindakwar aləkwa bəz anğa hay ba may.

² Jam adaw hay, aləkwa wure keđe bəza hay nğa Gazlavay. Gazlavay a da tərđandakwar nğada fa mey kwara na, ya sərkwa ba aran. Ama ya sərkwa fara fara pas masa *Kəriste ma da wuzwa vaw na, ya da tərkwaw letək anda anğa, maja ya hətkwar la fara fara anğa na, kwara.

³ Kwa waawa ma pa mewulkey anğa a ray mey a keđe na, si a wey vaw, a key mebərey ba anda Yesu Kəriste ma key mebərey ba.

⁴ Kwa waawa ma key mebərey na, a key nğene, a key həma a ray Gazlavay. Mekey mebərey na, ara mekey həma a ray Gazlavay.

⁵ Ka sərmara Yesu Kəriste a sawa a bəla keđe na, nğa ley mebərey nğa ndəhay. Anğa na, mebərey fa anğa daa ba səlak.

⁶ Anda keđe, kwa waawa macəmkaya ta anğa na, a key mebərey saba. Ama ndaw masa fa key mebərey na, ta hətar Yesu daa ba, ta səra Yesu fara fara daa ba.

⁷ Bəz adaw hay, ka da mbəkdamara ray akwar amba ndəhay a zlanğadadamakwar ba. Ndaw ma key cek ta cəved e na, anğa ndaw maaya anda Yesu Kəriste anğa ndaw maaya, ma ka cek ta cəved e.

⁸ Ndaw ma key mebərey mandaw mandaw na, anğa dasi har nğa bay-malula, maja bay-malula a zlar mekey mebərey na, dəga bəla ta zley daa ba aran. Yesu, Bəzey nğa Gazlavay, a sawa a bəla keđe na, nğa nəsa sləra nğa bay-malula ha.

⁹ Kwa waawa ma tərey sem bəzey nğa Gazlavay na, a key mebərey saba, maja *Mesəfney nğa Gazlavay fa key sləra daa anğa *. A gwa nğa key mebərey saba, maja Gazlavay ta tərda sem nğa bəzey anğa.

¹⁰ Ma wunkata bəza hay nğa Gazlavay, ta bəza hay nğa bay-malula na, me? Sərmara, ndaw ma key cek ta cəved e ba, da daa ba, ma wudfa məlmaha ba na, anğa bəzey nğa Gazlavay ba.

Mey da ray mewudfey-vaw

3:1 3.1 3.10; 4.6; Jan 1.12; 3.16 **3:2 3.2** 2Kwr 3.18; Fəl 3.21 **3:5 3.5** 1.7; 2.2; 4.10; Iz 53.9; Jan 1.29; 8.46; 2Kwr 5.21; Heb 4.15; 9.14; 1Pi 1.19; 2.22, 24; 3.18 **3:6 3.6** 3.9; 5.18; Jan 15.5; Rm 6.2, 14 **3:8 3.8** Mt 12.26-29; Jan 8.44

* **3:9 3.9** Mesəfney nğa Gazlavay fa key sləra daa anğa: Ta mey Gərek, a ləvey «hulfad nğa Gazlavay aa daa ndaw.» Ndəhay a ləvam «hulfad» a wudfey nğa ləvey «Mesəfney nğa Gazlavay». Ndəhay mekele a wulkam a ləvam hulfad ara «Mey nğa Gazlavay», da daa ba, ara «Heter mawiya». **3:10 3.10** 2.9, 29

11 Məlma adaw hay, wudkwa vaw. Yaw, mey a keđe na, ara mey masa akwar ma cəndamara dəga akwar ma təbmara mey ŋga Yesu təlām.

12 Wulkam da ray ndaw daha mezəley *Kayin †. Ka da kam cek anda anğa ba. Anğa na, aa dasi har ŋga bay-malula, a kəda məlmaha, mambaray a vagay. A kəda na, maja me? A kəda maja cek masa Kayin aha ma ka na, maaya ba fa dey ŋga Gazlavay, ama cek masa məlmaha ma ka na, maaya fa dey ŋga Gazlavay.

13 Məlma adaw hay, da masa ndəhay da bəla keđe a ŋgədamakwar ba na, ka da rəzlam ba.

14 Ya sərkwā aləkwa anda ndəhay maməctakaya saba, ama aləkwa ma hətkwa heter mendəvey ba cay. Ya sərkwā na, maja ya wudmatakwa məlma aləkwa hay. Ndaw masa ma wudəy vaw ba na, anğa anda ndaw maməckaya cəŋga.

15 Ndaw masa ma wudə məlmaha ba na, ara ndaw ma kədey ndaw vagay. Ka sərmara ndaw ma kədey ndaw vagay na, aa ta heter mendəvey ba daa ba.

16 Yesu *Kəriste ta vəlda ray anğa la maja aləkwa. Anda keđe, ya sərkwā mewudəy-vaw na, ta fa vəda. Yaw, anda anğa ma vəlda ray anğa ŋgada aləkwa na, si ya vəldakwa ray aləkwa ŋgada məlma aləkwa hay may.

17 Da ndaw cek anğa daha, a hətar məlmaha cek anğa daa ba, ama a sərfa dey-ceceh ba, a vəlar cek ba na, a da wudə Gazlavay na, kwara?

18 Bəz adaw hay, ka da wuzdamara mewudəy-vaw akwar ta fa mey meeguzley maaya maaya daada ba. Ama si ka wuzdamara mewudəy-vaw akwar fara fara ta fa sləra masa akwar ma kamara.

19-20 Da ray ŋgene, ya sərkwā aləkwa ta təbkwa mey masa fara fara la. Da mevel aləkwa a candakwar da ray cek masa aləkwa ma kakwa maaya ba na, ya sərkwā Gazlavay a fəna mewulkey aləkwa, a səra cek tabiya daa mevel aləkwa. Anda keđe, a dəkndakwar mevel la daa masa aləkwa fa dərkwa danğay.

21 Yaw, jam adaw hay, da mevel aləkwa fa candakwar daa ba na, ya da dərkwa danğay a Gazlavay ta mandərzay daa dey daa ba.

22 Ya gwakwa yaa cəfdakwa kwa meeme fa anğa, a vəldakwar la maja aləkwa fa təbkwa *mewey anğa hay, asaya, aləkwa fa kakwa sləra masa ma mbafar.

3:11 3.11 2.7-8; 4.11; Jan 13.34 † **3:12 3.12** Kayin: Ara bəzey mahura ŋga ata Adam ta Ev. **3:12 3.12** MC 4.8 **3:13 3.13** Jan 15.18 **3:14 3.14** 2.11; Jan 5.24; 13.35 **3:15 3.15** Mt 5.21-22; CWJ 21.8 **3:16 3.16** Jan 15.13; Gal 1.4; Fəl 2.17; 1Tes 2.8 **3:17 3.17** Mew 15.7 **3:18 3.18** Jak 2.15-17 **3:21 3.21** 2.28 **3:22 3.22** Jan 15.16

²³ Mewey anġa mahura na, ara mepey Bøzey anġa, Yesu Køriste, nġa ndaw aløkwa fara fara, asaya, ara mewudey-vaw da wuzlah aløkwa, anda Køriste ma løvndakwar.

²⁴ Kwa waawa ma tøba mewey hay nġa Gazlavay, ma key cek anda mewey hay a ma løvey na, ndaw a macømkaya ta Gazlavay, Gazlavay may, aa ta anġa. Ya sørkwa Gazlavay aa ta aløkwa na, ta fa me? Ya sørkwa ta fa Mesøfney anġa masa anġa ma vøldandakwara.

4

Mesøfney nġa Gazlavay a da søram ta mesøfney membørzley ndaw na, kwara?

¹ Jam adaw hay, ndøhay tabiya ma løvam ata ta *Mesøfney nġa Gazlavay na, ka da tøbmara mey ata ba. Si ka sanġalamata la dagay, amba ka sørmara da ata ta Mesøfney nġa Gazlavay fara fara kwa. Ya løvkwar anda keðe na, maja ndøhay ma pamara ray ata nġa ndøhay ma tøla mey nġa Gazlavay ga daa wura daa wura da bøla keðe daha.

² Yaw, kwa waawa ma løvey Yesu *Køriste a sawa ta fa Gazlavay da vad, ta tørey la nġa ndaw-magøðan na, ndaw a nġene, aa ta Mesøfney nġa Gazlavay. Ara anda keðe, akwar ma da sørmara ndaw ta Mesøfney nġa Gazlavay.

³ Ama kwa waawa ma tøba mey a keðe ba na, aa ta Mesøfney nġa Gazlavay daa ba. Mesøfney masa da ray anġa na, ara mesøfney nġa masa-gøra mahura nġa Køriste. Akwar ta cøndamara la masa-gøra mahura nġa Køriste a sawa la. Wure keðe, ta sawa cay, anġa da bøla cay.

⁴ Ama bøz adaw hay, akwar na, ndøhay nġa Gazlavay. Akwar ta kam bay-gula sem da ray ndøhay ma pamara ray ata nġa ndøhay ma tøla mey nġa Gazlavay, maja Mesøfney masa da ray akwar na, a føna mesøfney nġa bay-malula da ray ndøhay da bøla keðe ta gøðan.

⁵ Ndøhay ma pamara ray ata nġa ndøhay ma tøla mey na, ata ndøhay nġa bøla. Da ray nġene, aa guzlam mey nġa bøla. Ndøhay masa nġa bøla fa cønmatar mey.

⁶ Ama aløkwa na, ndøhay nġa Gazlavay. Ndaw ma søra Gazlavay na, a cønndakwar mey. Ndaw masa nġa Gazlavay ba na, a cønndakwar mey ba. Ya sørkwa ndaw masa ta Mesøfney fara fara nġa Gazlavay da ray, ta ndaw masa ta mesøfney membørzley ndaw na, anda keðe.

Mey da ray mewudfey-vaw nga Gazlavay

⁷ Jam adaw hay, wudkwa vaw da wuzlah aləkwa, maja mewudfey-vaw na, a sawa ta fa Gazlavay. Ndaw ma wudfey vaw na, Gazlavay ta tərda sem nga bəzey anğa, a sərə Gazlavay.

⁸ Ndaw ma wudfey vaw ba na, a sərə Gazlavay ba, maja cek masa Gazlavay ma ka tabiya na, a ka ta mewudfey-vaw.

⁹ Gazlavay ta slərdərwa Bəzey anğa mendulen la a bəla, amba ya hətkwa heter mendəvey ba ta fa anğa. Anda keđe, anğa fa wuzdərwa fara fara aa fa wudndakwar.

¹⁰ Ara aləkwa ma wudkwa Gazlavay teesəd ba, ama ara anğa ma wudndakwar teesəd. A slərwa Bəzey anğa, amba Bəzey anğa ha a vəlda ray anğa nga məcey amba Gazlavay a mbəkdandakwara mebərey aləkwa. Mewudfey-vaw na, anda keđe.

¹¹ Jam adaw hay, Gazlavay a wudndakwar kalah. Anda keđe maaya na, aləkwa may, si ya wudkwa vaw da wuzlah aləkwa.

¹² Gazlavay na, kwa ndaw ta hətar ta dey anğa daa ba. Ama da aləkwa fa wudkwa vaw da wuzlah aləkwa na, a wuzwa Gazlavay aa ta aləkwa, asaya, a wuzwa aləkwa fa wudkwa vaw fara fara anda Gazlavay ma wudndakwar.

¹³ Gazlavay ta vəldakwar Mesəfney anğa la. Maja ngene, ya sərkwā aləkwa macəmkaya ta Gazlavay, anğa may, aa ta aləkwa.

¹⁴ Papa aləkwa ta slərdərwa Bəzey anğa la amba a ləhdata ndəhay da bəla. Ala ta hətmar la ta dey ala, ala fa kam sede da ray a.

¹⁵ Da ndaw a ləvey Yesu ara Bəzey nga Gazlavay na, Gazlavay aa ta ndaw a, ndaw a may, macəmkaya ta Gazlavay.

¹⁶ Aləkwa na, ya sərkwā Gazlavay fa wudndakwar, aləkwa fa təbkwa aa mevel aləkwa, aa fa wudndakwar fara fara.

Gazlavay a ka sləra anğa tabiya ta mewudfey-vaw. Ndaw ma wudfey vaw na, aa macəmkaya ta Gazlavay, Gazlavay may, aa ta anğa.

¹⁷ Da ya wudkwa vaw fara fara anda Gazlavay ma wudndakwar na, ta pas masa Gazlavay ma da ka sariya na, ya zlurakwa daa ba, maja menjey aləkwa da bəla keđe anğa letek ta nga *Kərīste.

¹⁸ Ndaw ma wudɛy ndaw na, fa da zlurey ta sariya nga Gazlavay daa ba. Mewudɛy-vaw masa fara fara na, a bɛla mandɛrzay daa dey. Da ndaw fa zlurey na, ɲgene, mewudɛy-vaw nga Gazlavay fa key slɛra daa anɲa anda Gazlavay ma wudɛy daa ba, maja ndaw ta mandɛrzay na, fa zlurey ta banay ma da hɛtfar fa dɛba ɲga sariya.

¹⁹ Ya wudkwa vaw na, ara maja Gazlavay ma wudndakwar teesef.

²⁰ Da ndaw a lɛvey a wudɛa Gazlavay, ama a wudɛa mɛlmaha ba na, a key ɲgene, a mbɛrzley. Da a wudɛa mɛlmaha masa anɲa fa hɛtar ba na, a da wudɛa Gazlavay masa ta hɛtar ta dey anɲa daa ba sɛlak na, kwara?

²¹ Ndaw ma wudɛa Gazlavay na, si a wudɛa mɛlmaha may. Kede ara *mewey masa Kɛriste ma vɛldandakwara.

5

Ya fɛnkwa bɛla kede ta gɛdan

¹ Kwa waawa ma tɛba Yesu ara *Kɛriste, *ndaw masa Gazlavay ma wala ɲga lɛhdata ndɛhay na, anɲa ta tɛrey sem bɛzey ɲga Gazlavay. Kwa waawa ma wudɛa Gazlavay Papa alɛkwa na, a wudɛa bɛza hay ɲga Gazlavay may.

² Da ya wudkwa Gazlavay, asaya, da ya kakwa cek anda *mewey anɲa hay ma lɛvey na, ɲgene, ya sɛrkwa alɛkwa fa wudmatakwa bɛza hay ɲga Gazlavay.

³ Da ya kakwa cek anda mewey ɲga Gazlavay ma lɛvey na, a key ɲgene, ya wudkwa Gazlavay fara fara. Mewey anɲa ha, aa ta gɛra ɲga sɛpey ɲgada alɛkwa ba,

⁴ maja bɛza hay ɲga Gazlavay tabiya na, a fɛnmara bɛla ta gɛdan. Ya fɛnkwa bɛla kede ta gɛdan na, kwara? Ya fɛnkwa bɛla kede na, maja alɛkwa fa pakwa Yesu Kɛriste ɲga ndaw alɛkwa fara fara.

⁵ Ma fɛna bɛla na, wa? Ma fɛna bɛla na, si ndaw ma tɛba, Yesu na, ara Bɛzey ɲga Gazlavay.

Ma wuzda mey da ray Yesu Kɛriste fara fara na, me hay me?

⁶ Yesu *Kɛriste na, ara ndaw masa ma sawa a bɛla. A sawa na, ta hɛtey *baptem la ta yam. Mambaz anɲa ta mbɛdwa la daa memɛcey anɲa. A hɛtey na, baptem ta yam daada ba, ama mambaz anɲa ta mbɛdwa la daa memɛcey anɲa may. Asaya, *Mesɛfney ɲga Gazlavay ta wuzda la fara fara cek hay a ta kam la. Mesɛfney a, a mbɛrzley ba sɛlak.

⁷ Anda keŋe, cek hay maakar daha fa wuzdamərwa mey fara fara da ray Yesu.

⁸ Cek hay a na, ara Mesəfney ɲga Gazlavay, yam ɲga baptem, leɲ mambaz aɲga. Ata maakar ata, mey ata letek.

⁹ Aləkwa fa təbkwā mey masa ndəhay ma wuzdamara da ray cek masa ata ma hətmar. Mey masa Gazlavay ma wuzda na, a fəna mey ɲga ndəhay ma wuzdamara. Ara Gazlavay ta ray aɲga ma wuzda mey a da ray Bəzey aɲga.

¹⁰ Anda keŋe, ndaw masa ma təba Yesu, aɲga Bəzey ɲga Gazlavay na, a səra daa mevel aɲga mey a ara mey masa fara fara. Ama ndaw masa ma təba mey ɲga Gazlavay ba na, a pada Gazlavay ɲga ndaw membərzley, maja ta təba mey masa Gazlavay ma wuzda da ray Bəzey aɲga daa ba.

¹¹ Cek masa Gazlavay ma wuzdandakwara na, wura? Cek masa Gazlavay ma wuzdandakwara na, ara heter mendəvey ba masa aɲga ma vəldandakwara ta har Bəzey aɲga.

¹² Ndaw masa macəmkaya pal ta Bəzey ɲga Gazlavay na, aɲga ta heter mendəvey ba. Ndaw masa ta cəmey ta Bəzey ɲga Gazlavay daa ba na, aa ta heter mendəvey ba daa ba may.

Mey da ray heter mendəvey ba

¹³ Ya wuzlalakwara leeter keŋe ɲgada akwar ma pamara Yesu, Bəzey ɲga Gazlavay, ɲga ndaw akwar fara fara amba ka sərmara maaya maaya akwar ta hətam heter mendəvey ba cay.

¹⁴ Da aləkwa fa dərkwā daɲgay a Gazlavay na, ya zlurakwa ba maja ya sərkwā fara fara, da aləkwa faa cəfdafakwar cek masa mevel aɲga ma wudey na, ya hətkwā la.

¹⁵ Anda aləkwa ma sərkwā aɲga fa jəkfundakwar sləmay daa medərey-daɲgay aləkwa na, ya sərkwā ya hətkwā cek masa aləkwa maa cəfdakwā fa vəda la may.

¹⁶ Da ndaw a hətar məlmaha fa key mebərey, da mebərey a, ara mebərey ma hendey ndaw aa meməcey ba na, si a kar ambahw a Gazlavay maja aɲga. Da mebərey ɲga məlmaha ara mebərey ma hendey ndaw aa meməcey ba na, ɲgene, Gazlavay a vələr heter la. Mebərey ma hendey ndaw aa meməcey na, daha. ɲgene, ya ta ləvey ɲga key ambahw a Gazlavay maja mebərey a daa ba.

¹⁷ Cek hay maaya ba hay tabiya masa ndaw ma ka na, ara mebərey. Ama mebərey siya na, a hendey ndaw aa meməcey ba.

¹⁸ Ya sərkwā kwa waawa ma tərey sem ŋga bəzey ŋga Gazlavay na, a key mebərey saba, maja Yesu, Bəzey ŋga Gazlavay, fa jəɗa. Anda keɗe, bay-malula fa da gwa ŋga kar cek daa ba.

¹⁹ Ya sərkwā aləkwa na, ndəhay ŋga Gazlavay, asaya, ya sərkwā ndəhay da bəla keɗe tabiya ata dasi har ŋga bay-malula.

²⁰ Ya sərkwā Bəzey ŋga Gazlavay na, ta sawa la a bəla, ta vəlndakwar lenɟesl la amba ya sərkwā Bay Gazlavay, ndaw masa fara fara. Aləkwa macəmƙaya pal ta Gazlavay, ndaw masa fara fara ha, ta fa Bəzey aŋga, Yesu *Kəriste. Aŋga na, ara Gazlavay ndaw masa fara fara, ara aŋga ma vəltar heter mendəvey ba a ndəhay.

²¹ Bəz adaw hay, wam vaw, ka da səpam mey ŋga kuley hay ba.

**Leeter masa
Jan
ma wuzlala nga dey cew
Mey da ray
Leeter masa Jan ma wuzlala nga
dey cew**

Leeter nga Jan nga dey cew e keɗe na, ara ngada Dam-mamaha ta bɛz anɗa hay. Anda melɔvey, ngada ndɔhay daa mecɔmey-ray nga Yesu (aya 1). Mey daa leeter e keɗe na, anɗa gweegwe anda leeter masa ngeeme. A lɔvtar da ya wudkwa Bay Gazlavay fara fara na, ya wudkwa vaw da wuzlah alɔkwa la may (aya 4 haa 6). Asaya, a lɔvtar nga wam vaw fa ray ata amba aa zɛɗdamara mawurbay nga slɔra ata ba (aya 7 haa 11). Jan a vɔltar gɔɗanɗ amba a pamara Yesu nga ndaw ata fara fara mandaw mandaw. A ndɔvda leeter anɗa ha, a lɔvtar a sawa la fa ata amba a kam mafay dey ta dey. A kadatare ndɔhay daa Egɔliz mekele ma camatar har (aya 12 haa 13).

Mecey-har

¹ Ara yah, ndaw-maraw * da wuzlah bay-ray hay nga ndɔhay nga Yesu ma wuzlala ɗerewel keɗe.

Ya wuzlalakawa ngada kah, Dam-mama aɗaw † masa Gazlavay ma wala lenɗ ngada bɛz akah hay, akwar masa yah ma wudkwar fara fara. Ara yah taava aɗaw ma wudkwar daada ba, ama ndɔhay tabiya ma sɔrmara mey nga Gazlavay masa fara fara, a wudmakwar may. Ya wudmakwar na,

² maja mey fara fara ha aa daa mevel alɔkwa. A da njeɗ ta alɔkwa nga sɔrmataw.

³ Anja *Gazlavay, Papa alɔkwa, ta *Yesu *Kɔriste, Bɔzey nga Papa alɔkwa ha, nga pɔsmandakwar mey, nga sɔrfamandakwar dey-ceceh, nga njadamandakwar daa za-zay, alɔkwa masa ma tɔɓkwa mey masa fara fara, asaya, alɔkwa masa ma wudkwa vaw da wuzlah alɔkwa.

Mey da ray mewudfey-vaw fara fara

* **1:1 1.1** ndaw-maraw: Ndɔhay a wulkam «ndaw-maraw» na, ara Jan. † **1:1 1.1** Dam-mama aɗaw: Har-gɔɗanɗ nga ndɔhay a wulkam «dam-mama aɗaw» a wudfey nga lɔvey Egɔliz. Anda keɗe, «bɛz akah hay» ara ndɔhay daa Egɔliz e. **1:1 1 3** 1

⁴ Ya faa səmey ga maja ya nəka na, bəz akah hay siya fa səpmara mey masa fara fara anda Papa aləkwa ma ləyndakwar.

⁵ Yaw, Dam-mama adaw, ehe wure keɗe, ya fa kaka ambahw, ya ləvka, wudkwa vaw da wuzlah aləkwa. Ya wuzlalaka keɗe na, ara *mewey mawiya ba, ama ara mewey masa aləkwa ma sərkwa dəga aləkwa ma təbkwa mey ŋga Yesu təlam.

⁶ Gazlavay a ləvkwar, wudam vaw da wuzlah akwar. Keɗe ara mewey masa akwar ma cəndamara dəga akwar ma təbmara mey ŋga Yesu təlam.

Mey da ray masa-gəra hay ŋga Kəriste

⁷ Ndəhay ma mbəzlam hay ga daa wura daa wura da bəla keɗe daha. Yesu *Kəriste ta tərey sem ŋga ndaw-magədaŋ na, ndəhay ma mbəzlam hay a ŋgene a təbmara mey a ba. Ndəhay ma təbmara ba ha na, ara ndəhay ma mbəzlam, ata masa-gəra hay ŋga Kəriste.

⁸ Maja ŋgene, wam vaw fa ray akwar, amba kaa zəɗdamara mawurbay ŋga sləra akwar ba. Anda keɗe, cek hay tabiya masa Gazlavay ma diya maja akwar na, ka hətam la.

⁹ Sərmara, mey masa Kəriste maa sərkadandakwara na, kwa waawa ma səpa mey a ta cəved e ba, a pey mey mekele a dey a na, ndaw a macəmkaya ta Gazlavay daa ba. Ama ndaw ma səpa mey masa Kəriste maa sərkadandakwara na, ndaw a macəmkaya ta Gazlavay, Papa aləkwa, leŋ ta Bəzey aŋga.

¹⁰ Ara maja ŋgene, ya fa ləvkwar, da ndaw a sawa fa akwar, a wuzkwar mey mekele wal da ray Kəriste na, ka da təbmara ndaw a, a way akwar ba, kwa ka da camar har ba.

¹¹ Sləra maaya ba masa ndaw a ma ka na, ndaw ma car har na, anda a kamara cew e.

Mey ŋga madagway-dakw

¹² Yaw, ya wudfey ŋgaa guzlkwar da ray cek hay ga, ama ya wudfey ŋga wuzlalakwara fa ɗerewel ba. Ya wulkey ŋga daw fa akwar, yah ta ray adaw, ya da njakwa cew e, ya kakwa maday, amba ya njakwa daa meesəmey masa fara fara.

¹³ Bəza hay ŋga Dam-mamakw † masa Gazlavay ma wala a camaka har.

1:4 4 3Jŋ 3 **1:5 5-6** Jan 13.34; 1Jŋ 4.11 **1:6 6** Jan 14.15; 1Jŋ 2.5; 5.3 **1:7**
7 1Jŋ 2.18 **1:9 9** 1Jŋ 2.23 **1:10 10** Rm 16.17 **1:12 12** 3Jŋ 13-14 † **1:13**
1.13 Bəza hay ŋga Dam-mamakw: Feɗe a wudfey ŋga ləvey ndəhay daa Egəliz ŋga ata Jan.

**Leeter masa
Jan
ma wuzlala nga dey maakar
Mey da ray
Leeter masa Jan ma wuzlala nga
dey maakar**

Leeter nga Jan nga dey maakar a na, ara ngada ndaw nga Yesu daha mezoley Gayus. Annga ndaw daa mecəmey-ray nga ndəhay nga Yesu masa ndəhay da hwaɗ a fa cəmam ɗay daa ba. Jan aa həmda Gayus maja annga fa təba mey nga Gazlavay, a mbəkda ba (aya 2 haa 3).

Daa leeter e Jan taa guzley la saya da ray Diyawtəref len da ray Demetəriyus. Diyawtəref na, a wuɗey nga key bay-ray, ama aa guzley mey saw da ray Jan, a təbta ndəhay nga Yesu masa mələk hay ma diyam a way annga ba, asaya, a bəta ndəhay ma təbmata mələk hay a daa mecəmey-ray a (aya 9 haa 10). Ama Demetəriyus na, ndəhay faa həmdamara, annga fa key cek maaya (aya 12).

Daa leeter keɗe na, mey hay mahura maakar daha:
Metəbey ndəhay nga Yesu masa mələk hay
Mey da ray mewuɗey-vaw
Menjey daa mey nga Gazlavay mandaw mandaw.

Mecey-har

¹ Ara yah, ndaw-maraw * da wuzlah bay-ray hay nga ndəhay nga Yesu ma wuzlala ɗerewel keɗe.

Ya wuzlala ngada kah, Gayus, jam aɗaw masa yah ma wuɗa fara fara.

² Jam aɗaw, ya səra menjey akah daa cəved nga *Gazlavay annga maaya. Ya wuɗey ka njeɗ ta zazay, cek nga kaka ba.

³ Ya taa səmey la ga ta pas masa mələma aləkwa hay ma samawa, maja ta kam sede la da ray kah, a ləvmaya, kah ndaw ma səpa cəved nga Gazlavay fara fara, ka fa key cek mandaw mandaw anda mey masa fara fara ma ləvey.

⁴ Yaw, cek maa səmdaya ma fəna na, ara yah ma cənda bəz aɗaw hay fa səpmara mey masa fara fara.

Mey da ray menjəney ndəhay ma ka sləra nga Kəriste

* 1:1 1.1 ndaw-maraw: Ndəhay a wulkam «ndaw-maraw» na, ara Jan. 1:1
1 2Jn 1 1:3 3 2Jn 4

⁵ Jam adaw, ka fa jënta mөлma alөkwa hay daa *mecөmey-ray nga ndөhay nga *Yesu, kwa mөлak hay may. Ngene ara cek ma wuzda kah ndaw ma key cek ta cөved e.

⁶ Mөлman hay a ta kadamara la fa mey nga ndөhay daa mecөmey-ray fedө, a lөvam kah ta wudta la kalah. Ya fa kaka ambahw amba ka jënta daa mepөkey ata. Ka da jënta ha na, anda Gazlavay ma wudөy.

⁷ Sөra, ata na, ta mbөkdamata way ata hay sem, fa pөkam nga key slөra ngada *Kөriste. Daa mepөkey ata ha na, cek da har ndөhay ma tөba mey nga Yesu ba na, ta tөbam daa ba.

⁸ Anda kedө, alөkwa na, maaya ya jөntakwa ndөhay a, amba ya cөmkwa daa slam a nga wuzөy mey masa fara fara.

Mey da ray ata Diyawtөref ta Demetөriyus

⁹ Ya ta wuzleley leeter mecөhe la a ndөhay daa mecөmey-ray akwar, ama Diyawtөref a wudөy nga tөba mey a ba, maja a wudөy nga key *bay-ray nga ndөhay tabiya.

¹⁰ Da ray ngene, ta pas masa yah ma wusey la fa akwar na, ya kadakwara slөra hay maaya ba tabiya masa anga ma ka la. Anda melөvey, ya da kadakwara mey hay saw masa anga maa guzlda ta sөlөn masa anga ma ka da ray ala. Cek hay maaya ba masa anga ma ka na, ara kedө daada ba. A gөmey nga tөbta mөлma alөkwa hay masa mөлak hay ma diyam a way anga ba. Asaya, a tөkta ndөhay daa mecөmey-ray masa ma wudam nga tөbmata mөлak hay a. A bөlta ndөhay ma tөbmata mөлak hay a daa mecөmey-ray.

¹¹⁻¹² Ama Demetөriyus na, ndөhay tabiya faa hөmdamara. Menjey anga daa cөved fara fara fa wuzdөрwa, anga ndaw maaya. Kwa ala may, ya lөvam kөne da ray a. Yaw, ka sөra mey masa ala maa guzldamara na, ara mey fara fara. Jam adaw, ndөhay ma kam cek hay maaya ba na, ka da key cek anda ata ba, ama key cek anda ndөhay ma kam cek maaya. Ndaw ma key cek maaya na, anga ndaw nga Gazlavay, ama ndaw ma key cek maaya ba na, a sөra Gazlavay ba.

Mey nga madagway-dakw

¹³ Ya wudөy ngaa guzлка da ray cek hay ga, ama ya wudөy nga wuzlalakawa ta wuzleley ba.

¹⁴ Ya fa wudөy nga daw fa kah daa dөr hay a kedө. Anda kedө, ya da njakwa cөw e, ya kakwa maday.

¹⁵ Anja Gazlavay nga njadaka daa zazay.

Jam akah hay fede a camaka har. Catar har a jam aləkwa
hay fetede pal pal tabiya may.

Leeter masa Jud ma wuzlala Mey da ray Leeter masa Jud ma wuzlala

Leeter keɗe ara Jud ma wuzlalatarã ngada ndøhay ma tøba mey nga Yesu tabiya. Jud a na, ara mølmanŋ nga Jak (aya 1). Ndøhay a wulkam ara Jud masa mølmanŋ nga Yesu Køriste (Mt 13.55).

Jud a wuzlala leeter e na, maja ndøhay faa sarkadam ndøhay ta membørzley, asaya, maja ndøhay fa kam cek søfteleh køne (aya 3 haa 4). Anda keɗe a wudfey nga tøkta. Daa aya 6 haa 13 na, mey a ata gweegwe letek ta daa 2 Piyer 2.1 haa 3.3.

Jud a wuzlala na, fa lawa mey hay mekele mekele daa Mejøwey-mey Magurma. A wuzda banay ma da sawa a ray ndøhay ma tømbara mewudfey-vaw nga Gazlavay ba (aya 3 haa 13), banay ma da sawa a ray ndøhay ma kam cek hay malamba (aya 4, 7, 16) leŋ a ray ndøhay ma fæcmatarã cek hay nga ndøhay mekele (aya 11, 16). A wuzey mey da ray cek ma key ta ndøhay da Sadawm ta Gwamar zleezle. Jud a vøltar gødanŋ a ndøhay nga Yesu amba a nam ray a meesarkedey masa ata ma cøndamara ngeeme.

Daa leeter e keɗe na, mey maaya daha nga vøley gødanŋ a ndøhay:

Menjey ta Yesu na, kwara (aya 20 haa 21)

Mecey-har

¹ Ara yah, Jud, ma wuzlalakwara leeter keɗe. Yah na, ndaw ma ka sløra nga *Yesu *Køriste, asaya, yah mølmanŋ nga *Jak*.

Ya wuzlala leeter keɗe ngada akwar, ndøhay masa mazøltakaya ta fa Gazlavay, Papa aløkwa, akwar masa Gazlavay fa wudkwar, masa Yesu Køriste fa nøkfakwar dey.

² Anja *Gazlavay nga sørfakwar dey-ceceh, nga njadakwar daa zazay, asaya, nga wudkwar ma føna ma føna.

* **1:1 1** Jak: Jud ma løvey anga mølmanŋ nga Jak na, anda meløvey anga mølmanŋ nga Yesu Køriste (Mk 6.3). Jud ta løvey «yah mølmanŋ nga Yesu» na, daa ba. A løvey «yah mølmanŋ nga Jak» maja a wudfey nga zlepey ba. Jak a na, ara ndaw ma wuzlala leeter nga Jak. **1:1 1** Mt 13.55; Mk 6.3 **1:2 2** 2Pi 1.2

Jud a wuzlala dferewel keɗe na, maja me?
(2 Piyer 2.1-17)

³ Jam adaw hay, ya fa kəɗey vaw ŋga wuzlalakwar da ray heter mendəvey ba masa Gazlavay ma vɔldandakwara. Ama ya nəka na, si ya wuzlalakwara leeter keɗe amba ya vɔlkwar gəɗaŋ ŋga təɓey *Mey-maaya-mawiya ŋga Gazlavay mandaw mandaw, amba ndəhay a zləɓmara mey a ba. Mey-maaya-mawiya ha, ara mey masa aləkwa ma təɓkwa, masa Gazlavay ma vɔlda ŋgada ndəhay aŋga hay. Mey a, a mbəɗey ba səlak, a da njeɣ kəne ŋga sərmataw.

⁴ Ya ləvkwar anda keɗe na, maja ndəhay masa ma namar ray a Gazlavay ba ta mbəzam la a wuzlah akwar ta mayal a. A mbəɗdamara mabaraŋga mey da ray maaya ŋga Gazlavay amba a kam cek saw anda mevel ata mewuɗey. Da ray ŋgene, a ləvam Gazlavay a vɔley cəveɗ a ndaw ŋga key cek malamba. Asaya, Yesu *Kəriste, ndaw pal ma wey da ray aləkwa, masa Bay aləkwa Mahura pal na, a rəsmara, a təɓmara saba. Ndəhay ma namar ray a Gazlavay ba kəne na, mawuzlalakaya dəga zleezle daa dferewel ŋga Gazlavay, Gazlavay a da katar sariya.

Mey da ray cek ma da sawa a ray ndəhay ma zləɓmara mey ŋga Gazlavay

⁵ Ya wuɗey yaa guzlkwar da ray cek masa akwar ta sərmarara cay. Akwar fa sərɗadamara Bay Gazlavay ma ləhdatərwa ndəhay aŋga hay daa hwayak ŋga *Ejip, ba diya? Ama, fa dəɓa ha, ndəhay da wuzlah ata masa ma rəsmara mey aŋga na, Gazlavay ta kəɗta sem vagay.

⁶ Asaya, sərɗadamara maslaŋ hay ŋga Gazlavay da vad siya. Sləra maaya masa Gazlavay ma vɔldatara na, ta rəsmara sem, ta mbəkdamara sem, asaya, ta mbəkdamara slam ata menjeɣ sem. Da ray ŋgene, Gazlavay a pata aa slam-ləvaŋ daa vəgeɗ, a jəwta ta calalaw ŋga sərmataw, amba a katar sariya ta pas ŋga sariya mahura.

⁷ Asaya, sərɗadamara berney hay ŋga *Sadawm ta ŋga *Gwamar leŋ slala hay mekele ta cakay. Ndəhay daa slam hay a ŋgene, fa kam cek maaya ba anda maslaŋ hay ŋga Gazlavay heyey. A kam cek malamba, a səpam ŋga ley vaw ta cek saw masa ŋga key ba. Gazlavay ta sərɗata banay la ta awaw mendəvey ba. Banay ata ha, a wuzwa cek masa Gazlavay ma da ka ŋgada ndəhay malamba hay.

⁸ Yaw, ndəhay ma zləɓmara mey ŋga Gazlavay a ŋgene na, fa kam cek malamba anda ndəhay daa berney hay

a. Daa masa ata fa nam na, mesəfney fa katar, fa veltar mewulkey nga ley vaw saw, a təbmara Bay Gazlavay nga wey da ray ata ba, a cədmata maslan hay nga Gazlavay daa slam-mewedey da vad.

⁹ Kwa Misel, maslan mahura nga Gazlavay da vad na, ta cəda *Satan daa ba. Misel e, ta kam mey la ta Satan da ray vagay nga *Mawiz. Daa masa ata fa kam mey na, Misel e, a wudey nga key cek ma fənar ray ba, anda kedə ta cəda daa ba, ama a ləvar na, «Bay Gazlavay nga sərdaka banay!»

¹⁰ Ama ndəhay ma zləbmara mey nga Gazlavay a na, faa guzlam maaya ba da ray cek masa ata ma sərmara ba. Ata anda cek hay nga ley masa ma sərmara mewulkey ba. Da ray ngene, ndəhay a, aa zəddamata ray ata maja cek hay masa ata ma sərmara ba ha.

¹¹ Banay a da hətfatar, maja ata fa kam mebərey anda *Kayin †. Asaya, ata fa kam cek malamba nga hətey dala anda Balam ‡ ma ka zleezle. A təbmara mewey nga Gazlavay ba anda Kware § ma təba ba may. Da ray ngene, a məcam la anda Kware may.

¹² Masa akwar ndəhay ma təba mey nga Yesu, fa zəmam dəf daa slam a na, ndəhay a, a samawa nga key gwagway ta akwar ta hwaray daa dey daa ba, a nəsmara, a nəkam dey na, fa ray ata gway. Da ray ngene, ata na, anda gazlavay nga var masa memed ma handa, ama a pey var ba. Ata na, anda wudez hay, masa kwa ta kiya ma yey babəza na, wudez hay a, a yam ba. Ata na, anda wudez hay makwalatakaya masa madəslkaya da wurza.

¹³ Ata na, a wam vaw ba anda vanəwala nga yam ma cewesley saw kəne. Mebərey ata a wuzwa anda manəwafakw da ray yam. Ata na, fa mbəkdamara cəved nga Gazlavay anda wurzla hay ma mədam da gazlavay da vad. Maja ngene, Gazlavay ta dıytar slam la, matara ləven ləven nğada ata nga sərmataw.

¹⁴ Zleezle Henakw, ndaw daa səkway nga *Adam nga dey maasala, taa guzley la da ray cek ma da katar a ndəhay

1:8 8 2Pi 2.10 **1:9 9** Mew 34.6; Zak 3.2; 2Pi 2.11; **Misel:** CWJ 12.7 **1:10 10** 2Pi 2.12 † **1:11 11** Kayin: Ara ndaw ma vəlar cek nğada Gazlavay ta mevel maaya ba. Gazlavay a təba cek anğa ha ba. A cey mevel a ray Gazlavay, ta', a kəda məmaha Abel vagay. (MC 4.3-8.) ‡ **1:11 11** Balam: Ara ndaw ma wudey nga nəsa səkway nga Israyel, ama Gazlavay ta vəlar cəved daa ba. A wudey nga ka anda kedə maja Balak, bay nga Mawap hay, fa da vəlar dala. (Mesl 22.1-35.) § **1:11 11** Kware: Ara ndaw Jəwif daa səkway nga Levi. A wudey ata Mawiz ta Aranəw nga kam bay-ray ba. A wudey nga key anda ndaw ma ka kwakwas nga Gazlavay, ama masa ta zla sləra ha daa ba aranəw na, Gazlavay taa zəddata sem ta ndəhay da way anğa hay tabiya aa vəged. (Mesl 16.1-35.)
1:11 11 Kayin: MC 4.3-8; 1Jn 3.12; **Balam:** Mesl 22.7, 17; 1Pi 2.15; **Kware:** Mesl 16.1-34 **1:12 12** 2Pi 2.13, 17 **1:13 13** Iz 57.20; 2Pi 2.17

malamba hay a. A løyey: «Ehe, Bay Gazlavay a sawa la ta maslan anga hay ga da vad masa ndaw ma gwa nga sløfta ba.

¹⁵ A sawa na, nga key sariya a ndøhay tabiya. A sərdata banay la ta ndøhay ta mebørey tabiya. A da sərdata banay na, maja ata ma namar ray a Gazlavay ba, maja cek malamba tabiya masa ata ma kamara ma mbafar a Gazlavay ba, asaya, maja ata maa guzlam maaya ba da ray a.»

¹⁶ Ndøhay a na, mevel fa catar mandaw mandaw, faa nguram mey a ray ndøhay siya. A kam cek maaya ba anda ata ma wudam, a zlapam, a fəcmatara cek hay nga ndøhay ngada ata.

Cek masa ndøhay daa cøved nga Yesu ma da kamara

¹⁷ Jam adaw hay, akwar fa sərfadamara mey masa ndøhay mesløyey nga Bay aløkwa Mahura Yesu *Køriste ma wuzdamakwara zleezle da ray cek ma da key heyey, ba diya?

¹⁸ A løywakwar na, ta pas masa bøla gweegwe a ndøyey na, ndøhay a samawa la ngaa senjgørey a ray akwar, akwar ndøhay ma søpa cøved nga Gazlavay. Fa da namar ray a Gazlavay daa ba, a da kam cek maaya ba masa mevel ata ma wudøy.

¹⁹ Yaw, ara ndøhay a ma da handamawa mewudkey-døy a wuzlah ndøhay. Mewulkey nga bøla fa wata, *Mesøfney nga Gazlavay da ray ata daa ba.

²⁰ Ama akwar, jam adaw hay na, kam gødøy da wuzlah akwar amba ka tøybmarā *Mey-maaya-mawiya nga Gazlavay ma føna ma føna. Døram dangøy ta gødøy nga Mesøfney nga Gazlavay.

²¹ Sørmara, Gazlavay fa wudkwār kalah, njam daa maaya anga. Søykwmarā pas masa Bay aløkwa Mahura Yesu Køriste ma da vøldakwar heter mendøyey ba maja maaya anga ta dey-ceceh anga.

²² Søram dey-ceceh fa ndøhay ma wulkam cew cew da ray mey nga Gazlavay, jønmata.

²³ Vamatørwa daa awaw, løydamatørwa. Ngada ndøhay mekele saya na, sørfamatar dey-ceceh, ama wam vaw ta ata amba aa zøfdamakwar ba. Zana ata hay na, ata ta døyay maja mebørey ata. Anda kedø, kwa ka da gøsfamatar har ba.

Hølmakwa Bay Gazlavay

²⁴ Kakwa suse a Gazlavay, Gazlavay masa an̄ga ta gədan̄ n̄ga jədkwar amba ka mbəkdamara cəved̄ an̄ga ba. A mbəkdamara mebərey akwar, a gwa a handakwar manjar mebərey aa slam-mewed̄ey fa mey an̄ga ta meesəmey ga.

²⁵ Kakwa suse a Gazlavay, ara an̄ga pal Bay Gazlavay. Ara an̄ga ma ləhdandakurwa ta fa Bay aləkwa Mahura Yesu *Kəriste. Anja ndəhay tabiya n̄ga həlmamara. An̄ga Gazlavay Mawaca-waca ta gədan̄ ma wey da ray ndəhay tabiya, dəga bəla ta zley daa ba aran̄, haa wure ked̄e, asaya, haa n̄ga sərmataw. *Amen.

Cek masa Yesu Kəriste ma wuzar a Jan Mey da ray derewel nga Cek ma wuzar a Jan

Jan a wuzlala mey daa derewel keđe ngada ndəhay nga Gazlavay na, daa masa ata fa səram banay maja mey nga Yesu Kəriste. Bay Rawma zleezle a pa ray anğa na, nga Gazlavay, a kəđdata vaw ta ndəhay daa mecəmey-ray nga Yesu, maja a gəmam nga pamara anda Gazlavay ba. Anda keđe, Jan a wufey nga vəltar gədaŋ a ndəhay nga Gazlavay, amba a mbəkdamara Yesu ba. Asaya, Jan a wufey nga ləvtar na, fara fara, Yesu Kəriste a fənta masa-gəra anğa hay la cəpa ta gədaŋ.

Daa derewel e keđe na, Jan a wuzey cek hay ga ma rəzla ndaw. Cek hay a na, Jan a hətatar anda mesəfney ma kar. Ara Yesu Kəriste ma wuzdara. Fa dəba ha, a wuzlalatərwa cek hay a. Cek hay masa anğa ma hətatar na, mawatakaya ta cek hay mekele mekele. Pəles mabara, da daa ba, anğwa mabara a wufey nga ləvey «mekey bay-gula». Pəles magaza ta kiya magaza a wufey nga ləvey «meməcey, vəram, banay». Bəlay a wufey nga ləvey, slam-menjeý nga masa-gəra nga Gazlavay (13.1). Gədem a wufey nga ləvey Satan, bay-malula (20.2-3). Berney nga Babilanw a wufey nga ləvey slam masa ndəhay fa kam cek hay maaya ba da hwađ a. Daa slam mekele mekele cek hay masa anğa ma hətatar na, ata maasala (nəka 1.4; 1.12; 1.16; 5.1; 5.6; 8.2; 10.3; 12.3, leŋ 15.6). Fa Jəwif hay na, cek hay maasala a wufey nga ləvey cek hay a «makatakaya maaya maaya, mambəkakaya daa ba.»

Daa fasəlawal 1 haa 3 na, leeter hay maasala daha mawuzlalatakaya ngada ndəhay nga Yesu daa berney hay maasala masa daa hwayak nga Azi. Daa fasəlawal 4 ta 5 aa guzley da ray Yesu, Bəz-təbaŋ nga Gazlavay na, ara ndaw pal taava anğa ma wusa nga wura derewel mapadəkaya masa maslərbəkaya ta tebed. Daa fasəlawal hay siya na, Jan aa guzley da ray cek ma da key ta pas masa Yesu ma wura derewel mapadəkaya heyey sem. Derewel keđe fa wuzda ta fa Yesu Kəriste na, Gazlavay a fənta masa-gəra anğa hay la cəpa ta gədaŋ, leŋ Satan, bay ata.

Daa derewel e keđe na, mey mekele mekele daha nga vəley gədaŋ a ndəhay:

Yesu fa zøley fa mey-slam nga ndaw a, ndaw a (3.20)
 Maaya nga Gazlavay ma da sawa a ray ndaw ma jøkey
 slømay fa mey anga (1.3)
 Ndøhay ta maslan hay masa da vad a hølmmamara Bay
 Gazlavay na, kwara (fasølawal 4 haa 5)
 Da Jeruzelem mawiya ndøhay fa da søram banay daa saba
 (22.3-4)

Mey ngeeme

¹ Derewel kefe a wuzdørw a cek masa *Yesu *Køriste ma wuzdatara ngada ndøhay ma ka sløra anga hay. *Gazlavay a løvar a Yesu: «Wuzdatara cek hay masa yah ma da ka ngada fa mey nekøfey.» Da ray ngene, Yesu Køriste ta', a slørw a maslan anga da vad ngada fa ndaw ma ka sløra anga *Jan, amba a wuzdara cek hay a kefe tabiya.

² Cay, Jan ta', a key sede da ray cek masa anga ma høtar tabiya. Anda meløvey, a wuzdatara a ndøhay, a løvey: «Kefe he ara mey nga Gazlavay fara fara, ara Yesu Køriste ma wuzdørw a.»

³ Maaya nga Gazlavay a sawa la a ray ndaw ma da janga dèrewel e kefe fa mey nga ndøhay. Maaya nga Gazlavay a sawa la a ray ndøhay ma jøkam slømay fa mey a kefe. Mey a na, a wuzda cek ma da key. Asaya, maaya nga Gazlavay a sawa la a ray ndøhay ma tømbara mey mawuzlalakaya ha maja cek hay a tabiya daa dèrewel e kefe gweegwe cay a kam.

Jan a catar har a ndøhay daa Egøliz hay maasala

⁴ Ara yah, *Jan, ma wuzlala leeter kefe. Ya cakwar har ngada akwar ndøhay nga Yesu daa *mecømey-ray hay maasala daa hwayak nga Azi.

Anja Gazlavay nga pøskwar mey, asaya, nga njadakwar daa zazay. Anga na, aa daha døga bøla ta lømey daa ba aran, haa kasl wure kefe, anga daha, asaya, a sawa la a bøla. Anja mesøfney hay maasala masa ma njam fa mey nga slam-menjey nga Bay Gazlavay nga pøsmakwar mey, nga njadamakwar daa zazay may.

⁵ Asaya, anja Yesu *Køriste, ndaw ma key sede da ray Gazlavay fara fara ta cøved e, nga pøskwar mey, nga njadakwar daa zazay. Anga na, ara ndaw ngeeme ma sløkdawa daa memøcey. Anga na, Bay ma wey da ray bay hay cøpa da bøla.

Yesu Kəriste he, a wuɗndakwar kalah. Ta məcey la maja aləkwa. Ta fa mambaz aŋga ma mbəɗwa daa meməcey aŋga, a ləhdandakwar daa mebərey.

⁶ Aŋga na, ta cəmndakwar ray la amba a tərɗandakwar ŋga ndəhay aŋga hay, a key bay aləkwa. Anda keɗe, aləkwa ndəhay ma ka kwakwas ŋga Bay Gazlavay, Papaha. Ara aŋga ndaw masa ta gəɗaŋ, ndaw masa fa həlmamara ŋga sərmataw. *Amen.

⁷ Nəkmara, Yesu a fa sawa daa mekwtene. Kwa waawa a hətar la ta dey aŋga. Kwa ndəhay masa ma sləkmara ta zəwet * a hətmar la may. Ndəhay da bəla tabiya, a təwam la maja aŋga. Fara fara cek aha a da key kəne. Amen.

⁸ Bay Gazlavay masa ta gəɗaŋ ma fənta cek hay cəpa, a ləvey: «Yah na, ndaw masa ŋgeeme, asaya yah ndaw madagway-dakw.» Aŋga na, aa daha dəga bəla ta ləmey daa ba araŋ, haa kasl wure keɗe, aŋga daha, asaya, a sawa la a bəla.

Yesu a wuzar vaw a Jan

⁹ Ara yah, *Jan, məlmakw akwar. Aləkwa macəmkaya ta Yesu, aləkwa fa sərkwa banay anda aŋga, aləkwa fa bəskwa banay anda aŋga, aŋga fa wey da ray aləkwa tabiya. Yah na, ta kərzamaya la, ta', a kəzlamaya a Patmaws, hwayak da wuzlah bəlay, maja yah ma wuzey mey ŋga Gazlavay, asaya, maja yah ma wuzda Yesu *Kəriste na, ara cəved masa fara fara.

¹⁰ Pas pal daha, ara ta pas mesərfedey Bay Mahura Yesu, *Mesəfney ŋga Gazlavay ta sawa la a ray aɗaw. Daa ŋgene, ya cəney ɗay maa guzlya ta fa dəba aɗaw, anda taalam ma fey ta gəɗaŋ.

¹¹ Day a, aa guzlya, a ləvey: «Cek masa kah ma hətar keɗe, maaya na, ka wuzlala aa ɗerewel amba ka slərɗatara ŋgada mecəmey-ray hay maasala ŋga ndəhay ŋga Yesu daa berney ŋga Efez, daa berney ŋga Səmirna, daa berney ŋga Pərgam, daa berney ŋga Tiyatir, daa berney ŋga Sardes, daa berney ŋga Filadelfi, leŋ daa berney ŋga Lawdise.»

¹² Masa ɗay a maa guzlya la na, pəla! ya mbəɗwa dey a fa dəba, amba ya hətar ndaw masa maa guzlya heyey. Ama

1:5 1.5 2.26; 7.14; 19.15; Kwa 1.18; Heb 9.14; 1Jn 1.7 **1:6 1.6** 5.10; 20.4, 6; 22.5; Mab 19.6; 1Pi 2.9 * **1:7 1.7** ndəhay masa ma sləkmara ta zəwet: A wuɗey ŋga ləvey sewje pal masa ma sləka heyey daada ba. Ama a wuɗey ŋgaa guzley da ray ndəhay tabiya masa ma cəmdamara ɗay ata ŋga kəɗey Yesu, kwa Jəwif hay, kwa mahura hay ŋga Jəwif hay, kwa bay-ray hay ŋga Rawm may. **1:7 1.7** 1.13; Dan 7.13; Mt 24.30; Jan 19.34, 37; 1Tes 4.17 **1:8 1.8** 1.4, 8; 2.8; 4.8; 11.17; 16.5; 21.6; 22.13; Mab 3.14; Iz 44.6 **1:9 1.9** 22.8 **1:10 1.10** 17.3 **1:11 1.11** 4.5

ya da nōkey dey na, a ray petərļa hay ŋga bōrey magaza maasala ma wadām pəlŋged pəlŋged.

¹³ Da wuzlah petərļa hay a na, ya hōtey cek anda ndaw. Aŋga ta zana maazōma fa vaw kasl a dōba salay. Daa dadak aŋga na, cek anda zewed ŋga bōrey magaza majōwkaya.

¹⁴ Eŋgwec ŋga ray ŋga ndaw aha a wedey mabara ndōd-nded anda gagōmay. Bōz ŋga dey aŋga, a ley dey anda awaw.

¹⁵ Asaya, salay aŋga a wedey njēlay njēlay anda bōrey ma bawa daa awaw. Aa guzley dāy mahura, a cōney anda yam daa maajōrav mahura.

¹⁶ Ndaw aha, aŋga ta wurzļa hay maasala makōrzatakaya da har-zōmay aŋga. Dōlaw masa mey a makōdkaya dey cew e cew e fa bawa da mey aŋga. Dey aŋga a wedey anda pas ma wedey ta wuzlah-pas.

¹⁷ Masa yah ma hōtar la anda kedē na, tad! ya tōdey asi salay aŋga anda ya ta mōcey sem. Aŋga may, ta', a tōdōrwa har-zōmay aŋga, a pa a ray adaw, a lōvya: «Ka da zlurey ba! maja yah na, ndaw masa ŋgeeme, asaya yah ndaw madagway-dakw.

¹⁸ Yah na, ndaw masa ta dey. Ya ta mōcey la, ama nōkmara, ya ta slōkdāwa sem daa memōcey. Ya da njeŋ ta dey ŋga sōrmataw. Yah ta gōdan ŋga wey da ray memōcey, asaya yah ta gōdan ŋga wey da ray slam masa ndōhay mamōctakaya ma njam da hwad a.

¹⁹ Ya fa lōvka saya, wuzlalata cek hay masa kah ma hōtatar. Wuzlalata cek hay masa kah ma hōtatar wure kedē, asaya wuzlalata cek hay masa ma da kam kwa ŋgada fa mey cōpa may.

²⁰ Ehe, mabara ŋga mey da ray wurzļa hay da har-zōmay adaw ta petərļa hay maasala heyey. Wurzļa hay maasala a wudēy ŋga lōvey, maslan ŋga masa Gazlavay ma slōrdatōrwa ta da vad, ma pata pal pal aa Egōliz maasala heyey. Yaw, petərļa hay maasala may a wudēy ŋga lōvey Egōliz hay maasala.»

2

Mey masa Yesu ma slōrdatara ŋgada ndōhay daa Egōliz da Efez

¹ Ndaw a heyey aa guzlya saya, a lōvey: «Kah, *Jan, wuzlala mey adaw masa yah ma daa guzldakawa kedē amba ka slōrdara ŋgada maslan ŋga Gazlavay ma jōda

mecəmey-ray nga ndəhay adaw hay daa berney nga Efez. Ləvtar na,

keđe he ara mey adaw, yah, ndaw ta wurzla hay maasala da har-zəmay. Asaya, yah, ndaw ma pəkey da wuzlah petərļa hay maasala ma wadām.

² Yaw, ya səra menjey akwar, ya səra akwar fa kəfdamara vaw ta menjey a, asaya ya səra akwar fa bəsmara banay. Ya səra akwar fa vəlmatar cəved ngada ndəhay malamba hay nga samawa a wuzlah akwar daa ba. Ndəhay malamba hay a, a ləvam, ata ndəhay adaw hay meslərey, anja ngene, ara ndəhay adaw hay meslərey ba. Akwar ta sanjalamara mey ata la, ka sərmara na, ara ndəhay membərzley.

³ Akwar ta bəsmara banay la maja yah, ka ta gəram daa ba.

⁴ Ama mey pal daha. Akwar fa wudməya * anda ngeeme daa saba. Maja ngene, ya wudəy nga mbədkwar ray da ray a.

⁵ Wulkam da ray menjey akwar masa maaya zleezle. Nəkmara taw, wure keđe akwar ta vəhmawa sem a dəba. Anda keđe, si ka mbəfdamara menjey akwar, ka səpmara Gazlavay ta mevel pal, amba menjey akwar a, a key anda zleezle cənga. Da daa ba na, ya sawa la nga la petərļa akwar daa slam aha.

⁶ Ama taa slam lanjar na, ya faa həmdakwar ara mey ba, maja akwar fa wudām nga jəkey sləmay fa meesərkeđey nga ndəhay nga Nikwala † daa ba səlak. Yah may, ya wudəy meesərkeđey ata ba.

⁷ «Anda keđe, da ndaw, anja ta sləmay na, si a jəkey sləmay nga cəney mey masa *Mesəfney nga Gazlavay ma wuzdatara ngada mecəmey-ray hay nga ndəhay adaw hay. Da ndaw ta fəna bay-malula sem ta gədan na, ya da vəlar cəved nga zəmey babəza nga wudez masa daa jerne nga Gazlavay ma vəley heter mendəvey ba.»

Mey masa Yesu ma slərdatara ngada ndəhay daa Egəliz da Səmirna

⁸ Ndaw a heyey aa guzlya saya, a ləvey: «Kah, *Janj, wuzlala mey adaw masa yah ma daa guzldakawa keđe amba ka slərdara ngada maslanj nga Gazlavay ma jəda mecəmey-ray nga ndəhay adaw hay daa berney nga Səmirna. Ləvtar na,

2:1 2.1 1.16, 20; Ef 1.1 2:2 2.2 2Kwr 11.13; 1Jn 4.1 * 2:4 2.4 akwar fa wudməya: Ndəhay mekele a cəndamara mewudəy-vaw ara mewudəy-vaw da wuzlah ndəhay daa mecəmey-ray nga ndəhay nga Yesu. 2:5 2.5 2.16, 22; 3.3, 19 † 2:6 2.6 ndəhay nga Nikwala: Ara ndəhay maa sərkdam mey nga Yesu ta cəved e ba. A batamata ndəhay nga key cek malamba. 2:7 2.7 22.2, 14, 19; MC 2.8-9; 3.22; Ez 28.13; 31.8; Mt 13.9, 43

keɗe he ara mey aɗaw, yah na, ndaw masa ɲgeeme, asaya yah ndaw madagway-dakw. Yah, ndaw masa ta mæcey la, ama ya ta sləkɗawa sem daa memæcey a.

⁹ Ya sɛra banay akwar, ya sɛra akwar ndəhay masa-viya hay. Ama fara fara, ya kadakwara, akwar ndəhay masa-zleley hay. Ya sɛra ndəhay faa guzlam mey maaya ba da ray akwar may. Ndəhay a ɲgene a padamara ray ata ɲga *Jəwif hay, ama ara Jəwif hay ba, ara ndəhay ɲga *Satan, bay-malula.

¹⁰ Menjey nekəɗey feɗe ka da sɛram banay, ama ka da zluram ta banay a ba. Nəkmara, Satan, bay-malula, a da kəzlata ndəhay siya da wuzlah akwar aa fərsəne, amba a jadakwar. Da ray ɲgene, ka sɛram banay la haa ɗar kuraw. Njam majaratakaya maaya maaya haa kasl fa memæcey akwar, anda keɗe, ya vəkwar heter mendəvey ba la maja akwar ta kam bay-gula sem.

¹¹ «Anda keɗe, da ndaw, aɲga ta sləmay na, si a jəkey sləmay ɲga cəney mey masa *Mesəfney ɲga Gazlavay ma wuzdatara ɲgada mecəmey-ray hay ɲga ndəhay aɗaw hay. Yaw, da ndaw ta fəna bay-malula sem ta gəɗaɲ na, fa da mæcey ɲga dey cew daa saba səlak.»

Mey masa Yesu ma slɛrdatara ɲgada ndəhay daa Egəliz da Pərgam

¹² Ndaw a heyey aa guzlya saya, a ləvey: «Kah, *Jan, wuzlala mey aɗaw masa yah ma daa guzldakawa keɗe amba ka slɛrdara ɲgada maslaɲ ɲga Gazlavay ma jəɗa mecəmey-ray ɲga ndəhay aɗaw hay daa berney ɲga Pərgam. Ləvtar na,

keɗe he ara mey aɗaw, yah, ndaw masa ta dələw masa mey a makəɗkaya dey cew e cew e.

¹³ Ya sɛra berney masa akwar da hwaɗ a ɲgene. Ara berney masa *Satan, bay-malula, fa wey da hwaɗ a. Akwar ndəhay ma pamaya ɲga ndaw akwar fara fara, akwar fa təbmaya anda Bay akwar cəɲga, kwa ta pas ata ma kəɗmara Antipas vagay fa mey akwar na, akwar ta mbəkdamaya daa ba. Yaw, Antipas na, ara ndaw masa ma gərey ba ɲga key sede da ray aɗaw.

¹⁴ Ama mey hay siya daha na, ya wuɗey ɲga mbəɗkwar ray nekəɗey da ray a cəɲga. Ndəhay siya da wuzlah akwar fa təbmara meesərkedey ɲga ndaw mezəley Balam zleezle. Balam a taa sərkada bay daha la mezəley Balak ɲga təkната

*Israyel hay nga zomey aslaw nga kuley, ta nga ley vaw saw da palah.

¹⁵ Ndohay mekele hay da wuzlah akwar fa kam anda Balam a may, fa taknam ndohay ta meesarkedey nga ndohay nga Nikwala.

¹⁶ Anda kede, si ka mboddamara menjey akwar da bala. Da daa ba na, menjey nekodhey fedde, ya sawa la a wuzlah akwar nga kodhey vaw ta ndohay a ngene ta delaw ma bawa da mey adaw heyey.

¹⁷ «Anda kede, da ndaw, anga ta slomay na, si a jokey slomay nga coney mey masa *Mesofney nga Gazlavay ma wuzdatara ngada mecamey-ray hay nga ndohay adaw hay. Da ndaw ta fona bay-malula sem ta godan na, ya velar cek mezomey la masa yah ma da bada ngada anga. Asaya, ya da velar ngada ndaw a, ndaw a anywa mabara kerew kerew, masa mezoley mawiya mawuzlalakaya fa veda. Mezoley ngene kwa ndaw ma sera daa ba. Ma sera na, si ndaw masa mezoley a maveldakaya ngada anga.»

Mey masa Yesu ma slordatara ngada ndohay daa Egeliz da Tiyatir

¹⁸ Ndaw a heyey aa guzlya saya, a lovey: «Kah, *Jan, wuzlala mey adaw masa yah ma daa guzldakawa kede amba ka slordara ngada maslan nga Gazlavay ma jedfa mecamey-ray nga ndohay adaw hay daa berney nga Tiyatir. Lovtar na,

kede he ara mey adaw, yah, Bezey nga Gazlavay. Bezey nga dey adaw, a ley dey anda awaw. Salay adaw hay na, a wadam njelay njelay anda borey maakulfakaya.

¹⁹ Ya sera slora akwar. Fara fara ya sera na, akwar fa wufam vaw da wuzlah akwar. Asaya, akwar fa tobmara mey adaw, akwar fa bismara banay maja yah. Akwar fa jenam vaw da wuzlah akwar. Cek hay a tabiya masa akwar ma kamata ngene, ta fennmara masa akwar ma kamata zleezle sem.

²⁰ Ama mey pal daha na, ya wufey nga mbodkwar ray da ray a, maja akwar fa velmar coved a ngwas mezoley Jezebel ngene nga taknakwar. A pa ray anga anda *ndaw ma tela mey nga Gazlavay ngaa serkadata ndohay ma ka slora adaw hay. Meeserkey a ngene, fa teknata nga ley vaw saw da palah ta nga zomey aslaw nga kuley.

21 Ya ta vølar ðar nekøðey la ngada Jezebel e nga mbødda menjey anga da bøla, ama ta gømey daa ba, fa key cek hay malamba cønga.

22 Anda keðe, ya da køzla ngwas aha fa guzer nga macay amba a sørey banay. Yaw, ndøhay ma lam vaw saw † ta anga may, ya da sørdara banay ga anda anga. Da daa ba na, si a mbøðdamara menjey ata da bøla, si a mbøkdamara mejøkey slømay fa mey nga Jezebel e kwa.

23 Asaya, ya da køðta bøz anga hay vagay amba mecømey-ray hay nga ndøhay aðaw hay cøpa a sørmara ara yah ma gwa nga nøka mewulkey nga ndøhay ta cek hay ma mbafatar. Akwar cøpa, ya pølkwara mawurbay akwar la tøðe fa sløra nga ndaw a, ndaw a.

24 «Akwar ndøhay siya daa mecømey-ray nga ndøhay aðaw hay daa berney nga Tiyatir, akwar ta tøbmara mey nga ngwas Jezebel ngene heyey daa ba, akwar taa sørkadamara mey nga *Satan masa ndøhay ma zølmara “mey mabadakaya”, daa ba may. Ya fa da køtkwar fa cek mekele daa ba,

25 si ka tøbmara mey masa akwar ma cøndamara keðe aa mevel akwar, haa kasl pas masa yah ma da vøhwa a bøla.

26 Anda keðe, da ndaw ma føna Satan, bay-malula, sem ta gøðan, asaya, da ta tøba mey aðaw la haa mendøvey nga bøla na, ya da pa amba a wey da ray ndøhay daa hwayak hay tabiya.

27-28 Gøðan masa yah ma da vølar a ndaw a ngene na, ara gøðan masa Papay ma vøldiwa. Ta fa gøðan a, a da tørey nga bay masa ta gøðan anda zlanday nga børey. Da ray ngene, a da køðta ndøhay malamba hay anda ndaw ma wuhey mangayak hay. Asaya, ndaw ma sørey banay maja yah na, ya da vølar batay § ma weðey njuzl a ta slam ngaa pørek.

29 «Anda keðe, da ndaw, anga ta slømay na, si a jøkey slømay nga cøney mey masa *Mesøfney nga Gazlavay ma wuzdatara ngada mecømey-ray hay nga ndøhay aðaw hay.»

3

Mey masa Yesu ma slørdatara ngada ndøhay daa Egøliz da Sardes

† 2:22 2.22 Meley-vaw saw da palah feðe kaa na, a wuðey nga løvey meney ray ngada cek mekele aa slam a nga Gazlavay. 2:23 2.23 22.12; Jer 11.20

2:25 2.25 3.11 2:26 2.26-27 12.5; 19.15; Ps 2.8-9 § 2:27-28 2.27-28 batay: wurzla-banay. A wuðey nga løvey ndaw aha ta tørey bay-gula sem. 2:27-28 2.28 22.16

¹ Ndaw a heyey aa guzlya saya, a løyey: «Kah, *Jan, wuzlala mey adaw masa yah ma daa guzldakawa kefe amba ka slørdara ngada maslanj nga Gazlavay ma jøfa mecømey-ray nga ndøhay adaw hay daa berney nga Sardes. Løvtar na,

kefe he ara mey adaw, yah, ndaw ta mesøfney hay maasala nga Gazlavay, leñ ta wurzla hay maasala makørzatakaya da har.

«Ya søra sløra akwar. Ndøhay a løyam, akwar ndøhay masa ta dey, ama akwar anda ndøhay mamøctakaya.

² Fara fara, sløra akwar fa mey nga Gazlavay ngene na, a høcey. Anda kefe, sløkdøam, kam gødanj, amba kaa zødam nga sørmataw fa mey nga Gazlavay ba.

³ Sørfadamara mey nga Gazlavay masa akwar ma cøndamara zleezle, mey masa akwar ma tøbmara. Tøbmara mey a aa mevel akwar, namar ray. Mbøfdamara menjey akwar da bøla, søpmara Gazlavay ta mevel pal. Da akwar ta sløkdøam daa ba na, ya sawa la a wuzlah akwar dørfafay anda ndaw-mayal, akwar fa da sørmara pas a masa yah ma da sawa ha daa ba.

⁴ Ama ta ngene cøpa, ndøhay siya hay da wuzlah akwar fetefede da Sardes, ta dakalamata zana ata hay daa ba. Ya da pøkam daa slam a ta zana mabara, maja ya nøkta na, ata tøfe nga pøkam ta yah.

⁵ Anda kefe, ndaw ma føna bay-malula sem ta gødanj na, ya da køzlar zana mabara fa vaw. Mezøley anja mawuzlalakaya daa dørewel nga ndøhay ma da høtam heter mendøvey ba na, ya fa da vavøsa daa ba. Ya da løyey ta gødanj fa mey nga Papay, Bay Gazlavay, ta maslanj anja hay na, kefe he, ara ndaw adaw.

⁶ «Anda kefe, da ndaw, anja ta slømay na, si a jøkey slømay nga cøney mey masa *Mesøfney nga Gazlavay ma wuzdatara ngada mecømey-ray hay nga ndøhay adaw hay.»

Mey masa Yesu ma slørdatara ngada ndøhay daa Egøliz da Filadelfi

⁷ Ndaw a heyey aa guzlya saya, a løyey: «Kah, *Jan, wuzlala mey adaw masa yah ma daa guzldakawa kefe amba ka slørdara ngada maslanj nga Gazlavay ma jøfa mecømey-ray nga ndøhay adaw hay daa berney nga Filadelfi. Løvtar na,

kefe he ara mey adaw, yah, ndaw nga Gazlavay, yah ndaw ma mbørzley ba sølak. Yah ndaw ma kørza lekøle

ma wura mey-slam nga slam masa Bay Davit ma wa. Da ya ta wura mey-slam a la na, kwa ndaw mekele ma gwa ma gërca daa saba. Yaw, da ya ta gërca sem may, kwa ndaw mekele ma gwa nga wura daa ba sölak.

⁸ «Ya sëra slëra akwar. Asaya, ya sëra, akwar ta gëdan nekëdey gway. Ama ta ngene he cëpa, akwar fa tëbmara mey adaw ta mevel pal cënga, akwar ta mbëkdamara mey adaw daa ba. Ehe, ya ta wurkwar mey-slam la, kwa ndaw pal ma gwa nga gërca daa ba.

⁹ Jëkam slëmay maaya maaya fa cek masa yah ma da katara ngada ndëhay daa mecëmey-ray nga *Satan, bay-malula. Ndëhay a ngene a padamara ray ata nga *Jëwif hay, ama a mbërzlam, ata Jëwif hay ba. Nëkmara, cek masa yah ma da ka: ya da tëktar dëy a ndëhay a, amba a samawa, a ragadam fa mey akwar. Anda kefe, a da sërmara ya fa wudkwar kalah.

¹⁰ Akwar ndëhay adaw hay, akwar ta tëbmara mey adaw la, akwar ta bësmara banay la maja yah. Da ray ngene, ta pas masa banay ma da sawa a ray ndaw a, ndaw a, amba Gazlavay a nëka mevel nga ndëhay cëpa da bëla na, ya nëkfakwar dey la.

¹¹ Fara fara, menjey nekëdey fëde ya sawa la. Anda kefe, si ka pamara mey masa akwar ma cëndamara kefe aa mevel akwar maaya maaya, amba ndaw a gwa nga vakwara mawurbay masa yah ma da vëldakwara ba. Mawurbay a na, ara heter mendëvey ba.

¹² Anda kefe, ndaw ma fëna bay-malula sem ta gëdan na, ya da njada a cakay Gazlavay nga sërmataw. Kwa cek ma da badërwa a palah daa ba sölak. Ya da wuzlala mezëley nga Gazlavay adaw fa vëda leñ mezëley nga berney nga Gazlavay adaw. Anda melëvey, berney a na, ara *Jeruzelem mawiya, berney masa Gazlavay ma da slërdërwa ta da vad. Asaya, ya wuzlala mezëley adaw masa mawiya la fa ndaw a ngene.

¹³ «Anda kefe, da ndaw, anga ta slëmay na, si a jëkey slëmay nga cëney mey masa *Mesëfney nga Gazlavay ma wuzdatara ngada mecëmey-ray hay nga ndëhay adaw hay.»

Mey masa Yesu ma slërdatara ngada ndëhay daa Egëliz da Lawdise

¹⁴ Ndaw a heyey aa guzlya saya, a lövey: «Kah, *Jan, wuzlala mey adaw masa yah ma daa guzldakawa kefe amba ka slërdara ngada maslan nga Gazlavay ma jëda

mecəmey-ray nga ndəhay adaw hay daa berney nga Lawdise. Ləvtar na,

keđe he ara mey adaw, yah, ndaw mezəley Amen. Asaya, ara yah, ndaw ma key sede da ray Gazlavay fara fara ta cəved e, ya mbərzley ba səlak. Gazlavay a katərwa cek hay tabiya na, ta fa yah.

¹⁵ Ya səra sləra akwar. Sləra akwar a, a mbafaya ba, maja akwar fa səpmara cəved adaw ta mevel pal daa ba. Akwar fa wudmaya maaya maaya daa ba, asaya akwar fa rəsmaya daa ba, akwar na, baŋ ta baŋ gway. Kay, yah na, ya wudəy ka njam baŋ ta baŋ kəne ba.

¹⁶ Da ka njam baŋ ta baŋ ta yah, anda keđe na, ya da kəzlakwar a hwayak ta gədan, anda ndaw ma kərdəwa cek maaya ba da mey.

¹⁷ «Ka wulkam na, akwar ndəhay masa-zleley hay, akwar ta zleley ara mey ba. Asaya, ka wulkam na, cek ma həcfakwar daa ba səlak. Ama fara fara akwar ndəhay masa-viya hay na, ka səpmara, ba daw? Ya nəkakwar na, ka kamaya dey-ceceh. Akwar masa-viya hay ta vaw ba' kəne. Akwar wulaf hay.

¹⁸ Anda keđe, ya fa kətkwar. Samawa, hədkam bərey magaza ma wedəy njəlay njəlay fa yah, amba ka təram ndəhay masa-zleley fara fara. Samawa, hədkam zana hay mabara nga kəzley fa vaw amba ndəhay a hətmakwar akwar vaw ba' kəne saba. Anda keđe, hwaray fa da kakwar daa saba. Asaya, samawa, hədkam slalak nga dey, amba ka hətmar dey njəd-njed, akwar wulaf hay saba.

¹⁹ Kwa waawa masa yah ma wudə na, ya mbədar ray, ya kəta. Da ara anda keđe na, si akwar, ndəhay da Lawdise, ka kam gədan nga mbədey menjey akwar da bəla, ka səpmara Gazlavay ta mevel pal.

²⁰ Ehe, wure keđe ya fa lecey fa mey-slam nga ndaw, ya fa zəley fa mey-slam a. Yaw, da ndaw a, ta cənda dəy adaw la, asaya, da ta wuryawa mey-slam a la na, ya da mbəzey fa anga amba ya zəmam dəf daa slam a, yah ta anga, anga ta yah.

²¹ Yah, ndaw ma fəna bay-malula sem ta gədan, ala manjatakaya ta Papay, Bay Gazlavay daa slam anga menjey. Anda keđe, da ndaw ma fəna bay-malula sem ta gədan na, ya da vəlar cəved amba a sawa, ya njam cew e aa slam adaw menjey.

²² «Anda keđe, da ndaw, anga ta sləmay na, si a jəkey

sləmay ɲga cəney mey masa *Mesəfney ɲga Gazlavay ma wuzdatara ɲgada mecəmey-ray hay ɲga ndəhay adaw hay.»

4

Mehəsley-ray ɲgada Bay Gazlavay da vad

¹ Fa dəba ha, yah, *Jan, ya hətey cek mekele saya. Ya hətey na, mey-slam da vad mawurkaya. Ya cənda dəy ɲga ndaw maa guzlya ɲgeeme heyey. Day a, a cənwa ɲga gədan anda taalam ma fey, a ləvya: «Təpwa fedə a vad amba ya wuzdakawa cek masa ma da key ɲgada fa mey.»

² Menjey nekədəy na, *Mesəfney ɲga Gazlavay ta', a sawa a ray adaw. Fetədə da gazlavay da vad, ya da nəkey dey na, a ray slam-menjey ɲga bay. Ndaw manjakaya da ray a.

³ Ndaw aha a mbey kalah anda aɲgwa hay maaya ma wadəm pəlɲged pəlɲged daa pas. Slam-menjey a mazlərkaya ta kwalay. Kwalay a, a wədəy kalah may anda aɲgwa maaya ma wədəy pəlɲged pəlɲged mezəley «emerat».

⁴ Slam-menjey hay mekele kwakwar cew a ray a məfad a zlərmar ray ɲga slam-menjey heyey. *Bay-ray hay kwakwar cew a ray a məfad * manjatakaya da ray slam-menjey hay a ɲgene. Ndəhay a, ata ta zana mabara fa vaw. Jikwew hay ɲga bay-gula mapatakaya da ray. Jikwew hay a ɲgene makatakaya ta bərey magaza ma wədəy.

⁵ Var a zəmey wəd-wəd, wəd-wəd daa slam-menjey da wuzlah heyey. Asaya, var aa bəcey ta gədan təzlaw! təzlaw! daa slam-menjey a. Daa slam a ɲgene, awaw hay maasala fa gədam ɲgələr ɲgələr. Awaw hay maasala hay a ara mesəfney hay maasala ɲga Gazlavay heyey.

⁶ Asaya, cek anda dəhwa fa mey ɲga slam-menjey a daha, fa wədəy pəlɲged pəlɲged anda baɲgəra, dey a hətey gurgwar a wurza.

Asaya, cek hay mekele daha məfad ta dey, fa zlərmar ray ɲga slam-menjey da wuzlah heyey. Vaw ata cəpa na, dey hay wurcacak-cak.

4:2 4.2-3 5.7; Ps 11.4; 103.19 4:3 4.3 Ez 1.26-28 * 4:4 4.4 Bay-ray hay kwakwar cew a ray a məfad: Ndəhay a wulkam a wudəy ɲgaa guzley da ray səkway ɲga Israyel hay kuraw a ray a cew leɲ da ray ndəhay meslərey ɲga Yesu kuraw a ray a cew. Anda kedə, bay-ray hay kwakwar cew a ray a məfad kedə na, mapatakaya anda ndəhay masa Gazlavay ma ləhdata daa mebərey maja mejəwey-mey ɲga Gazlavay magurma ta mawiya. 4:4 4.4 Bay-ray hay: 5.5, 8, 10; 7.11, 13; 11.16; 14.3; 19.4; Iz 24.23; **mabara**: 6.11 4:5 4.5 8.5; 11.19; 16.18; 17.9; Mab 9.24; 19.16; Ez 1.13-14 4:6 4.6 15.2; Ez 1.22; **cek hay məfad**: 5.6, 8, 11; 6.1; 7.11; 14.3; 15.7; 19.4; Ez 1.5-12; 10.14

⁷ Ray nga cek ngeeme, a nakey anda ray nga mabar. Nga cek nga dey cew e na, a nakey anda ray nga bəz-sla. Nga cek nga dey maakar a, a nakey anda ray nga ndaw. Asaya, nga cek nga dey məfad a, a nakey anda ray nga bərgaday mahura masa fa jəvey.

⁸ Cek hay məfad a, ata ta kərpasl maakwaw maakwaw. Vaw ata cəpa na, dey wurcacak-cak gway, kwa dasi kərpasl may. Cek hay a fa zlam walay taa vad, taa pas, a gəram ba, a ləvam:

Kah pal, Bay Gazlavay.

Kah pal, Bay Gazlavay.

Ahaw, kah pal, Bay Gazlavay.

Fara fara, kah, Bay Gazlavay,

ndaw ta gədan ma fənta cek hay cəpa.

Kah na, kah daha dəga bəla ta ləmey daa ba aran,

haa kasl wure kefe,

kah daha.

Asaya, ka sawa la a bəla.

⁹ Anda kefe, cek hay məfad ta dey heyey fa zlamar walay ngada Bay Gazlavay manjakaya daa slam-menjey anga heyey, ara anga ndaw masa ta dey nga sərmataw. A zlamar walay kəne na, nga həslmar ray, nga həlmamara, ta nga kamar suse.

¹⁰ Daa masa fa kamara kəne na, *bay-ray hay kwakwar cew a ray a məfad heyey fa ragadam fa mey nga Gazlavay, ndaw masa ta dey nga sərmataw, masa manjakaya daa slam-menjey anga heyey. Bay-ray hay a ngene fa həlmamara Gazlavay na, a pəkwmata jikwew ata hay heyey, a pamata fa mey nga slam-menjey nga Bay Gazlavay heyey, a ləvam:

¹¹ Bay ala Gazlavay, gədan tabiya a sawa ta fa kah.

Kah təde amba ndəhay a həlmamaka, a həlmaka ray,

asaya kah təde nga wey da ray cek hay tabiya

maja kah ma katərwa cek hay tabiya.

Cek hay tabiya da bəla daha

ara maja kah ma wufey nga katərwa.

5

Mey da ray dərəwel mapadəkaya leŋ da ray Bəz-təban

¹ Masa yah, *Jan, ya fa nakey dey saya na, ya hətey dərəwel daha makərzakaya da har ndaw masa manjakaya daa slam-menjey da wuzlah heyey. Dərəwel e aa da har-zəmay. Mawuzlalakaya dey cew e cew e, ama mapadəkaya zlec! daa slam pal. Mey a maslərbəkaya ta tebed slam

maasala, amba ndaw a gwa nga wura ba. ² Fa dɔba ha, ya hɔtey maslan nga Gazlavay masa ta gɔdan. Aa fa wudey, a lɔvey: «Ma gwa nga pɔsɔta tebed ma slɔrba dɛrewel keɛde na, wa? Ma wusa nga wura dɛrewel e keɛde na, wa?»

³ Ama, kwa ndaw pal ma gwa nga wura daa ba sɔlak. Kwa ndaw ma pawa salay da vad, kwa ndaw ma sawa dama dama da bɔla keɛde, kwa ndaw ma bawa daa vɔged ma gwa nga wura dɛrewel e amba a nɔkey dey a hwad a na, daa ba sɔlak.

⁴ Anda keɛde, yah, Jan, ya ta tɔway la ga, maja kwa ndaw pal ma wusa nga wura dɛrewel e amba a nɔkey dey a hwad a daa ba.

⁵ Da ray ngene, ndaw pal da wuzlah *bay-ray hay kwakwar cew a ray a mɔfad heyey aa guzlya, a lɔvey: «Ka tɔway ba. Nɔka mabar ngene. A bawa daa sɔkway nga Juda. Ara ndaw ma yawa daa sɔkway nga Bay *Davit. Mabar a ngene ta fɔnta cek hay cɔpa sem ta gɔdan. Da ray ngene, a gwa nga pɔsɔta tebed maslɔrbakaya slam maasala ngene, a wura dɛrewel e.»

⁶ Daa ngene, ya hɔtey ndaw malacakaya da wuzlah slam-menjey heyey ta bay-ray hay lej cek hay mɔfad ta dey heyey. Ndaw a, a nɔkey anda bɔz-tɔban maslakaya dɔay a, ama aa ta dey cɔnga. Aa ta dɔram maasala * da ray, lej ta dey hay maasala †. Dey hay maasala a ngene ara mesɔfney hay maasala masa Gazlavay ma slɔrdata aa slam wura wura da bɔla cɔpa.

⁷ Ndaw anda Bɔz-tɔban heyey ta', a ngɔchawa, a tɔba dɛrewel da har-zɔmay nga ndaw manjakaya daa slam-menjey da wuzlah kaa heyey.

⁸ Masa anga ma tɔba dɛrewel e cay na, ta', cek hay mɔfad ta dey, lej bay-ray hay kwakwar cew a ray a mɔfad heyey a ragadam fa mey nga ndaw anda Bɔz-tɔban a. Ata cɔpa ta ganjaval da har, ta taasa hay nga bɔrey magaza marɔhkaya ta cek meengɔsey mezey maaya. Cek meengɔsey a, aa mapakaya anda medɔrey-dangay nga ndɔhay nga Gazlavay.

⁹ Mahura hay ta cek hay mɔfad ta dey heyey a zɔmar

5:1 5.1 10.2; Iz 29.11; Ez 2.9-10; Dan 12.4, 9 5:5 5.5 4.4; MC 49.9; Mt 1.1; Rm 1.3-4; Heb 7.14 * 5:6 5.6 dɔram maasala: Daa dɛrewel nga Gazlavay «dɔram» a wudɛy nga lɔvey «cek ta gɔdan». Nɔka Mew 33.17; Dan 7.7, 24. «Maasala» a wudɛy nga lɔvey «cek makakaya maaya maaya, mambɔkakaya daa ba». † 5:6 5.6 dey hay maasala: Anda Jak 4.10ma lɔvey «dey hay» a wudɛy nga lɔvey «mesɔrey cek hay cɔpa». 5:6 5.6 4.6-7; **bɔz-tɔban**: 5.9, 12; 6; 7.17; 12.11; 13.8; Iz 53.7; Jer 11.19; Jan 1.29; 1Pi 1.19; **mesɔfney hay maasala**: 4.5; Zak 3.9 5:7 5.7 4.2, 9; 5.1, 13; 6.16; 7.10, 15; 19.4; 20.11; 21.5; 1Bay 22.19; Iz 6.1; Ez 1.26-28; 10.1 5:8 5.8 8.3-4; Ps 141.2; **ganjaval**: 15.2

walay mawiya ngada ndaw anda Bəz-təbaŋ kaa heyey, a ləvmar:

«Kah na, ka wusa nga la dferewel keđe

nga pəslta tebed fa vəda

maja ta kədmaka la vagay.

Mambaz akah ta mbədfwa la.

Anda keđe, ka ta mbədtərwa ndəhay la

dasi har nga Satan

amba a təram ndəhay nga Gazlavay.

Kwa ndəhay masa daa səkway wura wura cəpa,

masa maa guzlam ta mey wura wura cəpa,

ta ndəhay daa wura daa wura cəpa

masa daa hwayak hay cəpa na,

ka ta mbədtərwa sem.

¹⁰ Ka ta tərdata la nga ndəhay

masa kah ma wey da ray ata,

ndəhay ma ka kwakwas nga Gazlavay,

mapatakaya nga key sləra ngada Gazlavay.

Anda keđe, ndəhay a, a da wam da ray ndəhay da bəla.»

¹¹ Fa dəba ha yah, Jan, ya cəney dəy nga maslaŋ hay nga

Bay Gazlavay da vad ga, a sləfam ba. Ya hətatar fa zlərmar

ray nga slam-menjey nga Bay Gazlavay heyey, nga cek hay

məfad ta dey, leŋ nga bay-ray hay kwakwar cew a ray a

məfad heyey.

¹² Maslaŋ hay a, fa zlam walay ta gədaŋ, a ləvam:

«Bəz-təbaŋ masa ma kədmara vagay heyey na,

aa təde nga wey da ray cek hay tabiya,

nga hətey zleley,

nga hətey leŋgesl,

ta nga hətey gədaŋ.

Asaya, aa təde amba ndəhay tabiya a həslmar ray,

aa səmam da ray mewedey anga,

a həlmamara.»

¹³ Fa dəba ha, ya cənda dəy nga cek hay tabiya masa

Gazlavay ma katərwa. Cek hay da vad, da bəla, daa vəged

leŋ daa bəlay cəpa fa zlam walay, a ləvam:

Anja ndəhay nga həlmamara Gazlavay

manjakaya daa slam anga menjey,

leŋ Bəz-təbaŋ may.

Anja ndəhay ngaa həmdamata,

ngaa həslmatar ray,

ngaa səmam da ray mewedey anga,

anja nga wam da ray cek hay tabiya nga sərmataw!

¹⁴ Cek hay məfad ta dey heyey a mbəǝdamatara, a ləvam: «*Amen, ɲga key kəne.» *Bay-ray hay kwakwar cew a ray a məfad heyey may a ragadam fa mey ata, a həlmamata.

6

Mey da ray ǝerewel maslərbakaya

¹ Masa yah, *Jan, ya fa nəkey dey saya na, ya hətar Bəz-təbaɲ ma la ǝerewel maslərbakaya slam maasala heyey fa wura. Masa aɲga fa pəslta tebed daa slam masa ɲgeeme na, ya cənda ǝay ɲga cek pal da wuzlah cek hay məfad ta dey heyey. A wudey ta gədaɲ anda var maa bəcey, a ləvey: «Hawa fede.»

² Ya da nəkey dey na, a ray pəles mabara fa bawa. Ndaw da ray pəles e. Ndaw aha aa ta lalaɲ makərzakaya da har. Ta', a vəlmar jikwew ɲga bay-gula. Aa fa daw ɲga key bay-gula da ray masa-gəra hay ɲga Gazlavay saya.

³ Ta', Bəz-təbaɲ kaa heyey, a pəslta tebed daa slam ɲga dey cew e. Masa aɲga fa pəslta tebed daa slam ɲga dey cew e na, ya cənda ǝay ɲga cek ɲga dey cew e da wuzlah cek hay məfad masa ta dey heyey, ǝay a aa guzley, a ləvey: «Hawa fede.»

⁴ Daa ɲgene, pəles mekele ta', a bawa. Pəles e magaza. A pəskamar mey a ndaw da ray a, amba a daw a wudkatar ǝay ɲga ndəhay da bəla, amba a kəǝam vaw da wuzlah ata vagay vagay. Ta', a vəlmar dəlaw maazəma a har.

⁵ Ta', Bəz-təbaɲ heyey a pəslta tebed daa slam ɲga dey maakar a. Masa aɲga fa pəslta tebed daa slam ɲga dey maakar a na, ya cənda ǝay ɲga cek ɲga dey maakar a da wuzlah cek hay məfad masa ta dey heyey, faa guzlwa, a ləvey: «Hawa fede.» Ya da nəkey dey na, a ray pəles matara fa bawa. Ndaw da ray pəles e na, aɲga ta kəlew ma wey cek da har.

⁶ Asaya, ya cəney ǝay maa guzlwa da wuzlah cek hay məfad masa ta dey heyey. Day a, aa guzley, a ləvey: «Dala masa ndaw ma hətar daa sləra fa ǝar pal na, a da həǝkey daw-zlaraway tərəb-har gway. Da ara salaway na, a da key tərəb tərəb-har maakar. Ama mal ta wuzam * na, ka da wusmata ba, ara cek hay ɲga nəsam ba.»

⁷ Ta', Bəz-təbaɲ heyey a pəslta tebed daa slam ɲga dey məfad a. Masa aɲga fa pəslta tebed daa slam ɲga dey məfad a na, ya cənda ǝay ɲga cek ɲga dey məfad a da

6:2 6.2-8 19.11, 14; Zak 1.8; 6.1-7 * **6:6 6.6** mal ta wuzam: Wuzam a na, ara yam ɲga babəza ɲga wudez maməslkaya. Cek mezəmey na, ndəhay a hatam ta banay maja daw a həǝkey ba. Ama «ka da wusmata ba» ta mevey ɲga may a ɲgene a wudey ɲga ləvey mal ta wuzam daha.

wuzlah cek hay məfad masa ta dey heyey, faa guzlwa, a lövey: «Hawa fedē.»

⁸ Ya da nəkey dey na, a ray pəles fa bawa. Vaw ŋga pəles e bərfakw a. Ndaw masa da ray a na, a zəlmara Meməcey, maja ara anğa ma kədfə ndəhay vagay. Slam masa ndəhay maməctakaya ma njam da hwađ a fa səpar wurzay. Ŋgada ata cewete, ta', a vəlmatar gədaŋ ŋga kədfey ndəhay reta ŋga reta da bəla vagay. A da ŋgəmamata ta dəlaw. Siya hay na, may a da kədfə vagay. Siya hay saya, macay ma da kədfə vagay. Asaya, siya hay, cek hay da ley ma da pəwmata.

⁹ Cay, Bəz-təbaŋ heyey a pəslta tebed daa slam ŋga dey zlam a. Masa anğa fa pəslta tebed daa slam ŋga dey zlam a na, ya hətatar mesəfney ŋga ndəhay maməctakaya dasi slam-mefəkey cek ŋgada Gazlavay †. A kədfmata ndəhay a ŋgene vagay maja ata ma təbmara mey ŋga Gazlavay, asaya maja ata ma kam sede fa mey ŋga ndəhay da ray mey ŋga Yesu.

¹⁰ Mesəfney hay ŋga ndəhay kaa heyey a wudam ta gədaŋ, a lövam: «Bay Mahura, kah na, Bay Gazlavay pal. Kah ndaw ma mbərzley ba. Ndəhay da bəla ma kədfmandar vagay na, ka da katar sariya na, ta vara? Ka da sərdəta banay na, ta vara?»

¹¹ Fa dəba ha, ta', a vəlmatar jəbe mabara ŋgada ndəhay maməctakaya kaa heyey, a lövmatar: «Njam fedē, məskam vaw nekədfey. Məskam vaw haa ata ma kədfmata məlmakw akwar hay masa ma kam sləra da bəla ŋgada Gazlavay anda akwar la dğagay. Ata na, mapatakaya ŋga məcey anda akwar. Fa dəba ha, sariya ŋga Gazlavay a key la.»

¹² Masa yah, Janj, ya fa nəkey dey saya na, ya hətar Bəz-təbaŋ heyey fa pəslta tebed daa slam ŋga dey maakwaw a. Masa anğa ma pəslta tebed daa slam ŋga dey maakwaw a cay na, hwiyak a wusey ta gədaŋ. Pas a mbədfey matara təlekw təlekw. Kiya may a mbədfey magaza anda mambaz.

¹³ Asaya, wurzla hay aa kwacamawa kurtata-ta' da gazlavay da vad anda babəza ŋga wudez maŋgurlakw a masa memed ma kwiydərwa a hwayak.

¹⁴ Slam da gazlavay da vad taa yihey sem anda ndaw ma pedey derewel, ma la, ma pa aa slam mekele. Anğwa hay ta hwayak hay da wuzlah bəlay ta ŋgəcham sem daa slam ata.

6:8 6.8 Jer 14.12; Ez 14.21; Aw 13.14 † **6:9 6.9** dasi slam-mefəkey cek ŋgada Gazlavay: Anda meləvey, ata da cakay Gazlavay, aa fa nəkfatar dey. **6:9 6.9** 1.2, 9; 12.11, 17; 19.10; 20.4; 1Jŋ 1.1-2 **6:10 6.10** 18.24; Ps 13.2-3; Mew 32.43; Lk 18.7 **6:11 6.11** jəbe mabara: 3.5, 18; 4.4; 7.9, 13; 19.8, 14; Iz 61.10 **6:12 6.12-13** 8.5, 12; 11.13, 19; 16.18; Jwl 2.10; Mt 24.29 **6:14 6.14** 16.20; 20.11; Iz 34.4; Heb 1.11-12

¹⁵ Ndəhay da bəla cəpa ta bəm sem. Kwa bay hay, kwa ndəhay mahura hay, kwa *bay-ray nga sewje hay, kwa masa-zleley hay, kwa masa-gədan hay, leŋ beke hay ta ndəhay masa beke ba hay, ndəhay cəpa ta hwam sem nga bəmawa aa bədam hay, a dəba hutkwam hay da aŋgwa.

¹⁶ Ndəhay a kefe a wudam ngada aŋgwa hay ta ngada hutkwam hay masa ata ma bəm asiya kaa heyey, a ləvam: «Bəzlmawa a ray ala, bədamandar amba ndaw manjakaya daa slam-menjey da wuzlah heyey a hətndar ba, asaya, amba Bəz-təban heyey a kərzandar ta sariya aŋga ba.

¹⁷ Fara fara dər a masa ata cewete ma da kamara sariya ha kefe na, ta wuswa sem. Da ray ngene, kwa ndaw fa da gwa nga ləhey ta pas a ngene daa ba.»

7

Mey da ray cek matəhkaya fa daŋgay nga ndəhay Israyel hay gabal temere ta kwakwar məfad a ray a məfad

¹ Fa dəba ha, yah, *Jan, ya hətey maslan hay mekele məfad nga Gazlavay. Ata malacatakaya pal pal ta mey cakay hay məfad * nga bəla. Fa təkmarə memed ma kawa ta mey cakay hay a amba memed e, a key saba. Anda meləvey, a key da hwayak saba, a key kwa da ray bəlay saba, kwa da ray wudez hay saba.

² Cay, ya hətey maslan pal mekele fa sawa ta wurza. Aŋga ta cek masa Bay Gazlavay, ndaw masa aŋga daha ta dey nga sərmataw, ma da təhtara † fa daŋgay nga ndəhay aŋga hay. Ta', a zəltərwa maslan hay məfad masa Gazlavay ma vəltar gədan nga nəsey hwayak ta bəlay heyey. A zəltərwa ta gədan, a ləvtar:

³ «Ka da nəsmata hwayak ta bəlay leŋ wudez hay ba dāgay. Si wara ala ma təhmatar cek fa daŋgay nga ndəhay ma ka slərə nga Gazlavay aləkwa la dāgay.»

⁴ Fa dəba ha, a wuzdamatiwa ndəhay masa ta cek matəhtakaya fa daŋgay kaa heyey tabiya. Ya cənda na, ata gabal temere ta kwakwar məfad a ray a məfad. Ndəhay a ngene, ata daa səkway hay tabiya nga *Israyel.

⁵ Ndəhay a na, ata gabal kuraw a ray a cew daa səkway nga Juda,

6:15 6.15 Iz 2.10, 19, 21; 24.21 **6:16 6.16** 5.7; Aw 10.8; Lk 23.30 **6:17 6.17**
 Jwl 2.11; Nah 1.6; Saw 1.14-18; Mal 3.2 * **7:1 7.1** cakay hay məfad: «Məfad»
 a wufey nga ləvey da bəla tabiya. **7:1 7.1** 9.14-15; Jer 49.36; Dan 7.2 † **7:2**
7.2 cek masa Bay Gazlavay ma da təhtara: Cek masa Gazlavay ma təhtara na, a
 wuzdərwa ndəhay a ara ndəhay nga Gazlavay. Da daa ba, a wuzdərwa ndəhay
 a, Gazlavay ta ləhdata sem, fa nəkfatar dey. Nəka Ez 9.4. **7:3 7.3** 9.4; 14.1, 3;
 22.4; Ez 9.4, 6 **7:4 7.4-8** 14.1, 3; 21.12-13

gabal kuraw a ray a cew daa səkway nga Ruben,
 gabal kuraw a ray a cew daa səkway nga Gat,
⁶ gabal kuraw a ray a cew daa səkway nga Aser,
 gabal kuraw a ray a cew daa səkway nga Naftali,
 gabal kuraw a ray a cew daa səkway nga Manase,
⁷ gabal kuraw a ray a cew daa səkway nga Simeyanjw,
 gabal kuraw a ray a cew daa səkway nga *Levi,
 gabal kuraw a ray a cew daa səkway nga Isakar,
⁸ gabal kuraw a ray a cew daa səkway nga Zabulanjw,
 gabal kuraw a ray a cew daa səkway nga *Jawzef,
 lej gabal kuraw a ray a cew daa səkway nga Benjamenj.

Mey da ray ndəhay da bəla tabiya makustakaya

⁹ Fa dəba ha masa yah ma hətatatar ndəhay *Israyel hay la na, ta', ya hətey ndəhay mekele ga makustakaya saya, a sləfam ba. A samawa da wuzlah ndəhay daa wura daa wura cəpa, daa hwayak hay cəpa, a bamawa daa səkway wura wura cəpa, aa guzlam mey hay wal wal cəpa. Ata tabiya fa mey nga slam-menjey nga Bay Gazlavay lej fa mey nga Bəz-təbanj nga Bay Gazlavay heyey. Ata cəpa ta jəbe mabara fa vaw, ta mey-har nga gendew da har nga həsley ray a Bay Gazlavay ta Bəz-təbanj anja.

¹⁰ Ndəhay a faa guzlam ta gədanj, a ləvam: «Ma ləhdamandar na, ara Gazlavay aləkwa manjakaya daa slam anja menjey ta Bəz-təbanj anja ha kefe.»

¹¹ Slam-menjey masa da wuzlah heyey ta *bay-ray hay lej cek hay məfad ta dey heyey na, maslanj hay tabiya nga Bay Gazlavay, a zlərmatar ray. Maslanj hay a, a ragadam, dangay dar! a hwayak fa mey nga slam-menjey heyey, a həlmamara Gazlavay,

¹² a ləvam:

«Amen, Bay Gazlavay aləkwa.

Anja ndəhay nga həlmamaka, ngaa həmdamaka,
 kah ndaw masa ta lenjesl.

Anja ndəhay nga kamaka suse, nga həslmaka ray,
 kah ndaw ma wey da ray cek hay tabiya,
 kah ndaw masa ta gədanj.

Cek hay a kefe nga key kəne nga sərmataw. Amen.»

¹³ Ndaw pal dasi bay-ray hay kwakwar cew a ray a məfad heyey aa cəfdaya, a ləvey: «Ka sərtə ndəhay ta jəbe mabara kefe daw? A samawa na, dama?»

¹⁴ Ya mbəfdara, ya ləvar: «Ara kah ma səra, Bay adaw. Yah na, ya səra ba.»

A mbəfđiwa, a ləvey: «Ara ndəhay ma bamawa cay daa banay mahura da bəla. Ta pərmata jəbe ata hay la daa mambaz ŋga Bəz-təbənŋ ŋga tərey mabara.

¹⁵ Ara maja ŋgene, ndəhay a ma lacam fa mey ŋga slam-menjey ŋga Bay Gazlavay heyey. Fa həlmamara Gazlavay taa vad, taa pas daa Way-mekey-kwakwas anŋa da vad. Ndaw masa manjakaya daa slam-menjey da wuzlah heyey, fa nəkfatar dey, fa bərdəta.

¹⁶ May fa da catar ŋgada ndəhay a ŋgene daa saba, yam fa da katar daa saba may. Kwa pas fa daa wurwa ŋga ndəta daa ba, kwa meeme fa da ndəta daa ba,

¹⁷ maja Bəz-təbənŋ masa daa slam-menjey heyey, a da tərey ŋga mecəkwer ata. A da handata aa wurak ŋga yam ma vəley heter mendəvey ba. Asaya, Gazlavay a da takwadətara matəway daa dey ata cəpa.»

8

Mey da ray ma pəsltey tebed ŋga dey maasala ha

¹ Fa dəba ha, Bəz-təbənŋ heyey a pəslta tebed ŋga dey maasala ha. Daa masa aa ma pəslta la, cek hay tabiya da gazlavay da vad manjatakaya teete haa mənət kwakwar maakar.

² Yah, *Janj, ya da nəkey dey na, ya hətey maslan hay maasala ŋga Gazlavay malacatakaya fa mey anŋa. Ta', a vəlmatar taalam hay maasala a maslan hay a.

³ Daa ŋgene, maslan mekele daha fa kərzey taasa ŋga bərey magaza. Taasa ha maamandaw na, faa ŋgəsam cek mezey maaya ŋgada Gazlavay da hwađ a ŋga dərmar danŋay. Maslan a, a sawa, deŋ! a lecey gweegwe ta slam-meewurey cek mezey maaya ŋgada Gazlavay makakaya ta bərey magaza. Ta', a vəlmar cek mezey maaya ga ŋga ŋgəsey amba kakas aha ta medərey-danŋay ŋga ndəhay ŋga Gazlavay tabiya a wusam fa vəda. Anda kedə, a pa cek mezey maaya heyey a ray slam aha, aa ŋgəsa fa mey ŋga slam-menjey ŋga Bay Gazlavay heyey. ⁴ Daa masa maslan faa ŋgəsa cek mezey maaya kaa heyey, kakas a, a bawa daa taasa da har maslan a, ta', aa ŋgəsey, a wusey fa mey ŋga Gazlavay a vad ta medərey-danŋay ŋga ndəhay ŋga Gazlavay heyey.

⁵ Masa maslan ŋga Gazlavay heyey ma ka cek aha la, anda kedə na, leŋ! a la taasa heyey, a hərəcawa awaw da ray

7:14 7.14 1.5; 22.14; Ps 51.9; Dan 12.1; Mt 24.21 **7:15 7.15** 21.3 **7:16 7.16** Iz 49.9-10 **7:17 7.17** 5.6; 21.6; Janj 10.10, 11; Ez 34.11-16, 23-24; **matəway daa dey:** 21.4; Ps 126.5-6; Iz 25.8 **8:1 8.1** Zak 2.17; Hab 2.20 **8:2 8.2** taalam hay; Jes 6.4, 6; Mt 24.31 **8:3 8.3** 5.8; Mab 30.1, 3

slam-meewurey cek heyey, ta', a kwiydərwa awaw a, a bəla. Menjey nekədey, var ta', a zəmey wəf-wed, wəf-wed, ta', aa bəcey təzlaw! təzlaw! Hwiyak a wusey ta gədanj gədek gədek anda anjwa ma bəzley.

Mey da ray taalam hay məfad ngeeme

⁶ Fa dəba nja cek hay a ngene, maslanj hay maasala ta taalam hay da har a diyam vaw amba a famata taalam hay a.

⁷ Maslanj ngeeme ta', a fa taalam anja. Lanja a kwiywa a bəla majahadəkaya ta awaw ta mambaz. Bəla ha a wunkey slam maakar. Slam pal awaw a wawura ta wudez hay da hwaɸ a cəpa. Kusaf masa meendəbək e cəpa ta wewurey sem.

⁸ Cay, maslanj nja dey cew e, ta', a fa taalam anja may. Cek anda anjwa mahura, awaw fa gədey njəm-njem da ray a, a kəzlwa təzlem! aa bəlay. Bəlay a, a wunkey slam maakar. Slam pal a tərey nja mambaz.

⁹ Cek hay masa daa yam a, a wunkey slam maakar. Slam pal, cek hay a cəpa a məcam. Kwambiwal hay ma pəkam da ray yam a, a wunkam slam maakar. Slam pal, kwambiwal hay a cəpa a nəsam.

¹⁰ Cay, maslanj lanjar ta', a fa taalam anja. Ara maslanj nja dey maakar a. Wayam hay lej wurak hay nja yam a wunkam slam maakar. Slam pal, wurzla mahura fa gədey njəm-njem anda awaw, a kəzlwa a hwaɸ a.

¹¹ Mezəley nja wurzla ha «Wurzla-Dədəwək». Masa aa ma kəzlwa la aa wayam kaa heyey na, ta', wayam hay a, a wunkam slam maakar. Slam pal, yam da hwaɸ a ta tərey sem dədəwək. Ndəhay ga ta məcam sem maja yam meədəwək ehe, aa ta mewer da hwaɸ a.

¹² Cay, maslanj mekele saya a fa taalam anja may. Ara maslanj nja dey məfad a. Masa aa ma fa la na, cek a təbzla mewedey nja pas, mewedey nja kiya, lej nja wurzla hay. Mewedey nja pas, nja kiya, lej nja wurzla hay a wunkey slam maakar. Slam pal a wedey saba. Anda kedə, ləvanj a key nekədey. Anda meləvey daa mevərndey na, pas a tey bərey daanğafad gway. Dasi tavad na, kiya ta wurzla hay a wadəm bərey daanğafad gway may.

Mey da ray banay ma da sawa

¹³ Fa dəba ha, ya da nəkey dey na, ya hətey bərgaday fa jəvey dərənj da vad. Ya cənda fa wudey ta gədanj, a ləvey: «Waay! Waay! Banay a sawa la a ray ndəhay cəpa da bəla.

Maslan hay maakar daha ta famata taalam ata hay daa ba aran. Da ta famata cay na, banay a sawa la ga.»

9

Mey da ray taalam nga dey zlam a

¹ Cay, maslan mekele ta', a fa taalam anga may. Ara maslan nga dey zlam a. Menjey nekəfey, yah, *Jan, ya hətey wurzla ma kəzlwa da vad a hwayak. A vəlmar lekəle amba a wura vəged meselelen e*.

² Ta', wurzla ha a wura vəged e. Kakas a bawa da hwad a anda ndaw ma ndəley meləmey hay ga daa wurak mahura. Sərat! a sərta pas. Ləvan təbzlelem! a key.

³ Ta', ayakw hay a bamawa daa kakas a, a bəla, a hətam gədan nga zey ndəhay anda arac.

⁴ A ləvmatar a ayakw hay a amba a zəmam kwa guzer ba, kwa wudez pal ba, asaya, a da zəmam cek mekele ma pəcwa daa hwiyak ba. Ama a da zam na, si ndəhay masa Gazlavay ma təhtar cek fa danğay ata hay daa ba səlak.

⁵ Asaya, a ləvmatar a ayakw hay a nga kədmata ndəhay vagay ba. Si a sərdamata banay gway haa kiya zlam. Mezey nga ayakw hay a na, a da catar anda mecey nga arac.

⁶ Daa kiya zlam a kefe, ndəhay a, a daa cəfdam meməcey amba a səram banay saba, ama fa da hətam meməcey daa ba. Fara fara a wudam nga məcey, ama kwa fa da hətam slam nga məcey daa ba səlak.

⁷ Ayakw hay kaa a nəkam anda pəles hay masa ma jəwmata cay nga daw aa vəram. Ata ta cek anda jikwew nga bay-gula da ray, makakaya ta bərey magaza. Dey ata na, anda nga ndəhay.

⁸ Engwec da ray ayakw hay a, maazəma səlep səlep anda nga ngusay. Sler ata hay yin-yen anda nga mabar.

⁹ Ayakw hay a, dadak ata hay masərtatakaya ta cek anda zana nga bərey masa ma kəzlamata ngadaa vəram. Zlara ata hay a mbam mey anda seret hay ga masa pəles hay ma hwadamara ngadaa vəram.

¹⁰ Asaya, kwetel ata cəb-ceb anda nga arac. A zam ndaw anda arac may. Ara kwetel hay a ngene ma vəlmatar gədan ngada ayakw hay a, amba a zamata ndəhay daa kiya zlam heyey.

* **9:1 9.1** Vəged meselelen e na, ara vəged masa mesəfney hay nga bay-malula matəbzlatakaya da hwad a. **9:1 9.1** vəged meselelen e: 11.7; 20.1; Jəw 26.6; 28.22; Lk 8.31; 2Pi 2.4 **9:2 9.2** MC 19.28; Mab 19.18 **9:3 9.3-11** Mab 10.12-20 **9:4 9.4** 7.2-3 **9:6 9.6** Jəw 3.21; Jer 8.3 **9:7 9.7** Jəw 39.19-20; Jwl 2.4 **9:8 9.8** Jwl 1.6 **9:9 9.9** Jwl 2.5

¹¹ Bay nga ayakw hay a na, ara maslan nga bay-malula masa ma wa wəged masa selesen heyey. Ta mey *Hebore a zəlmara maslan a «Abadanw», ta mey Gerek a zəlmara «Apaliyanw». Mezəley hay cewete kefe a wufey nga ləvey: «cek ma nəsey cek hay mandaw mandaw.»

¹² Anda kefe, banay ngeeme na, ta ndəvey cay. Ama wam vaw, maja banay hay mekele cew daha a samawa la saya.

Mey da ray taalam nga dey maakwaw a

¹³ Ta', maslan masa nga dey maakwaw a, a fa taalam anga may. Fa dəba ha, yah, *Jan, ya cəney dəy maa guzlwa ta cakay hay məfad nga slam-meewurey cek mezey maaya ngada Gazlavay heyey. Slam aha makakaya ta bərey magaza, anga fa mey nga Gazlavay.

¹⁴ Day heyey ta', aa guzlar ngada maslan nga dey maakwaw a masa ta taalam da har heyey, a ləvar: «Pəskata maslan hay nga bay-malula məfad masa majəwtakaya da mey-wayam mahura nga Efərat ngene.»

¹⁵ Maslan hay məfad ngene madiytakaya vaw dəga zleezle nga kədmata ndəhay da bəla vagay. Ta', maslan a, a daw a pəskata maslan hay a məfad ata. A pəskata na, amba a kam sləra, ta ləmla kefe, daa kiya ha kefe, ta pas a kefe, asaya, daa ler e kefe may. Gazlavay a wunkata ndəhay da bəla slam maakar. Slam pal na, maslan hay a, a kədmata vagay.

¹⁶ Ta', ya hətey sewje hay da ray pəles hay fa samawa. A kadamiwa sewje hay a, ata na, we. A ləvam ata maliyanw temere cew.

¹⁷ Anda yah ma hətar daa cek masa Yesu ma wuzdiwa na, sewje hay a, ata ta zana nga vəram fa vaw. Zana hay a magaza anda awaw, matara təlekw təlekw anda ləvan nga var, asaya maa kuray-bəzey. Ray nga pəles hay a, a səram ba ta ray nga mabar hay. Awaw ta kakas matara len anɡwa maa kuray-bəzey, ma gədey njəm-njem † a bawa da mey pəles hay a.

¹⁸ Ndəhay da bəla mawunkakaya slam maakar. Slam pal na, banay hay maakar a kefe a kədmata vagay. Anda meləvey, ara awaw ta kakas matara len anɡwa maa kuray-bəzey, ma gədey njəm-njem, ma bawa da mey ata heyey ma kədmata ndəhay a vagay.

¹⁹ Anda kefe, ara cek hay a ngene ma bamawa da mey pəles hay a, ma vəltar gədan nga sərdata banay ta ndəhay.

9:13 9.13 8.3; Mab 30.1-3 **9:14 9.14** 7.1; Mew 1.7 **9:15 9.15** 8.7-12 † **9:17 9.17** anɡwa maa kuray-bəzey, ma gədey njəm-njem: Ara anɡwa kuray-bəzey makərkaya ma gədey awaw kalah mezəley ta mey Pəlta «baruudu», ta mey Nasara «soufre». **9:17 9.17** Jəw 41.10-12

Asaya, kwetel ata hay fa sɛrdamata banay may. Kwetel hay a na, a nɛkam anda zezekw hay, maja mey nga kwetel hay a na, ata anda ray nga zezekw hay. Da ray ngene, pɛles hay a, a zam ndɛhay ta kwetel ata hay a.

²⁰ Ndɛhay masa ma mɛcam ta fa banay hay maakar kaa heyey daa ba na, kwa ta mbɛkdamara slɛra ata maaya ba daa ba cɛnga. Ata fa namatar ray ngada mesɛfney maaya ba hay ma bamawa ta fa bay-malula, leŋ ngada kuley hay. Kuley hay a siya hay makatakaya ta bɔrey magaza, siya hay ta bɔrey mekele mekele, siya hay ta aŋgwa, siya hay may ta hwadam maacadakaya. Kuley hay a cɛpa ngene a hɛtmar dey ba, a cɛnam slɛmay ba, asaya, a gwamara nga diyam ba. Ama ta ngene he cɛpa, fa namatar ray gway.

²¹ Ndɛhay a ngene fa kɛɛam ndɛhay mekele hay vagay, fa kam maazla hay maaya ba, fa lam vaw saw da palah, asaya fa lalam. Ata fa kamata cek hay a cɛnga, kwa ta mbɛkdamara menjey ata da bɛla daa ba sɛlak.

10

Mey da ray maslaŋ ta ɛrewel mecɛhe da har

¹ Fa dɛba ha, yah, *Jan, ya hɛtey maslaŋ mekele masa ta gɛdaŋ fa pawa salay da gazlavay da vadɛ. Aŋga masɛrtakaya ta gazlavay nga var. Ray aŋga matulakakaya ta kwalay. Dey aŋga a wedey anda pas. Salay aŋga hay a nɛkam anda neneh nga awaw maazɛma.

² Maslaŋ a, aa ta ɛrewel mecɛhe mawurkaya da har. Salay aŋga hay maazlakatakaya, salay nga zɛmay aa da ray bɛlay, salay nga gula aa da ray hwiyak.

³ Maslaŋ a, a wudey ta gɛdaŋ, anda mabar maa zlehey. Masa aa ma wudey cay na, ya cɛney var maa bɛcey dey maasala nga mbɛkɛdara mey a, a maslaŋ a.

⁴ Masa var a maa bɛcey ta meeguzley cay na, anja ya da wuzlala mey a. Ama, ya cɛney day nga ndaw mekele da gazlavay da vadɛ maa guzlya, a lɛvey: «Ka da wuzlala cek masa var maa guzldɛrwa ngene ba. Ka da kada a ndaw ba.»

⁵ Ta', maslaŋ masa ma pa salay aŋga pal a ray yam, langar a ray hwiyak heyey, a baŋgada har-zɛmay ngada vadɛ,

⁶ a mbedey ta mezɛley nga Gazlavay, ndaw masa aa daha nga sɛrmataw, ara aŋga ma lɛma slam da vadɛ ta cek hay da hwaɛ a cɛpa, leŋ slam da hwayak ta cek hay da hwaɛ a cɛpa. Asaya, ara aŋga ma katɛrwa bɛlay hay ta cek hay

da hwaɗ a cɔpa. A mbefey, a lɔvey: «Cek ma da key heyey na, cek ma da tɔka daa saba.

⁷ Yaw, daa masa maslan ŋga dey maasala ha ma da fa taalam anɔa kede na, Gazlavay a da ndɔvda cek mabadakaya masa aa ma wulkey ŋga ka. Cek mabadakaya ha na, ara cek masa anɔa ma wuzdatara ŋgada ma ka slɔra anɔa hay, ndɔhay ma tɔla mey anɔa hay zleezle.»

⁸ Cay, ɗay masa yah, Jan, yah ma cɔnda da gazlavay kaa heyey aa guzlya saya, a lɔvey: «Daw ta tɔba ɗerewel mawurkaya heyey masa da har maslan, salay pal da ray yam, langar da ray hwiyak katay.»

⁹ Fa dɔba ha, ta', ya daw fa maslan a heyey dɔba, ya lɔvar: «Vɔldiwa ɗerewel mecɔhe kede.» Maslan a, a mbɔɗdiwa, a lɔvey: «Ehe, zɔma. A da cɔrfaka da mey anda amam, ama da ka ta nda la a hwaɗ na, a da kaka ɗefɔwek *.»

¹⁰ Cay, ta', ya tɔba ɗerewel mecɔhe kaa heyey, zam! ya zɔma. Fara fara ta cɔrfaya la anda amam, ama daa masa yah ma nda la a hwaɗ na, ta tɔrey sem ɗefɔwek.

¹¹ Asaya, a lɔvya: «Si ka daw dey pal saya, ŋga wuzda mey masa Gazlavay maa guzlda da ray cek ma da key da ray sɔkway hay ga, da ray ndɔhay daa wura daa wura, da ray hwayak hay ga maa guzlam ta mey hay mekele mekele, asaya, da ray bay hay ga.»

11

Mey da ray ndɔhay ma ka sede cew

¹ Menjey nekɔɗey, ta', a vɔlmaya zlanday. Ara zlanday ma wey cek ta anɔa. Cay, ndaw daha aa guzlya, a lɔvey: «Slɔkɗey, daw ta wa megɔley ŋga *Way-mekey-kwakwas ŋga Gazlavay, leŋ slam-mefɔkey cek ŋgada Gazlavay. Asaya, slɔfta ndɔhay masa ma ɗɔram ɗanɔay daa way a *

² Ama ka da wa slam daa ambaw ba, mbɔkda maja slam a ŋgene aa mapakaya ŋgada sɔkway hay tabiya ma sɔmara Bay Gazlavay ba, maja ndɔhay a ŋgene a da wam da ray

10:6 10.6 Ps 146.6; Dan 12.7; SNM 4.24 **10:7 10.7** 22.6; Jer 25.4; Am 3.7-8

10:8 10.8-10 Ez 2.8-3.3 * **10:9 10.9** A da cɔrfaka...a da kaka ɗefɔwek: Ndɔhay a wulkam «A da cɔrfaka anda amam» a wuɗey ŋga lɔvey «metɔbey mey ŋga Gazlavay aa maaya maja aa guzley da ray melɔhey ŋga ndaw». «A da kaka ɗefɔwek» a wuɗey ŋga lɔvey «mey ŋga Gazlavay a wuzwa sariya masa Gazlavay ma da ka», da daa ba, a wuɗey ŋga lɔvey «ndɔhay a da sɔram banay maja mey a». * **11:1 11.1** wa megɔley ŋga Way-mekey-kwakwas ŋga Gazlavay[...]slɔfta ndɔhay: A wuɗey ŋga lɔvey cek masa anɔa ma wa ta ndɔhay masa anɔa ma slɔfta na, Gazlavay fa nɔkfatar dey. Ndɔhay masa ma ɗɔram ɗanɔay na, ara ndɔhay ŋga Gazlavay. **11:1 11.1** 21.15

*Jeruzelem, berney nga Gazlavay, a da nōsmara, haa kiya kwakwar mēfad a ray a cew †.

³ Asaya, ya da slərdata ndəhay adaw hay cew daha nga key sede da ray mey adaw fa mey nga ndəhay. Ndəhay cew e na, a da kəzlam zana ma təwa vagay fa vaw, amba a təwam maja mebərey nga ndəhay a. Fa dəba ha, a wuzdamara mey adaw masa yah maa guzlda la haa kiya kwakwar mēfad a ray a cew e keđe.»

⁴ Ndəhay a cew keđe na, ata malacatakaya fa mey nga Bay Gazlavay ma wa bəla tabiya. Ara wudez hay cew ma zəley *Awliwiye. Asaya, ata cewete petərila hay.

⁵ Da ndəhay masa-gəra ata hay a wudam nga kamatar cek maaya ba na, awaw a da bawa da mey nga ndəhay cew e, asaya, awaw a, a da takwarata masa-gəra ata hay a kəlmedek! Ara anda keđe, ndəhay masa-gəra ata hay a, ma da məcām. Kwa fa da hətām dabaray nga ləhey daa ba səlāk.

⁶ Daa masa ndəhay cew e fa təlām mey nga Gazlavay na, a gwamara nga təkay var ma da pawa haa kasl ata ma ndəvdamara metəley-mey a. Yaw, ata ta gədanj nga tərđamara yam nga mambaz. Asaya, ata ta gədanj nga handawa banay hay mekele mekele a ray ndəhay da bəla, kwa ta đar wura wura anda ata ma wudām.

⁷ Da ndəhay cew e keđe ta ndəvdamara metəley-mey nga Gazlavay cay na, cek nga ley mahura a bawa la daa vəged meselelenj e heyey, a da kərzata ndəhay cew e. A da fənta ta gədanj, a da kəđta vagay.

⁸ Vagay hay a, a da njām makwiydayakaya daa bəwal nga berney mahura, slam masa Bay ata Mahura Yesu ma məcəy da hwad a fa hwadam mazlangalakaya heyey. Berney a nģene a, a pamar sləmay-wazlay *Sadawm, da daa ba, *Ejip ‡.

⁹ Ndəhay daa hwayak hay tabiya, daa səkway hay tabiya, maa guzlam ta mey hay tabiya, ndəhay mekele mekele tabiya a da nəkмата vagay hay a daa bəwal haa đar maakar ta reta. Fa da vəlmatar cəvedj nga pəshamata na, daa ba.

† **11:2 11.2** kiya kwakwar mēfad a ray a cew: A wudəy nga ləvey «đar 1260».

11:2 11.2 Ps 79.1; Lk 21.24; **kiya kwakwar mēfad a ray a cew:** 12.6, 14; 13.5; Dan 7.25; 12.7 **11:4 11.4** Zak 4.1-3, 11-14; Jan 8.17 **11:5 11.5** 2Bay 1.10; Ps 97.3; Jer 5.14 **11:6 11.6** Mab 7.17-19; 1Bay 17.1; Jak 5.17 **11:7 11.7** 13.1-2; 17.8 ‡ **11:8 11.8** Sadawm ta Ejip: Sadawm ara berney masa ndəhay da hwad a, a kam cek malamba kalah. Da ray nģene, Gazlavay ta pəlha sem. Ejip na, ara hwayak masa ndəhay Israyel hay zleezle ma kamawa beke da hwad a. Ara hwayak masa ndəhay da hwad a, a wudmara Gazlavay ta ndəhay anģa hay ba səlāk, a nam ray a kuley hay. **11:8 11.8** Lk 13.33-34; **Sadawm:** MC 18.20; Iz 1.10; Ez 16.46; **Ejip:** Mab 3.16-19; 7.3-5

¹⁰ Ndəhay maaya ba hay cəpa da bəla aa səmam la ara mey ba da ray vagay hay a. A da kam gwagway ta mevəley cek hay da wuzlah ata. Aa məkam la fa meməcey nga ndəhay cew ma təlam mey nga Gazlavay kefe, maja ata ta sərdamata banay la kalah ta ndəhay da bəla.

¹¹ Fa dəba nga đar maakar ta reta kaa heyey, Bay Gazlavay a da fətatar mesəfney a ndəhay cew maməctakaya kaa heyey, amba a mbəlam. Ta', a sləkdam, a lacam ta lecey. Ndəhay masa ma hətmar cek aha na, a rəzlam ga, mandərzay a katar.

¹² Fa dəba ha, ndəhay cew heyey a cənam đay maa guzlwa ta gədan da vad, a ləvtar: «Samawa, təpmawa fa yah fefe a gazlavay.» Cay, a təpam a vad, gazlavay nga var a sərtata meedey masa-gəra ata hay heyey.

¹³ Daa ngene, hwiyak a wusey ta gədan gədek gədek, anda anğwa ma bəzley. Da wuzlah slam hay kuraw nga berney a na, pal a pəlhey. Hwiyak a ma wusey na, ta kədey ndəhay gabal maasala vagay la. Ndəhay siya masa ta dey na, a zluram ga, a həlmamara Bay Gazlavay da vad.

¹⁴ Ara anda kefe, banay nga dey cew e ma ndəvey. Ama wam vaw, maja menjey nekədey fefe banay mekele nga dey maakar a, a sawa la saya.

Mey da ray taalam masa nga dey maasala ha

¹⁵ Fa dəba nga banay nga dey cew e kefe, maslan nga Gazlavay nga dey maasala ha, a fa taalam anğa may. Day hay a cənmawa ta gədan da gazlavay, a ləvam: «Wure kefe, Bay Gazlavay aləkwa leŋ *Kəriste, ndaw anğa masa aa ma wala, fa wam da ray bəla. A da wam nga sərmataw.»

¹⁶ Masa đay hay a maa guzlam la na, *bay-ray hay kwakwar cew a ray a məfad manjatakaya daa slam-menjey hay fa mey nga Gazlavay heyey, ta', a ragadam, dangay dar! dar! a hwayak fa mey nga Gazlavay, a həlmamara,

¹⁷ a ləvam:

Bay Gazlavay, kah Gazlavay ta gədan
ma fənta cek hay tabiya.

Kah na, kah daha
dəga bəla ta ləmey daa ba aran,
haa kasl wure kefe,
kah daha nga sərmataw.

Ala fa kamaka suse,
maja wure kefe ka fa wuzdərwa gədan akah mahura.

Ka fa wey da ray cek hay tabiya dōba.

¹⁸ Səkway hay tabiya ta cam mevel la da ray akah.

Ama wure kede na, ara kah, Bay Gazlavay,
ma cey mevel da ray ata dōba.

Pas masa kah ma da katar sariya
ngada ndəhay maməctakaya tabiya ta wuswa cay.

Ara pas masa kah ma da pəltara mawurbay nga sləra
nga ndəhay ma ka sləra akah hay,
masa ma təla mey akah hay.

Asaya, ka pəltara mawurbay
nga ndəhay akah hay ma namaka ray,
kwa ngada ndəhay mahura hay ta mecəhe hay.

Ama ngada ndəhay masa ma nəsmara bəla na,
ara pas masa kah ma daa zəfdata.

¹⁹ Masa bay-ray hay a ngene maa guzlam cay na, *Way-mekey-kwakwas nga Gazlavay da vad bəfanj! a wurey haa kwa waawa a hətar *akwatay § nga *mejəwey-mey nga Gazlavay ta Israyel hay daa way a. Asaya, var a zəmey wəf-wəf, wəf-wəf, aa bəcey təzlaw! təzlaw! dey ga. Hwiyak a wusey anda aŋgwa ma bəzley. Asaya, lanja mahura mahura a kwiymawa a hwayak.

12

Mey da ray ata ngwas ta gədem mahura

¹ Fa dōba nga cek hay a ma kam ngene, cek daha merəzley ndaw a wuzwa vaw da gazlavay da vad. Ara ngwas. Ngwas aha pas masərtakaya fa vaw aŋga anda zana. Kiya aa dasi salay aŋga. Adikwaw nga wurzla kuraw a ray a cew da ray, anda jikwew nga bay-gula.

² Ngwas aha aa ta hwaɸ, fa da yey. Fa wudey maja hwaɸ a, fa car, fa sərey banay ga.

³ Cek mekele daha merəzley ndaw, a wuzwa vaw da vad saya. Ara cek nga ley mahura magaza. A səram ba ta gədem mahura. Cek aha, aa ta ray hay maasala leŋ gursaw nga bay hay maasala da ray hay a. Asaya, cek aha, aa ta dəram hay kuraw da ray. ⁴ Gədem e vey! a vawa wurzla hay ga da vad ta kwetel aŋga. Daa wurzla hay makustakaya slam maakar,

11:17 11.17 1.8; 4.8; 15.3; 16.7; 19.6, 15; 21.22; Am 4.13; 2Kwr 6.18 **11:18**

11.18 19.5; Ps 2.1-5; 110.5-6 § **11:19 11.19** Daa akwatay a na, aŋgwa hay cew masa mejəwey-mey nga Gazlavay ta Israyel hay mawuzlalakaya fa vəda daha. Daa Way-mekey-kwakwas magurma da bəla na, akwatay nga mejəwey-mey nga Gazlavay mabadakaya daa Slam masa Gazlavay aa da hwaɸ a. Ndaw a gwa nga hətar ba səlak, si ndaw mahura da ray ndəhay ma ka kwakwas nga Gazlavay ma hətar dey pal daa mevey gway. Nəka Heb 9.1-7. **11:19 11.19** 4.5; 6.12-13; 8.7; 15.5; Jəw 38.22-23; **akwatay:** 1Bay 8.1, 6 **12:1 12.1** Iz 7.14; 26.17 **12:3 12.3** gədem: 12.7, 9, 13; 13.2; 16.13; 20.2; Dan 7.7, 24

a wawa slam pal, a hazakadatərwa fakw! fakw! a hwayak. Ta', a lecey fa mey nga ngwas heyey, amba da ngwas aha ma yey cay na, a la bəzey a, a zəma.

⁵ Daa ngene, ngwas a, ta', a yawa bəzey mezəle. Ara bəzey a ma da wey da ray hwayak hay tabiya ta gədan. Daa masa aa ma yarawa cay, ta', a lamara bəzey a, a vad' a cakay Gazlavay manjakaya daa slam-menjey anğa.

⁶ Ngwas aha na, ta', a hway a wuzlah-ley aa slam masa Gazlavay ma diya amba a vəlar cek mezəmey da hwaɸ a. A da njej daa slam aha kiya kwakwar məfad a ray a cew*.

⁷ Fa dəba ha, vəram a key da gazlavay da vad'. Misel, mahura nga maslan hay nga Gazlavay, leŋ maslan anğa hay siya a kədam vaw ta gədem heyey. Gədem may ata ta maslan anğa hay daa vəram a.

⁸⁻⁹ Ata Misel ta fənmata gədem ta maslan anğa hay sem ta gədan, leŋ! a lamatərwa, fakw! fakw! a hazakadamərwa a palah, maja Bay Gazlavay a wudey a njam da vad' saba. Gədem e na, ara zezekw masa ma təkната ndəhay da bəla dəga zleezle. Mezəley anğa, *Satan, bay-malula. Ta kəzlamərwa sem da vad' ngada hwayak ta maslan anğa hay cəpa.

¹⁰ Menjey nekədey, ya cəney day nga ndaw maa guzlwa ta gədan da vad', a ləvey: «Wure keɸe Gazlavay aləkwa ta ləhdandakwar cay fara fara daa banay. Anğa fa wuzdərwa *mewey anğa, a fənta cek hay cəpa ta gədan. Asaya, wure keɸe, *Kəriste, ndaw anğa masa aa ma wala nga ləhdata ndəhay, fa zəma bay anğa. Ta hazakadamərwa Satan, ndaw maa dədfatar mey a məlma aləkwa hay sem. Ara ndaw maa dədfatar mey taa vad', taa pas fa mey nga Gazlavay aləkwa.

¹¹ Ama məlma aləkwa hay a, ta fənmara Satan sem ta gədan ta fa mambaz nga *Bəz-təban nga Gazlavay ma mbəɸwa. Asaya, ta fənmara sem ta gədan, maja ata ma kam sede da ray Yesu fa mey nga ndəhay ta mandərzay daa dey ba, ta zluram ta meməcey daa ba.

¹² Da ray ngene, meesəmey nga key da gazlavay da vad'. Akwar ndəhay masa da gazlavay da vad', sasəmam. Ama, akwar, ndəhay da ray hwayak ta ndəhay da ray bəlay,

12:4 12.4 Dan 8.10 **12:5 12.5** 19.15; Ps 2.9 * **12:6 12.6** kiya kwakwar məfad a ray a cew: A wudey nga ləvey «ɸar 1260». **12:6 12.6** 1Bay 17.1-7; 19.5-7; Mt 2.13; **ar 1260:** 11.2 **12:7 12.7** Dan 10.13; Jud 9 **12:8-9 12.9** 20.2; MC 3.1; Iz 14.12; 27.1; Lk 10.18; Jan 12.31 **12:10 12.10** 4.11; 11.15; **ndaw maa dədfatar mey:** Jəw 1.9-11; Zak 3.1 **12:11 12.11** 6.9; Mt 16.25; **Bəz-təban:** 5.6; 1Jn 2.14; 5.4

akwar na, banay a sawa la a ray akwar maja Satan, bay-malula, ta kəzlamərwa sem a wuzlah akwar, fa cey mevel ga, maja a səra na, pas anğa mendərey nekədey gway.»

¹³ Daa masa ta hazakadamərwa gədem sem a bəla na, ta', gədem e a wusey vaw, a səpar wurzay nğa nğwas ma yawa bəzey mezəle heyey.

¹⁴ Ama ta', a vəlmar zlara hay cew nğa bərgaday mahura a nğwas aha amba a jəvey ta anğa a wuzlah-ley, aa slam masa Gazlavay ma da vələr cek mezəmey heyey, amba a njeý fetede haa mevey maakar ta reta. Gədem kaa heyey a gwa a hətfar fetede saba.

¹⁵ Ta', gədem e a vəngwa yam ga da mey, a vevey anda wayam ma ley, a səpar wurzay nğa nğwas aha amba a la.

¹⁶ Ama hwiyak ta jəna nğwas aha la. Hwiyak a, bəzl! a bəzey anda ndaw ma wura mey, ndərbac! a sa yam masa gədem ma vəngwurwa heyey.

¹⁷ Daa masa gədem kaa heyey ma hətar hwiyak ma sa yam kede la na, a cey mevel ga a ray nğwas aha. Da ray nğene, a vəhwa amba a daw nğa kawa vəram ta bəz anğa hay siya. Bəza hay a na, ara ndəhay ma namar ray a mewey hay nğa Bay Gazlavay, asaya, ara ndəhay ma kam sede da ray Yesu fa mey nğa ndəhay.

¹⁸ Cay, ta', gədem kaa heyey a daw a lecey a mey-bəlay.

13

Mey da ray cek hay nğa ley hay cew

¹ Fa dəba ha, yah, *Jan, ya hətey cek nğa ley fa bawa daa bəlay. Cek aha aa ta ray hay maasala, dərām anğa hay kuraw. Gursaw nğa bay hay macəbtakaya da ray dərām hay kuraw ata. Mezəley maaya ba nğa cədey Gazlavay mawuzlalakaya fa ray anğa hay a.

² Cek nğa ley masa yah ma hətar a na, a sərām ba ta dəva. Ama salay anğa hay na, zlelek da mey a maazəma yin-yen*. Mey anğa may, a sərām ba ta mey nğa mabar. Gədem heyey a vəldara gədan anğa ta bay anğa amba a wey da ray bəla, a key cek ta gədan. ³ Ray nğa cek nğa ley a pal dasi maasala hay heyey, a nəkey na, anda ta nğəmamara la haa a məcey. Ama, cek nğa ley a ta', a mbəlwa daa meməcey, mbəlek e kaf! a kəfeý. Maja nğene, ndəhay cəpa da bəla a rəzlam da ray a, ta', a səpmara.

12:12 12.12 18.20 **12:14 12.14** mevey maakar ta reta: 11.2 **12:17 12.17** 6.9; 11.7; 13.7; Dan 7.21 **13:1 13.1** bəlay: Dan 7.3; **cek nğa ley:** 11.7; 13.11-17; 16.10; 17.3, 7-13; 19.20; Dan 7.3-8, 21, 25 * **13:2 13.2** Ta mey Gerek a lövey «salay hay na, a sərām ba ta salay hay nğa ours.» «Ours» ta mey Nasara na, ara cek nğa ley mahura masa-həma kalah. **13:2 13.2** 2Tes 2.9 **13:3 13.3** 17.8

⁴ Ata cəpa a ragadamar ɲgada gədem maja aa ma vɛlar gədan ɲgada cek ɲga ley kaa heyey. Asaya, a ragadamar ɲgada cek ɲga ley a, a ləvam: «Ma fəna cek ɲga ley keɖe ta mahura na, wa? Ma gwa ɲga fəna ta mekəɖey-vaw na, wa? Kwa ndaw pal ma gwa daa ba səlak.»

⁵ Daa ɲgene, a vɛlmar cəveɖ a cek ɲga ley a ɲga həsley ray ga ta ɲga cəɖa Gazlavay. A hətey gədan ɲga cəɖa Gazlavay haa kiya kwakwar məfad a ray a cew.

⁶ Anda keɖe, aa guzley maaya ba da ray Gazlavay, a cəɖa. Asaya, a cəɖa slam-menjey anɲa leɲ ndəhay da vad tabiya.

⁷ Fa dəba ha, a vɛlmar cəveɖ a cek ɲga ley a amba a kədam vaw ta ndəhay ɲga Gazlavay, a fənta ta gədan. Asaya, a fənta səkway hay cəpa, ndəhay daa wura daa wura cəpa, maa guzlam ta mey wura wura cəpa, leɲ hwayak hay cəpa, a fənta ta gədan. Ata cəpa dasi har ɲga cek ɲga ley a.

⁸ Ndəhay cəpa da bəla a dərmar danɲay la a cek ɲga ley a. Ara ndəhay masa mezəley ata mawuzlalatakaya daa ɖerewel ɲga ndəhay masa fa da hətam heter mendəvey ba daa ba. ɖerewel ɲga ndəhay ma da hətam heter mendəvey ba na, mawuzlalakaya dəga zleezle masa bəla ta ləmey daa ba aran, ara ɖerewel ɲga Bəz-təban masa ma slamara ɖay a heyey.

⁹ Yah, Jan, ya fa ləvey: «Da ndaw aa ta sləmay, si a jəkey sləmay maaya maaya fa mey masa yah ma kada keɖe.

¹⁰ Ndaw masa mapakaya ɲga kərzey na, si a kəzamara kəne. Ndaw masa mapakaya ɲga kəɖey vagay ta dəlaw na, si a kəɖmara kəne. Anda keɖe, si ndəhay ɲga Gazlavay a bəsmara banay, a pamara Gazlavay ɲga ndaw ata fara fara cəɲga.»

¹¹ Fa dəba ha, ya hətey cek ɲga ley mekele ma bawa daa vəged. Anɲa ta dəram da ray cew. Dəram anɲa hay a na, ata anda ɲga bəz-təban. Day anɲa a cəney anda gədem.

¹² Cek ɲga ley a keɖe fa key cek ta gədan tabiya anda ɲga cek ɲga ley ɲgeeme heyey. A ka sləra ha fa mey ɲga cek ɲga ley ɲgeeme. A təktaɖ ɖay ɲgada ndəhay cəpa da bəla ɲga ragadamar ta meney ray ɲgada cek ɲga ley ɲgeeme masa ray maɲɲəmɲkaya haa a məcey, mbəlek ma kəfey heyey.

¹³ Cek ɲga ley mecew e a key maazla ga haa a kwiywa awaw da gazlavay da vad a hwayak fa mey ɲga ndəhay cəpa.

¹⁴ A təknaata ndəhay cəpa da bəla ta fa maazla hay masa Gazlavay ma vəlar cəved ŋga key fa mey ŋga cek ŋga ley ŋgeeme kaa heyey. Ta fa maazla hay a na, a həldata ndəhay da bəla cəpa ŋga ləmam cek ma səram ba ta cek ŋga ley ŋgeeme masa ma ŋgəmamara ta dəlaw haa a məcey, ama aŋga ta dey cəŋga. A həldata ndəhay ŋga həsley ray a cek aha.

¹⁵ Fa dəba ha, Gazlavay a vəlar cəved a cek ŋga ley mecew e ŋga fətey memed a cek maləmkaya ha, amba a səfney, aa guzley, a kəfta ndəhay masa ma ragadamar ba vagay.

¹⁶ Asaya, cek ŋga ley a, a təktar dəy ŋgada ndəhay tabiya, kwa bəza hay, kwa ndəhay mahura hay, kwa masa-zleley hay, kwa masa-viya hay, asaya, kwa beke hay ta ndəhay masa beke ba hay, amba a təhtar cek fa daŋgay, da daa ba, fa har-zəmay ata.

¹⁷ Ndaw masa cek matəhkaya fa vəfa daa ba na, a gwa a hədkey cek saba, asaya, a gwa a hədkeley cek saba may. Cek matəhkaya ha na, ara mezəley ŋga cek ŋga ley masa ŋgeeme, da daa ba, ara lamba mapakaya anda mezəley a.

¹⁸ Anda kefe, yah, Jan, ya fa ləvey: «Maaya na, ndəhay a wulkam maaya maaya da ray mey a. Ndaw ta lengeŋ na, si a pey lengeŋ fa cek masa lamba ha ma wufey ŋga wuzdərwa. Lamba ha na, aa mapakaya anda mezəley ŋga ndaw, ara temere maakwaw ta kwakwar maakwaw a ray a maakwaw.»

14

Mey da ray Yesu ma mbəftərwa ndəhay da wuzlah ndəhay da bəla

¹ Daa masa yah, *Jan, ya fa nəkey dey saya na, ya hətar Bəz-təbaŋ heyey malacakaya da ray aŋgwa mezəley *Siyəŋw. Ndəhay masa mezəley ŋga Bəz-təbaŋ ta mezəley ŋga Bay Gazlavay Papaha mawuzlalatakaya fa daŋgay ata na, ata tabiya malacatakaya ta Bəz-təbaŋ a, daa slam a. Ndəhay a tabiya, ata gabal temere ta kwakwar məfad a ray a məfad.

² Asaya, ya cəney dəy maa guzlwa ta gədaŋ da gazlavay da vad. Aa guzley dəy mahura, a mbey mey ta gədaŋ anda yam ma vavawa daa maajərav mahura. Asaya, aa bəcey ta gədaŋ anda var. Dəy a masa yah ma cənda ŋgene, a cəney anda ndəhay ma kədam ganjaval ga daa slam a.

³ Ndohay gabal temere ta kwakwar mofad a ray a mofad heyey malacatakaya fa mey nga cek hay mofad ta dey heyey, leŋ fa mey nga *bay-ray hay heyey. Ata tabiya fa mey nga slam-menjey nga Bay Gazlavay. Ata fa zlam walay mawiya masa kwa ndaw mekele ma sora nga zla daa ba solak, si ndohay masa gabal temere ta kwakwar mofad a ray a mofad heyey, masa Yesu ma mbotowa da wuzlah ndohay da belä.

⁴ Ata na, ara ndohay masa ta har-dalay ba, maja ta nam ta ngusay daa ba solak. Kwa aa slam wura wura masa Bez-toban ma daw na, ndohay a, fa sɔpmar wurzay. Ara ata, ndohay masa anga ma mbotowa teesef da wuzlah ndohay da belä, amba a njam ngada Gazlavay ta ngada anga, anda cek ma key da ley teesef masa ndohay ma veldamara a Gazlavay ta ngada Bez-toban a.

⁵ Kwa ndaw ta coney membörzley pal da mey ata daa ba solak, asaya, kwa mebörey fa ata daa ba.

Mey da ray maslan hay nga Gazlavay maakar

⁶ Cay, yah, *Jan, ya hotey maslan nga Gazlavay mekele fa pökey doren da gazlavay da vad. *Mey-maaya-mawiya masa fara fara ma da njey nga sormataw na, aa daha da har anga. A da wuzdatara ngada ndohay da belä cöpa, kwa ndohay daa hwayak wura wura, daa sökway wura wura hay cöpa, leŋ ngada ndohay masa maa guzlam ta mey hay wura wura cöpa.

⁷ Ta', maslan nga Gazlavay a, aa guzlar ta gödan, a lövtar: «Namar ray a Gazlavay, hölmamara, maja pas masa aa ma da katar sariya ngada ndohay na, ta wuswa cay. Höslmar ray, ara anga ma lömowa slam da vad ta da hwayak, ara anga ma katowa belay hay leŋ wurak hay nga yam cöpa.»

⁸ Fa döba ha, yah, Jan, ya hotar maslan nga dey cew e fa sɔpar wurzay nga maslan ngeeme heyey, a lövey: «Berney mahura nga *Babilanw heyey ta pölhey sem. Fara fara ta pölhey sem pölah! pölah!, maja Babilanw aha ta ley vaw saw la, taa sorkadata sökway hay tabiya sem nga mbökdamara cöved nga Gazlavay amba a kam cek hay maaya ba mekele mekele anda anga. Ara anda aa ma völtar wuzam nga sey mandaw mandaw nga nösta.»

⁹ Fa döba ha, yah, Jan, ya hotar maslan nga dey maakar a fa sɔptar wurzay nga maslan hay cew heyey. A wudey ta gödan, a lövey: «Kwa waawa ma nar ray ngada cek nga ley ma bawa daa belay kefe, ta ngada cek malömkaya anda

an̄ga heyey, asaya, kwa waawa ma t̄ɔba amba cek aha a t̄ɔhar cek fa dan̄gay, da daa ba, fa har na,

¹⁰ ŋgene, Gazlavay a s̄ɔrda banay la. A cey mevel la a ray a. Maja ŋgene, a da s̄ɔrey banay, anda ndaw ma sey cek meed̄ɔwek e mar̄ɔhkaya pece pece daa v̄ɔley, kwa cek meed̄ɔdek e da hwaɗ a daa ba s̄ɔlak. Fara fara, Gazlavay a da s̄ɔrda banay daa awaw, fa ḡɔɗey nj̄ɔm-nj̄ɔm. A da s̄ɔrda banay k̄ɔne fa mey ŋga maslan̄ an̄ga hay ta fa mey ŋga B̄ɔz-t̄ɔban̄ an̄ga.

¹¹ Kakas ŋga awaw a, faa ŋḡɔsey ŋga s̄ɔrmataw. Nd̄ɔhay a, ta namar ray la ŋgada cek ŋga ley heyey, len̄ ŋgada cek mal̄ɔmkaya anda an̄ga, asaya, ta t̄ɔbmara la amba cek aha a wuzlalatar mez̄ɔley an̄ga fa ata. Anda keɗe, fa da h̄ɔtam mem̄ɔskey-vaw daa ba s̄ɔlak. A da s̄ɔram banay taa vad̄, taa pas maja awaw a.»

¹² Yah, Jan̄, ya fa l̄ɔvey: «Akwar nd̄ɔhay ŋga Gazlavay ma namar ray ŋgada kwakwas an̄ga, asaya, ma t̄ɔbmara mey ŋga Yesu, banay masa akwar ma s̄ɔrmara da b̄ɔla ŋgene na, si ka b̄ɔsmara gway.»

¹³ Fa d̄ɔba ha, ya c̄ɔney ɗay maa guzlya d̄ɔga da vad̄, a l̄ɔvey: «Wuzlala mey a keɗe: Nd̄ɔhay ma m̄ɔcam daa sl̄ɔra ŋga Bay Mahura na, maaya ŋga Gazlavay aa da ray ata d̄ɔga wure keɗe haa ŋga s̄ɔrmataw.» Ta', *Mes̄ɔfney ŋga Gazlavay a mb̄ɔɗɗara a ɗay maa guzlya heyey, a l̄ɔvey: «Ahaw, wure keɗe, sl̄ɔra ata ta nd̄ɔvey cay, a da m̄ɔskam vaw maja banay masa ata ma b̄ɔsmara da b̄ɔla heyey ta sl̄ɔra maaya masa ata ma kamara na, fa wuzd̄ɔrwa ata nd̄ɔhay ma kam cek maaya.»

Mey da ray mend̄ɔvey ŋga b̄ɔla

¹⁴ Fa d̄ɔba ha, yah, *Jan̄, ya da n̄ɔkey dey na, a ray mekwtene mabara. Ndaw anda B̄ɔz ŋga Ndaw manjakaya da ray mekwtene he. Ndaw aha, jikwew ŋga bay-gula da ray. Jikwew a makakaya ta b̄ɔrey magaza. Asaya, ndaw aha aa ta b̄ɔbey da har, mey a mak̄ɔɗkaya maaya maaya.

¹⁵ Menjey nek̄ɔɗey, maslan̄ mekele a bawa daa *Way-mekey-kwakwas ŋga Gazlavay da vad̄, aa guzlar ta ḡɔdan̄ ŋgada ndaw da ray mekwtene he, a l̄ɔvar: «La b̄ɔbey akah amba ka ŋḡɔma ɗaw, maja pas a ta wuswa cay. Cek hay da b̄ɔla ta n̄ɔham cay.»

14:9 14.9 13.15 **14:10 14.10** 15.7; 16.1, 19; 19.20; MC 19.24; Ps 11.6; Jer 25.15; Ez 38.22; Mt 25.41 **14:11 14.11** 19.3; Iz 34.10 **14:12 14.12** 13.10 **14:13 14.13** 1.3; 16.15; 19.9; 20.6; 22.7, 14; Heb 4.9-10 **14:14 14.14** 1.7, 13 **14:14 14.14-20** Dan 7.3-14; Jwl 4.13; Mt 13.39-40; 17.5; 24.30; SNM 1.9

16 Da ray ηgene, ndaw manjakaya da ray mekwtene kaa heyey leη! a la bebey aηga, ηgam! ηgam! a ηgəma daw * da bəla.

17 Cay, ya hətey maslaη mekele ma bawa daa Way-mekey-kwakwas ηga Gazlavay da vad heyey saya. Aηga ta bebey da har, mey a makədkaya maaya maaya may.

18 Fa dəba ηga maslaη a kefe, maslaη ηga Gazlavay mekele a sawa da cakay slam-mefəkey cek ηgada Gazlavay. Ara maslaη ma wey da ray awaw. Aa guzlar ta gədaη ηgada maslaη masa bebey da har heyey, a ləvar: «La bebey akah, daw ta slatərwa babəza ηga wudez ma vevey ta vevey da bəla, babəza masa yam a ma kam wuzam † ta aηga, daw ta slatərwa da bəla cəpa, maja ta nəham cay.»

19 Anda kefe, maslaη kaa heyey leη! a la bebey aηga ta', a daw a slatərwa babəza ηga wudez hay heyey ‡, kway! a kwiya da aa slam masa ndəhay ma mbərzlamara ηga dəcəy yam a. A wufey ηga ləvey na, Gazlavay fa cey mevel ga a ray ndəhay siya da bəla.

20 Slam masa aa ma mbərzlamara babəza ηga wudez e na, aa da dəba berney a §. Masa fa mbərzlamara ηga dəcəy yam a, ama ma da bawa na, ara mambaz. A vevey, a ley wayam anda yam haa a daw dərəη a key kəlemeeter temere maakar. Da pəles a ndəkwey a hwad a na, mambaz a, a kərza kasl aa mey.

15

Mey da ray maslaη hay maasala ηga Gazlavay ma da sərdamata banay ta ndəhay

1 Fa dəba ha, yah, *Jan, ya hətey cek maaya mekele ma rəzley ndaw a wuzwa vaw da gazlavay da vad. Ara maslaη hay ηga Gazlavay maasala ma da sərdamata banay mekele mekele ta ndəhay haa dey maasala. Banay hay a ηgene, ara mecey-mevel ηga Gazlavay madagway-dakw a ray ndəhay da bəla.

2 Cay, ta', ya hətey cek mekele saya anda dəhwa ma wufey pəηged pəηged anda baηgəra, ta awaw da hwad a, dey a hətey gurgwar a wurza. Ndəhay malacatakaya da mey dəhwa ha, ata ta ganjaval masa Gazlavay ma vəldatara da

* **14:16 14.16** a ηgəma daw: «Məηgəmey daw» fefe (14.15-16) a wufey ηga ləvey mekusey ndəhay maaya fa mey ηga Gazlavay ηga hətey heter mēdəvey ba. Daa 14.17-20a wufey ηga ləvey sariya ηgada ndəhay siya. † **14:18 14.18** wuzam: A tam wuzam kefe ta yam ηga babəza ηga wudez mezəley «raisin» ta mey Nasara. ‡ **14:19 14.19** Babəza ηga wudez hay kefe mapatakaya anda ndəhay ta mebərey masa Gazlavay ma da katar sariya. **14:19 14.19** 19.15; Iz 63.1-6 § **14:20 14.20** berney a: Ndəhay a wulkam, berney a na, ara Jeruzelem. **15:1 15.1** 4.5; 15.7; 16.1; 17.1; 21.9

har. Ara ndəhay ma fənmara cek ŋga ley ta gədan, ma namar ray ŋgada cek maləmkaya anda anga heyey ba, ma təbmara amba a hətam lamba anga heyey fa danɣay ata ba səlak.

³ Fa zlam walay masa *Mawiz, ndaw ma ka sləra ŋga Gazlavay ma zla zleezle. Ŋgene he, ara walay ŋga *Bəz-təban ŋga Gazlavay may *. Ndəhay a, a zlam walay, a ləvam:

Bay Gazlavay, kah Gazlavay ta gədan
ma fənta cek hay tabiya.

Sləra akah masa kah ma ka keɖe na,
aa kwakwad ba, aa maaya ara mey ba.

Kah na, Bay ma wey da ray hwayak hay cəpa.

Cek hay masa kah ma kata na, ka kata ta cəved e,
membərzley da hwad a daa ba səlak.

⁴ Bay Gazlavay, ndaw ma zlurey ta kah ba na, wa?
Ndaw ma ləvey a həslka ray ba na, ndaw a dama?
Kah na, kah Gazlavay pal.

Ndəhay daa hwayak hay cəpa a samawa la fa mey akah
ŋga həslmaka ray ta meregedey,
maja ata ma hətmar sləra akah makakaya ta cəved e.

⁵ Menjey nekəɖey, yah, Jan, ya hətar *Way-mekey-
kwakwas ŋga Gazlavay da vad mawurkaya. Slam-
mekərcey ta ambal aa da hwad a. *Akwatay ŋga *mejəwey-
mey ŋga Gazlavay ta ndəhay anga hay aa daa slam-
mekərcey a.

⁶ Cay, ya hətatar maslan hay maasala ma da sərdamata
banay ta ndəhay haa dey maasala heyey, fa bamawa daa
way a. Ata ta zana fa vaw mabara, ma ley dey. Asaya,
zəwet hay ŋga bərey magaza ma wedey pəlŋged pəlŋged
majəwtakaya fa dadak ata hay †.

⁷ Cek hay məfad ta dey heyey, pal da wuzlah ata ta', a
vəltar taasa hay ŋga bərey magaza pal pal a maslan hay a
maasala heyey. Taasa hay a marəhdatakaya ta mecey-mevel
ŋga Gazlavay, Gazlavay ndaw masa ta dey ŋga sərmataw.

⁸ Daa ŋgene, kakas fa bawa, fa bawa haa a rəhda way
a heyey. Kakas a, a bawa daa mewedey ŋga Gazlavay ta

15:2 15.2 4.6; 5.8; 13.15, 18; 14.2 * 15:3 15.3 Walay keɖe ara walay ŋga bay-gula. Anda Mawiz ta ndəhay Israyel hay ma zlamara walay da mey Bəlay Magaza maja Gazlavay ma ləhdata dasi har ŋga sewje hay ŋga Ejip heyey na, ndəhay malacatakaya da mey dəhwa keɖe fa zlam walay maja Bəz-təban ma ləhdata may. 15:3 15.3 16.5-6; 19.2; 22.12; Mew 32.4; Ps 145.17; **walay**: Mab 15.1; Ps 111.2; 139.14 15:3 15.3-4 4.11 15:4 15.4 14.7; Ps 86.9; 98.2-3; Iz 2.2-3; Jer 10.6-7 15:5 15.5 11.19; Mab 40.34; SNM 7.44 † 15:6 15.6 zəwet hay ŋga bərey magaza...fa dadak ata hay: A wudəy ŋga ləvey ata ta gədan ŋga Gazlavay ŋga key sləra. 15:6 15.6 1.13; Dan 10.5 15:7 15.7 4.6; 14.10; 16.1

daa gədan anğa. Ndaw a gwa nga mbəzey aa way a ba səlak, si banay hay maasala masa maslan hay maasala ma handamərwa heyey ma ndəvam la cəpa dğay.

16

Mey da ray banay hay nga madagway-dakw

¹ Fa dəba nga cek hay ma kam kefe, yah, *Jan, ya cəney dğay maa guzlwa ta gədan daa *Way-mekey-kwakwas nga Gazlavay da vad heyey. Day a, aa guzlwa ngada maslan hay nga Gazlavay maasala heyey, a ləvtar: «Diyam ta mbəddamara mecey-mevel nga Gazlavay daa taasa hay maasala kefe cəpa a bəla.»

² Anda kefe, maslan masa ngeeme ta', a daw a mbədda masa daa taasa anğa a ray bəla. Daa ngene, mbəlek hay ma cey kalah a bamawa njaba-njaba fa ndəhay masa lamba nga cek nga ley matəhtakaya fa vaw ata, masa ma namar ray ngada cek maləmkaya anda cek nga ley a heyey.

³ Fa dəba ha, maslan masa nga dey cew e ta', a mbədda masa daa taasa anğa may aa bəlay. Daa ngene, yam daa bəlay a, a tərey anda mambaz nga ndaw maməckaya ma bawa. Anda kefe, cek hay daa yam a cəpa ta məcəm sem.

⁴ Ta', maslan masa nga dey maakar a, a mbədda masa daa taasa anğa may aa wayam hay ta aa wurak nga yam hay. Anda kefe, yam daa wayam hay a ta daa wurak hay a ta tərey sem anda mambaz may.

⁵ Cay, yah, Jan, ya cənda dğay nga maslan nga Gazlavay ma wey da ray yam fa həslar ray ngada Gazlavay, a ləvey: «Kah na, Bay Gazlavay pal taava akah. Kah daha dəga zleezle haa wure kefe. Ka ta ka sariya kefe la ta cəved e.

⁶ Ndəhay ma kədmata ma təla mey akah hay vagay, ta ndəhay ma kədmata ndəhay akah hay siya na, ka ta vəltar mambaz la nga sey. Ngene he, ara cek təde fa sləra ata.»

⁷ Cay, ya cəney dğay mekele maa guzlwa ta gədan da cakay slam-meewurey cek ngada Gazlavay, a ləvey: «Ahaw, Bay Gazlavay, ndaw masa ta gədan ma fənta cek hay cəpa. Ka fa katar sariya a ndəhay ta cəved e, membərzley da hwad a daa ba səlak.»

⁸ Menjey nekədey, maslan nga dey məfad a, ta', a mbədda masa daa taasa anğa may a ray pas. Anda kefe, pas a hətey cəved nga cey ngulca-ca haa a ndəta ndəhay.

⁹ Daa masa pas a fa ndəta ndəhay a ngene, ta', a cədmara Gazlavay, maja ara anğa ma slərdərwa banay a kefe. Ama

ta mbəfdamara menjey ata da bəla daa ba, a namar ray a Gazlavay ba cəŋga.

¹⁰ Fa dəba ha, maslan ŋga dey zlam a, ta', a mbəfda masa daa taasa anŋa may a ray slam-menjey ŋga cek ŋga ley heyey. Daa ŋgene, ləvan a key daa slam masa cek ŋga ley a ma wa cəpa. Ndəhay cəpa daa slam aha aa pədam sler maja fa səram banay.

¹¹ Ama ta banay ŋgene cəpa na, kwa ndəhay a ta mbəfdamara menjey ata daa ba, ata fa kam cek maaya ba hay cəŋga. A cədmara Gazlavay da vad maja banay ata ta mbəlek hay mekele mekele ma catar.

¹² Cay, maslan ŋga dey maakwaw a, ta', a mbəfda masa daa taasa anŋa aa wayam mahura ŋga Efərat. Yam daa wayam a, taa səkey sem mbas! amba bay hay ma da samawa ta daa dana a hətam cəved ŋga zləŋgey a dey lanŋar.

¹³ Fa dəba ha, ta', yah, Jan, ya hətəy mesəfney hay maaya ba maakar. Ata a səram ba ta kakəran hay. Mesəfney a pal a bawa da mey gədem heyey. Lanŋar a bawa da mey cek ŋga ley heyey. Lanŋar may, a bawa da mey *ndaw ma təla mey ta membərzley.

¹⁴ Mesəfney hay a ŋgene a samawa ta fa bay-malula. Fa kam maazla hay mandaw mandaw ŋga rəzley ndəhay. Fa diyam a way bay hay da bəla cəpa ŋga kusmatərwa amba a kam vəram ta Gazlavay ta pas masa Gazlavay, ndaw ma fənta cek hay cəpa, ma da wuzdərwa gədan anŋa.

¹⁵ Da ray ŋgene, Bay Mahura a ləvey: «Wam vaw maaya maaya, maja ya da sawa na, dərfafoy anda ndaw-mayal. Maaya ŋga Gazlavay aa da ray ndaw ma jəfa vaw anŋa, a ney ba, ma wada vaw ta zana anŋa, amba dar masa yah ma da sawa na, ndaw a, a gwa ŋga pəkey ta vaw ba' kəne ba, asaya, hwaray fa da kar maja ndəhay a da hətmar vaw ba' kəne na, daa ba.»

¹⁶ Ta', mesəfney hay maaya ba maakar ma diyam a way bay hay heyey, a kusmata bay hay a aa slam daha mezəley ta mey *Hebərə «Harmagwadanw».

¹⁷ Fa dəba ha, maslan masa ŋga dey maasala ha, ta', a mbəfda masa daa taasa anŋa aa memed. Day a cənwa ŋga gədan daa slam-menjey ŋga Bay Gazlavay daa Way-mekey-kwakwas anŋa, a ləvey: «Banay hay a, ta kam cay.»

16:9 **16.9** 9.20-21; 16.11, 21 **16:10** **16.10** 13.1-2; **ləvan**: Mab 10.21-22; Iz 8.22
16:12 **16.12** Iz 11.15; 44.27; 46.11 **16:13** **16.13-14** 12.3; 13.1-2; Mab 8.2; Ps
 78.45 **16:14** **16.14** 11.17; 13.13-14; 19.20; Mt 24.24; 2Tes 2.9; **vəram**: 19.11-21
16:15 **16.15** 3.3, 18 **16:17** **16.17-21** 16.1; Iz 66.6

¹⁸ Da ray ηgene, var a zəmey wəf-wed, wəf-wed, aa bəcey ta gədan təzlaw! təzlaw! Hwiyak a wusey ga anda aηgwa ma bəzley. Dəga Gazlavay ma zlar ηga ləmtərwa ndəhay a bəla na, hwiyak ta wusey anda ηgene daa ba səlak.

¹⁹ Ta', hwiyak a bəzley, berney mahura * heyey a wunkey slam maakar. Berney hay cəpa da bəla a pəlham pəlah! pəlah! may. Gazlavay a sərfadərwa berney mahura ηga Babilanw, ta', a ce y mevel a ray a, a sərda banay ga, anda ndaw ma sa cek meedəwek e marəhkaya pece pece daa vəley.

²⁰ Daa ηgene, hwayak hay da wuzlah bəlay cəpa, yam aa zəfdata. Asaya, aηgwa hay a yayiham.

²¹ Lanja ga a kwiywa da vad a ray ndəhay. Lanja ha pal na, mahura anda hutkwam. Maja ηgene, ndəhay a cəfmara Gazlavay maja lanja ha fa sərdamata banay ga kalah.

17

Mey da ray ηgwas-barlaw

¹ Fa dəba ha, maslan pal dasi maslan hay ηga Gazlavay maasala masa ta taasa hay da har heyey, ta', a sawa, aa guzlya ηgada yah, *Jan, a ləvey: «Sawa fedə amba ya wuzdakawa banay masa ηgwas-barlaw daha ma da səra. Nηgwas * a na, mapakaya anda berney mahura masa gweegwe ta wayam hay mahura mahura.

² Bay hay cəpa da bəla ta lam vaw la ta aηga. Asaya, ndəhay ma sam wuzam aηga la haa a wam. Anda meləvey, ndəhay a ta lam vaw † la ta aηga may.»

³ Ta', *Mesəfney ηga Gazlavay a sawa a ray adaw. Fa dəba ha, maslan kaa heyey a handaya a ley. Daa masa yah da ley a na, ya hətey ηgwas manjakaya da ray cek ηga ley. Cek ηga ley a na, aa magaza anda mambaz, ta ray hay maasala, dərām hay kuraw cegwegw e da ray hay a. Vaw aηga cəpa mawuzlalakaya ta mezəley hay ma cəfey Gazlavay.

16:18 16.18 4.5; 6.12-13 * **16:19 16.19** Berney mahura: A wufey ηga ləvey na, berney ηga Babilanw daa mewulkey ηga ndəhay mekele. Nəka 14.8.Siya hay na, a wulkam, a ləvam na, ara berney ηga Jeruzelem. **16:19 16.19** 14.10; 18.2

16:21 16.21 11.19; 16.9 * **17:1 17.1** Nηgwas: Fedə na, ηgwas aha mapakaya anda berney ηga Babilanw. Ara berney gweegwe ta wayam hay cew mahura.

17:1 17.1 Jer 51.13 † **17:2 17.2** Meley-vaw saw da palah fedə kaa na, a wufey ηga ləvey meney ray ηgada cek mekele aa slam a ηga Gazlavay. **17:2 17.2**

14.8; 17.18; 18.3; Jer 51.7; Nah 3.4 **17:3 17.3** Mesəfney ηga Gazlavay: 1.10; 21.10; Ez 8.3; 40.2; **cek ηga ley:** 13.1-2

⁴ Ngwas aha na, aa ta zana fa vaw. Zana ha magaza ləmter e ta magaza anda mambaz. Asaya, anğa ta cek hay nğa bərey magaza mekele mekele ta anğwa hay ma wadam pəlɲged pəlɲged ma həɖkam ba leɲ bersle hay fa vaw. Asaya, taasa nğa bərey magaza makərzakaya da har. Taasa ha na, marəhdakaya ta cek hay maaya ba ma zləba ndaw daa meley-vaw anğa saw da palah heyey.

⁵ Fa danğay anğa mezəley nğa cek masa ndəhay ma sərmara ba mawuzlalakaya daha. Mezəley a, a wudəy nğa lövey:

«Kede he, berney mahura nğa Babilanɲw, ara mamanɲ nğa ngwas-barlaw hay ta mamanɲ nğa cek hay maaya ba da bəla cəpa.»

⁶ Ya hətar ngwas aha fa wey ta mambaz nğa ndəhay nğa Gazlavay, ndəhay ma kam sede da ray Yesu.

Daa masa yah ma hətar na, ya rəzley ga da ray a.

⁷ Da ray nğene, maslan nğa Gazlavay heyey aa cəɖfaya, a lövey: «Ka rəzley na, maja me? Jəkfaya sləmay amba ya wuzdakawa mey mabadakaya da ray ngwas kede ta da ray cek nğa ley masa ta ray maasala leɲ dəram hay kuraw, masa ngwas a, aa da ray a nğene.»

⁸ Yaw, cek nğa ley masa kah ma hətar kede na, anğa na, aa ta dey, ama wure kede, ta məcey sem. Menjey nekəɖey fede na, a sləkɖawa la daa vəged məseleleɲ e. Fa dəba ha, Gazlavay a daa zəɖda. Ndəhay da bəla masa mezəley ata mawuzlalatakaya dəga bəla ta ləmey daa ba aran daa ɖerewel nğa ndəhay ma da hətam heter mendəvey ba, daa ba na, a hətmar cek nğa ley a nğene na, a rəzlam la da ray a. A da rəzlam maja zleezle cek aha anğa ta dey, wure kede aa ta məcey sem, ama a lacawa la daa vəged e cəngga.»

⁹ Maslan a, a lövya saya: «Si ndaw a pey lenğesl nğa səra mey da ray cek hay a kede maaya maaya. Ray hay maasala nğa cek nğa ley a nğene na, a wuzwa anğwa maasala masa ngwas a ma njeɲ a ray a †. Ray hay a nğene may a wuzwa bay hay maasala.»

¹⁰ Dasi bay hay maasala ha nğene na, zlam ata daa bay daa saba, pal na, aa daa bay, lanğar ta sawa nğa zəma bay anğa daa ba aran. Ama pas masa anğa ma sawa cay na, fa da njeɲ daa bay a ga daa ba.

¹¹ Nğa cek nğa ley masa zleezle aa ta dey, ama wure kede, anğa daa saba heyey na, a da key bay nğa dey daanğafad

17:4 17.4 18.3, 16; Jer 51.7; Ez 28.13 17:5 17.5 Jer 2.20; Aw 1.2 17:6 17.6 16.6 17:7 17.7-8 13.1-2 17:8 17.8 13.3; **erewel:** 3.5 † 17:9 17.9 Fede na, ngwas aha mapakaya anda berney nğa Rawm. Berney a na, aa maləmkaya da ray anğwa hay maasala. 17:9 17.9 13.18

a. Anḡa na, aa da wuzlah bay hay maasala heyey may, Gazlavay a daa zəɖda.

¹² «Dəram hay kuraw nḡa cek nḡa ley masa kah ma hətatar nḡene, a wuzwa bay hay kuraw ma da samawa. Ata na, fa zəmamara bay ata daa ba aran. Ata ta cek nḡa ley heyey a hətam gədan la nḡa wey da ray ndəhay, ama nḡa menjey nekəɖey gway.

¹³ Bay hay a, a cəmam ɖay la pal, amba a kamar sləra a cek nḡa ley a nḡene ta gədan ata cəpa.

¹⁴ A kam vəram la ta Bəz-təban heyey. Ama Bəz-təban a, a fənta la ta gədan, maja anḡa na, ara Bay Mahura da ray mahura hay, anḡa Bay da ray bay hay cəpa. Asaya, ndəhay masa aa ma zelta, aa ma walata, ndəhay masa ma təbmara mey anḡa ta mevel pal na, a cəmam la ta Bəz-təban a, a kam bay-gula la da ray bay hay a ta cek nḡa ley a heyey.»

¹⁵ Ta', maslan nḡa Gazlavay kaa heyey aa guzlya saya, a ləvey: «Yam masa kah ma hətatar nḡwas-barlaw manjakaya gweegwe ta anḡa nḡene na, a wuzwa ndəhay ga, səkway nḡa ndəhay wura wura masa maa guzlam ta mey wura wura, asaya, hwayak wura wura.

¹⁶ Ama, dəram hay kuraw masa kah ma hətatar ta cek nḡa ley a ray anḡa na, a da rəsmara nḡwas-barlaw keɖe. A təbmara cek anḡa hay tabiya la, a cəkwmata zana anḡa hay fa vaw la cəpa ta gədan, amba a njey vaw ba' kəne. Fa dəba ha, a kəɖmara vagay la, a zəmamara aslaw nḡa vaw anḡa la. Siya nḡa aslaw a, ma da gərey na, a da ndəlmara daa awaw.

¹⁷ Ara Gazlavay ma da ka amba bay hay kuraw a, a cəmam ɖay pal nḡa key sləra nḡada cek nḡa ley heyey. Bay hay a, a pamara gədan ata asi har nḡa cek nḡa ley a, amba a wam da ray ndəhay tabiya haa kasl mey masa Gazlavay maa guzlda zleezle heyey a key fara fara.

¹⁸ Anda keɖe, nḡwas masa kah ma hətatar heyey na, ara berney mahura masa ma wey da ray bay hay cəpa da bəla.»

18

Mey da ray berney nḡa Babilanw ma da pəlhey

¹ Fa dəba nḡa cek hay a nḡene, yah, *Jan, ya hətəy maslan mekele fa pawa salay da vad. Anḡa ta gədan ga. Mewedey anḡa ta wada bəla la cəpa.

² Maslan a, a wudey ta gədan, a ləvey: «*Babilanw, berney mahura heyey, ta pəlhey sem. Ta pəlhey sem pəlah!

pələh! fara fara. Berney a, ta tərey sem nğa way nğa mesəfney maaya ba wura wura cəpa. Asaya, diyan hay maaya ba hay masa ndəhay ma zəmamara ba səlak, ata cəpa daa slam aha.

³ Babilanw ta pələhey sem maja ta ley vaw saw sem, taa sərkadata ndəhay daa hwayak hay tabiya sem nğa mbəkdamara cəved nğa Gazlavay amba a kam cek hay maaya ba mekele mekele anda anğa. Ara anda aa ma vəltar wuzam nğa sey mandaw mandaw nğa nəsta. Asaya, bay hay cəpa da bəla ta lam vaw saw la ta anğa. Ndəhay ma ka filaw hay cəpa da bəla, ta hətam dala la ga, maja cek hay maaya ma mbafar kalah masa ata ma hədkadamara.»

⁴ Ta', ya cəney day faa guzlwa ta gədan da vad, a ləvey: «Akwar ndəhay adaw hay, bamawa da wuzlah ndəhay daa berney a ngene, amba ka kam mebərey anda ata ba. Bamawa amba ka səram banay anda ata ba.

⁵ Fara fara, bamawa daa berney a, maja mebərey ata ga kalah, mambakaya kasl a gazlavay a vad. Yaw, Gazlavay fa sərfada sləra ata maaya ba masa ata ma kamara cəngə.

⁶ Sərdamata banay ta ndəhay daa berney a anda ata ma sərdamata banay ta ndəhay siya hay. Cek masa ata ma kamara a ndəhay siya ha na, ka da kamataara ma fəna ngene. Da ta vəlmatar cek meedəwek e vəley pal nğa sey la na, ka da vəlmatar nğada ata vəley cew.

⁷ Sərdamata banay ga ta ndəhay daa berney a amba a cam mevel, anda ata ma pamara vaw ata zleezle nğa nğwas ta gədan ga, anda ata ma njam ga daa wiya. Asaya, anda ata ma ləvam: "Yah manjakaya fede daa bay. Yah nğwas-vagay ba, kwa ndaw adaw fa da məcey amba ya təway na, daa ba."

⁸ «Da ray ngene, banay a da sawa a ray ndəhay daa Babilanw a cəpa dey pal. Anda kedə, macay mepesley ndəhay, meməcey leŋ may a sawa la a ray ndəhay a ta pas pal. Asaya, awaw a daa wura berney a kəlmədək! maja Bay Gazlavay na, anğa ndaw ta gədan, ara anğa pal ma da katar sariya a ndəhay a.»

⁹ Bay hay cəpa da bəla ma lam vaw saw da palah * daa berney a heyey, ta ma njam daa wiya a heyey, a da hətmar kakas nğa awaw ma daa wura berney aha na, a təwam la, aa haram la.

18:2 18.2 14.8; 16.19; Iz 13.20-22; 21.9; 34.11, 14; Jer 50.39-40; 51.8 **18:3 18.3** 17.2; 18.11-19; Iz 23.8; Ez 27.22-23, 33 **18:4 18.4** Iz 48.20; Jer 51.45; 2Kwr 6.17 **18:5 18.5** MC 18.20 **18:6 18.6** Ps 137.8; Jer 50.29 **18:7 18.7-8** Iz 47.8-9

18:8 18.8 17.16 * **18:9 18.9** Meley-vaw saw da palah fede kaa na, a wudəy nğa ləvey meney ray nğada cek mekele aa slam a nğa Gazlavay. **18:9 18.9-10** Ez 26.16-17; 27.30-35

¹⁰ Bay hay a, a da lacam dōrenj ta berney a, maja banay da hwaɗ a ta zluradata sem. A lōvam: «Waay! Waay! Babilanɗw, kah berney mahura masa ta gōdanj heyey, ka ta pōlhey sem pōlah! pōlah! ler pal gway. Sariya akah ta njeɗ ga daa ba.»

¹¹ Asaya, ndōhay cōpa da bōla ma kam filaw, a tōwam la, aa hūram la, maja berney a ma pōlhey sem. Kwa ndaw pal fa da hōɗkey cek ata hay nɗa filaw daa saba.

¹² Cek nɗa hōɗkedey hay a na, ara bōrey hay ma hōɗkam ba, anɗwa hay ma waɗam pōlɗged pōlɗged ma hōɗkam ba ta bersle hay, zana mabara ma ley dey, zana masa magaza lōmter e ta magaza anda mambaz ma hōɗkey ba, leɗ zana sōwal ma wedey wurek! wurek! Cek hay mekele nɗa filaw a na, ara anda hwadam mezey maaya, cek hay maacafakaya nɗa sler nɗa begōney, hwadam ma hōɗkey ba leɗ cek hay mekele mekele nɗa bōrey ta nɗa anɗwa meekuleɗ e.

¹³ Asaya, ndōhay nɗa filaw a fa hōɗkadam cek hay mezey maaya anda bōrdey, mal ma tekwedey fa vaw, slalak mezōley «*mir» leɗ matōway nɗa wudez mezey maaya. Cek hay mekele na, ara wuzam, mal metey lar, hapa leɗ daw. Fa hōɗkadam saya sla hay, tōbanj hay, pōles hay leɗ seret hay. Kwa beke hay, kwa ndōhay ma kōrzawa daa vōram na, ndōhay a nɗene fa hōɗkadamata may. Cek hay cōpa kaa na, kwa ndaw pal nɗa hōɗkata da Babilanɗw a daa saba sōlak.

¹⁴ Da ray nɗene, ma ka filaw hay a, a tōwam la, a daa guzɓmar aa berney a, a lōvmar: «Cek hay masa ma mbafamaka kalah heyey na, taa wuram sem cōpa. Zleley akah hay ta wiya masa kah ma ka heyey na, daa saba. Anda keɗe, kwa ka fa da hōtatar daa saba may.»

¹⁵ Ma ka filaw hay masa ma kam zleley ga daa berney a heyey, a da lacam dōrenj ta berney a, maja banay da hwaɗ a ta zluradata sem. A tōwam la ta gōdanj, aa hūram la,

¹⁶ a da lōvam: «Waay! Waay! Babilanɗw, berney mahura heyey, ta pōlhey sem pōlah! pōlah! Anɗa anda nɗwas ta zana mabara fa vaw ma ley dey, asaya, ta zana masa magaza lōmter e ta magaza anda mambaz ma hōɗkey ba. Asaya, aa ta danɗwa nɗa bōrey magaza leɗ ta bersle ma hōɗkey ba.

¹⁷ Zleley hay a ga keɗe a nōsam tabiya dey pal gway, kwa ta njeɗ ga daa ba.»

Ndōhay ma hwadamara kwambiwal hay ta bay-ray ata, leɗ ndōhay ma ka filaw ta kwambiwal hay a, asaya, ndōhay

tabiya masa ma diyam a mēlak ta kwambiwal hay a na, a lacam la dēreŋ ta Babilan̄w heyey,

¹⁸ a wudam la maja ata ma hētmar kakas ŋga awaw a maa wura berney a, a lōvam: «Berney mahura ma fēna keḏe daha saya daw?»

¹⁹ Ndēhay a, a da pētkwalam da hwayak ta matōway, a daa hūram, a da wudam ta gōdan̄, a lōvam: «Waay! Waay! Babilan̄w, berney mahura heyey na, ta pōlhey sem. Ara berney masa ndēhay ta kwambiwal hay ma hētam zleley ga da hwaḏ a. Berney a na, a pōlhey pōlah! pōlah!, a nōsey ler pal gway, kwa ta njeŋ ga daa ba.»

²⁰ Yaw, maslan̄ ŋga Gazlavay heyey a lōvey: «Akwar ndēhay da gazlavay da vad̄, sasēmam maja Babilan̄w a ma pōlhey keḏe. Akwar ndēhay ŋga Gazlavay ta ndēhay meslōrey leŋ ndēhay ma tōla mey an̄ga hay, sasēmam may, maja Gazlavay ta kar sariya sem a berney a keḏe, fa cek maaya ba masa an̄ga ma kakwara.»

²¹ Fa dōba ha, maslan̄ ŋga Gazlavay masa ta gōdan̄ daha ta', a daw, a lawa an̄gwa mahura masa dadakw anda lavar. Tōzlem! a kōzla aa bōlay kudap! aa zōḏey. A lōvey: «Babilan̄w, berney mahura, a da pōlhey anda keḏe may. Kwa ndaw fa da hēt̄ar fa dey daa saba.

²² Da Babilan̄w a, ndēhay fa da cōnam ḏay ŋga ndēhay ma kōḏam ganjaval, ma zlam walay, leŋ ma fam slōlam ta taalam hay na, daa saba. Asaya, ndaw fa da hōtey ndaw ma ḏiya cek hay membey kwa pal daa saba. Kwa ndaw fa da cōney ḏay ŋga cek mekōrey daw daa berney a daa saba may.

²³ Da Babilan̄w a, petōr̄la hay fa da waḏam daa saba. Kwa ndaw fa da cōney meesēmey ŋga meley kwakwa daa berney a daa saba. A key daa saba na, maja me? Ara maja, zleezle ndēhay ma ka filaw da Babilan̄w a, a zlapam ta zleley ata hay ma fōnmata siya hay da bōla, asaya, ta tōknata ndēhay tabiya da bōla la ta mekey maazla hay maaya ba.»

²⁴ Gazlavay a kar sariya a Babilan̄w anda keḏe maja aa ma hēt̄ar mambaz ŋga ndēhay ma tōla mey an̄ga da hwaḏ a. Asaya, maja aa ma hēt̄ar mambaz ŋga ndēhay an̄ga hay siya da hwaḏ a. Asaya, ndēhay makōḏtakaya vagay daa wura daa wura da bōla na, Gazlavay ta hēt̄ar mambaz ata la daa berney a may.

19

¹ Fa dɔba ha, yah, Jan, ya cɔney ɔay hay masa maa guzlmawa ta gɔdan da vad' anda ndɔhay ga maa guzlam daa slam a, a lɔvam: «*Aleluya! Hɛlmamara Bay Gazlavay! Ara Gazlavay alɔkwa ma lɔhdata ndɔhay daa banay. Ara anɔa ndaw masa ndɔhay ma hɛslmar ray, ara anɔa ndaw ma wey da ray cek hay tabiya.

² Anɔa fa katar sariya a ndɔhay ta cɔved' e, membɔrzley da hwad' a daa ba sɔlak. Da ray nɔgene, ta kar sariya cay nɔgada nɔgwas-barlaw masa ma nɔsa bɔla, ma batata ndɔhay nɔga lam vaw saw da palah * heyey. Gazlavay ta sɔrda banay la ta nɔgwas aha maja aa ma kɔfta ma ka slɔra anɔa hay vagay.»

³ Day hay masa yah ma cɔndatɔrwa nɔgene fa hɛlmamara Gazlavay, a lɔvam: «Aleluya! Hɛlmamara Bay Gazlavay, maja kakas masa faa nɔgɔsey daa berney a nɔgene, a da nɔjey nɔga sɔrmataw, kwa fa da ndɔvey daa ba sɔlak.»

⁴ Daa nɔgene, *bay-ray hay kwakwar cew a ray a mɔfad' heyey lej cek hay mɔfad' ta dey heyey a ragadam fa mey nɔga Gazlavay daa slam anɔa menjey, a hɛlmamara, a lɔvam: «*Amen. Aleluya! Hɛlmamara Bay Gazlavay!»

Mey da ray mekey mɔlak nɔga kwakwa nɔga Bɔz-tɔban

⁵ Fa dɔba ha, ɔay mekele aa guzlwawa ta daa slam-menjey nɔga Bay Gazlavay, a lɔvey: «Hɛlmamara Gazlavay alɔkwa, akwar ndɔhay ma ka slɔra anɔa hay tabiya, akwar ndɔhay masa ma namar ray, kwa bɔza hay, kwa ndɔhay mahura hay.»

⁶ Ta', ya cɔney ɔay hay mekele saya faa guzlmawa ta gɔdan anda ndɔhay ga maa guzlam daa slam a. Asaya, ɔay hay a, a mbam mey ta gɔdan anda yam ma vavawa daa maajɔrav mahura. A cɔnmawa anda var maa bɔcey may. Ya cɔnda ɔay hay a na, fa lɔvam: «*Aleluya! Hɛlmamara Gazlavay, maja Bay Gazlavay alɔkwa, ndaw masa ta gɔdan ma fɔnta cek hay tabiya, fa wey da ray cek hay tabiya fara fara.

⁷ Wure keɔe, njakwa daa meemɔlkey, sasɔmkwa, hɛlmakwa Gazlavay, maja gwagway nɔga Bɔz-tɔban † ma

19:1 19.1 4.11 * **19:2 19.2** Meley-vaw saw da palah fede kaa na, a wudɔy nɔga lɔvey meny ray nɔgada cek mekele aa slam nɔga Gazlavay. **19:2 19.2** 15.3; 16.6; 22.12; Mew 32.43; Ps 79.10 **19:3 19.3** kakas: 14.11; Iz 34.10 **19:4 19.4** 4.4, 6; 5.7; Ps 106.48 **19:5 19.5** 11.18; Ps 22.25; 115.13; 134.1; 135.1 **19:6 19.6** 11.17; 14.2; Ps 47.6-10; 96.7-10; Zak 14.9 † **19:7 19.7** Bɔz-tɔban: Fede Bɔz-tɔban ara Yesu Kɔriste. Kwakwa anɔa na, ara ndɔhay cɔpa ma tɔbmara mey anɔa. Gwagway may, ara pas masa ndɔhay ma da cɔmam ray ta Yesu da vad' nɔga sɔrmataw, anda kwakwa ta zel e ma da nɔjam cewete haa mendɔvey nɔga ɔar ata.

ley kwakwa ta wuswa cay. Kwakwa ha ta diya vaw cay,
 8 maja ta vølmar zana ma wedey ma ley dey mabara manjar dølay cay.» (Zana ha ñgene a wuzwa sløra maaya masa ndøhay ñga Gazlavay ma kamara.)

9 Cay, maslan heyey a løyva saya: «Wuzlala mey masa yah ma da kadakawa kefe aa ðerewel: Maaya ñga Gazlavay a sawa la a ray ndøhay cøpa mazøtakaya a gwagway ñga kwakwa ñga Bøz-tøban a.» Maslan a, a løyva saya: «Mey masa yah ma kadakawa kefe na, ara mey fara fara, maja mey a ara mey ñga Gazlavay.»

10 Masa maslan a maa guzlya cay na, ta', ya regedey fa mey anga amba ya hølma. Daa ñgene, a løyva: «Ka regedey fa mey adaw anda kefe na, maja me? Yah na, yah ndaw ma ka sløra ñga Gazlavay anda kah ta mølmakw hay, ma tømara mey masa Yesu ma handørwa a bøla may. Maaya ka regedey, ka dørey danjay na, ñgada Gazlavay gway.» Mey masa Yesu ma handørwa a bøla na, ara *Mesøfney ñga Gazlavay ma vøltar gødan a ndøhay ma tøla mey ñga wuzdamara mey a.

Ndaw da ray pøles mabara

11 Cay, yah, *Jan, ya da nøkey dey na, slam da gazlavay da vad mawurkaya. Ya høtey pøles mabara ta ndaw da ray a. A zølmara ndaw aha na, «Ndaw ma ka cek anda aa ma løyey, ma mbørzley ba.» Anja na, ndaw ma ka sariya a ndøhay ta cøved e, asaya, anja ndaw ma key vøram ñga diyey cek ta cøved e.

12 Bøz ñga dey ñga ndaw aha na, ñgøler ñgøler anda awaw magødkaya. Anja ta gursaw hay ga da ray. Mezøley mawuzlalakaya fa vaw anja daha, kwa ndaw mekele ma gwa ñga søra mezøley a daa ba sølak, si anja gway.

13 Zana anja fa vaw na, magwacakaya ta mambaz †. Mezøley ñga ndaw a na: «Mey ñga Gazlavay.»

14 Asaya, maslan hay ga ñga Gazlavay da vad fa søpmar wurzay ñga ndaw aha anda ndøhay ma diyam ñgadaa vøram. Ata ta zana mabara fa vaw ma ley dey manjar dølay. Ata da ray pøles mabara hay.

15 Da mey ndaw aha na, dølawa masa mey a makødkaya ñga køfta ndøhay daa hwayak hay da bøla daha. A da wey da ray hwayak hay tabiya ta gødan. A da bacata anda ndaw

19:7 19.7 21.2 **19:8 19.8** 6.11 **19:9 19.9** 14.12; Iz 25.6; Mt 22.2; Lk 14.15-16; **mey fara fara:** 21.5; 22.6 **19:10 19.10** 6.9; 22.8-9 **19:11 19.11** 4.1; 19.2; Ps 72.1-14; 98.9; Iz 11.4; Ez 1.1-3; SNM 7.56 **19:12 19.12** 1.14-15; 2.17 † **19:13 19.13** mambaz: Mambaz kefe ara mambaz ñga masa-gøra hay ñga Yesu masa anja ma key bay-gula da ray ata, da daa ba, ara mambaz anja masa aa ma mbøfda ñga lødhandakwar. **19:13 19.13** Jan 1.1 **19:13 19.13, 15** Iz 63.1-6 **19:14 19.14** 6.2-8, 11

ma becey babəza nga wudez fa pərad nga dəcey yam a, nga tey wuzam ta anga. Anda keđe, a da wuzdərwa mecey-mevel nga Bay Gazlavay, ndaw masa ta gədan ma fənta cek hay tabiya.

¹⁶ Fa zana nga ndaw a, leŋ fa tatəwal na, mezəley mawuzlalakaya daha. Mawuzlalakaya ha a ləvey: «Bay Mahura da ray bay mahura hay, Bay da ray bay hay cəpa.»

¹⁷ Fa dəba ha, yah, Jan, ya hətey maslan nga Gazlavay mekele malacakaya da ray pas. Maslan a, aa guzley ta gədan, a zəltərwa dīyan hay cəpa masa ma jəvam dərən da gazlavay da vad, a ləvtar: «Kusmawa nga zəmey daf daa gwagway mahura masa Gazlavay ma da ka.

¹⁸ Samawa amba ka zəmam aslaw nga vaw nga bay hay, nga *bay-ray hay nga sewje hay, ta nga sewje hay a, leŋ nga pəles hay ta ndəhay da ray a keđe. Samawa nga zəmey aslaw kwa nga waawa: nga beke hay ta nga beke hay ba hay, nga ndəhay mahura ta nga ndəhay mecəhe hay tabiya.»

¹⁹ Fa dəba ha, ya hətar cek nga ley heyey, leŋ bay hay cəpa da bəla. Sewje ata hay makustakaya daa slam a, amba a kam vəram ta ndaw da ray pəles mabara heyey, leŋ ta sewje anga hay may.

²⁰ Cay, ta', ndaw da ray pəles mabara kaa heyey a sawa, kaw! a kərza cek nga ley a, leŋ *ndaw ma təla mey ta membərzley, fakw! fakw! a hazakadata ta dey aa dəhwa nga awaw masa ta anɣwa maa kuray-bəzey, ma gədey njəm-njem. Ndaw ma təla mey ta membərzley a na, ta key maazla ga fa mey nga cek aha nga təkna ta ndəhay da bəla masa ta lamba nga cek nga ley matəhtakaya fa vaw ata heyey ta ma namar ray nɣada cek maləmkaya anda cek nga ley a heyey.

²¹ Sewje hay masa nga cek nga ley a na, ndaw da ray pəles e heyey ta kəfta sem vagay ta dəlaw maŋgəkakaya da mey anga heyey. Ta', dīyan hay heyey cəpa a samawa, a zəmamara aslaw nga vaw nga sewje hay a, haa a rəham.

20

Mey da ray Satan majəwkaya haa mevey gabal

¹ Fa dəba ha, yah, *Jan, ya hətey maslan nga Gazlavay mekele fa pawa salay da vad. Aa ta lekəle da har nga wurey

19:15 19.15 1.16; 2.26-27; 11.17; 14.14-20; Jer 25.30-31 **19:16 19.16** 17.14
19:17 19.17-18 Ez 39.4-5, 17-19 **19:18 19.18** 13.16 **19:19 19.19** 17.12-14;
 Ps 2.2; Ez 38.2-9, 14-16; Zak 14.2 **19:20 19.20** 13.1-2, 13, 15; *anɣwa maa*
kuray-bəzey: 14.10; 20.10, 14; 21.8; Iz 30.33

vøged meseleleŋ e heyey. Asaya, maslaŋ a, aa ta calalaw meegured e da har.

²⁻³ Cay, maslaŋ a ta', a daw, kaw! a kørzarawa gødem heyey, jøw! a jøwa ta calalaw a. Gødem e ara zezekw masa zleezle heyey, anda meløvey, *Sataŋ, bay-malula. Daa masa aa ma jøwa cay, a køzla kem! aa vøged meseleleŋ e heyey, a gørca mey a ta lekøle, slørab! a slørbey tebed * fa mey a. A ka køne amba gødem e a tøkndata ndøhay daa hwayak hay da bøla saba. A da njeŋ majøwkaya daa vøged e haa mevey gabal. Fa døba ha, a pøskamørwa la a bøla, ama a da njeŋ nekøfey gway.

⁴ Fa døba ha, ya høteŋ slam-menjeŋ hay ŋga bay, ndøhay manjatakaya da ray a. Gazlavay ta vøltar gødaŋ la amba a kamatar sariya ŋgada ndøhay da bøla. Asaya, ya høteŋ mesøfneŋ hay ŋga ndøhay mamøctakaya, masa ma kødmata vagay, ma døslmata ray ata, maja ata ma kam sede, ma løvam Yesu na, ara cøved masa fara fara, asaya maja ata ma wuzam mey ŋga Gazlavay. Ata na, ta namar ray ŋgada cek ŋga ley, ta ŋgada cek malømkaya anda aŋga heyey daa ba. Asaya, ta tømara amba cek ŋga ley a, a tøhtar cek fa danŋay, da daa ba, fa har na, daa ba sølak. Ya nøkta na, ata mamøctakaya, ama ta sløkdamawa sem daa memøceŋ a. Ata ta *Køriste na, ta wam la da ray bøla, haa mevey gabal.

⁵ Kede he ara ndøhay ŋgeeme ma sløkdamawa daa memøceŋ. Ndøhay siya na, ta sløkdamawa daa ba araŋ, si mevey gabal a cøhweŋ la dŋagay.

⁶ Fara fara, maaya ŋga Gazlavay a sawa la a ray ndøhay masa ma sløkdamawa teesed daa memøceŋ. Ata na, ndøhay ŋga Gazlavay. Fa da møcam ŋga dey cew daa ba sølak. Ndøhay a, a da tøram ndøhay ma ka kwakwas ŋgada Gazlavay leŋ ŋgada Køriste. Ndøhay a na, a da wam ta Køriste da ray bøla, haa mevey gabal.

Mey da ray vøram ŋga madagway-dakw

⁷ Masa *Sataŋ, bay-malula, ta key cay daa calalaw mevey gabal daa vøged heyey na, fa døba ha, a pøskamørwa daa vøged e.

⁸ A daw la aa wura aa wura aa hwayak hay da bøla cøpa amba a batata ndøhay. A zølmata ndøhay daa hwayak hay

20:1 20.1 10.1; 18.1; **vøged meseleleŋ e:** 9.1 * **20:2-3 20.2** a slørbey tebed: A slørbey tebed fa mey a na, amba a patar leŋgesl a ndøhay ŋga wurmara ba. Tebed e a wuzda ara ndaw mahura ma gørca slam aha. **20:2-3 20.2** 12.3, 9 **20:4 20.4** 6.9; 13.15; Dan 7.9, 22; Lk 22.30; 1Kwr 6.2 **20:6 20.6** 1.6; 2.11

a ṅgene na, Gakw ta Magakw †. Sataṅ a, a da kusta səkway hay a tabiya aa slam a, amba a kam vərəm ta Gazlavay. Ndəhay a ata ga, a sləfam ba, anda mawurbay da wayam.

⁹ Daa masa yah ma hətatar na, ata fa samawa təlbeṅ e daa wura daa wura cəpa, a zləmra slam masa ndəhay aṅga hay manjatakaya da hwad a, berney masa Gazlavay ma wudəy. Daa masa ata ma zləmra berney a sem na, awaw ba', a kəzlwa da gazlavay, aa wurta kəlmedək!

¹⁰ Bay-malula, ndaw ma batata ndəhay daa hwayak hay tabiya heyey na, ta', a kəzamara, a kəzlamara aa dəhwa ṅga awaw masa ta kakas maa kuray-bəzey mezey maaya ba, ma gəfey njəm-njem heyey. A kəzlamara ha na, a cakay ata cek ṅga ley leṅ *ndaw ma təla mey ta membərzley heyey. Daa awaw aha na, ata cəpa a da sərəm banay taa vad, taa pas ṅga sərmataw.

Mey da ray sariya ṅga bəla

¹¹ Fa dəba ha, yah, *Jan, ta', ya hətey slam-menjey mahura ṅga bay. Slam-menjey aha mabara, ndaw manjakaya da ray a. Slam da vad ta da hwayak taa zədam sem kudap! fa mey ṅga ndaw aha. Fa da hətmatar daa saba sələk.

¹² Asaya, ya hətatar ndəhay masa maməctakaya. Kwa ndəhay mahura hay, kwa mecəhe hay, ata cəpa mala-catakaya fa mey ṅga slam-menjey a. Cay, ya hətey ndaw fa wurey dərəwel hay. Ara dərəwel hay masa sləra ṅga ndəhay tabiya ma kamara mawuzlalatakaya da hwad a. Fa dəba ha, ya hətey ndaw fa wurey dərəwel mekele. Daa dərəwel e, mezəley ṅga ndəhay ma da hətam heter mendəvey ba mawuzlalatakaya da hwad a. Anda kefe, Gazlavay a katar sariya ṅgada ndəhay maməctakaya ha təde fa sləra ata mawuzlalatakaya daa dərəwel hay a.

¹³ Asaya, kwa ndəhay masa yam daa bəlay ma bəbətata na, yam a ta badatərwa sem a ray-dəgar. Kwa ndəhay maməctakaya daa Slam masa ndəhay maməctakaya ma njam da hwad a na, ta bamawa sem daa meməcey a. Ata cəpa, Gazlavay a katar sariya fa sləra ata.

¹⁴ Cay, a kəzlamata ata bay-meməcey ta slam ṅga ndəhay maməctakaya aa dəhwa ṅga awaw heyey. Dəhwa ṅga

† **20:8 20.8** Gakw daa dərəwel ṅga Ezekiyel ara bay ṅga hwayak ṅga Magakw (Ez 38.2). Fede na, mapatakaya anda səkway hay tabiya da bəla masa ma da kam vərəm ta Gazlavay. **20:8 20.8** 13.14; Jes 11.4; Ez 38.2, 10-12 **20:9 20.9** Mesl 2; 2Bay 1.10, 12; Ps 78.68; Ez 38.22; 39.6 **20:10 20.10** 19.20 **20:11 20.11** 5.7; 6.14; 21.1; Ps 114.3, 7; Mt 24.35; 2Pi 3.10 **20:12 20.12** Mab 32.32 **20:12 20.12-13** 3.5; 22.12; Dan 7.9-10

awaw aha na, ara slam masa ndəhay ma da məcam n̄ga dey cew da hwaɗ a.

¹⁵ Kwa waawa masa mezəley aŋga mawuzlalakaya daa ɗerewel n̄ga ndəhay ma da hətam heter mendəvey ba ha daa ba na, a kəzlamara aa dəhwa n̄ga awaw a.

21

Mey da ray cek hay tabiya masa Gazlavay ma da katərwa mawiya

¹ Fa dəba ha, yah, *Jan, ya da nəkey dey na, ya hətey slam da gazlavay da vad ta slam da hwayak mekele mawiya. Hwiyak ta slam da vad masa n̄geeme heyey na, daa saba. Aa slam ata na, cek hay cəpa mawiya. Asaya, bəlay hay tabiya na, taa zədam sem.

² Asaya, ya hətar *Jeruzelem, berney n̄ga Gazlavay. Berney a, a pey mawiya, fa sawa ta fa Gazlavay da vad n̄gada hwayak. Gazlavay ta ka berney a la maaya maaya, a mbey kalah anda dam ma ɗiyey vaw cay n̄gada way zel.

³ Asaya, ya cəney ɗay faa guzlwa ta gədaŋ daa slam-menjey n̄ga bay heyey, a ləvey: «Nəkmara, Gazlavay aa manjakaya da wuzlah ndəhay. Gazlavay a, ta ray aŋga, a da n̄jey ta ndəhay a. Ndəhay a n̄gene may, a da təram n̄ga ndəhay aŋga hay. Aŋga na, a da n̄jey n̄ga Gazlavay ata.

⁴ A takwadatara matəway daa dey ata la cəpa. Ndəhay fa da məcam daa saba. Anda keɗe, matəway-vagay daa saba. Ndəhay fa daa huraam daa saba may. Kwa vaw fa da catar a ndəhay daa saba səlak, maja cek hay masa n̄geeme taa zədam sem cəpa.»

⁵ Fa dəba ha, ndaw masa manjakaya daa slam-menjey heyey aa guzley, a ləvey: «Nəkmara, ya da katərwa cek hay tabiya mekele.» Menjey nekəɗey, a ləvyā: «Wuzlala cek masa yah ma wuzdakawa keɗe, maja ara mey masa fara fara, membərzley da hwaɗ a daa ba səlak.»

⁶ Cay, ndaw a, a ləvyā saya: «Sləra ha ta ndəvey cay. Yah na, ndaw masa n̄geeme, asaya yah ndaw madagway-dakw. Yah ndaw ma katərwa cek hay tabiya, asaya, yah ma ndəvdata. Ndəhay masa yam fa katar na, ya da vəltar yam n̄ga maaya daa wurak, yam masa ma vəley heter mendəvey ba.

20:14 20.14 20.10; 1Kwr 15.26; **meməcey n̄ga dey cew:** 2.11 **20:15 20.15** 3.5 **21:1 21.1** 21.5; Iz 65.17; 2Pi 3.13 **21:2 21.2** 3.12; 19.7; 21.9–22.5; 22.17; Iz 52.1; Mt 22.2; Gal 4.26; Heb 11.16; 12.22 **21:3 21.3** 7.15; Lev 26.12; Ez 37.26–28; Zak 2.9; 2Kwr 6.16 **21:4 21.4** 7.17; Iz 26.19; 35.10 **21:5 21.5** 5.7; 21.1; Iz 43.19; 2Kwr 5.17; **mey fara fara:** 19.9 **21:6 21.6** 1.8; 7.17; 22.1; Iz 55.1; Zak 14.8; Jan 7.37

⁷ Kwa waawa ma fəna *Satan, bay-malula, ta gədan na, ya da vəldara cek hay a kefe cəpa. Yah, Gazlavay, ya nəkfar dey la fa ndaw aha. Ya da njeý nga Gazlavay anga. Anga may, a da tərey nga bəzey adaw.

⁸ Ama ndəhay masa ta mandərzay daa dey, ndəhay masa ma mbəkdamaya sem, ta ndəhay masa mazləbkaya, leñ ndəhay ma kəfam ndaw vagay, ndəhay masa ma lam vaw saw da palah, leñ ndəhay ma ka maazla hay maaya ba ta ma ta kuley hay, asaya, ndəhay ma mbərzlam hay tabiya, slam ata na, daa dəhwa nga awaw masa ta anɣwa maa kuray-bəzey, ma gədey njəm-njem. Ngene, ara meməcey nga dey cew.»

Mey da ray Jeruzelem, berney masa Gazlavay ma ləma mawiya

⁹ Fa dəba ha, maslan nga Gazlavay pal a nɣəchawa ngada fa yah. Ara maslan pal da wuzlah maasala hay masa taasa hay ta banay hay nga madagway-dakw marəhdatakaya da hwad a heyey. Masa aa ma nɣəchawa la fa yah na, ta', a ləyya: «Sawa fedə amba ya wuzdakawa kwakwa nga Bəz-təban.»

¹⁰ Masa yah ma wusey fa anga cay na, *Mesəfney nga Gazlavay ta', a sawa a ray adaw. Cay, maslan nga Gazlavay ta', a handaya aa ray nga anɣwa maazəma, a wuzdiwa *Jeruzelem, berney nga Gazlavay, fa pawa salay da vad, da fa Gazlavay.

¹¹ Berney a, a wedey kulɣwad kulɣwad ta mewedey ma sawa ta fa Gazlavay. Mewedey a anga anda anɣwa maaya ma hədkey ba. A mbey kalah anda anɣwa hay maaya ma wadam pəlɣed pəlɣed anda banɣəra daa pas.

¹² Berney a, ray a mazlərkaya teleleñ ta mahwal meeber e, magəlkaya maazəma. Mey-slam hay nga mahwal nga berney a na, ata kuraw a ray a cew. Maslan hay kuraw a ray a cew fa jədmata mey-slam hay a. Asaya, mezəley nga səkway nga *Israyel kuraw a ray a cew mawuzlalatakaya pal pal fa mey-slam hay a.

¹³ Mahwal nga berney a na, ata dey məfad. Yaw, ta dey məfad ata na, mey-slam hay maakar maakar daha.

¹⁴ Vərza nga mahwal a na, makakaya ta anɣwa hay mahura mahura kuraw a ray a cew. Mezəley nga ndəhay meslərey nga Bəz-təban mawuzlalatakaya pal pal fa anɣwa hay a.

21:7 21.7 2Sam 7.14; Ez 11.20 **21:8 21.8** 2.11; 19.20; 21.27 **21:9 21.9** 15.1
21:9 21.9-22.5 Iz 54.1-17 **21:10 21.10** 17.3; Ez 40.2; Mt 4.8 **21:11 21.11**
21.18, 23; Iz 60.1-3, 19; Ez 43.2 **21:12 21.12-13** 7.5-8; MC 35.22-26; Mab 28.21;
Ez 48.30-35 **21:14 21.14** Heb 11.10; Ef 2.20

15 Maslan nga Gazlavay masa maa guzlya heyey na, aa ta zlanday nga b̄orey magaza da har. Ara zlanday ma wey meḡoley nga cek hay. A da wa berney a, leŋ mey-slam hay ta mahwal nga berney a may.

16 Mahwal nga berney a na, mal̄əmkaya zeedere, dey m̄əfad̄ ata r̄ək-rak. Zazam nga berney a, a key k̄əlemeeter gabal cew ta temere cew *. Meḡoley a may, ata letek.

17 Fa d̄əba ha, maslan heyey ta', a wa meḡoley nga mahwal nga berney a. Meḡoley a na, meeter kwakwar maasala a ray a maakwaw. A wa anda nd̄əhay ma wam cek hay mandaw mandaw.

18 Mahwal a na, mal̄əmkaya ta aŋgwa mez̄oley «jaspa», ma wedey ŋḡəl-ŋgel. Berney a may, mal̄əmkaya ta b̄orey magaza masa maaya ma wedey anda baŋḡəra.

19 V̄ərza nga mahwal a na, mapakaya ta aŋgwa hay mekele mekele ma həd̄key ba. Aŋgwa nga wurza ma pey ŋgeeme na, mez̄oley «jaspa». Aŋgwa nga dey cew e mez̄oley «safir», nga dey maakar a mez̄oley «agat», nga dey m̄əfad̄ a mez̄oley «emerat».

20 Aŋgwa nga dey zlam a mez̄oley «awnikis», nga dey maakwaw a, «sard̄əwan», nga dey maasala a, «k̄ərizawlit», nga dey daaŋgafad̄ a, «beril», nga dey zlam-letek a, «tawpaz», nga dey kuraw a, «k̄ərisawp̄əraz», nga dey kuraw a ray a letek e, «turkwaz», leŋ aŋgwa nga dey kuraw a ray a cew e, mez̄oley «ametista» †.

21 Mey-slam hay kuraw a ray a cewete na, makatakaya ta aŋgwa ma mbey kalah, kuled̄ kuled̄ anda bersle. Mey-slam pal na, makakaya ta aŋgwa ha pal may. B̄əwal mahura daa berney a na, makakaya ta b̄orey magaza masa maaya anda kwalaba masa nd̄aw a gwa a n̄əkey dey a dey langar.

22 Daa berney a, yah, *Jan, ya ta hətar *Way-mekey-kwakwas nga Gazlavay daa ba, maja aa slam nga way a na, ara Bay Gazlavay, Gazlavay masa ta ḡədaŋ ma f̄ənta cek hay tabiya, leŋ B̄əz-t̄əbaŋ aŋga.

23 Asaya, berney a, fa wufey pas ta kiya nga wad̄amawa a ray a daa saba, maja mewedey nga Gazlavay fa wad̄a, B̄əz-t̄əbaŋ heyey na, fa wad̄a berney a anda pet̄ərla.

24 S̄əkway hay c̄əpa da b̄əla a da p̄əkam daa mewedey aŋga ha. Bay hay masa sl̄əmay ata fa z̄oley, a da samawa

21:15 21.15 11.1; Ez 40.3 * 21:16 21.16 k̄əlemeeter gabal cew ta temere cew: Ta mey Ḡərek a l̄əvey, «a key *stadiya* gabal kuraw a ray a cew.» Lamba kuraw a ray a cew a wufey nga l̄əvey cek manjar nga z̄l̄əbey. 21:16 21.16 Ez 48.16-17 21:18 21.18-21 21.11; Iz 54.11-12; Ez 28.13 † 21:20 21.20 Aŋgwa hay a c̄əpa na, ara aŋgwa hay maaya ma həd̄kam ba, mewedey ata wal wal. 21:22 21.22 11.17 21:23 21.23 22.5; Iz 60.1-2, 19-20; 24.23

ta cek ata hay masa maaya ngadaa berney a.

²⁵ Mey-slam hay nga berney a, a da njam mawurtakaya hipas. Kwa ndaw fa da gercata daa saba sèlak, maja fetede he na, tavad a key daa saba.

²⁶ Ndohay daa hwayak hay cèpa da bèla masa slèmay ata fa zøley a da handamørwa cek hay mekele mekele maaya hay ngadaa berney a, amba a hølmar ray a Gazlavay.

²⁷ Ama kwa cek masa ta døløy na, fa da mbøzey aa berney a daa ba. Asaya, ndohay ma mbørzlam ta ndohay ma kam cek hay maaya ba mekele mekele cèpa fa da mbøzam daa ba may. Ma da mbøzam na, si ndohay masa mezøley ata hay mawuzlalatakaya daa dèrewel nga ndohay ma da høtam heter mendøvey ba, dèrewel masa nga Bøz-tøbanj heyey.

22

¹ Fa døba ha, maslanj heyey a wuzdiwa wayam nga yam masa ma vøley heter mendøvey ba. Yam a kølar kølar, dey a høtey gurgwar a wurza, a bawa daa slam-menjey nga Bay Gazlavay ta nga Bøz-tøbanj.

² Yam a, a vevey da wuzlah bøwal nga berney heyey. Ta dey cewete nga wayam a na, wudez daha ma vøley heter mendøvey ba *, a yam babøza dey kuraw a ray a cew fa mevey. Anda kedè, a yam dey pal fa kiya. Gwaslaf nga wudez e, ara slalak masa ma mbøldata ndohay daa hwayak hay tabiya.

³ Daa berney a, cek hay masa Gazlavay ma nøsta sem na, kwa pal daa ba sèlak. Daha na, slam-menjey nga Bay Gazlavay ta nga Bøz-tøbanj, lej ndohay ma ka sløra anja hay fa namar ray.

⁴ Ndohay a, a høtmar dey nga Gazlavay la. Asaya, Gazlavay a wuzlala mezøley anja la fa dangay ata.

⁵ Daa berney a, tavad fa da key daa saba. Pas ta petørla hay na, sløra ata daa saba may, maja ara Bay Gazlavay ta ray anja ma da wadata ndohay da hwad a. A da wam da ray cek hay tabiya nga sørmataw.

Mey da ray Yesu ma da vøhwa a bøla

⁶ Cay, maslanj nga Gazlavay heyey a løvya saya: «Mey hay tabiya masa kah ma cøndata kedè na, ara mey hay fara fara, kwa membørzley da hwad a daa ba sèlak. Bay Gazlavay ta

21:24 21.24 Ps 68.30; Iz 60.3 21:25 21.25-26 Iz 60.11 21:27 21.27 21.8; 22.15; Iz 35.8; 52.1; Ez 44.9; 1Kwr 6.9-10; 2Pi 3.13; **dèrewel nga ndohay ma da høtam heter mendøvey ba:** 3.5 **22:1 22.1-2** 21.6; Ez 47.1-12 * **22:2 22.2** wudez ma vøley heter mendøvey ba: Nøka MC 1.9; 3.22. **22:2 22.2** 21.21; **wudez:** 2.7 **22:3 22.3** 7.15; Jer 3.17 **22:4 22.4** 14.1; Ps 17.15; Mt 5.8 **22:5 22.5** 1.6; 21.23; Dan 7.18, 27

vøltar Mesəfney anġa la nġada ndəhay ma təla mey anġa, nġa wuzdamara mey anġa. Ara anġa ma slərdərwa maslan anġa nġa wuzdatara cek masa ma da key nġada fa mey nekədey a ma ka sləra anġa hay.»

⁷ Yesu a ləvey: «Wam vaw, menjey nekədey fedə, ya vəhwa la. Maaya nġa Gazlavay a sawa la a ray ndəhay ma təbmara mey hay daa dərewel kedə, ara mey masa Gazlavay ma wuzdərwa da ray cek ma da key.»

⁸ Yaw, ara yah, *Jan, ma cənda mey hay a kedə tabiya ta sləmay adaw. Asaya, ara yah ma hətatar cek hay tabiya ma kam kedə ta dey adaw. Masa yah ma cənda mey a ta yah ma hətatar cek hay a cay na, ta', ya regedey fa mey nġa maslan masa ma wuzdatiwa cek hay a kedə cəpa, amba ya həlma.

⁹ Daa nġene, a ləvya: «Ka regedey fa mey adaw anda kedə na, maja me? Yah na, ndaw ma ka sləra nġa Gazlavay anda kah ta məlmakw hay ma təlam mey nġa Gazlavay, leġ ndəhay siya hay ma təbmara mey daa dərewel kedə aa mevel ata. Maaya ka regedey, ka dərəy danġay na, nġada Gazlavay gway.»

¹⁰ Fa dəba ha, maslan nġa Gazlavay aa guzlya saya, a ləvey: «Mey masa Gazlavay ma wuzdakawa, kah ma wuzlala aa dərewel nġene na, ka da bada aa mevel akah ba, ama wuzdatara a ndəhay, maja cek hay masa mey hay a ma wuzdamatərwa nġene na, a kam la fiyaw.

¹¹ Anda kedə, ndəhay ma ka cek ta cəved e ba na, nġa kamara kəne cənġa. Ndəhay ma kam cek maaya ba ma ka hwaray na, nġa kamara kəne cənġa. Yaw, ndəhay masa ma kam sləra maaya na, nġa kamara kəne cənġa. Asaya, ndəhay masa ma vəldamara ray ata nġada Gazlavay ma nġam manjar mebərey na, nġa nġam kəne.»

¹² Cay, Yesu ta', aa guzley, a ləvey: «Wam vaw, maja menjey nekədey fedə, ya vəhwa la. Ya da sawa ta cek da har, amba ya wurkara mawurbay nġa ndaw a, ndaw a tədə fa sləra masa aa ma ka.

¹³ Yah na, ndaw masa nġeeme, asaya yah ndaw madagway-dakw. Yah ndaw ma katərwa cek hay tabiya, asaya, yah ma ndəvdata.»

¹⁴ Maaya nġa Gazlavay a sawa la a ray ndəhay masa ma pərmata zana ata hay. Ata na, ata ta cəved nġa mbəzey aa berney nġa Gazlavay ta daa mey-slam hay nġa mahwal

nga berney a. Asaya, ata ta cøved nga zømey babøza nga wudez ma vøley heter mendøvey ba.

¹⁵ Yaw, ndøhay ma kam cek maaya ba ma ka hwaray, ndøhay ma kam maazla maaya ba hay leŋ ndøhay ma lam vaw saw da palah na, fa da mbøzam aa berney a daa ba sølak. Asaya, ndøhay masa ma kødam ndaw vagay, ndøhay ma ta kuley hay, leŋ ndøhay ma mbøzlam mandaw mandaw na, a da njam daa ambaw, fa da mbøzam daa ba may.

¹⁶ «Yah, Yesu, ya ta slørdørwa maslaŋ aɸaw la nga wuzdatara mey a keɸe ngada ndøhay daa mecømey-ray hay nga ndøhay aɸaw hay. Yah na, ndaw ma yawa daa søkway nga Bay *Davit. Yah, batay ma wedey njuzl a ta slam ngaa pørek.»

¹⁷ Ata *Mesøfney nga Gazlavay ta kwakwa mawiya heyey a løvmar a Yesu: «Vøhwa.»

Akwar masa ma jøkam slømay fa mey hay a keɸe, si ka løvmar may: «Vøhwa.»

Yaw, ndøhay masa yam fa katar, nga samawa nga sam yam. Kwa waawa ma wudey nga sey yam na, nga sey yam ma vøley heter mendøvey ba nga maaya.

Mendøvey nga mey hay a

¹⁸ Yah, *Jan, ya fa køtata ndøhay tabiya ma cødamara mey masa Gazlavay ma wuzdørwa daa ðerewel e keɸe: da ndaw ta pey mey mekele la a ray masa daa ðerewel keɸe na, Gazlavay a da pa ndaw aha nga sørey banay anda mawuzlalakaya daa ðerewel e keɸe heyey.

¹⁹ Yaw, da ndaw ta guhey mey a pal masa Gazlavay ma wuzdørwa daa ðerewel e keɸe la na, Gazlavay fa da vølar cøved nga zømey babøza nga wudez ma vøley heter mendøvey ba heyey daa ba sølak, anda mawuzlalakaya daa ðerewel e keɸe. Asaya, ndaw aha fa da høtey cøved nga mbøzey aa berney nga Gazlavay keɸe daa ba sølak, anda mawuzlalakaya daa ðerewel e keɸe.

²⁰ Yesu, ndaw ma key sede fara fara ta cøved e da ray mey hay a keɸe, aa guzley, a løvey: «Ahaw, ya fa vøhwa wure keɸe.»

Amen. Yesu, Bay Mahura, sawa!

²¹ Anja maaya nga Bay Mahura Yesu nga njeý ta ndøhay tabiya.

22:14 22.14 7.14; Ps 118.19-20; **wudez:** 22.2 22:15 22.15 21.27; Ef 5.5 22:16 22.16 1.1; 5.5; **batay ma wedey njuzl a ta slam ngaa pørek:** 2.28; Mesl 24.17 22:17 22.17 21.2, 6 22:18 22.18 Mew 29.19 22:18 22.18-19 Mew 4.2; 13.1 22:19 22.19 wudez: 2.7; **erewel:** Mab 32.32 22:20 22.20 3.11; 22.6; 1Kwr 16.22 22:21 22.21 Gal 6.18